

Wængonguï nänö
Apänegainö



New Testament in Waorani (EC:auc:Waorani)

Wængonguï nänö Apænegainö

New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022
9bedab5a-39ff-5163-a35b-8056cbb8690

Contents

Mäateo	1
Mäadoco	87
Odoco	139
Wäö	229
Näni Cægainö	294
Odömänoidi	377
1 Coodintoidi	416
2 Coodintoidi	453
Gadataidi	477
Epetoidi	491
Pidipenteidi	505
Codotenteidi	514
1 Tetadönitenteidi	523
2 Tetadönitenteidi	531
1 Tımoteo	535
2 Tımoteo	546
Tito	554
Pidemöö	559
Ebedeoidi	561
Tantiago	592
1 Pegodo	602
2 Pegodo	613
1 Wäö	619
2 Wäö	629
3 Wäö	631
Codaa	633
Nänö Odömongainö	636

Itota Codito ingantedö ante Máateo nänö watapæ ante yewæmongainta

Itota Codito wæmæidi (Odoca 3.23-38)

¹ Nē Ponguingä, ante dodäni nāni nē angaingä iñömö Itota Codito Inongä ingampa. Tömengä iñömö Abadäo wodi pæingä nē ingaingä inte Awënë Dabii wodi pæingä mönö inongä ingacäimpa. Tömengä wæmæidi iūmaï ëmongadänimpa, ante yewæmonte ongompa.

² Abadäo wodi wengä Itæca ëñagacäimpa.

Ayæ wææ Itæca wodi wengä Aacobo ëñagacäimpa.

Ayæ wææ Aacobo wodi wënāni Oodaa nāni caipæ ëñagadänimpa.

³ Ayæ wææ Oodaa wodi Tämata ingante monte Pade tönö Dada inate tapæigacäimpa.

Ayæ wææ Pade wodi wengä Etedöo ëñagacäimpa.

Ayæ wææ Etedöo wodi wengä Adäma ëñagacäimpa.

⁴ Ayæ wææ Adäma wodi wengä Äminadabo ëñagacäimpa.

Ayæ wææ Äminadabo wodi wengä Näatöo ëñagacäimpa.

Ayæ wææ Näatöo wodi wengä Tädämöö ëñagacäimpa.

⁵ Ayæ wææ Tädämöö wodi pæte Adacaba ingante möninque Boodo ingante tapæigacäimpa.

Ayæ wææ Boodo wodi pæte Odoto ingante monte Obedo ingante tapæigacäimpa.

Ayæ wææ Obedo wodi wengä Yæte ëñagacäimpa.

⁶ Ayæ wææ Yæte wodi wengä Dabii ëñate pædinque awënë odeye bagacäimpa.

Ayæ wææ Dabii wodi pæte Odiya wodi nänöogængä iningä ingante möninque Tadömöö ingante tapæigacäimpa.

⁷ Ayæ wææ Tadömöö wodi wengä Doboäo ëñagacäimpa.

Ayæ wææ Doboäo wodi wengä Abiya ëñagacäimpa.

Ayæ wææ Abiya wodi wengä Ata ëñagacäimpa.

⁸ Ayæ wææ Ata wodi wengä Ootapato ëñagacäimpa.

Ayæ wææ Ootapato wodi wengä Oodäo ëñagacäimpa.

Ayæ wææ Oodäo wodi wengä Otiya ëñagacäimpa.

⁹ Ayæ wææ Otiya wodi wengä Ootäo ëñagacäimpa.

Ayæ wææ Ootäo wodi wengä Acadæ ëñagacäimpa.

Ayæ wææ Acadæ wodi wengä Etequiya ëñagacäimpa.

¹⁰ Ayæ wææ Etequiya wodi wengä Mänatee ëñagacäimpa.

Ayæ wææ Mänatee wodi wengä Ämöö ëñagacäimpa.

Ayæ wææ Ämöö wodi wengä Ootiya ëñagacäimpa.

¹¹ Ininque Ootiya wodi quëwengäñedë idægoidi inänite babidöniaidi ponte ö æ gobæ wabæca mäodäni gogadänimpa.

Ayæ wææ Babidönibæ nāni goyedë Ootiya wodi wënāni Eecöniya nāni caipæ ëñagadänimpa.

12 Mänii Babidöniabæ ö ænte godäni ate ayæ wææ Eecöniya wodi wengä Tadatiedo eñagacäimpa.

Ayæ wææ Tadatiedo wodi wengä Dodobabedo eñagacäimpa.

13 Ayæ wææ Dodobabedo wodi wengä Abiodo eñagacäimpa.

Ayæ wææ Abiodo wodi wengä Ediaquimö eñagacäimpa.

Ayæ wææ Ediaquimö wodi wengä Atodo eñagacäimpa.

14 Ayæ wææ Atodo wodi wengä Tadoco eñagacäimpa.

Ayæ wææ Tadoco wodi wengä Aquii eñagacäimpa.

Ayæ wææ Aquii wodi wengä Ediodo eñagacäimpa.

15 Ayæ wææ Ediodo wodi wengä Edeadado eñagacäimpa.

Ayæ wææ Edeadado wodi wengä Mäatäö eñagacäimpa.

Ayæ wææ Mäatäö wodi wengä Aacobo eñagacäimpa.

16 Ayæ wææ Ootee wodi ingante Aacobo tapæigacäimpa.

Ayæ Ootee wodi eñate pæte wææ Itota badä ingungä ingante Mäadiya ingante mongacäimpa.

Mäadiya ingante mongä ate tömengä wæætë Itota ingante mangacäimpa. Tömengä iñömö Awënë bacæcäimpa, ante cædinque Wængongui oginguipæ gao cæcä ate edæ, Codito, ante nänö nê pemongaingä ingacäimpa.

17 Mänömai i incæ Abadäo wodi pæinäni wææ nänömoidi wææ, önonpo tipæmpoga wææ mempoga go mempoga mänimpoga näni yebæñedë ate Abadäo wodi pæingä Dabii eñagacäimpa. Ayæ wææ Awënë Dabii wodi pæinäni wææ nänömoidi wææ, önonpo tipæmpoga wææ mempoga go mempoga mänimpoga näni yebæñedë ate Oodeoidi Inänite wabæca Babidöniabæ ænte gogadänimpa. Ayæ Babidöniabæ ænte godäni ate tömënäni pæinäni wææ nänömoidi wææ, önonpo tipæmpoga wææ mempoga go mempoga mänimpoga näni yebæñedë ate mönö Codito nänö ponguinque eñagacäimpa.

Itota Codito eñacampa

(Odoca 2.1-7)

18 Itota Codito iimai eñagacäimpa. Wäänä Mäadiya wodi nänö baquecäñedë Ootee wodi tömengä ingante do, Monguimo, angä eñëningä inte ayæ mönämäi iñongante Wængongui Tæiyæ Waëmö Önöwoca angä eñëningä do yædëmadä bacä adänitapa. 19 Yædëmadä ingä adinque Ootee cöwë nö cædongä inte, Piinte änäni wæcæ wæ, ante wædinque, Awëmö pango cæcæboimpa, ante pönengantapa.

20 Ante önöwënenque pönëninque möwocodë wiiimöñongä Wængongui tömengä anquedo ingante da pönongä pöninque anquedo iñömö iimai angantapa. “Ootee, Awënë Dabii pæimi inömi inte bitö nänöogængä Mäadiya ingante guinänämai æncæbiimpa. Tömengä iñömö Wængongui Tæiyæ Waëmö Önöwoca angä eñente beyænque ënengä adinque bitö iñömö tömengä ingante ee moncæbiimpa. 21 Tömengä Wëñængä onguinængä ingante mancæcäimpa. Mangä pæcä ate tömengä iñömö, Botö guidëmini mini wæquinque wënæ wënæ cæminipa, ante adinque botö æmo beyænque quëwencæminimpa, ante cæcæcäimpa cæbii. Bitö tömengä ëmowo ante, Nê Ængä inongä ingampa, ante Itota pemoncæbiimpa,” ante anquedo Wængongui nänö nê da pönöningä ponte Ootee ingante angacäimpa.

22 İninque Wængongui beyæ nê apænegaingä iimai ante nänö yewæmongainö bai ante linque batimpa.

23 “Baquecä incæ yædëmadä badinque

Wēñængä onguiñængä ingante mancæcäimpa.

Mangä eñacä adinque tōmengä emōwo, Ēmänoedo, ante godō pemoncadänimpa.”

Ante nāni yewæmongainō bai cædinque tōmengä emōwo, “Wængongui mōnō weca quēwengampa,” ante, Ēmänoedo, ante pemonte inongäimpa.

²⁴Ootee māniī wīimonte ñāni omæmongä ate Wængongui nānō da pōnōningä anquedo nānō āmai eñente cædinque oncōnē ænte gocä incæte guēa mōnāmai ingadaimpa. ²⁵Edæ bamoncadengä eñacä ate, Itota, ante pemonte ate tōmēna māniñedē ate guēa mongadaimpa.

2

Nē eñēnāni Itota weca eñacæ pōnānīpa

¹Itota Bedēē nāni quēwēñōmō eñacä ate māniñedē edæ Edode Oodeabæ awēnē odeye nānō iñedē edæ nē nō eñēnāni gobæ nænque tamōnō quēwēnāni inte Eedotadēē pongadänimpa. ²Ponte ānīnque,

—Oodeo Awēnē Odeye iñōmō ñōwocä eñadingä iñōmō æyōmōnō owocää, ante eñencæte ante wæmōnīpa. Edæ nænque tamōnō quēwēñōmōni Awēnē nēmō ta ñongæ adinque mōnitō tōmengä weca ædæ wææñinque edæ, Bitō Wængongui imidō anguēnē, ante watapæ apæncæcæ pōmōni imōnīpa, ānānitapa.

³Ayæ, Wacä Awēnē Odeye eñacampa, ante tededāni eñente wædinque māniōmæ tōmāmæ awēnē odeye Edode wæætē piinte bayongä Eedotadēē quēwēnāni tōmānāni tōmengä tōnō godongāmæ guiñente wædānitapa.

⁴Īnīnque, Wængongui quī, ante nē godōnāni ñænænāni tōnō Wængongui nānō wææ angainō ante nē odōmōnāni tōnō tōmānāni inānite Edode āñecä godongāmæ pōnānitapa. Pōnāni ate tōmengä, Codito nāni angaingä iñōmō æyōmōnō eñāquingää, ante æbānō yewæmōnte oñō aminīi. ⁵Åñongante,

—Oodeabæ iñōmō Bedēē nāni quēwēñōmō māniñōmō eñacæcäimpa, ante Wængongui beyæ nē apæncæcä incæ iūmai ante yewæmongacäimpa, ante apænedānitapa.

⁶“Oodabæ awēnē gobedōnadodoidi tæiyæñāni iñōnāni

mīnitō adobæca Oodabæ quēwēñinque Bedēē iñōmō mīni quēwencabo iñōmō mēa pōni imīni incæte edæ wīi onōmīnique incæmīnīpa.

Īñæmpa Wēñængä adocanque eñate pædinque nē Awēnē bate taodinque nē aacä bai inongä inte botō guidēñāni idægoidi inānite aacæcäimpa.”

Ante yewæmongä amōnīpa.

⁷Ante apænedāni eñente wædinque Edode wæætē nē nō eñēnāni inānite awēmō āñete pōnāni ate, Nēmō æyedēnō mā pōni tamō aminītawo. Åñongante tōmēnāni, Māniñedē tamō atamōnīpa, ante apænedāni. ⁸Eñēñinque Edode iñōmō,

—Mīnitō wæætē Bedēē iñōmō māo nē eñadingä ingante diqui diqui mīnte aedāni. Tōmengä ingante adinque wæætē adodō pōninque apænemīni eñēmoedāni. Edæ mīnitō gote æbānō wēñæ ingante apænemīni bai botō adobai edæ gote ædæ wææñinque edæ, Wængongui Awēnē imidō anguēnē, ante watapæ apæncæcæte ante āmopa, ante Edode ononque ante pōnēñinque apænegacäimpa.

⁹Angä eñēñinque nēmō nē adīnāni iñōmō Bedēē taadō gote æmō ayōnāni edæ ado nēmō tōmēnāni nænque tamōnō quēwēñinque nāni adīmō incæ wo go adinque edæ tē wocæ goyōnānite nēmō Wēñæ owoyōmō oncōmanca tæcædæca inō næ gongæ adānitapa. ¹⁰Adinque tōmēnāni edæ, Mōnō acæ

pönongä iñömö ongongampa, ante pönëninque watapæ togadänimpa. ¹¹ Mänü nani adincönë go guite ayönäni Wëñængä iñömö wäänä Määdiya tönö ongongä adinque tömënanä Wëñængä weca ædæ wææninque, Bitö Wængongui Awënë imidö anguënë, ante watapæ apænedänitapa. Ayæ tömënanä nani ante pönincoo wi æmpodinque oodo tönö ogui waa qui tönö ti nä öni pæqui tönö, Bitö qui iñimpa, ante pædæ godönäni ængacäimpa. ¹² Idæwaa adinque tömënanä möwocodë wïmõñönänite wacä ponte apænecantapa. Minitö awënë Edode weca ocæ ëmænte godämaï iedäni, angä ëñëninque tömënanä wæætë yaatænque godinque tömënanä ömæ wadæ gogadänimpa.

Ooteidi Equitobæ wodii winönänipa

¹³ Godäni iñinque edæ Ootee wïmõñongä Wængongui anquedo ingante da pönongä ponte apænedinque, “Edode do Wëñængä ingante wænoncæte ante diqui mincæcäimpa cæbii. Ængæ gantite Wëñængä nana badancaya inate ö ænte Equitobæ wodii goe. Ayæ gote quëwëñömini botö ämo ate pödäni,” angä.

¹⁴ Eñëninque Ootee tömengä nänö wïmõönæ ayaönæñëña incæ ængæ gantidique Wëñængä nana badancaya inate ö æninque edæ Equitobæ gocantapa. ¹⁵ Godinque Ootee nani wencabo iñömö Edode nänö wænguinganca quëwencæ gogadänimpa. Go quëwënanä iñinque mönö Awënë Wængongui iïmaï ante nänö apænegainö ante iñque batimpa. “Botö Wëñængä Equitobæ quëwëñongante äñebo pongantapa,” ante Wængongui beyæ në apænecä nänö yewæmongainö bai edæ do iñque batimpa.

Wëñænäni inänite Edode angä wænönäni wænänipa

¹⁶ Edode guiquënë, Nëmö në nö ëñënanä botö äñinö ante ëñënamäi inte dæ godänipa, ante adinque edæ ængui bacantapa. Ængui badinque tömengä, Wëñænäni inänite mäo wænödäni, angantapa. Äninque tömengä, Mëa wadepo iñonte nëmö ta tamönipa, ante në ëñënanä nani änimpoga ante pönëninque, Mëa wadepo ëñädinäni tönö ayæ ëñädinäni tönö Bedëë quëwënanä incæ Bedëë eyequei quëwënanä incæ onguiñænänique inänite mäo wænödäni, angantapa. Iñinque në wænönäni wæætë awënë nänö adinänique inänite capo ado tedæ wænönäni wængadänimpa. ¹⁷ Wænäni wädäni iñinque Wængongui beyæ në apænegaingä Eedëmiya wodi iïmaï ante nänö angainö bai edæ iñque batimpa.

¹⁸ “Nämaa nani quëwëñömö në Ca ca wæwënë nänä Ca ca wæpämö ëñënanitapa.

Wäänä në Yæ yæ änonä inte,

Daquedä iñömö, Botö wëñænäni, ante wädä ëñënanitapa.

Dæ änanä pönente wædinque wäänä ædö cæte piyænë cæquinäa,”

ante Eedëmiya wodi yewæmongacäimpa.

¹⁹ Ayæ ate awënë Edode wængä iñinque Ootee iñömö Equitobæ ayæ quëwëninque wïmõñongä Wængongui anquedo ponte a ongöninque tömengä ingante apænecantapa. ²⁰ “Ootee ëñëmi. Wëñængä ingante wænoncæ äñönäni incæ dobæ wænänipa cæbii. Ængæ gantite Wëñængä nana badancaya inate Idægobæ adodö ænte gocæbiimpa,” angä.

²¹ Eñëninque Ootee iñömö edæ ængæ gantidique nana badancaya inate Idægobæ adodö ænte gocantapa. ²² Mänïñedë wæmpo Edode wængä iñinque, Wæætë tömengä wængä Adoquedao Oodeabæ awënë odeye bacantapa, ante tededäni ëñente wædinque Ootee iñömö, Botö Oodeabæ ædö cæte wæætë goquimoo, ante guïñente wæcantapa. Wæætë tömengä möwocodë wïmõñongä

wacá angá eñēninque Oodeabæ wodo tebæ godinque Gadideabæ gocan-tapa. ²³ Godinque Ootee nāni wencabo Nāatadeta ponte quēwēnānitapa. Īninque, Nāatadēnō ingampa, ante pemoncædānimpa, ante Wængonguī beyæ nē apænegaingā nānō angainō bai cædinque wadāni ñōwo mōnō Codito ingante, Nāatadēnō, ante pemonte bai apænegadānimpa.

3

Wāō önömæca ponte apæneçä eñēnānīpa

(Māadoco 1.1-8; Odoca 3.1-9, 15-17; Wāō 1.19-28)

¹ Māniñedē Wāō mōnō nē æpænē guidōnongā inte Oodeabæ önömæca ponte apænecä eñengadānimpa. ² Ponte apænedinque tōmengä, “Öönædē Awēnē incæ inguipoga tōmāmæ Awēnē Odeye bacæcäimpa cæminii. Minitō wēnæ wēnæ cædinō ante, Ancaa wæwente awædō, ante ñimpo cædāni,” ante Wāō apænecä eñēnānitapa.

³ Mānōmāinō ante nē apænecä ingantedō ante Wængonguī beyæ nē apænegaingā Itaiya wodi ĩmaī ante do yewæmongacäimpa.

“Önömæca ĩñōmō adocanque ogæ tedete aa pecæcäimpa.

‘Awēnē nānō ponguīnō ante mīnitō tee moncate bai cædāni.

Taadō tōinō pīnonte bai cædinque mīnitō wēnæ wēnæ mīni cædinō ante edæ wido cædāni,’ ante aa pecä eñengæimpa.”

⁴ Ante Itaiya wodi nānō nē angaingā inte Wāō ñōwo pongantapa. Tōmengä weocoo ante cāmeyo ocaguincoo nonte badonte wēñate mongæninque pacadeyænta ante æmontai badonte encadeyænongäimpa. Tōmengä cænguī ante ñāwäique cæninque tōmengä bequī ante guīñēmænque ade bete quēwēnongäimpa. ⁵ Quēwēñongä, Eedotadēē quēwēnāni tōnō Oodeabæ tōmāo quēwēnāni tōnō Oododānonga biyōnæ tōmāo quēwēnāni tōnō tōmengä weca tate bee tēninque ānānitapa. ⁶ Bitō āmaī nāwangä wēnæ wēnæ cæte quēwēmōni inte wæmōnīpa, ante wædāni eñēninque Wāō Oododānō æpænē guidōngä guidānitapa.

⁷ Ayæ Paditeoidi tōnō Tadoteoidi guiquēnē Wāō nānō guidōñōmō pōnāni adinque tōmengä ayæ wæætē tōmēnāni ĩnānite angantapa. “Tæntæ pæimīni bai ĩnōmīni inte mīnitō ĩñōmō eñēnāmaī cæte quēwēmīnīpa. Oo pōni wænompadāni, ante æcānō wææ angä eñēninque wodii winonte pōmīnii.

⁸ Īñæmpa Wængonguī Awēnē gāmænō mīnitō dicæ ocæ emænte poncæ cæminiyaa. Nō cæte pōmīni ĩninque mīnitō nē ocæ emænte pōnāni waa cædō bai adobai waa cædāni. ⁹ Ayæ nāmā wææ āninque, ‘Mōnitō adomōnique docä Abadāō wodi pæimōni inte mōni quēwenguinque ĩmōnīpa,’ ante mīni tedewēnō ante pōnēnāmaī inguēnē quēwēmīnii. Īñæmpa Wængonguī, Botō pæināni bacædānīpa, angä bai dicacoo incæ dobæ tōmengä pæināni bai bacædōnīpa. ¹⁰ Edæ awæ yecæte ante awæncā nāni mæ yequinca eyewa pōni næænāni bai Wængonguī nānō panguinca næænte bai do edæ a on-gongampa. Tōmengä wainca ante a ongōñongä òmæcawæ bai wīi pōnente cædāni adinque awæncaca wægo yete godō gongapamō iya tante bai cæcæcäimpa, ante āmo eñēmaimīnīpa.”

¹¹ Ayæ, “Mīnitō wēnæ wēnæ mīni cædinō ante wido cæcæmīnīpa, ante cædinque botō mīnitō ĩmīnite æpænē guidōmo guimīnīpa. Incæte botō mānōmaī cæbo ate wacä ayæ poncæcäimpa. Tōmengä ĩñōmō tæi emongä ewocadongä ĩñongante botō wæætē wædāmo ĩnōmo inte tōmengä awæncata incæ ædō cæte godō ænte nææmāimoo. Tōmengä da pōnongä pōninque Wængonguī Tæiyæ Wæmō Önōwoca incæ pō guidīnque mīnitō mīmō

mēnongacæcäimpa. Ayæ mīnitō wēnæ wēnæ cædinō ante gonga tante bai tōmengä cæcæcäimpa. ¹² Waocä, Todigo tōmēmō wati wati tæñōnīnque botō tæñōnīñōmō òñōmancaque baquinque botō apænte ænīnque waiña tōmāmō oncōnē da wencæboimpa, ante timpodæ næænte wo ææntodō wo ææntodō cædinque ontapocoo wææincoo wadæ ñēmænte wo ewengampa. Waocä mänōmai wo ewencæte ante timpodæ næængä bai mönō nē Ponguingä ññōmō adobai oo pōni apænte ancæcäimpa. Todigo waiñacooque oncōnē da wente nē mangä bai tōmengä adobai nē waēmō ñāni ñānite apænte ængä ate tōmēñāni tōmengä nempo guicædänimpa. Wæætē wadæ ñēmænte wo ewente bai cædinque tōmengä nē ontapocoo wææincoo bai ñāni ñānite cōwē bæcōyōmō iya tangä gonte wæcædänimpa,” ante Wäo apænegacäimpa.

Itota æpænē guicampa

(Māadoco 1.9-11; Odoca 3.21-22)

¹³ Wäo ayæ apæneyongä Itota ññōmō Gadideabæ quēwēnīnque, Wäo botō ñmote æpænē guidongä guicæboimpa, ante cædinque Oododänonga pongantapa. ¹⁴ Ponte, Guidōmi guibo, añongante Wäo wæætē wææ äninque,

—Botō waēmō ñmopa diyæ bitō ñmote guidōmo guiquīmii. Bitō wæætē botō ñmote guidōmi guibo bai waa incædönimpa.

¹⁵ Ante wæyongante Itota wæætē,

—Cōwē ee cæbi, ämopa. Wængonguī nänō äñō ante tōmänō eñente nō cæmō inguēñēmō ñmopä.

Ante apænecä eñēnīnque Wäo Ao ante ee guidongä guigacäimpa. ¹⁶ Guiite æpæ do tao gongænte æmō ayongä ññontobæ öönæ incæ wēä godōmonte bayō Wængonguī Öñōwoca incæ equemō wææ bai tōmengäa wææ pō guicä acantapa. ¹⁷ Wææ guicä ayongä edæ öönædē ññō apænedīnque, “Māningä ññōmō botō Wēñængä ñnongä inte botō nē waadecä ingampa. Tōmengä ingante adīnque botō watapæ tobopa,” ante öönædē ññō apæñecä eñengacäimpa.

4

Itota incæ wēnæ wēnæ cæcæcäimpa, ante wēnæ cæcampa

(Māadoco 1.12-13; Odoca 4.1-13)

¹ Ayæ männēdē edæ, Itota ññōmō wēnæ angä eñente æbänō cæqingäa, ante Wængonguī Öñōwoca incæ Itota ingante öñōmæca mæicä æigacäimpa.

² Æi quēwēnīnque tōmengä wantæpiyæ coadenta eönæ mänimpoönæ itædē woyowotæ cænāmai quēwēnīnque gue ænente wægacäimpa. ³ Gue ænente wæyongä wēnæ awēñē, Wēnæ wēnæ cæe, ante nē änewengä ñnongä inte Itota weca pōnīnque,

—Bitō Wængonguī Wēmi ñmitawo. Nāwangä ñ ñīnque dica incæ pāo ämi ba cæmäimipa.

⁴ Äñongante Itota ññōmō,

—“Cæguinque cænte ædō cæte quēwengūi. Wængonguī nänō apænedō tōmāne eñente cædinque waocä cænguī cænte bai quēwencæcäimpa.” Mänōmainō ante Wængonguī beyæ yewæmonte ongō apa änewēē, äninque Baa angantapa.

⁵ Wēnæ awēñē ayæ Itota ingante Eedotadēē tæiyæ waēmō nāni quēwēññōmō ænte mäocä gocantapa. Ayæ Wængonguī oncō ñænænconga wænōmēñæca ænte mæi gōnongä næ gongængantapa. ⁶ Næ gongæñongante wēnæ awēñē wæætē,

—Bitō Wængonguī Wēmi ĩmitawo. Nāwangā ĩ ĩnque bitō to wæibi ate dodāni ĩmāinō ante nāni yewæmongainō bai ĩnque ba abaimpa.

“Bitō beyæ ante cædinque Wængonguī tōmengā anquedoidi ĩnānite angā pōninque,

tōmēnāni bitō ĩmite wææ aate ĩnæ æmpodāni ate

bitō dicaa tee tēwadāmai incæbiimpa,”

ante yewæmonte ongompa cæbii.

⁷ Āñongante Itota,

—Īnæmpa godōmenque ante yewæmongatimpa. “Bitō Awēnē bitō Wængonguī ĩñongante bitō wæætē edæ, ‘Ēñēnāmai cæbo incæte mōnō Awēnē Wængonguī æbānō cæqingāā,’ ante acæte ante cædāmai incæbiimpa,” ante adobaī wææ yewæmonte ongō apa ānewēē, ante Itota angantapa.

⁸ Ayæ wæætē wēnæ awēnē Itota ingante æibæ pōni onquiyaboga mæicā æicantapa. Æi ongōlongā wēnæ awēnē ĩñōmō awēnē odeye omæcoo inguipoga tōmāo ongōñōmæcoo adoyōmō a ongonte bai ado tedæ odōmōninque awēnē odeyeidi waa pōni nāni ěmōnō adobaī odōmongā acantapa. ⁹ Itota ingante apænedinque wēnæ awēnē,

—Bitō botō weca ædæ wææninque, Tatānabi bitō Wængonguī Awēnē bai ĩnōmi ĩmpa, ante watapæ apænebi ěñēmoe. Mānōmainō ante apænebi ěñēninque botō wæætē, Māniōmæ tōmāo ongōñōmæ pōnōmo æninque bitō tōmāmæ Awēnē babaĩmpa, ante wēnæ incæ ānewengantapa.

¹⁰ Ānewēñongante Itota wæætē,

—“Bitō Awēnē Wængonguī weca ædæ wææninque tōmengā ingante, Bitō Wængonguī ĩmidō anguēnē, ante watapæ apænecæbiimpa. Ayæ tōmengā adocanque ingante nē cæbi incæbiimpa,” ante Wængonguī beyæ yewæmongatimpa cæbii. Botō weca ongōnāmai gobāwe, angantapa. ¹¹ Angā go ate Wængonguī tōmengā anquedoidi pōninque Itota beyæ pōnō waa cægadānimpa.

Gadideabæ ponte Itota mā apænecampa

(Māadoco 1.14-15; Odoco 4.14-15)

¹² Ayæ quēwēñongā, Wāo ingante dobæ tee mōnedānipa, ante tededāni ěñēte wædinque, Itota wæætē Gadideabæ wadæ gogacāimpa. ¹³ Wadæ godinque tōmengā Nāatadeta ponte wodo pænta godinque godōmenque go gāwapæ yæwedeca Tabodōdidi tōnō Nempatadiidi nāni owogaimæ ĩñōmō pōninque edæ Capēnaōmō nāni quēwēñōmō ponte quēwengantapa. ¹⁴ Itota māniñōmō ponte quēwengā ĩnque Itaiya wodi Wængonguī beyæ nē apænecā nānō angainō bai māniñedē ĩnque batimpa.

¹⁵ “Tabodōmæ tōnō Nempatadiibæ ingaiñōmō,

Gāwapæno gāmæno godō,

Oododānō æmæmāa ĩñōmō,

Gadideabæ ĩñōmō wīi oodeoidi wadāni nāni quēwēñōmō impa.

¹⁶ Nē ěñēnāmai ĩnāni wēmō ĩñōmō contayōnāni,

tōmēnāni weca ñāō guinæ tamō bai adānitapa.

Tōmēnāni nāni wænguimāmo oo ĩñonte wēmō ĩñōmō contayōnāni,

mōnō Codito ñāō ěmongā inte do pongā adānitapa.”

Ante Itaiya wodi nānō yewæmongainō bai ante cædinque Itota māniñōmō ponte apænecā ěñēnānitapa.

¹⁷ Itota māniñedē ĩmai ante mā apænecā ěñēnānitapa. “Öönædē Awēnē incæ inguipoga tōmāmæ Awēnē Odeye oo bacæcāimpa cæmīni. Mīnitō wēnæ

wënæ cædinō ante, Ancaa wæwente awædō, ante pōnente ñimpo cædāni," ante cōwē apænecā ēñengadānimpa.

*Nē gæyæ dadōwēnāni inānite Itota aa pecampa
(Māadoco 1.16-20; Odoca 5.1-11)*

¹⁸ Ayæ mǎnīl pōninque Itota gāwapæ Gadideapæ yæwedeca gote cægonte ayongā Timōnō Pegodo nāni ānongā tōnō Æntade nāna caya inate acantapa. Nē gæyæ dadōwēna inōna inte tōmēna ñōwo dicamōñæ æpænē wo guitodonte dadōwēñōna Itota gote acantapa. ¹⁹ Tōmēna inate Itota,

—Īñāna, botō miñæ edæ tee empo pōeda, āmopa. Nē dadonte ænte pōmīna inte botō weca pōñōmīnate botō pōnō cæbo ate mīnatō wæætē nē apænemīna badinque waodāni inānite nē ænte pōmīna bacæmīnaimpa, angantapa.

²⁰ Angā ēñēninque tōmēna dicamōñæ do emō cæte godinque Itota miñæ edæ tee empo wadæ godatapa.

²¹ Mǎniñōmō ongonte wadæ godinque Itota wada inate Tebedeo wēna Tantiago tōnō Wāō nāna caya inate acantapa. Tōmēna mæmpo tōnō wipodē ongonte dicamōñæ tadōmoncōna adinque Itota tōmēna inate, Botō miñæ pōeda, angā. ²² Ēñēninque tōmēna Ao āninque Tebedeo wēna Tantiago tōnō Wāō wæmpocā ingante wæætē, Mæmpo ēñēmi, ānatapa. Nē cædāni tōnō wipodē owote cæyōmīnite mōnatō bitō ĩmite emō cæte godinque Itota miñæ gomōnapa, āninque adodaque wadæ gogadaimpa.

*Tæiyæñāni inānite Itota odōmonte apænecā ēñēñāni
(Odoca 6.17-19)*

²³ Ayæ Gadideabæ tōmāmæ godinque Itota ĩñōmō Wængonguī apænecā nāni ēñente yewæmongainta ate odōmōincōnē go guite odōmonte apænecāimpa. Ōñædē Awēnē incæ inguipoga tōmāmæ Awēnē oo badinque waa cæte aacæcāimpa, ante apænecā ēñengadānimpa. Ayæ waodāni wēnæ wēnæ inte nāni wæwēnō ante ayæ quiēmē beyæ wæncæ cæte wædāni incæ Itota tōmēnāni nāni wædō ante pōnō cæcā ate tōmānāni waa badānitapa.

²⁴ Adinque, Itota mǎnōmāi cæcampa, ante Tidiabæ tōmāmæ gode ānāni ēñēninque waodāni pōninque nē wēnæ wēnæ inte wæwēnāni inānite tōmengā weca ænte pōñānitapa. Ayæ nantate wæwēnāni tōnō wēnæ inte quēwēnāni inānite ænte pōninque dowænte ināni tōnō cōmāināni inānite tōmengā weca ænte pōnāni adinque tōmengā godō cæcā ate nē wēnæ wēnæ ĩnāni inte tōmānāni waa bagadānimpa.

²⁵ Ayæ Gadideabæ quēwēnāni tōnō Decapodibæ quēwēnāni pōñōnāni wadāni Eedotadē quēwēnāni tōnō Oodeabæ quēwēnāni ayæ Oododānō æmæmāa quēwēnāni tæiyæñāni pōninque tōmengā miñæ tee empote gogadānimpa.

5

Itota ānanquidi æite apænecā ēñēñāni

¹ Tæiyæñāni pōnāni adinque Itota ĩñōmō ānanquidi æi tæ contayongā tōmengā miñæ nē godāni pōnāni. ² Ate tōmengā ĩñæ ænete nanguī tedete ĩmāi ante odōmonte apænecā ēñengadānimpa.

*Waocā ĩmāi cæte watapæ tote quēwēncæcāimpa, ante
(Odoca 6.20-23)*

³ “Waodāni, Botō waēmō ēwocabopa diyæ ōñædē Awēnē weca go guiquimoo, ante nē wædāni ĩñōmō tōmēnāni nāni watapæ toquinque edæ ōñædē Awēnē Odeye nempo tōmēnāni quēwēnguīnō do ēadāni,” angantapa.

4 “Nē wæwente quēwēnāni īñōmō tōmēnāni nāni watapæ toquinque wædānīpa. Edæ Wængonguī tōmēnāni īnānite waadete godō cæcā ate tōmēnāni wampo pōnencædānīpa.”

5 “Nē gānē pōnente ædæmō cæte quēwēnāni īñōmō tōmēnāni nāni watapæ toquinque edæ inguipoga tōmāmæ ænīnque awēnēidi bai bacædānīpa.”

6 “Wængonguī nō pōni nānō entawēnō bai adobai entawencæboīpa, ante æcānō cænguī cæīnente bai wæda, æcānō tepæ gæwænte bai wæda tōmēnāni īñōmō nāni watapæ toquinque wædānīpa. Edæ tōmēnāni tōmo cænte bai Wængonguī nānō nō entawēnō ænte ædæmō entawente tocædānīpa,” ante Itota apænecantapa.

7 “Wadāni quēwencædānīpa, ante nē godō waadete waa cædāni īñōmō tōmēnāni nāni watapæ toquinque cædānīpa. Edæ mǎnōmai nē cædāni īnānite wadāni wæætē, Quēwencæmīnīpa, ante nǎēmæ apænedīnque godō waadete waa cæcædānīpa.”

8 “Mīmō ñāō bai nē entawēnāni īñōmō tōmēnāni nāni watapæ toquinque edæ Wængonguī ingante do acædānīpa,” ante apænecantapa.

9 “Guēadō guēa pīnāmai īedāni, ante nē wææ wææ ānāni īñōmō tōmēnāni nāni watapæ toquinque edæ wææ ānānīpa. Tōmēnāni īnānite wadāni edæ, Mīnitō Wængonguī wēñæmīni īmīnīpa, ante do apænedāni ēñente tocædānīpa.”

10 “Nō cædāni beyænque wadāni pīinte pānāni nē wæwēnāni īñōmō edæ tōmēnāni nāni watapæ toquinque wæwēnānīpa. Tōmēnāni ōōnædē Awēnē Odeye nempo nāni quēwenguīnō edæ do ēadānīpa.”

11 “Wadāni botō beyæ pīīnīnque mīnitō īmīnite babæ ante ānānitawo. Mīnitō īmīnite edæ togænte pānānitawo. Īnīnque edæ mīni watapæ toquinque impa. Ayæ, Nē wīwa cæmīni īmīnīpa, ante wadāni pīinte ānewēnāni wæmīni īnīnque edæ mīni watapæ toquinque impa. 12 Edæ, Ōōnædē mōnō ænguīnō ante nanguī ongompa, ante pōnēnīnque mīnitō ñōwo wadāni nāni pīinte cæyedē incæ watapæ toedāni. Edæ mīnitō īmīnite pīinte pānāni bai mīnitō ayæ dæ āñedē Wængonguī beyæ nē apænegānāni īnānite adobai pīinte pangadānīpa, ante toquēnē wæwēmīni,” ante Itota odōmonte apænegacāīpa.

*Cati bai īmīnīpa. Ñāō bai īmīnīpa, ante
(Māadoco 9.50; Odoca 14.34-35)*

13 Godōmenque apænedīnque Itota, “Mīnitō īñōmō inguipoga quēwēnāni beyæ cati quīmonte cæī bai inte ongōmīnīpa. Īnīnque mīnitō cati bai yæpæ ēmonte bai īnōmīni inte wæætē edæ nongæmonte bai badāmai īedāni. Cati īñōmō yæpæ ēmōnāmai nongæmonte ba adīnque edæ æbānō cæte wæætē yæpæ waa ēmonguī. Waa impa cænguīnānī anguēnē. Īñæmpa wido cæte nāni pīnā gāwate cængonīnque babāīpa,” ante odōmonte apænecantapa.

14 Ayæ, “Ñāō bai ēmōmīni inte mīnitō īñōmō edæ inguipoga quēwēnāni beyæ tīca ēnente bai cædīnque, Edonque acædānīpa, ante cæmīni īmīnīpa. Ānānquidi tæiyænāni mænonte quēwēnāni īnīnque edæ ædō cæte wē womonte inguī. Edæ edonque abāīpa. 15 Waocā ædō cæte tī wodōnote godō cængænē boo cæcaquīngāā anguēnē. Edæ, Mōnō quēwencabo edonque acæīpa, ante cædīnque waocā tī wodōnodīnque wænōmēnæcapaa cō cæcā ate edonque bæco aquīnāni. 16 Mīnitō guīquēnē, Wadāni mōnō waa cædīnō adīnque mōnō Mæmpo ōōnædē nē quēwengā ñāō bai tōmēngā nānō ēmōnō ante waa ate apænecædānīpa, ante cædīnque cōwē ñāō bai pōnēnīnque waa cæte quēwēdāni,” ante Itota odōmonte apænecantapa.

Wængongui nānō wææ angainō ante

¹⁷ Ayæ iīmaī ante godōmenque odōmonte apænecantapa. “Wængongui, iīmaī cæedāni, ante Mōitee wodi ingante angā ēñēnīnque tōmengā nānō wææ yewæmongainō ante ayæ Wængongui beyæ nē apænedāni nāni yewæmongainō ante munitō, Māninō ante Itota wido cæcæte ante pongampa, ante ædō cæte pōnēmīnii. Iñæmpa wīi wido cæcæte ante pōnimo inte botō tōmēnāni nāni angainō bai iīnque cæbo bacæimpa, ante pōmo iūpa. ¹⁸ Edæ nāwangā āmopa. Inguipoga tōnō ōōnæ iīnque baganca Wængongui, iīmaī cæedāni, ante nānō wææ angainō iīnonte adodeque pōni wē wom-onte badāmaī ingæimpa. Edæ guiyā tænoncaī incæ picæ yewæmōni incæ adodeque cōwē wadæ cædāmaī iīnonte tōmengā nānō angainō bai tōmānō adodō iīnque cæte bacæimpa. ¹⁹ Iīnque Wængongui nānō wææ angainō ante æcānō adodeque pōni ante ēñēnāmaī cæda iīnōmō tōmengā iīnōmō edæ ōōnædē Awēnē Odeye nempo quēwengā incæte ōnonganque pōni inguingānō anguēnē. Ayæ adobaī Wængongui nānō wææ angainō adodeque pōni ante odōmōnīnque, Mānīne ante ēñēnāmaī cæedāni, ante æcānō odōmonte apæneda tōmengā iīnōmō ōōnædē Awēnē Odeye nempo quēwengā incæte ōnonganque inguingānō anguēnē. Wæætē mānīnō Wængongui nānō wææ angainō ante nē ēñēte cædinque æcānō adodō ante odōmonte apæneda guiquēnē tōmengā wæætē ōōnædē Awēnē Odeye nempo quēwēnīnque ñænængā pōni inguingānō anguēnē. ²⁰ Incæte munitō imīnite iīmaī āmopa. Iīmaī cæedāni, ante nāni wææ yewæmongainō ate nē odōmōnāni nāni cægancaque nō cæmīni incæte Paditeoidi nāni cægancaque nō cæmīni incæte munitō wīi godōmenque nō cæmīni iīnque munitō edæ ōōnædē Awēnē Odeye nempo ædō cæte guiite quēwēmaīmīni,” ante Itota odōmonte apænecantapa.

*Piinte nāni ānō ante Itota odōmonte apænecampa
(Odoca 12.57-59)*

²¹ Mānōmaīnō ante apænedīnque Itota godōmenque odōmonte apænecantapa. “Mōitee wodi iīnōmō, ‘Wacā ingante godō wænōnāmaī iē. Nē wænongā nānō apænte pante wæquinque impa,’ ante dodāni inānite tōmengā nānō wææ angainō ante munitō iīnōmō do ēñēnīnque Ao āmīnitawo.

²² Botō iīnōmō edæ godōmenque ante nō āmopa. Nāni caipæ iīnōnāni æcānō tōmengā tōniñacā ingante pīna iīnōmō tōmengā nānō apænte pante wæquinque cæcampa. Ayæ tōmengā tōniñacā ingante æcānō, Ēñēnāmaī iūpā, āna edæ tōmengā ingante nē Apænte nāni Āncabo weca nānō panguinque ænte gōnoncædānīmpa. Edæ wacā ingante æcānō, Bitō mīmō ōmædēmi inte wīi ēñēncædō, ante nē āna iīnōmō tōmengā tadōmengadænguipo gonga bæcoyōmō nānō wido cæquinque angampa tōō,” ante Itota apænecāimpa.

²³ Ayæ, “Mānōmaī beyæ bitō, Wængongui qui, ante nāni iya tāimoga godoncæte ante tæcæ cædinque, Æ, botō tōniñacā ingante edæ wēnæ wēnæ cæbo pīngampa, ante pōnēmi iīnque, ²⁴ bitō godonguīncoo nāni iya tāimoga gāānē ñōnōnīnque bitō tōniñacā weca tāno gote nō apæneyōmi mīnatō guēa piyænē cæmīna ate bitō iīnōmō adodō ponte godōe,” angantapa.

²⁵ Ayæ, “Bitō imite nē piinte cæcā iīnōmō nē apænte anguināni weca gōnoncæte ante ænte idōmæ goyongā bitō tōmengā ingante waa apænebi ēñēnīnque tōmengā wæætē piyænē cædinque ee abaingampa. Edæ taadō godinque guēa waa apænedīnque piyænē cædāmaī imīna iīnque tōmengā iīnōmō nē awēnē apænte anguingā weca ænte māocā gobāimpā. Ayæ awēnē nē apænte angā ingante pædæ godongā ænīnque tōmengā bitō imite wæætē

wææ wānongā ingante angā ēñēninque tōmengā wæætē bitō imite bæi on-
gonte do tee mōnebaingampa. ²⁶ Tee mōnecā īninque edæ bitō godonte æinta
tōmanta pōnī pædæ godonte tabaīmipa, ante āmo ēñēmaīmipa,” ante Itota
apænegacāimpa.

Nāni godō towēmāmo ante Itota odōmonte apænegacampa

²⁷ Ayæ apænedinque, “Mōitee wodi, ‘Bitō nānōogængā īnāmaī īñongante bitō
godō mōnāmaī incæbiimpa,’ ante nānō wææ angainō ante ēñēninque mīnitō Ao
āmīnitawo. ²⁸ Botō godōmenque apænedinque nō āmopa. Onquiyængā ingante
wiwa toīnente adingā īñōmō tōmengā nānōogængā īnāmaī īñongante do godō
monte baī mīmō dobæ wentamō entawengampa.”

²⁹ Ayæ, “Bitō tōmēmō īnō incæ adinque wēnæ wēnæ toīnente babi īninque
tōmēmi adimō incæ o togæmonte baī cædinque wēnæ wēnæ bitō cædinō ante
wido cæbi waa īmāimpa. Wæætē bitō wēnæ wēnæ adimō wido cædāmaī
īninque bitō baō tōmāo tadōmengadænguipo wido cæte baquinō anguēnē.
³⁰ Adobaī bitō onpōca tōmēmæ īnō incæ wēnæ wēnæ cædimi inte tōmēmi
cædimpo incæ aa wi æmpote baī cædinque bitō wēnæ wēnæ cædinō ante wido
cæbi waa īmāimpa. Edæ a wi æmpote wido cædāmaī īmi īninque bitō baō tōmāo
tadōmengadænguipo wido cæte baquinō anguēnē,” ante Itota apænegacāimpa.

Nāni pāmænte wædō ante Itota odōmonte apænegacampa

(Máateo 19.9; Māadoco 10.11-12; Odoca 16.18)

³¹ Godōmenque odōmonte apænedinque Itota, “Ayæ, ‘Onquiyængā ingante
æcānō pāmæinēna tōmengā īñōmō yewæmōinta ænte yewæmōninque, Bitō
imate æmæwo pāmæmopa, ante yewæmonte onquiyængā ingante godongā
æncæcāimpa,’ ante dodāni nāni angainō ante do ēñēninque Ao āmīnitawo.
³² Botō edæ wadō ante īmaī ante nō āmopa. Onquiyængā awēmō todāmaī
ee quēwēñongante tōmengā nānōogængā godō pāmængā īninque onquiyængā
nē towengā nānō baquinque wacā ingante godō mōwengampa. Ayæ
onquiyængā pāmænte goyongā wacā onguīnængā tōmengā ingante godō
mōninque adobaī nē towengā bacampa, ante apænebo ēñēmaīmīnīpa,” ante
Itota apænegacāimpa.

Cōwē baquinō anguēnē, ante nāni ānewēnō ante

³³ “Ayæ wæætē edæ, ‘Botō Wængonguī cōwē quēwengā baī botō ānō cōwē
baquinō anguēnē, ante āmi īninque Wængonguī ēñengā beyænque bitō ānīnō
ante cōwē cædinque bitō wadō cædāmaī incæbiimpa,’ ante Mōitee wodi dodāni
īnānte angacāimpa. Mīnitō īñōmō tōmengā nānō wææ angainō ante ēñēninque
Ao āmīnitawo. ³⁴ Botō wadō ante nō āmo ēñēdāni. Edæ mānīnō, Botō
ānō nōingā baquinō anguēnē, ante ānāmaī iedāni. Ayæ mānīnō ancæte ante
mīnitō Wængonguī ēmōwo ante apænedāmaī īmīni incæte mīnitō, Ōōnæ tæī
ongō baī impa, ante apænedāmaī iedāni. Īñæmpa, Ōōnæ, ante āmīni īninque
mīnitō Wængonguī ōōnædē waa pōnī nānō contayōmō ante apænebaīmīni apa
ānewēmīni. ³⁵ Ayæ Wængonguī ēmōwo ante ānāmaī īninque mīnitō, Īmæca cōwē
ongō baī botō ānō cōwē baquinō anguēnē, ante adobaī apænedāmaī iedāni.
Īñæmpa, Īmæca, āmīni īninque mīnitō Wængonguī pī cæwate nānō ongōñōmō
ante apænebaīmīni apa ānewēmīni. Ayæ, Eedotadēē cōwē ongō baī botō ānō
cōwē baquinō anguēnē, ante apænedāmaī iedāni. Īñæmpa Eedotadēē īñōmō
mōnō Tæiyæ Awēnē Odeye ongongā apa ānewēmīni. ³⁶ Ayæ adobaī, Botō
ānō nōingā baquinō anguēnē, ancæte ante bitō, Tōmēmō ocabo tæī ongō baī
impa, ante mīni ānewēnō ante ānāmaī iē. Īñæmpa bitō ocaguī wentamō encabi

īnīnque bitō ædō cæte adoguinque pōni godō cæbi näämænta baquūi. Ayæ näämænta encabi īnīnque bitō ædō cæte adoguinque pōni godō cæbi wentamō baquūi anguēnē. ³⁷ Īnīnque mīnitō Ao āinēmini inte ‘Ao’ āinīnque mānīnque ædāni. Ayæ edæ Baa āinēnte wædinque ‘Baa’ āinīnque edæ mānīnque ædāni. Godōmenque ānīnque mīnitō edæ nē wīwa cædongā angā beyænque āmīnīpa tōō,” ante Itota odōmonte apænegacāimpa.

*Näämæ wēncæ wēncæ nāni cædō ante
(Odoca 6.29-30)*

³⁸ Ayæ godōmenque odōmonte apænedīnque Itota, “Īmaī ante dodāni nāni angainō ante ēñēnīnque Ao āmīnitawo. ‘Bitō godō cæbi beyæ wacā awīnca tæigæmongā bacā īnīnque tōmēngā näämæ cæcā beyænque bitō awīnca adobāi tæigæmōmi bacæbiimpa. Ayæ bitō godō cæbi beyæ wacā бага tā tobæ gogacā īnīnque tōmēngā näämæ cæcā beyænque bitō бага adobāi tā tobæ gogacæbiimpa.’ ³⁹ Botō wæætē wadō ante nō āmo ēñēdāni. Nē wīwa pōnō cæcā ingante näämæ cædāmaī īedāni. Edæ wacā bitō tōmēmpaga īnō pōnō tamongā wædīmi inte bitō wæætē æmæmpaga īnō dadi ēmæmonte ee ongōmi wæætē tamongæ. ⁴⁰ Ayæ wacā, Bitō īmite nē apænte angā weca ænte godīnque botō bitō weocoo æncæboimpa, ante cæyongā bitō mānīncooque tōmēngā ingante pædæ godōnīnque wacoo bitō yabæ mongæncoo tōnō ee abi ō æncæcāimpa. ⁴¹ Ayæ wacā bitō īmite, Bado, māninganca mongænte māobi goboe, angā ēñēnīnque bitō tōmēngā nānō āninganca māobi goyongante ayæ adoganca godōmenque mongænte māobi gocæ. ⁴² Ayæ nē, Pōnōmi æmoe, angā ingante godōmi ængæ. Ayæ wacā, Bitō quinca pōnōmi ænte cæte ate wæætē pōnōmo æe, ante nē angā ingante bitō pæ gompodāmaī incæbiimpa,” ante Itota apænegacāimpa.

*Nē pīnte ānāni īnānite waadete cæedāni, ante
(Odoca 6.27-28, 32-36)*

⁴³ Ayæ apænedīnque Itota, “Mīnitō dodāni nāni angainō ante do ēñēnīnque edæ Ao āmīnitawo. Tōmēnāni īñōmō, ‘Bitō guīdēngā ingante waadete cæe,’ ānīnque edæ, ‘Nē pīngā ingante näämæ pīnte cæe,’ ante wææ ānānitapa. ⁴⁴ Botō īñōmō edæ wadō ante nō āmo ēñēdāni. Mīnitō īmīnite nē pīnte cædāni īnānite mīnitō wæætē waadete cæedāni. Ayæ mīnitō īmīnite nē togænte pānāni beyæ ante Wængonguī ingante apæneedāni. ⁴⁵ Mānōmaī cædinque mīnitō mōnō Mæmpo ōōnædē nē quēwēngā wēñæmīni bacæmīnīpa. Edæ nē wīwa cædāni beyæ incæ nē waa cædāni beyæ incæ Mæmpo Wængonguī angā nænque tamōmpa. Ayæ nē nō cædāni beyæ incæ nē nō cædāmaī īnāni beyæ incæ Wængonguī angā cōōnæ cæpa. ⁴⁶ Mīnitō guīquēnē mīnitō īmīnite nē waadedānique īnānite waadete pōnēmīni īnīnque mīnitō mīni cædinō beyæ ante dicæ paga ænguīmīniyaa. Īñæmpa odōmāno awēnē beyæ nē æwēnāni incæ mīnitō waadete pōnēnganca adoganca cædinque tōmēnāni īnānite nē waadete pōnēnānique īnānite waadete pōnēnānīpa tōō. Bitō godōmenque cæbitawogaa. ⁴⁷ Ayæ mīnitō tōnīñadānique īnānite waadete apænedīnque mīnitō dicæ godōmenque cæmīniyaa. Īñæmpa wadāni nē, Nāmā cæte quēwēnguimo, ante nē ēñēnāmaī cædāni incæ mīni cædō baī adoganca cædāni apa quēwēmīni. ⁴⁸ Mōnō Mæmpo ōōnædē quēwēngā nē nō waa cædongā ingā baī mīnitō adobāi cædinque picæmīni badīnque nō waa cæte quēwēdāni,” ante Itota odōmonte apænegacāimpa.

6

Æbānō cæte waa cæquī, ante Itota apænecampa

¹ Itota ayæ godōmenque īmaī ante odōmonte apænegacāimpa. “Mīnitō edæ, Wængonguī nānō ānō ēñente nō cæbote, ante cæmīnitawo. Īnque mīnitō, Waodāni botō ĩmote waa acædānīmpa, ante ānāmaī inte wīī waodāni ayōnāni cædinque waa cædāni. Edæ, Waodāni botō ĩmote waa acædānīmpa, ante pōnēnīnque cæmīni ĩnīnque mōnō Mæmpo oōnædē nē quēwengā ĩñōmō mīnitō cædi beyæ wæætē pōnōnāmaī ĩmaingampa,” angantapa.

² Ayæ, “Wadāni nē wadō ante wadō cædāni guiquēnē, Ōmaadāni inte nē wædāni quī, ante pædæ godoncæte ante cædinque, Botō æbānō waa pōnī cæboo, ante tōmānāni ponte waa acædānīmpa, ante pōnente todompeta nāni ancadeca we we oōnānīpa. Tōmēnāni mīnitō odōmōincōnē go guīte ongōnīnque ayæ taadō gote cægōnīnque, Botō waa pōnī cæbo aedāni, ante yedæ ānāni ēñente godongāmæ pōnāni ate tōmēnāni tōmānāni ayōnāni godōnānīpa. Bitō ĩñōmō tōmēnāni nāni, Pōnō waa acædānīmpa, wædō baī wædāmaī inte edæ pæ wēēnete godōe. Tōmēnāni waodānīque godō waa adāni ænīnque mānīnque ænānīpa. Wængonguī guiquēnē waa adāmaī incæcāimpa. Nāwangā āmpo. ³ Bitō ĩñōmō, Ōmaadāni inte nē wædāni quī, ante godoncæte ante cædinque bitō guīdengā eyequeī pōnī ongongā incæ adāmaī incæcāimpa, ante wææ cæe. ⁴ Mānōmaī wææ cædinque awēmō godōmi æncædānīmpa. Mānōmaī cæbi adīnque bitō Mæmpo nē wēmō ĩñōmō nē acā ĩnongā inte awēmō bitō godōnī ante wæætē eyepæ pōnongā æncæbiīmpa,” ante Itota angacāimpa.

Wængonguī ingante æbānō apænequī, ante Itota apænecā (Odoca 11.2-4)

⁵ Ayæ godōmenque apænedīnque, Itota, “Wadāni Wængonguī ingante apænedīnque nāmanque ante nāni cæbaī mīnitō ĩñōmō wīī adobainō ante Wængonguī ingante apæneedāni. Mānīnāni guiquēnē, Botō apænebo adīnque waodāni pōnō waa acædānīmpa, ante pōnēwēnīnque mīnitō odōmōincōnē go guīdīnque næ gongænīnque Wængonguī ingante apænedānīpa. Ayæ tōmēnāni nāni quēwēñōmō ñænquedæmpo ĩñōmō gote næ gongænīnque Wængonguī ingante apænedānīpa. Nāwangā āmpo. Tōmēnāni waodānīque godō waa adāni ænīnque mānīnque ænānīpa. Wængonguī guiquēnē waa adāmaī incæcāimpa. ⁶ Bitō ĩñōmō tōmēmi oncōnē guīte odemō tee mōnedīnque mōnō Mæmpo nē awēmō quēwengā ingante apænee. Mānōmaī cæbi adīnque bitō Mæmpo wēmō ĩñōmō nē acā ĩnongā inte awēmō bitō cædinō ante wæætē eyepæ pōnongā æncæbiīmpa,” ante Itota odōmonte apænecantapa.

⁷ Ayæ, “Nāmā cæte quēwenguīmo, ante nē ānāni ōnonque nāni tedewēnō baī tededāmaī inte mīnitō nō cædinque Wængonguī ingante apæneedāni. Tōmēnāni ĩñōmō, Wantæpiyæ tedebo beyænque Wængonguī ēñencæcāimpa, ante babæ ante pōnēnīnque ōnōneque tedewēnānīpa cæmīnī. ⁸ Mīnitō ĩñōmō edæ tōmēnāni ōnōneque tedete nāni cædō baī edæ cædāmaī ĩedāni. ĩñæmpa mōnō Mæmpo ingante apænedāmaī ĩñōmonte tōmengā mōnō anguīnō ante wēēñēdē do ēñengā apa tedewēmīni. ⁹ ĩnīnque edæ īmaī ante Wængonguī ingante apæneedāni.

‘Mōnitō Mæmpo nē oōnædē quēwēnōmi inte ēñēmi.

Bitō ēmōwo Tæiyæ Waēmō ēmōmi adīnque mōnitō bitō ēmōwo ante waa adīnque apænemōnīpa.

¹⁰ Bitō oōnædē Awēnē nē ingāimi inte inguipoga Awēnē Odeyebi edæ bitō baquinque quingæ pōe.

Öönædē owodāni ēñente cædāni baī inguipoga adobaī bitō änō ante edæ ēñente cæte bacæimpa.

¹¹ Mōnitō īmōnite bitō, Cænguī, ante īimō īñō īimō īñō bitō pōnōni ñwoōnæ incæ eyepæ pōnōmi ænte cæmōnie.

¹² Mōnitō īmōnite nē waa cæquēñēnāni inte pōnō wēnæ wēnæ cædāni adinque mōnitō godō ñimpo cæmōni quēwēñāni baī bitō nē panguēñēmi incæ adobaī cædinque

mōnitō nē waa cæquēñēmōni inte wēnæ wēnæ cæmōni adinque pōnō ñimpo cæbi quēwēmōnie.

¹³ Ayæ mōnitō wēnæ wēnæ cæñente wædō ante bitō pōnō wææ cæbi ate mōnitō taadō oda cædāmaī inte wēnæ wēnæ cædāmaī incæmōnimpa.

Edæ nē wīwa cædongā nempo ongonte wæyōmōnite bitō gā peyæmpote æmi quēwencæmōnie, āmōnīpa.

Tōmēmīque edæ Awēñē Odeye tæī pīñæmi īñōmi mōnitō bitō nempo ongōmōnīpa. Nāmā ñāō baī entawēmi inte bitō cōwē tæī ēmōmi īnōmi īmīpa.

Amēē, ante, Nāwangā impa, ante apænemōnīpa.

Mānōmaīnō ante Wængonguī ingante apæneedāni,” ante Itota odomonte apænegacāimpa.

¹⁴ Ayæ godōmenque odōmōnte apænedinque Itota īimāinō ante apænegacāimpa. “Mīnitō īmīnite wēnæ wēnæ cæyōñānite mīnitō godō ñimpo cæmīni īinque mōnō Mæmpo nē öönædē quēwengā adobaī mīnitō wēnæ wēnæ cædinō ante pōnō ñimpo cæcā quēwēmaīmīnīpa. ¹⁵ Wæætē mīnitō woadāni nāni wēnæ wēnæ cædinō ante ñimpo cædāmaī īmīni adinque edæ mōnō Mæmpo adobaī mīnitō wēnæ wēnæ cædinō ante ñimpo cædāmaī inte pōnō pīncæcāimpa,” ante Itota apænegacāimpa.

Wængonguī beyæ ante cæbānō cænāmaī ī, ante

¹⁶ Ayæ odōmōnte apænecantapa. “Wadō ante nē wadō cædāni guiquēñē īimāi ante mā pōñēninque cædānīpa. Wængonguī beyæ ante ee ate cænāmaī inte botō wæwente baī ēmōmo adinque wadāni botō īmote waa acædānīpa, ante awīnca nāmōñānīpa. Mīnitō īñōmō Wængonguī beyæ ante cædinque ee ate cænāmaī īmīni īinque tōmēñāni nāni cæbaī cædāmaī īedāni. Wæætē nāmōñāmaī inte Wængonguī beyænque ante cænāmaī īedāni. Nāwangā mīnitō īmīnite āmopa. Tōmēñāni woadānīque godō waa adāni æninque māninque æñānīpa. Wængonguī guiquēñē waa adāmaī incæcāimpa. ¹⁷ Bitō guiquēñē Wængonguī beyænque ante ee ate cænāmaī inte cæbi īinque awīnca ñā mēmōnte ayæ oçabo òni pæcate cæe. ¹⁸ Bitō ee ate cænāmaī īmi īinque, Woadāni edonque acædānīpa, ante āñāmaī inte wæætē, Mæmpoque acæcāimpa, ante māñōmaī cæe. Bitō māñōmaī cæbi adinque mōnō Mæmpo nē wēmō īñōmō quēwengā īnongā inte wēmō īñōmō edonque adinque awēmō bitō cædinō ante wæætē eyepæ pōnongā æncæbiimpa,” ante Itota apænegacāimpa.

Öönædē mīni waa pōñī manguincoo ante (Odoca 12.33-34)

¹⁹ Godōmenque odōmōnte apænedinque Itota, “Tōmēmō māincoo, ante mancæte ante wædinque mīnitō inguipogaque cayæ cænte to tamōnte īñōmō cabo tē gæte da wēñāmaī īedāni. Edæ nē ò æñāni bæ tate nāni ò ænguīnque inguipogaque da wēmīni apa quēwēmīni. ²⁰ Öönædē ongoncoo guiquēñē to tamōñāmaī impa. Cayæ guīdāmaī ī īinque māincoo wodāmaī ongompa. Ayæ nē ò ænguīñāni adobaī māñīñōmō bæ tate guīdāmaī īñāni īinque māincoo cōwē wē wodōñāmaī ee ongompa. Īinque, Waadete mīni cædincoo cabo tē

gæte bai cædinqwe mīnitō ōönædē waa pōni incoo mīni ænte manguinqwe nōwo iñōmō waodāni inānite waadedingwe ee cæedāni. ²¹ Edæ waa pōni mīnitō mǎincoo ongōñōmō mīnitō māniñōmō adoyōmō quēwencæte ante wæmīni imīnīpa, ante adinqwe botō mānōmānō ante apænētabopa,” ante Itota odōmonte apænecantapa.

*Awinca wainca mōnō ěmōnō ante
(Odoca 11.34-36)*

²² Ayæ odōmonte apænedingwe, “Baonga quēwēninqwe mōnō edonque adinqwe cæcæimpa, ante mōnō awinca ěmōmōmpa. Īninqwe awinca wainca ěmonte edonque ate bai bitō mīmōno adobai ñāo entawēninqwe, Nō cæbote, ante pōnēmi ĩninqwe bitō baonga nō cæte quēwēmaīmīpa. ²³ Wæætē edæ awinca wīi wainca ěmōninqwe adāmaī inte bai wentamō entawēmi ĩninqwe bitō, Wīwa cæbote, ante mīmōno pōnēñōmīte bitō baonga wīwa cæbaīmīpa. Edæ mīmō ñāo entawēñōmi wentamō ba ĩninqwe bitō quēwenguīmāmo mæ māmonte bai baquinō anguēñē,” ante Itota apænecantapa.

*Wængonguī beyæ cædinqwe mǎincoo beyæ cæquī
(Odoca 16.13)*

²⁴ Ante apænedingwe Itota ayæ odōmonte apænecantapa. “Mēnaa awēnēna bayōnate waocā iñōmō mēnaa awēnēna nāna ānō ante ædō cæte ěñente cæquingāā. Īñæmpa adocanque ingante pīninqwe tōmēngā wacā ingante waadebaingampa. Wæætē ĩngā mīñæ tee empo godinqwe tōmēngā māningā ingante edæ wīwa adinqwe ěmō cæte gobaingampa. Mīnitō adobai Wængonguī beyæ ante nē cæmīni inte ædō cæte mǎincoo beyæ ante cæte quēwenguīmīni,” ante Itota angacāimpa.

*Mæmpo Wængonguī mōnō ĩmonte aacampa, ante
(Odoca 12.22-31)*

²⁵ Āninqwe, Itota ayæ godongāmæ odōmonte apænedingwe, “Mānōmaī beyæ botō mīnitō imīnite ĩmaī āmopa, angantapa. Mīnitō inguipogaque mīni quēwenguīmāmo ante wædāmaī ĩedāni. Cænguī bequī ante ayæ weocoo ante wædāmaī ĩedāni. Cænguī cænte beyænque mōnō dicæ quēwēmōngaa. Weocooque mōnō mōngæñō beyænque dicæ quēwēmōngaa. Mōnō quēwēmāmo ĩñōmō godōmenque impa. ²⁶ Ayamōidi awænæca nē cæwodāni inānite amīnitawo. Tōmēnāni dicæ tōmēmō mīnte pæ ate tā pete daga wente mānāniyaa. Incæte mōnō Mæmpo ōönædē quēwēnōngā inte wæætē tōmēnāni inānite eyepæ godongā cænāni aedāni. Mīnitō guiquēñē ayamōidi ĩnāmaī ĩñōmīnite Wængonguī mīnitō imīnite godōmenque waa adinqwe eyepæ pōnōngā cænte apa wæwēmīni. ²⁷ Edæ Wængonguī nānō anganca quēwenguēñēmīni inte mīnitō, Wantæ ĩño incæ godōmenque quēwēmote, ante wæwēmīni incæte edæ ædō cæte nāmā cædinqwe godōmenque wantæpiyæ quēwenguīmīni.”

²⁸ Āninqwe Itota godōmenque odōmonte apænecantapa. “Īninqwe mīnitō, Weocoo quincōdō wēñaquīi, ante pōnente quīnante wæwēmīni. Īñæmpa ongaicoo ōmædē pæ ĩñōmō weocoo ante daque daque dadāmaī inte wodonte tīnāmaī tōmēnque pæ aedāni. ²⁹ Incæte Awēñē Tadōmōō wodi waēmōncoo pōni ěñagaingā incæ wīi ongai bai ěñagacāimpa. Ongai ĩñōmō godōmenque waēmō pōni ěnodānīpa. ³⁰ Gaguīmæ ĩñōmō ĩmō ate edæ gongapamō guitodonte tanguinqwe pæ incæte nōwoōnæ Wængonguī pōnōngā waēmō wēñate ěnopa. Īninqwe, Waēmō ěnodō nē pōnōngā inte Wængonguī mōnō ĩmonte godōmenque eyepæ pōni pōnōngā ænte wēñacæimpa, ante pōnēmīniyaa. ³¹ Īninqwe mīnitō, ‘Quīmōnō impa cænguīmōō,’ ante, ‘Quīmæñō impa bequīmōō,’ ante ayæ,

'Quincodö impa wēñaquimöö,' ante pönēninque guiñente wæwēnāmaī iedāni. ³² Mānīnō ante wadāni nē ēñēnāmaī ināni nāni cabo nāni cabo wædāni incæte mīnitō guiquēnē, Mōnō æīnente wædō ante mōnō Mæmpo iñōmō edæ do ēñengampa, ante pönēninque edæ guiñente wædāmaī incæmīnīmpa. ³³ Wæætē edæ, Wængonguī Awēnē Odeye nempo quēwencæboīmpa, ante nanguī cædinque mīnitō, Tōmengā nō cæte nānō waa quēwēnō bai adobaī nō cæte waa quēwencæboīmpa, ante adobaī nanguī cæedāni. Mānōmaī quēwencæte ante fāno wæmīni adīnque Mæmpo Wængonguī mānīnō ante do edæ eyepæ pōnī pōnongā æññōmīni mānīncooque mīni wædō ante adobaī eyepæ pōnongā æncæmīnīmpa. ³⁴ Mānōmaī ī īnīnque, Īīmō ate æbānō cæquīī, ante guiñente wædāmaī iedāni. Edæ Īīmō ate mānīnō ante pönēninque eyepæ pōnente īnguīmpa. Īnīnque mīnitō, Nōwoōnæque æbānō cæquīī, ante guiñente pönēninque māninganca pōnente quēwēedāni," ante Itota odōmonte apænegacāīmpa.

7

Wadāni inānite apænte ānāmaī iedāni, ante (Odoca 6.37-38, 41-42)

¹ Mānōmaīnō ante odōmonte apænedīnque Itota godōmenque apænegacāīmpa. "Mīnitō wacā īngante, Wēnæ wēnæ īmīpa, ante apænte ānāmaī iedāni. Edæ mīni apænte wæquinque mīnitō wadāni inānite apænte āmīnīpa. ² Mīnitō wadāni inānite tee mante godōmīni nāni ænganca wæætē adoganca pōnōnāni æncæmīnīmpa. Ayæ mīni apænte anganca adoganca apænte ānāni wæcæmīnīmpa. ³ Bitō tōñīñacā wædænque wēnæ wēnæ cæcā īñongante bitō guiquēnē nanguī bitō wēnæ wēnæ cædīnō ante pōñēnāmaī īnte quīnante tōmengā īngante piīnte ānewēmīi. Tōmengā edæ awīnca guiyā mæ owo ēmongā bai entawente wæyongante bitō wæætē awæmpa wææ ēmongā bai wææ entawēmi īnte ædō cæte ate bai tōmengā īngante apænte āmīi. ⁴ Edæ tōmēmi awīnca awæmpa wææ ēmonte bai bitō wēnæ wēnæ adīmō ēmōmi īnte bitō tōñīñacā īngante, 'Biwī, bitō awīnca guiyangā mæ owo bai ate æ wīmōmoe,' ante edæ abīpa diyæ æ wīmonguīmīi. ⁵ Īñæmpa wadō tedete wadō cædōmi īnte bitō edæ tōmēmi awīnca awæ wææ ongōmpa tāno wīdō cæte ate edonque adīnque bitō tōñīñacā awīnca guiyā mæ owodō æmoncæbiīmpa."

⁶ Ānīnque Itota godōmenque apænedīnque, "Gūntaidī inānite, Tōmēnāni cænguī, ante tæiyæ waēmō cænguī godōnānitawoo. Edæ godōnāmaī ināni bai mīnitō adobaī Wængonguī nānō tæiyæ waēmō apænedō ante nē Baa ānāni inānite apænedāmaī iedāni. Ayæ odæ wængānāīdī weca waodāni wamoncoo waa pōnī ēmoncoo wææntodōnāmaī ināni bai mīnitō adobaī Wængonguī beyæ waa pōnī nāni apænegāīnō ante nē ēñente cædāmaī ināni inānite apænedāmaī iedāni. Edæ odæ wængānā pīnā gāwa baō wānā ñænte bai cædinque tōmēnāni ēñēnāmaī īnte cædinque dādī ēmænte tōmēmīni baō wangō pocænte bai pīlmānānīpa, ante mīnitō apænedāmaī ñīne cæedāni," ante Itota apænegacāīmpa.

Pōnōmi æmoe, ante mōnō angæīmpa, ante (Odoca 11.9-13; 6.31)

⁷ Ayæ apænedīnque Itota, "Pōnōmi æmoe, ante nē angā bai cædinque mīnitō mīni ænguīnō ante Wængonguī īngante apæneedāni. Āyōmōnō īī, ante nē dīquī dīquī mīngā bai cædinque mīnitō, Ābānō īī, ante ædæmō ēñēncæte ante Wængonguī īngante wede pōnente apæneedāni. Odēmō mōnitō beyæ wī ænecæīmpa, ante aa pecā bai cædinque mīnitō, Ābānō cæquīmoo, ante ēñēncæte ante Wængonguī īngante nanguī apæneedāni. ⁸ Edæ, Pōnōmi æmoe,

ante në änäni iñömö edæ do ænänipa. Në diqui diqui münäni adobaï do adänipa. Ayæ odemö ponte në aa pedäni tömënäni näni guiquingue edæ do wi ænete bai bacæimpa.”

⁹ Ayæ, “Bitö waobi inömi inte eñëmi. Bitö weñængä cænguï ante päö angä eñëningue bitö dicæ dicaque pædæ godömiyaa. ¹⁰ Gæyæ angä iñinque bitö tæntæ incæ dicæ pædæ godömiyaa. ¹¹ Mini waocabo në wïwa cædömiñi incæ, Quinö waa i, ante eñëningue münitö weñænäni inänite waëmoncooque godömiñi ænänipa. Iñinque mönö Mæmpo öönædë në quëwengä iñömö në änäni inänite waëmoncooque ante godömenque pönongampa,” ante Itota odömonte apænegantapa.

¹² Ayæ, “Münitö, Waodäni botö imote waa cædäni æningue waa tobaïmopa, ante wæmünitawo. Iñinque mini ante wædö bai ante münitö tömënäni inänite adobaï waa cædäni. Mäninonque ante wææ ancæte ante dodäni, Imaï cæedäni, ante wææ angadänimpa. Ayæ Wængonguï beyæ në apænedäni adodö ante ancæte ante yewæmongadänimpa. Iñinque botö änö bai cædinque münitö tömënäni näni angainö bai do edæ cæbaiminipa,” ante Itota odömoncæte ante apænegantapa.

*Odemö guiyänemö ante
(Odoca 13.24)*

¹³ Itota godömenque odömoncæte ante Imaï apænegantapa. “Münitö guiyänemö guidinque quëwenguinö taadonque pödäni. Wænguinö godö guiquinemo guiquënë yabæ inö ñænænemö ongö adinque tæiyænäni önonque pö guite edæ tömënäni näni wænguinque ñænænnonque godänipa. ¹⁴ Wæætë wædænque inäni guiquënë diqui minte guiyänemö adinque quëwenguinö guiyänö guite pönänipa,” ante Itota apænegantapa.

*Awæ æbänö iwæ, ante tömenca bete eñængæimpa, ante
(Odoca 6.43-44)*

¹⁵ Itota ayæ godömenque odömonte apænegantapa. “Pancadäniya, Wængonguï beyæ në apænemöni imönipa, ante në babæ apænedäni iñönänite münitö gomö ate tömënäni inänite eñënamäi iedäni. Tömënäni iñömö edæ mëñeidi bai inäni incæ obega æmontai bai weñate bai babæ cædänipa. Obega ee quëwënäni bai ee cæmöni imönipa, ante edæ babæ ante pönäni tamëñedäni. ¹⁶ Edæ tömenca adinque münitö, Awæ æbänö iwæ, ante tä pete bete do eñëmüni bai, Iñäni ædänidö inänii, ante eñencæte ante tömënäni näni cædinö adinque edæ do eñencæmünimpa.”

“Yowemö æncæte ante waodäni dicæ daa mongæwäa tä pete ænäniyaa. Iigowæñeca æncæte ante waodäni dicæ wæntowäa edæ tä pete ænäniyaa. ¹⁷ Waiwæ tömæwæ wainca incapa. Baawæ wæætë baaca incapa. ¹⁸ Waincawæ incæ ædö cæte baaca incaquü. Wæætë wïwa iwæ incæ ædö cæte wainca incaquü. ¹⁹ Awæ quiwæmenque wainca incadämäi i Iñinque mäniwæ tömëwæ mä yete gongapamö guitödönäni gonguinque ñongæmpa. Tömënäni adobaï näni gonte wæquinque babæ cædänipa. ²⁰ Iñinque, Awæ æbänö iwæ, ante tömenca adinque do eñënäni bai waocä nänö cædö ante adinque, Tömengä æbänö ingää, ante edæ do eñencæmünimpa,” ante Itota apænegäcäimpa.

*Wü tömänäni öönædë guiquinäni, ante
(Odoca 13.25-27)*

²¹ Ayæ godömenque odömonte apænedinque Itota Imaï apænegantapa. “Botö imote, ‘Awënë, bitö botö Awënë imipa,’ ante në tededäni näni tededö

beyænque ædó cæte öönædē Awēnē Odeye ömæ guiquinānii. Wæætē mōnō Mæmpo öönædē quēwengā nānō ānō bai nē cædingā iñōmō tōmenganque guicæcāimpa. ²² Iñque bayonte pancadāniya botō īmote, ‘Awēnē, Awēnē,’ āninue, ‘Bitō beyæ apæneganōnii æe, ancædānimpā. Ayæ, Bitō emōwo apænedinque wēnæ inte wido cægāmōnii æe. Bitō emōwo apænedinque mōnitō, Ate pōnencædānimpā, ante hamōnengæ cædinque nanguī waa cægāmōnii æe,’ ancædānimpā. ²³ Ēñēninque botō wæætē, ‘Iñæmpā botō mīnitō imīnite cōwē adāmai inte tæcæ abopa. Nē ēñēnāmai cædimīni inte botō weca ongōnāmai gobæwedāni,’ ancæboimpā,” ante Itota apænegancāimpa.

Nē mænōna īnate ante

(Māadoco 1.22; Odoca 6.47-49)

²⁴ Ayæ wæætē odōmōninque Itota iīmai apænecantapa. “Iñique edæ botō apænebo ēñēninque nē ēñente cædāni iñōmō tōmēnāni waocā nē ēñengā inte nānō nō ēñente cæi bai cædānimpā. Nē ēñengā iñōmō tæēmoncaa mænongampa. ²⁵ Tæēmoncaa mænongā ate cōōnæ nanguī cæ ate æpæ eyede āninue pō tapæmpā. Ayæ woboyæ nanguī pæmænte pō incæte oncō tæēmoncaa mænonte ongō iñique ædó cæte cabænte bobænte guiquiī. Nē ēñente cædāni iñōmō māniñōmō mænongā bai inte todānimpā. ²⁶ Wæætē botō apænebo ēñēninque nē ēñēnāmai cædāni guiquēnē tōmēnāni iñōmō waocā ocāi ömæcacā nānō ēñēnāmai cæi bai cædānimpā. Nē ömæcacā iñōmō emōnaiya aquiī iñōmō mænongampa. ²⁷ Aquiī iñōmō mænongā ate cōōnæ nanguī cæ ate æpæ eyede ante tapæmpā. Ayæ woboyæ nanguī pæmænte pō adinque mānincō öñonte ætæwo goquinque edæ do acapowate bogocæ tæ go wææmpā. Nē ēñēnāmai cædāni iñōmō māniñōmō mænongā bai inte wædānimpā,” ante Itota odōmonte apænegancāimpa.

²⁸ Māninganca ante iñque apænecā ēñēninque tōmānāni, Quinō bai angāā, ante guñente wædinque, ²⁹ Wīi mōnō imonte nē odōmōnāni nāni odōmōnō bai tōmēngā iñōmō nē angā inte bai edæ godōmenque nōingā ante odōmōngā ēñēmōmpā, ante tedegadānimpā.

8

Nē baadingā ingante Itota wadæ caacampa

(Māadoco 1.40-45; Odoca 5.12-16)

¹ Māniī ānanquidi ongōninque iñque apænete wæængā adinque tæiyæñāni tōmēngā miñæ wæængadānimpā. ² Tōmēngā miñæ tee empote wææ goyōnāni wacā baate ēñawengā inongā inte eyepæ pō bee tēninque Itota önōwa gāānē ædæ wææninque apænecantapa.

—Awēnē, Bitō Ao āmi inte wadæ caabi iñique botō waintai baabāimopa.

³ Āñongante Itota pædæ wææmpo gampo caadinque,

—Ao āmopa. Bitō waintai baacæbiimpā.

Angā iñique ñōmæintai nānō ēñadintai dæ baadinque tōmēngā waintai edæ do baacantapa. ⁴ Itota edæ tōmēngā ingante,

—Botō æbānō cæboo, ante wadāni īnānite māo apænedāmai imāwe. Wæætē, Nāwangā impā, ante acædānimpā, ante cædinque bitō, Wængonguī qui, ante nē godongā weca tōingā godinque waintai bitō baadintai odōmōmi acæcāimpa. Ayæ Mōitee wodi wææ ante nānō angaincoo bai ænte pōninque bitō waintai bitō baadi beyæ ante edæ, Wængonguī qui, āninue nē godongā ingante pædæ godōmi æncæcāimpa, ante Itota angacāimpa.

Capitō ingante nē cæcā ingante Itota cæcā waa bacampa
(Odoca 7.1-10)

⁵ Mánii pöinque Capënaömö pö guiiyongä odömäno tontadoidi awënë capitäo incæ, Itota pönö cæcæcäimpa, ante apænecæte ante pongantapa.

⁶ Pöinque tömengä,

—Awënë, botimote nē cæcä iñömö cömäingä badinque nangui pöni nantate oncönē öñongampa cæbii.

⁷ Ante añongante Itota,

—Gote cæbo waa bacä ae.

⁸ Angä ëñëninque,

—Awënë ëñëmi. Botö waëmö imopa diyæ bitö botö oncönē pö guiquimii. Edæ bitö adoyömö ongöinque ämi ininque botö imote nē cæcä waa bacæcäimpa. ⁹ Bitö iñömö Awënë Wængongui ingante nē ëñente cædömi imi bai botö adobai wacä awënë ingante nē ëñente cæbo imopa. Ininque botö awënë ëabo inte botö awënë beyænque ämo ëñëninque tontadoidi wæætē guñente wædinque botö änö ante ëñente cædänipa. Ininque adocanque ingante botö, Goe, ämo ëñëninque edæ do gocampa. Wacä ingante, Pöe, ämo ëñente pongampa. Ayæ botö imote nē cæcä ingante, Cæe, ämo ëñëninque edæ do cæampa.

¹⁰ Ante tontado capitäo nangui ëñengä inte apænecä ëñente wædinque Itota wæætē tömengä miñæ tee empo pönäni inänite apænedinque,

—Minitö iminite näwangä ämopa. Mönö idægocabo iñömönte mäningä wede pönengä ingä bai adocanque incæ edæ dæ angä awædü, angantapa. ¹¹ Incæte iimäinö ante apænebo ëñëdäni. Mönö wæmæidi Abadäo wodi Itæca wodi AACobo wodi öönædë Awënë Odeye ææmæ ponte waa beyönäni edæ nænque tamönö gämænö quëwënäni tönö nænque guiidö gämænö quëwënäni iñömö idægoidi inämai inäni incæ tæiyænäni adoyömö pöinque mönö wæmæidi tönö godongämæ becædänimpa. ¹² Wæætē Wængongui Awënë Odeye ömæ nē guiquënänäni guiquënë tömënäni wëmö iñömö, näni guingo imonte Yæ yæ wæyömö mäniñömö guitodonte wæquinänidö angüënë.

¹³ Äninque Itota wæætē tontado capitäo ingante,

—Ñowo wadæ goe. Bitö pönönö bai do bacæimpa.

Ante añongä adoyedë Itota nänö äniñedë incæ awënë ingä nē cæcä do waa bagacäimpa.

Pegodo nänöogængä badä ingante Itota cæcä waa bacä

(Mäadoco 1.29-31; Odoco 4.38-39)

¹⁴ Ayæ Itota mäniñömö pöinque Pegodo oncönē pö guite ayongä Pegodo nänöogængä wäänä daicawo gawænte möimoga öñongä acantapa. ¹⁵ Adinque tömengä önompo pædæ wææmpote bæi ongongä ate onquiyængä wæætē gancæ badinque ængæ gantidique Itota beyæ pönö cæcantapa.

Nantate wæwënäni inänite Itota cæcä waa badänipa

(Mäadoco 1.32-34; Odoco 4.40-41)

¹⁶ Mäniönæ gäwadecæ ba ininque wënæ tönö quëwënäni tæiyænäni inänite ænte pönäni adinque adodeque äninque Itota wënæ inte wido cæcantapa. Ayæ quiemë quiemë nantate wæwënäni inänite, Waa baedäni, angä waa badänitapa. ¹⁷ Itota mänömai cæcä ininque Wængongui beyæ nē apænecä Itaiya wodi do iimäi ante nänö angainö bai iinque batimpa. “Mönö nantate wæwëmämo ö æninque mönö daicawoidi teëmente gote mäo wido cæte bai cædinque tömengä teëmente wængä beyænque quëwëmö imompa,” ante Itaiya nänö angainö bai Itota cægacäimpa.

Itota miñæ nê goinëna
(*Odoca 9.57-62*)

¹⁸ Itota iñômö, Tæiyænäni godämæ gongænäni awædö, ante pönëninque tömengä miñæ nê godäni inänite, Gäwapæ æmæ wedeca mantamini taoboedäni. ¹⁹ Äninqe ayæ ongöñongante wacä tömënäni nani wææ yewæmongainö ante nê adingä inte nê odömongä ñongä inte Itota weca pöninque,

—Awënë nê Odömömi ëñëmi. Bitö ædömë goyömite botö bitö miñæ pö gocæboimpa.

²⁰ Angä ëñëninque Itota wæætë edæ,

—Babæ guintaidi iñômö ontatodë mongui ëadäni inänipa. Ayamöidi ongota ëadäni inänipa. Botö Waobo ëñagaïmo guiquënë mongui ömaabo imo apa poncæ ämi, ante Itota wææ apænegacäimpa.

²¹ Ayæ wacä tömengä ëmiñængä incæ tömengä ingante,

—Awënë ëñëmi. Botö täno gote botö wæmpo wængä ate daga wente ate pömoë.

²² Äñongante Itota wæætë,

—Ïñæmpa nê wæwocädäni incæ tömënäni guidënäni wænäni ate ee abi daga wencädänimpa. Bitö wæætë botö miñæ ee pöe, angacäimpa.

Itota angä ëñente woboyæ æpæ næ gongæmpa
(*Mäadoco 4.35-41; Odoca 8.22-25*)

²³ Mänii tao gocæte ante wipodë guiiyongä tömengä miñæ nê godäni godongämæ guidinque tömengä tönö tao godänitapa. ²⁴ Tao wogaa goyönäni woboyæ iñontobæ nangui pöni pæmæninque æpæ mængonta mængonta pöninque gao gao goyonte wipo ñänæ ñänæ æi guidentapa. Itota iñômö mö ñongantapa. ²⁵ Mö ñongä adinque tömengä tönö godäni iñômö tömengä weca gote, Ömæmoncæcäimpa, ante tao cædinque,

—Awënë, bete wæncæ cæmompæ cæbii.

²⁶ Ante äñönäni,

—Mini pönëegade, quimæ guiñëwëminii.

Äninqe tömengä ængæ gantidinqe, Woboyæ pæmænämaï imäwe. Gäwapæ incæ cädämaï næ gongæmäwe, angä ëñente woboyæ pæmænämaï iñö gäwapæ incæ næ gongæninque ñancæ ñancæ gongæmænimpa. ²⁷ Äñongä tömënäni ancai guiñëninque nämäneque tededinque,

—Æcämë inte angä ëñente woboyæ incæ æpæ incæ gongæmpa, ante guiñente wægadänimpa.

Guedatabæ iñômö wëncæ inte nê ënempöda
(*Mäadoco 5.1-20; Odoca 8.26-39*)

²⁸ Mänii æmæmäa tao ti wæænte Guedatabæ pöñongä wënæ inte quëwëna iñômö wao wodido quëwente pöninque Itota ingante mämö bee ténatapa. Tömëna iñômö, Waodäni taadö godämaï incädänimpa, ante wææ cæcæte ante nê pñinte cædöna inte edæ, ²⁹ pö bee téninque ogæ tededatapa.

—Bitö Wængongui Wëmi inömi incæ quimæ mönatö weca pöwëë. Ïnque bayedë möna pante wæquënëno ante pönëninque bitö ñöwo do pancæte ante pömitawo, ante wædatapa.

³⁰ Ante äñönte odæ wængänäidi nangui inäni a ongonde cænäni adinque,

³¹ wënæidi guiquënë Itota ingante äninqe,

—Bitö cöwë wido cæcæte ante pönëmi ñinque edæ odæ wængänäidi baönë ämi gobaïmönipa.

³² Ante ancaa tedete äna eññenique Itota,
–Gobäewedäni, angä.

Eññenique tömënäni tao godinque odæ wængänäidi baönë guiiyönäni odæncato wæætë ontadäa wæænömëmö iñömö gäwapæno pogodo wæi guiite becadote capo wængadänimpa.

³³ Becadote wænäni adinque odæ wængänäidi në aadinäni guiquënë pogodo wodii winonte tömënäni quëwëñömö mäo, Itota mänömaï cæcä wæmönipa, ante tededänitapa. Ayæ, Wënæidi tönö në quëwëñina inate Itota mänömaï cæcampa, ante wæmönipa, ante apænedäni. ³⁴ Eññenique tömänäni Itota ingante bee tencæte ante tömënäni näni quëwëñömö tate pönänitapa. Tömengä ingante adinque, Mönitö ömæ iñömö quëwëñämaï gobæwe, ante nanguï angadänimpa.

9

*Në cömäingä ingante Itota angä dao dao gocampa
(Mäadoco 2.1-12; Odoca 5.17-26)*

¹ Mäninö ante änäni eññenique Itota wadæ godinque wipodë go guiidinque imæmäa tate tömengä quëwëñömö pongacäimpa. ² Pongä adinque wadäni në cömäingä möimpataa öñöñongante edæ æmataæ æmataæ bæi ongöninque tömengä ingante næænte pönänitapa. Næænte pönäni adinque, Në næænte pönänäni tönö në cömäingä wede pönente pönänipa, ante adinque Itota iñömö në cömäingä ingante,

–Botö wëmi eññemi. Wënæ wënæ bitö cædimämo ante ñöwo ñimpo cætimpa.

³ Ante apænecä eññenique edæ në wææ odömönäni guiquënë pancadäniya nämäneque pönente tededinque, “İngä iñömö Wængongui ingampa diyæ mänömaï cæquiringäa. Edæ babæ ancædö.” ⁴ Ante pönëñönäni Itota tömënäni näni pönëwëñö ante önöwëninque do eññenique edæ,

–Minitö mïmöno quimæ wiwa ante pönëwëmïni. ⁵ “Në cömäingä nänö wënæ wënæ cædimämo ante do ñimpo cætimpa,” ante botö Wængongui bai ämo eññenique mïnitö guiquënë, Wængongui ingampa diyæ mänömaï cæquiringäa, ante pönëmïnipa. Ayæ wæætë, “Ængæ gantidinque dao dao gocæcäimpa,” ante botö Wængongui bai cæbo adinque mïnitö edæ, Wængongui ingampa diyæ mänömaï cæquiringäa, ante adobai pönëmïni imaimïnipa, ante awædö. İñæmpa mänömainö ante pönëmïni İinque mïnitö edæ æbänö cæquënëmo İmo ämïni. ⁶ Incæte woadäni näni wënæ wënæ cædimämo ante botö Waobo eñgäimo inte inguipoga quëwëñenque në ämo inte ñimpo cæbo quëwëñänipa, ante mïnitö edæ eññencæmïnipa, ante botö İlmaï cæbopa.

Äninque edæ në cömäingä ingante edæ,

–Ængæ gantidinque bitö möimpata topo cædinque ænte tömëmi oncönë næænte goe.

⁷ Angä eññenique cömäingä İingä incæ edæ ængæ gantidinque tömengä oncönë wadæ gocantapa. ⁸ Dao dao gocä ate wædinque godongämæ ongönäni iñömö, Æbänö cæcäi, ante eññänämaï inte guïñente wædinque, Wængongui pönö cæcä beyænque waocä ñöwo në angä badinque mänömaï cæcä amönipa, ante pönëninque, Wængongui bitö ñäo bai emömi inte tæi piñænte cæbi amönipa, ante watapæ apænægadänimpa.

*Máateo ingante Itota angä tee empote gocampa
(Mäadoco 2.13-17; Odoca 5.27-32)*

⁹ Itota edæ mäninö godömenque gocæ cæte ayongä adocanque Máateo iñömö, Odömáno awenë qui bacæimpa, ante godonte æinta nani æincönë ongonte cæcä adinque Itota guimö adinque Máateo ingante angantapa.

—Botö miñæ pöe, angä.

Ëñëninque Máateo edæ do ængæ gantidinke Itota miñæ tee empote wadæ gocantapa.

¹⁰ Ayæ ate Itota tömengä miñæ në godäni tönö Máateo oncönë go guiite cængöñönäni odömáno awenë beyæ në æwënäni tönö në ëñënamäi cædäni tönö nangui inäni ponte godongämæ cænänitapa. ¹¹ Adinque Paditeoidi guiquënë tömengä miñæ në godäni inänite äninque,

—Minitö Awenë në Odömongä iñömö odömáno awenë beyæ në æwënäni tönö në ëñënamäi cædäni tönö quimæ godongämæ cæwengäa.

¹² Änani ëñëninque Itota,

—Në waa ingä guiquënë, Cæbi waa baboe, änämäi ingampa. Në wænæ wænæ inte wæcä guiquënë dotodo ingante, Cæbi waa baboe, ante do aa pecampa. ¹³ Pancadäniya, Nämä incæ nö entawëmo imopa, ante në änäni inänite adinque botö në dotodo bai adobai inömo inte tömënäni inänite aa pedämäi incæboimpa. Wadäni guiquënë, Nämä wænæ wænæ cæbo imopa, ante në änäni guiquënë, Wængongui gämænö poncædänimpa, ante botö tömënäni inänite aa pecæ pönömoimpa. “Baö, Wængongui qui baquimpa, ante në iya tänäni inänite wii ainëwædö, wæætë godö waadete waa cædäni inänite ainëmo imopa,” ante Wængongui angä apa quëwënäni. Nöwo edæ godinque Wængongui nänö änö æbänö ante angä ëñente pömæwedäni, ante Itota apænegacäimpa.

*Ee ate cænämäi ingæimpa, ante në änäni
(Mäadoca 2.18-22; Odoca 5.33-39)*

¹⁴ Mäniñedë Wäö miñæ në godäni pöninque Itota ingante äninque,

—Paditeoidi tönö Wäö miñæ möni gocabo tönö mönitonque Wængongui beyæ ante ee ate wii cæmönipa. Bitö miñæ në godäni guiquënë quinante Wængongui beyæ ante cædämäi inte edæ do cænänii.

¹⁵ Änani ëñëninque Itota wæætë,

—Onguñængä në monguingä nänö wente ænte në pönäni bai inönäni inte botö miñæ në godäni iñömö ædö cæte wæwente bai cænämäi inguñänii. Wæætë ayæ ate guiquënë, Monguingä, nani në änogä bai iñömote wadäni ponte botö imote ö ænte gocædänimpa. Mänömaï cædäni ate botö miñæ në godäni iñömö mäniñedë ate wæætë cænämäi inte wæcædänimpa, ante apænedinke Itota godömenque iïmäi ante apænegacäimpa.

¹⁶ “Wacä dicæ miincoo æninque pedæncöoga pönö tadömonguingäa. Mänömaï cæcä ininque edæ miincoo incæ dobæ gäni tamonte guipite ate godömenque wänä tente baquënë. Minitö, Awente bai cænämäi inte waa quëwengæimpa, ante mini änewënö guiquënë pedæncöo bai inte ewenguincoo bai ënepa. Codito nempo watapæ quëwengæimpa, ante botö apænedö guiquënë miincoo bai inte quëwenguine ënepa. Ininque ewenguine tönö quëwenguine edæ ædö cæte adoyömö ëñente cæquii. ¹⁷ Ayæ adobai yowepæ biinömä nani ämæ miimæ æninque waodäni ædö cæte picæ æmontaicadedë godö pe ñiñænguñänii. Edæ picæ æmontaicadedë pe ñiñæñäni ininque yedæ æninque ætæwo goquiniö anguënë. Wæætë edæ æmontai miincadedë pe ñiñænte ate yedæ æninque tæi æbænämäi ee ongönö edæ miimæ tönö æmontaicade adobai ee ongonæimpa, apa quëwëminii,” ante Itota apænegacäimpa.

Gaido wēñængä beyæ cæcæ goyongante

*onquiyængä Itota weocoo gampocampa
(Mäadoco 5.21-43; Odoco 8.40-56)*

¹⁸ Tömēnāni inānite tæcæ apæneyongä wacä tömēnāni odömöincö awēnē inongä inte Itota weca ponte ædæ wææninque apænecantapa.

—Botö wēñængä baquēcä inōmō edæ dobæ wæncæ cæcampa cæbii. Bitö ponte tömengä ingante gampobi ate quēwencæcäimpa.

¹⁹ Angä ēñēninque Itota inōmō ængæ gantidinqe tömengä tönö goyöna tömengä miñæ nē godāni godongāmæ godānitapa. ²⁰ Idömæ goyönāni edæ wacä onquiyængä wantæpiyæ dote wadepo cōwē wepæ wantæ bidāmai wææ wæwēningä inōmō ñowo Itota önōñabæ inō pōninque tömengä weocoo yæwedecooque gampocantapa. ²¹ “Tömengä weocooque gampote waa bawēnemote,” ante onquiyængä nāmā pōnēninque gampocantapa.

²² Gampocä ate Itota dadi ēmæmonte adinque,

—Onquiyæmi, wæwēnāmai iē. Bitö wede pōnēnō beyæ edæ wantæ bawēnemipa.

Ante āñongä do edæ wantæ bawēnengacäimpa.

²³ Itota māni godinque awēnē oncōnē go guite ayongä nē ööña bai öönāni tönö nangui ināni cægonte Yæ yæ wædāni inānite adinque, ²⁴ tömēnāni inānite,

—Gä goedāni, āninque, Inæmpa inōmō wēñængä wodi wii æmæwo wængampa. Önonque edæ mö ñongampa.

Angä ēñēninque tömēnāni, Angantedö amīni, ante tömengä ingante badete todānitapa. ²⁵ Ayæ māni angä taodāni adinque Itota pö guidinque wēñængä baquēcä wodi ingante pædæ wææmpo bæi ongonte töö æmængä ate wēñængä ængæ ganticantapa. ²⁶ Mānōmai cæcä adinque nē adāni inōmō gode ä gode ä cædāni ate māniñōmō quēwēnāni tömānāni ēñengadānimpa.

Babetamōna inate Itota gampomongä waa adapa

²⁷ Itota wadæ gote godōmenque goyongä babetamōna tee empo ponte aa pedinque,

—Awēnē Dabii pæimi inōmi inte mōnatö imōnate pōnō waadete waa cæbi æmōnae, ante ancaa aa pedatapa.

²⁸ Aa peyöna tömengä edæ oncōnē go guicä adinque adoyömö pö guidatapa. Guida adinque Itota tömēna inate,

—Mīna ānō ante nō waa cæquimo, ante pōnēmīna.

Åñongante,

—Ao. Awēnē, bitö ānō bai cæcæbiimpa, ante pōnēmōnapa.

²⁹ Apæneda ēñēninque Itota pædæ gopo gampomōninque,

—Nē pōnēmīna inīmīna inte mīna pōnenganca do waa bacæmīnaimpa.

³⁰ Ante āñongä edæ tömēna awinca wi æmōnte bai adatapa. Itota inōmō edæ,

—Botö cædinö ante apænedāmai inguēnē quēwēmīnaa. Edæ pæ wēneyömīna ēñēnāmai incædānimpa, ante nangui angantapa.

³¹ Ininque wadæ godinque Itota nānō āninö ante wii ēñente cædinque tömēna, Itota mānōmai cæcä waa bamontamōnapa, ante tömāmæ māo apæneda ēñengadānimpa.

Wēncæ inte wido cæyongä babetadecä iningä tedecampa

³² Wadæ goyöna edæ wænæ tönö cæcä inte babetadecä inongä ingante Itota weca ænte pönäni. ³³ Adinque wænæ ingante Itota wido cæyongä babetadecä iningä iñömö edæ do tedecä adinque tömänäni ancaí guifiñenique,

—Itota nänö cædö bai mönö idægocabo adocanque incæ dicæ cæcä atamon-gaa, ante wædänitapa.

³⁴ Paditeoidi quiquënë,

—Wænæidi awënë tönö cædingä inte tömengä wido cæcä apa änewänäni, ante piingadänimpa.

Itota waodäni inänite waadete waa acampa

³⁵ Itota iñömö nangui näni quëwëñömö ayæ wædænque näni quëwëñömö wayömö wayömö godinque Wængongui angä näni ëñente yewæmongainta ate odömöincönë go guii go guii cædinque odömongä adänitapa. Ayæ, Mönö Awënë Odeye inguipoga oo ponguinö angüënë, ante nänö waa pönäni ante apænecä ëñänitapa. Ayæ quiëmë daicawo cæpämö adinque quiëmë wæncæ cæte wæwënö adinque tömengä godö cæcä waa badänitapa.

³⁶ Cæningancoo bai waodäni incæ bacoo inäni iñönäni në aadingä dæ angä bai inänipa, ante acantapa. Mänömaí inäni inte babæidi wiñaate wædinäni bai ængæ gantidämaí inäni bai waodäni incæ wæwëñönäni Itota tömënäni tönö godongämæ wæwente bai pönengantapa. ³⁷ Ayæ tömengä miñæ në godäni inänite apænedinque,

Tömëmoncoo bacoo bai inäni iñönänite tä pete inäni bai në gode änäni iñömö mënäniya pönäni inänipa cæmïni. ³⁸ Tömëmoncodë gæqui angä Awënë iñongante mïnitö tömengä ingante apænedinque, Tömëmoncodë në gæquinäni da godömi gote gæte bai äñete poncædänimpa, ante Wængongui ingante apæneedäni, ante Itota apænegacäimpa.

10

Itota angä ate dote ganca inäni në gode änäni badänipa (Mäadoco 3.13-19; Odoca 6.12-16)

¹ Ayæ ate tömengä miñæ në godäni önompo tipæmpoga go mënäniya mänimpodäni iñönänite Itota äñecä pönäni ate tömengä, Botö pönö cæbo ate mïnitö në ämïni badinque wænæidi në wentamö ewocadäni inänite wido cæcæmïnimpa, angantapa. Ayæ, Quiëmë daicawo gawænäni incæ quiëmë beyæ wæncæ cæte wæwënäni incæ mïnitö eyepæ inte godö cæmïni ate në wæwëniñäni waa bacædänimpa, ante pönö cægacäimpa.

² Itota nänö në da godöiniñäni önompo tipæmpoga go mënäniya mänimpodäni inänipa, ante adinque, Dote, ante näni gocabo inänipa, ante tededänipa. Tömënäni iïmaí ëmönäni inänipa. Tánoda Timönö Pegodo mönö änongå tönö Äntade nänä caya inapa. Ayæ Tebedeo wëna Tantiago tönö Wäö nänä caya inapa. ³ Pedipe tönö Batodömëë mënaa inapa. Odömäno awënë beyæ në æwëningä Máateo tönö Tömato mënaa inapa. Adepeo wengä Tantiago tönö Tadeo inapa. ⁴ Wacä, Mönö ömæ ingæimpa, ante në nangui cædingä incæ wacä Timönö ingampa. Ayæ Itota ingante odömonte në godonguingä Codaa Icadote mönö änongå ingacäimpa. Mänimpodäni Itota miñæ näni, Dote, ante gocabo inänipa.

Wængongui Awënë ingantedö ante apæneedäni, ante Itota angä godänipa (Mäadoco 6.7-13; Odoca 9.1-6)

⁵ Ininque Itota miñæ näni, Dote, ante gocabo iñönänite tömengä, “Mïnitö idægoidi inämaí inäni taadö godämaí inte edæ Tämadiadi näni quëwëñömö go

guidämaï ðedäni, ante da godongantapa. ⁶ Edæ cæningäidi obegaidi gueogæ gote bai ðnönäni inte monö idægocabo taadö oda cædinque tömënäni nani wë womonte wænguinö godänipa, ante adinque minitö tömënäni weca gote cæedäni. ⁷ Godinque minitö, Öönædë Awënë Odeye oo poncæcäimpa cæminii, ante mao apænemini eñencædänimpa. ⁸ Ayæ quiëmë beyæ nantate wæwënäni adinque godö cæmini ate waa bacædänimpa. Do wænïnäni inänite godö cæmini ate ñäni ömæmoncædänimpa. Baate inäni inänite godö wadæ caamini waitai baacædänimpa. Wënæidi inte godö wido cæedäni. Botö önonque änämaï inte pönö cæbo ænimini inte minitö botö cæbo bai adobaï cædinque wadäni inänite änämaï inte önonque godö cæmini æncædänimpa,” ante Itota angantapa.

⁹ Ayæ, “Minitö gocæ cædinque, Godonte æinta, ante tigitamö incæ oodo incæ padata incæ edæ wente æincadedë da wente ænämaï ðedäni. ¹⁰ Edæ wadäni beyænque në cæcä ðnömö tömengä eyepæ ænte quëwencæcäimpa cæminii. Mäincoo da wenguincade ænämaï inte goedäni, Weocoo mini eñacooque eñtate awæncata mini ewataque ewate ongonto mini nææntoque næænte goedäni,” angantapa.

¹¹ Ayæ apænedinque Itota tömengä miñæ në godäni inänite angantapa. “Nanguï pöni nani quëwëñömö incæ wædænque inäni nani quëwëñömö incæ minitö mäniñömö go guiidinque waocä në nö cæcä ingante ante diqui minte adinque mäningä oncönë go guiite owodinque wayömö mini go quëwenganca mänincönenque quëwëedäni. ¹² Mänincönë go guiidinque, ðnänäni, waa quëwëedäni, æedäni. ¹³ Ayæ äninque, Minitö weca æbänö pö guiite quëwenguimöni, äñömöni Ao änäni ate minitö tömënäni weca go guiite gänë pönëninque ee quëwëedäni. Wæætë nö cædämaï inäni adinque minitö edæ ee quëwënämaï edæ wadæ gomini wæcædänimpa. ¹⁴ Edæ, Pöedäni, änämaï inäni adinque ayæ minitö apænemini eñënämaï inäni ininque minitö wæætë tömënäni öncodo tao godinque, Minitö quëwëñömö näwate awædö, ante odömoncæte ante cædinque önöwa wadæ wadæ cæwate wadæ goedäni. ¹⁵ Edæ näwangä ämopa. Botö apænte anguionæ ðñonte Todömä ðnömö quëwengainäni tönö Gömoda ðnömö quëwengainäni tönö nanguï pante wæwëñönäni minitö iminute në Baa änäni quiquënë godömenque pante edæ wæwencædänimpa,” ante Itota tömënäni inänite da godongä godänitapa.

Togænte pancædänimpa, ante

¹⁶ Ayæ äninque Itota, “Cöwä æedäni, angantapa. Minitö ðnömö në cæningäidi bai ðnömöinite botö ðnömö mëñe bai inäni weca da godömo godinque minitö tæntæ nämä wææ cæcæte ante nänö eñente cæbai adobaï eñente cæedäni. Wæætë edæ equemö nänö ee cæbai minitö adobaï piñnämaï inte ee cæte quëwëedäni. ¹⁷ Ayæ edæ minitö iminute bæi ongöninque waodäni tömënäni në apænte änäni weca mao pædæ godönäni æncædänimpa. Ayæ godömenque tömënäni odömöincönë mao ænte godinque minitö iminute tæi tæi pancædänimpa cæminii. Ininque minitö edæ, Æbänö cæquänii, ante do eñëmini inte edæ nämä wææ aædäni. ¹⁸ Ayæ, Awënëidi tönö në eñënämaï inäni adobaï eñencædänimpa, ante cædinque botö ämo eñëninque minitö iminute mao pancabaa awënëidi gobedönadodoidi weca ayæ tömämæ awënëidi odeyeidi weca gönönäni gongæninque minitö botö beyæ apænecæminimpa. ¹⁹ Mäniñedë tömënäni nani ænte mao gönöñedë, Quinö bai apænequimoo, ante guiñënete wædämaï ðedäni. Mäniñedë edæ quinö bai apænequii, ante do eñencæminimpa. ²⁰ ðnæmpa wii nämä pönëninque apænequimini wæætë monö Wæmpo Önöwoca incæ apænecä eñëninque apænequimini iminipa,” ante Itota apænecæimpa.

²¹ Ayæ godömenque apænedinque Itota, “Mániñedē edæ nāna caya iñōnate adocanque nāemæ piinque, Wænoncæ, āninqe tōmengā tōniñacā ingante da godongā gocæcāimpa. Nāna wencaya iñōnate mæmpocā iñōmō nāemæ piinque, Wænoncæ, āninqe tōmengā wengā ingante da godongā gocæcāimpa. Ayæ wēñænāni incæ wæmpoda inate nāemæ piinque māo apænedāni ēñēninque wadāni tōmēnāni wæmpoda inate māmō wænōnāni wæncædāimpa. ²² Ayæ, Coditoidi iminipææ, ante tōmānāni botō ēmōwo beyænque mīnitō iminite nanguī piincædānīmpa. Piināni wæwēmīni incæ æcānō iimæca linque baganca wæntædāmaī inte botō ēmōwo beyæ piinte badāmaī ingāā tōmengā ingante botō æmo beyænque quēwencæcāimpa. ²³ Māniñedē ate waodāni togænte pancæte ante mīni quēwēñōmō pōnāni ate wædinque mīnitō iñōmō wayōmō wadāni nāni quēwēñōmō wodii winōedāni, āmopa. Edæ nāwangā āmopa. Edæ mōnō Idægobæ wayōmō wayōmō wodii winōninque pancayōmonga goyōmīni botō Waobo ēñagaīmo inte edæ do poncæboīmpa,” ante Itota apænegacāimpa.

²⁴ Ayæ, “Nē odōmongā ingante piinte cæyōnāni tōmengā miñæ nē gocā ingante edæ ædō cæte piinte cædāmaī inguīnāni. ²⁵ Awēnē nē odōmongā wæwente quēwēñongā tōmengā miñæ nē gocā guiquēnē ædō cæte wæwēnāmaī quēwengūngā. Edæ nē cæcā tōmengā awēnē baī bacā ininque idæwaa edæ imāimpa. Botō oncō ēacā baī nē Awēnē imo iñōmote wadāni, Wēnæ awēnē Beedeboobi imidō anguēnē, ante piināni incæ mīnitō botō tōnō mīni quēwencabo iñōmīnite wadāni godōmenque wēnæ wēnæ ante piincædānīmpa,” ante Itota apænecā ēñengadānīmpa.

*Guīñēnāmaī iedāni, ante
(Odoca 12.2-7)*

²⁶ Ayæ apænedinque, “Incæte tōmēnāni inānite guīñēnāmaī iedāni. Iñæmpa, Adāmaī incædānīmpa, ante quiēmē wē womonte i incæ iincayæ ate tōmāā wi ænete bayonte edonque pōni bacæīmpa. Ayæ quiēmē awēmō cætel incæ iincayæ ate edonque pōni acædānīmpa. ²⁷ Botō wēmō iñōmō mīnitō iminite apænebo ēñente ate mīnitō botō apænedō ante nāō apāiyōmō apænecæmīnīmpa. Ayæ godō wæntæ botō āninō ēñente ate mīnitō æibæ oncōmanca æidinque ogæ tedete apænemīni ēñencædānīmpa. ²⁸ Ayæ nē baonque wænōnāni inte ōnōwoca wænōnāmaī ināni inānite adinque mīnitō tōmēnāni inānite guīñēnāmaī iedāni. Wæætē edæ baō tōnō ōnōwoca tadōmengadænguipo nē ōmæe ēwēnongā ingante guiquēnē mīnitō tōmengā ingante guīñente wæedāni.”

²⁹ Āninqe, Itota godōmenque apænecantapa. “Waocā ayamōidi ōnompō æmæmpoqe mānimpodāni beyæ tiguitamō adotamonque ante pædæ godongā amīnitowa. Incæte mīnitō Mæmpo ānāmaī iñonte ayamō adocanque incæ yæipodē wæñnāmaī ingāmpa. ³⁰ Mōnō ocagui incæ æpoguīnō encāmōō, ante Mæmpo Wængonguī do ēñēninque mōnō imonte aacāmpa. ³¹ Edæ, Ayamōidi bacoo pōni ininque ōnonque inānīpa, ante nē āningā inte mōnō Mæmpo iñōmō mīnitō iminite wæætē waa acā apa guīñēwēmīni,” ante Itota apænegacāimpa.

*Waadāni ēñēñōnāni mōnō Itota ingante Ao angæīmpa, ante
(Odoca 12.8-9)*

³² Godōmenque apænedinque Itota, “Æcānō waodāni ēñēñōnāni botō imote Ao āninqe, Bitō botō Awēnē inōmi imīpa, ante āna tōmengā ōōnædē æiyongante botō tōmengā ingante wæætē edæ Ao āninqe, Bitō iñōmō botō miñæ nē gogaīmi inōmi imīpa, ante botō Mæmpo ēñēñongā ancæboīmpa. ³³ Wæætē

waodáni eñññönáni botö imote në Baa angaingä ingante guiquënë botö Mæmpo öönädë në quëwengä eñññongä botö tömengä ingante adobaï edæ Baa ancæboimpa,” ante Itota apænecäimpa.

*Botö beyæñque guëa piincädänimpa, angampa
(Odoca 12.51-53, 14.26-27)*

³⁴ Ayæ apænedinque Itota, “Inguipoga quëwënäni piyænë cæte wæætedö wææte cädämaï inte quëwencädänimpa, ante cæcæte ante Itota imæca pongaingä ingampa, ante minitö pönëminitawo. Iñæmpa yaëmë nææante bai põmo imopa. ³⁵ Botö apænedö beyæ onguinænä nänä wæmpocaya incæ næëmæ piincädäimpa, ante põmo imopa. Onquiyænä adobaï nänä badancaya incæ næëmæ piincädäimpa. Nänä wæntecaya incæ næëmæ waadedämaï inte piincädäimpa, ante põmopa. Mänömaï cæbo imopa, ante pönëminiyaa. ³⁶ Iñique, botö äno beyæ nani owocabo incæ næëmæ waadedämaï piincädänimpa,” ante apænecäimpa.

³⁷ Ayæ apænedinque Itota iïmaï apænecantapa. “Edæ æcänö mæmpo tönö wäänä inate ædæmö waadedinque botö imote wææte pönömenque waadeda iñömö tömengä iñömö botö në emiñængä ædö cæte baquingä. Adobaï wëñængä ingante ædæmö waadedinque botö imote pönömenque në waadecä iñömö tömengä wææte botö në emiñængä ædö cæte baquingä. ³⁸ Ayæ æcänö botö miñæ pöinëna tömengä iñömö edæ, Awæ botö wænguiwæ, ante nææante ponte bai cædinque, Wænönäni wæmo incæte Itota miñæ cöwë gocæboimpa, ante poncæcäimpa. Wææte æcänö mänömaï cädämaï ina guiquënë tömengä ædö cæte botö në emiñængä inguingä. ³⁹ Æcänö namanque pönente, Imæcaque waa quëwenguïmo, ante änaa tömengä iñömö quëwënämaï incæcäimpa. Wææte edæ, Wæmo incæ wæwëmo incæ botö öönädë Awënë angä eñente cöwë cæcæboimpa, ante æcänö äna guiquënë tömengä iñömö edæ cöwë quëwencæcäimpa,” ante Itota apænecäimpa.

*Në pönngä nänö waa cædinö beyæ eyepæ æncæcäimpa
(Mäadoco 9.41)*

⁴⁰ Ayæ apænedinque, “Minitö iminite Ao äninque waocä botö imote do edæ Ao äningä ingampa. Ayæ botö imote Ao äninque botö imote në da pönongaingä ingante do edæ Ao äningä ingampa. ⁴¹ Wængongui beyæ në apænecä ingante bitö, Wængongui beyæ në apænëbi inte põe, ämi iñique Wængongui beyæ në apænecä nänö paga ænganca bitö adopo æncæbiimpa. Ayæ në nö cæcä ingante, Bitö në nö cæbi inte põe, ämi iñique në nö cæcä nänö paga ænganca bitö adopo æncæbiimpa. ⁴² Näwangä ämopa. Bitö Itota miñæ në gobi inte æpæ becæbiimpa, ante bitö guiyangä ingante pædæ godömi ængä iñique bitö godöni beyæ eyepæ æncæbiimpa,” ante apænedinque Itota tömënäni inänite da godongä gogadänimpa.

11

*Wäo tömengä miñæ në goda inate da pönngä pönapa
(Odoca 7.18-35)*

¹ Ayæ tömengä miñæ nani, Dote, ante gocabo inänite iñique apænedinque Itota wadæ godinque tömënäni nani quëwëñömö odömoncæte ante ayæ, Eññencädänimpa, ante apænecæte ante wayömo wayömo gocantapa.

² Mäniñedë edæ Wäo iñömö tee mönete ongöñongante wadäni tömengä weca pöninque, Mönö Codito iïmaï cæcampa, ante tededäni eñente wædinque Wäo wææte tömengä miñæ goda inate Itota weca da godongä godatapa.

³ Īnque Wāo beyæ ancæte ante pōnque tōmēna ĩmāinō ante Itota ingante apænedatapa.

—Bitō ĩñōmō dodāni nāni, Nē Ponguingā, ante nē angāimi adobi ĩmitawo. Wæætē tōmēnāni nāni nē angāimi ĩnāmai ĩmi ĩnque bitō wæætē, Wacā ponguingā, ante wānō cōedāni, āmitawoo. Æbānō mōnitō cæquimōnii, ante ēñencæte ante wæmōnipa.

⁴ Ante āñōnate Itota wæætē, “Mīnatō ponte ēñēñōmīna botō æbānō apænebo ēñēmīnatawo, ante ayæ, Botō æbānō cæbo amīnatawo, ante mīnatō wæætē Wāo weca gote māo apænemīna ēñengæda. ⁵ Botō godō cæbo ate babetamō ĩnīnāni incæ waa bamonte adāni amīnapa. Cōmante ĩnīnāni incæ waa bate dao dao godāni amīnapa. Baate ĩnīnāni incæ æmontai waēmōntai baadāni amīnapa. Babetamonca ĩnāni ĩñōnānite botō godō cæmōmo ate ōnōmonca waa bamoncate ēñēnāni amīnapa. Do æmæwo wænte ōñōnāni ĩñōnānite botō godō cæbo ate ñāni ōmæmōnāni amīnapa. Ōmaadāni inte wæyōnānite botō Wængonguī waa pōni nānō pōnō cægāinō ante apænebo ēñente todāni amīnapa. ⁶ Ayæ, Botō beyæ waocā wīi pīinte wadæ gocā ĩñōmō tōmengā watapæ nānō quēwenguinque edæ oda cædāmai incæcāimpa, ante apænebo ēñēnīnque mīnatō Wāo ingante māo adodō ante apænemīna ēñengæda,” ante Itota angantapa.

⁷ Angā ēñēnīnque Wāo beyæ nē ānīna wadæ goyōna edæ Itota wæætē tōmānāni ĩnānite, Wāo æbānō ingāā, ante apænecantapa. “Mīnitō guiquēnē quīnō acæte ante ōnōmæca gomīnitapa. Cæwīpa woboyæ pæmænte ate æmæñō ædæ æmæñō ædæ gobaingā ingante mīnitō dicæ acæ gomīnitawogaa. ⁸ ĩnque edæ quingānō ingante acæte ante gomīnitapa. Waocā weocoo waēmōncoo mongænongā ingante mīnitō dicæ acæ gomīnitawogaa. ĩñæmpa waēmōncoo mongængā ĩñōmō awēnē oncōnē quēwengā apa quēwēnānii. ⁹ ĩnque edæ quīnante gomīnitawo. Mīnitō mīni nē go acæ cædongā ĩñōmō edæ Wængonguī beyæ nē apænecā ingantawo. Nāwangā ĩmpa. Wængonguī beyæ nē apænecā Wāo ĩngampa. Incæte tōmengā wīi Wængonguī beyæ nē apænegaināni bai ĩnongā inte godōmenque nanguī cæcā ĩngampa, ante apænebo ēñēmaimīnipa. ¹⁰ Wængonguī ĩlmai angampa, ante yewæmongatimpa.

‘Botō beyæ nē apænecā ingante da pōnōmo pōnīnque tōmengā taadō tāno beyænte bai cæcæcāimpa.

Tōmengā bitō Codito ĩmi beyæ ante taadō waa pīnonte bai waa cæcæcāimpa.’ Mānōmāinō ante dodāni adocā Wāo ĩngantedō ante pōnēnīnque yewæmongadānīmpa. ¹¹ Nōwo ĩñōmō āmo ēñēedāni. ĩmæca mīni ēñagāincabo ĩñōnīnite æpænē mōnō nē guidōnongā Wāo adocanque ñæñængā ĩñongante wacā tōmengā bai edæ dæ angampa. Incæte ōñædē Awēnē Odeye nempo quēwēnāni ĩñōnāni adocanque guiyangā pōni ĩngā incæte Wāo pōnōmenque wædangā ĩngampa,” ante Itota apænecantapa. ¹² Ayæ ĩlmai ante godōmenque apænecantapa. “Wāo tāno nānō apænedōñedē ayæ godōmenque ñōwo ganca tæi pīñænāni pogodo pōnīnque, Ōñædē Awēnē Odeye nempo mōnō wāānē guicæimpa, ante tee tate guite bai cædinque, Mōnō Awēnē incæcāimpa, ante edæ ō ænte bai cædānīpa. ¹³ Edæ Wængonguī beyæ nē apænegaināni tōnō, ĩlmai cæedāni, ante nē wææ angaingā tōnō tōmēnāni tōmānāni edæ, Awēnē poncæcāimpa, ante cōwē Wāo nānō ponganca apænegadānīmpa. ¹⁴ ĩnque, Ediya wodi ayæ poncæcāimpa, ante nāni nē ānongā Wāo ĩñōmō adocā ĩngampa, ante pōnēmīniyaa. ¹⁵ Ēamonca ongonte ēñēedāni,” angantapa.

¹⁶ Godömenque apænedinque Itota iimaï angantapa. “Inguipogaque ante nê quëwënäni iñömö quingamê bai Inäni. Quiëmê bai edæ quëwënäni. Wëñænäni mönö godonte æiñömö tæ contate owempodäni näni owempodö bai edæ adobaï cædäni, ante awædö. Wëñænäni näni owempote cæcabo incæ ææmæ cæte bai owempote cædinque wadäni inänite aa pedäni. ¹⁷ ‘Minitö beyæ ööña we we ööñömöni minitö wæætê edæ äwadämaï iminitapa töö,’ ante owempodinque wëñænäni piinte tedewënäni. Ayæ wæætê, Waocä do wængä ate näni wæbai ante wëñænäni näni owempote cæcabo iñömö, ‘Mönitö Ca ca wæyömöni minitö wæætê edæ wædämaï imini wæmönipa,’ ante piiniqua aa pedäni bai ñowodäni iñömö edæ adobaï piinte tedewënäni inäni. ¹⁸ Iimaï edæ impa. Wëñænäni näni wædö bai Wäö iñömö cænguï cænämaï tepæ bedämaï ponte quëwëñongante ñowodäni guiquenê, Wënæ tönö Wäö quëwengampa, ante piinäni. ¹⁹ Ayæ wæætê botö Waobo ëñagaïmo inte edæ ponte nê cænte bete quëwëmo adinque botö imotedö ante minitö iñömö, Cæowæobi inte cæmipa. Beowæobi inte bebipa, ante badete tomäni. Ayæ godömenque, Odömäno awënê beyæ nê æwënäni tönö nê ëñänämaï cædäni iñönänite bitö tömënäni æmigo imipææ, ante botö imote piiniqua minitö wëñænäni näni piinte aa pedö bai änewëminipa töö. Incæte, Nê nö ëñänäni iñömö nö cædäni, ante adinque, Näwangä nö ëñänäni, ante mönö ëñengæimpa,” ante Itota apænegacäimpa.

*Nê ëñänämaï cædäni inänite Itota piingampa
(Odoca 10.13-15)*

²⁰ Ayæ, Minitö quëwëñömö botö bamönengæ nanguï cæbo adimäni incæ minitö wënæ wënæ mini cædinö ante, Anca wæwente awædö, ante dicæ wæminitawogaa, ante piiniqua Itota wayömö wayömö tömengä nänö nanguï cædiñömö quëwënäni inänite iimaïno ante mä piingantapa. ²¹ “Codatü iñömö quëwëmini ëñëdäni. Betaida iñömö quëwëmini ëñëdäni. Minitö mini wæwenguinque ëñänämaï cæte quëwëminidö angüenê. Edæ botö minitö weca tæï piñænte botö cædi bai Tido näni quëwengaiñömö Tidö näni quëwengaiñömö adobaï cæbo bai mäniñömö quëwengainäni iñömö tömënäni dobæ wënæ wënæ näni cægäinö ante ñimpo cædinque weocoo gömæ ëmoncoo wëñadinque gönai öni pæcate Ca ca wæcægadänipa. ²² Iiniqua minitö iminite ämopa. Wængongü nänö apænte angüönæ iinque bayonte Tido iñömö quëwengainäni tönö Tidö iñömö quëwengainäni inänite nanguï pangä wæwënäni incæte tömengä minitö iminite godömenque pangä wæwencæminipa. ²³ Ayæ Capënaömö iñömö quëwëmini ëñëdäni. Minitö iminite Wængongü dicæ öönädê wo ææntodongä æi gote toquimäniyaa. Iñæmpa tadömengadænguipo wææntodongä guï wæcæminipa. Edæ botö minitö weca tæï piñænte botö cædi bai Todömä näni quëwengaiñömö adobaï cæbo bai tömënäni näni quëwengaiñömö edæ godömenque ñowo ganca edæ mæ ongoncædönipa. ²⁴ Iiniqua edæ ämo ëñëdäni. Wængongü nänö apænte angüönæ iinque bayonte Todömä quëwengainäni inänite nanguï pangä wædäni incæte minitö iminite godömenque pangä wæcæminipa,” ante Itota tömënäni inänite piingacäimpa.

*Botö weca pö guëmädäni, angampa
(Odoca 10.21-22)*

²⁵ Ayæ mäniñêdê Wængongü ingante apænedinque Itota, “Mæmpo ëñëmi. Wadäni nänä ocai encadäni tönö nanguï adinque nê ëñänäni tönö mäniñö bitö ëñengäinö ante ëñänämaï incædänipa, ante cædinque bitö cægäinö ante wë wodonte bai pæ wëënegabiimpa. Wæætê edæ wëñænäni näni

pönēno bai nē pönēnāni inānite wæætē bitō edonque odömōmi adinque do ēñēnānīpa. Bitō öönædē Awēnē ingaīmi inte inguiþoga Awēnē adobi inōmi inte edæ mǎnōmaī cæþīpa, ante adinque botō bitō imite waa ate pönēninque apæneþopa. ²⁶ Mæmpo, bitō tōmēmi ānō bai cædinque waa cæþi adinque botō Ao āmopa,” ante Wængongui ingante waa apæneþantapa.

²⁷ Wængongui ingante iinque apænedinque Itota godongāmæ ongōnāni inānite wæætē apæneþantapa. “Botō Mæmpo nō ēñēngā inte pōnō odōmongā beyænque botō iñōmō tōmānō ante nē ēñēmo imopa. Ayæ, Botō tōmengā Wēñæmo iñōmote botō Mæmpoque botō imote nē againgā iñongante wadāni adāmaī inānīpa. Wæætē edæ Mæmpocā ingante botō tōmengā Wēñæmo inōmo inte adoboque nē agaīmo imopa. Iinque, Botō abo bai iinānique adobaī ate bai pōnencædānīpa, ante cædinque botō mīnitō imīnite odōmōmo adinque mīnitō adobaī Mæmpocā ingante nē ate bai pōnēmīni bamīnīpa.”

²⁸ “Teēmē mongænte bai nangæ batawēmīni iinque mīnitō botō weca pōmīni ate botō wæætē teēmē mongænte mīni wæwēnō ante ö æmo ate mīnitō wæætē gancaþ pōnente guēmancæmīnīpa. ²⁹ Edæ botō mīmōno gānē pönēninque nāmā beyænque ānāmaī quēwēmo adinque mīnitō botō weca pōmīni iinque botō mīnitō tōnō iñacabo cæcæþoimpa. Edæ wagadada awæmpaa goti wīmoncate āāmencaque goda bai mōna guēa cæcaya bayōmōna botō nō ēñēnōmo inte pōnō odōmōnte apæneþo ēñēninque mīnitō önōwoca wampo pōnente guēmancæmīnīpa. ³⁰ Edæ botō tōnō āāmencaque bai cædinque bitō iñōmō oo wīmoncadimpa mongænte bai edæ do cæcæþiimpa. Botō mongæncōo wodæī iñonte bitō wæætē edæ wodæī mongænte gote bai nangæ badāmaī incæþiimpa,” ante Itota iinque apænegacāimpa.

12

Guēmanguiōnæ iñonte tōmēmō tā pete ænānīpa (Māadoco 2.23-28; Odoca 6.1-5)

¹ Māniñedē guēmanguiōnæ iñonte Itota tōmēmōncodē tæcæguedencodē go-cantapa. Goyongā tōmengā mīñæ nē godāni guiquēnē gæwænte wædinque tōmēmō tā pe tā pe æninque tæcæ cæncæ cædāni. ² Adinque Paditeoidi guiquēnē Itota ingante wæætē,

–Bitō mīñæ nē godāni æbānō cædāni, ante cōwā aquēnē. Iñæmpa, Guēmanguiōnæ iñonte māniñō bai cædāmaī iedāni, ante dodāni nāni wææ angainō ante ēñēnāmaī inte iināni iñōmō do cædānīpa tōö.

³ Ante þiññōnānite Itota,

–Mīnitō iñæmpa docā Dabii wodi tōnō godongāmæ godāni tōnō gæwænte wædāni iinque tōmengā æbānō cægacāi ante yewæmonte ongō incæte mīnitō iñōmō adāmaī inte bai ānewēmīni awædō. ⁴ Tōmengā iñōmō Wængongui oncōnē go guicantapa. Mānincōnē, Wængongui quī, ante nē godōnānique cængui impa, ante wææ nāni angainō bai cædinque tōmēnāni, Wængongui quī, ante pāö ñoncæ ñoncæ cædōnānīpa. Incæte māniñ pāö wī Dabiidi cængui iñi incæ Dabii do cængantapa. Ayæ tōmengā tōnō cægōnāni adobaī godongāmæ cængadānīpa. ⁵ Ayæ, Wængongui quī, ante nē godōnāni iñōmō Wængongui oncōnē ñænāncōnē iñōmō önōnæque nāni cæþaī guēmanguiōnæ iñonte adobaī cædāni incæte wentamō entawēnāmaī önonque cæcædānīpa, ante Möitee wodi wææ yewæmongacāimpa. Mīnitō iñōmō māniñō ante adāmaī inte bai ānewēmīnīpa tōö, angantapa.

⁶ “Ayæ apæneþo ēñēdāni. Mīnitō, Wængongui oncō ñænāncō waa pōni ongoncompa, ante ayōmīni edæ botō ñōwo mīnitō weca nē ongōmo guiquēnē

wīi Wængonguī oncō bai ongōmo inte wīi önōmoque ongōmopa. Wæætē edæ nāmā nō cædōmo inte botō iñōmō edæ godōmenque waa pōnī ongōmo apa quēwēmīni. ⁷ Incæte, Wængonguī iīmaīnō ante apænecampa. ‘Wængonguī quī, ānīnque mīni iya tånō ante pōnōmenque waa adīnque botō nē waadete mīni godō waa cædō ante godōmenque waa abopa,’ ante Wængonguī angampa. Īnīnque mīnitō iñōmō Wængonguī nānō angainō ante ēñēmīni inte bai iīnāni wentamō mongæñāmaī iñōnānite, Mīni pante wæquinque mānōmaī cæmīnīpa, ante apænte pīnāmaī incædōmīnīpa. ⁸ Botō iñōmō Waobo nē ēñagāīmo iñōmō Tæiyæ Awēnē ĩnōmo ĩmopa. Īnīnque botō nē guēmanguīōnæ Awēnē ĩnōmo inte edæ, Guēmanguīōnæ iñonte edæ æbānō cæquī, ante adobo nē Āmo ĩmopa,” ante Itota apænegacāīpa.

Nī cōmampoingā

(Māadoco 3.1-6; Odoco 6.6-11)

⁹ Ānīnque wadæ godīnque Itota iñōmō Wængonguī angā nāni ēñente yewæmongainta ate oodeoidi nāni odōmōincōnē go guīgacāīpa. ¹⁰ Māniñōmō nī cōmampoingā a ongongā adīnque Paditeoidi guīquēnē, Itota wapiticæ cæcā ĩnīnque mōnō māo piīnte angæīmpa, ante nē ānāni inte tōmengā ingante ānānitapa.

—Guēmanguīōnæ iñonte wacā waa bacæcāīpa, ante cædāni, ante Wængonguī wææ angantawo.

¹¹ Ante Itota ingante āñōnānite tōmengā wæætē,

—Guēmanguīōnæ iñonte waocā tōmengā cæningā ontatodē goyæ guī adīnque mīni waocabo ĩmīni incæ æcāmē pædæ guīpote æñāmaī ĩmaingāā.

¹² Cæningā ōnonganque iñongante waocā iñōmō waēmō pōnī ingampa, ante adīnque guēmanguīōnæ ĩ incæte waodāni beyæ cōwē waa cæcæīmpa, ante āmo ēñēmaīmīnīpa.

¹³ Ānīnque nī cōmampoingā ingante wæætē,

—Pædæ pompobi, angā.

Ēñēnīnque tōmengā pædæ gopodīnque æmæmpo bai waa empocā bacantapa. ¹⁴ Adīnque edæ Paditeoidi guīquēnē wadæ godīnque, Ābānō cæte tōmengā ingante wænōmō wænguingāā, ante godongāmæ pōnēnīnque tede-gadānīpa.

Codito æbānō cæqingā, ante Itaiya nānō apænegainō

¹⁵ Tōmēnāni, Wænongæīmpa, ante pōnente tededāni wædīnque Itota iñōmō wadæ gocantapa. Wadæ goyongā tæiyæñāni tee empo godāni ate wædīnque tōmengā godō cæcā ate nē wēnæ wēnæ inte wæwēnīnāni tōmānāni waa badānitapa. ¹⁶ Ayæ nē waa badīnāni ĩnānite, Mīnitō, Botō æbodō ĩmo, ante māo apænedāmaī ĩedāni, ante wææ angantapa. ¹⁷ Īnīnque Itaiya wodi Wængonguī beyæ nē apænecā iīmaīnō ante nānō yewæmongainō bai ĩnīnque cætīmpa.

¹⁸ “Wængonguī iīmaī ante apænecampa. Botō ĩmote nē cæqingā incæcāīpa, ante botō nē apænte ænongā iñōmō a ongongā aedāni. Adocā botō nē waadedongā iñongante botō tōmengā ingante adīnque watapæ tobopa.

Botō Ōnōwoca ingante da pōnōmo ænte ēwocadīnque botō ĩmo nē cæcā iñōmō, Botō nō cæte apænte ancæboīpa, ante tōmengā oodeoidi ĩnāmaī ĩnāni ĩnānite māo apænecæcāīpa.

¹⁹ Incæte tōmengā wīi wæætedō wæætē piīncæcāīpa. Ogæ tededāmaī incæcāīpa.

Waodāni taadō godinque tōmengā dicæ Yæ yæ ante tedecā ēñēnāniyaa.

²⁰ Cæwipa bedē næænimpa wā tadāmaī ināni bai waocā wæwengā iñongante tōmengā adobaī nē wæwengā ingante wido cædāmaī ingampa.

Ayæ gongapæncade cōmencaguī mīni tente tēēmāmoque go adinque pi ongōmōnāmaī ināni bai tōmengā adobaī waocā wæntæye bayongante tōmengā ingante godō piñnāmaī ingampa.

Adocā botō imote nē cædongā ingaingā inte tōmengā nē Awēnē nānō baganca cōwē nōingā ante apænte ānīnque cōwē waa cæcæcāimpa.

²¹ Ayæ botō imote nē cædongā nē Awēnē bacā adinque wadāni oodeoidi ināmaī ināni incæ, Tōmengā ēmōwo beyænque mōnō quēwengæimpa, ante pōnencædānimpa,”

ante Itaiya wodi Wængonguī beyæ nānō yewæmongainō bai Itota mōnō Codito ñowo ponte waa cæcā ingampa.

*Wēncæ tōnō cæcā imaingampa, ante wapiticæ ānānīpa
(Māadoco 3.20-30; Odoca 11.14-23, 12.10)*

²² Māniñedē wacā wēnæ tōnō quēwēnongā inte babetamongā babetadecā badingā iñongante wadāni tōmengā ingante ænte māmōnāni pongā adinque Itota godō cæcā ate tōmengā awinca adinque nē tedecā bacantapa. ²³ Cæcā waa bacā adinque tōmānāni, Æbānō cæcāā, ante guīñente wædinque, “Awēnē Dabii wodi pæingā wabānō imaingampa,” ante pōnente wægadānimpa.

²⁴ Mānōmāinō ante wædāni ēñēnīnque Paditeoidi guiquēnē, “Iñæmpa wēnæidi awēnē Beedeboo tōnō nē cæcā inongā inte Itota wēnæidi inānite wido cæbaingampa,” ante tedewēnānitapa.

²⁵ Wapiticæ tōmēnāni pōnēnō ante ēñente wædinque Itota tōmēnāni inānite, “Awēnē odeye nempo quēwēnāni iñōmō nāēmæ wæætēdō wæætē cædāni iñinque awēnē odeye nānō ōmædempote wæquinque tōmēnāni nāmā ēwente cæbainānīpa. Ayæ adocōnē owocabo incæ adoyōmō godongāmæ quēwēnāni incæ nāēmæ wæætēdō wæætē cædāni iñinque tōmēnāni oncō woquinque nāwæ gobainānīpa. ²⁶ Ayæ Tatāna nempo quēwēnāni iñōmō edæ nāēmæ piñinque wæætēdō wæætē cædinque tōmengā ingante wido cædāni iñinque Tatāna dicæ tōmēnāni awēnē odeye imaingāā. ²⁷ Mīnitō, Beedeboo tōnō cædinque Itota wēnæidi inānite wido cæcampa, ante tedewēminīpa. Māniñō mīni ānewēnō nāwangā i bai mīnitō miñæ nē godāni guiquēnē æcānō tōnō cæte wido cædāni. Iñinque mīnitō miñæ nē godāni incæ mīni ānewēnō beyænque ante nāēmæ piñinque mīnitō imīnite wæætē apænte ānīnque piñcædānimpa anguēnē. ²⁸ Botō iñōmō Wængonguī Ōnōwoca tōnō cæte wēnæidi inānite wido cæbo apa ānewēmīni. Mānōmaī i iñinque botō Wængonguī Awēnē Odeye inōmo inte mīnitō weca do pōmo aedāni,” ante Itota apænegacāimpa.

²⁹ Ayæ apænedinque tōmengā, “Nē tæi piñængā ingante wīi goto wīinque waocā ædō cæte tōmengā oncōnē guite māincoo ō ænguingāā. Edæ nē ēacā ingante bæi ongonte goto winte ate pō guite ō ænāni bai botō iñōmō wēnæ inte nē bæi ongote wido cæbo imopa,” angantapa.

³⁰ Ayæ, “Botō tōnō æcānō wīi godongāmæ cæcā iñōmō tōmengā iñōmō edæ Baa ante botō imote piñte cæcā ingampa. Ayæ botō, Waodāni botō miñæ poncædānimpa, ante cæyōmo waocā botō tōnō wīi cæcā iñōmō tōmengā wæætē botō miñæ poncæ cæyōnānite tatodongā wadæ godānīpa,” ante apænecantapa.

³¹ Ayæ, “Iñinque apænebo ēñēedāni, angantapa. Mīni waocabo wēnæ wēnæ cæmīni incæ Mæmpo Wængonguī ingantedō ante babæ ante godō wīwa āmīni incæte Wængonguī wæætē tōmānō beyæ pōnō ñimpo cæcā beyænque

quëwencæminimpa. Wæætē edæ Wængonguī Ōnōwoca ingante babæ ante godō wīwa ämīni īnīnque Wængonguī mānīnō ante cōwē űimpo cædāmaī incæcäimpa. ³² Ayæ botō Waobo ēñagaīmo īñōmote botō īmotedō ante waocä pīīnīnque adodeque angä incæte Wængonguī godō űimpo cæcä ate quëwencæcäimpa. Wæætē botō Tæiyæ Waēmō Ōnōwoca ingantedō ante æcänō pīīnīnque babæ äna guiquēnē tōmengä inguipoga nänō quëwengäñedē incæ wænte ate nänō goyedē incæ Wængonguī tōmengä nänō wënæ wënæ äninō ante cōwē űimpo cædāmaī incæcäimpa,” ante Itota apænegacäimpa.

Awæ æbänō iwæ, ante tōmenca bete ēñengæimpa, ante (Odoca 6.43-45)

³³ Ayæ waomō mōnō cædinō ante awæ incate bai ĩmpa, ante odōmoncæte ante Itota ĩlmaī ante apænegacäimpa. “Awæ æbänō iwæ, ante ēñencæte ante mōnō tōmenca tā pete bete ēñengæimpa. Awæ waiwæ iwæ īnīnque tōmenca wainca incaquīwæ ĩmpa. Wæætē awæ baawæ iwæ īnīnque edæ tōmenca baaca incaquīwæ iwæmpa, ante ēñengæimpa. ³⁴ Mīmōnē mōnō pōnēmāmo eyede tate bai tao godedinque mōnō mānīmāmoque ante pōnēnīnque tede-mompa. ĩnīnque mīnitō tæntæ pæīmīni bai ĩmīni ĩñōmō wīwa cæte quëwēmīni inte mīnitō ædō cæte waa ante apænequīmīni. ³⁵ Ayæ waa pōnī māincoo da wente ate tadonte ænāni bai cædinque nē waa cæcä ĩñōmō mīmōnē waa pōnī nänō entawēnīnō ante pōnēnīnque waa pōnī tedete waa cæcampa. Nē wīwa cæcä guiquēnē mīmōnē wīwa nänō entawēnīnō ante pōnēnīnque wīwa tedete wënæ wënæ cæcampa.”

³⁶ “Edæ apænebo ēñeedāni. Wængonguī tōmengä nänō apænte anguīōnæ ĩñonte, Mānīne quīnante ōnonque tedebitawo, ante angä ēñēnīnque mīni wao-cabo edonque apænequēnēmīni ĩmīnīpa. ³⁷ ĩnīnque mīni tedepāmo tōmāmāmo ante Wængonguī apænte änīnque edæ pancamīniya ĩmīnite űimpo cædinque edæ pancamīniya ĩmīnite, Mīni panguīnque tedewēmīnīpa, ancæcäimpa,” ante Itota apænegacäimpa.

Mä cæte odōmōmi amōnie, ante äñānīpa (Mäadoco 8.11-12; Odoca 11.29-32)

³⁸ Apænecä ēñēnīnque nē odōmōnāni tōnō Paditeoidi pancadāniya Itota ingante apænedīnque,

—Awēnē nē Odōmōmi ēñēmi. Pōnencædānīmpa, ante mä cæte bitō odōmōnō ante mōnitō äinente wæmōnīpa.

³⁹ Äñōnāni Itota wæætē,

—Mīni nē wīwa cæcabo inte Wængonguī ingante emō cæte pangote bai mīni wadæ godincabo ĩñōmō mīnitō, Mä cæte odōmōmi adīnque pōnēmāīmōnīpa, ante ancaa ämīni awædō. Nāwangä ämo ēñeedāni. Nōwomīni ĩmīnite mä cæte odōmōnāmaī ingæimpa. Cōnāō wodi beyæ nänō cægāinō ante edæ mānīnque mīni aīnīnque cæcæimpa änewēmīni. ⁴⁰ Mēōnaa go adoönæque ĩñonte gæyæ cæncadē Cōnāō wodi nänō ongongai bai edæ botō adobai Waobo ēñagaīmo inte edæ mēōnaa go adoönæque adopoönæ wao wodido on-goncæboīmpa. ⁴¹ Cōnāō wodi Wængonguī beyæ apænecä ēñēnīnque Nīnebaidi wënæ wënæ nāni cægāinō ante űimpo cædinque Wængonguī gāmænō pongadānīmpa. Cōnāō wodi wædangä ĩñongante botō nē ñænæmo inte nō ante apænebo ēñēnīnque mīnitō wæætē ēñēnāmaī ĩmīnīpa. ĩnīnque Nīnebaidi Wængonguī gāmænō nē pongāināni incæ Wængonguī nē apænte angä weca pōnīnque mīni űōwo quëwencabo tōnō godongāmæ gongænte ongōnīnque, Mīni panguīnque ēñēnāmaī ingāmīnīpa tōō, ante apænte pīñānīdō anguēnē.

⁴² “Ayæ adobai betamonca gämæno ömæ awënë onquiyængä iñömö awënë Tadömöö wodi nangui ëñente nänö apænedö ante ëñencæte ante doönæ quëwëninque pongacäimpa. Tadömöö wædænque ëñengä iñongante botö godömenque nangui ëñëmo inte minitö weca ongöñömete minitö iñæmpa wii ëñëminipa töö. Ìninqe mäningä onquiyængä incæ Wængongui në apænte angä weca pöningue mini ñöwo quëwencabo tönö godongämæ ongöningue, Mini panguinque ëñënamai ingaminipa töö, ante apænte piincæcäimpa,” ante Itota apænegacäimpa.

Wënæ waodë owote godingä inte adodö pongampa, ante (Odoca 11.24-26)

⁴³ Ayæ apænedinque Itota iimaï ante apænecantapa. “Waacä baönë owote ate tao godinque wënæ iñömö edæ, Quingänö baönë go guidinque edæ guëmante quëwenguimoo, ante diqui diqui minte ayongä önomæca to aminte i ate wædinque edæ,⁴⁴ ‘Botö tao godincönë adodö go guiite quëwencæboimpa,’ ante pönëninque adodö pongampa. Ponte ayongä waocä önonganque bayongante wacä önowoca tömengä owodämai ingä adinque wënæ wæætë, Æ waocä botö owodincö bai inongä inte ñöwo önonconque bai wadæ ñëmænte mäincoo cabo tē gæte bai ömæwocä ingä abopa.⁴⁵ Ante adinque tömengä wæætë godinque wënæidi godömenque wiwa cädäni tiæte ganca mänimpodäni inänite ænte pongampa. Tömënanäi tömänäni waocä baönë godongämæ pö guiite owodäni ate waocä iñömö wënæ yewæninque godömenque wæwengampa. Ñöwomini guiquënë wiwa mini cæcabo adobai bate wæwencæminipa,” ante Itota apænegacäimpa.

Itota badä tönö tömengä biwïidi (Mäadoco 3.31-35; Odoca 8.19-21)

⁴⁶ Itota oncönë a ongöningue nangui inäni inänite apæneyongä tömengä nänö biwïidi tönö tömengä wäänä tömengä ingante bee tente apænecæte ante oncodo ponte a ongönäni.⁴⁷ Adinque wacä ãñecæ ponte apænecantapa. —Bitö badä bitö biwïidi bitö imite apænecæte ante oncodo ponte yabæque ongönänipa cæbii.

⁴⁸ Æñongante Itota wæætë,

—Botö badä ædänö inää ante ämoo. Ayæ botö biwïidi ædänidö inänii ante ämoo, ante pönëmïni.

⁴⁹ Äninque, Itota tömengä miñæ në godäni gämæno oo cæmöninque,

—Ìinäni iñömö botö badäidi botö biwïidi inönäni inänipa, ante mänömainö ämo abaïminipa.⁵⁰ Mönö Mæmpo öönædë në quëwengä nänö äno bai ëñente æcänö cæte quëwëna mäningä edæ botö biwi ingampa. Mäningä botö biwinque ingampa. Mäninä botö badä inampa, ante pönencæboimpa, ante Itota apænegacäimpa.

13

Waacä nänö quiyadö ante odömonte apænecampa (Mäadoco 4.1-9; Odoca 8.4-8)

¹ Mänionæ edæ Itota oncodo tao godinque gäwapæ wedeca godinque tæ contagacäimpa. ² Tömengä nänö tæ contate ongöñömö nangui inäni tömão goto ponte ongönäni adinque tömengä wæætë wipodë go guiite tæ contate wäi wocænte owoyongä tömënanäi ayæ gäwapæ yæwedecaque ömaaque ongönänitapa. ³ Ayæ ömaaque ongönäni inänite apænedinque tömengä,

Wængongui Awënë nempo quëwëninque æbänö cæquii, ante ëñencæminimpa, ante botö imæca quëwënnäni nani cædönö ante odömonte apænebo ëñëedäni.

Äninqe Itota nangui apænecantapa. “Waocä nê quiyacä iñömö quiyacä gocampa. ⁴ Gote quiyayongä pancamonga taadö iñömö wææmompä. Taadö wæænte eyepodimö öñöñonte ayamöidi pöningque dobæ ade cænänipa. ⁵ Pancamonga guiquënë dicamontaa onguipoi woyedömö iñömö eyepote wææmpä. Onguipoi woyedömö öñömö inte pæquinnämai quingæ tä bocate pædinque æmonga æipa. ⁶ Edæ guingo icate æmæwo näñe wæmpä. Ininqe oguimento yæyæmë guiwadämai inte cöñe bawadämai iñonte nænque ti näwäñö wänä cacadinque edæ guingo icate näñe wæmpä. ⁷ Pancamonga guiquënë ömentacodë nänö eyepodimö iñömö pæquinnämai tä bocate gä æiyonte ömentacoo pö incootonque ganta cæca ate näñe wæmpä. Wampo incapa pæquii. ⁸ Wæmonguipoga quiyadimö guiquënë tä bocate waa pædinque tömëmö nangui pöni incapa. Incate pancawæncaä tiëë ganca, pancawæncaä tetenta ganca, pancawæncaä todëinta ganca mänimpomö incapa. Quiyacä nänö quiyadö ante edæ botö mäninqe ante apænebopa. ⁹ Ëamonca ongonte ëñëedäni,” ante Itota apænegacäimpa.

Önömoncaque ëñente pönënnämai inänipa, ante (Mäadoco 4.10-12; Odoco 8.9-10)

¹⁰ Ayæ tömengä miñæ nê godäni tömengä weca ponte apænedinque, Itota ëñëmi. Bitö tömënnäni inänite inguipoga quëwënnäni nani cæinö ante odömininque quinante mäninqe ante odömonte apænebitawo.

¹¹ Äñönnänte Itota, “Öönædë Awënë Odeye nempo æbänö quëwenguüi, ante mïni waocabo wëenëñedë mïni ëñënnämai ingainö ante botö ñowo mïnitö imïnite pönö edonque apænebo ate mïnitö adöminique nê ëñëmïni bamïnipä. Wæætë tömënnäni inänite guiquënë botö mäninö ante godö apænedämai imopa. ¹² Edæ nê ëacä ingante godönäni nänö godömenque æi bai botö nê ëñengä ingante godö apænebo ate tömengä godömenque waa pöni ëñente bacæcäimpa. Wæætë nê ömæpocä inongä ingante wædænque nänö ëadi incæ ö ænnäni bai nê ëñënnämai ingä guiquënë adöbai wædænque nänö ëñënnö incæ ö ænte bai ëwente bai baquinö anguënë. ¹³ Incæte edæ awincaque adinque nê adämai inäni inte tömënnäni önömoncaque ëñëninque nê ëñënnämai inäni inte pönënnämai inänipa. Ininqe botö, Wængongui Awënë nempo æbänö quëwenguüi, ante ëñënnämai incädänimpa, ante cædinque imæca quëwënnäni nani cæinonque ante odömonte apænebopa, angantapa. ¹⁴ Edæ Wængongui beyæ apænedinque Itaiya wodi iimäi ante nänö yewæmongainö bai ñowo quëwënnäni incæ iinque cædänipa.

‘Nawangä ëñencæte ante cædinque mïnitö önömoncaque ëñëninque pönënnämai imïni inte ëñënnämai incæminimpa.

Nawangä acæte ante cædinque mïnitö awincaque adinque wæætë pönënnämai imïni inte adämai incæminimpa.

¹⁵ Mäninänäni, Wii ainëwædö, ante awinca mönæ guimonte bai cædinque,

Önömonca wii ëñëinëwædö, ante tee mömoncate bai cædinque,

Mimönë wii pönëinëwædö, ante mïmö ömædë inäni inänipa.

Wii mänömai i bai tömënnäni awinca adinque

önömonca ëñëninque mïmönnë pönencædönänimpa.

Ayæ tömënnäni nani waa baquinque edæ

dadi ëmæninque botö gämænnö poncædönänimpa.

Ante Itaiya wodi nänö angainö bai iinque cætimpa,” ante Itota apænegacäimpa.

16 Ante Itota tōmengā miñæ nē godāni inānite apænegantapa. “Minitō guiquēnē awinca do adinque ōnōmonca do ēñēninque mīni toquinque impa. 17 Nāwangā āmopa. Wængonguī beyæ nē apænegaināni tōnō nē nō cægaināni tōnō ñōwo mīni adō ante nanguī ainente wædāni incæte adāmaī ingadānimpa. Ayæ mīni ñōwo ēñēnō ante nanguī ēñēinente wædāni incæte ēñēnāmaī ingadānimpa,” ante Itota apænegacāimpa.

*Quiyacā nānō cædō ante pōnente ūmaī impa
(Māadoco 4.13-20; Odoca 8.11-15)*

18 Itota ayæ tōmēnāni inānite godōmenque apænegantapa. “Mānīi quiyacā nānō quiyainō ante apænedinque botō, Wængonguī Awēnē ingante æbānō ēñenguī, ante odōmoncæte ante apæneyōmo mīnitō ēamonca ongonte ēñēedāni, angantapa. 19 Awēnē Wængonguī Odeye nempo æbānō cæte quēwenguī, ante mōnō apænedō ante ōnōmoncaque ēñēninque waocā mīmōno pōñēnāmaī ingā ininque tōmengā mīmōno nānō ēñēninō incæ wēnæ nē wīwa cæcā inongā inte pō ō ængampa. Māningā nē pōñēnāmaī ingā iñōmō taadō wedeca eyepodīmō baī ingampa. 20 Woyedōmō dicamontaa eyepodīmō baī ingā guiquēnē tōmengā Wængonguī nānō apænedō ēñēninque quingæ Ao ante watapæ tocampa. 21 Ayæ ate adocā incæ tōmēmō woyedōmō baī oguimento wæyæmē guiwadāmaī baī ingā inte wantæ iñō quēwengampa. Wængonguī nānō apænedō beyæ piñāni wæyongā tōmengā ingante wēnæ wēnæ cæcæte ante togænāni ate wædinque tōmengā guīñente wædinque edæ emō cæte gocampa,” angantapa.

22 Ayæ, “Ōmentacodē wæænte pædīmō baī ingā guiquēnē tōmengā ēñēninque godōmenque quēwēñongā inguipoga quēwente quiēmē beyænque mōnō wæpāmo pōninque ayæ, Māincoo beyænque toquimo, ante nāni oda cæte wæwēmāmo pōninque ōmentacoo ñancate cæ baī cæyonte Wængonguī nānō apænedinō incæ incadāmaī baī bapa. 23 Onguipoga wainguipoga quiyadīmō baī ingā guiquēnē tōmengā Wængonguī nānō apænedō ēñente wede pōñēninque edæ tōmēwæ incate baī Wængonguī beyæ nanguī cæcampa. Pancadāniya edæ tiēē ganca incate baī nanguī cædānipa. Wadāni guiquēnē tetenta ganca incate baī cædānipa. Ayæ wadāni todēinta ganca incate baī cædānipa,” ante Itota apænegā ēñēnānitapa.

Waimō tōnō ōmentacoo quiyate pæmō ante odōmongampa

24 Ayæ wæætē inguipoga quēwēnāni nāni cæinō ante odōmōninque Itota godōmenque apænegacāimpa. “Ōönædē Awēnē Odeye iñōmō gōnea tōmēmō waimō nē quiyacā baī ingampa. 25 Tōmengā quiyate gocā ate waodāni mō ñōñōnāni wacā nē piinte cædongā inte wæætē tōmengā nānō quiyadiñōmō awēmō ponte, Ōmentacoo pæcæimpa, ante adoyōmō pōnō nī quiyate wadæ gocā. 26 Ate waimō tănā nā bocate waiwæ pædinque tōmēmō incayō adoyōmō tæcæguedē ōmentacoo pæ. 27 Adinque nē cædāni guiquēnē nē ēcā weca pōninque, ‘Awēnē, bitō gōnea quiyadiñōmō tōmēmō waimō mīnāmaī imitawo. Ædōnō ponte ōmentacoo adoyōmō pæ, ante wæmōnipa.’ 28 Ante añōnāni, ‘Wa. Mōnō piinte ānongā cæbaingampa. Wabānō ī.’ Ante pōñēñongā tōmēnāni, ‘Ininque bitō āmi godinque abæ wiquimōni, āmitawo.’ 29 Ānāni ēñēninque nē ēcā wæætē edæ, ‘Īñæmpa mānōmaī cæmīni ininque waiwæ tōnō ōmentacoo guēa abæ wite babaimpa. 30 Īninque mīnitō ñōwo edæ omæ widāmaī inte to amīña peganca ee amīni guēa pæcæimpa. Amīñayedē edæ nē pedāni inānite botō, Ōmentacoo tāno tē gæte topo cæte iya tāninque tōmēmō waimō

guiquënë tā pete māmō ññōedāni, ancæboimpa, ante nē ēacā apænecampa.” Mānōmainō ante odōmoncæte ante Itota apænegacāimpa.

*Mōotatamō guidimō ante odōmonte apænecampa
(Māadoco 4.30-32; Odoca 13.18-19)*

³¹ Ayæ wæætē inguipoga mōnō adō ante odōmōninque Itota godōmenque apænedinque, “Waocā mōotatamō tōmēmō ænte māo tōmēmōncodē quiyacā bocate pæ amñitawo. Mānimō guidimō inte ñænæ pæ bai Wængongui Awënë Odeye nempo mīni quēwencabo iññōmō adobaī yebænte pæpa. ³² Edæ mōotatamō mīni ænte quiyamō guidimō pōñi i bai wamō mīni quiyamō adomōnque incæ adobaī guiyāmō pōñi i iññōmō edæ dæ ampa. Incæte mōotatamō iññōmō tā bocate pædinque mōotatawæ edæ ocāñequi doyæ pæwæ bapa. Wīi tōmāā ocāñequi mīni quiyadiwæ bai edæ ocāa ināmai inte mōotatawæ iññōmō edæ ñænæ awæ i adinque ayamōidi ponte awænēmæ ongōnānīpa. Mōotatamō guidimō incæ mānōmai pæ bai Wængongui Awënë nempo quēwēnāni iññōmō wædænque iññāni incæ nanguī yebænguñāni inānīpa,” ante odōmōninque Itota apænegacāimpa.

*Pāo yedæ æmpoquī da wenguī ante odōmonte apænecā
(Odoca 13.20-21)*

³³ Ayæ wæætē inguipoga quēwēnāni nāni cæinō ante odōmōninque Itota godōmenque iīmai ante apænecantapa. “Pāo yedæ æmpocæimpa, ante onquiyængā ñænængade tee manguincade ænte tee māninque ædīna nāni āmō ænte mempoga go adopoque da wēninque ayæ yedæ æmpoquī ænte pōnō da wēninque wempo wempo ædæmō cædengā ate pāomo yedæ æmpote tōmāo nāāmænta bapa. Yedæ æmpote ate pāomo tōmāo nāāmænta ba bai oñnædē Awënë Odeye nempo mīni quēwencabo iññōmō tōmāmīni nō ēñente bamīnīpa,” ante odōmōninque Itota apænegacāimpa.

*Inguipoga nāni cæi bai impa, ante Itota odōmongampa
(Māadoco 4.33-34)*

³⁴ Nanguī ināni māññōmō ongōnāni iññōnānite Itota inguipoga quēwēnāni nāni cæinō ante odōmōninque māninque ante tōmēnāni inānite apænecantapa. ³⁵ Edæ Wængongui beyæ nē apænegaingā iīmainō ante doyedē apænegacāimpa.

“Wængongui æbānō cæcāā, ante botō inguipoga quēwēnāni nāni cæinō ante odōmōninque botō iññæ ænete apænecæboimpa.

Wængongui nānō badongaiñedē ayæ godōmenque ñōwo ganca nānō wē wodonte ēñengaiñō ante botō ñōwo apænecæboimpa,”

ante docā nānō angaiñō bai ñōwo iññōmō iinque cæquinque Itota odōmonte apænegacāimpa.

Ömentacoo ante iīmai ante impa

³⁶ Ayæ nanguī ināni inānite emō cæte godinque Itota oncōnē pō guicā adinque tōmengā miñæ nē godāni guiquënë tōmengā ingante māmō āñānitapa. Gōnea ömentacoo quiyadincoo ante apænedinque bitō æbānō ante odōmoncæte ante apænebii. Edæ edonque apænebi ēñēmōnie.

³⁷ Aññōnānite tōmengā, “Tōmēmō waīmō nē quiyadingā botō āningā iññōmō botō Waobo ēñagaīmo inte māningā bai imopa. ³⁸ Gōnea botō āññōmō bai iinguipo impa. Tōmēmō waīmō botō ānimō bai ināni guiquënë Awënë Odeye ingante nāni ēñencabo inānīpa. Ömentacoo botō ānincoo bai ināni guiquënë wēnæ inte nē ēñēnāni iññōnāni ³⁹ nē pīinte quiyacā botō āningā bai iññōmō edæ wēnæidi awēnē ingampa. Amīña bai guiquënë inguipoga iinque bayedē

ingæimpa. Ayæ amiña tā pete bai cædāni guiquēnē Wængongui anquedoidi inānipa.”

⁴⁰ “Īnque edæ nāni amiña bayedē ōmentacoo tē gæte topo cæte nāni iya tāi bai edæ adobai iinque bayedē baquinō anguēnē. ⁴¹ Māniñedē edæ Waobo ēñagaimo inte botō anquedoidi inānite āmo pōninque tōmēnāni gōnea iñōmō ōmentacoo tē gæte bai cæcædānimpā. Botō nempo quēwēnāni pancadāniya oda cæte ēñēnāmai cædānipa. Īnque, Oda cæcædānimpā, ante nē cædāni tōnō nē ēñēnāmai cædāni tōnō tōmānāni inānite botō anquedoidi iñōmō abæ wite bai tē gæte mǎo, ⁴² gongapamō nāni āmogate Ca ca wæyōmō wido cæcædānimpā. ⁴³ Māniñedē edæ nē nō entawēmīni guiquēnē mōnō Mæmpo Awēnē Odeye iñongā tōmengā nempo nē quēwēmīni iñōmō edæ nænque tamō guinæ gongæ bai adobai guinæ edæ gongæncæmīnimpā. Ēamonca ongote ēñēdāni,” ante Itota angacāimpā.

Waëmoncoo wē wodonte māincoo, ante

⁴⁴ Godōmenque odōmōninque Itota iimānō ante apænecantapa. “Ōönædē Awēnē Odeye nempo mīni quēwencabo iñōmō waëmoncoo onguipodē ææ wote nāni wē wodonte māincoo bai impā. Waocā gote māincoo adinque adodō ææ wote æninque wayōmō wē wodongampa. Wodonte ate tōmengā watapæ todinque tōmengā ēadincoo tōmancoo godonte eyepæ æninque tōmengā waëmoncoo nānō wē wodōnimæ æncæte ante ōmæ nē ēadingā weca do godinque mānimæ tōmāmæ beyæ ante edæ eyepæ pædæ godōninque ængampa. Waocā mǎnōmai tōmengā ēadincoo tōmancoo nānō godōni bai cædinque ōönædē Awēnē Odeye iñōmō, Botō nempo quēwencæmīnimpā, ante tōmengā Wēñægā ingante eyepæ godōninque inguipoga tōmāo quēwēnāni inānite ængacāimpā,” ante Itota apænecāimpā.

Wamō adomonque pōni waëmō imō ante

⁴⁵ Ayæ godōmenque, “Ōönædē Awēnē Odeye nempo guicæte ante cæcā iñōmō wamoncoo pededamō nāni āmoncoo godonte æncæte ante nē diqui diqui mingā bai ingampa. ⁴⁶ Īnque wamō pededamō nānō æinēnimō adomonque waëmō pōni i ate tæcæ adinque waocā wadæ gote tōmengā nānō ēadincoo tōmancoo godonte eyepæ æninque wæætē mānimō wamō incæ godonte ængampa,” ante Itota odōmonte apænecāimpā.

Dicamōñæ ante odōmonte Itota apænecampa

⁴⁷ “Ayæ wæætē edæ, Ōönædē Awēnē Odeye iñōmō edæ dicamōñæ gāwapæ nāni dadōi bai tōmāā gæyæidi ænte bai cæcampa. ⁴⁸ Dicamōñæ eyede dadōninque yæwedeca wēā manta cōnōninque tæ contate apænte adinque, Nāwāaquinā i, adinque ō æ otodē da wēninque, Baacā i, adinque wido cædāni bai Wængongui Awēnē adobai cæquingānō anguēnē. ⁴⁹ Edæ iinque bayedē Wængongui anquedoidi pōninque nē nō cædāni inānite apænte æninque nē wiwa cædāni inānite adinque nānēnē gōnongā ⁵⁰ ongōñōnānite gongapamō edæ guitodongā guicædānimpā. Tōmēnāni edæ māniñōmō guiite ongōninque āmogate wædinque Ca ca wæcædānimpā,” ante Itota odōmonte apænecāimpā.

Waëmoncoo incæ mūincoo tōnō pedæncōo ante

⁵¹ Māniñō ante iinque odōmonte apænedingote Itota tōmēnāni inānite,
—Botō odōmonte apænedō tōmānō ante edonque ēñēmīnitawo.

Āñongante,
—Ao ēñentamōnipa.

⁵² Ante apænedāni ēñēninque tōmengā apænecantapa.

—Īnque æcänö, Öönædē Awēnē Odeye æbänö cæcää, ante ædæmō ēñēnque nē odōmonte apæneda i tōmengā ĩñōmō waēmoncoo nē da wente mangā bai adobai ĩnongā inte Wængongui nänö änö ante entawengā ingampa. Ayæ edæ nē ēacā nänö da wēnincade wi ænedinque mīincoo tönö pedæncoo tadonte odōmongā bai nē odōmonte apæncæ ĩñōmō adobai cæcampa. Edæ doyedē nänö ēñēnō incæ ñowo nänö ēñēnō incæ mīmōnē waa pōni nänö entawēnō ante edonque odōmonte apæncampa, ante Itota mānque ante idæwaa apænegacäimpa.

*Nāatadeta ĩñōmō ponte Itota apæncampa
(Māadoco 6.1-6; Odoca 4.16-30)*

⁵³ Wængongui Awēnē æbänö cæcää, ante odōmoncæte ante imæca quēwēnāni nāni cæinō ante nänö odōmōnīnō tōmānō ante ĩnque apænedinque Itota wadæ gocantapa. ⁵⁴ Tōmengā nänö pægaiñōmō ponte tōmēnāni odōmōincōnē pō guiddinque māniñōmō quēwēnāni ĩnānite odōmonte apæncantapa. Ēñēnque tōmēnāni ancaĩ guñēnque,

—Īngā ĩñæmpa, æbänö cæte nanguĩ ēñengā ĩngāā, ānānitapa. Tōmengā edæ æbänö cæte tæi piñæninque bamōnengæ cæcää, ante ēñencæte ante wæmōnipa. ⁵⁵ Īngā ĩñæmpa awæmpa nē tīmōwengā wengā ĩmaingā inte bamōnengæ mānōmāi cæcampa, ante awædō. Tōmengā wāānā ēmōwo Māadiya ingampa, ante awædō. Tōmengā biwīdi ōnōnānique Tantiago tönö Ootee, Tīmōnō tönö Codaa ĩnāmaĩ ĩnānitawogaa. ⁵⁶ Tōmengā biwinqueidi mōnitō tönö tōmānāni ongōnāni aedāni. ĩnque tōmengā wæætē æbänö cæte nanguĩ ēñengā badinque edæ nanguĩ cæcää.

⁵⁷ Ante pōnente wædinque tōmēnāni tōmengā beyæ ante piinte badānitapa. Piinte badāni adinque Itota tōmēnāni ĩnānite angantapa.

—Īñæmpa Wængongui beyæ nē apæncæā ĩñōmō tōmengā tōmāmæ gote apæneyongante tōmengā ingante waa adānipa. Wæætē tōmengā nänö pægaiñōmō pōninque oncōnē pō guite apæneyongā edæ māniñōmonque tōmengā ingante wiwa adānipa tōō, ante apænegacäimpa.

⁵⁸ Incæte, Pōnēnāmaĩ ĩñōnānite botō ædō cæte nanguĩ mā cæquimoo, ante pōnente wædinque tōmengā tōmēnāni weca edæ wædænque pōni cægacäimpa.

14

*Wāō æpcænē nē guidōnongā wængampa
(Māadoco 6.14-29; Odoca 9.7-9)*

¹ Tōmānāni māniñedē, Itota æbänö cæcää, ante māo ānāni ēñēnque pancabaa awēnē Edode do ēñengacäimpa. ² Tōmengā ĩñōmō tōmengā ingante nē cædāni ĩnānite apæncantapa. “Wāō wodi æpænē nē guidōningā incæ ĩngā Itota ĩñōmō adoca inte a ongongā awædō. Tōmengā do wænte ñāni ōmæmōninque pongampa tōō. Māniñō beyænque tōmengā tæi piñænte entawēnongā inte nē nanguĩ cæcā ingampa,” ante awædō, angantapa.

³ Wāō wodi ĩñōmō ĩmaĩ wængacäimpa. Do ĩñedē awēnē Edode ĩñōmō tōmengā biwī Pedipe manguiwēningā Ædodiya ingante ō ænte mōningā ĩnongäimpa. Māningā Ædodiya Wāō ingante piingā beyænque Edode ĩñōmō Wāō ingante bæi ongonte goti winte tee mōnedongäimpa. ⁴ Edæ Wāō ĩñōmō nänö caate wænguinque Edode ingante ĩmaĩnō ante do wææ āningā ĩnongäimpa. “Edode ēñēmi, bitō Wængongui nänö angainō bai ēñēnāmaĩ inte edæ māningā onquiyængā ingante manguiwēmipa tōō,” ante cōwē wææ āningā ĩnongäimpa.

⁵ Angä eñente piinque Edode, Wäo ingante botö æbänö cæte wænunguimo, ante cædongäimpa. Incæte tōmānāni, Wængonguī beyæ nē apænedongā Wäo ingampa, ante tededāni eñëningā inte Edode, Botö imote piināni wæcæ wæ, ante guñente wædinque Wäo ingante wænonāmaī inte ata cæpodongäimpa. ⁶ Incæte Edode nānō eñagäiōnæ iinque bayō wadāni ponte godongāmæ bete ayōnāni edæ Ædodiya wengā baquecā tode pete äwacā adinque Edode wæætē nanguī todongäimpa. ⁷ Iinque tōmengā, Wængonguī ayongā nāwangā ämopa, ante baquecā ingante änogäimpa. Waa pōni bitō tode pete äwadi beyæ bitō quiēmē ante æinente ämi adinque botö bitō äno ante cōwē pōnōmo æncæbiimpa, änogäimpa. ⁸ Angä eñëninque baquecā wæætē wäänā weca gote, Æbänö anguimoo, ante äñongā wäänā guiquënë, Ìlmaī æe, angä eñëninque baquecā wæætē Edode ingante,

—Ìlmaī pōnō cæbi æmoe. Wäo æpænē guidōnogā ingante wangō tamenate tōmengā ocabo Ìnī coyomēnætaca cō cæte ænte māmō pædæ pōnōmi æmoe.

⁹ Angä eñente wædinque awënë odaye iñōmō, Æ eñente awædō. Quīnō ñōwo cæquimoo, ante nanguī wædongäimpa. Incæte godongāmæ becōnāni eñëñōnānite, Wængonguī ayongā cōwē godoncæboimpa, ante nē äningā inte nē wænogā ingante tōmengā, Baquecā nānō äñinō baī cædāni, änogäimpa.

¹⁰ Angä eñëninque nē wænogā tee möneincōnē go guidinque edæ Wäo ingante māo bæi ongōninque wangō tomenacadongäimpa. ¹¹ Ayæ Wäo ocabo Ìnī coyomēnætaca cō cædinque baquecā weca ænte māmō pædæ pōnōnāni æninque baquecā wæætē wäänā inante godongā ænōnāimpa.

¹² Ayæ Wäo wodi tōmengā miñæ nē godināni pōninque tōmengā baō Ìnī ænte māo daga wëninque wæætē Itota weca pōninque, Wäo wodi mānōmaī wængā wæmōnipa, ante tōmengā ingante apænegadānimpā.

5.000 ganca Ìnāni Ìnānite Itota godongā cænānīpa

(Māadoco 6.30-44; Odoca 9.10-17; Wäo 6.1-14)

¹³ Wäo wodi do wængäimpa, ante apænedāni eñente wædinque Itota wæætē edæ, Önōmæca gocæboimpa, ante wipodē guī contate wogaa gocantapa. Gocā ate, Māniñōmō gocæ cæcampa, ante tededāni eñëninque tæiyænāni tōmēnāni nāni quēwëñōmō wacōnē ta wacōnē ta ömaaue oō pænta tāno gote mæ ongōnānitapa. ¹⁴ Itota iñōmō wipodē wogaa pō ti wæænte ayongā nanguī Ìnāni dobæ ponte mæ ongōnāni adinque, Æbänö cæte quēwenguñānii, ante tōmēnāni tōnō godongāmæ wæte baī pōnengantapa. Ayæ daicawo gawænāni Ìnānite godō cæcā ate waa badānitapa. ¹⁵ Gäwadecæ bayō tōmengā miñæ nē godāni tōmengā weca pōninque,

—Ñōwo wēmō bacæ cæpa cæbii, änānitapa. Ayæ, Önōmæca incæ cænguī dæ ä adinque bitō godongāmæ ongōnāni Ìnānite ämi waodāni quēwëñōmō gote cænguī godonte ænte cæncædānimpā.

¹⁶ Äñōnānite Itota,

—Goquīnāni, ante quīnante äminii. Mīnitō wæætē godōmīni cæncædānimpā, ämopa.

¹⁷ Äñongante,

—Ìñæmpa pāō önompo æmæmpoque gæyæ mēa pōni Ì. Cænguī nææmōnipa diyæ godōmōni cænguñānii.

¹⁸ Ante wææ äñōnāni Itota iñōmō,

—Mānimpodānique nææmīni incæ ænte māmō pædæ pōnōmīni æmoedāni, angantapa.

19 Ayæ godongämæ mæ ongönäni inänite angä gaguimäa tæ contadäni ate tömengä päö önompo æmæmpoque gæyæ mäa æninque öönädë inö æmö adinque, Wængongui, bitö waa pönömi ænte cæmönipa. Ante apænedinque päö pä æ pä æ cædinque tömengä miñæ në godäni inänite pædæ pönongä æninque tömëni wæætë godömenque tömänäni inänite di mæñæ di mæñæ cædäni ænte cænänitapa. 20 Mänömaï pönö cæcä æninque tömänäni tömo pönö cænänitapa. Cænte ate edæ tömëni ao mæ ao mæ nani ñönöni ee öñoncoo pædæ wææmpo ö æ da da wente æninque tömengä miñæ në godäni iñömö otodë önompo tipæmpoga go mentodëa cængui eyede da wënäni contagatimpa. 21 Në cænäni iñömö edæ onguiñænänique incæ tincö mïdo ganca mänimpodäni iñönäni onquiynäni tönö nani wencabo tönö godömenque nanguï inäni inte cængadänipa.

*Itota cæpæ yædopæno dao dao gocampa
(Mäadoco 6.45-52; Wäö 6.16-21)*

22 Tömänäni iinque cænäni ate Itota tömengä miñæ në godänique inänite do angantapa. Minitö täno wipodë guï contate æmæ wedeca tao goyömini botö wæætë godongämæ ongönäni inänite ämo godäni ate ayæ poncæboimpa. 23 Angä Ao ante tao goyönäni tömengä wæætë wadäni inänite, Nöwo goedäni, angä wadæ godänitapa. Ayæ tömengä Wængongui ingante apænecæte ante änanquidi æcantapa. Æite apænedinque wëmö bayö tömengä adocanque a ongongacäimpa. 24 Tömengä miñæ në godäni guiquënë taocæte ante cædinque edæ tæcætibæ wiyate cæwoyönäni edæ woboyæ pæmænte nanguï pönö edæ æpæ incæ incæ cæte mængonta mængonta cæyonte wipo wäi wocæntapa. 25 Ayæ tawadiya nänö peyedë bayonte edæ Itota iñömö æpæ yædopænoque edæ dao dao pongä adänitapa. 26 Yædopæno edæ dao dao pongä gomö adinque tömengä miñæ në godäni edæ ancaï guïñëninque,

—Quiëmë imäi. Waocä wænte babæningä wabänö cægongä, ante Yæ ante guïñente wædänitapa.

27 Ante wæyönäni edæ Itota iñömö,

—Ee piyænë cæte guïñënamäi iedäni. Botö imo apa guïñëwëminii.

28 Ante äñongä, Pegodo guiquënë,

—Awënë, bitö imitawo. Nö nö imi inte bitö æpæ yædopæ bitö weca ämi pömoë.

29 Angä ëñëninque,

—Pöe.

Äñongä Pegodo wipodë ongöninque edæ ti wææninque yædopæno edæ dao dao gote Itota weca tæcæ obo ponte ayongä, 30 woboyæ nanguï nanguï pæmæ ate wædinque ancaï guïñëninque æpænë tæi guïdinque Yæ wæcantapa.

—Awënë, æpæ bete wæncæbontaye.

31 Ante wæcä adinque Itota tömengä ingante edæ quingæ pædæ gopo töö æmæninque,

—Iñæmpa botonque iñömote pönëninque pöe, antabopa. Quinante wapiticæ edæ pönëmitapa, angantapa.

32 Ayæ wipodë guïda ate woboyæ iñontobæ næ pæmænämäi gongæ.

33 Adinque wipodë ongönäni wæætë Itota weca ædæ wæente apænedinque, —Näwangä bitö Wængongui Wëñæmi inömi imipa, ante watapæ apænedänitapa.

*Caate wædäni inänite Itota cæcä waa badänipa
(Mäadoco 6.53-56)*

³⁴ Ayæ æmæmāa taodinqe tōmēnāni Guēnetadetebæ ti wæænānitapa. ³⁵ Ti wæænāni adinqe māniōmæ quēwēnāni guiquēnē, Tōmengā Itota ingampa, ante do adinqe tōmāmæ mǎo gode ā gode ā cædāni ēñēninque wēnæ wēnæ ināni inānite tōmānāni inānite tōmengā weca ænte māmōnāni pōnānitapa. ³⁶ Itota ingante, Bitō weocoo āmi yæwedecooque gampote waa bacædānimpa. Ānāni wædinque tōmengā Ao angā ēñēninque nē gampo gampo cædāni iñōmō tōmānāni edæ waa ināni bagadānimpa.

15

Mimōno tao godi beyænque waocā wentamō ēwocacampa
(Māadoco 7.1-23)

¹ Dodāni nāni wææ angainta ate nē odōmōnāni tōnō Paditeoidi pancadāniya Eedotadēē quēwēninque māniñedē Itota weca pōninque iīmaī ānānitapa.

² —Bitō miñæ nē godāni iñōmō dodāni nāni angainō ante quīnante ēñēnāmaī inte wapiticæ cædāni wæmōnīpa. Tōmēnāni iñæmpa mempodāmaī inte wentamō nampote cænguī cænāni awædō.

³ Ante piīnāni wædinque Itota wæætē,

—Minitō guiquēnē dodāni nāni angainonque ante ēñente cæcæte ante cædinque Wængonguī nānō wææ angainō ante edæ quīnante ēñente cædāmaī iīminī. ⁴ Wængonguī, “Bitō wæmpo ingante bitō badā inante waadedinque waa cæe,” angacāimpa. Ayæ, “Wæmpocā ingante wāānā inante nē piīnte wiwa angā ingante wænōmīni wæncæcāimpa,” ante wææ angacāimpa. ⁵ Minitō guiquēnē iīmaī ānewēninque edæ wææ cæmīnīpa. Waocā mæmpocā ingante waa cæquēnengā iñongante wāānā inante adobāi waa cæquēnengā iñongante mīnitō wæætē wææ āninque, Waocā wæmpocā ingante wāānā inante iīmaīnō ante apænecæcāimpa, ānewēmīnīpa. Wæætē edæ “Mæmpo, bitō quī, ante, Badā, mīnō quī, ante botō pōnōmo mīna ænguēnēnō incæ nōwo wæætē edæ, Wængonguī quī, ante do edæ godonte impa.” ⁶ Ante apænedinque waocā wæmpoda inate wīi godonguēnengā ingampa, ante mīnitō iñōmō edæ wææ ānewēmīni awædō. Iñæmpa mānōmaīnō ante wææ ānewēninque mīnitō edæ dodāni nāni angainonque ante cæcæte ante cædinque Wængonguī nānō wææ angainō ante edæ, Ōnōneque impa, ante baī cæmīnīpa tōō. ⁷ Minitō waa cæmīni inte baī nē ānewēmīni iñōmīnīte edæ āmo ēñēdāni. Mīni cædō ante Wængonguī iīmaī ante apænecampa, ante Itaiya wodi nōingā ante yewæmongacāimpa.

⁸ “Iīnāni iñōmō botō iīmote ōnōneque waa apænete baī tededāni incæte, tōmēnāni mīmōno æmæ pōnente edæ gobæ ongonte baī ināni awædō.

⁹ Ayæ botō wææ cædæ wæænte waa ate baī tededinque tōmēnāni, Wængonguī iīmidō anguēnē, ante ōnōneque tedewēninque ōnonque edæ cædānīpa. Waodānique nāni wææ ānōnō ante odōmonte apænedānīpa tōō.”
Ante Wængonguī piīngampa, ante yewæmongacāimpa.

¹⁰ Mānōmaīnō ante apænete ate Itota wæætē nanguī ongōnāni inānite aa pecā pōnāni adinqe apænegacāimpa.

—Botō apænebo ēñēninque ocaidē pōnente ædæmō ēñēdāni, angantapa.

¹¹ Ōnōnē guīdī beyænque waocā mīmō wentamō entawēnāmaī ingampa. Wæætē mīmōnē wiwa pōnēninque nānō ōnōne tao gode beyænque tōmengā wentamō mongængampa, ante apænebo ēñēdāni.

¹² Ante apænecā ate tōmengā miñæ nē godāni iñōmō tōmengā weca ponte ānānitapa.

—Bitō mānōmaīnō ante apænebi ēñēninque Paditeoidi iñōmō guingo imonte piīnāni apa ānewēē.

13 *Äñönäni tömengä,*

—Awæ botö Mæmpo münämaï iwæ to wite bai wido cæte bacæimpa. Pa-diteoidi iñömö wii botö Mæmpo quinäni inönäni inte adobai edæ wido cæte wææcädänimpa.

14 Edæ babetamönäni bai eñënamäi inäni inte tömënanäni iñömö wadäni adobai babetamönäni bai inäni inänite nê ænte mäodäni inäni apa cæminii. Tömënanäni inänite gomö aedäni. Edæ babetamongä ingante wacä adobai babetamongä inongä ingante ænte mäocä gocä ininque tömëna nana babetamoncaya guëa ontatodê mongæcadæ guibainapa.

15 Ante apænecä eñëninque Pegodo,

—Mänömaïnö ante odömonte apænedinque bitö æbänö ante odömoncæte ante apænebitapa, ante apænebi eñëmönie.

16 *Äñongante Itota,*

—Minitö incæ ocäi ömæcadäni bai inömüni inte eñënamäi imünitawo. 17 Edæ quincöomê önöne guidincoo incæ cæncadê guüite ate goiwaa ogä mente wido cæte ba apa änewëminii. 18 Wæætê önöne waocä nänö tedewënö guiquënë mímönê nänö wüwa pönënö beyænque tao godepa. Ininque waocä önöwoca mäninö beyænque wentamö ewocacampa. 19 Edæ waocä mímönê nänö entawente taodinö beyæ wüwa ante pönengampa. Mímönê nänö piinte pönënö beyænque waocä godö wænongampa. Mímönê towëinente tömengä nänöogængä inämaï iñongante godö mongampa. Ayæ æcämenque iñongante mímönê towëinente beyænque waocä godö mongampa. Mímöno æinente wædinque wacä qui awëmö ængampa. Mímönê wüwa pönëninque wacä ingante godö babæ wapiticæ apænecampa. Ayæ wacä ingante piinte tedecampa. 20 Ininque mímöno tao godi beyænque waocä wentamö ewocacampa. Wæætê mempodämaï inte nänö cænö beyæ waocä wentamö ewocadämaï ingampa, ante edæ Itota apænecäimpa.

*Onquiyængä oodeocä inämaï inte wede pönente angampa
(Mäadoco 7.24-30)*

21 Mäniñömö quëwente wadæ godinque Itota Tido nani quëwëñömö Tidöo nani quëwëñömö eyequei pongacäimpa. 22 Mäniñömö ponte quëwëñongä onquiyængä Cänäamæ nê eñate pædingä inte adoyömö quëwente tadinque tömengä weca pöninque aa pecantapa.

—Awënê bitö Awënê Dabii wodi pæimi inömi inte eñëmi. Botö beyæ pönö waadete waa cæe. Botö wëñængä onquiyængä wënæ inte quëwente wæwengampa cæbii.

23 Ante mänömaï aa pecä wædinque Itota pæ wëëncantapa. Pæ wëëncä adinque tömengä miñæ nê godäni guiquënë tömengä weca pöninque wææ apænedänitapa.

—Mönö miñæ tee empote Yæ yæ nê änewënogä ingante ämi gocæe.

24 Ante wææ änäni eñëninque Itota wæætê,

—Cænünäni obegaidi gueogæ gote wæwënäni bai möni idægocabo adobai inte wê wömonte wædäni adinque Mæmpo Wængongui, Tömënanique inänite cæquümi goquümi, äninque botö imote da pönongä wii pontawoo.

25 Angä eñëninque onquiyængä iñömö wæætê Itota önöwa gäänê ædæ wææninque apænecantapa.

—Awënê, botö beyæ cæbi waa bacæe, angantapa.

26 *Äñongante Itota wæætê,*

—Wēnāni cænguī inguēnē waocā dicæ guintamōidi cænguī ante wææntodonguingāā. Bitō edæ wabi iñōmite botō bitō beyæ ædō cæte cæquimoo.

²⁷ Angā ēñente wædinque,

—Awēnē iñæmpa nē ēadāni nāni cænte eyepodimō wæænte ænōmengadæmpa iñō ōñōñō guintamōidi ade cæmpa.

²⁸ Æñongante Itota,

—Onquiyæmi ēñēmi. Bitō nanguī pōnēnīmi iñōmite bitō ānō ante do cæte impa.

Ante tæcæ apæneyongā tōmengā wengā edæ do adoyedē edæ waa bagacāmpa.

Caate wædāni inānite Itota cæcā waa badānīpa

²⁹ Māniñmō quēwēninque wadæ godinque Itota Gadideapæ ōmaaque pō ānanquidi æi tæ contacantapa. ³⁰ Tæ contate ongōñongā nanguī ināni godongāmæ pōninque wēnæ wēnæ inte wædāni inānite ænte pōnānitapa. Pæ opa pæ opa godāni tōnō tente tobænte wædāni inānite babetamō ināni tōnō babetade ināni inānite Itota weca ænte māmō ñō cædānitapa. Ñō cædāni ongōñōnānite Itota tōmānāni inānite godō cæcā ate waa badānitapa.

³¹ Godongāmæ ongōnāni guiquēnē, Itota godō cæcā ate babetade iñināni incæ tededāni ēñēmōnīpa, ante guñente wædānitapa. Tente tobænte wædināni incæ waa badāni amōnīpa. Pæ opa pæ opa godāni iñināni incæ waa bate godāni amōnīpa. Babetamō iñināni incæ waa adāni wæmōnīpa, ante guñente wædinque edæ Wængonguī ingante apænedinque, Mōni idægocabo Wængonguī inōmi inte edæ bitō adobique ñāō bai ēmōmi inte edæ tæī piñænte cæbi amōnīpa, ante watapæ apænegadānīpa.

4.000 ganca ināni inānite Itota godongā cænānīpa

(Māadoco 8.1-10)

³² Māniñedē Itota tōmengā miñæ nē godāni inānite aa pecā pōnāni ate apænecantapa.

—Iñāni botō weca ongōnāni iñōmō mēōnaa go adoönæque iñonte botō weca ongōñōnāni tōmēnāni cænguī ōmæpodāni badāni ate wædinque botō tōmēnāni tōnō godongāmæ wæte bai pōnēmopa. Cænāmaī inte gue ænente wæyōnānite botō, Oncōnē goedāni, āmo gote bai tōmēnāni edæ idōmæ godinque nangæ badinque edæ bocæ bocæ cæte wæcædōnānīpa.

³³ Angā wædinque tōmengā miñæ nē godāni wæætē,

—Ēnodāni ināniyaa. Ōnōmæca incæ pāō impa æninque godōmōni cænguñānīi.

³⁴ Ante wæyōnānite Itota,

—Mīnitō pāō æpodō nææmīni.

Æñongante,

—Pāō ōnompo æmæmpoque go mēa gæyæ guiyā pōnī mēa pōnī mæ on-gompa, ante edæ apænedānitapa.

³⁵ Itota iñōmō godongāmæ ongōnāni nanguī ināni iñōnānite angā tæ contadānitapa. ³⁶ Iñinque pāō ōnompo æmæmpoque go mēa tōnō gæyæ tōnō nāni næænincoo pædæ godōnāni æninque tōmengā Wængonguī ingante, Bitō waa pōnōmi cæncæmōnīpa, ante apænedinque pā æninque tōmengā miñæ nē godāni inānite pædæ pōnongā æninque tōmēnāni wæætē wadāni inānite pædæ pædæ godōnāni ænānitapa. ³⁷ Æninque tōmānāni godongāmæ cænīnque tōmo pōnī cænānitapa. Idæwaa cænāni ate tōmēnāni pā ænte nāni cænte

ññonñi ee õñoncoo wente æninqwe Itota miñæ nè godáni otodê pönö da wënänitapa. Ìninqwe õnompö æmæmpoqwe go mentodêa cængui eyede contagatimpa. ³⁸ Nê cænñnani ìñömö onguñænäninque coatodo müido ganca ìñönani onquiyænani tönö nani wencabo tönö tömênani æpodänimê godömenque nangui pöni ìñönanimpa. ³⁹ Ìninqwe cænani ate Itota ìñömö, Goedäni, angä godäni ate tömengä wipodê guui contate ìmæmäa Mäagadabæ pongacäimpa.

16

*Mä cæte odömömi amönie, änänipa
(Mäadoco 8.11-13; Odoca 12.54-56)*

¹ Itota pongä adinque Paditeoidi tönö Tadoteoidi ìñömö, Mönö ämö êñëninque tömengä oda cæbaingampa, ante cædinque Itota ingante apænedinque, Bitö, Pöncædänimpa, ante õönædê mä cæi bai cæbi amönie.

² Änani êñëninque tömengä wæætê,

—Minitö ìñæmpa gäwædecæ ìñonte æmö adinque, “Baänæ watamö bacæ wiñadæ pöni gongæmpa,” ante do êñëmïnipa. ³ Ayæ ñäö bayö edæ, “Cöönæ cæcæ guinæ wepæ bai gongæmpa,” äninque mïnitö, Öönæ æbänö êönæpa, ante adinque do edæ êñëmïnipa. Ìninqwe, Wængongui quinö cæcæ cæcampa, ante quïnante wii êñëmïni. ⁴ Nöwomïni ìñömö edæ nè wiwa cæmïni inte mïnitö Wængongui ingante pangocæte bai emö cæte gomïni ìmïnipa. Edæ, Mä cæte odömömi adinque pönêmäimönipa, ante ancaä ämïni awædö. Incæte Cönäö wodi mä pöni nänö cægäinö ante adinque mïnitö pönenguênëmïni ìñömïnite mäninque mïni aquinque ante odömönte ingæimpa.

Äninque Itota tömênani ìnänite emö cæte wadæ edæ gogacäimpa.

*Wapiticæ nani apænedö yedæ æmpoqui bai impa, ante
(Mäadoco 8.14-21)*

⁵ Tömengä miñæ nè godäni guiquênê tao gocæ cædinque päö wii pönente ænämäi inte æmæmäa tao ti wæænänitapa. ⁶ Itota ìñömö mänii päö tömênani nani ænämäi ìnö ante wii tededinque wadö ante pönente ìimäi apæncantapa.

—Päö yedæ æmpoqui, ante Paditeoidi tönö Tadoteoidi nani da wente cæi ate gomö aedäni.

⁷ Angä êñente wædinque tömengä nänö nè emiñænani wæætê nani caboque tededinque,

—Päö ænte pönämäi ìmöimpa, ante Itota wabänö mänömai beyæ ämaingampa.

⁸ Ante nämæneque tededäni wædinque Itota ìñömö,

—Mïni pönêegade. Päö ænämäi inte mïni pöninö ante quimæ tedewëmïni.

⁹ Awincaque adinque adämäi ìmïnitawo. Edæ päö õnompö æmæmpoqwe æninque botö godömo æninque tinco müido ganca ìnani nani cænñnö ante awincaque adimïni inte mïnitö mïmöno pönênämäi ìmïni awædö. Ayæ cænte ate nani wææntodönincoo wente ænte mïni contadinö ìñömö cængui æpotodênö ongontawo, ante pönëmïniyaa. ¹⁰ Ayæ ate botö õnompö æmæmpoqwe go mä päö ænte godömo æninque coatodo müido ganca ìnani nani cænñnö ante adinque mïnitö ìñömö edæ êñënämäi ìmïnitawo. Ayæ edæ ñænæ otodê mïni wente ænte contadinö cængui æpotodênö ongontawo, ante pönëmïniyaa.

¹¹ Mänñnö ñöwo botö, Gomö aedäni, ante wææ äninque botö wii päonque ante apænetabopa, ante quïnante wii êñëmïni. Incæte botö, Päö yedæ æmpoqui, ante Paditeoidi tönö Tadoteoidi nani da wente cæi ate gomö aedäni, ante wææ ämopa.

¹² Angä êñente pönente wædinque tömênani, Gomö aedäni, ante apænedinque Itota wii õnonque päö da wente cæinque ante wææ angampa.

Wæætē edæ Tadoteoidi tönö Paditeoidi wapiticæ ante nāni odömönte apænedö ante tömengä, Gomö aedāni, ante wææ angampa, ante do eñēnānitapa.

Bitö Coditobi inömi imipa, ante Pegodo angampa

(Máadoco 8.27-30; Odoca 9.18-21)

¹³ Māniū imæmäa tate ate Tetadea Pidipobæ eyequei pöningue tömengä miñæ nē godāni inānite apænedinque Itota,

—Botö Waobo eñagaimo iñömote wadāni botö imotedö ante tededinque, Æbodö imoo, ante apænedāni eñēmīni.

¹⁴ Æñongante tömēnāni wæætē apænedānitapa.

—Bitö imitedö ante apænedinque pancadāniya, Æpænenē nē guidongaingä Wäo wodi incæ Itota adocä imaingampa, ante tededāniya. Wadāni guiquēnē, Ediya wodi incæ Itota inongä imaingampa, ante apænedāniya. Wadāni guiquēnē, Eedēmiya wodi ingampa, ante apænedāniya. Ayæ, Wīi Eedēmiya ingä ininque Itota Wængongui beyæ nē apænegaināni iñönānite adocä imaingä ingampa, ante tededāniya.

¹⁵ Ante tömengä miñæ nē godāni apænedāni eñēninque Itota wæætē,

—Mīnitö diyæ, Æbodö imoo, ante pönēmīni.

¹⁶ Æñongante Timönö Pegodo wæætē,

—Wængongui nē quēwengä Wēmi ingāimi inte bitö iñömö Coditobi inömi imipa.

¹⁷ Ante apænecä eñēninque Itota iñömö,

—Timönö bitö Öönata wēmi inömi inte eñēmi. Wīi waocä apænecä beyæ bitö mänömainö ante eñēmitapa. Wæætē bitö nangui toquinque edæ botö Mæmpo öönæde nē quēwengä incæ bitö imite pönö odömönte apænecä eñēmitapa.

¹⁸ Ayæ edæ iīmaī ante bitö imite āmopa. Bitö dicamö bai inömi imipa, ante pönēninque botö bitö emöwo ante Pegodo pönö pemömo emömpa. Incæte dicabo tæimö i bai bitö nö āninö iñömö edæ tæine i iñonte botö mänimoga tæi ñænonte bai pönö badömo ate mīnitö mīni pönencabo bacæmīniya. Ininque mīnitö, Itota nē Codito ingampa, ante mīni pönencabo iñömö tæi emömi badinque mänimoga tæi ongonte bai wede pönēñöminite nē tæi piñænāni tadömengadænguipo owote ta pönāni incæ ædö cæte godömenque māmö bæ taquīnāni. ¹⁹ Edæ öönæde Awēnē Odeye nempo guiquinque ante odemö wi ænequi bai botö bitö imite pönömo æncæbiimpa. Æmi ate bitö nē āmi badīmi inte inguipoga bitö wææ ānö incæ öönæde dobæ wææ angainö inte ongongæimpa. Ayæ bitö quiēmē inguipoga ñimpo cæbi i iñonte māniū adobai öönæde dobæ ñimpo cæte ongongæimpa.

²⁰ Ante iinque apænedinque Itota tömengä miñæ nē godāni inānite iīmaīnö ante wææ angantapa. Mīnitö iñömö botö imotedö ante apænedinque, Codito inongä ingampa, ante gode ānāmaī inte edæ pæ wēēneedāni, angacäimpa.

Itota, iīmaī cædāni wæncæboimpa, ante apænecampa

(Máadoco 8.31-9.1; Odoca 9.22-27)

²¹ Ayæ Itota māniñedē mā odömöninque tömengä miñæ nē godāni inānite apænedinque, Botö cōwē Eedotadēē goquēnēmo imopa, angantapa. Gobo ate oodeoidi nē aadāni nāni Picæncabo tönö, Wængongui qui, ante nē godönāni ñænænāni tönö nē odömönāni tönö godongāmæ cædinque botö imote wēnæ wēnæ cædāni wæncæboimpa. Ayæ botö imote godömenque wænönāni wæncæboimpa. Incæte Wængongui angä beyænque botö meönaa go adoönæque iñonte edæ ñāni ömæmönöte quēwæncæboimpa, ante

apænecäimpa. ²² Mänömainö ante apæneçä eññönäni Pegodo guiquenê Itota ingante nänênê măo godinque Itota ingante pilingantapa.

—Awênê, quimæ wæncæ anewêê. Wængongui pönö wææ aacä beyæ bitö caate wædämaï incæbiimpa.

²³ Ante wææ añongante Itota dadi emæninque Pegodo ingante näemæ pünninque,

—Bitö Tatänabi bai inömi inte edæ botö weca ongönämaï wadæ gobæwe, angantapa. Bitö wii Wængongui nänö pönênö ante pönëmi inte wæætê edæ waodäninque nani pönëwênö bai pönëninque mänömainö ante bitö botö imote ægodawaquï ñononte bai cædinque wææ anewëmi awædö, angacäimpa.

²⁴ Ayæ tömengä miñæ nê godäni inänite apænecantapa.

—Æcänö botö miñæ pöinëna ina tömengä iñömö nämä beyæ ante pönënamäi inte edæ botö miñæ tee empote poncæcäimpa. Nämä nänö wænguiwæ mongænte ponte bai cædinque tömengä, Botö wæmo incæ caate wæbo incæ Itota ingante cöwê tee empote gocæboimpa, ante poncæcäimpa. ²⁵ Edæ æcänö, Nämä wææ gompodinque quëwencæboimpa, ante cædinque botö miñæ pönämaï ingä guiquenê tömengä iñömö edæ quëwênämaï incæcäimpa. Wæætê edæ, Wænönäni wæmo incæte botö Itota miñæ tee empote cöwê gocæboimpa, ante æcänö äna guiquenê tömengä wæætê quëwencæcäimpa.

²⁶ Edæ waocä inguipoga ongoncoo tömancoo ö æncæte ante cædinque nämä önöwoca incæ pædæ godongä wê womonte ba ininque edæ tömengä nänö ömæwocate wæquinque æmaingampa. Iñæmpa eyepæ godongampa diyæ önöwoca wæætê æmaingäa.

²⁷ Ante Itota iñömö, “Edæ botö Waobo eñagaïmo inte botö Wæmpo ñäö tömäo guinæ gongæñonte botö edæ botö anquedoidi tönö edæ godongämæ poncæboimpa. Ayæ pömo ate botö tömämini munitö cægaï ganca ante eyepæ pædæ pönömo æncæminimpa. ²⁸ Edæ näwangä ämopa. Minitö iñömö ongömini pancaminiya iñömö ayæ wænämäi mümini quëwênömini botö Waobo eñagaïmo inte Awênê Odeye bate ponte a ongömo adinque munitö botö nempo quëwencæminimpa,” ante Itota apænecäimpa.

17

Itota waëmö pönï ñäö bai emongä bacä adänipa (Mäadoco 9.2-13; Odoco 9.28-36)

¹ Mäninö ante apænecä ate Itota önömpo æmæmpoque go adöönæque iñonnte Pegodo ingante ayæ Tantiago tönö Wäo nana caya inate mänimpodäni inänite änanquidi mäçicä adodäninque æigadänimpa. ² Æite ongöñönäni edæ Itota awinca tömënäni ayönäni edæ wii cöwê nänö emönö bai waëmö pönï ñäö bai edæ emongä bamongä adänitapa. Edæ nænque ti näwante ñäö bai bate emongä ininque tömengä weocoo näämænta ñäö incoo eñacä adänitapa. ³ Ayæ ayönäni edæ doyedê pönï nê æigaïna iñömö Möitee wodi tönö Ediya wodi incæ iñontobæ a ongöninque Itota tönö godongämæ tedegönäni. ⁴ Adinque edæ Pegodo guiquenê Itota ingante apænecantapa.

—Awênê eñëmi. Iñömö mönö waa pönï ongonte awædö. Bitö Ao ämi ininque botö oncontaicoo mentaiya go adotaique mænöninque bitö oncontai ante adotaique Möitee oncontai ante adotaique Ediya oncontai ante adotaique mænömaïmopa.

⁵ Ante ayæ tedeyongä boguimämo waëmö pönï ocabogadäni obo wææninque guinæ gongæ ayönäni boguimämodê önönepämoque apænecantapa.

—Íngä iñömö botö Wengä inongä inte botö në waadegaingä inongä ingampa. Tömengä ingante adinque botö watapæ tobopa. Minitö tömengä pönö apæneçä eñëedäni.

⁶ Angä wædinque tömengä miñæ në æidäni iñömö ançai guññenique do do wæate bai cædinque guidömëmæ tæ go wæænänitapa. ⁷ Go wæænäni adinque Itota tömënäni weca ponte godö gampodique,

—Guiññenämaï inte ængæ gantiedäni, angantapa.

⁸ Ayæ æmö ayönäni Itotaque adocanque ongongä agadänimpa.

⁹ Ayæ änanquidi inö wææ pöñönäni Itota tömënäni inänite angantapa.

—Minitö mä pönï botö emönö wiimonte bai mini adinö ante gode änämaï pæ wëeneyömini botö iñömö Waobo në eñagaïmo inte edæ wænte ate pñäni ömæmoncæboimpa. Näni ömæmömo ate minitö edæ mäniñedé ate apæneçæmünimpa.

¹⁰ Angä eñente wædinque tömengä tönö në æidänäni tömengä ingante änänitapa.

—Mänömaï i ininque, Ediya wodi täno poncæcäimpa, ante në odömönäni iñæmpa quïnante apænedänii.

¹¹ Äñönäni Itota wæætë,

—Ediya wodi näni änogä iñömö täno pongä ingampa. Näwangä impa. Pöninge tömengä, Doyedé ingäi bai ñowo wæætë adobaï bacæimpa, ante badongampa. ¹² Botö wæætë iimainö ante apænebo eñëedäni. Nöwocä mönö Ediya inongä inte do pongäimpa ante aquënë. Do pöningä ingante edæ awincaque adinque, Æcänö ingää, ante eñënëmaï inte cædäni guiquënë quïëmë näni cæinënö inçæ edæ do cædänipa. Ayæ adobaï, Tömengä ingante näni cædi bai botö Waobo eñagaïmo iñömote botö imote adobaï wënæ wënæ cædäni wæcæboimpa, ante apænebo eñëedäni.

¹³ Ante apæneçä eññenique tömengä tönö në æidänäni iñömö edæ, Æpænë mönö guidöningä Wäö ingantedö ante apæneçampa, ante tæcæ eññänäni inte wægadänimpa.

Itota wënæ ingante angä go ate wëñængä waa bacampa

(Mäadoco 9.14-29; Odoca 9.37-43)

¹⁴ Mänïi änanquidi æidänäni inte adodö wæænninge nanguï pönï inäni weca pönäni adinque wacä onguññængä Itota weca ponte da guicapodique angantapa.

¹⁵ —Awënë eññemi. Botö wengä onguññængä ingante waadete waa cæe ämopa. Tömengä iñömö edæ ançaa quidi quidi dowænte wæwënnique wantæ wantæ iñö gongapamö tæ wææ tæ wææ cæcampa. Ayæ æpænë tæi guii tæi guii cæcampa. ¹⁶ Ante wædinque, Botö wengä ingante pönö cæmïni waa bacæcäimpa, ante botö bitö miñæ në godäni weca ænte pömo adinque tömënäni ædö cæte cæquïnänii.

¹⁷ Äñongante Itota tömënäni inänite,

—Nöwomïni mini ædæmö cædämaï incabo mini pönëgade impa, angantapa. Minitö weca æpogadö quëwëmoi. Wapiticæ cæmïni iñöminite æpogadö piyænë cæte wæwëmoi. Edæ wëñængä ingante iñömö botö weca ænte mämömïni pongæedäni, angantapa.

¹⁸ Ayæ wënæ ingante pünninge Itota, Tao gobäwe, angä tao gocä ate wëñængä iñömö dobæ waa bacantapa.

¹⁹ Ayæ ate tömengä miñæ në godäni adodänique Itota weca pöninge tömengä ingante,

—Mönitö guiquenē bitō bai wido cæcæ cædinque edæ quīnante wido cædāmaī intamōnii.

²⁰ Ante wæyönānite,

—Wede pönēmīnīpa diyæ wido cæquīmīnii. Edæ mīni pönēnō mōotatamō bai guiyā pōnī ēwocamīni īnīnque mūnitō ānanquidi īñōmō ongonquidi adīnque, Nānēnē gobāwe, ante āmīni bai edæ ānanquidi incæ do gā gote wayōmō gongæncædōnīmpa. Edæ quīēmē cæcæte ante āmīni īnīnque tōmānō edæ do cæte babaimpa, ante nāwangā apænebo ēñēedāni. ²¹ Incæte mānīi wēnæ inte wido cæcæte ante cædinque cænguī wantæpiyæ cænāmaī inte Wængonguī ingante apænete ate edæ wido cæquī impa, ante Itota apænecā ēñēnānitapa.

Wænōnāni wæncæboīmpa, ante Itota adodō ante apænecā

(Māadoco 9.30-32; Odoca 9.43-45)

²² Mānīi Gadideabæ pōnīnque godongāmæ goyönānite Itota īimāinō ante apænecantapa. Adocanque, Waocā nē ēñagaingā īñōmō æyōmōnō on-gongāā, ante godō odōmōnīnque botō īmote waodāni nempo pædæ godongā æncædānīmpa. ²³ Nē ænāni wæætē botō īmote wænōnāni nāñe wæncæboīmpa. Ayæ mēōnaa go adōōnæque īñonte edæ Wængonguī angā beyænque botō edæ ñāni ōmæmonte quēwencæboīmpa.

Itota mānōmāinō ante apænecā ēñēnīnque tōmengā mīñæ nē godāni wæætē edæ nangūi wæwente bagadānīmpa.

Wængonguī oncō beyæ, ante Itota eyepæ godongampa

²⁴ Mānīi pōnīnque tōmēnāni Itota tōnō godongāmæ Capēnaōmō nāni quēwēñōmō pōñōnāni wadāni guiquenē Wængonguī oncō beyæ ante tīguītamō didacōma nāni ānontamō mentamonga ante nē ānōnāni inte Pegodo weca ponte ānānitapa.

—Mīnitō Awēnē nē Odōmongā guiquenē Wængonguī oncō beyæ ante didacōma tīguītamō cōwē pōñōnāmaī ingantawo.

²⁵ Āñōnānite Pegodo,

—Cōwē nē pōnongā ingampa.

Ānīnque oncōnē pō wāānē guīyongante Itota tāno apænecantapa.

—Tīmōnō, æbānō ante pōnēmīi, angantapa. Īmæca nē quēwēmō mōnō eyepæ ænte quēwengæīmpa, ante īmæca awēnē odeyeidi īñōmō edæ tōmēnāni nempo nē quēwēnāni īnānite, Pōñōmīni æmoedāni, ānānitawo. Wæætē edæ wadāni īnānite ānānitawo. Ēdānidō īnānite ānāni, ante pōnēmīi, ante Pegodo ingante Itota angantapa.

²⁶ Āñongante Pegodo,

—Wadāni īnānite ānānīpa.

Ante apæneyongā Itota wæætē edæ,

—Mānōmaī ī īnīnque edæ mōnō Awēnē Wængonguī nempo nē quēwēnōmō inte wīi godonguēnēmō īmōmpa. ²⁷ Incæte wīi piinte bacædānīmpa, ante botō īmaī āmpa. Bitō gāwapāa māo dadonte wēā tadōñōmi gæyæ tānocā tacā æe. Ānīnque gæyæ ōñōneca wi ænete ayōmi adotamonque incæ coatodo didacōma ēmontamō incæ edæ gæyæ ōñōne ongotamō adīnque bitō tadonte æncæbiīmpa. Mānīntamō ænte māo bitō beyæ botō beyæ eyepæ godōmi æncædānīmpa, angā gote Pegodo cægacāīmpa.

18

Æcānō ñæncængā inte nē angā inguingāā, ante tededānīpa

(Māadoco 9.33-37; Odoca 9.46-48)

¹ Māñīñedē Itota mīñæ nē godāni tōmengā weca ponte apænedīnque,

—Bitō öönædē Awēnē Odeye iinque bayömi æcänö bitō nempo quëwëninque ñænængä pöni inongä inte nē angä inguingää, änänitapa.

² Itota iñömö wëñængä guiyangä ingante edæ aa pecä pongä ate tömengä ingante tæcæguedē goncædinque tömënäni inänite wæætē apænegacantapa.

³ —Nawangä ämo ëñeedäni. Minitö öönædē Awēnē Odeye nempo guicæte ante wapiticæ mīni pönëwënö wido cædinque wëñænäni nāni piyænē cæte pönënö bai pönëedäni. Mänömaï cædämaï iñini iinque Awēnē Odeye nempo cöwē guiddämaï inte wæbaiminipa. ⁴ Incæte iingä wëñængä, Önömoque imopa, ante pönengä bai æcänö adobainö ante pönente quëwëna guiquënë tömengä iñömö edæ öönædē Awēnē Odeye nempo quëwëninque ñænængä pöni inte edæ nē angä ingampa. ⁵ Ayæ æcänö botö ëmöwo apænedinque mäningä bai wëñængä ingante, Pöe, ante godö waa cæcä iñömö tömengä iñömö edæ botö imote edæ do, Pöe, ante pönö waa cæcä ingampa, ante Itota apænegacäimpa.

*Wacä oda cæcæcäimpa, ante nāni wæquinque cædänipa
(Mäadoco 9.42-48; Odoca 17.1-2)*

⁶ Itota ayæ apænegacantapa. “Wadäni godö cædäni beyæ botö imote nē pönënäni incæ pancadäniya edæ dobæ oda cæte wënæ wënæ cædänipa. Iinque, Wëñængä adocanque guiyangä pöni ingä incæ oda cædämaï incæcäimpa, ante wææ cæcæte ante cædinque nē godö cæcæ cædingä ingante iimäi cædäni iinque tömengä toquënegä imaingampa. Waodäni nāni dacæ godö dacæ godö cæquinca ñænænca æninque tömengä önömenca æ wëmencadinque tömengä ingante tæcætibæ wido cædäni iinque tömengä edæ, Wënæ wënæ cædämaï inte becadote wæmo beyænque Wængonguï botö imote wii godömenque pangampa, ante wædinque waa toquënegä imaingampa. ⁷ Quëimë beyæ oda cædinque inguipoga quëwënäni nāni wæquinque wënæ wënæ cædänipa. Nē pönënäni incæ pancadäniya wii ëñente do oda cædänipa. Cöwë mänömaï impa. Incæte, Oda cæcæcäimpa, ante nē cæcä iñömö edæ tömengä nangui nänö caate wæquinque cæcampa,” ante apænegacäimpa.

⁸ Ayæ, “Bitö önompoca cædinque wënæ wënæ cæbi iinque önompö aa wi æmpote wido cæte bai cædinque wënæ wënæ bitö cædinö ante wido cæbæwe. Bitö önöwa wapiticæ godinque wënæ wënæ cæbi iinque bitö önöwa aa wi æwate wido cæte bai cædinque wënæ wënæ bitö cædinö ante wido cæbæwe. Iñæmpa inguipoga quëwëninque bitö æmæmpoque empöbi incæte æmæntique entibi incæte bitö öönædē æidinque cöwë wænämäi quëwëmi iinque waa imaimpa. Edæ tipæmpoga empöbi inte tipæntiya entibi inte edæ bitö gonga cöwë bæcote wæwenguïñömö wii æmæwo wido cæte wæquimidö angüënë. ⁹ Ayæ bitö awinca wiwa adinque wënæ wënæ cæbi iinque bitö awinca oo togæmonte wido cæte bai cædinque wënæ wënæ bitö cædinö ante wido cæbæwe. Iñæmpa inguipoga quëwëninque bitö æmæmonque ëmömi inte bitö godömenque quëwëmi iinque waa imaimpa. Edæ wii tipæmonga ëmömi inte edæ bitö tadömengadænguipo gonga cöwë bæcote wæwenguïñömö wii wido cæte wæquimidö angüënë,” ante Itota angacäimpa.

*Bodego wë womonte ba, ante odömonte apænegacampa
(Odoca 15.3-7)*

¹⁰ Ayæ, “Iingä guiyangä iñömö önonganque ingampa, ante mīnitö adocanque ingante incæ piinte adämaï imæwedäni. Iñæmpa tömënäni inänite nē aadäni anquedoidi incæ öönædē quëwëninque botö Mæmpo nē öönædē quëwëngä awinca cöwë adänipa cæmīni. ¹¹ Edæ botö Waobo ëñagaïmo inte

edæ wē womōnāni inānite diqui minte æncæte ante pōmo ïmopa,” ante Itota apænegacantapa.

¹² Ayæ, “Æbānō ante pōnēmīni edæ. Waocā obegaidi tiēē ganca ēacā ongōñōnāni adocanque pangocæte nānēnē gocā adinque nē ēacā ïñōmō nōobenta i nōebe ganca ināni ānāmānē ongōñōnānite ēmō cæte diqui mincæ wīi goquingā, ante pōnēmīnii. Cōwē edæ diqui diqui mincæ gocæcāimpa. ¹³ Godinque nē pangocæ godingā ingante ēadente acā ïnīnque nē ēacā waa tobaingampa. Edæ pangocæ godāmaī ināni nōobenta i nōebe ganca ināni inānite adinque cōwē tocā ïnongā inte tōmengā tæcæ nānō adingā beyæ godōmenque tocampa. ¹⁴ Mīnitō Mæmpo oōnædē nē quēwengā adobaingā, Guiyangā wē womonte wænāmaī incæcāimpa, ante cōwē diqui diqui mingampa,” ante Itota odōmonte apænegacāimpa.

*Nē wēnæ wēnæ cæcā ingante pīnāmaī inte waadecāimpa
(Odoca 17.3)*

¹⁵ Godōmenque odōmōnīnque Itota apænegacantapa. “Bitō tōnīñacā bitō ïmite wēnæ wēnæ cæcā wædinque bitō tōmengā weca gote āmi adomīnaque nānēnē gote ongōeda. Ongōñōmīnate bitō tōmengā ingante, Mānōmaī cæbitapa, ante āmi ēñengāe. Mānōmaī āmi ēñengā ïnīnque tōmengā waadete babaingampa,” ante apænegacāimpa. ¹⁶ Ayæ godōmenque apænegacantapa. “Wæætē tōmengā ēñēnāmaī inte waadedāmaī ingā ïnīnque bitō Wængonguī angā ēñente nāni yewæmongainō baī cæe. Waocā æbānō cæcāā, ante adinque waoda mēnaa ïna incæ mēnaa go adocanque ināni incæ adoyōmō ante apænedāni ïnīnque tōmēnāni nāni apænedō beyænque ante mōnō, Nō impa, ante ēñengæïmpa, ante Wængonguī beyæ yewæmongatimpa. ïnīnque bitō, Mōnō adoyōmō ante apænegacāimpa, ante waoda mēnaa ïnate āmi incæ adocanque ingante āmi incæ æcāmenque bitō tōnō goda tōmengā adoyōmō ante nōinō ante apænegacāimpa. ¹⁷ Ayæ apænemīni ate nē wēnæ wēnæ cædingā cōwē ēñēnāmaī ingā ate wædinque bitō ïñōmō, Itota nē Codito ingampa, ante mīni pōnencabo weca gote apænebi ēñenguīnāni. Ayæ tōmēnāni wææ ānāni ate tōmengā godōmenque ēñēnāmaī ingā ïnīnque tōmengā, Nāmā cæte quēwenguīmo, ante nē ēñēnāmaī cædāni baī ingampa. Ayæ, Odōmāno awēnē beyæ nē æwengā baī ingampa cæbii. Tōmengā ēñēnāmaī cæcāinō anguēnē, ante bitō edæ tōmengā ingante gomō ae,” ante Itota angantapa.

¹⁸ Ayæ apænedinque, “Nāwangā āmopa. Mīnitō inguipoga nē āmīni inte apænte āmīni ïnīnque mīni apænte ānīnō incæ oōnædē dobæ apænte ante ïmpa. Ayæ inguipoga mīnitō apænte ānīnque ñimpo cæmīni ïnīnque mīni cædō baī oōnædē adobaī do ñimpo cæte ingæïmpa.”

¹⁹ Ante apænedinque Itota ayæ apænedinque, “Mīnitō ïmīnite ïmaī āmopa, angantapa. Inguipoga mēmīnaa guēa adoyōmō pōnente apæneyōmīna botō Mæmpo oōnædē nē quēwengā ïñōmō mīna āmaī ante tōmānō cæcæcāimpa. ²⁰ Edæ mēmīnaa ïmīna incæ mēmīnaa go adocanque ïmīni incæ æpomīnimē ïnōmīni incæ mīnitō adoyōmō ponte botō ēmōwo apænete ongōñōmīni edæ botō adoyōmō mīnitō tōnō godongāmæ ongoncæboïmpa,” ante Itota apænegacāimpa.

²¹ Ayæ ate Pegodo tōmengā weca ponte ānīnque,

—Awēnē, botō tōnīñacā botō ïmote wēnæ wēnæ cæcā adinque botō tōmengā ingante æpogadō godō ñimpo cæbo ee goquingāā. Edæ ònompō æmæmpoque go mempoga māñimpo ñimpo cæbo ee goquingā, āmii.

²² Åñongante Itota,

—*Īñæmpa, wīl ōnompō æmæmpoꝥe go mempogaꝥe anguii. Edæ godōmenꝥe bitō ānimpoga pīlnāmaī inte ñimpō cæbi ate wæætē adopoga wæætē adopoga ayæ cōwē tetenta ganca wæætē wæætē ñimpō cædinꝥe coatodo tiento nōobenta ganca mānimpoga pīlnāmaī inte ñimpō cæbi goꝥuingā. Mānōmaī ante Itota tōmengā mīñæ nē godāni ĩnānite, Cōwē pīlnāmaī inte ñimpō cæꝥuimīni, angacāimpa.*

Nē cædongā nānō waadedāmaī cædō ante odōmongampa

²³ Itota ayæ apæncantapa. “Māninō beyæ bitō ānō baī cædāni wædinꝥe ĩmæca awēnē odeye nānō apænte āmaī oōnædē Awēnē Odeye incæ tōmengā ingante nē ēñēmīni ĩmīnite æbānō apænte angampa, ante odōmōmo aꝥuimīni, angantapa. ²⁴ ĩmæca awēnē ĩñōmō, Botō ĩmote nē cædāni incæ botō ĩmote debe ĩnāni inte eyepæ pōnōnāni æncæboimpa, ante cæyongā adocanꝥe tadento ñæñængæde nāni godonte æinta incæ diete mīdo ganca nānō pōnongā æni beyæ wæætē pōnōnāmaī debe ingā adinꝥe tōmengā ingante ænte māmōnāni pongampa. ²⁵ Pongā adinꝥe tōmengā awēnē ĩñōmō, Ōmæpocā inte tōmengā ædō cæte pōnongā ænguimoo, ante pōnente wædinꝥe ĩmaī angantapa. Wacā ingante nē cædāni tōmengā nāni wencabo bacædānimpā, ante cædinꝥe botō nē pōnōnāmaī ingā nāna gæncaya nāni wencabo tōmānāni ĩnānite bæi ongonte wacā ingante godonte eyepæ ænguimoo, angā. ²⁶ Ēñente wædinꝥe edæ nē cæcā ĩñōmō tōmengā weca ædæ wææninꝥe edæ, ‘Awēnē, waadete cædinꝥe ee abi adinꝥe botō ayæ ate botō debe inganca tōmanta pōnōmo æncæbiimpā.’ ²⁷ Ante wæcā ēñēninꝥe awēnē ĩñōmō nē cæcā ingante guēa wæte baī pōnēninꝥe, Tōmāā edæ godonte impā, āninꝥe godō ñimpō cæcā abæ tawænte gocantapa.

²⁸ “Incæte tōmengā tōnō wadāni nāni godongāmæ cæcabo ĩñōnāni wacā guiquēnē adocā ingante tiēē tīguitamō ganca nānō pōnongā æni beyæ wæætē pōnōnāmaī debe ĩnongāimpā. Adinꝥe nē abæ tawænte godingā incæ tōmengā ingante debe ingā ingante godō yao ongonte ñimāmencate cædinꝥe, ‘Do bitō æninta pōnōmi æmo tōō.’ ²⁹ Ante pīngā wædinꝥe tōmengā tōnō nē cæcā inte nē debe ingā wæætē nē āningā weca da guicapodinꝥe, ‘Bitō waadete cædinꝥe ee abi ĩninꝥe botō ayæ ate pōnōmo æncæbiimpā.’ ³⁰ Ante wæyongā edæ Baa āninꝥe tōmengā, Tōmanta edæ cōwē pōnōmi æmo ate tabāimpā, āninꝥe edæ tee mōnecā ongongantapa.”

³¹ “Adinꝥe edæ tōmēna tōnō nē cædāni guiquēnē, Mānōmaī cæcā, ante wædinꝥe pīninꝥe awēnē weca gote, Mānōmaī cæcampa, ante wæmōnīpa. ³² Ānāni ēñēninꝥe wēnæ wēnæ nē cædingā ingante āñecā pongā ate tōmengā ingante awēnē, ‘Botō ĩmo nē cædīmi inte nē wēnæ wēnæ cæbitapa tōō. Īñæmpa bitō nanguī āmi beyænꝥe botō edæ, Tōmanta edæ godonte impā, ante ñimpō cæbo abæ tawænte gobitapa. ³³ ĩninꝥe botō guēa wæte pōnente cæbo baī bitō tōnō nē cæcā ingante bitō adobaī guēa wæte pōnēmi baī waa incædōnimpā.’ ³⁴ Āninꝥe awēnē āngā badinꝥe, Tōmengā tōmanta nānō æninta botō ĩmote adodō nānō pōnonguinganca botō, Tōmengā ingante ænte pancæmīnimpā, āmopa. Āninꝥe tōmengā ingante tee mōnete oncōnē nē pānāni ĩnānite pædæ godongā ænānīpa.” ³⁵ Māninꝥe ante odōmōnte apænedinꝥe Itota godōmenꝥe apæncantapa.

—Edæ mīni waocabo ĩñōmīnite mīnitō wacā nānō wēnæ wēnæ cædinō ante godō ñimpō cædāmaī ĩmīni adinꝥe awēnē nānō apænte ānō baī botō Mæmpo oōnædē nē quēwengā ĩñōmō adobaī mīnitō wēnæ wēnæ cædinō ante ñimpō cædāmaī inte tōmānō ancæcāimpā, ante apænegacāimpā.

19

*Nānōogængā ingante nāni pāmæno ante
(Māadoco 10.1-12; Odoco 16.18)*

¹ Mānī Gadideabæ quēwente iinque apænete ate Itota Oododāno æmæmāa godinque Oodeabæ pongacāimpa. ² Pongā adinque nanguī ināni tee empogoyōnāni tōmengā gampocā waa badānitapa.

³ Paditeoidi guiquēnē, Godō āmo ēñēninque Itota wabāno adodeque oda cædete wæcā tocæī, ante pōnēwēnāni inte tōmengā weca pōninque ānānitapa.

—Wængonguī æbāno ante wææ angacāī. Waocā tōmengā nānōogængā ingante quīēmē beyænque pāmængā iinque edæ nō cæte intawo.

⁴ Ante āñōnāni Itota,

—Mīnitō iñæmpa Wængonguī beyæ ante nāni yewæmōinta adāmai inte āmīnitawo. Wēēñēdē edæ waocā ingante nē Badongaingā iñōmō, “Onguīñængā ingampa, ante ayæ, Onquiyængā ingampa, ante badongacāimpa,” ante yewæmongatimpa. ⁵ Ayæ, “Mānōmai beyæ waocā mæmpocā ingante ēmō cæte wāānā inante ēmō cæte godinque onquiyængā ingante, Botō nānōogængā, ante æmæwo moncæcāimpa. Iinque mēnaa inīna incæ tōmēna nāna gæncaya badinque adocanque bai bacædaimpa,” ante yewæmongatimpa. ⁶ Iinque tōmēna nāna gæncaya adocanque bai badinque nānēnē mēnaa ināmai inapa. Mānōmai beyæ Wængonguī, Adocanque bai inapa, ante nāna gæncaya nāno nē badongaina iñōnate waocā wæætē pango cædāmai incæcāimpa.

⁷ Āñongante tōmēnāni wæætē,

—Iinque, Æmæwo pāmæmo goquīmi, ante yewæmōninque māninta bitō yewæmōninta onquiyængā ingante godōmi ængā ate bitō ōnonque pāmæncæbiimpa, ante Mōitee wodi quīnante wææ angacāī, ante ēñencæte ante mōnitō wæmōnipa.

⁸ Ānāni ēñēninque Itota edæ,

—Iñæmpa, Mīmō ōmædēmīni inōmīni inte mīnitō wēnæ wēnæ cæinēmīni imīnipa, ante wædinque edæ Mōitee, Nānōogængā ingante pāmænguīmi, ante yewæmongacāimpa. Wēēñēdē iñōmō edæ wīī mānōmai ingatimpa.

⁹ Wæætē onquiyængā wacā ingante godō todāmai iñongante tōmengā ingante nē pāmæningā iñōmō tōmengā dobæ nāno towenguinque edæ wacā onquiyængā ingante godō mongampa. Ayæ onquiyængā pāmænte goyongā wacā onguīñængā tōmengā ingante godō mōninque adobai nē towengā bacampa, ante āmo pōnēmaimīnipa.

¹⁰ Angā ēñēninque tōmengā mūñæ nē godāni guiquēnē,

—Iñæmpa nāna gæncaya ina inte pāmænāmai ingæimpa, ante bitō āno bai nō i iinque edæ waocā wēmō cæcā bai waa imaimpa, ante pōnente wæmōnipa.

¹¹ Ante wæyōnānīte Itota,

—Wēmō cæcā, ante mīni āno bai ante waocā ædō cæte cæquingāā. Wængonguī nāno ānīnānique mānīno ante Ao ante mōnāmai inānipa. ¹² Edæ ædānidō mōnāmai inguīnāni, ante pancadāniya guiquēnē wāānā cæncadē ēñayedē edæ ongænca babetamiñænāni ēñagānāni inte mōnāmai ināni. Pancadāniya wæætē waodāni cædāni beyænque babetamiñænāni badinque mōnāmai inānipa. Ayæ pancadāniya guiquēnē ōonædē Awēnē Odeye nempo beyæ ante nāmā pōnēninque Ao ante edæ mōnāmai inānipa. Edæ æcāno botō āno ēñente Ao āna, tōmengaque mānōmai cæcæcāimpa, ante Itota odōmongā ēñengadānīmpa.

*Wēñænāni inānite gampo cæcadinque waa apænecampa
(Máadoco 10.13-16; Odoca 18.15-17)*

¹³ Ayæ ate, Wēñænāni inānite Itota pönō gampo cæcadinque tōmēnāni beyæ Wængongui ingante apæneecäimpa, ante cædinque wadāni tōmengä wæte ænte pō ænte pō cædāni adinque tōmengä miñæ nē godāni guiquēnē, Ænte pönāmaï iedāni, āninque Baa Baa ānāni. ¹⁴ Ate wædinque Itota iñōmō edæ,

–Wēñænāni inānite ee amīni poncædānimpa. Edæ mǎnīnāni nāni pōnēnō bai adobai pōnēnāni inte edæ öönædē Awēnē Odeye nempo do quēwēnāni inānipa. Īninque mīnitō iñōmō wēñænāni inānite Baa ānāmaï iedāni.

¹⁵ Āninque wēñænāni inānite pædæ gopo gampo cæcadinque wadæ gogacäimpa.

*Māincoo nē nangui ēacā Itota weca ponte apænecampa
(Máadoco 10.17-31; Odoca 18.18-30)*

¹⁶ Ayæ wacā Itota weca pōninque,
–Awēnē nē Odōmōmi apænebi ēñēmoē, angantapa. Botō æbānō waa cæbo ĩninque cōwē wānāmaï wantæpiyæ quēwēmalmoō.

¹⁷ Ante āñongā Itota edæ,
–Wængongui adocanque nē waa cæcā ingā incæte bitō botō ĩmonte āninque, Æbānō waa cæquīmo, āmii. Incæte, Quēwenguīmo, ante wæbi ĩninque bitō, Īmaï cæedāni, ante Wængongui nānō wææ angainō ante ēñente cæe.

¹⁸ Angā wædinque,
–Ædedō ante āmii.
Āñongante Itota wæætē,
–Īmaï. “Wacā ingante godō wænōnāmaï. Bitō nānōogængā ināmaï ĩñongante godō mōnāmaï. Wacā qui awēmō ænāmaï. Wacā æbānō cæcāā, ante godō babæ wapiticæ ānāmaï. ¹⁹ Wæmpocā ingante wāānā inante waa adinque godō waa cæe. Ayæ, Nāmā ante bitō waadete cæbi bai wadāni inānite adobai godō waadete cæe.”

²⁰ Angā ēñēninque edēningā iñōmō,
–Botō mǎnīnō bitō ānō bai do cæte pægāimo inte botō quīnō edæ godōmenque cæquīmoō.

²¹ Āñongante Itota wæætē,
–Bitō, Ædæmō nō cæbo bacæboimpa, āmi ĩninque edæ öönædē bitō waēmconco ænguinque edæ ñowo godinque ĩmæca bitō māincoo tōmancoo godonte æninque bitō æninta wæætē ömæpodāni inte wædāni inānite tōmanta godōmi æncædānimpa. Ayæ edæ botō ĩmote tee empote pōe.

²² Angā ēñēninque edēningā iñōmō edæ, Botō māincoo, ante nānō nangui ēacoo ante pōnente wæwente wædinque wadæ gogacäimpa.

²³ Gocā ĩninque edæ Itota tōmengä miñæ nē godāni inānite apænedinque,
–Nāwangā āmo ēñēdāni, angantapa. Öönædē Awēnē Odeye nempo guiite quēwencæte ante cædinque waodāni ömæpodāni inte botō miñæ pōnānipa. Māincoo nangui ēacā guiquēnē æbānō cæte ömæpocā inte botō miñæ ponte guiite quēwenguingāā, angantapa. ²⁴ Ayæ cāmeyo iñōmō guiyangā ingampa diyæ daagō guiyampite pædæ tacāā. Cāmeyo ñænængade ĩnongā inte pædæ tadāmaï ingā bai nē ēacā adobai ingampa. Tōmengä nāmā ayongā ñænængā ĩnongā inte edæ æbānō cæte Wængongui Awēnē Odeye nempo do wāānē guiite quēwenguingāā.

²⁵ Ante apæneca wædinque tōmengä miñæ nē godāni wæætē ancai guīñēninque,

–Īñæmpa mǎnōmaï ĩ ĩninque æcānō wāānē guiite quēwenguingāā, ānānitapa.

²⁶ Itota tōmēnāni inānite cōwā adinque apænecantapa.

—Waomīnique incæ nāmā mīni cædō beyænque ædō cæte quēwēmaimīni. Wæætē Wængonguinque nāmā tōmānō do cæcā ingampa.

²⁷ Angā ēñente wædinque Pegodo guiquēnē,

—Mōnitō iñōmō edæ mōni ēadincōo owæ caate bitō miñæ òmæpomōni inte pōmōni abipa. Òmæpomōni imōni inte edæ quīnō ænguimōnii.

²⁸ Æñongante Itota wæætē tōmēnāni inānite angantapa.

—Nāwangā āmopa. Botō badōmo ate tōmancoo mīincooque iinque bayonte botō Waobo ēñagaiimo iñōmō edæ tōmēmo ñāō ēmōnō ēmōninque edæ pō tæ contacæboimpa. Iinque mīnitō botō imote nē tee empogaimīni inte māniñedē ate tōmēmīni tæ containpaa tipæmpoga go mempaa pō tæ contadinque awēnēidi badinque edæ idægoidi tipæmpoga go mencabadāniya inānite apænte ancēmīnīmpa.

²⁹ “Ayæ godōmenque āmopa. Mīnitō nāwangā oncodo tao godinque mīnitō tōniñadāni inānite ēmō cæte godinque badā inante mæmpocā ingante wēnāni inānite botō ēmōwo beyænque ēmō cæte pōmīnitapa. Iinque iimāi ante nāwangā āmopa. Æcānō botō beyænque mānōmāi cædinque tōmengā nānō ēadī òmæ ēmō cæte goda iñōmō tōmengā nānō ēmō cæte godincōo bai adopocoo æncæcāimpa. Wīi adopogaque edæ æninque tōmengā wæætē edæ godōmenque adopocoo adopocoo æninque tiēē ganca mānimpoga æncæcāimpa. Ayæ botō pōnō cæbo æninque tōmengā cōwē wantæpiyæ wænāmāi quēwencæcāimpa. ³⁰ Incæte edæ tāno yæcado ongōnīnāni pancadāniya wæætē yæmiñæ gote ongōnāni bacædānīmpa. Ayæ yæmiñæ ongōnīnāni inte wæætē yæcado ponte ongōncædānīmpa,” ante Itota apænecacāimpa.

20

Nē cædāni æbānō cædāni, ante odōmonte apænecampa

¹ Itota ayæ edæ, Òñnædē Awēnē Odeye nempo æbānō quēwēnāni, ante odōmoncæte ante iimāi apænecacāimpa. “Wacā nē òmæ ēacā nānō cæbai Òñnædē Awēnē Odeye incæ adobai cæcampa. Nē ēacā ñāō bayō oncodo taodique, Æcānō ñōwoōnæ botō yowementacodē cæquīnaa. ² Ante adinque tōmengā beyæ nē cæcædāni inānite, Mīnitō tōmāā itædē cæmīni ate botō adocanque ingante deēnadio tiguitamō adotamonque pōnōninque wacā ingante wacā ingante adotamonque adotamonque pōnōmo æncæmīnīmpa, āñongante Ao ante yowementacodē cæcæ godānīpa. ³ Gote cæyōnāni tōmantadæ æñonte nē ēacā tōmēnāni nāni godonte æiñōmō gote ayongā wadāni ònonque cædāmāi a ongōnāni. ⁴ Adinque tōmengā, ‘Mīnitō adobai gote cæmīni ate eyepæ godōmo æncæmīnīmpa.’ Angā ēñēninque Ao ante godānīpa. ⁵ Ayæ tæcæbæcā iñonte adobai tōmengā wadāni inānite angā godāni ate wæætē ædæ wæicā iñonte adobai taodique wadāni inānite angā godāni. ⁶ Ate edæ awæncabo wæiyongante edæ adocā tao ayongā wadāni ònonque a ongōnāni adinque tōmengā tōmēnāni inānite, ‘Quīnante tōmāā itædē edæ cædāmāi a ongōmīni.’ ⁷ Ante āñongā, ‘Iñæmpa mōnitō imōnite, Cædāni, ānānīpa cæquīmōnii.’ Anāni ēñēninque, ‘Mīnitō adobai edæ botō yowementacodē gote cædāni,’ angā godānīnīmpa,” ante Itota odōmonte apænecantapa.

⁸ Ayæ, “Gāwadecæ pōni bayonte nē ēacā iñōmō tōmengā beyæ nē apænecā ingante āninque, ‘Botō beyæ nē cædāni inānite aa pebi pōnāni ate bitō tōmēnāni nāni cædī beyæ godōmi eyepæ æncædānīmpa. Awæncabo wæiyongā ñōwo pōni gote cædināni inānite edæ tāno godōmi ænāni ate wæætē wēnē gote

cædināni inānite eðæ ayæ ate godōmi æncæðānimpa.' ⁹ Angā ēñente aa peyongā awæncabo wæiyongā gote cædināni inte tāno pōnāni ate deēnadio tiguitamō adotamonque adotamonque godongā ænāni. ¹⁰ Ate adinque tāno gote cædināni guiquēnē, Mōnō godōmenque ænguī impa, ante pōnēñōnāni tōmēngā godongā æninque eðæ deēnadio tiguitamō incæ adotamonque adotamonque adopo adopo ænānīpa. ¹¹ Æninque tōmēnāni nē ēcācā ingante piinte tededinque, ¹² 'Mōnitō tōmāā itædē nāwancate cæmōni incæ iñæmpa cæbii. Ayæ pōnāni guiquēnē wantæ iñō adoque ooda ganca cæðāni incæ mōnitō baī adopo godōmi ænāni wæmōnīpa tōō.' ¹³ Ante piññōnāni nē ēcācā wæætē adocanque ingante apænedinque, 'Iñæmpa botō bitō imite wēnæ wēnæ cæbogaa. Eðæ, Deēnadio tiguitamō adotamonque pōnōmo æncæbiimpa, āñōmo Ao ānāmaī imitawoo. ¹⁴ Bado, bitō qui incæ ænte goe. Eðæ bitō æni baī ayæ ponte cædingā ingante adopo godonguēnēmo intabopa. ¹⁵ Eðæ botō ēadincōo incæ, Æcānō ingante godonguīmo, ante pōnente wædinque ædō cæte tōmēmo incæ ānāmaī inguīmo. Botō nē waa cæbo iñōmote bitō guiquēnē eðæ piinte abi awædō, ante nē ēcācā angampa."

¹⁶ Māninganca ante odōmōnte apæningque Itota iñōmō, "Mānōmaī cæðāni ininque botō, Tāno yæcado ongōnīnāni inte wæætē yæmiñæ gote ongoncæðānīpa, antabopa. Ayæ, Yæmiñæ ongōnīnāni inte wæætē yæcado ponte ongoncæðānīpa, ante apænetabopa," ante apænegacāimpa.

Itota, Wæncæboimpa, ante wæætē adodō ante apæncēcā

(Māadoco 10.32-34; Odoco 18.31-34)

¹⁷ Māniī godinque Eedotadēē gocæ cædinque tōmēngā miñæ, Dote, ante nāni gocabo inānite Itota nānēnē ænte māodique idōmæ goyōnāni apænecantapa.

¹⁸ —Nōwo iñōmō eðæ mōnō Eedotadēē iñōmō æicæimpa. Æi gote ongōmō ate adocanque, Waocā nē ēñagaingā æyōmōnō ongongāā, ante wadāni inānite godō odōmongā bæi ongonguīnāni. Ayæ, Wængonguī qui, ante nē godōnāni ñænænāni tōnō nē odōmōnāni nempo tōmēngā botō imote pædæ godongā æninque tōmēnāni wæætē botō imote apænte āninque, Cōwē wæncæcāimpa, ancæðānīpa. ¹⁹ Ayæ eðæ, Awæ ñænquedimæ cædinque tōmēngā ingante timpote wænōedāni, ante tōmēnāni oodeoidi ināmaī ināni nempo botō imote wæætē māo godōnāni æncæðānīpa. Æninque tōmēnāni wæætē botō imotedō ante badete todinque ayæ tæi tæi pāninque awāa timpodāni wæncæboimpa. Nāñe wæmo ate Wængonguī angā beyænque botō mēōnaa go adoñæque iñonte ñāni omæmoncæboimpa, ante Itota apænegacāimpa.

Tantiago tōnō Wāō badā, Botō āmaī ante cæe, angampa

(Māadoco 10.35-45)

²⁰ Tebedeo wēna Wāō tōnō Santiago iñōna tōmēna badā iñōmō tōmēnā wēna tōnō Itota weca ponte ædæ wææninque eðæ, Botō āmaī ante cæe, ante apæncēcā. ²¹ Eñēninque Itota,

—Minō quīnō apænecæte ante pōmiī.

Åñongante,

—Bitō Tæiyæ Awēnē Odeye bate tæ contadinque eðæ botō wēñæna inate āni ate adocanque bitō tōmēmæmi inō adocanque dipæmæmi inō tæ contaquīna āmopa, angantapa.

²² Eñēninque Itota wæætē,

—Iñæmpa adāmaī inte mīnitō āmīni awædō. Botō nantate wæwenguīmæ baī becabo baī mīnatō eðæ adotaca becate baī Ao ante botō beyæ nantate

wæwenguimīnaa. Edæ æpænē guite bai botō wænguimæ bai guifnēnāmai imīnapa diyæ botō beyæ wænguimīnaa.

Åñongante,

—Ao ante guifnēnāmai cæcæmōnaimpa, ānatapa.

²³ Itota wæætē,

—Botō nanguī caate wæwēmo bai mīnatō adotaca bete bai āanque bai caate wæcæmīnaimpa. Nāwangā impa. Incæte æcānō botō tōmēmæ inō æcānō botō dipæmæ inō tæ contaquīna botō edæ pōnō ānāmai imopa. Wæætē botō Mæmpo do, Mānīnaque mānimpaa tæ contaquīna, ante nē badongaingā inte tōmengā adocanque godō angā contaquīna, ante Itota apænægacāimpa.

²⁴ Mānōmaīnō ante tededapa tōō, ante ēñēnīnque wadāni diete ganca tōmengā mīñæ nē godāni guiquēnē iñāna nāna caya inate edæ piīnānitapa. ²⁵ Piīnāni inīnque Itota aa pecā pōnāni ate tōmēnāni inānite iīmāi apænecantapa.

—Oodeoidi ināmai ināni awēnēidi æbānō cædānīpa, ante do ēñēmīnīpa. Tōmēnāni iñōmō nāmā beyænque ante cædīnque nanguī piīnte ānāni wædīnque tōmēnāni nempo quēwēnāni wæætē do ēñente cædānīpa. Ayæ tōmēnāni weca nē ñænænāni inōnāni iñōmō, Tōmēmoque āmo ēñente cædāni, ante piīnte ānāni wædānīpa. ²⁶ Mīnitō guiquēnē tōmēnāni nāmā beyænque ante nanguī ānāni bai wīi adobai cæquēnēmīni imīnīpa. Wæætē mīni cabo iñōmīni adocanque ñænængā pōni ingā bacæte ante cædīnque tōmengā wæætē edæ mīnitō beyæ nē cæcā baquēnengā ingampa. ²⁷ Ayæ yæcado ongōinente wæcā iñōmō tōmengā yæcado ongoncæte ante cædīnque wæætē edæ yæmīñæ pōni gote tōmānāni inānite nē cæcā bādīnque tōmengā nāmā beyæ ante cædāmai inguēnengā ingampa. ²⁸ Edæ Waobo ēñagaīmo inte adobai, Botō beyæ pōnō cæcædānīmpa, ante wīi pōmo imopa. Wæætē wadāni beyæ godō cæcæte ante pōmoimpa. Ayæ edæ nanguī ināni tee mōnete bai wæwēñōnāni botō wæætē, Tōmēnāni wibænete tacædānīmpa, ante tōmēmo wepæ incæ godoncæte ante pōmo imopa, ante Itota apænægacāimpa.

*Babetamōna iñōnate Itota gampomongā waa bamōnapa
(Māadoco 10.46-52; Odoca 18.35-43)*

²⁹ Itota mānīnō godīnque Eedicoo nāni quēwēñōmō ponte tayōnāni tōmengā mīñæ nanguī ināni tee empote godānitapa. ³⁰ Goyōnāni onguifnēna babetamōna iñōmō taadō wedeca tæ contate a ongōñōna, Itota pongampa, ānāni ēñēnīnque aa pedatapa.

—Awēnē, bitō Dabii wodi pæīmi inōmi inte mōnatō imōnate pōnō waadete waa cæe.

³¹ Ante āñōna godongāmæ godāni guiquēnē, Apocænē inguēnē quēwēnaa, ānāni incæ godōmenque yedæ aa pedīnque,

—Awēnē, bitō Dabii wodi pæīmi inōmi inte mōnatō imōnate pōnō waadete waa cæe, ānatapa.

³² Itota iñōmō næ gongæñīnque āñecā pōna adīnque,

—Mīnatō imīnate quīnō cæbo āmīnaa.

³³ Angā ēñēnīnque,

—Awēnē gampomōmi awīnca wi ænete bai aquīmōna, ante wæmōna.

³⁴ Åñōna Itota tōmēna godongāmæ wæte bai pōnēnīnque edæ pædæ gopo gampomongantapa. Gampomongā ate tōmēna waa ada bādīnque Itota mīñæ do godatapa.

21

Itota Eedotadëe iñömö pongampa
(*Máadoco 11.1-11; Odoca 19.28-40; Wäö 12.12-19*)

¹ Mänii gote Eedotadëe obo pöningue Odibowænquidi ontacamö goimö Betapaguee nani quëwëñömö ganca pöñönäni Itota tömengä miñæ né goda mënaa inate da godöningue angantapa. ² Tömëna inate,

—Mänii nani quëwëñömö ongö amina. Tömëñömö go guiite ayömina bodo onquiyæ nana wencaya ñäni ñæi a ongö acæminaimpa. Ñäni ñæi a ongö adinque minatö mänina inate ñi cæyænte botö weca ænte pöeda. ³ Ayæ minatö iminate wææ änäni ëñëningue minatö wæætë edæ, Awënë nänö ænguënëno ante ænte gomónapa, ante apæneeda. Ayæ, Tömengä iinque cæte ate do da pöngongä æncæminimpa, ante apæneeda, angantapa.

⁴ Do iñömö Wængongui beyæ né apæneecä iimañö ante nänö apænegañö ante edæ iinque bacæimpa, ante mänömai cætimpä.

⁵ “Tiöno iñömö quëwëñäni inänite iimaï äedäni, Badogaa, minitö Awënë Odeye ñöwo minitö weca pongä aedäni.

Edæ mönö mäincoo mongæwëngongä bodo wengäa tæ contate mönö Awënë

pongampa.

Tömengä gänë pöngongä inte bodoga contate pongä aedäni, ante

ancæminimpa.”

Ante docä nänö apænegañö ante ñöwo iinque cætimpä.

⁶ Mänömañö ante angä ëñente godinque tömengä miñæ né goda iñömö Itota nänö äñinö bai do cædinque, ⁷ bodo nana wencaya inate töi töi ænte pöningue tömëna weocoo yabæcooque æidämæ wö cæyabæda ate Itota wæñömëñæca inö æi yiyæ tæ contacantapa. ⁸ Adinque edæ nanguï inäni, Itota nänö ponguñö, ante tömëñäni weocoo yabæcooque ñö cædinque bee podöwayönäni wadäni guiquënë gönea gote yæpæma öñabo tapænte mämö bee bee podöwadäni ate tömengä podöwainonque gocantapa. ⁹ Gocä adinque täno godäni tönö ayæ pönäni tönö godongämæ godinque nanguï inäni yedæ äninque,

—Bitö Awënë Dabii wodi pæimi inömi inte pömi adinque, Möni quëwënguinque impa, ante, Badogaa, ante tomönipa. Awënë Wængongui ëmowo beyænque pömi iinque bitö toquinque edæ Wængongui bitö imite waa cæcæcäimpa. Ayæ öönæde iñömö adobaï, Badogaa, möni quëwënguinque, ante ingæimpa.

¹⁰ Ante mänii cædinque pöñönäni, Itota Eedotadëe pongä adinque mäniñömö quëwëñäni ancaï guiñëningue,

—Mäningä æcänö ingäa.

¹¹ Ante wæyönäni godongämæ pönäni iñömö,

—Itota ingampa. Tömengä iñömö Wængongui beyæ né apæneecä inongä inte Gadideabæ Nääateta quëwente pongä ingampa, ante apænegadänimpa.

Wængongui oncö tæiyæ waëmö bacæimpa, ante cæcä

(*Máadoco 11.15-19; Odoca 19.45-48; Wäö 2.13-22*)

¹² Itota iñömö Wængongui oncö ñænæncönë yabæcönë pö guidinque mäniñömö mäincoo mänäni tönö wadäni né godonte ænäni tönö ongönäni adinque tömengä tömänäni inänite, Oncodo taoedäni, äninque da tadongä oncodo tao godänitapa. Ayæ campio ante nani godonte æimpa tönö equemö godoncæte ante né mänäni nani cönöimpa tönö bæ tacä tömampaa guidömëmæ tæ go wææntapa. ¹³ Ayæ tömëñäni inänite angantapa.

—Wængongui beyæ iimañö ante yewæmongatimpä. “Wadäni botö oncönë pö guidinque botö imote apænecädänimpa,” ante Wængongui angä incæte

mīnitō wēnæ wēnæ cæmīni beyænque Wængonguī oncō incæ nē awēmō ð ænāni nāni womōincōnē bai wentamō bapa tōō.

¹⁴ Ānīnque Itota ayæ Wængonguī oncō ñænæncōnē yabæcōnē ongōñongā pæ opa pæ opa godāni tōnō babetamōnāni tōmengā weca pōnāni adīnque tōmengā godō cæcā ate waa badānitapa. ¹⁵ Mānōmaī mā cæcā waa badāni ate wædīnque, Wængonguī quī, ante nē godōnāni ñænænāni tōnō nē odōmōnāni guīquēnē pīntē badānitapa. Ayæ wēñænāni Wængonguī oncō ñænæncō yabæque ongōnīnque yedæ ānīnque, “Badogaa, Awēnē Dabii pæīmi īnōmi adīnque mōni quēwengūnque impa,” ante Yæ ānānitapa. Ānāni ēñēnīnque nē godōnāni ñænænāni tōnō nē odōmōnāni ænguī badīnque ¹⁶ Itota ingante ānānitapa.

—Wēñænāni æbānō ānāni ēñēnāmaī īmitawo.

Āñōnāni Itota,

Do ēñēmopa. Īñæmpa mīnitō guīquēnē Wængonguī beyæ ante īimainō ante yewæmonte ongō adāmaī inte ānewēmīnitawo.

“Bitō tæcæ ēñadāni tōnō goōmæ nē gānāni īnānite apænebi ēñente,

tōmēnāni Ao ante nō pōni tēdedīnque,

Wængonguī tæiyæ waēmō ingānō, ante watapæ apænedānīpa.”

Mānōmainō ante yewæmonte ī apa ānewēmīnīi.

¹⁷ Ānīnque Itota edæ tōmēnāni īnānite ēmō cæte wadæ godīnque Betānia nāni quēwēñōmō gote mongacāimpa.

Iigowæ ðmæcawæ ī adīnque Itota pīngampa

(Māadoco 11.12-14, 20-26)

¹⁸ Ñāō bayō Eedotadēē nāni quēwēnō gāmænō adodō pōnīnque Itota gæwænte wæcantapa. ¹⁹ Gomō adīnque iigowæ a ongō ponte ayongā ðñaboque ēmæ adīnque,

—Ōmæcabi īmi cōwē incadāmaī incæbiimpa.

Āñongā iigowæ incæ guīñē wænīmpa. ²⁰ Guīñē wæ adīnque tōmengā mīñæ nē godāni īñōmō,

—Quīmæ iigowæ īñontobæ guīñē wæ amōō.

²¹ Ante wæyōnāni Itota īñōmō edæ,

—Nāwangā ante mīnitō īmīnite apænebopa. Wīī æmæ pōnēmīni inte wede pōnēmīni īnīnque mīnitō iigowæ inte botō cæbaī adobaī do cæbaīmīni. Ayæ godōmenque cædīnque mīnitō ānanquīdī ongō ate, “Ānanquīdī ēñēmi, ānīnque, Bitō cabænte wo gote gāwapænē guīie,” ante āmīni īnīnque edæ mīnitō ānīnō bai do babaiimpa. ²² Wængonguī ingante wede pōnēmīni īnīnque quīēmē incæ ante tōmengā ingante apænēmīni incæ mīni ānīnō tōmānō æncæmīnīmpa, ante apænēgacāimpa.

Awēnē īmīpa, ante æcānō ānāi, ante Itota ingante ānānīpa

(Māadoco 11.27-33; Odoco 20.1-8)

²³ Itota ayæ Wængonguī oncō ñænæncōnē yabæcōnē pō guīdīnque odōmonte apænecā ēñēñōnāni, Wængonguī quī, ante nē godōnāni ñænænāni tōnō oodeoidī īnānite nē aadāni, Nāni Picæncabo, nāni ānāni tōnō tōmengā weca pōnīnque ānānitapa.

—Æcānō nē angā inte bitō īmite angā cæbīi. Īñæmpa, Nē āmi bacæbiimpa, ante æcānō pōnō āna ēñente nē āmi inte bai cæbīi, ante ēñencæte ante wæmōnīpa.

²⁴ Ānāni ēñēnīnque,

—Míni ámaí botó adodeque ámo eñëninque mînitô tâno apænemîni eñente ate mânîfedê ate botó wæætê, Æcânô nê ána inte pônô angá cæboo, ante apænëbo eñëmaimînipa. ²⁵ Wäo wodi ingante guiquënë, Bitô æpænê guidoncæbiimpa, ante æcânô ána eñente guidongäi, ante pönëmîni. Wængongui ôônædê apænecä eñente cæcantawo. Wæætê edæ waodänique änanî eñente cæcantawo. Ædô ante pönëmîni.

Itota angá eñëninque tömënäni nãmäneque wæætedô wæætê tedecöninque, “Wa, æbänô anguii, ante wædänitapa. Ìñæmpa, Wængongui angá eñëninque Wäo cægacäimpa, ämô bai Itota wæætê mönô ìmonte, “Quinante pönënämaí ìmînitawo, ancædongäimpa,” ante wædänitapa. ²⁶ Wæætê edæ, “Waodäni tömännäni, Wængongui beyæ nê apænecä Wäo wodi ingacäimpa, ante pönënanîpa, ante pönente wædinque Itota ingante nê änanî ìñömô, Wadäni pîinäni wæcæ wæ, äninque, Waodänique änanî eñente Wäo cægacäimpa, ante mönô ædô cæte anguii.”

²⁷ Ante pönëninque tömënäni Itota ingante edæ,

—Wa, eñënämaí ìmönîpa.

Ante wæyönäni Itota edæ,

Ìninque botó adobai, Æcânô nê angá inte pônô angá cæboo, ante míni äninô ante apænëdämaí incæboimpa, angacäimpa.

Mæmpocä wëna æbänô cæda, ante odömongampa

²⁸ Itota odömoncæte ante apænëdinque,

—Mînitô guiquënë odömonte tedëbo ate ämo eñente apænemîni eñëmoedäni. Ìimaí impa. Waocä tömengä wëna mënaa ìñöna adocanque weca godinque mæmpocä ìñömô, “Botó wëmi, bitô ñöwoönæ yowementacodê cæte pöe.”

²⁹ Äñongä edæ, “Wii goinëmo,” angampa. Wæætê edæ ayæ ate pönencöninque edæ, Botó ædô cæte Baa äninque quëwëmo, ante pönëninque edæ mæmpocä nänô äninô ante eñëninque edæ cæcæ gocampa. ³⁰ Ayæ ate mæmpocä wæætê wacä wengä weca adobai mäo äñongä tömengä edæ, “Bitô mæmpobi ämi eñente gocæboimpa,” ante apænecä incæte edæ godämaí ingampa. Mäninque ante tedëbo. ³¹ Ñöwo mînitô ìmînite ämopa, Mæmpocä nänô äno bai æcânô cæcäi, ante pönëmîni.

Äñongante,

—Tänocä.

Ante apænëyönäni Itota tömënäni ìnänite wæætê,

—Nawangä ämopa. Mînitô Awënë Wængongui Odeye nempo pö guidämaí ìñömînite odömäno awënë beyæ nê æwënanî tönô onquiyænäni mäincoo beyæ ante nê towente quëwënanî tönô tâno ponte do guicädänîpa. ³² Edæ Wäo wodi mînitô weca ponte nô cæte töinô ante odömöñongante mînitô ìñömô pönëmînitawogaa. Ayæ godömenque awënë beyæ nê æwënanî incæ mäincoo beyæ ante nê towente quëwënanî tönô incæ do pönënanîpa. Ayæ mînitô mänömaí cædäni adimîni incæte wæætê wëna wënæ míni cædinô ante wædämaí inte wii pönëmînitapa töö, ante Itota apænëgacäimpa.

Në aadäni inguëñënanî incæ wîwa cædänîpa, ante

(Mäadoco 12.1-12; Odoca 20.9-19)

³³ Ayæ godömenque apænëdinque Itota, “Wængongui Awënë æbänô cæcää, ante eñencæmînimpa, ante botó ìmæca quëwënanî nänî cæinô ante odömonte apænëbo eñëedäni. Edæ ìimaí impa. Ömæ äcä yowementacodê da da mäo da caate wææ cædinque, Tömëmô ænte pinä pinä gäwate wæ yopænte

tómēmæ ænguifnōmō ante cædinque ææ wote badongantapa. Ayæ, Yowementacodē awēmō guiddāmaī incædānimpa, ante cædinque æi wænōmēnæca gomō aquifnōmō mænongā ate nē ēacā ifnōmō wabæca gocæ cædinque wadāni ōmæ wite nē aate tā pedāni inānite apæncantapa. Botō yowementacodē incæ mīnitō ōmæ wite aaedāni. Aayōminite botō, Mīnitō qui, ante pancamonga pōnōmō æncæminimpa, angā Ao añnōnāni wadæ gocantapa. ³⁴ Ayæ yowedepo wodo bayonte tōmengā ingante nē cædāni inānite, Mīnitō yowementacodē nē aadāni weca godinque botō yowemō incæ pancamonga āmīni æninque botō weca wæætē māmōmīni æmoedāni, angā godānitapa. ³⁵ Angā godinque pōnāni adinque yowementacodē nē aadāni guiquēnē nē æncæ pōnāni inānite bæi ongōninque adocanque ingante nangui tæi tæi pāninque wacā ingante godōmenque wænōnāni wængā ate ayæ wacā ingante dicaca tacadāni. ³⁶ Adinque māo apænedāni wædinque nē ēacā ifnōmō wæætē godōmenque nangui ināni da godongā gote pōnāni adinque nē aadāni guiquēnē adobaī cædāni wædānitapa.”

³⁷ Ayæ godōmenque odōmōninque Itota apæncantapa. “Ifninque nē ēacā ifnōmō, ‘Tómēmo wengā ingante da godōmo gocā adinque tōmēnāni guifnente wædinque ee abainānipa,’ āninque tōmengā ingante da godongā tōmengā pōni gocantapa. ³⁸ Yowementacodē nē aadāni guiquēnē gomō ayōnāni nē ēacā wengā dicæ pongā adinque, ‘Tōmengā ingampa. Wæmpocā mīncoo inī edæ iingā ifnōmō nē ænguingā ingampa cæmōō. Mōnō edæ māo wænōmō wængā ate edæ mōnō qui babaimpa.’ ³⁹ Ånewēninque tōmēnāni nē ēacā wengā ingante edæ bæi ongōnte yowementacodē wææ cæte ifnōmō yabæque edæ, Ōmæ, ante wænōnāni wængantapa.”

⁴⁰ Ante māninganca odōmonte apænedinque Itota ifnōmō tōmengā ingante nē ānināni inānite angantapa. “Ifninque mīnitō ifnōmō, Nē ēacā pōninque edæ yowementacodē nē aaquēnēnāni inānite æbānō cæquingā, antē pōnēmīni.”

⁴¹ Ante añngante tōmēnāni wæætē,

—Ōmæ, ante nē wænōnīnāni inānite tōmengā nāēmæ edæ, Ōmæ, ante wænongā wæncædānimpa. Ayæ wæætē, Ædānidō nō cædinque yowedepo ifnō yowedepo ifnō tā pete pōnōnāni ænguimoo, ante adinque awēnē, Mīnitō wæætē aacæminimpa, angā Ao ante aacædānimpa, ante apænedānitapa.

⁴² Itota ayæ tōmēnāni inānite,

—Wængongui angā ēfnente nāni yewæmongainta æbānō ongō ante mīnitō adāmaī inte āmīni awædō, angantapa.

“Dica ænte adinque, Wēnæ wēnæ inca, ante nē mænōnāni nāni wido cædinca incæ

gomonga waēmonca inca ifninque tāno nāni ifnōninca bæbængapa do bacapa.

Wængongui Awēnē incæ mānōmaī cæcā adinque

mōnō waocabo guifnente wædinque waa amompa,”

Ante yewæmonte impa abaiminipa. ⁴³ Mānīnō mīni ēfnēnāmaī inō beyæ mīnitō Awēnē Wængongui Odeye nempo quēwente mīni cæquēnēnō incæ ō ænte bai cæcā wæcæminimpa. Ayæ wæætē wadāni inānite tōmēmō wainca incate bai nō cædāni inānite godō angā ēfnēninque tōmēnāni wæætē tōmengā nempo quēwente waa cæcædānimpa. ⁴⁴ Botō ifnōmō mānīi dica waēmonca bai inōmo inte āmo ēfnēninque nē wæcā ifnōmō tōmengā ifnōmō māninca tæ go wææninque wædænque tobænte wæcā bai inongā inte botō onōwa gāānē ædæ wææncæcāimpa. Wæætē æcānō ingante Wængongui pīnte mānīnca tacacā inaa tōmengā guiquēnē quiēmē bai yaintai bai goquīnō anguēnē, ante pōnēmīniyaa.

⁴⁵ Ante nē aaquēnēnāni nāni cæinō ante odōmōninque Itota apænecā ēñente wædinque, Wængonguī qui, ante nē godōnāni ñænænāni tōnō Paditeoidi iñōmō, Iñæmpa mōnō imonte pūinte angā awædō, ante pōnente wædinque, ⁴⁶ Quinō cæte tōmengā ingante bæi ongonte ò ænguīi, ante cōwā adānitapa. Incæte, Waodāni tōmānāni, Wængonguī beyæ nē apænecā Itota inongā ingampa, ante pōnēnānīpa, ante wædinque, Pīīnāni wæcæ wæ, āninque edæ ñimpo cægadānimpa.

22

Monguimæno ante odōmonte apænecampa (Odoca 14.15-24)

¹ Wængonguī Awēnē æbānō cæqingāā, ante ēñencæminimpa, ante imæca awēnē nānō cæinō ante Itota tōmānāni inānite wæætē odōmonte apænegacāimpa.

² “Inguipoga awēnē odeye tōmengā wēñæ beyæ monguimæno ante nānō cæbai oōnædē Awēnē Odeye iñōmō adobaī cæcampa. ³ Inguipoga awēnē iñōmō tōmengā ingante nē cædāni inānite, Wēēnē botō ānināni inānite wente ænte pōedāni. Angā tē tē wente ænāni ēñēninque edæ, Wīi pōinēwædō, ānāni. ⁴ Ēñente wædinque awēnē wæætē wadāni tōmengā ingante nē cædāni inānite da godōninque, ‘Wēēnē botō ānināni weca godinque botō beyæ īīmaīnō ante apænemīni ēñencædānimpa. Botō wengā monguimæno ante wagadaidi onguīñænāni tōnō cænināni oguīmo pōni ināni inānite do wænōninque botō ææmænoca do eyepæ cæbopa. Botō wengā monguimæno pō beedāni, ante mæmpocā angampa, ante edæ botō beyæ apæneedāni.’ ⁵ Angā ēñēninque gote apæneyōnāni tōmēnāni ēñēnāmaī inte ōnonque wadæ godinque pancadāniya gōnea ante goyōnāni wadāni godonte æncæte ante godānitapa. ⁶ Wadāni ayæ ongōnāni guiquēnē ēñēnāmaī inte awēnē nānō da godonte nē cædāni inānite piinte wēnæ wēnæ cædāni wæyōnāni māo wænōnāni wænānitapa.”

⁷ “Mānōmaī cædāni ate wædinque awēnē odeye iñōmō āingā badinque tōmengā tontadoidi inānite angā ēñēninque nē wænōnināni inānite māo capō wænōnāni. Wænāni adinque godōmenque onconcoo tōmēnāni nāni ēadincōo iya tānāni. ⁸ Īninque edæ awēnē wæætē tōmengā ingante nē cædāni inānite, ‘Monguimæno do eyepæ cæte ongō incæte botō nē ānināni waa cædānīpa diyæ āmo bequīnānīi. ⁹ Īninque mīnitō wæætē edæ iyænompoga iyænompoga māo godinque æcāmenque ingante bee tēninque tōmēnāni tōmānāni inānite āmīni ææmæno pō becædānimpa.’ ¹⁰ Angā ēñente cædinque nē cædāni taadonque pō bee bee bee tēninque waa cædāni incæ wīwa cædāni incæ tōmānāni inānite āñete ænte māmōnāni pō monguimæno oncōnē pō guīid-
inque eyede goto gongænte bedānitapa.”

¹¹ Ayæ, “Awēnē odeye iñōmō ēñacæ pō bedāni inānite acæ guīyongā edæ adocanque monguimæno bequī weocoo awēnē odeye nānō pōnōnincoo incæ wēñadāmaī inte ōnoncooque ee mongængā. ¹² Adinque, ‘Æmigo, bitō ædō cæte monguimæno weocoo wēñadāmaī inte ōnoncooque ee mongænte guīibīi,’ ante āñongā edæ pæ wēēnecā. ¹³ Adinque awēnē odeye iñōmō nē aadāni inānite āninque, ‘Nē monguimæno weocoo wēñadāmaī ingā ingante mīnitō goti wimpote wææ goti wēwate edæ wēmō iñōmō nāni guingo imonte Yæ yæ ante wæyōmō māo wido cædāni,’ ante awēnē odeye angampa. ¹⁴ Mānōmaī nāni cædō bai adobaī impa. Edæ nanguī ināni inānite Wængonguī, Pōedāni, angā incæte edæ wædænque ināni inānite apænte Ao ante ængampa,” ante Itota apænegacāimpa.

Tæiyæ Awënë nânö äintamö ante tededänipa

(Mäadoco 12.13-17; Odoca 20.20-26)

¹⁵ Itota mänömaï apæneçä eñente wædinque Paditeoidi wadæ godinque godongæmæ ponëe çoninque, Mönö piinte apænte anginque ante quïnö çæmö ate Itota adodeque wapiticæ tededinque oda çæquingää. ¹⁶ Ante pönëninque tömënanï nê emiñænänï tönö Edodeidi inänite da godönänï godinque Itota weca pöninque,

—Awënë nê Odömömi eñëmi. Bitö nö pönente çæbi ïmipa, ante do eñëmönipa. Ayæ bitö ayömi mönitö tömämöni önömönique ïmöni adinque bitö, Waodäni æbänö anguinänii, ante ayæ, Æbänö çæquinänii, ante wæðamai ïnömi inte edæ Wængongui taadö ante guñënämaï inte nö odömönte apænebipa. ¹⁷ Ìninque bitö æbänö pönëmi. Odömäno gobiedöno beyæ ante tæiyæ awënë Tetædo tiguitamö nânö änantamö ante æbänö wææ yewæmante ï, ante eñencæte ante wæmönipa edæ. Godonte edæ waa çæte intawo. Wæætë wënæ wënæ çæte intawo, ante apænebi eñencæmönipa.

¹⁸ Äñönäni Itota ïñömö tömënanï do, Çæmö wapiticæ tedecæcäimpa, ante nänï äninö ante do eñëninque tömënanï inänite wæætë edæ,

—Mïni wadö tedete wadö çæcabo ïñömö edæ quïnante botö ïmote, Æbänö çæmö oda çæquingää, ante çæminii. ¹⁹ Tetædo tiguitamö nânö änantamö odömömïni aquïmo.

Äñongä deënadio tiguitamö adotamonque ænte pönäni. ²⁰ Adinque tömënanï inänite Itota,

—Æcänö awinca bai yewæmante badonte ï. Edæ æcänö emöwo ante yewæmante ï.

²¹ Äñongante,

—Awënë Tetædo awinca bai yewæmante badonte impa. Adocä emöwo ante yewæmante ongö amönipa.

Änänï eñëninque Itota ïñömö edæ,

—Awënë Tetædo qui ï ïninque edæ Tetædo ingante godongæimpa. Wæætë Awënë Wængongui qui ï ïninque Wængongui ingante godongui ï apa änewëminii.

²² Ante Itota nânö äninö eñente beyæ, Quiëmë bai angää, ante ancai guñënte wædinque wadæ godadänimpa.

Ædö çæte nänï ömæmonguiï, ante wæðänipa

(Mäadoco 12.18-27; Odoca 20.27-40)

²³ Mäniönæ adoönæ ïñonte Tadoteoidi nê, Waocä wæninque nänï ömæmönämaï æmæwo wængampa, ante nê änewënanï inte Itota weca pöninque, Ìimaïnö ante eñencæte ante wæmönipa, änanitapa.

²⁴ —Awënë nê Odömömi eñëmi. Möitee wodi mönö beyæ ante wææ yewæmöninque ïmaï ante yewæmongacäimpa. Waocä möninque wëñæ tapæidämaï inte wængä ate tömengä tönïñacä wæætë owæmpoingä ingante möninque wëñæ tapæidinque, Botö tönïñacä wodi wængä ingampa, ante pæpogacæcäimpa, ante yewæmongacäimpa. ²⁵ Nöwo ïñömö möni cabo ïñömönite adodäni nänï caipæ önompo æmæmpoque go mënaa inänï ïñönänï bamoncadengä möninque wëñæ tapæidämaï manguiwëninque edæ näñe wængä ate ayæmengä wæætë owæmpoingä ingante mongä. ²⁶ Ìninque ayæmengä incæ adobai wëñæ ömæpocä näñe wængantapa. Ayæ wææ wacä ayæmengä adocä ingante monte ate wëñæ adobai tapæidämaï inte edæ näñe wængantapa. Ayæ wææ wacä adobaingä, ayæ wææ wacä tapæidämaï inte näñe, ayæ wææ wacä, ayæ wææ ayæmengä pönï adocä ingante

mōninque wēñæ tapæidāmaī inte nāñe wængantapa. ²⁷ Onquiyængā guiquenē owæmpote wædinque tōmangā pōñi nāñe wængantapa. ²⁸ Ìninqe, Mōnō ñāni òmæmonguionæ, ante mīni ãonæ ìñonte māningā owæmpoingā ìñomō æcānō nānōogængā baquingā. Edæ tōmengā ingante ìñomō edæ tōmānāni man-guīwengadānimpā. ²⁹ Æññānite Itota wæætē,

—Mīnitō ìñæmpa. Wængonguī angā ēñente nāni yewæmōinta adāmaī inte baī ãmīni awædō. Wængonguī adocanque tæī piñængā inte edæ tōmāā cæcampa, ante pōñenāmaī inte edæ oda cæte ãmīni awædō. ³⁰ Edæ Wængonguī anquedoidi òonædē cōwē owodāni baī ìñonāni inte waodāni ñāni òmæmōninque godō ñānōnāmaī ìñāni inte edæ mōnāmaī inguīnānidō anguēnē.

³¹ Wæætē do wængaīñāni nāni ñāni òmæmonguīnō ante ēñencæmīnimpā, ante Wængonguī beyæ yewæmōnte ongō adāmaī ìmīnitawo. ³² “Botō ìñomō Abadāō Wængonguīmo ingaimo inte ayæ Itæca Wængonguīmo ingaimo inte botō Aacobo Wængonguīmo adobo ìmo anguēnē,” angacāimpā. Ante nē angaingā inte edæ æmæwo wænīñāni tōmēnāni Wængonguingā ædō cæte inguingā. Wæætē edæ mūī quēwēnānique tōmēnāni Wængonguī ìnogā ingampa. Ìninqe edæ nē wænte godīñāni incæ ayæ mīñāni quēwēnāni ìñānimpā, ante pōnenguēnē ānewēmīni.

³³ Ante apænecā ēñēninque godongāmæ ēñengōñāni guiquenē, Æbānō cæte Itota waa pōñi odōmonte apænecā ēñēmōni, ante wægadānimpā.

*Wængonguī nānō wæce angaīne mēnea tæīneda pōñi ēnepa
(Māadoco 12.28-34)*

³⁴ Tadoteoidi guiquenē, Ædō cæte gomonga anguī, ante edæ pæ wēenedānitapa. Mānōmaī Itota nānō nō ānīnō beyæ pæ wēenedānimpā, ante tededāni ēñēninque Paditeoidi wæætē godongāmæ pōñānitapa. ³⁵ Itota æbānō cæte wapitacā āmaingā, ante pōñēñōñāni adocanque idægoidi nāni wææ angaīnō ante nē ate ēñēnongā ìñomō Itota ingante angantapa.

³⁶ —Awēnē nē Odōmōmi ēñēmi. Wængonguī, Ìmaī cæedāni, ante nānō wææ angaīnecoo ante pōñēninque ædedō tæīne pōñi ì ìñonte mōnō nanguī ēñente waa cæquī.

³⁷ Æñongante Itota ìñomō,

—Ìmaīnō ante nānō wææ angaīne ìñomō edæ tæīne pōñi ìñonte mōnō nanguī ēñente waa cæcæimpā. “Wængonguī mōnō Awēnē ingante bitō mīmō entawente waadedinque bitō ocaī encabi inte nō pōñēninque bitō òñowoca ēwocabi inte edæ tōmengā ingante ædæmō waa waadete pōñē.” ³⁸ Māñine nānō wææ angaīnō waa pōñi ì ìninqe māñine tāno waa cæquī impā. ³⁹ Ayæ wade nānō angaīnō adobaī nanguī waa ēñente cæquī impā. “Bitō nāmā bitō waadete waa cædō baī adobaī pōñēninque wadāni ìñānite adobaī waa waadete cæe.” ⁴⁰ Ìmaī cæedāni, ante Mōitee wodi nānō wææ angaīnō ayæ Wængonguī beyæ nē apænēdāni nāni angaīnō cæcæte ante cædinque edæ māñine Wængonguī mēnea nānō wææ angaīne ēñente cæte beyænque edæ tōmānō edæ do eyepæ cæte impā, ante Itota apænecāimpā.

*Codito æcānō pæingā ìnogā ingā, ante apænecampa
(Māadoco 12.35-37; Odoca 20.41-44)*

⁴¹ Māñi Paditeoidi adoyōmō ponte ayæ ongōññāni Itota tōmēnāni ìñānite angantapa. ⁴² Itota ìñomō tōmēnāni ìñānite,

—Codito ìñomō æcānō ingā, ante pōñēmīni. Æcānō Wengā ìnogā ingā, ante pōñēmīni.

Ante Æñongante Paditeoidi wæætē,

—Awënë Dabii pæingä ïnongä ingampa.

⁴³ Äññonänite Itota edæ,

—Awënë Dabii pæingä ïnongä ïñongante edæ Dabii tömë edæ Codito ingant-edö äninque quïnante, Awënë ïmipa, angacäimpa.

⁴⁴ “Awënë Wængonguï incæ botö Awënë ingante apænedinque,

Botö tömëmæ ïnö tæ contayömi,

bitö ïmite nê pïinäni ïnänite bæ tabo ate

bitö önöwa gäänë ongöññonänite bitö pinä gäwacæbiimpa, angacäimpa.”

Ante Wængonguï Önöwoca apæneçä ëñëninque Dabii wodi yewæmongacäimpa. ⁴⁵ Codito nê Awënë ingampa, ante awënë Dabii wodi

nänö nê angaingä ïnongä inte edæ adocä Codito ïñömö ædö cæte næëmæ Awënë Dabii wodi pæingä inguingää, ante pönenguëñë änewëminii.

⁴⁶ Ante äñngö edæ tömänäni, Mönö ædö cæte wæætë anguiï, äninque ëñënamäi inte edæ pæ wëenegadänimpa. Ayæ ïncayæ ate, Apænebi ëñëmönii, ante ædö cæte angui moo, ante edæ tömänäni guïñente wædinque äñämäi ingadänimpa.

23

Paditeoidi tönö nê odömönäni ïnänite Itota püinte angä

(Mäadoco 12.38-40; Odoca 11.37-54, 20.45-47)

¹ Pæ wëenedäni adinque tömengä miñæ nê godäni godongämæ ongönäni nanguï ïnäni tönö ongöññonänite Itota tömänäni ïnänite apænegacäimpa.

² “Nê odömönäni tönö Paditeoidi ïñömö Möitee wodi nänö angainö ante nê ëñëñäni inte nê nö odömönte apænedäni ïnäni. ³ Mänömaï ïnäni adinque mïnitö ïñömö tömënäni äninö ante tömänö ante cöwë ëñente cæedäni. Wæætë tömënäni näni cæi bai cædämaï ïedäni. Edæ, ïmaï cæedäni ïmaï cæedäni, ante näni äñö ante tömënäni nämä incæ ëñëñämäi cæedäni. ⁴ Edæ mäincoo teëmencoo mö paate wadäni önöncapæ cö cædancapæñäni bai cædinque tömënäni, Wadäni guëmançædänimpa, ante cædämaï ïnäni inte önompogonca adopogoncaque incæ gä ænancapæñämäi ïnäni.”

⁵ “Quiëmë cædäni incæ tömënäni cöwë, Wadäni botö ïmote waa acædänimpa, ante cædäni. Wadäni, Bitö Wængonguï beyæ näni yewæmongainta nanguï abi ïmipa, ante pönëninque mönitö ïmönite waa acædänimpa, ante babæ cædinque mäninta æmontaicade ñænæ pöni badonte mïni tente önöncaipoga wo cæte encapodänimpa. Ayæ, Bitö Wængonguï ingante nanguï apænebi ïmipa, ante pönencædänimpa, ante cædinque tömënäni weocoo ñä cæwate ñä cæwate doya guënë ewa badöninque doya pöni wëñate mongænänimpa.

⁶ Ayæ ææmæ becæ godinque tömënäni, Botö täno bete toçæboimpa, ante waëmompaa pöni tæ contate bete todänimpa. Ayæ Wængonguï angä näni ëñente yewæmongainta ate odömöincönë pö guïdinque tömënäni nämanque ante pönëninque waëmompaa pöni tæ contate todänimpa. ⁷ Ayæ waodäni näni godonte æññömö wainö pancadë goyönäni wadäni pö beë tëninque, Nê odömömi, bitö ïmite waa amönipa, ante apænedäni ëñëninque edæ nê odömönäni ïñömö nanguï todänimpa,” ante Itota apæneçantapa.

⁸ Ayæ apænedinque, “Mïnitö guiquënë mïnitö Awënë nê Odömongä adocanque pöni ïñngä mïni caipæ ïñöminite wadäni, Awënë nê odömömi ïmipa, ante äñämäi incædänimpa, ante wææ cæedäni. ⁹ Ayæ mönö Mæempo adocanque pöni öönädë quëwengä ingä adinque mïnitö waocä ingantedö ante apænedinque, Mönö mæmpo ingampa, ante äñämäi ïedäni. ¹⁰ Ayæ, Mönö Awënë nê Odömongä ïñömö adocanque pöni Codito ïñngä ingampa, ante ëñëminii ïñöminite wadäni, Nê ämi ïmipa, ante äñämäi incædänimpa, ante

wææ cæedāni. ¹¹ Ayæ edæ mīni cabo iñōmīnite wacā beyæ wacā nē godō cæcā iñōmō ñænængā pōni ingā incæcāimpa. ¹² Edæ nāmā ængō cæte bai cædinque æcānō, Botō botō, āna tōmengā iñōmō edæ wææntodonte bai ōnonque bacæcāimpa. Wæætē æcānō, Botō botō, ānāmaī inte, Ōnōmoque īmopa, āna iñōmō edæ tōmengā ingante ængō cæte bai cædāni adinque wadāni tōmengā ingante waa acædānīmpa,” ante Itota tōmengā mīñæ nē godāni inānite apænegacāimpa.

¹³ Ayæ nē odōmōnāni tōnō Paditeoidi inānite Itota piinte angantapa. “Mīnitō iñōmō mīni pante wæquinque edæ wadō tedete wadō cæmīni īmīnīpa. Wadāni ōōnædē Awēnē Odeye nempo guīdāmaī incædānīmpa, ante mīnitō odemō tee mōnete bai wææ cæmīnīpa. Tōmēmīni guīdāmaī īmīni inte mīnitō wadāni guīcæ cæyōnānite edæ tōmēnāni nāni guīdāmaī wæquinque edæ wææ cæmīnīpa. ¹⁴ Nē odōmōmīni tōnō Paditeoidi īmīni mīni wadō tedete wadō cædīncabo inte mīni wæquinque īmpa. Owæmpōināni oncō ō æmīni incæte mīnitō, Wantæpiyæ botō tedebō beyænque wadāni botō īmote waa acædānīmpa, ante Wængonguī ingante wantæpiyæ nē tedemīni inte godōmenque mīni panguinque ingæīmpa,” ante Itota angacāimpa.

¹⁵ Ayæ apænedīnque, “Nē odōmōmīni tōnō Paditeoidi īmīni mīni wadō tedete wadō cædīncabo inte mīni wæquinque. Edæ, Adocanque incæ mōnitō ēmīñængā bacæcāimpa, ante mīnitō æpæ tōmāmæ wogaa gote dīqui dīqui mīnīnque inguīpoga taadō tōmānō gote dīqui dīqui mīnte ayōmīni adocanque Ao angā adinque mīnitō tōmengā ingante godō odōmōmīni. Ēñēnīnque tōmengā guīquēnē mīnitō wēnæ wēnæ goquīnō godōmenque godīnque gomonga nē wēnæ wēnæ cæcā badīnque tadōmengadænguīpo nānō gomonga panguinque mīnitō mīñæ tee empote gocampa tōō.”

¹⁶ Ayæ, “Babetamōmīni mīni wæquinque babæ ante māomīni ate edæ oda cæte godānīpa. Īñæmpa īmaī ānewēmīnīpa. ‘Botō ānō nōingā baquīnō anguēnē, ancæte ante æcānō, Wængonguī tæiyæ waēmō oncō tæi ongō bai īmpa, āna tōmengā ōnonque tedete apænecampa, ante ānewēmīnīpa. Wæætē edæ, Wængonguī tæiyæ waēmō oncō oodo mæ ongō bai īmpa, ante æcānō āna guīquēnē tōmengā nō angā inte cæcæcāimpa,’ ante mīnitō iñōmō babæ wapīticæ āmīnīpa. ¹⁷ Mīni babetamō incabo mīmō ōmædē incædō. Edæ Wængonguī tæiyæ waēmō oncōnē oodo ōñō adinque, Oodo incæ godōmenque waa pōni īmpa, ante babæ ante pōnēmīnīpa. Īñæmpa oodo ænīnque, Wængonguī oncō waēmō ēmonguīnta, ante ænte badōnāni beyænque oodo tæiyæ waēmō bapa, ante pōnēmīniyaa.”

¹⁸ “Ayæ edæ mīnitō babæ apænedīnque, ‘Botō ānō nōingā baquīnō anguēnē, ancæte ante waocā, Wængonguī quī, ante baō nāni iya tāīmpaa tæi ongō bai īmpa, ante æcānō āna ōnonque tedecampa. Wæætē mānīnō ancæte ante, Baō iya tāīmpaa nāni iya tanguīngā bai īmpa, ante æcānō āna iñōmō tōmengā nō ante cæcæcāimpa,’ ante mīnitō babæ wapīticæ āmīnīpa. ¹⁹ Mīni babetamō incabo āmīni ēñēmoedāni. Ēdō waa intawō. Nāni iya tāīmpaa incædō tæiyæ waēmō intawō. Wæætē edæ baō nāni iya tanguīngā incæ tæiyæ waēmō intawō. Ēbānō ante pōnēmīni. Īñæmpa baō ænīnque, Wængonguī quī, ante iya tānāni beyænque baō nāwāaquinā bacampa, ante pōnēmīniyaa. ²⁰ Īnīnque, Botō ānō nōingā baquīnō anguēnē, ancæte ante waocā, Nāni iya tāīmpaa tæi ongō bai īmpa, ante æcānō āna tōmengā, Iya tāīmpaa tōnō baō nāni iya tanguīngā tōnō tōmāā beyæ, ante bai dobæ angampa. ²¹ Ayæ æcānō, Wængonguī tæiyæ waēmō oncō beyænque ante nāwangā baquīnō anguēnē, āna tōmengā Wængonguī oncō beyæ ayæ mānīncōnē nē owocā beyæ adobai

dobæ angampa. ²² Ayæ æcänö, Öönædē beyænque näwangä baquïnö anguënē, äna tömengä edæ Wængongui nänö containpaa beyæ ayæ containpaa nē Contacä beyæ adobaï dobæ angampa,” ante apænegacäimpa.

²³ Ayæ apænedinque Itota, “Nē odömömini tönö Paditeoidi incæ mîni wadö tedete wadö cædincabo inte mîni wæquinque impa. Tömëmini mîni mînte pædimö tönö guimö ogui wayabo tönö tömëmö mîni tä pete ænimö tē gæte diete ganca mîni cabo tē gædincoo ñö cædinque adocooque æninque, Wængongui qui, ante godöninque waa cæminipa. Incæte edæ Wængongui, Nö cæedäni, ante nänö änö ante, Godö waadete waa cæedäni, ante nänö änö ante, Wede pönente cæedäni, ante nänö änö ante mînitö mîni wæquinque ëfente cædämaï Imînipa. İmaï tåno waa cæquënëmîni inte mînitö mänincoo ayæ godömenque Wængongui ingante godömini inguënëmîni imînipa. ²⁴ Babetamömini babæ ante mäomîni ate edæ oda cæte godänipa. Mînitö, Diete ganca mînitö mänincoo ongö adinque adocooque cöwë godongui İ, äninque owætaca bequïñömö guincawæ owoyö tæ wedote baï cæminipa. Wæætë edæ Wængongui nänö änö baï cædämaï inte mînitö edæ cämeyo ñænængade pönï owoyö önonque ade bete baï pönënamäi inte cæminipa, ante awædö,” ante İtota apænegacäimpa.

²⁵ Ayæ nē odömönäni tönö Paditeoidi inänite godömenque äninque tömengä, “Mîni wadö tedete wadö cæcabo inte mîni wæquinque impa. Owæta tönö cængæ yabætaque ñongate baï mînitö wadäni ayönäni nē waa cæmîni inte wæætë edæ cæncadenta inö wentaga engate baï cæminipa. Mîni wacä qui ö æinënö ayæ nämanque ante mîni towënö beyæ owæta cæncadenta inö opogö tagate eyede baï impa diyæ. ²⁶ Bitö Paditeobi babetamömi ëñëmi. Cæncadenta inö tåno ñä mënongabi İninque yabæta inö ñongate wainta baquïnö anguënë,” angacäimpa.

²⁷ Ayæ, “Nē odömömini tönö Paditeoidi incæ mîni wadö tedete wadö cædincabo inte mîni wæquinque impa. Mînitö wao wodido baï yabæque waëmö paate baï İñonte cæncadë inö wao bayetoca ñömænte öö wayömö baï entawëmîni imînipææ. ²⁸ İninque wadäni yabæque adinque, Mînitö nō entawëmîni imînipa, ante pönëñönäni mînitö wiwa mîni pönënö beyæ wadö tededinque wadö cædinque edæ mîmö wentamö entawëmînipa,” ante Itota pïingacäimpa.

²⁹ Tömënäni inänite ayæ pïinque, “Nē odömömini tönö Paditeoidi incæ mîni wadö tedete wadö cædincabo inte mîni wæquinque. Edæ Wængongui beyæ nē apænegainäni wodido, ante mînitö do mænönominipa. Ayæ, Nē nō cægainäni wodido, ante mænöninque mînitö oncontai waëmö pönï paadomînipa. ³⁰ Ayæ, ‘Mæmæidi nāni quëwengaiñedë quëwëmöni baï mönitö tömënäni tönö, Wængongui beyæ nē apænedönäni inänite mäo wænönämäi inte ee quëwencædömönimpa,’ ante äminipa. ³¹ Mänömainö ante apænedinque mînitö, Wængongui beyæ nē apænegainäni inänite nē wænongainäni pæimöni imönipa, ante nämä incæ edonque pönï apænte äminipa. ³² Edæ mînitö wæmæidi nē wænongainäni inte nāni pe ñiñængaimämo wiï eyepæ inte baï cædinque mînitö ñöwo godömenque eyede pe ñiñænte baï capo wænömæwedäni,” ante Itota badete baï angacäimpa.

³³ Ayæ äninque, “Mîni tæntæcabo pæimîni baï imîni ëñëedäni. Mîni obe-cabo pæimîni baï imîni ëñëedäni. Mînitö tadömengadænguipo mîni pante wæquënënö ante æbänö cæte aamö cæte edæ tabaimîniyaa. ³⁴ İninque Wængongui beyæ nē apænedäni tönö nē nō ëñëänäni tönö nē odömönäni inänite botö ñöwo mînitö weca da pönömo pönänipa. Adinque mînitö İñömö edæ pancadäniya inänite wænömîni wæncædänimpa. Pancadäniya inänite mînitö awäa

timpomīni wæncædānīmpa. Ayæ pancadāniya īnānite mīnitō odōmōincōnē bæi ongōnīnque tæi tæi pāmīni caate wædinque tōmēnāni wayōmō quēwēnāni weca wayōmō quēwēnāni weca wodii goyōnāni mīnitō tee empo tee empo togænte goquīmīni, ante awædō. ³⁵ Mānōmaī wēnæ wēnæ cæyōmīni edæ nōwomīni beyænque tōmāā inguiṗoga wepæ aa bedīnque nāate baquīmīnidō anguēnē. Edæ Adāō wodi wengā Abedo nē nō cægaingā wepæ tōnō ayæ quēwēnte nē ēñente cædāni īnānite godō wænōnāni wængaīnāni tōnō tōmēnāni tōmānāni wepæ beyæ mīnitō nāate wæcæmīnīmpa. Ayæ mīnitō Wængonguī oncō ñænæncō boyæ iya tāīmpaa gāānē ongōnīnque Bedequiya wengā Tacadiya īngante godō wænōmīni wængā īnīnque tōmēngā wepæ nāate wæmīnīpa. ³⁶ Nōwomīni mīni wepæ nāate wæquīnque tōmanguīpo aa betīnō anguēnē, ante āmo ēñēedāni,” ante Itota tōmēnāni īnānite idæwaa piinte apænegacāīmpa.

*Eedotadēē quēwēnāni beyæ ante Itota wæcampa
(Odoca 13.34-35)*

³⁷ Ayæ Eedotadēē īñōmō quēwēnāni beyæ ante pōnēnīnque Itota, “Eedotadēē quēwēmīni ēñēedāni, angantapa. Wængonguī beyæ nē apænedāni īnānite mīni wængōncabo inte ayæ Wængonguī nānō da pōnōnāni īnānite dicaca tacamīni īñōmīnīte botō īñōmō mīnitō īmīnīte waadete pōnō cæīnente nangūi wæbopa. Tawadiya wæmōnā īñōmō, Botō wēnāni, ante gomṗodīnque tæcæēnēmæ wēā pōnō ō ænā bai botō adobai, Botō wēnāni pōedāni, ante æpogadō āñōmote mīnitō, Wīī pōīnente awædō, ante Baa āmīni wætābopa. ³⁸ Nōwo īñōmō edæ mīni quēwēñōmō ōnonconcooṗe baconcoo tamēñedāni. ³⁹ Nōwo īñōmō edæ botō dæ āñōmo mīnitō, ‘Awēnē Wængonguī ēmōwo beyænque pōnīnque bitō toquīnque edæ waa cæcæbiīmpa,’ ante mīni anguīnganca mīnitō edæ botō īmote adāmaī incæmīnīmpa ante āmo ēñēedāni,” ante Itota apænegacāīmpa.

24

*Wængonguī oncō ñænæncō bæ tate baccæīmpa, ante
(Māadoco 13.1-2; Odoca 21.5-6)*

¹ Itota Wængonguī oncō ñænæncō oncodo tao gocantapa. Wadæ gocæ cæyongā tōmēngā mīñæ nē godāni īñōmō, Wængonguī oncō ñænæncō æbānō waa pōnī mænonte īī, ante odōmoncæte ante tōmēngā weca pōnāni. ² Ate wædinque Itota wæwætē,

—Mīnitō guīquēnē mānīncoo tōmancoo edæ waa amīnitawo. Nāwangā ante mīnitō īmīnīte apænebopa. Mānīncoo mīni acoo incæ tōmanca bæ tadāni wæænca adīnque pangūīmæ pangūīmæ godīnque dica adocaque pōnī incæ wænōmēmæca ongōnāmaī īngæīmpa, ante apænegacāīmpa.

*Oo īnīnque baccæīmpa, ante æbānō ate ēñenguīī, ante
(Māadoco 13.3-23; Odoca 21.7-24, 17.22-24)*

³ Mānīī taodīnque Odībowænquīdī pō æite tæ contate ongōñongā tōmēngā mīñæ nē godāni adodānīnque tōmēngā weca ponte apænedānītapa.

—Bitō ānō ante æyedēnō īnīnque baquīī, ante ēñencæte ante wæmōnīpa. Edæ bitō ponque æyedēnō pongūīmīī, ante ayæ mōnō inguiṗoga quēwēnō æyedēnō æmæwo īnīnque baquīī, ante ēñencæte ante wæmōnīpa. Īnīnque, Æbānō mā odōmonte bai ba adīnque edæ, Oo pōnī īmpa, ante wædinque ēñenguīmōnīī, ante ēñencæte ante wæmōnīpa.

⁴ Āñōnāni Itota,

—Wapiticæ odömöñönäni mīnitō wæætē, Mönō oda cædāmaī ingæīmpa, ante nāmā wææ aquēnē quēwēmīni. Edæ īmaī baquī ī ataqeedāni. ⁵ Edæ wadāni nanguī ināni botō ēmōwo ante babæ tedete pōnīnque, “Botō Codito īnōmo īmopa,” ante apænedīnque wapiticæ māodāni godīnque edæ nanguī ināni tōmēnāni mīñæ oda cæte wapiticæ gocædānīmpa. ⁶ Edæ, Wabæca awēnē tōnō pō bee tēnīnque wæætedō wæætē cædapā, ante tededāni ēñencæmīnīmpa. Ayæ wayōmō nāni guēadō guēa cæte wæñonō ante tededāni incæte edæ guīñente wædāmaī īedāni. Edæ mānīnō botō ānīnō baī cōwē bacæīmpa. Ba incæte mōnō īnguīpoga quēwēnō īñōmō māñīfēdē wīī æmæwo īnque bacæīmpa. ⁷ Adobæca quēwēnāni īñōnānite wabæca quēwēnāni ponte bee tēnīnque guēadō guēa cæquīnāni īnānīpa. Adobæca awēnē odeye nempo quēwēñōnānite wabæca awēnē odeye tōmengā nānō ēnempodāni māmō bee tēnīnque guēadō guēa cæte wæñonante wænguīnāni īnānīpa. Ayæ waodāni nāni cæñīnente wængūnque cænguī incæ tōmāā capo wængæīmpa. Ayæ wayōmō wayōmō goīnque pō wæcædānīmpa. ⁸ Incæte māñī nāni wæwēnō ba īnīnque edæ ōnonque mā pōñī nāni wæwenguī īnguīnō anguēnē.

⁹ Māñōmāīnō ante Itota godōmenque apænegacāīmpa. “Māñīfēdē edæ mīnitō īmīnite mīni wæquinque ō ænte māō godōnāni wæyōmīni godōmenque wæñōnāni wæncæmīnīmpa. Ayæ māñīfēdē botō ēmōwo apænemīni beyæ tōmāmæ quēwēnāni mīnitō īmīnite pīncædānīmpa. ¹⁰ Ayæ adoyedē mīni pōñencabo incæ pancadāniya guīngo imonte baī badīnque edæ pōñēnāmāī īnte Baa anguīnāni. Ayæ mīni cabo incæ nāēmæ pīīnīnque pancadāniya, Nānō wængūnque, ante wacā īngante nāēmæ godoncædānīmpa. ¹¹ Ayæ nē babæ ante apænedāni ponte, Wængonguī beyæ nē apænemōni īmōnīpa, ante odömōnāni adīnque pancadāniya edæ oda cæte wadō pōnente baquīnāni īnānīpa. ¹² Ayæ ēñēnāmāī īnte nāni cæpāmo godōmenque yebænte baī nanguī ba ate wædīnque nē pōñēnāni īnte wodo tōmānāni edæ Baa ānīnque waadedāmaī bacædānīmpa. ¹³ Edæ æcānō īmæca īnque baganca wæntædāmaī īnte botō ēmōwo beyæ pīīnte badāmaī īnaa tōmengā edæ botō æmo beyænque cōwē wæñāmāī quēwencæcāīmpa. ¹⁴ Ayæ edæ, Awēnē Odeye nempo watapæ quēwængæīmpa, ante mīni pōñencabo tōmāmæ quēwēnāni īnānite māō apænemīni ēñencædānīmpa. Māñōmāī apænedīnque īnque cæmīni ate māñīfēdē ate edæ īnque baquīnō anguēnē,” ante Itota tōmengā mīñæ nē godāni īnānite apænegacāīmpa.

¹⁵ Ayæ apænedīnque Itota, “īnīnque, Wængonguī beyæ nē apænegāīngā Dañīniedo wodī, Nōmæī baī ōō wadō nāni wo ēwenguīmāmo incæ Wængonguī oncō tæyīæ wæēmoncōnē ænte māmō cō cæquīnānidō anguēnē, angacāīmpa. Dañīniedo nānō yewæmongāīnta adīnque nē adīngā īñōmō tōmengā do ēñēmaīngampa. Īncayæ ate māñōmāī cō cædāni ongō adīnque, ¹⁶ māñīfēdē Oodeabæ quēwēmīni īñōmō edæ ānanquīdī do wodīī wīnonte æībæwedāni. ¹⁷ Ayæ oncōmanca ongōmīni īnīnque māīncoo æncæte ante oncōnē wæī guīdāmāī īnte oncōmancaque oncōmancaque wodīī wīnōmæwedāni. ¹⁸ Ayæ tōmēmoncodē cæmīni īnīnque yacoo æncæte ante oncōnē ocæ ēmæñāmāī īnte godōmenque wodīī wīnōmæwedāni. ¹⁹ Māñīōnæ īnque bayedē nē yædēmadā īnāni tōnō goomæ nē gāñōnāni tōnō tōmēnāni nāni wæquīmāmo baquīnō anguēnē. ²⁰ Ayæ mīnitō mīni wodīī wīnonguīōnæ ante pōñēnīnque edæ Wængonguī īngante, Wīī edæ cōōnædepo bacæīmpa, ante ayæ, Guēmanguīōnæ īñonate badāmāī īngæīmpa, ante ædāni. ²¹ Edæ māñīfēdē waodāni nanguī nāni wæwēmāmo nāni angā baquīnō anguēnē. Edæ Wængonguī nānō badongāīñedē māñōmāī nāni wæwēmāmo baī dæ āñonate

ayæ godömenque ñowo ganca dæ änompa. Ayæ godömenque ñinque baganca mänömaï nâni wæwenguimämo bai dæ anguinö angüenë. ²² Edæ wantæpiyæ nâni wæwenguï impa, ante adinque Wængonguï, Mänimpoönæque edæ wæwencädänimpa, ante pönömenque ante änamaï ingä bai quingänö quëwenguënë dæ ancädönänimpa. Incæte, Në quëwenguïnâni botö angainâni wïï wantæpiyæ wæwencädänimpa, ante cædinque Wængonguï dobæ pönömenque äninque, Idæwaa impa, ancæcäimpa,” ante Itota apænegacäimpa.

²³ Ayæ, ñinque bayonte æbänö inguüi, ante apænedinque Itota godömenque ñïmaï ante apænecantapa. “Mänïñedë wadâni mînitö ñimînite, ‘Ïñömö mönö Codito ponte ongongä tamëñedâni,’ ante ayæ, ‘Wayömö ponte a ongongä atamönipa,’ ante tededâni ëñëninque mînitö ññömö edæ ëñëñämaï ñmæwedâni. ²⁴ Wadâni mänïñedë ponte a ongöninque nämä incæ ante, Tömëmö Codito ññömö ñmopa, ante babæ ante tedequïnâni. Ayæ, Wængonguï beyæ në apænebo ññömö ñmopa, ante babæ ante tedequïnâni. Tömënâni, Wængonguï nänö apænte ængainâni incæ æmæwo oda cædinque wapiticæ gocädänimpa, ante cædinque bamönengæ bai cædinque öönädë cæi bai cædinque nö odömonte bai cæquïnâni ññänipa. Incæte Wængonguï në apænte ængaingä inte edæ ee aquingä diyæ æmæwo oda cædinque wapiticæ goquïnâni. ²⁵ Edæ ñinque badämaï ññonte botö ñowo do apænebo ëñëedâni. ²⁶ ñinque, pönente quëwëñöminî wadâni, ‘Cöwä aedâni, öñömæca mæ ongongampa,’ ante äñâni ëñëninque mînitö acæ taodämaï ñedâni. Ayæ, ‘Öncö guimongacönë a ongongä apa quëwëedâni,’ ante äñâni incæte pönëñämaï ñedâni. ²⁷ Edæ nænque tamönö gämæñö näñinque guidö gämæñö quingæ gote bai edæ tömänâni edonque ayönâni botö Waobo ëñagaïmo inte botö ponque poncæboimpa. ²⁸ Edæ abadæidi ñömæingäa weö pönâni bai mînitö tömämîni adoyedë ññontobæ botö weca ponguimîni ñimînipa,” ante Itota apænegacäimpa.

*Waacä ëñagaïgä ñïmaï pöninque cæcæcäimpa, ante
(Mäadoco 13.24-37; Odoco 21.25-33, 17.26-30, 34-36)*

²⁹ Ayæ godömenque apænedinque Itota, “Mänïï nâni wæwëmämo nâni angä ñinque go ate nænque ññontobæ wëmö badinque apäicä apäidämaï ingæimpa. Nëmöncoo öönädë ññö wææ tæ wææñinque waa tæ waa tæ wæængæimpa. Öönädë tæi ongongaincoo incæ wancæ wancæ cæte bai wapiticæ goquïnö angüenë. ³⁰ Mänïñedë ate botö Waobo në ëñagaïmo inte oo pönömo öönädë ate bai ba adinque wabæca nâni cabo wabæca nâni cabo tömäma quëwëñâni Ca ca wæcädänimpa. Wæyönâni botö Waobo në ëñagaïmo inte boguimancodë mämö pöninque botö tæi pönî piñæmo inte ññö apäite bai waëmö ëmonte wææmo acädänimpa. ³¹ Mänïñedë todompeta mönö ancadeca yedæ ænete bai we ööñonte botö anquedoidi ññänite da godömo godinque tömënâni boguimä æmæñö betamonca æmæñö betamonca nänö pö goinö godinque öönädë tömäne godinque edæ Wængonguï nänö apænte ængainâni ññänite äñete poncädänimpa,” ante Itota apænecantapa.

³² Ayæ, “Wængonguï Awënë æyedëñö ponguingäa, ante botö iigowæ æbänö ñwæ ante odömonte apænebo ëñëedâni. Tömëwæ müwæ badinque iigowæ wayabo tänä nä boca adinque mînitö, Öñabo nänö bocainepo inte nænque näwantedæ baquinque bocapa, ante pönëninque edæ do ëñëminipa. ³³ Ayæ adobaï mäninö botö apænedinö bai edæ do ba adinque mînitö, Waacä në ëñagaingä ññömö edæ do odemö pönî ongöninque edæ oo poncæcäimpa, ante ëñencæminimpa. ³⁴ Näwangä ämopa. Nöwomîni ayæ mümîni quëwëninque wænte godämaï ññömîni mäninö botö apænedinö bai tömänö edæ do ñinque

baquinō anguēnē. ³⁵ Ōönædē ongōñōmō inguipoga tōnō wo ēwente baī dæ ba incæte botō angaiñonque guiquēnē edæ dæ badāmaī inte edæ cōwē tæī ongongæimpa,” angantapa.

³⁶ Ayæ, “Māniōnæ æyedēnō ī, ante, Māniñepo ædepodō ī, ante ēñencæte ante mīni wædinō ante æcāmenque incæ ēñēnāmaī ingampa. Tōmānāni ēñēnāmaī īñōnāni edæ Wængongul anquedoidi incæ ēñēnāmaī inānīpa. Wæmpocā Wēmo incæ ēñēnāmaī īñōmote Wæmpocā īñōmō tōmengā adocanque incæ edæ nē ēñengā ingampa,” ante Itota apænegacāimpa.

³⁷ Ayæ godōmenque īmaī ante apænecantapa. “Waobo nē ēñagaīmo inte botō ponguiōnæ īinque bayedē guiquēnē Nōwee wodi Docā nāni angaingā nānō quēwēñedē dodāni nāni quēwengai baī adobaī edæ quēwenguināni inānīpa. ³⁸ Māniñedē æpæ ayæ ānāmaī īñedē nē quēwengaiñāni īñōmō ōnonque cænte bete, Monguingā, ante godonte ate mōniñque tōmēnāni Docā Nōwee oncō baī wipo mæñonte nānō guiquiōnæ īinque baganca quēwencægadānīmpa. ³⁹ Tōmēnāni inānite æpæ ænte gocæ cæganca tōmēnāni, Æpæ anguimpa, ante ēñēnāmaī nāni quēwengai baī adobaī ēñēnāmaī cæyōnāni botō Waobo ēñagaīmo inte adobaī edæ īñontobæ poncæboimpa. ⁴⁰ Māniñedē waoda tōmēmoncodē guēa cæyōna adocanque ingante ō æñāni goyongā adocanque wæætē a ongoncæcāimpa. ⁴¹ Ayæ onquiyæna guēa apo cæyōna adocanque ingante ō æñāni goyongā adocanque wæætē a ongoncæcāimpa,” ante Itota odōmonte apænecantapa.

⁴² Ayæ, “Awēnē æyedēnō ponguingāā, ante ēñēnāmaī imīni inte mīnitō mīimīni inte edæ cōwā aquēnē quēwēñāni. ⁴³ Nē awēmō ængā æyedēnō ponguingāā, ante ēñente baī nē ēacā īñōmō, Bæ tate guidāmaī incæcāimpa, ante wææ wānoncædongāimpa, ante ēñente quēwēedāni. ⁴⁴ Wao Wēmo ēñagaīmo inte botō adobaī mīnitō ēñēnāmaī īñōmīni do īñontobæ ponguīmo imo ante mīnitō botō ponguinō ante wānō cōedāni,” ante Itota angacāimpa.

*Awēnē quincōo ante nē ædæmō aacā
(Odoca 12.41-48)*

⁴⁵ Ayæ Itota īmaī apænecantapa. “Inguipoga awēnē īñōmō, Æcānō nē ēñengā inongā inte botō quincōo ante ædæmō aacā inguingāā, āniñque, Mānōmaī inte cæcā ingante adinque botō āmo ate tōmengā nē angā badinque botō oncōnē quēwēñāni inānite ædæmō aadinque cængui eyepæ īñonte godongā cæncædānīmpa, angampa. ⁴⁶ Ante awēnē wayōmō gote ponte ayongā, Nē cæcā botō ānō ante ēñente cæcampa, ante adinque awēnē wæætē tōmengā ingante godō waa cæcā tōmengā ingante godō waa cæcā ate nē waa cæcā īñōmō edæ waa tocæcāimpa. ⁴⁷ Mīnitō imīnite nāwangā ante apænebopa. Nē ēñente cædingā ingante awēnē, Bitō botō māincōo tōmancoo edæ nē aabi bacæbiimpa, ancæcāimpa.”

⁴⁸ “Wæætē edæ tōmengā ingante nē cæcā incæ wēnæ wēnæ cæcā inongā inte mīmōno pōnēwēniñque, Botō awēnē wabānō wantæpiyæ pōnāmaī imaingampa, ante pōnengā īinque æbānō babaī. ⁴⁹ Tōmengā edæ wadāni nāni cæcabo īñōnānite nāēmæ pīniñque tæi tæi pangā īinque ayæ nē tī nāmæ bete quidi quidi dowænte badāni tōnō godongāmæ cænte becā. ⁵⁰ Īinque tōmengā, Æōnædō ponguingāā, ante wædāmaī īñongante, Æyedēnō ponguingāā, ante ēñēnāmaī īñongante edæ awēnē īñontobæ pongā wæbaingampa. ⁵¹ Pōniñque awēnē īñōmō ēñēnāmaī cædingā ingante baō wido wido todinque tōmengā ingantedō āniñque, Nē wadō tedete wadō cædināni nāni panguinō gote tōmēnāni tōnō godongāmæ ongonte wæcæcāimpa. Ante cædinque awēnē

töménáni náni guingo imonte Ca ca wæyömö wido cæcä wæcæcäimpa,” ante Itota apænegacäimpa.

25

Baquedäni nani cæinö ante odömongampa

¹ Mäninganca apænedinque Itota ayæ godömenque odömonte apænegacäimpa. “Mäniñedë öönædë Awënë Odeye nempo quëwënäni iñömö baquedäni diete ganca nani cæi bai adobaï cæcædänimpa. Baquedäni iñömö, Edëningä ñowoönæ monguingä, ante tica ënëincade æninque tömengä ingante bee tencæte ante tao godänipa. ² Baquedäni incæ tömënäni tinco ganca inäni në ëñënäni iñönäni edæ adoganca tinco ganca inäni në ëñënämaï inäni inänipa. ³ Në ëñënämaï inäni guiquënë tömënäni tica ënëincade æninque gongapæncade ænämaï goyönäni, ⁴ në ëñënäni guiquënë gongapæncadedë godö pe ñiñænte gongapæ eyepæ ænte godänipa. ⁵ Mänömaï ænte gote ayönäni në monguingä wantæpiyæ pönämaï dæ angä adinque tömënäni tömänäni edæ möinente ædo ædo cædinque mö ñönänipa.”

⁶ “Mö ñönönäni ayaönæñëña pöni bayonte edæ, ‘Në monguingä pongä атаquedäni. Tao bee tenguënë quëwëminii.’ ⁷ Ante aa pedäni ëñëninque edæ baquedäni tömänäni ængæ gantidinque, Tica ënëincade waëmö ti wodönote bacæimpa, ante wadæ wadæ cædänipa. ⁸ Cæyönäni në ëñënämaï inäni guiquënë në ëñënäni inänite, ‘Mönitö tica ënëincade edæ wodo mönæ ëmompæ cæminii. Minitö næænimæ incæ pancapaa pönöminii æncæmönimpa.’ ⁹ Äñönäni, ‘Iñæmpa, mönitö beyæ minitö beyæ adobaï wi eyepæ imäimpa, ante awædö. Edæ godoncæte ante në mänäni weca gote godonte æedäni.’ ¹⁰ Änäni ëñente godonte æncæ goyönäni edæ në monguingä do pongä adinque në ëñente eyepæ nææninäni iñömö monguingä tonö godongämæ monguimæno oncönë becæ guidäni iinque edæ odemö tee mönete intapa. ¹¹ Ayæ ate edæ wadäni gongapæ eyepæ ænte pöñönäni do tee mönete i adinque tömënäni, ‘Awënë, awënë ëñëmi. Odemö wi ænebi guimönie.’ ¹² Ante wæyönäni awënë wæætë, ‘Minitö iminute näwangä ämopa. Minitö æminidö iminii, ante botö cöwë adämaï imopa,’ angampa.” Mäninque ante odömoncæte ante Itota iimaï angantapa.

¹³ “Minitö guiquënë, Äönædö i, æyedönö i, ante ëñënämaï imini inte edæ wänö conte quëwëdäni,” angacäimpa.

Tadento nani godonte æinta ante odömongampa *(Odoca 19.11-27)*

¹⁴ Ayæ æbänö baquii, ante odömoncæte ante Itota, Waocä në ëcä nänö cæi bai bacæimpa, ante apænegacäimpa. “Në ëcä wayömö gocæte ante cædinque tömengä ingante në cædäni inänite äñete mämongä pöñönänite, Botö ëadinta incæ pönömo æninque minitö në aamini badinque botö beyæ godonte æncæminimpa. ¹⁵ Äninque në ëcä iñömö, Në cædäni æbänö nanguï cædinque aaquinänii, ante adinque tadento ñænængade näni godonte æinta incæ adocanque ingante önonpo æmæmpoque mänimpota pædæ pönöninque wacä ingante tadento mentaa mänimpota pædæ pönöninque wacä ingante tadento adotaque pædæ pönongampa. Ayæ wadæ gocä. ¹⁶ Äninque tadento önonpo æmæmpoque mänimpota në æningä iñömö do godinque godonte æ godonte æ cædinque önonpo æmæmpota tömengä nänö ænimpota adopota æñongä edæ tadento önonpo tipæmpoga bapa. ¹⁷ Ayæ tadento mentaa në æningä adobaï godonte æ godonte æ cædinque mentaa nänö æninta adopota wæætë æñongä edæ tadento mëa go mëa bapa. ¹⁸ Wæætë adotaque në

æningä guiqüenë tömengä wadæ godinque onguipodë ææ wodinque awënë godonte æinta æninque tee moncate wë wodongampa,” angantapa.

¹⁹ Ayæ, “Wantæpiyæ ate tömënäni awënë adodö pöninque, Botö qui eyepæ æncæboimpa, ante cædinque tömënäni näni ænte aadinta ante cöwä acantapa.

²⁰ Önompo æmæmpoqe tadento në æningä iñömö edæ æmæmpota adopota nänö godonte æninta ænte pöninque awënë ingante, ‘Awënë, bitö botö imote, Aacæbiimpa, ante tadento önompo æmæmpoqe mänimpota pædæ pönömi æntabopa. Æninque botö godonte ænte godonte ænte edæ nanguï cædinque edæ mänimpota adopota æmæmpota dobæ æmoi ae.’ ²¹ Angä wædinque tömengä awënë iñömö, ‘Badogaa. Botö imote në cæbi inömi inte bitö ædæmö aabi inte ñowo waa cæbi æmopa. Bitö wædænque æninque cöwë ædæmö aabi adinque botö ñowo nanguï pöni botö ëadincoo pönömo æninque bitö wæætë edæ në aabi bacæbiimpa. Botö bitö awënë inömo inte watapæ tote quëwëmo iñömotë bitö edæ äänömonque bai bitö watapæ tote quëwënginque pöe,’ angantapa.”

²² “Ayæ mäa tadento në æningä adobaï pöninque, ‘Awënë, bitö botö imote, Aacæbiimpa, ante tadento mentaa mänimpota pædæ pönömi æninque botö godonte ænte godonte ænte edæ nanguï cædinque edæ mentaa mänimpota adopota dobæ æmoi ae.’ ²³ Angä wædinque tömengä awënë iñömö, ‘Badogaa. Botö imote në cæbi inömi inte bitö ædæmö aabi inte ñowo waa cæbi æmopa. Bitö wædænque æninque cöwë ædæmö aabi adinque botö ñowo nanguï pöni botö ëadincoo pönömo æninque bitö wæætë edæ në aabi bacæbiimpa. Botö bitö awënë inömo inte watapæ tote quëwëmo iñömotë bitö edæ äänömonque bai bitö watapæ tote quëwënginque pöe,’ angantapa.”

²⁴ “Ayæ ate edæ adotaque në æningä wæætë pöninque, ‘Awënë, bitö në waadedämi cædömi inte bitö wii gadiñömö wayömö incæ edæ do wogaabipa. Ayæ bitö wii miñömö wayömö incæ edæ do tä pete gæte bai æmipa, angantapa. ²⁵ Æninque botö edæ ancai guiñente wædinque edæ tao godinque onguipodë ææ wote bitö tadento daga wëninque edæ wë wodontabopa. Bado, bitö qui incæ edæ do æmipa,’ angantapa.”

²⁶ “Angä ëñente wædinque tömengä awënë wæætë, ‘Botö imote në cæbi inömi inte bitö wiwa pönëmi inte wæntæye cæbi abopa. Botö æbänö gadämaï iñömö do wogaabopa, ante bitö edæ do ëñëmitapa. Botö minämaï iñömö do tä pete gæbopa, ante bitö äniñö edæ do ëñëniimi inte cæbitapa töö. ²⁷ Æninque mäninö ante do ëñëniimi inte bitö edæ padata botö godonte æinta æninque edæ në godonte ænäni weca godontë ænguënëmi imitapa töö. Mänömaï cæbi bai botö ocæ ëmænte pöninque edæ botö qui do æninque wadäni näni guidöninta tönö edæ do æncædömoimpa töö.’ ²⁸ Æninque tömengä ingante në cædäni inänite awënë angantapa. ‘Minitö ñowo iingä tadento adotaque tömengä nänö nææninta ö æninque edæ tadento önompo tipæmpoga në næængä ingante pædæ godömiini æncæcäimpa. ²⁹ Edæ në ëadäni inänite tömänäni inänite godömenque godontë ingæimpa. Æninque tömënäni qui nanguï ëacædänimpa. Wæætë edæ ëadämaï inte ömæpocä ingä guiqüenë tömengä nänö ëadincoo wædænque pönii incæte edæ ö ænte dæ ba wæcæcäimpa. ³⁰ Ayæ edæ mäningä botö imote në cædingä incæ wæntæye inongä inte cædämaï iñongante munitö wëmö iñömö näni guingo imonte Ca ca wæwëñömö tömengä ingante edæ guitodonte wido cæmiini wæcæcäimpa,’ ante tömengä awënë angampa.”

Tömämce quëwënäni inänite apænte angæimpa, ante

³¹ Itota mänömainö ante odömonte apænedinque godömenque apænegacäimpa. “Botö anquedoidi tönö godongämæ pöninque botö Waobo

nē ēñagaimo inte ñäo apáite bai nē ēmōmo inte poncæboimpa. Māniñedē botō pōñedē botō Awēnē tæ contaimpa tæ contadinque edæ oōnædē waa pōni ongōnāni bai waa pōni ongoncæboimpa. ³² Māniñedē tōmāmæ quēwēnāni botō weca godongāmæ ponte a ongoncædānimpa. Ayæ nē aacā tōmengā cæñināni inānite apænte adinque bodegoidi æmænō cōnōninque cabodaidi æmænō nānō cōnōnō bai cædinque botō inōmō edæ imæca quēwēnāni tōmānāni inānite apænte adinque pancadāniya inānite æmænō gōnōninque wadāni inānite æmænō gōnōmo ongoncædānimpa. ³³ Obegaidi bai nē ēñente cædāni inānite botō tōmēmæ inō gōnōninque wæætē cabodaidi bai nē ēñēnāmai cædāni inānite botō dipæmæ inō gōnoncæboimpa.”

³⁴ “Gōnōninque botō Awēnē Odeyebo inōmo inte botō tōmēmæ inō nē ongōnāni inānite ancæboimpa. ‘Botō Mæmpo nānō nē waademini inte pōedāni. Tōmengā inguipoga nānō badongaiñedē āninque, Awēnē Odeye nempo mini quēwenguinō impa, ante do badongacāimpa. Īninque Awēnē Odeye nempo mini quēwenguēnēnō ñōwo ænte quēwēdāni. ³⁵ Edæ botō gue ænente wæyōmo mīnitō cænguī nē pōnōmīni cængaboimpa. Tepæ gæwænte wæbo adinque mīnitō nē pōnōmīni begaboimpa. Botō Wabo imo inte cowodē bai pōmo adinque mīnitō, Pō guīi, āmīni ēñēninque mīnitō weca guīite ēñagaboimpa. ³⁶ Ayæ ōmaabo inte wæyōmo mīnitō pōnōmīni wēñagaboimpa. Wēnæ wēnæ inte wæyōmo mīnitō ponte nē waadete cægaimīni ĩmīnīpa. Tee mōnete oncōnē ongonte wæwēñōmote botō weca ēñacæ nē pongaimīni ĩnōmīni inte mīnitō ñōwo wæætē edæ botō nempo guīite quēwencæmīnimpa,’ ancæboimpa.”

³⁷ “Āmo ēñēninque edæ nē nō cædāni guīquēnē, ‘Awēnē ĩñæmpa æyedēnō bitō gue ænente wæyōmi dicæ pōnōmōni cæmitawogaa, ancædānimpa. Ayæ tepæ gæwæñōmi dicæ pōnōmōni bebitawogaa. ³⁸ Āyedēnō wacā incæ pōmi adinque mōnitō dicæ, Pō guīi, antamōniyaa. Ayæ ōmaabi adinque dicæ pōnōmōni wēñabitawogaa. ³⁹ Ayæ wēnæ wēnæ inte wæyōmi incæ tee mōnete wæyōmi incæ mōnitō dicæ acæ pontamōniyaa.’ ⁴⁰ Ante wæyōnāni botō Awēnē Odeyebo inōmo inte edæ tōmēnāni inānite, ‘Īñæmpa botō tōniñadāni ĩñōnānite adocanque ōnonganque ĩñongante mīnitō waa cægaimīni inte edæ botō imote do waa cæte ĩmīnīpa āmo ēñēdāni,’ ante tōmēnāni inānite ancæboimpa,” angantapa.

⁴¹ “Ayæ botō dipæmæ inō nē ongōnāni inānite botō nē Awēnē inōmo inte ancæboimpa. ‘Mīnitō nē tente wæquēnēmīni guīquēnē ñōwo edæ gā gobæwedāni. Edæ Wængonguī do badōninque, Wēnæ tōnō tōmengā anquedoidi nānō nē ēmiñænāni tōnō wantæpiyæ cōwē wænāmai nāni bæcote wæquīñōmō, ante nānō badongaiñōmō mīnitō māniñōmō edæ gote guīibæwedāni,’ ante edæ ancæboimpa. ⁴² ‘Edæ botō gue ænente wæbo adinque mīnitō edæ dicæ pōnōmīni cæntabogaa. Gæwænte wæyōmo mīnitō dicæ pōnōmīni betabogaa. ⁴³ Ayæ Wabo imo inte cowodē bai pōmo adinque mīnitō dicæ, Pō guīie, āmīnitawogaa. Ōmaabo inte wæyōmo wecoo dicæ pōnōmīni wēñatabogaa. Wēnæ wēnæ inte wæbo incæ tee mōnete wæbo incæ mīnitō ĩñōmō edæ dicæ ēñacæ pōmīnitawogaa,’ ancæboimpa.”

⁴⁴ “Āmo ēñente wædinque nē ēñēnāmai ināni ĩñōmō, ‘Awēnē ēñēmi. Bitō æyedēnō gue ænente tepæ gæwænte wæbitawo. Ayæ wabi bai inte æyedēnō pōmi atamōniyaa. Wecoo ōmaabi inte wæbi adinque, daicawo gawæmi adinque, tee mōnete wæbi adinque mōnitō bitō beyæ dicæ cædāmai intamōniyaa.’ ⁴⁵ Āñōnāni botō ĩñōmō edæ tōmēnāni inānite, ‘Īñæmpa wacā ingante ōnonganque ĩñongante mīnitō cædāmai ingaimīni inte botō

imote edæ mäninö do cædamaï ingaminimpa. Ämo eñëmaïminipa, ante püncæboimpa. ⁴⁶ Ìnque tømënanï nani tente wæwenguinö incæ æmæwo wadæ gocæðanimpa. Wæætë në nö cæðani guiqüenë cöwë wænamaï nani quëwenguinö æmæwo gocæðanimpa,” ante Itota apænecäimpa.

26

Itota ingante bæi ongongcäimpa, ante cæðanipa

(Mäadoco 14.1-2; Odoco 22.1-2; Wäö 11.45-53)

¹ Ayæ mäninö tømänö ïnque apænete ate Itota tømengä miñæ në godäni ïnante apænecantapa.

² —Mëonaa go ate wodo pänta gogaïönæ bai Patowa mönö ææmæ cænguiönæ impa, ante do eñëminipa. Mäniönæ ïñonte botö Waobo eñagaïmo ïñömote botö imote bæi ongöninque edæ, Awæ ñænquedimæ cæte ïngä ingante töö godöninque daagö timpote wææ tüwadinque edæ æænö gö cæte wænödäni, ante botö imote pæðæ godönäni æncæðanimpa, ante apænecäimpa.

³ Mäniñedë, Wængongui qui, ante në godongä ñænængä pöni Caiapato oncönë godongämæ pöninque wadäni në godönäni ñænænäni tönö oodeoidi ïnante në aadäni nani Picæncabo ïñömö, ⁴ adoyömö pönëninque, Mönö æbänö babæ cæte Itota ingante awëmö bæi ongonte ænte wænonguii, ⁵ ante pönënanï incæte,

—Ïñæmpa ææmæntedæ ïñonte wænömö bai tømänäni ængui bate Yæ yæ ante piinte cæcæðönänimpa, ante pönente wæðinque mönö ædö cæte mäniñedë cæquii, ante wægadänimpa.

Itota ocaboga onquiyængä ogui wapæ gao cæcacampa

(Mäadoco 14.3-9; Wäö 12.1-8)

⁶ Itota mäniñedë Betänia godinque në baadingä Timönö oncönë gui eñadinque cæncongantapa. ⁷ Cæncöñongä wacä onquiyængä ïñömö tømengä weca pö guidingue ogui wapæ nani nanguï godonte ænimæ dica adabatodo waincadedë pe ñiñænte nanö mänimæ incæ ñowo ænte mämö Itota ocaboga edæ gao cæcacantapa. ⁸ Mänömaï cæcä adinque Itota miñæ nani gocabo ïñömö püinque,

—Ïñæmpa önonque gao guënente bai cæcampa töö, änänitapa. ⁹ Edæ iimæ ïñömö nanguï pöni æninta beyæ godonte ænguënëmæ imæmpa. Godonte ænte bai ömæpodäni ïnante wæætë godonguënë apa.

¹⁰ Ante pünäni wæðinque Itota ïñömö,

—Quimæ püwëminii. Ìngä onquiyængä ïñömö botö imote waa pöni cæcä apa quëwëminii. ¹¹ Ïñæmpa ömæpodäni ante mïni äninäni mïnitö weca cöwë quëwëñönäni botö wæætë mïnitö weca wii wantæpiyæ quëwencæboimpa. ¹² Mänimæ ogui wapæ botonga gadongadinque tømengä botö baö daga wenguinque eyepæ ïñonte edæ öni paacantapa. ¹³ Mïnitö imïnite näwangä ante apænëbopa. Waa pöni botö apænëdö apænëdinque tømämæ æyömmë apænëðäni eñënanï mäningä onquiyængä nanö cæðinö ante adobaï tededäni eñente pönencæðanimpa, ante Itota apænecäimpa.

Itota ingante Codaa odömonte godoncæte ante cæcampa

(Mäadoco 14.10-11; Odoco 22.3-6)

¹⁴ Ayæ mäniñedë nani, Dote, äincabo ïñönäni adocanque Codaa Icadiote nani ähongä ïñömö, Wængongui qui, ante në godönäni ñænænäni weca gocantapa.

¹⁵ Godinque apænecantapa.

—Botō, Itota æyömönō ongongää, ante pönō odömōmo ate mīnitō bæi ongonte æmīni īnīnque æpotadō, Eyepæ ī, ante pönōmīni æmaīmoo.

Angä ēñēnīnque tōmēnāni padata figuitamō incæ todēinta ganca tee mam-pote tōmengä ingante pædæ godōnāni. ¹⁶Æningä inte tōmengä cōwē cōwä adīnque, Æbānō cæte Itota ingante odōmonte pædæ godōmo ate ænguīnānīi, ante pōnente cægacāimpa.

Päō tönō owæta Itota pædæ pōnongä cænte bedānīpa

(Māadoco 14.12-25; Odoca 22.7-23; Wäō 13.21-30; 1 Coodintoidi 11.23-26)

¹⁷Māniñedē oodeoidi päō yedæ æmpoquī ōmæmō ī nāni ææmæ cæte cænguīōnæ tæcæ ba adīnque Itota mīñæ nē godāni īñōmō, Wodo prænta gogaiōnæ bai Patowa mōnō ææmæ cænguīōnæ impa, ante pōnente wædīnque tōmengä weca ponte ānānitapa.

—Æyömönō bitō beyæ Patowa ææmæ ante cæmōni ate cænguīmīi.

¹⁸Åñōnāni tōmengä nānō ēmīñæna mēnaa īnate ānīnque,

—Mīnatō waodāni nāni quēwēñōmō godīnque onguīñængä botō nē āningä ingante bee tēnīnque mīnatō īmaīnō ante apænemīna ēñengæda. “Mōnō Awēnē īmaī angampa. Botō wænguīōnæ oo pōni bapa cæbīi. Botō nē ēmīñænāni tōnō botō bitō oncōnē Patowa ææmæ ponte cæncæmōnīmpa, angampa,” ante āmīna ēñengæda, angä.

¹⁹Ēñente wædīnque tōmēna Itota nānō ānō bai cædīnque, Patowa ææmæ cænguī impa, ante cædatapa.

²⁰Gāwadecæ bayō Itota tönō, Dote, nāni āincabo ponte godongāmæ cæncæte ante ongōnānitapa. ²¹Cæncōñōnāni Itota,

—Nāwangä ante apænebo ēñēdāni. Mīni cabo incæ adocanque, Æncædānīmpa, ante botō īmote odōmonte pædæ godonguingä ingampa.

²²Ante apænecä ēñēnīnque tōmēnāni wæwente bayōnāni adocanque adocanque,

—Åwēnē, botō īmotedō ante dicæ apænebitawogaa.

²³Ante tedeyōnāni Itota wæætē,

—Botō tönō guēa adotaca nē mīi cædingä īñōmō tōmengä botō īmote nē odōmonte pædæ godonguingä ingampa. ²⁴Edæ dodāni Wængonguī beyæ nāni yewæmongainō bai cædīnque botō Waobo ēñagaīmo inte cōwē wænte goquēnēmo īmodō anguēnē. Īnīnque edæ botō īmo nē odōmonte godonguingä īñōmō tōmengä nānō wæquinque ingæimpa. Māningä wīi ēñate bai waa toquēnengä incædongāimpa.

²⁵Ante apænecä wædīnque Codaa īñōmō Itota ingante nē odōmonte godonguingä īñōmō edæ,

—Awēnē nē Odōmōmī ēñēmi, botō īmotedō ante āmitawogaa.

Ante āñongante edæ Itota,

—Tōmēmi nāmā incæ, Botō īmotedō, ante do tedebi īmīpa.

²⁶Ante apænecantapa. Ayæ cæncōñōnāni Itota päō bæi ongonte ænīnque Wængonguī ingante waa ate apænedīnque päō pä ænīnque tōmengä mīñæ nē godāni īnānīte pædæ godō pædæ godō cæcantapa.

—Botō baō bai impa, ante pædæ pōnōmo ænīnque mīnitō Ao ante cædāni.

²⁷Ånīnque ayæ bequīmæ owætaca bæi ongonte ænīnque Wængonguī ingante waa ate pōnente apænedīnque pædæ godōnīnque,

—Botō wepæ bai impa, ante pædæ pōnōmo ænīnque tōmāmīni Ao ānīnque godongāmæ intaca beedāni, angantapa. ²⁸Botō wepæ īmæ bai impa. Wængonguī do apænedīnque, Botō pōnō cæbo ate mīnitō Ao āmīni īnīnque mōnō godongāmæ waa cæte quēwengæimpa, angacāimpa. Nōwo adobai mīine

áninque apænebopa. Botō wepæ ante Ao ante æmīni inte mōnō godongāmæ waa cæte quēwengæimpa. Edæ nanguī īmīni mīni wēnæ wēnæ cædinō beyæ ante nā mēnongaquimæ impa. ²⁹ Nāwangā āmopa. Botō Mæmpo Awēnē Odeye īñongā botō tōmengā nempo quēwēninque mīnitō tōnō godongāmæ mūimæ botō beganca mēnimæ yowepæ nōwo æmæwo bebo tamēñedāni, ante Itota apænegacāimpa.

Dicæ abogaa, ante Pegodo anguingā, ante apænecampa
(Māadoco 14.26-31; Odoca 22.31-34; Wāo 13.36-38)

³⁰ Ayæ Wængonguī ingante āmotamīni ante tao godinque Odibowænquidi godānitapa. ³¹ Goyōnānite Itota apænecantapa.

—Wængonguī beyæ yewæmōninque, “Nē aadingā ingante tacabo dæ wængā īninque edæ cæningāidi obegaidi panguimæ goquimpa,” ante nāni yewæmonte angainō baī cædinque mīnitō tōmāmīni nōwoōnæ woyowotæ incæ botō dæ āmo beyæ guingo imonte badinque edæ panguimæ goquimīni īmīnīpa. ³² Panguimæ gomīni incæte botō edæ nāni ōmæmonte ate Gadideabæ tāno gote a ongōñomo mīnitō ayæ pōedāni.

³³ Angā wædinque Pegodo guiquēnē,

—Īñæmpa dæ āmi beyæ tōmānāni guingo imonte badinque panguimæ godāni incæte edæ botō guiquēnē cōwē panguimæ godāmaī incæboimpa.

³⁴ Āñongante Itota wæætē,

—Bitō imite nāwangā ante apænebo ēñē. Nōwoōnæ woyowotæ incæ tawadiya pedāmaī īñonte bitō botō imotedō ante wadō ante apænedinque, Dicæ abogaa, ante edæ mempoga go adopoque anguimī īmīpa.

³⁵ Angā ēñente wædinque,

—Īñæmpa bitō tōnō guēa wæmo incæte botō cōwē, Dicæ abogaa, ante edæ ānāmaī incæboimpa.

Āñongā tōmengā mīñæ nē godāni tōmānāni adodō ante angadānimpa.

Guetēmānii īñōmō Itota Wængonguī ingante apænecampa
(Māadoco 14.32-42; Odoca 22.39-46)

³⁶ Mānīī godinque Itota yabæ incæ Guetēmānii nāni āñōmō tōmengā mīñæ nē godāni tōnō gocantapa. Mānīñōmō pōninque tōmengā tōmēnāni Inānite,

—Tæ contate ongōñōmīni botō godōmenque godinque Wængonguī ingante apænete pōmoedāni.

³⁷ Āninque Pegodo tōnō Tebedeo wēna īnate ænte mācā goyōnāni Itota īñōmō nanguī wæwente badinque ancaī guīñēninque, ³⁸ tōmēnāni Inānite,

—Botō wænguimāmo pōnō anguēnē, ante botō ōnōwoca incæ pæmænte wæte wænguī wæ, ante wæbo tamēñedāni. Mīnitō guiquēnē ēamonca godongāmæ wææ aacōedāni.

³⁹ Āninque Itota wædænque godōmenque godinque guidōmēmæ ñongænte Wængonguī ingante apænecantapa. “Botō Mæmpo, bitō Ao āninque edæ tī nā wænguimæ baī ō ænte baī cædinque botō imote edæ, Wæñāmaī incæbiimpa, āmi īninque botō edæ waa tobāimopa. Incæte botō ānōnō baī wīī cædinque wæætē tōmēni ānōnō baī cæe,” āmopa.

⁴⁰ Ante apænecā ate tōmengā mīñæ nē godāni weca adodō ponte ayongā tōmēnāni mō ñōnāni adinque tōmengā Pegodo ingante,

—Botō tōnō wānō conguēnēmīni incæ mīnitō adoque ooda incæ wīī aacōmīnii. ⁴¹ Mīmōno waa cæinēmōnīpa, ante ēwocayōmīni baō aquīīñō ēñamīni inte wæntæye bamīnīpa. Īninque edæ wānō cōninque nāmā beyænque

ante Wængonguī ingante apænedinque edæ, Wīi wænæ wænæ cæinēmōni bacæmōnīmpa, ante apæneedāni.

⁴² Ānīnque Itota adodō wadæ gote wæætē apænedinque, “Botō Mæmpo, botō bedāmai iñōmote bitō ō ænāmai īmi īninque botō cōwē bitō āmai becæboīmpa.”

⁴³ Ante Wængonguī ingante apænete ate ponte ayongante mōwo mōīnente æmō cæte wædinque mō ñōnāni. ⁴⁴ Adinque edæ tōmengā wæætē adodō godinque ñōwo mempoga go adopoque nānō apænedīnō ante adodō ante Wængonguī ingante īinque apænegcantapa. ⁴⁵ Ayæ tōmengā mīñæ nē godāni weca wæætē adodō pōninque,

—Īñæmpa cōwē mōmīni edæ cōwē guēmāmīni awædō. Aquēnē quēwēedāni. Botō Waobo ēñagāimo inte botō wæwenguīōnæ do bayonte edæ botō īmote nē wænæ wænæ cædāni īnānite nē godō odōmonguīgā iñōmō do godongāi ataquēedāni. ⁴⁶ Ængæ gantite mōnō gocæīmpa. Botō īmo nē odōmonte godonguīgā obo pōni pongā tamēñedāni, angacāīmpa.

Itota ingante bæi ongonte ænānīpa

(Māadoco 14.43-50; Odoca 22.47-53; Wāō 18.2-11)

⁴⁷ Ayæ apæneyongā edæ Codaa wodi tōmēnāni nāni, Dote, ante gocabo adocabo īingā incæ ñōwo pongantapa. Wængonguī quī, ante nē godōnāni ñæñæñāni tōnō oodeoidi īnānite nē aadāni nāni Picæncabo tōnō da pōnōnāni pōninque wadāni tæiyæñāni adobaī yaēmē nææñinque canta nææñāni inte Codaa mīñæ pōnānitapa. ⁴⁸ Doyedē iñōmō nē odōmonte godoncæ cæcā Codaa iñōmō tōmengā mīñæ poncæ cædāni īnānite īmaī ante wēēnēñedē apænedīngā īnongāīmpa. “Botō odōmonte queē bemōmo adinque mīnitō wæætē, Tōmengā ingampa, ante adinque tōmengā ingante edæ bæi ongonte ō æedāni.”

⁴⁹ Ante do āningā inte Codaa ñōwo iñōmō Itota weca pōninque,

—Awēnē nē Odōmōmi īmi, bitō īmi.

Ānīnque edæ waa cæte baī queē bemongantapa. ⁵⁰ Adinque Itota wæætē,

—Botō mīñæ nē godīmi ēñēmi. Māñinō ante bitō ponque pō cæbāwe.

Āñongā wadāni tōmengā weca pōninque pædæ gopo bæi ongonte Itota ingante æñānitapa.

⁵¹ Wængonguī quī, ante nē godongā ñæñængā pōni ingante nē cæcā māñīñōmō ponte a ongonā adinque Itota tōnō pōningā adocanque pædæ guiipote yaēmē o togænte æninque māningā nē cæcā ingante tæi pāninque ōnōmonca wangō tamoncacantapa. ⁵² Adinque Itota iñōmō tōmengā ingante,

—Yaēmē adodō mīni tīe, āmpa. Edæ yaēmē nē o togænte nææñāni tōmāñāni īnānite yaēmenca adobaī tacadāni wæncædānīmpa. ⁵³ Īñæmpa æbānō ante pōñēmi edæ. Wængonguī anquedoidi adocabodāni que tei mīido ganca iñōñānite botō Mæmpo ingante apænebo baī tōmengā do angā īninque anquedoidi nāni cabo nāni cabo incæ ōnompō tipæmpoga go mencabodāniya botō beyæ ponte cæbāñānīpa, ante pōñēmiyaa. ⁵⁴ Incæte botō Codito īnōmo inte botō Mæmpo ingante māñōmai apænebo ēñente cæcā baī dodāni, Codito īmaī wæncæcāīmpa, ante Wængonguī angā ēñente nāni yewæmongainō ante ædō cæte īinque bacædōnīmpa, ante awædō, ante apænegacāīmpa.

⁵⁵ Ayæ wæætē ñōwo pōñāni īnānite Itota apænegcantapa.

—Mīnitō īñæmpa, Bitō nē ō æñīmi īmpa, ante baī cædinque botō īmote canta tōnō yaēmē næænte ō æncæte ante pōmīni awædō. Botō Wængonguī oncō yabæcōnē īmō iñō iñō iñō apænecōñōmo mīnitō botō īmote yao ongōñāmai

ee amínitapa tóo. ⁵⁶ Incæte mīnitō Wængonguī beyæ nē apænedāni nāni yewæmongainō bai ñōwo iinque baquinque cæmīni abopa.

Ante apænecā ēñēnīnque tōmengā ēmīñængā nē godīnāni tōmānāni edæ nāwæ panguimæ cæte wodii wīnongadānīmpa.

*Nē Apænte nāni Ānoncabo weca Itota ongongampa
(Māadoco 14.53-65; Odoco 22.54-55, 63-71; Wāō 18.12-14, 19-24)*

⁵⁷ Ayæ Itota ingante nē yao ongonte ænāni guiquēnē, tōmengā ingante māo godinque edæ, Wængonguī qui, ante nē godongā ñænængā pōni inongā Caiapato weca ænte godānitapa. Māniñōmō do pōninque nē wææ ante odōmōnāni tōnō odoeidi inānite nē aadāni nāni Picæncabo tōnō do a ongōnānīmpa. Māniñōmō Itota ingante ænte māmōnāni pongacāīmpa. ⁵⁸ Pegodo guiquēnē tōmengā mīñæ ayæ ayæ godinque, Wængonguī qui, ante nē godongā ñænængā pōni inongā oncō yacōmoyæ iñōmō pō guidinque, Itota ingante æbānō cæquīnāni, ante wææ wānōnāni weca pōninque tæ contate waa acongantapa.

⁵⁹ Wængonguī qui, ante nē godōnāni ñænænāni tōnō nē Apænte nāni Ānoncabo tōmānāni, Mōnō apænte ante wænōmō wæncæcāīmpa, ante cædinque, Itota nānō wænguinque wēnæ wēnæ cæcā ingampa, ante æcānō babæ ante anguingāā, ante diqui diqui mīnōnānīmpa. ⁶⁰ Incæte nangūi ināni ponte babæ apænedāni incæte, Æcānō eyepæ babæ ānaa, ante edæ dæ angā wædānitapa. Ayæ ate mēnaa nē babæ wapīticæ ānōna inte awēnēidi weca pō guite, ⁶¹ apænedīnque,

–Īngā, “Wængonguī tæiyæ waēmō oncō ongō incæte botō iñōmō tæi pīñæmo inōmo inte godō cæbo bai wo tænguimæ wææmaīmpa. Ayæ mēōnaa go adoōnæque iñonte botō wæætē do mænōmaīmpa,” angā ēñentamōnāna tōo. ⁶² Ante apænecā ēñēnīnque nē godongā ñænængā pōni inongā incæ ængæ gantidinque Itota ingante,

–Īñæmpa pæ wēēnebii. Tōmēna bitō imitedō ante godō āninque nāna ānīnō ante bitō æbānō āmii.

⁶³ Āñongā Itota cōwē ānāmaī edæ pæ wēēnecā. Adinque nē godongā ñænængā pōni inongā wæætē,

–Wængonguī nē Quēwengā inte tōmengā nānō ēñēñongā edæ nāwangā ante apænebi ēñēmōnii, āmopa. Mōnō Codito iñōmō Wængonguī Wengā inongā ingampa. Bitō iñæmpa mānīmidō inōmi imitawo.

⁶⁴ Mānōmaī angā ēñēnīnque Itota wæætē,

–Tōmēmi bitō ānīnō bai mānīmodō inōmo īmopa. Incæte botō godōmenque apænebo ēñēedāni. Īncayæ ate botō iñōmō edæ Waobo ēñagaīmo inte edæ Wængonguī nē Tæi Pīñængā ingā tōmēmængā inō tæ contabo adinque mīnitō ayæ ate botō oōnædē boguīmancodē pōmo acæmīnīmpa.

⁶⁵ Ante apænecā ēñēnte wædinque nē godongā ñænængā pōni inongā piinte badinque, Ēñēnte awædō, ante bai cædinque edæ nāmā weocoo wānā ñænte,

–Wængonguī ingampa mānōmaī cæquīngāā. Edæ tōmengā nāmā incæ babæ ante nē wēnæ wēnæ apænecā īninque idæwaa. Wacā tōmengā ingantedō, Wēnæ wēnæ cæcā atabopa, ante nē ancæcāīmpa, ante ñōwo diqui diqui mīnāmaī ingæīmpa. Tōmengā nāmā Wængonguī Wengā inte bai babæ ante nānō ānewēnīnō ante do ēñēmīni inte mīnitō, ⁶⁶ edæ æbānō ante pōnēmīni.

Ante āñongā nē apænte ānāni guiquēnē,

–Nānō wænguinque ānewengampa tōo.

67 Ante apænte äninque edæ pancadäniya Itota tömengä awinca towæ tänömöninque tæi tæi pänänitapa. Wadäni guiquënë tömengä ingante tamöninque,

68 tömengä ingante,

—Bitö Codito imitawo. Æcänö bitö imite awëmö nê pänaa, ante Wængongui beyæneque apænedinque apænebi ëñëmönii, ante badete togadänimpa.

Pegodo incæ, Dicæ abogaa, angampa

(*Mäadoco 14.66-72; Odoca 22.56-62; Wäö 18.15-18, 25-27*)

69 Ayæ Pegodo guiquënë mänii yæipodë yacömöñäa contate ongöñongä onquiyængä nê cæcä ïñömö tömengä weca ponte apænedinque,

—Mäningä Gadideabæ quëwëningä Itota tönö bitö guëa cægömitapa töö.

70 Ante apæneyongä tömänäni nani ayömö Pegodo,

—Dicæ. Bitö äñö ante æbänö ämii, ante dicæ ëñëmogaa.

71 Ante äninque Pegodo yademö gäänë tao gote ongongä adinque wacä onquiyængä wæætë godongämæ ongönäni ïñänite apænedinque,

—Mäningä adobai Itota Näatadeta quëwëningä tönö nê cægöningä ingä aedäni.

72 Ante apæneyongä Pegodo wæætë,

—Wængongui ëñëñongä botö näwangä ämo ëñëedäni. ïngä onquiyængä nänö nê äningä ingante botö dicæ abogaa, angantapa.

73 Ayæ wantæ ate mäniiñömö ongönäni Pegodo weca pöinque,

—Ïñæmpa Itota tömengä tedecä bai adode nê tedebi inte bitö tömengä müñæ mini nê gocabo adobi imipa töö.

74 Äñönäni edæ Pegodo wæætë, Wængongui ëñëñongä apænedinque botö nöingä ämpa, ante Wængongui ëmowo ante babæ tedewëninque tömënäni ïñänite,

—Mini nê angä ingante dicæ abogaa.

Mänömaï ante tæcæ änewëñongä edæ tawadiya dobæ petapa. 75 Pe wædinque tömengä, Æ Itota nänö äñinö bai impa, ante wæcantapa. Itota, “Tawadiya pedämaï ïñonte bitö botö imotedö ante wadö ante apænedinque, Dicæ abogaa, ante edæ mempoga go adopoque anguümi imipa,” angantapa. Ante Pegodo, Nöwo nänö pequinque do pecampa, ante wædinque oncodo taote edæ guingo imonte wædinque edæ Ca ca wægacäimpa.

27

Itota ingante Pidato weca cæte mäo göñönäni

(*Mäadoco 15.1; Odoca 23.1-2; Wäö 18.28-32*)

1 Ayæ ñäö bayonte, Wængongui qui, ante nê godönäni ñænænäni tönö oodeoidi ïñänite nê aadäni nani Picæncabo tönö apænte äninque edæ, Itota ingante wæñongæimpa, ante godongämæ Ao angadänimpa. 2 Äninque tömengä ingante yao ongonte goti winte æninque edæ odömänoidi beyæ Oodeabæ awënë gobedönadodo Pidato ingante mäo göñönäni ængacäimpa.

Codaa wodi ümaï cædinque wængampa

3 Ayæ, Itota ingante wæñongæimpa, äñäni ëñente wædinque Codaa tömengä ingante nê godöningä guiquënë, Æ tömengä nänö wænguinquemë cæboinö ante pönëmogaa, ante guingo imonte wæcantapa. Ayæ, Wængongui qui, ante nê godönäni ñænænäni tönö nê aadäni nani Picæncabo adodö æncædänimpa, ante todëinta padatamö tömënäni nani pönontamö adodö pædæ godoncæte ante gocantapa.

⁴ Ayæ tōmēnāni īnānite,

—Īnæmpa cæboo. Edæ Itota wēnæ wēnæ cædāmaī īningā īfŋongante botō nē godōnīmo inte wīwa cæbo īmo ante awædō.

Ante āfŋongante tōmēnāni guiquēnē,

—Tōmēmi wēnæ wēnæ cædīmi inte wentamō bitō entawēnō adinque mōnitō ædō cæte wæquimōnii. Tōmēmi edæ nē cædīmi inte edæ abaīmipa tōō.

⁵ Ānāni wædinque edæ tiguitamō incæ Wængonguī tæjyæ waēmō oncōnē wo wææntodōninque Codaa oncodo tao godinque edæ nāmā ōnōmenca wēā æi goti guemencate dobæ wængacāimpa.

⁶ Māninta wo wææntodongā ate wædinque, Wængonguī quī, ante nē godōnāni fŋænænāni incæ tiguitamō yao yao ongonde æninque,

—Wepæ nāadintamō adinque Wængonguī Baa ancæcāimpa, ante pōnente wædinque mōnō, Wængonguī quī, ante ædō cæte godonguīmōō.

⁷ Ante godongāmæ pōnencōninque tōmēnāni, Oodeoidi īnāmaī īnāni wōdido bacæimpa, ante ōmæ nē dai bædongā ēadiōmæ incæ mānīi tigu-itamō godonte ængadānimpā. ⁸ Īninque wepæ nāadintamō godonte nāni ænimæ ante, Wepænguipo impa, ante nāni pemōnimæ īfŋōmō fŋōwo ganca impa. ⁹ Īninque do īfŋōmō Eedēmiya wodi Wængonguī beyæ īmaī ante nānō apænegaīnō baī īinque batimpā. “Idægoidi, Tōmengā beyæ mānimpotamō godonte ængæmpa, ante nāni ānimpotamō incæ todēnta tiguītamō padatamō æninque, ¹⁰ tōmēnāni Wængonguī botō imote nānō ānīnō baī ēfente cædinque edæ dai bædongā ēadiōmæ godonte ænānitapa,” ante Eedēmiya nānō angaīnō baī do īinque batimpā.

Pidato weca Itota ongongampa

(Māadoco 15.2-5; Odoca 23.3-5; Wāō 18.33-38)

¹¹ Itota īfŋōmō awēnē gobedōnadodo Pidato weca a ongōfŋongante awēnē gobedōnadodo īfŋōmō tōmengā ingante,

—Bitō oodeoidi Awēnē Odeyebi īmitawo.

Āfŋongante,

—Bitō tōmēmi ānō baī botō mānīmodō īmopa, Itota angantapa.

¹² Ayæ, Wængonguī quī, ante nē godōnāni fŋænænāni tōnō nē aadāni nāni Picæncabo guiquēnē Itota ingante āninque, Wēnæ wēnæ cæbipa tōō, ante āfŋōnāni tōmengā edæ pæ wēēnecā. ¹³ Ate wædinque Pidato wæætē,

—Bitō æpogadō wēnæ wēnæ cæbi īmipa, ante nanguī ānāni ēfēnāmaī inte bitō ædō cæte edæ pæ wēēnebii.

¹⁴ Āfŋongante Itota īfŋōmō tōmēnāni nāni ānīnō ante adodeque ante apænēdāmaī ingā adinque awēnē gobedōnadodo wæætē, Quiēmē baī pæ wēēnecā awædō, ante wængacāimpa.

Itota wæncæcāimpa, ānānīpa

(Māadoco 15.6-20; Odoca 23.13-25; Wāō 18.38-19.16)

¹⁵ Mānīmæ awēnē gobedōnadodo mānīfēdē wadepo īfŋō wadepo īfŋō cōwē īmaī cædongāimpa. Oodeoidi ææmæ nāni cæyedē gobedōnadodo īfŋōmō, Nē tee mōnete ongōnāni īnānite adinque mīnitō æcānō ingante āmīni fŋimpo cæbo goquingāā, ante āfŋongā ānāni ēfēninque tōmengā tōmēnāni nāni āningā adocanque ingante fŋimpo cæcā godongāimpa. ¹⁶ Mānīfēdē adocanque wēnæ wēnæ nānō cædinō beyæ tee mōnete a ongongampa, ante tōmānāni do ēfēnōnānimpā. Māningā ēmōwo Badabato īnongāimpa. ¹⁷ Īninque nanguī īnāni godongāmæ pōnāni ate Pidato tōmēnāni īnānite edæ,

—Æcānō ingante mīnitō beyæ ñimpo cæbo abæ tawænte gocā ænguimīni. Badabato ingante ñimpo cæbo gocā ænguimīni. Wæætē edæ Itota Codito mīni ānongā ingante ñimpo cæbo gocā ænguimīni, angacāimpa.

18 Edæ do iñōmō, Itota gomonga cæcā ate wædinque tōmēnāni tōmengā ingante piinte adōnānimpa. Mānīnō beyænque tōmēnāni Itota ingante bæi ongote botō nempo ænte māmō pædæ pōnōnānitapa, ante Pidato do eñngantapa.

19 Ayæ odōmānoidi nāni apænte anguimpaa ayæ ongōñongā Pidato nānōogængā iñōmō wacā ingante da pōnongā pōnīnque Pidato ingante nānōogængā beyæ apæncantapa. “Botō ñōwoōnæ mōwocodē wīlmōnīnque māningā nē nō cædongā beyæ nangui wogæi wogæi cæwēnente wæbopa cæbii. Bitō tōmengā ingante gampodāmaī inte gomō aquēnē quēwēē, āmopa,” ante bitō nānōogængā angampa, angantapa.

20 Angā eñente wæyongā, Wængongui quī, ante nē godōnāni ñænænāni tōnō nē aadāni nāni Picæncabo nāni āincabo guiquēnē wadāni nē godongāmæ ongōnāni Inānite ānānitapa. Mīnitō Pidato ingante iīmaī æedāni. Badabato ingante ñimpo cæbi gocæ. Itota ingante wæætē āmi wænōnāni wængæe, ante æedāni, ānānitapa. Awēnēidi incæ mānōmaī ānāni eñēnīnque godongāmæ ongōnāni Ao ānānitapa. 21 Awēnē Pidato iñōmō tōmēnāni Inānite ānīnque,

—Mēnaa ongōna iñōnate mīnitō æcānō ingante āmīni ñimpo cæbo goquingā.

Åñongante,

—Badabato ingante āmōnipa.

22 Ānāni wædinque Pidato wæætē,

—Īnīnque Itota Codito mīni ānongā ingante æbānō cæquimoo, ante āmīni.

Åñongante tōmānāni edæ,

—Awæ ñænquedīmæ āmi cæte gōnonte wænōnāni wængæe tōō.

23 Ānāni eñēnīnque Pidato ayæ,

—Īñæmpa quīnō wēnæ wēnæ cæcantawo.

Åñongā tōmēnāni godōmenque yedæ ānīnque adodō,

—Āmi awāa timpote wænōnāni wængæe.

24 Ante ancaā ānewēñōnāni Pidato iñōmō, Tæcæ wæætēdō wæætē ānāni inte tōmēnāni wēnæ wēnæ cædāni wæqui wæ, ante guīñente wædinque ayæ, Ædō cæte botō godōmenque cæquimoo, ante pōnente wædinque edæ æpæ pi ñīñænte tōmēnāni ayōnāni ōnempo mempodīnque tōmēnāni Inānite angantapa.

—Tōmengā wēnæ wēnæ cædāmaī iñongante botō, Wæñongæimpa, ānāmaī īmo inte tōmengā wepæ ñaadāmaī īmo æedāni. Wæætē mīnitō guiquēnē, Wæncæcāimpa, ante nē ānimīni inte edæ nāate bacæmīnimpa, ante adīnque botō mempobo æedāni.

25 Angā eñēnīnque tōmānāni Ao ānīnque edæ,

—Mōni ānīnō beyænque mōnitō incæ mōnitō wēnāni incæ tōmengā wepæ beyæ nāate bai bacæmōnimpa tōō.

26 Ānāni ate awēnē gobedōnadodo Pidato tōmēnāni nāni ānīnō ante eñente cædinque edæ Badabato ingante ñimpo cædinque tōmēnāni nempo pædæ godongā ænānitapa. Wæætē edæ Itota ingante edæ Pidato angā æmontai badōimenca tæi tæi pānāni ate tōmengā ingante ñænque quepote awāa nāni gōnonguinque edæ da godongā ænte godānitapa.

²⁷ Awënë gobedönadodo nänö wææ wänönäni guiquënë Itota ingante ænte godinque awënë gobedönadodo oncönë Podætodio nāni ancönë mangui guiiyongä tontadoidi bacabo Itota weca godongämæ äñete pönānitapa. ²⁸ Pöninque tömēnāni, Awënë ïmi inte awënë weocoo wēñacæbiimpa, ante bai cædinque badete todinque Itota weocoo gā tadongadinque wæætē opatawæ ēmoncoo pönö da wēñadinque, ²⁹ daa mongæmenca bai æninque que cædinque, Awënë poganta wencacæbiimpa, ante bai cædinque pönö daga wencadānitapa. Ayæ cæwipa ænte māmö pædæ pönonte änāni æninque tömengä tömēmæmpoca pæ mangä adinque tömēnāni da guicapodinque tömengä ingante,

—Badogaa, bitö oodeo awënë odeyebi ïmpææ, ante badete togadānimpa.

³⁰ Ayæ tömengäa towæ towæ tänongadinque cæwipa æninque tæi tæi ancaa pancadānitapa. ³¹ Ayæ ïnque badete todinque tömēnāni opatawæ ēmoncoo gā tadongadinque tömengä nāmā weocoo daga wēñadānitapa. Ayæ edæ tömengä ingante awæ timpote wænoncæte ante töö æmænte ænte tao mādāni gogacäimpa.

Itota ingante awäa timpodāni wængampa

(Mäadoco 15.21-32; Odoca 23.26-43; Wäö 19.17-27)

³² Ænte mǎo godinque tömēnāni Tidēne quēwengä Timönö ingante bee tēninque tömengä ingante edæ, Bitö ægodöe, Itota ingante möni timpoquiwæ ænte mongænte goe, änāni mongænte gocantapa.

³³ Mänii Itota ingante ænte mǎo godinque Godogota nāni äñömö mönö tededö “Ocatainö” ïñömö mäniiñömö pönānitapa. ³⁴ Mäniiñömö pönāni ate wadāni, Nantate beyæ becæcäimpa, ante cædinque yowepæ biinömæ nāni ämæ tönö moncapæ adoyömö wempo cædēninque pædæ pönö cæyönāni tömengä önonque yædæ bedinque edæ Baa angantapa.

³⁵ Ayæ Itota ingante awæ ñænquedimæ nāni ænte pöniwäa töö godöninque pönö timpodinque wææ tiwadinque ængæ gantidēnānitapa. Ængæ gantidēnāni ate wægöñongä tömēnāni wæætē tömengä weocoo ïni ante, Æcänö quinca nö ta adinque tömengä mänincoo æncæcäimpa, ante wææntodöninque adocooque adocooque ænānitapa. Mänömaï cæyönāni Wængongui beyæ nāni apænegaïnö bai ïnque cætimpa. “Botö weocoo ïni ö æninque tömēnāni nāni caboque wacä ingä wacä ingä nēnempodānitapa. Ayæ, Æcänö quinca nö ta adinque tömengä mänincoo æncæcäimpa, ante cædānitapa.” ³⁶ Tömēnāni tæ contadinque tömengä ingante wææ aadānitapa. ³⁷ Ayæ, Itota nē wænguēnengä ingampa, ante quīnante änāni, ante edonque acæimpa, ante cædinque tömēnāni, “Ïngä Itota ïñömö oodeoidi Awënë Odeye ïnongä ingampa,” ante yewæmöninque edæ awæmpaa tömengä ocaboca ïnö tee tinte wo cædānitapa.

³⁸ Ayæ wada nē ö ænte quēwēnina ïnate adoyedē tömengä tönö adocanque tömēmæ ïnö adocanque dipæmæ ïnö godö timpote ængæ gantidēdāni wængogadaimpa. ³⁹ Ayæ wodo pænta nē godāni guiquënë Itota ingante godö wænæ wænæ ante badete todinque pica pica cædinque, ⁴⁰ tömengä ingante wapiticæ apænedinque,

—Bitö ïñæmpa Wængongui tæiyæ waëmö oncö incæ bæ tate wo ëwēninque edæ mēönaa go adoönæque ïñonte do mænoncæ ämitawo. Mänömaï cæcæ änāni inte bitö tömēni edæ nāmā incæ cæte quēwēmæwe. Bitö nö Wængongui Wēmi ïmi ïninque edæ o togæmpote o togæwate wæææ, ämönipa töö.

⁴¹ Äñönāni edæ, Wængongui qui, ante nē godönāni ñænænāni guiquënë nē odömönāni tönö ayæ oodeoidi ïnānite nē aadāni nāni Picæncabo tönö adobai ïmaï ante edæ badete todānitapa.

42 —Tömengä, Wadäni quëwencädänimpa, ante waa cæcantawoo. Ñöwo iñäempa ædö cæte nämä waa cæte quëwengüingää. Idægoidi awënë odeye ingampa diyæ ti wæænte goquingää. Edæ ti wæænte gocä adinque mönitö wæætê edæ, Näwangä impa, ante pönëmai wædö. 43 Ayæ nämä ingantedö äninque tömengä edæ, Botö Wængonguï Wëmo inömo imopa, ante angämææ. Tömengä, Wængonguï cöwë pönö cæcæcäimpa, ante wede pönengä iñongante Wængonguï wæætê tömengä ingante edæ waa acampa diyæ ñimpo cæcä goquingää, ante badete todänitapa. 44 Ayæ nê ö æna guiquënë tömengä tönö godongämæ timpote wægöna ininque Itota ingante pïnte adobaï wënæ wënæ ante badete togadäimpa.

Itota wængampa

(Mäadoco 15.33-41; Odoca 23.44-49; Wäö 19.28-30)

45 Tæcæbæcä pöni bayö tömämæ iñontobæ wëmö badinque ayæ ayaönäa wæiganca mä mämönte baï ñimpa. 46 Ayæ edæ ayaönäa wæiyonte Itota nanguï pöni yedæ äninque, “Edii, Edii, nëma tabatäni,” äninque mönö tededö, “Botö Wængonguïñäa, botö Wængonguïñäa, ædö cæte botö imo ëmö cæte gobyaa.”

47 Ante wæcä ëñëninque godämæ ongönäni guiquënë,
—Æ. Ediya ingante aa pecä apa.

48 Äñönäni adocanque do pogodo gote önætämö ænte pöninque biinömä baï önömænque ænte aa bedöninque næænte, Cæwipaca pædæ æænömo becæcäimpa, ante cæyongä, 49 wadäni guiquënë,

—Ee aquënë. Ediya edæ ponte wabänö cæcä quëwengüingä abaimpa, angadänimpa.

50 Itota iñömö wæætê ogæ tededinque do wængacäimpa. 51 Ininque edæ Wængonguï oncö tæiyæ waëmoncönë weocoo odemö näni wææ wodöincoo adoyedë önönæca inö tæcægedë pöni tænguimæ wææntapa. Ayæ goinque bayonte dica incæ tæ gämæntapa. 52 Ayæ wao wodido incæ wi ænote bayonte edæ Wængonguï quinäni do wængainäni incæ pancadäniya ñäni ömæmöninque 53 tömënäni wodido abæ tawænte godänitapa. Edæ ñöwo iñömö, Itota ñäni ömæmongä ate tömënäni nê ñäni ömæmöninäni inte Eedotadëë näni waëmö quëwëñömö ponte a ongöñönäni nanguï inäni agadänimpa.

54 Mänii goinque do pö adinque ayæ, Æbänö cætimpä, ante tömänö adinque edæ tontado capitäö tönö wææ wänönäni tönö ancaï guïñëninque,

—Näwangä impa. Ñingä iñömö Wængonguï Wengä ingainö ante pönenguënë, angadänimpa.

55 Do iñömö Itota Gadideabæ quëwente pöñongante onquiyænäni nanguï inäni tee empote pöninque tömengä beyæ nê cædinäni inte ñöwo adodäni adoyömö pö gongæninque pömö adänitapa. 56 Mäadiya Mäagadadënë tönö wacä Mäadiya inatapa. Inä iñömö Tantiago tönö Ootee badä inantapa. Ayæ Tebedeo wëna tömëna badä tönö wadäni adobaï Itota wæñongante gobæ agadänimpa.

Itota wodi baö inï mäo daga wënänipa

(Mäadoco 15.42-47; Odoca 23.50-56; Wäö 19.38-42)

57 Ayæ gäwadecæ bayonte Ootee nê nanguï eacä incæ Itota miñæ nê gocä do badingä inte Adimäta iñömö pægaingä inte pongä ingantapa. 58 Tömengä iñömö ñöwo Pidato weca godinque, Itota wodi baö inï pönömi æmoe, angantapa. Pidato Ao äninque nê cædäni inänite, Tömengä baö ee amïni æncæcäimpa, angantapa. 59 Itota wodi baö inï gämiyate pædæ wæænonte ænte godinque

waemö weocoo ninocoo nãni ancoo wĩni wĩni caadinqwe, ⁶⁰ Ootee, Botö wodido baquimpa, ante dicamontaa nãnö wodintatodê miintatodê mão guidö ñö cædinqwe daga wengantapa. Ayæ dicabo da pæñæ pönö tee mönodinqwe wadæ gogaçaimpa. ⁶¹ Ìimaĩ cæyongã Mäadiya Mäagadadênã tönö wacã Mäadiya tönö Itota wodido obo contate acõnatapa.

Itota wodido iñömö wææ wænönãni a ongönãni

⁶² Ayæ guëmanguiönæ bacæ cæpa, ante nãni tãno cæönæ iinqwe cædãni ate iimö ate, Wængongui quĩ, ante nê godönãni ñænænãni tönö Paditeoidi guiquenê Pidato weca ponte ⁶³ tõmengã ingante äninque,

—Awenê eñemi. Mäningã nê babæ äningã iñömö tõmengã miingã iñedê apænedinqwe, Mëönaa go adoönæque iñonte botö ñãni ömæmoncæboimpa, ante nãnö äninö ante pönente wæmönipa. ⁶⁴ Ayæ tõmengã miñæ nê godinãni incæ tõmengã baö ini awemö ö æmainãni ante edæ wæmönipa. Ænãni iinqwe tõmënãni, “Dobæ ñãni ömæmongäimpa,” ante godömenque babæ äñãni edæ wænæ wænæ babaimpa cæbii. Nöwo wææ wänönãni inãnite ämi godinqwe tõmënãni mäningã nãnö wodintatodê tæëmö tee mönodinqwe mëönaa go adoönæque ganca wææ wänonte acædänimpa. Edæ wii godömenque wænæ wænæ bacæimpa, ante cæcæbiimpa, ämönipa.

⁶⁵ Äñönãni Pidato wæætê,

—Bado, wææ wänönãni mæ ongönãnipa. Minitö tõmënãni inãnite ænte mäomĩni goyönãni minitö wæætê mĩni eñenĩnö bai do cædinqwe tæëmö tee mönote cædãni.

⁶⁶ Angã eñente godinqwe tæëmö mönodinqwe Itota nãnö wodintatodê dai tee bædodänitapa. Ayæ, Awenê emöwo adinqwe wi ænodãmaĩ incædänimpa, ante dai bæyömö aquifedê ongontoca da guidonte awenê emöwo adimpaca yewæmonte bai bagatimpa. Ayæ wææ wänönãni inãnite ænte mão gö cædãni wææ wänongadänimpa.

28

Itota do wæningã inte ñãni ömæmonte quëwengampa

(Mäadoco 16.1-8; Odoca 24.1-12; Wäö 20.1-10)

¹ Mänii guëmanguiönæ iinqwe go ate wacã tëmãna baquinque ñãö ba iinqwe Mäadiya Mäagadadênã tönö wacã Mäadiya iñömö Itota wodido cææte ante gogadaimpa. ² Awenê Wængongui anquedo do wææ pöninque edæ dicabo wêgã godö oo wi ænocantapa. Ayæ goinqwe nangui ocæ ocæ cætimpã. Anquedo iñömö dicaboga tæ contacantapa. ³ Tõmengã awinca näinte cæ bai emönongã inte tõmengã weocoo näãmænta pönĩ emoncoo mongænte a ongongã. ⁴ Adinqwe edæ nê wææ wänönãni guiquenê ancai guifente wædinqwe do do wæate bai badinqwe æmæwo wænte bai öñönãnitapa. ⁵ Mänii onquiyæna pöñõnte Wængongui anquedo iñömö,

—Guifênãmaĩ ieda. Itota nãni awãa timpodãni wæningã ingante minatö diqui diqui mĩminapa, ante edæ do eñemopa. ⁶ Iñömö edæ dæ angampa. Tõmengã nãnö äninö bai cædinqwe do edæ ñãni ömæmöninque tao gocäimpa. Pö guiite aeda. Iintatodê nãnö öñontatodê iñömö edæ öñontatoque impã. ⁷ Ayæ nê adimĩna inte edæ quingæ pogodo gote tõmengã miñæ nê godinãni inãnite gode ante apænedinqwe, “Itota dobæ ñãni ömæmongäimpa ataqueedãni, äeda.” Ayæ iñömö tõmengã Gadideabæ tãno godinqwe a ongönongã minitö gote aedãni, ante minatö gode ante apæneda eñeedãni. Bado, ämo eñemĩnãpa edæ.

⁸ Angä eñëninque tömengä wodido abæ tawænte wadæ godinque tömëna, Ancai guiñente wæte todadö, äninque watapæ todirque Itota miñæ në godinani inänite gode ancæ pogodo godatapa. ⁹ Goyöna edæ Itota incæ iñontobæ mäo bee téninque edæ, Minatö, angä eñëninque edæ iñäna tömengä weca pöningue önöwaca ædæ wæænte mö ongöwate, Wængongui Awënë imidö angüenë, ante watapæ apæneyöna, ¹⁰ Itota iñömö edæ,

—Guiñënamäi iëda, angantapa. Ayæ, Minatö botö biwüdi inänite gode äninque iimaï äeda. Minitö Gadideabæ godinque botö imote acæminimpa, ante tömënanäi inänite äeda, ante Itota angacäimpa.

Në wææ wänöninäni babæ ante apænedänipa

¹¹ Onquiyæna gode ancæ goyöna Itota wodido në wææ wänöninäni pancadäniya wæætë tömënanäi nani quëwëñömö godinque, Wængongui qui, ante në godönäni ñænænäni inänite apænedinque, iimaï cætimpa, ante tömänö ante apænedänitapa. ¹² Apænedäni eñëninque edæ në godönäni ñænænäni guiquënë në aadäni nani Picæncabo tönö pönë cöningue godongämæ Ao äninque tontadoidi në wææ wänönäni iñönänite tiguitamö padatamö bacoo godöningue, ¹³ tömënanäi inänite iimaï angadänimpa.

—Wadäni Itota wodi baö ante wæyönäni edæ minitö önonque, Mö cöñömöni tömengä miñæ në godinani awëmö ponte ö ænänitapa, ante babæ apæneccæminimpa. ¹⁴ Ayæ mäninö äñömöni awënë gobedönadodo eñëninque, Quimæ möwëminäi, ante piingä adinque edæ mönitö wæætë wææ cædinque tömengä ingante ämöni eñëninque tömengä pänämäi ñimpo cæyongä minitö guïñente wædämaï incæminimpa.

¹⁵ Äninque në godönäni ñænænäni iñömö në wææ wänöninäni inänite nanguï tiguitamö godönäni ænänitapa. Mänintamö æninque awënëidi babæ nani äninö bai adodö ante apænedinque, Tömengä miñæ në godäni ö ænänitapa, ante babæ wapiticæ apænegadänimpa. Ininque tömënanäi nani babæ apænedö eñëninque edæ oodeoidi gode ante tededinque godömenque ñöwo ganca ayæ wapiticæ ante tededänipa.

*Itota, Apæneccæ goedäni, angampa
(Mäadoco 16.14-18; Odoca 24.36-49; Wäö 20.19-23)*

¹⁶ Önompo æmæmpoque go adodänique Itota miñæ nani godincabo guiquënë mäniü Itota nänö änö bai cædinque Gadideabæ godinque änanquidi æyönäni ¹⁷ Itota a ongongä adinque tömengä weca ædæ wæænte, Wængongui Awënë imidö angüenë, ante watapæ apæneyönäni pancadäniya guiquënë, Wabänö i, ante pönënamäi ingadänimpa. ¹⁸ Itota iñömö tömënanäi weca pönömenque pöningue,

—Wængongui pönö cæcä beyænque botö iñömö öönädë Tæiyæ Awënë inömo inte inguipoga adobai në Tæiyæ Awënë badinque nämä tæi piñæmo inte në ämo imopa. ¹⁹ Ante wædinque minitö guiquënë inguipoga tömämæ quëwënanäi weca godinque, Itota miñæ gocædänimpa, ante apænemini ëñente botö miñæ në godäni bacædänimpa. Ayæ mönö Mæmpo ëmöwo apænedinque, ayæ Wængongui Wëmo iñömote botö ëmöwo apænedinque, ayæ Wængongui Tæiyæ Wæmö Önöwoca ëmöwo apænedinque minitö tömämæ quëwënanäi inänite æpænë guidömni guicædänimpa. ²⁰ Ayæ botö minitö iminute botö äninö ante, Tömänö ante adodö cæedäni, ante odömömini ëñente cæcædänimpa. Ayæ botö edæ ñöwo incæ ayæ inguipoga iinque baganca cöwë minitö tönö ongonte godongämæ cæcæboimpa. Näwangä inguinö angüenë, ante Itota angacäimpa.

Itota Codito ingantedö ante Mäadoco nänö watapæ ante yewæmongainta

Wäo önömæca ponte apæ necä ëñënanipa

(Mäateo 3.1-12; Odoca 3.1-9, 15-17; Wäo 1.19-28)

¹ Ponguingä, ante nâni Codito angaingä inongä inte Wængongui Wengä Itota ingantedö ante botö Mäadocobo watapæ ante yewæmömopa.

² Doyedë inömö Wængongui beyæ apænedinque, Codito ingante Wængongui iimaï angäimpa, ante Itaiya wodi yewæmongacäimpa.

“Taadö bitö goquino waa wëwaqingä, ante bai cædinque botö, Botö beyæ nê gode änongä ingante da godömo täno beyænte gocä ate bitö ayæ gocæbiimpa, ämopa.

³ Önömæca inömö adocanque ogæ tedete aa pecæcäimpa.

Tömengä inömö, ‘Awënë nänö ponguino ante munitö tee moncate bai cædinque, taadö töinö pinonte bai cædäni,’ ante aa pecä ëñengäimpa.”

⁴ Ante Itaiya wodi nänö nê angaingä inongä inte Wäo nïwo önömæca pöningue æpænë guidongantapa. Mänömaï cædinque tömengä mäninömö pönäni inänite apænedinque, Minitö, Idæwaa wënæ wënæ cæte awædö, ante ocæ ëmænte Wængongui gämænö pöningue æpænë guicæminimpa. Mänömaï cæmini adinque Wængongui munitö cædinö ante nê panguënegä incæte piinämaï inte ñimpo cæcæcäimpa. ⁵ Ante Wäo mänömaï apæneyongante Oodeabæ tömão quëwënäni Eedotadëë quëwënäni tömänäni tömengä weca pö pö bee tente ëñëningue, Näwangä ämipa. Bitö ä bai ëñënaïmaï cæte quëwëmöni inte idæwaa wënæ wënæ cæte awædö, ante wædäni ëñëningue Wäo Oododänö æpænë guidongä guidänitapa.

⁶ Wäo inömö weocoo ante cämeyo ocaguincoo nonte badöincoo mongænte adobaï pacadeyænta ante æmontai badonte encadeyængäimpa. Tömengä cængui ante nïwäique cænte tömengä bequi ante guinëmænque ade bete nê quëwëngäimpa.

⁷ Iimaï ante apæ necä ëñënanitapa. “Incyæ ate nê Ponguingä guiquënë tömengä tæï ëmongä ewocadongä inte nanguï cæcä ingampa. Botö guiquënë wædämo pöni inömo inte tömengä awæncata eyepæï imopa godö nï cæquimoo. ⁸ Botö önonque æpænë guidömo guimïnipa. Tömengä wæætë da pönongä ate Wængongui Tæiyæ Waëmö Önöwoca pö guicä ewocæcæminimpa,” ante Wäo mäninädë apænegacäimpa.

Itota æpænë guicampa

(Mäateo 3.13-17; Odoca 3.21-22)

⁹ Ininque Gadideabæ Näatadeta quëwente Itota mäninädë pongä adinque Wäo Oododänö æpænë tömengä ingante guidongä guicantapa. ¹⁰ Ininque æpænë guidingä inte do ää ta gongæninque Itota æmö ayongä öönæ gä godonte bayö equemö wææ bai Wængongui Tæiyæ Waëmö Önöwoca incæ tömengä wææ guicä acantapa. ¹¹ Ayæ ëñëngante, “Bitö botö Wëmi inömi inte nê botö waadebi imipa, ate tobopa,” ante öönædë inö apæ necä ëñengacäimpa.

Itota incæ wënæ wënæ cæcæcäimpa, ante wënæ cæcampa

(Mäateo 4.1-11; Odoca 4.1-13)

¹² Māniñedē Itota ingante Wængongui Ōnōwoca incæ, Æibawē, āninqe ōnōmæca mæicā æicantapa. ¹³ Æi quēwēninqe wantæpiyæ coadenta ēonæ ōnōmæca quēwēñongante wēnæ awēnē Tatāna pōninqe, Wēnæ wēnæ cæcæcāimpa, ante Itota ingante cædongāimpa. Ayæ Itota mǎnōmāi babæidi quēwēñōmō quēwēñongante Wængongui tōmengā anquedoidi inānite da pōnōngā pōninqe tōmēnāni tōmengā beyæ pōnō waa cægadānimpa.

*Itota Gadideabæ pōninqe tæcæ mā cæcampa
(Māateo 4.12-17; Odoca 4.14-15)*

¹⁴ Mǎnōmāi cæte ate ayæ awēnē odeye Edode dobæ Wāō ingante tee mōnecā ate māniñedē Gadideabæ pōninqe Itota mā Wængongui nānō waa pōni cægainō ante Īlmaī ante apænegacāimpa. ¹⁵ “Ponguingā, ante dodāni nāni angaiñedē botō Wængongui Awēnē Odeyebō inōmo inte ñōwo ĩninqe bayedē do pōmopa, ante apænebo ēñēdāni. Minitō wēnæ wēnæ mīni cædimāmo wido cædinque waa pōni botō apænedinō mīni ēñēnō ante pōñēdāni,” ante Itota angacāimpa.

*Nē gæyæ dadōwēnāni inānite Itota aa pecampa
(Māateo 4.18-22; Odoca 5.1-11)*

¹⁶ Ayæ māniī pōninqe Itota gāwapæ Gadideapæ yæwedeca gote cægonte ayongā Timōnō tōnō Æntade tōmengā tōniñacā ĩnate acantapa. Nē gæyæ dadōwēna inōna inte tōmēna dicamōñæ æpænē wo guitodonte dadōwēna acantapa. ¹⁷ Tōmēna ĩnate Itota,

–Īñāna, botō miñæ edæ tee empo pōeda, āmopa. Nē dadonte ænte pōmīna ĩnate botō weca pōñōmīnate botō pōnō cæbo ate mīnatō wæætē nē apænemīna badinque waodāni inānite nē ænte pōmīna bacæmīnaimpa, angantapa. ¹⁸ Angā ēñēninqe tōmēna dicamōñæ do ēmō cæte godinque Itota miñæ edæ tee empo wadæ godatapa.

¹⁹ Itota ĩñōmō godōmenque gote ayongā Tebedeo wēna Tantiago tōnō Wāō adobāi wipodē dicamōñæ tadōmoncōna acantapa. ²⁰ Adinque Itota do, Botō miñæ pōeda, angā ēñēninqe tōmēna Ao āninqe wæmpocā ingante wæætē, Mæmpo ēñēmi, ānatapa. Bitō nempo wipo ēmō cæte gomōnapa, āninqe adodaque wæmpocā ingante ēmō cæte Itota miñæ wadæ godatapa.

*Itota angā ēñēte wēnæ ince tao gopa
(Odoca 4.31-37)*

²¹ Ayæ tōmēnāni quēwēñōmō Capēnaōmō māmongā pōnānitapa. Ood-eoidi guēmanguīōnæ bayonte Itota ĩñōmō Wængongui apænecā nāni ēñēte yewæmongainta ate nāni odōmōincōnē do pō guidinque odōmonte apænecā ēñēnānitapa. ²² Ēñēñōnāni tōmengā nāmā tæī piñæninqe nē angā ĩngā ĩnate nō odōmonte apænecā ēñēte wædinque tōmēnāni, Wadāni nē wææ odōmōnāni guiquēnē mǎnōmāi odōmonte apænedāni ēñēmongaa. Itotaque nāmā nē ēñēte entwēnongā ĩnate nō pōni odōmonte apænecā ēñēmōnīpa, ante wædānitapa. ²³ Ayæ wēnæ wentamō ēwocacā ĩnate nē quēwengā māniñedē tōmēnāni odōmōincōnē a ongōninqe ĩñontobæ yedæ ante apænecantapa.

²⁴ –Bitō Itota Nāatadeta quēwēnīmi ĩnate quīnante mōnatō weca pōmīi. Mōnatō ĩmōnate edæ æmæwo wido cæcæte ante wabānō pōmitawo. Bitō æmōmidō ĩmīi, ante botō do atabopa. Bitō Wængongui Tæiyæ Waēmō Wēmi ĩnōmi ĩmīpa, ante edæ do ēñēmopa.

²⁵ Ante tedeyongante Itota tōmengā ingante wææ āninqe,

–Apocænē quēwenguēnē tedewēē. Waocā baōnē quēwēnōmi ĩnate edæ tao gobāwe.

²⁶ Angä eñëningue wënæ nê wentamö ewocacä iñfömö waocä ingante quidi quidi mao tæ gotodö go wææñongante, Yæ yæ, äningue dobæ tao gotapa.

²⁷ Itota angä wënæ tao gocä adinque tömänäni guiffente wædinque nani caboque wæætedö wæætë tedingue,

—Iingä iñfömö quino bai ante cæcä. Tömengä nê angä inongä inte edæ mä pöni odömönte apænecampa. Edæ wënæidi nê wentamö ewocadäni inänite tömengä angä eñente cædänipa, ante awædö.

²⁸ Ante pönente wædinque tömënäni, Itota mänömaï cæcampa, ante tedingue Gadideabæ tömäo quëwënäni inänite mao gode ä gode ä cædäni do eñengadänimpa.

Pegodo nänöogæ wäänä ingante Itota cæcä gancæ bacä

(Mäateo 8.14-15; Odoca 4.38-39)

²⁹ Mänii Itota oodeoidi odömöincönë ongöningue iinque odömönte apænecä ate tömënäni tao godinque Tantiago tönö Wäö miñæ godinque Timönö tönö Äntade oncönë go guidänitapa. ³⁰ Go guiiyönänite wadäni, Timönö nänöogängä wäänä daicawo gawænte möimoga öñongampa, änäni. ³¹ Eñente wædinque Itota tömengä weca go gongæningue pædæ wææmpote bæi on-gonte töö æmængä ate tömengä ængæ ganticantapa. Ayæ gancæ badinque tömengä wæætë tömënäni beyæ cæcantapa.

Daicawo gawænäni inänite Itota cæcä waa badänipa

(Mäateo 8.16-17; Odoca 4.40-41)

³² Mänionæ gawadecæ pöni nænque wëmö bayö wadäni daicawo gawænäni inänite wënæ inte quëwënäni inänite tömänäni inänite Itota weca ænte pönänitapa. ³³ Ayæ mäniiñfömö quëwënäni tömänäni adoyömö pöningue odemö goto gongænänitapa. ³⁴ Ayæ quiemë beyæ wënæ wënæ inte wædäni adinque Itota nangui inäni inänite godö cæcä waa badänitapa. Ayæ wënæidi nangui inäni inänite wido cædinque Itota, Botö æbodö imoo, ante nê adimini inte tededämaï imæwedäni, ante tömënäni inänite wææ angacäimpa.

Itota oodeoidi odömöincönë go guidique apænecampa

(Odoca 4.42-44)

³⁵ Ayæ tæcæ oque pönente wëmö iñfönte ængæ gantidique Itota oncodo tao gote gomonga önömæca godinque Wængongui ingante apænecantapa. ³⁶ Apæneyongante Timönöidi, Ädönö gocäi, ante tee empo tee empo gote, ³⁷ adinque,

—Dæ ämi wædinque tömänäni bitö imite ante diqui diqui minänipa cæbii.

³⁸ Ante äñönänite Itota wæætë,

—Mönö wayömö gocæimpa. Eyequei nani quëwëñfömö nani quëwëñfömö mao botö apænëbo eñencädänimpa, ante cæcæte ante tate pontabopa.

³⁹ Ante nê äningä inte Gadideabæ tömäo godinque oodeoidi odömöincönë go guii go guii cædinque Wængongui nänö apænëdö ante Itota apænecä eñengadänimpa. Ayæ wënæidi inänite wido cæcä gogadänimpa.

Në baadingä ingante Itota wadæ caacampa

(Mäateo 8.1-4; Odoca 5.12-16)

⁴⁰ Ayæ wacä cöwë baate eñawengä inongä inte Itota weca ponte da gupadinque,

—Bitö Ao ämi inte wadæ caabi ininque botö do waintai baabaïmopa.

⁴¹ Äñongante Itota tömengä tönö guëa wæwente bai nangui pönengä inte pædæ wææmpo gampo caadinque,

—Ao ämopa. Bitö waintai baacæbiimpa.

⁴² Angā ininque ñōmæintai nānō ēñadintai dæ baadinque tōmengā waintai edæ do baacantapa. ⁴³ Itota edæ tōmengā ingante do da godōninque nanguī angantapa.

⁴⁴ —Ēñēmi. Botō æbānō cæboo, ante edæ wadāni inānite māo apænedāmai ĩmāwe. Wæætē, Nāwangā impa, ante acædānimpa, ante cædinque bitō, Wængonguī quī, ante nē godongā weca tōingā godinque waintai bitō baadin-tai odōmōmi ædæmō acæcāimpa. Ayæ Mōitee wodi wææ ante nānō angaincoo bai ænte pōninque bitō waintai bitō baadi beyæ ante edæ, Wængonguī quī, āninque nē godongā ingante pædæ godōmi æncæcāimpa, ante Itota nē baad-ingā ingante nanguī angantapa.

⁴⁵ Angā incæte nē baadingā wæætē wadæ godinque ēñēnāmai inte gode ā gode ā cædinque edæ, Itota wadæ caacā waintai baaboī aedāni, ante māo tedecā ēñēnānitapa. Mānōmai ēñēnāmai cæcā beyænque Itota, Tōmēnāni weca ñōwo ædō cæte edonque goquimoo, ante wædinque nānēnē gote ōnōmæca gomonga cægongantapa. Incæte tōmengā weca æmæñō quēwēnāni æmæñō quēwēnāni cōwē pō pō cægadānimpa.

2

Nē cōmāingā ingante Itota angā dao dao gocampa (Māateo 9.1-8; Odoca 5.17-26)

¹ Ayæ tæñōnæ quēwēninque ocæ ēmænte Capēnaōmō pongā adinque wadāni, Itota oncōnē ponte ongongampa. ² Ante tededāni wædinque nanguī ināni acæ pōnāni oncōnē eyede pōni guidinque odemō incæ tōmāo wææ ongōñānitapa. Mānōmai tōmāo goto ongōnāni inānite tōmengā Wængonguī nānō apænedō ante apænecā. ³ Ēñēñōnāni wadāni tōnō godongāmæ pōninque mengāa go mengāa ināni incæ cōmāingā nānō mōimpataa æmætæ æmætæ bæi ongonte næænte pōñānitapa.

⁴ Ponte ayōnāni wadāni Itota weca eyede pōni goto ongōnāni adinque nē ænte māmō pōnāni ĩñōmō, Ædō cæte guiquī. Ante wædinque oncōmāa ĩnō æidāmæ mæi æidinque Itota ōnōnæca ĩnō epæ cædāni ompite gongæñō tōmēnāni cōmāingā mōimpataa bæi ongōninque tōmengā ingante Itota weca edæ pædæ wææñōnāni. ⁵ Wæænte ongongā adinque, Tōmēnāni æbānō wede pōnente cædānīpa, ante adinque Itota cōmāingā ingante,

—Botō wēmi wædāmāi ĩe. Wēnæ wēnæ bitō cædimāmo ante bitō ñōwo ñimpo cæte quēwencæbiimpa.

⁶ Ante apænecā ēñēninque nē wææ odōmōnāni guiquēnē pancadāniya godāmæ tæ contate ongōninque nāmāneque pōnente tededinque, ⁷ “Quimæ ānewēē. ĩngā ĩñōmō Wængonguī ingampa diyæ mānōmai cæquingāa. Edæ babæ ancædō. Waomō wēnæ wēnæ mōnō cædimāmo ante Wængonguinque nē ñimpo cæcā ingampa.” ⁸ Ante mīmōnoque pōñēñōnāni Itota tōmēnāni nāni pōñēwēnō ante ōñōwēnenque do ēñente bai pōñēninque edæ,

—Mīnitō quimæ mānōmainō ante pōñēwēmīni.

⁹ “Botō nē cōmāingā nānō wēnæ wēnæ cædimāmo ante ñimpo cæbo quēwencæcāimpa,” ante botō Wængonguī bai āmo ēñēninque mīnitō guiquēnē, Wængonguī ingampa diyæ mānōmai cæquingāa, ante pōñēmīnīpa. Wæætē edæ, “Ængæ gantidinque mōimpata æninque dao dao gocæcāimpa,” ante botō Wængonguī bai āmo ĩnque mīnitō adobaī, Wængonguī ingampa diyæ mānōmai cæquingāa, ante pōñēmīni ĩmaimīnīpa, ante awædō. ĩñæmpa mānōmainō ante pōñēmīni ĩninque mīnitō edæ æbānō cæquēnēmo ĩmo āmīni.

¹⁰ Incæte botō Waobo ēñagaīmo inte inguipoga quēwēninque waomīni mīni

wënæ wënæ cædimāmo ante nē āmo inte ñimpo cæbopa, ante mīnitō edæ ēñencæmīnīmpa, ante botō īlmaī cæbopa.

Āninque edæ nē cōmāingā ingante edæ,

11 –Bitō imite āmo ēñēe. Ængæ gantidīnque bitō mōimpata topo cæte āninque edæ tōmēmi oncōnē næænte goe.

12 Angā ēñēinque cōmāingā īningā incæ edæ tōmānāni ayōnāni ængæ gantidīnque mōimpata topo cæte nææ nææ tao gocā adānitapa. Dao dao gocā adīnque tōmēnāni, Æbānō cæcāi, ante ēñēnāmaī inte guīñente wædīnque,

–Wēenēnedē mānōmaī cædāni atamōniyaa. ņōwo īñōmō mā pōnī cæcā amōnīpa, ante pōnēnīnque, Wængonguī bitō ñāō ēmōmi inte waa pōnī cæbi amōnīpa, ante watapæ apænegadānīmpa.

*Debii ingante Itota angā tee empote gocampa
(Māateo 9.9-13; Odoca 5.27-32)*

13 Itota wæætē adodō gāwapæ wedeca gocantapa. Ayæ nanguī īnāni adoyōmō pō pō cædāni adīnque tōmengā tōmēnāni īnānite odōmonte apænecā ēñēnānitapa. 14 Ayæ godōmenque cægonte ayongā Adepeo wengā Debii īñōmō, Odōmāno awēnē quī bacæīmpa, ante godonte æīnta nāni æīncōnē awēnē beyæ æncæte ante ongonā adīnque Itota tōmengā ingante,

–Botō mīñæ pōe.

Angā ēñēinque Debii edæ ængæ gantidīnque tōmengā mīñæ wadæ edæ gocantapa.

15 Ayæ ate Itotaidi Debii oncōnē pō guīte cængōñōnāni odōmāno awēnē beyæ nē æwēnāni tōnō nē ēñēnāmaī cædāni tōnō nanguī īnāni adoyōmō pō guīte godongāmæ cænānitapa. Edæ tæiyæñāni tōmengā mīñæ nē godāni īnōnānīmpa. 16 Paditeoidi īnōnāni inte nē odōmōnāni guīquēnē ponte ayōnāni nē ēñēnāmaī īnāni tōnō awēnē beyæ nē æwēnāni tōnō Itota godongāmæ cængā adīnque tōmēnāni tōmengā mīñæ nē godāni īnānite ānānitapa.

–Odōmāno awēnē beyæ nē æwēnāni tōnō wadāni nē ēñēnāmaī cædāni tōnō Itota quīmæ godongāmæ cæwengāā.

17 Āñōnāni Itota wæætē tōmēnāni īnānite,

–Nē waa ingā guīquēnē, Cæbi waa baboe, ānāmaī ingampa. Nē wënæ wënæ ingā guīquēnē dotodo ingante do, Cæbi waa baboe, ante aa pecampa. Pancadāniya, Nāmā incæ nō entawēmo īmopa, ante nē ānāni īnānite adīnque botō nē dotodo baī adobaī īnōmo inte tōmēnāni īnānite aa pedāmaī incæboīmpa. Wadāni guīquēnē, Nāmā wënæ wënæ cæbo īmopa, ante nē ānāni guīquēnē, Wængonguī gāmæñō poncædānīmpa, ante botō tōmēnāni īnānite aa pecæ pontabopa, ante Itota apænegacāīmpa.

*Ee ate cænāmaī ingæīmpa, ante nē ānāni
(Māateo 9.14-17; Odoca 5.33-39)*

18 Wāō mīñæ nē godāni tōnō Paditeoidi tōnō māniñedē Wængonguī beyæ ante ee ate cænāmaī īnōnānīmpa. Īnīnque wadāni Itota weca pōnīnque ānānitapa.

–Wāō mīñæ nē godāni tōnō Paditeoidi mīñæ nē godāni tōnō tōmēnānique, Wængonguī beyæ, ante ee ate cænāmaī īnānīpa. Bitō mīñæ nē godāni guīquēnē quīnante Wængonguī beyæ ante cædāmaī īnāni inte do cænānīi.

19 Ānāni ēñēinque Itota wæætē,

–Onguīñængā nē mōnguingā nānō wente ænte nē pōnāni baī īnōnāni inte botō mīñæ nē godāni īñōmō ædō cæte wæwente baī cænāmaī inguīnānīi. Edæ botō tōnō watapæ quēwēnāni inte tōmēnāni ædō cæte wæwente baī cænāmaī inguīnānīi. 20 Wæætē ayæ ate guīquēnē, Mōnguingā, nāni nē ānongā

baī iñōmote wadāni ponte botō imote bæi ongōninque ò ænte gocædānimpa. Mānōmaī cædāni ate botō miñæ nè godāni iñōmō māniñedē ate wæætē cænāmaī inte wæcædānimpa, ante apænedinque Itota godōmenque iūmaī ante apænegacāimpa.

²¹ “Wacōā dicæ miincoo æninque pedæncōoga pōnō tadōmonguingāa. Mānōmaī cæcā iñinque edæ miincoo incæ dobæ gāānē tamonte guipite ate godōmenque wānā fente baquēnē. Minitō, Awente baī cænāmaī inte waa quēwengæimpa, ante miñi ānewēnō guiquēnē pedæncōo baī inte ēwenguīne ēnepa. Coditō nempo watapæ quēwengæimpa, ante botō apænedō guiquēnē miincoo baī inte quēwenguīne ēnepa. Iñinque ēwenguīne tōnō quēwenguīne ædō cæte adoyōmō ēñente cæquīl. ²² Ayæ adobaī yowepæ biñōmæ miimæ æninque wacōā ædō cæte picæ æmontaicadedē godō pe ñiñænguingāa. Edæ picæ æmontaicadedē pe ñiñængā iñinque yedæ ææninque ætæwo goquīnō anguēnē. Wæætē edæ æmontai miincadedē pe ñiñænte ate yedæ ææninque tæi æbænāmaī ee ongonguī apa quēwēmīni,” ante Itota apænegacāimpa.

Guēmanguiōnæ iñonte tōmēmō tā pete ænānīpa

(Māateo 12.1-8; Odoca 6.1-5)

²³ Ayæ ate guēmanguiōnæ iñonte Itota tōmēmōncodē tæcæguedencodē gocantapa. Goyongā tōmēngā miñæ nè godāni tōmēmō inca tæcæ tā pe tā pe ænte idōmæ godāni. ²⁴ Adinque Paditeoidi guiquēnē Itota ingante āninque,

–Bitō miñæ nè godāni æbānō cædānīi, ante cōwā aquēnē. Iñæmpa, Guēmanguiōnæ iñonte māniñō baī cædāmaī iedāni, ante dodāni nāni wææ angainō ante ēñēnāmaī inte iñāni ēñēnāmaī inte quimæ cædānīi.

²⁵ Ante piññōnānīte Itota,

–Docā Dabii wodi tōmēngā nānō nè ēmiñæñāni tōnō òmæpodāni pōni inte gæwænte wædinque æbānō cægadānīi, ante yewæmonte òñō incæ mīnitō iñæmpa adāmaī inte āmīni awædō. ²⁶ Wængonguī quī, ante nè godōnānique cængūi impa, ante wææ nāni angainō baī cædinque dodāni pāō, Wængonguī quī, ante ñoncæ ñoncæ cædōnānimpa. Incæte Abiatade wodi nè godongā ñæñængā pōni inongā nānō godōñedē māniñedē Dabii wodi Wængonguī oncōnē go guidinque māñī pāō do ænte cæninque tōmēngā miñæ nè godāni iñānīte godōmenque godongā cænānītapa, ante yewæmonte òñō apa ānewēmīnīi.

²⁷ Ante apænedinque Itota ayæ,

–Wængonguī quīnante, Guēmanguiōnæ, ante badongacāi, ante pōnēmīni. Guēmancædānimpa, ante cædinque Wængonguī waomō beyænque ante, Minitō guēmanguiōnæ, ante badongacāimpa, ante pōnenguēñēmīni iñinīpa. Ædānidō māniñōnæ iñonte cædāmaī iñānīi, ante pōnēninque Wængonguī dicæ māniñōnæ beyænque ante wadāni iñānīte badongantawogaa. Ædō cæte mānōmaīnō ante pōnēwēmīnīi. ²⁸ Iñinque botō Wacōbo nè ēñagāimo iñōmō Tæiyæ Awēnē iñōmo inte edæ guēmanguiōnæ Awēnē iñōmo iñopa. Ayæ, Guēmanguiōnæ iñonte edæ æbānō cæquīl, ante adobo nè Āmo ingāimo iñopa, ante Itota apænegacāimpa.

3

Nī cōmampoingā

(Māateo 12.9-14; Odoca 6.6-11)

¹ Iñcayæ ate Itota wæætē oodeoidi Wængonguī apænecā nāni ēñente yewæmongainta ate nāni odōmōincōnē go guicantapa. Māniñōmō

onguññängä nī cōmampote wædongä inte a ongongantapa. ² Mäniñedē Paditeoidi pancadāniya, Itota wapiticæ cæcä ñinque mōnō wæætē pñinte angæimpa, ante nē ānewēnāni inte cædōnānimpā. Nōwo ññōmō tōmēnāni, Guēmanguñōnæ ñ incæte Itota nī cōmampoingä ingante, Waa bacæcäimpa, ante cæcä ñinque mōnō māo pñinte angæimpa, ante babæ cæcæte ante cōwä adānitapa. ³ Ante cōwä ayōnāni nī cōmampoingä ingante Itota,

–Bitō ængæ gantidinqwe tæcæguedē pō næ gongæe.

⁴ Äninqwe wæætē nē pñinte ancädāni ñnānte äninque,

–Guēmanguñōnæ ññonte mōnō æbānō cæquēnēmō ñmōö, ante wææ angatñi. Mōnō edæ waa cæquēnēmō ñmompā, ante pōnēmñitawo. Wæætē edæ, Wēnæ wēnæ cæquēnēmō ñmompā, ante pōnēmñitawo. Quēwencädānimpā, ante mōnō waa cæquēnēmō ñmompā, ante pōnēmñitawo. Wæætē, Wæncädānimpā, ante mōnō wæñonguēnēmō ñmompā, ante pōnēmñitawo. Māñōmāi ante Itota angä ñinque tōmēnāni edæ pæ wēenedānitapa. ⁵ Adinqwe tōmengä ænguñ badingue tōmēnāni ñnānite æmætæ gomō æmætæ gomō adinqwe edæ, Mīmō ñmædēñnāni incädō, ante wædinque nī cōmampoingä ingante,

–Pædæ pompobi, angä ēñēñinque pædæ pompodinqwe nē cōmampodingä incæ ædæmō waa empocä bapocantapa. ⁶ Adinqwe edæ Paditeoidi guiquēñē wadæ tao godinque Edodeidi tōnō bee tēñinque, Mōnō æbānō cæte Itota ingante wæñōmō wænguingä, ante godongämæ pōnēñinque tedegadānimpā.

Gäwapæ wedeca nanguñ ññāni pōñānipa

⁷ Itota ññōmō tōmengä nānō nē ēmiññāni tōnō wadæ tao godinque gäwapæ wedeca godāni adinqwe Gadideabæ quēwēñāni nanguñ ññāni tee empote godānitapa. ⁸ ñninqwe wadāni Oodeabæ, Eedotadēē, Idōmeabæ, Oododānō æmæmāa, Tido eyequei, Tidōo eyequei mäññōmō quēwente tededinqwe, Itota māñōmāi cæcampa, ante tededāni ēñente wædinque bacoo ññāni mäññōmæ tōmāo quēwēñāni inte tōmengä weca pōñānitapa. ⁹ Adinqwe Itota, Goto gongænāni wæcæ wæ, ante pōñēñinque tōmengä miññæ cōwē nē godāni ññānite, Wipo ænte pōmñini ate botō wipodē wāi wocænte owocæboimpā, angantapa. ¹⁰ Wēñē ññōmō, Itota nanguñ ññāni ññānite gampocä waa badānipa, ante nē adññāni inte tōmēñāni ññōwo, Mōnō gampo cæte waa bacæimpa, ante cædinque goto gongænāni wædinque māññōmāiñō ante äñongäimpā.

¹¹ Ayæ Itota ingante adinqwe wēñæidi nē wentamō ēwocadāni incæ tōmengä ññōwa gāñē ædæ wæññinque,

–Bitō Wængonguñ Wēmi ññōmi ññipa tōö, ante Yæ äñānitapa. ¹² Èñente wædinque Itota wæætē, Botō æbodō ñmoo, ante cōwē äñāmāi inguēñē quēwēññi, angacäimpā.

Itota angä ate dote ganca ññāni nē gode äñāni badānipa (Mäteo 10.1-4; Odoca 6.12-16)

¹³ Ayæ äñānquidi æidinque Itota, ññāni ññānite ämo poncädānimpā, ante aa pecä tōmengä weca pōñānitapa. ¹⁴ Pōñāni ate tōmengä dote ganca ññāni māñimpodāni ññānite, Mñitō botō miññæ quēwēññōmñite botō wadāni weca da godōmo gote apæñemñini ēñencädānimpā, äninque, Botō beyæ nē gode äññi incæmñinimpā, angacäimpā. ¹⁵ Ayæ pōñō apæñebo ēñēñinque mñitō tæñi ēmōmñi inte wēñæidi ññānite nē äññi badingue wido cæcæmñinimpā. ¹⁶ Tōmengä dote ganca nānō apæñte æññāni ññōmō ññāmāi ēmōññānimpā. Tāñocä Timōñō ēmongä incæte Itota wawo Pegodo pemongacäimpā. ¹⁷ Tebedeo wodi wēna Tantiago tōñō Wäö nāna caya nē yedæ tededā ññā adinqwe Itota,

“Detæbo nānōmoda bai īnapa,” ante, Mæmæ beyæ, ante Boānede pemongacāimpa. ¹⁸ Ayæ Æntade, Pedipe tōnō Batodōmēē, Māateo tōnō Tōmato, Adepeo wengā Tantiago tōnō Tadeo īnānitapa. Ayæ, Mōnō ōmæ ingæīmpa, ante nangui cædongā inte wacā Timōnō ingantapa. ¹⁹ Ayæ Itota ingante odōmonte nē godonguingā Codaa Icadote nāni ānongā ingacāimpa. Mānimpodāni īnānite Itota angā nē gode ānāni bagadānimpā.

*Wēnæ tōnō cæcā īmaingampa, ante wapiticæ ānānīpa
(Māateo 12.22-32; Odoca 11.14-23, 12.10)*

²⁰ Ayæ ate Itota oncōnē pongacāimpa. Pongā adinque bacoo īnāni wæætē pō pō goto gongæñāni adinque wadāni guiquēnē, Itotaidi quidō cænguīnāni, ante wædōnānimpā. ²¹ Ayæ, Quīmæ. Ocai edæ ōmædæcacā pōnente bai cæcāmææ, ante pōnente tededōnānimpā. Mānōmaiñō ante tededāni ēñēnīnque Itota guidēñāni guiquēnē tōmengā ingante bæi ongonte æncæte ante wadæ pōnānimpā.

²² Ayæ nē wææ odōmōnāni guiquēnē Eedotadēē quēwente pōnīnque, “Īñæmpa wēnæ awēnē Beedeboo tōnō quēwengā inte Itota māningā tōnō cædinque wēnæidi īnānite wido cæcā īmaingampa,” ante tedewēnāni.

²³ Ēñente wædinque Itota aa pecā pōnāni ate, “Tatāna mīni ānongā īñōmō nāmā incæ ædō cæte wido cæquingā, ante ēñencæmīnimpā, ante botō, Inguipoga æbānō cædāni, ante odōmōmo aedāni. ²⁴ Awēnē odeye nempo quēwēnāni īñōmō pīñāni badinque nāēmæ wæætēdō wæætē cædāni īnīnque awēnē odeye nānō ōmædempote wæquinque tōmēnāni nāmā ēwente cædānīpa.

²⁵ Ayæ adocōnē owocabo incæ adoyōmō godongāmæ quēwēnīnāni incæ nāēmæ wæætēdō wæætē cædāni īnīnque tōmēnāni oncō woquinque nāwæ gobānīnīpa. ²⁶ Ayæ Tatāna nempo quēwēnāni īñōmō edæ nāēmæ pīnte badinque wæætēdō wæætē cædinque tōmengā ingante wido cædāni īnīnque Tatāna dicæ tōmēnāni awēnē īmaingā,” ante Itota odōmonte apænegantapa.

²⁷ Ayæ, “Nē tæī pīñængā ingante wīī goto wīnīnque waocā ædō cæte tōmengā oncōnē guīte māincoo ō ænguingā. Edæ nē ēacā ingante bæi ongonte goto wīnte ate pō guīte ō ænāni bai botō īñōmō wēnæ inte nē bæi ongonte wido cæbo īmopa,” angantapa.

²⁸ Ayæ, “Nāwangā apænebo ēñēedāni, angantapa. Mīni waocabo wēnæ wēnæ cæmīni incæ wadāni īnānite godō babæ ānewēmīni incæte edæ Wængonguī wæætē tōmānō ante pōnō ñimpō cæcā beyænque quēwencæmīnīmpā. ²⁹ Wæætē Wængonguī Tæiyæ Waēmō Ōnōwoca ingante waocā godō babæ ante wēnæ wēnæ apænegā īnīnque tōmengā æmæwo wentamō mongængā bagaingā īnīnque cōwē wantæpiyæ wentamō mongæncæcāimpā. Mānōmai beyæ Wængonguī ñōwopāmo īñonte ñimpō cædāmai inte īncayæ pōmāmo īñonte adobai ñimpō cædāmai inte cōwē pancæcāimpā,” ante Itota apænegacāimpā.

³⁰ Ānīnque, Mīnitō botō īmote, Bitō wēnæ nē wentamō ēwocā tōnō quēwente cæbaimīpa, āmīnitawoo. Īñæmpa, Wængonguī Tæiyæ Waēmō Ōnōwoca tōnō quēwente cæbo apa ānewēmīni, ante Itota apænegacāimpā.

*Itota badā tōnō tōmengā biwīdi
(Māateo 12.46-50; Odoca 8.19-21)*

³¹ Ayæ Itota wānā tōmengā biwīdi tōnō māñī nāni ponque pō do pōnīnque yabæque ayæ ongōnīnque, Guīī āñete tæe. ³² Ānāni ēñente āñecæte ante ponte apænegā ēñēnīnque wadāni Itota weca contate ongōnāni Itota ingante wæætē apænedīnque,

—Bitö badä bitö biwüidi tönö bitö ìmite ante oncodo ponte yabæque ongönänipa cæbii.

³³ Ante äñönänite,

—Botö badä ædänö inäa ante ämoo, ante pönëmini. Ayæ botö biwüidi ædänidö inänii ante ämoo, ante pönëmini.

³⁴ Äninqe godämæ contate ongönäni inänite adinque,

—Ïnänii ïñömö edæ botö badäidi botö biwüidi inönäni inänipa, ante mänömainö ämo abaiminipa. ³⁵ Edæ Wængongui nänö äno bai ëñente æcänö cæte quëwëna mäningä botö biwi ingampa. Mäningä botö biwinque ingampa. Mäninä botö badä inampa, ämo abaiminipa, ante Itota apænegacäimpa.

4

Waacä nänö quiyadö ante odömonte apænecampa (Mäateo 13.1-9; Odoca 8.4-8)

¹ Wæætë gäwapæ yæwedeca gote odömoncæ cæyongä nanguï inäni tömão goto ponte ongönäni adinque Itota wipodë go guuite tæ contate wäi wocænte owoyongä tömënanii ayæ gäwapæ yæwedecaque ömaaque ongönänitapa.

² Ìninqe tömënanii inänite nanguï pönii odömöninqe Itota, Wængongui Awënë nempo quëwëninque æbänö cæquüi, ante ëñencæmininipa, ante botö imæca quëwënanii nänii cæinö ante odömonte apænebo ëñëedäni.

Äninqe iimäi ante odömonte apæneca ëñengadäninipa. ³ “Apænebo ëñëedäni. Waocä në quiyadongä ïñömö quiyacæ gocampa. ⁴ Gote quiyayongä pancamonga taadö ïñömö eyepote wææmompä. Taadö wæænte eyepodimö öñöñonte ayamöidi pöninqe dobæ ade cænänipa.

⁵ Pancamonga guiquënë dicamontaa onguipoi woyedömö ïñömö eyepote wææmpä. Onguipoi woyedömö öñömö inte pæquinämaï quingæ tä bocate pædinque æmonga æipa. ⁶ Ìninqe oguimento yæyæmë guiwadämaï inte cöñe bawadämaï ïñonte nænque ti näwäñö wänä cacadinque edæ guingo icate näñe wæmpä. ⁷ Pancamonga guiquënë ömentacodë nänö eyepodimö ïñömö pæquinämaï tä bocate gä æiyonte ömentacoo pö incootonque ganta cæca ate näñe wæmpä. Wampo incapa pæquüi. ⁸ Waëmonguipoga quiyadimö guiquënë tä bocate waa pædinque tömëmö nanguï pönii godömenque incapa. Pancawæncaa edæ todëinta ganca, pancawæncaa teifenta ganca, pancawæncaa tiëë ganca mänimpomö incapa. Quiyacä nänö quiyadö ante edæ botö mäninqe ante apænebopa.”

⁹ Mänömaï impä, ante ïnque apænebopa. Ëamonca ongonte edæ ëñëedäni, ante Itota apænegacäimpa.

Önömoncaque ëñente pönënämaï inänipa, ante (Mäateo 13.10-17; Odoca 8.9-10)

¹⁰ Ayæ ate nanguï ongönänii dæ godäni ate Itotaidi adodäninqe ongönänii edæ, Dote, ante nänii gocabo tönö wadäni tömengä miñæ godäni tönö tömengä weca ponte änänitapa. Itota ëñëmi. Bitö mäninö ante apænedinque æbänö ante odömoncæte ante apænebitawo. ¹¹ Äñönänite, “Wængongui Awënë Odeye ïñömö æbänö awëmö cæcää, ante mini waocabo wëñëñedë ëñënämaï ininö incæte ñowo edonque pönö apænebo ate minitö adominqe në ëñëmini bamänipa. Gobæ ongönäni inänite apænedinque, Inguipoga quëwënanii nänii cæi bai impä, ante botö pancaa ante odömonte apænebo ëñëänipa. ¹² Dodäni Wængongui beyæ apænedinque iimainö ante yewæmongadäninipa. Wængongui nänö në ñimpo cæquëñënanii inämaï

ināni inte tōmēnāni iñōmō awincaque adinque wīi ædæmō adāni inte ònōmoncaque ēñēninque ædæmō ēñēnāmaī ināni inte edæ ocæ ēmænte pōnāmaī incædānimpā, ante yewæmongadānimpā. Mānōmaī iinque bacæimpā, ante beyænque botō tōmēnāni inānite wīi edonque apænebopā,” ante Itota apænecantapā.

*Quiyacā nānō cæinō ante pōnente iīmaīnō ante ēñēgæimpā
(Māateo 13.18-23; Odoca 8.11-15)*

¹³ Itota ayæ tōmēnāni inānite godōmenque apænecantapā. “Botō mānīnō inguiopogā nāni cæinō ante do odōmonte apænebo ēñēninque mīnitō ēñēnāmaī iīmīnitawo. Iinque ñōwo godōmenque odōmonte apænebo incæte mīnitō ædō cæte godōmenque ēñēnguimīnīi.”

¹⁴ “Iīmaī impā. Nē apænecā iñōmō tōmēmō quiyate baī cædinque Wængonguī tōmengā nānō apænedō ante apænecampā. ¹⁵ Pancadāniya quiquēñē taadō eyepote wæænīmō baī ināni inte Wængonguī nānō apænedō ante ēñēninque mīmōno pōnēnāmaī iñōnānite ayamō ade cængā baī Tatāna incæ ponte ò ængampā. ¹⁶ Wadāni quiquēñē dicamontāa woyedōmō iñōmō eyepote wæænīmō baī ināni inte tōmēnāni Wængonguī nānō apænedō ēñēninque quingæ Ao ante watapæ todānīpā.”

¹⁷ “Ayæ ate adodāni wantæ iñō quēwēñōnānite wadāni Wængonguī nānō apænedō beyæ pīnāni wædānīpā. Ayæ wadāni wēnæ wēnæ cæcæte ante togænte pānāni wædānīpā. Iinque oguīmento yæyæmē guiwadāmaī nāñe wænte baī ināni inte tōmēnāni guīñente wædinque émō cæte godānīpā. ¹⁸ Ayæ wadāni quiquēñē òmentacodē eyepote wæænīmō baī iīnāni inte Wængonguī nānō apænedō ēñēñōnāni, ¹⁹ inguiopogā quēwente quiēmē beyænque mōnō wæpāmo pompa. Ayæ, Māincōo beyænque toquīmo, ante nāni òdā cæte wæwēmāmo pōninque wacoo wacoo nāni æinēnō pōninque edæ òmentacoo ñancate cæ baī cæyonte Wængonguī nānō apænedīnō incæ incadāmaī baī bapā. ²⁰ Onguiopogā wainguiopogā quiyadīmō baī ināni quiquēñē tōmēnāni Wængonguī apænedīnō ēñente Ao āninque wede pōnēnāni inte tōmēwæ incate baī Wængonguī beyæ nangui cædānīpā. Pancadāniya todēinta ganca incate baī nangui cæyōnāni, pancadāniya godōmenque teitenta ganca incate baī cædānīpā. Pancadāniya nangui pōnī tiēē ganca incate baī cædānīpā,” ante Itota apænecā ēñēnānitapā.

*Gongapæncade ante odōmonte apænecampā
(Odoca 8.16-18)*

²¹ Ayæ tōmēnāni inānite Itota iīmaī odōmōninque apænecantapā. “Waomīni gongapæncade tī wodōnodinque dicæ owætadē boo cæcamīniyāa. Dicæ mōimoga ænōmengadæ inō māo concæmīniyāa. Wæætē edæ wænōmēnæcapāa concæmīni ñāō bæco amīnīpā. ²² Quīnō ante wē wodonte baī i iñōmō mānīnō ante iīncayæ ate tadonte edonque ate baī ēñēnguīnque ñōwo wē wodonte impā. Quīnō bee ocate baī i iñōmō mānīnō iīncayæ ate wi æncate edonque aquinque ñōwo bee ocate impā. ²³ Éamonca ongonte ēñēnguēñē cæmīnīi,” angantapā.

²⁴ Ayæ tōmēnāni inānite godōmenque apænedinque Itota, “Ònōmonca ēñēninque ēñēnguēñē cæmīnīi. Mīnitō mīni tee mante godoncade incæ adocadeca tee mānīnque Wængonguī mīnitō iīmīnite adodō pōnōninque godōmenque ayæ pōnongā æncæmīnīpā. ²⁵ Edæ nē ēacā ingante godōnāni ængā baī nē ēñēngā ingante godō apænebo ēñente entawēninque tōmengā godōmenque ēñente bacæcāimpā. Nē ēadāmaī ingā quiquēñē tōmengā wædænque pōnī

nänö mänincoo iñonte mänincoo tömancoo ö ænani wæcä bai në eñenamai ingä adobaï tömengä wædænque põni nänö eñente entawenö iñonte ö ænte bai cæbo dæ ba ate wæcæcäimpa.” Mänömainö ante Itota tömengä emiñænani inänite odömonte apæneca eñenänitapa.

Guiyamö pæpa, ante odömonte apæneca

²⁶ Nöwo iñömö öömaque ongönäni inänite godömenque odömöningue Itota iñmai ante apænegacäimpa. “Wacä quiyacä ate awemö pæ bai inte Wængongui Awënë Odeye põno cæcä ate tömengä nempo në quëwënäni awemö yebæningue bacoo põni badänipa. Apænebo eñeedäni. Wacä gönea quiyate ate, ²⁷ woyowotæ mö ñöningue baänæ ñäni ömæmöñongä iimö iñö iimö iñö tömëmö nänö quiyadimö incæ awemö tä bocate pæpa. Wacä iñömö, Æbämë cæte tä bocate pæpa, ante acantawogaa. ²⁸ Edæ onguipo beyænque tömengä nänö quiyadimö incæ tä bocate pædinque æmonga æi cængüimæ baate ate ayæ cængüi yagapa. ²⁹ Yaga adinque, Amiñate cængüi bapa, ante edæ Pete ængampa,” ante odömonte Itota apænegacäimpa.

Möotatamö guidimö ante odömonte apæneca
(Mäateo 13.31-32; Odoco 13.18-19)

³⁰ Ayæ godömenque apænedinque Itota, “Wængongui Awënë Odeye nempo æbänö quëwënäni, ante mönö quinä odömonte ate eñenguüi. Edæ, Inguipoga quinä pæte yebænte bai i adinque, Mäninäni adobaï yebænänipa, ante eñengæimpa. ³¹ Iñmai impa. Möotatamö mini ænte quiyamö guidimö põni i bai wamö mini quiyamö adomongue incæ adobaï quiyamö põni i iñömö edæ dæ ampa. ³² Incæte möotatamö iñömö tä bocate pædinque möotatawæ edæ ocäñequi doyæ pæwæ bapa. Wüi tömää ocäñequi mini quiyadiwæ bai edæ ocäa inämai inte möotatawæ iñömö edæ ñænæ awæ impa. Adinque tömewæ ibæñömö ayamöidi gänë iñömö ponte ongönänipa. Möotatamö guidimö incæ mänömai pæ bai Wængongui Awënë nempo quëwënäni iñömö wædænque inänäni incæ nanguüi yebænguänäni inänipa,” ante Itota odömonte apænegacäimpa.

Inguipoga nani cæi bai impa, ante Itota odömongampa
(Mäateo 13.34-35)

³³ Ayæ Itota, Wængongui Awënë nempo quëwënäni æbänö cæquüi, ante eñencädänimpa, ante imæca quëwënäni nani cæinö ante godömenque nanguüi põni odömöningue godongämæ ongönäni nani eñenganca apænedinque idæwaa. ³⁴ Mäninonque bai odömonte apænedinque tömënäni inänite cöwë godömenque apænedämai inongäimpa. Incæte tömengä miñæ në godäni adodänique ongöñönäni Itota edonque põni, Mänömai impa, ante tömänö ante apæneca eñengadänimpa.

Itota angä eñente woboyæ æpæ næ gongæmpa
(Mäateo 8.23-27; Odoco 8.22-25)

³⁵ Mänionæ gäwadecæ bayonte Itota tömengä emiñænäni inänite,
—Gäwapæ æmæmäa taocæimpa.

³⁶ Äningue ömaa ongönäni inänite emö cæte taocæ cædinque tömengä nänö apænedimodë adopodë ayæ contayongante mantadäni taocantapa. Adinque wädäni wapodë godongämæ taodänitapa. ³⁷ Tao wogaa goyönäni woboyæ iñontobæ nanguüi põni pæmæningue æpæ mängonta mängonta põningue gao gao wipodë änëñö, ³⁸ Itota yæmiñæmpo bee podoncate mö ñongantapa. Ömæmoncæcäimpa, ante tao cædinque,
—Awënë, bete wæncæ cæmompä mö ñömii.

39 Änani eñëninque ñäni ömæmonte ængæ gantidique,

–Woboyæ, pæmænāmai imæwe. Gäwapæ incæ cædāmai næ gongæmæwe.

Ante añongä woboyæ pæmænāmai inō gäwapæ incæ næ gongæninque ñancæ ñancæ gongæmænimpa. 40 Ayæ tömënäni inänite,

–Mini pönëegade, quimæ guiñëwëminii.

41 Äñongä tömënäni ancai guiñëninque nämäneque tededinque,

–Æcämë inte angä eñente woboyæ incæ æpæ incæ gongæmpa, ante guiñente wægadänimpa.

5

Wënæ wentamö ewocacä tönö në quëwengä

(Mäateo 8.28-34; Odoca 8.26-39)

1 Ìninque Itotaidi mänii æmæmäa tao godinque Guedatabæ pö ti wæænänitapa. 2 Itota mänömai pöninque gäwapæ tao ti wæængä adinque onguiñængä wënæ wentamö ewocacä tönö në quëwengä inongä inte edæ waodänido quëwente tao bee tengantapa. 3 Tömengä waodänido cöwë në quëwengä ingante ædö cæte goto winguñänii. Daagömenca incæ tææmö

impa goto winguñänii. 4 Æno pönö goto wimænte wææ Æno pönö goto wiwate bacæcäimpa, ante ancaa cæyönäni tömengä daagömë wangö ñæ wangö ñæ cædongäimpa. Æcämenque incæ tæi piñængä inte tömengä ingante ænguingää. Edæ dæ änogäimpa. 5 Itädë incæ woyowotæ incæ tömengä änanquidi æite wææ waodänido pö änanquidi æite wææ ocæ emænte pö pö cæte Yæ yæ äninque dicaca nämä incæ äwænunga äwænunga cæte wencata bai eñate quëwënogäimpa. 6 Ìninque Itota go dibæ pongä adinque tömengä quingæ

podogo godinque Itota weca ædæ wæænininque, 7 ogæ tededinque, –Itota eñëmi, bitö në Æibæ Quëwengä Wængongui Wëmi inömi incæ quimæ botö weca pöwëë. Edæ, Ämogate wæcæcäimpa, ante botö imote cædāmai imæwe, ante nangui angantapa.

8 Edæ tömengä tæcæ pö bee teñongante wënæ ingante Itota iümai ante äningä inongäimpa. –Wentamö në wentamö ewocabi inte ämo eñëë. Bitö waocä baonga guiidëmi inte ñöwo tao gobäwe, ante Itota täno angä eñente wædingä inte wënæ ñöwo, Cædāmai imæwe, angantapa.

9 Ìninque Itota, –Bitö æmömidö imii. Äñongante, –Tontadoidi tæiyænäni adinque, Deguiönö, änanipa. Mönitö adobaï tæiyæ pöni imönipa, ante botö emöwo adobaï Deguiönö emömopa.

10 Ante apænedinque ayæ, Mönitö imönite wabæca wido cædāmai incæbiimpa, ante ancaa angantapa. 11 Mäninñömö odæ wængänäidi nangui inäni eyequei änanquidi a cængönäni adinque, 12 wënæidi incæ Itota ingante, –Ïi odæ wængänäidi weca ämi godinque tömënäni baönë guiite quëwëmönie.

13 Ante tedete äñönänite Itota Ao angä eñente wædinque wënæidi wentamö ewocadäni inñömö tao gote odæ wængänäidi baönë go guiidänitapa. Ìninque odæncato dote müido ganca inäni incæ ontacamö cængöninque tömäne to wæi gäwapæno pogodo wæi guiite becadote capo wænänitapa.

14 Becadote wænäni adinque odæ wængänäidi në aadinäni guiquenë pogodo wodii winonte tömënäni quëwëñömö mäo bee tente apænedinque

idōmæ mǎo gode ä gode ä cæte, Itota mänōmǎi cæcǎ wæmōnipa, ante apænedāni ēñēninque wadāni, Æbānō cæcǎi, ante acæte ante pōnānitapa. ¹⁵ Itota weca ponte ayōnāni wēnæidi tōnō nē quēwēningǎ incæ ñōwo ōnonganque bate weocoo ēñacǎ inte tæ contate ongonǎ adinque tōmēnāni, Mōnō Deguiōnō ēnemocǎ āningǎ ingampa, ante guiñente wægadānimpa. ¹⁶ Nē adināni guiquēnē ñōwo pōnāni inānite apænedinque, Wēnæ ēnemocǎ īningǎ ingante Itota æbānō cæcǎi, odæ wængānāidi inānite Itota æbānō cæcǎi, ante apænedāni. ¹⁷ Ēñēninque tōmēnāni wæætē Itota ingante, Mōnitō weca quēwēnāmǎi gobāwe, ānāni.

¹⁸ Ēñente wædinque wipodē go guicæ cæyongante wēnæidi inte quēwēningǎ iñōmō, Bitō miñæ māobi goboe. ¹⁹ Āñongante Baa āninque Itota,

–Tōmēmi oncōnē gote, Wængonguī Awēnē wēnæidi inānite wido cæcǎ ōnōmoque babōi amīnipa, ante bitō guidēnāni inānite mǎo apænebi ēñencædānimpa. Ayæ, Botō wæwente quēwēñōmote tōmengǎ guēa wæwente bai pōnente pōnō cæcǎ waa batabopa, ante apænebi ēñencædānimpa.

²⁰ Itota angǎ ēñēninque wadæ godinque tōmengǎ Decapodibæ mǎo, Itota waa cæcǎ waa batabopa, ante apænecǎ. Ēñente wædinque tōmānāni, Æ æbānō cæte mänōmǎi waa bacǎi, ante guiñente wægadānimpa.

Gaido wēñængǎ beyæ cæcæ goyongante

onquiyængǎ Itota weocoo gampocampa (Māateo 9.18-26; Odoca 8.40-56)

²¹ Mānīi wipodē guiite tōmengǎ īmæmāa ta ti wæængǎ ate nanguī ināni acæte ante pō goto goto godāmæ gongæñānitapa. Itota ayæ gāwapæ wedeca ongongantapa. ²² Ayæ ongōñongǎ wacǎ oodeoidi odōmōincō awēnē īnongǎ inte tōmengǎ ēmōwo Gaido iñōmō Itota ingante adinque pōninque tōmengǎ ōnōwaca gāānē ædæ wææñinque, ²³ tōmengǎ ingante,

–Botō wēñængǎ baquēcǎ iñōmō edæ dobæ wæncæ cæcampa cæbii. Bitō ponte tōmengǎ ingante gampobi waa bate quēwencæcāimpa, ante nanguī angantapa.

²⁴ Gaido mänōmǎi angǎ ēñēninque Itota wæætē tōmengǎ miñæ gocantapa. Idōmæ goyongante nanguī ināni bee tente goto goto pōnāni. ²⁵ Īninque godāmæ ongōnāni tōnō onquiyængǎ adocanque wantæpiyæ dote wadepo iñonte wepæ wantæ bidāmǎi cōwē wææ wæwēningǎ inte adobai ponte tōmēnāni miñæ gocantapa. ²⁶ Doyedē iñōmō onquiyængǎ waa bawēnencæte ante cædinque tōmengǎ quincōo tōmancoo eyepote pædæ godongǎ æñinque dotodoidi tæiyænāni cædāni caate wæcǎ incæte tōmengǎ waa bawēnēnāmǎi inte godōmenque wēnæ wēnæ bate wædongāimpa.

²⁷ Mānōmǎi quēwēnte wæyongante wadāni, Itota mänōmǎi cæcampa, ante tededāni ēñente wædinque tōmengǎ ñōwo goto pōnāni tōnō pōninque Itota ōnōñabæca inō ponte weocooque godō gampocantapa. ²⁸ Edæ, “Tōmengǎ weocooque gampote waa bawēnēmote,” ante pōnēningǎ inte, ²⁹ tōmengǎ godō gampoyongǎ wepæ nānō gowete wæwēnimæ wantæ bi ate tōmengǎ, Wantæ biwēnēmopa, ante ōnōwēnenque pōnengantapa. ³⁰ Itota iñōmō, Æ, tæi piñænte botō entawēnō incæ edæ wacǎ beyæ cæquinque do gotimpa, ante wæwēnente awæddō, āninque goto gongæñāni tæcæguedē næ gongæñinque dadi ēmænte cōwǎ adinque,

–Botō weocoo æcānō pōnō gampodai, angantapa.

³¹ Āñongante tōmengǎ nānō nē ēmiñænāni guiquēnē,

—Ēnodāni pōnānīpa aqūīmīi. Æcānō gampodāi, ante āmīi.

³² Wææ ānāni incæte tōmengā, Æcānō botō īmote wede pōnēninque gampo-
daī, ante godōmenque tōmāo cōwā cōwā acantapa. ³³ Ayongante onquiyængā
guiquēnē, Wampo bawēnēmopa, ante pōnēningā inte nanguī guīñēninque do
do wāate wædinque Itota weca ponte ædæ wææncate tōmānō ante tōingā
apænecā ēñēngantapa. ³⁴ Apænecā ēñēninque Itota wæætē,

—Onquiyæmī ēñēmi. Bitō wede pōnēnō beyæ edæ wampo bawēnēmīpa.
Nōwo edæ wædāmaī inte waa godinque nō bawēnente quēwēe, angantapa.

³⁵ Ante tæcæ apæneyongā oodeoidi odōmōincō awēnē Gaido oncōnē
quēwēnāni māniñedē pōninque edæ Gaido ingante apænedānitapa.

—Bitō wengā iñōmō nōwo æmæwo wængampa cæbīi. Nōwo Awēnē nē
Odōmongā ingante quīnante godōmenque angūi.

³⁶ Ante ponte āñōnānīte Itota tōmēnāni æbānō tededāni ante ēñēnāmaī inte
baī cædinque oodeoidi odōmōincō awēnē Gaido ingante apænedinque,

—Guīñēnāmaī inte ōnonque wede pōnēe, angantapa.

³⁷ Ayæ godongāmæ ongōnāni inānīte, Ee ongōedāni, āninque Pegodo ingante,
Tantiago tōnō Wāō nāna caya īnate mānimpodānique inānīte ænte gocantapa.

³⁸ Tōmēnāni tōnō godinque Itota tōmēnāni odōmōincō awēnē oncōnē ponte
ayongā mānincōnē waodāni nanguī cægōninque edæ Ca ca wædinque ogæ
tedete Yæ yæ ānāni acantapa. ³⁹ Adinque Itota oncōnē guīdinque,

—Quīmæ ogæ tedete cægōwēmīnīi. Quīmæ Ca ca wæmīnīi. Iñæmpa iñōmō
wēñængā wodi edæ wīl æmæwo wængantapa. Edæ mō ñongampa.

⁴⁰ Ante apænecā ēñēninque tōmēnāni, Angantedō amīni, ante tōmengā
ingante badete todānitapa. Itota wæætē edæ, Gā goedāni, angā oncodo tao
godānitapa. Īninque wēñængā wæmpo tōnō wāānā īnate Itota tōmengā mīñæ
nē pōiñāni tōnō mānimpodānique inānīte ænte manguicā wēñængā wodi
nānō ōñoncōnē wāānē guīdānitapa. ⁴¹ Wēñængā wodi ingante Itota pædæ
wææmpo bæi ongonte tōō æmæninque,

—Tadita cōmī, āninque mōnō tededō, “Wēñæmī onquiyæmī ængæ gantibi,”
angantapa.

⁴² Angā ēñēninque wēñængā baquēcā dote wadepo ēñadingā inte dobæ
ængæ gantite dao dao gocā. Adinque tōmānāni ancaī guīñente wædānitapa.

⁴³ Itota wæætē, Botō æbānō cæboo, ante mīnitō māo apænedāmaī iedāni.
Āninque edæ wēñængā beyæ cænguī angā godōna cængantapa.

6

Nāatadeta iñōmō ponte Itota apænecampa

(Māateo 13.53-58; Odoca 4.16-30)

¹ Itota wadæ godinque tōmengā mīñæ nē godāni tōnō tōmengā nānō
pægāiñōmō pongadānīmpa. ² Ayæ, Guēmanguīōnæ impa, āninque Itota
tōmēnāni odōmōincōnē go guīdinque tæcæ odōmonte apænecā ēñēninque
māniñōmō ongōnāni nanguī ināni guīñente wædinque nāni caboque ted-
edānitapa.

—Īngā iñæmpa ædō cæte nanguī ēñente apænecāā. Æbānō cæquīi,
ante æcānō tōmengā ingante godō odōmongā adinque tōmengā mānōmaī
bamōnengæ cæcāā, ante ēñencæte ante wæmōnīpa. ³ Īngā iñæmpa mōnō
awæmpa nē tīmōwengā īmaingā inte bamōnengæ mānōmaī cæcampa, ante
awædō. Edæ Māadiya wengā īnongā inte tōmengā iñōmō ōnōnānique mēmō

ingampa. Tantiago tönö Ootee, Codaa tönö Timönö tömënäni mēmō ināmai ingantawogaa. Tömengä biwinqueidi incæ mönitō tönö wīi ongonāni atamōō.

Ante pōnente wædinque tömengä beyæ ante piinte badānitapa. ⁴ Inique piinte badāni adinque Itota wæætē angantapa.

—Inæmpa, Wængongui beyæ nē apæneca inte tömämæ gote apæneyongante tömengä ingante waa adānipa. Wæætē tömengä nānō pægaifōmō ponte apæneyongante māniifōmonque wæætē wiwa adānipa. Tömengä nānō guidēnāni tönö tömengä oncōnē owodāni tönö mānimpodānique tömengä ingante wiwa adānipa tōō.

⁵ Äninqe Itota adopoque adopoque gampocā waa badānitapa. Mānōmai wædænque cædinque tömengä, Ædō cæte gomonga cæquimoo. ⁶ Äninqe, Mīni pōnēgade. Quinante pōnēnāmai imīni, ante wægcāimpa.

*Wængongui Awënë ingantedō ante apæneedāni, ante Itota angä godānipa
(Māateo 10.5-15; Odoca 9.1-6)*

Ayæ wayōmō nāni quēwēñōmō wayōmō nāni quēwēñōmō māo odōmōninque Itota apæneca ēñengadānipa. ⁷ Ayæ, Dote ināni, nāni änōnāni inānite aa pecā pōnāni inique, Nōwo mīnitō æmænō mēmīnaa æmænō mēmīnaa goyōmīnite botō pōnō cæbo ate mīnitō awēnēidi bai badingque edæ wēnæidi wentamō ēwocadāni inānite nē āmīni incæmīnimpa, ante da godongä godānitapa. ⁸ Ayæ, Iīmai cæedāni, angantapa. Mīnitō taadō godinque ongontoque mīni nææntoque næænte goedāni. Cængui incæ māincoo da wenguincade incæ ænāmai inte godinque tiguitamō ōnōncamoncadedē da wēnāmai inte ōmæpōmīni goedāni. ⁹ Awæncata mīni ēwataque ēwate weocoo mīni ēñacooque ēñadinque wacoo ænāmai goedāni, angantapa. ¹⁰ Ayæ godōmenque äninqe Itota,

—Godinque æcōnēnō tāno go guimīni owodinque mīnitō wayōmō mīni go quēwenguinganca mānincōnenque go guii go guii cædinque quēwēdāni. ¹¹ Äyōmōmē goyōmīnite wadāni, Pōedāni, änāmai inte mīnitō apænedō ante wīi ēñēnāni wædinque mīnitō wæætē tömënāni inānite emō cæte iīmaiñō ante goedāni. Mīnitō inæmpa, Pōedāni, änāmai imīni adinque mönitō gomōni tamēñedāni, ante odōmoncæte ante mīnitō ōnōwa wadæ wadæ cæwadinque wadæ goedāni.

¹² Äninqe Itota tömengä emīñænāni inānite, Nōwo goedāni, äninqe da godongä godānitapa. Godinque tömënāni wabæca quēwēnāni inānite māo, Mīnitō wēnæ wēnæ mīni cædinō ante wæwente pōnēninque ñimpo cæedāni, ante māo apænedāni ēñēnānitapa. ¹³ Wēnæidi nangui ināni inānite wido cædānitapa. Ayæ waodāni nangui ināni wēnæ wēnæ inte wædāni iñōnānite oginguipæ ōni ōni paadāni ate waa bagadānipa.

*Wäo æpcēnē nē guidōnongä wængampa
(Māateo 14.1-12; Odoca 9.7-9)*

¹⁴ Itota emōwo ante apænedāni ēñēninque tömämæ quēwēnāni do ēñēninque gode ä gode ä cæte tedeyōnāni Edode pancabaa awēnē odeye incæ, Itota æbānō cæcā, ante ēñengacāimpa. Inique tömengä iñōmō,

—Æpænē nē guidōnongä Wäo wodi dobæ wænte ñāni ōmæmōningä inte iingä Itota iñōmō imaingampa. Māniñō beyænque tömengä tæi piñænte entawēnongä inte nē nangui cæcā ingampa, ante pōnēmopa, angantapa.

¹⁵ Ayæ wadāni,

—Eđiya wodi imaingampa.

Ante tedeyōnāni wadāni wæætē,

—Wængongui beyæ nē apænegaināni bai tōmengā adocā īmaingampa.

¹⁶ Ante tededāni ēñēninque Edode iñōmō,

—Botō nē wangō tamencadongā Wāō wodi adocā incæ edæ ñāni omæmonte a ongōmaingampa, ante wædongāimpa.

¹⁷ Wāō wodi iñōmō iimaī wængacāimpa. Do iñedē awēnē Edode nanō tōniñacā Pedipe ayæ mīngā iñongā Pedipe manguiwēningā Ædodiya ingante Edode iñōmō, Botō nanōogængā bacæcāimpa, ante ō ænte mongā. Īnque tōmengā adocā Wāō wodi ingante bæi ongonte goti winte tee mōnedongāimpa.

¹⁸ Edæ Wāō iñōmō nanō caate wænguinque Edode ingante iimaīnō ante do wææ āningā ĩongāimpa. “Edode ēñēmi, Wængongui nanō angainō bai ēñēnāmaī inte bitō tōniñacā nanōogængā ingante edæ manguiwēmipa tōō.”

¹⁹ Ante wææ angā ēñēninque Ædodiya guiquēnē Wāō nanō āniñō beyæ cōwē piīnque tōmengā ingante wænoncæ cæcā incæte ædō cæte tōmengā ingante wænonguingāā. ²⁰ Edæ, Wāō tæiyæ waēmō onguiñængā inte nē nō cæcā ingampa, ante do ēñēnongā inte Edode iñōmō Wāō ingante edæ guīñente wædongā ĩongāimpa. Īnque tōmengā ingante edæ wææ gompdongāimpa. Ayæ Wāō apænecā ēñēninque Edode, Angā ēñente æbānō cæquimoo, ante nanguī wæcā incæte tōmengā ingante ēñēninque todongāimpa. ²¹ Īncayæ ate Edode nanō ēñagāiōnæ ĩnque bayonte Ædodiya, Æōnædō wænonguimoo, ante nanō āniōnæ eyepæ batimpa. Edode iñōmō, Māniōnæ bai ēñagaboimpa, ante ææmæ cædinque wente ængā ate tōmengā miñæ awēnēdi tōnō ton-tadoidi awēnēdi tōnō Gadideabæ quēwēnāni awēnēdi tōnō tōmānāni becæ pōnānitapa. ²² Ponte bete cængōñōnāni Ædodiya wengā baquēcā incæ tæcæguedē pō gongænte tode pete āwacā adinque awēnē odeye Edode tōnō godongāmæ ongōnāni nanguī todōnānampa. Īnque baquēcā ingante Edode ānongāimpa,

—Waa pōni bitō tode pete āwadi beyænque bitō quiēmē ante æinente āmi ate botō ēñente da pōnōmo æe.

²³ Ānque ayæ godōmenque ānque, Wængongui ēñēñongā nōingā āmopa, ānongāimpa. Quiēmē impa bitō æinēmi botō tōmāā edæ do godōmo æncæbiimpa. Edæ bitō æinente āmi ĩnque botō awēnē odeyebo ĩnōmo inte botō ēnempodō incæ edæ tæcæ pā cæte pōnōmo æmaīmipa. ²⁴ Angā ēñēninque taodique,

—Badā ēñēmi, quīnō anguiimoo.

Āñongante wāānā edæ do,

—Botō iimaī āmopa, ānantapa. Wāō æpænē nē guidongā ocabo wangō tomencaate pædæ pōnōmi æmoe, ancæbiimpa, āmopa.

²⁵ Ānā ēñēninque awēnē weca do ponte guidinque baquēcā wæætē,

—Wāō æpænē nē guidongā ingante wangō tomencaate tōmengā ocabo ĩni coyomēnætaca cō cæte do pōnōmi æmoe.

²⁶ Angā ēñente wædinque awēnē odeye iñōmō, Æ ēñente awædō. Quīnō ñōwo cæquimoo, ante nanguī wædongāimpa. Incæte tōmengā, Botō iñæmpa godongāmæ becōnāni ēñēñōnānite, Wængongui ayongā cōwē godoncæboimpa, ante nē āniimo inte edæ ædō cæte ñōwo Baa anguiimoo. ²⁷ Ante pōnente wædinque tōmengā nanō āniñō, Cōwē godongui impa, ante pōnēninque Edode wæætē nē wænongā ingante, Bitō godinque wangō tomencaate nente māmōmi ængæe. ²⁸ Angā ēñēninque nē wænongā wæætē tee mōnincōnē gote guidinque Wāō ingante wangō tomencaā wængantapa. Ayæ Wāō ocamō

ini coyomænætaca cö cædinque baquecä weca ænte mämö pædæ pönongä æninque baquecä wæætë wäänä inante godongä ænönäimpa.

²⁹ Mänömaï wængäimpa, ante gode änäni eñente wædinque Wäö wodi tömengä miñæ nê godinäni incæ pöningque tömengä baö ini ænte mäo daga wengadänimpa.

5.000 ganca inäni inänite Itota godongä cænänipa

(Mäteo 14.13-21; Odoco 9.10-17; Wäö 6.1-14)

³⁰ Mänii Itota nê nänö da godöninäni iñömö ocæ emænte ponte godämæ gongænte, Mänömaï cætamönipa. Mänömaï odömonte apænemöni eñenänitapa.

³¹ Ante apænedänitapa. Ayæ, wadäni nanguï owentædæ pænta owentædæ pænta wææ cægönäni adinque tömënäni ædö cæte cæquinänii. Cængui incæ ædö cæte cænguinänii. Adinque Itota,

—Minitö adomînique botö miñæ önömæca gote wædænque guëmæedäni, angantapa. ³² Angä Ao ante tömënäni adodänique Itota miñæ wadæ godinque önömæca gocæte ante wipodë wææ contate wogaa godänitapa. ³³ Goyönänite wadäni guiqüenë, Itotaidi incæ godänipa, ante adinque wacönë ta wacönë ta godinque tæiyænäni tee ta tee ta go ömaaque oo pænta pogodo gote do edæ pöningque a ongönänitapa. ³⁴ Ayæ wipodë wogaa mämö tæcæ æænoncadoyönäni Itota iñömö ti wæænte ayongä nanguï inäni do ponte a ongönäni acantapa. Tömënäni nê aacä dæ añongä obegaidi quëwenguinämäi inäni inte adodänique ongönäni bai inäni inte wæwënänipa, ante pönente tömengä tömënäni tönö godongämæ wæwente bai pönengantapa. Ininque nanguï odömonte apæncä eñenänitapa. ³⁵ Ayæ gäwadecæ bayö Itota miñæ nê godäni tömengä weca ponte äninque,

—Nöwo wëmö bacæ cæpa cæbii, änänitapa. Ayæ, Önömæca incæ cængui dæ ampa. ³⁶ Inäni inänite ämi idömæ owodäni weca godinque ayæ nanguï inäni nani quëwëñömö godinque cængui godonte cænguinänie.

³⁷ Añönänite Itota wæætë,

Minitö wæætë godömîni cæncædänimpa, ämopa.

Añongante,

—Æ, ënodäni inäniiyaa. Iñæmpa ocho apäicä cæte beyæ paga æinta æninque mänimpota päö ante godonte æninque edæ wii eyepæ imäimpa. Mönitö wadæ gote mänimpota beyæ päö godonte æninque inönö godongämæ ongönäni inänite godömöni cænguinänii, ämitawoo.

³⁸ Ante wæyönänite Itota,

—Päö æpodö nææmîinii. Acæ goedäni.

Angä ate pöningque,

—Päö önompo æmæmpoque gæyæ mæa pönî mæ ongompa.

³⁹ Ante apænedäni eñëninque Itota godongämæ mæ ongönäni inänite, Nöwo mîni cabo mîni cabo gaguimäa tæ contaedäni. ⁴⁰ Angä eñëninque pancadäniya tiëë ganca nani cabo nänënë pancadäniya tincoenta ganca nani cabo nänënë tömänäni nani cabo nani cabo tæ contadänitapa. ⁴¹ Tæ contadäni ate päö önompo æmæmpoque gæyæ mæa æninque öönædë inö æmö adinque, Wængongui, bitö waa pönömi ænte cæmönipa, ante apænedinque päö pä pä æ cædinque tömengä, Nanguï inäni cængui ante ænte mäo cö cæedäni, ante tömengä miñæ nê godäni inänite pædæ pönongä æninque mæ cö cædänitapa. Ayæ gæyæ mæa iñonte adobai æninque tömengä tömänäni inänite di mæñæ di mæñæ cæcä æninque cænänitapa. ⁴² Æninque tömänäni tömo pönî cænäni, ⁴³ ate edæ tömengä emiñænäni päö tönö gæyæ nani ao mænte ñönöni ee

õñoncoo pædæ wææmpo ö æ da da wente æninque otodë õnompō tipæmpoga go mentodëa cænguī eyede da wënāni contagatimpa. ⁴⁴ Nē cænāni iñõmõ onguīñænāni edæ tinco mūido ganca mānimpodāni nanguī iñāni nāni wencabo cængadānimpā.

Itota yædopæ dao dao gocampa

(Mäateo 14.22; Wäö 6.16-21)

⁴⁵ Itota ayæ do tõmengä nānõ nē ãmīñænāni iñānite, Ægodödäni. Mīnitõ tãno wipodë guiite æmæ wedeca Betaida tao goyõmini botõ wæætë wadāni nē cænīnāni iñānite ämo godāni ate põmoedāni. ⁴⁶ Angä Ao ante tao goyõnāni tõmengä wadāni iñānite wæætë angä godāni ate adocanque ongonte Wængonguī ingante apæncæte ante änanquidi æcantapa. ⁴⁷ Ayæ wëmõ bayõ tõmënāni tæcætibæ wogaa goyõnāni tõmengä adocanque õmaa ongonte ayongä, ⁴⁸ tõmengä nānõ ãmīñænāni wiyate taocæ cæyõnāni edæ woboyæ nanguī pæmæante põnõmenque ænte põ ædõ cæte goquīnāni. Adinque tawadiya nānõ peyedë edæ tæcæpæ põni i gāwapæ wænõmënæcapæ inõ edæ Itota iñõmõ æpæno yædopæ dao dao obo ponte wodo pænta gocæ cæcantapa. ⁴⁹ Yædopæ edæ gocä gomõ adinque tõmënāni Yæ äninque, Waocä wænte babæningä wabänõ cægongä, ante wædānitapa. ⁵⁰ Edæ tõmengä ingante adinque tõmāni ancai guīñente wædānitapa. Tõmengä iñõmõ tõmënāni iñānite do apænedinque,

–Ee piyænë cæte guīñenāmaī iedāni. Botõ imo apa guīñewëminii.

⁵¹ Äninque wipodë põ guicä ate woboyæ incæ næ gongæ pæmænāmaī batapa. Ba adinque tõmënāni godõmenque guīñëninque, Quīnante mænõmaī cæ, ante wædānitapa. ⁵² Edæ, Itota æbänõ iñõntobæ pãõ nanguī põni põnõ badongä, ante nē adināni incæte tõmënāni mīmõ õmædë iñāni inte bai wīl põnente wægadānimpā.

Caate wædāni iñānite Itota cæcä waa badānipa

(Mäateo 14.34-36)

⁵³ Ayæ æmæmāa taodinque tõmënāni Guënetadetebæ ti wææninque wipo ñā cæmencadānitapa. ⁵⁴ Mænõmaī ti wæænte ñā cæmencayõnāni māniñõmõ quëwënāni guiquënë, Tõmengä Itota ingampa, ante do adānitapa. ⁵⁵ Ante adinque mænõmæ tõmão pogodo godinque wënæ wënæ wæwënāni iñānite ñõnæmpado ñõ cædinque, Itota æyõmõnõ ongongäa, ante ëñëninque tõmënõmõ tõmengä nānõ ongõñõmõ do ænte põnānitapa. ⁵⁶ Ayæ wadāni nāni nanguī põni quëwëñõmõ incæ wædænque nāni quëwëñõmõ incæ idõmæ incæ, Itota ædõmë gocää, ante adinque wadāni wæncæ cædāni iñānite mænīñõmõ ænte māmõ taadõ wedeca ñõ cædāni õñõnānitapa. Iñāni wæætë tõmengä ingante, Bitõ weocoo yæwedecooque ämi gampote waa bamõnie. Ante wæyõnānite, Ao angä ëñente nē gampo gampo cædānique tõmānāni waa iñāni bagadānimpā.

7

Mimõno tao godi beyænque waocä wentamõ ëwocacampa

(Mäateo 15.1-20)

¹ Ayæ Paditeoidi tõnõ nē wææ odõmõnāni tõnõ pancadāniya Eedotadëë quëwente māniñedë Itota weca ponte godongämæ gongænte ayõnāni, ² Itota miñæ nē godāni pancadāniya mempõdāmaī inte wentamõ empote cænāni adānitapa. ³ Edæ dodāni, Õnompō ædæmõ mempõinānique cæncædānimpā, ante nāni wææ angainõ ante Ao äninque, Bapogabo cæte wæcæ wæ, ante Paditeoidi tõnõ oodeoidi tõmānāni ancaa mempote ate cænõnāni iñānipa. ⁴ Ayæ,

Ædæmō āadānique cænguīnāni īnānīpa, ante pōnēninque oodeoidi nāni godonte æīñōmō gote pōninque ædæmō āate ate cænānīpa. Ayæ dodāni godōmenque nanguī nāni wææ angainō ante pōnente Ao ante cædinque tōmēnāni owæta cængæ tiguicade awæmpa tōmancoo ancaa mēnongate quēwēnānīpa. ⁵ Īninque dodāni nāni wææ angainō ante Ao ante tōmānō ante ēñente cæte quēwēnāni inte Paditeoidi tōnō nē wææ odōmōnāni ñōwo īñōmō Itota ingante edæ piinte āninque,

–Bitō mīñæ nē godāni īñōmō quīnante dodāni nāni angainō ante ēñēnāmaī inte wentamō nampote cænguī cænānīi.

⁶ Ante pīināni wædinque Itota wæætē,

–Mīnitō guiquēnē waa cæmīni inte baī nē ānewēmīni īñōmīnite mīni cædō ante Wængonguī īmaī apænecampa, ante Itaiya wodi nōingā ante yewæmongacāimpa.

“Īnāni īñōmō botō īmote ōnōneque waa apænete baī tededāni incæte, tōmēnāni mīmōno æmæ pōnente edæ gobæ ongonte baī īnāni awædō.

⁷ Ayæ botō īmote waa ate baī ædæ wæænte tededinque, Wængonguīmi īmidō anguēnē, ante apænedāni incæte tōmēnāni botō īmote ōnonquedō ante cædānīpa.

Waadānique nāni wææ ānōnō ante odōmonte apænedānīpa tōō.”

Ante Wængonguī pīingampa, ante yewæmongacāimpa. ⁸ Edæ Wængonguī, īmaī cæedāni, ante nānō wææ angainō ante Baa ānimīni inte mīnitō waodānique nāni ānewēnō ante Ao ante cæmīnīpa tōō, angantapa.

⁹ Ante apænedinque Itota godōmenque,

–Mīnitō dodāni nāni angainonque ante ēñente cæcæte ante cædinque Wængonguī nānō wææ angainō ante wido cædinque dicæ waa cæmīniyaa.

¹⁰ Mōite wodi, “Bitō Wæmpo ingante bitō badā īnante waadedinque waa cæe,” angacāimpa. Ayæ, “Waoçā wæmpocā ingante wāānā īnante piinte wēnæ wēnæ angā īninque mīnitō tōmengā ingante wænōmīni wæncæcāimpa,” ante wææ ante yewæmongacāimpa. ¹¹ Incæte mīnitō īmaīnō ante wææ cæmīnīpa. Waoçā mæmpocā ingante waa cæquēnengā īñongante wāānā īnante adobaī waa cæquēnengā īñongante mīnitō wæætē wææ āninque, Bitō wæmpocā ingante wāānā īnante apænedinque īmaī ante apænecæbiimpa, ānewēmīnīpa. Bitō, “Mæmpo, bitō quī, ante, Badā, mīnō quī, ante do botō pōnonguēnēnō incæ ñōwo wæætē Wængonguī ingante do edæ godonte impa,” ante, Codobānō nāni ānō impa, ante apænecæbiimpa. ¹² Āninque mīnitō Wæmpo beyæ wāānā beyæ nē cæquēnengā ingante wææ āmīni beyæ tōmengā wīī cæcampa. ¹³ Mānōmaī cædinque mīnitō dodāni nāni angainō mīni Ao ante ænīnonque ante ēñēninque Wængonguī nānō angainō ante edæ, Ōnōneque impa, ante baī cæmīnīpa tōō. Ayæ adobaī wapiticaē āninque mīnitō wadō wadō cædinque wēnæ wēnæ cæmīnīpa tōō, ante Itota apænegacāimpa.

¹⁴ Ayæ nanguī īnāni īnānīte Itota aa pecā pōñōnānīte apænecantapa.

–Mīnitō tōmāmīni īmīnīte apænebo ēñēninque ocaidē pōnente ædæmō ēñēdāni. ¹⁵ Quincoomē yabæque ongoncoo incæ waoçā ōnōnē guīdi beyænque tōmengā mīmō dicæ wentamō entawenguingāā. Wæætē mīmōnē wīwa pōnēninque nānō tao godincoo beyænque mīmō wentamō mongængampa, ante apænebo ēñēdāni.

¹⁶ Ēamonca ongonte ēñēdāni.

¹⁷ Ante apænedinque Itota nanguī ongōnāni īnānīte ēmō cæte oncōnē gote wāānē guīcā ate tōmengā nānō nē ēmīñænāni guīquēnē, Mānōmaīnō ante

odömonte apænedinque bitö æbänö ante odömoncæte ante apænebitapa, ante eñencæte ante wæmönipa. ¹⁸ Ante wæyönänite Itota,

—Minitö incæ ocai ömæcadäni bai inömini inte eñënamai iminitawo. Cænguï incæ waocä mimönë guipa wentamö ewoqaqingäa. ¹⁹ Edæ wii mimönë guipa. Wæætë cæncadë guite goiwaa ogä mente wido cæquinque i apa anewëminii.

Mänömaïnö äninque Itota, Tömää cænguï waëmö impa, angacäimpa.

²⁰ Äninque godömenque,

—Mimönë wiwa pönëninque nänö tao godincoo beyænque waocä wentamö ewocacampa. ²¹ Edæ mimönë nänö entawente taodinö beyænque waocä önöwëninque wënæ wënæ ante pönengampa. Mimönë towëinente nänö pönëno beyænque waocä godö towente quëwengampa. Mimönö æinente wædinque wacä qui awëmö ængampa. Mimönë nänö piinte pönëno beyænque godö wænongampa. Nänöogængä inämai iñongante waocä mimönë towëinente nänö pönëno beyænque godö mongampa. ²² Mimönë nangui æinente wædinque mäincooque ante pönëwengampa. Mimönë nänö taodi beyæ wacä ingante piinte cæcampa. Mimönë pönëwëninque, Wacä edæ oda cæcadänimpa, ante babæ cæcampa. Wiwa nänö pönëwëno beyænque quingämë bai cæte quëwengampa. Mimönë nänö piinte adö beyæ waocä, Wacä bai ñænæmo pöni bacæboimpa, ante cæcampa, ayæ wacä ingante godö wënæ wënæ ante babæ angampa. Mimönë nämä ante waa ate nänö pönëno beyænque, Tömëmoque waëmö imopa, ante nämä waa acampa. Mimö ömædengä inte eñënamai cæte önonque quëwengampa. ²³ Mänii wiwa cæpämö tömämämo mimönë nänö pönëno beyænque waocä wentamö ewocacampa, ante Itota apænegacäimpa.

Onquiyæ oodeo inämai inte Itota ingante pönente angä

(Máateo 15.21-28)

²⁴ Mäniiñömö quëwente godinque Itota Tido eyequei gogacäimpa. Ayæ, Awëmö guite owoyömo wadäni adämai incädänimpa, ante pönëninque oncönë pö wäänë guite onongä incæte ædö cæte wii aquinänii. ²⁵ Edæ, Itota owocampa, ante do tededäni eñëninque wacä wäänä, Botö wengä onquiyængä inömo wënæ në wentamö ewocacä ingante ënem pocampa, ante wædinque Itota weca ponte ædæ wæænte apænecantapa. ²⁶ Itota eñëmi. Wënæ botö wengä tönö në quëwengä ingante wido cæquimi, angantapa. Mänii onquiyængä Tidopënitibæ në eñagaingä inte guidiego tededö në tedecä inongä. ²⁷ Adinque Itota, Wii oodea onquiyængä inongampa, ante wædinque angantapa.

—Wënanii cænguï inguënë waocä dicæ guintamöidi cænguï ante wææntodonguingäa. Bitö edæ wabi iñömite botö bitö beyæ ædö cæte cæquimoo.

²⁸ Äñongante,

—Awënë iñæmpa wëñænäni cænguï cæninque eyepodäni wæænte ænömengadæmpa inö öñöñö guintamöidi ade cæmpa.

²⁹ Ante apæneyongä Itota,

—Bitö nö apænedimi inte waa gocæbiimpa. Wënæ bitö wëñængä nänö wædö incæ dobæ edæ ëmö cæte wadæ gotimpa.

³⁰ Angä eñëninque oncönë go guite ayongä tömengä wëñængä önonganque bate möimoga onongä agacäimpa.

Babetamoncacä ingante Itota waa cæcampa

³¹ Mänii Tido gote quëwëninque Itota wadæ godinque Tidöo wodo pänta gocanque go Gadideapæ wedecä poncæ cædinque Decapodibæ yaatænque

pongantapa. ³² Gadideapæ wedeca pongä adinque wacä önömonca babetamoncacä inte önöne wapiticæ tedecä ingante Itota weca ænte pöningue, Gampo cæbi waa babaingampa. ³³ Äñönäni Itota babetamoncacä ingante nänéné ænte godinque önömonca pædæ guipomoncacantapa. Ayæ nämä önombo towæ tänompodinque wapiticæ tedecä ingante godö gampo cæguenewacantapa. ³⁴ Ayæ öönædē inö æmō adinque öö guemante äningue babetamoncacä ingante, “Epata,” äningue mönō tededö, “Önömonca wi æmoncabæwe,” angantapa.

³⁵ Äñongä edæ önömonca tee mömoncate bai ini wi ænete bai badinque önunguënēwa nīmæncæguenēwa gote bai cæguenēwadinque töö tedecantapa. ³⁶ Itota, Botö cæbo nē adimīni inte gode änämaī iedäni, äningue ancaa angä incæte nē adināni iñömō godōmenque nanguī gode ä gode ä cæte tededäni ³⁷ Eñente wædinque tömänäni nanguī guññenique, “Edæ önömonca babetamonca inināni inänite Itota cæcä ate önömonca eññenāni badänipa. Önöne babetade inināni inänite cæcä ate önöne tededäni badäni atamönipa. Tömää edæ waa cæcä ingampa,” ante nanguī tedete wægadänimpa.

8

4.000 ganca inäni inänite Itota godongä cænänipa (Máateo 15.32-39)

¹ Mäniñedē wadäni tæiyæ pöni inäni ponte eññönäni tömēnāni cænguī dæ ä adinque Itota tömengä miñæ nē godäni inänite aa pecä pönäni ate,

² —Inäni botö weca ongönäni iñömō mēönaa go adoönæque iñonte botö weca ongönönäni tömēnāni cænguī ömæpodäni badäni ate wædinque botö tömēnāni tönö godongämæ wæte bai nanguī pönemo imopa. ³ Cænämäi inte gue ænente wæyönänite botö, Oncönē goedäni, ämo gote bai tömēnāni edæ idömæ godinque tepæ gæwæningue edæ nangæ badinque bocæ bocæ cæte wæcædönänimpa. Edæ pancadäniya gobæ quēwente pönäni abopa.

⁴ Ante apæneçä eñente wædinque tömengä miñæ nē godäni wæætē,
—Inæmpa önömæca incæ päö impa æningue godömöni cænguñänipi.

⁵ Ante wæyönänite Itota,
—Päö æpodö nææmīni. Äñongante,
—Önombo æmæmpoque go mä mæ ongompa.

⁶ Ante apæneyönäni Itota godongämæ nanguī ongönäni inänite angä onguipoiya tæ contadänitapa. Ayæ päö önombo æmæmpoque go mä nāni nææñincoo pædæ godönäni æningue tömengä Wængonguī ingante, Bitö waa pönömi cæncæmönimpa, ante apænedinque pä æningue tömengä miñæ nē godäni inänite, Pædæ godö pædæ godö cæmīni cæncædänimpa, ante godongä æningue wadäni inänite godäni ænte cænänitapa. ⁷ Ayæ gæyæ mä pöni nææñänitapa. Mänii nāni nææni æningue Wængonguī ingante apænedinque adobai angä pædæ godö pædæ godö cædäni. ⁸ Äningue tömö pöni cænänitapa. Ayæ idæwaa cænäni ate tömēnāni pä ænte nāni cænte iñönöni ee öñoncoo wente æningue Itota miñæ nē godäni otodē pönö da wänitapa. Inique önombo æmæmpoque go mentodæa cænguī eyedæ contagatimpa. ⁹ Nē cænäni iñömō ongüññänique ante tee mampote coatodo miido ganca bai inäni inte ongönönänimpa. Inique cænäni ate Itota angä wadæ godänitapa. ¹⁰ Godäni ate Itotaidi do wipodē guī contate cæwodinque imæmäa pöningue Dadämänotabæ pongadänimpa.

*Mā cæte odömömi amönie, ante Paditeoidi änänipa
(Māateo 16.1-4; Odoco 12.54-56)*

¹¹ Itota pongä adinque Paditeoidi ponte bee tēninque tōmengä ingante, Æbänö cæbi, æbänö ämii, ante ancaa änänitapa. Ayæ, Mönö ämö ēñente tōmengä oða cæbaingampa, ante cædinque Itota ingante apænedinque, Bitö, Pöncædänimpa, ante öönædē mā cæi bai cæbi amönie. ¹² Änäni ēñēninque Itota, Ancaa änäni awædö, ante wæwente badinque öö öö ante guēmangantapa.

—İñæmpa ñöwomïni, Mā cæte odömömi adinque pönēmaimönipa, ante ancaa ämïni awædö. Näwangä ämo ēñēdäni. Nöwomïni imïnite mā cæte odömönämaï ingæimpa.

¹³ Ante äninque tōmēnäni inänite emö cæte godinque wipodē guiite æmæmäa taocæ cæte cæwodinque wadæ gocantapa.

*Wapiticæ apænedäni ēñēninque gomö aedäni, angampa
(Māateo 16.5-12)*

¹⁴ Mänii æmæmäa näni tao gocæ cæyedē tōmengä miñæ nē godäni guiquenē päö wii pönente ænämaï inte godäni ininque päö adoque pönï näni wēenēñedē ñönöninque wipodē öñompa. ¹⁵ Itota inömö mänii päö tōmēnäni näni ænämaï inö ante wii tededinque wadö ante pönente apænecantapa.

—Päö yedæ æmpoqui, ante Paditeoidi tönö Edode näni da wente cæi ate gomö aedäni. ¹⁶ Angä ēñente wædinque tōmengä nänö nē emiñænäni wæætē näni caboque tededinque, Päö ænte pönämaï inöimpa, ante Itota wabänö mänömaï beyæ ämaingampa.

¹⁷ Ante nämäneque tededäni wædinque Itota wæætē tōmēnäni inänite,

—Päö ænämaï inte mïni pöninö ante quimæ tedewemïni. Botö päö ante dicæ wæbogaa. Nanguï cæbo adimïni inte mïnitö ayæ ēñēnämaï imïnitawo. Edæ mïmö ömædēmïni inte tedewemïnipa, ante awædö. ¹⁸ Edæ awincaque adinque ayæ adämaï imïnitawoo. Önömoncaque ēñēninque ēñēnämaï imïnitawoo. Edæ botö æbänö cætabopa, ante adimïni inte edæ wii pönēmïnitawo. ¹⁹ Päö önompo æmæmpoque botö pä ænte godöni incæ tincö mïdo ganca inäni näni cænte ñönöni ee öñöñonte æpotodēnö cængui wente æmïni.

Äñongante,

—Önompo tipæmpoga go mentodæa.

²⁰ Ayæ päö önompo æmæmpoque go mæa guiquenē coatodo mïdo ganca inäni näni cænte ñönöni ee öñoncoo æpotodēnö cængui wente æmïni.

Äñongante,

—Önompo æmæmpoque go mentodæa.

²¹ Apænedäni ēñēninque tōmengä edæ,

—İñæmpa Tadoteoidi tönö Paditeoidi wapiticæ ante näni odömonte apænedö ante botö, Gomö aedäni, ante wææ ämopa, ante mïnitö ayæ ēñēnämaï imïnitawoo, angacäimpa.

Betaida inömö babetamongä ingante gampomongampa

²² Mäninö godinque Betaida inömö pönäni adinque wadäni babetamongä ingante Itota weca ænte pöninque, Gampomonguimi. ²³ Änäni ēñēninque Itota babetamongä önompo bæi öngonte föö æmænte tōmēnäni quewēñömö tao yabæque ænte mäocä gocantapa. Ayæ godö towæ tänömonte gampo cæmöninque, Pancaa tæcæ abi edæ, angantapa. ²⁴ Äñongä edæ tæcæ inæ æmonte,

—Awæ cægonte bai waodāni incæ cægōnāni abopa. ²⁵ Itota wæætē godō gampo cæmongā ate babetamongā īningā incæ nōwo cōwā adinque edæ waa bamōninque tōmāo edonque pōni acantapa. ²⁶ Īninque tōmengā ingante Itota,

—Īnōmō nāni quēwēñōmō yaatænque wadæ godinque tōmēmi oncōnē goe, angā gogacāimpa.

Bitō Codito ĩnōmi ĩmipa, ante Pegodo angampa

(Māateo 16.13-20; Odoca 9.18-21)

²⁷ Itota ĩnōmō tōmengā miñæ nē godāni tōnō wadæ godinque Tetadea Pidipobæ wædænque ĩnāni nāni quēwēñōmō wædænque ĩnāni nāni quēwēñōmō go go cædānitapa. Idōmæ godinque tōmengā nānō nē ēmiñænāni ĩnānite Itota angantapa.

—Wadāni botō ĩmotedō ante tededinque, Æbodō ĩmoo, ante apænedāni ēñēmīni.

²⁸ Āñongante,

—Bitō ĩmitedō ante apænedinque pancadāniya, Æpænē nē guidongaingā Wāo wodi incæ Itota adocā ĩmaingampa, ante tededānipa. Wadāni guiquēnē, Ediya wodi incæ Itota ĩnongā ĩmaingampa, ante apænedānipa. Wadāni guiquēnē, Wængonguī beyæ nē apænegaināni bai Itota ĩnōmō adocā ĩmaingampa, ante bitō ĩmitedō ante tededānipa, ānānitapa.

²⁹ Ante tōmengā miñæ nē godāni apænedāni ēñēninque Itota,

—Ayæ mīnitō guiquēnē, Æbodō ĩmoo, ante āmīni.

Āñongante Pegodo ĩnōmō,

—Bitō mōnō Codito ĩnōmi ĩmipa.

³⁰ Angā ēñēninque, Botō ĩmotedō ante, Codito ĩnongā ingampa, ante gode ānāmaī edæ pæ wēneedāni, āmpa, ante Itota wææ angacāimpa.

Itota, ĩmaī cædāni wæncæboimpa, ante apænegacampa

(Māateo 16.21-28; Odoca 9.22-27)

³¹ Ayæ māniñedē Itota tōmengā miñæ nē godāni ĩnānite ĩmaī ante mā odōmonte apænegacāimpa. Botō Waobo ēñagaīmo inte nanguī caate wæquēnēmo ĩmopa. Edæ nē aadāni nāni Picæncabo tōnō, Wængonguī quī, ante nē godōnāni nænænāni tōnō nē odōmōnāni tōnō mānināni ĩnōmō botō ĩmote Baa ānāni wæquēnēmo ĩmopa. Ayæ botō ĩmote godōmenque wænōnāni wæncæboimpa. Incæte botō do wænōnāni wænimo inte edæ mēōnaa go adoōnæque ĩñonte nāni ōmæmoncæboimpa. ³² Mānōmaī ante Itota edonque apænegantapa. Apænegā ēñēñōnāni Pegodo guiquēnē Itota ingante nānēnē māocā godinque, Quimæ wæncæ ānewēē, wææ ante tæcæ piincæ cæyongante, ³³ Itota edæ tōmengā miñæ nē godāni gāmænō dadi ēmænte adinque Pegodo ingante nāemæ pīlinque angantapa.

—Bitō Tatānabi bai ĩnōmi inte edæ botō weca ongōnāmaī wadæ gobæwe. Wīi Wængonguī nānō ānōnō ante pōnēmi inte bitō waodāninque nāni pōnēwēnonque ante pōnēninque mānōmaīnō ante tedebi awædō, angantapa.

³⁴ Ayæ tōmengā ēmiñænāni tōnō nanguī ongōnāni ĩnānite aa pecā pōnāni ate Itota tōmānāni ĩnānite apænedinque,

—Æcānō botō miñæ pōinēna ĩna tōmengā nāmā beyænque ante pōnēnāmaī inte botō miñæ tee empote poncæcāimpa. Nāmā nānō wænguīwæ ænte mongænte ponte bai cædinque tōmengā, Botō wænguīmo incæ caate wæbo incæ Itota ingante cōwē tee empote gocæboimpa, āninque poncæcāimpa.

³⁵ Edæ æcānō, Nāmā wææ gompodinque quēwæncæboimpa, ante cædinque botō miñæ pōnāmaī ingā guiquēnē tōmengā ĩnōmō edæ quēwēnāmaī

incæcāimpa. Wæætē edæ, Wænōnāni wæmo incæte botō Itota miñæ tee empote godinque tōmengā waa pōni nānō cægainō ante apænecæboimpa, ante æcānō cæda guiquēnē tōmengā edæ ayæ quēwencæcāimpa. ³⁶ Edæ waocā inguipoga ongoncoo tōmancoo o æncæte ante cædinque nāmā ōnōwoca incæ pædæ godongā wē womonte ba īninque edæ tōmengā nānō ōmæwocate wæquinque māincooque æmaingampa. ³⁷ Īnæmpa eyepæ godongampa diyæ ōnōwoca wæætē æmaingāā. ³⁸ Nōwodāni Wængonguī ingante pāmænte godinque nē ēñēnāmaī cædāni weca quēwēninque mīnitō ĩñōmō botō Waobo nē ēñagaīmo beyæ ante guingo imonte wæmīnitawo. Botō apænedō beyæ ante guingo imonte wæmīnitawo. Īnæmpa botō Mæmpo ñāō guinæ gongæñonte anquedoidi tæiyæ waemō emōnāni tōnō dibæ pōninque botō wæætē botō beyæ ante nē guingo imonte wædingā beyæ ante nāmæ guingo imonte wæcæboimpa.

9

¹ Mānōmaīnō āninque Itota godōmenque,

—Botō weca ongōmīni pancamīniya ĩñōmō īmaī ba acæmīnimpa, ante nāwangā āmopa. Mīnitō ayæ wænāmaī mīmīni quēwēñōmīni botō Wængonguī Awēnē Odeye ĩnōmo inte tæi pīñæninque Tæiyæ Awēnē babo acæmīnimpa, ante Itota apænecāimpa.

*Itota waemō pōni ñāō bai emongā bacā adānipa
(Māateo 17.1-13; Odoca 9.28-36)*

² Mānīnō ante apænecā ate Itota ĩñōmō ōnōmpo æmæmpoque go adoñæque ĩnque go ate Pegodo ingante Tantiago tōnō Wāō ĩnate mānimpodānique ĩnānīte ānanquidi mæicā adodānique æibæ æite ongongadānīmpa. Æite ongōñōnāni edæ Itota awinca tōmēnāni ayōnāni edæ wīi cōwē nānō emōnō bai waemō pōni ñāō bai edæ emongā bamongā adānitapa. ³ Tōmengā weocoo ñāō pōni nāmāenta weocoo ēñacā adinque tōmēnāni, Ædō cæte ĩncoo bai nāmāenta pōni yamonte cæquinānī, ante edæ wædānitapa. ⁴ Ayæ ayōnāni edæ doyedē pōni nē æigaina ĩñōmō Mōitee wodi tōnō Ēdiya wodi incæ Itota tōnō edæ godongāmæ pō gongæninque tedegōna adānitapa. ⁵ Adinque Pegodo guiquēnē Itota ingante,

—Awēnē nē Odōmōmi ēñēmi. ĩñōmō mōnō waa pōni ongonte awædō. Bitō āmi ĩninque mōnitō oncontaioco mentaiya go adotaique mænōninque bitō oncontai ante adotaique Mōitee oncontai ante adotaique Ēdiya oncontai ante adotaique mænōmaimōnīpa, angantapa.

⁶ Edæ Wāō tōnō Tantiago tōnō godongāmæ guīñente wædinque Pegodo, Æbānō ante tedequīmo, ante ēñēnāmaī inte mānīnō ante ōnonque tēdecantapa. ⁷ Ayæ edæ boguīmāmo ocabogadāni obo wææninque ganta owo ĩninque ōnōnepāmoque boguīmāmodē apænecantapa. “Īngā ĩñōmō botō Wengā botō nē waadecā ingampa cæmīnī. Tōmengā pōnō apænecā ate ēñēdāni,” ante apænecā ēñengadānīmpa. ⁸ Ēñēninque quingæ gomō gomō ayōnāni wada edæ do dæ goda ĩñōnate Itota adocanque ñōwo tōmēnāni weca ongongā agadānīmpa.

⁹ Ayæ ānanquidi ĩnō wææ pōñōnāni Itota tōmēnāni ĩnānīte angantapa. Mānīnō mīni adīnō ante mīnitō gode ānāmaī pæ wēneyōmīni botō Waobo ēñagaīmo inte edæ wænte ate ñāni ōmæmoncæboimpa. Ñāni ōmæmōmo ate mīnitō edæ māniñedē ate apænecæmīnīmpa. ¹⁰ Ante angā ēñēninque tōmēnāni gode ānāmaī pæ wēnedāni incæ nāmāneque, Mānīnō tōmengā nānō ñāni

ömæmonguimämo ante æbänö ante apænecää, ante wædönänimpa. ¹¹ Ìninqe Itota ingante,

—Mänömaï ì ìninqe, Ediya wodi täno poncæcäimpa, ante nê odömönäni ìnæmpa quïnante apænedänii.

¹² Æñönänite Itota wæætê,

—Ediya wodi näni änongå ìñömö täno pongä ingampa. Näwangä impa. Pöninqe tömengä, Doyedê ingaï bai ñowo wæætê adobaï nõ pönï bacæimpa, ante badongampa. Ìninqe dodäni Waocä nê êñaquingä ingantedö ante yewæmöninqe, Nanguï caate wæyongante wadäni pïninqe Baa ancædänimpa, ante quïnante yewæmongadänii, ante pönëmini. ¹³ Incæte botö iimainö ante apænebo êñeedäni. Nöwocä mönö Ediya ìnongä inte do pongäimpa ante aquenê. Tömengä pongä adinqe wadäni edæ dodäni näni yewæmongainö bai adobaï cædinque quiëmê ante näni cæinewenö ante do cædänipa, ante Itota tömengä tönö nê æidinäni ìnänite apænegacäimpa.

Itota wænæ ingante angä go ate wëñængä waa bacampa

(Mäteo 17.14-21; Odoca 9.37-43)

¹⁴ Itotaidi mänü wææninque tömengä nänö nê emiñænäni æidämaï ìnäni weca ponte ayönäni wadäni nanguï ìnäni goto gongænäni adänitapa. Nê æidämaï ìnäni tæcæguedê ongöñönänite nê wææ odömönäni guiquênê tömënäni tönö wæætê wæætê änäni adänitapa. ¹⁵ Itota do pongä adinqe edæ goto gongæninäni tömänäni guiñente wædinque wadæ pogodo ponte bee téninqe, Bitö pömi, änanitapa. ¹⁶ Æñönänite Itota,

—Tömënäni tönö quïnö ante apænedinqe wæætedö wæætê äminii.

¹⁷ Æñongante adocanque tæcæguedê ongongä inte wæætê apænedinqe,

—Awenê nê Odömömi êñëmi. Botö wengä wænæ babetadecä ingante êwocampa, ante wædinque botö tömengä ingante bitö weca ænte pontabopa.

¹⁸ Æyömömê ongöñongante wænæ pö guidinqe wëñængä ingante cöwê gotodongä tæ go wæængampa. Ìninqe wëñængä wodi mäwanta tadedinqe wentoquênê wentoquênê angadinque pæ opate bacampa. Mänömaï cæcä ate wædinque botö bitö miñæ nê godäni ìnänite, Wænæ inte wido cæedäni, ämo cæquênänäni incæ ædö cæte cæquïnänii.

¹⁹ Ante apæneyongä Itota tömënäni ìnänite,

—Nöwomïni mïni pönëegade. Botö mïnitö weca æpogadö quëwëmoï. Pönënämaï inte cæyömïnite botö æpogadö piyænê cæte wæwëmoï. Edæ wëñængä ingante botö weca ænte mämömïni pongædäni, angantapa.

²⁰ Ænte pönäni ate wænæ incæ Itota ingante adinqe do wëñængä ingante do do wäate bai cædinque wido cæcä tæ go wæængantapa. Ayæ mäwantabo tadedinqe бага wædinque wentoquênê angadinque edæ pæntæmæ pæntæmæ gocä. ²¹ Adinqe wæmpocä ingante Itota,

—Æyedönö mänömaï bacäi.

Æñongante,

—Wëñængäñedê do badingä inte quëwengampa. ²² Quëwëñongante wëñængä ingante wantæ wantæ ìñö wantæ wantæ ìñö, Gongapamö guitodömo gonte wæncæcäimpa, ante wænæ incæ cæcä. Ayæ, Æpænê adobaï guitodömo becadote wæncæcäimpa, ante cæcampa, ante cæcampa. Näwangä tæi pïñæmi ìninqe bitö mönatö wæwönö ante pönente cæbaïmipa. ²³ Æñongante,

—Bitö guiquênê wabänö wede pönëmi ìmitawoo. Edæ wede pönëñongante edæ waocä beyæ tömää do cæte impa.

²⁴ Angä êñente wædinque wæmpocä ìñömö yedæ äninque,

—Bitö imite pönemopa. Edæ botö æmæ pönönö ante bitö cæbi ate ædæmō wede pönente bacæboimpa, ante wæbopa.

²⁵ Ante āñongä nanguī ināni do pogodo pönāni ate wædinque Itota iñömō wænæ nē wentamō ɛwocacä ingante piinte āninque,

—Wēnæbi bitö, Babetamonca babetæ bacædānimpa, ante nē cæbi inōmi inte ñowo tao godinque wīi adodö guiiquimi incæbiimpa, angantapa.

²⁶ Ēñente wædinque nanguī Yæ yæ āninque wēñængä ingante wido cæcä do do wāate tæ go wææninque pæntæmæ pæntæmæ goyongante wænæ tao gocantapa. Gocä ate wēñængä do wæñināni bai õñongä ate wædinque pancadāniya, Æmæwo wæmaingampa, ante wædāni. ²⁷ Īninque Itota iñömō pædæ wææmpo õnompo bæi ongonte ængæ ganticantapa.

²⁸ Itota ayæ wadæ godinque oncönē pō guiyongante tōmengä nānō nē emiñænāni awēmō āninque,

—Mōnitö guiquēñē bitö bai wido cæcæte ante cædinque quinante wido cædāmai intamōnii.

²⁹ Ante wæyönānite,

—Wænæ māningä bai ingante wido cæcæte ante cædinque wantæpiyæ cænāmai inte Wængongui ingante nanguī apænete ate wido cæcæimpa, ante apæneccä ēñengadānimpa.

*Wænönāni wæncæboimpa, ante Itota adodö ante apæneccä
(Mäateo 17.22-23; Odoca 9.43-45)*

³⁰ Ayæ wadæ gote Gadideabæ wodo pænta godinque Itota, Wadāni adāmai iñönānite ³¹ botö emiñænāni adodānique ongõñönānite odömōnte apænebo ēñencædānimpa, ante cæcantapa. Ayæ tōmēñāni inānite iimainō ante awēmō apæneccantapa.

—Adocanque, Waocä nē ēñagaingä æyömönö ongongää, ante godö odömōninque botö imote waodāni nempo pædæ godongä æncædānimpa. Nē æñāni wæætē botö imote edæ wænönāni nāñe wæncæboimpa. Incæte mēönaa go adoönæque iñonte botö adobo incæ ñāni õmæmoncæboimpa.

³² Ante apæneyongante tōmengä emiñænāni õnõmoncaque ēñēninque ēñēñāmai ināni inte, Ēbānō ante tedebii, ante guiñente wædinque āñāmai pæ wēñegadānimpa.

*Æcänö ñæñængä inte nē angä inguingää, ante tededānipa
(Mäateo 18.1-5; Odoca 9.46-48)*

³³ Māñii godinque Capēnaömō iñömō ponte oncönē guidinque tōmēñāni inānite Itota,

—Idömæ pöninque æbānō ante tedemñitawo.

³⁴ Āñongante edæ, Mönö cabo incæ æcānonque ñæñængä pōñi inongä inte nē angä inguingää, ante tedewēñināni inte guingo imonte wædinque pæ wēñedānitapa. ³⁵ Īninque tæ contadinque Itota iñömō, Dote, nāni āincabo inānite, Pōedāni, angä pönāni ate,

—Yæcado ongömote, ante nē ānongä iñömō tōmengä wæætē yæmiñængä pōñi gote ongonte tōmāñāni beyæ nē godö cæcä bate waa tobaingampa.

³⁶ Āninque Itota wēñængä guiyangä ingante æninque tæcæguedē goncæte pæ māninque tōmēñāni inānite wæætē apæneccantapa.

³⁷ —Æcänö botö emōwo apænedinque māningä bai wēñængä ingante, Pōe, ante godö waa cæcä iñömō tōmengä iñömō edæ botö imote edæ do, Pōe, ante pönö waa cæcä ingampa. Ayæ edæ botö imote, Pōe, ante nē waa cæcä iñömō tōmengä iñömō wīi botö adoboque imote waa cæcä ingampa. Wæætē botö

imote nē da pönöningä ingante Wængongui ingante adobaï edæ, Pöe, ante do waa cæcampa, ante Itota apænecäïmpa.

Mönö imonte æcänö pünämaï ina mönö tönö cæcampa

(Mäteo 10.42; Odoco 9.49-50)

³⁸ Itota mänömaï apænecä ëñëñönanï Wäo guiquënë, —Awënë nē Odömömi ëñëmi. Wacä bitö ëmöwo apænedinque wënæidi inte wido cæcä atamönipa töö. Ayæ, Wii mönö cabo ingampa, ante adinque mönitö tömengä ingante Baa äninque, Cædämaï imäwe, antamönipa.

³⁹ Ante apæneyongante Itota wæætë,

—Ee amini cæcædäni. Edæ æcänö botö ëmöwo apænedinque öönædë nänï cæï bai mä cæda, tömengä ædö cæte botö imotedö ante do wënæ wënæ anguingää. ⁴⁰ Edæ mönö imonte æcänö pünämaï ina tömengä mönö cabo inongä inte bai mönö tönö godongämæ cæcä ingampa töö. ⁴¹ Näwangä ämopa. Bitö Codito nänö nē ëmiñænömi imi ænte bee, ante wacä minitö iminite æpæ adotacaque pönongä bemini ininque nē pönöningä wæætë tömengä nänö pönöniñö beyæ eyepæ æncæcäïmpa, angacäïmpa.

Wacä oda cæccæcäïmpa, ante nänï wæquinque cædänipa

(Mäteo 18.6-9; Odoco 17.1-2)

⁴² Mänömainö apænedinque Itota godömenque apænecantapa. “Wadäni godö cædäni beyæ botö imote nē pönënanï incæ pancadäniya edæ dobæ oda cæte wënæ wënæ cædänipa. Ininque, Wëñængä adocanque guiyangä pöni ingä incæ oda cædämaï incæcäïmpa, ante wææ cæcæte ante cædinque nē godö cæcæ cædingä ingante iïmaï cædäni ininque tömengä toquëngä imaingampa. Waodäni nänï dacæ godö dacæ godö cæquinca ñænænca æninque tömengä önömenca æ wëmencadinque tömengä ingante tæcætibæ wido cædäni ininque tömengä edæ, Wënæ wënæ cædämaï inte becadote wæmo beyænque Wængongui botö imote wii godömenque pangampa, ante wædinque waa toquëngä imaingampa. ⁴³ Bitö önompoca cædinque wënæ wënæ cæbi ininque bitö önompo aa wi æmpote bai wido cæte bai cædinque wënæ wënæ bitö cædinö ante wido cæbäwe. Inæmpa inguipoga quëwëninque æmæmpoque empobi incæte bitö cöwë bitö wænämaï quëwënguinque öönædë æibi waa imaimpa. Edæ wii tipæmpoga empobi inte edæ bitö gonga cöwë bæcote wæwënguiñömö wii æmæwo wido cæte wæquimido anguënë. ⁴⁴ Edæ mäniñömö tadömengadænguipo iñömö cængota wænämaï gonga ëmönämaï bæcoquino anguënë.”

⁴⁵ Ayæ, “Bitö önöwaca wapiticæ godinque ëñëñämaï cæbi ininque önöwa aa wi æwate bai wido cæte bai cædinque wënæ wënæ bitö cædinö ante wido cæbäwe. Inæmpa inguipoga quëwëninque æmæwæque ëwabi incæte bitö cöwë bitö wænämaï quëwënguinque öönædë æibi waa imaimpa. Edæ wii tipæmpoga ëwabi inte edæ bitö tadömengadænguipo wido cæte wæquimido anguënë. ⁴⁶ Edæ mäniñömö tadömengadænguipo iñömö cængota wænämaï gonga ëmönämaï bæcoquino anguënë.”

⁴⁷ “Ayæ ægodawate tæ go wæænte bai cædinque bitö awinca beyæ ëñëñämaï cæbi adinque bitö awinca cäi cæmonte bai cædinque wënæ wënæ bitö cædinö ante wido cæquimi, ämo. Edæ bitö, Botö tipæmonga ëmonte incæ tadömengadænguipo wii goinnte awädö, ante pönente wædinque edæ cäi cæmonte awinca æmæmonque ëmömi inte quëwëninque Wængongui Awënë Odeye weca æite waa tobaimpa. ⁴⁸ Edæ mäniñömö tadömengadænguipo iñömö cængota wænämaï gonga ëmönämaï bæcoquino anguënë,” ante Itota apænecantapa.

49 Ayæ godömenque apænedinque, “Wadäni, Ööingä ñömænämaï ingæimpa, ante cædinque cati ñænæ quimönique gongapamö æñö cæte biyadänipa. Waomini tömämini adobaï caate wædinque ædæmö biyate bai badinque ñömænämaï inguiminidö anguënë. 50 Cati quimonte cæi ññömö wæme inte gæpæ ðmopa. Incæte nongæmte ba adinque munitö wæætë æbänö nö cæmini wæætë gæpæ ðmonguï ï. Ööingä wæme bacæimpa, ante quimonte cæi wëä wëä pæmönäni bai cædinque munitö mini caipæ incæ piyænë cæte wacä ingä wacä ingä waa cæte quëwëedäni,” ante Itota ödömonte apæneçä ëñengadänimpa.

10

Nänöogængä ingante näni pämcænö ante (Mäteo 19.1-12; Odoca 16.18)

1 Mänii Capënaömö ongöinque wadæ tao iguidinque Oodeabæ ganca Oododänö æmæ wedeca pongantapa. Pongä adinque nanguï inäni wæætë pö pö cædäni adinque Itota cöwë nänö ödömöi bai adobaï ödömonte apæneçä ëñënanitapa. 2 Paditeoidi guiquënë, Godö ämö ëñëninque Itota adodeque oda cædete wæcä tocæi, ante cædinque tömengä weca pöninque, Itota ëñëmi, änanitapa. Wængonguï æbänö ante wææ angacäi. Waocä tömengä nänöogængä ingante pämcængä ïninque edæ nö cæte intawo.

3 Ante äñönäni tömengä wæætë,

—Möitee wodi æbänö ante yewæmöninque munitö iminite wææ angacäi.

4 Angä ëñëninque,

—Æmæwo pämcæmo goquïmi, ante yewæmöninque mäninta bitö yewæmöninta onquiyængä ingante godömi ængä ate bitö önonque pämcæncæbiimpa, ante Möitee wodi wææ ante yewæmongacäimpa.

5 Ante apænedäni ëñëninque Itota,

—Ïñæmpa, Mimö ömædëmini inömini inte munitö wënæ wënæ cæinëmini iminipa, ante wædinque Möitee wodi, Mänömaï cædäni, ante yewæmongacäimpa. 6 Edæ wëenëñedë Wængonguï nänö badongaiñedë tömengä, “Onguïængä ingampa, ayæ, Onquiyængä ingampa, ante badongacäimpa. 7 Mänömaï beyæ waocä mæmpocä ingante ëmö cædinque wäänä inante ëmö cæte godinque onquiyængä ingante, Botö nänöogængä, ante æmæwo mongä ate tömëna nänä gæncaya inöna inte möninque guëa quëwencædaimpa. 8 Ïninque æmæwo möninque tömëna nänä gæncaya incæ adocanque bai bate quëwencædaimpa,” ante Möitee wodi nänö yewæmongai bai cædinque tömëna nänä gæncaya do möninque nänënë inämaï adocanque bai do bacäimpa. 9 Mänömaï beyæ Wængonguï, Adocanque bai inapa, ante nänä gæncaya nänö në badongaïna ññönate waocä wæætë pango cædämaï incæcäimpa.

10 Angä wædinque Itota tönö oncönë guidinque tömengä miñæ në godänique, Æbänö ante ämitawo. Godömenque apænebi ëñëmönie. 11 Ante äñönänite Itota,

—Æcänö näwä nänöogængä ingante pämcëninque wacä onquiyængä ingante möna tömengä wiwa towengä do badinque näwä nänöogængä ingante wiwa cæcampa. 12 Onquiyængä guiquënë tömengä nänöogængä ingante pämcænte godinque wacä ingante godö mongä ïninque tömengä adobaï wiwa towengä bacampa, ante Itota apæneçä ëñengadänimpa.

*Wēñænāni inānite gampo cæcadinque waa apæñecampa
(Máateo 19.13-15; Odoca 18.15-17)*

¹³ Ayæ ate, Wēñænāni inānite Itota pönö gampo cæcadinque waadete apæñecæäimpa, ante cædinqwe wadāni tōmengä weca ænte pö ænte pö cædāni adinqwe tōmengä miñæ nē godāni guiquēñē, Ænte pönāmaï Iedāni, āninqwe Baa Baa ānāni. ¹⁴ Ate wædinque Itota ænguï badinqwe nē Baa ānönāni inānite wææ āninqwe,

–Wēñænāni inānite ee amīni poncædānimpa. Edæ mänināni nāni pönēñö bai adobai pönēñāni inte edæ Wængonguï Awēñē Odeye nempo do quēwēñāni inānipa. Ininqwe mīnitō iñömō wēñænāni inānite Baa ānāmaï Iedāni. ¹⁵ Edæ nāwangä apænebo eñēedāni. Wēñængä do pönengä inte Ao angä ingä bai Wængonguï Awēñē Odeye ingante do pönēninqwe nē Ao ānāni iñömō tōmēñāninqwe tōmengä nempo guidinque quēwēñānipa. Wadāni guiquēñē Wængonguï Awēñē Odeye ingante Baa ante pönēñāmaï ināni guiquēñē tōmēñāni ædō cæte tōmengä nempo guidinque quēwēngüñāni, ante Itota apænegacäimpa.

¹⁶ Äninqwe edæ wēñænāni inānite bæi ongonte pæ mäninqwe, Wængonguï mīnitō imīnite waadete pönö cæcæcäimpa, ante Itota gampo cæcacä gampo cæcadinque waa apænegacäimpa.

*Mäincoo nanguï ëacä Itota weca ponte apæñecampa
(Máateo 19.16-30; Odoca 18.18-30)*

¹⁷ Ayæ godōmenque gocæ cæyongä wacä edæ Itota weca pogodo ponte da guicapodinqwe,

–Awēñē nē waa Odömömi apænebi eñēmoe. Botö æbāñö cædinque cōwē wænāmaï wantæpiyæ quēwēmäimoo.

¹⁸ Äñongante Itota edæ,

–Wængonguï adocanque nē waa cæcä iñongante bitö botö imote, Nē waa cæbi imipa, ämii. ¹⁹ Imaï cæedāni, ante Wængonguï nāñö wææ angainö ante bitö tōmēmi do eñēmipa. “Wacä ingante godö wænönāmaï ie. Bitö nāñöogængä ināmaï iñongante godö guëa mōnāmaï ie. Wacä qui adinqwe awēmō æñāmaï ie. Wacä wēñæ wēñæ cæcä atabopa, ante godö babæ wapiticæ ānāmaï ie. Wacä qui æncæte ante cædinque babæ cædāmaï ie. Wæmpocä ingante wäänä inante waa adinqwe tōmēna inante godö waadete cæe,” ante wææ yewæmongacäimpa, ante bitö edæ do eñēmipa, angantapa.

²⁰ Ante apæñecä eñēninqwe nē āningä guiquēñē Itota ingante wæætē,

–Awēñē nē Odömömi eñēmi. Botö mäninö bitö āñö bai tōmāñö eñente cædinque pægaboï ae.

²¹ Apæñecä eñēninqwe Itota tōmengä ingante cōwä adinqwe waadete pönēninqwe,

–Adodeque ayæ eñente cæquēñēmi imipa, ante ämo eñēe. Öönædē bitö waëmoncoo ænguinque edæ ñöwo godinqwe imæca bitö mänincoo tōmancoo godonte æninqwe bitö æninta wæætē ömæpodāni inte wædāni inānite tōmanta godömi æncædānimpa. Ayæ edæ botö imote tee empote pöe.

²² Angä eñēninqwe, Botö mäincoo nanguï imipa, ante pönente wædinque nē ëacä iñömō nanguï wæwēninqwe wadæ gogacäimpa.

²³ Gocä adinqwe Itota godongämæ adinqwe tōmengä nāñö nē emiñænāni inānite,

–Wængonguï Awēñē Odeye nempo guiite quēwēncæte ante cædinque waodāni ömæpodāni inte botö miñæ pönānipa. Mäincoo nanguï ëacä guiquēñē æbāñö cæte ömæpocä inte botö miñæ ponte guiite quēwēngüñgää, angantapa.

²⁴ Ìnínque tòmengä mĩñæ nè godäni tòmengä nänö apænedö beyæ ante, Æbänö angää, ante guĩñente wæyönänite Itota wæætë,

–Botö wëmĩni ëñëedäni. Wængonguĩ Awënë Odeye nempo guiite quëwencæte ante cædinque ante waocä mäincoo mangä beyænque eyepæ cæcampa diyæ guiquingää. ²⁵ Edæ cämeyo guiyangä ingampa diyæ daagö guiyampite pædæ tacää. Ìnínque, cämeyo ñænængæ ìnongä inte pædæ tadämaĩ ingä bai nè ëcä adobai ingampa. Tömengä nämä ayongä ñænængä ìnongä inte edæ æbänö cæte Wængonguĩ Awënë Odeye nempo do wäänë guiite quëwenguingää.

²⁶ Ante apæneçä ëñëinque godömenque nanguĩ pönĩ guĩñente wædinque tömënanĩ nämæneque tededinque,

–Ìñæmpa mänömaĩ ì Ìnínque æcänö wäänë guiite quëwenguingää.

²⁷ Ante nämæneque tededäni ìnänite adinque Itota,

–Waomĩnique incæ nämä mĩni cædö beyænque ædö cæte quëwëmaimĩni. Wængonguĩ guiquënë wĩ wao bai cædongä inte nämä incæ tömänö do cæcä ingampa.

²⁸ Ante apæneçä ate Pegodo tòmengä ingante äninque,

–Mönitö ìñömö möni ëadincoo owæ caate bitö mĩñæ ömæpomöni pömöni ae.

²⁹ Tæcæ añongante Itota tömënanĩ ìnänite wæætë,

–Minitö botö beyæ ante pönëinque waa pönĩ botö apænebodö beyæ ante pönëinque pömĩnitapa. Ìnínque edæ botö ìmaĩ ante näwangä ämpa. Æcänö mäninö beyæ tòmengä oncodo taodinque tòmengä tönĩñadäni ìnänite ëmö cædinque mæmpocä tönö wäänä ìnante ëmö cæte wëñænäni ìnänite ëmö cæte godinque tòmengä göneacoo ëmö cæte owæ caate godinque botö mĩñæ æcänö wadæ pöna ìñömö, ³⁰ tòmengä ìñömö inguipoga quëwëincoo wëënë nänö ëadincoo bai adopocoo æninque godömenque adopo adopo tiëë ganca mänimpoga adopo æncæcäimpa. Ayæ onconcoo æninque tòmengä tönĩñadäni tòmengä badäidi tòmengä wëñænäni tiëë ganca bai yebænäni bai æninque, tòmengä göneacoo wæætë bacoo æncæcäimpa. Incæte tòmengä ingante togænte pancædänimpa. Ìncayæ pömämo bayonte botö, Bitö quëwengüimämo, ante godömo æninque tòmengä cöwë wantæpiyæ wænämäi quëwencæcäimpa.

³¹ Incæte edæ täno yæcado ongöninäni inte pancadäniya wæætë yæmĩñæ gote ongönäni bacædänimpa. Ayæ yæmĩñæ ongöninäni inte wæætë yæcado ponte ongönäni bacædänimpa, ante Itota apænegacäimpa.

Wænceboimpa, ante Itota wæætë adodö ante apæneçampa

(Máateo 20.17-19; Odoca 18.31-34)

³² Mänĩ Eedotadëe ante ñöwo änämænë æiyönäni Itota incæ täno beyænte æicä. Ate wædinque tòmengä ëmĩñænäni guiquënë, Tömengä nänö wænguinque täno æicampa, ante wæyönäni ayæ pönäni guiquënë guĩñente wædönänimpa. Itota ìñömö tòmengä mĩñæ, Dote, ante nani gocabo ìnänite nänënë ænte mäocä goyönäni tòmengä, Botö ìmote ìmaĩ cædäni bacæboimpa, ante edonque apæneçantapa. ³³ Æñëñönänite, “Ñöwo ìñömö mönö edæ Eedotadëe ìñömö æicæimpa. Mänĩñömö æi pö gongæmö ate adocanque, Waocä nè ëñagaingä æyömönö ongongää, ante godö odömongä bæi ongonguinanĩ. Ayæ, Wængonguĩ quĩ, ante nè godönäni ñænænäni tönö nè odömonäni nempo tòmengä botö ìmote pædæ godongä tömënanĩ wæætë botö ìmote apæntë äninque, Cöwë wæncæcäimpa, äninque oodeoidi ìnämäi ìnani ìnänite wæætë pædæ mäo godönäni. ³⁴ Æninque ìnänĩ wæætë botö ìmotedö ante badete todinque botonga tawimæ towæ tänongadinque æmontaimenca

tæi tæi pânâni ämogate wæyömote botö imote godömenque wænönâni wæncæboimpa. Wæætê do wænîmo inte botö meönaa go adoönæque iñonte ñâni ömæmoncæboimpa,” ante Itota wæætê apænecäimpa.

*Tantiago tönö Wäö, Mönatö ämai cæe, ante wædapa
(Máateo 20.20-28)*

³⁵ Ayæ Tebedeo wëna Tantiago tönö Wäö iñömö Itota weca pöninge,
—Awënë nè Odömömi ëñëmi. Mönatö quiëmê ämöna cæbi waa tobaïmönapa,

³⁶ Äna ëñëninge,
—Mînatö beyæ quînö cæbo æmîna.

³⁷ Äñongante,
—Awënë inömi inte bitö ñäö ëmömämöde tæ contadîngue mönatö imönate iïmai cæcæbiimpa, ante ämönapa. Adocanque bitö tömëmæmi inö adocanque dipæmæmi inö ämi tæ contaquïmöna.

³⁸ Ante äna ëñente wædîngue Itota wæætê,
—Iñæmpa mînatö ëñënämai inte mänömai ämîna awædö. Edæ botö nantate wæwenguïmæ bai becabo bai mînatö edæ adobai adotaca becate bai Ao ante botö beyæ nantate wæwenguïmînaa. Ayæ botö wænguïmämo ante mînatö adopænê guuite bai adobai Ao ante botö beyæ guïñënämai inte wænguïmînaa.

³⁹ Ante äñongante,
—Ao ante guïñënämai cæcæmönaimpa.

Ante apæneyöñate Itota,
—Botö nanguï caate wæwëmo bai mînatö adotaca becate bai äanque bai caate wæquïmîna imînapa. Botö wænguïmämo ante mînatö adopænê guuite bai adobai wænguïmîna imînapa. Näwangä impa. ⁴⁰ Incæte botö tömëmæmo inö botö dipæmæmo inö æcänö tæ contaquïna, ante wîi botö godö ämo imopa. Wæætê, Awënë contaimpaa mänînaque tæ contaquïna, ante do badongaingä inte Mæmpo Wængonguï iñömö tömengä adocanque godö angä contacädaimpa, ante Itota apænecäimpa.

⁴¹ Mänömainö ante tededapa töö, ante ëñëninge wadâni diete ganca tömengä mîñæ nè godâni guiquënë Tantiago tönö Wäö inate pîinânitapa. ⁴² Pîinâni ate wædîngue Itota aa pecä pönâni ate tömënâni inânite wæætê apænecantapa.

—Mînitö, Oodeoidi inämai inâni æbänö cædânipa, ante do ëñëmînipa. Tömënâni nâni, Awënëidi, ante nè äñönâni iñömö nämä beyænque ante cædîngue nanguï plînte äñâni wædîngue awënëidi nempo quëwënâni incæ wæætê do ëñente cædânipa. Ayæ tömënâni weca nè ñænænâni inönâni iñömö, Tömëmöque ämo ëñente cædâni, ante plînte äñâni wædânipa. ⁴³ Mînitö guiquënë tömënâni nämä beyænque ante nanguï äñâni bai wîi adobai cæquëñëmîni imînipa. Wæætê mîni cabo iñöminî adocanque ñænængä pöñi ingä bacæte ante cædîngue tömengä täno edæ mînitö beyæ nè cæcä baquëñengä ingampa. ⁴⁴ Ayæ yæcado ongöïñente wæcä iñömö tömengä yæcado ongoncæte ante cædîngue wæætê edæ yæmîñæ pöñi gote tömânâni beyæ nè cæcä badîngue tömengä nämä beyæ ante cædämai inguëñengä ingampa. ⁴⁵ Edæ Waobo ëñagaïmo inte adobai, Botö beyæ pönö cæcædânimpa, ante wîi pömo imopa. Wæætê wadâni beyæ godö cæcæte ante pömoimpa. Ayæ edæ nanguï inâni tee mönete bai wæwëñönâni botö wæætê, Tömënâni wibænete tadîngue quëwencædânimpa, ante tömëmö wepæ incæ godoncæte ante pömo imopa, ante Itota apænecäimpa.

*Batîmeo babetamongä ingante Itota angä waa bamongä
(Máateo 20.29-34; Odoca 18.35-43)*

46 Itota mäninö godinque Eedicoo nāni quēwēñōmō pongadānimpa. Tömengā nānō nē ēmīñænāni tōnō tæiyænāni tōnō Eedicoo iñōmō wodo pænta tayōnāni wacā babetamongā Timeo wodi wē Batimeo iñōmō taadō wedeca, Pönōmi æmoe, ante ānecōnongāimpa. 47 Iñinque wadāni, Itota Nāatadeta pædingā inte pongampa, ante tededāni ēñēninque tōmengā ogæ tedete, —Itota ēñēmi. Awēnē Dabii wodi pæimi iñōmi inte botō wædō ante pōnente cæe.

48 Ante tæcæ āñongante godongāmæ godāni pancadāniya, Apocænē inguēnē quēwēe, ante ānāni incæte tōmengā godōmenque yedæ aa pedinque, —Awēnē Dabii wodi pæimi iñōmi inte botō wædō ante pōnente cæe.

49 Äninque ancaa aa pecā ēñēninque Itota næ gongæninque, —Babetamongā ingante aa pemīni pongædāni.

Angā ēñēninque babetamongā ingante,

—Ængæ gantidinke wædāmaī imāwe. Bitō imite, Pōe, angā apa quēwēe.

50 Änāni ēñēninque babetamongā incæ ayacooga gāni tadongate do ængæ gantidinke Itota weca pongā. 51 Adinque,

—Bitō beyæ quīnō cæquimoo.

Äñongante babetamongā,

—Awēnē nē Odōmōmi ēñēmi. Cæbi waa bamonte aboe.

52 Angā ēñēninque Itota,

—Waa bitō bamonguinque botō imote pōnemitapa. Önonque wadæ gobāwe.

Äñongante tōmengā do waa bamonte adinque Itota miñæ taadonque gogacāimpa.

11

Itota Eedotadēe iñōmō pongampa

(Máateo 21.1-11; Odoca 19.28-40; Wäo 12.12-19)

1 Mānīi gote Eedotadēe obo pōninque Odibowænquidi nāni anquidi ontacamō goinō Betapagūee nāni quēwēñōmō ganca ayæ Betānia nāni quēwēñōmō ganca pōñōnāni Itota tōmengā miñæ nē goda inate mēnaa inate da godōninque angantapa. 2 Imāi angantapa.

—Mānīi nāni quēwēñōmō ongō amīna. Tōmēñōmō go guite ayōmīna bodo wē picængā incæ waocā ingante mongænāmaī iningā inte nāni ñæingā a ongonā cæmīnaimpa. Adinque ñi cæyænte ænte pōeda. 3 Wacā, Quīnante ñi cæyæmīnaa, ante wææ angā ēñēninque mīnatō wæætē edæ, Mōnō Awēnē nānō ænguēñēnō ante ænte gomōnapa. Tōmengā iinke cæte ate adodō do da pōnongā æedāni, ante äeda.

4 Angā ēñēnte gote ayōna bodo wē taadō wedeca odemō awāa ñānō ñæ a ongō adinque ñi cæyænte ænte gocæte ante cæda.

5 Adinque māñiñōmō ongōnāni guiquēnē,

—Bodo wē quimæ ñi cæyæwēmīnaa.

6 Äñōnānīte Itota nānō āninō adodō āna ēñēninque, Ao ānāni. 7 Äñēninque ñi cæyænte Itota weca tōi tōi ænte pōnatapa. Ænte pōninque tōmēna weocoo yabæcooque æidāmæ wo cæyabæda ate Itota wæñōmēnæca inō æi yiyæ tæ contactantapa. 8 Adinque nangui ināni, Itota nānō ponguinō, ante tōmēnāni weocoo yabæcooque pōnō bee podōwāñāni wadāni guiquēnē gōnea gote yæpæma öñabo tapænte māmō bee bee podōwadāni ate tōmengā podōwāinonque gocantapa. 9 Gocā adinque tāno godāni tōnō ayæ pōnāni tōnō nangui ināni godongāmæ godinque yedæ āninque,

—Möni quëwenguinque impa, ante, Badogaa, ante tomönpa. Awënë Wængonguï ëmowo beyænque pömi ïninqe bitö toquinque edæ Wængonguï bitö ïmite waa cæcæcäimpa. ¹⁰ Mönö mæmæ Dabii wodi pæïmi ïnömi ïmpa, ante adinqe mönitö, Awënë odeye Dabii wodi nempo nani waa quëwengäi bai bitö nempo mönitö waa quëwenguinque impa. ïninqe, Badogaa, ante yedæ añömöni æibæ pöni quëwënëni incæ, Badogaa, ancædänimpa.

¹¹ Ante yedæ añönäni Itota Eedotadëë pö ti wææninque Wængonguï oncö ñænæncönë yabæcönë pö guiidinqe mäniñömö ongoncoo tömäã acantapa. Ayæ, Gäwadecæ pöni ba awædö, ante tömengä ëmiñænäni dote ganca ïnani tönö wadæ tao Betänia gogacäimpa.

Iigowæ ömæcawæ i adinqe Itota pïngampa
(Máateo 21.18-19)

¹² Gote Betänia monte baönæ pöñönäni Itota gæwænte wædinque, ¹³ Quïnö impa cænguimoo, ante gomö ayongä iigowæ öñabo ëmæ incæ incate bocabäimpa, ante gote ayongä ömæcawæ acantapa. Önönepoque i beyæ incadämaï intapa. ¹⁴ Ante iigowæ inte apænedinque,

—Iigowæ ëñëmi. Incaquinämaï inte bitö incaquïmi cænguïnäni.

Añongante tömengä nänö në ëmiñænäni edæ ëñëe gongæñänimpa.

Wængonguï oncö tæiyæ waëmö bacæimpa, ante cæcä
(Máateo 21.12-17; Odoca 19.45-48; Wäö 2.13-22)

¹⁵ Do nani ponguënö Eedotadëë pönänitapa. Itota ïñömö Wængonguï oncö ñænæncönë yabæcönë pö guiidinqe mäniñömö mäincoo mänäni tönö wadäni godonte æncæte ante godongämæ pönäni tönö ongönäni adinqe tömäñäni ïnänite, Oncodo tao goedäni, ante da tadongä tao godänitapa. Ayæ campio ante nani godonte æimpa tönö equemö godoncæte ante në mänäni nani cönöimpa tönö bæ tacä tömampaa guidömëmæ tæ go wææntapa. ¹⁶ Ayæ wadäni mäincoo mongænte yacönenque gocæte ante cæyönänite Itota, ïncodo mongænte godämaï ïedäni, äninque wææ cæcantapa. ¹⁷ Ayæ tömënäni ïnänite angantapa.

—Wængonguï beyæ ïmaïnö ante yewæmongatimpa. “Tömämæ quëwënëni botö oncönë pö guiidinqe botö ïmote apænecädänimpa,” ante Wængonguï angä incæte mïnitö wënæ wënæ cæmïni beyænque Wængonguï oncö incæ në awëmö ö ænäni nani womöincönë bai wentamö bapa töö.

¹⁸ Ante odömonte apæneyongante, Wængonguï quï, ante në godönäni ñænænäni tönö në wææ ante odömönäni tönö ëñëe gönänitapa. Wadäni önönänique guiquënë, Itota quïante waa pöni apæncä ëñëmönii, ante wädäni. Adinqe awënëidi wæætë, Itota beyænque pïñäni wæcæ wæ, ante pönëninque Itota ingante guïñente wædinque, Quïnö cæmö wæmaingäã, ante wænoncæte ante pönente cægadänimpa. ¹⁹ Gäwadecæ bayonte Itotaidi ïñömö oncodo tao godinqe godömenque yabæque tao gogadänimpa.

Iigowæ ömæcawæ do guïñë wæ adänpa
(Máateo 21.20-22)

²⁰ Baänæ ate ïimö nani pöninö adodö ponte ayönäni iigowæ yæwaguinto ætæwowate tömëwæ æi ayawæ edæ dobæ guingo iwate wænimpa, ante adänitapa. ²¹ Adinqe Pegodo, Itota ïmö nänö äni bai impa, ante pönëninque, —Awënë në Odömömi cöwä ae. Bitö pïinte äniwæ inte iigowæ edæ dobæ guïñë wæ ataque.

²² Añongante tömënäni ïnänite Itota wæætë,

—Wængonguī ingante wede pönemæwedāni, angantapa. ²³ Ī ānanquidi ĩñōmō ongō ĩñonte waocā, “Ānanquidi ēñēmi, āningue, Bitō cabænte wo gote gāwapænē guie,” angā ēñēningue ānanquidi tōmē gāwapæno do wo gote guiquī ĩ, ante pönēmīnitawo. Edæ nāwangā ante mīnitō ĩmīnite apænebopa. Æcāmenque incæ edæ æmæ pönēnāmaī inte, Botō ānō baī do bacæimpa, ante wede pönēningue āna ĩningue tōmengā nānō āninō baī do æmaingampa. ²⁴ Mānōmaī beyæ botō mīnitō ĩmīnite apænebopa. Mīnitō quīēmē incæ ante Wængonguī ingante apænedinque, Tōmengā nāwangā pönongā æncæboimpa, ante wede pönente apænemīni ĩningue mīnitō āninō tōmānō edæ do æncæmīnimpa.

²⁵ Ayæ edæ, “Mīnitō, Wīwa cæbo incæte Wængonguī oönædē nē quēwēnongā inte botō ĩmote pönō ĩmpo cæcā ĩningue botō waa tobaīmopa, ante wæmīnitawo. Īñæmpa, Wængonguī mānōmaīnō cæcæcāimpa, ante cædinque mīnitō tōmengā ingante apæncæte ante ongōningue tāno piyænē cæte cæedāni. Wacā wænæ wænæ cæcā wædōmīni inte mīnitō wæætē tōmengā ingante pönō ĩmpo cæedāni, ante Itota apænegacāimpa. ²⁶ Wæætē edæ mīnitō pönō ĩmpo cædāmaī ĩmīni ĩningue mīnitō wænæ wænæ cædinō ante mīnitō Mæmpo oönædē nē quēwengā ĩnongā inte tōmengā adobaī ĩmpo cædāmaī ĩmaingampa,” ante Itota apænegacāimpa.

*Awēnē ĩmīpa, ante æcānō ānaī, ante Itota ingante ānānīpa
(Māateo 21.23-27; Odoca 20.1-8)*

²⁷ Eedotadēē ĩñōmō adodō pönānitapa. Itota Wængonguī oncō ñænæncōnē yabæcōnē go guite cægōnongā, Wængonguī quī, ante nē godōnāni ñænænāni tōnō nē wææ ante odōmōnāni tōnō nē aadāni nāni Picæncabo, nāni ānāni tōnō tōmengā weca ponte ānānitapa. ²⁸ Tōmengā ingante,

—Æcānō nē angā inte bitō ĩmite angā cæbii, ānānitapa. Æcānō bitō ĩmite, Nē āmi ĩmīpa, pönō āna æningue bitō nē āmi inte baī edæ mānōmaī cæbii. ²⁹ Ante wæyōnānite Itota nāēmæ āningue,

—Botō mīnitō ānō baī adodeque āmo ēñēningue mīnitō wæætē apænemīni ēñēmoedāni. Apænemīni ēñente ate, Botō cædinō ante æcānō nē angā inte pönō āna æningue cæboī, ante botō wæætē apænebo ēñēmaīmīnīpa.

³⁰ Wāō wodi ingante æcānō, Æpænē guidonguīmi, āna ēñēningue tōmengā wæætē guidongāī, ante pönēmīni. Edæ Wængonguī angā ēñente cæcantawoo. Wæætē waodānique ānāni ēñente cæcantawoo. Æcānō Wāō ingante ānaa, ante apænemīni ēñēmoedāni. ³¹ Angā ēñente wædinque tōmēnāni, Æbānō anguīī, ante wæætedō wæætē nāmāneque tededinque, “Wængonguī angā ēñente Wāō guidongantapa, ante āmo baī Itota wæætē mōnō ĩmote, ‘Quīnante Wāō ingante pönēnāmaī ĩmīnitapa,’ ancædongāimpa. ³² Ante pōnente wædinque wæætē, Wængonguī beyæ nē apæncā Wāō wodi ĩnongāimpa, ante tōmānāni pönēnānīpa. Ante pōnēningue awēnēidi wæætē, Waodānique ānāni ēñente Wāō guidongantapa,” ante mōnō ædō cæte anguīī. Edæ pīnāni wæcæ wæ. ³³ Ante guīñente wædinque Itota ingante edæ,

—Wa. Ēñēnāmaī ĩmōnīpa.

Ante wæyōnānite Itota wæætē,

—Īningue edæ, Æcānō nē angā inte pönō āna æningue botō cæboī, ante mīnitō ānō ante botō adobaī apænedāmaī incæboimpa, ante angacāimpa.

12

Nē aadāni inguēnēnāni incæ wīwa cædānīpa, ante (Máateo 21.33-46; Odoca 20.9-19)

¹ Ayæ māniñedē Itota, Wængonguī æbānō cæcāā, ante ēñencædānīpa, ante īmaca quēwēnāni nāni cæinō ante odōmōninque īīmaī apænecantapa. “Waočā yowementacodē mīninque wææ da da māo da caadīnque, Tōmēmōncō ænte pinā pinā gāwate tōmēmæ ontatodē wæ yopænte æñōmō, ante ææ wote badongā. Ayæ yowementacodē awēmō guīidāmaī incædānīpa, ante æi wænōmēnæca gomō aqūiñmō mænongā. Ate wabæca gocæ cædinque wadāni ōmæ wite nē aadāni īnānite, Botō yowementacodē incæ ōmæ wite aaedāni, angantapa. Aayōmīnite botō, Mīnitō qui, ante pancamonga pōnōmo æncæmīnīpa, angā Ao āñōnāni wadæ gocantapa.”

² “Ayæ yowedepo bayonte tōmengā ingante nē cæcā ingante apænedīnque, Bitō yowementacodē nē aadāni weca godīnque pancamonga āmi ænīnque botō weca wæætē māmōmi æmoe, angā gocantapa. ³ Angā godīnque pongā adīnque yowementacodē nē aadāni guīquēnē nē æncæ pōningā ingante bæi ongonte tæi tæi pānīnque ōmæpocā da tadōnāni gocantapa. ⁴ Adīnque nē ēacā īñōmō wacā ingante tōmengā ingante nē cæcā ingante angā gote pongā adīnque yowementacodē nē aadāni adobai tæi tacadāni wæyongante, Guingo imonte wæcæcāīmpa, ante tōmengā ingante godō wīwa cædānīpa. ⁵ Ayæ wæætē nē ēacā wacā ingante da godongā godīnque yowementacodē pongā adīnque nē aadāni wæætē tōmengā ingante wænōnāni wængantapa. Ayæ wæætē nanguī īnāni īnānite da godongā pōnāni adīnque pancadāniya īnānite tæi tæi pānīnque pancadāniya īnānite wænōnāni wænānīta.”

⁶ “Adocanque pōni nē ēacā weca ongōnongāīmpa. Māningā īñōmō nē ēacā wengā onguīñængā īñongante nē ēacā tōmengā ingante nanguī waedōngāīmpa. Īnīnque nē ēacā īñōmō, ‘Tōmēmō wengā ingante da godōmo gocā adīnque tōmēnāni guīñente wædinque ee abaiñānīpa,’ ante pōnēnīnque tōmengā ingante da godongā tōmangā pōni gocantapa. ⁷ Gote dicæ pongā adīnque tōmēnāni, ‘Tōmengā ingampa. Wæmpocā māincoo īni edæ īngā īñōmō nē ænguīngā ingampa cæmōō. Mōnō edæ māo wænōmō wængā ate edæ mōnō qui babaiīmpa.’ ⁸ Ānewēnīnque tōmēnāni nē ēacā wengā ingante edæ bæi ongonte wænōnīnque tōmengā baō īni yowementacodē wææ cæte yabæque edæ, Ōmæ, ante wido cædānīpa. Mānīnque apænebopa.”

⁹ Ante tededinque Itota apænecāīmpa. Ayæ māniñē nē āniñāni īnānite wæætē īīmaī angantapa. “Īnīnque yowementacodē nē aaquēnēnāni īnānite nē ēacā æbānō cæquīngāā, ante pōnēmīni. Tōmengā edæ, Ōmæ, ante do pōnīnque nē aaquēnēnāni īnānite godō wænōnīnque wadāni īnānite yowementacodē godongā ænīnque aacædānīpa.”

¹⁰ Ānīnque Itota, “Mīnitō guīquēnē dodāni nāni yewæmongainta adāmaī inte botō īmote āmīnitawo. Edæ īīmaīnō ante Wængonguī angā ēñente yewæmongadānīpa.

‘Dīca ænte adīnque, Wēnæ wēnæ inca, ante nē mænōnāni nāni wido cædinca incæ

gomonga waēmōnca inca īnīnque tāno nāni ñōnōnīnca bæbængapa do bacapa.

¹¹ Wængonguī Awēnē incæ māñōmaī cæcā adīnque mōnō waocabo guīñente wædinque waa amōmpa,’ Ante yewæmōnte ī abaiīmīnīpa.”

¹² Māñōmaī apænecā ēñente wædinque awēnēidi wæætē, Īñæmpa nē aaquēnēnāni nāni cæinō ante odōmōnte apænedīnque Itota mōnō imonte

plinte angä awædö, ante pönëninque tömengä ingante bæi ongoncæ cædänitapa. Incæte, Wadäni pünäni wæcæ wæ, ante wædinque ee adinque bæi ongonämaï inte tömënäni edæ wadæ gogadänimpa.

Tæiyæ Awënë nänö äintamö ante tededänipa

(Mäateo 22.15-22; Odoca 20.20-26)

¹³ Mänü awënëidi incæ ayæ ate Paditeoidi pancadäniya tönö Edodeidi pancadäniya inänite da godöninque, Minitö gote Itota ingante äñömïni wabänö tömengä nänö pante wæquinque adodeque wapiticæ bai tedebaingampa.

¹⁴ Änäni ëñëninque Itota weca wadæ pöninque,

–Awënë nê Odömömi ëñëmi. Bitö nö pönente cæbi imipa, ante do ëñëmönipa. Ayæ bitö ayömi mönitö tömämöni önömönique bai imöni adinque bitö inñömö, Wadäni æbänö angünänii, ante ayæ, Äbänö cæquinänii, ante wædämaï imi inte Wængonguï taadö ante bitö guññänämaï inte nö odömönte apænebipa. Ininque apænebi ëñëmönie. Odömäno gobiedöno beyæ ante tæiyæ awënë Tetædo tiguitamö nänö änantamö ante æbänö wææ yewæmonte i, ante ëñencæte ante wæmönipa.

¹⁵ Godonte edæ waa cæte intawo. Wæætë wënæ wënæ cæte intawo. Ante äñönänite Itota inñömö, Waa cæte bai tedewënanipa, ante do ëñente wædingä inte tömënäni inänite,

–Botö imotedö ante cædinque, Äbänö cæmö ate oda cæquiringä, ante quïnante cæminii. Deënadio tiguitamö ænte pömini aboedäni.

¹⁶ Angä ëñente ænte pönäni adinque,

–Æcänö awinca bai yewæmonte badonte i. Æcänö ëmöwo ante yewæmonte i.

Ante äñongante,

–Awënë Tetædo awinca bai yewæmonte badonte impa. Adocä ëmöwo ante yewæmonte ongö amönipa.

¹⁷ Ante apænedäni ëñëninque Itota tömënäni inänite,

–Awënë Tetædo qui i ininque edæ Tetædo ingante godongæimpa. Wæætë Awënë Wængonguï qui i ininque Wængonguï ingante godonguï i apa änewëmïni.

Angä ëñëninque tömënäni, Æ, nö pönï ante apæncampa, ante tömengä ingante waa adinque guññente wægadänimpa.

Ædö cæte nänö ömæmonguï, ante wædänipa

(Mäateo 22.23-33; Odoca 20.27-40)

¹⁸ Ayæ Tadoteoidi nê, Waocä wæninque nänö ömæmönämaï æmæwo wængampa, ante nê änewënäni inte Itota weca pöninque, Möni änö ante ämi ëñëmaïmönipa, äninque,

¹⁹ –Awënë nê Odömömi ëñëmi. Möitee wodi mönö beyæ ante wææ yewæmöninque iïmaï ante yewæmongacäimpa. Waocä möninque wëñæ tapæidämaï inte wængä ate tömengä tönññacä wæætë owæmpoingä ingante möninque wëñæ tapæidinque, Botö tönññacä wodi wengä ingampa, ante pæpogacäimpa, ante yewæmongacäimpa.

²⁰ “Ininque wadäni iïmaï cædänitapa, ante apænemöni ëñëe. Edæ önonpo æmæmpoque go mengäa nänö caipæ inñönänite bamoncadengä möninque wëñæ tapæidämaï manguiwëninque edæ näñe wængä. ²¹ Wængä ininque wææ ayæmengä adocä ingante möninque wëñæ tapæidämaï näñe wængä. Ayæ wææ wacä adobai wëñæ tapæidämaï näñe. ²² Ayæ wææ wëñæ tapæidämaï näñe, ayæ wææ wëñæ tapæidämaï näñe, ayæ wææ wëñæ tapæidämaï näñe, ayæ wææ ayæmengä pönï adocä ingante möninque wëñæ tapæidämaï näñe wængantapa. Onquiyængä quiquënë ancaa owæmpote wædinque tömengä

põni nãñe wængantapa. ²³ Ìninqe, Mönö ñãni òmæmonguïönæ, ante ñini äönæ ññonte mãningã owæmpoingã ññömö æcãnö nãnöogængã baquingãã. Edæ tõmengã ingante ññömö edæ tõmãnãni manguiwengadãnimpa.”

²⁴ Æññõnãnite Itota wæætë,

—Minitö ññæmpa. Wængonguï angã ëññente ñãni yewæmõinta adãmai inte baiãmïni awædö. Wængonguï adocanque tæi piñængã inte edæ tõmãã cæcampa, ante pönënamãi inte edæ oda cæte æmïni awædö. ²⁵ Edæ Wængonguï anquedoidi öönæde cöwë owodãni bai ññönãni inte waodãni ñãni òmæmõningue godö ññönãmãi mõnãmãi inguïnãnidö anguënë. ²⁶ Wæætë do wængainãni ñãni ñãni òmæmonguïnö ante Mõitee wodi ocãñequiya ante yewæmõningue adotaa æbãnö yewæmongacãi, ante minitö adãmai inte æmïni awædö. Edæ Mõitee wodi ingante Wængonguï ññãmã angacãimpa. “Botö ññömö Abadãö Wængonguïmo ingaimo inte ayæ Itæca Wængonguïmo ingaimo inte botö Aacobo Wængonguïmo adobo ñmo anguënë.” ²⁷ Ante në angaingã inte edæ æmæwo wænñãni tõmënãni Wængonguï ædö cæte inguingãã. Wæætë edæ mïl quëwënãnique tõmënãni Wængonguï ññongã ingampa, pönenguënë quëwëmïni. Në wænte godinãni incæ ayæ mïñãni quëwënãni ññãnipa. Minitö edæ wadö ante tededimïni inte edæ oda cæte wapiticæ ænewëmïnipa, angacãimpa.

*Wængonguï nãnö wææ angainë mẽnea tæñineda põi ënepa
(Máateo 22.34-40)*

²⁸ Mãnömã Æññõnãnite nõ apæñecã ëññente wædinque adocanque në wææ ante odõmongã ññömö Itota weca põninqe,

—Wængonguï, ññãmã cæedãni, ante nãnö wææ angainecoo ante pönëningue ædedö tæñine põi ñññonte mõnö nanguï ëññente waa cæquïl.

²⁹ Æññongante Itota ññömö,

—Ññãmãinte ante nãnö wææ angainë ññömö edæ tæñine põi ëne ñññonte mõnö nanguï ëññente cædinque waa cæcæimpa, angantapa. “Idægoidi, æmo ëññedãni. Wængonguï mõnö Awënë ññömö, tõmengã adocanque ññongã inte edæ nãwã Awënë ññongã ingampa. ³⁰ Mãnömã Awënë Wængonguï ingampa, ante adinqe bitö mïmõ entawente tõmengã ingante waadedinqe öñöwoca ëwocabi inte ædæmõ waadete pönencæbiimpa. Ayæ edæ bitö ocai encabi inte nõ pönëningue bitö baö tæi piñænte ëññabi inte edæ godö waadete cædinque tõmengã ingante waa waadete pönë.” ante nãnö yewæmongainë tæñine ñññonte mõnö nanguï ëññente waa cæcæimpa. ³¹ Ayæ wade nãnö angainë adobaï tæñine ñññonte mõnö ëññente waa cæcæimpa. “Nãmã bitö waadete waa cædö bai adobaï pönëningue bitö wadãni ññãnite adobaï waa waadete cæe.” Mãninqe. ññãmã cæedãni, ante Wængonguï nãnö wææ angainö ante tæñineda bai wade edæ dæ ampa.

³² Ante apæñecã ëññëningue në wææ odõmongã ññömö,

—Awënë në Odõmõmi nãwangã edæ ante apæñebi ëññëmopa. Wacã wængonguï dæ Æññongante adocanque mõnö Wængonguï ññongã ingampa, ante nõ æmipa. ³³ Ìninqe tõmengã ingante mïmõno entawente waadedinqe mõnö ocai encamö inte nõ pönëningue mõnö baö tæi piñæmõ inte godö Wængonguï ingante waadete cædinque nãmã mõnö pönëno bai wadãni ññãnite adobaï waadete godö waa cæmõ adinqe Wængonguï waa acampa. Nãwangã impa. Baö bataa iya tante godömö incæ, Wængonguï qui, ante mõnö ancaa godömö incæ Wængonguï ayongã wædænque waa cæte impa. Wæætë mãñinö bitö æññinö bai cæmõ adinqe Wængonguï godõmenque waa acampa.

³⁴ Ante nē wææ odōmongā nō ēñente apæ necā wædinque Itota edæ,
–Bitō Wængonguī Awēnē Odeye nempo obo pōnī ongōmi inte guilbaīmipa,
ante awædō.

Angā ēñēninque tōmānāni, Mōnō æbānō godōmenque anguiī, ante guīñēnete
wædinque pæ wēēnegadānimpā.

Codito æcānō Pæingā inongā ingā, ante

(Mäateo 22.41-46; Odoca 20.41-44)

³⁵ Pæ wēēnedāni adinque Itota ayæ Wængonguī oncō ñænæncō yabæcōnē
ongōninque odōmonte apæ necantapa.

–Dodāni nāni wææ yewæmongainō ante nē odōmōnāni iñōmō mōnō
Codito ingantedō ante apænedinque, Awēnē Dabii wodi pæingā inongā
ingampa, ante quīnante ānāni, ante pōnēmini. ³⁶ Iñæmpa Dabii wodi incæ
Wængonguī Tæiyæ Waēmō Ōnōwoca tōnō apænedinque,
“Botō Awēnē ingante apænedinque Awēnē Wængonguī incæ iīmaī ante
apænegacāimpā.

Bitō botō tōmēmæ inō tæ contate ongōñōmi,
Bitō imite nē pīnāni inānite bæ tabo ate,
bitō ōnōwa gāānē ongōnāni inānite pinā gāwacæbiimpā.”

Ante Awēnē Dabii wodi incæ yewæmongacāimpā. ³⁷ Codito inongā ingampa,
ante awēnē Dabii wodi nānō nē angaingā inongā inte edæ adocā Codito iñōmō
ædō cæte næēmæ Awēnē Dabii wodi pæingā inguingā, ante pōnenguēnē
ānewēmīni. Mānōmaīnō ante Itota odōmonte apæ necā ēñēninque tæiyænāni
godongāmæ ongōnāni waa ēñengadānimpā.

Nē wææ odōmōnāni inānite Itota pīngampa

(Mäateo 23.1-36; Odoca 11.37-54, 20.45-47)

³⁸ Itota godōmenque iīmaī ante odōmonte apænegacāimpā. “Cædāmaī, ante
wææ ante nāni yewæmongainta nē ate odōmōnāni inānite mīnitō gomō
aedāni. Tōmēnāni iñōmō doyæncōo waēmōncōo wēñate mongænte todānīpa.
Waadāni nāni godonte æiñōmō cægōñōnānite wadāni pō bee tēninque
tōmēnāni inānite, Nē odōmōmi, bitō imite waa amōnīpa, ante apænedāni
ēñēninque edæ nē odōmōnāni iñōmō nanguī todānīpa. ³⁹ Ayæ tōmēnāni
odōmōincōnē go guīdinque tōmēnāni nāmanque ante pōnēninque waēmompaa
pōnī tæ contate todānīpa. Ayæ ææmæ becæ godinque tōmēnāni, Botō tāno
bete tocæboimpā, ante waēmompaa pōnī tæ contate bete todānīpa. ⁴⁰ Ayæ
owæmpōināni oncō yo mongænte bai cædinque ō æwēnāni inte nē wææ
odōmōnāni iñōmō, Botō imote waa acædānīpa, ante cædinque Wængonguī
ingante nōingā apænete bai cædinque babæ cædinque wantæpiyæ tededānīpa.
Tōmēnāni godōmenque nāni nanguī pōnī pante wæquinque mānōmaī nāmā
beyenque ante cædānīpa, ante adinque mīnitō iñōmō ee gomō aedāni,” ante
Itota wææ angacāimpā.

Owæmpoingā incæ, Wængonguī quī, ante godongampa

(Odoca 21.1-4)

⁴¹ Māniñedē Wængonguī oncō yabæcōnē iñōmō, Wængonguī quī, ante nāni
wēnoncadedē da wēnōnānīmpā. Mānincōnē pō guīdinque tōmēnāni nāni da
wēnoncade gāānē tæ contadinque Itota a ongōñongā nanguī ināni adoyōmō
pōnīnque daga daga wēnāni acantapa. Pancadāniya nanguī ēadāni inte nanguī
pōnī da wēnāni acantapa. ⁴² Ayæ a ongōñongā owæmpoingā ōmæpocā inte
ōnontamonque incæ mentamonga ænte māmō daga wengantapa. ⁴³ Adinque
Itota tōmengā nānō nē emiñænāni inānite aa pecā pōnāni ate,

—Náwanga ante apænebo eñeedáni. Wadáni tómanáni wædænque póni godonte bai wii eyepæ daga weñónáni lingá owæmpoingá iñómó omæpocá inte wædongá incæte godómenque nanguí godonte bai godongá abopa. ⁴⁴Edæ mänináni guiquenê nanguí eadáni inónáni inte, Quëwenguinta impa, ante cö cædinque tómenáni náni wii æinentaque ayæ ongóintaque godónánipa. Íngá omæpocá ingá guiquenê tómengá nánó quëwenguinta incæ, Wængonguí qui bacæimpa, ante tómana edæ daga wengampa, ante Itota apænegacáimpa.

13

Wængonguí oncö ñæncencö bæ tate bacæimpa, ante (Máateo 24.1-2; Odoco 21.5-6)

¹ Mánii Wængonguí oncö ñæncencö yabæcönê ongonte iinque apænete tao goyongá tómengá nánó nê emiñængá adocanque Itota ingante, —Awênê nê Odómomi eñêmi, angantapa. Dicaco wainca wænómênæca wænómênæca náni mænongaincaco waincö ongö cöwá ae.

² Äñongante edæ,

—Bitö guiquenê, ñæncængade náni mænongaincö ongö abii. Mänincoo míni acoo incæ tómanca bæ tadáni wæænca adinque panguimæ panguimæ godinque dica adocaque póni incæ wænómênæca ongónamá ingæimpa, ante Itota apænegacáimpa.

Oo iinque bacæimpa, ante æbánó ate eñenguí, ante (Máateo 24.3-28; Odoco 21.7-24, 17.22-24)

³ Mánii taodinque Odibowænquidi go æidinque tómenáni Wængonguí oncö ñæncencö gomó náni ayómó tæ contayongá Pegodo tónó Tantiago, Wáó tónó Æntade mánimpodáni Itota ingante awémó äñanitapa. ⁴ Mánii bitö äñinó ante æyedênó iinque baquí, ante eñencæte ante wæmónipa. Ayæ, Íimai cæbo ate minitö, Oo póni impa, ante eñencæminimpa, ante Wængonguí æebánó mä cæuingää, ante apænebi eñemaimónipa.

⁵ Ante wæyónánite Itota, “Wapiticæ odómöñónáni minitö wæætê, Mönó oda cædámaí ingæimpa, ante námá wææ aquenê quëwëminii. Edæ íimai baquí í ataqeedáni. ⁶ Edæ wadáni nanguí ináni babæ tedete póninque botó emówo ante, ‘Botó mánimodó inómo imopa,’ ante apænedinque wapiticæ edæ máodáni godinque nanguí ináni tómenáni miñæ oda cæte wapiticæ gocædánipa,” ante apæncantapa.

⁷ Ayæ, “Wabæca awênê tónó pö bee téninque wæætedö wæætê cædapa, ante tededáni eñencæminimpa. Ayæ wayómó náni guëadó guëa cæte wænónó ante tededáni incæte edæ guíñente wædámaí íedáni. Edæ mäninó botó äñinó bai cöwê bacæimpa. Ba incæte mönó inguipoga quëwënó iñómó mäníñedê wii æmæwo iinque bacæimpa. ⁸ Adobæca quëwënáni iñónánite wabæca quëwënáni ponte bee téninque guëadó guëa cæquínáni inánipa. Adobæca awênê odeye nempo quëwënónánite wabæca awênê odeye tontadoidi mämó bee téninque guëadó guëa cæte wænonte wænguináni inánipa. Ayæ wayómó wayómó goinque pö wæcædánipa. Ayæ waodáni náni cæínente wænguinque cænguí incæ tómaa capo wængæimpa. Mánii weñæ mä nantate bai wæwente bamini incæte míni godómenque wæwenguinque ingæimpa.”

⁹ Ante apænedinque Itota godómenque, “Tómëminí námá incæ wææ aadáni. Edæ minitö iminite bæi ongóninque edæ nê apænte äñáni weca máo pædæ godónáni æncædánipa. Ayæ godómenque tómenáni odómóincönê máo gönónáni gongæñómíni minitö iminite tæi tæi pancædánipa. Ayæ botó beyænque pancabaa awênëidi gobedónadoidi weca ayæ tómamæ

awënéidi odeyeidi weca máo gônönáni gongæninque munitö botö beyæ apæ necæminimpa. ¹⁰ Edæ iinque bayedé botö ånedé ayæ badåmaï iñonte, Botö æmo beyænque quëwencæminimpa, ante waa põni botö apænedö ante tömämæ quëwënanï doyedé ëñencæðänimpa. ¹¹ Iinque mäniñedé munitö iminite nani bæi ongonte ænte goyedé, Né apænte ånani weca ongöninque æbånö ante apænequimoo, ante wædåmaï iedåni. Edæ, Èbånö waa apænequii, ante Wængongui Tæiyæ Waëmö Önöwoca apæ necæ ëñente ate apæ necæminimpa. Wii nämä põnéninque wææté Wængongui nånö apænedö ëñëninque apæ necæminimpa.”

¹² “Mäniñedé edæ nana caya iñonate adocanque næëmæ piinique, Wænoncæ, åninque tömengä tönifacä ingante da godongä gocæcåimpa. Nana wencaya iñonate mæmpocä iñömö næëmæ piinique, Wænoncæ, åninque tömengä wengä ingante da godongä gocæcåimpa. Ayæ wëñænani incæ wæmpoda inate næëmæ piinique máo apænedåni ëñëninque wadåni tömënanï wæmpoda inate mämö wænönani wæncædaimpa. ¹³ Ayæ, Coditoidi iminipææ, ante tömånani botö ëmöwo beyænque munitö iminite nanguï piincæðänimpa. Piinani wæwëmini incæte æcånö iimæca iinque baganca wæntædåmaï inte botö ëmöwo beyæ piinte badåmaï inaa botö tömengä ingante æmo beyænque quëwencæcåimpa,” ante Itota apæ necantapa.

¹⁴ Ayæ, “Wadåni põ ñömæi bai öö wadö nani wo ëwenguimåmo incæ tæiyæ waëmö iñömö ænte mämö cö cæcæðänimpa, ante doyedé yewæmongatimpa. Docä nånö yewæmongainta adinque në adingä iñömö tömengä do ëñëmaingampa. Incayæ ate cö cæðani ongö adinque edæ mäniñedé Oodeabæ quëwëmini iñömö ånanquidi do wodii winonte æibæwedåni. ¹⁵ Ayæ oncömanca ongömini iinque mäincoo æncæte ante oncönë wæi guidåmaï inte oncömancaque oncömancaque wodii winömaewedåni. ¹⁶ Ayæ në gönea cæmini iinque yacoo æncæte ante oncönë ocæ ëmæñnåmaï inte godömenque wodii winömaewedåni. ¹⁷ Mäniönæ iinque bayedé yæðemadä inåni tönö goömæ në gånönani tönö tömënanï nani wæquimåmo baquinö angüënë. ¹⁸ Ayæ munitö mini wodii winonguiönæ ante põnéninque edæ Wængongui ingante, Wii edæ cöönædepo bacæimpa, ante apæneedåni. ¹⁹ Edæ mäniñedé waodani nanguï nani wæwëmåmo nani angä baquinö angüënë. Edæ Wængongui nånö badongaiñedé mänömaï nani wæwëmåmo bai dæ åñonte ayæ godömenque ñöwo ganca dæ ånompä. Ayæ godömenque iinque baganca mänömaï nani wæwenguimåmo bai dæ angüinö angüënë.”

²⁰ “Edæ wantæpiyæ nani wæwenguï impa, ante adinque Wængongui, Mänimpöönæque edæ wæwencæðänimpa, ante põnömenque ante ånåmaï ingä bai quingånö quëwenguënë dæ ancæðönänimpa. Incæte Wængongui, Mänimpodåni inånite apænte æmo beyænque në quëwenguinani inånipa, ante nånö apænte ængaiñani inånite waadete põnéninque dobæ, Mänimpöönæque wæwencæðänimpa, ante cædinque põnömenque angacåimpa,” ante Itota apænegacåimpa.

²¹ Ayæ, Iinque bayonte æbånö inguii, apænedinque Itota godömenque iimåi ante apæ necantapa. “Mäniñedé wadåni munitö iminite, ‘Iñömö mönö Codito ponte ongongä tamëñedåni,’ ante ayæ, ‘Wayömö a ongongä atamönipa,’ ante tededåni ëñëninque edæ munitö iñömö ëñëñåmaï imæwedåni. ²² Wadåni mäniñedé ponte a ongöninque nämä incæ ante, Tömëmo Codito inömo imopa, ante babæ ante tedequinåni. Ayæ, Wængongui beyæ në apænebo inömo imopa, ante në babæ ante tedequinåni. Tömënanï, Wængongui nånö apænte ængaiñani incæ æmæwo oda cædinque wapiticæ gocæðänimpa, ante cædinque bamönengæ bai cædinque öönæðé cæi bai cædinque nö öðömonte

baī cæquīnāni īnānīpa. Incæte Wængonguī nē apænte ængaingā inte edæ ee aqingā diyæ æmæwo oda cædinque wapiticæ goquīnānī. ²³ Edæ īnque badāmaī īfōnte botō nōwo do apænebo ēfēnte cædāni. Oda cædāmaī incæboīmpa, ante nāmā wææ aabæwedāni,” ante Itota angacāīmpa.

Waobo ēñagaīmo inte botō īīmaī ponte cæcæboīmpa, ante

(Mäteo 24.29-35, 42, 44; Odoca 21.25-36)

²⁴ Ānīnque Itota ayæ godōmenque apænedīnque, “Mānīī nāni wæwēmāmo nāni angā īnque go ate nænque īfōntobæ wēmō badīnque apāicā apāidāmaī īngæīmpa. ²⁵ Nēmōncoo oōnædē īnō wææ tæ wæænīnque waa tæ waa tæ wæængæīmpa. Oōnædē tæī ongongaincoo incæ wancæ wancæ cæte baī wapiticæ goquīnō anguēnē. ²⁶ Mānīīnedē edæ botō Waobo nē ēñagaīmo inte boguīmāncodē pōnīnque tæī pōnī pīñæmo īnīnque edæ nāō apāite baī waēmō ēmōte wææmo acædānīmpa. ²⁷ Mānōmaī pōnīnque botō anquedoidī īnānite āmo godīnque tōmēnāni æmæno betamonca æmæno betamonca boguīmā nāni pō goīnō godīnque īnguīpoga tōmāne godīnque oōnæ tōmāne godīnque Wængonguī nānō apænte ængaināni īnānite āfēte poncædānīmpa.”

²⁸ Ante Itota godōmenque apænedīnque, “īgowæ æbānō īwæ, ante odōmōte apænebo ēñēnīnque pōnēedāni, angantapa. Tōmēwæ mīīwæ badīnque īgowæ wayabo tānā nā boca adīnque mīnītō, Ōñabo nānō bo-caīnepo īnte nænque nāwāntedæ baquīnque bocapa, ante pōnēnīnque edæ do ēñēmīnīpa. ²⁹ Ayæ adobaī mānīnō botō apænedō baī edæ do ba adīnque mīnītō, Waocā nē ēñagaingā do odemō pōnī ongōnīnque īnguīpoga oo poncæcāīmpa, ante ēñencāmīnīmpa. ³⁰ Nāwangā āmopa. Nōwomīni ayæ mīīmīni quēwēnīnque wænte godāmaī īñōmīni mānīnō botō apænedīnō baī tōmānō edæ do īnque baquīnō anguēnē. ³¹ Edæ oōnædē ongōñōmō īnguīpoga tōnō wo ēwēnte baī dæ ba incæte botō angainonque guīquēnē dæ badāmaī inte edæ cōwē tæī ongongæīmpa,” angacāīmpa.

³² Ayæ, “Mānīōnæ æyedēnō ī, ante, Mānīnepo ædepodō ī, ante ēñencæte ante mīni wædīnō ante æcāmenque incæ ēñēnāmaī īngāmpa. Tōmānāni ēñēnāmaī īñōnāni edæ Wængonguī anquedoidī incæ ēñēnāmaī īnānīpa. Wæmpocā Wēmo incæ ēñēnāmaī īñōmote Wæmpocā īñōmō tōmēngā adocanque incæ edæ nē ēñēngā īngāmpa,” angantapa.

³³ Ānīnque ayæ godōmenque apænedīnque Itota tōmēnāni īnānite īīmaī angantapa. “īnīnque, Āyedēnō baquīī, ante ēñēnāmaī īmīni inte edæ mōnāmaī mīīmīni wānō cōnīnque edæ Wængonguī īngante apæneedāni. ³⁴ Botō ponguīnō īñōmō waocā ēacā nānō cæī baī īmpa. Īngā waocā īñōmō wabæca gocæ cædinque, Botō īmote nē cædāni nē ānāni badīnque botō oncō waa aocædānīmpa, ante adocanque īngante, Māninganca cæe, wacā īngante edæ, Māninganca cæe, wacā īngante, Māninganca cæe, ante odōmōnīnque odemō wææ a congā īngante, Cōwā ae, ānīnque wadæ gocā. ³⁵ Īnīnque botō nē ēacā baī īñōmote mīnītō, Mōnītō Awēnē æyedēnō ponguīngāā, ante ēñēnāmaī īmīni inte gāwadecæ ayaōnænēña tawadiya peyedē nāō ba, æyedēmē poncæcāīmpa, ante wadō congūēnē cāmīnīni. ³⁶ Edæ, Wīī mō nōmōnī ponguīngā īngānō anguēnē, ante cædinque mīīmīni quēwēmāīmīnīpa. ³⁷ Mīnītō īmīnīte botō ānō ante tōmānāni īnānite adobaī, Wānō congūēnē quēwēmīnīi,” ante Itota angacāīmpa.

14

Itota īngante bæī ongōnte ængæīmpa, ante cædānīpa

(Mäteo 26.1-5; Odoca 22.1-2; Wāō 11.45-53)

¹ Mëönaa go ate wodo pänta gogaïönæ bai Patowa ææmæ baquimpa, ante pönëninque oodeoidi ñowo, Pão yedæ æmpoqui ömæmö i mönö cænguiönæ inguimpa, ante cædönänimpa. Mäniñedë, Wængongui qui, ante në godönäni ñænænäni tönö në wææ ante odömönäni iñömö, Mönö awëmö cæte Itota ingante bæi ongonte ænte mäo wæñongæimpa, ante cædönänimpa. ² Oo pöni impa, ante wædinque awënëidi,

– Ìñæmpa ææmæntedæ iñonte wænömö bai tömänäni ængui bate Yæ yæ ante piinte cæcædönänimpa, ante adinque mönö ædö cæte mäniñedë cæquii, ante wægadänimpa.

Itota ocaboga onquiyængä ogui wapæ gao cæcacampa

(*Mäateo 26.6-13; Wäö 12.1-8*)

³ Itota iñömö Betänia godinque në baadingä Timönö oncönë go guiite ëñacantapa. Guii ëñate cæncöñongä onquiyængä adoyömö pö guicantapa. Tömengä ogui wapæ näwä näadodopæ näni änömæ nänö nangui godonte ænimæ dica adabatodo waincadedë pe ñiñænte mäningä inte ñowo ænte mämö Itota weca pongantapa. Pöninque tömengä mäincaide wencade ao mænodinque Itota ocaboga edæ gao cæcacantapa. ⁴ Adinque godongämæ ongönäni pancadäniya ængui badinque näni caboque tededinque,

– Ìñæmpa ogui wapæ incæ önonque guënte bai cæcampa töö. ⁵ Edæ waocä adoque wadepo cæte beyæ paga æninque todetiento deénadiota näni æninta ayæ godömenque æninta beyæ godonte ænguënëmæ ìmæmpa. Godonte ænte bai ömæpodäni inänite wæætë godonguënë apa.

Ante nämæneque tededinque onquiyængä ingante nangui piinte änänitapa.

⁶ Itota wæætë,

– Quimæ piwëminii. Ìngä onquiyængä iñömö botö imote waa pöni cæcä apa quëwëminii. Ee aquënë quëwëminii. ⁷ Edæ ömæpodäni mïni äniñäni minitö weca cöwë quëwënäni adinque minitö æyedëmë tömënäni beyæ waa cæinëmïni inte edæ do waa cæbäimïnipa. Botö guiquënë minitö weca wii wantæpiyæ ongoncæboimpa. ⁸ Adinque mänimæ ogui wapæ botonga gadongadinque tömengä edæ botö baö daga wenguinque eyepæ iñonte öni paacantapa. Ìnque tömengä nänö cæganca ante do cæcä apa änewëminii. ⁹ Minitö imïnite näwangä ante apænebopa. Tömämæ æyömömë wadäni näni ëñente toquinque botö imotedö ante apænedäni ëñënäni mäningä onquiyængä nänö cædinö ante adobaï tededäni ëñente pönencædänimpa, ante Itota apænegacäimpa.

Itota ingante odömönte godoncæte ante Codaa cæcampa

(*Mäateo 26.14-16; Odoca 22.3-6*)

¹⁰ Ayæ mäniñedë näni, Dote, incabo iñönäni adocanque Codaa Icadote näni äñongä iñömö, Itota æyömönö ongongäa, ante odömönte pædæ pönömo æncæmïnipa, ante cædinque, Wængongui qui, ante në godönäni ñænænäni weca wadæ gocantapa. ¹¹ Godinque tömengä, Ìmaï cæcæboimpa, ante apæneçä ëñëninque awënëidi nangui todinque Ao äninque, Cæbi ate tiguitamö pönömöni æncæbiimpa, änäni. Ëñëninque Codaa Ao äninque, Æbänö cæte godö odömömo ænguñänii, ante cöwä adinque ancaa cægacäimpa.

Awënë Itota päö tönö owæta pönongä cænte bedäni

(*Mäateo 26.17-29; Odoca 22.7-23; Wäö 13.21-30; 1 Cooidintoidi 11.23-26*)

¹² Oodeoidi päö yedæ æmpoqui ömæmö i näni cænguiönæ tæcæ ba ate tömënäni, Wodo pänta gogaïönæ bai Patowa mönö cænguiönæ impa, ante pönente cædinque, Wængongui qui impa, ante codotedo mäniönæ edæ cöwë

wæñnōñānīmpa. Ìnīnque māñīōnæ ïnīnque ba adīnque tōmēngā nāñō nē ēmīñænānī Itota īngante ānīnque,

—Ēdōñō āmī gote mōñitō Patowa ææmæ ante cæmōnī ate bitō bete cænguīmīi.

13 Āñānī ēñēnīnque Itota tōmēngā nāñō nē ēmīñæna mēnaa īnate da godōñīnque,

—Māñī nanguī nānī quēwēñōmō gote taadō goyōmīnate onguīñængā incæ cadabodē æpæ iyænte næænte pō bee tengā adīnque mīnatō tōmēngā mīñæ tee empote goeda. 14 Tōmēngā æcōñēñō guicā adīnque māñī oncō nē ēacā īngante ānīnque mīnatō, “Mōñō Awēñē nē Odōmōngā īnte ïmaī angampa. Bitō oncōñē guicōñē æcōñēñō ante, Bitō oncō, ante āmī guīdīnque botō nē ēmīñænānī tōñō botō Patowa ææmæ bete cænguīmōñīi, angampa.” 15 Ante āñōmīnate tōmēngā æmōngapaa mæī odōmōñīnque ñænæncō awæmpa nāñō do cōñōincō odōmōngā adīnque mīnatō māñīncōñē mōñō beyæ tōmāā eyepæ cæcæmīnīmpa.

16 Angā ēñēnte tao godīnque nāñī quēwēñōmō ponte ayōna, Itota nāñō āñō baī tōmāā do cæte ongōmpa, ante adīnque tōmēna Patowa ææmæ ante cædatapa.

17 Gāwadecæ bayōnte dote īñāñī nāñī cabo Itota mīñæ godōngāmæ pōñāñītapa. 18 Ponte tæ contate cæncōñōñāñīte Itota,

—Nāwangā ante apænebo ēñēdāñī. Mīñī cabo incæ adocanque botō tōñō ñōwo godōngāmæ cæncōngā incæ, Æncædāñīmpa, ante botō ïmote odōmonte pædæ godōngūngā īngampa.

19 Ante apæñecā ēñēnīnque, Wæñēnte awædō, ante pōñēnīnque tōmēngā īngante adocanque adocanque ānīnque tōmāñāñī adoyōmō,

—Botō ïmotedō ante dicæ apæñebītwogaa.

20 Āñōñāñī Itota wæætē,

—Ōnompo tīpæmpoga go mēmīnaa ïñōmīñī adocanque botō tōñō guēa adōtaca mī cæte cængā incæ tōmēngā nē cæquīngā īngampa. 21 Edæ dodāñī Wængōngū beyæ ante nāñī yewæmōngāī baī cædīnque botō Waobo ēñagāīmo īnte cōwē wænte goquēñēmo ïmodō anguēñē. Incæte botō ïmote nē odōmonte godōnōngā guīquēñē tōmēngā nāñō wæquīnque cæquīngā īngampa. Māñīngā wīī ēñate baī waa toquēñēngā incædongāīmpa. 22 Ayæ tæcæ cæncōñōñāñī Itota pāō bæī ongōnte æñīnque Wængōngū īngante waa ate apæñēdīnque pāō pā æñīnque tōmēñāñī īñāñīte pædæ godō pædæ godō cæcantapa.

—Botō baō baī īmpa, ante pædæ pōñōmo æñīnque mīñitō Ao ante cæedāñī.

23 Āñīnque ayæ bequīmæ owætaca bæī ongōnte æñīnque Wængōngū īngante waa ate apæñēdīnque pædæ godōñīnque nēñēmpocā æñīnque tōmāñāñī bedāñītapa. 24 Beyōñāñī tōmēñāñī īñāñīte apæñēdīnque,

—Botō wepæ ïmāī baī īmpa. Wængōngū do apæñēdīnque, Botō pōñō cæbo ate mīñitō Ao āñīñī ïñīnque mōñō godōngāmæ waa cæte quēwēngæīmpa, angacāīmpa. Ñōwo adobāī mīñīe āñīnque apæñēbōpa. Botō wepæ ante Ao ante æmīñī īnte mōñō godōngāmæ waa cæte quēwēngæīmpa. Edæ nanguī īñāñī beyæ gowequīmæ īmpa. 25 Botō ïñōmō Awēñē Odeye badīnque ocæ ēmænte pōñīnque mīñīmæ botō beganca māñīmæ yowepæ ñōwo æmæwo bebo tamēñēdāñī, ante Itota apæñegacāīmpa.

Pegodo incæ, Dicæ abogaa, apæñēquīngā īngampa, ante (Māateo 26.30-35; Odoca 22.31-34; Wāō 13.36-38)

26 Ayæ Wængōngū īngante āmotamīñī ante tao godīnque Odībōwænquīdī godāñītapa. 27 Goyōñāñīte Itota ïmaī ante apæñēcāntapa.

—Dodäni Wængonguï beyæ yewæmöninque, “Në aadingä ingante tacabo dæ wængä ate cæningäidi obegaidi wæætë panguimæ goquimpa,” ante näni yewæmonte angainö bai cædinque botö dæ ämo beyæ guingo imonte wædinque tömämïni edæ näwæ goquimïni imïnipa, ante awædö. ²⁸ Panguimæ gomïni incæte botö edæ ñäni ömæmonte Gadideabæ täno gote a ongöñömo mïnitö ayæ pöedäni.

²⁹ Angä ëñente wædinque Pegodo guiquënë,

—Ïñæmpa dæ ämi beyæ tömänäni guingo imonte badinque panguimæ godäni incæte edæ botö guiquënë cöwë panguimæ godämai incæboimpa.

³⁰ Äñongante,

—Bitö imite näwangä ante apænebo ëñëe. Ñöwoönæ woyowotæ incæ tawadiya mempoga pedämai ïñonte bitö ïñömö botö imotedö ante wadö ante apænedinque, Dicæ abogaa, ante mempoga go adopoque anguimï imïpa.

³¹ Angä ëñente wædinque Pegodo wæætë,

—Ïñæmpa botö bitö tönö wæmo incæte mäninö ante cöwë änämai incæboimpa.

Ante nanguï äñongä tömänäni adodö ante apænegadänimpa.

Guetëmänii ïñömö Itota Wængonguï ingante apænecampa

(Mäateo 26.36-46; Odoca 22.39-46)

³² Mänii godinque yabæ incæ Guetëmänii näni äñömö pöninque tömengä mïñæ në godäni inänite Itota,

—Tæ contate ongöñömöni botö godömenque gote Wængonguï ingante apænete pömoedäni.

³³ Äninque Pegodo Tantiago Wäö mänimpodäninque inänite ænte mäocä goyönäni Itota ïñömö nanguï wæwente badinque guïñente wæcantapa. ³⁴ Ayæ tömönäni inänite,

—Botö wæwëmämo entawëninque pæmænte wæte wænguï wædö. Minitö guiquënë tæ contadinque ëamonca wänö cöedäni.

³⁵ Äninque wædæ pö gote ædæ wæænte guidömëmæ ñongæninque Wængonguï ingante, Bitö Ao ämi botö caate wæquintedæ wïi ba ate waa tobaïmopa. ³⁶ Äninque, “Mæmpo, botö Wæmpo ëñëmi. Bitö tæi piñæmi inömi imïpa. Bitö ti nä wænguimæ bai ö ænte bai cædinque botö imote edæ, Wænämai incæbiimpa, ämi ïninque botö edæ waa tobaïmopa. Incæte botö änönö bai wïi cædinque wæætë tömëmi änönö bai cæe,” ämopa.

³⁷ Äninque tömönäni weca adodö ponte ayongä mö ñönäni adinque tömengä Pegodo ingante,

—Timönö edæ mömitawo. Botö tönö wänö conguënëmi incæ bitö adoque oda ganca incæ wïi aacömii. ³⁸ Edæ, Mïmöno waa cæinëmönipa, ante ëwocayömïni baö aquïñö ëñamïni inte wæntæye bamïnipa. Ïninque edæ mïnitö wänö cöninque nämä beyænque Wængonguï ingante apænedinque edæ, Wïi wënæ wënæ cæinëmöni bacæmönimpa, ante apæneedäni.

³⁹ Äninque Itota wæætë wadæ godinque wëenë nänö äninö bai apænedinque Wængonguï ingante adodö ante apænecantapa. ⁴⁰ Ayæ adodö ponte ayongä möwo möinente ædo ædo cædinque mö ñönäni acantapa. Acampa, ante wædinque tömönäni, Æbänö anguimöö, äninque edæ pæ wëenedänitapa. ⁴¹ Itota wæætë mempoga go adopoque gote apænedinque ñöwo adodö pöninque edæ tömönäni inänite,

—Ayæ edæ guëmante mö ñömïni. Edæ idæwaa. Ñöwo ïinque cætimpa. Botö Waobo ëñagaïmo inte edæ botö wæwenguïönæ do edæ ba ïninque në

wënæ wënæ cædāni nempo nē pædæ godōmoncæ cædingā iñōmō botō ïmote do odōmonte godongāi ataqeedāni. ⁴² Nōwo edæ ængæ gantidinqe mōnō gocæïmpa. Botō ïmo nē odōmonte godonguingā iñōmō edæ obo pōni pongā tamēnedāni, angacæïmpa.

Itota ingante bæi ongonte ænte godānīpa

(Máateo 26.47-56; Odoca 22.47-53; Wāō 18.2-11)

⁴³ Ayæ apæneyongā edæ Codaa wodi tōmēnāni nāni, Dote, ante gocabo adocabo ïningā incæ ñōwo pongantapa. Do iñōmō, Wængonguī quī, ante nē godōnāni ñænænāni tōnō nē wææ odōmōnāni tōnō nē aadāni nāni Picæncabo tōnō wadāni ïnānite, Codaa miñæ goedāni, ante da godōnōnānīmpa. Nōwo iñōmō tōmēnāni nāni nē da godōnāni inte tæiyænāni yaēmē næænte canta næænte Codaa miñæ pōnānitapa. ⁴⁴ Doyedē iñōmō nē odōmonte godoncæ cæcā Codaa iñōmō tōmengā miñæ poncæ cædāni ïnānite ïlmaī ante wēēñēdē apænedingā ïnongāïmpa. “Botō odōmonte queē bemōmo adinque mīnitō wæætē, Tōmengā ingampa, ante adinque tōmengā ingante bæi ongonte æninqe wææ cæte māōmīni gocæcæïmpa.” ⁴⁵ Ante do āningā inte Codaa iñōmō ñōwo Itota weca pōninqe,

–Awēnē nē Odōmōmi ïmi.

Āninqe edæ waa cæte bai edæ queē bemongantapa. ⁴⁶ Mānōmaī queē bemonte odōmongā adinque tōmengā miñæ pōnāni incæ Itota ingante pædæ gopo bæi ongonte ænānitapa.

⁴⁷ Wængonguī quī, ante nē godongā ñænængā pōni ïnongā ingante nē cæcā incæ māniñōmō ponte a ongongā adinque Itota gāānē ongongā adocanque pædæ guipote yaēmē o togænte æninqe māningā nē cæcā ingante tæi pāninqe ònōmonca wangō tamoncacantapa. ⁴⁸ Adinque Itota iñōmō ñōwo pōnāni ïnānite,

–Mīnitō ïñæmpa, Bitō nē ò ænīmi ïmīpa, ante bai cædinque botō ïmote canta tōnō yaēmē næænte ò æncæte ante pōmīni awædō. ⁴⁹ ïñæmpa Wængonguī oncō ñænæncōnē yabæcōnē ïmō ïñō ïmō ïñō apæñecōninqe botō mīnitō weca a ongōñōmote mīnitō edæ bæi ongōnāmaī ee amīnitapa tōō. Incæte Wængonguī angā ēñente nāni yewæmōngainō bai ïnque baquinque ante cæcæïmpa.

⁵⁰ Ante apæneyongante tōmānāni edæ emō cæte wodii wīnōnānitapa.

⁵¹ Adocanque edēningā guiquēnē ōmaacā inte yabæcooque nīnocoō nāni ancooque pōnō wīniyate Itota miñæ gocantapa. Tōmengā ingante yao ongōnānitapa. ⁵² Adinque tōmengā wæætē gā tadongate wecoo ōmaacā wodii wīnongacæïmpa.

Nē Apænte nāni Ānōncabo weca Itota ongongampa

(Máateo 26.57-68; Odoca 22.54-55, 63-71; Wāō 18.12-14, 19-24)

⁵³ Wængonguī quī, ante nē godongā ñænængā pōni ïnongā weca ænte godinque Itota ingante gōnōnāni gongænte ongongantapa. Ayæ, Wængonguī quī, ante nē godōnāni ñænænāni tōnō nē aadāni nāni Picæncabo tōnō nē wææ odōmōnāni tōnō tōmānāni pō bee bee bee tente godongāmæ ongōnānitapa. ⁵⁴ Pegodo guiquēnē tōmengā miñæ ayæ ayæ godinque, Wængonguī quī, ante nē godongā ñænængā pōni ïnongā oncō yacōmoyæ iñōmō wāānē guīcantapa. Māniñōmō guīdinque tōmengā wææ wānōnāni tōnō gongapamō tæ contate a ootocongantapa.

⁵⁵ Wængonguī quī, ante nē godōnāni ñænænāni tōnō nē Apænte nāni Ānōncabo tōmānāni, Mōnō apænte ante wænōmō wæncæcæïmpa, ante cædinque, Itota nānō wænguinque wënæ wënæ cæcā ingampa, ante æcānō nē

adingä inte godö anguingäa, ante ancaa diqui diqui miñönäni mänömaĩno ante nē angüenengä edæ dæ angantapa. ⁵⁶ Edæ nanguĩ inäni põninque babæ apænedinque, Mänömaĩ cæcä atamönipa, ante apænedäni incæte adoyömo apænedämaĩ inäni inte wapiticæ wapiticæ änänitapa. ⁵⁷ Ayæ ate pancadäniya ængæ gantidinque, Tömengä ingante apænte angæimpa, ante cædinque babæ wapiticæ ante äninque,

⁵⁸—İngä İımaĩ ante apæneçä eñentamönipa. “İncö Wængonguĩ tæiyæ waemö oncö waodäni önopoca näni mænönincö incæte botö cæbo wo tænguimæ wæænguimpa. Ayæ meönaa go adoönæque iñonte wacö wĩ önopoca mænonguincö wæætē mænnoncæboimpa,” ante apæneçä eñentamönipa töö, ante tededäni.

⁵⁹ Incæte adodeque ante apænedinque adoyömo äninque tömēnāni godömenque äninque wadö wadö wapiticæ ante apænedänitapa.

⁶⁰ Eñente wædinque, Wængonguĩ quĩ, ante nē godongä ñænængä põni İnongä guiquenē godongämæ ongönäni tönö tæcæguedē dibæ ongonte ængæ gantidinque Itota ingante,

—İñæmpa pæ wēenebii. Bitö æbänö cæbitapa, ante iñäni näni äninö ante bitö æbänö ämii.

⁶¹ Ante äñongante edæ Itota cöwē änämaĩ pæ wēeneçä. Adinque nē godongä ñænængä põni İnongä wæætē godö äninque,

—Wængonguĩ mönö Waemö İnongä Wengä mönö Codito İnongä ingampa. Bitö iñæmpa mänimidö İnömi İmitawo.

⁶² Äñongante Itota iñömö,

—Ao. Mänimodö İnömo İmopa. İninque İncayæ ate botö Waobo eñagaımo inte Wængonguĩ nē Tæi Piñængä İngä tömēmængä İnö tæ contabo adinque munitö ayæ ate botö öönædē boguımancodē põmo acæminimpa.

⁶³ Ante apæneçä eñente wædinque nē godongä ñænængä põni İnongä iñömö piinte badinque, Eñente awædö, ante bai cædinque edæ nämä weocoo wänä ñæninque,

—İdæwaa, angantapa. Nöwo wacä ingante, Itota wænæ wænæ cæcä atabopa, ante nē äincædongä ingante godömenque diqui diqui minämaĩ ingæimpa.

⁶⁴ Tömengä nämä Wængonguĩ Wengä inte bai babæ godö tedewengampa töö. İninque edæ tömengä babæ nänö änewenö ante do eñēmīni inte edæ æbänö ante põnemīni.

Ante äñongante nē apænte änäni tömānāni edæ, Nänö pante wænguinque edæ änewengampa töö.

⁶⁵ Ante apænte änäni ate edæ pancadäniya Itota tömengäa towæ tänongadinque tömengä awınca weocoota põnö ñāne cæmöninque tæi tæi pāninque tömengä ingante,

—Æcänö pānaa, ante Wængonguĩ beyænque apænebi eñēmönie.

Ante badete toyönäni wææ wänönäni guiquenē tömengä ingante bæi ongonte tæi tæi pangadänimpa.

Pegodo incæ, Dicæ abogaa, angampa

(*Mätece 26.69-75; Odoca 22.56-62; Wäö 18.15-18, 25-29*)

⁶⁶ Ayæ Pegodo guiquenē yæipodē yacömöñāa guĩ contate ongöñongä onquiyængä, Wængonguĩ quĩ, ante nē godongä ñænængä põni İnongä ingante nē cæcä iñömö adoyömo põ guıcantapa. ⁶⁷ Ponte ayongä Pegodo gongapamö ootocæ cæcä adinque onquiyængä ædæmö cöwä adinque,

—Māningä Nāatadeta iñömö quēwēnongä Itota tönö bitö guēa cægömitapa töö.

68 Angä eñente wædinque,

–Dicæ. Bitö änö ante æbänö ämii, ante dicæ eñëmogaa.

Äninqe tao yabædemö gäänë gongæñongä tawadiya wëenengä petapa.

69 Ayæ wæætë Pegodo ingante adinque onquiyængä iñömö godongämæ ongönäni inänite,

–Mäningä adocabodäni Iningä inte ongongä атакедäni.

70 Ante apænyongä Pegodo wæætë, Dicæ bitö angänö imogaa, angantapa.

Ayæ wantæ ate mäniñömö ongönäni adobai,

–Iñæmpa Gadideabæ quëwëniimi inte bitö näwangä Itota tönö tee empo në pömi imipa töö.

71 Änäni eñente wædinque Pegodo wæætë, Botö Wængongui eñëñongä nöingä ämpa, ante Wængongui ëmöwo ante babæ tedewëninque tömëni inänite wæætë,

–Mäni angantedö ingante dicæ abogaa. Dicæ abo ante bai änewëminipa töö.

72 Ante tæcæ änewëñongä iñontobæ tawadiya ayængä petapa. Ayængä pe eñente wædinque Pegodo Itota nänö äninö ante pönengantapa. Itota do iñömö, “Tawadiya mempoga pedämaï iñonte bitö botö imotedö ante wadö ante apænedinque, Dicæ abogaa, ante edæ mempoga go adopoque anguimi imipa,” änogäimpa. Ante pönente wædinque Pegodo, Nöwo nänö pequinque do pecampa, ante wædinque Ca ca wægacäimpa.

15

Itota incæ Pidato weca ongongampa

(Mäteo 27.1-2, 11-14; Odoca 23.1-5; Wäö 18.28-38)

1 Wængongui quï, ante në godönäni ñænænäni tönö në aadäni näni Picæncabo tönö në wææ odömonäni tönö tömëni iñömö në änäni inönäni inte oodeoidi näni në Apænte Änoncabo inönäni. Ininqe mäniï ñäö bayonte tömëni, Äbänö cæquï, ante pönente wædinque godongämæ pönë cöinque Ao äninqe Itota ingante goto winte töö æmänte ænte godinque odömäno awënë Pidato wodi nempo mäo pædæ godönäni ængantapa. 2 Pidato guiquënë tömengä ingante,

–Oodeoidi Awënë Odeyebi bitö imitawoo. Äñongante,

–Bitö tömëni änö bai botö mäniimodö imipa, ante Itota angantapa.

3 Wængongui quï, ante në godönäni ñænænäni guiquënë, Iingä Itota iñömö wënæ wënæ cæcampa, ante wadö wadö ante püinque Pidato ingante ancaa änänitapa. 4 Änäni eñente wædinque Pidato wæætë Itota ingante,

–Iñæmpa pæ wënebi. Bitö æpogadö wënæ wënæ cæbi imipa, ante nanguï änäni apa quëwë.

5 Äñongante Itota tömëni näni äninö ante cöwë apænedämaï ingä adinque awënë gobedönadodo wæætë, Quiëmë bai pæ wëneccä awädö, ante guñente wægacäimpa.

Itota wæncæcäimpa, änäni

(Mäteo 27.15-31; Odoca 23.13-25; Wäö 18.38-40, 19.1-16)

6 Mänimæ awënë gobedönadodo mäniñedë wadepo iñö wadepo iñö cöwë iïmaï cædongäimpa. Oodeoidi ææmä cæyönänite gobedönadodo iñömö, Në tee mönete ongönäni inänite adinque minitö æcänö ingante ämini ñimpo cæbo goquingä, ante änäni eñëninque tömengä tömëni näni äningä adocanque ingante ñimpo cæcä godongäimpa. 7 Doyedë wädäni ængui badinque, Awënë

ingante wido cæcæimpa, ante cædinque wænonte cæyönäni adocanque Badabato näni änongå tömënäni tönö godongämæ cædongä ïnongäimpa. Ænque awënëidi nê wîwa cædäni ïnänite bæi ongonte goto winäni ongönönäni Badabato adobaï tömënäni tönö godongämæ tee mömænete ongönongäimpa. ⁸ Ænque ñöwo ïñömö wadäni tæiyænäni Pidato weca pöningue, Cöwê bitö cædö bai ñöwo adobaï mönitö beyæ cæquimi ante wæmönipa. ⁹ Änäni ëñëningue Pidato ïñömö,

—Oodeoidi Awënë Odeye ingante pönö ñimpo cæbo abæ tawængä ænguimînii. Æbänö cæbo ænguimînii.

¹⁰ Edæ do ïñömö Itota gomonga cæcä ate wædinque, Wængonguï quï, ante nê godönäni ñænænäni incæ tömengä ingante piinte adönänimpa. Mäninö beyænque tömënäni Itota ingante bæi ongonte botö nempo ænte mämö pædæ pönönänimpa. Ante pönente wædinque Pidato, Oodeoidi Awënë Odeye ingante ñimpo cæbo goquingä, ämunitawoo, ante ñöwo angantapa. ¹¹ Ænque, Wængonguï quï, ante nê godönäni ñænænäni guiquënë godongämæ ongönäni ïnänite apænedinque, Minitö Pidato ingante ïmaï æedäni, änanitapa. Änäni ëñëningue oodeoidi wæætê Pidato ingante, Wîi bitö ängänö ante ämönipa. Wæætê Badabato ingante ñimpo cæbi gocæe, ante änäni. ¹² Æñëningue Pidato godö äninque,

—Ænque oodeoidi Awënë Odeye mîni änongå ingante æbänö cæquimoo, ante ämînii.

¹³ Äñongante tömënäni ogæ tededinque,

—Awæ ñænquedimæ ämi cæte wænönäni wængæe töö.

¹⁴ Änäni ëñente wædinque Pidato,

—Ïñæmpa quïnö wënæ wënæ cæcantawoo.

Äñongante godömenque yedæ äninque adodö,

—Ämi awäa timpote wænönäni wængæe töö.

¹⁵ Ancaa änewëñönäni Pidato ïñömö, Mäninäni pünämaï piyænê cæcædänimpa, ante cædinque Badabato näni äningä ingante godö ñimpo cædinque tömënäni nempo pædæ godongä ænanitapa. Wæætê edæ Itota ingante edæ Pidato wodi ängä æmontai badöimenca tæi tæi pänäni ate ñænque quepote awäa näni gönonguinque edæ da godongä ænte godänitapa.

¹⁶ Pædæ godongä ate nê tontadoidi tömengä ingante töö æmænte wadæ godinque awënê gobedönadodo oncönê Podætodio näni ancönê mangui guiyongä tontadoidi bacabo Itota weca godongämæ äñete pönänitapa. ¹⁷ Pöningue tömënäni, Awënê ïmi inte awënê weocoo wëñacæbiimpa, ante bai cædinque badete todinque Itota ingante wæætê opatawæ ëmoncoo pönö da wëñadinque daa mongæmenca æninque que cædinque, Awënê poganta, ante bai pönö daga wencädänitapa. ¹⁸ Ayæ Yæ yæ äninque,

—Badogaa, bitö oodeo awënê odeyebi ïmipææ.

¹⁹ Ante badete todinque cæwipaca ancaa tæi tæi pancadinque tömengäa towæ towæ tänongadinque da guicapote ædæ wæænningue, Bitö Tæiyæ Wæmö Awënê ïmi amönipa, ante bai badete todänitapa. ²⁰ Ayæ ïnque badete todinque tömënäni opatawæ ëmoncoo gä tadongadinque tömengä nämä weocoo da wëñädänitapa. Ayæ edæ tömengä ingante awæ timpote gönoncæte ante töö æmænte ænte tao mäodäni gogacäimpa.

*Itota ingante awäa timpodäni wængampa
(Mäteo 27.32-44; Odoca 23.26-43; Wäö 19.17-27)*

²¹ Māniñedē Tidēne quēwēnongā Timōnō guiquēnē Adecantodo tōnō Odopo tōmēna wæmpo ñnongā inte tōmengā yabæque gote pōnongāimpa. Ñnque Itota ingante ænte godinque ayōnāni māningā Timōnō ñōwo wodo tebæ gocæ cædinque pongā adānitapa. Ñnque tontadoidi, Bitō ægodōe. Itota ingante mōni timpoquīwæ ænte mongænte goe, ānāni ænte mongænte gocantapa.

²² Mānōmāi godinque Godogota nāni āñōmō mōnō tededō “Ocatāinō” iñōmō Itota ingante ænte pōnānitapa. ²³ Māniñōmō pōnāni ate wadāni, Nantate beyæ becæcāimpa, ante cædinque biñōmæ nāni wædænque ti nāmæ tōnō mīidapæ nāni ānōmæ adoyōmō wempo cædēninque pædæ pōnō cæyōnāni tōmengā ōnonque yædæ bedinque edæ bedāmaī ingantapa. ²⁴ Ayæ tōmengā ingante awæ ñænquedīmæ nāni ænte pōniwāa tōō godōninque pōnō timpodinque wææ tiwadinque ængæ gantidēnānitapa. Ængæ gantidēnāni ate wægōñongā tōmēnāni wæætē tōmengā weocoo ñi ante, Æcānō quınca nō ta adinque tōmengā mānincoo æncæcāimpa, ante wææntodōninque adocooque adocooque ænānitapa.

²⁵ Edæ nænque tōmantadæ æñonte māniñedē incæ tōmengā ingante ñnque timpote edæ ængæ gantidēnāni wægongacāimpa. ²⁶ Ayæ, Itota wæncæcāimpa, ante quīnante apænte ānāni, ante tōmānāni ponte adinque ēñencædānimpa, ante yewæmōninque, “Oodeoidi Awēnē Odeye ñnongā ingampa,” ante yewæmōninque awæmpa wo cædānitapa. ²⁷ Ayæ wada nē ō ænte quēwēnāna ñnate adoyedē tōmengā tōnō adocanque tōmēmæ ñnō adocanque dipæmæ ñnō godō timpote gantidēdāni wægongadāimpa. ²⁸ Ñnque, Nē ēñēnāmaī cædāni nāni cabo tōnō tōmengā adocā ingampa, ante Wængonguī angā ēñente nāni yewæmongainō bai ñōwo ñnque bagatimpa.

²⁹ Ayæ wodo pænta nē godāni guiquēnē Itota ingante godō babæ ante badete todinque pica pica cædinque,

—Bitō iñæmpa Wængonguī tæiyæ wæmō oncō incæ bæ tate wo ewēninque mēōnaa go adoōnæque iñonte do mænonguimi inte edæ, ³⁰ o togæmpote o togæwate ti wææninque edæ quēwēmāwe.

³¹ Ayæ, Wængonguī quī, ante nē godōnāni ñænænāni tōnō nē wææ odōmōnāni adobaī nāni cabo nāmāneque godongāmæ badete todinque,

—Tōmengā, Wadāni quēwencædānimpa, ante waa cæcantawoo. Ñōwo iñæmpa. Nāmā beyænque eyepæ cæcampa diyæ quēwenguingāā. ³² Idægoidi awēnē odeye ingā ñnque tōmengā ti wæænte gocā adinque mōnitō wæætē, Tōmengā nāwā Codito ingampa, ante pōnēmaī wædō.

Ante badete toyōnāni nē ō æna tōmengā tōnō godongāmæ timpote wægōna incæ adobaī Itota ingante piñinque wēnæ wēnæ ante badete togadāimpa.

Itota wængampa

(Māateo 27.45-56; Odoca 23.44-49; Wāō 19.28-30)

³³ Tæcæbæcā pōni bayō tōmāmæ iñontobæ wēmō badinque ayæ ayaōnāa wæiganca mæ māmōnte bai ñnimpa. ³⁴ Ñnque ayaōnāa wæiyōnte Itota nanguī pōni yedæ āninque, “Edoi, Edoi, nēma tabatāni,” āninque mōnō tededō, “Botō Wængonguīñāa, botō Wængonguīñāa, ædō cæte botō ñmote emō cæte gobiyaā.”

³⁵ Ante wæcā ēñēninque godāmæ ongōnāni guiquēnē,

—Æ. Ediya wodi ingante aa pecā apa.

³⁶ Āñōnāni adocanque do pogodo gote ōnætāmō ænte pōninque biñōmæ bai ōnōmænque æninque aa bedōnte nææninque edæ, Becæcāimpa, ante cædinque cæwipaca pædæ æænongantapa.

—Ee aquënë quëwëedáni. Ediya wabänö ponte o togænte pædæ wæænongä abaimpa.

³⁷ Angä ate Itota iñömö wæætë ogæ äninque edæ æmæwo guëmäninque wængacäimpa. ³⁸ İninque edæ Wængongui tæiyæ waëmoncönë weocoo odemö nani wææ wodöincoo adoyedë önönæca inö tæcæguedë pöni tænguimæ wææntapa. ³⁹ Mänömaï ogæ äninque do wængä adinque tontadoidi awënë capitäo guiquënë,

—Näwangä impa. İngä iñömö Wængongui Wengä ingainö ante pönenguënë, angacäimpa.

⁴⁰ Ayæ onquiyænäni Mäadiya Mäagadadënë nani änogä, Otite tönö Tantiagomö badä Mäadiya, Tadömee, mänimpodäni adobaï oo gote gomö a ongönänitapa. ⁴¹ Tömënäni iñömö Gadideabæ quëwengänedë Itota miñæ gote pönö waa cædinäni inte ñowo pö gobæ ongöninque pömö adänitapa. Itota Eedotadëe pö æñongante wadäni onquiyænäninque godongämæ tee empote pöninäni inte ñowo pöninque a ongönänitapa.

Itota wodi baö ini mäo daga wënänipa

(Máateo 27.57-61; Odoca 23.50-56; Wäö 19.38-42)

⁴² Oodeoidi nani, Gäwadecæ ba ate guëmanguiönæ inguimpa, ante nani täno cæönæ ingatimpa. İninque gäwadecæ oo ba ate wædinque, ⁴³ Adimatea iñömö quëwëningä inte Ootee, Wængongui Awënë Odeye nempo mönö æyedëno quëwengäimpa, ante wänö conte baï quëwënogäimpa. Tömengä oodeoidi nani Apænte Äincabo adocä İnogä inte ñænængä İnogäimpa. Tömengä iñömö Pidato weca ñowo guïñänamaï pö guidinque, Itota wodi baö pönömi ænte wëmoe, angantapa. ⁴⁴ Angä ëñëninque Pidato, Wa. Wabänö wængäi, ante pönente wædinque awënë capitäo ingante äñete pongä adinque, Do wængäi.

⁴⁵ Äñongante edæ, Dobæ wængäimpa, ante apænecä ëñëninque Pidato wæætë Ootee ingante, Itota wodi baö ini o togænte æmäwe. ⁴⁶ Angä ëñëninque Ootee iñömö edæ waëmö weocoo ñino nani änoncoo godonte æninque Itota wodi baö ini wi æmpote wææ wi æwadinque pædæ wæænonte ænte gocantapa. Ayæ mänincoo wïni wïni caate dicamontaa wointatodë guidö ñö cæte daga wëninque dicabo edæ da pæñæ pönö tee mönogacäimpa.

⁴⁷ Mänömaï cæyongante Mäadiya Mäagadadënë nani änogä tönö Otite badä Mäadiya mänimpodaque tömengä ingante nani da wëniñömö adatapa.

16

Itota do wëningä inte nani ömæmonte quëwengampa

(Máateo 28.1-10; Odoca 24.1-12; Wäö 20.1-10)

¹ Tömënäni guëmanguiönæ İnque go ate Mäadiya Mäagadadënë nani änogä tönö Tantiago badä Mäadiya tönö Tadömee tömënäni iñömö, Itota wodi baö öni pæcäimpa, ante cædinque ogui waqui godonte æñänitapa. ² Ænte ate wacä tæmäna baquinque ñäö tæcæ bayonte İñäni do godinque nænque tæcæ mæ awæ nanö tamöñedë Itota wodigo pöninque, ³ nämäneque äñänitapa.

—Dicabo nani moncadodınca æcänö tæi piñængä inte pönö da tæñæna ate mönö guiite aquï. ⁴ Ante wædinque go gongænte pömo ayönäni dicabo ñænængade pöni nani äninca incæ dobæ dicabo ñænængade pöni do da tæñæi a öñö adänitapa. ⁵ Adinque tömengä wodigo wäänë guiite ayönäni edëningä bai ingä doyæncoo näämænta ëmoncoo wëñate tömëmæ inö tæ contate a ongongä adinque onquiyænäni wæætë edæ ancai guiñente wædänitapa.

⁶ Edëningä iñömö,

—Guññente wædämaï iedäni. Minitö, Itota Näatadeta quëwëningä ingante edæ wadäni awæ timpodäni ate nê wæningä ingante edæ diqui diqui mïmïni awædö. Tömengä edæ dobæ ñäni ömæmonte tao gocäimpa. Iñömö edæ dæ angampa. Iñtodê nänö öñontatodê iñömö edæ önotatoque ïi ataqueedäni. ⁷ Ayæ Pegodo tönö tömengä nänö nê emïñænïnäni tömänäni inänite gode ante apænedinque mïnitö nê adimïni inte iïmaïnö ante apænecämïnimpa. “Itota iñömö tãno Gadideabæ godinque a ongöñongante mïnitö adoyömö godinque tömengä nänö äninö bai godinque tömengä ingante acæmïnimpa,” ante gote apænedäni.

⁸ Ante apænecä eñëninque, Æbänö ante mänömaï angää, ante ancai guññente do do wäate wædinque onquiyænäni iñömö Itota wodido abæ tawæ tao wodii winönänitapa. Guññente wædönäni inte tömënäni wadäni inänite bee téninque apænedämaï pæ wëënegadänimpa.

*Itota ingante Mäadiya Mäagadadënä acampa
(Wäö 20.11-18)*

⁹ Itota tömënäni nãni guëmãniönæ go ate iïmö baänæque do ñäni ömæmonte pö a ongöñongante Mäadiya Mäagadadënä tãnocä agacäimpa. Iñgä onquiyængä iñömö wëëneñedê wënæidi tiæte ganca inäni ênempoyongante Itota wido cædongäimpa. ¹⁰ Ñöwo iñömö Itota miñæ nãni quëwëincabo ayæ ca wæwëñönänite Mäadiya Mäagadadënä incæ tömënäni inänite mäo apænecantapa. ¹¹ Itota ayæ müingä ingä atabopa, ante apænecä eñëninque tömënäni wïi pönënänique ongongadänimpa.

*Wada tömengä nänö nê emïñænïna Itota ingante adapa
(Odoca 24.13-35)*

¹² Mänömaï wïi pönënäni ate tömënäni nãni Itota miñæ godincabo incæ mënaa idömæ gote ayöna Itota incæ wacä bai bate cægongä adatapa. ¹³ Ate wædinque tömëna wadæ godinque Itota miñæ nãni godincabo wadäni inänite apænedinque, Mänömaï cægongä atamönäna, äna eñëninque edæ cöwê pönënämaï ingadänimpa.

*Tömengä nänö da godönïnäni inänite Itota angampa
(Mäteo 28.16-20; Odoca 24.36-49; Wäö 20.19-23)*

¹⁴ Ayæ ate onte ganca inäni nãni Itota miñæ godincabo cænte tedete a cöñönäni Itota pö a ongongä adänitapa. Tömengä iñömö, Minitö pönëegade impa. Wadäni, Itota do edæ ñäni ömæmonte cægongä atamönäna, ante apænedäni eñëninque mïnitö mïmö ömædëmïni inte wïi pönëmïni, ante Itota pïngacäimpa.

¹⁵ Ayæ tömënäni inänite, “Wængonguï nänö badongainäni inguipoga tömäo quëwënäni iñönänite mïnitö botö imotedö ante mäo tömänäni inänite wat-apæ apænemïni eñencädänimpa. ¹⁶ Edæ æcänö wede pönëninque æpænê guïda tömengä botö godö æmo beyænque quëwencæcäimpa. Wæætê nê pönënämaï ingä guiquënë tömengä nänö apænte pante wæquinque pönënämaï ingampa. ¹⁷ Botö cæbo ate nê pönënäni adobaï edæ iïmaï mä cädäni adinque wadäni do eñencädänimpa. Botö emöwo apænedinque tömënäni wënæidi inänite wido cæcädänimpa. Ayæ wadäni tömënäni tededö mä tedecädänimpa. ¹⁸ Ayæ tæntæ bæi ongönäni incæte wænguimæ bedäni incæte wënæ wënæ badämaï incädänimpa. Ayæ caate wædäni inänite gampodäni ate do waa bacädänimpa,” ante Itota apænegacäimpa.

*Itota incæ öönædē æicampa
(Odoca 24.50-53)*

¹⁹ Īnque tōmēnāni ĩnānite apænecā ēñēnāni ate edæ Wængonguī öönædē ængö cæcā æidinque Wængonguī tōmengä nānō tōmēmæ ĩnō mōnō Awēnē Itota ĩñōmō tæ contagacāimpa. ²⁰ Īnque tōmengä nānō ēmiñænīnāni wæætē edæ tōmāmæ wadæ godinque wabæca māo wabæca māo apænedāni ēñēnānitapa. Mōnō Awēnē incæ cæcā ate tōmēnāni mā cædāni adinque nē ēñēnāni wæætē, Nō impa, ante wægadānimpa. Māninque ante yewæmonte impa.

Itota Codito ingantedö ante Odoca nänö watapæ ante yewæmongainta

Odoca imo yewæmömopa, ante

¹ Nöwodäni nangui Inäni incæ, Mönitö weca æbänö linque cægatimpa, ante do yewæmoncæ cædänipa. ² Doyedë quëwënnäni iñömö, Æbänö cægatimpa, ante nê agaiñäni inte mäninö ante, Näwangä impa, ante nê apænedäni badingque adode beyæ ante nê cædäni bagadänimpa. Tömënnäni mönitö imönite adodö ante pönö apænedäni ëñentamönipa. Inique iñäni apænedäni möni ëñënö bai ñowodäni wæætë edæ adobai pöni ante yewæmoncæ cædäni inique botö iñömö edæ, Adobainö ante yewæmoncæboimpa, antabopa. ³ Teopido bitö ñænæmi pöni inömi inte ëñëmi. Botö iñömö, Wëenëñedë æbänö mä pöni cægatimpa, ante ayæ, Nöwo ganca æbänö cæte i, ante ëñencæte ante nangui cædinque ædæmö ëñënimö inte botö edæ, Bitö Teopidobi acæbiimpa, ante adodö adodö ante yewæmömopa. ⁴ Wadäni odömönte apænedäni ëñëninque bitö wæætë, Nö intawo, ante ëñencæte ante cædinque botö yewæmöninta adinque edæ do ëñencæbiimpa. Mänömainö ante yewæmömö ae.

Wäö ëñaquingä, ante anquedo ponte apænecampa

⁵ Wængongui quï, ante nê godönäni pancadäniya Abiyaidi nani cabo iñönänite adocanque Tacadiya ëmongacäimpa. Tömengä iñömö Oodeabæ awënë odeye Edode wodi nänö ingaiñedë, Wængongui quï, ante nê godongä ingacäimpa. Tömengä nänöogængä Aadöo wodi pæingä Editabeti ingacäimpa. ⁶ Tömëna iñömö nana gæncaya inöna inte Wængongui ayongante nö cæte quëwëninque Wængongui, Imai cæedäni, ante nänö wææ angainö ante ëñente quëwëñönate wadäni, Eñënamai quëwënapa, ante ædö cæte anguinäni. ⁷ Editabeti owæntacä inte wëñæ mänämai quëwëñongante wëñæ dæ ä wædinque nana gæncaya picæna badingque quëwengadaimpa.

⁸ Dæ ä wædinque quëwëñönate Tacadiya wodi tönö godongämæ nani godoncabo nani godöñedë ba inique tömengä iñömö, Wængongui quï, ante godongantapa. ⁹ Godöñongante tömënnäni, Æcänö ñöwo guiddinque ogui waqui tanguingä, ante acæte ante cædänitapa. Tömënnäni cöwë nani cæi bai cædinque tömënnäni ëmowo wataa wataa yewæmöninque adoyömö da wëninque adotaque tadonte adänitapa. Ayönäni, Tacadiya ëmowo impa, ante adinque ännäni ëñëninque tömengä Awënë Wængongui tæiyæ wæmö oncönë guiddinque ogui waqui tangantapa. ¹⁰ Woadäni tömänäni, Nöwo ogui waqui iya tangæimpa, ante yabæcönë godongämæ pöninque Wængongui ingante apænegadänimpa. ¹¹ Tacadiya iñömö tæcæ tancæ cæyongä Wængongui nänö da pönöningä anquedo tömënnäni nani iya täimpaa gäänë tömëmæ inö pö næ gongænte a ongongä acantapa. ¹² Adinque Tacadiya, Æbänö cæquï, ante ancai guïñente wæcantapa. ¹³ Wæyongante anquedo guiquënë,

–Tacadiya, guïñënamai ie. Bitö Wængongui ingante apænebi ëñëninque tömengä bitö äno ante do cæcampa. Bitö nänöogængä Editabeti iñömö onguïñængä ingante mancæcäimpa cæbii. Mangä ëñacä adinque bitö tömengä ëmowo, Wäö, pemoncæbiimpa. ¹⁴ Wëñængä waa pöni ëñacä adinque bitö watapæ tocæbiimpa. Wadäni nangui Inäni adobai wëñængä ëñacä ate

tocædânimpa. ¹⁵ Wængonguī incæ, Botō ayōmo bitō wengā wadāni bai guiyā ināmai n̄ænængā pōni ingā abopa, angā beyæ waodāni adobai tōmengā beyæ ante adinque tocædânimpa. Yowepæ biinōmæ incæ wapæ incæ tōmengā tī nāmæ tōmāmæ bedāmai incæcāimpa. Wäänā cæncadē ayæ ongōñongante Wængonguī Tæiyæ Waēmō Ōnōwoca incæ tōmengā pō guicæcāimpa. ¹⁶ Ayæ bitō wengā picængā badinque māo apæneçā ēñēninque idægoidi nanguī nāni Wængonguī gāmænō poncædânimpa. ¹⁷ Ayæ Wængonguī Ōnōwoca ingante Ediya wodi nānō ēwocagāi bai adobai ēwocadinque bitō wengā iñōmō adocā nānō tæi piñængāi bai adobai tæi piñængā incæcāimpa. Ininque tōmengā iñōmō mōnō Awēnē nānō ponguīnō ante tāno beyænte bai cædinque odōmongā ate mæmpoidi wēñænāni inānite pōnente waadete cæcædânimpa. Ayæ tōmengā apæneçā ēñēninque nē ēñēnāmai cædāni incæ nō cæte quēwēñāni nāni ēñēnō bai nō ēñente cæcædânimpa. Mānōmai cædinque bitō wengā adocā apæneçā ēñente cædinque waodāni mōnō Awēnē nānō ponguīnō ante eyepæ pōni cædinque tōmengā ingante ante wānō concædânimpa. Mānōmainō ante anquedo Tacadiya ingante apænegacāimpa.

¹⁸ Angā ēñēninque Tacadiya wæætē anquedo ingante apænedinque,

—In̄æmpa botō nānōogæñā picænā inampa. Botō adobai picæmo imopa. Ædō cæte, Nō impa, ante ēñenguimoo.

¹⁹ Añongā anquedo wæætē,

—Botō Gabodiedo ingaimo imo apa ānewēē. Wængonguī weca nē ongōmo iñōmote tōmengā iñōmō, Botō watapæ apænedō ante bitō Tacadiya ingante apænete pōe, ante da pōnogā pontabopa. ²⁰ Nōwo iñōmō botō ānō pōñēnāmai imi inte bitō babetadebi badinque tededāmai iñōmite botō apænedō ante iinque cæbo ba ate tedecæbiimpa, ante anquedo Tacadiya ingante apænegacāimpa.

²¹ Mānōmai tedeyōna wadāni, Tacadiya taqingā, ante wānō cōninque, Wængonguī tæiyæ waēmō oncōnē guidinque æiquedō taqingā, ante wægadânimpa. ²² Tōmengā tadinque tededāmai ingantapa. Ayæ godōmenque tededāmai inte ōnompoque oo cæpo oo cæpo cæcā adinque tōmēnāni, Wængonguī tæiyæ waēmō oncōnē guiti ongōninque Tacadiya wūimonte bai mā pōni adingā inte nōwo edæ babetadecā inte tacampa, ante wædānitapa.

²³ Wængonguī beyæ ante cæe, ante nāni iinque āniōnæ ganca cædinque Tacadiya wodi oncōnē gocantapa. ²⁴ Māniñedē ate tōmengā nānōogængā Editabeti yædēmadā badinque edæ ōnompo æmæmpoque apāicā ganca oncōnē wē womongantapa. ²⁵ Tōmengā iñōmō edæ, “Wēēñēñedē, Owæntabi imipa, ante piñāni wæbo adinque Wængonguī botō imote waadete pōnō cædinque nōwo wæætē, Piñāmai incædânimpa, ante cæcampa,” ante pōñēninque Editabeti togacāimpa.

Itota ēñaqingā, ante

²⁶ Editabeti ōnompo æmæmpoque go adoque apāicā yædēmadā nānō iñedē Wængonguī tōmengā anquedo Gabodiedo nāni ānogā ingante da pōnogā pōninque Gadideabæ Nāatadeta nāni quēwēñōmō gocantapa. ²⁷ Godinque tōmengā baquēcā Māadiya nāni ānogā weca pongantapa. Tōmengā ingante Awēnē Dabii wodi pæingā Ootee, Monguimo, ante do āningā inongāimpa.

²⁸ Ininque anquedo Gabodiedo Māadiya weca pō guidinque tōmengā ingante, —Wængonguī nānō nē waadebi inte ēñēe. Wængonguī bitō imite waa cæcæcāimpa. Wadāni onquiyænāni inānite Wængonguī pōnōmenque pōnō waa cædongā inte bitō imite edæ godōmenque waa pōni pōnō cæcā acæimpa.

²⁹ Ante tæcæ apæneyongä tömengä ancai guññenique, Quinö bai i ante botö imote apænecää, ante wæcantapa. ³⁰ Wæyongante anquedo wæætë,

–Mäadiya, bitö guññenämaï ie. Wængongui incæ edæ bitö imite nanguï waadete pönö acampa. ³¹ Bitö ñowo edæ yæðemadä badinque bitö wëñængä onguññængä mancæbiimpa. Tömengä ëñacä ate bitö tömengä ëmowo, Itota ingampa, ante pemoncæbiimpa. ³² Tömengä iñömö edæ nanguï tæï piñænte cæcä incæcäimpa. Ìninqe tömengä ingantedö ante, Æibæ pöni nè Quëwengä Wengä ingaingä ingampa, ante apænecæimpa. Ayæ Awënë Wængongui incæ tömengä ingante apænedinque, Bitö Awënë bayömi mæmæ awënë odeye Dabii wodi nempo dodäni nani quëwengai bai bitö nempo adobai quëwencädänimpa, ante adocä Itota ingante pönongä ænte Awënë Odeye bacæcäimpa. ³³ Ìninqe Aacoboidi tömengä nempo quëwëñönänite tömengä cöwë tömënanï Awënë Odeye incæcäimpa. Tömengä nanö Awënë Odeye inguimämo iñömö edæ dæ badämaï ingæimpa, ante Wængongui nanö da pönöningä Mäadiya ingante angantapa.

³⁴ Mäadiya wæætë tömengä ingante,

–Botö iñæmpa onguññængä tönö mönämäï inte wëñæ ædö cæte man-guimoo.

³⁵ Ante wæyongante anquedo wæætë edæ,

–Wængongui Tæiyæ Waëmö Önöwoca incæ bitö weca poncæcäimpa. Wængongui Æibæ Quëwënongå tömengä nanö tæï piñænö incæ wææ owo bai cæcæcäimpa. Mänömaï beyæ bitö Wëñængä Onguiñængä incæ Tæiyæ Waëmö ëñacä ate, Wængongui Wëñængä ingampa, ante pemoncädänimpa.

³⁶ Ayæ godömenque apænebo ëñëe. Editabeti bitö guidengä iñömö picængade pöni iñongante, Owæntacä ingampa, ante tededänitawo. Incæte tömengä picængadecä incæ dobæ edæ önompo æmæmpoque go adoque apäicä yæðemadä inte tömengä wëñængä edæ onguññængä ingante ënengampa.

³⁷ Ìñæmpa quiëmë ante Wængongui nanö änönö ante tömää edæ cöwë cæcæcäimpa.

³⁸ Ante anquedo angä ëñente wædinque Mäadiya,

–Mönö Awënë beyænque nè cæbo imopa. Bitö änö bai Ao ämo bacæcäimpa.

Ante apænecä ëñëninque Wængongui nanö da pönöningä incæ ëmö cæte wadæ gogacäimpa.

Editabeti weca Mäadiya ëñacë gocampa

³⁹ Mäniñedë ate Mäadiya wodi wadæ godinque änämænë quingæ æidinque Oodeabæ quëwënanï nani quëwëñömö adoyömonque incæ pöninque,

⁴⁰ Tacadiya oncönë pö guidinque Editabeti ingante, Waa quëwëmi, angantapa. ⁴¹ Mäadiya mänömaï apænecä ëñëninque Editabeti wodi wengä cæncadë ongöninque wogæi wogæi tocantapa. Editabeti iñömö Wængongui Tæiyæ Waëmö Önöwoca incæ tömengä pö guicä Ìninqe ædæmö pöni ëwocacä bacantapa. ⁴² Mänömaï badinque adocä ogæ tededinque,

–Mönö onquiyæncabo iñömönte bitö adobique bitö waa toquinque impa, angantapa. Wængongui wamöni imönite pönömenque waadedinque bitö iminante godömenque nanguï waadecampa. Bitö nè ënënongå ingante Wængongui nanguï waadecä beyæ tömengä adobai tocæcäimpa. ⁴³ Botö önömoque iñömöte bitö iñömö mönö Awënë badä inömi inte edæ botö weca quïnante pömii. ⁴⁴ Tæcæ edæ apænebi önömonca ëñëñömo botö cæncadë nè ongönongä incæ wogæi wogæi watapæ tocä ae. ⁴⁵ Mönö Awënë bitö imite

nänö äninö ante bitö iñömö, Tömengä cöwë cæcæcäimpa, ante pönëninque bitö toquinque edæ nē pönëmi imitapa.

⁴⁶ Editabeti mänömaï apæneyongä Mäadiya wæætë ämotamini ante bai iïmai angacäimpa.

“Botö mímöno pönëninque, Mönö Awënë iñömö edæ waa pönï mönö inongä ingampa, ante watapæ apænebopa.

⁴⁷ Ayæ, Quëwencæbiimpa, ante botö imote nē Ængä iñongante botö Wængongui ingante ante pönëninque edæ watapæ tote ëwocabopa.

⁴⁸ Botö tömengä ingante nē cædömo inte önömoque pönï iñömote tömengä wæætë botö imote waa acampa.

Iïncayæ nänömoidi wææ iïncayæ nänömoidi wææ inäni tömänäni botö imotedö ante apænedinque,

Tömënä iñömö Wængongui nänö nē waadedä ingadäimpa, ante apænecädänimpa.

⁴⁹ Wængongui nē Tæi Piñænongä inte botö imote pönö nanguï cæcä beyænque edæ apænecädänimpa.

Tömengä ëmöwo iñömö edæ Tæiyæ Waëmö ëmongampa.

⁵⁰ Ayæ iïncayæ nänömoidi wææ iïncayæ nänömoidi wææ inäni tömengä ingante guïñente cæyönänite tömengä wæætë waadete pönö waa cæcæcäimpa.

⁵¹ Tömengä nē tæi piñænongä inte tömengä önompoca cæte bai nanguï cæcantapa.

Ayæ wadäni, Tömëmoque waëmö imopa, ante önöwëninque pönënanï inänite tömengä angä näwæ godänitapa.

⁵² Ayæ awënëidi nänï tæ contaimpaa ongöñönänite tömengä tömënanï inänite wido cæcä godänitapa.

Wæætë önönänique inänite ængö cæcä contadinque tömënanï wæætë awënëidi bai badänitapa.

⁵³ Ayæ gue ænente wædäni iñönänite tömengä waa pönï cængui godongä æninque tömënanï tömo pönï cænänitapa.

Wæætë nanguï eadäni tömënanï inänite da godongä godinque ömæpodäni inte godänitapa.

⁵⁴ Mönö idægocabo iñömö tömengä ingante nē cæmö iñömote tömengä mönö tönö godongämæ cæcantapa.

Ayæ, Waadete botö pönö waa cægainö bai adodö cæcæboimpa, ante pönëninque tömengä ñöwo pönö waadete waa cæcä æmompä.

⁵⁵ Abadäo wodi pæimö iñömote tömengä mönö mæmæidi inänite nänö angainö bai cædinque,

cöwë ñimpo cædämaï inte pönö waadete cæcampa.”

⁵⁶ Ante Mäadiya wodi ämotamini ante bai angantapa. Ayæ Editabeti weca mëa go adoque apäicä quëwente ate ayæ ate tömengä oncönë gogacäimpa.

Wäö ëñacampa

⁵⁷ Editabeti wodi guiquënë oo pönï ënëninque tömengä wëñængä onguïñængä mangacäimpa. ⁵⁸ Ayæ tömengä guiidënanï tönö godongämæ quëwënanï iñömö, Æ mönö Awënë wii plingä inte Editabeti ingante ædæmö waadete waa cæcampa, ante tæcæ ëñëmönipa, äninque Editabeti tönö godongämæ togadänimpa. ⁵⁹ Ayæ adoque Wængongui itædë go ate wëñængä ingante æmontaique eö togæncæ cædäni iñömö godongämæ pöninque tömengä wæmpo ëmöwo bai ante, Tacadiya, ante pemoncæ cædänitapa.

⁶⁰ Cæyönänite wäänä Baa äninque,

—Tömengä ëmöwo Wäö ëmoncæcäimpa, ante wææ angadäimpa.

61 Āñongante tōmēnāni wæætē,

—Īñampa bitō guidēnāni Wāō ēmōnāmai. Dæ āmōnānipa.

62 Āninqwe wæmpocā ingante omō cædinque, Æmongānō ēmonguingā āmii, ante odōmōmi amōnii. 63 Āñōnānite tōmengā tededāmai Īnongā inte ōnopocaque odōmongā adinque yewæmōinta æninqwe pædæ pōnōnāni ate tōmengā Īñōmō edæ, “Tōmengā ēmōwo Wāō ēmoncæcāimpa,” ante yewæmongā adinque tōmānāni edæ guīñente wægadānipa. 64 Yewæmongā ate tōmengā ōnonguēnēwa ñīmæ cæguēnēwate bai baguēnēwate ate edæ tōmengā ogæ tededinque Wængonguī ingante, Waa pōñi cæbi abopa, ante watapæ edæ apænecantapa. 65 Īninqwe māñīñōmō godongāmæ quēwēnāni tōnō Oodeabæ ānāmēnē quēwēnāni tōnō tōmānāni, Mānōmai batimpa, ante nanguī tededānitapa. 66 Tededāni ēñēninqwe nē ēñēnāni wæætē, “Īngā wēñēngā Īñōmō æbānō nānō baquinque edæ pæquingā,” ante tōmānāni godongāmæ wægadānipa. Edæ tōmengā tōnō Wængonguī godongāmæ cæcā ingacāimpa.

Tacadiya āmotamīni ante angampa

67 Wēñēngā wæmpocā Tacadiya guiquēnē Wængonguī Tæiyæ Waēmō Ōnōwoca ingante ēwocadinque Wængonguī beyæ apænedinque āmotamīni ante bai apænecantapa.

68 “Mōnō idægocabo Wængonguī Īñōmō adocā mōnō Awēnē Īñongante mōnō tōmengā ingante waa ate watapæ apænecāimpa.

Tōmengā Īñōmō, Botō quīnāni bate abæ tawænte bai quēwēncædānipa, ante tōmengā do æncæ pongā acāimpa.

69 ‘Ōnōmoncawæ wææ ēmoncate bai wææ gom pocæcāimpa,’ ante cædinque tōmengā mōnō imonte nē ænguingā ingante da pōnongā pōninqwe Īngā wæætē ængā beyænque quēwēmōmpa.

Wængonguī ingante nē cægaingā awēnē odeye Dabii wodi pæingā Īnongā inte tōmengā mānōmai cæcā beyænque quēwēmōmpa.

70 Wængonguī Īñōmō tōmengā beyæ nē apænegaināni tæiyæ waēmō ingaināni Īñōnānite tōmēnāni tōnō apænedinque,

Cōwē cæcæboimpa, ante nānō apænegainō bai ñōwo edæ Īnque cæcampa.

71 Mōnō Īñōmō nē piinte ānāni nempo ongōñōmonte tōmengā,

Piinte cædānipa, ante adinque mōnō imonte gā pe æmpote ō ængā beyænque quēwēmōmpa.

72 Mānōmai cædinque tōmengā mōnō mæmæidi inānite nānō angainō bai cædinque ñōwo waadete pōnō cæcampa.

Ayæ, Botō pōnō cæbo ate mīnitō Ao āmīni Īninqwe mōnō godongāmæ wææ cæte quēwēngæimpa, ante tōmengā tæiyæ waēmō nānō angainō ante cōwē pōñēnongā inte ñōwo Īnque cæcampa.

73 Edæ mæmæ Abadāō wodi ingante, Botō nē Quēwēmo ingāimo inte nōingā āmopa,

ante Wængonguī Īmāinō ante nānō pōnō cæquīnō ante nō apænegacāimpa.

74 Abadāō ēñēmi. Nē piinte cædāni nempo wæwēñōmīnite botō gā pe æmpote ō æninqwe

pōnō cæbo ate eyepæ badinque mīnitō wæætē guīñēnāmai inte botō Wængonguī Īmo beyæ cæcæmīnimpā, ante Wængonguī nē pōnō cæquingā inte apænegacāimpa.

75 Wængonguī Īñōmō edæ, Mīnitō tæiyæ waēmō ēwocadinque mīni quēwēnganca

botō weca nō pōni cæte quēwencæminimpa, ante pōnō cæcā ingacāimpa,” ante wēñængā mæmpocā Tacadiya wodi apænecantapa.

⁷⁶ Ayæ wēñængā ingante tōmengā īīmaī ante godōmenque apænecantapa.

“Botō wēmi bitō īmite botō wæætē apænebo ēñēe, angantapa.

Nē Æibæ Pōni Quēwengā beyæ bitō nē apænebi inōmi īmipa, ante bitō īimitedō ante apænecædānimpa.

Mōnō Awēnē taadō pīnongæimpa, ante bitō edæ tāno beyænte gote bai cædinque,

⁷⁷ mōnō Awēnē quīnāni īnānite īīmaī ante odōmonte apænecæbiimpa.

Wēnæ wēnæ mīni cædō ante Wængonguī pōnō īmpo cæcā ate mīnitō īñōmō edæ,

Tōmengā ængā beyænque mōnō quēwenguī impa, ante do ēñencæminimpa, ante apænebi ēñencædānimpa.

⁷⁸ Edæ mōnō Wængonguī incæ mōnō wēnæ wēnæ wædōnō ante waadete pōnō waa cædinque,

ōōnædē Quēwengā ingante mōnō weca da pōnongā pōninque nænque tæcæ tamō bai ēmongā acæimpa.

⁷⁹ Mānōmaī cædinque mōnō wænguīmāmo beyæ wēmō īñōmō awædō,

ante wæyōmonte tōmengā ponte a ongongā adinque mōnō nænque pāmo oo tote bai quēwēmompā.

Ayæ, Mīnitō mīni gānē pōnente quēwenguīnō taadonque poncæminimpa, ante tōmengā tōō æmænte māmongā pōmompā.”

Mānōmainō ante Tacadiya wodi tōmengā wēñængā ingante apænecacāimpa.

⁸⁰ Wēñængā īñōmō do pædinque ōnōwoca tæī pīñænte ēwocagacāimpa. Idægoidi weca tōmengā nānō ponte a ongonganca ōnōmæca quēwengacāimpa.

2

Itota ēñacampa

(Māateo 1.18-25)

¹ Wāō idægoidi weca nānō pōñedē īinque bayonte awēnē Tetædo Agoto īñōmō, Æpomīnidō īmīni, ante acæte ante cædinque odōmāno ōmæ nē quēwēnāni īnānite edæ, Mīnitō ēmōwo tōmāmīni yewæmoncæminimpa, angacāimpa. ² Tidiabæ awēnē Tidēnio ingāñedē odōmāno awēnē tāno angā.

³ Ēñēinque adocanque tōmengā mæmæīdi nāni quēwengāīñōmō wacā tōmengā mæmæīdi nāni quēwengāīñōmō tōmānāni yewæmoncæte ante edæ go cægadānimpa.

⁴ Īinque Oodeabæ Awēnē wodi Dabii wodi pæingā īnongā inte Ootee īñōmō Gadideabæ Nāatadeta nāni quēwēñōmō quēwēninque adobai tōmengā mæmæ Dabii wodi nānō quēwengāīñōmō Bedēē īñōmō gogacāimpa. ⁵ Edæ Ootee nānōogængā inguingā Māadiya yædēmadā īñongante tōmēna nāna næncaya inguina guēa yewæmoncæ godatapa. ⁶ Bedēē ponte quēwēñōna Wēñængā īñōmō īinque pædinque ⁷ hamoncadengā incæ onguīñængā inte īīmaī ēñagacāimpa. Māniñōmō monguī incōnē īñōmō māniñedē eyede pōni goti ongōnāni ate wædinque tōmēna wæætē cænēnāni cænguī oncontaidē guiyantaidē go guīda ate Wēñængā ēñacantapa. Īinque guiyantaidē ēñacā ate wāānā Wēñængā ingante weocoo wīni wīni caadinque cænēnāni cænguīncadedē nō cædā ōñongantapa.

Obegaidi īnānite nē aadāni īnānite anquedoidi apcænedāni

⁸ Idægoidi cænīnāni obegaidi nāni ānōnāni iñōnānite nē aawēnāni iñōmō eyepancadē adoōnæ woyowotæ a cōnōnānīmpa. ⁹ A cōñōnāni mōnō Awēnē anquedo ponte a ongōñongā mōnō Awēnē nānō ñāō ēmōnō beyænque godongāmæ guīnæ gongæ adīnque nē aadāni ancai guīñente wædānitapa. ¹⁰ Anquedo iñōmō tōmēnāni iñānite, “Guīñēnāmaī īmāewedāni. Mīni nangui ēñente toquinque ante botō ñōwo watapæ apænebo ēñēedāni. Mīnitō tōnō inguipoga tōmāo quēwēnāni adobaī adode beyænque watapæ tocæmīnīmpa. ¹¹ Mōnō Awēnē Codito iñōmō, Æmo beyænque quēwēncæmīnīmpa, ante nē Ængā baquīngā īnongā inte do edæ ēñacantapa. Edæ mīnitō beyæ ante tōmēngā ñōwoōnæ īncæ awēnē Dabii wodi nānō quēwēngaiñōmō ēñacantapa. ¹² Nō īmpa, ante gote acæmīnīmpa. Wēñængā īngante wāānā wīni wīni caadīnque edæ cænīnāni cænguīncadedē ñō cædā ate a oñongā adīnque mīnitō, Nō īmpa, ante ēñencæmīnīmpa.”

¹³ Ante anquedo āñongā wadāni nangui īnāni oōnædē owodāni īncæ iñontobæ tontadoidi ongōnāni baī tōmēngā tōnō godongāmæ ponte a ongōnīnque āmotamīni ante baī ānīnque Wængongui īngante iīmaī ante watapæ apænedānitapa.

¹⁴ “Wængongui æībæ pōnī quēwēnongā inte edæ ñāō apāite baī ēmongānō anguēnē. Tōmēngā inguipoga iñōmō waadete pōnō cæcā beyænque mīni waocabo edæ gānē pōnenguīmīnidō anguēnē.”

¹⁵ Ante āmotamīni ante baī ānīnque anquedoidi oōnædē adodō wadæ æite godāni ate nē aawēnāni iñōmō nāni cabo tededīnque,

—Mōnō Awēnē mōnō īmonte apænecā mōnō ēñēnō ante, Æbānō cæcāī, ante mōnō Bedēē gote ædæmō acæīmpa. ¹⁶ Ānīnque pogodo ponte ayōnāni Māadiya tōnō Ootee a ongōñōna Wēñængā iñōmō cænīnāni cænguīncadedē a oñongā adānitapa. ¹⁷ Īnque adīnque wadæ godīnque, Wēñængā æbānō īngāā, ante anquedo apænecā nāni ēñēnō ante gode ā gode ā cæte wayōmō wayōmō quēwēnāni iñānite tededāni ēñēnānitapa. ¹⁸ Ēñēnīnque tōmānāni wæætē, Nē aawēnāni æbānō ante apænedāni, ante guīñente wædānitapa. ¹⁹ Māadiya guīquēnē, Wēñængā æbānō īngā ānāni, ante nāmā pōnēē congantapa. ²⁰ Nē aawēnāni guīquēnē, Wængongui ñāō apāite baī ēmōnongā inte pōnō waa pōnī cæcā æmōnīpa. Edæ anquedo nānō apænedō baī do cæcā amōnīpa, ante apænedīnque eyepancadē ocæ ēmænte gogadānīmpa.

Bitō Wengā, ante mæmpoda Wēñængā īngante Wængongui oncōnē cente pōnapa

²¹ Ayæ, Adoque Wængongui ītædē go ate æmontaique ēō togængæīmpa, ante idægoidi cōwē nāni cæī baī cædīnque Wēñængā īngante ēō togæñānitapa. Ayæ Māadiya yædēmadāmaī nānō īñedē anquedo nānō pemōnīnō baī ānīnque mæmpoda Wēñængā ēmōwo ante, Itota, pemongadānīmpa.

²² Wāānā mānīmpoōnæ wepæ ñāte īnampa, ante Mōitee wodi nānō angaimpoōnæ īinque go ate tōmēna, Wēñængā iñōmō Wængongui Awēnē quī īngampa, ante mōnō godongæīmpa, ante tōmēngā īngante Eedotadēē iñōmō ænte gogadānīmpa. ²³ Edæ, “Onguīñæñāni bamōncadēñāni tōmānāni tæiyæ waēmō bacædānīmpa, ante tōmēnāni Wængongui Awēnē nempō pædæ godongæīmpa,” ante Awēnē Wængongui nānō angainō ante ēñēnīnque Māadiya tōnō Ootee do cædatapa. ²⁴ Ayæ, Equemōna nāna gæncaya, Wængongui quī, ante godongæīmpa. Wīī mānōmaī cæte tæcæ wengā wengā pæda mēnaa īnate godongæīmpa. Ootee tōnō Māadiya iñōmō mānōmaī

cædinque, Wængongui qui impa, ante mēnaa inate ænte pōninque pædæ godōna ængacāimpa.

²⁵ Māniñedē adocanque edæ tōmengā ēmōwo Timeōnō Wængongui beyænque ante nō cædongā inte Eedotadēē iñōmō quēwengacāimpa. Idægoidi wampo pōnente quēwencædānimpā, ante Wængongui æyedēnō ædæmō cæquingāā, ante tōmengā wānō cōnonte quēwēnongāimpa. Ayæ Wængongui Tæiyæ Waēmō Ōnōwoca ingante tōmengā cōwē ēwocacā inongāimpa.

²⁶ Wængongui Tæiyæ Waēmō Ōnōwoca do apænecā ēñēninque Timeōnō wodi iñōmō, Botō ayæ wænāmaī mūimō quēwēmoyedē mōnō Awēnē Codito ingante aquīmo imopa, ante do ēñēningā inongāimpa. ²⁷ Nōwo iñōmō Wængongui Ōnōwoca angā ēñēninque tōmengā Wængongui oncō ñænæncōnē yabæcōnē pō guicantapa. Māniñedē Itota mæmpoda iñōmō idægoidi wææ ante nāni cægainō baī cæcæte ante cædinque Wēñængā Itota ingante ænte pō guida.

²⁸ Adinque Timeōnō iñōmō edæ Wēñængā ingante bæi ongonte pæ māninque Wængongui ingante, Tōmēmi waa toquinque mōnitō imōnite pōnō cæbipa, ante apænecantapa.

²⁹ “Bitō Tæiyæ Awēnē inōmi inte ēñēmi. Bitō imite nē cæbo iñōmote bitō doyedē, Cæbo acæbiimpa, angabiimpa.

Īninque bitō āninō baī nōwo edæ ĩnque cæbi adīmo iñōmote bitō āmi ate wænte goboe.

³⁰ Edæ bitō, Quēwencæmīnimpā, ante

nē Ænguingā ingante nōwo da pōnōmi ponte ēñacā do abopa.

³¹ Mānōmaī cædinque bitō, Wadāni nāni cabo wadāni nāni cabo waodāni tōmānāni acædānimpā,

ante cædinque bitō nē Ænguingā ingante nōwo da pōnōmi ponte a ongongā acæimpa.

³² Idægoidi ĩnāmaī ĩnāni incæ tōmēnāni nāni cabo nāni cabo incæ edonque acædānimpā, ante cædinque bitō da pōnōmi pōninque tōmengā ñāō apāite baī a ongongā acædānimpā.

Ayæ mōni idægocabo iñōmōnite bitō, Wēñængā ængā beyænque botō quīmīni iñōmō ñāō baī waēmō pōni ēmōninque quēwencæmīnimpā, ante pōnō cæbi abopa.”

³³ Ante āmotamīni ante baī Timeōnō wodi, Wēñængā æbānō cæquingā ingāā, ante tedecā ēñēninque Wēñængā mæmpo tōnō tōmengā badā iñōmō guñente wædatapa. ³⁴ Timeōnō wæætē, Mīna waa toquinque ĩngā Wēñængā ingante æmīnāpa, ante apænedinque tōmengā badā Māadiya ingante ĩmaī ante godōmenque apænecantapa.

—Picængā badinque ĩngā Wēñængā cæcā beyænque idægoidi pancadāniya tæ go wæænte baī wæyōnāni pancadāniya wæætē ængæ gantite baī quēwencædānimpā. Wængongui iñōmō, Wēñængā ingante ate ēñencædānimpā, ante odōmonte cæyongā pancadāniya wæætē adocā ingante godō piinte tedecædānimpā. ³⁵ Ante apænedinque Timeōnō iñōmō Māadiya ingante apænecantapa. Mānōmaī bayonte, Nanguī ĩnāni æbānō ante mīmōno pōnēnāni, ante edonque acæimpa. Bitō iñōmō yaēmē yete baī wæwente ēwocacæbiimpa, ante apænecacāimpa.

³⁶ Ayæ wadā iñōmō Wængongui beyæ nē apænedā iñōmō tōmēnā ēmōwo Ānā adobaī ongōnantapa. Atedoidi nāni cabo iñōnāni adocanque Pānoedo wēnā ĩnōnā inte tōmēnā picængadedā ingadāimpa. Tōmengā iñōmō baquecāñedē mōninque nānōogængā tōnō ōnompō æmæmpoque go mēa wadepo

quēwente ate onguiñængä guiquēnē nāñe wængacäimpa. ³⁷ Onquiyænä iñömö ñowo otenta i coatodo wadepo nanö eñagainganca owæmpoinä quēwēnä inte tömēnä Wængongui oncö ñænæncönē yabæcöenque cöwē quēwēninque taodāmaï inönäimpa. Itædē woyowotæ tömēnä cöwē, Wængongui ingampa, ante waa cædinque Wængongui ingante apænecæte ante wantæpiyæ cænāmaï quēwēnä inönäimpa. ³⁸ Tömēnä ñowo eyepæ pöni mämö bee tēninque Itota ingante adinque Wængongui ingante waa ate pönēninque apænecantapa. Ayæ wadāni, Mönitö Eedotadēē iñömö quēwēmöni iñömönite Wængongui æyedēnö pönö cæcä beyæ abæ tawænte quēwenguimöni, ante nē wänö cönāni inānite dodä Änä iñömö Wēñængä ingante do adinä inte, Wēñængä nē Ænguingä inte do eñate pongä atabopa, ante cöwē apæneda eñengadänimpa.

Näatadeta ocæ emænte godänipa

³⁹ Ayæ mäni, Awēnē Wængongui, Iïmai cæedāni, nanö angainö ante iñque cæte ate Ootee nāni wencabo Gadideabæ gocæte ante wadæ godinque Näatadeta tömēnāni nāna quēwēniñömö pongadänimpa. ⁴⁰ Wēñængä iñömö edæ picængä pædinque tæï piñængä bacantapa. Ayæ ocāi encacä inte nangui eñente bagacäimpa. Ayæ Wængongui waadete pönö apænecä eñente ewocadinque tömengä nē waadete pönö cæcä ingacäimpa.

Wængongui oncönē Itota gote ongongampa

⁴¹ Wodo pänta gogaïönæ bai Patowa mönö ææmæ cænguïönæ ñowo impa, ante pönēninque idægoidi Patowa ante Eedotadēē godinque ææmæ cædönänimpa. Itota mæmpoda adobai Patowa nāni ämæ cöwē cæyedē wadepo iñö wadepo iñö Eedotadēē goda ingadäimpa. ⁴² Iñinque Itota dote wadepo iñonte Wængongui beyæ ante ææmæ cöwē nāni cædö bai Ootee nāni wencabo do gote cædänitapa. ⁴³ Ææmæ tömää iñque cædinque oncönē poncæte ante taadonque pöninque mæmpoda adāmaï iñönate Itota guiquēnē Eedotadēē iñömö ayæ quēwengantapa. ⁴⁴ Godongämæ mönö poncabo tönö pongä imaingampa, ante pönēna inte taadö tömää itædē pöninque tömēna guidēnāni weca tömēna æmigoidi weca diqui diqui mincæ cæyöna, ⁴⁵ edæ dæ angä. Ate wædinque tömengä ingante diqui mincæte ante Eedotadēē adodö ocæ emænte gogadäimpa.

⁴⁶ Mëönaa go adoönæque iñonte diqui diqui minte ate edæ Wængongui oncö ñænæ oncönē yabæcönē pö guite ayönate Itota iñömö nē odömönāni weca eñēē cöninque, Æbänö i, Æbänö cæquï, ante angä adatapa. ⁴⁷ Tömengä apænecä eñēninque tömänāni, Æ tömengä iñömö ocāi nē encacä waa eñengä amönipa, änānitapa. Ayæ, Itota ingante, Æbänö i, ante änāni eñēninque tömengä wæætē nō apænecampa, ante wædinque tömänāni guïñente wædänitapa. ⁴⁸ Mæmpoda iñömö mäniñömö pö guite ayöna Itota mänömaï cæcä adinque guïñente wædatapa. Tömengä badä tömengä ingante,

–Botö Wēmi eñēmi. Mönatö imönate quñante mänömaï cæbii. Iñæmpa bitö wæmpo tönö mönatö bitö imite ante ancaa diqui diqui minte wæwentamönapa.

⁴⁹ Äñongante tömengä wæætē,

–Mīnatö iñæmpa, Mæmpocä oncönē Itota ongonguēnægä ingampa, ante eñēnāmaï imīnatawo. Quñante wayömö diqui diqui mīmīnatawo.

⁵⁰ Äñongante, Æbänö ante angä, ante ædæmö eñēnāmaï inatapa.

⁵¹ Tömengä wæætē mæmpoda miñæ gote Näatadeta pöninque tömēna nāna änö ante cöwē eñente cæcantapa. Wäänä guiquēnē tömengä nanö cædinö ante nāmä pönēē congä ingacäimpa. ⁵² Itota iñömö edæ nangui eñengä bate

pædongäimpa. Picængä bayongante Wængongui tönö waodäni adobaï tömengä ingante cöwë godömenque godömenque waadete adönänimpa.

3

Wäo æpænë në guidongä önömæca quëwente apænecä

(Mäateo 3.1-12; Mäadoco 1.1-8; Wäo 1.19-28)

¹ Tibedio quinte wadepo tömämæ awënë nänö inöñedë Pontio Pidato wodi nani änongå adoyedë Oodeabæ awënë inöngante Edode wæætë Gadideabæ awënë inongäimpa. Adoyedë inömö Edode wodi nänö tönifnacä Pedipe Itodeabæ Todacönitebæ awënë inöngä Ditäniato wodi adoyedë Abidëniabæ awënë inongäimpa. ² Mänimpodäni mänömæ awënëidi inönäni Änato wodi tönö Caiapato wodi adoyedë, Wængongui qui, ante në godöna ñænæna pöni inöna inönäimpa. Tömëna nana inöñedë adoyedë edæ Tacadiya wodi wengä Wäo ingante önömæca inömö ayæ quëwëñongante Wængongui apænægacäimpa. ³ Wäo wodi inömö Oododänonga ömaaque go tömäo cægöningue iimaï apænecä ëñënanitapa. Minitö, Idæwaa wënæ wënæ cæte awädö, ante ocæ ëmænte Wængongui gämænö pödäni. Ayæ, Wënæ wënæ botö cædinö ante Wængongui piinamäi inte pönö ata cæpocä quëwëmopa, ante edonque acäimpa, ante odömöningue æpænë guiedäni, ante Wäo angacäimpa. ⁴ Mänömaï cædinque Wængongui beyæ në apænëgaingä Itaiya wodi iimaï ante nänö yewæmonte apænëgainö bai Wäo adobaï cægacäimpa.

“Adocanque önömæca ongöningue iimaï ante yedæ tedecä ëñencädänimpa.

‘Awënë nänö ponguinö ante tee monte bai cædinque, taadö töinö pinonte bai cædäni.

⁵ Onquiyabo incæ änanquidi incæ, Mæmö pöni bacäimpa, ante ææ wocäimpa.

Biyönæ inömö tee möningue mæmö pöni badongäimpa.

Taadö idiqubæ inönte töinö pinongäimpa.

Wënæ wënæ inönte wainö pöni taadö badongäimpa.

⁶ Taadö mänömaï mæmö pöni ba ininque tömämæ quëwënäni incæ, Wængongui pönö ængä beyænque mönö quëwenguinö impa, ante edonque acädänimpa, ancæcäimpa.”

⁷ Ante yewæmonte ongompa cæminii, ante Wäo wodi æpænë guicæte ante pönäni nangui inäni inönänite iimaï angantapa. “Minitö inömö tæntæ pæimäni bai inte në babæ cæmini ininque edæ ëñenguënë quëwëmini. Wængongui nänö piinte panguiämö ante edæ, Wænompadäni, ante æcänö äna ëñëningue minitö wodiï winonte pöminii. ⁸ Wængongui Awënë gämænö minitö ocæ ëmænte poncæ cæminitawo. Nö nö pömini ininque edæ në ocæ ëmænte pönäni wainca incate bai waa cædäni bai minitö inömö edæ adobaï waa cædäni. Minitö nämæneque pönëningue, ‘Mönitö mæmæ Abadäo wodi pæimöni imöni beyænque Wængongui mönitö imönite waa acæcäimpa,’ ante nämä wææ ancæ cæminitawo. Inæmpa Wængongui angä bai Abadäo wodi pæimäni mimi inö bai dicaco incæ dobæ adobaï bacædönüi apa änewëminii. ⁹ Awæ inömö wainca incadämaï i ininque edæ do yete gongapamö iya tangäimpa. Awæ yecæte ante awænca eyewa næænäni bai Wængongui nänö panguiämö inömö edæ oo pöni pö apa quëwëminii,” ante Wäo apænægacäimpa. ¹⁰ Angä wædinque godongämæ ongönäni pancadäniya wæætë,

Mänömaï i ininque æbänö cæquëñëmöni imönii. ¹¹ Äñönänite Wäo,

—Weocoo mencooga në mangä inömö weocoo ömaacä ingante adocooque godongä æncæcäimpa. Cængui në ëcä adobaï cængui ömæpocä ingante

godongä æncæcäimpa, angantapa. ¹² Ayæ odömāno awënë nānō āninta nē ænāni guiquënë adobaī æpænē guicæte ante pōninqe Wāo ingante ānānitapa.

—Nē odōmōmi ēñēmi. Mōnitō iñōmō æbānō cæquënëmōni ïmōnii.

¹³ Āññānite tōmengä wæætē,

—Mīnitō awënë, Mānimpota, ante nānō ānimpota ante wadāni ïnānite āmīni pædæ pōnōnāni eyepæ æninque mīnitō wæætē, Tōmēmōni quī, ante godōmenque ānāmaī ïedāni, angantapa. ¹⁴ Ayæ tontadoidi adobaī tōmengä ingante,

—Mōnitō guiquënë æbānō cæquënëmōni ïmōnii.

Āññānite Wāo wodi ïmaī angantapa.

—Mīnitō wacā tōmengä nānō godonte æinta ò æncæte ante pæmēnēnāmaī ïedāni. Ayæ wacā wēnæ wēnæ cædāmaī ïñongante mīnitō, Wēnæ wēnæ cæbitapa, ante babæ wapiticæ ānāmaī ïedāni. Ayæ mīnitō cædi beyæ mīnitō awënë eyepæ pōnongä æninque piyænē cæte godōmenque æinente wædāmaī ïedāni, angantapa.

¹⁵ Āñongante godongāmæ ongōnāni iñōmō, Wængonguī doyedē, Codito ponguingä, ante nānō nē angaingä iñōmō edæ ïngä Wāo wabānō ïmaingampa, ante ònōwēnque pōnēnāni ïnte edæ, Wāo æbānō cæquingä, ante acæte ante a ongōnānitapa. ¹⁶ Wāo wæætē tōmānāni ïnānite apænedinque, “Botō guiquënë nāwangä mīnitō ïmīnite æpænē guidōmo guimīnipa. ïncayæ ate nē Ponguingä guiquënë tōmengä iñōmō nāwangä ññængä pōni ïñongante botō guiquënë guiyāmo ïnōmo ïnte tōmengä awæncata ïncæ ædō cæte ñi cæquimoo. Tōmengä iñōmō mīnitonga gonga bæcote baī cædinque Wængonguī Tæiyæ Waēmō Ōnōwoca ingante edæ da pōnongä æncæmīnimpä. ¹⁷ Waocā, Todigo tōmēmō wati wati tæñōninque botō tæñōniñōmō ònōmancaque baquinque botō waiña tōmāmō oncōnē da wencæboimpa, ante timpodæ næænte wo ææntodō wo ææntodō cædinque ontapocoo wææincoo wadæ ñēmænte wo êwengampa. Waocā mānōmaī wo êwencæte ante timpodæ næængä baī mōnō nē Ponguingä iñōmō adobaī oo pōni apænte ancæcäimpa. Edæ waēmō ïnāni ïnānite apænte æninque tōmengä ontapocoo baī ïnāni ïnānite gonga cōwē bæcōyōmō iya tangä gonte wæcædānimpä.”

¹⁸ Mānōmaīnō āninque Wāo wodi godōmenque wade wade apænedinque tōmēnāni ïnānite, Āmo ēñēmaīmīnipa, angacäimpa. Ayæ, Codito ingantedō ante watapæ apæncæcä ēñengadānimpä. ¹⁹ ïncæte tōmengä pancabaa Awënë Edode ingante, Bitō tōniñacä nānōogængä Ædodiya ingante mōmii, ante pūinque Edode nānō wīwa cædinō ante tōmānō ante piingä adinque, ²⁰ Edode wodi guiquënë godōmenque wīwa cædinque Wāo ingante tee mōnecä wægacäimpa.

Itota cæpcënë guicampa

(Māateo 3.13-17; Māadoco 1.9-11)

²¹ Mānī Wāo tōmānāni ïnānite æpænē nānō guidōñedē Itota ingante adobaī guidongä guicantapa. Guite ante Wængonguī ingante apæneyongä ònæ wi ænete baī bayonte edæ ²² Wængonguī Tæiyæ Waēmō Ōnōwoca equemō wææ contate baī tōmengäa edonque pōni wææ guicä ate òönædē apænedinque,

—Bitō botō Wēmi botō nē waadebi ïmipa. Bitō ïmite waa adinque waa tobopa, ante òönædē apæncæcä ēñengacäimpa.

Itota nānō mæmæidi

(Māateo 1.1-17)

23 Todëinta wadepo nanö ëñagaiñedë iinque bayonte Itota mänïñedë täno cæcä ingacäimpa. Tömengä ingante në pæpogadongä iñömö Ootee iñongante wadäni, Itota wæmpocä ingampa, ante pönëñänimpa.

Ootee wodi mæmpo wææ Edii wodi ingacäimpa.

24 Edii wodi mæmpo wææ Mäatato, Mäatato wodi mæmpo wææ Debii, Debii wodi mæmpo wææ Mëedequi, Mëedequi wodi mæmpo wææ Cäna, Cäna wodi mæmpo wææ docä Ootee wodi ingacäimpa.

25 Mänii docä Ootee wodi mæmpo wææ Mäatatia, Mäatatia wodi mæmpo wææ Ämoto, Ämoto wodi mæmpo wææ Näacö, Näacö wodi mæmpo wææ Etedi, Etedi wodi mæmpo wææ Näagai ingacäimpa.

26 Näagai wodi mæmpo wææ Mäato, Mäato wodi mæmpo wææ docä Mäatatia, docä Mäatatia wodi mæmpo wææ Tëmei, Tëmei wodi mæmpo wææ Ooteco, Ooteco wodi mæmpo wææ Oodaa ingacäimpa.

27 Oodaa wodi mæmpo wææ Owäna, Owäna wodi mæmpo wææ Deta, Deta wodi mæmpo wææ Dodobabedo, Dodobabedo wodi mæmpo wææ Tadatiedo, Tadatiedo wodi mæmpo wææ Nëedi ingacäimpa.

28 Nëedi wodi mæmpo wææ docä Mëedequi, docä Mëedequi wodi mæmpo wææ Adi, Adi wodi mæmpo wææ Cotäö, Cotäö wodi mæmpo wææ Edëmadäö, Edëmadäö wodi mæmpo wææ Ede ingacäimpa.

29 Ede wodi mæmpo wææ Ootowee, Ootowee wodi mæmpo wææ Ediyedede, Ediyedede wodi mæmpo wææ Oodii, Oodii wodi mæmpo wææ docä Mäatato ingacäimpa.

30 Mänii docä Mäatato wodi mæmpo wææ docä Debii, mänii docä Debii wodi mæmpo wææ Timeönö, Timeönö wodi mæmpo wææ docä Oodaa, docä Oodaa wodi mæmpo wææ wacä docä Ootee, mänii docä Ootee wodi mæmpo wææ Öönäö, Öönäö wodi mæmpo wææ Ediyaquimö ingacäimpa.

31 Ediyaquimö wodi mæmpo wææ Mëedeä, Mëedeä wodi mæmpo wææ Mëna, Mëna wodi mæmpo wææ Mäatata, Mäatata wodi mæmpo wææ Näatäni ingacäimpa.

32 Näatäni wodi mæmpo wææ Awënë Dabii, Awënë Dabii wodi mæmpo wææ Yæte, Yæte wodi mæmpo wææ Obedo, Obedo wodi mæmpo wææ Boodo, Boodo wodi mæmpo wææ Täna, Täna wodi mæmpo wææ Näatöö ingacäimpa.

33 Näatöö wodi mæmpo wææ Äminadabo, Äminadabo wodi mæmpo wææ Adämii,

Adämii wodi mæmpo wææ Adöni,
 Adöni wodi mæmpo wææ Etedöo,
 Etedöo wodi mæmpo wææ Pade,
 Pade wodi mæmpo wææ wacä docä Oodaa ingacäimpa.

³⁴ Mänii docä Oodaa wodi mæmpo wææ Aacobo,
 Aacobo wodi mæmpo wææ Itæca,
 Itæca wodi mæmpo wææ Abadäo,
 Abadäo wodi mæmpo wææ Tade,
 Tade wodi mæmpo wææ Näacodo ingacäimpa.

³⁵ Näacodo wodi mæmpo wææ Tedogo,
 Tedogo wodi mæmpo wææ Dagao,
 Dagao wodi mæmpo wææ Pedego,
 Pedego wodi mæmpo wææ Eebedo,
 Eebedo wodi mæmpo wææ wacä docä Täna ingacäimpa.

³⁶ Mänii Täna wodi mæmpo wææ Cainäo,
 Cainäo wodi mæmpo wææ Adapacadæ,
 Adapacadæ wodi mæmpo wææ Temö,
 Temö wodi mæmpo wææ Docä Nöwee,
 Docä Nöwee wodi mæmpo wææ Nämeco ingacäimpa.

³⁷ Nämeco wodi mæmpo wææ Mäatotadëo,
 Mäatotadëo wodi mæmpo wææ Ënoco,
 Ënoco wodi mæmpo wææ Aadedo,
 Aadedo wodi mæmpo wææ Mäadadede,
 Mäadadede wodi mæmpo wææ wacä docä Cainäo ingacäimpa.

³⁸ Docä Cainäo wodi mæmpo wææ Ënoto,
 Ënoto wodi mæmpo wææ Teto,
 Teto wodi mæmpo wææ Adäo,
 Adäo wodi ingante në badongaingä iñömö edæ mönö Mæmpo Wængongui
 inongä ingacäimpa. Mäninäni iñömö edæ Itota mæmæidi ingadänimpa.

4

Itota wënæ wënæ cæcæcäimpa, ante wënæ cæcampa
(Mäteo 4.1-11; Mäadoco 1.12-13)

¹ Mänii Oododänonga quëwëningue Wængongui Tæiyæ Waëmö Önöwoca
 ingante ædæmö ëwocacä inongä inte Itota iñömö wadæ gocantapa.
 Goyongante Wængongui Önöwoca tömengä ingante önömæca ænte mäocä
 gogacäimpa. ² Godingue coadenta ëönæ mänimpoönæ quëwëñongante wënæ
 awënë pöningue, Wënæ wënæ cæe, ante ancaa cædongäimpa. Itota iñömö
 mänimpoönæ cænämaï iningä inte edæ iinque bayonte gæwænte wæcantapa.
³ Adingue wënæ awënë tömengä ingante,

—Bitö näwangä Wængongui Wëmi inömi inte dica incæ päo ämi ba
 cæmaïmipa.

⁴ Äñongante,

—“Cæntedö quëwengui i. Iñæmpa Wængongui nanö apænedö ante tömänö
 ante ëñente quëwengæimpa,” ante yewæmonte ongö apa, äningue Itota edæ
 Baa angacäimpa.

⁵ Ayæ Itota ingante onquiyaboga ænte mæicä æite ongöñongante wënæ
 awënë wæætë inguipoga awënë odeyeidi ömæ tömäo ongöñömæ adoyömö
 a ongonte bai adotedæ odömongä acantapa. ⁶ Odömongä ayongante Itota
 ingante äningue wënæ awënë wæætë,

—Awēnēidi waincōnē pōni ongōninque waēmoncooga mongæninque tæi piñæninque tōmēnāni nempo quēwēnāni inānite nangui ānāni ēñente do cædānīpa, ante abii. Tōmēnāni waēmō pōni nāni emōmāmo ante æcānō emonguingāā, ante, Tæi piñænte nāni enempodō ante æcānō empoquingāā, ante, botō iñōmō edæ do ænte enempogaimo inte tōmēmoque nē āmo inte godōmo ænānīpa. Inīnque bitō imite, Bado, godōmo æe, āmopa. ⁷ Inīnque bitō mānīncoo æncæte ante botō weca ædæ wææninque, Tatānabi bitō Wængongui bai inōmi imīpa, āmi adīnque botō wæætē, Bado, bitō tōmāmæ Awēnē babīpa, ante edæ pōnōmo æmāimīpa, ante wēnæ awēnē ānewēgantapa.

⁸ Angā ēñēninque Itota,

—Iīmaī ante yewæmongatīpa. “Awēnē Wængongui weca ædæ wæænte tōmēngā ingante apænedīnque, Bitō adobīque Wængonguimi imidō anguēnē, ante watapæ apænecæbiīpa. Ayæ, Wængongui beyænque cæcæbiīpa,” ante wææ yewæmonte ongō apa quēwēē, ante Itota angacāīpa.

⁹ Wēnæ awēnē ayæ Itota ingante Eedotadēē ænte māocā goyongante Wængongui oncō ñænæ oncōmāa ænte mæicā æicantapa. Æite næ gongæñongante wēnæ awēnē wæætē, Bitō nāwangā Wængongui Wēmi imīpa, ante acædānīpa, ante bitō to wæibāwe. ¹⁰ Āninque wēnæ awēnē godōmenque apænedīnque, “Iīmaī ante do yewæmonte ongompa, Bitō imite wææ aacædānīpa, ante cædīnque Wængongui tōmēngā anquedoidi inānite da pōngā

¹¹ pōninque bitō imite iñæ æmpodāni Inīnque, bitō dicaa tee tēwadāmaī incæbiīpa,” ante yewæmongatīpa cæbii.

¹² Āñongā Itota wæætē,

—Iñæmpa iīmaī ante ingatīpa. “Bitō, Mōnō Awēnē Wængongui æbānō cæquingāā, ante acæte ante cædāmaī incæbiīpa. Ēñēnāmaī cæbo incæte edæ mōnō Awēnē Wængongui botō imote cōwē wææ aaquingā, ante acæte ante wēnæ wēnæ cædāmaī incæbiīpa,” ante wææ yewæmonte ongō apa ānewēē, Itota angacāīpa.

¹³ Ante Itota angā ate wēnæ awēnē incæ, Itota wēnæ wēnæ cæcæcāīpa, ante nānō ānewēnō iīnque cædīnque iīncayæ ate nānō ponte cæquinque edæ wadæ gogacāīpa.

Gadideabæ godīnque Itota tāno cæcampa

(Māateo 4.12-17; Māadoco 1.14-15)

¹⁴ Itota iñōmō Wængongui Ōnōwoca nānō tæi piñænō ewocadīnque Gadideabæ adodō pongacāīpa. Do pongāīpa, ante adīnque wadāni wayōmō gode ā gode ā cædāni ēñēgadānīpa. ¹⁵ Tōmēngā iñōmō māniōmæ wayōmō wayōmō godīnque tōmēnāni nāni odōmōincōnē go guīte go guīte cædīnque odōmonte apænecā adīnque tōmānāni, Waa pōni odōmonte apænecampa, ante tedegadānīpa.

Nāatadeta iñōmō ponte Itota apænecampa

(Māateo 13.53-58; Māadoco 6.1-6)

¹⁶ Wæætē Nāatadeta tōmēngā nānō pægaiñōmō pōninque tōmēnāni guēmanguiōnæ iñonte Itota nānō cōwē cæi bai ñōwo cæcantapa. Oodeoidi Wængongui apænecā nāni ēñente yewæmongainta ate odōmōincōnē go guīdīnque tōmēngā mānīnta ate apænecæte ante ængæ ganticā. ¹⁷ Adīnque tōmēngā ingante Itaiya wodi Wængongui beyæ nānō yewæmongainta pædæ

pönönäni ængantapa. Æninque, Māniñōmō yewæmonte i, ante ñi cæpote adinque, İmaï yewæmonte ongompa, ante apænecantapa.

18 “Wængongui Awënë Önowoca botonga pö guicä ate botö tömengä ingante ewocabopa.

İninque tömengä botonga gao cæte bai cædinque tömengä nänö tæi piñæmāmo da pönöningue botö imote angantapa.

Bitö ömaadāni wæwënëni inānite Wængongui Awënë waa pönö cæcæcäimpa, ante watapæ apænebi eñencædänimpa, angacäimpa.

Në tee mönete bai wædāni inānite bitö, Wængongui pönö wi ænecä beyænque minitö abæ tawænte gocæminimpa, ante godö apænebi eñencædänimpa. Në babetamönäni inānite, Minitö wæætë waa acæminimpa, ante bitö godö cæcæbiimpa.

Piinte cædāni ate wæwente quëwëñönānite bitö wæætë gä pe æmpobi abæ tawænte bai gocædänimpa.

19 Ayæ, Wængongui Awënë nänö waadete cæquinepo do batimpa, ante apænebi

eñencædänimpa, ante Wængongui botö imote do da pönongä pömo imopa.”

20 Ante İtaiya wodi nänö yewæmongainta adinque adodö nä nä capod-
ingue māniñōmō në cæcä ingante pædæ godöningue İtota tæ contacantapa. Mänōmaï cæcä adinque tömenäni nāni odömöincönë në ongönāni tömānāni tömengä ingante cöwä adänitapa. 21 Ayönānite,

–Wængongui botö imotedö ante apænecä eñëningue nāni yewæmongainö bai ñowoönæ eñëñōmini edæ do İnque ba aminipa.

22 Ante apænecä eñëningue tömānāni, Tömengä nanguï waadete pönö tedecampa, ante apænedinque tömengä ingante waa adinque guñente wædänitapa.

–İngä İñæmpa Ootee wengä İmaingä inte bamöngæ mänōmaï cæcampa, ante awædö, ante nāni caboque tededänitapa.

23 Mänōmaï ante wæyönānite İtota tömenäni nāni pönëno ante önöwënenque eñëningue,

–Botö imote apænedinque minitö, “Bitö dotodo bai İnömi inte nāmā incæ cæte waa babäwe,” ante dodāni nāni angainö bai ante tedemini awædö. Ayæ, “Capënaömö İñömö bitö waa cæbi adinque tededäni eñëmönipa. Māniñōmō bitö cædinö bai tömëmi eñagaiñömö adobai wii cæbii,” ante wæmini abopa.

24 Äninque İtota godömenque apænedinque,

–Nāwangä ämpa. Wængongui beyæ në apænecä İñömö tömengä quëwëñiñömö ponte apæneyongante, Wii eñëinë wædö, ante Baa änānipa.

25 Nāwangä edæ ämo eñëedāni. Docä Ediya wodi quëwengäñedë mëa go adoque wadepo ayæ tæcæ wadepo İñonte tömenäni ömæ tömāo nāni gæwænte wægaimāmo baquinque cöönæ cædāmaï ingatimpa. Māniñedë İdægobæ İñömö owæmpoināni nanguï İnāni quëwëñönānite, 26 tömenäni weca Ediya ingante da godönāmaï inte Wængongui wæætë edæ, Bitö Tidöo eyequei gote Tadedpata İñömö quëwengä owæmpoingä weca goe, angä gogacäimpa.

27 Adobai Wængongui beyæ në apænegaingä Editeo wodi quëwengäñedë İdægobæ æmontai në baadāni nanguï İnāni İñönānite Wængongui tömenäni İnānite wædæ caadāmaï inte wæætë edæ Tidiabæ quëwengä Näämäö ingante wædæ caacä waintai baagacäimpa.

28 Ante İtota apænecä eñëningue mänincönë ongönāni tömānāni piinte äināni badänitapa. 29 Äināni badinque tömengä ingante tömenäni nāni quëwëñömö yabæ İnö wido cædänitapa. Ayæ tömenäni nāni mænonte quëwenquidi tömāne

ænte mǎo godinque tǒmēnāni, Bæ tamō guidōmēmæ tæ wææncæcāimpa.
³⁰ Ante cæyōnāni, Itota iñōmō tæcæguedē godinque aamō cæte wadæ wogacāimpa.

Itota angā ēñente wēnæ incæ tao gopa
(Māadoco 1.21-28)

³¹ Wadæ godinque Gadideabæ Capēnaōmō nāni quēwēñōmō pōninque Itota tǒmēnāni nāni guēmanguīōnæ bayonte tǒmēnāni inānite odōmonte apænecā ēñēnānitapa. ³² Eñēñōnāni tǒmengā nāmā tæī pīñæninqe nē angā inongā inte nō odōmonte apænecā ēñente wædinque tǒmēnāni, Æ tǒmengā iñōmō nō pōni odōmonte apænecā ēñēmōnipa, ante wædānitapa.

³³ Māniñedē edæ onguīñængā wēnæ wentamō ēwocā tōnō nē quēwengā iñōmō tǒmēnāni odōmōincōnē a ongōninque iñontobæ yedæ ante aa pecantapa.

³⁴ —Quīmæ quēwēē. Bitō Itota Nāatadeta quēwēñīmi inte quīnante mōnatō weca pōmii. Mōnatō imōnate edæ æmæwo wido cæcæte ante wabānō pōmitawo. Bitō æmōmidō imii, ante botō do atabopa. Bitō Wængonguī Tæiyæ Waēmō Wēmi inōmi imipa, ante edæ do ēñēmopa.

³⁵ Ante tedeyongante Itota wææ āninque,
 —Apocænē quēwenguēñē tedewēē. Waocā baōñē quēwēñōmi inte edæ tao gobæwe.

Angā ēñēninque wēnæ guīquēñē tǒmānāni ayōnāni waocā ingante mǎo tæ gotodō go wææñongante tǒmengā baonga wēnæ wēnæ cædāmaī inte tao gotapa. ³⁶ Itota angā wēnæ tao gocā adinque tǒmānāni guīñente wædinque nāmāneque tededinque,

—Tǒmengā æbānō cæte nē angā ingāā. Iñæmpa nē angā inongā inte tǒmengā tæī pīñæninqe wēnæidi nē wentamō ēwocadāni inānite angā tao godāni awædō.

³⁷ Ante pōnente wædinque tǒmēnāni, Itota mǎnōmaī cæcampa, ante tededinque māniōmæ tǒmāo gode ā gode ā cædāni ēñengadānimpa.

Pegodo nānōogæ wāānā ingante Itota cæcā gançæ bacā
(Māateo 8.14-15; Māadoco 1.29-31)

³⁸ Māniī tǒmēnāni odōmōincōnē ongonte apænedinque Itota tao godinque Timōnō oncōnē go guicantapa. Go guīyongante wadāni, Timōnō nānōogængā wāānā iñōmō nanguī daicawo gawænte nangæ bacampa cæbii, ānāni. ³⁹ Eñēninque Itota tǒmengā weca go gongæninqe daicawo inte pīinte bai āninque, Idæwaa impa, angā dæ batapa. Ininqe tǒmengā gançæ badinque ængæ gantidinque tǒmēnāni beyæ cæcantapa.

Nantate wæwēnāni inānite Itota cæcā waa badānipa
(Māateo 8.16-17; Māadoco 1.32-34)

⁴⁰ Nænque gāwadecæ bayonte nantate wæwēnāni inānite Itota weca ænte pōnāni adinque tǒmengā wacā ingante wacā ingante godō gampocā ate tǒmēnāni waa badānitapa. ⁴¹ Ayæ waodāni nanguī ināni baōñē wēnæidi quēwēñōnānite Itota angā ēñēninque tao godinque,

—Bitō Wængonguī Wēmi inōmi imipa, ante Yæ ānānitapa.

Ininqe Itota, Botō Codito inōmo imopa, ante do ēñēnānipa, ante wædinque wēnæidi inānite, Apocænē imæwedāni, ante edæ wææ angacāimpa.

Itota oodeoidi odōmōincōnē go guīte apænecā
(Māadoco 1.35-39)

⁴² Ayæ baänæ ate Itota wayömö önömæca gocantapa. Gocä adinque wadäni tömengä ingante ante diqui diqui minte tömengä weca do pöninque, Mönitö imönite emö cæte godämaï incæbiimpa, ante wææ cæcæte ante cædänitapa.

⁴³ Ate wædinque tömengä wææ äninque,

—Botö, Wængongui Awënë Odeye nempo watapæ quëwenguinö angüenë, ante cöwë apænequënemo imopa. Wængongui, Mänömainö ante apænecaäbiimpa, ante botö imote da pönongä pönimo inte botö tömänäni quëwëñömö gote apænequënemo inte gobopa.

⁴⁴ Ante Oodeabæ godinque tömënäni odömöincönë go guii go guii cædinque Itota apænecaä ëñengadänimpa.

5

Gæyæ nanguï pöni dadöwënänipa

(Mäateo 4.18-22; Mäadoco 1.16-20)

¹ Ayæ Itota Guënetadetepæ wedeca gote ongöinque Wængongui nänö apænedö ante apæneantapa. Ëñencæte ante cædinque nanguï inäni godongämæ pö goto ongonte ëñëë congadänimpa. ² Apænecaä ëñëñönäni tömengä gomö ayongä gæyæ në dadöwënäni dicamöñæ yamoncæte ante ti wææninque tömënäni näni ti wææ godimpo mäa wipo gäwapæ wedeca ömædempo wäi wocæ acantapa. ³ Adinque Itota adoque wipodë Timönö wipodë guiidinque tömengä ingante, Tæcæpæno gämæñö eyequei wo go wäi wocæe, angä gä go wäi wocængä ininque Itota tæ contate tömënäni inänite odömönte apænecaä ëñëñänitapa. ⁴ Tömënäni inänite inque apænedinque Timönö ingante,

—Bitö wipo tæcæpæno godömenque ænte gobi ate minitö dicamöñæ wo guitodonte gæyæ dadonte æncæminimpa.

⁵ Äñongä Timönö,

—Awënë ëñëmi. Tömää woyowotæ gæyæ dadoncæte ante dicamöñæ ancaa guitodöñömöni wii datapa. Incæte bitö ämi beyænque botö Ao ante cæcæboimpa.

⁶ Ante mäo guitodöñönäni gæyæ nanguï pöni da ate dicamöñæ wodo wægo tengatimpa. ⁷ Ininque Timönöidi wa wipodë ongönäni ponte godongämæ æncædänimpa, ante ömö cædäni adinque wa wipo ænte pönäni ate gæyæ mäa wipodë eyede pöni ñönönäni ate wipo emä guicæ cætimpa. ⁸ Ininque, Itota angä beyænque gæyæ nanguï pöni æmönipa, ante adinque Timönö Pegodo inömo Itota önöwa gäänë ædæ wææninque,

—Awënë ëñëmi. Botö wënæ wënæ entawëmo inömete bitö waemö pöni entawëmi inte nänëñë goe, angacäimpa.

⁹ Ante guñente wæyongante në dadöwënäni wadäni adobaï, Äbänö cæte nanguï pöni gæyæ dadonte æmöö, ante wædinque ancaï guñëninque Timönö tönö godongämæ wædänitapa. ¹⁰ Ayæ Timönö tönö godongämæ gæyæ në dadöwëna Tebedeo wodi wëna Tantiago tönö Wäö adobaï guñente wægadäimpa. Ininque Itota inömo Timönö ingante,

—Guñëñämaï incæbiimpa. Gæyæidi gæte bitö æmaï bitö inçayæ ate waodäni inänite gæte baï cædinque apænebi ëñëninque ponte quëwencædänimpa.

¹¹ Angä ëñëninque wipo emönaiya ænte mämö ñä cæcadodinque tömënäni mäincoo tömancoo edæ emö cædinque edæ Itota miñæ wadæ gogadänimpa.

Nē baadingā ingante Itota wadæ caacampa
(Mäateo 8.1-4; Mäadoco 1.40-45)

¹² Incayæ ate Itota wadāni nāni quēwēñōmō gote quēwēñongante wacā cōwē baate ēñawēnongā inte tōmengā weca ponte guidōmēmæ ædæ wææninque angantapa,

—Awēnē, bitō Ao āmi inte wadæ caabi ĩninqe botō waintai baabaĩmopa.

¹³ Āñongā Itota pædæ wææmpo gampo caadingue,

—Ao āmopa. Bitō waintai baacæbiimpa.

Ante tæcæ āñongā ñōmæintai nānō ēñadintai edæ dæ baadingue tōmengā waintai do baacantapa. ¹⁴ ĩninqe Itota tōmengā ingante,

—Ēñēmi. Bitō waintai baadĩmi inte wadāni ĩnānite māo apænedāmai ĩe. Wæætē, Nāwangā ĩmpa, ante acædānĩmpa, ante cædingue bitō, Wængonguĩ quĩ, ante nē godongā weca tōingā godinque waintai bitō baadintai odōmōmi ædæmō acæcāĩmpa. Ayæ Mōitee wodi wææ ante nānō angaincoo bai ænte pōninque bitō waintai bitō baadi beyæ ante edæ, Wængonguĩ quĩ, āninque nē godongā ingante pædæ godōmi æncæcāĩmpa, ante wææ angantapa.

¹⁵ Wææ angā incæte, Itota mǎnōmai cæcampa, ante nangui gode ā gode ā cædāni ēñēninque nangui ĩnāni Itota apæneceā ēñencæte ante ayæ tōmēnāni nāni caate wædō waa bacæte ante goto pō goto pō cægadānĩmpa. ¹⁶ Itota ĩñōmō wantæ wantæ ĩñō ñōnōmæca nānēnē godinque Wængonguĩ ingante wæætē wæætē apænegacāĩmpa.

Nē cōmāingā ingante Itota angā dao dao gocampa
(Mäateo 9.1-8; Mäadoco 2.1-12)

¹⁷ Ayæ adobai ĩmō ĩñō ĩmō ĩñō Itota cōwē odōmonte apænegacāĩmpa. Mǎniñedē oodeoidi nāni wææ angainō ante nangui adinque nē ēñēnāni ĩñōmō nē odōmōnāni ĩñōnānĩmpa. Wadāni adobai, Mōnō wææ angainō ante ēñente cæcæĩmpa, ante nangui ānāni guiquēnē Paditeoidi nāni ānāni ĩñōnānĩmpa. ĩninqe Itota mǎniñedē odōmonte apæneyongā mǎniñāni nē odōmōnāni tōnō Paditeoidi ĩñōmō Gadideabæ nāni quēwēñōmō ta Oodeabæ nāni quēwēñōmō ta pōninque ayæ Eedotadē ĩñōmō ta pōninque Itota weca pōninque tæ contate a ongōnānitapa. Mǎniñedē wadāni wa wa badinque wēnæ wēnæ inte wædāni ĩñōnānite Itota ĩñōmō Awēnē Wængonguĩ nānō tæi piñænō entawēninque nangui cæcā waa badōnānĩmpa. ¹⁸ ĩninqe wadāni nē cōmāingā nānō mōĩmpataa æmætæ æmætæ bæi ongote nææninque, Itota weca ænte nangui ñō cæcæĩmpa, ante pōnānitapa. ¹⁹ Ponte ayōnāni wadāni eyede pōni goto ongōnāni adinque nē ænte māmō pōniñāni ĩñōmō, Ædō cæte guiquĩ. Ante wædinque oncōmāa ĩñō æidāmæ mæi æidinque dai bæte mænōniñōmō epæ cædāni ompite gongæñō tōmēnāni cōmāingā mōĩmpataa bæi ongōninque tōmengā ingante godongāmæ ongōnāni weca tæcæguedē Itota weca pædæ wææñōnāni ongongantapa. ²⁰ Mǎnōmai cædāni adinque Itota, Nāwangā wede pōnente cædānĩpa, ante adinque,

—Æmigo, wēnæ wēnæ bitō cædimāmo ante ñōwo ñĩmpo cætĩmpa.

²¹ Āñongā Paditeoidi tōnō nē wææ odōmōnāni nāmāneque pōnente tededinque, “Wēnæ wēnæ cædingā ingante æcānō ñĩmpo cæquingāā. ĩngā ĩñōmō Wængonguĩ ingampa diyæ mǎnōmai cæquingāā. Edæ babæ ancædō.”

²² Ante pōnēñōnāni Itota tōmēnāni nāni pōnēwēnō ante do ēñēninque,

—Mĩnitō mĩmōno quĩmæ wēnæ wēnæ pōnēwēmĩni. ²³ “Nē cōmāingā nānō wēnæ wēnæ cædimāmo ante godō ñĩmpo cæbopa,” ante botō Wængonguĩ bai āmo ēñēninque mĩnitō guiquēnē, Wængonguĩ ingampa diyæ mǎnōmai cæquingāā, ante pōnēmĩnĩpa. Ayæ wæætē, “Ængæ gantidinque mōĩmpata

ænte dao dao gocæcäimpa,” ante botö Wængonguï bai ämo ëñëninque mïnitö adobaï, Wængonguï ingampa diyæ mänömaï cæquiringäa, ante pönëmïni ïmaïminipa, ante awædö. Ìñæmpa mänömaïnö ante pönëmïni ïnïnque mïnitö edæ æbänö cæquënëmo ämïni. ²⁴Incæte botö Waobo ëñagaimo inte inguipoga quëwëninque waodäni näni wënæ wënæ cædimämo ante në ämo inte pönö ñimpo cæbopa, ante mïnitö edæ ëñencæmïnïmpa, ante botö ïmaï cæbopa.

Äninque në cömäingä ingante edæ,

–Bitö ïmite ämo ëñë. Ängæ gantidinque bitö möimpata topo cæte æninque tömëmi oncönë næænte goe.

²⁵ Ängä ëñëninque cömäingä ïningä incæ edæ tömänäni ayönäni ængæ gantidinque, Wængonguï ñäö bai ëmönongä inte pönö tæï piñænte cæcä æmopa, ante apænedinque tömengä nänö öñöninta topo cæte tao oncönë ænte gocantapa. ²⁶ Gocä ate wædinque tömänäni, Äbänö cæcäi, ante ëñënämaï inte guïñente wædinque, Wængonguï bitö ñäö bai ëmömi inte waa pönï cæbi amönipa, ante watapæ apænegadänïmpa. Ayæ,

–Ñowo ïñömö mä pönï cæcä amönipa, ante ancai guïñente wædänitapa.

Debii ingante Itota angä tee empote gocampa

(Mäateo 9.9-13; Mäadoco 2.13-17)

²⁷ Ayæ ate Itota tao gote ayongä odömäno awënë nänö äninta ante në ængä Debii ingante acantapa. Tömengä ïñömö Awënë nänö æimpa gäänë tæ contate ongongä adinque Itota tömengä ingante,

–Botö miñæ pöe.

²⁸ Ängä ëñëninque do ængæ gantidinque Debii mänincoo tömancoo ëmö cæte Itota miñæ wadæ gogacäimpa.

²⁹ Ayæ ate Debii, Itota beyæ, ante tömengä oncönë ææmæ nanguï pönï cæcantapa. Ìnïnque ææmæ becæte ante awënë beyæ në æwënäni nanguï ïnäni pö tæ contate cæñönäni wadäni adobaï pö tæ contate cæñäni. ³⁰ Adinque Paditeoidi tönö tömënäni në odömönäni guiquënë Itota miñæ në godäni ïnänite piñte äninque,

–Odömäno awënë beyæ në æwënäni tönö wadäni në wënæ wënæ cædäni tönö mïnitö quimæ godongämæ ponte tæ contate bete cæmïni.

³¹ Ante piñönäni Itota wæætë tömënäni ïnänite,

–Në waa ingä guiquënë, Cæbi waa baboe, änämaï ïñongante në wënæ wënæ ingä guiquënë dotodo ingante, Cæbi waa baboe, ante do aa pecampa.

³² Pancadäniya, Nämä incæ në nö entawëmo ïmopa, ante në änäni ïñönänite botö ïñömö edæ në dotodo bai adobaï ïnömo inte tömënäni ïnänite aa pedämaï incæboïmpa. Wadäni guiquënë, Nämä wënæ wënæ cæbo ïmopa, ante në änäni ïñönänite botö, Tömënäni, Idæwaa wënæ wënæ cæte awædö, ante Wængonguï gämænö poncædänïmpa, ante cædinque tömënäni ïnänite aa pecæ pongaboïmpa, ante Itota apænegacäimpa.

Ee ate cænämaï ingæïmpa, ante në änäni

(Mäateo 9.14-17; Mäadoco 2.18-22)

³³ Itota ingante ïmaï ante ayæ änänitapa. Wäö miñæ në godäni ïñömö, Wængonguï beyæ, ante ee ate cænämaï ïnäniya. Ayæ Paditeoidi miñæ në godäni adobaï ee ate cædänipa. Bitö miñæ në godäni guiquënë do cænte bete quëwënänipa töö.

³⁴ Änäni ëñëninque Itota wæætë,

–Onguïñængä në munguingä wente ænte pönäni ïñönänite mïnitö wæætë, Ee ate cænämaï ïedäni, ante edæ ædö cæte wææ anguimïni. Munguingä nänö wente ænte në pönäni bai ïñönäni inte botö miñæ në godäni ïñömö ædö cæte

wæwente bai cænāmai inguinānii. ³⁵ Wæætē ayæ ate guiquēnē, Monguingā, nāni nē ānongā bai iñōmote wadāni ponte botō imote ō ænte gocædānimpā. Mānōmai cædāni ate botō miñæ nē godāni iñōmō māniñedē ate wæætē cænāmai inte wæcædānimpā, ante Itota apænegacāimpā. ³⁶ Ayæ, Wængongui Awēnē nempo quēwēninge æbānō cæquī, ante ēñencædānimpā, ante Itota imæca quēwēnāni nāni cælinō ante odōmōnte iūmai ante apænecantapā.

—Mūncōo badōnte ate waocā dicæ adocōo wānā ñænte pancacooga æninque pedæncōoga pōnō tadōmonguingā. Mānōmai cæcā iñinque edæ mūncōo incæ do wānā tente baquēnē. Ayæ pedæncōo ēmōnō bai mūncōo wī adobai ēmōpā. Minitō, Awente bai cænāmai inte mōnō quēwengæimpā, ante mīni ānewēnō guiquēnē pedæncōo bai inte wote baquīne ēnepā. Wængongui gāmæñō pōninque quēwencæmīnimpā, ante botō apænedō guiquēnē mūncōo bai inte quēwenguīne ēnepā. Iñinque wote baquīne tōnō quēwenguīne tōnō ædō cæte mēnea ante ēñente cæquī. ³⁷ Ayæ adobai yowepæ biinōmæ mūmæ æninque waocā ædō cæte picæ æmontaicadedē godō pe ñiñænguingā. Iñæmpā picæ æmontaicadedē pe ñiñængā iñinque edæ tæi æbæ æmæwo goquēnē. ³⁸ Mūmæ wæætē mūncadedē pe ñiñængæimpā. Adobai botō odōmōnō mūmæ bai iñōnte dodāni nāni odōmōwēnō ædō cæte botō odōmōnō tōnō adoyedē ēñente cæquī. ³⁹ Incæte, “Gōnænimæ iñōmō waēmepæ imæmpā,” ante nē bedōmīni inte mīnitō mūmæ ædō cæte quingæ bequimīnii, ante Itota angacāimpā.

6

Guēmanguiōnæ iñōnte tōmēmō tā pete ænānīpā (Māateo 12.1-8; Mādocolo 2.23-28)

¹ Ayæ ate guēmanguiōnæ iñōnte Itota tōmēmōncodē tæcæguedencodē gocantapā. Goyongā tōmengā miñæ nē godāni iñōmō tōmēmō inca tā pete æninque dacæ dacæ cædinque ade cæ ade cæ godāni. ² Adinque Paditeoidi guiquēnē,

—Iñæmpā, Guēmanguiōnæ iñōnte māninō bai cædāmai iedāni, ante dodāni nāni wææ angaiñō ante mīnitō ēñenāmai inte quimæ cæmīnii.

³ Ante piññōnānīte Itota,

—Docā Dabii wodi tōmengā nānō ēmiñænāni tōnō ōmæpodāni inte gæwænte wædinque æbānō cægadānii, ante yewæmōnte ōñō incæ mīnitō iñæmpā adāmai inte bai āmīni awædō. ⁴ Wængongui quī, ante nē godōnānique cængui impā, ante wææ nāni angaiñō bai cædinque dodāni pāo, Wængongui quī, ante ñoncæ ñoncæ cædōnānimpā. Incæte Dabii wodi Wængongui oncōnē go guidiinque māniñ pāo do ænte cæninque tōmengā miñæ nē godāni inānite godōmenque godongā cænānitapā, ante yewæmōnte ōñō apa ānewēmīnii.

⁵ Ante apænedinque Itota tōmēnāni inānite ayæ apænecantapā.

—Botō iñōmō Waobo nē ēñagāimo iñōmō Tæiyæ Awēnē iñōmo inte edæ guēmanguiōnæ Awēnē iñōmo imōpā. Iñinque botō, Guēmanguiōnæ iñōnte edæ æbānō cæquī, ante adobo nē Amo ingāimo imōpā, ante Itota apænegacāimpā.

Nī cōmampoingā

(Māateo 12.9-14; Mādocolo 3.1-6)

⁶ Iñcayæ ate guēmanguiōnæ adobai waōnæ iñōnte Itota oodeoidi odōmōncōnē go guite odōmōnte apæneyongā onguīñængā ōnōmpo tōmēmæ iñō nī cōmampote wædongā inte māniñōmō a ongongantapā. ⁷ Māniñedē nē odōmōnāni tōnō Paditeoidi guiquēnē, Itota wapiticæ cæcā iñinque mōnō wæætē piñte angæimpā, ante nē ānewēnāni iñōnānimpā. Nōwo iñōmō

tömēnāni, Nōwoōnæ guēmanguiōnæ ī incæte Itota nī cōmampoingā ingante, Waa bacæcāimpa, ante cæcā īnīnque mōnō māo piinte angæimpa, ante babæ cæcæte ante cōwā adānitapa. ⁸Mānīnō, Mōnō pīngæimpa, ante nāni pōnēwēnō ante Itota īñōmō ōnōwēnenque edæ do ēñēnīnque edæ nī cōmampoingā ingante, –Bitō ængæ gantidinque tæcæguedē pō næ gongæe.

Angā ēñēnīnque ængæ gantidinque pō næ gongængantapa. ⁹Īnīnque Itota nē piinte ancædāni īnānite,

–Āmo apænemīni ēñēmoedāni. Guēmanguiōnæ īñonte mōnō æbānō cæquēnēmō īmōō, ante wææ angatī, ante pōnēmīni. Mōnō waa cæquēnēmō īmōpa, ante pōnēmīnitawo. Wæætē edæ, Mōnō wēnæ wēnæ cæquēnēmō īmōpa, ante pōnēmīnitawo. Guēmanguiōnæ īñonte edæ, Quēwencædānīmpa, ante cæquēnēmō īmōpa, ante pōnēmīnitawo. Wæætē mōnō edæ ōmæe ēwenguēnēmō īmōpa, ante pōnēmīnitawo. ¹⁰Ānīnque æmætæ gomō æmætæ gomō edæ tōmānāni īnānite adīnque nī cōmampoingā ingante,

–Pædæ pompobi.

Angā ēñente cædinque nē cōmampodingā incæ pædæ æmpote edæ ædæmō waa empocā bapocantapa. ¹¹Īnīnque tōmēnāni, Guēmanguiōnæ incæ mānōmāi cæcampa, ante ænguī badīnque, Itota ingante mōnō æbānō cæquī, ante pīnīnque nāni cabo nāmāneque tedegadānīmpa.

Itota angā ate dote ganca īnāni nē gode ānāni badānīpa

(Māateo 10.1-4; Māadoco 3.13-19)

¹²Mānīñedē Wængonguī ingante apænecæte ante Itota ānanquidi æidinque tōmāā woyowotæ apænee congantapa. ¹³Nāō ba adīnque tōmēngā mīñæ nē pōnīnāni īnānite ata pecā pōnāni ate tōmēngā, Botō beyæ nē gode āmīni incæmīnīmpa, ante dote ganca īnāni mānīmpodāni īnānite apænte ængacāimpa. ¹⁴Tōmēngā nānō nē da godōnāni baquīnāni īñōmō edæ īmāi ēmōnōnānīmpa. Tānocā Timōnō ēmongā ingā incæte Itota wawo Pegodo pemongacāimpa. Īngā Pegodo tōnō Āntade nāna caya, Tantiago tōnō Wāō nāna caya, Pedipe tōnō Batodōmēe, ¹⁵Māateo tōnō Tōmato, Adepeo wengā Tantiago īnōnānīmpa. Ayæ, Mōnō ōmæ ingæimpa, ante nanguī cædongā inte wacā Timōnō īnongāimpa. ¹⁶Tantiago wengā Codaa tōnō Itota ingante odōmonte nē godonguīgā ingāingā inte wacā Codaa Icadiote nāni ānongā īnatapa. Mānīmpodāni īnānite Itota apænte ængacāimpa.

Tæiyæñāni īnānite Itota gampocā waa badānīpa

(Māateo 4.23-25)

¹⁷Mānīmpodāni tōnō Itota mæmō īñōmō wæænīnque næ gongænte ongongantapa. Mānīñōmō tōmēngā mīñæ nē godāni nanguī īnāni do ponte a ongōnōnānīmpa. Ayæ tōmēnāni tōnō wadāni Eedotadēe īñōmō quēwēnāni tōnō Oodeabæ tōmāo quēwēnāni ayæ Tido eyequei Tidōo eyequei gāwapæ wedeca quēwēnāni nanguī īnāni do ponte a ongōnōnānīmpa. Tōmēnāni, Itota apænecā ēñengæimpa, ante ayæ, Wēnæ wēnæ inte wæwēmō inte mōnō waa edæ bacæimpa, ante pōnīnque a ongōnānitapa. ¹⁸Ayæ wēnæidi nē wentamō ēwocadāni tōnō quēwente wæwēnāni mānīñōmō ponte ongōnāni īnānite Itota adoyōmō wææ pōnīnque godō cæcā waa badānitapa. ¹⁹Ayæ, Itota tæī pīñænte entawengā inte pōnō cæcā ate waa badānīpa, ante adīnque tōmānāni tōmēngā ingante gampocæte ante cædānitapa.

Mīni toquinque, ante ayæ, Mīni wæquinque, ante

(Māateo 5.1-12)

²⁰ Ayæ Itota tömengä miñæ nê godäni inänite gomö adinque apæ necä eñenänitapa.

“Minitö, Botö waemö imopa diyæ Awënë Odeye nempo guiquimoo, ante nê wæwëmini iñomö watapæ mîni toquinque Wængongui Awënë Odeye nempo mîni quëwenguinö edæ do ëamînipa,” angantapa.

²¹ “Inguipogaque gæwænte wæmîni inte edæ mîni watapæ toquinque Wængongui pönongä tömo pönî cæncæmînipa,” angantapa.

“Minitö inguipogaque wæwente quëwëmini inte edæ mîni watapæ toquinque Wængongui pönö waadete cæcæcäimpa,” angantapa.

²² “Botö Waobo eñagaïmo miñæ gomîni beyænque wadäni mînitö imînite badete todinque piinte adinque wido cædänitawo. Botö beyænque mînitö ëmowo ante, Wiwa ëmowo awædö, ante Baa änänitawo. Edæ mîni waa toquinque inguipogaque mänömaï cædänipa. ²³ Öönædë mönö ænguïnö ante nanguï ongompä, ante pönëninque mînitö ñowodäni nâni piinte cæyedë incæ watapæ toedäni. Iinâni nê piinte cædäni wæmæidi incæ Wængongui beyæ nê apænegaïnâni inänite edæ adobaï piinte cægadänimpa, ante toquënë wæwëminii. ²⁴ Wæætë edæ mäincoo nanguï nê ëamîni guiquënë iincayæ ate mîni wæquinque edæ inguipogaque watapæ quëwëminipa,” ante Itota apænecantapa.

²⁵ “Nê tömo cæmîni guiquënë iincayæ ate mîni gæwænte wæquinque edæ inguipogaque tömo cæmînipa,” ante apænecantapa.

“Nê Ca ca tomîni adobaï iincayæ ate Ca ca mîni wæquinque edæ inguipogaque tomînipa,” angantapa.

²⁶ “Minitö imînite ante tömänâni waa apænedäni iinque edæ mîni wæquinque ingæimpa. Iñæmpa iinâni nê waa apænedäni adodäni mæmæidi adobaï cægadänimpa. Wadäni babæ wapiticæ apænedäni incæ, Wængongui beyæ nê apænebo imopa, ante nê anewënâni inänite iinâni mæmæidi iñomö adobaï waa apænecadänimpa,” ante Itota apænecacäimpa.

Nê piinte cædäni inänite waadete cæcæimpa, ante (Máateo 5.38-48, 7.12)

²⁷ Ayæ godömenque apænedinque Itota, “Minitö nê eñëmîni iñömînite ämo eñeedäni. Minitö imînite nê piinte cædäni inänite mînitö wæætë waadete cæedäni. Minitö imînite nê piinte adäni inänite mînitö wæætë waa cæedäni.

²⁸ Wënæ wënæ bacæmînipa, ante nê änâni inänite mînitö wæætë waa apænete godö cæedäni. Minitö imînite nê wënæ wënæ cædäni inänite mînitö wæætë tömënâni beyæ ante Wængongui ingante apæneedäni. ²⁹ Wacä bitö imite imæmpaga inö tamongä wædimi inte bitö wæætë æmæmpaga inö dadi ëmæmonte ee ongömi tamongæ. Ayæ yogui beyæ bitö yabæcoo ö ængä adinque önönancapæncoo tönö ee abi ö ængæ. ³⁰ Mäincoo ante nê angä ingante tömengä nanö änoncoo edæ ee godömi ængæ. Ayæ bitö mäincoo nê ö ængä ingante, Wæætë adodö pönömi æmoe, änâmaï incæbiimpa. ³¹ Minitö, Wadäni botö imote waa cæcædänimpa, ante wæmînitawo. Edæ mäninö ante mîni wædö bai adobaï wædänipa, ante pönëninque mînitö wæætë wadäni tömänâni inänite waa cæedäni,” ante Itota angacäimpa.

³² Ayæ apænedinque, “Minitö imînite nê waadedänique inänite waadete pönëmîni inte wadäni inänite waadedämaï imîni adinque edæ Wængongui dicæ mînitö imînite waadete pönö aqingäa. Iñæmpa nê eñënâmaï cædäni incæ nê waadete pönëänique inänite waadete pönëninque mînitö cæganca do cædänipa töö. ³³ Ayæ adobaï mînitö imînite waa cædänique inänite waa cæmîni inte wadäni inänite waa cædämaï imîni adinque Wængongui

mīnitō īmīnite dicæ waa aqingāa. Īñæmpa mīnitō cædō bai nē ēñēnāmaī cædāni incæ adobaī do cædāni apa cæmīni. ³⁴ Ayæ, Adodō pōnongā æncæboimpa, ante pōnēwēninque mīnitō nē adodō pōnongingā ingante godōmīni inte wadāni inānite godōnāmaī īmīni adinque Wængonguī mīnitō īmīnite dicæ waa aqingāa. Īñæmpa nē ēñēnāmaī ināni nāni cabo incæ, Adodō pōnongā æncæboimpa, ante pōnēwēninque nē adodō pōnonginganque ingante godōninque mīnitō cædō bai adobaī cædānīpa tōō.”

³⁵ “Wæætē mīnitō īmīnite nē pīnāni inānite waadete pōnēninque waa cæedāni. Ayæ tōmēnāni nāni ānō ante, Adodō pōnōmi æmoe, ante ānāmaī inte ee godōmīni æncædānīpa. Mānōmaī waadete cæmīni īninque mīnitō īncayæ ate mīni waadete cægāinō beyæ nanguī æmaīmīnīpa. Ayæ mōnō Mæmpo Æibæ pōnī nē Quēwengā īñongante tōmengā ingante nē waa ate pōnēnāmaī ināni inānite tōmengā godō waadete cæcampa. Nē wīwa cædāni inānite tōmengā godō waadete cæcampa. Īninque mīnitō tōmengā nānō cæī bai adobaī waadete cæmīni īninque Mæmpocā waadete nānō entawēnō bai mīnitō adobaī entawēninque tōmengā wēmīni īmaīmīnīpa. ³⁶ Mōnō Mæmpo pōnō waadete nānō waa cægāī bai mīnitō adobaī wadāni inānite godō waadete waa cæedāni,” ante Itota angacāimpa.

*Wadāni inānite apænte ānāmaī īedāni, ante
(Māateo 7.1-5)*

³⁷ Ayæ wæætē Itota īmaī ante apæncantapa. “Wacā ingante apænte ānāmaī īmīni īninque mōnō Mæmpo wæætē mīnitō īmīnite apænte ānāmaī īncacāimpa. Ayæ, Wacā nānō tente wæquinque wēnæ wēnæ cæcampa, ante ānāmaī īmīni ate mōnō Mæmpo wæætē, Mīni tente wæquinque wēnæ wēnæ cæmīnīpa, ante apænte ānāmaī īncacāimpa. Wacā wēnæ wēnæ cæcā ingante mīnitō ñimpo cæmīni ee gocā ate mōnō Mæmpo adobaī mīnitō īmīnite ñimpo cæcā quēwencæmīnīpa. ³⁸ Wadāni inānite ee godōedāni. Mīnitō ee godōmīni ænāni īninque wadāni wæætē mīnitō īmīnite ee pōnōnāni æncæmīnīpa. Nē pōnōnāni īñōmō tōmēnāni nāni tee māincadedē da wēninque da wæænonte wancæ wancæ cædinque eyepote wæænguinque eyede pōnī da wēninque mīnitō ænguincadedē pōnō wāne cædāni edæ æncæmīnīpa. Edæ mīnitō tee mante mīni godōincade incæ adocadeca tee mante bai cædinque Wængonguī mīnitō īmīnite eyepæ pōnongā æncæmīnīpa,” ante Itota apænegacāimpa.

³⁹ Ayæ, Wængonguī Awēnē nempo quēwēninque æbānō cæquīī, ante ēñencædānīpa, ante Itota īmæca quēwēnāni nāni cæinō ante odōmōninque īmaī apæncantapa. “Babetamongā ingante wacā babetamongā incæ ædō cæte māo odōmongā goqingāa. Īñæmpa mānōmaī cædinque nāna babetamongā awēnēnāni nāni cæinō ante odōmōninque īmāni cæinō nē ēñengā ingante tōmengā nānō nē ēmīñængā guiquēnē dicæ godōmenque ēñengā ingāa. Incæte īninque odōmōnte apæncæcā ēñēninque tōmengā nānō nē ēmīñængā abæ tawæninque wæætē nē odōmongā bai bacæcāimpa,” ante Itota apænegacāimpa.

⁴¹ Ayæ apænedinque, “Bitō tōñīnacā wædænque wēnæ wēnæ cæcā īñongante bitō guiquēnē nanguī bitō wēnæ wēnæ cædinō ante wædāmaī īnōmi inte tōmengā ingante quīnante pīinte ānewēmīi. Īñæmpa tōmēmi awinca gāānē awæmpa wææ ongompa, ante adāmaī inte bai cæcipa tōō. ⁴² Tōmēmi awinca gāānē awæmpa wææ ongompa, ante bitō adāmaī inte bitō tōñīnacā ingante, ‘Bīwī, bitō awinca guiyā mæ owo bai ate æ wimōmoe,’ ante edæ abīpa ænguīmīi. Īñæmpa bitō nē wadō tedete wadō cædōmi inte edæ tōmēmi awinca

gäänē wææ ongompa tāno wido cæte ate edonque adinque bitō tōnīñacā awinca guiyā owodō æncæbiimpa,” ante Itota angacāimpa.

*Awæ æbānō iwæ, ante tōmenca bete ēñengæimpa, ante
(Māateo 7.17-20, 12.33-35)*

⁴³ Ayæ godōmenque apænedinque Itota, “Waincawæ incæ ædō cæte baaca incaquīl. Wæætē wīwa iwæ incæ ædō cæte wainca incaquīl. ⁴⁴ Awæ æbānō iwæ, ante ēñencæte ante mōnō tōmenca tā pete bete ēñengæimpa. Igowæñeca æncæte ante waodāni dicæ daa mongæwāa edæ tā pete ænāniyaa. Yowemō æncæte ante waodāni dicæ daacamēña tā pete ænāniyaa. ⁴⁵ Mōnō waocba iñōmō adobai iñōmō inte cæmompā. Mīmōnē mōnō pōnēmāmo eyede tate bai tao godedinque mōnō mānīmāmoque ante pōnēninque tedemompā. Waocā nē waa cæcā guiquēnē waa pōni tōmengā nānō pōnēnō ante entawēninque waa tedecampā. Nē wīwa cæcā guiquēnē tōmengā nānō wīwa pōnēnō ante entawēninque wīwa tedecampā,” ante Itota apænegacāimpa.

*Nē mænōna ante
(Māateo 7.24-27)*

⁴⁶ Ayæ godōmenque apænedinque, “Mīnitō iñōmō botō īmote, ‘Awēnē, mōnitō Awēnē īmipa,’ ante tedemīni incæte botō ānō ante quīnante wīl ēñente cæmīni. ⁴⁷ Nōwo iñōmō edæ apænebo ēñēdāni. Botō gāmænō ponte ēñēninque waocā botō ānō ante do ēñente cæcā iñōmō tōmengā īlmai ingampā. ⁴⁸ Waocā adocanque oncō mænoncæte ante guībæ ææ wodinque dicaboga mænoncæte ante gōnongā bai nē ēñente cæcā iñōmō adobai cæcā ingampā. Tōmengā oncō tæi mænonte ongō īninque æpæ āninque quingæ pō incæte oncō ædō cæte wanæ wanæ cæquīl. Iñæmpā tæi mænonte ongompā. ⁴⁹ Wæætē waocā guībæ ææ wote gōnōnāmai yabæque oncō mænongā ate yabæque mænōiñōmō æpæ āninque pō ate oncō dobæ bogo cæte tæ wææninque æmæwo gopa. Botō apænebo ēñēninque waocā nē ēñēnāmai cæcā iñōmō tōmengā nē yabæque mænongā bai inte ocai incadāmai inte bai ēñēnāmai cæcampā,” ante Itota īnque apænegacāimpa.

7

*Capitāo ingante nē cæcā ingante Itota cæcā waa bacampā
(Māateo 8.5-13)*

¹ Ayæ tōmēnāni inānite īnque apænedinque Itota Capēnaōmō nāni quēwēñōmō gogacāimpa. ² Mānīñōmō quēwēninque odōmāno tontadoidi awēnē capitāo ingante nē cæcā iñōmō wēnæ wēnæ badinque æmæwo wæncæ cæcā ingantapa. Awēnē capitāo ingante nē cæcā iñongante awēnē wæætē tōmengā ingante nanguī waadecantapa. ³ Īninque, Itota waa cæcā ingampā, ante māmō apænedāni ēñēningā inte tontado capitāo iñōmō oodeoidi inānite nē aadāni nāni Picæncabo inānite apænedinque, Mīnitō Itota weca godinque tōmengā ingante āmīni ēñente pōninque tōmengā wæætē botō īmote nē cæcā ingante cæcā waa bacæcāimpa. ⁴ Angā ēñente godinque nē aadāni nāni Picæncabo guiquēnē Itota weca pōninque tōmengā ingante nanguī ānānitapa.

—Mōnō oodeocabo iñōmōnte māningā tontado capitāo iñōmō mōnō īmōnte waa cæcampā, ante wædinque bitō tōmengā beyæ waa cæcæbiimpa. ⁵ Tōmengā iñōmō mōnō oodeocabo iñōmōnte waadete cædinque, Wængonguī apæneçā nāni ēñente yewæmongainta ate mīnitō odōmōincō impa, ante do mænonte pōnongā æmompā cæbii.

⁶ Änani ëñëninque Itota në aadani näni Picäncabo tönö wadæ gocantapa. Oncö obo pöñönänite tontado capitäo iñömö tömengä guidënanani inänite, Go bee tëninque botö beyæ Itota ingante iimaï ante apæneedäni, angantapa. “Awënë ee ongöe. Botö waëmö imopa diyæ bitö botö oncönë pö guiquimii, ante capitäo bitö imite angampa,” ante apæneedäni, angä ponte apænedänitapa. ⁷ Ayæ adobai, “Botö wii waëmö inömo inte edæ bitö weca pönämaï intabopa. Incæte bitö adoyömö ongöninque ämi İninque botö imote në cæcä waa bacæcäimpa. ⁸ Bitö iñömö Awënë Wængongui ingante në ëñente cædömi İmi bai botö adobai wacä awënë ingante në ëñente cæbo İmopa. İninque botö awënë äbo inte botö awënë beyænque ämo ëñëninque tontadoidi wæætë guñfente wædinque botö änö ante cædänipa. İninque adocanque ingante botö, Goe, ämo ëñëninque edæ do gocampa. Wacä ingante, Pöe, ämo ëñëninque edæ do pongampa. Ayæ botö imote në cæcä ingante, Cæe, ämo ëñëninque edæ do cæcampa.” Mänömainö ante Itota ingante botö beyæ ante apænemini ëñengäedäni, ante tontado capitäo iñömö tömengä guidënanani inänite angä godinque tömënanani wæætë capitäo nänö änö bai ante Itota ingante adodö ante apænedänitapa.

⁹ Mänömainö ante tontado awënë beyæ apænedäni ëñëninque Itota wæætë, Mäningä tontado awënë iñömö waa pöni ëñengampa, ante wædinque godongämæ ongönäni inänite,

–Näwangä ämopa. Mönö idægocabo iñömönte mäningä wede pönengä ingä bai adocanque incæ edæ dæ angä awædö, angantapa.

¹⁰ Ayæ në bee tencæ pöninani oncönë wadæ gote ayönäni capitäo ingante në cæcä iñömö do waa bacä agadänimpa.

Ämæwo wæningä ingante Itota angä näni ömæmongampa

¹¹ Itota iñömö İmö ate Näino näni quëwëñömö gocæte ante goyongante tömengä nänö në ëmiñænäni tönö wadäni nangui İnani godongämæ godänimpa. ¹² Mäniñömö yabædemö obo pöñongä onguiñængä æmæwo wæningä ingante næænte pönänitapa. Tömengä badä owæmpoingä İnogä inte tömengä wengä adocanque wængä wædinque pongantapa. Ayæ mäniñömö quëwënanani nangui İnani wäänä tönö godongämæ pönäni acantapa. ¹³ Wäänä ingante adinque Itota tömengä tönö guëa wæwente bai pönëninque,

–Wædämaï İe.

¹⁴ Äninque do wæningä ingante tömënanani näni daga wenguimpa gäänë ponte gampocä ate në næænänäni næ gongænänitapa. Itota iñömö,

–Edëniimi, bitö imite ämopa. Ängæ gantie, angantapa.

¹⁵ Èñëninque në wæningä incæ ængæ gantidique tæcæ tedecä adinque Itota wäänä ingante pædæ godongä ængantapa. ¹⁶ Itota mänömaï cæcä adinque tömännäni nangui guñfente wædinque Wængongui ingante watapæ apænedinque,

–Wængongui beyæ në apænecä tæi ëmongä İnogä inte mönö weca a ongongä amompa, änänitapa.

Ayæ,

–Wængongui quimö iñömönte Wængongui incæ mönö weca ponte godongämæ cæcampa. Näwangä impa, ante nangui todänitapa.

¹⁷ Ayæ Oodeabæ tömäo quëwënanani inänite wayömö gomonga quëwënanani inänite mäo gode ä gode ä cæte, Itota æbänö cæcää, ante apænedäni ëñengadänimpa.

*Wäo tömengä miñcë në goda İnate da pöngä pönäpa
(Mäteo 11.2-19)*

18 Wäo müñæ né godäni adobaï, Itota æbänö cæcä ingää, ante eñëningue Wäo ingante mämö apænedäni eñengantapa. Mäninö ante apænedäni eñente wædinque Wäo iñömö tömengä müñæ né goda mënaa inate äñecä pönatapa. 19 Pöna adinque Wäo tömëna inate, Mínatö mönö Awënë weca godinque botö beyæ ante iïmaï ante äeda, angantapa. Awënë eñëmi. Bitö iñömö dodäni nani, Nê Ponguingä, angaiïmi adobi iïmitawo. Wæætê tömënäni nani né angaiïmi inämaï iïmi ininque bitö wæætê, Wacä ponguingä, ante wänö cöedäni, ämitawoo. Æbänö mönitö cæquimöniï, ante botö beyæ ante eñencæte ante äeda. Ante Wäo mënaa inate Itota weca da godongä godatapa. 20 Godinque Itota weca pöninque iïmaï ante apænedatapa.

—Wäo æpænê né guidönongä iñömö mönatö imönate da pönöningue bitö imite iïmaï angampa. Awënë eñëmi. Dodäni nani, Nê Ponguingä, angaiïmi bitö iñömö adobi iïmitawo. Wæætê tömënäni nani angaiïmi inämaï iïmi ininque bitö wæætê, Wacä ponguingä, ante wänö cöedäni, ämitawoo. Æbänö mönitö cæquimöniï, ante eñencæte ante Wäo mönatö imönate da pönongä pontamönapa, änatapa.

21 Mäniñedê incæ daicawo gawænäni tönö wënæ wënæ inte wæwënäni nanguï inäni inänite Itota godö waa cæcä waa badänitapa. Wënæidi né wïwa ewocadäni inänite tömengä wido cæcä ate waodäni nanguï inäni waa badänitapa. Babetamönäni nanguï inäni inänite tömengä gompomongä waa bamönänitapa. 22 Ininque mänömaï cæcä waa ayönate ñowo pöna inate Itota,

—Botö godö cæbo ate babetamö ininäni incæ do adäni aminäpa. Cömante ininäni incæ waa bate dao dao godäni aminäpa. Baate ininäni incæ ñowo æmontai waëmontai baadäni aminäpa. Babetamonca inäni iñönänite botö godö cæbo ate önömonca eñënäni badäni aminäpa. Do æmæwo wænte öñönäni iñönänite botö godö cæbo ate ñäni ömæmonte quëwënäni aminäpa. Ömaadäni inte wæwënäni inänite botö Wængonguï Awënë pönö waa cæcæcäimäpa, ante watapæ apænebo eñencädänimäpa. Ininque mînatö ponte eñëñömîna botö æbänö apænebo eñëminatawo, ante ayæ, Botö æbänö cæbo aminatawo, ante mînatö ñowo wæætê Wäo weca gote mäo apænemîna eñengæda, angantapa.

23 Ayæ, “Botö beyæ waocä wïï piïnte wadæ gocä iñömö tömengä nänö watapæ toquinque oda cædämaï incæcäimäpa, ante Wäo ingante mäo apænemîna eñencæcäimäpa,” ante Itota angantapa. 24 Angä eñëningue Wäo beyæ né äñina wadæ goda adinque Itota wæætê godongämæ ongönäni inänite, Wäo æbänö ingää, ante apænecantapa. “Mînitö guiquënë quïnö acæte ante önömæca gomînitapa. Cæwîpa woboyæ pæmænte ate æmænö ædæ æmænö ædæ gobaingä ingante mînitö dicæ acæ gomînitawogaa. 25 Ininque edæ quingänö ingante acæte ante gomînitapa. Edæ waocä weocoo waëmoncoo mongæñongä ingante mînitö dicæ acæ gomînitawogaa. Iñæmpa weocoo waëmoncoo né mongænäni iñömö nämanque ante pönente nani ænte mäincoo beyæ ante né towënäni inte tömënäni iñömö awënë oncönê quëwënäni apa quëwënänii. 26 Ininque edæ quïnante gomînitawo. Mînitö mîni né go acæ cædongä iñömö edæ Wængonguï beyæ né apænecä ingantawo. Näwangä impa. Wængonguï beyæ né apænecä Wäo ingampa. Incæte tömengä wïï Wængonguï beyæ né apænegaiñäni bai inongä inte godömenque nanguï cæcä ingampa, ante apænebo eñëmaïmînipa. 27 Wængonguï iïmaï angampa, ante yewæmongatimäpa.

‘Botö beyæ né apænecä ingante da godömo godinque tömengä taadö täno beyænte bai cæcæcäimäpa.

Tömengä bitö Codito iïmi beyæ ante taadö waa piñonte bai waa cæcæcäimäpa.’

Mänömaïnö ante dodäni adocä Wäö ingantedö ante pönëninque yewæmongadänimpa. ²⁸ Nöwo iñömö ämo ëñëedäni. Ìmæca mïni ëñagaincabo iñömïnite æpænë mönö në guidönongä Wäö adocanque ñænængä iñongante wacä tömengä bai edæ dæ angampa. Incæte Wængonguï Awënë Odeye nempo quëwënäni iñönäni adocanque guiyangä pöni ingä incæte Wäö pönömenque wædangä ingampa,” ante Itota apænecantapa.

²⁹ Itota mänömaïnö ante apænecä në ëñënäni iñömö odömäno awënë beyæ në æwënäni incæ wadäni incæ tömänäni Wäö nänö në guidongainänique inönänimpa. Ìninqe tömënäni, Wængonguï nö cæcä ingampa, ante tömänäni apænëdänitapa. ³⁰ Paditeoidi tönö idægoidi nani wææ angainö ante në ate ëñënäni guiquënë Wäö nänö guidongainäni inämaï inönänimpa. Ìninqe tömënäni guiquënë Wængonguï gämænö ponguëñänäni incæte edæ Baa änanitapa.

³¹ Godömenque apænëdinque Itota iïmaï angantapa. “Mänömaï i Ìninqe inguipogaque ante në quëwënäni iñömö quingämë bai inänipa. Quiëmë bai edæ quëwënänipa. ³² Wëñænäni mönö godonte æiñömö tæ contate owempodäni nani owempodö bai edæ adobai cædänipa, ante awædö. Wëñænäni nani owempote cæcabo incæ ææmæ cæte bai owempote cædinque wadäni inänite aa pedänipa. ‘Minitö beyæ ööña we we ööñömöni minitö wæætë edæ äwadämaï iminitapa töö,’ ante owempodinqe wëñænäni pïinte tedewëñänipa. Ayæ wæætë, Waocä do wængä ate nani wæbai, ante wëñænäni nani owempote cæcabo iñömö, ‘Minitö Ca ca wæyömöni minitö wæætë edæ wædämaï imïni wæmönipa,’ ante pïininqe aa pedäni bai ñöwodäni iñömö edæ adobai pïinte tedewëñäni inänipa.”

³³ “Edæ iïmaï impa. Wëñænäni nani wædö bai Wäö æpænë mönö në guidönongä iñömö cænguï cænämaï yowepæ biñömæ nani wædænque ti nämæ bedämaï ponte quëwëñongante minitö guiquënë, Wënæ tönö Wäö quëwengampa, ante pïiminipa. ³⁴ Ayæ wæætë botö Waobo ëñagaïmo inte tömäa cænguï cænte yowepæ biñömæ bete minitö weca ponte quëwëñömote minitö guiquënë, Cæowæöbi inte cæmipa. Beowæöbi inte bebipa, ante badete minitapa. Ayæ godömenque, Odömäno awënë beyæ në æwënäni tönö wadäni në ëñënämaï cædäni iñönänite bitö tömënäni æmigo imipææ, ante botö imote pïininqe minitö wëñænäni nani pïinte aa pedö bai änewëmïnipa töö. ³⁵ Incæte, Në nö ëñënäni iñömö nö cædänipa, ante adinqe, Näwangä nö ëñënänipa, ante mönö ëñengæimpa,” ante Itota apænëgacäimpa.

Paditeocä Timönö oncönë Itota go guiite ëñacampa

³⁶ Ayæ ate adocanque Paditeocä incæ Itota ingante, Botö oncönë pö cæe, angä Ao ante Paditeocä oncönë godinqe pö guiite cæ congan-tapa. ³⁷ Tömënäni quëwëñömö onquiyængä në wënæ wënæ cæte quëwengä inongäimpa. Tömengä iñömö, Paditeocä oncönë Itota cæncongampa, ante tededäni ëñëninque oguï wapæ dica adabatodo waincadedë pe ñiñænte næænte pongantapa. ³⁸ Pö guidinqe tömengä Itota önöwaca inö pö næ gongæninque Ca ca wæcantapa. Ca ca wæyongä Itota önöwaca inö ömæ petæ petæ wææ aa bee adinqe onquiyængä wæætë tömengä ocaguincooca wadæ cæwacantapa. Ayæ quëë bewadinqe oguï wapæ gao cæwacantapa. ³⁹ Mänömaï cæcä adinqe, Pö cæe, në äningä inte Paditeocä iñömö nämæneque pönëninque, “Itota iñömö Wængonguï beyæ në apænecä inte bai tömengä, Æcänö botö imote gampocäa, ante ayæ, Quiëmë bai onquiyængä ingäa,

ante ēñencædongäimpa. Ìñæmpa nē wēnæ wēnæ cædongä ingampa, ante do ēñencædongäimpa.”⁴⁰ Ante pōnēñongä Itota wæætē,

–Timōnō, bitō ìmite adodeque apænebo ēñēe.

Åñongante Paditeo wæætē,

–Ao, nē Odömōmi ìmi, apænebi ēñēmoe.

⁴¹ Angä ìninqe Itota,

–Onguññängä adocanque nē godōwengä inte quēwēñongante onguññæna mēnaa ìnante godongä ate debe badapa. Adocanque ingante nanguì quìniento èmō godongä ate nanguì debe bayongante wacä ingante wædænque tincoenta èmō godongä ate wædænque debe bacampa.⁴² Nē godōningä nänō äñimota òmæpoda inte tōmēna, Ædō cæte wæætē adodō pōnonguimōnaa, ante wæyōnate nē godōningä ìñömō edæ, Òmæpomina inte minatō ædō cæte adodō pōnōmīna ænguimoo, ante botō ænāmaì inte ñimpo cæcæboimpa, angampa. Ìninqe Timōnō bitō ìmite ämopa. Mēnaa ìnate ñimpo cæte äñāmaì ingä adinque nē godongä ingante æcänō godōmenque nanguì waadete pōnenguingäa, ante pōnēmii.

⁴³ Åñongante Timōnō,

–Wa. Godōmenque nanguì èmō debe ingä ìñömō tōmengä wabänō godōmenque waadete pōnengä ìmaingampa, ämopa.

Angä ēñēninqe Itota,

–Nāwangä ante pōnēmipa.

⁴⁴ Äninqe Itota onquiyängä gämænō dadi èmænte adinque Timōnō ingante apænedinque,

–Ìngä onquiyängä ingante edæ abi. Botō bitō oncōnē pō guiyōmote bitō, Mēwaquimæ, ante bitō dicæ pōnōmiyaa. Tōmengä guiquēnē òmæ wææmonte aa bewadinque tōmengä ocaguinca wadæ cæwacä ae.⁴⁵ Bitō guiquēnē waadedämaì inte queē bemōnāmaì ìñōmite tōmengä ìñömō botō pō guiyedē tāno queē bewadinque cōwē queē bewacä ae.⁴⁶ Bitō guiquēnē oginguipæ gao cæcadāmaì ìñōmite tōmengä ìñömō oguì wapæ gao cæwacä ae.⁴⁷ Ìninqe botō, Tōmengä mänōmaì cæcampa, ante odōmōninque bitō ìmite ämo ēñēe. Edæ tōmengä nanguì wēnæ wēnæ cæcä ìñongante Wængonguì godō ñimpo cæcä ate tōmengä wæætē nanguì waadete pōnengampa. Bitō ìñömō edæ wædænque wēnæ wēnæ cæbi ìñōmite Wængonguì pōnō ñimpo cæcä ate bitō wæætē wædænque waadete pōnēmi abopa.

⁴⁸ Äninqe onquiyängä ingante apænedinque Itota,

–Wēnæ wēnæ bitō cædinō ante pōnō ñimpo cæbo æe.

⁴⁹ Angä ēñēninqe wadāni godongāmæ cæ cōnāni guiquēnē godō wæntæ wæntæ äninqe,

–Ìngä ìñömō edæ waocä wēnæ wēnæ nänō cædinō ante, Pōnō ñimpo cæbo æe, ante nē angä ìñömō edæ æcänō ingäa.

⁵⁰ Ante wædinque tedeyōnāni Itota ìñömō onquiyängä ingante,

–Bitō wede pōnēnō beyænque quēwencæbiimpa. Ñōwo edæ wædāmaì inte goe, angacäimpa.

8

Itota beyæ, ante onquiyænāni godongāmæ cædināni

¹ Ayæ ate Itota nanguì ìnāni nāni quēwēñömō wayōmō wædænque ìnāni nāni quēwēñömō wayōmō wayōmō godinque, Awēnē Wængonguì Odeye

nempo watapæ quēwencæminimpa, ante waa apæneca ēñengadānimpa. Ayæ tōmengā tōnō dote ganca ināni mānimpodāni godongāmæ godānitapa. ² Ayæ onquiyænāni adobai Itota miñæ godānitapa. Tōmēnāni pancadāniya wēnæidi nē wīwa ēwocadāni tōnō nē quēwengaināni iñōnānite wadāni nantate wæwengaināni iñōnānite Itota cæcā ate tōmānāni do waa badināni inte ñōwo tōmengā miñæ tee empote godāni inōnānimpa. Adocanque Mādiya Māagadadēnā nāni angaingā tōmengā baonga wēnæidi tiæte ganca ināni tao godāni iñinque tōmengā ōnonganque badingā inte Itotaidi tōnō godinque pōnō cæcā inongāimpa. ³ Wacā onquiyængā Wāōnā nānōogængā Tiota guiquēnē Edode nānō ēadincoo nē aacā iñongante Wāōnā iñōmō Totānā tōnō ayæ wadāni onquiyænāni nanguī ināni tōnō adobai Itotaidi tōnō godongāmæ godinque pōnō cædōnānimpa. Tōmēnāni nāni ēadincoo incæ ænte pōninque Itotaidi beyæ ante pōnō cædōnānimpa.

*Waacā nānō quiyadō ante Itota odōmonte apænecampa
(Māateo 13.1-9; Māadoco 4.1-9)*

⁴ Nanguī ināni wayōmō nāni quēwencabo wayōmō nāni quēwencabo bacoo ināni godongāmæ ponte a ongōñōnānite Itota apænecantapa. Wængonguī nānō apænedō ante waodāni æbānō ēñēnāni, ante ēñencædānimpa, ante in-guipoga quēwēnāni nāni cæinō ante iīmāinō ante apænecantapa. ⁵ “Waacā nē quiyadongā iñōmō quiyacæ gocampa. Gote quiyayongā pancamonga taadō iñōmō wææmompā. Taadō wæænte eyepodimō ōñōñonte pinā gāwadāni ædō cæte pæquīl. Ayæ ayamōidi pōninque dobæ ade cænānipa. ⁶ Pancamonga guiquēnē dicamontaa iñōmō wææninque pæquināmai gā æidinque oguimēto guiwapa pæquīl. Guiwadāmai inte edæ guingo icadimō tōmencaguī tañfe wæncaguimpā. ⁷ Pancamonga guiquēnē ōmentacodē nānō eyepodimō iñōmō pæquināmai tā bocate gā æiyonte ōmentacoo adoyōmō pō incootonque ganta cæca ate nāñe wæmpā. Wampo incapa pæquīl. ⁸ Wæmonguipoga quiyadimō guiquēnē tā bocate waa pædinque tōmēmō tiēē ganca mānimpomō nanguī pōni incapa. Quiyacā nānō quiyadō ante edæ botō māninque ante apænebopa.”

Mānōmāinō ante apænedinque Itota ogæ tededinque, “Ēamonca ongonde edæ ēñēdāni,” angacāimpa.

*Ōnōmonque ēñente pōnēnāmai inānipa, ante
(Māateo 13.10-17; Māadoco 4.10-12)*

⁹ Tōmengā miñæ nē godāni iñōmō, Itota ēñēmi, ānānitapa. Māninō ante apænedinque bitō æbānō ante odōmoncæte ante apænebitawo. ¹⁰ Āñōnānite tōmengā, “Wængonguī Awēnē Odeye nempo æbānō quēwenguī, ante mīni waocabo wēēnēñedē mīni ēñēnāmai ingainō ante botō ñōwo edonque pōnō apænebo ate mīnitō adomīniquē ēñēmīni iīmīnipa. Wæætē wadāni inānite edæ botō inguipoga quēwēnāni nāni cæinonque ante odōmōninque apænebopa. Edæ tōmēnāni, Awincaque adinque wīl ædæmō adāni inte ōñōmoncaque ēñēninque ædæmō ēñēnāmai incædānimpā, ante dodāni Wængonguī beyæ ante nāni yewæmongainō bai iñinque bacæimpā, ante botō tōmēnāni inānite mānōmāinonque ante apænebopa,” ante Itota apænecantapa.

*Quiyacā nānō cæinō ante pōnente iīmāinō ante ēñengæimpā
(Māateo 13.18-23; Māadoco 4.13-20)*

¹¹ Itota ayæ godōnente apænecantapa. “Botō nē quiyacā nānō cæinō ante apænedinque iīmāinō ante odōmoncæte ante apænetabopa. Tōmēmō quiyadimō iñōmō Wængonguī nānō apænedō bai impā. ¹² Taadō wæænte ōñōmō botō ānōmō guiquēnē nē ēñēnāni bai impā. Tōmēnāni Wængonguī

nānō apænedō ante tæcæ ēñēñōnānite wēnæ awēnē pōninque, Quēwēnāmai incædānimpa, ante cædinque Wængongui nānō angainō ante ō ængā ïnque tōmēnāni ōmætawēnāni inte ædō cæte pōnente quēwenguināni. ¹³ Dicamontaa wæænte pædimō bai ïnāni guiquēnē Wængongui nānō apænedō ante wat-apæ ēñente todinque nē Ao ānāni ïnānīpa. Tōmēnāni ïñōmō oguimento guiwadāmai bai ïnāni inte wantæ ïñō pōnēnāni ate tōmēnāni nāni pōnēnō beyæ ante wadāni pīnte cædāni ate tōmēnāni wæætē guīñente wædinque ēmō cæte godānīpa. ¹⁴ Ōmentacodē wæænte pædimō bai ïnāni guiquēnē tōmēnāni ēñēninque godōmenque quēwēñōnāni inguipoga quēwente quīēmē beyænque mōnō wæpāmo pō ate guīñente wædinque pædāmai ïnānīpa. Māincooque beyæ ayæ ōnonque towente nāni wædō beyæ tōmēnāni ōmentacoo incootonque ñā caate bai cæ ïnque edæ wampo encadānīpa pæquināni. ¹⁵ Onguipoga wainguipoga quiyadimō bai ïnāni guiquēnē tōmēnāni nō pōnente waa cæte quēwēnāni ïnānīpa. Tōmēnāni ïñōmō edæ Wængongui nānō apænedō ante ēñēninque do bæi ongonte wede pōnēnāni ïnānīpa. Wæntæye ïnāmai ïnāni inte tōmēnāni ee cædinque tōmēwæ incate bai waa cædānīpa. Botō māñōmāinō tōmānō ante odōmoncæte ante nē quiyacā nānō cædō ante apænetabopa,” ante Itota apænegacāimpa.

*Gongapæncade, ante odōmonte apænecampa
(Māadoco 4.21-25)*

¹⁶ Ayæ, “Gongapæncade ti wodōnoinque waodāni dicæ owætadē boocæcadāniyaa. Mōimoga ænōmengadæ ïnō dicæ concæcadāniyaa. Wæætē, Māññōmō nē pō guidāni acædānīpa, ante cædinque gongapæncade awæmpa æmongapaa concædāni ñāō bæco adānīpa. ¹⁷ Quīēmē ante wē wodonte ï ïñōmō māñinō tōmānō ante ïncayæ ate edonque ate bai ēñengæïmpa. Quīñō ñōwo beecate bai ï incæ māñinō tōmānō ïncayæ ate wī æncate bai ïñonte edonque acæïmpa,” ante Itota apænecantapa.

¹⁸ Ayæ, “Nē ēacā ingante godōnāni ængā bai nē ēñengā ingante godō apænebo ēñente entawēninque tōmengā godōmenque ēñente bacæcāimpa. Nē ēadāmai ingā guiquēnē tōmengā, Ēabopa, ante pōnēninque nānō wædænque pōñi ēadincoo ïñonte ō ænāni wæcā bai nē ēñēnāmai ingā adobai tōmengā, Entawēmopa, ante pōngē ïnque wædænque pōñi nānō entawēnō ïñonte edæ ō ænte bai cæbo dæ ba ate wæcæcāimpa cæminii. Ēamonca ongonte ēñēninque quēwēmīnii,” ante Itota apænegacāimpa.

*Itota wānā tōnō tōmengā biwīdi pōnānīpa
(Māateo 12.46-50; Māadoco 3.31-35)*

¹⁹ Māññēdē tōmengā wānā tōnō tōmengā biwīdi pōninque tōmengā weca guicæte ante cæyōnāni wadāni goto ongōnāni ate wædinque, Ædō cæte guiquī. ²⁰ Ante wædāni adinque wacā,

—Itota ēñēmi. Bitō badā tōnō bitō biwīdi bitō ïmite ante oncodo ponte yabæque ongōnānīpa cæbii.

²¹ Ante apænecā ēñēninque Itota,

—Wængongui nānō ānō ēñēninque nē ēñente cædāni ïñōmō tōmēnāni botō badā bai botō tōññadāni bai ïnānīpa, angacāimpa.

*Itota angā ēñente woboyæ æpæ næ gongæmpa
(Māateo 8.23-27; Māadoco 4.35-41)*

²² Māññēdē tōmengā miñæ nē godāni ïnānite Itota,

—Gāwapæ æmæmāa taocæïmpa.

Angā ēñente cædinque tōmengā tōnō wipodē guidinque tæcæ taocæ wogaa godānitapa.

²³ Tao wogaa goyönäni Itota wipodē näñe ñongæninque edæ mö ñongantapa. Mänömaï mö ñöñongä goyönänite woboyæ nanguï pönï pæmæninque edæ æpæ mængonta mængonta pöningue wipodē baguimæ guï adinque tömënäni, Æpæ bete wænguï wæ, ante Yæ wædänitapa. ²⁴ Itota weca gote, Ömæmoncæcäimpa, ante tao cædinque,

—Awënë, möni Awënë, eñenguënë quëwëe. Bete wæncæ cæmompæ cæbii.

Änäni ñäni ömæmonte ængæ gantindinque, Woboyæ æpæ idæwaa mængonta cæbipa. Næ gongæmäwe, angä. Næ gongæninque ñancæ ñancæ gongæmæmpa. ²⁵ Ayæ tömënäni inänite,

—Mïni pönëgade incæ quïnante wïï pönëmïni.

Äñongante tömënäni ancai guïñëninque, Æbänö anguimöö, ante nämæneque tedegadänimpa.

—Ïngä ññömö æcänö ñongä inte mänömaï angä eñëninque woboyæ incæ æpæ incæ næ gongæmpa, ante wæmönipa, ante tedegadänimpa.

Guedatabæ ññömö wænæ inte nê ënemopä

(Mäateo 8.28-34; Mäadoco 5.1-20)

²⁶ Mänïï Gadideabæ ëmö cæte godinque Itotaidi æmæmäa wogaa tao godinque Guedatabæ pö ti wæænänitapa. ²⁷ Wipodē manta wo cæyönäni Itota ti wæænte tæcæ ömaa goyongante onguïñængä wënæidi tönö nê quëwengä ññömö mämö bee tengantapa. Ïngä ññömö tömënäni quëwëññömö nê quëwengaingä inte ñwo wantæpiyæ oncönë quëwënämaï inte ömaacä quëwëninque waodänidoque cöwë quëwengä ñongäimpa. ²⁸ Itota ingante adinque tömängä önöwa inö ædæ wæænininque edæ Yæ angantapa.

—Itota eñëmi, bitö Æibæ Quëwengä Wængonguï Wëmi inömi incæ quimæ botö weca pöwëë. Botö imote edæ, Ämogate wæcæcäimpa, ante cædämaï imäwe, ante nanguï angantapa.

²⁹ Edæ tæcæ pöñongante tömängä wentamö nänö nê ëwocadongä ingante Itota, Gobäwe, ante do angä eñente wædingä inte ñwo mänömaï angantapa. Mänïï wænæ ññömö wantæ wantæ ññonte onguïñængä ingante bæi ongonte bai cædongäimpa. Ñinque mäningä onguïñængä ingante waodäni daagömenca edæ ëno pönö goto wimænte wææ ëno pönö goto wïwadinque wææ wänönönänimpa. Incæte tömängä daagömë wangö ñæ wangö ñæ cædongäimpa. Ayæ tömängä ingante wænæ wæætë wæætë da godongä önomæca wodii winonte quëwënongå inte adocä ñwo Itota weca ponte angacäimpa. ³⁰ Angä eñëninque Itota wæætë,

—Æmömidö imii.

Äñongante,

—Botö ëmöwo Deguiönö ëmömopa, angantapa.

Edæ tontadoidi Deguiönö näni änoncabo bacoo inäni bai botö nê ënempodäni adobai wënæidi bacoo inänipa, ante adinque, Deguiönö ëmömopa, ante onguïñængä angantapa. ³¹ Wënæidi guiquënë Itota ingante wæætë wæætë äninque, Mönitö imönite tadömengadænguipoga wido cædämaï imäwe, ancaa änanitapa.

³² Mänïññömö odæ wængänäidi nanguï inäni änanquidi a cængönäni adinque, Ññömö odæ wængänä baönë ämi go guiite quëwenguimöni, änäni eñëninque Itota, Ao angä. ³³ Eñëninque waocä baönë quëwente tao godinque wënæidi odæ wængänä baönë wæætë go guiddäni ate odæncato wæætë ontadäa wæænömëmö ññömö gäwapæno pogodo wæi guiite becadote capo wængadänimpa.

³⁴ Itota mänömaï cæcä ate wædinque odæ wængänäidi nê aadinäni guiquenê pogodo wodii winonte tömënäni quëwëñömö mäo bee tente apænedinque idömæ mäo gode ä gode ä cæte, Itota mänömaï cæcä wæmönipa, ante apænedänitapa. ³⁵ Eñëninque wadäni wæætê, Æbänö cæcäi, ante acæte ante pönänitapa. Itota weca ponte ayönäni wënæidi tönö nê quëwëningä incæ ñowo önganque bate weocoo ëñacä inte Itota önöwa gäänê ëñêê congä adinque guïñente wægadänimpa. ³⁶ Wënæ tönö quëwëningä ingante Itota mänömaï cæcä ante nê adinäni iñömö ñowo pönäni inänite, Mänömaï cæcantapa, ante do apænedänitapa. ³⁷ Eñëninque Guedatabæ quëwënäni tömänäni ancaï guïñente wædinque Itota ingante, Mönitö weca quëwënämaï ñowo gobäwe, änäni ëñente wædinque tömengä wipodê imæmäa poncæte ante guicä. ³⁸ Adinque wënæidi tao godäni ate nê önganque bate quëwengä iñömö Itota ingante, Bitö miñæ mäobi goboe, angä ëñëninque Itota wæætê, Bitö ee quëwëmi, äninque,

³⁹ —Tömëmi oncönê adodö godinque, Wængonguï æbänö nanguï cæcä waa batawoo, ante mäo apænebi ëñencädänimpa.

Angä ëñëninque oncönê godinque tömënäni nänä quëwëñömö tömäo cægöninque tömengä, Itota mänömaï cæcä ate waa batapopa, ante mäo apæneca ëñengadänimpa.

Gaido wëñængä beyæ cæcæ goyongante

Itota weocoo onquiyængä gampocampa (Mäateo 9.18-26; Mäadoco 5.21-43)

⁴⁰ Itota imæmäa ocæ ëmante pongä adinque, Æyedëno ponguingäa, ante nê wädinäni inte tömänäni tömengä ingante waa ate togadänimpa. ⁴¹ Mäniñedê wacä oodeoidi odömöincö awënë inongä inte tömengä ëmöwo Gaido iñömö pö Itota önöwaca inö ædæ wææninque tömengä ingante, Botö oncönê quingæ pöe, ante nanguï angantapa. ⁴² Edæ botö wëñængä onquiyængä adocanque inongä inte dote wadepo nänö ëñagaï iñonte edæ wæncæ cæcampa cæbii, ante wæcantapa.

Ïninque Itota tömengä miñæ gocantapa. Idömæ goyongante nanguï inäni goto goto pöninque wodo mö ñongæñäni wæcantapa. Wampo impa go-
quingäa. ⁴³ Mäniñedê wacä onquiyængä pongantapa. Tömengä iñömö wantæpiyæ dote wadepo iñonte wepæ wantæ bidämaï cöwê wææ wædinque waa bawënenæte ante cædinque tömengä quincöo tömancoo eyepote pædæ godongä æninque dotodoidi æcämenque incæ onquiyængä beyæ ædö cæte waa cæquinäni. ⁴⁴ Mänömaï quëwente wædongä inte tömengä ñowo Itota önöñabæca inö pöninque tömengä weocoo yæwedecooque godö gampo cæyongä wepæ iñontobæ edæ wantæ bitapa.

⁴⁵ Itota iñömö edæ,

—Æcänö botö imote pönö gampodai.

Äñongante tömänäni, Æcänö gampodatawogaa, ante adoyömö ante änäni ate wædinque Pegodoidi wæætê,

—Awënë ëñëmi. Bitö weca tömänäni goto goto godäni apa ämi.

⁴⁶ Itota wæætê,

—Ïñæmpa adocanque botö imote wede pönëninque gampocantapa. Tæi piñænte botö entawënë incæ edæ wacä beyæ cæquinque do gotimpa, ante wæwëñente awädö.

⁴⁷ Äñongante onquiyængä iñömö, Ædö cæte wê womonguimoo, ante pönente wædinque do do wæate bai guïñëninque Itota weca ædæ wææncate tömänäni

ayönänite apænedinque, Botö waa bawëncæte ante bitö ìmite pönö gam-potabopa. Tæcæ pönö gampo cædinque waa babo ae. ⁴⁸ Ante apænecä eñëninque Itota,

—Onquiyæmi eñëmi. Bitö wede pönëno beyæ edæ wantæ bawënëmipa. Nöwo edæ nõ bawënëmi inte wampo pönente waa goe, ante godö ædæmö apæncantapa.

⁴⁹ Ante tæcæ apæneyongä oodeoidi odömöincö awënë Gaido oncönë quëwengä mänifedë pöningque edæ Gaido ingante apæncantapa.

—Bitö wengä ìñömö nõwo æmæwo wængampa cæbii. Në Odömongä ingante nõwo bitö godömenque änämaï incæbiimpa.

⁵⁰ Ante nõwo pöningä Gaido ingante angä eñëninque Itota wæætë,

—Gaido, guñënämaï ìe. Bitö wede pönëmi adinque bitö wengä müingä quëwencæcäimpa.

⁵¹ Äninque Itota godömenque godinque awënë oncönë pö guicæ cædinque Pegodo ingante Tantiago tönö Wäö ìnate wëñængä wæmpo tönö wäänä ìnate mänimpodänique ìnänite ænte manguicä wäänë guiddänitapa. Wadäni ìnänite wæætë wæcæ cæcä guiddämaï ìnänitapa. ⁵² Tömänäni Ca ca wædinque wëñængä wodi ingante ante pönente wæwënäni adinque Itota tömënäni ìnänite,

—Ca ca wædämaï ìedäni. Ìñæmpa ìñömö wëñængä wodi edæ wii æmæwo wængantapa. Mö edæ ñongampa.

⁵³ Angä eñente wædinque tömënäni, Æmæwo wænte öñongampa, ante do adinäni inte wæætë edæ, Antedö amüni, ante tömengä ingante badete todänitapa. ⁵⁴ Ìninque Itota wëñængä ingante pædæ wææmpo bæi ongonte töö æmæninque ogæ tededinque,

—Wëñæmi, ængæ gantibi, angantapa.

⁵⁵ Äñongä tömengä do wæningä inte ñäni ömæmonte quëwëninque ængæ ganticantapa. Itota wëñængä beyæ cængui angä godöna cængantapa.

⁵⁶ Adinque mæmpoda, Æbänö cæte mänömaï cæcää, ante guñente wædatapa. Incæte Itota wæætë, Botö æbänö cæboo, ante minatö wadäni ìnänite apænedämaï incæminaimpa, angacäimpa.

9

Wængongui Awënë ingantedö ante apæneedäni, ante Itota angä godänipa (Mäateo 10.5-15; Mäadoco 6.7-13)

¹ Tömengä müñæ në godäni, Dote ìnäni, näni änönäni ìnänite Itota angä pönäni ate, Botö në ämo inte botö tæi piñænö ante nõwo pönömo ænte entawëninque münitö tæi piñæninque në ämüni bacæminimpa. Ìninque münitö ämüni ate wënæidi tömänäni do gocædänimpa. Adobaï ämüni ate wënæ wënæ inte wæwënäni waa bacædänimpa. ² Münitö, Wængongui Awënë Odeye inguipoga do pongäimpa, ante apænemüni eñencædänimpa. Ayæ wënæ wënæ ìnäni ìnänite godö cæmüni waa bacædänimpa, ante Itota mänimpodäni ìnänite da godongä gogadänimpa.

³ Ìmaï angacäimpa.

—Münitö ömæpomüni taadö goedäni. Ongonto incæ mäincoo da wënguincade incæ cængui incæ godonte æinta incæ tömancoo edæ ænämaï inte ömæpomüni godinque edæ eñacoque eñate goedäni, angantapa. ⁴ Ayæ, Godinque æcönë töno go guimüni owodinque münitö wayömö müni go quëwenganca mänincönenque go guui go guui cædinque quëwëedäni. ⁵ Æyömömë goyömüni wadäni, Pöedäni, änämaï inte münitö apænedö ante wii eñënäni wædinque münitö wæætë tömënäni ìnänite emö cæte iimainö ante goedäni.

Mīnitō iñæmpa, Pōedāni, ānāmaī īmīni adinque mōnitō gomōni tamēñedāni, ante odōmoncæte ante mīnitō ōnōwa wadæ wadæ cæwadinque wadæ goedāni.

⁶ Angā godinque tōmēnāni quēwēñōmō wayōmō tōmēnāni quēwēñōmō wayōmō tōmāo godinque Itota nānō da godōnināni iñōmō mōnō Awēñē ingantēdō ante māo watapæ apæñedāni ēñēnānitapa. Ayæ wēnæ wēnæ ināni inānite godō cædāni ate waa bagadānimpa.

*Itota æcānō ingāā, ante Edode wæcampa
(Māateo 14.1-12; Mādoco 6.14-29)*

⁷ Tōmānāni māniñedē, Itotaidi æbānō cædāni, ante tedeyōnānite pancabaa awēñē odeye Edode incæ do ēñengantapa. Itota iñōmō æcānō ingāā, ante wædinque pancadāniya, Wāō wodi do wænte ñāni ōmæmōningā inte iingā Itota īmaingampa, ante tededāni ēñente wædinque awēñē Edode guiñente wæcantapa.

⁸ Wadāni guiquēñē, Ediya wodi ponte a ongōmaingampa, ante tedeyōnāni wadāni guiquēñē, Wængonguī beyæ nē apænegaināni incæ adocanque docā incæ do ñāni ōmæmōningā inte a ongōmaingampa, ante tededāni. ⁹ Eñente wædinque Edode wæætē,

—Botō tōmēmo āmo ēñēninque Wāō wodi ingante wido tamencadāni wængantapa. Īninque māningā Itota nāni nē tededongā guiquēñē æcānō ingāā. Ante wædinque Edode, Æbānō cæte Itota ingante aquimoo, ante nanguī cægacāimpa.

*5.00 ganca ināni inānite Itota godongā cænānīpa
(Māateo 14.13-21; Mādoco 6.30-44; Wāō 6.1-14)*

¹⁰ Itota nānō da godōnināni iñōmō tōmengā weca adodō pōninque, Mānōmaī mānōmaī cætāmōnīpa, ante nanguī tededāni ēñengacāimpa. Eñente ate tōmengā tōmēnāni inānite nānēñē Betaida eyequeī ænte māocā. ¹¹ Goyōnānite wadāni do ēñēninque tee empote pōnāni adinque Itota, Waa pōmīni abopa, ante waadete apæñedinque, Mīnitō Wængonguī Awēñē Odeye nempo watapæ quēwencæmīnīpa, ante apæñecantapa. Ayæ, Pancadāniya waa baquēñēnāni inānīpa, ante adinque tōmengā godō cæcā ate waa badānitapa.

¹² Ayæ gāwadecæ bayonte edæ, Dote, ante nāni Itota mīñæ gocabo iñōmō tōmengā weca pōninque ānānitapa.

—Īñōmō ōnōmæca impa cæbii. Bitō godongāmæ ongōnāni inānite āmi idōmæ owodāni weca godinque ayæ nanguī ināni nāni quēwēñōmō godinque oncō eyepæ ī ate cæninque moncædānimpa.

¹³ Āñōnānite Itota,

—Mīnitō wæætē godōmīni cæncædānimpa. Āñongante,

—Īñæmpa pāō ōnompō æmæmpoque gæyæ mēa pōñī mānimpoque nææmōnīpa tōō. Īninque bitō wæætē, Tōmānāni beyæ cænguī gote ænte pōedāni, āmitawoo.

¹⁴ Onguīñæñāninque tīnco mīdo ganca ināni edæ mæ ongōnōnānimpa. Incæte Itota tōmengā mīñæ nē godāni inānite angantapa.

—Mīnitō tōmānāni inānite, Tīncoenta ganca mīni cabo nānēñē tīncoenta ganca mīni cabo nānēñē āmīni tæ contacædānimpa.

¹⁵ Angā ēñēninque ānāni tæ contadānitapa. ¹⁶ Itota pāō ōnompō æmæmpoque æninque gæyæ mēa æninque oōnædē æmō adinque Wængonguī ingante, Bitō waa pōnōmī ænte cæmōnīpa, ante apæñecantapa. Ayæ pāō tōnō gæyæ pā æ pā æ cædinque tōmengā mīñæ nē godāni inānite pædæ godongā æninque tōmēnāni tōmānāni inānite di mæñæ di mæñæ cædāni ænte cængadānimpa.

¹⁷ Tōmānāni eyepæ ænte tōmo pōñī cænānitapa. Ayæ ao mæ ao mæ cæte

ñōñōnāni ate Itota miñæ nē godāni wæætē ao mæ nāni ñōñōni ee õñoncoo pædæ wææmpo õ æninque õnompō tipæmpoga go mentodæa cænguī eyede da wēnāni contagatimpa.

Bitō Coditobi ñōmi ñimpa, ante Pegodo apæñecampa

(Māateo 16.13-19; Māadoco 8.27-29)

¹⁸ Ayæ ate Itota nānēnē godinque Wængonguī ingante apæneyongā tōmengā miñæ nē godāni tōmengā tōnō godongāmæ ongōñōnānimpa. Tōmēnāni ñānīte angantapa.

–Wadāni botō ñmotedō ante apæñedinque, Æbodō ñmoo, ante apæñedāni ēñēmīni.

¹⁹ Æñongante tōmēnāni wæætē,

–Bitō ñmitedō ante apæñedinque pancadāniya, Wāō æpænē nē guidongaingā incæ Itota adocā ñmaingā ingampa, ānānīpa. Wadāni pancadāniya wæætē, Ediya wodi ingaingā incæ Itota adocā ñmaingā ingampa, ānānīpa. Pancadāniya wæætē, Wængonguī beyæ nē apænegaingā adocanque do wængaingā inte ñāni õmæmonte quēwēnongā incæ Itota adocā ñmaingā ingampa, ante tededānīpa.

²⁰ –Mīnitō guiquēnē, Botō æbodō ñmoo, ante pōnēmīni.

Æñongante Pegodo,

–Wængonguī nānō nē angāimi ñōmi inte bitō ññōmō edæ nē Coditobi ññōmi ñimpa, angantapa.

Itota, ññāi cædāni wæncæboimpa, ante apæñecampa

(Māateo 16.20-28; Māadoco 8.30-9.1)

²¹ Pegodo māñōmāñō ante apæñecā ēñēninque Itota wæætē angantapa. Mīnitō botō ñmotedō ante apæñedinque, Codito ñnongā ingampa, ante gode ānāmaī ñedāni āmopa, ante nanguī āninque edæ wææ angacāimpa. ²² Æninque,

–Botō Waobo ēñagāimo inte nanguī caate wæquēñēmo ñmopa. Nē aadāni nāni Picæncabo tōnō, Wængonguī quī, ante nē godōnāni ñæñæñāni tōnō nē odōmōñāni tōnō māññāni edæ botō ñmote Baa ānāni wæquēñēmo ñmopa. Ayæ botō ñmote godōmenque wæññōnāni wænguēñēmo ñmopa. Incæte Wængonguī angā beyænque botō mēōnaa go adoñnæque ññonte edæ ñāni õmæmonte quēwēncæboimpa, ante apæñegacāimpa.

²³ Ante apæñedinque Itota tōmāñāni ñānīte godōmenque apæñedinque,

–Æcānō botō miñæ pōñēna ñna tōmengā nāmā beyænque ante pōñēnāmāi inte ññō ññō ññō botō miñæ tee empote poncæcāimpa. Nāmā nānō wænguīwæ næænte ponte baī cædinque tōmengā, Botō wænguīmo incæ caate wæbo incæ Itota ingante cōwē tee empote gocæboimpa, āninque poncæcāimpa. ²⁴ Edæ æcānō, Nāmā wææ gompodinque quēwēncæboimpa, ante cædinque botō miñæ pōñāmaī ingā guiquēnē tōmengā ññōmō edæ quēwēñāmaī incæcāimpa. Wæætē edæ, Wæññōñāni wæmo incæte botō Itota miñæ tee empote cōwē gocæboimpa, ante æcānō āna guiquēnē tōmengā wæætē quēwēncæcāimpa. ²⁵ Edæ waocā inguipoga ongoncoo tōmancoo õ æncæte ante cædinque nāmā õñōwoca incæ pædæ godongā wē womonte ba ñinque edæ tōmengā ññæmpa quēwēngampa diyæ māñcoo ēaquiringā. ²⁶ Mīnitō pancamīñawo. ññæmpa botō Mæmpo nānō emōñō tōnō anquedoidi tæyæ wæmō ññāni nāni emōñō guñæ gongæññonte botō Waobo nē ēñagāimo inte edæ nāmā ññō apāite baī dibæ pōninque botō wæætē nē guññente wægaingā beyæ ante nāemæ guingo imonte edæ wæcæboimpa. ²⁷ Nāwangā āmopa. Botō

weca ongömīni pancamīniya ayæ wænāmaī edæ mīmīni quëwëñfōmīni botō Wængonguī Awënë Odeyēbo babo ate botō nempo guicæmīnīmpa, ante Itota apænegacāīmpa.

Itota waēmō pōnī nāō baī ēmongā bacā adānīpa
(Māateo 17.1-8; Māadoco 9.2-8)

²⁸ Mānōmainō ante apænedīngā inte Itota adoque Wængonguī itadē go ate Wængonguī ingante apænecæte ante æidīnque Pegodo ingante Wāō tōnō Tantiago īnate mānimpodāni īnānite ānanquidi ænte mæicā æidānīta. ²⁹ Æite go apæneyongā tōmengā awīnca īñōmō edæ wīi cōwē nānō ēmōnō baī waēmō pōnī nāō baī edæ ēmongā bamongā adānīta. Ayæ tōmengā weocoo nānō ēñacoo īñōmō edæ nāīnte baī ēmoncōo badīnque nāāmænta pōnī ēñacantapa. ³⁰ Ayæ ayōnāni edæ onguīñæna mēnaa edæ Mōitee wodi tōnō Ediya wodi īncæ īñontobæ a ongōnīnque Itota tōnō tededatapa. ³¹ Tōmēna īñōmō nāō apāite baī ēmōna inte Itota tōnō godongāmæ apænedatapa. Godongāmæ apænedīnque tōmēnāni, Itota æbānō nōwo Eedotadēē godīnque īnque cædīnque oo wænte wadæ gocæcāīmpa, ante tededānīta. ³² Mānōmainō ante tedeyōnāni Pegodoidi guiquēnē mōīnente a ongōnīnque ædæmō nāni omæmonte æmō ayōnāni Itota nāō apāite baī ēmongā adīnque tōmengā tōnō onguīñæna mēnaa godongāmæ adiyæ ongōnāni adānīta. ³³ Onguīñæna īñōmō Itota ingante tæcæ emō cæte gocæ cæyōna Pegodo guiquēnē,

—Awënë ēñēmi. Īñōmō mōnō waa pōnī ongonte awædō. Bitō āmi ate mōnītō oncontaīcōo mentaiya go adotaique mæñōnīnque bitō oncontai ante adotaique Mōitee oncontai ante adotaique Ediya oncontai ante adotaique mæñōmāimōnīpa.

Mānōmainō ante tededīnque Pegodo, Æbānō ante tedequēnēmo īmoō, ante ēñēnāmaī inte ōnonque tedecantapa. ³⁴ Mānōmaī tedeyongā boguīmancōo obo wæænte wææ owoyō adāmaī īnāni inte, Boguīmancōo ganta cæ wæcæ wæ, ante Pegodoidi guīñente wædānīta. ³⁵ Ayæ boguīmancodē ōnōnepāmoque apænecantapa. “Īngā botō Wengā botō nē apænte ængaingā īngampa cæmīnī. Tōmengā pōnō apænecā ate ēñēdāni.”

³⁶ Ante apænecā ēñente ayōnāni Itota nōwo adocanque a ongongā adānīta. Īnīnque tōmengā mīñæ nē godāni nē adīnānīque inte pæ wēenedīnque tōmēnāni nāni adīnō ante mānīfēdē wadāni īnānite apænedāmaī īngadānīmpa.

Itota wēnæ īngante angā go ate wēñcængā waa bacampa
(Māateo 17.14-21; Māadoco 9.14-29)

³⁷ Mānī ānanquidi æi īimō ate wææ pōñōnāni Itota ingante bee tencæte ante nanguī īnāni pōnānīta. ³⁸ Godongāmæ ponte nanguī īnāni ongōñōnāni onguīñængā adocanque edæ ogæ tededīnque,

—Nē Odōmōmi ēñēmi. Botō wengā onguīñængā īngante pōnō waa æe. Tōmengā adocanque botō wengā īngampa cæbīi. ³⁹ Tōmengā nānō nē ēwocadongā inte wēnæ īncæ tōmengā īngante edæ bæi ongongā ate tōmengā īñontobæ Yæ yæ angampa. Ayæ godō cæcā ate botō wengā edæ do do wāadīnque ōnōne māwanta tadecampa. Wēnæ īñōmō wantæ īñō tao godīnque adodō pō guīite edæ cōwē quëwëñīnque botō wengā īngante edæ ēwencæ cæcampa cæbīi. ⁴⁰ Bitō mīñæ nē godāni īnānite botō, Wēnæ inte wīdo cæedāni, ancaa āñōmo tōmēnāni nē cæquēnēnāni īncæ ædō cæte wīdo cæquīnānīi, ante wæbopa.

⁴¹ Ante wæyongante Itota,

—Ñowomīni mīni ædæmō cædāmāincabo mīni pōnēgade impa. Mīnitō weca æpogadō quēwēmoī. Wapiticæ cæyōmīnite botō æpogadō piyænē cæte wæwēmoī. Ānīnque mæmpocā ingante apænedīnque, Bitō wengā ingante botō weca ænte pōe.

⁴² Angā ēñente ænte māmōngā pōñongante wēnæ incæ yæipodē bæ tacā do do wāate wæwengantapa. Tōmengā wentamō nānō nē ēwocadongā ingante Itota iñōmō edæ, Ee ae, ante wææ angantapa. Ayæ wēñængā ingante pōnō cæcā ate tōmengā wæætē ōnonganque bayongante mæmpocā ingante Itota pædæ godongā ængacāimpa. ⁴³ Mānōmaī cæcā adīnque, Wængonguī incæ tæī piñænongā inte mānōmaī cæcampa, ante pōnēnīnque tōmānāni ancaī guīñente wægadānīmpa.

*Īmaī cædāni wæncæboīmpa, ante adodō ante apæneccā
(Māateo 17.22-23; Māadoco 9.30-32)*

Mānōmaī cæcā ate guīñente wæyōnāni tōmengā miñæ nē godāni iñānite Itota Īmaī ante apænegacāimpa.

⁴⁴ —Ñōwo āmo ēñenguēñē quēwēmīni. Adocanque, Waocā nē ēñagaingā æyōmōnō ongongāā, ante godō odōmōnīnque botō ĩmote waodāni nempō pædæ godōnāni æncædānīmpa.

⁴⁵ Ānīnque tōmengā nānō apænedō æbānō ĩ, ante wædānitapa. Wē womonte ĩ ĩnīnque tōmēnāni ædō cæte ēñenguīnāni. Ayæ, Æbānō ante āmīi, ante anguēñēnāni incæ edæ guīñēnete wædīnque pæ wēēnegadānīmpa.

*Æcānonque nē angā inguingāā, ante tededānīpa
(Māateo 18.1-5; Māadoco 9.33-37)*

⁴⁶ Tōmengā miñæ nāni nē gocabo iñōmō, Mōni cabo incæ æcānonque ñænængā pōñi ĩnongā inte nē angā inguingāā, ante wædīnque nāmā incæ wæætēdō wæætē tedeyōnānite ⁴⁷ Itota ōñōwēnque do ēñengantapa. Ēñēnīnque wēñængā adocanque ingante bæi ongōnīnque tōmengā gāānē iñōmō gō cæcantapa. ⁴⁸ Tōmēnāni iñānite apæneccantapa.

—Waacā botō ēmōwo beyænque ĩngā wēñængā ingante, Pōe, ante waa cæcā iñōmō tōmengā botō ĩmote adobaī edæ, Pōe, ante do waa cæcampa. Botō ĩmote æcānō, Pōe, ānīnque waa cæda tōmengā adobaī botō ĩmote nē da pōnōngā ingante Wængonguī ingante edæ adobaī, Pōe, ante do waa cæcampa. Edæ mīni waocabo wædāmīni iñōmīnite waocā guiyangā pōñi ĩnongā nānō entawēnō bai nē entawengā iñōmō tōmengā ñænængā pōñi ĩnongā ingampa, ante apænegacāimpa.

*Nē pñinte cædāmaī ĩngā iñōmō godongāmæ cæcā ingampa
(Māadoco 9.38-40)*

⁴⁹ Wāō iñōmō Itota ingante apænedīnque,

—Awēñē ēñēmi. Wacā incæ mōnō cabo iñāmaī ĩnongā inte bitō ēmōwo apænedīnque wēñædi iñānite wido cæcā atamōnīpa. ĩnīnque mōnitō wæætē edæ, Bitō mōnitō tōnō gobi ĩmpa Itota ēmōwo apænequīmīi, ante tōmengā ingante edæ wææ antamōnīpa.

⁵⁰ Ante apæneyongante Itota,

—Īñæmpa mīnitō ĩmīnite nē pñinte cædāmaī ĩngā iñōmō tōmengā wæætē mīnitō tōnō godongāmæ cæcā ingampa cæmīni. Tōmengā ingante wææ ānāmaī incæmīnīmpa, angacāimpa.

Tantiago tōnō Wāō ĩnate Itota wææ angampa

⁵¹ Oo pōni nānō æiquiōnæ bacæ cæyonte Itota, Eedotadēē iñōmō botō cōwē gocæboimpa, ante gocæ cæcantapa. ⁵² Wadāni iñānite tōmengā, Poncæcāimpa, ante mīnitō tāno beyænte goedāni, ante da godongā godānitapa. Godinque tōmēnāni iñōmō Tāmadiabæ godinque tōmengā beyæ cæcæte ante Tāmadiaidi nāni quēwēñōmō gocæ cæyōnāni, ⁵³ Tāmadiaidi wæætē edæ, Eedotadēē gāmæñō Itota gocā awædō, ante adinque, Mōnitō weca pōnāmaī incæcāimpa, ante wææ ānānitapa. ⁵⁴ Īimaī cædāni adinque Wāō tōnō Tantiago tōmengā nānō ēmiñæna iñōmō,

—Awēnē ēñēmi. Baa ānāni adinque oōnædē gonga āmōna wææ gonte wænguīnāni, āmi, ānatapa.

⁵⁵ Āñōnate Itota wæætē edæ dadi ēmæmonte wææ ante tōmēna inate, “Īñæmpa mīnatō ĩmīnate æwocadō angā ēñente āmīnaa, ante mīnatō edæ ēñēnāmaī ĩmīna awædō. ⁵⁶ Īñæmpa botō Waobo ēñagaīmo ĩmo iñōmō edæ waodāni iñānite ōmæe ēwencæte ante wīī pongaīmo ĩmopa. Wæætē edæ, Botō æmo beyænque quēwencædānimpā, ante pongaboimpā,” ante pīngacāimpa. Ayæ wadāni nāni quēwēñōmō gogadānimpā.

Itota miñæ nē goīnēnāni
(Māateo 8.19-22)

⁵⁷ Taadonque goyōnāni Itota ingante wacā angantapa.

—Awēnē, bitō ædōmē goyōmite botō bitō miñæ pō gocæboimpa.

⁵⁸ Angā ēñēninque Itota wæætē,

—Babæ guintaīdi iñōmō ontatodē monguī ēadāni iñānīpa. Ayamōidi ongota ēadāni iñānīpa. Botō Waobo ēñagaīmo wæætē edæ monguī ōmaabo ĩmopa poncæ āmīi, angacāimpa.

⁵⁹ Ayæ wacā ingante Itota,

—Botō miñæ pōe.

Angā ēñente wædinque tōmengā,

—Awēnē ēñēmi. Botō tāno gote botō wæmpo wængā ate daga wente ate pōmoe.

⁶⁰ Āñongante Itota wæætē,

—Īñæmpa nē wæwocadāni incæ tōmēnāni guīdēnāni wænāni ate ee abi daga wencædānimpā. Bitō wæætē, Wængonguī Awēnē Odeye do pongāimpa, ante gote apænebi ēñencædānimpā. ⁶¹ Ayæ wacā adobaī,

—Awēnē bitō ĩmite tee empote goīnēmo incæ ee ongōñōmi tāno gote botō guīdēnāni iñānite, Gobopa, ante apænete pōmoe. ⁶² Āñongante Itota wæætē,

—Ōmæ nē mangæ mangæ cædongā iñōmō tōō pōni mīnte pæquimpā, ante cæquēnengā ingampa. Tōmengā dadi ēmænte adinque tōō pōni cæcampa diyæ tōō mīnte pæquīī. Ayæ adobaī Wængonguī Awēnē Odeye nempo quēwēninque nē cæquēnengā iñōmō tōmengā dadi ēmænte inguipogaque ante acā ĩninque Awēnē beyæ ante ædō cæte cæquingā.

10

72 ganca iñāni iñānite Itota da godongā godānīpa

¹ Ayæ ate mōnō Awēnē godōmenque tetenta i doo ganca iñāni mānimpodāni iñānite ĩmaī angantapa. Mīnitō æmæñō mēmīnaa æmæñō mēmīnaa godinque botō nē goquīñōmō ante wayōmō nāni quēwēñōmō māo wayōmō nāni quēwēñōmō māo tāno beyænte gomīni ate botō ayæ poncæboimpa, āninque da godongā gogadānimpā. ² Īimaī ante da godongā godānitapa. “Nāwangā āmopa. Waocā tōmencacodē do pequina nanguī inca baī Awēnē

nempo nē quēwenguēnēnāni adobaī nanguī īnāni īnānīpa. Incæte nē tā pedāni wædænque īnāni baī nē gode ānāni īñōmō adobaī mēnāniya pōnī īnānīpa cæmīnī. Mīnitō Wængonguī ingante apænedīnque, Awēnē, bitō tōmencacodē nē ēabi inte āmi ēñēnīnque gote apænecædānīmpa, ante ædāni.

³ Nōwo mīnitō īñōmō goedāni, āmopa. Mēñeidi weca ongōnīnque codotedoidi īñōmō tæēmō īnānīpa diyæ nāmā wææ aqūīnānī. Mīnitō īñōmō codotedoidi aqūīnāni baī adobaī aqūīmīni īñōmīnīte botō āmo mēñe baī īnāni weca edæ gomīni ataqueedāni.

⁴ Godonte mīni ænguīnta wente æī ænāmāi inte māincoo mongænte godāmaī īedāni. Awæncata næænte godāmaī īedāni. Taadō godīnque wacā ingante bee tēnīnque apænedāmāi inte goedāni.

⁵ Æcōnēmenque go guīite, Mīni quēwencabo gānē pōnente waa quēwēedāni, āmīni ēñencædānīmpa.

⁶ Mānīncōnē quēwengā Ao angā īnīnque tōmengā gānē pōnente waa quēwēmaīnīmpa. Wæætē Baa angā īnīnque mīnitō adomīnīque gānē pōnente waa quēwēmaīmīnīpa.

⁷ Mānīncōnē mīni go guīidīncōnē quēwēñōmīnīte mānīncōnē quēwēnāni pædæ pōnōnāni ænte cænte bete quēwēedāni. Edæ nē cæcā īñōmō tōmengā nānō cædī beyæ eyepæ ænguēnengā ingampa. Mīnitō adocōnēnque quēwēnīnque wacōnē wacōnē godāmaī īedāni.

⁸ Æyōmōmē goyōmīni mānīñōmō quēwēnāni, Pōedāni, ānāni ēñente wædīnque mīnitō tōmēnāni cænguī pōnōnāni ænīnque cæedāni.

⁹ Wēnæ wēnæ wæwēnāni īnānīte godō cæmīni waa bacædānīmpa. Ayæ tōmēnāni īnānīte, ‘Wængonguī Awēnē Odeye mīnitō weca oo pongā acæmīnīmpa,’ ante apæneedāni.

¹⁰ Ayæ tōmēnāni quēwēñōmō go guīyōmīnīte Baa ānāni īnīnque mīnitō wæætē tōmēnāni taadonque tao godīnque tōmēnāni īnānīte,

¹¹ ‘Mīnitō quēwēñōmō onguīpoi wadæ cæwate gomōna tamēñedāni. Incæte Wængonguī Awēnē Odeye mīnitō weca oo pongā acæmīnīmpa,’ ante ædāni.

¹² Edæ mīnitō īmīnīte āmopa. Wængonguī nānō apænte anguīōnæ īnīnque bayonte Todōmā īñōmō quēwengāīnāni guīquēnē nanguī pante wæwēñōnāni mīnitō īmīnīte nē Baa ānāni guīquēnē godōmenque nanguī pante wæwenguīnāni īnānīpa,” ante Itota angacāīmpa.

*Nē ēñēnāmāi quēwēnāni īnānīte Itota pīngampa
(Māateo 11.20-24)*

¹³ Ānīnque Itota nē ēñēnāmāi quēwēnāni īnānīte pīnīnque īīmaī angantapa. “Codatūī īñōmō quēwēmīni ēñēedāni. Betaīda īñōmō quēwēmīni ēñēedāni. Mīnitō mīni wæwenguīnque ēñēnāmāi cæte quēwēmīnidō anguēnē. Edæ botō mīnitō weca tæī pīñænte botō cædī baī Tīdo nāni quēwengāīñōmō Tīdōō nāni quēwengāīñōmō adobaī cæbo baī mānīñōmō quēwengāīnāni īñōmō wēnæ wēnæ nāni cægāīnō ante dobæ ñīmpo cædīnque gōmæ ēmoncoo da wēñadīnque gōnaiboga tæ contadīnque Ca ca wæcægadānīmpa.

¹⁴ Īnīnque Wængonguī nānō apænte anguīōnæ īnīnque bayonte Tīdo īñōmō tōnō Tīdōō īñōmō quēwengāīnāni īnānīte nanguī pangā wæwēnāni incæte tōmengā mīnitō īmīnīte godōmenque pangā wæwencæmīnīmpa.

¹⁵ Ayæ Capēnaōmō īñōmō quēwēmīni ēñēedāni. Wængonguī mīnitō īmīnīte dicæ oōnædē wo ææntodongā æi gote toquīmīniyaa. Īñæmpa tadōmengadænguīpo wææntodongā guīi wæcæmīnīmpa,” angantapa.

¹⁶ Ānīnque Itota wæætē tetenta i doo īnāni īnānīte apænedīnque, “Mīnitō apæneyōmīni æcānō ēñengā tōmengā īñōmō edæ botō īmote do ēñengā ingampa. Wæætē mīnitō īmīnīte nē Baa angā īñōmō tōmengā edæ botō īmote do Baa angā ingampa. Ayæ botō īmote nē Baa ānīngā inte tōmengā botō īmote nē da pōnōngā ingante do Baa angampa,” ante apænedīnque tōmēnāni īnānīte Itota angā godānītapa.

Tetenta i doo ināni do godināni inte occæ emænte pōnāni

¹⁷ Angā godināni inte tetenta i doo ganca ināni adodō occæ emænte pōninque watapæ todirique Itota ingante apænedinque,
 –Awēnē, bitō emōwo apænedinque mōnitō wēnæidi inānite āmōni ēñēninque bitō emōwo beyænique godānīpa.

¹⁸ Ante todāni ēñēninque Itota wæætē,

–Nāinte quingæ cæ bai Tatāna iñōmō wēnæ awēnē incæ oōnæde īnō wæængā nē agaimo inte botō adobo āmopa. ¹⁹ Botō pōnō āmo ate mīnitō iñōmō nē āmīni badinque edæ tæntæ tōnō emēñe ingante pinā gāwadāni bai adobai tæī emōmīni inte tæntæ bai nē cædāni inānite wido cæcæmīnīpa. Ayæ mōnō imonte nē piinte cædongā incæ tæī piñænte cæcā incæte mīnitō iñōmō godōmenque tæī emōmīni inte māningā nānō tæī piñænte cæpāmo ante tōmāmāmo ante edæ wido cæcæmīnīpa. Edæ æcāmenque incæ mīnitō imīnite æmæwo wido cædāmai incæcāmpa. ²⁰ Incæte mīnitō āmīni ēñēninque wēnæidi do ēñente cædāni beyænique todāmai iedāni. Wæætē, Mōnitō emōwo oōnæde dobæ yewæmonte ongmpa, ante adinque mīnitō mānōmai beyænique watapæ toedāni, angacāmpa.

Mæmpo Wængonguī ingante apænedinque Itota tocampa (Māateo 11.25-27, 13.16-17)

²¹ Āninque Wængonguī Tæiyæ Waemō Ōnōwoca ingante ēwocadongā inte Itota māniñedē edæ watapæ todirique Wængonguī ingante iūmai ante apænecantapa. “Mæmpo ēñēmi. Bitō, Wadāni nāmā ocāi encadāni tōnō nanguī adinque nē ēñēnāni tōnō māniñō bitō cægāinō ante ēñēnāmai incædānīpa, ante cædirique bitō cægāinō ante wē wodongabiūpa. Wæætē wēñænāni tæcæ ēñadāni bai ināni inānite bitō edonque odōmōmi adinque do ēñēnānīpa. Bitō oōnæde Awēnē ingāimi inte inguipoga Awēnē adobi inōmi inte edæ mānōmai cæbīpa, ante adinque botō bitō imite waa ate pōnēninque apænebopa. Mæmpo, bitō tōmēmī ānō bai cædirique waa cæbi adinque botō Ao āmopa, ante apænebopa,” ante Wængonguī ingante apænegacāmpa.

²² Ayæ, “Botō Mæmpo incæ, Bitō Awēnē inōmi inte aacæbiūpa, ante tōmāo iñōmō ongoncoo botō nempo pædæ pōnōninque tōmāo iñōmō quēwēnāni tōmānāni inānite adobai botō nempo pædæ pōnōngā æninque botō iñōmō edæ tōmancoo ēnempodirique tōmāo iñōmō quēwēnāni inānite nē ēnempobo imopa. Wængonguī Wēmo iñōmote, Æbodō imoo, ante Mæmpoque ēñengā ingampa. Botō wæætē tōmengā Wēmo inōmo inte, Wængonguī æcānō ingāā, ante adoboque nē ēñēmo imopa. Ayæ, iñāninque nē ēñēnāni incædānīpa, ante botō nē angāināni inānite odōmonte botō apænebo ēñēninque tōmēnāni wæætē, Wængonguī æcānō ingāā, ante nē ēñēnāni badāni ate mōnitō adomōnique āanque bai nē ēñēmōni imōnīpa.”

²³ Ante apænedinque Itota dadi emæninque tōmengā miñæ nē godāninque inānite apænedinque, “Nōwo mīni adinō adinque nē emōmīni inte mīnitō mīni watapæ quēwengūnque impa. ²⁴ Iūmai impa, ante apænebo ēñēdāni. Wængonguī beyæ nē apænegāināni nanguī ināni tōnō imæca awēnēidi nanguī ināni incæ mīni adinō bai ante aīnente wægāināni incæte edæ adāmai ingadānīpa. Mīni ēñēniñō ante adobai ēñēinente wægāināni incæte tōmēnāni ēñēnāmai ingadānīpa,” ante māninganca Itota apænecā ēñengadānīpa.

Tāmadiabæ quēwengā incæ nē waa cæcā ingampa, ante

²⁵ Ayæ ate adocanque idægoidi nāni wææ angāinō ante nē ate ēñengā iñōmō, Itota æbānō wapiticæ apænebaingāā, ante cædirique ængæ gantid-
 inque tōmengā ingante iūmai angantapa.

—Awënë nē Odömömi ēñēmi. Botō æbänō cæte cōwē wænāmaī wantæpiyæ quēwenguimoo, ante wæbopa.

²⁶ Æñongante Itota,

—Mōitee wodi, Īmaī cæedāni, ante wææ yewæmōninque æbänō ante yewæmongā ongō abii.

²⁷ Æñongante nē odōmongā wæætē,

—Īmaī ante yewæmongacāimpa. Bitō mīmō entawēmi inte Wængonguī mōnō Awënë ingante waadedinque bitō önōwoca ēwocadinque ædæmō waadete pōncæbiimpa. Bitō baō tæī piñænte ēñabi inte godō waadete cædinque bitō ocai encabi inte nō pōnēninque waa waadete pōnē. Ayæ adobaī bitō nāmā bitō waadete waa cædō baī adobaī pōnēninque godongāmæ quēwēnāni inānite adobaī waa waadete cæe.

²⁸ Ante apænecā ēñēninque Itota tōmengā ingante wæætē,

—Bitō nō ēñēmi inte nōingā apænebitapa. Mānīnō bitō ānīnō baī cæbi ĩninque bitō wænāmaī quēwēmaīmipa.

²⁹ Angā ēñēninque guīñente wædinque nē odōmongā ĩñōmō, Botō cæquēnēnō ante wīī cæbopa, ante Itota ēñēnāmaī incæcāimpa, ante nāmanque ante wææ āninque,

—Īñæmpa wa. Godongāmæ quēwēnāni, ante bitō ānīnāni ĩñōmō ædānidō ĩnāni.

³⁰ Æñongante Itota wæætē, Mōnō guīdengā æcānō ingāā, ante odōmoncæte ante Īmaī apænegacāimpa.

—Onguīñængā adocanque Eedotadēē quēwente Eedicoo wæidō cægōñongante nē ō ænāni tōmengā ingante ĩñontobæ bæi ongonte weocoo gāni tadongadinque tæi tæi pānāni nangæ bacā ĩninque wadæ godāni. ³¹ Ate, Wængonguī quī, ante nē godongā adocanque adodō wæidō godō godinque nē nangæ bate ōñongā ingante gomō adinque ee wodo pænta æmæ wedeca gocampa. ³² Ayæ ate Debiī wodi pæñāni nāni Wængonguī oncōnē cæcabo incæ adocanque adobaī adoyōmō wææ pōninque nē nangæ bate ōñongā ingante gomō adinque ee wodo pænta gocampa. ³³ Ayæ ate wacā Tāmadiabæ nē quēwēnōngā incæ ado wæidō godinque nē nangæ ōñongā weca adoyōmō ponte gomō adinque, Tōmengā ædō cæte quēwenguingāā, ante tōmengā wædō ante baī nangui pōnente cæcantapa. ³⁴ Īngā ĩñōmō nē nangæ bate ōñongā weca pōninque tæi tæi pānāni nānō æbāadiñōmō oginguipæ tōnō yowepæ tī nāmæ biñōmæ nāni āmæ gao caadinque weococa wīni caacampa. Ayæ, Tæ contate gocæcāimpa, ante adocā Tāmadiabæ quēwengā ĩñōmō nāmā nānō nē mongænte goquēnengā bodo önōñabæ nē nangæ badingā ingante ængō cæcā tæ contayongante bodo ingante tōō tōō ænte gocampa. Ayæ taadō pōnāni nāni cænte guīte mōincō ganca ænte māo guīdinque nē nangæ badingā ingante waa cæcampa. ³⁵ Īimō ate padata nāni godonte æinta mentaa tadōninque mānincōnē nē aacā ingante pædæ godōninque, Bitō nē nangæ badingā ingante waa cæe. Quīēmē æinengā adinque bitō godōmi ængā ate botō bitō weca adodō pōninque bitō godōnimpo adopo wæætē pædæ pōnōmo æncæbiimpa, ante gocampa. Mānōmaī cæcampa. ³⁶ Āninque Itota tōmengā ingante nē āningā ingante godōmence angantapa. Bitō ĩmite ñōwo āmo ēñēninque bitō wæætē apænebi ēñēmoe. Nē nangæ bate ōñongā weca pōnāni mengāā go adocanque ĩnāni incæte æcānō tōmengā tōnō godongāmæ quēwēnāni baī inte waa cæcantawoo, ante pōnēmii.

³⁷ Æñongante nē odōmongā wæætē,

—Tömengä ingante nē waadete godö waa cædongä incæ tömengä guidendä bai cæcampa.

Ante apænecä ēñēninque Itota wæætē,

—Tömengä nänö cædö bai bitö adobaï godinque cæbäwe, angacäimpa.

Mäadota tönö Mäadiya nāna caya oncönē Itota ēñacampa

³⁸ Ayæ taadö goyönāni tömēnāni quēwēñömö pongä adinque onquiyængä tömengä emöwo Mäadota iñömö Itota ingante angä tömengä oncönē pö guiite ēñacantapa. ³⁹ Mäadota tönñacä Mäadiya iñömö Itota önöwaca inö tæ contadinque tömengä apænecä ēñēē congantapa. ⁴⁰ Mäadota guiquenē nē ēñadāni beyæ ante nanguï cæte wædinque Itota weca pöninque,

—Awēnē, botö tönñacä emö cæte gocä ate botö adoboque nanguï cæbo ate wædāmaï imitawo. Edæ ämi pö cæcæe.

⁴¹ Äñongante Itota,

—Mäadota, Mäadota, bitö wa wa wa cæcæte ante wæwēmi awædö. ⁴² Wæætē adoque pöni cædinque edæ eyepæ impa. Mäadiya do, Quinö waa cæquimoo, ante apænte pönēningä inte botö önöwaca inö pö tæ contate ēñēē congä adinque botö wæætē tömengä ingante, Goe, änāmaï incæboimpa, angacäimpa.

11

Wængonguï ingante cæbänö apænequï, ante Itota apænecä

(Mäate 6.9-15, 7.7-11)

¹ Itota ayæ ate wayömö gote Wængonguï ingante apænecantapa. Ìnque apænecä adinque tömengä nänö nē emiñængä adocanque tömengä ingante apænedinque,

—Awēnē ēñēmi, Wäö tömengä nänö emiñænāni inānite odömonte, Wængonguï ingante cæbänö ante apænequï, ante nänö apænedö bai bitö mönitö imönite adobaï ante odömonte apænebi ēñenguimönii.

² Ante wæyönāni Itota,

—Wængonguï ingante apænecæte ante iïmaï ante apæneedāni,

“Mönitö Mæmpo nē öönædē quēwēnömi inte ēñēmi.

Mönitö bitö emöwo tæiyæ waemö emömi adinque bitö emöwo ante waa adinque apænemönipa.

Bitö öönædē Awēnē nē ingäimi inte inguipoga Awēnē Odeyebi bitö baquinque edæ quingæ pöe. Öönædē owodāni ēñente cædāni bai inguipoga adobaï bitö änö bai ēñente cæcæimpa.

³ Mönitö imönite bitö, Cænguï, ante iïmö iñö iïmö iñö eyepæ pönömi ænte cæmönie.

⁴ Mönitö wænæ wænæ cæmönie incæte bitö nē panguēnēmi incæ pönö ñimpo cæbi quēwēmönie. Mönitö adobaï edæ wadāni mönitö imönite wænæ wænæ cædāni adinque ñimpo cæmönie quēwēnāni ae.

Mönitö wænæ wænæ möni cæinēnö godö gocæte ante cæmönie adinque bitö wææ cæbi ate mäninö godö godāmaï inte mönitö wæætē wænæ wænæ cædāmaï incæmönimpa, Wæætē edæ nē wiwa ewocadongä nempo ongöñömönite bitö gä pe æmpobi quēwēmönie.”

Mänömainö ante apænete Wængonguï ingante apæneedāni, Itota angantapa.

⁵ Äninque tömēnāni inānite godömenque apænedinque Itota,

—Bitö iïmaï cæbi Ìninque bitö æmigo cæbänö cæbaingäa, ante pönēedāni. Ayaönænēna incæ bitö æmigo weca godinque bitö, “Botö æmigo ēñēmi. Päömo bodogaa tånoque pönömi ænimo inte ayæ ate botö adopo pönömo æncæbiimpa. ⁶ Edæ wacä botö æmigo incæ wayömö gocæte ante botö weca

pongampa cæbii. Botō, Quinō impa diyæ godōmo cænguingāā, ante wædimo inte bitō imite āmopa.” ⁷ Āñōmi tōmengā guicōnē oñōninquē, “Botō odemō ædæmō tee mōnedinque botō wēñænāni tōnō mōimoga oñōmo inte diyæ ædō cæte ængæ gantite godōmo ænguimii. Ee ae.” ⁸ Āninquē bitō æmigo incæ bitō āmi beyænque ængæ gantite pōnōnāmaī ingampa. Incæte wæætē wæætē āñōmi tōmengā, Ancaā ēñente awædō, āninquē ængæ gantidinque bitō imite do pōnongā æmaimipa. ⁹ Ante apænedinque botō iñōmō mīnitō mīni ænguino ante āmopa. Pōnōmi æmoe, ante nē angā bai cædinque mīnitō mīni ænguino ante Wængonguī ingante apæneedāni. Āyōmōnō īi, ante nē diqui diqui mingā bai cædinque mīnitō, Ābānō īi, ante ædæmō ēñencæte ante Wængonguī ingante wede pōnente apæneedāni. Odemō mōnitō beyæ wi ænecæimpa, ante aa pecā bai cædinque mīnitō, Ābānō cæquimoo, ante ēñencæte ante Wængonguī ingante nanguī apæneedāni. ¹⁰ Edæ, Pōnōmi æmoe, ante nē ānāni iñōmō edæ do ænānīpa. Nē diqui diqui mīnāni iñōmō do adānīpa. Ayæ odemō ponte nē aa pedāni tōmēnāni nāni guiquinque edæ do wi ænete bai bacæimpa.

¹¹ Ante apænedinque Itota godōmenque apænecantapa.

–Wēñæ mæmpobi īmi, ēñēmi. Bitō wēñængā pāo ante angā ēñēninque bitō dicæ dicamō incæ godōmi ængāā. Gæyæ ante angā ēñēninque bitō tæntæbo incæ dicæ godōmi ængāā. ¹² Enquēmo angā ēñēninque bitō emēne incæ dicæ godōmi ængāā. ¹³ Īninquē mīnitō nē wiwa cædōmīni incæ, Wēñængā beyæ quino waa ī, ante ēñēmīni inte do godōmīni ængampa. Mōnō Mæmpo iñōmō waa pōni cædongā iñongante ānāni ēñēninque tōmengā nē ānāni īnānite tōmengā Tæiyæ Waēmō Ōnōwoca ingante da pōnongā æncædānīpa, ante Itota apænegacāimpa.

*Wēnæ tōnō cæcā īmaingampa, ante wapiticæ ānānīpa
(Māateo 12.22-30; Māadoco 3.20-27)*

¹⁴ Ayæ wēnæ nē babetadecā iñōmō waocā baō do guite ongōñongante Itota tæcæ wido cæcantapa. Wēnæ tao gocā ate onguīñængā tededāmaī īningā incæ do tedecā ate wædinque godongāmæ ongōnāni wæætē guīñente wædinque waa agadānīpa. ¹⁵ Pancadāniya guiquēnē, “Īñæmpa wēnæ awēnē Beedeboo tōnō godongāmæ cædinque Itota wēnæidi īnānite wido cæcā īmaingampa tōō,” ante tedewēnānīpa.

¹⁶ Wadāni guiquēnē, Ābānō cæmō ate Itota oda cæquiringāā, ante cædinque tōmengā ingante, Bitō oōnædē nāni cæī bai mā odōmōmi ate pōnēmaimōnīpa, ānānīpa. ¹⁷ Mānōmaī babæ cæcæte ante ānewēnānīpa, ante Itota do ēñēningā inte īmaī angantapa. “Awēnē odeye nempo quēwēnāni nāēmæ wæætēdō wæætē cædāni īninquē awēnē nānō ōmædempote wæquinque tōmēnāni nāmā ēwente cædānīpa. Ayæ adocōnē owocabo incæ adoyōmō godongāmæ quēwēnāni incæ nāēmæ wæætēdō wæætē cædāni īninquē tōmēnāni oncō woquinque nāwæ gobainānīpa. ¹⁸ Mīnitō, Wēnæ awēnē Beedeboo tōnō cædinque Itota wēnæidi īnānite wido cæbaingampa, ante ānewēmīnīpa tōō. Īñæmpa awēnē Tatāna nempo quēwēnāni iñōmō nāēmæ wæætēdō wæætē pīnāni īninquē adocabodāni īnāmaī iñōnānite tōmengā dicæ tōmēnāni īnānite ēnempobaingāā. ¹⁹ Mīnitō, Beedeboo tōnō cædinque Itota wēnæidi īnānite wido cæcampa, ante tedewēmīnīpa. Mānīnō mīni ānewēnō nāwangā ī bai mīnitō mīñæ nē godāni guiquēnē æcānō tōnō cæte wido cædānī. Īninquē mīnitō mīñæ nē godāni incæ mīni ānewēnō beyænque ante nāēmæ pīnīnque mīnitō imīnite wæætē apænte āninquē pīncædānīpa anguēnē. ²⁰ Botō iñōmō Wængonguī tōnō godongāmæ cædinque wēnæidi īnānite wido cæbo apa

ānewēmīni. Mānōmaī ī īnīnque botō Wængonguī Awēnē Odeye īnōmo inte mīnitō weca do pōmo aedāni,” ante Itota apænegacāimpa.

²¹ Ayæ, “īīmaī impa. Nē tæī piñængā īñōmō tæēmoncoo wēñate mongæñinque, Wææ godō cæinca, ante tæēmonca nææante tōmengā oncō boyæ wææ godō wææ godō cæyongā tōmengā ēadincoo īñōmō edæ ee ongompa. Tatāna īñōmō mānōmaī ingampa. ²² Incæte wacā godōmenque tæī ēmongā inte pōninque māningā ingante edæ bæ tacampa. Ayæ tæēmonca, Wææ godō botō cæinca, ante māningā nānō āninca ñōwo pōningā īñōmō gā pe æmpote ō æninque tōmengā nānō ēadincoo adobaī gā pe æmpote ō ænte māo nēnempocampa. Botō īñōmō nē tæī ēmōmo pōni īnōmo inte edæ godōmenque tæī ēmongā nānō gānā cæbaī cæbopa,” angantapa.

²³ Ayæ, “Botō tōnō æcānō wīī godongāmæ cæcā īñōmō tōmengā īñōmō edæ botō īmote Baa ante piinte cæcā ingampa. Ayæ botō, Waodāni botō mīñæ poncædānīmpa, ante cæyōmo waocā botō tōnō wīī cæcā īñōmō tōmengā wæætē botō mīñæ poncæ cæyōnānite tatodongā wadæ godānīpa,” ante Itota apænecantapa.

Wēncæ waodē owote godingā inte adodō pompa, ante

(Māateo 12.43-45)

²⁴ Ayæ apænedinque Itota īīmaī ante apænecantapa. “Waocā baōnē owote ate tao godinque wēnæ wentamō nānō ēwocadingā īñōmō edæ, Quingānō baōnē go guīdinque edæ guēmante quēwenguīmoo, ante diqui diqui mīnte ayongā ōnōmæca to amīnte ī ate wædinque edæ, ‘Botō tao godincōnē adodō go guīte quēwencæboīmpa,’ ante pōnēninque adodō pongampa. ²⁵ Ponte ayongā waocā ōnonganque bayongante wacā ōnōwoca tōmengāa owodāmaī ingā adinque wēnæ wæætē, Æ waocā botō owodincō baī īnongā inte ñōwo wadæ ñēmænte māincoo cabo tē gæte baī ōmæwocacā ingā abopa. ²⁶ Ate adinque tōmengā wæætē godinque wēnæidi godōmenque wentamō ēwocadāni tīæte ganca mānimpodāni īnānite ænte pongampa. Tōmēnāni tōmānāni waocā baōnē godongāmæ pō guīte owodāni ate waocā īñōmō wēnæ yewæninque godōmenque wæwængampā,” ante Itota apænegacāimpa.

Æbānō cæte watapæ quēwenguī, ante

²⁷ Itota tæcæ apæneyongante onquiyængā īñōmō godongāmæ ongōnāni tōnō ongōninque ogæ tededinque,

–Bitō īmite nē mangainā inte edæ tōmēnā nānā toquinque impa. Bitō īmi goōmæ gānongainā inte edæ tōmēnā watapæ nānā quēwenguinque impa.

²⁸ Ante ogæ tedecā ēñēninque Itota wæætē,

–īñæmpa Wængonguī nānō ānō ēñēninque nē cædāni guīquēnē tōmēnāni wæætē nāni watapæ quēwenguinque ēñente cædānīpa, ante apænegacāimpa.

Öönædē nāni cæī baī cædinque mā cæbi amōnie, ānānīpa

²⁹ Māñīñedē godōmenque nanguī īnāni pōnāni adinque Itota, īīmaī ante apænecantapa. “Mīnitō wīwa mīni cæcabo īmīnīpa. Mīnitō edæ, Mā cæte odōmōmi adinque pōnēmaīmōnīpa, ante ancaa āmīni awædō. Nāwangā āmo ēñēdāni. Cōnāō wodi beyæ cædinque Wængonguī bamōnengæ nānō cægāinō ante mīnitō pōnēnāmaī īñōmīnite edæ māñinque mīni aquinque cæcæīmpa ānewēmīni. ³⁰ Nīnebaidi pōnencædānīmpa, ante Cōnāō wodi ingante Wængonguī angā quēwengacāimpa. Nōwomīni pōnencæmīnīmpa, ante adobaī cædinque Wængonguī botō Waobo ēñagāimo īñōmote adobaī angā quēwēmo acæmīnīmpa. ³¹ Doyedē īñōmō betamonca gāmæñnō ōmæ awēnē īnongā inte onquiyængā incæ awēnē Tadōmōō wodi nanguī ēñente nānō

apænədō ante ēñencæte ante doönæ quēwēninque pongacäimpa. Tadömöö wædænque ēñengä ññongante botō godōmenque nangui ēñēmo inte mīnitō weca ongōñōmote mīnitō ññæmpa wīī ēñēmīnīpa tōō. Ññinque māningä onquiyængä incæ Wængongui nē apænte angä weca pōninque mīni ññōwo quēwencabo tōnō godongāmæ ongōninque, Mīni pante wæquinque ēñēnāmāi ingamīnīpa tōō, ante apænte pīnguingä ingampa. ³² Cōnāō wodi Wængongui beyæ apænecä ēñēnībaide Nīnebaidi wēnæ wēnæ nāni cægāinō ante wæwente pōnēninque ññimpo cægādānīpa. Cōnāō wodi wædangä ññongante botō wæætē nē ññænæmo inte apænēbo ēñēninque mīnitō ññōmō ēñēnāmāi ññimīnīpa. Ññinque Nīnebaidi incæ Wængongui nē apænte angä weca pōninque mīni ññōwo quēwencabo tōnō godongāmæ gongænte ongōninque, Mīni pante wæquinque ēñēnāmāi ingamīnīpa tōō, ante apænte pīñānidō anguēnē,” angantapa.

Mōnō awīnca gomō aquīnemō bai ēmōmpa, ante

(Māateo 5.15, 6.22-23)

³³ Ayæ godōmenque apænecantapa. “Gongapæncade tī wodōnodinque waodāni dicæ awēmō ññōmō wē wodōnāniyaa. Owæta boo cæcadāniyaa. Wæætē, Māññōmō nē pō guidāni acædānīpa, ante cædinque gongapæncade awæmpa æmongapaa cō cædāni ññāō bæco adānīpa. ³⁴ Mōnō baō tōmāō beyæ mōnō awīnca tīca ēnente bai ēmōmōmpa. Mōnō nō pōnēninque amō ññinque mōnō ññāō tīca ēnente cægonte bai waa cæte quēwēmōmpa. Wæætē wīwa pōnente amō ññinque mōnō wēmō ññōmō cægonte bai inte wīwa cæte quēwēmōmpa. ³⁵ Māññōmāi beyæ bitō, Wēmō ēwocadāmāi incæboimpa, ante bitō ññōwoca cōwā adinque nāmā wææ cæe. ³⁶ Ññinque bitō baō tōmāō ññāō entawēninque bitō ññōwoca adobai ññāō ēwocabi ññinque quīomenque incæ wēmō entawēnāmāi ññimīnīpa. Gongapæncade ññāō bæco edonque abi bai edæ ññāō ædæmō entawēninque edonque adinque waa quēwēmāimīpa,” ante Itota apænecäimpa.

Paditeoidi tōnō nē wææ odōmōnāni ññānīte Itota pīngä

(Māateo 23.1-36; Mādādo 12.38-40; Odoca 20.45-47)

³⁷ Ññinque apænecä ate adocanque Paditeocä tōmēngä ingante, Pō cæe, angä ēñente pō guite cæncæte ante ongongä. ³⁸ Adinque Paditeocä ññōmō, Itota quīnante mempodāmāi inte cængäā, ante guīñente wæcä. ³⁹ Ññinque mōnō Awēnē tōmēngä ingante,

—Mīnitō Paditeoidi ññōmō edæ owæta tōnō podato cæncadē ññō wentamō ēnencōo ee adinque yabæque mēnongate bai cæmīni ññimīnīpææ. Māññōcōque æñnente mīni wædō beyæ ayæ wīwa mīni cædō beyæ edæ mīmōno wentamō entawēmīni ññimīnīpa. ⁴⁰ Mīni ēñēgadē. Nē badongä ññōmō yabæque badōninque cæncadē ññō badōnāmāi ññingantawogaa. Ññæmpa mōnō baō nē badongāingä ññōmō adocä mōnō ññōwoca badongacāi apa quēwēmīni. ⁴¹ Ññinque mīnitō wæætē wadāni ññānīte ædæmō waadedinque mīnitō māññōcō pædæ godō pædæ godō cæmīni ññinque tōmancoo edæ ññā mēnongate bai ba adinque mīnitō wæætē edæ ññāō bai entawencæmīnīpa.

⁴² Paditeoidi mīni wæquinque ññimāi cæmīnīpa. Māññōcō diete ganca māññimōcōo ænte cō cædinque, Adocōcōque Wængongui quī ññimpa, ante mōnō godongæimpa, ante cæmīnīpa. Mīnitō māññōmāi cædinque edæ ññābo mīni mīnte pæyabo, Ogui waa cængui, ante mīni tā pete æññābo incæ edæ, Wængongui quī ññimpa, ante pancayaboga godōmīnīpa. Māññinganca cædinque mīnitō waa cæmīni incæte wadāni ññānīte nō cædāmāi ññimīni inte Wængongui ingante waadete pōñēnāmāi ññimīnīpa tōō. Ññæmpa māññō

oñabo godonguënemini inte minito godömenque waadete pönëninque nõ cæquënemini iminipa.

⁴³ Ayæ Paditeoidi mini wæquinque impa. Minito odömöincönë go guidingque namanque ante pönëninque waemoppaa pöni tæ contate tomüni awædö. Ayæ waodäni näni godonte æimancadë godinque minito namanque pönëninque, Wadäni, Waa quëwëedäni, ante apænedinque mönitö imönite waa acädänimpa, ante mini wæquinque edæ änewëminipa töö.

⁴⁴ Ayæ waocä wodido ñömæi ongö bai minito iñömö mini wæquinque edæ wentamö entawëminipa. Mänömaï entawëminipa, ante ëñënamäi inte wadäni edæ mini äno ante ëñente cædinque edæ oda cædänipa, ante Itota piingantapa.

⁴⁵ Ìninque adocanque idægoidi näni wææ angainö ante në ate ëñengä iñömö Itota ingante apænedinque,

—Awënë, mänömaï äninque bitö mönitö imönite adobai piinte änewëmi awædö.

⁴⁶ Äñongante,

—Minitö dodäni näni wææ angainö ante në adimüni inte edæ mini adobai wæquinque impa. Edæ, Cædämaï cædämaï, ante ancaa wææ äninque minitö iñömö edæ mäincoo teëmencoo mö paate wadäni önönancapæ cö cædancapænäni bai cæminipa töö. Ayæ wæætë önompogonca adopogoncaque incæ gä ænancapænämaï cæte bai cædinque minitö mini wæquinque edæ, Æbanö cæte waa quëwenguüi, ante odömönte apænedämaï iminipa töö, ante Itota apænecantapa.

⁴⁷ Ayæ godömenque apænedinque, “Wængongüi beyæ në apænegainäni inänite minitö mæmæidi incæ në wænönäni ingadänimpa. Minitö iñömö, Në wænongainäni nänömoidi imönipa, ante bai cædinque, Wængongüi beyæ në apænegainänido, ante mænönomünipa töö. Mini wæquinque edæ mänömaï cæminipa. ⁴⁸ Ìninque, Mönitö mæmæidi wænongadänimpa, ante ëñënimöni inte tömënanäni wodido ante mænönomönipa, äninque minitö mæmæidi näni cægainö ante Ao äninque cæminipa töö,” ante Itota piingantapa.

⁴⁹ Ayæ iümaï ante apænecantapa. “Mänömaï beyæ Wængongüi mönö në ëñengainä iñongä incæ iümaï ante apænegacäimpa. ‘Botö beyæ në apænedäni tönö botö në da godönäni inänite botö, Idægoidi weca gote apæneedäni, ämo gocädänimpa. Ämo gote pönäni adinque idægoidi wæætë pancadäniya inänite wænönäni wæncädänimpa. Ayæ pancadäniya inänite togænte pänäni wæcädänimpa,’ ante Wængongüi do apænegacäimpa. ⁵⁰ Ìninque ñowo quëwëmini iñöminite, Quinante wænöminüi, ante Wængongüi edæ minitö imönite ancæcäimpa. Wængongüi beyæ në apænegainäni inänite tömëngä nänö badongaiñedë dodäni mä pöni wænönäni beyæ ayæ iincayæ ate ñowo ganca wænönäni beyæ ìninque edæ në wænäni tömänäni wepæ näni nägainö ante, Ñowo quëwëmini mäninäni tömänäni wepæ näate bai iminipa. ⁵¹ Edæ tömänäni näni wænongainö ante edæ ñowomüni mini pante wæquinque impa. Edæ mä pöni wænöninque docä Abedo wodi ingante adocanque wænongä wængacäimpa. Iincayæ ate Wængongüi oncö ñænæncö boyæ näni iya täimpaa gäänë ongöñongante Tacadiya wodi ingante wænönäni nänö wænganca wadäni nanguüi inäni inänite wænönäni wængadänimpa. Incæte Wængongüi, Minitö mæmæidi nänömoidi ingaimüni inte tömënanäni näni wænongai beyænque wepæ näate bai wentamö entawëñöminite botö wæætë ñowomüni imönite pämo wæcæminipa, ante Wængongüi angampa,” ante Itota apænegacäimpa.

⁵² Ayæ apænedinque, “Dodäni näni wææ angainö ante në adimüni iñömö minitö në ëñenguënemini inte edæ mini wæquinque nõ pönente ëñënamäi

īmīnīpa. Ayæ wadāni, Nō pōnente ēñengæīmpa, ante odemō guite bai tæcæ cædāni adinque mīnitō odemō tee mōnete yabæ wido cæte bai cædinque tōmēnāni īnānite edæ wææ cæmīnīpa tōō,” ante Itota apænegacāīmpa.

⁵³ Īnque apænete tao goyongā nē odōmōnāni tōnō Paditeoidi tōmengā ingante nanguī piinte badinque, Āmōni ēñēnīnque apænebi ēñēmōnīi, apænebi ēñēmōnīi, ante ancaa ānānitapa. ⁵⁴ Ayæ, Tōmengā wabānō oda cæte tedecā Īnque mōnō wæætē pāmō wæbaingampa, ante wææ wānonte bai cægadānīmpa.

12

Wadō tedete wadō nāni cædōnō ante

¹ Māniñedē nanguī īnāni æpodō mīdo ganca īnāni adoyōmō pō bee tē bee tē cædinque goto gongæñōnāni Itota tōmengā mīñæ nē godāni īnānite tāno apænedinque, “Paditeoidi Īñōmō wadō tedete wadō cæyōnāni mīnitō wæætē wadō nāni cædō ante, Pāō yedæ æmpoquī bai wodō wodō cæpa, ante gomō adinque tōmēnāni nāni cæinō bai cædāmaī īedāni. ² Adāmaī incædānīmpa, ante quīēmē wē wodonte ī incæ Īncayæ ate tōmāā wi ænete bayonte edonque pōnī bacæīmpa. Ayæ quīēmē awēmō cæte ī incæ Īncayæ ate edonque pōnī acædānīmpa. ³ Wēmō Īñōmō mīni tededō incæ edæ nāō Īñōmō edonque pōnī ēñengæīmpa. Ayæ guīicōnē mīnitō wæntæ apænedō incæ Īncayæ ate oncōmanca īnō æi edæ ogæ tedete edonque ēñengæīmpa,” ante Itota apænecantapa.

Æcānō ingante guīñente wæquī, ante

(Māateo 10.26-31)

⁴ Ayæ, “Botō æmīgoidi āmo ēñēedāni. Waocā baonque wænōnāni ate tōmengā ingante ædō cæte godōmenque cæquīnāni. Īnque mīnitō Īñōmō, Baonque wænōnāni wæncæ wæ, ānīnque edæ guīñēnāmaī īedāni. ⁵ Wæætē edæ, Æcānō ingante guīñente wæquenēmīni Īmīni, ante botō odōmonte apænebo ēñēedāni. Waomīni Īmīnite wænonte ate nē angā Īnongā inte tadōmengadænguipo nē wido cæcā ingante Īñōmō mīnitō tōmengā ingante edæ guīñēedāni. Ao. Māningā ingante guīñente wæedāni,” ante Itota apænecantapa.

⁶ Ayæ, “Waadāni ayamōidi ōnōmpo æmæmpoque mānimpodāni beyæ tīgutamō mentamonga ante pædæ godonte ænāni amīnitawo. Incæte ayamō adocanque ingante edæ Wængonguī cōwē wææ aacampa. ⁷ Edæ, Ayamōidi bacoo pōnī īnāni incæte ōnōnānīque Īnānīpa, ante nē āningā inte mōnō Mæmpo Īñōmō mīnitō Īmīnite wæætē godōmenque waa acampa. Īñæmpa mōnō ocaguī incæ æpoguīnō encamōō, ante Wængonguī Īñōmō edæ do ēñente aacā apa guīñēwēmīni,” ante Itota angantapa.

Waadāni ēñēñōnāni mōnō Itota ingante Ao angæīmpa, ante

(Māateo 10.32-33, 12.32; Māadoco 10.19-20)

⁸ Ayæ apænedinque, “Nāwangā āmpa, angantapa. Æcānō waodāni ēñēñōnāni botō Īmote Ao ānīnque, Bitō botō Awēñē Īnōmi Īmīpa, ante āna botō Waobo nē ēñagāimo inte tōmengā ingante wæætē Ao ānīnque, Bitō Īñōmō botō mīñæ nē gogaīmi Īnōmi Īmīpa, ante Wængonguī anquedoidi ēñēñōnāni ancæboīmpa. ⁹ Wæætē edæ waodāni ēñēñōnāni botō Īmote nē Baa angaīngā ingante botō wæætē Wængonguī anquedoidi ēñēñōnāni tōmengā ingante edæ Baa ancæboīmpa,” angantapa.

10 Äninqe, “Botö Waobo eñagaïmö iñömote waocä babæ ante wïwa angä incæte Wængonguï wæætë edæ pönö ñimpo cæcä quëwencæcäimpa. Wæætë Wængonguï Tæiyæ Waëmö Önöwoca ingante godö babæ ante në änewengä ingante Wængonguï wæætë edæ ñimpo cædämaï inte cöwë pancæcäimpa,” ante Itota apænecantapa.

11 Ayæ, “Minitö iminite bæi ongonte tömënanï odömöincönë ænte godinque gö cædäni incæte minitö mäniñedë, Æbänö ante apænequïmoo, ante wædämaï iedäni. Awënëidi weca incæ në änanï weca incæ minitö iminite ænte mäo goncædäni incæte minitö mäniñedë, Pïinänï eñente wædinque æbänö ante nämä wææ anguïmoo, ante ayæ, Æbänö ante apænequïmoo, ante guïñente wædämaï iedäni. 12 Ìnæmpa Wængonguï Tæiyæ Waëmö Önöwoca mäniñedë incæ, Æbänö wææ anguï, ante odömote angä eñëninque minitö wæætë mäniñö ante wææ ancæminimpa,” ante Itota apænegacäimpa.

Mäincoo näni æñëmämo ante

13 Tæcæ apæneyongä godongämæ ongönäni ongöningue adocanque Itota ingante,

—Awënë, botö wæmpo wodi mangaincoo incæ mæmpo wodi ömæ ingaïmæ incæ botö mëmö ingante tæcæguedë ämi pä cæcä æmöe.

14 Äñongante Itota,

—Botö në apænte ämo imopa diyæ ämo pä cæqingä.

15 Äninqe godongämæ ongönäni inänite apænedinque,

—Wïi mäincoo nanguï ænte beyænque mönö quëwengæimpa cæminï. Mïni mäincoo æñëmämo ante edæ ñimpo cædinque ee aedäni.

16 Äninqe Itota, Wængonguï Awënë æbänö cæqingä, ante eñencædänimpa, ante imæca quëwënanï näni cæinö ante odömöinque iïmaï apænecantapa.

—Adocanque në nanguï ëacä inte tömengä ömæ wainguipoga nanguï pönï pæ. 17 Adinque tömengä iñömö, “Æbänö cæquïmoo. Botö cænguï da wenguincö ñænæncö impa diyæ da wente manguïmoo.” 18 Äninqe, “Iïmaï cæcæboimpa.

Guiyancö oncö bæ tate ñænæncö wæætë mænoncæboimpa. Mænöningue tömëmoncoo tönö mäincoo wæætë mänicönë tömancoo da wencæboimpa.

19 Ayæ nämanque apænedinque botö, Botö cænguï tönö mäincoo nanguï wadepo ba beyæ eyepæ mäniño inte botö guëmancæboimpa. Önonque cænguï nanguï cænte nanguï bete tocæboimpa,” 20 Ante nämanque pönëñongä wæætë

në mäningä ingante Wængonguï, “Eñënämaï cæbipa töö. Nöwo woyowotæ incæ edæ, Idæwaa quëwëmipa, ämo wæncæbiimpa. Wæmi adinque edæ bitö mäincoo inï edæ æcänö mäincoo baquï,” ante Wængonguï angampa,

ante Itota, Mäninque ante apænebopa, angacäimpa. 21 Ayæ tömënanï inänite wæætë, “Wængonguï mänömaï angä eñente wædinque minitö wæætë iïmaï ante pönencæminimpa. Æcänö, Tömëmoque quï, ante da da wente mäna iñömö tömengä Wængonguï ayongä në ömæpocä bai inte ömæwocacä ingampa. Në ëacä wodi nänö wænö bai tömengä adobai bate wæquinö anguënë,” ante Itota

apænegacäimpa.

Tömengä wëñcænäni inänite Wængonguï aacampa, ante

(Mäateo 6.25-34)

22 Itota mäniñedë tömengä müñæ në godäni inänite, “Ininque botö minitö iminite ämopa. Inguipoga mïni quëwenguïmämo ante wædämaï iedäni. Quïmönö impa cænguïmoo, ante, Quincöödö impa wëñaquïmoo, ante wædämaï iedäni. 23 Cænguinque cæninque dicæ quëwëmongaa. Weocooque wëñadinque dicæ quëwëmongaa. Mönö quëwenguïmämo iñömö godömenque

impa. ²⁴ Gapatai iñōmō cænguī ante dicæ minte pæ ate tā pete mǎnǎniyaa. Incæte Wængonguī eyepæ godongā cǎnǎni aedāni. Minitō guiquēnē ōōmā ēadāni bai ināmai iñōmīnite Wængonguī minitō imīnite godōmenque waa adinque eyepæ pōnongā cǎmīnīpa. ²⁵ Wængonguī nǎnō anganca quēwēninque minitō nanguī cædinque wantæ iñō incæ ædō cæte godōmenque quēwēnguimīnī. ²⁶ Mǎnīnō wædænque cæqui incæte wīi eyepæ cǎmīni ininque minitō, Botō quēwēnguīnō ante wadō wadō cæcæboimpa, ante quīnante wæmīnīi,” ante Itota angantapa.

²⁷ Ayæ, “Ongai guiquēnē weocoo ante daque daque dadāmai inte wodonte tīnāmai iñōnǎnite Wængonguī weocoo waēmoncoo bai godongā waa pōni ēnopa. Awēnē Tadōmō wodi waēmoncoo ēagaingā incæ wīi ongai bai ēñagacǎimpa. Ongai iñōmō godōmenque waēmō pōni ēnopa. ²⁸ Gaguimæ iñōmō iimō ate edæ gongapamō nē tanguinque ñōwoōnæ pæ incæte Wængonguī waēmō pōnongā ēnopa. Ininque, Waēmō ēnodō nē pōnongā inte mōnō imonte godōmenque eyepæ pōni pōnongā ænte ēñacǎimpa, ante pōnēmīniyaa. ²⁹ Minitō cænguī ante bequi ante æinente wædāmai iedāni. Edæ, Æbānō cæte ænguimōō, ante wædāmai iedāni. ³⁰ Inguipoga wayōmō nāni ēñēnāmai incabo wayōmō nāni ēñēnāmai incabo mǎnīnō ante wæyōnāni minitō guiquēnē, Mōnō ænguēnēnō ante mōnō Mæmpo iñōmō edæ do ēñegampa, ante pōnēninque guīñente wædāmai iedāni. ³¹ Wæætē Awēnē Odeye nempo quēwēncæte ante nanguī cæyōmīnite tōmēngā wæætē minitō ænguēnēnō ante do edæ eyepæ pōni pōnongā æncǎmīnīpa,” ante Itota apæncantapa.

*Mōnō ēaquincoo ōōnædē do ēamōmpa, ante
(Māateo 6.19-21)*

³² Godōmenque apænedinque Itota, “Botō nē aabo iñōmote minitō botō miñæ mīni gocabo iñōmō wædænque pōni imīni incæte edæ guīñente wædāmai iedāni. Iñæmpa minitō Mæmpo iñōmō, Awēnē Odeye nempo quēwēncǎmīnīpa, ante pōnō cædinque waa tocampa cǎmīnī. ³³ Minitō iñōmō, Ō ænāni dæ āñōmō cayæ cǎnāmai iñōmō botō mǎincoo wodāmai inguincoo inte edæ cōwē mæ ongongæimpa, ante cædinque ōōnædē iñōmō wo ææntodonte bai cæedāni. Wodāmāincadedē da wente bai cædinque minitō mǎincoo godonte æninque ōmæpodāni wæwēnāni inānite wæætē godōmīni æncǎdānīpa. ³⁴ Mīni waocabo iñōmō minitō mǎincoo ongōñōmō mǎniñōmō quēwēncæte ante wæmīni imīnīpa, ante adinque botō, Ōōnædē iñōmō wo ææntodonte bai cæte mǎedāni, antabopa,” ante Itota apænecantapa.

Tōmāā eyepæ cædinque wānō cōedāni, ante

³⁵ Ayæ apænedinque, “Waadāni, Awēnē beyæ ante cæcæimpa, ante weocoo eyepæ wēñadinque, Gongapæncade waēmō bæcocæimpa, ante eyepæ pōni cædāni bai minitō adobai eyepæ pōni cædinque, Awēnē poncæcǎimpa, ante wānō cōedāni. ³⁶ Edæ waodāni tōmēnāni awēnē wayōmō gote ææmæ bete ocæ ēmænte ponte aa pecā ēñēninque quingæ wi ænecate ante wānō cōnāni bai cædinque minitō adobai, Awēnē poncæcǎimpa, ante wānō cōedāni. ³⁷ Edæ awēnē ponte ayongā tōmēngā ingante nē cædāni wānō cōnāni adinque tōmēngā wæætē edæ pōnō waa cæcā æninque tōmēnāni iñōmō tocædānīpa. Minitō imīnite nāwangā āmopa. Nē wānō cōnīnāni inānite awēnē pōnō angā ate tæ contadāni ate tōmēngā nē awēnē inongā incæ, Nanguī cæcæimpa, ante weocoo wēñadinque tōmēnāni weca pōninque edæ pōnō cæcā æncædānīpa. ³⁸ Edæ woyowotæ tæcæ bæcā incæ ayatadāa wæicā incæ pōninque tōmēngā nē wānō cōnīnāni inānite waa adinque pōnō waa cæcā adinque tōmēnāni

iñōmō watapæ edæ tocædānimpa. ³⁹ Wæætē oncō nē ēacā guiquēnē, Nē awēmō æncæ cædongā æyedēnō ponguingāā, ante ēñēninquē do wææ cæcā bai nē awēmō æncæ cædongā wæætē edæ pō guite ænāmaī incædongāimpa, ante apænebo ēñente pōnēedāni. ⁴⁰ Mīnitō adobaī, Waocā nē ēñagaingā æyedēnō ponguingāā, ante ēñēnāmaī īmīni inte edæ tōmānō eyepæ cædinque edæ wānō cōedāni,” ante Itota angacāimpa.

*Awēnē ingante nē cæda, ante
(Māateo 24.45-51)*

⁴¹ Mānōmaī angā ēñēninquē Pegodo,
—Māninō odōmonte bitō apænedō ante mōnitō adomōnique ēñencæmōnimpa, ante apænebitawo. Wæætē edæ, Wadāni tōmānāni ēñencædānimpa, ante apænebitawo.

⁴² Āñongante mōnō Awēnē wæætē odōmoncæte ante apænedinque, “Inguipoga awēnē iñōmō, Æcānō nē ēñengā īnongā inte botō quincōo ante ædæmō aacā inguingāā, āninquē, Mānōmaī inte cæcā ingante adinque botō āmo ate tōmengā nē angā badinque botō oncōnē nē cædāni īnānite ædæmō aadinque cænguī eyepæ iñonte godongā cæncædānimpa, angampa. ⁴³ Īninquē awēnē wayōmō gote ponte ayongā, Nē cæcā botō ānō ante ēñente cæcampa, ante adinque awēnē wæætē tōmengā ingante godō waa cæcā ate nē waa cæcā iñōmō edæ waa tocæcāimpa. ⁴⁴ Mīnitō īmīnite nāwangā ante apænebopa. Nē ēñente cædingā ingante awēnē, Bitō botō māincoo tōmancoo edæ nē aabi bacæbiimpa, ancæcāimpa.”

⁴⁵ “Incæte nē cæcā wæætē, Botō awēnē æiquedō ponguingāā, ante pōnēninquē tōmengā tōnō awēnē ingante nāni godongāmæ cæcabo onguīñænāni incæ onquiyænāni incæ tōmēnāni īnānite tæi tæi pāninquē cænguī nanguī cæninque tī nāmæ nanguī bete quidi quidi dowænte bacā. ⁴⁶ Īninquē tōmengā, Æōnædō ponguingāā, ante wædāmaī īñongante, Æyedēnō ponguingāā, ante ēñēnāmaī īñongante edæ awēnē iñontobæ pongā wæbaingampa. Ponte adinque awēnē wæætē māningā nē ēñēnāmaī cædingā ingante wido widō todinque nē pōnēnāmaī īnāni weca māo wido cæbaingampa,” ante Itota apænegantapa.

⁴⁷ Ayæ, “Awēnē ingante nē cæcā incæ awēnē nānō ānō ante ōnōmoncaque ēñēninquē wīī eyepæ cædinque ēñēnāmaī cæcā Īninquē awēnē iñōmō tōmengā ingante nanguī tæi tæi pancæcāimpa. ⁴⁸ Ayæ wæætē edæ, Awēnē æbānō angāā, ante ēñēnāmaī inte ēmoncā guiquēnē tōmengā nānō panguinque wēnæ wēnæ cæcā incæte tōmengā ingante wædænque tæi tæi pancæcāimpa, ante Itota apænegacāimpa. Edæ awēnē æcānō nempo nanguī pōnongā ænte næængā iñōmō tōmengā ingante Awēnē wæætē, Bitō adodō nanguī pōnōmi æmoe, ancæcāimpa. Ayæ, Botō māincoo nanguī ongoncoo iñonte bitō aacæbiimpa, ante æcānō ingante awēnē angāā tōmengā ingante, Bitō godōmenque nanguī cæcæbiimpa, ante awēnē ancæcāimpa,” ante odōmōninque Itota apænegacāimpa.

*Nāwæ goccædānimpa, ante cæcæte ante pōmopa, angampa
(Māateo 10.34-36)*

⁴⁹ Āninquē Itota godōmenque apænedinque, “Botō inguipoga gonga bai tānoncæte ante pongāimo inte edæ, Do tānonte bai edæ waa tocædōmoimpa. ⁵⁰ Ayæ botō nantate wæwencæte ante pongāimo inte botō nantate wæganca nantate botō wæquēnēnō ante ĩnque cæcæte ante wæbopa. ⁵¹ Mīnitō, Inguipoga quēwēnāni piyænē cæte wæætēdō wæætē cædāmaī inte quēwencædānimpa, ante cæcæte ante Itota pongaingā ingampa, ante

pönēmīnitawo. Īñæmpa wadō āmo ēñēedāni. Botō inguipoga pōmo beyænque wæætedō wæætē pīncædānīmpa. ⁵² Īncayæ ate ōnōmpo æmæmpoque nāni owocabo mānimpodāni ĩñōnānite mengāa go adocanque ĩnāni ĩñōmō botō beyænque mēnaa ĩnate nāēmæ pīinte bacædānīmpa. Ayæ wæætē mēnaa ĩna incæ mengāa go adocanque ĩnāni ĩnānite wæætē nāēmæ pīinte bacædaīmpa. ⁵³ Botō ēmōwo beyæ mæmpocā tōmengā wengā onguīñægā ingante nāēmæ pīinte bacæcāīmpa. Wēñægā wæætē mæmpocā ingante nāēmæ pīinte bacæcāīmpa. Wāānā tōmēnā wengā onquiyægā ingante wæætē nāēmæ pīinte bacædāīmpa. Wæætē wāānā ingante wēñægā incæ nāēmæ pīinte bacæcāīmpa. Bīyongā ingante nānō wæntedā incæ nāēmæ pīinte bacædāīmpa. Nānō wæntedā ĩnate bīyongā ingante nāēmæ wæætē pīinte bacæcāīmpa,” ante Itota tōmengā mīñæ nē godāni ĩnānite apænegacāīmpa.

*Æbānō oo baquīmpa, ante ēñengcēīmpa, ante
(Māateo 16.1-4, 8.11-13)*

⁵⁴ Ayæ godongāmæ ongōnāni ĩnānite apænedīnque, “Nænque guīdō gāmænō boguīmā wentamō pō adīnque mīnitō, Cōōnæ wentamō wocæmpa, āñōmīni edæ do cæpa. ⁵⁵ Ayæ wæætē woboyæ betamonca ĩnō pæmæ pō adīnque, Ocoi nāwancæ cæpa, ante tedeyōmīni dobæ ocoi nāwampa. ⁵⁶ Inguipoga gomō adīnque ōōnædē æmō adīnque mīnitō, Æbānō cæcæte ante ēmōō, ante edæ do ēñēmīnīpa. Wæætē, Inguipoga wayōmō wayōmō æbānō cædāni, ante adīnque mīnitō, Wængonguī oo pōni cæquingānō anguēnē, ante quīnante wīi ēñēmīni. Edæ wadō tedete wadō cæmīni ĩmīnīpa tōō,” ante Itota tōmēnāni ĩnānite pīingacāīmpa.

*Nē pūngā ingante waadete apæneccēīmpa, ante
(Māateo 5.25-26)*

⁵⁷ Ayæ edæ, “Æbānō cæte nō cæquīi, ante mīnitō tōmēmīnīque apænte ante cæquēnēmīni ĩmīnīpa. ⁵⁸ Nē pīinte angā ĩñōmō bitō ĩmite edæ, Wīwa cæbīpa, ante awēnē weca ænte māocā ĩdōmæ godīnque bitō guīquēnē tōmengā ingante waadete apænebi ēñēnīnque tōmengā wæætē piyænē cædinque ee abāingampa. Wæætē edæ wīi waadete apænebi ĩnīnque tōmengā nē apænte angā weca godōmenque ænte gobāingampa. Nē apænte angā wæætē bitō ĩmite wææ wānongā ingante pædæ godongā ænīnque wææ wānongā wæætē tee mōnebaingampa. ⁵⁹ Tee mōnecā ĩnīnque bitō quīēmē beyæ debe ĩmi ĩnīnque edæ tōmanta pōni di godonte ate tabāīmpa, ante āmo ēñēmaīmīpa,” ante Itota apænegacāīmpa.

13

Occē ēmænte Wængonguī gāmænō pōnguēnēmīni ĩmīnīpa

¹ Māñēdē wadāni Itota weca pōnīnque ĩmaī ante apænedāni ēñengantapa. Gadideabæ quēwēnāni, Wængonguī quī, ante cæningā ingante tæcæ wænōñōnānite Pidato guīquēnē tōmēnāni ĩnānite ĩñontobæ wænōnīnque tōmēnāni wepæ cæningā wepæ tōnō dibæ cæcantapa. ² Ante tedeyōnāni Itota wæætē, “Gadideabæ quēwēnāni wadāni pōnōmenque wēnæ wēnæ cædāni ĩñōnāni mānimpodānīque godōmenque wēnæ wēnæ cædāni ĩntē mānōmaī wænānīpa, ante mīnitō pōnēmīni awædō. Īñæmpa Gadideabæ quēwēnāni tōmānāni adobaī wēnæ wēnæ cædāni ĩñōnāni mānīnānīque edæ wænānīpa. ³ Wīi mānōmaī ĩmpa, āmo ēñēmaīmīnīpa. Tōmēnāni wīi godōmenque wēnæ wēnæ cædīnāni ĩntē wænānītapa. Mīnitō guīquēnē wēnæ wēnæ mīni cædīnō ante wæwente pōnēnīnque ĩmpo cædāmaī ĩmīni ĩnīnque mīnitō tōmāmīni adobaī wæmāimīnīpa,” āngantapa.

⁴ “Ayæ Eedotadëe iñomö tömënäni nāni gomö aquincö Tidoe nāni ānoncö tæ wææñonte waodāni dietiocho ganca iñāni capo wænāni iñique mīnitö, Tömënāni godömenque wënæ wënæ cædāni inte wænānīpa, ante pönēmīni awædö. Iñæmpa Eedotadëe quëwënāni tömānāni adobai wënæ wënæ cædāni iñonāni mānimpodānique edæ wænānīpa. ⁵ Wīi mīnitö pönënö bai impa, āmo ëñëmaimīnīpa. Tömënāni wīi godömenque wënæ wënæ cædīnāni inte wænānitapa. Mīnitö guiquënë wënæ wënæ mīni cædīnö ante wæwente pönëñique ñimpo cædāmai imīni iñique mīnitö tömāmīni adobai wæmaimīnīpa,” ante Itota apæñecantapa.

Iigowæ ömæca ongompa, ante odömonte apæñecampa

⁶ Ayæ Itota, Wængonguī Awënë æbānö cæcää, ante ëñencædānīmpa, ante imæca quëwënāni nāni cæñinö ante odömöñique iūmai apæñecantapa. “Waacā tömencodë iigowæ mīnte pæ ate tömenca ante ponte ayongä edæ dæ ömæcawæ ongompa. ⁷ Ate wædīnque tömengä ocæ ëmænte godīnque tömencawæncoo në aacä ingante apæñedinque, ‘Edæ mëa go adoque wadepo tömenca ante gote ayömo edæ mānīi iigowæ cöwë ömæcawæ önonque wææ ongompa cæbīi. Ömæcawæ wææ ongöwæ adīnque wido tate æmæwo wido cæe.’ ⁸ Añongä tömencawæncoo në aacä wæætë, ‘Awënë, ee ongöe. Botö iigowæ önöwa gäänë ææ wodīnque māmö wagada goi ænte wempo cædente tee moncabo ate wadepo ate bitö ongöñömi edæ, ⁹ do incabaimpa. Wæætë wadepo ate ayömite ömæcawæ ate wædīnque edæ æmæwo wido tate wido cæbaimpa,’ ante në cæcä angampa.” Māñique ante odömonte apæñebopa, ante Itota apæñecäimpa.

Itota bocæ bocæ wædingä ingante cæcä ate waa bacampa

¹⁰ Guëmanguiönæ iñonte Itota oodeoidi odömöincönë go guidīnque odömonte apæñecantapa. ¹¹ Onquiyængä māñiñömi ongongä iñömi tömengä dietiocho wadepo iñonte wënæ guicä ate bocæ bocæ wæwëningä inte ædö cæte adiyæ ængæ gantiquingää. ¹² Tömengä ingante adīnque Itota aa pecä pongä ate,

–Onquiyæmi, bitö bocæ bocæ wædö ante ñöwo botö ñimæncæpote bai cæbo ate bitö waa babīpa.

¹³ Äñique tömengä ingante gampcä ate ñimæncæpote bai badīnque onquiyængä iñömi adiyæ gantīdīnque wæætë, Wængonguī bitö ñäö bai ëmömi inte waa pönī pönö cæbi æmopa, ante watapæ apæñecantapa. ¹⁴ Guëmanguiönæ iñonte Itota māñömai cæcä waa bacä adīnque tömënāni odömöincö awënë guiquënë piinte badīnque godongämæ ongönāni inānite,

–Quimæ quëwëmīnīi. Önonpo æmæmpoque go adoönæque mönö cæönæ iñonte mīnitö waa bacæte ante ponguënëmīni imīnīpa. Guëmanguiönæ iñonte edæ cædāmai inguënë quëwëmīnīi.

¹⁵ Ante piññongante mönö Awënë wæætë,

–Mīnitö wadö tedete në wadö cædömiñi inte ëñëedāni. Mīnitö cæñingä iñömi wagada incæ bodo incæ gue ænente wæyongante mīnitö guëmanguiönæ i incæte cöwë ñi cæyænte æpæ wedeca ænte māo göñömi gongænte becampa. ¹⁶ Wæætë māningä onquiyængä iñömi Abadäö wodi pæñingä iñongante Tatāna dietiocho wadepo iñonte goti winte bai cæcä wædingä iñongante mīnitö iñæmpa guëmanguiönæ i beyænque edæ, Tömengä ñimæncæpodāmai incæcäimpa, ante quīnante wææ ämīnīi.

17 Angä eñente wædinque nē piinte änāni guingo imonte wæyönāni godongāmæ ongönāni guiquēnē, Bamönengæ pōni Itota waa pōni cæcampa, ante adinque nangui togadānimpa.

Mōotatamō guidimō ante odōmonte apænegacampa
(Māateo 13.31-32; Māadoco 4.30-32)

18 Īninqe Itota tōmēnāni Īnānite, “Wængonguī Awēnē Odeye nempo nāni quēwencabo ĩñōmō quīnō bai ĩnānī. Edæ, Æbānō nanguī yebænte badānī, ante botō inguipoga quīnō pæte yebænte bai i adinque, Mānīnāni adobai yebænānīpa, ante eñenguī. 19 Īmaī impa. Waocā mōotatamō tōmēmō ænte māo tōmēmōncodē quiyacā bocate pæ ĩninqe ñænæñeque bayonte ayamōidi pōninqe awænēmæ ongönānīpa. Mōotatamō guidimō incæ mānōmaī pæ bai Wængonguī Awēnē nempo quēwēnāni ĩñōmō wædænque ĩnīnāni incæ nanguī yebænguīnāni ĩnānīpa,” ante Itota odōmonte apænegacāmpa.

Pāo yedæ æmpoquī da wenguī ante odōmonte apænegacampa
(Māateo 13.33)

20 Itota ayæ angantapa. “Wængonguī Awēnē ĩñōmō tōmengā nempo quēwēnāni ĩnānite æbānō cæcā, ante odōmōncæte ante botō, Īmaī cæcampa, ante odōmonte apænebo eñenguīmīnī. 21 Edæ Īmaī impa. Onquiyængā ñænængade tee manguincade ænte tee māninqe ædīna nāni āmō ænte mem-poga go adopoque da wēninqe ayæ, Pāo yedæ æmpocæīmpa, ante adoyōmō pōnō da wēninqe wempo wempo cædæmō cædengā ate pāōmo yedæ æmpote tōmāo nāāmænta bapa. Yedæ æmpote ate pāōmo tōmāo nāāmænta ba bai oōnædē Awēnē nempo mīni quēwencabo ĩñōmō tōmāmīni nō eñente bamīnīpa,” ante Itota odōmonte apænecantapa.

Odemō guiyānemō, ante
(Māateo 7.13-14, 21-23)

22 Itota māñīdē Eedotadē taadō godinque nanguī nāni quēwēñōmō wodo pænta godinque wædænque nāni quēwēñōmō wodo pænta godinque wayōmō wayōmō gote odōmonte apænegacāmpa. 23 Goyongante adocanque, —Awēnē, bitō æmi beyænque nē quēwenguīnāni ĩñōmō wædænque ĩnānīpa, āmītawo.

Åñongante Itota,

24 —Odemō guiyānemō guicæte ante edæ nanguī cædāni. Edæ nanguī ĩnāni incæ guicæte ante cædinque guīdāmaī incædānīpa, āmo eñēmaīmīnīpa.

25 Īmaī impa. Oncō nē ēacā ængæ gantidinque odemō tee mōnecā adinque mīnitō ĩñōmō tōmengā oncō boyæ gote ongōninqe aa pedinque, “Awēnē, wi ænebi guīquīmōnī.” Ante wæyōmīnīte tōmengā, “Æmīnidō ĩmīnī, ante ayæ, Ædōnō gāmænō quēwente pōmīnī ĩmīnī, ante botō adāmaī ĩmōpa,” ancæcāmpa.

26 Angä eñēninqe mīnitō wæætē, “Īñæmpa mōnitō bitō tōnō godongāmæ cænte becongāmōnīmpa. Ayæ bitō mōnitō taadō ponte cægōninqe odōmonte apænebi eñengāmōni ae,” ancæmīnīmpa. 27 Åñōmīnī tōmengā ĩñōmō, “Æmīnidō ĩmīnī, ante, Ædōnō gāmænō pōmīnī ĩmīnī, ante botō eñēnāmaī ĩmōpa. Edæ do antabopa. Nōwo nē wīwa cægāīmīnī inte edæ botō weca ongōnāmaī. Edæ wadæ goedāni, āmōpa,” ancæcāmpa, ante Itota apænecantapa.

28 “Īninqe mīnitō gomō ayōmīnī Wængonguī beyæ nē apænegānīni tōnō dodāni Abadāo wodi Itæca wodi Acabo wodi tōnō tōmānāni Wængonguī Awēnē Odeye ōmæ godongāmæ ongōñōnāni mīnitō ĩmīnīte edæ yabæque wido cæcā ate wædinque mīnitō wæætē guingo imonte piinte wædinque edæ Ca ca wæcæmīnīmpa. 29 Wadāni wæætē edæ nænque tamōnō pōnāni

tönö nænque guidö pönäni ayæ betamonca æmataæ æmataæ pönäni tönö Wængongui Awënë Odeye oncönë ponte tæ contadinque ææmæ bete cængoncædänimpa. ³⁰ Inique ayæ ate ëñënäni incæ pancadäniya yæcado ongönäni bate toyönäni minitö guiquënë do ëñënimini inte yæcado ongömini incæte pancaminiya wæætë yæmiñæ gote ongonte wæcæminimpa,” ante Itota apænecäimpa.

Eedotadëë quëwënäni beyæ ante Itota wæcampa

(Mäateo 23.37-39)

³¹ Mäniñedë Paditeoidi pancadäniya tömengä weca pöningue,

—Awënë Edode bitö imite wænoncæ angantaye. Bitö ongönämaï wayömö wadæ goe.

³² Änäni ëñëningue Itota,

—Edode congäñe bai babæ cædongä iñongante minitö tömengä weca godinque, Itota iïmaï angampa, ante apænemini ëñengæedäni. “Edode ëñëmi. Botö ñowoönæque baönæque wënæidi inänite iñque wido cædinque iñque godö cæbo waa badäni ate iñabæ guingä iñonte botö edæ mäniñedë edæ idæwaa cægaïmo bacæboimpa, ante Itota apænecampa,” ante apænemini ëñengæedäni, ämopa. ³³ Incæte botö ñowoönæ godinque baönæ godömenque godinque edæ waönæ godömenque botö goquënëno godinque Eedotadëë gocæboimpa. Edæ Wængongui beyæ nê apænegainäni incæ Eedotadëë iñömö tömënäni nani wængaiñömö iñonte botö Wængongui beyæ nê apænëbo adobo inömo inte edæ ædö cæte wayömö ongonte wænguïmo.

³⁴ Ante apænëningue Itota Eedotadëë iñömö quëwënäni beyæ ante pönente wædinque, “Eedotadëë quëwëmini ëñëedäni, angantapa. Wængongui beyæ nê apænëdäni inänite mïni wænongaincabo inte ayæ Wængongui nänö da pönönäni inänite dicaca tacamini iñöminite botö iñömö minitö iminite waadete pönö cæinente nangui wæbopa. Tawadiya wæmönä iñömö, Botö wënäni, ante gompodinque tæcæënëmæ wëä pönö ö ænä bai botö adobai, Botö wënäni pöedäni, ante æpogadö äñömote minitö, Wïi pöinente awædö, ante Baa ämïni wætabopa. ³⁵ Nöwo iñömö minitö onconcoo edæ önonconcooque baconcoo tamëñedäni. Nöwo edæ botö dæ äñömo minitö, ‘Awënë Wængongui ëmöwo beyænque pöningue bitö toquinque edæ waa cæcæbiimpa,’ ante mïni anguinganca minitö edæ botö imote adämaï incæminimpa ante ämo ëñëedäni,” ante Itota apænecäimpa.

14

Æpæ ëñate nê wædongä ingante Itota cæcä waa bacä

¹ Itota guëmanguïönæ iñonte Paditeoidi awënë oncönë cæncæte ante go guiiyongante godongämæ ponte ongönäni guiquënë, Itota æbänö cæquingää, ante waa agönänitapa. ² Tömengä weca adocanque æpæ ëñate nê wædongä inte a ongongä. ³ Adinque idægoidi nani wææ angainö ante nê ate ëñënäni tönö Paditeoidi inänite apænëningue Itota iïmaï angantapa.

—Wængongui æbänö ante wææ angacäi. Waa bacædänimpa, ante guëmanguïönæ iñonte mönö waa cæquënëmö imöö, ante pönëmini. Wæætë edæ, Guëmanguïönæ iñonte cædämaï inguënëmö imöö, ante pönëmini.

⁴ Äñongä edæ pæ wëenedänitapa. Itota iñömö edæ nê æpæ ëñate wædongä ingante gampocä waa bacantapa. Ayæ, Goe, angä gocantapa. ⁵ Angä gocä ate Itota wæætë tömënäni inänite iïmaï angantapa.

—Minitö waocabo iñöminite adocanque tömengä wëñængä onguïñængä incæ tömengä wagada onguïñængä incæ æpæ ante nani ææ wodïñömö goyæ

guicä ñinque mämpocä ññömö guëmanguiönæ ññonte edæ dicæ töö tadönämaï inguingäa. Mänömaï goyæ guicä wædinque munitö tömämini guëmanguiönæ ñ incæte do gote näwæ gongæninque edæ quingæ töö tadömaïminipa.

⁶ Ante Itota añongante tömënäni ædö cæte wæætë anguinäni. Edæ pæ wëenedänitapa.

Monguimæno ante awënë beyæ gote nē wente ænāni, ante

⁷ Ayæ Paditeo awënë nänö nē añedinäni pöninque nämanque ante pönëninque, Yæcado ongöñomote botö ñmote wæa acädänimpa, ante cædinque waa pönï tæ contaï ññömö tæ contadäni Itota acantapa. ñinque tömengä, Wængonguï Awënë nempo quëwëninque æbänö cæquüi, ante ëñencädänimpa, ante ñmæca quëwënäni nāni cæinö ante odömöninque ñmaï apænegantapa.

⁸ –Bitö ñmite, Monguimæno pö bee, ante nē wente ængä ëñëninque bitö pöninque yæcado ñnö wæmö ññömö tæ contadämaï incæbiimpa. ññæmpa wacä tömengä nänö nē waadecä pongä ñinque ⁹ minatö ñminate nē wente ængä ññömö bitö weca pöninque, “Bitö gä goyömi botö nē waadecä wæætë tæ containgä,” ante ämaingampa. ñinque bitö gä godinque wü wæmö ññömö wæætë tæ contadinque guingo ñmonte wæbaïmipa. ¹⁰ Wæætë nē wente ængä ëñëninque bitö monguimæno pöninque yæmiñæ pönï wënæ wënæ ññömö tæ contæ. Edæ nē wente ængä ponte ayongä bitö wënæ wënæ ññömö tæ contabi adinque tömengä wæætë bitö ñmite, “Botö nē waadebi ñnömi inte bitö ñnöwo yæcado pönï pö tæ contæ, ämopa,” ämaingampa. Mänömaï angä ëñëninque godongämæ cæ cönäni ññömö, Nē ëacä nänö nē waadebi bitö ñmi amönipa, ante bitö ñmite waa abaïñänipa. ¹¹ Edæ, Botö nämä nē waa cæbo ñnömo inte edæ yæcado ongonguënemo ñmopa, ante nē cæcä ññömö tömengä ññömö wæantodonte bai guingo ñmonte wæcæcäimpa. Wæætë edæ, Botö önömoque ñmopa, ante yæmiñæ nē ongongä ññömö tömengä guiquënë ængö cæte tocæcäimpa, ante Itota apænegantapa.

¹² Tömënäni ñnänite ñinque apænedinque nē wente æningä ingante Itota godömenque angantapa.

–Bitö, Pö cæe, ante ææmænoca wente æninque bitö æmigoidi ñnänite wente ænāmaï ñe. Bitö toniñadäni ñnänite wente ænāmaï ñe. Bitö guidëñäni ñnänite wente ænāmaï ñe. Eyequei owote mäincoo nē ëadäni ñnänite wente ænāmaï ñe. Edæ bitö tömënäni ñnänite wente æmi ñinque tömënäni wæætë bitö ñmite wente æmaïñänipa, ante wææ cædinque bitö ññömö, Botö godönö wæætë eyepæ pönönäni mäninque æninque öönædë wæætë ænāmaï ñmaïmopa, ante wædinque edæ tömënäni ñnänite wente ænāmaï ñe. ¹³ Wæætë ææmænö ante wente æninque ömæpodäni inte wæwënäni ñnänite cömante wæwënäni ñnänite bee ñante wæwënäni ñnänite babetamönäni ñnänite wente æe. ¹⁴ Mäninäni ñnänite wente æninque edæ bitö toquinque ingæimpa. Tömënäni wæætë ædö cæte adopo pönönäni ænguimii. Edæ nē nö cædäni nāni ññäni ömæmonguionæ ñinque bayonte edæ mönö Mæmpo Wængonguï incæ bitö ñmite adopo pönongä æncæbiimpa, ante Itota apænegacäimpa.

Ææmæ ante Itota odömoncæte ante apænegantapa
(Mäateo 22.1-10)

¹⁵ Angä ëñëninque Itota tönö nē cængongä adocanque tömengä ingante apænegantapa.

–Wængonguï Awënë Odeye pongä ate tömengä tönö godongämæ nē cængä ññömö edæ tömengä nänö watapæ toquinque cænguingä.

¹⁶ Apænegä ëñëninque Itota wæætë tömengä ingante odömoncæte ante apænegantapa.

—Waocā ææmæno ante cædinqe nanguī ināni inānite māo apænedinqe, ĩncayæ ate āmo ate pō bete cædāni, ante cæcantapa. ¹⁷Ææmæno beyedē ĩnque bayonte tōmengā ingante nē cæcā ingante āninqe, “Īiōnæ ææmæno ĩnque cætimpā. Pōdāni,” ante bitō tē tē wente ænte pōe, ante da godongā. ¹⁸Godinqe wente ængā ēñēninqe do nānō nē āñedināni wæætē, Ædō cæte ponguīmōni, ante tōmānāni adoyōmō wædānipa. Tānocā ĩñōmō, “Botō ōmæ ante tæcæ godonte æninqe botō acæ goquīmo inte botō ææmæ becæ godāmaī ĩmopa. Incæte nē wente æningā weca adodō gote bitō botō beyæ apænebi ēñēninqe tōmengā wæætē botō ĩmote pīlnāmaī incæcāimpa,” angampa. ¹⁹Wacā guiquēnē, “Wagada onguīñæna nāna goti wimencacaya nāna goti wimencacaya ōnomo æmæmpoque ganca mānimpodāni ināni inānite godonte ænimo inte botō, Æbānō cædāni, ante acæ gocæ cæbopa. ĩnque botō ææmæ becæ pōnāmaī ĩmo incæte awēnē ingante āmi botō ĩmote pīlnāmaī incæcāimpa,” angampa. ²⁰Wacā guiquēnē, “Botō tæcæ mōnimo inte ædō cæte ponguīmo,” angā. ²¹Ēñēninqe nē cæcā ĩñōmō awēnē weca adodō pōninqe tōmēnāni nāni cædōnō ante tōmāā apænecā ēñente wædinqe nē ēacā ĩñōmō ænguī badinqe tōmengā ingante nē cæcā ingante, “Bitō mōnō quēwēñōmō wacā taadō wacā taadō ñænænō incæ guiyānō incæ tōmāo gote adinqe nē ōmæpodāni inānite, nē cōmāināni inānite, nē biyaate ināni inānite, nē babetamōnāni inānite adinqe ænte pōe.” ²²Angā ēñente cædinqe nē cæcā wæætē awēnē ingante, “Awēnē, bitō ānīnō ante do cæbo incæte bitō oncō wī eyede ĩmpa.” ²³Ante apænecā ēñente wædinqe awēnē wæætē, “Ōnōmæca ĩñōmō ñænænō incæ guiyānō incæ gote diquī diquī mīnte wadāni inānite ate āmi pōnāni ĩnque botō oncō eyede ponte cæncædānīmpa. ²⁴Edæ bitō ĩmite āmopa, Wēēnēñedē botō wente ænīnāni incæ bedāmaī incædānīmpa,” ante nē ēacā angampa. Māninqe ante apænebopa, ante Itota apænegacāimpa.

*Itota miñæ gocæte ante cæbānō cæquī, ante
(Māateo 10.37-38)*

²⁵Itota tōnō nanguī ināni godongāmæ godānitapa. Tōmēnāni inānite apænecæte ante tōmengā dadi ēmænte adinqe apænecantapa.

²⁶“Mīnitō ĩñōmō, Itota gāmæñō ponguīmo, āmīnitawo. Īñæmpa botō weca pōninqe waocā mæmpo tōnō wāānā ĩnate ante wædāmaī incæcāimpa. Tōmengā nānōgōgēngā ingante ante wædāmaī inte tōmengā wēñænāni tōnō tōmengā nānō tōñīñadāni inānite ante wædāmaī incæcāimpa. Mānimpodāni inānite piinte baī pōnēninqe tōmengā, Nāmanque ante quēwēncæboimpa, ante wædāmaī inte piinte baī pōnēninqe botō ĩmote wæætē godōmenque nanguī waadete pōnenguēnēngā ingampa. Mānōmaī ante pōnēnāni ĩñōmō tōmēnānique edæ botō miñæ nē godāni badānipa. ²⁷Ayæ botō miñæ poncæ cædinqe waocā, Awæ botō wænguīwæ, ante næænte ponte baī cædinqe, Wæñōnāni wæmo incæte Itota miñæ cōwē gocæboimpa, ante poncæcāimpa. Mānōmainō ante wī cæcā ĩñōmō tōmengā ĩñōmō edæ botō nē ēmīñēngā ædō cæte baquingāā. ²⁸Æi gomō aquincō mænoncæ cædinqe bitō, Æpodō godonte æninqe ĩnque mænonguīmo. Botō eyepæ mantawo, ante tāno pōnēnāmaī inte edæ ædō cæte mænonguīmī. ²⁹Tāno pōnēē cōnāmaī ĩmi ĩnque bitō ongonto ontowæ do nāñe ñongæninqe godōmenque ænguī ante ōmæpobi badinqe ĩnque edæ mæñōnāmaī ĩmaīmpa. Ayæ edæ mæñōnāmaī ĩmi adinqe godongāmæ ongōnāni wæætē, ³⁰Æ bitō mænoncæ cædīmi incæ ĩnque mæñōnāmaī ĩmpa tōō,” ante badete tobāinānipa,” angantapa.

³¹Ayæ, “Īmæca awēnē wabæca awēnē ingante guēadō guēa piinte cæcæte ante cædinqe ædō cæte tāno pōnēnāmaī inte cæquingāā. Īmaī pōnente

cæquēnengā ingampa. Botō tontadoidi guiquēnē diete mīido ganca iñōnānite wabæca awēnē tōmengā tontadoidi guiquēnē bæinte mīido ganca ināni awædō. Tōmengā tontadoidi nanguī ināni tōnō piincæte ante pōñongante botō æbānō cæte edæ wææ cæquimoo, ante tāno pōnēē congūēnē ingampa. ³² Ayæ, Botō iñōmō tæi piñæmo imopa diyæ tōmēnāni inānite wido cæquimoo, ante pōnengā ininque tōmengā edæ wabæca awēnē gobæ ongōñongante māo wææ anguēnengā ingampa. Edæ, Botō æbānō cæbo ate bitō wæætē piyænē cæte ee ate gobi quēwēmoē, ante wææ anguēnengā ingampa. ³³ Mīni cabo adobaī iminipa. Māincooque impa, ante godonte baī cædinque munitō tōmancoo emō cædinque tōmānāni inānite emō cædinque botō mīñæ poncæminimpa. Iñæmpa emō cædāmaī imīni ininque munitō botō nē emīñæmīni ædō cæte baquīmīni,” ante Itota angacāimpa.

*Cati incæ nongæ bapa, ante
(Māateo 5.13; Māadoco 9.50)*

³⁴ Ayæ apænedinque Itota, “Cati quimonte cæi iñōmō waēme inte gæpæ emompa, angacāimpa. Incæte nongæmonte ba adinque munitō wæætē æbānō nō cæmīni wæætē gæpæ emonguī. ³⁵ Iñæmpa gōnea inguipoga cati wāne cædāni ininque tōmēmō cati beyæ pædāmaī ingæimpa. Ayæ wagada goi tōnō wempodente wāne cædāni ininque tōmēmō cati beyæ pædāmaī ingæimpa. Ininque edæ cati nongæ ba ate wido cædānipa. Mānōmaī apænebo eñēninque ēamonca ongonte eñēdāni,” ante Itota apænecāimpa.

15

*Cæningā wē womōnimpa, ante odōmōninque apænecampa
(Māateo 18.10-14)*

¹ Odōmāno awēnē beyæ nē ænāni tōnō Wængonguī ingante eñēnāmaī inte nē cædāni tōnō tōmānāni Itota apænecā eñencæte ante godongāmæ pōnāni inōnānimpa. ² Adinque Paditeoidi tōnō nē odōmōnāni guiquēnē Itota ingante ante piīninque,

—İngā iñōmō, Pōedāni, āninque nē eñēnāmaī cædāni tōnō cæ congā awædō.

³ Ante piīnte tededāni wædinque Itota, Wængonguī Awēnē nempo quēwēninque æbānō cæquī, ante eñencædānimpa, ante imæca quēwēnāni nāni cæinō ante odōmōninque iīmaī apænecantapa. ⁴ “Mīnitō iñæmpa. Mīni waocabo iñōmīnite adobi iñōmō bitō obegaidi tiēē ganca ēabi iñōmi obega adocanque incæ wē womonte edæ dæ bacā ininque bitō iñōmō æbānō cæbāimī. Edæ nōobenta i nōebe ināni ayæ ongoncoo inānite yabæque emō cæte godinque onōmæca gote wē womōningā ingante bitō ædō cæte diqui diqui mīnāmaī imīi. Bitō aganca cōwē edæ diqui diqui mīmaimipa. ⁵ Ayæ diqui diqui minte ēadente ate, Nōwo ēadēmopa, ante todinque onōnancapæ wo ææntodōninque, ⁶ oncōnē mongænte pōninque bitō guīdēnāni tōnō bitō æmigoidi tōnō āñete pōnāni ate, ‘Badogaa, botō wē womō wædō dobæ ēadente i abopa. Edæ mōnō watapæ toquinque impa,’ ante nē ēabi iñōmō āmaimipa. ⁷ Ōōnædē quēwēnāni iñōmō adobaī cædānipa, ante apænebo eñēdāni. Waodāni nōobenta i nōebe ganca ināni nē nō cædōnāni inte wē womōnāmaī inte ayæ ongōnāni adinque ōōnædē quēwēnāni wædænque todānipa. Wæætē waocā adocanque incæ nē womōningā iñōmō tōmengā edæ wēnæ wēnæ nānō cædinō ante wæwente pōñēninque ñimpo cæte pongā adinque ōōnædē quēwēnāni iñōmō godōmenque watapæ todānipa,” ante Itota apænecāimpa.

Onquiyængä tigitamö nänö wë wodönintamö ante

⁸ Godömenque apænedinque Itota odömongantapa. “Ayæ wæætë onquiyængä tigitamö diete ganca mǎñongä adotamonque wë wodonte ba adinque, Nǎö gongængæimpa, ante tica wodönodinque tömengä oncö tömão wadæ ñëmæ wadæ ñëmæ cæte diqui diqui minte ængampa. ⁹ Do æninque tömengä guidënanï tönö tömengä æmigoidi tönö ãñete pöñönänite, ‘Botö wë womontamö wædö dobæ éadente abopa. Mönö edæ watapæ toquinke impa,’ angampa. ¹⁰ Ìninque mïnitö ìmïnite apænebopa. Adocanque incæ wënæ wënæ nänö cædinö wæwente pönëninque ñimpo cædinque pongä adinque Wængonguï anquedoidi incæ watapæ todänipa,” ante Itota apænegacäimpa.

Mäincoo në ewengä ingante mæmpocä waadete pönö cæcä

¹¹ Ayæ godömenque apænedinque Itota, “Mæmpocä tömengä wëñæna mënaa ññönote, ¹² ayæmengä ññömö wæmpocä ingante apænedinque, ‘Mæmpo, bitö éacoo incæ æmæncooque pä cæte botö ænguënencooque pönömi æmoe.’ Angä Ao äninque wæmpocä pä cædinque wacä ingä pædæ wacä ingä pædæ godongä æna. ¹³ Ate wantæ ate ayæmengä ññömö ænte næænte wabæca godinque quingämë bai önonque towente quëwëninque wæmpocä nänö pönönincoo incæ eye cæpote ba. ¹⁴ Ate mäniömæ cænguï dæ ba ate nani gæwænte wæpämö pö ìninque tömengä mäincoo ænguëngä inte wæwengä. ¹⁵ Ìninque tömengä mäniñömö quëwengä weca gote äninque, Bitö ìmi në cæbo bacæboimpa, ãñongante Ao äninque, Botö ömæ odæ wængänäidi nani cæmancadë gote në aabi bacæbiimpa, ante da godongä. ¹⁶ Gote aadinque tömengä gue ænente ömædengä inte odæ wængänäidi nani cæntapodë incæ cæñente wæyongante cænguï dicæ pönöñaniyaa.”

¹⁷ “Ante wædinque tömengä namanque pönë cöninque, ‘Ïñæmpa botö wæmpo ingante në cædäni ññömö önonänique incæ eyepæ pönï cæññönäni botö ññömö edæ gæwænte wænguï wæ. ¹⁸ Botö mæmpo weca edæ wadæ gocæboimpa. Gote pöninque botö tömengä ingante, Mæmpo ëñëmi. Öönædë quëwengä ingante botö godö ëñëñämäi cædinque bitö ayömite pönö wënæ wënæ cæbo ññömote, ¹⁹ bitö ñño wo edæ, Botö wëmi, ante ædö cæte anguïmii. Wæætë edæ, Bitö botö ìmote, Në cæbi bæ, ämi ate botö bitö ìmite në cæbo bacæboimpa, ancæboimpa.’ ²⁰ Ante pönëninque wadæ godinque wæmpocä weca gocantapa,” ante apænedinque Itota godömenque odömonte apænecantapa.

“Ayæmengä mäñömäi gote gobæ pönï dibæ pöñongante wæmpocä ññömö gomö adinque ññontobæ pönö waadete wæcampa. Pogodo pönï godinque tömengä wengä ingante waa waadedinque bæi ongonte queë bemongampa. ²¹ Tömengä wengä ññömö, ‘Mæmpo ëñëmi. Öönædë në quëwengä ingante botö godö ëñëñämäi cædinque bitö ayömite pönö wënæ wënæ cæbo ññömote bitö ñño wo edæ, Botö wëmi, ante ædö cæte anguïmii.’ ²² Ante tæcæ apæneyongante mæmpocä ññömö në cædäni ññänite äninque, ‘Weocoo waëmoncoo quingæ ö ænte mämö daga wëñaquïmïni. Öonmpo timpöi ænte pöninque godö da timpodinque awæncata ö ænte godö da wëwædäni. ²³ Ayæ wagada wëñængä nangui cænte oguïmo pönï ñngä inte wænonte æñömïni ate mönö cænte tocæimpa. ²⁴ Edæ botö wengä ññömö do wænte bai ñngä incæte ñño wëmi ñngä pongä aedäni. Botö në wë womongä wædongä incæ edæ ñño wo dobæ éadente tobopa.’ Ante wæmpocä angä ëñëninque ææmæ cædinque nangui todänitapa,” ante Itota godömenque odömonte apænecantapa.

25 “Ææmæ cæte toyönäni bamoncadengä guiquënë gönea ayæ cædongäimpa. Ìnque cæte ate obo ponte ëñëñongä ämotamini ante äwadäni. 26 Ëñente wædinque në cæcä ingante äñecä pöñongante, Æbänö cædäni, ante wæcampa. 27 Äñongante, ‘Bitö biwi incæ do pongä adinque bitö wæmpo, Botö wengä mïngä ëñadente tobopa, ante adinque wagada wengä oguimo pöni ìnongä ingante do angä wænonte ææmæ cæte todänipa.’ 28 Ante apænecä ëñëninque bamoncadengä ìñömö edæ ænguï badinque oncönë guidämaï, Baa angä. Wædinque wæmpocä ìñömö oncodo taodinque tömengä ingante waadete apænedinque, Oncönë pö guie, angampa. 29 Bamoncadengä wæætë, ‘Ìñæmpa bitö beyæ ante wadepo ìño wadepo ìño botö ancaa cædinque bitö änö tömänö ante do cæbo ìñömote bitö wæætë, Bitö æmigoidi tönö cænte tocæminimpa, ante dicæ ämiyaa. Caboda wengä incæ dicæ pönömi æmogaa. 30 Wæætë mäningä bitö wengä guiquënë onquiyænäni mäincoo beyæ ante në towente quëwënäni tönö quëwëninque bitö éadincoo incæ në ëwënegä inte pongä adinque bitö wæætë wagada wë oguimo pöni ìnongä incæ mäningä beyæ do wænömpa, ante awædö,’ angantapa.”

31 “Ante püñongante wæmpocä, ‘Botö wëmi ëñëmi. Bitö ìñömö cöwë edæ botö weca ongömi ìmpa. Botö mäincoo ìni edæ bitö mäincoo cöwë ìmpa. 32 Incæte mäningä bitö biwi, Do wæmaï ingampa, ante mönö në pönëngä inte ñowo mïngä ingä pongä ae. Në wë womöningä ingante do éadente ate edæ ææmæ cæte toquënë ìnimpa,’ ante bamoncadengä ingante wæmpocä angampa.” Mäninque ante apænebopa, ante Itota apænecäimpa.

16

Në aaquënegä incæ nö cædämaï ingampa, ante

1 Itota tömengä miñæ në godäni ìnänite godömenque apænedinque, “Waocä adocanque mäincoo nanguï éacä ìñongante wadäni, Bitö mäincoo në aaquënegä incæ önonque pöni wido cæcä ae. 2 Änäni ëñëninque në éacä ìñömö në aaquënegä ingante äñecä pongä ate ìmaï angampa. ‘Bitö quimæ cæbii, ante adinque tededäni edæ ëñëmopa. Ñowo idæwaa botö mäincoo inte në aadimi inte edæ abæ tawæ gocæbiimpa. Ämo ate ëñente wædinque bitö botö mäincoo ìni ante edæ, Æbänö aadinque cæboo,’ ante apænebi ëñëmoe.”

3 “Ante pünte angä ëñente wædinque në aadingä ìñömö nämäneque tededinque, ‘Botö awënë, Gobäwe, angä ëñëninque botö abæ tawænte gote awædö. Botö cæte ænguënenta ñowo ænämaï ìninque æbänö cæte ænte quëwenguimo. Botö, Wadäni beyæ onguipoi ææ wobo ate pönönäni ænte quëwencæboimpa, ante pönëmo bai edæ tæi piñæmopa diyæ ææ woquïmoo. Ayæ, Önonque pönömini æmoedäni, ante ædö cæte anguïmoo. Guñënete awædö. 4 Æ. Tæcæ pönëmopa. Botö awënë angä botö abæ tawænte goyömote wadäni wæætë, Botö oncönë pö guie, ancædänimpa, ante cædinque botö ñowo ìmaï cæcæboimpa,’ ante ìmaï cæcampa,” ante apænedinque Itota godömenque apænecantapa.

5 “Wadäni ìñömö ìngä awënë pönongä æninque adodö pönönämaï ìnäni inte debe ìnönänimpa. Ìnäni ìnänite adocanque adocanque tömänäni ìnänite angä pönönänite në aadingä ìñömö täno pöningä ingante apænedinque, ‘Botö awënë ingante bitö ayæ æpodo pönönämaï ìmii.’ 6 Äñongante, ‘Oguinguipæ incæ botö tiëë ganca tanquebo encadedë awënë ingante pönönämaï inte debe ìmpa.’ Ante apænecä ëñëninque ‘Mänimpocadedë debe ìmpa,’ ante awënë nänö yewæmöninta pædæ godöninque në aadingä ìñömö, ‘Bado, bitö

līnta ænte pōnōmenque ante yewæmōninque edæ, Botō tincoenta ganca encadedē debe ïmopa, ante edæ quingæ tæ contate yewæmōe, angā ēñente cæcampa. ⁷ Ayæ pōningā ingante nē aadingā angantapa. 'Bitō guiquēnē æpodō pōnōnāmaï ïmi.' Añongante, 'Todigo incæ tee manguincade ñænængade pōni tiē ganca encadedē botō debe ïmopa.' Ante apænecā ēñēninque awēnē nānō yewæmōninta pædæ godinque nē aadingā, 'Bado bitō līnta ænte pōnōmenque ante yewæmōninque, Otentā ganca debe ïmopa, ante yewæmōe, angā cæcampa.'

⁸ "Īninque nē aaquēngā mānōmaï ōnonque wīwa cæcā wædinque awēnē tōmengā ingante, Bitō ocai nanguï encabi inte nāmanque ante pōnēwēninque cæbitapa, angampa, ante Itota nē aaquēngā ingante ante māninque apænecantapa. Ayæ godongāmæ ongōnāni ïnānīte godōmenque apænedinque, Inguipogaque ante quēwēnāni ïñōmō nāni caboque nanguï ēñente cæyōnāni botō ñāō ïñōmō nē quēwēnāni nāni cabo guiquēnē wīi nanguï ēñente cædānīpa," ante Itota odōmoncæte ante apænecantapa.

⁹ Ayæ, "Mīnitō ïmīnīte ñōwo āmo ēñēedāni. Māningā nē aacā ocai encate cæcā bai mīnitō ïñōmō adobāi inguipogaque wīwa cæcæte ante nāni godonte æinta māmīni ïninque ocai encate tōingā pōnente cæedāni. Inguipoga ïnque bayedē mānīnta ïñōmō edæ dæ bacæïmpa, ante pōnente wædinque, wadāni beyænque ante godō waa cæedāni. Mānōmaï cæmīni ïninque mīnitō ōmæpomīni inte ōñædē nāni cōwē wantæpiyæ quēwēncōnē æite godinque pōñōmīnīte, Oncōnē pōedāni, āmañānīpa," ante Itota apænecantapa.

¹⁰ Ayæ, "Wacā māincoo wædænque pōni æninque ædæmō aacā ïninque tōmengā wæætē nanguï māincoo æninque adobāi ædæmō aaquingā ingampa. Wæætē edæ māincoo wædænque pōni aaquēngā incæ babæ cæcā ïninque tōmengā wæætē nanguï æninque cōwē babæ cæqingā ïmaingampa.

¹¹ ïninque māincooque ante mīni wædoncoo æninque mīnitō ædæmō aadāmaï ïmīni adinque mīnitō ïmīnīte, Wo ēwēnāmāincoo aacæbiimpā, ante dicæ pōnōnāni ænguïmīniyaa. ¹² Ayæ wacā mīnitō ïmīnīte, Botō qui ædæmō aadāni, ante pōnongā æñimīni inte mīnitō ædæmō aadāmaï ïmīni adinque, Tōmēmīni quī, ante mīnitō ïmīnīte pōnōnāmaï incædānīmpa," ante Itota apænecācāmpa.

¹³ Ante apænedinque Itota godōmenque apænecantapa. "Mēnaa awēnēna ïna beyæ wacā ædō cæte cæqingāā. Adocanque awēnē ingante pīninque wacā ingante waadebaingampa. Wæætē adocanque miñæ godinque wacā ingante wīi waa abaingampa. Mīnitō adobāi ïmīni inte Wængonguï ingante nē cæmīni ïninque māincooque ante ædō cæte cæquimīni," ante Itota angacāmpa.

¹⁴ Itota apænecā ēñēninque Paditeoidi guiquēnē māincooque ante nē wæwēnāni ïnōnāni inte, Quimæ ānewēē, ante badete togadānīmpa. ¹⁵ Adinque Itota wæætē tōmēnāni ïnānīte, "Mīnitō ïñæmpa, Mōnitō ïmōnīte adinque waodāni, Nē nō cædāni ïnānīpa, ante pōnencædānīmpa, ante nē babæ cæmīni ïmīnīpa. Incæte Wængonguï mīnitō mīmōnē mīni entawēnō ante edæ do acampa. Waodāni nāni waa adō ante Wængonguï wæætē, Wentamō pōni ï awædō, ante pīingampa," ante Itota apænecantapa.

Wængonguï Awēnē nānō wææ angainō cōwē ongompā

¹⁶ Äninque Itota, "Wēēñēñedē ïñōmō Wāō nānō ponganca dodāni Mōitee wodi nānō wææ angainō ante ayæ Wængonguï beyæ nē apænecāni nāni angainō ante apænete quēwengadānīmpa. Nōwo guiquēnē, Wængonguï Awēnē Odeye nempo guite quēwengæïmpa, ante watapæ apænete impa. ïne ante ēñēninque tōmānāni Awēnē nempo guicæte ante edæ pæ pagænte cædinque da godō guidānīpa," ante apænecantapa.

17 Ayæ apænedinque, “Incæte öönæ tönö inguipo æmæwo edæ dæ nāni baganca edæ Wængongui nānō wææ angainō iñōmō edæ cōwē mæ ongongæimpa. Mānīne ante yewæmōninque dodāni nāni tænoncagai iñōmō edæ guiyā pōni incæ cōwē wadæ cædāmaī ingæimpa,” ante Itota apænegacäimpa.

*Nāni pāmænte wædō ante Itota apænecampa
(Māateo 19.1-12; Māadoco 10.1-12)*

18 Ayæ godōmenque apænedinque Itota, “Æcānō nāwā nānōogængä ingante pāmæninque wacā onquiyængä ingante godō mōna iñōmō tōmengä edæ wiwa towengä do bacampa. Adobai, tōmengä nānōogængä iningä iñongante wacā mōninque edæ do towente bacampa,” ante apænecantapa.

Tæcæ wodi tönö Datado, ante Itota odōmonte apænecä

19 Godōmenque odōmonte apænecæte ante Itota iūmaī ante apænegacäimpa. “Onguñængä adocanque nē ēacā inte cæncadencoo wæmoncoo wēñadinque awēñēidi nāni opatawæ ēmoncoo bai yabæque wēñadongäimpa. Tōmengä tæcæ wodi inongä inte waēme cænguincōoque æninque iūmō iñō iūmō iñō ææmæ cædinque nanguī todinque quēwēnongäimpa. 20 Tæcæ wodi yabædemō inō wacā tōmengä emōwo Datado ingante ænte māmō ñō cædāni ñongængantapa. Īngä iñōmō, Pönōmi æmoe, Pönōmi æmoe, ante nē ānewēnongä inte quēmoncoo tōmāo baate wædongäimpa. 21 Ayæ tæcæ wodi weca cæninque eyepodāni wæænte öñoncoo adinque tōmengä ænte cæncæte ante wæwēnongäimpa. Ayæ edæ tōmengä nanguī baate ñōmænte wæyongä guintaidi incæ pō yædæ yædæ beyadōnānimpä. 22 Tōmengä nē, Pönōmi æmoe, Pönōmi æmoe, ante ānewēnongä inte nāñe wængä adinque Wængongui anquedoidi tōmengä öñowoca ingante Abadāo wodi weca ænte mæñidāni æcantapa. Ayæ ate tæcæ wodi adobai nāñe wængä adinque tōmengä baō iñi daga wēñānitapa.”

23 Ante apænedinque Itota tæcæ wodi ingante ante godōmenque apænecantapa. “Tōmengä öñowoca guidōmēmō taadō wææ gote mæ māmōnte bai iñōmō ongōninque nanguī āmogate wæwēnongä inte gomō ayongä Abadāo wodi a ongongä acantapa. Datado wodi adobai Abadāo wodi weca a ongongä acantapa. 24 Adinque tæcæ wodi iñōmō Abadāo ingante aa pedinque, ‘Mæmpo Abadāo ēñēmi. Botō gonga bæcoyōmō guite nanguī āmogate wæwēmo cæbii. Botō āmogate wædō ante pönō wadæte waa cædinque bitō Datado ingante da pönōmi pōninque tōmengä æpæ ada ipomencacā botō cōñe bamencaboe.’ 25 Åñongante Abadāo, ‘Botō wēmi, Datado imæcayedē wēnæ wēnæ āmogate wæwēñongante bitō māincoo wæmoncooque ænte todinque quēwēñōmiimpa. Ñōwo diyæ bitō āmogate wæwēñōmite Datado ingante wæætē ædæmō cæbo ate wampo pōnēninque tōmengä ñōwo iñōmō watapæ quēwente tocampa. 26 Ayæ godōmenque āmo ēñē. Nānēñē ī apa ānewēē. Botō weca ongongä inte ædō cæte bitō weca goquingāā. Wæætē bitō weca ongongä inte botō weca ædō cæte ponguingāā. Guilbæ pōni iñōmō taadō impa taquū. Edæ dæ ampa,’ ante Abadāo wodi angampa, angantapa.”

27 “Angä ēñente wædinque tæcæ wodi wæætē, ‘Mæmpo Abadāo ēñēmi. Datado ingante āmi ēñente tōmengä botō mæmpo oncōñē adodō gocæcäimpa. 28 Māniñōmō botō tōniñadāni önompo æmæmpoquæ ganca mānimpadāni inānipa. Īninque bitō Datado ingante āmi tōmēnāni weca gote, Wæñompadāni, ante wææ angä ēñēninque tōmēnāni wæætē iñōmō nanguī pōni āmogate wæwēñōmō pōnāmaī incædānimpä.’ 29 Åñongante Abadāo wæætē, ‘Mōitee

wodi nānō wææ ante yewæmongainta Wængongui beyæ nē apænedāni nāni yewæmongainta do mǎnāni inte edæ bitō tōniñadāni iñōmō mǎninta adinque, Æbānō i, ante do ēñenguēnēnāni inānipa.’³⁰ Ante apæneyongā tæcæ wodi wæætē, ‘Iñæmpa mæmpo Abadaō ēñēmi. Wacā nē wængaingā inte ñāni omæmonte tōmēnāni weca gote apæneca ēñēninque botō tōniñadāni tōmēnāni wēnæ wēnæ cædinō ante wæwente pōnēninque do edæ ñimpo cæbainānipa.’³¹ Ante wæyongante, ‘Iñæmpa Mōitee wodi nānō wææ angaiñō ante Wængongui beyæ nāni apænegaiñō ante ēñēnāmaī ināni inte tōmēnāni nē wænte ñāni omæmōningā apæneyongante cōwē ēñēnāmaī imāinānipa,’ ante Abadaō wodi angantapa.” Tæcæ wodi ingante ante apænedinque Itota mǎninque ante apænegacāimpa.

17

*Wacā oda cæcæcāimpa, ante nāni wæquinque cædānipa
(Māateo 18.6-7; Māadoco 9.42)*

¹ Ayæ tōmengā mǎñæ nē godāni inānite apænedinque Itota, “Nē pōnēnāni incæ pancadāniya wīi ēñente do oda cædānipa. Cōwē mǎnōmaī impa. Incæte, Oda cæcæcāimpa, ante nē cæcā iñōmō edæ tōmengā nanguī nānō caate wæquinque cæcampa.”² Iñinque edæ, Wēñængā adocanque guiyangā pōni incæ oda cæcæcāimpa, ante nē godō cæcæ cædingā iñōmō edæ, Wīi cæcæcāimpa, ante mōnō edæ wææ cæcæcāimpa. Waodāni nāni dacæ godō dacæ godō cæquinca ñænænca æninque nē godō cæcæ cæcā önōmenca æ wēmencadinque tōmengā ingante tæcætibæ wido cædāni iñinque tōmengā edæ, Wēnæ wēnæ cædāmaī inte wæmo beyænque Wængongui botō imote pānāmaī ingampa, ante tōmengā waa toquēngā imaingampa.”³ Mǎnōmaī āmo ēñēmīni inte mīnitō, Oda cæcæcāimpa, ante nē cæcā bai cædāmaī incæboimpa, ante edæ nāmā wææ aedāni,” āninque Itota iīmaī apænecantapa.

“Wacā wēnæ wēnæ cæcā adinque bitō wæætē tōmengā ingante, Cædāmaī incæbiimpa, ante wææ æ. Āmi ēñēninque tōmengā wēnæ wēnæ nānō cædinō beyæ guingo imonte wædinque, Wīwa cætabopa, ante apæneca ēñēninque bitō wæætē piyænē cædinque tōmengā ingante ñimpo cæbi ee gocæcāimpa.”

⁴ Tōmengā wæætē adoönæque iñonte önompo æmæmpoque go mempoga mǎnimpoga bitō imite wīwa cædingā inte tōmengā guingo imōninque, ‘Bitō imite wīwa cætabopa,’ ante adopoga apæneca ēñēninque bitō wæætē tōmengā ingante adopoga ñimpo cæbi ee gocæcāimpa,” ante Itota angantapa.

Mōnō tæi piñænte entawenguinque wede pōnēmompā

⁵ Mōnō Awēnē tōmengā nānō nē da godōināni iñōmō tōmengā ingante āninque,

–Wædænque pōnēmōni iñōmōnite bitō pōnō cæbi æninque mōnitō ædæmō wede pōnēmōni bacæmōnimpā.

⁶ Ānāni ēñēninque mōnō Awēnē wæætē,

–Mōotatamō guiyāmō pōni nānō inganca mīnitō pōnēnō mǎninganca wædænque pōnēmīnitawo. Mǎningancaque pōnēmīni incæte mīnitō mōodedawæ nāni āwæ inte apænedinque, “Awæ ēñēmi. Bitō bæ wite godō gāwapæ minte pæbāwe,” ante āmīni bai awæ incæ dobæ edæ ēñente cæcædōnimpā, ante Itota apænecantapa.

Wacā ingante nē cæcā incæ iīmaī cæquēngā ingampa

⁷ Ayæ godōmenque apænedinque, “Mīni waocabo iñōmīnite adobi nē ēabi imi iñinque bitō imite nē cæcā ingante edæ æbānō cæbaimi. Tōmengā gōnea

mangæ mangæ wodinque ayæ cænīnāni inānite iinque aadinque pō guicā adinque bitō iñōmō edæ, ‘Pō tæ contate cæe,’ ante edæ dicæ āmīyaa. Edæ nē ēacā ingampa diyæ tāno cænguīgāā. ⁸ Wæætē nē ēabi inōmi inte bitō, ‘Botō beyæ cænguī ænōninque bitō weocoo topo cædinque pōnōmi æninque botō cænte bebo ate bitō māniñedē ate edæ cænte becæbiimpa,’ ante cōwē āmaīmpa. ⁹ Ayæ, Cæe, ante bitō āninō ante tōmengā ēñente cæcā beyænque bitō, Waa cæbi æmopa, ante dicæ anguīmīi. ¹⁰ Iinque mōnō Awēnē, Cæedāni, ante nānō angainō ante eyepæ pōni cædinque mīnitō adobaī ante pōnenguēnēmīni iīmīnīpa. ‘Mōnitō nē cæmōnique inte ōnōmōnique inōmōni inte wēnæ wēnæ cæte awædō. Mōnitō tōmengā nānō ānonque māninque cæte ate tōmengā beyæ ante dicæ godōmenque nanguī cæmōniyaa,’ ante pōnente wæquēnēmīni iīmīnīpa,” ante Itota tōmengā miñæ nē godāni inānite apænegacāimpa.

Itota angā ate diete ganca ināni waintai baadānīpa

¹¹ Māniī Eedotadēē iñōmō gocæte ante godinque Itota Tāmadiabæ æmætæ Gadideabæ æmætæ tæcæguedē pōni godinque, ¹² waodāni nāni quēwēñōmō tæca pōñongā nē baate wædāni ōnōmpo tipæmpoga ināni pō bee tēnānitapa. Pō gobæ næ gongæninque pōmō adinque, ¹³ aa pedānitapa.

—Itota nē Awēnē inōmi inte ēñēmi. Mōnitō wædō ante pōnō waadete waa cæe, āmōnīpa.

¹⁴ Āñōnānite gomō adinque Itota,

—Mīnitō guiquēnē Wængonguī oncōnē godinque, Wængonguī quī, ante nē godōnāni inānite mīnitō æmontai māo odōmōmīni acædānīmpa.

Angā ēñente tōmēnāni idōmæ godinque iñontobæ waintai baagadānīmpa.

¹⁵ Iinque adocanque watapæ todinque, Wængonguī bitō ñāo apāite baī inōmi inte edæ waa cæbi æmopa, ante yedæ apænedinque adodō pongantapa.

¹⁶ Tōmengā iñōmō wabæca Tāmadiabæ nē quēwēningā incæ pō Itota ōnōwa inō guidōmēmæ ñongæninque waa ate pōnēninque, Bitō pōnō cæbi ate waintai baabopa, ante apænecā. ¹⁷ Ēñēninque Itota wæætē angantapa.

—Īñæmpa mīni cabo ōnōmpo tipæmpoga mānīmpomīni inōmīni inte edæ wīī tōmāmīni waintai baamīnitawo. Iinque wadāni ōnōmpo æmæmpoque go mēnaa go mēnaa ināni iñōmō edæ ædōnō gote dæ ānāni. ¹⁸ Īngā iñōmō wabæca quēwēningā incæ adocanque Wængonguī ingante waa pōni apænecæte ante ponte quēwēñongā wadāni guiquēnē tōmānāni pōnāmaī inānitawo.

¹⁹ Āninque Itota tōmengā ingante,

—Bitō wede pōnēnō beyænque waintai baadīmi inte ængæ gantite goe, angantapa.

Īmaī iinque bayonte Awēnē Odeye poncæcāimpa, ante

(Māateo 24.23-28, 36-41)

²⁰ Paditeoidi Itota ingante, Wængonguī Awēnē æyedēnō ponte Awēnē Odeye baquīgāā, ante wæyōnānite tōmengā wæætē, Īñæmpa wīī waomīni ayōmīni Wængonguī Awēnē Odeye pongā ingampa. ²¹ Iinque, “Tōmengā iñōmō ponte ongongampa,” ante ayæ wæætē, “Tōmengā wayōmō gote ongongampa,” ante edæ ædō cæte anguīi. Mīnitō weca nē quēwēngā incæ Awēnē Odeye bayongante waodāni tōmengā nempo do quēwēnāni apa ānewēmīni, ante Paditeoidi inānite angacāimpa.

²² Ayæ tōmēnāni inānite iinque apænedinque Itota tōmengā nānō nē ēmiñænāni inānite wæætē apænecantapa.

—Īncayæ ate munitō, Waocā nē ēñagaingā ingante adoönæque incæ ainēmōnīpa, ante wæcæminīpa. Wæmīni incæte adāmaī incæminīpa. ²³ Wadāni munitō imīnite, “Īñōmō ongongā tamēñedāni,” ānīnque ayæ, “Wayōmō ongongā tamēñedāni,” āñōnāni munitō acæ godāmaī iedāni. Tōmēnāni mīñæ edæ godāmaī imæwedāni. ²⁴ Botō ponguōnæ īinque bayonte botō īñōmō edæ Waobo nē ēñagaimo inte edæ ñāō æmataæ æmataæ nāinte bai ēmōnīnque edæ edonque pōnī ponte a ongoncæboīpa. ²⁵ Incæte botō ñōwo guiquēnē tāno nangui āmogate wæwencæboīpa. Ayæ ñōwodāni īñōmō botō imote edæ Baa ānīnque wido cæcædānīpa, ante Itota apænegacāmpa.

²⁶ “Botō Waobo nē ēñagaimo inte botō ponguōnæ īinque bayedē guiquēnē Nōwee wodi Docā nāni angaingā nānō quēwēñedē dodāni nāni quēwengā bai adobaī edæ quēwenguñāni īnānīpa. ²⁷ Docā Nōwee wodi ñænæ wipoboga oncō bai mænōnīnque tōmēngā nānō guiganca tōmēnāni ōnonque cænte bete monte quēwengadānīpa. Monguīna, ante ñānonte quēwengadānīpa. Māniñedē edæ tōmēnāni nāni capo bedō wængūnīnque edæ æpæ do angatīpa. ²⁸ Dooto wodi nānō quēwengāñedē dodāni adobaī cænte bete quēwengadānīpa. Nē mānāni godongadānīpa. Æīnēnāni wæætē godonte ængadānīpa. Mīnte pæcæīpa, ante cædinque onconcoo mænonte quēwengadānīpa. ²⁹ Incæte Dooto wodi Todōmā īñōmō quēwente nānō tao gogaiōnæ īñonte gonga tōnō atopodemō nangui ocoi bæcomō cōōnæ cæ bai wæænīnque māō bæco īinque māniñōmō quēwēnāni tōmānāni gonte wængadānīpa. ³⁰ Botō Waobo ēñagaimo inte edonque botō a ongōñedē māniñō nāni bæco gonte wængā bai adobaī bacæīpa, ante āmo ēñēmaīmīnīpa,” ante Itota angacāīpa.

³¹ Ayæ godōmenque apænedīnque, “Māniōnæ īñonte munitō oncōmanca ongōnīnque, Botō māincoo, ante oncōnē wæi guidīnque ænāmaī inte wodi wīnōmæwedāni. Ayæ gōnea cædinque māincoo ante oncōnē ocæ ēmænte æncæ pōnāmaī imæwedāni. ³² Īñæmpa, Dooto nānōgængā wodi æbānō dadi ēmænte adīnque edæ gonte wængacāī, ante pōnēmīniyaa. ³³ Inguipogaque cōwē quēwencæboīpa, ante nē pōnēngā īñōmō tōmēngā īñōmō edæ quēwēnāmaī incæcāīpa. Wæætē edæ inguipoga mōnō guēmante quēwenguīmāmo ante nē wædāmaī ingā guiquēnē tōmēngā īñōmō edæ cōwē wænāmaī quēwencæcāīpa, ante āmo ēñēmaīmīnīpa,” ante Itota apænegacāīpa.

³⁴ Ayæ, “Māniñedē woyowotæ ī īinque mēnaa āñōmonque ōñōna adocanque ingante bæi ongonte goyōnāni adocanque ingante ēmō cæte godāni a ongoncæcāīpa. ³⁵ Ayæ onquiyæna cængui ante guēa dicaca dacæ dacæ cæte godō wēñōna adocanque ingante bæi ongonte goyōnāni adocanque ingante ēmō cæte godāni a ongoncæcāīpa.” ³⁶ “Ayæ onguīñæna gōnea guēa cæyōna adocanque ingante bæi ongonte goyōnāni adocanque ēmō cæte godāni a ongoncæcāīpa.”

³⁷ Ante apænegā ēñente wædinque tōmēnāni wæætē,

—Awēnē, bitō ānō æyōmōnō incæ mānōmaī baquīī.

Āñōnānīte,

—Baō æyōmōmē wænte ōñōñōmonte abadæidi wē ongonte edæ do godongāmæ pōnāni bai waodāni, Mōnitō Awēnē pongampa, ante do ēñēnīnque godongāmæ poncædānīpa, ante Itota apænegacāīpa.

¹ Ayæ tömengä miñæ nè godäni cöwë Wængongui ingante apænedinque wæntæte badämaï incädänimpa, ante cædinque Itota inguipoga quëwëñäni näni cæinö ante odömönte apænegacäimpa. ² “Wayömö näni quëwëñömö adocanque waodäni näni nè apænte änogä inte quëwëñongäimpa. Wængongui ingante guiñëñämaï Inongä inte tömengä iñömö, Waodäni æbänö äñäni, ante wædämaï inongäimpa. ³ Adoyömö tömëñäni quëwëñömö onquiyængä adocanque owæmpoingä inte nè wædongä inte quëwëñongäimpa. Tömengä guiquënë mäningä nè apænte adongä weca wæætë wæætë pöningue, Botö imote adocanque nè piingä iñongante bitö ämi ëñente wæætë nõ cæcæcäimpa. ⁴ Ante ancaa pöningue äñä ëñente wædinque nè apænte änogä iñömö edæ cöwë Baa Baa angä. Incæte ayæ ate nämäneque tededinque tömengä, ‘Onquiyængä iñömö ancaa angä awædö, äninque, Wængongui ingante guiñëñämaï imo inte botö, Waodäni æbänö äñäni, ante wædämaï imo incæte, ⁵ mäningä owæmpoingä pö pö cæcä wædinque botö, Ancaa ponte angä wæcæ wæ, ante wæætë tömengä ingante waa cæcæboimpa. Tömengä ingante nè piingä ingante botö, Nö cæe, ante wææ ämo wæcæcäimpa.’ Äninque nè Baa äningä incæte owæmpoingä beyæ do waa cæcampa. Mäningue ante odömömpa.”

⁶ Ante odömönte apænedinque mönö Awënë iñömö godömenque apænecantapa. “Në apænte angä iñömö wiwa cæcä incæte, Tömengä æbänö apæneçää, ante munitö ëñente pönëmæwedäni. ⁷ Wængongui näno nè apænte ængäimäni inte munitö itædë woyowotæ wæætë wæætë aa pe aa pe cöyömini Wængongui edæ ædö cæte Baa anguingää. Wææ ämi ate nõ cæcædänimpa, ante äñömönite tömengä iñömö edæ, Iincayæ ate cæcæboimpa, ante ædö cæte anguingää. ⁸ Wæætë quingæ edæ do cæcæcäimpa. Në piinte cædinäni iñönänite Wængongui wææ angä ate tömëñäni munitö iminite wæætë nõ cæcædänimpa, ante ämo ëñëmaimäni. Incæte Wao Wëmo ëñagaïmo inte botö ponte ayömo wede pönëñäni wabänö inguipoga mæ ongönäni aquimoo, ante wæbopa,” ante Itota angacäimpa.

Paditeo tönö awënë beyæ nè ænogä æbänö cæda, ante

⁹ Ayæ pancadäniya, Wadäni önönäni iñönäni mönonque nõ cæmö imopa, ante pönëwëninque wadäni inänite piinte adäni. Mänömainö ante nè änewëñäni inänite Itota, Wængongui ingante æbänö apænequii, ante ëñencädänimpa, ante imæca quëwëna näna apæneinö ante odömöningue apænecantapa. ¹⁰ “Waoda mënaa Paditeo tönö odömäno awënë beyæ nè æwengä iñömö Wængongui ingante apæneçæte ante Wængongui oncö ñænæncö yabæcönë æi guuidatapa. ¹¹ Paditeo iñömö adiyæ gongæninque nämä incæ apænedinque, ‘Wængongui ëñëmi. Wadäni bai wiï imopa. Botö iñömö godömenque waëmö imopa, ante todingue botö mänömaï beyæ bitö imite waa ate apænebopa, änewengampa. Edæ wadäni guiquënë wacä qui ö æñäni. Wadäni inänite wiwa cædäni. Tömëñäni nänöogængä inämaï iñongante godö guëa möñäni. Botö iñömö mäninäni bai inämaï inömo inte botö mänöñömö ongongä odömäno awënë beyæ nè æwengä bai wiï imopa, ante adinque botö Wængongui bitö imite waa ate pönëninque apænebopa. ¹² Botö iñömö, mëönaa go mëönaa iñonte, mëönaa go mëönaa iñonte bitö imite apæneçæte ante cænämaï quëwëmpa. Ayæ botö ænincoo tömancoo ate adinque botö önonpo tipæmpoga mäniipocoo mæ ongöñincoo adocooque æninque, Wængongui qui, ante cöwë pædæ pönömo ae,’ ante apænewengampa.”

13 “Odömāno awēnē beyæ nē ænongā guiquēnē guingo imōninque nāmā tæi tæi yatawēninque, ‘Wængonguī ēñēmi, botō nē wīwa cæbo adinque bitō waadete pōnō pīnāmaī incæbiimpa, āmopa,’ angā. Māninque angampa. 14 Mānōmainō ante odōmoncæte ante apænedinque Itota, Nōwo āmo ēñēedāni, angantapa. Īngā awēnē beyæ nē æwengā mānōmaī āñongante Wængonguī do, Botō ayōmo bitō nō cæbi babipa, ante godō badongā ate tōmengā edæ nō pōnēnongā inte tōmengā oncōnē gocampa. Wæætē Paditeo, Nāmanque waēmō ĩmopa, ante nē ānewēningā ingante Wængonguī, Nō cæbi bacæbiimpa, ante godō badōnāmaī incæcāimpa, ante āmo ēñēmaīmīnīpa. Edæ, Nāmanque waa cæbo ĩmopa, ante nē ængō cæcā guiquēnē edæ wææntodonte bai inte wæcæcāimpa. Wæætē, Nāmanque wēnæ wēnæ cæbo ĩmopa, ante nē apæneca guiquēnē edæ ængō cæte bai inte tocæcāimpa,” ante Itota apænegacāimpa.

Wēñænāni ĩnānite gampo cæcadinque Itota waa apæneca
(*Māateo 19.13-15; Māadoco 10.13-16*)

15 Ayæ ate wadāni, Wēñænāni ĩnānite Itota pōnō gampo cæcadinque waa apæneccæcāimpa, ante cædinque tōmengā weca guiyānāni ĩnānite ænte pō ænte pō cædāni adinque tōmengā miñæ nē godāni guiquēnē, Ænte pōnāmaī ĩedāni, ante Baa ānāni. 16 Adinque Itota wæætē wēñænāni ĩnānite aa pecā pōñōnāni tōmengā miñæ nē godāni ĩnānite apæneccampa.

—Wēñænāni ĩnānite botō weca ee amīni pōncædānīpa. Īñæmpa mānīnāni nāni pōnēnō bai adobai pōnēnāni inte edæ Wængonguī Awēnē Odeye nempo do quēwēnāni ĩnānīpa. Īninque mīnitō ĩñōmō wēñænāni ĩnānite Baa ānāmaī ĩedāni. 17 Edæ nāwangā apænebo ēñēedāni. Wēñægā do pōnægā inte Ao angā ĩngā bai Wængonguī Awēnē Odeye ingante do pōnēninque nē Ao ānāni ĩñōmō tōmēnānīque tōmengā nempo guīdinque quēwēnānīpa. Wadāni guiquēnē Wængonguī Awēnē Odeye ingante Baa ante pōnēnāmaī ĩnāni guiquēnē tōmēnāni ædō cæte tōmengā nempo guīdinque quēwēnguīnāni, ante Itota apænegacāimpa.

Māincoo nangūi ēacā inte Itota weca ponte apæneccampa
(*Māateo 19.16-30; Māadoco 10.17-31*)

18 Māniñedē Itota ingante wacā awēnē angantapa.

—Awēnē nē waa Odōmōmi apænebi ēñēmoē. Botō æbānō cædinque wānāmaī wantæpiyæ quēwēmaīmoō.

19 Āñongante Itota tōmengā ingante,

—Wængonguī adocanque nē waa cæcā ĩñongante bitō botō ĩmote, Nē waa cæbi ĩmopa, āmīi. 20 Āninque Itota godōmenque apæneccampa. Īmāi cæedāni, ante Wængonguī nānō wææ angainō ante bitō tōmēmi edæ do ēñēmīpa. “Bitō nānōgægā ĩnāmaī ĩñongante bitō godō guēa mōnāmaī ĩe. Wacā ingante godō wæñōnāmaī ĩe. Wacā quī adinque awēmō ænāmaī ĩe. Wacā wēnæ wēnæ cæcā atabopa, ante godō babæ wapiticæ ānāmaī ĩe. Wæmpocā ingante wānā ĩnante waa adinque tōmēna ĩnate godō waadete cæe,” ante wææ yewæmongacāimpa, ante bitō edæ do ēñēmīpa, angantapa.

21 Ante apæneca ēñēninque māningā awēnē wæætē,

—Botō mānīnō bitō ānō bai tōmānō ante ēñente cædinque pægaboī ae.

22 Ante apæneca ēñēninque Itota wæætē,

—Adodeque ayæ ēñente cæquēnēmi ĩmopa, ante āmo ēñēe. Oōnædē bitō waēmoncoo ænguinque edæ ĩmæca bitō mānīncoo tōmancoo godonte æninque bitō ænīnta wæætē òmæpodāni inte wædāni ĩnānite tōmanta godōmi æncædānīpa. Ayæ edæ botō ĩmote tee empote pōe.

²³ Angä ëñente wædinqe tōmengä mäincoo nanguï ëadongä inte mäincoo beyænque ante pōnëninque mäningä awënë iñōmō wæwente bacantapa.

²⁴ Ìninqe Itota tōmengä ingante gomō adinque,

–Wængonguï Awënë Odeye nempo guiite quëwencæte ante cædinqe waodäni òmæpodäni inte botō miñæ pōnänipa. Mäincoo nanguï ëacä guiquënë æbänō cæte òmæpocä inte botō miñæ ponte guiite quëwenguingää, angantapa.

²⁵ Cämeyo iñōmō guiyangä ingampa diyæ daagō guiyampite pædæ tacää. Ìninqe cämeyo pædæ tadämaï ingä bai nē ëacä iñōmō adobai ingampa. Tōmengä nämä ayongä ñænængä inongä inte edæ æbänō cæte Wængonguï Awënë Odeye nempo do wäänë guiite quëwenguingää.

²⁶ Mänōmäinō ante Itota apænecä ëñëninque nē ëñënäni wæætë,

–Ìñæmpa mänōmaï i Ìninqe æcänō wäänë guiite quëwenguingää.

²⁷ Ante wæyönänite,

–Waomini mïni, Ædō cæte cæquïi, ante mïni wædō incæ Wængonguï iñōmō do cæcampa, ante Itota apænecä.

²⁸ Ëñente wædinqe Pegodo,

–Awënë ëñëmi. Mōnitō ëadincoo owæ caate bitō miñæ tee empo pōmōni abipa.

²⁹ Äñongante Itota tōmënäni inänite wæætë,

–Mïnitō näwangä oncodo tao godinque mïnitō nänōogængä ingante mïnitō tōniñadäni inänite wæmpoda ìnate wëñænäni inänite ëmō cæte botō miñæ pōmïnitapa. Ìninqe ìmaï ante näwangä ämopa. Æcänō Wængonguï Awënë Odeye beyænque botō miñæ mänōmaï pōna iñōmō, ³⁰ tōmengä iñōmō inguipoga quëwëninque nänō ëmō cædincoo adopocoo æninque ayæ wæætë godōmenque nanguï æncæcäimpa. Ayæ ìncayæ ate öönædë godinque edæ tōmengä cōwë wantæpiyæ wænänmaï quëwencæcäimpa, ante ämo ëñëmaimïnipa, angacäimpa.

Itota, Wæncæboimpa, ante wæætë adodō ante apænecä

(Mäateo 20.17-19; Mäadoco 10.32-34)

³¹ Äninqe tōmengä miñæ, Dote, ante näni gocabo inänite Itota nänënë ænte mäocä goyönäni ìmaï ante apænecantapa. “Ñowo iñōmō mōnō edæ Eedotadëe iñōmō æicäimpa. Wængonguï beyæ nē apænegainäni ìmäinō ante yewæmōninque, Nē Waocä ìncayæ ate ëñate pæcä adinque tōmengä ingante æbänō cæquinänii, ante yewæmongadänimpa. Ñowo mōnō Eedotadëe iñōmō æi pō gongæmō ate edæ mäninō dodäni näni angainō bai edæ do ìnque bacæimpa. ³² Botō edæ mänimodō ëñagalmo iñōmote odeoidi botō ìmote ö æninque wadäni inänite pædæ mào godōnäni ö æninque tōmënäni wæætë tawimæ botonga towæ tänongadinque botō ìmote badete todinque pïninque wïwa anguinäni inänipa. ³³ Ayæ æmontaimenca tæi tæi pänäni ämgate wæyōmote botō ìmote godōmenque wænönäni wæncæboimpa. Wæætë mëonaa go adoönæque iñonte edæ botō do wænimo inte edæ näni òmæmonte wæætë quëwencæboimpa,” angantapa.

³⁴ Tōmengä miñæ nē godäni iñōmō mäninō, Tōmengä æbänō bate wæquingää, ante adodeque incæ edæ ëñënämaï ingadänimpa. Tōmengä nänō apænedō edæ wë wodonte bai iñonte tōmënäni öñōmoncaque ëñëninque, Æbänō ante apænecää, ante wïi edonque ëñënanitapa.

Itota angä ate babetamongä ìningä incæ do waa acampa

(Mäateo 20.29-34; Mäadoco 10.46-52)

³⁵ Itota mäninö godinque Eedicoo iñömö obo pöñongä onguinängä babetamö inte nē wædongä inte taadö wedeca, Pönömi æmoe, ante äncönongäimpa. ³⁶ Nangui Inäni cægönäni eñëninque babetamongä iñömö, Quinante cægönäni, ante wæyongante, ³⁷ Itota Näatadeta quëwëningä inte edæ ñowo wodo tebæ gocampa, ante apænedäni. ³⁸ Eñëninque tömengä iñömö aa pedinque,

—Itota eñëmi. Bitö Awënë Dabii wodi pæimi inömi inte botö wædö ante edæ ñowo waadete pönö waa cæe.

³⁹ Äñongante täno godäni wæætë tömengä ingante, Apocænë inguënë änewëë, ante wææ äñönäni tömengä godömenque nangui äninque,

—Awënë Dabii pæimi inömi inte edæ botö wædö ante pönö waadete waa cæe, ante wæcä.

⁴⁰ Wædinque Itota næ gongæninque, Tömengä ingante ænte mämömini pongæädäni. Angä obo ænte mämönäni pöñongante Itota,

⁴¹ —Ebanö ante ämii. Bitö beyæ quinä cæquimoo.

Äñongante,

—Awënë, wëenë botö emongaï bai cæbi acæboimpa.

⁴² Angä eñëninque Itota wæætë,

—Wëenë bitö emongaï bai abäwe. Edæ wede pönëmi inte edæ waa bamömpa.

⁴³ Ante nanö äñedë nē babetamöningä do waa bamöninque Itota miñæ godinque Wængongui ingante, Bitö ñäö apäite bai emömi inte edæ waa cæbi æmopa, ante togacäimpa. Mänömaï cæcä adinque tömänäni adobaï Wængongui ingante waa adinque, Bitö ñäö bai emömi inte waa cæbipa, ante togadänimpa.

19

Itota tönö Taqueo

¹ Itota mänii Eedicoo pöninque tæcæ wodo tebæ gocä ingantapa.

² Mäniñömö adocanque Taqueo näni änongä iñömö tömengä odömäno awënë beyæ nē ænäni awënë inongä inte nangui mäincoo ëadongä inongäimpa.

³ Tömengä ñowo, Itota æcänö ingäa, ante acæte ante ponte ayongä wadäni nangui Inäni wææ ongönäni adinque, Botö ocäa pöni inömo inte edæ Itota ingante ædö cæte aquimoo, ante wæcantapa. ⁴ Adämaï inte wæyongante wadäni, Itota iñö gämænö pö wodo tebæ goquingä, ante tededäni eñëninque tömengä Itota ingante acæte ante pogodo täno gote awäa ticämodöwäa näni äwäa daëwa æi næ gongænte a ongongantapa. ⁵ Itota obo pöninque æmö ayongä Taqueo a ongongä adinque tömengä ingante,

—Taqueo, quingæ wææe. Ñowoönæ edæ pö bitö oncönë eñäquënëmo imopa.

⁶ Angä eñëninque Taqueo quingæ wææ ti wææninque, Ao, botö oncönë waa poncæbiimpa, ante watapæ toдинque edæ tömengä oncönë mämongä pongacäimpa. ⁷ Itota mänömaï cæcä adinque wadäni, Æ nē wiwa cæcä weca Itota quimæ eñacæ gocäa, ante tömänäni piinte tedegadänimpa. ⁸ Taqueo iñömö edæ tömënäni ayönäni ængæ gantite adiyæ ongöninque mönö Awënë ingante,

—Awënë eñëmi. Botö mäincoo tæcæguedencoo pä cædinque ömæpodäni inte wæwënäni Inänite ñowo godömo ænäni æe. Ayæ botö wacä qui ante babæ äninque ö æmo wæcä ininque wëenëñedë botö ö ænincoo adopocoo bai incæ godömenque mempoga go mempoga godömo æncæcäimpa.

⁹ Ante apænecä eñëningue Itota wadäni inänite apænedinque,
 –Taqueo adobaï Abadaö wodi pæingä inongante botö nê æmo inömo inte
 tömengä oncönë nani owocabo quëwencædänimpa, ante ñwoönæ pontabopa.
¹⁰ Botö Waobo eñagaïmo inömö æmo beyænque quëwencædänimpa, ante
 cædinque wê womonte bai inäni inänite diqui diqui mincæ pontabopa, ante
 Itota apænegacäimpa.

*Mïnata nani godonte cëinta ante odömongampa
 (Mäateo 25.14-30)*

¹¹ Mänömaï apænecä eñënanï inte tömënäni, Itota Eedotadëë obo
 pongampa, ante adinque, Wængonguï Awënë Odeye nempo mönö oo
 pönï quëwenguinque impa, ante pönente edæ oda cædänitapa. Inique Itota,
 Wængonguï Awënë æbänö cæqingäa, ante eñencædänimpa, ante imæca
 quëwënäni nani cæinö ante odömöningue apænecantapa.

¹² Iimainö ante apænecantapa. “Waucä adocanque awënë odeye pæingä
 inongä inte, Botö gobæ wabæca gote imæca pancabaa awënë odeye bate
 põmoedäni. ¹³ Änninge tömengä ingante nê cædäni diete ganca inäni inänite
 äñete pönäni ate tömengä oodo mïnata nani äinta wantæpiyæ cæte nani
 æinta incæ æninque adocanque ingante adotaque pædæ wacä ingante ado-
 taque pædæ godöningue tömänäni inänite godongä adopota adopota ænänipa.
 ‘Minitö mäninta æninque godonte æï godonte æï cædinque, Yebængæmpa,
 ante botö gote pompoga cæedäni.’ ¹⁴ Ante wadæ gocä adinque tömengä
 nempo quëwënäni guiquënë tömengä ingante piunte cædinque pancadäniya
 inänite äninque, Minitö tömengä miñæ godinque awënëidi inänite gode äninque,
 Mäningä inömö wïi mönitö awënë odeye bacæcäimpa, ante wææ ämïni
 eñencædänimpa, ante da godönäni godänitapa,” ante apænedinque Itota ayæ
 godömenque apænecantapa.

¹⁵ “Incæte awënëidi do änäni ate awënë odeye badinque tömengä ömæ
 pongantapa. Pöninque tömengä, Botö beyæ nê cædäni inömö godonte æï
 godonte æï cædinque æbänö godömenque nanguï edæ ænte mänänii, ante
 acæte ante cædinque, Botö oodo mïnata nê æninäni inänite äñete põedäni, angä.

¹⁶ Äñete pönäni ate tömengä weca täno põningä inömö, ‘Awënë eñëmi. Bitö
 oodo mïnata adotaque incæ önompo tipæmpoga mänimpota edæ ñowo yebænte
 bapa.’ ¹⁷ Ante apænecä eñëningue tömengä ingante, ‘Botö imote nê cæbi imi
 waa cæbi æmpoga. Wædænque incæ ænimi inte bitö ædæmö aate cæbipa,
 ante adinque botö önompo tipæmpoga nani quëwëñömö quëwënäni inönänite
 bitö nempo pönömo æninque nê ämi inte aabi æmoe.’ ¹⁸ Ante tömënäni
 awënë angä ate ayængä pöninque, ‘Awënë eñëmi. Bitö oodo mïnata adotaque
 incæ önompo æmæmpoque mänimpota ñowo yebænte bapa.’ ¹⁹ Ante apænecä
 eñëningue tömengä ingante adobaï apænedinque, ‘Önompo æmæmpoque nani
 quëwëñömö quëwënäni inönänite botö bitö nempo godömo ænte aabi æmoe,’
 angantapa,” ante Itota apænecantapa.

²⁰ Ayæ godömenque apænedinque Itota, “Awënë angä ate tömengä guiquënë
 pöninque, ‘Awënë eñëmi, tömëmi mïnata æe. Botö weocodë ædæmö wïni
 caadinque wææ aate mantabopa. ²¹ Äninque, Bitö wïi bitö ñönönï incæ
 wacä ñönönï incæ ö ænte mämi awædö. Ayæ wïi bitö mïmi pæ incæ wacä
 mingä pædi incæ tä pebi imipa, ante pönente wædinque cætäbopa. Bitö tæëmö
 inömi imipa, ante guñente wædinque botö oodo mïnata botö æninta wïni
 caapote weocodë ædæmö wææ aabo ae.’ ²² Äñongante tömengä awënë inömö,
 ‘Inæmpa bitö nê wïwa cæbi imi nämä bitö tededö beyænque bitö imite apænte

ancæboimpa. Botō tæēmō imo inte wīi botō ñōnōni incæ wacā ñōnōni incæ ò æmopa. Wīi botō mīmo pædi incæ wacā mingā pædi incæ edæ do tā pebo imopa. Mānōmaī impa, ante bitō dicæ ēñēnāmaī imitawogaa. ²³ Do ēñēnīmi inte bitō ēñēnte edæ cæquēnēmi imitapa tōō. Botō oodo mīnata godonte æinta æninque edæ nē godonte ænāni weca baanco weca quīnante wīi guidonte æmitawo. Mānōmaī cæbi bai botō ocæ ēmænte pōninque edæ botō quī do æninque wadāni nāni guidōninta tōnō edæ do æncædōmoimpa tōō, angampa.”

²⁴ “Æninque godongāmæ ongōnāni īnānite awēnē apænecantapa. ‘Mīnitō ñōwo īngā mīnata nānō nææninnta ò æninque edæ mīnata ònompō tipæmpoga nē næængā ingante pædæ godōmīni æncæcāimpa.’ ²⁵ Angā ēñēninque tōmēnāni, ‘Awēnē īñæmpa, īngā diete ganca mīnata do mangā apa āmīi.’

²⁶ Ante wæyōnāni awēnē wæætē, ‘Īñæmpa nē ēadāni īnānite tōmānāni īnānite godōmenque godonte īngæimpa. Wæætē edæ ēadāmaī inte òmæpocā īngā guīquēnē tōmēngā nānō ēadīncoo wædænque pōni ī incæte edæ ò ænte dæ ða wæcæcāimpa. Ante apænebo ēñēmaīmīnīpa. ²⁷ Ayæ botō imote nē pīnāni guīquēnē botō imotedō ante apænedīnque, Bitō wīi mōnitō awēnē odeye bacæcāimpa, ante nē Baa ānāni guīquēnē, tōmēnāni īnānite botō weca ænte pōninque botō ayōmo wænōmīni wæncædānīpa, āmopa, awēnē angantapa. Māninque ante odōmonte apænebopa,” ante Itota apænegacāimpa.

Eedotadēē īñōmō Itota pongampa

(Māateo 21.1-11; Māadoco 11.1-11; Wāō 12.12-19)

²⁸ Māninganca apænedīnque Itota Eedotadēē æicæte ante tāno gocantapa. ²⁹ Godīnque Odibowænquīdi nāni anquīdi ontacāmō goīnō Betapaguee nāni quēwēñōmō obo pōninque Betānia ganca pōninque Itota tōmēngā mīñæ nē goda mēnaa īnate da godōninque, ³⁰ īmaī angantapa.

—Mānīi nāni quēwēñōmō ongō amīna. Tōmēñōmō go guīte ayōmīna bodo wē picængā incæ waocā ingante mongænāmaī īningā inte ñāni ñæīngā a ongongā acāmīnāimpa. Adīnque ñī cæyænte ænte pōeda. ³¹ Ayæ wacā mīnatō īmīnate, Quīnante ñī cæyæmīnaa, ante wææ angā īninque mīnatō wæætē, Mōnō Awēnē nānō ænguēnēnō ante æmōnāpa, ante apæneeda, angantapa.

³² Tōmēngā nānō nē da godōna wadæ gote ayōna Itota nānō āni bai bodo wē a ongō. ³³ Adīnque ñī cæyæñōna bodo wē nē ēadāni tōmēna īnate,

—Bodo wē quīmæ ñī cæyæwēmīnaa.

³⁴ Wææ āñōnānite tōmēna wæætē,

—Mōnō Awēnē nānō ænguēnēnō ante æmōnāpa.

³⁵ Ante āna ēñēninque Ao ānāni īninque awæ ñā cæyæñōmō ñī cæyænte bodo ingante tōi tōi ænte pōnatapa. Ayæ ænte pōninque tōmēna weocoo yabæcooque æidāmæ wo cæyabædīnque āna ate Itota wænōmēnæca īnō æi tæ contate gocantapa. ³⁶ Bodoga æi tæ contate taadonque goyongā tōmēngā nānō goquīnō ante waodāni weocoo wæænō bee podōwadānīpa. ³⁷ Odibowænquīdi wæænōmēmō īñōmō pōnōmenque pōñongante tōmēngā mīñæ nē godāni godongāmæ nāni poncabo tōmānāni īñontobæ nanguī todīnque ogæ tedēdānīpa. Itota bamōnengæ nanguī cæcā atamōnīpa, ante nāni adīnō ante pōnēninque Wængonguī ingante waa ate apænedānīpa.

³⁸ —Mōni quēwēnguīnque impa, ante, Badogaa, ante tomōnīpa. Awēnē Wængonguī ēmōwo beyænque pōmi īninque bitō toquinque edæ Wængonguī bitō imite waa cæcæcāimpa. Ōōnædē nē quēwēngā pōnō piyænē cæcānō ænguēnē. Æibæ pōni quēwēnongā īñōmō ñāō bai ēmongānō ænguēnē. ³⁹ Ante nanguī īnāni godongāmæ godīnque āmotamīni ante bai āñōnāni pancadāniya Paditeoidi īnōnāni inte Itota ingante,

—Nē Odōmōmi ēñēmi. Bitō miñæ nē godāni inānite wææ āmi apocæne inānie.

⁴⁰ Añōnānite tōmengā wæætē,

—Mīnitō imīnite nāwangā āmopa. Waodāni pæ wēenedāni inique dicacoo incæ botō imote waa ate baī edæ yedæ āmainānīpa, ante Itota apænegacāmpa.

⁴¹ Ayæ pōnōmenque pōnīnque Eedotadēē gomō adīnque Itota māniñōmō quēwēnāni inānite ante pōnēnīnque Ca ca wædinque, ⁴² iīmāi angantapa. “Mīnitō iñōmō edæ ñōwoōnæ mīni gānē pōnenguīnque botō imote edonque pōnī adīnque Ao āmīni baī waa incædōnīmpa. Incæte mīnitō, Æbānō cæte gānē pōnenguīmōō, ante edæ wē wodonte baī i inique mīnitō adāmaī imīnīpa. ⁴³ Incayæ ate mīnitō imīnite nē pīnāni incæ mīnitō wææ cæinca gānē pōnō tee mongate godāmæ wææ ongōnāni adīnque mīnitō edæ ædō cæte tao wodii wīnonguīmīnīi. ⁴⁴ Botō mīnitō weca pōmo incæte mīnitō awīncaque adīnque, Wængonguī ñōwoōnæ ponte æncæcāmpa, ante dica amīniyaa. Mānōmaī beyænque nē pīnāni iñōmō mīnitō imīnite bæ tadāni tæ go wææñōmīnīte wænōnāni wæncæmīnīmpa. Ayæ wēñænāni wææ cæte iñōmō quēwēñōnānīte tōmēnāni inānite edæ wænōnāni wæncædānīmpa. Dica mīni mænongainca incæ bæ tadāni ate dica adocaque incæ wænōmēnæca iñō ongōnāmaī ingæīmpa,” ante Itota apænegacāmpa.

*Wængonguī oncō tæiyæ waēmō bacæīmpa, ante cæcampa
(Māateo 21.12-17; Māadoco 11.15-19; Wāō 2.13-22)*

⁴⁵ Ayæ Wængonguī oncō ñænæncōnē yabæcōnē go guīdīnque Itota māniñōmō nē godonte æncæte ante nē mānāni inānite da tadongā tao goyōnānīte, ⁴⁶ Ayæ tōmēnāni inānite angantapa.

—Wængonguī beyæ iīmānō ante yewæmongatīmpa. “Waodāni botō oncōnē pō guīdīnque botō imote apænecædānīmpa,” ante Wængonguī angā incæte mīnitō wēnæ wēnæ cæmīni beyænque Wængonguī oncō incæ nē awēmō ō ænāni nāni womōincōnē baī wentamō bapa tōō.

⁴⁷ Ayæ iīmō iñō iīmō iñō Wængonguī oncō ñænæncōnē yabæcōnē go guīdīnque Itota odōmonte apænecā ēñēnānīta. Māniñōmō, Wængonguī quī, ante nē godōnāni ñænænāni tōnō nē odōmōnāni tōnō tōmēnāni awēñēdi guīquēnē, Itota ingante wænonte wido cæcæīmpa, ante ancaa cæyōnāni, ⁴⁸ wadāni tōmānāni, Tōmengā æbānō odōmongāā, ante ēñēē cōnāni adīnque awēñēdi wæætē, Tōmengā ingante mōnō ædō cæte wido cæquīi, ante wædinque ñīmpo cægadānīmpa.

20

*Awēñē imīpa, ante æcānō ānāi, ante Itota ingante ānānīpa
(Māateo 21.23-27; Māadoco 11.27-33)*

¹ Incayæ ate Itota Wængonguī oncō ñænæncōnē yabæcōnē go guīte waodāni inānite odōmonte apænedīnque Wængonguī Awēñē ingantedō ante watapæ apænecā ēñēnānīta. Apænecā ēñēñōnāni, Wængonguī quī, ante nē godōnāni ñænænāni tōnō nē odōmōnāni iñōmō nē aadāni nāni Picæncabo tōnō tōmengā weca ponte ānānīta. ² Ponte apænedīnque,

—Æcānō nē angā inte bitō imīte angā cæbīi. Bitō imīte æcānō, Nē āmi babīpa, āna ēñēnīnque cæbīi.

³ Ante añōnānīte Itota,

—Botō wæætē mīnitō imīnite āmo ēñente apænemīni ēñēmoedāni. ⁴ Wāō wodi iñōmō quīnante æpænē guidongantawo, ante pōnēmīni. Ōōnædē nē

owocā angā ēñente cæcantawoo. Waodānique ānāni ēñente cæcantawoo. Æbānō ante pōnēmīni. Mīnitō wæætē apænemīni ēñēmoedāni.

⁵ Āñongā tōmēnāni iñōmō nāni caboque tededingue, “Iñæmpa mōnō, Wængonguī oōnædē inō angā Wāō ēñente cæcampa, āmō bai Itota wæætē, ‘Quīnante tōmengā ingante pōnēnāmaī iīmīni,’ ante mōnō īmonte pīincædongāimpa. ⁶ Ayæ wæætē, Waodānique ānāni ēñente cægacāimpa, āmō bai godongāmæ ongōnāni iñōmō, Wængonguī beyæ nē apænecā Wāō wodi ingacāimpa, ante nē pōnēnāni inte tōmānāni mōnō īmonte dicacā tacadāni wæncædōmōimpa.”

⁷ Ante pōnente wædinque tōmēnāni wæætē Itota ingante, Wa. Æcāmē angā ēñēningue Wāō wodi cægacāi, ante ēñēnāmaī īmōnīpa, ānāni. ⁸ Wædinque Itota wæætē,

—Botō adobai, Æcānō nē angā inte pōnō āna ēñēningue botō mānōmaī cæboo, ante mīnitō īmīnite apænedāmaī incæboimpa, angacāimpa.

*Nē aadāni inguēnēnāni incæ wīwa cædānīpa, ante
(Māateo 21.33-44; Māadoco 12.1-11)*

⁹ Ayæ godongāmæ ongōnāni inānite Itota, Wængonguī Awēnē æbānō cæcāā, ante ēñencædānīpa, ante īmæca quēwēnāni nāni cæinō ante odōmōningue iīmaī apænecantapa. “Onguīñængā adocanque yowementacodē mīnte pæyonte wadāni omæ wite aate nē tā pedāni inānite, Botō yowementacodē incæ omæ wite aadedāni. Aayōmīnite botō, Mīnitō quī, ante pancamonga pōnōmo æncæmīnīpa, angā Ao ānāni ate nē ēacā iñōmō edæ wantæpiyæ wabæca quēwēncæ gocantapa. ¹⁰ Yowedepo iñque bayedē nē cæcā ingante nē ēacā iñōmō, Bitō yowementacodē nē aadāni weca godingue pancamonga āni ænīnque botō weca wæætē māmōmi æmoe, angā. Gote pongā adīnque yowementacodē nē aadāni guīquēnē nē æncæ pōningā ingante bæi ongonte tæi tæi pānīnque da tadōnāni omæpocā inte gocantapa. ¹¹ Ayæ wæætē nē ēacā iñōmō wacā tōmengā ingante nē cæcā ingante angā gote pongā adīnque yowementacodē nē aadāni adobai tæi tæi pānāni wæyongante, Guingo īmonte wæcæcāimpa, ante godō wīwa cædāni wæyongante da tadōnāni omæpocā inte gocampa. ¹² Ayæ mēnaa īnate da godongā omæpoda pōna adīnque nē ēacā iñōmō wacā nē cæcā ingante angā gote pōñongante tōmēnāni godō mæ yete wido cædānīpa,” ante odōmōningue Itota godōmenque apænecantapa.

¹³ “Mānōmaī cædānīpa, ante ēñente wædinque yowementacodē nē ēacā iñōmō, ‘Botō iñōmō æbānō cæquēnēmo īmoo, ante wædinque, Botō edæ iīmaī cæcæboimpa. Botō wengā onguīñængā botō nē waadecā iñongante da godōmo gocæcāimpa. Tōmēmo wengā da godōmo gocā adīnque tōmēnāni wabānō guīñente wædinque ee abainānīpa,’ ante pōnēningue da godongā. ¹⁴ Gote dicæ pongā adīnque yowementacodē nē aadāni guīquēnē, ‘Tōmengā ingampa. Wæmpocā māincoo iñi edæ iñgā iñōmō nē ænguingā ingampa cæmōō. Mōnō edæ māo wænōmō wængā ate edæ mōnō quī babaiimpa.’ ¹⁵ Ānewēningue tōmēnāni tōmengā ingante wææ cæte iñōmō yabæque wido cædinque godōmenque wænōnāni wængantapa.”

Ante Itota, Māningue ante apænebopa, ante tōmēnāni inānite angantapa. “Mānōmaī cædāni adīnque yowementacodē nē ēacā iñōmō tōmēnāni inānite æbānō cæquingāā, ante pōnēmīni. ¹⁶ Tōmengā edæ do pōnīnque nē aacquēnēnāni inānite godō wænōnīnque wadāni inānite wæætē yowementacodē godongā ænīnque nē aadāni bacædānīpa.”

Itota mānōmaī angā ēñente wædinque godongāmæ ongōnāni iñōmō,
—Mānōmaī cædāmaī inguēnē ānewē, ante wædānīpa.

17 Ìinque Itota tòmènanì Ìnànìte gomò adinque,

–Ìñæmpa èñènámaì cæmìni Ìñòmìnìte Wængonguì pánámaì inguingää, ante pònèmìnìtawo. Ìinque mìnìtò, Ììmaì ante quínante yewæmongatimpa, ante pònèmìni.

“Dica ænte adinque, Wènæ wènæ inca, ante nè mænönàni nàni wido cædinca incæ

gomonga waèmonca inca Ìinque tåno nàni ñönöncinca bæbængapa do bacapa,” ante yewæmongadänimpa. 18 Botò Ìñòmò mánìi dica waèmonca bai Ìnòmo Ìntè åmo èñèninque nè wæcå Ìñòmò tòmengå Ìñòmò mánincaa tæ go wæænínque tobænte wæte bai botò önöwa gånè ædæ wææncæcåimpa. Wæætè æcånö ingante Wængonguì piinte mánincaca tacacå Ìnaa tòmengå guiquènè quìemè bai yaintai bai goquingånö anguènè, ante pònèmìniyaa, ante Itota apænægacåimpa.

19 Ante nè aaquènènanì nàni cæinö ante odömönínque Itota apænecå èñente wædinque nè odömönàni tönö, Wængonguì quì, ante nè godönàni ñænænàni Ìñòmò, Ìñæmpa mõnò Ìmonte piinte angå awædö, ante pònènanìtapa. Ìinque tòmènanì, Mönö ñöwo pönì tòmengå ingante bæi ongongæimpa, ante cædånìtapa. Incæte tæcæ bæi ongongæ cædinque, Wadåni piünàni wæcæ wæ, ante wædinque ee adånìtapa.

*Tæiyæ Awènè nånö åintamö ante tededånipa
(Måateo 22.15-22; Måadoco 12.13-17)*

20 Ìinque, Mönö Itota ingante bæi ongönínque odömånö gobedönadodo awènè nempo godömö æninque tòmengå wæætè nè angå Ìntè edæ Itota ingante apænte ancæcåimpa, ante ñænænàni incæ tòmengå ingante cöwå adånìtapa. Ayæ wadåni Ìnànìte åninque, Mìnìtò Itota mìnæ tee empote gote nõingå ante bai apænedínque wæætè babæ cædånì. Babæ cæmìni beyæ tòmengå adodeque incæ wapiticæ tedecå èñèninque mìnìtò ocæ èmænte ponte apænemìni èñencæmönimpa, ånàni èñente godínque ñænænàni nàni ånìnö bai babæ cædånìtapa. 21 Ìinque ñænænàni nàni nè da godönìnanì Ìñòmö Itota weca pönínque,

–Awènè nè Odömömi èñèmi. Bitö apænedö nõ impa, ante do èñèmönipa. Bitö ayömi mõnö waocabo adoyömö pönì Ìmönipa, ante adinque bitö tømãmöni Ìmönìte adoyömö pönì cæbi æmönipa. Ayæ, Wængonguì taadö ante bitö nõ pönì odömömi Ìmpa, ante èñèmönipa. 22 Ìinque apænèbi èñèmönii. Odömånö gobiedöno beyæ ante tæiyæ awènè Tetædo tìguitamö nånö ånintamö ante æbånö wææ yewæmonte ì, ante èñencæte ante wæmönipa edæ. Godonte edæ waa cæte Ìntawo. Wæætè wènæ wènæ cæte Ìntawo.

23 Åñönånìte Itota Ìñòmö, Tömènanì wènæ wènæ ancæte ante babæ cædånìpa, ante do èñente wædinque,

24 –Deénadio tìguitamö odömömi aboedånì. Æcånö awinca bai yewæmonte badonte ì. Æcånö èmöwo ante yewæmonte ongö, ante edæ apænemìni èñèmoedånì.

Åñongante,

–Awènè Tetædo awinca bai yewæmonte badonte impa. Adocå èmöwo ante yewæmonte ongö amönipa.

25 Ante apænedånì èñèninque,

–Awènè Tetædo quì ì Ìinque edæ Tetædo ingante godongæimpa. Wæætè Awènè Wængonguì quì ì Ìinque Wængonguì ingante godonguì ì apa ånewèmìni.

²⁶ Ante Itota tōmānāni ayōnānite nō apæneçā ēñente wædinque ñænænāni nāni da pōnōnāni wæætē, Mōnō ædō cæte piinguī, ante guingo imonte wædinque pæ wēnegadānimpa.

Ædō cæte ñāni òmæmonguī, ante wædānipa

(Māateo 22.23-33; Māadoco 12.18-27)

²⁷ Tadoteoidi nē, Waocā wæninque ñāni òmæmōnāmaī æmæwo wængampa, ante nē ānewēnāni inte Itota weca pōninque, Mōni ānō ante apænebi ēñēmaīmōnipa, ānānitapa.

²⁸ —Awēnē nē Odōmōmi ēñēmi. Mōnō beyæ ante Mōitee wodi iīmaī ante wææ yewæmongacāimpa. Onguiñængā monte ate wēñæ tapæidāmaī inte wængā iīnque tōmengā tōniñacā incæ owæmpoingā ingante mōninque, Botō tōniñacā wodi wēnāni wæætē pæcædānimpa, ante tapæicæcāimpa, ante yewæmongacāimpa. ²⁹ Iīnque wadāni iīmaī cædānitapa, ante apænemōni ēñēe. Edæ ònpoque æmæmpoque go mengāa nāni caipæ iñōnānite bamoncadengā mōninque wēñæ tapæidāmaī manguiwēninque edæ nāñe wængā. ³⁰ Ate ayæmengā wææ adocā ingante mōninque wēñæ tapæidāmaī inte nāñe wængā. ³¹ Ayæ wææ wacā mōninque adobaī nāñe wængā, ayæ wææ wacā mōninque nāñe wængā, ayæ wææ wacā mōninque nāñe wængā. ³² Ate onquiyængā tōmangā nāñe wængā. ³³ Iīnque, Mōnō ñāni òmæmonguiōnæ, ante mīni āōnæ iñonte māningā owæmpoingā iñōmō æcānō nānōogængā baquingāā. Edæ tōmengā ingante iñōmō edæ tōmānāni manguiwengadānimpa.

³⁴ *Āñōnānite Itota,*

—Inguipoga quēwēninque edæ mīni waocabo iñōmō do mōmīnipa. Wacā ingante do godō ñānōmīni mongampa. ³⁵ Wæætē, Mīnguipoga bayonte iīnānique eyepæ inte ñāni òmæmonte oōnædē æite quēwencædānimpa, ante Wængonguī nānō nē angaiñāni iñōmō tōmēnāni mōnāmaī iīnque wadāni iñānite godō ñānōnāmaī incædānimpa. ³⁶ Ayæ Wængonguī anquedoidi bai iñōnāni inte tōmēnāni Wængonguī nānō nē angaiñāni iñōmō ædō cæte wæætē wænguīnāni. Tōmēnāni nē ñāni òmæmongaiñāni iñōnāni inte edæ Wængonguī wēñænāni iñānipa. ³⁷ Wæætē Mōitee wodi incæ ocāñeque bæcoīñeque ante nānō yewæmongainta adotaa yewæmōninque, Waodāni dobæ ñāni òmæmonte quēwencædānimpa, ante edonque odōmongacāimpa. Tōmengā iīmaī ante yewæmongacāimpa. Mōnō Awēnē inongā iñōmō Abadāo Wængonguī ingaingā inte ayæ Itæca Wængonguī ingaingā inte adocā Acabobo wodi Wængonguī ingānō angūenē, ante yewæmongacāimpa. ³⁸ Iñāmpa Wængonguī iñōmō nē quēwēnāni Wængonguī inongā inte tōmengā nē wængaiñāni Wængonguī ināmaī ingampa. Wæætē tōmengā ayongante do wængaiñāni incæ tōmānāni mīñāni quēwēnānipa.

³⁹ Ante apæneyongante nē odōmōnāni pancadāniya,

—Awēnē nē Odōmōmi ēñēmi. Bitō nōingā ante apænebi awædō, ante apænedānitapa.

⁴⁰ Ayæ wadāni tōmānāni guīñente wædinque godōmenque ānāmaī ingadānimpa.

Codito æcānō Pæingā inongā ingāā, ante

(Māateo 22.41-46; Māadoco 12.35-37)

⁴¹ Ayæ tōmēnāni iñānite Itota,

—Awënë Dabii wodi Pæingä ìnongä wææ Codito ingampa, ante quĩnante añānii, ante pönēmĩni, angantapa. ⁴² Ìñæmpa Dabii wodi incæ tõmengä nānõ ãmotamĩni ãintaa Ìĩmaĩ ante yewæmongacãĩmpa.

“Botõ Awënë ingante apænedĩnque Awënë Wængonguĩ incæ Ìĩmaĩ ante apænegacãĩmpa.

Bitõ botõ tõmëmæ ìnõ tæ contate a ongõe.

⁴³ Ongõõomite botõ bitõ ìmite nẽ pĩĩnāni ìnānite bæ tate cæbo ate, bitõ õnõwa gāānẽ ongõnāni ìnānite pinā gāwacæbiĩmpa,” ante Awënë Wængonguĩ apænegacãĩmpa.

⁴⁴ Codito nẽ Awënë ingampa, ante awënë Dabii wodi nānõ nẽ angaingä ìnongä inte edæ adocã Codito ìñõmõ ædõ cæte nāēmæ Awënë Dabii wodi Pæingä inguingā. ante pönenguēnẽ ānewēmĩnii, ante Itota angacãĩmpa.

Nẽ wææ odõmõnāni ìnānite Itota pĩingampa

(Māateo 23.1-36; Māadoco 12.38-40; Odoca 11.37-54)

⁴⁵ Ayæ tõmānāni ēñēẽ cõñõnānite tõmengä miñæ nẽ godāniquẽ ìnānite Itota apænegacãĩmpa.

⁴⁶ “Cædāmaĩ, ante wææ ante nāni yewæmongainta nẽ ate odõmõnāni ìnānite mĩnitõ gomõ aedāni. Tõmēnāni ìñõmõ doyæncoo wæẽmoncoo wēñate mongænte todānipa. Waodāni nāni godonte æĩñõmõ cægõñõnānite wadāni põ bee tēnĩnque tõmēnāni ìnānite, Nẽ odõmõmi, bitõ ìmite waa amõnipa, ante apænedāni ēñēnĩnque edæ nẽ odõmõnāni ìñõmõ nanguĩ todānipa. Ayæ tõmēnāni odõmõincõnẽ go guidĩnque tõmēnāni nāmanque ante pönēnĩnque wæẽmompaa põni tæ contate todānipa. Ayæ æēmæ becæ godĩnque tõmēnāni, Botõ tãno bete tocæĩmpa, ante wæẽmompaa põni tæ contate bete todānipa.

⁴⁷ Ayæ owæmpõĩnāni oncõ yo mongænte bai cædĩnque õ æwēnāni inte nẽ wææ odõmõnāni ìñõmõ, Botõ ìmote waa acædānĩmpa, ante cædĩnque Wængonguĩ ingante nõingä apænete bai cædĩnque babæ cædĩnque wantæpiyæ tededānipa. Tõmēnāni edæ nāni nanguĩ põni pante wæquinque mǎnõmaĩ nāmā beyænque ante cædānipa, ante adĩnque mĩnitõ ìñõmõ ee gomõ aedāni,” ante Itota wææ angacãĩmpa.

21

Owæmpõingä incæ, Wængonguĩ quĩ, ante godongampa

(Māadoco 12.41-44)

¹ Itota Wængonguĩ oncõnẽ ongonte gomõ ayongä nẽ nanguĩ ēadāni, Wængonguĩ quĩ, ante nāni wēnoncadedẽ põ daga daga wēnāni acantapa. ² Ayæ ayongä onquiyængä owæmpõingä õmæpocã inte õnontamonque mentamonga põ daga wengä. ³ Adĩnque Itota Ìĩmaĩ ante apænegacãĩmpa.

—Nāwangä ante apænebo ēñēedāni. Wadāni tõmānāni wædænque põni godonte bai wĩ eyepæ daga wēñõnāni ìngä owæmpõingä ìñõmõ õmæpocã inte wædongä incæte godõmenque nanguĩ godonte bai godongä abopa.

⁴ Tõmēnāni nanguĩ ēadāni ìnõnāni inte, Quēwenguinta ìmpa, ante cõ cædĩnque tõmēnāni nāni wĩ æĩnentaque ayæ ongõintaque godõnānipa. Ìngä õmæpocã ìngä guiquēnẽ tõmengä nānõ quēwenguinta incæ, Wængonguĩ quĩ bacæĩmpa, ante tõmanta edæ daga wengampa, ante Itota apænegacãĩmpa.

Wængonguĩ oncõ ñæñæncõ bæ tate bacæĩmpa, ante

(Māateo 24.1-2; Māadoco 13.1-2)

⁵ Wēñēñedẽ Wængonguĩ oncõ ñæñæncõ mæñõnĩnque wadāni dicacoo wæẽmoncoo põni tee bædāni waa ongõncadõmpa. Ayæ wacoo wæẽmoncoo põni ænte põnĩnque, Wængonguĩ quĩ ìmpa, ante pædæ godõnāni ongõnõmpa.

Ñöwo iñömö Itota miñæ nê godäni pancadäniya gomö ayönäni, Dicacoo tönö wadäni waa pöni nani ænte pönoncoo waëmoncoo pöni ongö amönipa, ante tededänitapa. Tedejönänite Itota,

⁶ —Mänincoo mini acoo incæ iincayæ ate tōmanca bæ tadäni wæænca adinque panguimæ panguimæ godinque dica adocaque pöni incæ wænömænæca ongönäma iingæimpa, ante apænecacäimpa.

Oo iinque bacæimpa, ante æbänö ate ëñenguü, ante (Mâteo 24.3-28; Mäadoco 13.3-23)

⁷ Mänöma i apænecä ëñëninque tōmënäni wæætë,

—Awënë nê Odömömi ëñëmi. Mänü bitö äninö ante æyedëno iinque baquü, ante ëñencæte ante wæmönipa. Ayæ, iima i cæbo ate minitö, Oo pöni impa, ante ëñencæminimpa, ante Wængongü æbänö mä cæquiringä, ante apænëbi ëñëmönie.

⁸ Äñönäni Itota, “Wapiticæ odömöñönäni minitö wæætë, Mönö oda cædäma iingæimpa, ante nämä wææ aedäni. Edæ iima i baquü i ataqeedäni. Wadäni nangü inäni ponte botö ëmowo ante apænedinque, ‘Coditobo imopa,’ ante babæ ante tedequinäni inäni. Ayæ, ‘Oo pöni impa,’ ante ponte nangü inäni tedequinäni inäni. Mänömainö ante ponte tedejönänite minitö wæætë tōmënäni miñæ tee empote godäma iimæwedäni. ⁹ Ayæ, Wabæca awënë tönö pö bee téninque wæætëdö wæætë cædapa, ante tededäni ëñencæminimpa. Ayæ, Adobæca quëwëninque incæ awënë ingante wido cæcæte ante ængæ gantidänipa, ante tededäni ëñëninque minitö iñömö edæ guñënäma iedäni. Mänöma i edæ täno cöwë bacæimpa. Incæte iinque baönæ botö äönæ æiquedö pongüü.”

¹⁰ Ante apænedinque Itota godömenque apænecantapa. “Adobæca quëwëñäni iñönäni wabæca quëwëñäni ponte bee téninque guëadö guëca cæquinäni inäni. Adobæca awënë odeye nempo quëwëñönänite wabæca awënë odeye nempo quëwëñäni mämö bee téninque guëadö guëca cæte wænonte wængüñäni inäni. ¹¹ Ayæ wayömö wayömö goinque nangü pöni ocæ ocæ cæcæimpa. Ayæ waodäni nani cæinente wængüinque cængü incæ tömä capo wængæimpa. Ayæ quingæ nani wodonte wënæ wënæ inte wængüimämo incæ edæ do pongæimpa. Edæ anca i nani guñënguimämo edæ pongæimpa. Öönädë iñömö nani wo go wo go cæwënguimämo edæ ate bai bacæimpa.”

¹² Ayæ apænedinque Itota, “Mänimämo nani guñënguimämo tömämämo ayæ pönäma i iñonte minitö iminite togænte yao ongonte tōmënäni odömöincönë ænte go guidingque apænte äninque minitö iminite mä tee mönecædänimpa. Ayæ botö ëmowo beyæ minitö iminite tömämæ awënëidi odeyeidi weca ayæ pancabaa awënëidi gobedönadodoidi weca ænte mäodäni gote gongæncæminimpa. ¹³ Minitö awënëidi weca godinque gongænte apænemini ëñëninque awënëidi incæ, Itota æcänö ingä, ante ëñencædänimpa.

¹⁴ Iinque minitö iminite awënëidi weca ayæ ænte godäma i iñedë incæ minitö iima i ante nämæneque pönëdäni. Botö awënë weca ongöninque æbänö ante wææ angüimoo, ante edæ wædäma i incæboimpa, ante piyænë cædäni.

¹⁵ Iñæmpa botö pönö nö apænëbo ëñënimini inte minitö wæætë adodö ante apænecæminimpa. Mänömainö ante apænemini ëñëninque nê piñäni guiquënë nö pöni mini apænëdö ante ædö cæte wido cæquinäni. Wæætëdö wæætë ædö cæte angüñäni. ¹⁶ Minitö mæmpoidi incæ minitö tönüñädäni incæ minitö guidëñäni incæ minitö æmigoidi incæ, iingä ingampa, ante godö odömöninque minitö iminite wadäni nempo pædæ godönäni ö æncædänimpa. Äninque pancaminiya iminite godömenque wænönäni wængüimini iminipa.

17 Ayæ, Coditoidi iminipææ, ante tōmānāni botō ēmōwo beyænque mīnitō imīnite nanguī piincædānimpa. 18 Incæte mīnitō baō incæ ocaguī incæ adoguinque incæ æmæwo ewēnāmaī ingæimpa. 19 Īnque mīnitō botō imote piināmaī inte wæntædāmaī inte ee cæmīni ĩnque botō æmo beyænque quēwencæmīnimpa.”

20 Ante apænedinque Itota godōmenque apænegacāimpa. “Wabæca ton-tadoidi pōninque Eedotadēē godongāmæ wææ ongōnāni adinque mīnitō, Bæ tate nāni wido cæquīmāmo oo pompa, ante do edæ ēñencæmīnimpa. 21 Mānōmaī cædāni adinque Oodeabæ quēwēmīni ĩñōmō ānanquidi do wodii wīnonte æibæwedāni. Ayæ Eedotadēē quēwēmīni ĩñōmō edæ yabæque taobæwedāni. Ayæ yabæque quēwēmīni inte Eedotadēē ĩñōmō pō guīdāmaī imæwedāni. 22 Māniñedē edæ Wængonguī nānō panguiōnæ incæ Wængonguī beyæ nāni yewæmonte angaiōnæ incæ ĩnque baquinō anguēnē. 23 Māniōnæ ĩnque bayedē edæ yædēmadā ĩnāni tōnō goomæ nē gānōnāni tōnō tōmēnāni nāni wæquīmāmo baquinō anguēnē. Īmæca quēwēnāni edæ māniñedē nanguī pōni caate wæquīnāni ĩnānipa. Īdægoidi ĩnānite edæ nanguī pōni piinte cæquinō anguēnē. 24 Pancadāniya ĩnānite yaēmenca wido tadāni wænguināni ĩnānipa. Ayæ pancadāniya ĩnānite bæi ongonte māo wabæca ænte goquināni ĩnānipa. Wængonguī doyedē apænedinque, Oodeo ĩnāmaī ĩnāni ĩnque nāni cæpoga cæcædānimpa, angacāimpa. Īnque tōmengā nānō angaimpoga ĩnque baganca oodeoidi ĩnāmaī ĩnāni incæ Eedotadēē ĩñōmō pōninque nanguī cægōninque piñā gāwate bai bæ tadāni wæquīmīni ĩmīnipa, ante apænebo ēñēmalmīnipa,” ante Itota apænegacāimpa.

Waobo ēñagaīmo inte botō ĩmaī ponte cæcæboimpa, ante (Māateo 24.29-35, 42-44; Māadoco 13.24-37)

25 Ayæ, “Oo pōni ĩmpa, ante edæ ēñencæmīnimpa, ante cædinque Wængonguī angā ate nænque tōnō apāicā nēmoncoo mā pōni edæ wacoo bai bacæimpa. Inguipoga guiquēnē ñænængade pōni gāwapæntibæ tadōmengadæ māngonta māngonta cædinque nanguī ā ēñente wædinque tōmāmæ quēwēnāni edæ, Æbānō cæquīmōō, ante edæ nanguī pōni guīñente wæquināni ĩnānipa. 26 Ayæ waodāni æmō ayōnāni ōnædē tæī ongongaincoo incæ wancæ wancæ cæte bai wapiticæ go ate adinque tōmēnāni ancaī guīñente wædinque, Inguipoga mōnō quēwēñōmō edæ quīēmē bai bacæimpa, ante wædinque ĩñontobæ nangæ bate wæcædānimpa. 27 Māniñedē edæ botō Waobo nē ēñagaīmo inte boguīmancodē pōninque tæī pōni piñæmo ĩnque edæ ñāō apāite bai waēmō ēmonte wææmo acædānimpa. 28 Īnque mānōmaī tæcæ ba ate wædinque mīnitō ocabo guīni æmencadinque, Badogaa, ānque edæ, Oo pōni mōnō abæ tawænte goquinque ĩmpa, ante āmæwedāni,” ante Itota apænegacāimpa.

29 Ayæ, Wængonguī Awēnē oo poncæcāimpa, ante æbānō ēñenguī, ante ēñencædānimpa, ante Itota ĩmæca quēwēnāni nāni cæinō ante odōmōninque ĩmaī apænecantapa. “Īgowæ aedāni. Ayæ quīwæmē incæ tōmāwæ aedāni. 30 Ōñabo tānā nā boca adinque mīnitō ĩñōmō, Ōñabo nānō bocainepo inte nænque nāwatedæm baquinque bocapa, ante pōnēninque edæ do ēñēmīnipa. 31 Ayæ adobai māniñō botō apænedō bai do edæ ba adinque mīnitō, Wængonguī Awēnē Odeye do odemō pōni ongōninque inguipoga oo poncæcāimpa, ante ēñencæmīnimpa,” angacāimpa.

32 Ayæ apænedinque Itota, “Nāwangā āmopa. Ñōwomīni mīimīni quēwēninque wænte godāmaī ĩñōmīni edæ māniñō botō āniñō bai tōmānō edæ do ĩnque baquinō anguēnē. 33 Edæ ōnædē ongōñōmō inguipoga tōnō

wo ewente bai dæ ba incæte botō angainonque guiquēnē dæ badāmaī inte edæ cōwē tæi ongongæimpa,” ante apænecantapa.

³⁴ Ayæ, “Minitō iñōmō edæ, Mōnō quingāmē bai wiwa quēwēmō iñique mōnō mīmō ōmædēmō bate wæcæ wæ, ante nāmā wææ aadāni. Tī nāmā bete quidi quidi dowāninque mīmō ōmædēmō bacæ wæ, ante nāmā wææ aadāni. Ayæ, Inguipoga quēwēmō inte quiēmē beyænque wædinque mīmō ōmædēmō bacæ wæ, ante nāmā wææ cæedāni. Mīmō ōmædēmō inte wæyōmonte māniōnæ wīi iñontobæ pō wæcæimpa, ante mīmō ōmædēmō badāmaī ingæimpa, ante nāmā wææ cæedāni. ³⁵ Iñæmpa waodāni tōmānāni inguipoga tōmāmæ quēwēñōnānite edæ iñontobæ ba wæcædānimpā. ³⁶ Iñique woyowotæ itadē cōwē wānō cōnīnque mīnitō Wængonguī ingante cōwē apæneedāni. Mīnitō, Māniñō iñique ba adīnque mōnō eyepæ inte aamō cæte wodi winongæimpa, ante Wængonguī ingante apæneedāni. Ayæ, Waocā nē ēñagaingā weca mōnō eyepæ gongængæimpa, ante adobai edæ Wængonguī ingante apæneedāni,” ante Itota angacæimpa.

³⁷ Itota māniñedē Wængonguī oncō ñænæncōnē iimō iñō iimō iñō yabæcōnē go guite odōmonte apæneca ēñēnāni ate tōmengā wæætē gāwadecæ iñō gāwadecæ iñō tao godīnque Odibowænquidi æite owodongæimpa. ³⁸ Ayæ tōmengā Wængonguī oncō ñænæncōnē yabæcōnē ongonte apæneca ēñencæte ante tōmānāni wæætē baānæ iñō pō baānæ iñō pō bee tēnōnānimpā.

22

Itota ingante bæi ongongæimpa, ante cædānīpa

(Māateo 26.1-5, 14-16; Māadoco 14.1-2, 10-11; Wāō 11.45-53)

¹ Pāō yedæ æmpoquī ōmæmō ī nāni cænguīōnæ ante oodeoidi, Patowa mōnō wodo pænta gogaīōnæ ææmæ oo pōni bacæimpa, ante cædōnānimpā.

² Wængonguī quī, ante nē godōnāni ñænæñāni tōnō nē odōmōnāni iñōmō, Itota ingante mōnō wido cæcæimpa, ante cōwē cædōnānimpā. Incæte, Wadāni pīlnāni wæcæ wæ, ante guīñente wædinque tōmēnāni māniñedē, Mōnō æbānō cæte awēmō bæi ongongæimpa, ante wægadānimpā.

³ Ayæ Itota miñæ nāni, Dote, ante gocabo iñōnāni Codaa Icadīote nāni ānongā adocā īnongæimpa. Tatāna māniñedē tōmengāa pō guīcantapa.

⁴ Iñique nē godōnāni ñænæñāni tōnō Wængonguī oncō nē wæ wānōnāni awēñēdi iñōmō godongāmæ ongōñōnāni Codaa tōmēnāni weca godīnque iimāi ante apænecantapa. Itota æyōmōnō ongongāa, ante botō æbānō odōmonte pædæ pōnōmo ate ænguīmīni. Angā ēñēninque tōmēnāni tōmengā tōnō māniñō ante godongāmæ tedegadānimpā. ⁵ Tōmengā, Odōmonte pædæ pōnōmo æncæmīnimpā, ante apæneyongante tōmēnāni nanguī todīnque wæætē, Tiguitamō padatamō pōnōmōni æncæbiimpā, ante apænedāni.

⁶ Ēñēninque tōmengā Ao ante wadæ godīnque, Wadāni adāmaī iñōnānite botō æbānō cæte iñāni īnānite awēmō odōmonte godōmo ænguīñāni, ante cōwā adīnque cægacæimpa.

Awēñē Itota pāō tōnō owæta godongā cænte bedānīpa

(Māateo 26.17-29; Māadoco 14.12-25; Wāō 13.21-30; 1 Coodintoidi 11.23-26)

⁷ Pāō yedæ æmpoquī ōmæmō ī nāni cænguīōnæ iñonte wodo pænta gogaīōnæ bai ī iñique Patowa ææmæ bete cænguīōnæ do iñique batimpā. Māniñōnæ iñonte oodeoidi cōwē cæningā codotēdo ingante wænōninque, Wængonguī quī, ante godonguēñēnāni iñōnānimpā. ⁸ Iñique Pegodo tōnō Wāō īnate da godōninque Itota iimāi angantapa.

—Mīnatō īnōnō gote, Patowa ææmæno impa, ante ænōmīna ate mōnō cængæimpa.

⁹ Angā ēñēninque tōmēna,

—Æcōnēnō go guite æænonguīmōna, āmii.

¹⁰ Āñōnate tōmengā wæætē,

—Waa aeda. Mīnatō mānīī nāni quēwēñōmō go guiyōmīna onguīñængā incæ cadabodē æpæ iyænte næænte gocā adinque tōmengā ingante edæ tee empote goeda. Tee empo goyōmīna tōmengā oncōnē go guicā adinque, ¹¹ mīnatō wæætē oncō nē ēcā ingante īīmaī ante æeda. “Mōnō Awēnē nē Odōmongā incæ bitō īmite īīmaī angampa. Bitō æcōnēnō āmi guidindque botō nē ēmīñænāni tōnō Patowa ææmæ ante cænguīmōnii, angampa,” ante apæneeda. ¹² Mānōmaīnō ante apænemīna ēñēninque nē oncō ēcā īñōmō æmongapaa mæi goyōmīnate oncō ñænæncō awæmpaa do nānō cōnōincō odōmongā adinque mīnatō mānincōnē tōmāā eyepæ cæcæmīnaimpa, ante Itota da godongā godatapa.

¹³ Mānōmaī angā godinque apæneyōna, Itota nānō ānō bai adobai tōmāā batimpa, ante adinque tōmengā nānō nē ēmīñæna, Patowa ææmæno impa, ante cædatapa.

¹⁴ Īnque ææmæno nāni cæñedē īnque bayonte Itota awæmpaa gāānē pō tæ contayongā tōmengā nānō nē da godōnīnāni godongāmæ pō tæ contadāni.

¹⁵ Adinque Itota tōmēnāni īnānite apænecantapa.

—Botō īñōmō caate wæte wænāmaī īñedē mīnitō tōnō godongāmæ Patowa ante cænte tocæimpa, ante cæīnente nanguī wætabopa. ¹⁶ Apænebo ēñēedāni. Botō Wængonguī Awēnē īnōmo inte Awēnē Odeye badinque māñīñedē ate waodāni īnānite æmæwo pōnī ata cæpocæboimpa. Māninganca botō ata cæpoganca botō ñōwo, Wængonguī Awēnē dodāni īnānite ata cæpodinque wodo pænta gogacāimpa, ante Patowa ææmæno ñōwo īnque cæncæ cæbopa. ¹⁷ Āninque ayæ Itota bequīmæ owætaca bæi ongonte æninque Wængonguī ingante waa ate apænedinque tōmēnāni īnānite angantapa.

—Mīnitō owæta īinta æninque godongāmæ beedāni. ¹⁸ Āmo ēñēedāni. Yowepæ ñōwo bedinque botō Wængonguī Awēnē īnōmo inte Awēnē Odeye botō baganca edæ ñōwo æmæwo bebopa.

¹⁹ Ante apænedinque Itota pāō æninque Wængonguī ingante waa ate pōnente apænedinque pā æninque pædæ godōninque apænecantapa.

—Īī pāō botō baō bai impa. Botō, Mīnitō quēwencæmīnimpa, ante botō baō godonte bai cædinque wæncæboimpa. Botō pā ænte pædæ pōnōmo bai mīnitō īncayæ ate botō īmote ante pōnēninque adobai cæte wacā ingā wacā ingā pædæ godonte cæedāni, angantapa. ²⁰ Mānōmaī angā īnque cænāni ate owæta adobai ænte apænedinque tōmengā,

—Botō wepæ īīmæ bai impa. Wængonguī do apænedinque, Botō pōnō cæbo ate mīnitō Ao āmīni īninque mōnō godongāmæ waa cæte quēwengæimpa, angacāimpa. Ñōwo adobai botō wepæ mīnitō beyæ pædæ godōmo ate mīnitō Ao ante æmīni īninque mōnō godongāmæ waa cæte quēwengæimpa. ²¹ Incæte botō īmote nē pōnō odōmonte pædæ godonguingā īñōmō botō ōnōmpo gāānē cænguīmpaa adoyōmō ongō aedāni. ²² Wængonguī do nānō angānō bai botō nē Waobo ēñagaīmo inte wænte gocæboimpa. Nāwangā impa. Incæte botō īmote nē pōnō odōmonte pædæ godonguingā īñōmō edæ tōmengā nānō nanguī wæwenguinque edæ mānōmaī cæcā ingampa tōō.

²³ Ante Itota apæneyongä tömënäni nāni caboque tedingue edæ, Æcänö ingante ante apænecaä, ante wædänitapa.

Æcänö yæcado ongonguingää, ante tededänipa

²⁴ Ayæ adobai, Mönö cabo iñömöte æcänö ñænængä inte edæ yæcado ongonte bai në angä baquingää, ante wædingue tömënäni wæætedö wæætë äningue nangui tedewënäni. ²⁵ Adingue Itota tömënäni inänite, “Idægoidi inämaï inäni awënëidi iñömö tömënäni nempo quëwënäni inänite, Botö ämo ëñente cædäni, ante nangui piinte änewënäni. Incæte në piinte änewënäni iñönänite tömënäni nempo quëwënäni wæætë, Mönitö awënëidi në Pönö Cædäni inänipa, ante babæ ante pemöwënänipa. ²⁶ Wæætë munitö guiquënë inguipoga awënëidi nāni cæi bai cædämaï iedäni. Mini cabo incæ në yæcado ongongä inte yæmiñængä bai baquënegä ingampa. Ayæ në angä inongä inte wacä beyæ në cæcä bai baquënegä ingampa. ²⁷ Æbänö ante pönëminii. Æcänö ingante, Awënë bai ingampa, ante nangui waa adänii. Në cænguimpaa gäänë tæ contate cængä ingante waa adänitawo. Wæætë awënë beyæ ante ænte mämö pönongä ingante waa adänitawo. Inämpa në contacä ingante näwangä waa adänipa. Incæte botö iñömö önömoque bai cædömo inte munitö weca pöninque në ænte mämö pönongä bai inte në pönö cædömo imopa,” ante Itota apænecantapa.

²⁸ Ayæ apænedingue, “Botö caate wæwëñömöte munitö iñömö botö tönö godongämæ iñacabo cædimini iminipa. ²⁹ Iningue botö Mæmpo botö imote, Awënë Odeye bacæbiimpa, ante nänö pönö cægai bai botö wæætë, Botö tönö iñacabo cædimini inömini inte munitö awënë odeyeidi adobai bacæminimpa, ante pönö cæcæboimpa. ³⁰ Ayæ, Botö në Awënë Odeye bayömöte munitö botö awæmpaa gäänë tæ contadinque godongämæ edæ cænte becæminimpa, ämopa. Ayæ idægoidi önömpo tipæmpoga go mencabodäniya iñönänite munitö awënë tæ contaimpaa tæ contadinque tömënäni inänite në apænte ämini bacæminimpa,” ante tömëngä miñæ në godäni inänite Itota apænegacäimpa.

Pegodo incæ, Dicæ abogaa, ante anguingä ingampa, ante (Mäateo 26.31-35; Mäadoco 14.27-31; Wäo 13.36-38)

³¹ Itota ayæ,

—Timönö, ëñëmi. Timönö, bitö imite ämopa. Waocä tömëmö ænte wancæ wancæ cæcä ontapo wææ bai munitö iminite Tatäna incæ bæi ongonte wënæ wënæ cæcæte ante angampa. ³² Wæætë, Bitö wede pönëningue nangæ badämaï incæbiimpa, ante botö do edæ Wængongui ingante apænetabopa. Iningue bitö iñömö edæ iincayæ ate botö gämænö ocæ ëmænte ponguimi imipa. Pöninque, Bitö tönifadäni wæætë tæi piñænäni bacædänimpa, ante tömënäni inänite godö töö æmænte bai cæe.

³³ Ante apænecaä ëñëningue Timönö wæætë,

—Awënë ëñëmi. Bitö imite tee mönedäni iningue botö do bitö tönö go guibaimopa. Bitö imite wænönäni wæmi iningue edæ botö bitö tönö do wæmäimopa.

³⁴ Ante apænecaä ëñëningue Itota angantapa.

—Pegodo, bitö imite ämo ëñëe. Tawadiya ñöwoönæ ayæ pedämaï iñonte bitö botö imotedö apænedingue, Dicæ abogaa, ante mempoga go adopoque angümi imipa, ante Itota apænegacäimpa.

Botö caate wæquimämo oo baccäimpa, angampa

³⁵ Ayæ wæætë tömënäni inänite,

—Botö wëenëñedë munitö iminite da godöningue, Godonte æinta da wente ænguincadedë ænämaï inte goedäni, antabopa. Mäincoo da wente ængui

næænāmai inte awæncata næænāmai inte goedāni, ante botō da godōmo godinque mīnitō ænguēnēmīni inte wæmīnitawo.

Åñongante,

—Ænguēnente wædāmai intamōnipa, ānānitapa.

³⁶ Itota wæætē tōmēnāni inānite,

—Ñōwo iñōmō æcānō godonte æinta da wente ænguincade māna tōmengā mānincade næænte gocæcāimpa. Ayæ māincoo da wente ænguī adobāi næænte gocæcāimpa. Ayæ yaēmē mānāmai ingā inte weocoo yacoo nē māningā wacā ingante godonte æninque wæætē yaēmē godonte æncæcāimpa. ³⁷ Iīmai ante dodāni nāni yewæmongainō bai botō imote cæcædānimpa. “Nē ēñēnāmai nāni cæcabo iñōnānite tōmengā adocā inongā ingampa, ante ānānitapa,” ante yewæmongatimpa. Mānōmai impa, ante pōnēninque botō iīmai āmopa. Botō imote æbānō cæquinānīi, ante nāni yewæmongainō bai botō imote tōmānō iinque cæquinō ænguēnē. Botō imote ante nāni yewæmongainō bai cædinque ñōwo iñōmō edæ eyepæþ ba aedāni.

³⁸ Ante apæneyongante tōmēnāni,

—Awēnē, yaēmē mēa mæ ongō æe.

Ānānitapa. Tōmengā wæætē,

—Idæwaa, angacāimpa.

Guetēmānīi iñōmō Itota Wængonguī ingante apænecampa

(Māateo 26.36-46; Māadoco 14.32-42)

³⁹ Iinque apænedinque Itota wadæ godinque cōwē nānō æidō bai æidinque Odibowænquidi go æiyongante tōmengā miñæ nē godāni tee empo æigadānimpa. ⁴⁰ Æi cōwē nānō æi ongōñōmo pōninque tōmēnāni inānite,

—Mīnitō ñōwo Wængonguī ingante nāmā beyænque apænedinque, Mōnitō wīi wēnæ wēnæ cæinēmōni bacæmōnimpa, ante apæneedāni.

⁴¹ Āninque Itota wadæ godinque dica mōnō wido cæganca māninganca godinque da guicapodinque Wængonguī ingante apænecantapa.

⁴² Apænedinque, “Mæmpo ēñēmi. Bitō Ao āninque edæ tī nā wænguimæ bai ō ænte bai cædinque botō imote edæ, Wænāmai incæbiimpa, āmi iinque botō edæ waa tobaimopa. Incæte botō ānōnō bai wīi cædinque wæætē tōmēmi ānōnō bai cæe, āmopa.”

⁴³ Ante apæneyongā Wængonguī ōnædē nānō da pōnōningā anquedo Itota weca ponte a ongōninque, Tæi piñænte entawencæbiimpa, ante cædinque pōnō tōō æmænte bai cæcantapa. ⁴⁴ Incæte Itota iñōmō edæ nanguī wæwente badinque Wængonguī ingante ancaa apænecā iinque edæ tōmengā owæmæ wepæ gowete bai tadinque onguipoiya petæ petæ wææntapa.

⁴⁵ Ayæ iinque apænedinque tōmengā ængæ gantite godinque tōmengā miñæ nē pōnināni weca ponte ayongā tōmēnāni nanguī wæwente wædinque mō ñōnāni. ⁴⁶ Adinque edæ tōmengā tōmēnāni inānite,

—Iñæmpa mōwo mōmīnīi. Edæ ængæ gantidinque, Wēnæ wēnæ cæinente badāmai incæmōnimpa, ante Wængonguī ingante apæneedāni, angacāimpa.

Itota ingante bæi ongonte ænte godānīpa

(Māateo 26.47-56; Māadoco 14.43-50; Wāō 18.2-11)

⁴⁷ Ante tæcæ apæneyongā nanguī ināni iñontobæ ponte a ongōnānitapa. Itota miñæ nāni, Dote, ante gocabo iningā incæ Codaa iñōmō tāno beyænte pōninque Itota ingante waa cæte bai queē bemoncæte ante pongā. ⁴⁸ Adinque Itota tōmengā ingante,

—Codaā iñæmpa, botō Waobo eñagaïmo iñōmote bitō, Ìngā ingampa, ante queē bemōninque odōmonte pædæ godōmi ænguïnāni, angantapa.

⁴⁹ Mānōmaï cæcæ cædānipa, ante adinque tōmengā miñæ nē godāni guiquēnē,

—Awēnē, yaēmenca godō tao cæquimōni āmii, ānānitapa.

⁵⁰ Wængonguï quï, ante nē godongā ñænængā pōni Ìnogā ingante nē cæcā iñōmō māniñōmō ponte a ongongā adinque Itota miñæ nē pōningā adocanque wæætē yaēmē æninque māningā ònōmonca tōmēmonca Ìnō wangō tamoncacā wæcantapa. ⁵¹ Adinque Itota wæætē,

—Idæwaa, āninque gampo cæmoncacā waa bamoncagacāimpa. ⁵² Ayæ, Wængonguï quï, ante nē godōnāni ñænænāni incæ Wængonguï oncō ñænæncō ante nē wææ wānōnāni incæ nē aadāni nāni Picæncabo incæ tōmengā ingante æncæte ante nē pōnināni iñōnānite Itota tōmēnāni Ìnānite, Botō miñæ nē godāni tōnō botō dicæ awēnē ingante wido cæcæte ante cæbogaa. Incæte mīnitō, Nē wido cæcā ingampa, ante bai cæmīni awædō. Edæ canta teēmenca mīni badōinca tōnō yaēmē næænte botō weca pōmīni. ⁵³ Ìñæmpa botō æpogadō Wængonguï oncō ñænæncōnē Ìmō Ìñō Ìmō Ìñō yabæcōnē go guid- inque mīnitō weca a ongōñōmote mīnitō wæætē bæi ongoncæte ante pædæ gopodāmaï Ìmīnitapa. Edæ ñōwo wēmō mæ māmōnte bai Ìñōnte edæ mīni nē wēnæ wēnæ cæyedē impa, ante apænegacāimpa tōō.

Pegodo incæ, Dicæ abogaa, angampa

(Māateo 26.57-58, 69-75; Mādoco 14.53-54, 66-72; Wäö 18.12-18, 25-27)

⁵⁴ Ìninque Itota ingante bæi ongonte ænte māo, Wængonguï quï, ante nē godongā ñænængā pōni Ìnogā weca ænte godānitapa. Gobæ godāni Ìninque Pegodo Ìñōmō ayæ ayæ godantapa. ⁵⁵ Ñænæñ oncō yacōmoyæ Ìñōmō wææ wānōnāni gonga tānōnte godāmæ pō tæ contadāni adinque Pegodo tōmēnāni weca pō tæ contacā. ⁵⁶ Adinque nē cæcā onquiyængā tōmengā gongapamō ongongā adinque tōmengā ingante cōwā adinque,

—Ìngā adobaï māningā miñæ tee empo gocā ingantapa.

⁵⁷ Åñongante Pegodo,

—Onquiyæmi eñēmi. Botō māningā ingante dicæ abogaa, angantapa.

⁵⁸ Ayæ wantæ ate wacā pōninque Pegodo ingante waa adinque,

—Bitō adobaï tōmengā miñæ nē gobi Ìmitapa tōō.

Ante apænecā eñēninque,

—Onguïñæmi eñēmi. Botō dicæ tōmengā miñæ gobogaa. Edæ wabo Ìmopa.

⁵⁹ Ayæ wacā adobaï wantæ wantæ adoque ooda go ate āninque,

Ìngā Ìñōmō Itota miñæ nē godingā ingampa. Nāwangā impa. Gadideabæ quēwēningā inte edæ pongā aedāni.

⁶⁰ Angā eñēninque Pegodo,

—Onguïñæmi, quïēmē bai apænebipa, ante botō eñēnāmaï Ìmopa.

Ante tæcæ mēnea åñongante tawadiya Ìñontobæ aa aa pecantapa. ⁶¹ Itota incæ tōmengā gāmænō dadi ēmænte pōmō acā adinque Pegodo Ìñontobæ, Æ, āninque, “Tawadiya ñōwoönæ pedāmaï Ìñōnte bitō botō Ìmotedō ante wadō ate apænedinque, Dicæ abogaa, ante tededinque mempoga go adopoque anguimi Ìmipa,” ante Itota wēēnēñedē apænecā eñēntabopa. ⁶² Ñōwo nānō pequinque do pecampa, ante pōnente wædinque Pegodo oncodo tao godinque Ca ca wægacāimpa.

Itota ingante badete todinque cædānipa

(Māateo 26.67-68; Mādoco 14.65)

⁶³ Itota ingante nē wææ wänönäni iñömö tömengä ingante mänifedē badete todinque edæ tæi tæi pänänitapa. ⁶⁴ Ayæ tömengä awinca wīni cæmöninque tömēnāni,

—Ecänö bitö imite tæi tæi pänaa, ante Wængonguī apænecä eñente ate apænebi eñēmönie.

⁶⁵ Ante badete todinque quiēmē bai ante godö babæ änewēnänitapa.

Nē apænte änāni weca Itota ongongampa
(*Mäteo 26.59-66; Mäadoco 14.55-64; Wäö 18.19-24*)

⁶⁶ Nāö bayedē, Wængonguī qui, ante nē godönāni ñænænāni tönö nē odömönāni iñömö idægoidi inānite nē aadāni nāni Picæncabo Inönāni inte edæ godongāmæ go bee tēninque tömēnāni nāni apænte anguimpaa gäänē ongönönāni Itota ingante tömēnāni weca töö æmænte ænte mao gönönāni gongængantapa.

⁶⁷ Tömengä ingante nē apænte änāni iñömö,

—Apænebi eñēmönie, äninque, Bitö mönitö Codito inömi imitawoo.

Äñönānite Itota wæætē,

—Botö apænebi ininque münitö wæætē eñēnāmaī imaīmīnīpa. ⁶⁸ Ayæ wæætē botö eñencæte ante ämo ininque münitö wæætē botö imote apænedāmaī imaīmīnīpa. ⁶⁹ Incæte ämo eñēedāni. Botö iñömö nē Waobo eñagaīmo inte iincayæ ate Wængonguī nē tæi Piñængä tömēmæ inö tæ contate on-goncæboimpa.

⁷⁰ Ante apænecä eñēninque tömānāni,

—Iñæmpa, bitö Wængonguī Wēmi imitawoo.

Äñönānite,

—Botö mänimodö imopa. Tömēmīni edæ mänömaī äninque edæ nö apænemīnīpa.

⁷¹ Ante apænecä eñēninque,

—Idæwaa. Tömengä nämä incæ edæ, Wængonguī Wēmo imopa, ante wænæ wænæ apænecä do eñentamompa. Ininque mönö ñowo edæ, Wadāni, Itota wænæ wænæ cæcampa, ante apænecädänimpa, ante quīnante godömenque diqui diqui mingui, ante wægädänimpa.

23

Pidato weca gote Itota ongongampa
(*Mäteo 27.1-2, 11-14; Mäadoco 15.1-5; Wäö 18.28-38*)

¹ Ininque mänifñömö ongönāni tömānāni godongāmæ ængæ gantidinqe Itota ingante awenē Pidato weca ænte gogädänimpa. ² Godinque tömēnāni, Itota iīmaī nē wænæ wænæ cæcä ingampa, ante piīninque,

—Mönitö cöwä ayömöni iingä iñömö wapiticæ odömonte apænecä eñēninque mönitö ömæ quēwēnāni oda cæte eñēnāmaī cædāni wæmönīpa. Edæ odömāno awenē Tetædo nänö äninta godönāmaī iedāni, ante tömengä wææ angampa. Ayæ tömengä, Botö iñömö Awenē Odeye Coditobo inömo imopa, ante nämä ante angampa töö.

³ Ante godö piīnāni eñēninque Pidato iñömö Itota ingante,

—Bitö oodeoidi Awenē Odeyebi imitawoo.

Äñongante Itota wæætē,

—Bitö tömēmi änö bai botö mänimodö imopa, angantapa. ⁴ Ininque nē godönāni ñænænāni tönö wadāni godongāmæ ongönönānite Pidato wæætē,

—Botö ayömote iingä dicæ eñēnāmaī cæte wentamö mongængä abogaa, angantapa.

⁵ Ante Pidato apænecā incæte tōmēnāni godōmenque āninque,

—Īñæmpa tōmengā Gadideabæ tāno odōmōninque ñōwo ĩñōmō ganca pōninque Oodeabæ tōmāo godinque odōmonte apænecā ēñēninque waodāni edæ piinte badāni apa cæbii, ānānitapa.

Edode weca Itota gote ongongampa

⁶ Mānōmaīnō ānāni ēñente wædinque Pidato wæætē, ĩngā ĩñōmō nāwangā Gadideabæ quēwēningā inte pongantawoo. ⁷ Āñongante, Māningānō ingampa, ante apænedāni ēñēninque tōmengā, Gadideabæ nē quēwēningā inte tōmengā awēnē Edode nānō nē ēnempodongā ingampa, ante tæcæ ēñengantapa. Ayæ, Edode ñōwo Eedotadēē ponte quēwengampa, ante do ēñēningā inte Itota ingante Edode weca Pidato da godongā gocantapa. ⁸ Doyedē ĩñōmō wadāni, Itota æbānō cæcāā, ante tededāni ēñēninque Edode, Itota botō weca pōninque wabānō bamōnengæ pōni cæcā abaimopa, ante pōnēninque tōmengā ingante wantæpiyæ aīnengā ĩnogāimpa. Īninque Itota ingante ñōwo adinque Edode nanguī togacāimpa. ⁹ Īninque, Apænebi ēñēmoē, āni ēñēmoē, ante Edode wæætē wæætē āñongante Itota ĩñōmō edæ pæ wēēnete apænedāmai ingacāimpa. ¹⁰ Edode weca adoyōmō ongōninque nē godōnāni ñænænāni tōnō nē odōmōnāni guiquēnē ænguī badinque, Itota wēnæ wēnæ cæcā ingampa tōō, ante nanguī piinte angadānimpā. ¹¹ Ayæ Edode tōnō tōmengā tontadoidi tōnō Itota ingante piīninque, Waa cæte bai cæcantedō abi, ante badete todānitapa. Ōnonque badete tocæte ante tōmēnāni wæmō pōni weocoo daga wēñadinque tōmengā ingante adodō Pidato weca da godōnāni gogacāimpa. ¹² Īninque do nāna guēadō guēa piīncaya ĩnina inte edæ Edode tōnō Pidato māñōnæ edæ guēa piyænē cæte nāna æmigocaya bagadāimpa.

Itota wæncæcāimpa, ānānīpa

(*Māateo 27.15-26; Māadoco 15.6-15; Wāō 18.39-19.16*)

¹³ Pidato ĩñōmō nē godōnāni ñænænāni tōnō awēnēidi tōnō ōnōnāninque ĩnānite āñecā pōnāni ate tōmengā, ¹⁴ tōmānāni ĩnānite āninque,

—Īngā ingante botō weca ænte pōninque mīnitō, Tōmengā wapiticæ odōmonte apænecā ēñēninque wadāni oda cædinque ēñēnāmai cædānīpa, ante piīmīnīpa. Incæte mīnitō edonque ayōmīnite botō, Itota æbānō cæcāā, ante ēñencæte ante cōwā ayōmo edæ tōmengā wēnæ wēnæ nānō cædō ante mīni ānewēnō ante edæ dæ ā abopa. ¹⁵ Ayæ Edode adobai tōmengā ingante apænte āninque wēnæ wēnæ nānō cædinō ante adāmai inte wædinque adodō botō weca da pōnongā ponte a ongongā aedāni. Edæ, Tōmengā nānō wænguīnque, ante nānō cædinō edæ dæ ā apa ānewēmīnīi. ¹⁶ Īninque botō ōnonque tæi tæi pāninque ñimpo cæbo gocæcāimpa, ante Pidato angantapa. ¹⁷ Wadepo ĩñō wadepo ĩñō tōmēnāni ææmæ nāni cæyedē, Nē tee mōnete ongongā adocanque gocæcāimpa, ante cōwē godō ñimpo cæquēnengā ĩnogā inte awēnē Pidato ñōwo māñōmaīnō ante cæntapa. ¹⁸ Māñōmaīnō angā ēñēninque tōmānāni adoyōmō ogæ tededinque,

—Itota ingante wido cædinque Badabato ingante wæætē pōnō ñimpo cæbi æmōnie, ānānitapa.

¹⁹ Badabato guiquēnē tōmēnāni nāni quēwēñōmō awēnē ingante wido cæcæte ante cædinque godōmenque waocā ĩngante wæñōningā inte edæ ñōwo tee mōnete ongōnogāimpa. ²⁰ Pidato ĩñōmō, Itota ingante æbānō cæte ñimpo cæbo goquingāā, ante wædinque tōmēnāni ĩnānite wæætē aa aa peyongante, ²¹ Oodeoidi wæætē,

—Awæ ñænquedimæ ämi cæte gönonte wænönäni wængæe töö, ante wæætë wæætë adodö äninque Yæ änänitapa.

²² Quimæ änewëmīni, ante do mempoga äningä inte Pidato ñöwo mempoga go adopoque änongå inte,

—Quinö wënæ wënæ cæcantawogaa, angantapa. Ìñæmpa, Quinö wënæ wënæ cæcantawo, ante cöwä ayömo edæ dæ ampa. Ìninque botö ämo ate edæ tömengä ingante tæi tæi päninque ñimpo cædäni gocæcäimpa, ämopa, angantapa.

²³ Incæte awënëidi tönö wadäni godömenque Yæ äninque, Awæ ñænquedimæ ämi cæte gönonte wænönäni wæncæcäimpa, ante, Cöwë wænongåëimpa, ante ancaa aa pedänitapa. Ìninque tömënäni näni Yæ yæ äno beyænque Pidato ñimpo cæcantapa. ²⁴ Ìninque ancaa wææ änäni ëñente wædinque tömengä, Tömënäni näni äno bai godö cæcæboimpa, ante nämäneque pönengantapa. ²⁵ Mänīñedë Badabato nê, Awënë ingante wido cæcæimpa, ante cædinque nê wænöningä inte ayæ tee mönete ongönongäimpa. Pidato ñöwo, Ìngä guiquënë oodeoidi näni nê äningä ingampa, ante godö ñimpo cæcantapa. Itota ingante wæætë, Oodeoidi näni äno bai cæcæimpa, ante cædinque Itota ingante wæætë tontadoidi nempo pædæe godongä ænte godänitapa.

Itota ingante awäa timpodäni wængampa

(Mäteo 27.32-44; Mäadoco 15.21-32; Wäö 19.17-27)

²⁶ Itota ingante ænte goyönäni Tidënebæ nê quëwengä Timönö wayömö gote pöninque eyepæ pöni mämö bee tengantapa. Tömengä ingante adinque bæi ongöninque tömënäni, Ñænquedimæ möni cædiwæ Itota miñæ ænte goe, äninque ñö cædancaþänäni næænte gocantapa.

²⁷ Goyongante Itota miñæ nangui inäni godänitapa. Onquiyænäni incæ Yæ yæ ante wo ca wo ca wædinque tee empote godänitapa. ²⁸ Ìninque Itota dadi emænte adinque tömënäni inänite,

—Onquiyæmīni, Eedotadë quëwëmīni inte mīnitö botö beyæ ante wædämaï ledäni. Wæætë tömëmīni nämä beyænque ante wæedäni. Ayæ mīnitö wëñænäni beyæ ante pönente wæedäni, ämopa. ²⁹ Ìncayæ ate mīnitö caate wædinque Ìmaï ante wæquimīni Ìmīnīpa. “Wëñæ nê mänämaï ingä Ìñömö edæ tömengä nänö waa toquinque. Goömæ nê gänönämaï ingä Ìñömö edæ tömengä nänö toquinque impa,” ante wæquimīni Ìmīnīpa. ³⁰ Mänīñedë edæ, “Waadäni Ìmaï ante wæcædänīmpa. Onquiyabo onguipo æmæwo cabæñö goyæ guimönīe. Änanquidi wææ mönitonga capo ñongæñö wë womonte bamönīe, ante wæcædänīmpa,” ante dodäni näni yewæmongainö bai edæ bacæimpa. ³¹ Edæ awæ miwæ Ìñonte gonga wædænque wo cædäni bai ñöwo Ìñömö waodäni wīi nangui wënæ wënæ cædänīpa. Wæætë awæ amimö bayonte tū wodönöyönäni dobæ wo bæco bai waodäni Ìncayæ ate quingämë bai cæquinäni inänīpa, ante Itota mäninö godinque apænegacäimpa.

³² Ayæ, Mäo wænongåëimpa, ante nê ænte godäni Ìñömö mënaa nê wënæ wënæ cædina Ìnate tömengä tönö godongämæ ænte gogadänīmpa. ³³ Ocatainö, näni äñömö ænte pöninque awæ ñænquedimæ näni badönīwäa Itota ingante töö godonte timpodinque wææ tūwadinque ængæ gantidënanitapa. Ängæ gantidënanī ate wægöñongä tömënäni nê wënæ wënæ cædina Ìnate adobai Itota tömëmæ inö adocanque tömengä dipæmæ inö adocanque timpote gönönäni gongænatapa. ³⁴ Mänömaï cædäni adinque Itota,

—Mæmpo eñēmi. Tömēnāni eñēnāmaī ināni inte iīmaī cædānīpa cæbīi. Wēnæ wēnæ nāni cæinō ante bitō wæætē edæ ñimpo cæbi quēwencædānīpa āmopa, angacāimpa.

Māniñedē tōmengā weocoo inī ante, Æcānō quīnca nō ta adīnque tōmengā badīncoo æncæcāimpa, ante tōmēnāni wæntodōnīnque adocooque adocooque ænānitapa. ³⁵ Wadāni, Æbānō cæquīngāā, ante acæte ante godongāmæ a ongōnānitapa. Awēnēdi incæ tōmengā ingante ante badete todīnque,

—Tōmengā, Quēwencædānīpa, ante wadāni inānite ængā quēwēnānitawo. Ayæ Wængonguī iñōmō, Codito ingampa, ānīnque tōmengā ingante ængantawo. Iñīnque tōmengā Wængonguī nānō nē ængaingā inongā inte edæ nāmā aamō cæte quēwencæcāimpa, ante badete togadānīpa.

³⁶ Tontadoidi guīquēnē obo pōnīnque tōmengā ingante badete tote bai cædīnque edæ, Yowepæ tī nāmæ becæcāimpa, ante pædæ æænōnīnque, ³⁷ tōmengā ingante,

—Oodeoidi Awēnē Odeyebi īmi iñīnque bitō nāmā aamō cædīnque quēwēmāwe, ante towengadānīpa.

³⁸ Ayæ, “Iñgā oodeoidi Awēnē Odeye inongā ingampa,” ante yewæmōnīnque tōmēnāni tōmengā dæca inō wo cædāni owotapa.

³⁹ Nē wēnæ wēnæ cædīna guīquēnē tōmengā tōnō ongōñōna adocanque tōmengā ingante godō wēnæ wēnæ ante badete tocantapa.

—Bitō iñæmpa, Codito inōmo īmopa, āmitawo. Māniñi inōmi iñīnque bitō tōmēmi aamō cæte gote quēwēnīnque mōnatō imōnate adobaī ñimpo cæbi aamō cæte gomōnæ.

⁴⁰ Āñongante wacā wææ ānīnque,

—Iñæmpa tōmēmi adobaī bitō wængūnīnque ongōmi inte Wængonguī ingante guīñēnāmaī inte āmi awædō. ⁴¹ Mōnatō wēnæ wēnæ cæmōna iñōmōnate nē apænte ānāni edæ nōingā cæte pānāni wæmōnapa. Mōnatō wēnæ wēnæ cædīnō beyæ eyepæ tente wæmōnapa. Tōmengā guīquēnē wēnæ wēnæ cædāmaī inongā inte wængā apa ānewēē.

⁴² Ānīnque adocā wæætē Itota ingante apænedīnque,

Awēnē eñēmi. Bitō Awēnē Odeye badīnque botō imote pōnente cæbi āmopa.

⁴³ Āñongante Itota,

—Nāwangā āmopa. Bitō ñōwoōnæ incæ wænte godīnque do wænte gogaināni nāni watapæ quēwēñōmō botō tōnō guēa ongoncæbiimpa, angacāimpa.

Itota wængampa

(*Māateo 27.45-56; Māadoco 15.33-41; Wäo 19.28-30*)

⁴⁴ Māniñedē edæ tæcæbæcā iñedē mæ māmōnte bai tæcæ badīnque ayaōnāa wæiganca tōmāmæ iñōmō edæ wēmō ingatimpa. ⁴⁵ Edæ nænque nāwānāmaī ī iñīnque wēmō ingatimpa. Ayæ Wængonguī tæiyæ waēmōncōnē odemō nāni wææ wodōincoo adoyedē edæ ōnōnæca inō tæcæguedē pōni tængūimæ wææntapa. ⁴⁶ Māniñedē Itota ogæ tededīnque,

—Mæmpo eñēmi. Ñōwo edæ botō ōnōwoca bitō ōnōnempo pædæ pōnōmo æe.

Ānīnque edæ æmæwo guēmānīnque wængacāimpa.

⁴⁷ Mānōmaī cæte wængā adīnque odōmāno tontado capitāo incæ,

—Nāwangā impa. Iñgā iñōmō edæ nō pōni cæcā inongā inte edæ wængā abopa, ānīnque, Wængonguī ñāō apāite bai emōnongā inte mānōmaī cæcā abopa, ante apænegacāimpa.

⁴⁸ Ayæ, Æbänö cæquii, ante godongämæ ponte a ongönäni iñömö tömänäni, Itota mänömaï wængä awædö, ante wædinque edæ nämä öntonawë tæi tæi tompotawëninque wadæ gogadänimpa. ⁴⁹ Wæætë Itota ingante nê do adinänique iñömö gobæ ongonte pömö agönänitapa. Wëenëhedë tömengä Gadideabæ quëwente pöñongante onquiyænäni tömengä miñæ nê pöninäni inte tömënäni ñowo adobaï gobæ ongonte pömö agönänitapa.

Itota wodi baö ñi mäo daga wënänpa

(Mäteo 27.57-61; Mäadoco 15.42-47; Wäö 19.38-42)

⁵⁰ Oodeoidi näni Apænte Äincabo iñönänite adocanque tömengä ëmöwo Ootee ñongäimpa. Tömengä cöwë waa cædinque nê nö cædongä ñongäimpa. ⁵¹ Do iñömö, Itota ingante wæñongäimpa, ante oodeoidi näni Apænte Äincabo godongämæ pönente cæyönänite adocä Ootee iñömö edæ Baa ante tömënäni tönö godongämæ cædämaï ñongäimpa. Tömengä, Wængongui Awënë Odeye nempo mönö æyedëno quëwengäimpa, ante wänö conte baï quëwëñongä ñongäimpa. Tömengä Oodeabæ Adimatea iñömö nê quëwëñongä inte ñowo pöningä ingantapa. ⁵² Mäningä Ootee iñömö awënë Pidato weca do gote apænedinque, Itota wodi baö ñi pönömi ænte daga wëmoe. ⁵³ Angä ëñëninque awënë Ao angä ëñente gocantapa. Godinque tömengä Itota wodi baö ñi wi æmpote wææ wi æwadinque pædæ wæænonte ænte godinque waëmö weocoo ñino näni änoncoo wini wini caete dicamontaa wointatodë önotatoque iñömö daga wengantapa. Do näni wënämaï intatocä iñonte daga wengantapa. ⁵⁴ Oodeoidi näni, Gäwadecæ ba ate guëmanguïönæ inguimpa, ante täno näni cæönæ i ñinque Ootee mänömaï täno cægacäimpa.

⁵⁵ Do iñömö Gadideabæ quëwente Itota tönö godongämæ nê pöninäni inte onquiyænäni ñowo Ootee miñæ tee empote pöninque Itota wodido adinque, Tömengä baö æbänö ñö cædäni, ante do adänitapa. ⁵⁶ Adinque tömënäni oncönë godinque ogui wapæ ogui wayabo tönö ænte ponte öni pæcæte ante cædänitapa. Incæte, Guëmanguïönæ impa, ante wædinque waönæ ate näni goquinque tömënäni Wængongui nänö wææ angainö baï cædinque täno guëmangadänimpa.

24

Itota do wëningä inte ñäni ömëmonte quëwengampa

(Mäteo 28.1-10; Mäadoco 16.1-8; Wäö 20.1-10)

¹ Ayæ guëmanguïönæ ñinque go ate baänæ ate ooque pönente bayonte mäninäni onquiyænäni ogui waqui näni cædincoo ñowo ænte nææninque Itota wodido pönänitapa. ² Ponte ayönäni dicabo ñænængade pönï do da tæñæi a öñö adänitapa. ³ Ayæ ontatodë guiite ayönäni edæ mönö Awënë Itota wodi baö edæ dæ antapa. ⁴ Önotatoque i awædö, ante adinque guiñente wæyönäni edëñina baï ina iñömö weocoo näämænta pönï näinte baï ëmoncoo mongæna inte edæ iñontobæ tömëna weca a ongöna. ⁵ Ate wædinque onquiyænäni iñömö ancaï guiñente wædinque ædæ wæænte onguipoga bigui tëmönänitapa. Edëñina baï ina iñömö onquiyænäni inänite,

– Ñænampa munitö do wænänäni weca ponte nê quëwengä ingante ante quänante diqui diqui miminii. ⁶ Tömengä iñömö edæ do bæ ñäni ömëmonte godingä inte edæ ñintatodë iñömö dæ angä ædäni. Tömengä wëenëhedë Gadideabæ munitö weca nänö ayæ quëwëñedë munitö iminute iimaï ante apænecä ëñëmini inte ñowo adodö ante pönëdäni. ⁷ Tömengä iñömö, Botö Waobo ëñagaïmo iñömote nê wënæ wënæ cædäni nempo odömonte mäo

pædæ godōnāni æninque tōmēnāni wæætē wænōnāni wænguēnēmo ïmopa, ante apæncā ēñēmīnitapa. Ayæ mēōnaa go adoōnæque ïñonte botō ñāni òmāmōnte quēwenguēnēmo ïmopa, ante apæncā ēñēmīni inte pōnenguēnē quēwēedāni.

⁸ Ante edēnāna bai ïna āna ēñente wædinque onquiyæñāni ïñōmō, Itota æbānō angacāi, ante tæcæ pōnente wædānitapa. ⁹ ïnīnque ontatodē tao wadæ godinque onquiyæñāni ïñōmō Itota tōmengā mīñæ nē godināni ònōmpo tipæmpoga go adocanque ïnāni ïnānite māo apænedinque wadāni tōmānāni ïnānite apænedāni ēñēnānitapa. ¹⁰ Mānōmāinō ante Itota nānō nē da godōngāināni ïnānite nē gote apænedāni ïñōmō Māadiya Māagadadēnā nāni ānōngā tōnō Wāōnā, Tantiago wāānā Māadiya ayæ wadāni onquiyæñānique tōnō godinque tōmēnāni ïnānite apænedāni ēñēnōnānimpa. ¹¹ Incæte, Mānōmāi ïmpa, ante māo apænedāni ēñēninque, Onquiyæñāni ïñōmō ònōnquedō ante tededāni awædō, ante Itota nānō nē da godōnīnāni ïñōmō edæ pōnēnāmāi ïngadānimpa. ¹² Pegodo guiquēnē quingæ ængæ gantidinque pogodo godinque Itota wodido pōngantapa. Ponte ædæ wæænīnque guimō ayōngā wīni wīni cædincooque òñō adinque tōmengā nāmāneque pōnēninque, Æbāmē cætimpā, ante wædinque wadæ gogacāimpa.

Ēmaodō taadō godānīpa
(*Māadoco 16.12-13*)

¹³ Eedotadēē ongōninque wædænque ïnāni nāni quēwēñōmō Ēmao goiñō ïñōmō onte quidōmetodo ganca māninganca taadō ïmpa. Māniōnæ adoōnæque ïñonte Ēmao ïñōmō gocæte ante waoda mēnaa idōmæ godatapa. ¹⁴ Æbānō cætimpā, ante tōmānō ante tedegodatapa. ¹⁵ Tedegoyōna Itota incæ māmō bee tēninque godōngāmæ gocā. ¹⁶ Incæte, Tōmengā æcānō ïngāā, ante wē wodonte bai ï beyæ tōmēna adāmāi ēmōna inte ēñēnāmāi ïnatapa. ¹⁷ Itota ïñōmō,

—Æbānō ante wæætēdō wæætē tede gomīnatawoo.

Angā ēñente wædinque tōmēna wæwente bai ēmōna inte edæ næ gongænatapa. ¹⁸ Adocanque tōmengā ēmōwo Codeopato ïñōmō tōmengā ïngante apænedinque,

—Eedotadēē quēwēñāni tōmānāni, Æbānō ñōwo māñiñōmō cætimpā, ante ēñēñōnāni bitō adobique adoyōmō quēwēninque edæ ēñēnāmāi ïmitawoo.

¹⁹ Āñōngante Itota,

—Ædō āmīna.

Āñōngā tōmēna wæætē,

—Itota Nāatadeta quēwēningā ïngante ante tedemōnapa. Wængonguī beyæ nē apæncā ïnōngā inte māningā onguīñængā ïñōmō Wængonguī ayōngā ayæ woadāni ayōnāni adobai tæi piñæñōngā inte waa pōni apænedinque nangui cæcā ïnōngāimpa. ²⁰ Mānōmāi ïñōngante nē godōnāni ñænæñāni tōnō mōnō òmæ awēñēidi guiquēnē wadāni nempo pædæ godōninque, Itota ïngante apænte āninque māo wænōmīni wængædāni, ānāni ēñēninque ïnāni wæætē tōmengā ïngante ñænquedīmæ cæte timpote wææ tīwadinque edæ gōnōnāni wængantapa. ²¹ Mōnatō guiquēnē, Tōmengā mōnō idægocabo Awēnē badinque pōnō ængā beyænque mōnō abæ tawænte quēwēnguimō ïmōmpa, ante pōñēñimōna inte edæ ñōwo wæmōnapa. Ayæ, Tōmēnāni māñōmāi nāni cædiōnæ edæ ñōwo mēōnaa go adoōnæque ïmpa, ante edæ mōnatō godōmenque wæmōna ae. ²² Māñōmāi ï incæte mōni cabo incæ onquiyæñāni pancadāniya tōmengā wodido gote pōninque, ïlīmāi atamōnīpa, ante apænedāni ēñente wædinque mōnatō wæætē ancañi guīñente wæmōnapa. ²³ Tōmēnāni

iñömö tömengä baö ini adāmaī ināni inte edæ wadæ pöningue iīmaī ante apænedāni wætamōnāpa. Mōnitō wīimonte bai Wængonguī anquedoda inate mā pōni atamōnīpa, ānānitāpa. Ayōmōnite anquedoda iñömö, Itota ñāni ömæmōnte edæ müingä quëwengampa, ante apæneda ëñëningue edæ wadæ pōmōnīpa, ante onquiyænāni apænedāni ëñentamōnāpa. ²⁴ Mänōmainō ante apænedāni ëñëningue mōni cabo incæ pancadāniya Itota wodido gote adinque, Onquiyænāni nāni āninō bai edæ nāwangä impa, ante adāni incæte Itota ingante adāmaī ināni wæmōnāpa.

²⁵ Ante apæneda ëñëningue Itota wæætë tömëna inate,

—Mīnatō pōnëgade i apa ānewëmīnaa. Mīmō ömædëmīna imīna inte mīnatō Wængonguī beyæ nē apænëgāināni nāni apænedō ante tömānō ante edæ ëñënāmaī imīna awædō. ²⁶ Codito iñömö edæ cōwë caate wæquënegängä ingacāimpa. Ayæ wænte ñāni ömæmōningue tömengä nāmā nānō ñāo iñömō æiquënegängä ingacāimpa, ante pōnëmīnaa.

²⁷ Ayæ, Codito æbānō cæquingää, ante Mōitee wodi æbānō apænete yewæmongacāi, ante tāno apænedinque Itota mīmōnoque pōnëningue, Wængonguī beyæ nē apænedāni tömānāni æbānō apænëgadāni, ante, Codito æbānō cæquënegängä ingacāi, ante edonque odōmōnte apænecä ëñënatāpa.

²⁸ Mānī tömëna nāna quëwëñömö tömëna nāna gocæ cæyōmō pōñōnāni Itota wodo tebæ gocæ cæte bai cæcä. ²⁹ Adinque tömëna nanguī āningue tömengä ingante edæ,

—Ñōwo gāwadecæ pōni inte wëmō ba apa. Mōnatō oncōnë go guiite cænte monte baanæ ate goe.

Ante ancaa āñōna tömëna oncōnë pō ëñacæ guicantāpa. ³⁰ Ayæ tömëna tönō cæncæte ante tæ contadinque tömengä pāo pā æningue Wængonguī ingante waa ate pōnente apænedinque tömëna inate tæcæ pædæ godoncæ cæyongä. ³¹ Tömëna awinca wi ænete bai bayō, Tömengä ingampa, ante edæ tæcæ adatāpa. Tömengä iñömö edæ adoyedë tömëna ayōna edæ dæ gocä.

³² Adinque tömëna guëa tedinque,

—Nāwangä intawo. Wængonguī mōnō Codito ingantedō ante apænecä ëñëningue æbānō yewæmongadānimpa, ante tömengä ponte odōmongä ëñëningue mōnō mīmō edæ gonga bæco bai totamōmpa. Wīi edæ mānōmaī intawo.

³³ Ante tedinque tömëna adodō taadō quingæ godinque Eedotadëë ponte ayōnate edæ Itota mīñæ nē godināni iñömō onte ganca mānīpodāni iñōnāni tömënāni tönō wadāni godongāmæ pō bee tente a ongōnāni adatāpa. ³⁴ Iñāni guiquëñë,

—Mōnō Awënë iñömō ñāni ömæmōnte müingä quëwengampa. Nāwangä edæ impa. Tömengä ingante Timōnō Pegodo do acantāpa, ante godongāmæ tededāni adatāpa.

³⁵ Mänōmainō ante tededāni ëñëningue tömëna wæætë, Mōnatō taadō goyōmōnate wacä pō bee tëningue iīmaī cæcantāpa, āningue, Æbānō cæcantāpa, ante adodō adodō ante apænëdatāpa. Ayæ godōmenque apænedinque, Oncōnë go guiyōmōni tömengä pāo pā ængä adinque mōnatō, Itota ingampa, ante do ëñentamōnāpa, ante tömānō ante apæneda ëñëngadānimpa.

*Tömengä müñæ nē godināni weca Itota pongampa
(Māateo 28.16-20; Māadoco 16.14-18; Wäo 20.19-23)*

³⁶ Mānīnō ante ayæ tæcæ tedehyōnāni Itota incæ edæ tömënāni weca tæcæguëdënāni do pō guiite a ongōningue,

—Guiñënāmaī gānë pōnëdāni.

³⁷ Angä eñëninque tömënäni, Öñowoca badī iīmaī, ante ancai guiñente wædinque, Yæ änäni. ³⁸ Adinque Itota,

—Quinante guiñewëminii. Mimöno quinante æmæ æmæ pönente wæminii.

³⁹ Bado botö önompo empobo edæ aedäni. Botö önöwa ewabo aedäni. Botö baö edæ gampo caate aedäni. Iñæmpa önöwoca badī imo bai ædö cæte baö tönö bamë eaquënemö. Baö tönö bamë eadömo inte botö imo apa guiñewëminii.

⁴⁰ Äninque Itota önompo tönö önöwa tömënäni inänite odömongä. ⁴¹ Adäni incæte tömënäni guiñente todingue wede pönënämaī iñönänite tömengä,

—Minitö weca cængui æbänö mämīnii.

⁴² Äñongante gæyæ baö do awëni eadäni inte pædæ godönäni ⁴³ æninque tömënäni ayönäni edæ ade cængantapa. ⁴⁴ Ayæ tömënäni inänite apænedinque Itota,

—Botö imotedö ante Möitee wodi wææ äninque æbänö yewæmongacäi, ante botö minitö weca ayæ quëwëninque do apænetabopa. Botö imotedö ante Wængongui beyæ në apænegainäni æbänö yewæmongadäni, ayæ ämotamini äninque æbänö yewæmongadäni, ante apænetabopa. Mänine botö apænedö ante tömänö edæ iñque baquinö angüënë.

⁴⁵ Ante apænedinque Itota, Ocai encate eñencædänimpa, ante pönö cædinque tömënäni inänite Wængongui angä eñëninque näni yewæmongainö ante odömonte apæncä eñëninque tömënäni edonque edæ eñënanitapa.

⁴⁶ Ayæ godömenque apænedinque,

—Mönö Codito cöwë nantate wæninque mëönaa go adoönæque iñonte näni ömæmongüëngä incæcäimpa, ante edæ edonque yewæmongatimpa.

⁴⁷ Ayæ, Codito emöwo ante Eedotadëe iñömö täno apænete ate tömämæ quëwënanäni inänite iīmaī ante apæncæcäimpa. Tömënäni inänite apænedinque, Wënæ wënæ mīni cædinö ante ñimpo cædinque Wængongui gämænö pöedäni. Pömīni adinque tömengä wæætë pänämaī inte pönö ñimpo cæcæcäimpa, ante apænequinäni incædänimpa, ante yewæmongatimpa. ⁴⁸ Minitö iñömö, Æbänö cætimpa, ante në adimīni inte edæ në apænequimīni imīnīpa.

⁴⁹ Ayæ edæ Wængongui, Botö Tæiyæ Waëmö Öñowoca ingante da pönömo æncæminimpa, angacäimpa. Iñinque botö Mæmpo nänö në angaingä ingante botö oo da pönömo æncæminimpa. Mänömaī i iñinque Wængongui nänö tæi piñænö æncæte ante minitö, Wængongui Öñowoca ingante ewocacæcäimpa, ante Eedotadëe iñömö wänö cöedäni, angacäimpa.

Öönædë Itota æicampa

(Mäateo 16.19-20)

⁵⁰ Itota ayæ tao godinque Betänia obo pöninque tipæmpoga pædæ æmpodinque, Minitö imīnīte Wængongui waa cæcæcäimpa, ante waa apæncä eñengadänimpa. ⁵¹ Tæcæ apæncä eñëñönäni edæ tömengä iñontobæ inque ingä edæ öönædë æigacäimpa. ⁵² Adinque tömengä miñæ në godinäni iñömö ædæ wæænte apænedinque, Näwangä Wængongui Wengä inongä inte æicampa, ante watapæ apænedinque Eedotadëe wadæ godinque nanguī togadänimpa. ⁵³ Wængongui oncö ñænæncönë yabæcönë iīmō iñō iīmō iñō pō cædinque Wængongui ingante, Bitö ñäö bai emömi inte waa pönī cæbīpa, ante cöwë waa apænegadänimpa.

Itota Codito ingantedö ante Wäo nänö watapæ ante yewæmongainta

Wængongui nänö Angainö ante në emongaingä Waocä bagacäimpa

1 Weëneñedë pöni Wængongui nänö mä badöñedë Wængongui nänö Angainö ante në emongaingä iñömö do ingacäimpa. Tömengä Wængongui weca quëwengacäimpa. Ayæ adocä adobai në Wængongui inongä ingacäimpa. 2 Weëneñedë pöni tömancoo badönämaï iñedë mäningä do Wængongui weca quëwengacäimpa. 3 Wængongui angä ëñëninge adocä tömancoo badongacäimpa. Tömengä wii badongä bai Wængongui nänö badongaincoo tömancoo edæ dæ ancædonimpa. 4 Mäningä iñömö mönö quëwenguinö entawengacäimpa. Ayæ mönö quëwenguinö edæ entawëninge tömengä waodäni beyæ në ñäö bai inongä ingacäimpa. 5 Tömengä në ñäö bai ingaingä inte mönö wëmö iñömö ta tamongä ate adoyömö ñäö bai bayonte edæ mönö wëmö iñömö edæ mänii ñäö ædö cæte mönæ emonguii.

6 Onguiñængä adocanque ingante Wængongui da pönongä pöningä ingampa. Tömengä ëmowo, Wäo, ante pëmonte ingacäimpa. 7 Tömengä iñömö Wængongui nänö ñäö ëmömämo ante edonque pöni bacäimpa, ante në ñäö bai ingaingä ingantedö ante apænecæte ante pongacäimpa. Adocä apænecä beyænque waodäni tömänäni tömengä nänö në apænedongä ingante pönencædanimpa, ante pongacäimpa. 8 Incæte mäningä wii ñäö bai ingaingä ingampa. Wæætë tömengä, Wacä waodäni beyæ në ñäö bai ingaingä ingampa, ante apænecæte ante pongacäimpa. 9 Në nö ñäö bai në ingaingä iñömö waodäni tömänäni inänite tömengä nänö ñäö ëmömämo pönoncæte ante inguipoga wææ pongacäimpa.

10 Tömengä inguipoga iñömö quëwengacäimpa. Ayæ tömengä inguipoga në badongaingä iñongante inguipogaque quëwënanäni wæætë Baa äninge tömengä ingante ædö cæte ate bai pönenguinänii. 11 Tömengä edæ tömengä qui weca pongacäimpa. Pongä ate tömengä guidënanäni incæ tömengä ingante ænämäi ingadänimpa. 12 Incæte tömengä ingante në ængainäni iñömö tömengä ëmowo, Codito, ante në wede pönënanäni iñönänite tömengä tömënanäni inänite Ao äninge edæ, Wængongui wënanäni bacædanimpa, ante pönö cægacäimpa. 13 Ayæ Wængongui wënanäni iñömö wii waocä ëñate bai inänipa. Waocä, Botö wë manguingue, ante änämäi iñongante ëñadänipa. Wii nänöögængä angä beyænque inänipa. Wæætë Wængongui tömenganque cæcä ate tömënanäni tömengä wënanäni badänipa.

14 Tömengä iñömö edæ, Wængongui nänö Angainö, ante në emongaingä iningue Waocä ëñate bagacäimpa. Waocä ëñate badinge tömengä mönö weca quëwengacäimpa. Mæmpo Wængongui Wengä adocanque inte adocä godömenque ñænængä inte në cædongä ingä atamönipa. Adocä Mæmpo weca quëwente në pongä iñömö tömengä nangui waadete pönö cædongä inte nöingä ängongä ingampa. 15 Wäo iñömö, Mäningä æbänö ingää, ante apænecäimpa. “Mäningä botö në apænedongä ingantedö ante iimaï apænëtabopa. Botö täno pömo imopa. Tömengä në ayæ Ponguingä iñömö godömenque ñænængä inte cædongä ingampa. Edæ botö ëñadämaï iñedë tömengä do ingacäimpa,” ante nangui pöni yedæ äninge Wäo apænëgacäimpa.

16 Mänigä nē ayæ Ponguingä iñömō nanguī pōni waadete pōnō cædinque tōmengä wæætē wæætē nānō entawēnō ante pōnongä æninque tomompa. 17 Edæ Wængonguī tōmengä nānō wææ angainō ante apæneçä ēñēninque Mōitee wodi wæætē adodō ante yewæmōninque waodāni inānite godongacāimpa. Wængonguī nānō waadete pōnō cægainō ante nōingä nānō angainō ante guiquēnē Itota Codito beyænque ēñēmompa. Itota Codito iñömō mōnō nē Ponguingä ingaingä ingampa. 18 Mōnō waocabo tōmāmō incæ Wængonguī ingante cōwē adāmaī imompa. Incæte tōmengä adocanque Wengä Wængonguī weca nē quēwēnongä inte, Mæmpo æbānō ingaingä ingāā, ante tōmengä odōmongä ate pōnēmompa.

*Wäo æpænē guidōnongä, Botō wī Codito imopa, angä
(Māateo 3.11-12; Mādoco 1.7-8; Odoco 3.15-17)*

19 Oodeoidi awēnēdi Eedotadēē quēwēnāni iñömō Wængonguī quī, ante nē godōnāni tōnō Debii wodi pæināni inānite da godōnāni Wäo weca godānipa. Gote pōninque adodāni, Æbidō inōmi imii, ante apænebi ēñēmōnie, āñōnāni Wäo iūmaī āninque 20 nāmā wææ ānāmā inte wæætē, Botō wī Codito inōmo imopa, ante edonque pōni angantapa.

—Botō wī Codito inōmo imopa.

21 Āñongante tōmēnāni wæætē tōmengä ingante,

—Æbidō inōmi imii, Ediya wodi inōmi imii. Apænebi ēñēmōnie.

Ante ānāni ēñēninque tōmengä,

—Wabo imopa.

Ante āñongä tōmēnāni wæætē,

—Wængonguī beyæ nē apænebi ayæ Ponguīmi inōmi imitawo.

Ānāni ēñēninque tōmengä,

—Wabo imopa.

Ante angantapa.

22 Tōmēnāni iñque āninque,

—Æbidō inōmi imii, ante apænebi ēñēmōnie tōō. Mōnitō imōnite nē da pōnōnāni weca godinque mōnitō tōmēnāni inānite, Æbidō imii, ante ancæmōnimpa. Iñinque bitō nāmā incæ æbānō āmii.

23 Āñōnāni Wäo wæætē tōmēnāni inānite, Itaiya wodi nē Wængonguī beyæ nē apæneçä nānō angainō bai ante iūmaī ante apænebo ēñencæminimpa.

—Ōnōmæca incæ nē aa pebo inōmo inte botō tōmēmo pepāmo iūmaī nāni ēñēnō impa. “Awēnē nānō ponguīnō ante tōinō pīnonte bai tee mōedāni,” ante aa bebopa, angantapa.

24 Paditeoidi nē wadō tedete wadō cædāni nāni cabo inōnāni inte tōmēnāni pancadāniya inānite da godōnāni Wäo weca nē godānipa. 25 Gote pōninque mānināni guiquēnē,

—Bitō wī Codito inōmi inte wī Ediya wodi inōmi inte ayæ wī Wængonguī beyæ nē apænebi ayæ Ponguīmi inōmi imipa. Bitō ædō cæte waodāni inānite æpænē guidōmi imii.

26 Ante āñōnāni Wäo wæætē,

—Botō ōnonque æpænē guidōnōmo imopa. Wæætē mīnitō weca adocanque a ongonä iñongante, Tōmengä æcānō ingāā, ante mīnitō ēñēnāmā iminipa.

27 Botō tāno pōmo imopa. Tōmengä nē ayæ Ponguingä ingampa. Botō ōnonque wædænque cæbo inte ædō cæte tōmengä awæncata incæ nī cæte cæbo imoo.

28 Betānia nāni quēwēñōmō Oododānō æmæmāa Wäo æpænē nānō guidōñōmō mānōmaī bagatimpa.

Itota Wængongui Codotedo

²⁹ Baänæ ate Itota bee tente pongä adinque Wäo apæneantapa. “Aedäni, ñingä Wængongui da pönongä pöningä ingampa. Ayæ tömengä waodäni ingui-poga quëwënanäni näni wënæ wënæ cægäinö ante æninque teëmë mongænte wænguingä ingampa, ante Wængongui tömengä ingante, Codotedo, ante pönö pemongacäimpa. ³⁰ Mäningä ññömö botö nê apænedongä ññongante botö ñmaï apænetabopa. ‘Botö täno pömo ñmopa. Onguiñængä nê ayæ Ponguingä ññömö godömenque ñænængä inte cædongä ingampa. Edæ botö ëñadämaï ññedë tömengä do ingacäimpa.’ ³¹ Botö incæ adobaï, Tömengä æcänö ingää, ante ëñënamäi intabopa. Mönö idægocabo ññömönte, Minitö tömengä ingante ëñencæminimpa, ante botö æpænë guidöninque pömo intabopa.”

³² Ayæ Wäo, Tömengä ingampa, ante äninque, “Botö æmö ayömote Wængongui Önöwoca incæ öönædë owote equemö bai wææ tömengäa næ gongængä atabopa. ³³ Wængongui, Waodäni inänite æpænë guidöe, ante botö imote nê da pönöningä wii botö ñmo angä bai botö, Itota æcänö ingää, ante ëñënamäimo incædömoimpa. Incæte tömengä botö imote ñmaï angantapa. ‘Wængongui Önöwoca incæ æcänö onguiñængäa wææ næ gongængä ayömi mäningä ññömö nê æpænë guidönäni bai Wængongui Tæiyæ Waëmö Önöwoca ingante da pönongä waodäni mímönoque pö guiiquingä, ante cæcä ingampa.’ ³⁴ Mäninö botö adinö impa. Mänömaï beyæ ñmaï ämopa, Mäningä ññömö Wængongui Wengä ñnongä ingampa,” ante Wäo apænegacäimpa.

Itota miñæ nê täno godäni

³⁵ Baänæ ate Wäo tönö tömengä ëmiñæna mënaa adoyömö ongöñönäni ³⁶ Itota wodo tebæ cægongä adinque Wäo angantapa.

—Aeda, tömengä ññömö Wængongui Codotedo ñnongä ingampa.

³⁷ Mäninö angä ëñëninque Wäo nänö nê ëmiñæna ñina incæ Itota ingante tee empo godaimpa. ³⁸ Itota dadi ëmænte ayongä tee empo pöna adinque angantapa.

—Quinante pöminäa.

Ante äñongä tömëna wæætë,

—Mætodo, æyömönö owobi. Apænebi ëñëmönae.

Änatapa. Mänine, Mætodo, ante mönö tededö, Nê Odömongä, ante impa.

³⁹ Äna ëñëninque tömengä,

—Ægodöeda go aeda.

Äñongä tömengä miñæ godatapa. Goyöna ædæ wææcä intapa. Ayæ nänö owocönë gote adinque tömëna adoönæ tömengä weca a ongönapa.

⁴⁰ Wäo nänö äñinö ëñëninque Itota ingante tee empo goda mënaa ññönate adocanque Äntade ññömö Timönö Pegodo tönñacä ingantapa. ⁴¹ Tömengä nänö tönñacä Timönö ingante ancæte ante diqui diqui minte gote adinque angantapa.

—Mëetiya mönö äñongä ingante atamönapa, angantapa. Tömengä ññömö Wængongui nänö nê Pönongaingä Codito ñnongä ingampa.

⁴² Ayæ Timönö ingante Itota weca ænte mämongä pongä adinque Itota angampa.

—Bitö Wäo wë Timönömi ñmi abopa. Botö wæætë, Bitö tæimö dicabo bai ñmipa, ante bitö ñmite mönö tededö, Quepata, pönö pemömpa. Önonque adowo ëmowo incæ guidiego tededö, Pegodo, äñanipa.

Pedipe tönö Näatänaedo ñnate Itota angä tee empo goda

⁴³ Baänæ ate Itota, Gadideabæ ante gocæboimpa, ante pönengäimpa. Pedipe ingante adinque Itota tömengä ingante,
—Botö miñæ põe, ämo, angacäimpa.

⁴⁴ Pedipe iñömö Æntade tönö Pegodo bai Betaida nana quëwëñömö adoyömö quëwëningä ñongaimpa. ⁴⁵ Pedipe Näätänaedo weca gocä adinque tömengä ingante ñimai äninque,

—Wængongui nänö wææ angainö ante yewæmöninque Möitee wodi nänö nê yewæmongaingä ingante mönitö atamönipa. Wængongui beyæ nê apænegaïnäni adobai mäningä ingantedö ante yewæmongadänimpa. Tömengä iñömö Itota Näätateta quëwëningä inte Ootee wengä ingampa, ante angantapa.

⁴⁶ Ante äñongä Näätänaedo wæætê,

—Näätateta quëwëñömö adocanque waa quëwente pongä, ante mönitö dicæ ëñëmöniyaa.

Angä ëñëninque Pedipe iñömö,

—Pö ae, angantapa.

⁴⁷ Itota ayongä Näätänaedo pongä adinque tömengä,

—Ïngä iñömö näwä idægocä ñongä inte tömengä nê nö entawëningä inte babæ cædämai ñongä ingampa, ämopa.

⁴⁸ Angä ëñëninque Näätänaedo,

—Æbänö imoo, ante bitö æbänö cæte do ëñëmi,

Ante äñongä Itota wæætê tömengä ingante,

—Pedipe iñömö bitö ñimite ayæ aa pedämai iñedë bitö iigowæncawa tæ contabi iñömite botö bitö ñimite do atabopa, angacäimpa.

⁴⁹ Ayæ Näätänaedo,

—Awënë nê Odömömi ñimi, bitö Wængongui Wëmi ñömö ñimipa. Idægoidi mönö cabo iñömte bitö mönitö Awënë Odeyebi ñömö ñimipa, ämopa.

⁵⁰ Äñongä Itota wæætê,

—Bitö iigowæncawa tæ contabi iñömite botö bitö ñimite atabopa, ämo beyænque pönëmi ñimipa. Mäninö ante adinque bitö godömenque botö bamönengæ cæbo acæbiimpa, ämopa.

⁵¹ Tömengä godömenque angantapa.

—Bitö ñimite näwangä ämopa. Öönæde wi ænete bayö Wængongui anquedoidi Waocä ëñagingä weca wææninque æiyönäni bitö acæbiimpa.

2

Cänaa quëwëñömö nani monguimæno cæte bedäni

¹ Mëönaa go adoönæque iñonte Cänaa quëwëñömö Gadideabæ iñömö monguimæno ante bedäni. Itota wäänä adoyömö ponte ongacäimpa.

² Itota tömengä emiñænäni tönö tömënäni ñänite adobai, Monguimæno nani bequinque, ante tē tē wente ænte pongadänimpa. ³ Ayæ yowepæ wædænque ti nämæ biñömæ nani ämæ dæ bedäni adinque Itota wäänä tömengä Wengä ingante,

—Tömënäni biñömæ dæ ämæmpa.

⁴ Äñongä Itota wæætê,

—Badä ëñëmi. Botö cæquënëñö tömëmoque cæquïnö ñimipa. Botö cæyedë wii eyepæ ñimipa, ämopa.

⁵ Tömengä wäänä iñömö nê cædäni ñänite,

—Minitö ñimite æbänö angä ëñente cædäni, angantapa.

⁶ Ayæ önompo æmæmpoque go adocadeque æpæncade dica inte badöincade iñömö cö cædäni ongoncadepa. Wængongui weca guicæte ante waëmö bacæmöimpa, ante äate cædänipa, ante oodeoidi nâni äagaincade incadepa. Ìincade pancacadea otenta ditodo næ ongoncadepa. Ayæ pancacadea tië ditodo næ ongoncadepa. ⁷ Nê cædäni inänite Itota,

—Æpæncadecoo iñömö æpæ eyede pöni pe ñiñæedäni.

Angä ëñëninque pe ñiñængadänimpa. ⁸ Ayæ tömënäni inänite,

—Owæta ænte wædænque mä iyænte monguimæno ante nê cædongä ingante godömini æncæcäimpa, ämopa.

Angä ëñëninque mänömaï cægadänimpa. ⁹ Ayæ monguimæno ante nê cædongä æpæ inimæ incæ biinomæ badimæ æninque, Æbänö imæ, ante bedinque tömengä, Itota nänö badönimæ impa, ante ëñënamäi inongäimpa. Nê cædönäni Itota weca æpæ pe ñiñæñäni que ëñëñönänimpa. Ayæ monguimæno ante nê cædongä iñömö nê monguingä ingante, Nänënë pöe, aa pecä pongä ate, ¹⁰ Ìimaï angantapa.

—Wadäni tömänäni waimæ biinomæ täno godönäni bedänipa. Ayæ ate ææmæ becæ pönäni tömo pöni bedäni adinque tömënäni biinomæ wædænque godonte nâni ænimæ wæætê godönäni bedänipa. Bitö guiquënë ñowoyedê waimæ biinomæ bitö nänënë concædimæ ænte pömipa.

¹¹ Itota, Acædänimpa, ante mänömaï cædinque tömengä Cänaa quëwëñömö Gadideabæ iñömö mänii mä nänö bamönengæ cægacäimpa. Mänii tæi piñænte bamönengæ cæcä adinque waodäni, Tömengä waëmö pöni inte cæcampa, ante edonque agadänimpa. Ayæ tömengä ëmiñæñäni iñömö tömengä ingante godömenque wede pönëñäni bagadänimpa.

¹² Ayæ ate Capënaömö quëwëñömö Itota tömengä wäänä tönö tömengä biwiidi tönö tömengä ëmiñæñäni tönö wææ gogadänimpa. Mäniñömö godinque wædænque ëönæ quëwengadänimpa.

*Wængongui oncö tæiyæ waëmö bacæimpa, ante cæcä
(Mäateo 21.12-13; Mäadoco 11.15-18; Odoca 19.45-46)*

¹³ Wodo pänta gogaionæ, ante oodeoidi Patowa nâni ææmæ cænguionæ oo pöni bayedê Itota Eedotadê iñömö æigacäimpa. ¹⁴ Tömengä iñömö Wængongui oncö ñæñæncönê yabæcönê pö guidinque ayongä wagadaidi obegaidi tönö equemöidi inänite godonte æncæte ante nê mänäni inänite acantapa. Ayæ wadäni campio næænte nê godonte æñönäni iñömö nâni godonte æimpaa tæ contayönänite tömengä acantapa. ¹⁵ Yæguincamê ñæñæmömo nää wënëninque que cæte ate æninque tömengä Wængongui oncö ñæñæncönê yabæcönê nê ongönäni inänite tatodongä tao godänitapa. Adobai obegaidi tönö wagadaidi inänite, Tao gobæwedäni, angä tao godänitapa. Ayæ campio næænte nê godonte æñönäni tömënäni tiguitamö æninque tömengä wido cæcä gueogæ gotimpa. Ayæ adodäni nâni æimpaa bæ tacä guidömëmæ go wææntapa.

¹⁶ Ayæ equemöidi godonte æncæte ante nê mänäni inänite Itota,

—Minitö equemöidi ænte tao gobæwedäni. Botö Mæmpo oncönê incæ minitö ædö cæte, Mönö godonte æiñömö bai impa, ante cæminitapa töö, angacäimpa.

¹⁷ Mäninö angä ëñëninque tömengä ëmiñæñäni Awënê Dabii nänö yewæmongainö ante Ìimaï ante pönente wædänipa. “Bitö oncö ante waodäni waa acædänimpa, ante cæcæboimpa, ante botö nanguï cæinente wængui wæ,” ante yewæmongatimpa.

¹⁸ Ayæ oodeoidi awënëdi pancadäniya tömengä ingante,

—Bitö mänii tömää awënë bai cæbi incæ æbänö bitö bamönengæ cæte odömömi adinque mönitö, Mäningä nē angä ingampa, ante eñencæmönimpa, ämönipa.

¹⁹ Äñönäni Itota wæætē tömēnāni inänite,

—Wængongui tæiyæ waemö oncö incæ munitö iincö bæ tate ewēmīni ininque botö meönaa go adoönæque iñö miincö mænoncæboimpa, ämopa.

²⁰ Angä eñēninque oodeoidi awēnēdi pancadāniya,

—Wængongui tæiyæ waemö oncö coadenta i tei wadepo ganca mænogadānimpa. Bitö iñömö ædö cæte, Botö meönaa go adoönæque iñö miincö mænoncæboimpa, ämii, änänitapa.

²¹ Itota iñömö nämä baö incæ ante, Wængongui tæiyæ waemö oncö bai impa, ante apæncä inongäimpa. ²² Tömengä iincayæ wængä ate Wængongui, Nāni ömæmōe, angä ñāni ömæmongä ate, Æbänö angacäi, ante tömengä emiñænāni pönēnānitapa. Ayæ, Wængongui angä eñente nāni yewæmongainö nö impa, ante pönēnāni inte ayæ Itota tömēnāni inänite nänö äninö ante adobai pönengadānimpa.

Itota, Mönö waocabo æbänö imöö, ante eñengampa

²³ Patowa nāni ææmæ cæyedē Itota Eedotadēe iñömö ponte quēwēninque, Acädānimpa, ante bamönengæ nangui cæcä adinque waodāni tæiyænāni iñömö, Mäningä mönö Codito ingampa, ante pönengadānimpa. ²⁴ Itota edæ, Waodāni tömānāni æbänö entawēnāni inänii, ante do eñēnongä inte tömengä, Wabänö pönēnāni, ante tömēnāni inänite gomö adongä ingantapa. ²⁵ Edæ tömengä waodāni nāni entawēnö ante do eñēnongä ingantapa. Ininque waocä iñömö, Waodāni æbänö cædāni, ante apæncæcäimpa, ante Itota tömengä ingante, Bitö botö imo adodö ancæbiimpa, ante änāmai ingacäimpa.

3

Itota tönö Nicodemö

¹ Paditeocä adocanque tömengä emöwo Nicodemö tömengä iñömö oodeoidi awēnēdi tönö nē godongämæ cæcä ingacäimpa. ² Adocä woyowotæ Itota weca pöninque,

—Awënë nē Odömömi eñēmi. Wængongui, Odömoncæbiimpa, ante bitö imite da pönongä pönimi imipa, do eñēmönipa. Edæ Wængongui waocä tönö godongämæ cædāmai ingä ininque mäningä ædö cæte bitö bai bamönengæ cæcä aquimönii.

³ Angä eñēninque Itota wæætē,

—Bitö imite näwangä ämopa. Nē mempoga eñadinganque Wængongui Awënë Odeye nempo guite aquingä ingampa.

⁴ Äñongä Nicodemö,

—Waocä picängä ba ate ædö cæte mempoga eñäquingää. Tömengä nänö wäänä cæncadē ædö cæte mempoga guii æidinque eñäquingää.

⁵ Angä eñēninque Itota angantapa.

—Bitö imite näwangä ämopa. Waocä æpænē guidengä iñongante Wængongui Önöwoca cæcä beyænque mempoga eñadinganque Wængongui Awënë Odeye nempo guite quēwengingä ingampa. ⁶ Baonga beyænque nē eñadāni iñömö edæ baonque eñate quēwēnānipa. Wæætē Wængongui Önöwoca cæcä beyænque nē eñadāni iñömö Wængongui Önöwoca ingante ewocate quēwēnānipa. ⁷ Botö, Bitö mempoga eñäquēnēmi imipa, ante botö änö

ēñēninque, Æbāmē impa, ante ānāmaī incæbiimpa. ⁸ Woboyæ nānō cægaī bai wayōmō wayōmō pæmænte gopa. Woboyæ nānō pæmæmāmo ēñēmō incæ, Ædonō pæmænte pō, ædonō pæmænte go, ante ēñēnāmaī imompa. Wængonguī Ōnōwoca cæcā beyænque nē ēñādāni tōmānāni inānite tōmengā æbānō cæcāā, ante adobaī ēñēnāmaī imompa, āmopa, ante Itota apænecantapa.

⁹ Apænecā ēñēninque Niicodemō,
—Æbānō inguūī.

¹⁰ Āñongā Itota wæætē,

—Idægoidi inānite nē odōmōmi īmi incæte māninō ante ædō cæte ēñēnāmaī īmii. ¹¹ Bitō īmite nāwangā āmopa. Mōnitō quiēmē ante ēñēnīmōni inte māninō ante apænemōnipa. Mōnitō quiēmē ante adīmōni īninque, Mānōmaī impa, ante apænemōnipa. Minitō guiquēnē mōni ānō ante apænemōni ēñēninque ayæ Baa āmīni inte pōnēnāmaī īminipa. ¹² Botō mīnitō īmīnite, Inguipoga quēwēnāni weca æbānō ī, ante apænedīmo īmo incæte mīnitō ēñēnāmaī īminipa. Īninque Wængonguī cæcā beyænque ōnædē mīni quēwenguīnō ante æbānō ī, ante apæneho bai ædō cæte pōnenguīmīni, ante apænecantapa.

¹³ Ayæ apænedinque, “Waodāni tōmānāni ōnædē æidāmaī ingadānimpa. Waobo nē ēñagaimō inte ōnædē quēwente nē wææ pōmo īñōmō botō adoboque ōnædē æibo īmopa. ¹⁴ Mōitee wodi ōnōmæca tæntæ nāni badōninto æninque awāa nā cædinque gō cæcā a ongongatimpa. Waobo ēñagaimō īmote adobaī awāa timpodinque tīwadinque gō cædāni wængonguēnēmo īmopa. ¹⁵ Mānōmaī botō īmote cædāni adinque botō īmote nē wede pōnēnāni īñōmō tōmānāni cōwē wænāmaī quēwencædānimpa,” ante Itota apænegacāimpa.

Wængonguī nānō waadete pōnēnō

¹⁶ “Edæ Wængonguī incæ inguipoga quēwēnāni inānite nē waadete pōnengā inte tōmengā Wengā adocanque onguīñængā īñongante pōnongā pongacāimpa. Īninque æcānō tōmengā ingante nē wede pōnēna īñōmō tōmengā wē womōnāmaī inte cōwē wænāmaī quēwencæcāimpa. ¹⁷ Edæ Wængonguī incæ tōmengā Wengā ingante inguipoga īñōmō da pōnongā pongacāimpa. Incæte, Inguipoga quēwēnāni nāni pante wæquinque, ante apænte ancæte ante wīī pongacāimpa. Wæætē inguipoga quēwēnāni inānite tōmengā ængā beyænque quēwencædānimpa, ante tōmengā ingante da pōnongā pongacāimpa.”

¹⁸ “Æcānō tōmengā ingante nē wede pōnēna īñōmō Wængonguī tōmengā ingante, Bitō pante wæquinque cæbipa, ante apænte ānāmaī incæcāimpa. Æcānō guiquēnē wede pōnēnāmaī ina īñōmō Wængonguī tōmengā ingante, Botō Wengā adocanque īñongante bitō tōmengā emōwo ante pōnēnāmaī īnōmi inte wæcæbiimpa, ante do apænte angā ingampa. ¹⁹ Wængonguī nānō apænte ānō īñōmō īmaī impa. Nē nāō bai inongā īñōmō, Wængonguī æbānō ingāā, ante inguipoga īñōmō ancæte ante pongacāimpa. Incæte waodāni tōmēnāni nāni cædīmāmo wēnæ wēnæ ī beyænque wēmō īñōmō ante waadete pōnēnāni inānipa. Wæætē nē nāō bai inongā ingante waadedāmaī inānipa. ²⁰ Nē wēnæ wēnæ cædōnāni inte nāō īñōmō ante pīīninque Baa āninque, Mōnō cædīnō edonque pōni badāmaī ingæimpa, ante nāō īñōmō pōnāmaī inānipa. ²¹ Waodāni Wængonguī nāwangā nānō āmaī nē cædōnāni guiquēnē, Mōnō cædīnō ante Wængonguī mōnō tōnō godongāmæ cæcā beyænque cætamompa, ante edonque pōni acædānimpa, ante cædinque nāō īñōmō pōninque cædānipa.”

Wäo nē guidōnongā Itota ingantedō ante apænecā

²² Ayæ ate Itota tömengä emiñænäni tönö Oodeabæ wædænque näni quëwëñömö godänitapa. Gote pöninge mäniñömö tömënäni tönö wædænque quëwëninge Itota angä beyænque tömënäni waodäni inänite æpænë guidönäni guigadänimpa. ²³ Ænöö quëwëñömö æpæ nangui mæ adinque Wäo mäniñömö guidongä guigadänimpa. Ayæ waodäni, Wäo monitö imönite æpænë guidonguingä, ante cöwë tömengä weca pönäni inänite guidongä guidänimpa. Ænöö quëwëñömö Tadii quëwëñömö eyequei inimpa. ²⁴ Mäniñedë Wäo ingante ayæ tee mönedämai ingadänimpa.

²⁵ Wäo emiñænäni pancadäniya oodeocä adocanque tönö apænedinque, Mönö oodeocabo æbänö cæte Wængongui weca guicæte ante waëmö bacæmöimpa, ante tömënäni näni pönënö ante guëadö guëa ante tedewëñäni. ²⁶ Adodäni Wäo weca ponte apænedinque,

–Në odömömi ëñëmi. Oododänö æmæmäa bitö weca në pöningä ingantedö ante bitö, Mäningä ingampa, ante apænebitawo. Edæ mäningä onguiñængä iñömö adobaï æpænë guidongä guidänipa töö. Waodäni tömänäni tömengä weca godänipa, ante wædänitapa.

²⁷ Ante wædäni ëñëninge Wäo,

–Wængongui öönädë quëwëngongä pönö angä æninque waocä mänömai beyæ cæcampa. ²⁸ Botö wii Codito inömo imopa. Iñæmpa Wængongui botö imote täno da pöngongä pönimo imopa. Tömengä ayæ Ponguingä, ante apænetabopa. Mänömainö ante apænebo ëñënimini inte minitö tömëmini mäninö ante në apænequëñëmimi iminipa. ²⁹ Monguingä iñömö mongä ate tömengä onquiuyængä nänöogængä bacampa. Tömengä guidengä iñömö në monguingä ante wänö cöninge ëñëñongä monguingä apæneca ëñëninge, Monguingä apæneca ëñëmopa, ante watapæ tocampa. Botö adobaï Codito apæneca ëñëmopa, ante mäningä bai nangui watapæ tobo imopa. ³⁰ Tömengä iñömö godömenque ñænængä inte cædongä baquëñengä ingampa. Botö guiquënë pönömenque wædämo inte cædömo baquëñëmö imopa, ante Wäo apænegacäimpa.

Öönädë në quëwente wææ pongä

³¹ Ayæ Wäo godömenque apænecantapa. Öönädë në quëwente wææ pongä iñömö tömengä iñömö wii wadäni bai wædangä inte wæætë ñænængä inte cædongä ingampa. Öönädë në quëwente wææ pongä iñömö tömengä godömenque ñænængä inte cædongä ingampa. Inguipoga iñömö në ëñacä guiquënë waodäni bai quëwëngongä inte inguipogaque ante apænecampa. ³² Tömengä Wængongui weca quiëmë adingä inte quiëmë ëñëningä inte mäninö ante apæneca ëñëninge wadäni wæætë, Näwangä impa, ante änämai inänipa töö. ³³ Mäninö ante në Ao angä guiquënë tömengä, Wængongui näwangä angä ingampa, ante edonque pönä angä inongä ingampa. ³⁴ Edæ Wængongui nänö da pönöningä iñömö Wængongui nänö änö ante apænecampa. Tömengä ingante Wængongui iñömö tömengä Önöwoca ingante godongä æninque tömengä ædæmö ëwocate quëwengampa. ³⁵ Mæmpo Wængongui iñömö tömengä Wengä ingante në waadete pönengä ingampa. Wængongui tömengä ingante, Bitö nempo quino inincoo tömancoo pönömo æninque bitö awënë bacæbiimpa, ante pönö cægacäimpa. ³⁶ Æcänö Wængongui Wengä ingante në wede pönëna iñömö tömengä cöwë wænämai quëwencæcäimpa. Æcänö Wængongui Wengä ingante në Baa ante pönëñämai ina guiquënë tömengä wii cöwë wænämai quëwencæcäimpa. Edæ Wængongui

tömengä ingante ænguī nānō panguīmāmo cōwē cædongā ingampa, ante Wäo māniñedē iñque apænegacäimpa.

4

Itota Tämadiabæ onquiyængä ingante apænecä

¹ Paditeoidi inänite iīmai ante tededäni eñēnānitapa. Itota pönō cædinque æpænē guidongä guiddinque tömengä nānō emiñænāni iñomō wīl Wäo emiñænāni bai wædænque badāni inte nanguī ināni badānipa, ante tededānitapa. ² Mänōmai ānāni incæte wīl Itota nē guidongä inongäimpa. Wæætē tömengä emiñænāni waodāni inänite guidōnāni guigadānimpa. ³ Māniñō ante Paditeoidi do eñēnānipa, ante ānāni eñēninque Awēnē Itota Oodebæ quēwēninque wadæ go Gadideabæ iñomō ocæ emænte gogacäimpa.

⁴ Gadideabæ taadō Tämadiabæ iñomō tæcæguedē inō godō tömengä goquēngä inongäimpa. ⁵ Tämadiabæ iñomō godinque tömengä Ticada nāni āñomō pongantapa. Māniñi Ticada quēwēñomō eyequei docä AACobo wodi tömengä wengä Ootee wodi ingante, Pancabaa bitō omæ baquññomō, ante tömengä ingante nānō godongaimæ inimpa. ⁶ Ayæ æpāamōnicæ AACobo wodi nānō ææ wogaimōnicæ adoyōmō inimpa. Itota taadō gobæ inō godinque nangæ badinque æpāamōnicæ iñomō pō tæ contayongä māniñedē tæcæ bæcä bagatimpa. ⁷ Tæ contate ongōñongä Tämadiabæ quēwengä onquiyængä æpæ iyænte tadonte æncæte ante pongä adinque Itota tömengä ingante,

—Æpæ pönōmi beboe, angantapa. ⁸ Edæ tömengä miñæ nē godāni māniñāni quēwēñomō cænguī godonte æncæ godāni inōnānimpa.

⁹ Tämadiaidi inänite oodeoidi cōwē gomō adāni inānipa, ante eñengä inte Tämadiabæ quēwengä onquiyængä iñomō Itota ingante,

—Bitō oodeobi imi incæte botō Tämadiabæ quēwēmo iñomote bitō ædō cæte botō imote, Æpæ pönōmi beboe, āmii, āmopa.

¹⁰ Åñongä Itota wæætē,

—Bitō, Wængonguī quīnō nānō pönōni i, ante eñente bai ayæ, Æbodō inōmo inte bitō imite, Æpæ pönōmi beboe, ante apæneboo, ante eñente bai bitō wæætē botō imote, Æpæ pönōmi beboe, ancædōmiimpa. Ayæ botō bitō imite æpæ quēwenguimæ pönōmo becædōmiimpa, āmopa.

¹¹ Angä eñēninque onquiyængä,

—Awēnē, bitō æpæ mā iyæncade dæ ampa. Ayæ æpāamōnicæ guilbæ impa. Māniñæ æpæ quēwenguimæ bitō nē apænedimæ ædōnō mā iyænte ænguimii. ¹² Mönō docä mæmpo AACobo wodi iñomō, Botō æmæwo wæmo adinque botō æpāamōnicæ minitō quī bacæimpa, ante iñmōnicæ mōnō imonte godongacäimpa. Tömengä adomōnicæ æpæ begacäimpa. Tömengä wēnāni tōnō tömengä cæningäidi adobaī adopæ begadānimpa. Adocä mōnō docä wædangä iñongante bitō godōmenque ñænæmi inte nē cædōmi imitawogaa, āmopa.

¹³ Åñongä Itota wæætē,

—Æcāmenque iñomō māniñæ bedinque wæætē gæwænte bacæcäimpa.

¹⁴ Æcāmenque botō godonguimæ nē becä guiquēnē tömengä gæwænāmai cōwē quēwæncæcäimpa. Wæætē botō tömengä ingante tömēmo godonguimæ godōmo bedinque tömengä botō quēwēñō entawente quēwæncæcäimpa. Æpāamōnicæ cōwē cægō bai botō tömengä mīmōno godonguimæ beyænque tömengä wænāmai nānō quēwenguīnō do æninque quēwæncæcäimpa, āmopa.

¹⁵ Onquiyængä tömengä ingante,

—Awënë, äinique, Botö gæwæñāmaī bacæboimpa, ante mǎnīmæ botö ïmote pönömi beboe, ämopa. Ayæ mǎniññömö cöwë æpæ iyæncæ pönāmaī incæboimpa.

¹⁶ Ante äñongä tömengä wæætë,

—Goe, bitö nǎnööögængä ingante aa pedinque ænte mǎmömi pongäe, angan-tapa.

¹⁷ Äñongä tömengä wæætë,

—Botö nǎnööögængä dæ ampa.

Angä ëñëninque Itota tömengä ingante,

—Bitö, Botö nǎnööögængä dæ angampa, äinique nö ante ämipa. ¹⁸ Ìñæmpa bitö nǎnööögæidi önompo æmæmpoque ïñönänite bitö tömënäni ïñänite mönïmi ïmipa töö. Ayæ ñöwoyedë onguññængä bitö weca nē quëwengä ïñömö wïi bitö nǎwä nǎnööögængä ingampa. Ìninqe ñöwo bitö äno ïñömö edæ nǎwangä impa, ämopa.

¹⁹ Angä ëñëninque onquiyængä,

—Awënë, Bitö Wængonguī beyæ nē apænebi ïmi adinque ëñëmopa. ²⁰ Mönitö dodäni mæmpoidi wodi, ïi onquiyabo ïnö gote Wængonguī ingante, Bitö Awënë Wængonguī imidö angüënë, ante ædæ wææñinque angadänimpa. Minitö nē oodeoidi ïmïni guiquënë, Wængonguī ingante waa ate apænecæte ante Ee-dotadë quëwëñömö mǎniññomonque godinque ædæ wæænte apænecæimpa, äminipa töö.

²¹ Äñongä Itota wæætë,

—Onquiyæmi ëñëmi. Botö äno ëñëninque pönëe. Minitö ïñömö ædæ wææñinque botö Mæmpo ingante, Bitö Awënë Wængonguī imidö angüënë, ante ïi onquiyabo ïnö incæ Eedotadëe mǎniññömö incæ mïnitö mǎniñö ante änāmaī angüönæ oo pöni impa. ²² Minitö tāmadiadi ïñömö nē Wængonguī ingante, Bitö Awënë Wængonguī imidö angüënë, ante ædæ wææñinque apænemïni incæte adocä ingante, Æbänö ingää, ante ëñëñāmaī ïminipa töö. Mönitö guiquënë nē ædæ wææñinque Wængonguī ingante waa ate apænemöni inte adocä, Æbänö ingää, ante do ëñëmöni ïmönipa. Edæ, Nē wënæ wënæ cædäni wæncæ cædinäni incæ quëwencædänimpa, ante nē Engä ïñömö oodeocä ïnongä ingä apa änewëe. ²³ Botö Mæmpo ingante, Bitö Awënë Wængonguī imidö angüënë, ante ædæ wææñinque nǎwangä ante apænedönäni inte apænecædänimpa. Adodäni, Nǎwangä impa, ante nö pönente ëwocadäni inte ædæ wææñinque Wængonguī ingante mǎniñö ante watapæ apæncædänimpa. Mǎniñö ante nāni apænequionæ ïñömö edæ oo pöni impa. Edæ do ïnque batimpa. Wængonguī, Mǎnōmaī entawente nö pönänäni baī ïnāni ïnänite diqui diqui mininque, Mǎniñäniqwe botö ïmote, Bitö Awënë Wængonguī imidö angüënë, ante ædæ wææñinque watapæ apæncædänimpa, angampa. ²⁴ Wængonguī Önöwocaque ëwocate quëwengä ingampa. Ìninqe nē ædæ wæænte tömengä ingante watapæ apænedäni ïñömö tömënäni, Nǎwangä impa, ante nö pönente ëwocadäni inte ædæ wææñinque tömengä ingante watapæ apænequëñëñäni ïñäni, ämopa.

²⁵ Angä ëñëninque onquiyængä,

—Botö, Mëetiya nāni Codito äñongä poncæcäimpa, ante do ëñëmopa. Tömengä pongä ate, Æbänö inguüi, ante mönö ïmote tömänö odömonte apæncä ëñencæmönimpa.

²⁶ Äñongä Itota wæætë,

—Botö nē apænebo ïñömö Codito ïnömo ïmo apa cæbii, ämopa.

²⁷ Tæcæ apæneyongante tömengä miñæ nē godäni ocæ emænte ponte ayönäni tömengä iñömö onquiyængä ingante apæneçä adinque, Æbänö cæ wæmönii, ante guifente wæðanitapa. Incæte, Æbänö ämii, ante, Quinante tömengä ingante tedebii, ante adocanque incæ änämaï ingantapa. ²⁸ Ayæ onquiyængä tömengä iyæncade emö cæte nāni quēwēñömö ocæ emænte gote pöninque waodäni inänite apænedinque,

²⁹ —Ægodöedäni, onguifængä iñömö botö imote tæcæ adinque, Botö æbänö cæboo, ante tömänö ante botö imo nē apæneçä ingante pö aedäni. Mäningä wabänö mönö Codito inongä ingantawo, ante ämopa.

³⁰ Angä eñëninque tömënäni nāni quēwēñömö tao godinque tömengä weca gogadänimpa. ³¹ Onquiyængä nāni quēwēñömö tæcæ goyongä Itota nänö nē emiñænäni iñömö tömengä ingante,

—Awënë nē Odömömi imi wæðænque cæe, ämönipa.

³² Ante äñönäni tömengä wæætë tömënäni inänite,

—Botö cængui botö äädö ante quinö i, ante minitö guiquënë tömää eñënämaï iminipa töö.

³³ Angä eñëninque tömengä emiñænäni godongämæ nāmanque apænedinque,

—Wabänö wacä tömengä ingante cængui ænte pongantawo.

³⁴ Äñönäni Itota,

—Botö imote nē da pönongä nänö änö bai botö cædö iñömö mänii tömö cængui bai impa. Ayæ, Tömengä nänö cædö ante tömänö iinque cæbopa, ante botö cædö iñömö botö cængui bai adobai impa. ³⁵ Minitö iñömö, Mëa go mëa apäicä bayonte amiñayedë tömömoncodë gæcæmönimpa, ante wii äminitawo. Botö guiquënë minitö iminite ämopa. Waodäni inänite wi æmonte aedäni. Edæ mäninäni tömömoncoo gæyedë bai inänipa. ³⁶ Itota, Botö beyæ ante waodäni inänite nē gædongä ingante botö, Bitö cæbipa, ante paga cædinque ñowoyedë incæ do pönömo ængampa. Wænämaï wantæpiyæ quēwencæðänimpa, ante cædinque ñowoyedë incæ tömengä tömënäni inänite do gædongä ingampa. Iinque botö änö ante waodäni mimöno nē quiyadingä tönö nē gædingä tönö guëa tocæðaimpa. ³⁷ Mänömaï wëenëñedë nāni angainö ante, Waocä adocanque tömömö quiyacä ate wacä guiquënë nē gædongä ingampa, ante nāwangä ante impa. ³⁸ Tömömoncodë iñömö cæðäni bai cæðämaï imini incæte minitö tömömoncoo gæquinäni bai bacæminimpa, ante botö, Waodäni botö quinäni inänite gæcæminimpa, ante minitö iminite da godömo gominitapa. Wadäni iñömö do mänincodë nanguï pöni quiyate cædinque botö änö ante waodäni inänite apænegadänimpa. Minitö guiquënë mini cæðämaï iñömö incæ önonque gæðimäni iminipa, ante Itota apænegacäimpa.

³⁹ Onquiyængä guiquënë tämadiaidi mänifñömö nāni quēwēñömö quēwënäni inänite, “Tömengä iñömö botö imote tæcæ adinque, Botö æbänö cæboo, ante tömänö ante botö imote apæneçantapa,” ante apæneçä eñëninque tömënäni nanguï inäni Itota ingante pönengadänimpa. ⁴⁰ Tämadiaidi tömengä weca godinque, Bitö mönitö weca a ongöe, änäni eñëninque tömengä mëönaa iñonte tömënäni weca owocantapa. ⁴¹ Tömengä nänö owoyedë tömengä nänö änö beyænque godömenque tæiyænäni iñömö tömengä ingante wede pönente badänitapa. ⁴² Adodäni onquiyængä ingante,

—Wii bitö apænete änonque ante eñëninque pönömöni inte mönitö tömengä apæneçä adobai eñënimöni imönipa. Ayæ, Mäningä iñömö inguiyoga mönö

quëwencabo iñõmonte tõmengä näwangä mönõ imonte në Ænongä ingampa, ante do ëñëmõnipa, apænegadänimpa.

Itota cæcä beyænque awënë tõnõ cæcä wengä waa bacäi

⁴³ Mëõnaa go ate tõmengä mäniñõmö quëwëninque wadæ godinque, Gadideabæ gocæboimpa, ante gocantapa. ⁴⁴ Itota incæ wëenëñedë, ïimaï impa, ante ånongäimpa. Wængongui beyæ në apænegä inte tõmengä nänõ pægaïmæ incæ mäniñõmö apæneyongä tõmengä tõnõ pægaïnäni guiquënë tõmengä ingante wïi waa adänipa töö, ante ånongäimpa. ⁴⁵ Tõmengä mäniï Gadideabæ nänõ ponque pongä adinque gadideaidi edæ Eedotadëë iñõmö Patowa nani ææmæ cæyedë Itota bai mäniñõmö gote ongõñõnani, Tõmengä æbänõ cæcäa, ante tõmäå adinäni inte, Bitõ põmi waa amõnipa, ante tõmengä ingante apænegadänimpa.

⁴⁶ Ayæ Gadideabæ godinque Itota wæætë Cänaa nani quëwëñõmö, Æpæ incæ biinõmæ bacæïmpa, ante wëenëñedë nänõ cædiñõmö adoyõmö gocantapa. Capënaõmö nani åñõmö quëwëninque adocanque pancabaa awënë tõnõ godongämæ cæcä iñõmö tõmengä wëñængä onguiñængä wënæ wënæ inongäimpa. ⁴⁷ Adocä onguiñængä iñõmö, Itota Oodeabæ quëwente Gadideabæ pongä, ånani ëñëninque tõmengä Itota weca gote angantapa. Botõ wëñængä onguiñængä wæncæ cæcä iñongante bitõ tõmengä ingante cæbi waa bacæ. Ægodöe. ⁴⁸ Itota tõmengä ingante,

—Botõ, Acæminimpa, ante bamõnengæ cæbo ate wæmïni inte mïnitõ mäniñõ beyænque botõ imo pönëmïni awædõ.

⁴⁹ Ante apænegä ëñëninque pancabaa awënë tõnõ godongämæ cæcä,
—Awënë, botõ wëñængä ayæ wænåmaï iñedë ægodöe gocæïmpa.

⁵⁰ Ante åñongä Itota wæætë,

—Ñõwo wadæ goe. Bitõ wëñængä iñõmö quëwencæcäimpa, åmopa. Angä ëñëninque onguiñængä, Itota nänõ ånõ nõ impa, ante pönëninque wadæ gogacäïmpa. ⁵¹ Tõmengä, Botõ oncõ, ante taadonque goyongante tõmengä beyæ në cædõnani tõmengä ingante apænegæte ante põ bee tënänitapa. Põ bee tëninque,

—Bitõ wëñængä waa bacäi.

⁵² Ante apænedäni ëñëninque tõmengä tõmënäni inånite, Botõ wëñængä æyedënõ waa bacäi, ante åñongä tõmënäni wæætë tõmengä ingante,

—Ïimõ ædæ gowayedë mäniñedë tõmengä gançæ bacantapa, ante apænedänitapa. ⁵³ Ayæ wëñængä mæmpo, Bitõ wëñængä quëwencæcäimpa, ante Itota botõ imote nänõ åniñedë adoyedë botõ wëñængä do waa bacantapa, ante wædinque tõmengä tõnõ tõmengä nani quëwencabo tõmancabo Itota ingante wede pönënäni bagadänimpa. ⁵⁴ Itota oodeoidi weca quëwente Gadideabæ ocæ ëmænte põninque tõmengä mäniñõmö iï bamõnengæ cædinque mempoga nänõ cædõ bamõnengæ bagatimpa.

5

Itota cæcä beyænque pæ opa pæ opa gocä waa bacäi

¹ Ayæ ate oodeoidi, Mönõ Wængongui beyæ, ante nani ææmæ cæyedë Itota Eedotadëë iñõmö æidinque ado ante gogacäimpa. ² Eedotadëë wææ cæte iñõmö obegaidi nani põ guidemõ gäänë gäwapæ impa. Mänimæ gäwapæ ebedeo tededõ Betadapæ nani åmæ yæwedeca õnopmo æmæmpoque ñoncæcate inoncõimpa. ³ Mänincõnë wënæ wënæ inäni tæiyænäni cõwë õñõnõnänimpa. Pancadäniya babetamõnani inte pancadäniya pæ opa pæ opa godõnani inte

pancadäniya cömante inönäni inänipa. ⁴ Adodäni, Æpæ incæ gopæ, ante wänö cönönäni inönänimpa. Edæ Wængongui anquedo wæætê wæætê, Mänimæ incæ incæ gopængæimpa, ante wææ pöninque cædongäimpa. Gäwapæ incæ incæ go cæpæ adinque æcänö täno mänimænê guiida inte adocä quiëmê wënæ wënæ i waa badongäimpa. ⁵ Mänñömö öñönäni weca adocanque në öñönongä iñömö todëinta i ocho wadepo ganca wënæ wënæ inte wægaingä inongäimpa. ⁶ Adocä mänñömö öñongä ingante Itota ponte ayongä wädäni, Mäningä wantæpiyæ mänömaï wënæ wënæ inte wægaingä ingampa, ante apænedäni êñëninque Itota tömengä ingante,

—Bitö, Waa bänëmö, ämitawo.

⁷ Ante äñongä në wënæ wënæ ingä wæætê,

—Awënê, gäwapæ incæ incæ gopæñedê æcänö botö imote ænte guiquinaa edæ dæ angampa. Ayæ botö, Æpænê guicæboimpa, ante goyömo wacä pöninque do täno guicä.

⁸ Ante wæyongante Itota,

—Ængæ gantie, bitö bee podonte möïmo ænte goe. ⁹ Äñongä onguiñængä iñömö iñontobæ waa badingä inte tömengä bee podonte möïmo ænte cægonte gocantapa. Oodeoidi näni guëmanguïönæ iñonte Itota mänömaï cæcantapa. ¹⁰ Mänömaï beyæ oodeoidi awënêidi iñömö onguiñængä në waa badingä ingante,

—Ñöwoönæ guëmanguïönæ iñonte mönö æbänö cæquii, ante do wææ yewæmonte impa cæbii. Bitö bee podonte möïmo næænämaï incæbiimpa.

¹¹ Ante pññönäni tömengä wæætê,

—Botö imote, Waa bae, ante në cædingä iñömö adocä incæ, Bitö bee podonte möïmo ænte goe, angä cætabopa.

¹² Angä êñëninque tömënäni tömengä ingante,

—Mäningä iñömö bitö imite, Bitö bee podonte möïmo ænte goe, ante në angä iñömö æcänö ingää. Apænebi êñëmönie, änänitapa.

¹³ Itota guiquënê do wadäni nanguï inäni ongönäni tæcæguedê go wadæ godongäimpa. Mänömaï beyæ onguiñængä në waa badingä iñömö, Në cædingä æcänö ingää, ante êñënämaï ingantapa. ¹⁴ Ayæ ate Itota Wængongui oncö ñænæncö yabæcönê go guidinque tömengä ingante bee téninque,

—Êñëmi, bitö wæætê waa babi ïmpa. Ìnque godömenque wënæ wënæ cædämaï incæbiimpa. Bitö mäninö wënæ wënæ bitö cægaïnö ante ñimpo cædämaï ïmi ñinque wabänö bitö wæwënguinque godömenque babaïmpa, ämpa.

¹⁵ Angä êñëninque onguiñængä wadæ gote oodeoidi awënêidi weca pöninque angantapa. Botö imote, Waa bae, ante në cædingä iñömö Itota ingampa, ante apænecantapa. ¹⁶ Mänömaï beyæ Itota mäninö nänö cædinö ante guëmanguïönæ iñonte cæcä adinque oodeoidi awënêidi iñömö tömengä ingante togænte wënæ wënæ cædänitapa. ¹⁷ Itota tömënäni inänite,

—Botö Mæmpo ñöwoönæ ganca tömengä nänö cædö ayæ cæcä ingampa. Ayæ botö adobaï cæbo ïmpa, ante apænecantapa.

¹⁸ Mäninö angä êñëninque tömënäni godömenque pñinque, Mönö tömengä ingante æbänö cæte wænömö wænguingää, ante godömenque nanguï cægadänimpa. Tömënäni, Tömengä guëmanguïönæ iñonte do cæcä ingampa. Ayæ godömenque, Wængongui botö Mæmpo inongäimpa, ante tededinque tömengä, Botö Wængongui bai ïmpa, ante bai cæcampa töö, ante tömënäni godömenque pñingadänimpa.

Tömengä Wengä ingante Wængongui pönö cæcä ate Awënë bacampa

¹⁹ Itota adodäni inänite iimaï äinique, “Botö minitö iminite näwangä ämopa. Botö Wængongui Wëmo inömo incæ ædö cæte adoboque nämanque cæbo imoo. Botö Mæmpo æbänö cæcää adinique botö adodonque cæbopa. Edæ botö Mæmpo nänö cædö bai botö Wængongui Wëmo inte adobai cæbopa. ²⁰ Edæ Mæmpocä Wëmo iñömote tömengä botö imote waadete pönëninque tömengä nänö cædö tömänö ante botö imote odömongä abo imopa. Ayæ minitö, Æbänö cæcä wæmöö, ante wæcæminimpa, ante cædinque tömengä godömenque bamönengæ nänö cædö ante botö imote odömongä ate botö wæætë cæbo acæminimpa. ²¹ Edæ botö Mæmpo iñömö æmæwo wængainäni inänite, Näni ömæmöninque minitö müimäni quëwencæminimpa, ante pönö cæcä bai botö tömengä Wëmo iñömö adobai cæbo imopa. Æcänö ingante, Bitö müi quëwencæbiimpa, ante äinëmo inte botö tömengä ingante pönö cæbo ate miingä quëwencæcäimpa. ²² Adobai botö Mæmpo iñömö waodäni inänite adinique, Æcänö waa cæcantawo, ante, Æcänö wënæ wënæ cæcantawo, ante apænte änämaï ingampa. Wæætë edæ botö tömengä Wëmo iñömote tömengä, Bitö mäninö ante waodäni tömänäni inänite apænte ancæbiimpa, ante cægacäimpa. ²³ Mänömaï cædinque botö Mæmpo, Waodäni botö imo nani waa abai adobai botö Wengä ingante tömänäni waa acædänimpa, ante cægacäimpa. Botö tömengä Wëmo iñömote nê waa adämaï ingä iñömö tömengä botö Wæmpocä botö imote da pönongä ingante adobai waa adämaï ingampa töö,” ante Itota apænegantapa.

²⁴ Ayæ apænedinique, “Minitö iminite näwangä ämopa. Waocä botö äno ëñëninque botö imote nê da pönongaingä ingante nê wede pönengä iñömö tömengä nänö apænte pante wæwenguinö godämaï incæcäimpa. Wæætë tömengä nänö wænämaï quëwenguinö gocæcäimpa. Edæ tömengä mönö æmæwo wænguino ñimpo cædinque wænämaï mönö quëwenguinö do gocäimpa. ²⁵ Minitö iminite näwangä ämopa. Waodäni nê quëwënäni incæ tömënäni æmæwo wængainäni bai inönäni inte tömënäni iñömö Wængongui Wëmo botö tedepämo oo ëñencædänimpa. Nöwoönæ tömënäni nani ëñenguinöe do batimpa. Nê ëñënanäni iñömö tömënäni nani wænämaï quëwenguinö gocædänimpa. ²⁶ Wængongui nämä nê quëwënongä inte tömänäni nani quëwëmämo ante nê godongä ingampa. Mänömaï beyænque botö tömengä Wëmo adobai nämä nê quëwënömo inte tömänäni nani quëwëmämo ante nê godömo imopa. ²⁷ Ayæ Waobo ëñagaimo iñömote tömengä pönö cæcä beyænque botö nê ämo badinique nämä tæi piñænte cædinque edæ, Æcänö waa cæcantawo, ante, Æcänö wënæ wënæ cæcantawo, ante nê apænte anguimo imopa. ²⁸ Botö mänömainö ante apænebo ëñëninque minitö, Æbänö angä wæmöö, ante änämaï incæminimpa. Edæ æmæwo wængainäni tömänäni tömënäni nani wodido nê öñongainäni iñönänite edæ botö tedepämo incæ tömënäni nani ëñenguinöe oo pönö impa. ²⁹ Botö tedepämo ëñëninque tömënäni tömänäni ta poncædänimpa. Nê waa cægainäni iñömö wænämaï nani quëwenguinö nani goquinque ñäni ömæmoncædänimpa. Nê wënæ wënæ cægainäni guiquënë nani apænte pante æmæwo wæwenguinö nani goquinque ömæmoncædänimpa cæminii,” ante Itota apænegacäimpa.

Æcänö äna ëñente cæbii, ante Itota ingante änänipa

³⁰ Ayæ godömenque apænedinique Itota iimaï apænegantapa. “Botö ædö cæte nämanque adoboque cæbo imoo. Wæætë Wængongui botö imote æbänö angä ëñëninque botö mäninö ante, Æcänö waa cæcantawo, ante, Æcänö wënæ

wēnæ cæcantawo, ante apænte ämopa. Ayæ botō apænte äno iñōmō cōwē nōinō ante impa. Edæ botō tōmēmo ämai cædāmai ïmopa. Wæætē botō Mæmpo botō ïmote nē da pōnongaingā nānō ämai cæbo ïmopa. ³¹ Botō nāmanque äninque, Æbānō cæboo, ante apænebo bai mīnitō, Önonquedō ante impa, ancædōmīnīmpa. ³² Botō æbānō cæboo, ante wacā botō beyæ ante nē apæncæ ingampa. Tōmengā botō ïmotedō ante nānō apænedō iñōmō edæ nō ïmpa, ante ēñēmopa. ³³ Mīnitō botō ïmotedō ante, Æbānō cæcää, ante ēñencæte ante Wāo nē æpænē guidōnongā weca wadāni inānite da godōmīnitapa. Ayæ Wāo mānīnāni inānite botō ïmotedō ante nō apæncæ ēñēnānitapa. ³⁴ Botō æbānō cæboo, ante waodāni botō beyæ apæncædānīmpa, ante botō änāmai ïmopa. Wæætē, Mīnitō botō æmo beyænque quēwencæmīnīmpa, ante cædinque botō mǎnōmāinō ante apænetabopa. ³⁵ Wāo nē æpænē guidōnongā tōmengā iñōmō tī wodōnoincade bæco bai ingacāimpa. Ayæ, Tōmengā nānō angainō ñāo bai impa, ante adinque mīnitō wantæyō iñonte, Waa impa, ante watapæ tomīnitapa. ³⁶ Botō æbānō cæboo, ante Wāo nē æpænē guidōnongā nānō angainō beyæ waodāni mānīnō ante do ewocadāni ingadānīmpa. Ayæ botō Mæmpo, Bitō ïlmai cæe, ante, Tōmāā ïnque cæcæbiimpa, ante botō ïmote nānō angainō bai ante do cædōmo ïmopa. Botō Mæmpo botō ïmote da pōnongaingā ingampa, ante wadāni botō cædinō beyæ do ēñēnānīmpa. ³⁷ Ayæ botō Mæmpo botō ïmote nē da pōnongaingā iñōmō adobai, Botō æbānō cæboo, ante apæncæ ēñēngadānīmpa. Mīnitō guiquēnē tōmengā ingante adāmai ïmīni inte tōmengā nānō tedepāmo incæ cōwē ēñēnāmai ïmīnīpa tōō. ³⁸ Ayæ botō Mæmpo botō ïmote da pōnongā pōnīmo ïmopa, ante mīnitō pōnēnāmai ïmīni inte edæ tōmengā nānō angainō ante entawēnāmai quēwēmīni ïmīnīpa. ³⁹ Wængonguī angā ēñēnīnque nāni yewæmongainta ædæmō adōmīni inte edæ mīnitō, Mānīnō nāni yewæmongainta amōni beyænque mōnitō wænāmai mōni quēwenguīnō gocæmōnīmpa, ante pōnēmīni ïmīnīpa. Ìñæmpa mānīntaa yewæmōnīnque botō ïmotedō ante apænedīnque yewæmongadāni apa quēwēmīni. ⁴⁰ Botō, Mīnitō wænāmai mīni quēwenguīnō ante pō æedāni, äñōmote mīnitō wæætē Baa äninque botō weca pōnāmai ïmīnīpa,” ante Itota apæncæcantapa.

⁴¹ Ayæ apænedīnque tōmengā, “Waodāni botō ïmote waa adinque apæncædānīmpa, ante änāmai ïmopa, angantapa. ⁴² Ìñæmpa, Mīnitō æbānō cæmīnī, ante botō do ēñēmopa. Wængonguī nānō waadete pōnente entawēnō mīnitō entawēnāmai quēwēmīnīpa, ante do ēñēmopa. ⁴³ Wængonguī angā ēñēnīnque botō wææ pōnīmo adinque mīnitō Baa ante botō ïmote pōnēnāmai ïmīnīpa. Wacā guiquēnē nāmā äninque pongā ïnque mīnitō māningā ingante Ao ante pōnēmaïmīnīpa, ante awædō. ⁴⁴ Mīnitō wacā ingā wacā ingā, Botō ïmote waa adinque waa apæncædānīmpa, ante cæmīni awædō. Incæte mīnitō, Mōnō Wængonguī nē adocanque ingaingā ingampa, ante, Tōmengā mōnō ïmote waa adinque apæncæcāimpa, ante cædāmai ïmīnīpa. Mānōmai beyæ mīnitō botō ïmote ædō cæte pōnēmīni ïmīnī. ⁴⁵ Botō Mæmpo weca ongōnīnque mīnitō ïmīnītedō ante botō, Ìñāni wēnæ wēnæ cædāni inānitapa, ante ancæboimpa, ante mīnitō pōnēmīnitawo. Mānōmāinō ante edæ pōnēnāmai ïedāni. Wæætē Mōitee wodi nānō angainō ēñente beyænque mōnō quēwengæimpa, ante pōnēmīnīpa. Ìñæmpa adocā Mōitee wodi mīni nē pōnēnongā iñōmō, Nē wēnæ wēnæ cæmīni ïmīnīpa, ante ancæcāimpa cæmīnī. ⁴⁶ Mīnitō Mōitee wodi ingante pōnente bai adobai botō ïmote pōncædōmīnīmpa. Edæ tōmengā botō ïmotedō ante yewæmongacāimpa. ⁴⁷ Mōitee wodi nānō yewæmongainō ante pōnēnāmai ïmīni ïnīnque mīnitō ædō cæte botō apænedō ante ēñēnīnque pōnenguīmīnī,” ante Itota mānīñedē ïnque

apænegacäimpa.

6

5.000 ganca inäni inänite Itota godongä cænänipa

¹ Mäninö iinque apænete ate wantæyö iñonte Itota wadæ godinque gäwapæ Gadideapæ nani ämæ æmæmäa tao gogacäimpa. Mänimæ Tibediapæ nani ämæ impa. ² Tömengä wogaa tao gocä adinque waodäni tæiyænäni pö tee empo godänitapa. Tömengä, Acädänimpa, ante cædinque wænæ wænæ inäni inänite bamönengæ cæte odömongä do adinäni inte godänitapa. ³ Ayæ Itota tömengä nänö emiñænäni inänite änanquidi ænte mäicä æidinque tömönäni tömengä tönö tæ contadänitapa. ⁴ Wodo pänta gogaiönæ, ante oodeoidi Patowa nani ææmæ cæönæ oo pöni ingatimpa. ⁵ Itota gomö ayongä waodäni tæiyænäni tömengä weca pönäni adinque tömengä Pedipe ingante,

—Mäninäni waodäni beyæ ædönö gote päö godonte æninque godömöni cænguänäni, angantapa.

⁶ Edæ Itota iñömö, Æbänö cæbaimoo, ante do eñëningä inte mäninö ante, Pedipe æbänö cæquingäa, ante acæte ante angantapa. ⁷ Pedipe wæætê tömengä ingante,

—Iñæmpa päö ante tömänäni wædænque cæncædänimpa, ante ocho apäicä cæte beyæ paga æinta æninque mänimpota godonte æninque edæ wii eyepæ imaimpa, angantapa. ⁸ Ayæ tömengä emiñængä Timönö Pegodo biwi Æntade iñömö Itota ingante,

⁹—Mönitö weca nê ongongä edëningä iñömö tebada nani awënënimö guiyä päö önompö æmæmpoque tönö guiyä gæyæ mäa pöni næængä ingampa. Incæte mänii cængui tæiyænäni beyæ ædö cæte eyepæ i, ante wæbopa.

¹⁰ Angä eñëninque Itota,

—Minitö tæiyænäni godongämæ ongönäni inänite ämüni tæ contaedäni, angantapa. Tömengä nänö ämäi änäni eñëninque waodäni önömæcæque inö nangui gaguimæ pæyömö do tæ contadänitapa. Onguiñænäni incæ önompö æmæmpoque müdo ganca inäni inte tæ contadäni ingadänimpa. ¹¹ Itota päö æninque, Wængongui, Bitö waa pöni pönömi ænte cænguimöni, ante apænedinque tömengä nänö emiñænäni inänite godongä æninque tömönäni wæætê tæ contadäni inänite di mäñænäni cænänitapa. Ayæ tömengä gæyæ æninque adobai cæcantapa. Tömänäni iñömö nani cæinënö ante eyepæ cængadänimpa.

¹² Tömönäni tömö pöni cænäni ate tömengä emiñænäni inänite tömengä,

—Cængui nani ao mä ao mä ñönöni ee öñoncoo wote badämaï ingæimpa, ante pædæ wææmpo ö æedäni.

¹³ Angä eñente cædinque nê cænäni päö önompö æmæmpoque tebada nani awënënimö nani ao mä ao mä ñönöni ee öñoncoo ö ænte da wænäni ate edæ otodê tipæmpoga go mentodëa cængui eyede da wænäni contagatimpa.

¹⁴ Waodäni iñömö Itota bamönengæ nänö cædi adinque,

—Näwängä iingä iñömö Wængongui beyæ nê apæneçä ingampa. Tömengä inguipoga Ponguingä, ante nani angaingä inongäimpa, ante tæcæ änänitapa.

¹⁵ Tömönäni, Bitö mönitö Awënë Odeye bacæbaimpa, ante botö imote bæi ongoncæte ante poncæ cædänipa, ante wædinque Itota wadæ godinque adocanque änanquidi wæætê æigacäimpa.

*Itota æpæ yædopçä dao dao gocä
(Müateo 14.22-27; Müadoco 6.45-52)*

¹⁶ Gäwadedæ pōni bayō tōmengä emiñænāni iñōmō gāwapæ yæwedeca wæi gogadānimpa. ¹⁷ Itota angä eñēninque māniñōmō wæi wipodē guiddinque tōmēnāni, Gāwapæ æmæmāa Capēnaōmō nāni quēwēñōmō mōnō taocæimpa, ante tæcæ wogaa tao goyōnāni dobæ wēmō bayō Itota ayæ tōmēnāni weca pōnāmai iñongāimpa. ¹⁸ Ayæ woboyæ nangui pæmænte pōñō æpæ mæ conta mæ conta cæyonte, ¹⁹ tōmēnāni wodo tincō quidōmetodo wiyate cæyōnāni Itota iñōmō wipo gāmænō pōninque æpæ yædopæ wænōmēnæcapæ dao dao pongä adinque ancai guiñēnānitapa. ²⁰ Ancai guiñēñōnānite Itota iñōmō tōmēnāni iñānite,

—Botō Imopa. Guiñēnāmai iedāni, angantapa.

²¹ Ante añongä tōmēnāni Ao ante tōmengä ingante wipodē æninque tōmēnāni nāni goinēñōmō emōnaiya do tao gogadānimpa.

Waadāni Itota ante diqui diqui minte pōnāni

²² Iimō ate tæiyænāni gāwapæ imæ wedeca a ongōiñōnānimpa. Iñinque tōmēnāni, Wipo adoque pōni māniñōmō wāi wocæ incæte Itota iñōmō mānimpodē guiddāmai iñongante tōmengä miñæ godāni adodānique guui wadæ tao godānitapa, ante adinque wædānitapa. ²³ Awēnē Itota do Wængongui ingante, Bitō waa pōni pōnōmi cænguimōni, ante apænecā ate waodāni nāni pāo cæniñōmō pancadāniya ayæ ongōnānimpa. Nōwo iñōmō wapocoo Tibedia nāni quēwēñōmō wo cæwodinque māniñōmō tōmēnāni nāni cæniñōmō eyequei pōnāni adānitapa. ²⁴ Iñinque Itota tōnō tōmengä nānō emiñænāni edæ dæ ānāni wædinque tæiyænāni iñōmō wipodē guite Capēnaōmō godinque Itota ante diqui diqui mincæte ante wogaa gogadānimpa.

Itota, Mōnō quēwenguinque, ante cænguī bai ingampa

²⁵ Adodāni gāwapæ æmæmāa tao godinque tōmengä ingä adinque,

—Awēnē nē Odōmōmi imi æyedēnō iñōmō pōmitawo, ānānitapa.

²⁶ Añōnāni Itota wæætē,

—Minitō iminite nāwangä āmopa. Minitō tōmo pōni pāo cænimīni inte botō imote ante diqui diqui mincæ pōmīnitapa tōō. Wæætē edæ botō, Acæmīnimpa, ante bamōnengæ cæbo beyæ mīnitō wīi pōmīni awædō.

²⁷ Mīnitō, Mōnō cænguī, ante æncæte ante cæmīni incæte inguipogaque mīni woquīnonque ante æncæ cædāmai quēwēedāni. Wæætē edæ, Mōnō cænguī iñinque bayedē cænguī mæ oñongæimpa, ante cædinque mīnitō, Mōnō wænāmai quēwenguinque gocæmōimpa, ante pōnente quēwēedāni. Botō nē Waobo ēñagaīmo imo māniñ cænguī mīnitō iminite pōnōmo æncæmīnimpa. Botō Mæmpo botō imotedō ante, Iñgä nō cæcā ingampa, ante odōmongacāimpa.

²⁸ Angä eñēninque tōmēnāni tōmengä ingante,

—Mōnitō, Wængongui nānō cæquimāmo ante cæcæte ante quīnō cæquēnēmōni imōni, ante wæmōnipa.

²⁹ Añōnāni Itota wæætē,

—Botō Wængongui nānō nē da pōnongāimo iñōmote mīnitō botō imote mīni wede pōnēñō iñōmō edæ māniñō Wængongui nānō cædō impa, angantapa.

³⁰ Mānōmai beyæ tōmēnāni godōmenque tōmengä ingante,

—Bitō, Eñencædānimpa, ante bamōnengæ bitō cædō ante æbānō cæte odōmōmi adinque pōnēmaimōnipa. Æbānō cæquimīi, ante ānewēnānitapa.

³¹ Mōnō wæmæidi onōmæca nāni quēwēñedē cænguī mānāā nāni angāi cængadānimpa. Iimānō ante yewæmongatimpa. “Tōmengä, Mīnitō cænguī,

ante tömënäni inänite öönædë inö mäwææ godongacäimpa,” ante näni yewæmongainö bai impa, ante apænedänitapa.

³² Itota wæætë tömënäni inänite,

—Nawangä ämopa. Minitö iminite öönædë mäwææ cænguï në pönongaingä iñömö tömengä wïi Möitee wodi ingacäimpa. Wæætë botö Mæmpo iñömö tömengä munitö iminite öönædë näni näwä cænguï bai pönongä cæncæminimpa.

³³ Öönædë quëwente wææ pongaingä iñömö tömengä iñömö, Cænguï bai ingampa, ante Wængonguï nänö në angaingä ingampa. Adocä inguipoga quëwënäni inänite, Mini wantæpiyæ wænämai quëwenguinö ante pönongä æninque quëwënäni.

³⁴ Ante Itota apænecä ëñëninque tömënäni,

—Awënë, ñowo mänü cænguï iimö iñö iimö iñö pönömi cæmönie.

³⁵ Äñönäni Itota godömenque apænedinque,

—Botö iñömö, Mini quëwenguinque, ante mini cænguï bai inömo imopa. Botö weca në pongä iñömö cöwë cænguï gue ænënamäi bai quëwencæcäimpa. Ayæ botö imote në wede pönengä iñömö cöwë tepæ gæwænämai bai quëwenguingä ingampa, ante apænecantapa. ³⁶ Ayæ wæætë, Minitö iminite do botö äno bai impa. Botö imote do adimini incæte munitö ayæ wede pönënamäi iminipa.

³⁷ Botö Mæmpo, Bitö quinäni bacædänimpa, ante cædinque botö imote pönongä æmo ininque botö quinäni në badäni inte tömënäni tömänäni iñömö botö weca edæ do pönänipa. Ayæ æcämenque botö weca pöna inate, Botö weca pönämai imipa, ante cöwë änamäi incæboimpa. ³⁸ Edæ öönædë quëwëninque botö wïi tömömo ämai cæcæboimpa, ante wææ pontabopa. Wæætë botö imote në da pönongaingä nänö ämai cæcæboimpa, ante wææ pontabopa. ³⁹ Ayæ botö imote në da pönongaingä botö imo nänö angainö iñömö iimäi impa. Waodäni bitö quinäni bacædänimpa, ante pönömo æninque bitö quinäni badinque adocanque incæ wë womonte wænämai incæcäimpa. Wæætë iinque baquïönæ iñonte bitö, Näni ömæmöedäni, ämi ëñëninque bitö quinäni tömänäni edæ ñäni ömæmoncædänimpa. ⁴⁰ Edæ botö Mæmpo nänö angainö iñömö iimäi impa. Botö Wængonguï Wëmo iñömotete botö imote ædæmö adinäni inte edæ botö imote në pönënanäni tömänäni cöwë wænämai wantæpiyæ quëwencædänimpa. Mänömainö ante impa. Ayæ iinque baquïönæ iñonte botö mäninäni inänite, Minitö ñäni ömæmöedäni, ämo ate ömæmoncædänimpa. Itota mänömai apænecantapa.

⁴¹ Apænecä ëñëninque oodeoidi iñömö, Tömengä, “Botö cænguï bai imopa, ante öönædë inö wææ pontabopa,” angampa, ante tömengä ingantedö ante tæcæ piinte tedewënänitapa. ⁴² Tömënäni,

—Ïngä iñömö wïi Ootee wengä Itota ingantawo. Tömengä mæmpo tönö wäänä wïi mönö adöna inatawo. Tömengä ædö cæte, Botö öönædë quëwente wææ pontabopa, angä änewëë.

⁴³ Ante piññönäni Itota wæætë,

—Minitö namanque godongämæ piinte tededämai iedäni. ⁴⁴ Botö Mæmpo botö imote në da pönongaingä wïi pönö cæcä bai æcämenque incæ botö weca pönämai incædongäimpa. Ayæ iinque baquïönæ iñonte botö weca në pongä ingante, Näni ömæmöe, ämo ñäni ömæmoncæcäimpa. ⁴⁵ Wængonguï beyæ në apænëgainäni näni yewæmongaintaa iimäi ante yewæmongadänimpa. “Wængonguï waodäni tömänäni inänite odömonte apænecä ëñencædänimpa.” Botö Mæmpo apænecä në ëñënanäni iñömö tömengä nänö odömonte apænecä ante në ëñënanäni inönäni iinque tömënäni tömänäni botö weca pönänipa, ante Itota apænecantapa.

⁴⁶ Ayæ apænedinque, “Mîni waocabo tømâmîni incæ botö Mæmpo ingante cõwê adâmaï imînitapa. Botonque iñômö Wængonguï weca nê quëwente pömo inte botö Mæmpo ingante nê adîmo iñômö adoboque põni ïmopa. ⁴⁷ Mînitö imînite nâwangä ämopa. Botö ïmote nê wede põngä iñômö tømengä cõwê wantæpiyæ nânö quëwenguimämo do entawente quëwengä ingampa. ⁴⁸ Botö iñômö, Mîni quëwenguinque, ante mîni cænguï bai ïmopa. ⁴⁹ Mîni wæmæidi önömæca quëwëñedê cænguï mânää nâni angai cængainâni incæte edæ do wængadânimpa. ⁵⁰ Botö iñômö cænguï bai iñômö inte öönædê quëwente wææ pömo ïmopa. Ìnînque waocä, Cænguï cænte bai quëwengæïmpa, ante botö ïmote põngä ïnînque tømengä cõwê wænâmaï quëwëmaingampa. ⁵¹ Botö cænguï bai ïmo inte öönædê quëwengäïmo incæ wææ pontabopa. Æcänö cænguï cænte bai botö ïmote põnëna tømengä iñômö cõwê wænâmaï quëwencæcäïmpa. Ìi cænguï botö godonguï botö nâmä baö ïmpa. Inguipoga quëwënâni inânite, Mînitö quëwenguimîni, ante botö nâmä baö incæ godoncæboïmpa,” ante Itota mânömaï apænecantapa.

⁵² Mânînö angä êñente wædinque oodeoidi nâni cabo iñômö godongämæ nâmanque tededinque wæætê godö wæætê godö änewënânitapa.

—Mânîngä iñômö mönö ïmö tømengä nâmä baö ædö cæte põngä cænguïmöni.

⁵³ Ante tedewëñönâni Itota wæætê tømënâni inânite,

—Mînitö imînite nâwangä ämopa. Botö Waobo êñagaïmo iñömote mînitö botö baö cænâmaï inte botö wepæ bedâmaï imîni ïnînque ædö cæte Wængonguï wantæpiyæ nânö quëwenguimämo entawëmîni inguïmîni. ⁵⁴ Botö baö nê cængä ayæ botö wepæ nê beca tømengä iñômö Wængonguï wantæpiyæ nânö cõwê quëwenguimämo do entawente quëwengä ingampa. Ayæ ïnque baquïönæ iñonte botö mânîngä ingante, Bitö ñâni ömæmõe, ämo ñâni ömæmoncæcäïmpa. ⁵⁵ Edæ botö baö nâwä cænguï bai ïmpa. Ayæ botö wepæ nâwä bequï bai ïmpa. ⁵⁶ Botö baö nê cængä inte ayæ botö wepæ nê beca iñômö tømengä botö nempo ee quëwëngä ingampa. Ayæ adobaï tømengä botö ïmote entawëngä ingampa. ⁵⁷ Botö Mæmpo nê Quëwëngä inte botö ïmote da põngä põni mo ïmopa. Tømengä põnö cæcä ate quëwëmo ïmopa. Botö ïmote nê cængä iñômö adobaï botö cæbo beyænque quëwencæcäïmpa. ⁵⁸ Botö cænguï bai ïmo inte öönædê wææ põni mo iñômö mânîi cænguï bai ïmopa. Mönö wæmæidi cænguï mânää nâni angai cængainâni incæ edæ do wængadânimpa. Wæætê ñowo wææ pömo iñömote, Cænguï ïmpa, ante nê cængongä iñômö tømengä cõwê wænâmaï quëwencæcäïmpa, ante Itota apænegacäïmpa.

⁵⁹ Tømengä mânînö ante Capënaömö nâni quëwëñömö nâni odömöincönê ongöinque tømënâni inânite odömonte apænegacäïmpa.

Itota nânö änö beyænque mönö wænâmaï quëwengæïmpa

⁶⁰ Mânînö odömonte apænecä êñëinque tømengä ëmîñænâni nanguï inâni, —Tømengä nânö odömonte apænedînö iñômö waadedämaïnö ïmpa. Edæ æcänö êñëmainaa, ante äñânitapa.

⁶¹ Mânînö nânö odömonte apænedînö ante tæcæ piinte tedewënâni wædinque Itota tømënâni inânite,

—Mînitö botö äñinö ante oda cæmîni inte piimîni imînitawo, angantapa.

⁶² Ayæ godömenque apænedinque, Botö Waobo êñagaïmo ïmo öönædê quëwente wææ pongäïmo inte adodö adoyömö æibo adinque mînitö æbänö ante ämaïmîni. ⁶³ Wængonguï Önöwoca põnö cæcä beyænque waocä quëwengä

īnīnque tōmengā baonque nānō ēñayō beyænque ædō cæte quēwēmaingāā. Botō Wængonguī Ōnōwoca tōnō apænedīnque mīnitō īmīnite botō apænedīnō beyæ mīnitō ōnōwoca ēwocate quēwencæmīnīmpa. ⁶⁴ Incæte mīnitō weca pancadāniya īñōmō botō īmo pōnēnāmaī īnānīpa tōō, ante Itota apæncantapa.

Edæ tōmēnāni weca æcānō tōmengā īngante pōnēnāmaī īngāā, ante Itota do ēñēnongāīmpa. Ayæ tōmengā īngante nē godō odōmongūngā æcānō īmaingāā, ante tōmengā adobaī do ēñēnongāīmpa. ⁶⁵ Itota godōmēnque apænedīnque,

—Botō mānīī beyæ mīnitō īmīnite do antabopa. Botō Mæmpo wīī pōnō cæcā baī æcāmenque incæ botō weca pōnāmaī incædongāīmpa, ante apænegacāīmpa.

⁶⁶ Mānīōnæ ganca tōmengā mīñæ nē godāni incæ nangūī īnāni wadæ godīnque tōmengā mīñæ ayæ tee empo godāmaī īngadānīmpa. ⁶⁷ Tōmēnāni wadæ godāni adīnque Itota ōnompo tīpæmpoga go mēa ganca īnāni īnānite,

—Mīnitō diyæ æbānō cæquīmīnī. Mīnitō tōmēnāni baī adobaī botō īmote ēmō cæte, Wadæ goīnēmōnīpa, āmīnitawo.

⁶⁸ Āñongā Timōnō Pegodo wæætē,

—Awēnē, æcānō mīñæ gobaīmōnī. Wacā mōnitō īmōnite nē ēmīñængā īñōmō edæ dæ angampa. Wantæpiyæ wænāmaī mōni quēwēnguīnō ante æbānō gocæmōnīmpa, ante wæyōmōni bitō īñōmō nē apænebi īmpa. ⁶⁹ Bitō īñōmō Wængonguī nānō da pōnōnōmi īnte tōmengā nānō Tæiyæ Wæmō īnōmi īmpa, ante pōnēmōni īnte ēñēmōnīpa.

⁷⁰ Ante apæneccā ēñēnīnque Itota,

—Mīnitō ōnompo tīpæmpoga go mēa ganca īmīni īnte wīī botō apænte æñōmīni īmīnitawo. Incæte mīni cabo incæ adocanque īñōmō wēnæ quī īngampa, ante apænegacāīmpa.

⁷¹ Timōnō Icadiote wengā Codaa īngantedō ante Itota mānōmaī āngacāīmpa. Tōmengā ōnompo tīpæmpoga go mēnaa nāni cabo adocanque īngōngā incæte ayæ ate Itota īngante odōmōnte nē godongūngā īngōngāīmpa.

7

Itota biwīdi tōmengā īngante pōnēnāmaī īnāni

¹ Ayæ ate Itota Gadideabæ tōmāmæ wayōmō wayōmō gocā īngacāīmpa. Oodeabæ īñōmō oodeoidi awēnēidi botō īmote wænoncæ cædānīpa, ante wædīnque Itota, Oodeabæ wīī goīnēmopa, ante mānīōmæ godāmaī īngōngāīmpa.

² Oodeoidi, Mōnō wæmæidi oncontaicoo mænōnīnque quēwēngadānīmpa, ante pōnēnīnque tōmēnāni ææmæ oo pōni īngatīmpa. ³ Itota biwīdi tōmengā īngante,

—Bitō ēmīñænāni bitō bamōnengæ cæbi acædānīmpa, ante cæcæte ante bitō īñōmō ongōnāmaī īnte wæætē Oodeabæ goquēnēmi īmpa. ⁴ Waodāni tōmānāni ayōnāni cæbo edonque acædānīmpa, ante cæīnengā īñōmō tōmengā wīī awēmō cæcampa. Bitō mānīī cædīnō do cæbi īnte waodāni tōmānāni bitō īmite edonque pōni acædānīmpa, ante odōmōnte cæe, āmōnīpa.

⁵ Edæ tōmengā biwīdi incæ tōmengā īngante pōnēnāmaī īnāni īnōnānīmpa.

⁶ Mānōmaī beyæ Itota tōmēnāni īnānite,

—Botō wīī nōwo goquēnēmo īmpa. Mīnitō guīquēnē æyedēmē gomīni incæ cōwē waa īmpa. ⁷ Inguīpogaque quēwēnāni mīnitō īmīnite ædō cæte pīinte badānī. Wæætē botō tōmēnāni īnānite, Mīnitō wēnæ wēnæ cæmīni īmīnīpa, ante apænebo beyæ tōmēnāni botō īmo pīīnānīpa. ⁸ Mīnitō ææmæ cædāni weca æite goedāni. Botō goquīōnæ wīī eyepæ īmpa, ante pōnēnīnque botō ayæ mānīmæ cædāni weca godāmaī īmpa.

9 Mäninö äninque tömengä godömenque Gadideabæ ongonte quëwengacäimpa.

Itota nani cææmæ cæyömö gote pongacäimpa

10 Incæte tömengä biwliidi ææmæ ante godäni ate tömengä adobaï godinque wii waodäni nani ayömö gocampa. Wæætë awëmö gocantapa. 11 Ayæ nani ææmæ cæyömö oodeoidi awënëidi iñömö,

—Mäningä onguinængä æyömönö ingää, ante tömengä ingante ante diqui diqui minte wææ wänönänitapa.

12 Tæiyænnäni ponte a ongönäni godongämæ nämä tededinque tömengä ingantedö ante wæntæ wæntæ tededänitapa. Pancadäniya, “Tömengä waa cæcä ingampa.” Äñönäni wadäni iñömö, “Baa, mäningä waodäni inänite wapiticæ mäodinque, Oda cæquinänimpa, ante cæcä ingampa,” ante apænedönänimpa.

13 Oodeoidi awënëidi inäni adinque guinente wædinque wadäni tömänäni tömengä ingantedö ante waodäni ëñëñönäni apænedämaï inönänimpa.

14 Tömënäni ææmæ do cæyedë Itota iñömö Wængongui oncö ñænæncönë yabæcönë æite pö guidinque waodäni inänite mä odömonte apæneçä ëñengadänimpa. 15 Tömengä odömonte apæneçä ëñëninque oodeoidi ançai guinëninque,

—Ebänö cæte nanguï ëñengä ingää. Edæ tömengä ecoeda adämaï inongä ingampa.

16 Äñönäni Itota wæætë,

—Botö odömonte apænedö ante wii nämä pönëninque odömonte apænebo imopa. Wæætë Wængongui botö imote në da pönongaingå nänö angainö ante odömonte apænebopa. 17 Minitö, Wængongui nänö angainö ante Itota odömonte apæneçampa, ante pönëminitawo. Wæætë, Nämä pönëninque Itota odömonte apæneçampa, ante pönëminitawo. Inæmpa waocä, Wængongui nänö ämaï cææboimpa, ante æcänö änaa tömengä iñömö, Æcänö angä ëñëninque Itota odömonte apæneçää, ante do ëñæncæcäimpa. 18 Në nämä pönëninque apæneçä iñömö tömengä nämä ante, Botö imo waa acædänimpa, ante ainente apæneçä ingampa. Wæætë edæ, Botö imo në da pönongainganque ingante waa acædänimpa, ante në ainente cæcä iñömö tömengä edæ në nö cæte quëwënongå ingampa. Adocä, Waodäni oda cæquinänimpa, ante tömënäni inänite wii wapiticæ mäocä ingampa, ante Itota apæneçantapa. 19 Ayæ apænedinque, “Wængongui nänö wææ angainö ante Möitee wodi wii minitö beyæ ante yewæmongacäi. Incæte minitö tömämini Wængongui nänö wææ angainö adinque ëñente cædämaï iminipa töö. Minitö quinante botö imote, Wëñöinëmönimpa, ante pönëninque cæminii.”

20 Ante awënëidi inänite äñongante nanguï inäni adoyömö ongönäni wæætë,

—Bitö wënæ tönö cæbi imipææ, ante tömengä ingante äninque, Bitö imite æcänö wëñöinente cæcä.

21 Ante änäni ëñëninque Itota godömenque tömënäni inänite,

—Guëmanguionæ inñonte botö adofoque bamönengæ cæbo adinque minitö tömämini ançai guinente wæminipa edæ. 22 Möitee wodi iñömö, Minitö wëñængä ëñacä ate önompo æmæmpoque go mëönaa go adoönæque inñonte mänionæ tömengä yabæque ëö togæncæminimpa, ante minitö iminente odömonte apænegacäimpa. Wii Möitee wodi mänömaï mä cæcä ingacäimpa. Wæætë wëñënedë incæ minitö wæmæidi do adodö cægadänimpa. Incæte Möitee wodi, Mänionæ inñonte ëö togæncæminimpa, ante pönö angä beyænque minitö guëmanguionæ i incæte minitö wëñængä onguinængä ingante ëö togæmini iminipa töö. 23 Möitee wodi nänö wææ yewæmongainö wido cædämaï

ingæimpa, ante cædinque mīnitō guēmanguiōnæ iñonte edæ wēñængä onguiñængä ingante do eō togæmīnīpa. Incæte edæ guēmanguiōnæ iñonte botō wēnæ wēnæ iningä ingante ämo ate tōmengä baō tōmäñō waa bacä beyænque quīnante botō imote pīimīni imīni. ²⁴ Waocä wabänō nänō cædi wēnæ wēnæ ī, ante pōnēninque ædæmō eñēnāmaī imīni inte mīnitō tōmengä ingä, Bitō wēnæ wēnæ cæbi imīpa, ante apænte änāmaī ledāni. Wæætē, Æbänō ī, ante ædæmō eñēninque nōingä ante ancæmīnīpa, ante Itota mänōmaī apænegacäimpa.

Itota iñōmō Codito mōnō nē Ponguingä ingampa

²⁵ Mänōmaī beyæ Eedotadēē quēwēnāni pancadāniya,

—Māningä ingante wænōmōni wæncæcäimpa, ante awēnēidi wīi änānitawo, ante māniñedē tæcæ tedewēnānitapa. ²⁶ Aedāni, tōmengä iñōmō edonque pōni a ongōninque waodāni inānite apæneyongä incæ mōnō awēnēidi tōmengä ingante änāmaī pæ wēēnete inānīpa tōō. Tōmēnāni wabänō, Māningä iñōmō nāwangä Codito mōnō änongä ingampa, ante pōnēnānitawo. ²⁷ Iñæmpa, Māningä onguiñængä æyōmōnō quēwente pongä ingää, ante do eñēmōpa. Mōnō Codito, Nē Ponguingä, ante nāni angaingä iñōmō æyōmōnō quēwente pongä, ante mōnō waocabo tōmāmō incæ eñēnāmaī inguimō imōmpa, änānitapa.

²⁸ Ayæ Itota Wængongui oncō ñænæncōnē yabæcōnē odōmonte apænedinque aa pecantapa.

—Ao, Botō æbodō imoo, ante mīnitō eñēmīniyaa. Ayæ botō, Æyōmōnō quēwente pōmoo, ante mīnitō adobaī eñēmīniyaa. Botō wīi nāmā pōnēninque pontabopa. Botō imote nē da pōnongaingä nāwangä inongä ingampa. Mīnitō, Tōmengä æbänō ingää, ante eñēnāmaī imīnīpa tōō. ²⁹ Botō wæætē edæ tōmengä weca quēwēmo iñōmote tōmengä botō imote da pōnongä pōnīmo inte edæ botō iñōmō edæ tōmengä ingante do agaīmo inōmo imōpa, angacäimpa.

³⁰ Mānīnō angä eñēninque tōmēnāni, Quīnō cæte tōmengä ingante bæi ongonguimōnīpa, ante pōnengadānīpa. Incæte tōmengä nänō wænguiōnæ wīi eyepæ ī beyæ tōmengä ingante o ænāmaī ingadānīpa. ³¹ Tæiyæñāni adoyōmō pō ongōnāni weca ongōninque nanguī ināni tōmengä ingante wede pōnēnānitapa. Tōmēnāni,

—Māningä onguiñængä iñōmō nanguī bamōnengæ cæcä inongäimpa. Mōnō Codito iñōmō tōmengä pongä ate godōmenque bamōnengæ cæquingä inganta-wogaa.

Itota ingante bæi ongoncæte ante cædāni

³² Tæiyæñāni māniñōmō ongōnāni iñōmō Itota ingantedō ante mänōmaīnō ante wæntæ wæntæ tedeyōnāni Paditeoidi eñēnānitapa. Ayæ, Wængongui quī, ante nē godōnāni ñænæñāni tōnō Paditeoidi iñōmō Wængongui oncō ñænæncō wææ wānōnāni inānite, Mīnitō goedāni. Tōmengä weca godinque tōmengä ingante bæi ongoncæte ænte pōedāni, änānitapa. ³³ Itota godōmenque apænedinque,

—Mīnitō weca wantæyō quēwēninque botō ayæ ate botō imote nē da pōnongaingä weca ocæ émænte gocæboimpa. ³⁴ Botō ocæ émænte gobo ate mīnitō botō imote ante diqui diqui mīmīni incæte adāmaī inguimīni imīnīpa. Ayæ botō go quēwēñōmō mīnitō adoyōmō ædō cæte ponguimīni imīni.

³⁵ Angä eñēninque oodeoidi awēnēidi nāmanque tededānitapa.

—Māningä, Gocæboimpa, ante ædōnō goyongante mōnitō diqui diqui mīninque adāmaī inguimōni imōnī. Tōmengä, Edæ mōnō guiidēnāni do

panguimæ godinque guidiegoidi weca wayömö wayömö nāni quēwēñömö tömengä wabānō goquingää. Ayæ guidiegoidi māniñömö quēwēñāni Inānite odōmonte apænebo ēñencædānimpā, ante apænequingää. ³⁶ Tömengä iñæmpā, “Botō ðmote ante diqui diqui mīmīni incæte mīnitō botō ðmote adāmai inguimīni imīnīpā, angampa tōō. Ayæ, Botō go quēwēñömö mīnitō adoyōmō dicæ ponguimīniyāa,” ante māniñō ante æbānō ante apænecantawo, angadānimpā.

Waēmō æpæ tayōmō ta gopæ mönō quēwenguimæ impā

³⁷ Ayæ tömēnāni nāni ææmæ iñque cæönæ iñonte, Nænæ ææmæ impā, ante godōmenque nanguī cæyōnāni Itota iñömö ængæ gantidinque yedæ yedæ tedecantapā.

—Nē gæwænte wæcā iñömö tömengä botō weca poncæcāimpā. Ayæ botō tōnō godongāmæ becæcāimpā. ³⁸ Æcāmenque botō ðmote nē wede pōnengä iñömö tömengä quēwenguimæ ænte entawencæcāimpā. Ayæ waēmō æpæ tayōmō ta gote cægōmæ bai tömengä adobai tömengä nānō entawēnō godonte bai cædinque, Wadāni bete bai quēwencædānimpā, ante godō cæcæcāimpā. Wængonguī angä ēñente nāni yewæmongainō bai ante mānōmainō ante impā.

³⁹ Mānōmainō ante Itota iñömö, Botō ðmote nē wede pōnēnāni inte ayæ ate Wængonguī Ōnōwoca ingante ænte entawenguināni Inānīpā, ante pōnēninque māningä Wængonguī Ōnōwoca ingantedō ante apænegacāimpā. Edæ Itota ayæ wænāmai inte oönæde ocæ emænte æidāmai nānō iñedē Wængonguī iñömö Tæiyæ Waēmō Ōnōwoca ingante ayæ da pōnōnāmai inongäimpā.

Waodāni wæcætē godō wæcætē godō nāni ānewēñō

⁴⁰ Māniñō nānō ānō ēñēninque waodāni pancadāniyā, —Nāwangä impā. Māningä iñömö, Wængonguī beyæ nē apænecā nē Ponguingä, ante nāni angaingä adocā inongä ingampa.

⁴¹ Ante āñōnāni wadāni guiquēñē,

—Mōnō Codito nē Ponguingä, ante nāni angaingä māningä ingampa.

Ānāni ēñēninque wæætē wadāni,

—Mōnō Codito ædō cæte Gadideabæ quēwente pongä ingää, ānānitapā.

⁴² Iñæmpā mönō Codito iñömö Awēñē Dabii pæingä inguingäimpā. Ayæ Bedēē Dabii nānō quēwengaiñömö adoyōmō ēñāquingä ingampa, ante Wængonguī angä ēñente nāni yewæmongainō ongō adāmai imīnitawo.

⁴³ Angä ēñēninque waodāni, Itota æcānō ingää, ante mānōmai wadō wadō ante pōnente tedewengadānimpā. ⁴⁴ Pancadāniyā, Tömengä ingante bæi ongōinēmōnīpā, ānāni incæte tömengä ingante bæi ongonte ænāmai in-gadānimpā.

Awēñēidi Itota ingante pōnēnāmai inōñāni

⁴⁵ Wængonguī oncō tæiyæ waēmō oncōñē wææ wānōnāni iñömö, Wængonguī quī, ante nē godōnāni ñænænāni tōnō Paditeoidi weca ocæ emænte pōnānīpā. Ocæ emænte pōnāni adinque tömēnāni,

—Quinante tömengä ingante ænte pōnāmai imīni.

⁴⁶ Ante āñōnāni wææ wānōnāni wæætē,

—Māningä ongūñængä waa apænecā bai æcānō adobai tedecā iñömö edæ dæ angampa.

⁴⁷ Ānāni ēñēninque Paditeoidi guiquēñē,

—Tömengä mīnitō imīnite adobai wapiticæ māocā oda cæte gobaīmīni bamīnitawo. ⁴⁸ Āninque tömēnāni godōmenque, Awēñēidi incæ Paditeoidi

incæ adocanque tömengä ingante pönengä ingantawogaa. ⁴⁹ Nangui inäni iñömö ongönäni guiquenē tömēnāni nē önönānique inte Wængongui nānō wææ angainō ante eñēnāmai inäni inte tömengä ingante pönēnāni inānīpa. Mānōmai beyæ tömēnāni Wængongui nānō pangaimāmo ante wæquināni inānīpa.

⁵⁰ Nicodemō iñömö wēēnēñedē Itota weca nē godingä adobaī tömēnāni bai Paditeocä inongä inte apænecantapa.

⁵¹ —Wacä, Æbänö cæboo, ante nämä beyæ wææ änāmai iñongante mönō, Tömengä ingante pangæimpa, ante ædō cæte apænte anguii. Edæ, Wææ änāmai iñongante pangæimpa, ante dicæ wææ yewæmongadāniñaa.

⁵² Ante añongä tömēnāni,

—Bitō adobaī Gadideabæ quēwente ponte bai tedeipææ. Wængongui beyæ nāni yewæmongainta ae. Adinque bitō, Wængongui beyæ nē apæneccä wii Gadideabæ quēwente pongä ingampa, ante do eñencæbiimpa, ante angadānīpa.

Onquiyængä nānō towēnō

⁵³ Māninō änāni ate tömānāni oncönē ocæ emænte gogadānīpa.

8

¹ Itota guiquenē Odibowænquidi nāni anquidi gocantapa. ² Iimō ate ñāō bayedē tömengä Wængongui oncō ñænæncönē yabæcönē wæætē pō guicä adinque waodāni tömānāni tömengä nānō ongōñömō goto pönāni adinque Itota tömēnāni inānite odömōnte apæneccæte ante tæ contacantapa.

³ Māniñedē onquiyængä adocanque tömengä nānōogængä ināmai iñongante wacä onguiñængä tönō tæcæ godō guēa mongä adāni ate nē odömönāni tönō Paditeoidi iñömō māningä onquiyængä ingante ænte pönānitapa. Tömengä ingante tæcæguedē gö cædāni ongōñongä ⁴ tömēnāni Itota ingante,

—Awēnē nē Odömōmi imi, iingä onquiyængä iñömō wacä ingante tæcæ godō guēa mongä adāni wæmönīpa. ⁵ Wængongui nānō angainō ante Möitee wodi iimai ante wææ yewæmongacäimpa. Onquiyænāni māningä onquiyængä bai cædāni iñönānite mīnitō tömēnāni inānite dicaca tacamini wæncædānīpa. Bitō guiquenē quīnō āmii.

⁶ Māninō ante tömēnāni iñömō, Æbänö apæneccä, äninque, Wabänö pancadea wapiticæ tedecæcäimpa, ante cædānitapa. Edæ wapiticæ tedecä ininque mönitō, Adocä wēnæ wēnæ cæcä ingampa, ante ancæmönīpa, ante cædānitapa. Itota guiquenē ædæ wææninque onguipoga tömengä önongompoga yewæmongacäimpa. ⁷ Tömēnāni godōmenque tömengä ingante eñencæte ante añönāni Itota ængæ gantite tömēnāni inānite,

—Mīnitō weca adocanque ongōninque nē wēnæ wēnæ cædāmai ingä ininque māningä tāno onquiyængä ingante, Wænguimi, ante dicaca tacacæcäimpa, ante angantapa.

⁸ Äninque wæætē ædæ wææninque onguipoga yewæmongacäimpa.

⁹ Māninō angä nē eñēnāni iñömō adocanque wadæ go wacä wadæ go wacä wadæ go tömānāni wadæ godānīpa. Picænāni tāno wadæ godāni ayæ wadāni wadæ godānitapa. Tömānāni dæ godāni adinque Itota adocanque ee ongōñongä onquiyængä ayæ adoyömō næ gongængantapa. ¹⁰ Itota ængæ gantidinqe onquiyængä ingante,

—Æyömönō ināni. Bitō imite apænte äninque tacadāmai inānitawo.

¹¹ Añongä tömengä wæætē,

—Awēnē, tömānāni mānōmai cædāmai inānitapa.

Angä eñēninque Itota,

—Botō adobaī bitō imite apænte āninqe tacadāmaī incæboimpa. Nōwo goe āmopa. Bitō wēnæ wēnæ cæte quēwēnimāmo űimpo cæte waa quēwēe, angacāimpa.

Inguipoga quēwēnāni beyæ Itota űāō baī inongāimpa

¹² Ayæ Itota wæætē waodāni inānite apænedinque,

—Botō iűōmō inguipoga quēwēnāni beyæ űāō baī imodō anguēnē. Æcānō botō miűæ tee empo goda tōmengā wēmō iűōmō cōwē cægōnāmaī ingampa. Wæætē tōmengā nānō quēwēnō taadō edonque acæcāimpa, ante botō tōmengā beyæ űāō baī imopa, ante apænecantapa.

¹³ Paditeoidi guiquēnē tōmengā ingante,

—Bitō iűōmō nāmā āninqe, Æbānō imoo, ante apænebi imipa tōō. Mānōmaī nāmanque ante apænebi beyæ bitō ānīnō ōnonquedō ante impa, āmōnipa, piűnānitapa.

¹⁴ Itota wæætē,

—Botō iűōmō nāmā āninqe, Æbānō imoo, ante apænebo incæ botō apænedō nāwangā impa. Edæ, Botō æyōmōnō quēwente pōmo imoo, ante ayæ, Ædōnō gobo imoo, ante do ēñēmopa. Mīnitō guiquēnē, Botō æyōmōnō quēwente pōmoo imoo, ante ayæ, Ædōnō gobo imoo, ante wīl ēñēmīnipa tōō. ¹⁵ Waodānīque, űīmaī cæedāni, ante nāni wææ ante cægā baī mīnitō wacā ingante apænte āmīni imīnipa. Botō guiquēnē waodāni tōmānāni inānite adinque, Æcānō waa cæcantawo, ante, Æcānō wēnæ wēnæ cæcantawo, ante apænte ānāmaī imopa.

¹⁶ Incæte botō mānōmaī apænte āmo baī, Æbānō apænte āmoo, ante pōnēninque tōmēmo nō ante apænte āmopa. Edæ wīl botonque apænte āmopa. Wæætē botō Mæmpo botō imote nē da pōnongaingā iűōmō tōmengā iűōmō botō tōnō godongāmæ cæcā ate apænte āmopa. ¹⁷ Mīnitō mīni wææ yewæmongaintaa űīmaī ante wææ yewæmongatimpa. Mēnaa onguīñæna nē adina inte tōmēna nāna adīnō ante apæneda ēñēninque mīnitō wæætē, Nō impa, ante ēñēcæmīnimpa. ¹⁸ Botō iűōmō nāmā āninqe, Æbānō imoo, ante apænebo imopa. Ayæ botō Mæmpo botō imote nē da pōnongaingā iűōmō tōmengā botō imotedō ante, Æbānō ingāā, ante adobaī apænecā ēñēcæmīnimpa.

¹⁹ Angā ēñēninque tōmēnāni tōmengā ingante,

—Bitō Mæmpo æyōmōnō quēwengāā.

Āñōnāni Itota wæætē,

—Mīnitō iűōmō, Botō incæ æbānō imoo, ante, Botō Mæmpo incæ æbānō ingaingā ingāā, ante ēñēmīni imīnitawogaa. Botō æbodō imoo, ante ēñēmīni inte baī mīnitō, Botō Mæmpo æbānō ingaingā ingāā, ante adobaī ēñēmīni incædōmīnimpa, ante apænegacāimpa.

²⁰ Itota Wængonguī oncō űāēnæncōnē yabæcōnē go guīidinque, Wængonguī quī, ante nāni da wencade gāānē ongonte apænedinque mānīnō ante apænegacāimpa. Incæte tōmengā nānō wænguīōnæ wīl oo pōnī i beyænque tōmengā ingante bæi ongonte ænāmaī ingadānimpa.

Itota, Botō goquīñōmō mīnitō ædō cæte goquīmīni, angā

²¹ Itota wæætē tōmēnāni inānite āninqe,

—Botō wadæ goquīmo imopa. Gobo ate mīnitō botō imote ante diqui diqui mīnguīmīni imīnipa. Mīnitō wēnæ wēnæ cædōmīni inte wæncæmīnimpa. Botō goquīñōmō mīnitō ædō cæte ponguīmīni, angantapa.

²² Mānīnō beyæ oodeoidi awēnēidi, Tōmengā iűōmō, Botō goquīñōmō ante mīnitō ædō cæte ponguīmīni, ante quīnante angāā. Tōmengā nāmā incæ, Wængonguīmo, ante pōnēninque űīmaī angantawo, ante ānānitapa.

²³ Itota godōmenque,

—Minitō iñōmō inguipoga quēwēmini imīnīpa. Botō guiquēnē oōnædē quēwente pōmo imopa. Minitō iñōmō ī inguipogaque nāni quēwencabo tōnō adomīni imīnīpa. Botō guiquēnē ī inguipogaque nāni quēwencabo tōnō adobo ināmai imopa. ²⁴ Mānōmai beyæ botō, Minitō wēnæ wēnæ cædōmīni inte wæncæmīnīpa, ante mīnitō imīnite apænētabopa. Botō, Æbānō imoo, ante āmo ēñēnīque pōnēnāmai imīni īnīnīque mīnitō wēnæ wēnæ cædōmīni inte nō wæmāimīnīpa.

²⁵ Ante apænecā ēñēnīque tōmēnāni,

—Æbidō imītawo.

Ante āñōnāni Itota wæætē,

—Botō do mīnitō imīnite, Æbodō imoo, ante nē ānīmo imopa. ²⁶ Botō mīnitō imīnitedō ante nanguī anguēnēmo imopa. Minitō imīnitedō ante āmo bai mānīi botō ānō mīni apænte angūnīque imāimīpa. Incæte botō imote nē da pōnongāngā iñōmō tōmengā nōingā inte tōmengā, Quīnō botō imote angāā, ante botō ēñēnīnō ante botō adodō ante inguipoga quēwēnāni inānīte apænēbo imopa, angantapa. ²⁷ Incæte tōmēnāni, Itota tōmengā Mæmpo ingantedō ante mōnitō imōnīte apænecampa, ante ēñēnāmai ingadānīpa. ²⁸ Mānōmai beyæ Itota,

—Botō Waobo ēñagaīmo iñōmote mīnitō botō imote awāa timpodīnīque tīwadinīque gō cæmīni wægōñōmo mīnitō mānīfēdē edæ, Botō æbodō imoo, ante ēñencæmīnīpa. Ayæ botō nāmā pōnēnīnīque cædāmai imopa. Wæætē Wæmpo nānō odōmonte apænedō ante botō imote apænecā botō ēñēnīnō ante adodō ante apænēbopa, ante mīnitō adobaī mānīfēdē ēñencæmīnīpa. ²⁹ Botō imote nē da pōnongāngā botō imote emō cædāmai inte cōwē botō tōnō godongāmæ ongongā ingampa. Edæ botō cōwē, Æbānō cæbo ate tōmengā waa aquīngāā, ante cæbopa, ante Itota apænēgacāimīpa.

³⁰ Mānīnō āñongā nanguī ināni iñōmō tōmengā ingante pōnēngadānīpa.

Wēnæ beyænque nē cædāni

³¹ Odeoidi pancadāniya nē pōnēnāni iñōnānīte Itota iñōmō,

—Minitō cōwē botō odōmonte apænedīnō bai cæmīni īnīnīque botō mīñæ nō gomīni imāimīnīpa. ³² Ayæ botō ānō nōīnō impa, ante ēñencæmīnīpa. Mānīnō nō botō ānō beyænque mīnitō űimpo cæte quēwencæmīnīpa.

³³ Ante āñongā tōmēnāni wæætē,

—Mōnitō iñōmō Abadāō nānō pæīmōni imōni inte mōnitō cōwē wacā æcāmenque beyænque nē cæmōni ināmai intamōnīpa tōō. Bitō iñōmō, Wacā beyænque mīnitō godōmenque cædāmai inte űimpo cæte quēwencæmīnīpa, ante ædō cæte āmīi.

³⁴ Āñōnāni Itota wæætē,

Mīnitō imīnite nāwangā āmopa. Nē wēnæ wēnæ cæcā iñōmō tōmengā wacā beyænque cæte nē quēwēngā bai wædongā inte edæ tōmengā nānō wēnæ wēnæ cægāinonque ante cædinīque ædō cæte aamō cæte goquīngāā. ³⁵ Wacā beyænque cæte nē quēwēngā iñōmō tōmengā awēnē nāni wencabo tōnō wīi cōwē godongāmæ quēwēngā ingampa. Awēnē wēngā guiquēnē tōmengā mæmpo tōnō nāna wencaya ina beyænque tōmengā awēnē tōnō cōwē guēa quēwēngā ingampa. ³⁶ Mānōmai beyæ Wængongūi Wēngā mīnitō imīnite űimpo cæcā īnīnīque mīnitō nō űimpo cæte quēwēnīnīte wacā beyænque nē cæcā bai ināmai inte quēwēngūimīni imāimīnīpa. ³⁷ Mīnitō iñōmō Abadāō nānō pæīmīni imīnīpa, ante do ēñēnōpa. Incæte botō ānō ante mīmōnē entawēnāmai quēwēmini beyæ mīnitō botō imote, Wænōmōni wæncæcāimīpa, ante pōnēmīni imīnīpa. ³⁸ Botō iñōmō botō Mæmpo weca tōmēmo adīnō ante mīnitō imīnite

apænebo imopa. Minitō guiquēnē mīni mæmpo nānō angainō mīni ēñēninō ante cæmīni imīnīpa.

³⁹ Ante apæneyongā tōmēnāni wæætē,
—Abadāo mōnō docā mæmpo ingaingā ingampa.

Ānāni ēñēninque Itota,

—Minitō nō Abadāo wēmīni inte bai mīnitō tōmengā nānō cægainō bai adobai cæcædōmīnīpa tōō. ⁴⁰ Nōwo iñæmpa botō, Wængonguī nāwangā nānō angainō ante botō ēñēninō ante mīnitō imīnite nē apænebo iñōmote mīnitō, Mōnitō æbānō cæte wænōmōni wænguingāā, ante pōnēmīni imīnīpa. Abadāo mānīi mīni cægai bai cædāmai ingacāimpa. ⁴¹ Minitō iñōmō tōmēmīni mæmpo nānō cægai bai adobai cædōmīni imīni awædō.

Āñongante tōmēnāni,

—Minitō wīi wegōwæ wēmōni imōnīpa tōō. Wængonguī incæ tōmengā adocanque mōnitō Mæmpo inongāimpa.

⁴² Ānāni ēñēninque Itota tōmēnāni inānite,

—Wængonguī nāwangā mīnitō Wæmpocā ingā bai mīnitō botō imote waadete pōnencædōmīnīpa. Edæ botō Wængonguī weca quēwente mīnitō weca nōwo wææ pontabopa. Botō wīi nāmā pōñēninque pontabopa. Wæætē tōmengā botō imote da pōnongā pongaimo imopa. ⁴³ Minitō imīnite botō quīnō apæneboo, ante mīnitō quīnante ēñēnāmai imīnī. Edæ botō ānō ante, Quīnō apæneboo, ante mīnitō babetamō ināni bai inōmīni inte ædō cæte ēñēnguīmīnī. ⁴⁴ Wēnæ iñōmō mīnitō mæmpo inongāimpa. Ayæ mīnitō mæmpo nānō cæinēwēnō ante mīnitō adodō ante, Mōnitō cæinēmōnīpa, ante cæmīnīpa. Wēñēñedē inguipoga mā badōñedē tōmengā, Botō wænonguīmo, ante do entawengā ingacāimpa. Tōmengā, Quīnō nāwangā impa, ante cōwē ānāmai ingampa. Ayæ edæ, Quīnō ānō nōinō impa, ante tōmengā entawēnāmai inongāimpa. Adocā babæ tēdēdinque tōmengā babæ nānō entawēnonque ante tēdewengā ingampa. Edæ tōmengā nē babæ ānongā ingampa. Ayæ tōmengā iñōmō mā babæ angaingā ingampa. ⁴⁵ Incæte botō nāwangā āmo beyænque mīnitō botō ānō ante pōñēnāmai imīnīpa tōō. ⁴⁶ Minitō weca ongongā iñōmō æcāmenque incæ botō imote apænte āninque, Bitō wēnæ wēnæ cæbi imīpa, ante, Nāwangā impa, ante odōmōnatawogaa. Botō nāwangā āmo bai mīnitō quīnante botō angainō ante pōñēnāmai imīnīpa. ⁴⁷ Wængonguī wēnāni nē inōnāni iñōmō Wængonguī nānō angainō ante ēñēnāni inānīpa. Minitō guiquēnē tōmengā wēmīni ināmai imīni beyæ, Tōmengā quīnō angāā, ante ēñēnāmai imīnīpa, ante Itota apænegacāimpa.

Abadāo ayæ ēñādāmai iñedē mōnō Codito do ingaingā

⁴⁸ Oodeoidi wæætē tōmengā ingante,

—Bitō Tāmadiabæ quēwēmi imipææ. Ayæ wēnæ tōnō cæbi imipææ, ante wīi nāwangā āmōni intamōnīi.

⁴⁹ Ante pīlnāni ēñēninque Itota wæætē apænedinque,

—Botō wīi wēnæ tōnō cædōmo imopa. Wæætē botō iñōmō, Botō Mæmpo ingante waa acæboimpa, ante cæbo imopa. Minitō guiquēnē botō imote waa adāmai imīnīpa tōō. ⁵⁰ Waodāni, Bitō waēmō imīpa, ante botō imote apænecædānīpa, ante botō cædāmai imīpa. Wæætē wacā iñōmō, Waodāni bitō imite apænedinque, Waēmō imīpa, ante apænecædānīpa, ante nē cæcā ingampa. Māningā nē apænte ānongā ingampa. ⁵¹ Minitō imīnite nāwangā āmopa. Botō angainō ante nē ēñēnte cæcā tōmengā iñōmō wantæpiyæ wēnāmai quēwencæcāimpa, angantapa.

⁵² Ante apænecā ēñēninque oodeoidi,

—Bitō wēnæ tönō cæbi ïmipa, ante ñōwo ædæmō ēñēmōnīpa. Abadāō wodi ïñæmpa do wængacāīmpa. Ayæ Wængonguī beyæ nē apænedāni adobaī do wængadānīmpa. Incæte bitō, “Botō angainō ante nē ēñente cæcā tōmēngā ïñōmō wantæpiyæ wænāmaī quēwencæcāīmpa, ante apænebi tōō.” ⁵³ Mōnō docā mæmpo Abadāō wodi ñænængā inte cægaingā incæte bitō ïñōmō edæ, Abadāō wædangā ïñongante botō ïñōmō godōmenque ñænæmo inte cædōmo ïmopa, āmitawo. Tōmēngā ïñōmō edæ do wængacāīmpa. Ayæ Wængonguī beyæ nē apænedāni adobaī do wængadāni apa ānewēē. Bitō nāmā ānīnque, Æcāmē bai ïmoō, ante āmi.

⁵⁴ Āñōnāni Itota wæætē,

—Botō nāmā ānīnque, Waodāni, Bitō waēmō ïmipa, ante botō ïmote apænecādānīmpa, ante ēñēinente wæbo bai waodāni botō ïmote nāni waa apænedō wæætē ōnonquedō ante incædōnīmpa. Botō Mæmpo incæ mīnitō, Mōnō Wængonguī ingampa, ante mīni ānongā guiquēnē tōmēngā ïñōmō, Bitō waēmō ïmipa, ante botō ïmote pōnō apænecā apa quēwēmīni. ⁵⁵ Mīnitō tōmēngā ingante wī adīnque pōnēnāmā ïmīnīpa tōō. Botō guiquēnē tōmēngā ingante do agaimo inte pōnēmo ïmopa. Botō tōmēngā ingante adāmaī ïmopa, ante bai botō mīnitō bai babæ ante ancædōmoīmpa. Wæætē tōmēngā ingante do adīnque nē pōnēngaimo inte botō ïñōmō edæ tōmēngā nānō angainō bai nē cæbo ïmopa. ⁵⁶ Inguipoga botō ponguīōnæ ante mīnitō docā mæmpo Abadāō wodi incæ, Codito ponguīōnæ pongā acæboīmpa, ante pōnēnīnque do edæ watapæ togacāīmpa. Īnīnque tōmēngā mānīōnæ Codito nānō ponguīōnæ adīnque godōmenque togacāīmpa, ante Itota apænecantapa.

⁵⁷ Oodeoidi tōmēngā ingante,

—Bitō ēñagai ïñōmō tincoenta wadepo ïnāmā i incæte bitō ædō cæte, Botō Abadāō ingante atabopa, ante āmīi.

⁵⁸ Ante pīñōnāni Itota wæætē,

—Mīnitō ïmīnite nāwangā āmopa. Abadāō wodi ayæ ēñadāmaī ïñedē botō ïñōmō edæ do quēwēmo ingaimo ïmopa, ante apænecantapa.

⁵⁹ Mānīnō ante apænecā ēñēnīnque tōmēnāni ïñōmō tōmēngā ingante dicaca tacacæte ante cædīnque dicacōo wææmpo ænānitapa. Incæte Itota wē womōnīnque Wængonguī oncō ñænæncodo tao wadæ gogacāīmpa.

9

Babetamō ēñagāingā incæ waa bamonte acampa

¹ Itota gomonga godīnque onguīñængā babetamō ēñagāingā ingante acantapa. ² Tōmēngā ēmīñænāni ïñōmō tōmēngā ingante,

—Awēnē nē Odōmōmi ïmi, māningā onguīñængā incæ tōmēngā mæmpoda incæ æcānō wēnæ wēnæ cæda beyæ tōmēngā babetamō ēñacantawo, ante ēñencæte ante ānānitapa.

³ Itota tōmēnāni ïnānite,

—Īngā onguīñængā incæ tōmēngā mæmpoda incæ tōmānāni wēnæ wēnæ cædāmaī ïnānitapa. Wæætē tōmēngā babetamō ēñagāingā inte quēwēñongante Wængonguī nānō cædō ïñōmō edonque pōnī acæīmpa, ante māningā mānōmaī ingacāīmpa. ⁴ Īñānāni ēñēedāni. Botō ïmote nē da pōnongāingā tōmēngā nānō cædō ante mōnō mīi quēwenganca mōnō cæquēnēmō ïmopa. Mōnō wænguīōnæ ïñonte mōnō ædō cæte ayæ cæquīmōō. ⁵ Botō inguipoga quēwēñedē botō inguipoga quēwēnāni beyæ ñāō bai ïnōmo ïmopa.

⁶ Mäninö ante äninque Itota onguipoga towæ tänöninge wëä wëä gopod-
 inque aquimæ bayonte æninque babetamongä awinca öni öni pæmongantapa.

⁷ Ayæ tömengä ingante,

—Goe. Gäwapæ Tidoeë nani ämæ godinque bitö awinca ñäö memöe, ämopa,
 angantapa. Tidoepæ nani ämæ iñömö mönö tededö, Da godömæ, ante impa.

Angä eñente godinque onguinængä ñä memöninge tömengä oncönë ocæ
 emænte pöninge do acä ingacäimpa. ⁸ Tömengä mänömai do acä inte pongä
 adinque godongämæ quëwënäni tönö wëenëñedë tömengä, Pönömi æmoe,
 añongante në adinäni tönö,

—Æ, Ìngä onguinængä diyæ, Pönömïni æmoedäni, ante në ä necöningä wii
 adocä ingantawo.

⁹ Änani eñëninge pancadäniya,

—Mäningä ingampa, änänitapa.

Wadäni guiquënë,

—Wii tömengä ingä, önonque tömengä nänö emö bai emönongä ingampa.

Ante tedeyönäni onguinængä tömenganque,

—Botö mänimodö inömo imopa, angantapa.

¹⁰ Ayæ tömënäni,

—Æbänö cæte bitö waa bamonte abii.

¹¹ Äñönäni tömengä wæætë,

—Onguinængä iñömö tömengä emöwo Itota iñömö onguipoga towæ
 tänöninge wëä wëä gopodique aquimæ bayonte æninque botö awinca
 öni öni pæmongantapa. Ayæ botö imote, “Goe. Gäwapæ Tidoepæ nani ämæ
 godinque bitö awinca ñä memöe” angantapa. Angä eñëninge botö wadæ
 gote ñä memöninge do waa bamonte abopa, angantapa.

¹² Tömënäni tömengä ingante,

—Ìngä onguinængä bitö änogä iñömö æyömönö ingää.

Ante añönäni tömengä wæætë,

—Botö eñenämai imopa, angacäimpa.

Babetamö ìngä ingante Paditeoidi ancaä änäni

¹³ Ayæ Paditeoidi weca onguinængä në babetamö eñagaingä ingante ænte
 mämönäni pongantapa. ¹⁴ Itota mänii aquimæ badöninge babetamö ìngä
 awinca wi æmante bai nänö cæönæ iñömö oodeoidi guëmanguionæ inönimpa.

¹⁵ Mänömai beyæ Paditeoidi iñömö adobai eñencæte ante babetamö ìngä
 ingante edæ, Æbänö cæte bitö waa bamonte abii, ante añönäni tömengä
 wæætë,

—Mäningä iñömö aquimæ æninque botö awinca öni öni pæmongantapa.
 Ayæ botö tömëmo awinca ñä memöninge ñöwo waa bamömo inte abopa,
 angantapa.

¹⁶ Paditeoidi pancadäniya,

—Ìngä onguinængä iñömö wii Wængongui weca quëwente pongä ingampa.
 Edæ tömengä mönö guëmanguionæ iñonte guëmänämai inte do cæcampa,
 änänitapa.

Wadäni guiquënë,

—Ìñæmpa waocä në wënæ wënæ cæcä ìnogä inte ædö cæte mänömai,
 Acæminimpa, ante mä cæquiringä, änänitapa.

Ìninque tömënäni wadö wadö ante pönente tedewengadänimpa. ¹⁷ Ayæ
 tömënäni wæætë babetamö ìngä ingante,

—Tömengä cæcä ate bitö waa abi inte bitö edæ tömengä ingantedö ante
 quinö ämii.

Ante äññonäni onguifñængä wæætë,

–Tömengä Wængongui beyæ nê apæneçä ingampa, angantapa.

18 Babetamö ìningä ìñömö, Waa bamömo ìmopa, ante apæneçä ëñëningue oodeoidi awënëidi ayæ pönënamai ìnänitapa töö. Tömengä mæmpoda ìnate aa pedäni ponte apæneçä ate mäniñhedë pönënanitapa. 19 Tömënäni tömëna ìnate,

–Ìngä onguifñængä edæ minatö wengä ingantawo. Mäningä nê babetamö ëñagängä minatö änongå adocä ingantawo. Æbänö çæte tömengä ñöwo waa bamonte acäi.

20 Ante äññonäni tömengä mæmpoda wæætë, Nê babetamö ëñagängä ìñömö tömengä mönatö wengä ingampa, ante ëñëmönapa. 21 Incæte mönatö, Æbänö çæte tömengä ñöwo waa bamonte acäa, ante, Æcänö tömengä awinca wi æmonte bai çæçä, ante ëñënamai ìmönapa. Minitö tömengä ingante ëñencæte ante äedäni. Tömengä do picængä ingampa. Tömenganque apæneçä ëñencæminimpa, änatapa.

22 Tömengä mæmpoda oodeoidi awënëidi ìnänite guifñëningue mäniñö ante apænedatapa. Edæ oodeoidi awënëidi ìmaï ante do apænedönänimpa. Æcänö Ìfota ingante Ao ante, Mönö Codito ingampa, äna ëñëningue edæ, Mönitö odömöincönë ongönämai incæbiimpa, ante tömengä ingante da tadömöni tao gocæcäimpa, ante godongämæ pönente apænedönänimpa. 23 Mänömai beyæ tömengä mæmpoda, “Tömengä do picængä ingampa. Minitö tömengä ingante ëñencæte ante äedäni,” angadaimpa.

24 Onguifñængä nê babetamö ìningä ingante wæætë aa pedäni pongä ate tömengä ingante,

–Bitö Wængongui ëñëñongä näwangä ante apænee, ämönipa. Edæ ìngä onguifñængä mäniñö nê çædingä wënæ wënæ çæçä ingampa, ante edæ do amönipa.

25 Ante piññonäni tömengä wæætë,

–Mäningä wënæ wënæ çæçä incæ wii wënæ wënæ çæçä incæ botö ëñënamai ìmopa. Botö babetamömo ìnimo incæ ñöwo waa bamonte abopa. Mäningue ëñëmo ìmopa.

26 Ante apæneçä ëñëningue tömënäni tömengä ingante,

–Tömengä ìñömö bitö ìmite æbänö çæcantawo. Æbänö çæte bitö waa bamonte abii, änanitapa.

27 Tömengä wæætë,

–Minitö ìminite do antabopa. Botö äññömote minitö ëñënamai ìminipa töö. Quinante wæætë adodö ante ëñëinëminii. Minitö adobai, Mönitö tömengä ëmiñæmöni baquimöni, ante äminitawo, ante angantapa.

28 Ayæ tömënäni tömengä ingante plinte wënæ wënæ badete todingue,

–Bitö mäningä ëmiñæmi ìmipa töö. Mönitö guiquënë Möitee ëmiñæmöni ìmöni apa quëwëmi, änanitapa. 29 Wængongui Möitee ingante apænegacäimpa, ante do ëñëmönipa. Ìngä guiquënë æyömönö quëwente pongäa, ante ëñënamai ìmönipa.

30 Äññonäni onguifñængä wæætë,

–Mäniñö minitö äniñö wiwa impa äminii. Tömengä pönö çæçä waa bamonte abo incæte tömengä æyömönö quëwente pongäa, ante minitö ëñënamai ìminipa. 31 Nê wënæ wënæ çæçäni ìñömö Wængongui ingante apæneyönäni tömengä tömënäni ìnänite ëñënamai ingampa, ante do ëñëmompä. Wæætë Wængongui ingante, Bitö adobique mönö Wængongui ìmidö anguënë, ante nê apæneçä ìñömö tömengä Wængongui nänö angainö nê ëñente çædongä inte

apæneyongante Wængongui tōmengä ingante eñencæcäimpa. ³² Waocä nē babetamō eñagaingä iñongante wacä tōmengä awinca wi æmonte bai cæcä ante æyedēmenque incæ inguipoga quēwēnāni dicæ ānāni eñēnānitawogaa. ³³ Iñgä onguiñængä iñōmō wii Wængongui nānō da pōnongä pongaingä inte bai tōmengä tōmānō cædāmai incædongäimpa, angantapa.

³⁴ Mānīnō angä eñēninque tōmēnāni wæætē,

Bitō eñagaiñedē do wēnæ wēnæ cæte eñagaiimi imipa. Incæte bitō mōnitō imōnite ædō cæte, Eñencæminimpa, ante odōmonte apænebi imipa tōō.

Ānāni iñinque tōmēnāni, Bitō mōnitō odōmōincōnē ongōnāmai tao gobæwe, ante tōmengä ingante da tadōnāni tao gogacäimpa.

Nē babetamō bai iñāni iñānite ante Itota apænecampa

³⁵ Tōmēnāni tōmengä ingante da tadōnānīpa, ante tededāni eñēninque Itota tōmengä ingante ante diqui diqui minte gote adinque.

—Bitō Waocä nē eñagaingä ingante pōnēmitawo.

³⁶ Angä eñēninque onguiñængä,

—Awēnē, māningä æcānō iñaa. Botō tōmengä ingante pōnencæboimpa, ante apænebi eñēmo.

³⁷ Ante āñongä Itota wæætē,

Bitō tōmengä ingante do abitapa. Ayæ bitō imite nē apænebo iñōmō tōmēmo imopa.

³⁸ Angä eñēninque onguiñængä,

—Awēnē, botō wede pōnēmo imopa. Ayæ, Bitō Wængongui Wēmi imidō angūēnē, ante tōmengä Itota weca ædæ wææñinque apænecantapa.

³⁹ Itota iñōmō edæ,

—Botō, Inguipoga quēwēnāni æbānō cædāni, ante apænte ancæte ante pōninque iīmai cæbopa. Botō nē babetamōnāni bai iñāni waa bacædānīpa, ante cædinque pontabopa. Ayæ wæætē, Mōnitō waa amōnīpa, ante nē ānāni iñānite, botō, Babetamōmīni bai imīnīpa, ante edonque odōmoncæte ante pontabopa.

⁴⁰ Mānīnō angä eñēninque Paditeoidi pancadāniya tōmengä weca nē ongōnāni guiquēnē tōmengä ingante,

—Æbānō āmīi. Iñæmpa mōnitō adobai babetamōmōni bai imōnitawogaa.

⁴¹ Ante āñōnāni Itota wæætē,

—Mīnitō babetamōmīni bai inte bai wēnæ wēnæ cædāmai incædōmīnīpa. Wæætē mīnitō, Mōnitō waa amōnīpa, ante nē ānōmīni inte mīni wentamō mongæncōo ee mongæmīni inguimīnidō angūēnē, ante apænegacäimpa.

10

Nē aacä tōnō tōmengä obegaidi

¹ Itota ayæ iīmai apænecantapa. “Mīnitō imīnite nāwangä āmopa. Onguiñængä obegaidi nāni wææ cæyōmō guidemō nē guidāmai inte wæætē wayōmō da ēwa æi guicä iñōmō tōmengä iñōmō nē awēmō ō ængä iñongä inte adobai wadāni ayōnāni nē pō ō ænte gocä ingampa. ² Odemō nē guicä guiquēnē tōmengä obegaidi iñānite nē aacä ingampa. ³ Nē aacä beyæ odemō nē wææ cæcä wi ænecampa. Wi ænecä ate nē aacä pō guite tedeyongä obegaidi tōmengä nānō tedepāmo eñēnte iñānīpa. Tōmengä obegaidi iñānite nāni emōwo nāni emōwo ante aa pecä pōñōnānite tōmengä tōmēnāni iñānite ænte taocampa. ⁴ Tōmengä obegaidi tōmānāni iñānite ænte taodinque tōmengä ōnōmæca iñōmō tāno beyænte gocä ate tōmengä obegaidi

tömengä nänö tedepämo eñëninque tömengä ingante tee empo godänipa. ⁵ Wacä ingante guiquënë tömënanï tee empote godämaï inänipa. Wæætë wacä nänö tedepämo eñënämaï inäni inte tömënanï tömengä wecä ongönämaï wodiï gocädänimpa,” ante Itota apænecantapa.

⁶ Tömengä mänömaï tömënanï inänite odömoncæte ante, Në aacä æbänö cæcäa, ante odömonte apænecä incæte tömënanï tömengä nänö äninö ante eñënämaï ingadänimpa.

Itota mönö ïmonte në Aacä ingä

⁷ Mänömaï beyæ Itota wæætë äninque, “Botö munitö ïmïnite näwangä ämopa. Botö ïñömö në obegaidi bai inäni nänï wææ cæyömö, Guicädänimpa, ante odemö bai ïmopa. ⁸ Wëenëñedë botö ayæ pönämaï ïñedë wadäni odömonte apænecæ pongadänimpa. Tömënanï tömännäni waodäni inänite në awëmö ö ænännï bai inönännï inte adobai wadäni ayönännï në pö ö ænte gogainännï bai ingadänimpa. Incæte waodäni ïñömö në botö obegaidi bai inönännï inte në ö æñinännï inänite wæætë eñënämaï ingadänimpa. ⁹ Botö në odemö bai ïmopa. Odemö në guicä bai ïñömö tömengä botö ïmote pönengä ïñongante botö æmo beyænque quëwencæcäimpa. Adocä në obega bai inte tömënanï nänï wææ cæyömö guïdemö në guicä bai ïninque tömengä piyænë cæte quëwencæcäimpa. Ayæ tömengä wæætë në taocä bai ïninque tömengä nänö cænguï mä öñö adinque eyepæ cæncæcäimpa,” ante Itota apænecantapa.

¹⁰ Ayæ apænedinque, “Në awëmö ængä guiquënë tömengä ïñömö awëmö æncæte ante pongä ïnogä inte adobai wænoncæte ante wo ëwencæte ante mäninganca cæcæte ante pongä ingampa. Botö ïñömö, Waodäni quëwencädänimpa, ante ayæ, Tömënanï nänï quëwenguinque ante watapæ pönï quëwencädänimpa, ante pontabopa. ¹¹ Botö obegaidi bai inäni inänite në waa aacä bai ïmopa. Në waa Aacä ïñömö nämä incæ obegaidi beyænque wæncæcäimpa. ¹² Godonte æinta ante wacä ingante në cæcä ïñömö tömengä ïñömö obegaidi në ëacä inämaï ïnogä inte në aacä inämaï ingampa. Mänömaï beyæ adocä ïñömö mëñe bai ingä pongä adinque tömengä obegaidi inänite ëmö cæte wodiï winongampa. Tömengä wodiï winongä adinque mëñe bai ingä wæætë obegaidi wecä pogodo ponte obega ingante yao ongöninque, Obegaidi pangocæ goquïnännï, ante cæcampa. ¹³ Godonte æintaque ante në cæcä ïñömö, Æbänö cæte obegaidi waa quëwenguïnännï, ante änämaï ïnogä inte edæ wodiï winongampa,” ante Itota apænecantapa. ¹⁴⁻¹⁵ Ayæ apænedinque, “Obegaidi inänite waa aacä bai edæ botö ïñömö në waa Aabo ïmopa. Botö Mæmpo edæ botö ïmote do ate pönengä bai botö adobai tömengä ingante do adinque pönëmopa. Ayæ tömömo obegaidi bai inäni inänite do adinque tömënanï inänite pönëmopa. Ayæ tömënanï guiquënë botö ïmote do adäni inte botö ïmote pönënanïpa. Botö nämä incæ obegaidi bai inäni beyænque wæncæboimpa. ¹⁶ Ayæ wadäni ïñömö botö obegaidi bai në inäni incæ wïi mänïñömö wææ cæyömö quëwënanï inänipa. Botö mäninännï inänite adobai æte mämö pongüenëmö ïmopa. Adodäni adobai botö tedepämo, Æbänö ämoö, ante eñenguïnännï inänipa. Mänömaï beyæ mäninännï ïñömö do botö quïnännï tönö tömännäni adocabodänique baquïnännï inänipa. Ayæ në Aabo adoboque ïñömö tömännäni beyæ cæcæboimpa.” ante Itota apænecantapa.

¹⁷ Ayæ apænedinque, “Botö nämä incæ Ao ante wæninque ñäni ömæmoncæboimpa, ante cædinque wæætë tömömo müi quëwenguïmo ïncæboimpa. Mänömaï beyæ botö Mæmpo botö ïmote waadete pönengä ingampa. ¹⁸ Waodäni ïñömö ædö cæte botö ïmote wænonguïnännï. Botö nämä incæ Ao äninque wæncæboimpa. Botö nämä tæï piñæmo ïñömö,

Wænguimo, ante nē āmo īnōmo īmopa. Ayæ adobai botō nāmā tæi piñante nē āmo inte botō, Nāni ōmæmoncæboimpa, ante cædinqwe wæætē tōmēmo mīi quēwenguimo incæboimpa. Botō Mæmpo īñōmō botō īmote nānō wææ angainō botō ēñēninō ante ēñente cæbopa,” ante apænecantapa.

¹⁹ Mānīnō apænecā ēñēninque oodeoidi wæætē wadō wadō pōnente tedwengadānimpa. ²⁰ Oodeoidi nanguī īnāni īñōmō,

—Tōmēngā wēnæ tōnō cæcā inte edæ ōmæcacā īnongā ingampa. Ædō cæte tōmēngā ingante ēñēmīni īmīni.

²¹ Añōnāni oodeoidi incæ wadāni guiquēnē,

—Tōmēngā wēnæ tōnō cæcā inte bai tōmēngā īlmai nānō ānīnō ante wīi angā incædongāimpa. Nē wēnæ inte quēwente cæcā īñōmō babetamōnāni awinca wi æmōnte bai cæcā waa bamōnāniyaa.

Oodeoidi Itota ingante Baa ānāni

²² Yoguite tedæ īñonte waodāni Eedotadēē quēwēnāni, Wængonguī oncō tæiyæ waēmō oncō ante dodāni mænongadānimpa, ante pōnente ææmæ cæyōnāni. ²³ Itota Wængonguī oncō ñænæncōnē yabæcōnē Tadōmōō nāni ānoncōnē īñōmō cægongantapa. ²⁴ Oodeoidi tōmēngā weca pō godongāmæ gongæante ānāni,

—Bitō æbānō īmīi, ante æpōōnædō ayæ āinēnāmai īmīi. Bitō mōnitō Codito īmī īnīnque mōnitō īmōnite edonque pōnī apænēbi ēñēmōnīi.

²⁵ Ante añōnāni Itota wæætē,

—Mīnitō īmīnite do antabopa. Incæte mīnitō pōnēnāmai īmīnīpa tōō. Botō edæ botō Mæmpo ēmōwo ante bamōnēngæ cæbo adinqwe mīnitō, Botō æbānō īmoo, ante ēñēngūēnēmīni īmīnīpa. ²⁶ Mīnitō wīi botō obegaidi bai īnōmīni inte botō īmote pōnēnāmai īmīnīpa tōō. ²⁷ Waodāni botō obegaidi bai nē īnāni inte botō tedepāmo, Æbānō āmoo, ante do ēñēnāni. Ayæ botō tōmēnāni īnānite adinqwe pōnēmo īñōmote tōmēnāni wæætē botō īmote tee empote godānīpa. ²⁸ Botō adodāni īnānite wantæpiyæ nāni quēwenguīnō godōmo ænīnque quēwēncædānimpa. Ayæ cōwē wænāmai incædānimpa. Tōmēnāni tōmēmo ōnōnempo ongōñōnānite æcānō tōmēnāni īnānite gā pe æmpoda īñōmō edæ dæ angampa. ²⁹ Botō Mæmpo edæ adodāni īnānite botō īmote nē pōnongaingā īnongā ingampa. Tōmānāni wædānāni īñōnāni tōmēngā īñōmō godōmenque ñænængā inte nanguī cædongā ingampa. Īnīnque tōmēngā ōnōnempo ongōñōnānite æcānō tōmēnāni īnānite gā pe æmpoda īñōmō edæ dæ angampa. ³⁰ Botō īñōmō botō Mæmpo tōnō āawocaque bai ēwocamōna īmōnāpa, ante Itota apænēgacāimpa.

³¹ Mānīnō angā ēñēninque oodeoidi wæætē tōmēngā ingante dicaca tacacæte ante cædīnque dicacoo wææmpo ænānīpa. ³² Tōmēnāni dicacoo wææmpo æñōnānite Itota tōmēnāni īnānite,

—Botō mīnitō weca botō Mæmpo nānō angāi bai nanguī bamōnēngæ odōmōnte cætabopa. Ædō botō bamōnēngæ cædīnō ante adinqwe mīnitō botō īmote dicaca tacacæ cæmīni.

³³ Ante añōngā oodeoidi wæætē,

—Mānīnō bitō waa cædīnō beyæ ante mōnitō wīi bitō īmite dicaca tacacæ cæmōnīpa. Wæætē bitō babæ ante Wængonguī ingante godō wēnæ wēnæ ānīpa, ante bitō īmite tacacæ cæmōnīpa. Edæ mōnitō waomōni bai inte bitō adobai waobi īmī incæte bitō, Botō Wængonguīmo īnōmo īmopa, ante ānīpa tōō.

³⁴ Ante wæyōnāni Itota wæætē tōmēnāni īnānite,

—Mīnitō mīni wææ yewæmongainō wīi īlmai ante yewæmongatīi. “Mīnitō īñōmō wængonguīdi īmīnīpa, ante do antabopa,” ante yewæmongadānimpa.

³⁵ Wængongui angä eñente nani yewæmongainö ante waodäni ædö cæte Baa äninque wido cæquinäni. Wængongui nänö angainö ante apæneca nē eñēnāni iñōnānite tōmengä, Minitō wængonguidi iñinipa, angantapa. ³⁶ Ayæ botō Mæmpo botō imote inguipoga da pōnoncæte ante, Botō adoboque quimi iñinipa, ante botō imote apænte ængacäimpa. Iñinque edæ botō tōmengä quimo iñōmo inte tōmengä nänö nē da pōnongaïmo iñōmote edæ botō imote edæ æbänö anguii. Iñæmpa botō iñōmō Wængongui Wëmo iñōmo iñinipa, äñōmote edæ minitō wæætē, Bitō babæ ante Wængongui ingante godō wënæ wënæ ämipa, ante quinante äminitawo. ³⁷ Botō edæ Mæmpo nänö cædö bai cædämai imo bai minitō mäniñedē botō imote pōnēnāmai iñinipa bai waa incædōnimpa. ³⁸ Minitō botō imote pōnēnāmai iñinipa incæte botō guiquēnē botō Mæmpo nänö cædö bai adobai cæbo iñinque minitō, Botō æbänö cæboo, ante adinque pōnencäminimpa. Mänōmai cædinque, Botō Mæmpo ingante botō ewocabo iñinipa, ante ayæ, Botō adobai botō Mæmpo nempo quëwëmopa, ante eñenguiñinipa inte ayæ eñēninque pōnencäminimpa, ante Itota angacäimpa.

³⁹ Mäninö angä eñēninque tōmēnāni wæætē tōmengä ingante bæi ongoncæ cæyōnāni tōmengä do aamō cæte gocantapa.

⁴⁰ Ayæ Eedotadēē wadæ godinque Oododänö æmæmäa ocæ emænte taod-inque tōmengä Wäo wēnēñedē waodäni iñānite æpænē nänö guidōniñōmō adoyōmō gote ongongä ingantapa. ⁴¹ Ayæ tōmengä mäniñōmō ongōñedē waodäni nangui iñāni tōmengä weca goto pōninque äñānitapa.

—Ate eñencäminimpa, ante Wäo wodi cōwē bamōnengæ cædämai ingä incæte tōmengä mäningä Itota ingantedō ante nänö angainö tōmānō nāwangä ante angantapa, ante apænedānitapa.

⁴² Ayæ mäniñōmō ongōninque waodäni nangui iñāni Itota ingante wede pōnēnāni bagadānimpa.

11

Datado wængäimpa

¹ Mäniñedē wacä onguiñængä tōmengä emōwo Datado wënæ wënæ badinque oñōnongäimpa. Mäadiya tōnō Mäadota tōmengä tōniñada nana quëwēñōmō tōmengä adoyōmō Betānia iñōmō quëwēnongäimpa. ² Ingä Mäadiya guiquēnē ayæ ate ogui wapæ ænte Awēnē Itota ingante ñni pædinque nāmā ocagui inte tōmengä ñnōwa amimō cæquingä adocä Mäadiya iñongä tōmengä tōniñacä Datado ñōwo wënæ wënæ bacä iñongäimpa. ³ Iñinque Datado tōniñada iñōmō, Itota ingante aa pebi pongæ, äna eñente wacä gote,

—Awēnē eñēmi, Bitō nē waadecä iñōmō wënæ wënæ ingampa cæbii, ante änapa, ante apæñecantapa.

⁴ Mäninö nāna äno ante apæneca eñēninque Itota,

—Mäninö wënæ wënæ inte nänö wædö iñōmō wii wængui impa. Wæætē waodäni, Wængongui ñäo apäite emōnongä ingampa, ante acædānimpa. Ayæ botō imote, Bitō Wængongui Wëmi adobai ñäo apäite emōnōmi iñinipa, ante apæñecädanimpa, ante mäningä wënæ wënæ ingampa, angantapa.

⁵ Mäadota tōnō tōmengä tōniñacä Mäadiya nāna caya inate ayæ Datado ingante Itota tōmēnāni iñānite waadete pōnēnongäimpa. ⁶ Datado wënæ wënæ ingampa, ante apæneca eñengä incæte Itota nänö ongōñōmō adoyōmō meōnaa ayæ ongongantapa. ⁷ Tōmengä ayæ ate tōmengä emiñēñāni iñānite,

—Ægodōedäni, wæætē Oodeabæ mōnō gocäimpa.

⁸ Äñongä tōmēnāni wæætē tōmengä ingante,

—Awënë nē Odömömi ïmi, wantæyö intapa oodeoidi bitö ïmite dicaca tacacæ cædäni incæte bitö ñowo wæætë, Mänñömö goquïmo, ämitawo.

⁹ Ante änäni Itota wæætë,

—Ïñæmpa nænque wïl tömäa itædë apäitawo. Itædë nē gocä mönö nænque ingui-poga apäicä ate beyæ tewädamaï gocampa. Botö ïñömö itædë gocä bai adobaï mümo botö quëwenganca botö cæquënëno ïinque cæquingue gobopa.

¹⁰ Woyowotæ nē gocä bai guiquënë tömengä wæætë ñäo dæ ä beyæ tewate bai gocampa, angacäimpa.

¹¹ Mänñö angä ate tömengä godömenque tömënäni ïnänite,

—Mönö æmigo Datado ïñömö mö ñongä. Botö ñowo tömengä weca gote, Ñäni ömæmoe, ämo ñäni ömæmonguingä, ante apænecantapa.

¹² Tömengä ëmiñænäni wæætë tömengä ingante,

—Awënë Itota, tömengä mö ñongä ïinque edæ gancæ baquingä, apænedänitapa.

¹³ Itota Datado nänö æmäwo wænñimämo ante apænecä incæte tömengä ëmiñænäni guiquënë, Datado önonque mö ñongampa, ante Itota apænecampa, ante pönönänimpa. ¹⁴ Mänömaï beyæ Itota tömënäni ïnänite,

—Datado æmäwo wængäimpa, ante edonque pönï apænecantapa.

¹⁵ Minitö pönencæminimpa, ante botö, Tömengä wæncæ cæyongä botö tömengä weca ongönämaï intabopa, ante minitö beyæ ante tobopa. Ægodödäni, tömengä weca mönö gocäimpa, angantapa.

¹⁶ Ayæ Tömato Äancadënaque näni änogä ïñömö Itota ëmiñænäni wadäni ïnänite,

—Ægodödäni, äninque, Tömengä tönö godongämæ wæncæte ante tömengä müñæ gocäimpa, angacäimpa.

Itota mönö ömæmonguimämo mönö mü quëwenguimämo ante nē pönongä ingampa

¹⁷ Ayæ Itota ponte ëñëñongä, Datado baö tömënäni näni wodintatodë mëönaa go mëönaa do daga wënänitapa, ante apænedäni ëñengacäimpa.

¹⁸ Betänia ïñömö näni taadö godö Eedotadëe näni quëwëñömö godö eyequeï ïnönimpa. Mänñ taadö wodo tedete quidömetodo ganca ïnönimpa. ¹⁹ Oodeoidi nangui ïnäni ïñömö Mäadota tönö Mäadiya weca pöninque, Minatö tönñicä wængä ate wæwëmina incæte piyænë cæte quëwæcæminäimpa, ante waadete apænecæte ante pönänitapa. ²⁰ Itota oo pönï pongampa, ante änäni ëñëninque Mäadota tömengä ingante bee tencæte ante gocantapa. Mäadiya guiquënë oncönë ee ongongantapa. ²¹ Mäadota Itota weca pöninque tömengä ingante,

—Awënë Itota, bitö mönitö weca ongömi bai botö tönñicä wïl wæncædongäimpa. ²² Tömengä æmäwo wængä incæte bitö ñowo Wængongui ingante quiemë ante apænëbi tömengä pönö cæcä ænguimi ïmipa, ante botö ëñëmopa, ante apænecantapa.

²³ Angä ëñëninque Itota tömengä ingante,

—Bitö tönñicä wodi ñäni ömæmonguingä.

²⁴ Ante apænecä ëñëninque Mäadota wæætë,

—Ao, ingui-poga ïinque bayedë mönö ñäni ömæmöñedë tömengä do wængaingä incæte ñäni ömæmoncæcäimpa, ante botö do ëñëmopa, angantapa.

²⁵ Itota tömengä ingante äninque,

—Botö nē ñäni ömæmonguimo ïñömö inte cæbo beyænque minitö ñäni ömæmoncæminimpa. Müni wantæpiyæ quëwëngüinque ante nē Quëwëmo ïñömö ïmopa. Botö ïmote nē wede pönengä ïñömö do wængä incæte ayæ ate

wantæpiyæ quëwencæcäimpa. ²⁶ Ayæ nē mīi quëwengä inte botö imote wede pönengä iñömö tömengä cöwë wænāmaī quëwencæcäimpa. Bitö mäninö ante pönëmitawo.

²⁷ Angä ëñëninque Mäadota tömengä ingante,

—Awënë Itota Ao ämopa, ante apænecantapa. Bitö mönitö Codito iñömi imipa, ante pönëmopa. Wængongui Wëmi iñömi inte bitö iñömö edæ, Inguipoga nē Ponguingä, ante nāni angaimi imipa, ante pönëmopa, ante apænecantapa.

Itota Datado wodintatodë gote wæcä

²⁸ Mänömaī ante apænëdinqwe Mäadota ocæ ëmænte gote Mäadiya ingante aa pecä pongä ate Mäadota tömengä ingante awëmö äninque,

—Mönö nē Odömongä do pöningwe bitö imite aa pecampa.

²⁹ Angä ëñëninque Mäadiya quingæ ængæ gantite tömengä weca gocantapa.

³⁰ Itota Betänia iñömö ayæ guidämaī inongäimpa. Mäadota tömengä ingante nänö bee tēniñömö tömengä adoyömö ayæ a ongönongäimpa. ³¹ Oodeoidi Mäadiya tönö oncönë godongämæ ongöninque, Tömengä piyænë cæcæcäimpa, ante tæcæ waadete apæneyönäni tömengä quingæ ængæ gantidinque taocä adinque tömënäni, Tömengä Datado wodi nänö wodintatodë wæcæte ante gocampa, ante pönente tömengä ingante tee empote godänitapa.

³² Itota nänö ongöñömö pöningwe Mäadiya tömengä ingante adinque tömengä önöwa ædæ wæænte apænëdinqwe,

—Awënë Itota, bitö mönitö weca ongömi bai botö tönñäcä wīi wæncædongäimpa, ante wæcantapa.

³³ Mäadiya mänömaī wæyongä oodeoidi tömengä tönö godongämæ nē pönināni adobaī wædäni adinque Itota wæwente entawëninque wæcantapa.

³⁴ Ayæ,

—Datado wodi baö æyömönö da wëminitawo,

Angä ëñëninque tömënäni,

—Awënë Itota, pö ae.

³⁵ Ante äñönäni Itota Ca wæcantapa. ³⁶ Tömengä mänömaī wæcä adinque oodeoidi,

—Aedäni, tömengä Datado wodi ingante nö waadete pönengä ingantapa.

³⁷ Ante tedeyönäni pancadäniya,

—Tömengä iñæmpa nē babetamongä awinca wi æmonte bai cædingä inte adocä Datado wodi ingante cæcä bai tömengä wīi wæncædongäimpa, ante wægadänimpa.

Datado nänö ñäni ömçëmömämo

³⁸ Itota wæætë wæwente entawëninque Datado wodintatodë pongacäimpa. Tömengä wodido ontatodë i iñonte dicabo ñænængade da pæñæ pönö tee mönodäni. ³⁹ Adinque Itota,

—Dicabo da tæ ñæedäni, äñongä Datado wodi tönñäcä Mäadota wæætë,

—Awënë Itota, ëñëmi. Mëönaa go mëönaa tömengä wodido öñöninque tömengä wodi do öö wadingä ingampa.

⁴⁰ Ante wææ angä ëñëninque Itota,

—Bitö wede pönëmi iñinque edæ Wængongui æbänö ñäö apäite ëmönongä inte cæcäa, ante bitö acæbiimpa, ante bitö imite wīi antawo, angacäimpa.

⁴¹ Ininque tömënäni dicabo tæ ñænänitapa. Ayæ Itota æmö adinque,

—Mæmpo botö apænëdinö ante do ëñëmitapa, ante adinque botö bitö imite waa ate pönëninque apænëbopa. ⁴² Botö apænëdö ante æyedëmë apænëbo incæ bitö cöwë ëñëmipa, ante botö do ëñëmopa. Wæætë edæ woadäni botö

weca godongämæ gongænäni beyæ ante botö mäninö ante apænetabopa. Bitö botö imote da pönömi pontabopa, ante tömënäni pönencædänimpa, ante apænetabopa.

⁴³ Mänömainö ante Wængongui ingante apænedinque Itota,

—Datado ta pöe, ante yedæ aa pecantapa.

⁴⁴ Nê wæningä iñömö edæ do ta pongantapa. Tömengä önompo weocoo inte näni wini wini cædincoo ayæ empodinque önöwa näni wini wini cædincoo ayæ ewadinque tömengä awinca weocoo näni ñâne cæmönincoo ayæ emongä inte ta pongä adinque Itota tömënäni inänite,

—Mänincoo ñi cæmini gocæe, angacäimpa.

Itota ingante bæi ongonte ængæïmpa, ante tedewënäni

(Mäteo 26.1-5; Mäadoco 14.1-2; Odoca 22.1-2)

⁴⁵ Mänömai beyæ oodeoidi nangui inäni Mäadiya weca eñacæ nê pöninäni inte inäni iñömö Itota mänömai cæcä adinque tömengä ingante wede pönënäni bagadänimpa. ⁴⁶ Pancadäniya guiquënë Paditeoidi weca godinque, Itota quinö cæcää, ante adodö angadänimpa. ⁴⁷ Ininque Wængongui qui, ante nê godönäni ñænænäni tönö Paditeoidi iñömö wæætê tömënäni ömæ näni Apænte Äincabo tömänäni inänite, Mönö godongämæ apænecæïmpa, ante adoyömö pöedäni, ante äñönäni pönäni adinque tömënäni,

—Ingä iñömö, Acædänimpa, ante nangui bamönengæ cæcä ingä. Mönö quinö cæquimöö. ⁴⁸ Ante wædinque mönö tömengä ingante, Bitö mänömai godömenque cædämai incæbiimpa, ante wii wææ ämö ininque waodäni tömänäni tömengä ingante pönëmainänipa. Tömengä ingante pönënäni ininque, Itota oodeoidi Awënë bacæte ante cæcampa, ante pönente wædinque odömänoidi incæ edæ wææ cæbainänipa. Ininque tömënäni pöninque mönö tæiyæ waemö oncö wo ewëmainänipa. Ayæ mönö ömæ iñömö mönö quëwencabo incæ nämä nê ämö iñömö tömënäni pö ö ænte bai cædinque tömënäni nê änäni babainänipa, äñanitapa.

⁴⁹ Tömënäni weca adocanque Caiapato manii wadepo, Wængongui qui, ante nê godongä ñænængä pöni inongä inte tömengä iñömö,

—Minitö tömänö ante eñënamai iminipa töö, apænecantapa. ⁵⁰ Mönö ömæ quëwencabo wii tömämö wængæïmpa, ante wæætê tömëmö beyæ ante adocanque onguiñængä wængä ininque godömenque waa imaimpa, ante minitö eñënamai imini inte tedewëmini awädö.

⁵¹ Mänömainö ante apænedinque Caiapato mä nänö pönënonque ante wii angacäimpa. Wæætê tömengä manii wadepo inönte, Wængongui qui, ante nê godongä ñænængä pöni inongä inte Wængongui beyæ apænedinque, Itota iñömö oodeoidi beyæ ante wæncæcäimpa, ante apænegacäimpa. ⁵² Ayæ wii Oodeabæ quëwënanique beyæ ante wænguingä. Wæætê, Wængongui wënäni wayömö wayömö pangote godinäni inte adodänique badinque adoyömö godongämæ poncædänimpa, ante tömengä wæncæcäimpa. ⁵³ Caiapato mäninö ante nänö äñionæ inönte täno godongämæ pönëninque oodeoidi ömæ näni Apænte Äincabo iñömö, Æbanö cæte Itota ingante wænömö wænguingää, ante cöwë tedewënönänimpa.

⁵⁴ Mänömai beyæ Itota ayæ oodeoidi weca wii edonque gocä inongäimpa. Wæætê wadæ godinque tömengä önomæca eyequei Epadaimë näni äñömö godinque mäninö tömengä emiñænäni tönö ongönongäimpa.

⁵⁵ Wodo pänta gogaionæ, ante Patowa näni cæönæ oo pöni inönimpa. Mäniñedë Oodeabæ wayömö wayömö quëwënäni nangui inäni Eedotadë

quëwëñomö pö æidinqe tömënäni Patowa nani ææmæ ayæ cædämaï iñedë dodäni angai bai cædinque, Mönö wënæ wënæ cægainö ante mönö mënongate bai waëmö bacæimpa, ante nämä incæ äacæte ante cædinque æi gogadänimpa. ⁵⁶ Adodäni Wængongui oncö ñænæncönë yabæcönë pö guidinque adiyæ gongæninque, Itota æyömönö ingää, ante pönente gomö adinque nämæneque godongämæ apænedinque,

—Mänängä iñomö ææmæ beyæ ante edæ pönämaï ingantawo. Æbänö ante pönëminii, ante apænedönänimpa.

⁵⁷ Wængongui qui, ante godönäni ñænænäni tönö Paditeoidi wæætë waodäni inänite wææ änönänimpa. Æcänö Itota nänö a ongöñomö ante në ëñengä iñomö tömengä mönitö imönite angä ëñëninque mönitö wæætë Itota ingante yao ongonte æmaimönipa, ante do wææ änönänimpa.

12

Awënë Itota önöwa ogui wapæ gao cæwacampa (Mâteo 26.6-13; Mäadoco 14.3-9)

¹ Önompö æmæmpoque go adoönæque ate Patowa nani ämæ bacæ cæyedë Itota Betänia iñomö pongantapa. Itota do angä ate në ñäni ömæmöningä Datado iñomö tömengä adoyömö Betänia quëwënongäimpa. ² Itota pongä adinque waodäni mäniñomö quëwëñäni, Itota ingante waa amönipa, ante tömengä beyæ ææmæ cægadänimpa. Wadäni tönö Datado adobaï Itota tönö godongämæ tæ contate cæññönäni Mäadota iñomö tömënäni inänite cænguï godongä cænänitapa. ³ Ayæ Mäadiya iñomö mëedio ditodo ganca nani ogui wapæ öni pæquimæ näadodopæ nänö nanguï godonte ænimæ incæ æente nämö Itota önöwa gao cæwadinque tömengä ocagui inte amimö cæcä inique oncönë tömancönë ogui waacönë ingatimpa. ⁴ Itota miñæ në gocä adocanque Codaa Icadote nani änogä iñomö edæ, Itota ingante æncædänimpa, ante odömönte në godonguingä inte ñöwo wææ apænecantapa.

⁵ —Iimæ nänö ogui wapæ quinante ömæpodäni beyæ ante godonte ænämaï ingantawo. Iñæmpa waocä adoque wadepo cæte beyæ paga æninque todeiento deënadiota nänö ænimpota beyæ mänimæ godonte ænimæ imæmpa, ante wæcantapa.

⁶ Tömengä dicæ ömæpodäni beyæ ante pönëninque mänömainö ante apænecantawogaa. Wæætë tömengä në awëmö ænogä inte mäninö ante apænecantapa. Tömënäni da wente æintaa næænongä inte tömengä iñomö, Tömënäni da wëninta incæ pancataa botö qui bacæimpa, ante awëmö ænogä inte mänömaï apænecantapa. ⁷ Itota wæætë tömengä ingante,

—Onquiyængä ingante piinte änewënämaï incæbiimpa. Mänimæ botö daga wenguionæ ante manguëngä inte tömengä botö baö nani daga wenguinque ante eyepæ iñonte öni paacantapa. ⁸ Ömæpodäni cöwë munitö weca quëwëñäni inänipa. Botö guiquënë wii cöwë munitö weca quëwëmo imopa, ante apænegacäimpa.

Datado ingante wænongæimpa, ante tedewëñäni

⁹ Itota Betänia ponte ongongampa, ante apænedäni ëñëninque oodeoidi nanguï inäni tömengä weca pönäni incæte wii tömengä beyænque pönänintapa. Wæætë adobaï Datado ingante angä në ñäni ömæmöningä ingante acæte ante pongadänimpa. ¹⁰ Mänömaï beyæ Wængongui qui, ante në godönäni ñænænäni iñomö, Æbänö cæte Datado ingante adobaï wænömö wænguingää, ante godongämæ tedewëñänitapa. ¹¹ Iñæmpa oodeoidi nanguï inäni, Datado

beyæ mönitö imönite emö cæte Itota ingante pönëninge tömengä gämæno godänipa, ante wægadänimpa.

Itota Eedotadëe inömö pongä

(*Mäateo 21.1-11; Mäadoco 11.1-11; Odoca 19.28-40*)

¹² Imö ate, Eedotadëe inömö poncæte ante Itota idömæ pongampa, ante apænedäni eñëninge ææmæ beyæ ante tæiyænäni pöninäni inömö, ¹³ yædëmæmä wangö tate mao bee tente taodinqe yedæ aa pedinqe, —Möni quëwenguinque ante, Badogaa, ante tomönipa. Bitö Awënë Wængongui emöwo beyænque pömi ininqe bitö toquinque edæ Wængongui bitö imite waa cæcæcäimpa. Bitö idægoidi Awënë inömi inte bitö toquinque ingæimpa.

¹⁴ Ante yedæ añönäni Itota inömö bodo wengä ate æninge tömengä æi contate pongantapa. Wëenënedë Wængongui beyæ iima ante nani yewæmante angainö bai inque cædinqe pongantapa.

¹⁵ “Tiöno inömö quëwëmi inömö edæ guñënämaï ledäni.

Minitö Awënë Odeye nöwo minitö weca pongä aedäni. Edæ bodo wengä æi contate pongampa,”

ante yewæmongadänimpa. ¹⁶ Tömëni dodäni nani angai bai cædinqe Itota ingante bee tencæ taodäni adinqe Itota nänö në emiænäni inömö, Æbänö cädäni, ante mänihedë eñënämaï inte wædönänimpa. Wæætë edæ Itota Wængongui näö emöñömö ocæ emænte gocä adinqe tömengä emiænäni mänihedë ate edæ, Itota ingante waodäni nöwo nani cædonö ante dodäni wëenënedë yewæmongadänimpa, ante pönente wædönänimpa.

¹⁷ Datado wodi ontatodë ongöñongante Itota, Ta pöe, ante aa pecä eñëninge në wæningä incæ näni ömæmöninqe ta pongä adinqe Itota weca godongämæ ongöninäni nangui inäni inömö, Itota mänömaï cæcä atamönipa, ante gode ä gode ä cædönänimpa. ¹⁸ Ininqe edæ, Itota mänömaï bamönengæ cæcampa, ante apænedäni eñente beyænque waodäni tæiyænäni Itota weca bee tencæ pönänitapa. ¹⁹ Mänömaï beyæ Paditeoidi inömö nämanque godongämæ tedewënanitapa.

—Waodäni tömänäni æbänö tömengä miñæ tee empo godäni ante aedäni. Mänii beyæ ante, Mönö cædinö wii eyepæ impa, ante adinqe, Mönö æbänö cæte godömenque cæquimö, ante wægadänimpa.

Guidiegoidi pancadäniya Itota ingante diqui minäni

²⁰ Eedotadëe inömö tömëni ææmæ cæyedë Wængongui ingante waa ate apænedäni ante në pönäni pancadäniya inömö guidiegoidi inönänimpa.

²¹ Mäninäni inömö Pedipe weca pöninqe edæ,

—Awënë, eñëmi. Mönitö Itota ingante ainëmönipa, ante änänitapa. Mäningä Pedipe inömö Betaida quëwëñömö Gadideabæ quëwente pongä inongäimpa.

²² Tömengä inömö Æntade weca gote tömengä ingante guidiegoidi nani äninö ante apæneca ate tömëna wæætë Itota weca guëa godinqe tömengä ingante äñöna, ²³ Itota wæætë,

—Wængongui nänö cæönæ do ba ininqe tömengä pönö cæcä beyænque botö Waobo eñagaimo inömö näö apäite emonæboimpa. ²⁴ Minitö iminite näwangä ämopa. Tömëmö onguipo quiyadimö incæ yabæque ñömädämaï i bai ædö cæte tä bocate pædinqe tömëmö nangui pöni imonguii. Wæætë tömëmö yabæque ñömäate ate tä bocate pædinqe nangui pöni imopa. Botö adobaï wanguënmö imopa. Botö wii wæmo bai ædö cæte waodäni tæiyænäni botö quinäni baquinäni. ²⁵ Në, Nämanque pönente quëwëmote, ante pönengä inömö edæ tömengä nänö quëwenguimämo incæ wo ewente bacæcäimpa. Inguipoga

quëwëñedë nè, Wïi nämanque pönente quëwëmote, ante pönengä guiquënë tömengä nänö wantæpiyæ quëwenguinö ante do éadingä inte tömengä nänö wænänamai quëwenguinque gocæcäimpa. ²⁶Æcänö botö imote nè cæda ina tömengä iñömö edæ botö imote tee empo goquënegä ingampa. Ayæ æyömönö botö quëwëmo botö imote nè cædongä adoyömö quëwencæcäimpa. Botö Mæmpo iñömö botö imote nè cædongä ingante waa acæcäimpa, ante Itota apænecäimpa.

Itota, Botö wæncæboimpa, ante apænecä

²⁷ Ayæ godömenque apænedinque Itota iïmai apænecantapa. “Botö guinëmämo entawëninque wæbo inte quinö anguïmoo. ‘Botö Mæmpo ëñëmi, äninque, Botö nantate wæwenguinæ oo pöni ba incæte bitö pönö ö æmi ate wæwënamai bacæboimpa,’ ante botö wïi mänömainö ante ancæboimpa. Edæ botö wæwenguinö beyæ ante pontabopa. ²⁸Mæmpo, Bitö æbänö ñäo apäite ëmömi iïmi, ante odömömi acädänimpa,” angantapa.

Äñongä öönädë inö tedepämo apænedinque, “Botö æbänö ñäo apäite ëmömo imopa, ante do odömontabopa. Ayæ wæætë adodö cæcæboimpa,” ante apænecä ëñënanitapa.

²⁹ Mäniñömö godongämæ ongönäni nanguï inäni iñömö mänimämo ëñëninque edæ, Detæbo tæi tëmämo bai impa, ante wädänitapa. Wädäni guiquënë,

—Anquedo iñömö tömengä ingante apænecantapa, ante änänitapa.

³⁰ Itota iñömö wæætë,

—Mänimämo wïi botö beyæ ante apænecampa. Wæætë munitö beyæ ante apænecampa. ³¹ Nöwoyedë Wængonguï inguipoga quëwënanäni inänite apænte nänö panguinö iñömö edæ oo baquïnö anguënë. Inguipogaque quëwënanäni awënë iñongante wënæ ingante Wængonguï ñöwoyedë, Gobäwe, angä gocæcäimpa. ³² Botö imote awäa timpodinque ængæ gantidënanäni wægömo ate botö waodäni tömänäni inänite, Minitö botö weca poncæmënimpa, ante aa pecæboimpa, ante Itota apænecantapa.

³³ Mänömainö ante apænedinque tömengä, Æbänö wænguïmoo, ante ëñëncæädänimpa, ante apænecantapa. ³⁴ Ëñëninque mäniñömö ongönäni nanguï inäni,

—Mönitö iñæmpa, Mönö Codito cöwë ee ongoncæcäimpa, ante dodäni nani wææ angainö ante yewæmonte ongompa, ante ëñëntamönipa. Incæte bitö iñömö nämanque äninque, Botö Waobo ëñagaïmo iñömote botö imote awäa timpodinque gö cædäni wægonguïmo imopa, ante ædö cæte ämii. Äninque, Ìngä Waocä nè ëñagaingä iñæmpa ee ongönämai wænte goquingäa.

³⁵ Ante wæyönäni Itota tömënanäni inänite,

—Botö, Waodäni mïmönë ñäo bai entawëninque quëwencæädänimpa, ante pontabopa. Wædænque ayæ iñö botö munitö wecä quëwëninque munitö iminöte odömönte apænecampa. Mönitö taadö wëmö badämai ingæimpa, ante munitö taadö ayæ ñäo iñedë goedäni. Edæ wëmö iñömö nè goca iñömö tömengä edæ, Ädönö goboo, ante ëñënamai ingampa. ³⁶ Botö ñäo bai ëmönömo imopa. Näo iñömö nè cægömöni incæmönimpa, ante bacæte ante cædinque munitö iñömö botö munitö weca ayæ ongöñömote botö imote pönëedäni ämopa, angantapa.

Tömengä iinque apænete ate wadæ godinque wë womonte ongongacäimpa.

Oodeoidi Itota ingante iïmai cæte pönënamai inänipa

³⁷ Itota oodeoidi weca nanguï bamönengæ cæte odömongä incæte tömënanäni ayæ tömengä ingante pönënamai inänitapa. ³⁸ Wængonguï beyæ nè apænecä

Itaiya wodi iimaï ante do nänö angainö bai iinque baquinque tömënäni mänömaï cædönänimpa.

“Awënë Wængongui ëñëmi. Mönitö apænemöni tömënäni nani ëñënë ante edæ æcänö ëñente pönengäa. Ìñæmpa nê pönengä iñömö edæ dæ angä awædö.

Ayæ Awënë Wængongui nänö tæi piñænte cægainö ante æcänö ada iñömö edæ dæ angampa.”

³⁹ Ìniquè tömënäni ædö cæte pönenguinänii, ante Itaiya wodi edæ wayömö yewæmöninque, Wængongui iimaïno ante cæcä beyæ pönënäni inänipa, ante yewæmongacäimpa.

⁴⁰ “Tömënäni botö gämænö ocæ ëmænte pönäni bai botö wæætë, Waa bacæminimpa, ante godö cæcædömoimpa.

Incæte mänömaï cædämaï incæboimpa, ante Wængongui iimaï cægacäimpa.

Tömengä godö cæcä beyænque waodäni babetamönäni bai adämaï bagadänimpa.

Adobai mimönë nani pönënö ömædë badinque ëñënämaï bagadänimpa.

Edæ, Tömënäni nani adinö ante ëñënämaï incädänimpa, ante cædinque ayæ edæ, Tömënäni nani ëñënë ante ëñënämaï incädänimpa,” ante wææ cægacäimpa.

ante Itaiya wodi yewæmongacäimpa. ⁴¹ Itaiya wodi Itota nänö ñäö ëmömämo æbänö ingui, ante do ate bai ingaingä inte edæ Itota ingantedö ante mäninö ante doyedë angacäimpa.

⁴² Nöwo guiquënë oodeoidi awënëidi tæiyænäni Itota ingante pönënänimpa. Incæte Paditeoidi beyæ guinënäni inte, Mönö odömöincönë go guiyömönite tömënäni mönitö imönite wii tatodoncädänimpa, ante wææ cædinque tömënäni nê pönënäni incæ waodäni ëñëñönäni pæ wëenete tededämaï inänimpa. ⁴³ Edæ mäninäni, Waodäni mönitö imönite waa ate apænecädänimpa, ante nanguï ainente wædäni inönänimpa. Adodäni, Wængongui mönitö imönite waa ate apænecæcäimpa, ante pönömenque ainente wædäni inönänimpa.

Itota nänö änö beyænque waodäni apænte wæcädänimpa

⁴⁴ Itota yedæ äninque aa pecantapa. “Botö imote nê pönengä iñömö wii botö adoboque imote pönëngä ingampa. Wæætë edæ botö imote nê da pönongaingä ingante tömengä adobai pönengä inongäimpa. ⁴⁵ Adocä botö imote nê acä iñömö tömengä botö imote nê da pönongaingä ingante adobai acä ingampa. ⁴⁶ Botö imote nê wede pönënäni iñönäni adocanque incæ wëmö iñömö wii godömenque ee ongoncæcäimpa, ante cædinque botö iñömö inguipoga quëwënäni weca ñäö bai inömo inte pontabopa.”

⁴⁷ “Waacä botö änö ëñëninque wii ëñente cæcä ingä incæte botö tömengä ingante apænte änämaï imopa. Edæ botö wii inguipoga quëwënäni inänite apænecæte ante pontabopa. Wæætë inguipoga quëwënäni inänite æmo beyænque quëwëncæminimpa, ante pontabopa cæminii. ⁴⁸ Botö imote nê Baa angä iñömö tömengä botö änönö ante, Dicæ pönëmogaa, angä iñongante tömengä ingante nê apænte änö incæ edæ mæ ongompa. Inguipoga iinque baquionæ iñonte botö äninö incæ nê apænte anguingä bai ba iniquè mäningä ingante, Bitö pante wæquinque Baa angabiimpa, ante bai apænete ingäimpa.

⁴⁹ Edæ botö wii nämänque pönëninque apænëtabopa. Wæætë, Botö quinö apænëquimoo, ante, Æbänö ante apænëquimoo, ante botö Mæmpo botö imote nê da pönongaingä iñömö tömengä botö imote wææ angä ëñëninque apænëtabopa. ⁵⁰ Tömengä nänö wææ angainö ëñente cæbo beyænque munitö

wantæpiyæ cōwē quēwencæminimpa, ante do ēñēmopa. Īninqe botō Mæmpo botō ĩmote nānō angainō ante botō adodō ante apænebopa,” ante Itota māniñedē ĩnque apænegacāimpa.

13

Itota incæ tōmengä ēmiñænāni ōnōwa mēnōwacä

¹ Patowa nāni āmæ wantæyō bacæimpa, ante nāni cæyedē Itota ĩñōmō, Botō ingui-poga quēwente ēmō cæte botō Mæmpo weca ocæ ēmænte æi goquiönæ do bacæimpa, ante do ēñēnongäimpa. Itota ingante pōnēnāni nē ingui-poga quēwēnāni ĩñōnānite tōmengä tōmēnāni ĩnānite waadete pōnēninqe ñōwoyedē, Botō æbānō nanguī waadete pōnēmo ĩmoo, ante odōmongäimpa.

² Gāwadecæ bayō Itota tōmengä ēmiñænāni tōnō godongāmæ cæñōnāni wēnæ awēnē cæcä beyænque Timōnō wengä Codaa Icadote ĩñōmō, Itota ingante odōmonte godoncæboimpa, ante pōnengä ĩnongäimpa. ³ Itota ĩñōmō, Quincoomē ongoncoo incæ Wængonguī pōnō cæcä beyænque botō tōmancoo awēnē badinqe nāmā tæi piñænte nē āmo ĩmopa, ante ēñēnongäimpa. Ayæ edæ Wængonguī weca quēwente wææ pōnimo inte botō Wængonguī weca ocæ ēmænte goquimo ĩmopa, ante do ēñēnongäimpa. ⁴ Māniñō ante ēñēnongä incæ tōmengä ĩnque cænte ate ængæ gantidinqe yabæcoo gä tadongadinque wadæ caaincoo æninqe ōnoncadyæŷ ĩnō goti padengantapa. ⁵ Ayæ ate æpæ mēnongaquintadē pe ñiñæninqe tōmengä ēmiñænāni tōmānāni ōnōwa mēnōwadinque wadæ caaincoo goti padēincoo inte wadæ cæwacæ tæcæ cæcantapa.

⁶ Mānōmaī cædinque tōmengä Timōnō Pegodo weca pongä adinqe adocä ĩñōmō tōmengä ingante,

—Bitō botō Awēnē ĩmi incæte botō ōnōwa mēnōwacæ pōmitawo.

⁷ Ante āñongä Itota wæætē,

—Ñōwoque botō æbānō cæboo, ante ēñēnāmaī ĩmipa. Incæte ayæ ate ēñencæbiimpa.

⁸ Angä ēñēninqe Pegodo,

—Botō ōnōwa cōwē mēnōwadāmaī incæbiimpa, ante Baa āmopa cæbii.

Ante āñongä Itota godōmenque,

—Botō bitō ōnōwa mēnōwadāmaī ĩmo baī bitō wī botō quīmi ĩmaīmipa, ante angantapa.

⁹ Māniñō angä ēñēninqe Timōnō Pegodo wæætē,

—Awēnē, Mānōmaī ĩ ĩninqe bitō wī botō ōnōwaque mēnōwaquīmi. Wæætē botō ōnompo adobaī mēnompodinqe botō ocabo mēnoncæe.

¹⁰ Ante āñongä Itota wæætē,

—Æpæ nē āadingä ĩñōmō tōmengä baō ēñayō tōmāñō waēmō ĩmpa. Īninqe tōmengä ōnōwaque nāmanque mēnōwacä inte eyepæ ĩmpa. Minitō do mīmō mēnongate waēmō entawēnōmīni ĩmīnīpa. Incæte wī tōmāmīni waēmō entawēnōmīni ĩmīnīpa, angantapa.

¹¹ Edæ, Æcānō botō ĩmote nē odōmonte godonguingä ingää, ante tōmengä do ēñēnongäimpa. Mānōmaī beyæ tōmengä, “Minitō wī tōmāmīni do mēnongate waēmō entawēnōmīni ĩmīnīpa,” angantapa.

¹² Ayæ tōmēnāni ōnōwa ĩnque mēnōwadinque tōmengä yabæcoo wēñadinque tōmengä adodō gote tæcæ contadinque tōmēnāni ĩnānite,

—Botō mānōmaī cædinque mīnitō beyæ ante quīnō cæboo, ante ēñēmīnitawo, ante āninqe Itota godōmenque, ¹³ Mīnitō botō ĩmote, Nē Odōmōmi ĩmipa, āninqe ayæ adobaī, Awēnē ĩmipa, āmīni ĩmīnīpa. Edæ botō mīnitō Awēnē

inōmo ininque mīnitō mānōmaīnō ante nāwangā ante āmīnipa. ¹⁴ Botō iñōmō mīnitō Awēnē inōmo inte nē mīnitō imīnite Odōmōmo imo incæ mīnitō ōnōwa do mēnōwabo amīnipa. Ininque botō mānōmaī mēnōwabo bai mīnitō adobaī wacā ōnōwa wacā ōnōwa mēnōwaquēnēmīni imīnipa. ¹⁵ Botō cæbo bai mīnitō adobaī cæcæmīnipa, ante cædinque botō mīnitō beyæ ante cæbo aedāni. ¹⁶ Mīnitō imīnite nāwangā āmopa. Awēnē ñænængā inongā iñongante tōmēngā ingante nē cæcā iñōmō wīi godōmenque ñænængā ingampa. Awēnē nē da godongā ñænængā iñongā tōmēngā nānō nē da godōningā wæætē wīi godōmenque ñænængā ingampa. ¹⁷ Mīnitō ñōwo mānīnō ante ēñēnimīni inte edæ ado ante cæmīni ininque mīni toquinque bacæimpa, ante Itota apænecantapa.

¹⁸ Ayæ apænedinque, “Botō wīi tōmāmīni beyæ antabopa. Botō apænte ænīnāni ædānidō inānīi, ante botō nē ēñēmo imopa. Wængonguī angā ēñente nāni yewæmongainō bai iinque bacæimpa, ante iīmaī bacæ cæpa. ‘Botō tōnō godongāmæ nē cængongā iñōmō botō imote nē pīinte cæcā bacantapa.’ ¹⁹ Mānōmaī ba adinque edæ mīnitō botō imotedō ante apænedinque, Tōmēngā mōnō Codito inongā ingampa, ante pōnencæmīnipa, ante cædinque botō ñōwo ayæ badāmaī iñedē mīnitō imīnite āmopa. ²⁰ Mīnitō imīnite nāwangā āmopa. Æcāmenque botō nē da godongaingā ingante æna tōmēngā iñōmō edæ botō imote adobaī ængā ingampa. Ayæ æcāmenque botō imote æna tōmēngā iñōmō botō imote nē da pōnongaingā ingante ængā ingampa cæmīni,” ante Itota apænecāimpa.

Itota ingante Codaa nē godonguingā ingampa, ante (Māteo 26.20-25; Māadoco 14.17-21; Odoca 22.21-23)

²¹ Mānīnō angā ate Itota iñōmō tōmēngā nānō wæwēmāmo entawēninque wæcā inte, Nāwangā ante apænebo ēñēdāni. Mīni cabo incæ adocanque, Æncædānīmpa, ante botō imote odōmonte pædæ godonguingā ingampa.

²² Ante apænecā wædinque tōmēngā ēmīñænāni, Æcānō ingante apænecāā, ante ēñēnāmaī inte godongāmæ wacā ingā wacā ingā adānitapa. ²³ Itota ēmīñænāni adocanque iñōmō Itota nānō nē waadete pōnengaingā inongāimpa. Tōmēngā iñōmō Itota tōnō āāñōmonque tæ contate ongōnaimpa. ²⁴ Timōnō Pegodo iñōmō iingā ingante ōmō ōmō cædinque angampa. Bitō Itota ingante, Æcānō ingāā, ante āmi angā ēñente ate apænēbi ēñēmōnie. ²⁵ Angā ēñēninque māningā Itota tōnō āāñōmonque nē tæ contacā iñōmō,

—Awēnē, æcānō ingāā, ante apænēbi ēñēmōnie, ante tōmēngā ingante āñongā.

²⁶ Itota wæætē,

—Botō iī pāō owætaca mīi cæte godōmo nē ænguingā iñōmō tōmēngā nē cæqingā ingampa.

Ayæ pāō owætaca mīi cædinque Timōnō wē Codaa Icadite ingante godongantapa. ²⁷ Codaa pāō ængā ate Tatāna iñōmō tōmēngā do guigacāimpa. Ininque tōmēngā ingante,

—Bitō quīnō cæcæ cæbii edæ quingæ cæe, ante Itota angantapa.

²⁸ Wadāni adoyōmō nē cænāni iñōmō, Itota quīnante mānīnō ante tōmēngā ingante angāā, ante ēñēnāmaī inōnānīmpa. ²⁹ Edæ Codaa tōmēnāni da wente æinta næænongā ingā beyæ tōmēnāni pancadāniya, Ææmæ beyæ ante mōnō cænguī wīi eyepæ ēamōni ininque, Bitō godonte æncæbīmpa, ante Itota angampa, ante pōnēnōnānīmpa. Adobaī ōmæpodāni inānite, Godōmi ænguīnānīmpa, ante Itota angampa, ante pōnēnōnānīmpa.

³⁰ Codaa pāō ænte ate tao gogacāimpa. Do woyowotæ iñōnīmpa.

Itota nänö wææ änönö ante ñöwo angampa

³¹ Codaa dæ gocä adinque Itota,

—Botö Waobo eñagaimö inte æbänö ñäö apäite emönömo imoo, ante ñöwo edonque bacæimpa. Botö cæquino beyæ Wængongui æbänö ñäö apäite emongä ingää, ante edonque bacæimpa. ³² Ayæ botö cæquino beyæ Wængongui ñäö apäite nänö emönö edonque ba inique Wængongui cæcä ate botö ñäö apäite botö emönö adobaï edonque bacæimpa. Ayæ mänömaï Wængongui wantæyö cæcæcäimpa. ³³ Botö wëmini botö minitö weca wantæyö quëwëninque gobopa. Minitö botö imote ante diqui diqui mingui mini iminipa. Ayæ oodeoidi inänite botö angainö bai ñöwo minitö iminite adodö ämpa. Botö goquiñömö ante minitö ædö cæte pongui mini iminii. ³⁴ Botö wææ änönö ante ñöwo minitö iminite ämpa. Wacä ingä wacä ingä waadete pönencæminipa. Botö minitö iminite waadete pönönömo bai minitö adobaï wacä ingä wacä ingä waadete pönenguënemini iminipa. ³⁵ Minitö wacä ingä wacä ingä waadete pönëmini adinque wadäni tömänäni, Minitö Itota nänö në emiñæmini iminipa, ante eñencädänipa, ante Itota apænegacäimpa.

Pegodo incæ, Dicæ abogaa, anguingä ingampa, ante (Mäateo 26.31-35; Mäadoco 14.27-31; Odoca 22.31-34)

³⁶ Timönö Pegodo tömengä ingante,

—Awënë, ædömë gobii.

Ante äñongä Itota wæætë,

—Botö goquiñömö ante bitö ædö cæte botö imote ñöwo tee empo ponguimi imii. Ayæ ate guiquënë bitö botö imote tee empo ponguimi incæbiimpa, angantapa.

³⁷ Pegodo godömenque,

—Awënë, äninque, Botö quinante bitö imite ñöwo tee empo godämaï imoo, ante wæcampa. Botö Ao äninque bitö beyæ ante nämä wænguimo imopa.

³⁸ Ante äñongä Itota wæætë,

—Bitö Ao äninque botö beyæ ante näwangä wænguimi imiyaa. Bitö imite näwangä ante apænebo eñëe. Tawadiya pedämaï iñonte bitö iñömö botö imotedö, Dicæ abogaa, ante mempoga go adopoque anguimi imipa, ante apænegacäimpa.

14

Mæmpo weca mönö godö ante Itota taadö bai ingampa

¹ Itota tömengä emiñænäni inänite, “Mimönë guiffente wädämaï iedäni. Wæætë Wængongui ingante wede pönëedäni, angantapa. Ayæ adobaï botö imote wede pönëedäni. ² Botö Mæmpo nänö quëwëñömö onconcoo bacoo pöni mä ongompa. Mänömaï impa, ante wii näwangä i bai botö minitö iminite ancædömoimpa. Minitö beyæ ante botö, Mini ponte quëwengu onconcoo ante tömää ædæmö badoncæte ante mäniñömö gocæboimpa. ³ Ayæ minitö quëwengu onconcoo tömää ædæmö mänoncæte ante gobo inique botö ocæ emænte poncæboimpa. Pöninque minitö botö quëwëñömö adoyömö botö tönö godongamæ quëwencæminipa, ante botö minitö iminite ænte mæibo æicæminipa. ⁴ Botö goquiñömö æyömönö i, ante ayæ mäniñömö gocæte ante taadö godö ante minitö do eñëmïnipa,” ante Itota apænecantapa.

⁵ Apæneçä eñëninque Tömato iñömö tömengä ingante,

—Awënë, Ädömë goquimii, ante mönitö eñënämaï imöni inte mönitö mäninö bitö goquino ædönö i, ante taadö ædö cæte eñnguimöni.

⁶ Äñongä Itota wæætë,

—Botö iñömö tömëmo në taadömo bai inömo imopa. Ayæ botö adobo në nawangä äno bai inömo bai iñömote minitö æbänö nawangä impa, ante ëñenguimini iminipa. Botö edæ në Quëwëmo inte pönö cæbo beyænque minitö quëwenguimini iminipa. Botö wii pönö cæbo bai waocä æcämenque incæ botö Mæmpocä weca godämaï incædongäimpa. ⁷ Botö imote do ate pönëmini ininque minitö botö Mæmpo ingante adobai ate pönëmini imaiminipa. Nöwo tömengä ingante tæcæ ate bai pönëmini inte minitö tömengä ingante cöwë në agaimini incæminipa, ante apænecantapa.

⁸ Mäninö apænecä ëñëninque Pedipe iñömö,

—Awënë, Mæmpocä ingante odömömi amönie. Mäninque adinque idæwaa. Eyepæ impa.

⁹ Äñongä Itota wæætë,

—Pedipe ëñëmi. Botö minitö weca wantæpiyæ quëwëmo incæ bitö ayæ botö imote adämaï inte bai pönënämaï imitawo. Në botö imote acä iñömö tömengä adobai Mæmpocä ingante në acä ingampa. Ininque bitö iñömö, Mæmpocä ingante odömömi amönie, ante ædö cæte botö imote ämii. ¹⁰ Wæmpocä nempo botö në quëwëmo imopa, ante ayæ, Wæmpocä ingante botö entawëmo imopa, ante bitö pönënämaï imitawo. Botö minitö iminite, Æbänö apæneboo, ante wii nämanque pönëninque apænebopa. Wæætë botö Wæmpocä incæ botö tönö në äawocaque bai quëwëmongä inte edæ tömengä nänö cædö ante në cæcä ingampa. ¹¹ Tömengä nempo quëwëmo imopa, ante ayæ, Tömengä ingante botö entawëmo imopa, ante minitö iminite apænebo ëñëninque pönëdäni. Wæætë edæ minitö botö äno beyænque ayæ pönënämaï imini incæte botö bamönengæ nanguï cædinö adinque mäninö beyænque pönëdäni. ¹² Minitö iminite nawangä ämpa. Botö imote në wede pönengä iñömö tömengä botö cæbai adobai cæcæcäimpa. Ayæ botö Mæmpocä weca ocæ ëmænte gobo beyæ në wede pönengä iñömö edæ wii önonque botö cæbai cædinque godömenque cæquingä ingampa. ¹³ Minitö botö ëmöwo ante apænedinque quiëmë æncæte ante apænemini ëñëninque botö Wængonguï Wëmo inömo inte edæ, Mæmpocä nänö ñäö ëmömämo edonque pöni acædänimpa, ante cædinque minitö äno bai edæ do cæcæboimpa. ¹⁴ Minitö, Ænguimöni, ante quiëmë beyæ ante botö ëmöwo ante botö imo apænemini ëñëninque do cæcæboimpa, ante Itota apænecäimpa.

Wængonguï Tæiyæ Waëmö Önöwoca poncæcäimpa, ante

¹⁵ Ayæ godömenque apænedinque Itota iïmaï ante apænecantapa. “Minitö botö imote waadete pönëmini ininque botö wææ angainö ante ëñente cæquimini imaiminipa. ¹⁶ Ayæ, Wacä botö beyæ ante minitö tönö godongämæ cæquingä, ante botö iñömö botö Mæmpocä ingante, Da godömi gocæe, ante apænecæboimpa. Ayæ tömengä botö äno ante do ëñente cædinque edæ, Tömengä minitö tönö cöwë ongonte godongämæ cæcæcäimpa, ante cædinque adocä ingante minitö weca da pönongä ponguingä ingampa. ¹⁷ Wængonguï në nö cæcä ingampa, ante nawangä impa, ante Wængonguï Tæiyæ Waëmö Önöwoca incæ në odömongä inongä ingampa. Incæte waodäni në ingui-pogaque quëwënanäi iñömö tömengä ingante adämaï inäni inte pönënämaï inönäni inte edæ ædö cæte tömengä ingante Ao ante ænguïnänäni. Wæætë edæ tömengä minitö weca quëwëmongä iñongante minitö tömengä ingante në entawenguimini inte tömengä ingante do ate bai pönëmini iminipa,” ante Itota apænecantapa.

18 Ayæ apænedinque, “Botö wii munitö nöwamini bai mini baquinque ante edæ emö cæte goquimo imopa. Wæætë munitö weca ocæ emænte poncæboimpa. 19 Wantæ ate waodani në inguipogaque quëwënanï iñömö edæ botö imote adamaï inguinani inänipa. Minitö guiquënë botö imote aquimini iminipa. Edæ botö quëwëmo beyænque munitö adobai quëwencæminimpa.

20 Ayæ Wængongui Tæiyæ Waëmö Önöwoca nänö ponguionæ iñonte munitö iñömö edæ, Mönö æbänö äanque bai quëwëmö imöö, ante ëñencæminimpa. Edæ, Botö Mæmpocä nempo quëwëmo imopa, ante ayæ edæ, Minitö botö nempo quëwëmini iminipa, ante ayæ, Minitö iminite adobai botö entawëmo quëwënomini iminipa, ante munitö ëñencæminimpa. 21 Æcänö botö wææ angainö ö æninque ëñente cæda tömengä iñömö botö imote në waadete pönengä ingampa. Botö imote në waadete pönengä ingante botö Mæmpo näëmæ waadete pönencæcäimpa. Ayæ botö adobai mäningä ingante waadete pönencæboimpa. Ayæ, Botö æbänö imoo, ante tömengä ingante odömömo acæcäimpa,” ante Itota apænecantapa.

22 Codaa iñömö edæ wii Codaa Icadiote wacä Codaa iñömö edæ Itota ingante apænecantapa.

–Awënë iñæmpa bitö mönitö imönite apænedinque, Botö æbänö imoo, ante odömömo acæminimpa, äninque quinante wæætë, Inguipogaque quëwënanï inänite odömönamaï incæboimpa, ante pönëninque cæbitawo, angantapa.

23 Itota wæætë,

–Wacä botö imote në waadete pönengä inique tömengä iñömö botö odömönte apænedö ante ëñente cædongä imaingampa. Botö Mæmpo adocä ingante waadete pönengüingä ingampa. Ayæ mönatö tömengä tönö cöwë godongämæ quëwencæte ante tömengä weca ponguimöna imönapa. 24 Botö imote në waadete pönënamaï ingä guiquënë tömengä iñömö botö odömönte apænedönö ante ëñënamaï cædongä ingampa. Mäninö botö odömönte apænebo mini ëñëninö iñömö wii botö nämä pönëninque apænedinö impa. Wæætë botö imote në da pönongingä nänö angainö impa, ante Itota apænecantapa.

25 Ayæ apænedinque, “Minitö weca botö quëwënedë botö mäninö ante munitö iminite apænetabopa. 26 Botö Mæmpocä botö emöwo beyæ ante tömengä Tæiyæ Waëmö Önöwoca ingante da pönongä ponguingä inte tömengä munitö tönö godongämæ në cædongä ingampa. Adocä munitö iminite tömänö ante odömönte apænecä ëñencæminimpa. Ayæ botö apænedö mini ëñëninö tömänö ante tömengä adodö apænecä wæætë pönencæminimpa,” ante Itota apænecantapa.

27 Ayæ apænedinque, “Botö pönö cæbo beyænque munitö gänë entawente quëwëedäni, ante pönö cædinque gobopa. Botö gänë entawëmämö incæ munitö iminite pönömo æninque munitö gänë pönente quëwencæminimpa. Botö inguipogaque quëwënanï nani godönö bai wii pönömo imopa. Nö cæte pönömo imopa. Minitö mimönë guifente wædämaï inte piyënë cæte quëwencæminimpa. 28 Botö munitö iminite emö cæte godinque munitö weca ocæ emænte poncæboimpa, ante botö apænebo ëñëminitapa. Botö edæ, Botö Mæmpocä weca gocæboimpa, ante apænebo ëñënimini inte munitö botö imote waadete pönëmini inique botö beyæ ante watapæ tobaïminipa. Edæ botö wii botö Mæmpo bai inömo inte wædämo inömo imopa. 29 Mänömaï linque ba adinque munitö, Näwangä impa, ante pönencæminimpa, ante botö ñöwoque ayæ badämaï iñedë munitö iminite apænetabopa,” ante Itota apænecantapa.

30 Ayæ apænedinque, “Ii inguipogaque quëwënanï awënë iñömö wënæ inongä inte oo poncæ cæcampa. Inique botö munitö iminite wii wantæpiyæ

ayæ apænebopa. Edæ tömengä ædö cæte botö imote nämä tæi piñænte nê angä inguingäa. ³¹ Incæte botö, Waodäni inguipogaque quëwënäni iñömö iimaï ante ëñencädänimpa, ante cæbopa. Botö Mæmpo ingante botö waadete pönëmopa, ante ayæ, Botö Mæmpo botö imo wææ angä bai botö adodö cæbo imopa, ante tömënäni ëñenguënënäni inänipa,” ante Itota iñque apænegacäimpa.

Ayæ, “Nöwo edæ ængæ gantidinqe mönö gocæimpa,” angacäimpa.

15

Itota näwä yowementa bai ingampa

¹ Ayæ godömenque apænedinque Itota iimaï apænecantapa. “Botö näwä yowementa bai imopa. Ayæ botö Mæmpo yowementa nê aacä bai ingampa.

² Botö imote pönënäni tömänäni ii yowementa gædëmænto bai inänipa. Æcänö wii botö ëmiñængä bai cæda tömengä iñömö gædëmænto ömæcato bai ingampa. Botö Mæmpo gædëmænto ömæcato bai iñongante wangö topænte bai cædinque tömengä ingante wido cæcampa. Æcänö botö ëmiñængä bai cæda guiquënë tömengä gædëmænto tömenca incato bai ingampa. Gædëmænto tömenca incato incæ godömenque waa pædinque nanguï incacæimpa, ante wææ topæ wææ topæ cædäni bai botö Mæmpo iñömö adobai cæcampa. Botö nê ëmiñængä wii eyepæ cæcä adinque tömengä ingante wadæ cæcampa.

³ Botö änö ante minitö iminite botö apænedinö beyæ minitö mïmönê do mënongate quëwëmïni iminipa. ⁴ Minitö botö nempo ee quëwënömïni incæminipa. Ayæ adobai minitö botö imote cöwê entawente quëwënömïni iminipa. Gædëmænto yowementa adoyömö ibænte odæ yate bai pæte incate bapa. Edæ gædëmænto adotoque iñonte ædö cæte nämä cædinque incaquinto. Minitö iñömö, Tömenca incate bai mönö nanguï cæcæimpa, ante cædinque botö nempo ee quëwenguënëmïni iminipa,” ante Itota apænecantapa.

⁵ Ayæ apænedinque, “Botö yowementa bai imopa. Minitö guiquënë gædëmænto bai iminipa. Waocä botö nempo ee quëwënongå inte ayæ botö imote cöwê entawënongå ingä iñinque tömengä tömenca incate bai nanguï cæbaingampa. Wæætê edæ botö nempo quëwënämaï imïni iñinque minitö tömäa cædämaï imaiminipa töö. ⁶ Nê botö nempo ee quëwënämaï ingä iñömö tömengä gædëmænto nani wido cædinto bai ingampa. Mäninto amimö bayonte gæte mämö gongapamö ñö cædäni wo bæco bai cædinque tömengä ingante botö Mæmpo adobai wido cæcä ingampa,” ante Itota apænecantapa.

⁷ Ayæ apænedinque, “Minitö guiquënë botö nempo ee quëwëninge botö angainö inte ee entawente quëwëmïni iñinque minitö quiemê æncæte ante äinëmïni incæ Wængonguï ingante apænemïni inte tömengä wæætê pönongä æmaïminipa. ⁸ Minitö nanguï pönï tömenca incate bai imini inte, Minitö botö ëmiñæmïni iminipa, ante edonque pönï ingæimpa. Mänömaï cæmïni iñinque, Botö Mæmpo ñäo apæite ëmönongä ingampa, ante odömönte ingæimpa. ⁹ Botö Mæmpo iñömö botö imo waadete pönengä ingaingä bai botö adobai minitö iminite waadete pönëmo intabopa. Botö nê waadete pönëmo iñömote minitö iñömö botö nempo ee ongöedäni. ¹⁰ Botö Mæmpo nê waadecä iñongante botö tömengä nänö wææ angainö ante ëñente cædimö inte tömengä nempo ee ongömopa. Minitö adobai botö nê waadete pönëmo iñömote minitö botö wææ angainö ante ëñente cæmïni iñinque edæ botö nempo ee ongömïni imaiminipa,” ante Itota apænecantapa.

¹¹ Ayæ apænedinque, “Botö watapæ topämo ante minitö mïmönê entawëninge watapæ tocæminipa, ante ayæ, Mïni watapæ topämo eyepæ ingæimpa, ante botö minitö iminite mäninö ante apænetabopa. ¹² Botö wææ

änö iñömö iimaĩ ante impa. Minitö iminite botö waadete pönëninö bai minitö adobaĩ wacä ingä wacä ingä waadete pönëdäni. ¹³Æcänö nänö æmigoidi beyæ ante, Botö Ao äninque nämä incæ tömënäni beyæ ante wænguimo, ante cæcä iñömö tömengä nänö waadete pönëmämo wii waodäni tömänäni waadete pönëmämo bai impa. Tömengä iñömö edæ godömenque nanguĩ waadete pönengä ingampa. ¹⁴Minitö botö wææ angainö ëñente cæmini iñinque botö guidëmini iimaĩminipa. ¹⁵Minitö botö imo nê cædömini iminipa, ante botö minitö iminite godömenque apænedämaĩ imopa. Edæ awënë ingante nê cæcä iñömö, Awënë æbänö cæcää, ante ëñënaingä ingampa. Wæætë edæ botö Mæmpo nänö angainö ante botö ëñëninö tömänö ante minitö iminite apænebo ëñëmini beyæ botö, Minitö botö guidëmini iminipa, ante apænedimo imopa. ¹⁶Minitö wii botö imote apænte ænimini iminipa. Wæætë botö iñömö, Minitö botö emiñæmini inömini inte tömenca nanguĩ incate bai nanguĩ cæcæminimipa, ante minitö iminite apænte ænimo imopa. Minitö botö emiñæmini inömini inte cöwë cæmini iñinque minitö quiëmë ante botö ëmöwo beyænque apænemini ëñëninque Mæmpocä iñömö do pönongä æncæminimipa. ¹⁷Botö wææ änö iñömö iimaĩ ante impa. Minitö wacä ingä wacä ingä waadete pönëdäni,” ante Itota apænegacäimpa.

Inguipogaque nê quëwënäni Itotaidi inänite nãni pïwmämo

¹⁸Mänömainö ante apænedinque Itota godömenque iimaĩ ante apænecantapa. “Inguipogaque nê quëwënäni iñömö minitö iminite pïwnäni adinque minitö guiñënaĩ inte edæ, Itota ingante do pïngadänimipa, ante pönëmini iminipa. ¹⁹Waodäni nê inguipogaque quëwënäni nãni cabo wacä ingä wacä ingä waadete pönënäni inänipa. Minitö inguipogaque nãni quëwëncabo tönö adomini imini bai tömënäni minitö iminite adobaĩ waadete pönencædönänimipa. Wæætë minitö inguipoga nãni quëwëncabo tönö adomini inämaĩ iminipa. Ìñæmpa wëenëñedë minitö inguipoga quëwëñöminite botö do minitö iminite apænte æntabopa. Mänömaĩ beyæ nê inguipogaque quëwënäni iñömö minitö iminite pïwnäni inänipa. ²⁰Botö äno ante minitö iminite, Æbänö apæneboo, ante ñowo wæætë pönëdäni. ‘Awënë ñæñængä inongä iñongante tömengä ingante nê cæcä iñömö wii godömenque ñæñængä ingampa.’ Waodäni botö imote pïwnäni wæwëmo bai minitö iminite adobaĩ pïwnäni wæwëmini incæminimipa. Botö odömonte apænegainö ante ëñente cædäni bai minitö odömonte apænedö ante adobaĩ ëñente cæcædänimipa. ²¹Minitö botö quiwini iñöminite edæ botö ëmöwo beyænque iñäni, Botö imote nê da pönongaingä, Æbänö ingää, ante ëñënaĩ inäni inte mänömaĩ edæ cæquinäni inänipa,” ante Itota apænecantapa.

²²Ayæ apænedinque, “Botö tömënäni inänite wii ponte apænebo bai tömënäni nãni wentamö mongænguimämo mongænämaĩ incædönänimipa. Ñowo iñömö, Botö apænebo nê ëñëninäni inte tömënäni nãni wentamö mongæmämo do mongænänipa. Ìñæmpa Itota apænecä ëñënaĩ imönipa, ante ædö cæte angünäni. ²³Botö imote nê pïngä iñömö tömengä adobaĩ botö Mæmpocä ingante pïngä ingampa. ²⁴Wacä, Botö bamönengæ botö cæbaĩ adobaĩ cæcä iñömö cöwë dæ angampa. Ìninque botö wii tömënäni weca bamönengæ cæbo bai tömënäni nãni wentamö mongænguimämo mongænämaĩ incædönänimipa. Incæte, Botö æbänö cæboo, ante do adäni incæ tömënäni botö imote pïwninque botö Mæmpo ingante adobaĩ pïwnänapa. ²⁵Dodäni nãni wææ yewæmongaintaa yewæmöninque iimaĩ ante nãni apænegainö bai ñowodäni nãni cædö beyæ edæ iinque batimpa. ‘Botö imote önonque pïwnänapa,’ ante yewæmongadänimpa,” ante Itota apænecantapa.

²⁶ Ayæ apænedinque, “Botö edæ botö Mæmpo weca ocæ emænte gote ate mînitö beyæ ante mînitö tönö godongämæ cæqingä ingante da pönoncæboimpa. Mänîngä îñömö Wængonguï Tæiyæ Waëmö Önöwoca îngongä inte edæ, Æbänö näwangä î, ante apænegä eñencæmînimpa. Tömengä botö Mæmpo weca quëwente ponguingä ingampa. Pönînque tömengä, Botö æbänö cæboo, ante apænegä eñencæmînimpa. ²⁷ Mînitö adobaï wëenëñedé botö mî cæyedé do botö miñæ godimîni îmîni inte edæ, Botö æbänö cæboo, ante apænequënemîni îmînipa,” ante Itota tömengä nänö nê emîñænâni îñanite apænegacäimpa.

16

¹ Godömenque apænedinque Itota îmaï apænegacantapa. “Mînitö oda cædämaï tæï gongænte ongoncæmînimpa, ante cædinque botö mînitö îmînite mänînö ante tömänö apænetabopa. ² Mînitö odömöincönê go guiiyömînite wadâni, Mönitö tönö godongämæ ongönämaï îedâni, ante mînitö îmînite tatodönâni gocæmînimpa. Wîi mänînonque cæquîñänimpa. Wæætê îincayæ ate æcâmenque mînitö îmînite nê wænonguîna îna îñömö tömengä, Botö Wængonguï nänö cædö ante cæbopa, ante pönencæcäimpa. ³ Botö Mæmpo ingante wîi adinque pönênämaï îñâni inte ayæ botö imote adämaï inte baï pönênämaï îñâni îñömö tömênâni îñömö mînitö îmînite mänînö cæquîñâni îñânipa. ⁴ Edæ mänîñonæ bayonte mînitö, Botö wææ angainö ante æbänö ämoo, ante wæætê pönencæmînimpa, ante botö mînitö îmînite mänînö ante do apænetabopa,” ante Itota apænegacäimpa.

Wængonguï Tæiyæ Waëmö Önöwoca nänö cædö

Ayæ godömenque apænedinque Itota îmaï apænegacantapa. “Mînitö tönö wëenëñedé godongämæ ongömo beyæ botö mänînö ante mänîñedé apænedämaï intabopa. ⁵ Botö îmo nê da pönongaingä weca botö ñöwo pönî ocæ emænte goquîmo incæte, Bitö æyömönö goquîmi, ante mînitö tömämîni botö imote ânämaï îmînipa. ⁶ Botö mänînö ämo beyæ mînitö nanguï pönî wæwëmîni îmînipa. ⁷ Incæte botö mînitö îmînite näwangä ämopa. Mînitö beyæ waa ingäimpa, ante botö goquîmo îmopa. Botö wadæ godämaï îmo baï mînitö tönö godongämæ nê cæqingä îñömö mînitö weca pönämaï incædongäimpa. Wæætê edæ cöwê goquîmo inte godinque botö tömengä ingante mînitö weca da pönömo ponguingä ingampa. ⁸ Pönînque Wængonguï Tæiyæ Waëmö Önöwoca cæcä beyænque inguipogaque quëwënâni, Mönö wënæ wënæ cædömö inte wentamö mongæmö awædö, ante wæcædänimpa. Ayæ tömengä cæcä beyænque, Wængonguï weca æcänö nö cæte quëwëna îna, ante eñencædänimpa. Ayæ Wængonguï apænte ante pancæcäimpa, ante adobaï eñencædänimpa. ⁹ Edæ botö imote nâni pönênämaï îñö beyænque inguipogaque quëwënâni îñömö edæ, Mönö wënæ wënæ cædonque ante cædinque pönênämaï îmompä, ante wæcædänimpa, ante adocä cæcæcäimpa. ¹⁰ Ayæ edæ, Botö îñömö botö Mæmpo weca gote quëwëñomote mînitö botö imote adämaï inguîmîni îmînipa. Îninque botö Mæmpo weca gote quëwëmo beyæ Wængonguï Tæiyæ Waëmö Önöwoca incæ, Æbänö nö cæte quëwenguï, ante inguipogaque quëwënâni îñanite odömönte apænegä eñencædänimpa. ¹¹ Ayæ inguipogaque quëwënâni awënë îñongante wënæ ingante Wængonguï, Botö pancæboimpa, ante do apænte angacäimpa, ante Wængonguï Tæiyæ Waëmö Önöwoca godö odömönte apænegä beyænque eñencædänimpa,” ante Itota apænegacantapa.

¹² Ayæ apænedinque, “Botö mînitö îmînite nanguï ayæ apæneinente wæbo incæte mînitö ñöwo ganca ædö cæte eñnguîmîni. ¹³ Wængonguï Tæiyæ

Waemö Önöwoca pongä ate tömengä iñömö, Æbänö näwangä impa, ante tömänö ante mīnitö imīnite odōmonte apæneca ēñencæminimpa. Adocä, Æbänö apænequimoo, ante wīi nämä pönēninque apænecæcäimpa. Wæætē Wængonguī tömengä ingante angä nänö ēñēninö ante Wængonguī Önöwoca iñömö mäninonque ante mīnitö imīnite odōmonte apæneca ēñencæminimpa. Ayæ, Ìncayæ ate æbänö baquī, ante tömengä mīnitö imīnite apæneca ēñencæminimpa. ¹⁴ Botö æbänö ñäö apäite emönömo imopa, ante edonque pönī bacæimpa, ante cædinque tömengä iñömö botö entawēnö ante mīnitö imīnite odōmonte apæneca ēñencæminimpa. ¹⁵ Botö Mæmpo nänö eadoncoo iñömö edæ tömancoo botö quincōo impa. Mänömaī beyæ iīmaī apænetabopa. Tömēmo entawencōo ante Wængonguī Önöwoca iñömö mīnitö imīnite odōmonte apæneca ēñencæminimpa, ante apænetabopa,” angantapa.

¹⁶ “Ayæ wantæ ate mīnitö botö imote adāmaī inguīmīni Ìminipa. Ayæ ate wantæyö iñonte botö imote wæætē acæminimpa,” ante Itota apænegacäimpa.

Mini wæwēmāmo incæ wæætē mīni toquinque bacæimpa

¹⁷ Tömengä emīñænāni pancadāniya nämanque godongāmæ apænedinque, –Mäninö äninque tömengä, Mīnitö wantæ ate botö imote adāmaī inguīmīni Ìminipa, ante æbänö ancæte ante apænecaä, ante wædānitapa. Ayæ, Wantæ iñonte mīnitö botö imote wæætē acæminimpa, ante ayæ, Botö Mæmpo weca gote quēwēmo beyæ impa, ante Itota apæneca awædö, ante apænedānitapa. ¹⁸ Tömēnāni wæætē wæætē, Mäninö tömengä, Wantæyö, ante nänö äno iñömö edæ æbänö ante apænecaä, ante wædānitapa. Tömengä æbänö ancæte ante apænecaä, ante ēñēnāmaī Ìmönipa, ante wædānitapa.

¹⁹ Tömēnāni mäninö ante pönēninque botö imote ēñencæte ante äinēnāni Ìnānipa, ante wædinque Itota tömēnāni Ìnānite,

–Wantæ ate mīnitö botö imote adāmaī inguīmīni Ìminipa, ante botö äno ante ayæ, Wantæyö iñonte mīnitö botö imote wæætē acæminimpa, ante botö æbänö ämoo, ante mīnitö nämanque godongāmæ tedemīnitawo. ²⁰ Mīnitö imīnite näwangä ämopa. Inguipogaque quēwēnāni iñömö watapæ toyönāni mīnitö caate wæquīmīni inte Ca ca wæcæminimpa. Mīnitö wæwenguīmīni Ìminipa. Incæte mīni wæwēmāmo incæ mīni toquinque bacæimpa. ²¹ Onquiyængä iñömö tömengä wēñæ ēñacæ cæyedē nangui nantate wæcä inte wæwengä bacä incæte tömengä wēñæ ēñacä adinque tömengä, Botö wē ēñacä ingampa, ante watapæ tote beyæ tömengä nänö wædinö ante edæ pönēnāmaī ingampa.

²² Mīnitö tömengä bai adobaī Ìminipa. Ñöwoyedē mīni caate wæyedē impa. Incæte botö wæætē mīnitö imīnite aguimo imopa. Mänömaī beyæ mīnitö watapæ tocæminimpa. Mänīñedē, Mīnitö todāmaī acæminimpa, ante æcāmenque incæ wææ cædāmaī incæcäimpa.

²³ Godömenque apænedinque Itota, “Mänīñedē mīnitö botö imote, Æbänö Ì, ante ēñencæte ante godömenque änāmaī incæminimpa. Mīnitö imīnite näwangä ämopa. Botö Mæmpo ingante mīnitö quīēmē æncæte ante botö emöwo ante apæneyömīni tömengä iñömö do pönongä æncæminimpa. ²⁴ Ñöwo ganca mīnitö quīēmē æncæte ante botö emöwo ante apænedāmaī Ìnīmīni Ìminipa. Ñöwo iñömö edæ, Pönömi æmönie, ante Wængonguī ingante apænedāni. Apænemīni ēñēninque tömengä pönongä æninque mīnitö eyepæ pönī mīni watapæ toquinque ænguīmīni incæminimpa,” ante Itota apænegacäimpa.

Itota nē tcæi emönongä ingampa

²⁵ Mänömaīnö ante apænedinque Itota iīmaī apænecantapa. “Mīnitö imīnite inguipoga quēwēnāni nāni cæbänö ante odōmonte apænedimo incæte botö

wantæyö baquïönæ iinque bayonte mänömainö ante godömenque odömonte apænedämaï incæboimpa. Wæætë botö tömëmo Mæmpo ingantedö ante apænedinque minitö iminite edonque pöni apænecæboimpa. ²⁶ Mäniönæ minitö botö Mæmpo ingante botö émöwo beyænque apænequimïni iminipa. Iinque botö, Minitö beyæ ante botö Mæmpo ingante apænequïmo imopa, ante mänömaï beyæ botö änamäi imopa. ²⁷ Edæ botö Mæmpo incæ minitö iminite waadete pönengä ingampa. Botö imo waadete pönëninque minitö iñömö edæ, Wængonguï weca quëwëninque Itota pongaingä ingampa, ante pönënimïni beyæ botö Mæmpo adobai minitö iminite waadete pönengä ingampa. ²⁸ Botö edæ Mæmpocä weca quëwente inguipoga iñömö pönimo inte ñöwo pöni inguipoga quëwëninque wadæ godinque Mæmpocä weca ocæ émænte goquïmo imopa,” ante Itota apænecantapa.

²⁹ Tömengä ëmiñænäni,

—Ñöwo inguipoga quëwënäni näni cæbainö ante odömonte apænedämaï inte bitö edonque pöni apænebi ëñëmönipa. ³⁰ Bitö tömänö ante ëñëmi imipa, ante ñöwo ëñëmönipa. Iinque mönitö, Æbänö i, ante ëñencæte ante bitö imite änamäi iñömöni bitö iñömö do në ëñëmi imipa. Mänömaï beyæ mönitö, Bitö Wængonguï weca quëwente pönimi inte në ëñëmi imipa, ante do pönëmöni imönipa.

³¹ Ante äñönäni Itota wæætë,

—Ñöwo tæcæ pönëmïni iminitawo. ³² Wantæyö bayedë iñömö edæ ñöwo pöni batimpa. Mäniñedë minitö botö imote émö cæte panguimæ panguimæ wodii winöninque tömëmïni oncönë go guiquimïni iminipa. Botö imo adoboque émö cæte gomïni incæte botö iñæmpa wïi adoboque ongömopa. Edæ botö Mæmpo botö tönö godongämæ ongongampa. ³³ Minitö iñömö botö nempo quëwëmïni inte gänë pönente quëwencæminimpa, ante cædinque botö mäninö ante minitö iminite apænetabopa. Ii inguipoga quëwëninque minitö caate wæcæminimpa. Incæte mïni wæwenguimämo ante guñënämaï iedäni. Edæ inguipogaque ante näni wënæ wënæ cædönö ante Baa äninque botö godömenque tæi ëmönömo inte në gänä cægaimo imopa. Mänömainö ante Itota tömengä nanö ëmiñænäni inänite iinque apænecä ëñengädänimpa.

17

Itota Mæmpo ingante mönö beyæ ante apænecantapa

¹ Itota mänömainö ante iinque apænedinque öönædë æmö adinque iïmaï apænecantapa. “Mæmpo ëñëmi. Bitö, Æbänö baquïi, ante bitö angainö bai do batimpa. Botö edæ, Bitö Wëmo inömo iñömote bitö pönö cæbi ate botö ñäö apäite bai botö ëmönö iñömö edonque pöni bacæimpa, ante apænebopa. Mänömaï cæbi adinque botö wæætë bitö beyæ pönö cæbo ate bitö ñäö ëmömämo edonque pöni bacæimpa. ² Bitö pædæ pönömi botö në ængainäni inänite botö cöwë wantæpiyæ näni quëwenguinö ante godömo æncædänimpa, ante bitö botö tönö godongämæ cæbi beyænque botö waodäni tömänäni inänite në ämo batabopa. ³ Waodäni cöwë wantæpiyæ näni wænämaï quëwenguinö ante iïmaï impa. Mæmpo, bitö adobique näwä Wængonguï inömi iñömite tömënäni bitö imite ate bai pönencædänimpa. Ayæ botö Itota Coditobo bitö në da pönongaimo iñömote do adinque tömënäni pönencædänimpa. Tömënäni mänömaï näni pönënö beyænque edæ cöwë wantæpiyæ näni wænämaï quëwenguimämo edæ do ëadänipa,” ante Itota apænecantapa.

⁴ Ayæ Mæmpo ingante godömenque apænedinque, “Bitö, Ìimaï cæe, ante bitö angainö ante botö inguipoga quëwëninque do Ìinque cæbo beyæ bitö ñäö ëmömämo edonque pöni bagatimpa. ⁵ Wëenëñedë pöni inguipoga badönämaï ñedë bitö weca ongöninque botö ñäö ëmongaïmo inte ñöwo bitö weca ocæ ëmænte pömo adinque bitö pönö cæbi ate botö adobo ñäö apäite bai ëmömo ate edæ edonque pöni acæimpa,” Mæmpo ingante apænecantapa.

⁶ Ayæ, “Inguipoga quëwënäni bitö quinäni Ìänäni, ante bitö pædæ pönömi æninque botö wæætë, Wængonguï æcänö ingää, ante tömënäni Ìänite odömömo ëñëñänitapa. Adodäni bitö quinäni Ìñönänite bitö tömënäni Ìänite pædæ pönömi æntabopa. Tömënäni bitö angainö ante ëñente cædinäni Ìänäni. ⁷ Bitö pönömi æninque botö ëwocagaincoo ante Ìänäni Ìñömo edæ, Mänincoo tömancoo edæ Mæmpocä pönongä æninque Itota ëwocacampa, ante ñöwo do ëñëñänäni. ⁸ Edæ Mæmpo bitö pönö apænebi botö ëñente ængainö ante botö adodö ante edæ tömënäni Ìänite godö apænebo ëñëñinque tömënäni do æñänitapa. Botö bitö weca quëwente pongaïmo Ìmopa, ante ëñëñinque tömënäni ædæmö ëñëñänitapa. Ayæ, Bitö botö Ìmote da pönömi në pongaïmo Ìmopa, ante pönëñänitapa,” ante Itota Mæmpocä ingante apænecantapa.

⁹ Ayæ, “Mæmpo, botö tömënäni beyæ ante bitö Ìmote apænebopa. Botö wïi inguipogaque quëwënäni beyæ ante apænebopa. Wæætë edæ, Bitö në pædæ pönömi botö ængainäni Ìñömo edæ bitö quinäni Ìänäni, ante botö tömënäni beyæ ante bitö Ìmote apænebopa. ¹⁰ Botö quinäni tömänäni bitö quinäni Ìänäni. Ayæ bitö quinäni tömänäni botö quinäni adobai Ìänäni. Tömënäni cædäni beyænque botö ñäö ëmömämo edonque pöni batimpa.”

¹¹ Ante apænedinque Itota godömenque apænecantapa. “Botö inguipoga Ìñömo godömenque ongönämaï incæboimpa. Wæætë bitö weca ocæ ëmænte ponguïmo Ìmopa. Botö ëmïñænäni guiquëñë inguipoga Ìñömo ayæ ongönäni Ìänäni. Mæmpo bitö në Tæiyæ Waëmö Ìnömi inte ëñëmi. Bitö ëmöwo bitö pönö pemongaiwo beyænque botö tæï piñænte në ämo Ìmopa. Ìninque mönatö äawocaque bai ëwocate quëwëmöna bai mäninäni adobai äawocaque bai ëwocate quëwencædänimpa, ante cædinque bitö tæï piñæmi inte tömënäni Ìänite wææ aacæbiimpa, ante bitö Ìmote apænebopa. ¹² Mäninäni weca botö quëwëñedë botö Ìñömo bitö ëmöwo bitö pönö pemongaiwo beyænque botö tömënäni Ìänite wææ aatabopa. Ayæ, Wë womönämaï incædänimpa, ante adodäni Ìänite wææ gampotabopa. Ìninque tömënäni tömänäni wë womönämaï Ìänäni. Önonque adocanque Ìñömo æmæwo wë womonguëngä incæ tömengä Ìñömo edæ Wængonguï angä ëñente näni yewæmongainö bai ñöwo Ìinque baquinque ante edæ æmæwo wë womongantapa,” ante Itota Mæmpocä ingante apænecantapa.

¹³ Ayæ, “Botö ñöwo bitö weca ocæ ëmænte ponguïmo Ìmopa. Tömënäni botö watapæ topämo tömämämo entawëninque quëwencædänimpa, ante botö mäninö ante inguipoga ayæ quëwëñedë apænebo Ìmopa. ¹⁴ Mæmpo, bitö angainö ante botö tömënäni Ìänite godö apænebo ëñëñänitapa. Botö inguipogaque näni quëwencabo tönö adobo Ìnämaï Ìmo bai tömënäni edæ adobai inguipogaque näni quëwencabo tönö adodäni Ìnämaï Ìänäni adinque inguipogaque quëwënäni wæætë tömënäni Ìänite piñänitapa. ¹⁵ Mæmpo ëñëmi. Bitö botö ëmïñænäni Ìänite, Minitö inguipoga Ìñömo ayæ quëwëñämaï incæminimpa, ante ænte mäobi gocædänimpa, ante botö bitö Ìmote apænedämaï Ìmopa. Wæætë, Wënæ awënë në wiwa cædongä Ìñömo tömënäni Ìänite, Oda cæcædänimpa, ante cæyongante bitö wææ aabi ate tömënäni wæætë oda cædämaï incædänimpa, ante bitö Ìmote apænebopa. ¹⁶ Botö inguipogaque näni quëwencabo tönö adobo Ìnämaï Ìmo bai tömënäni edæ adobai inguipogaque

näni quëwencabo tönö adodäni inämaï inänipa. ¹⁷ Bitö äno inömö edæ näwangä ante impa. Ininque bitö godö cæbi ate näwangä bitö äno beyænque tömënanäni inömö tömëmi cædonque ante cædinque tæiyæ waëmö ëwocate quëwënanäni incädänimpa, ante bitö imite apænëbopa. ¹⁸ Bitö botö imote inguipoga inömö bitö da pönömi pömo bai botö adobai tömënanäni inänite inguipoga quëwënanäni weca da godömo godänitapa. ¹⁹ Tömënanäni inömö bitö cædonque ante cædinque tæiyæ waëmö ëwocate quëwënanäni incädänimpa, ante botö inömö edæ bitö cædonque ante Ao äninque, Botö nämä incæ tömënanäni beyæ ante wænguïmo imopa,” ante Itota apænecantapa.

²⁰ “Mæmpo ëñëmi. Botö wii botö ëmiñænänique beyæ ante bitö imite apænëbopa. Wæætë tömënanäni botö angainö ante apænëdäni ëñente pönëninque wadäni në wede pönenguinäni inönänite botö inänäni beyæ ante adobai bitö imite apænëbopa. ²¹ Mæmpo, Bitö imite botö entawëmo imo bai ayæ botö bitö nempo quëwëmo imo bai mäninänäni tömänäni adobai äawoqaue bai ëwocate quëwëmäinänipa, ante cæcæbiimpa, ante bitö imite apænëbopa. Ayæ inguipoga quëwënanäni inömö, Bitö botö imote da pönömi pongaïmo imopa, ante pönencädänimpa, ante cædinque bitö godö cæbi ate tömënanäni mönatö nempo quëwencädänimpa, ante bitö imite apænëbopa. ²² Bitö pönö cæbi beyænque botö ñäo bai entawëninque, Mönatö äawoqaue bai ëwocate quëwëmöna bai tömënanäni adobai äawoqaue bai ëwocate quëwencädänimpa, ante botö inömö bitö pönönimämo botö ñäo entawëmämo tömënanäni inänite adopämo godömo ænte entawënanäni. ²³ Tömënanäni äawoqaue bai ëwocate quëwencädänimpa, ante tömënanäni botö imote entawënanäni. Ayæ botö bitö imite entawëmo imopa. Tömënanäni mänömaï äawoqaue bai ëwocädäni adinque inguipoga quëwënanäni inömö, Bitö botö imote në da pönömi pongaïmo imopa, ante ëñencädänimpa, ante apænëbopa. Ayæ botö imote waadete pönengaimi imi bai bitö tömënanäni inänite adobai waadete pönengaimi imipa, ante ëñencädänimpa, ante apænëbopa,” ante Mæmpocä ingante Itota apænecantapa.

²⁴ Ayæ, “Mæmpo, Bitö pædæ pönömi botö në ængainäni inömö botö ñäo ëmömämo acädänimpa, ante botö, Tömënanäni botö quëwëñömö adoyömö quëwencädänimpa, ante ainente wæbopa. Wëenëñedë pönä inguipoga badönämaï inëdë bitö inömö edæ botö imote waadete pönëninque botö ñäo ëmömämo pönömi botö ængaimämo tömënanäni adopämo acädänimpa, ante ainente wæbopa. ²⁵ Mæmpo në nö cædömi imi ëñëmi. Inguipogaquë quëwënanäni bitö imite wii adinque pönënanämaï inänäni incæte botö inömö edæ bitö imite do ate pönëmo imopa. Botö ëmiñænänäni inömö, Bitö botö imote da pönömi në pongaïmo imopa, ante do ëñënanitapa. ²⁶ Botö cæbo beyænque mäninänäni inömö, Bitö imite ate bai pönënanitapa. Botö imote bitö waadete pönëno ante adodö waadete pönëno tömënanäni mïmönë entawente quëwencädänimpa, ante ayæ, Tömënanäni botö imote entawencädänimpa, ante botö ayæ cæbo beyænque tömënanäni inömö, Bitö imite ate bai pönencädänimpa,” ante Itota Mæmpo ingante inque apænëgacäimpa.

18

Itota ingante bæi ongonte cænte godänipa

(Mäteo 26.47-56; Mäadoco 14.43-50; Odoca 22.47-53)

¹ Wængongui ingante inque apænëdinque Itota tömengä ëmiñænänäni tönö wægä godinque Quedodöo biyönæ æmæ wedeca godänitapa. Æmæ wedeca odibowæncodë näni ancodë i ininque Itota tömengä ëmiñænänäni tönö mänincodë pö guiidänitapa. ² Itota ingante në odömongingä Codaa inömö Itota tömengä ëmiñænänäni tönö mänincodë wantæ inö wantæ inö gote ongönäni

īnīnque Itota ingante nē odōmonguīgā Codaa īñōmō mānīncodē do ad-
ingā īnongāīmpa. ³ Īnīnque tontadoidi adocaboque īnānīte ænīnque Codaa
īñōmō edæ tāno beyænte adocodē pongantapa. Ayæ, Wængonguī quī,
ante nē godōnāni ñænænāni tōnō Paditeoidi nāni wææ wānōnāni īnānīte
Codaa nempo godōnāni ænīngā īnte tōmēngā tōmēnāni īnānīte tontadoidi
tōnō ænte māmongā pōnānitapa. Pōnīnque tōmēnāni gonga tīcainē næænte
gongapæncade tīcainē næænīnque yaēmē næænte Codaa mīñæ pōnānitapa.

⁴ Itota nāmā ante, Æbānō bate wæquīmoo, ante tōmāā ēñēnongā īnte awæñē
tao godīnque tōmēnāni īnānīte,

–Æcānō ingante ante diqui diqui mīnte pōmīnīi.

⁵ Ante āñongā tōmēnāni wæætē,

–Itota Nāatadeta nē quēwēnīngā ingante āmōnīpa.

Ānāni ēñēnīnque,

–Botō tōmēmo īmopa, ante Itota apænecantapa.

Ayæ nē odōmonguīgā Codaa īñōmō tōmēnāni weca a ongōnongāīmpa. ⁶ Itota
īñōmō, “Botō tōmēmo īmopa,” ante āñongā tōmēnāni gā godīnque onguīpoga tæ
go wæænānitapa. ⁷ Tæ go wæænāni adīnque tōmēngā adodō,

–Æcānō ingante ante diqui diqui mīnte pōmīnīi.

Ante āñongā tōmēnāni wæætē,

–Itota Nāatadeta quēwēnīngā ingante āmōnīpa.

⁸ Ānāni ēñēnīnque Itota wæætē,

–Botō tōmēmo īmopa, ante do antabopa. Mīnītō īñōmō botō īmote ante diqui
dīqui mīnte pōmīnī bāi mānīnāni īnānīte bæi ongōnāmāi īedāni.

⁹ Itota Mæmpocā ingante do apænedīnque, “Bitō edæ pōnōmī botō
ængāināni īnānīte wææ aabo beyæ adocanque īncæ wē womōnāmāi
īnānitapa,” ante nānō angāinō bāi ñōwo īnque bacæīmpa, ante mānōmāi
angantapa. ¹⁰ Tīmōnō Pegodo īñōmō nē yaēmē næængā īnte pædæ guīpote
yaēmē ænīnque, Wængonguī quī, ante nē godongā ñænængā pōnī īnongā
ingante nē cæcā ingante tæi pānīnque tōmēmonca īnō wangō tamoncacantapa.
Pegodo nānō nē wangō tamoncadingā ēmōwo Māadoco ēmongā īnongāīmpa.

¹¹ Itota wæætē Pegodo ingante,

–Bitō yaēmē adodō da wēe, ānīnque, Botō wæwenguīmāmo ante botō
Mæmpo pōnongā ænīmō īnte wæwenguēnēmo īmopa, angacāīmpa.

Itota ingante bæi ongōnīnque Ānato weca ænte godāni

(Māateo 26.57-58; Māadoco 14.53-54; Odoco 22.54)

¹² Ayæ odōmāno tontadoidi tōnō tōmēnāni awēñē ayæ oodeoidi awēñēidi
tōnō Itota ingante bæi ongōnīnque ænānitapa. Ænīnque tōmēngā ingante goto
wīmpote cædānitapa. ¹³ Ayæ adodāni Ānato nānōwā Caiapato weca Itota
ingante ænte māo godānitapa. Edæ Caiapato īñōmō, Wængonguī quī, ante nē
godongā ñænængā pōnī īnongā mānīi wadepo īñonte īnongāīmpa. ¹⁴ Caiapato
wēēñēñedē oodeoidi awēñēidi īnānīte īmāi ante nē ānongā īnongāīmpa. Mōnō
waocabo beyæ ante adocanque onguīñængā wængā īnīnque wāa īmāīmpa.

Pegodo īncæ, Dīcæ abogaa, angampa

(Māateo 26.69-70; Māadoco 14.66-68; Odoco 22.55-57)

¹⁵ Itota nānō ēmīñængā wacā tōnō Tīmōnō Pegodo īñōmō tōmēna īñōmō
Itota ingante tee empo godatapa. Mānīngā īñōmō Itota nānō ēmīñængā
īñōmō, Wængonguī quī, ante nē godongā ñænængā pōnī nānō nē adīngā
īnongāīmpa. Īnīnque Itota tōnō pōnīnque tōmēngā Wængonguī ingante nē
godongā ñænængā pōnī īnongā oncō yacōmōñāa īñōmō pō guīcantapa.

¹⁶ Pegodo guiquënë odemö yabæ inö a ongöngäimpa. Wacä Itota miñæ në goca iñömö, Wængongui quï, ante në godongä ñænængä pöni ñongä nänö në adingä iñömö tömengä ocæ emænte pönnique baquécä odemö në wææ aacä ingante apæncantapa. Pegodo ingante ämi guicæ, angä eñënnique baquécä wi ænecä ate tömengä Pegodo ingante ænte manguicä guicantapa.

¹⁷ Manguicä guiyongä baquécä odemö në wææ aacä iñömö Pegodo ingante, –Bitö adobaï mäningä onguñængä nänö në emiñænömi ñimipa töö.

Ñongä tömengä wæætë,

–Botö wabo ñimopa, angantapa.

¹⁸ Yogueite ingatimpa. Ayæ në cædonäni tönö oodeoidi awëneidi wææ wänönäni gongapamö ootoquï, ante nani tadöni gäänë adiyæ ongonte ootodönänimpa. Pegodo adobaï tömënäni tönö godongämæ adiyæ ongonte ootocantapa.

Në godongä ñæncengä Itota ingante angampa

(Mäateo 26.59-66; Mäadoco 14.55-64; Odoca 22.66-71)

¹⁹ Mäniñedë Änato iñömö, Wængongui quï, ante në godongä ñænængä pöni iñömö Itota ingante, Bitö në emiñænäni diyæ, ängongäimpa. Ayæ Itota nänö odömonte apænegainö ante, Æbänö i, ante tömengä ingante adobaï angantapa. ²⁰ Itota wæætë,

–Wadäni eñëñönänte botö edonque pöni apænebo eñëñänitapa. Botö cöwë minitö odömöincönë incæ Wængongui onco ñænæncönë incæ oodeoidi tömänäni nani pöincönë pö guidique odömonte apænebo eñëñänitapa. Botö cöwë awëmö apænedämaï intabopa. ²¹ Bitö botö ñimote, Æbänö i, ante quinate ämi. Botö ñimote në eñëñänäni inänte ämi eñente apænedäni eñencæbiimpa. Edæ mäniñäni ædæmö eñëñäni inänipa.

²² Mänömaïnö angä eñënnique wææ wänongä adocanque iñömö Itota gäänë ongönnique tömengä ingante tæi tamönnique apænecä,

–Wængongui quï, ante në godongä ñænængä pöni ñongä ingante ædö cæte mänömaï ante wæætë änewëe töö.

²³ Ante ñongä Itota wæætë,

–Botö wënæ wënæ änimö ñimo bai bitö botö wënæ wënæ äninö ante, Æbänö i, ante apænebi eñëmoe. Wæætë edæ näwangä ante apænebo ñinnique bitö quinate botö ñimote tæi tamömipææ, angantapa.

²⁴ Ayæ, Wængongui quï, ante në godongä ñænængä pöni Caiapato weca gocæcäimpa, ante Änato iñömö Itota ingante ayæ goto wimpoingä ñongante angä eñënnique tömengä ingante ænte gogadänimpa.

Pegodo incæ, Dicæ abogaa, wæætë angampa

(Mäateo 26.71-75; Mäadoco 14.69-72; Odoca 22.58-62)

²⁵ Timönö Pegodo ayæ adiyæ otoyongante wadäni,

–Bitö tömengä emiñænömi adobaï ñimipa töö.

Änäni eñënnique tömengä,

–Wabo ñimopa, angantapa.

²⁶ Wængongui quï, ante në godongä ñænængä pöni ñongä ingante në cædäni iñönänte adocanque iñömö Pegodo nänö në wangö tamoncadingä guidengä ñongäimpa. Tömengä iñömö Pegodo ingante,

–Bitö tömengä miñæ odibowæncodë ongöñedë bitö ñimi atabopa. Bitö wii ñimitawo.

²⁷ Ante ñongä Pegodo wæætë, Wabo ñimopa, ante tæcæ änewëñongä tawadiya dobæ pegatimpa.

*Pidato weca Itota ongongä**(Mäateo 27.1-2; Mäadoco 15.1-5; Odoca 23.1-5)*

²⁸ Tæcæ ñäo bayonte Itota ayæ Caiapato weca ongõngante oodeoidi iñömö, Mönö tömengä ingante odömäno gobedõnadodo awënë Pidato weca ænte gocæimpa, ante cædinque awënë oncö boyæ mäodäni gocantapa. Incæte tömënäni dodäni näni wææ angainö beyæ ante guiñente wædinque, Pidato oncönë guite bai mönitö mimö wentamö éwocamöni incædömönimpa. Iñæmpa mänömaï cæmöni ininque mönitö Patowa mönö ææmæ cæyedë cænguï ædö cæte cænguimöni, ante wædinque guidämaï inänitapa. ²⁹ Ininque Pidato tömënäni weca oncö boyæ taodique tömënäni inänite,

— Ìngä onguiñængä iñömö quïnö wënæ wënæ cæcantawo.

³⁰ Äñongä tömënäni wæætë,

— Mäningä wii wënæ wënæ cæcä inte bai mönitö tömengä ingante wii ænte mämö pædæ godömöni æncædömiimpa.

³¹ Änäni ëñëninque Pidato,

— Minitö tömëmïni tömengä ingante ænte godinque mïni wææ yewæmongainö bai ante cædinque, Tömengä ingante pangæimpa, ante apænte äedäni.

Äñongä oodeoidi awënëidi,

— Iñæmpa mïnitö wææ ämïni iñömïni mönitö cöwë tacamöni wænäni möni cægainö bai ædö cæte æcämenque ingante wænömöni wænguingäa, ante wædänitapa.

³² Odömänoidi mäniñedë wënæ wënæ cædäni inänite awäa töö godömænte timpodinque wææ tiwadinque godö wænönäni inönänimpa. Ininque odömänoidi inänite pædæ godöninque oodeoidi wæætë Itota, Äbänö cædäni wænguimoo, ante dö nänö angainö bai ñöwo ininque baquinque cædänitapa.

³³ Mäninö änäni ëñëninque Pidato wæætë oncönë ñænæncönë guidinque Itota ingante äñecä pongä adinque, Pidato,

— Bitö oodeoidi Awënë Odeyebi imitawo.

³⁴ Angä ëñente Itota wæætë,

— Bitö nämä pönëninque apænebitawo. Wabänö wacä botö imotedö ante bitö imite apæneçä ëñëmitawo.

³⁵ Ante äñongä Pidato,

— Botö dicæ oodeobo imogaa. Tömëmi guidënäni tönö Wængonguï qui, ante në godönäni ñænænäni iñömö bitö imite mämö pædæ pönönäni æntabopa töö. Bitö quïnö wënæ wënæ cæbitawo.

³⁶ Äñongante Itota wæætë apænedinque,

— Wii inguipoga quëwënäni änäni beyæ botö Awënë Odeyebö në ingaïmo imopa. Botö inguipoga quëwënäni Awënë Odeyebö inte në ämo imo bai botö nempo quëwënäni iñömö botö imote, Bæi ongonte ænte godämaï incædänimpa, ante wææ cædinque oodeoidi tönö guëa wæætedö wæætë cæcædönänimpa. Incæte wii inguipoga quëwënäni änäni beyæ wæætë edæ wayömö quëwengäïmo inte botö tömëmö nämä incæ Awënë Odeyebö në ingaïmo imopa.

³⁷ Mänömainö ante Itota apæneçä ininque Pidato,

— Iñæmpa Awënë Odeyebi bitö imitawo.

Äñongante Itota wæætë,

— Bitö tömëmi änö bai botö Awënë Odeyebö inömoimpa. Näwangä ämipa. Botö iñömö Wængonguï nänö angainö ante, Näwangä impa, ante inguipoga

quëwënäni inänite apænecæte ante edæ mäniü beyænque ante inguipoga inömo pö ëñagaimo imopa. Wængongui näwangä ante nänö angainö ante Ao ante ëñente nê cædäni inömo edæ tömënäni tömänäni botö imote nê ëñënäni inänipa, angantapa.

³⁸ Äñongante Pidato,

—Æcämê näwangä angää, angacäimpa.

Itota wæncæcäimpa, änänipa

(Mäteo 27.15-31; Mäadoco 15.6-20; Odoco 23.13-25)

Pidato mänömai apænedinque wæætê oodeoidi weca oncö boyæ taod-
inque apænecantapa.

—Ïngä quinä wënæ wënæ cæcä ingampa, ante ëñënämai imopa. Ïn-
inque botö dicæ tömengä ingante apænte angüimo imogaa. ³⁹ Wadepo inö wadepo
inö Patowa mîni ææmæ cæönæ mînitö, Ædänidö tee mönete ongönäni, ante
pönëninque adocanque ëmowo ante botö imote apænedinque, Ïngä ingante
ñimpo cæbi goquingä, ante cöwê ämînipa. Ïn-
inque adocanque ingante, Ïngä
inömo mîni apænedongä ingampa, ante botö tömengä ingante ñimpo cæbo
ate ænte gomîni inöminipa. Ïn-
inque ñowo diyæ. Mînitö, Oodeomöni Odeye
inongante pönö ñimpo cæbi abæ tawænte goguinga, ämînitawo.

⁴⁰ Äñongante tömënäni yedæ tededinque,

—Mäningä ingante dicæ ämöniyaa. Wæætê Badabato ingante ñimpo cæbi
gocæe, ante tedewengadänipa.

Badabato wëenëñedê wadäni tönö, Odömäno tæiyæ awënë ingante wido
cæcäimpa, ante cædingä inongäimpa.

19

¹ Ayæ Pidato angä ate Itota ingante bæi ongonte mäo æmontaiya tæi tæi
pänänitapa. ² Tontadoidi daa mongæmenca æninque que que cædinque,
Awënë poganta, ante pönö da wencadänitapa. Awënë weocoo wëñacæbiimpa,
ante badete tote bai cædinque Itota ingante opatawæ ëmoncoo pönö daga
wëñadänitapa. ³ Daga wëñadinque tömënäni wæætê wæætê tömengä weca
ponte äninque,

—Badogaa, bitö oodeo awënë odeyebi ïmpææ.

Ante badete todinque tömengä ingante tæi tamönänitapa.

⁴ Pidato tömënäni weca oncö boyæ adopoque ayæ tadinque oodeoidi
inänite apænedinque,

—Ïngä inömo æbänö cæcantawo, ante ëñencæte ante cæbo ate tömengä wënæ
wënæ nänö cædö ante dicæ abogaa. Mînitö mänömainö ante ëñencæmînipa,
ante botö tömengä ingante mînitö weca ænte mantabo tacä aedäni, angan-
tapa.

⁵ Itota daa mongæmenca poganta encadinque opatawæ ëmoncoo
mongænte tayongä Pidato tömënäni inänite,

—Ïngä onguinængä ongongä aedäni.

⁶ Tömengä ingante adinque, Wængongui qui, ante nê godönäni ñænænäni
tönö adodäni inänite nê wææ wänönäni inömo yedæ tedewëninque,

—Awæ ñænquedimæ cæte ämi wænönäni wængæe. Ämi wænönäni wængæe.

Ante ancaa änewënäni ëñëninque Pidato wæætê,

—Mînitö inæmpa tömengä ingante æninque awæ ñænquedimæ cæte
wænömîni wængæe. Botö guiquënë ïngä wënæ wënæ nänö cædö ante
dicæ abogaa.

7 Pidato añongä oodeoidi wæætë ïimaï tedewënänitapa.

—Mönitö wææ yewæmongainö ante ëñente quëwëmöni ïmönipa. Ìngä ïñömö edæ nämä ante edæ, Wængonguï Wëmo ïnömo ïmopa, ante cædinque edæ mäninö möni wææ yewæmongainö ante ëñënämaï cæcampa. Mänömaï ëñënämaï inte cæcä beyæ tömengä nê wænguëngä ingampa.

8 Mänömainö änäni ëñëninque Pidato godömenque guïñente wædinque, 9 oncönê ñænæncönê adodö pö guïdinque Itota ingante,

—Bitö ædönö quëwente pömi ïmii.

Ante añongä Itota guiquënë pæ wëenecä. 10 Adinque Pidato tömengä ingante,

—Bitö quïnante botö ïmo tededämaï ïmii. Botö nämä nê tæï piñænte ämo ïnömo inte ämo ïninque ñimpo cædäni gobaïmipa. Botö wadö ante ämo ïninque bitö ïmite do awæ ñænquedimæ cæte wænönäni wæmaïmipa, ante ëñënämaï ïmitawo.

11 Añongante Itota wæætë,

—Wængonguï bitö tæï piñænte ämämo ante godönämaï ingä bai bitö tömömi tæï ämi ïmi diyæ botö ïmote anguïmiyaa. Mänömaï beyæ bitö ïmite, Wænömi wæncæcäimpa, ante botö ïmote nê pædæ pönöningä ïñömö edæ godömenque wënæ wënæ cæcä ingampa, ante apænecantapa.

12 Mänömainö angä ëñëninque Pidato, Æbänö ñimpo cæbo goquingää, ante cædongäimpa. Cæyongä oodeoidi wæætë godömenque yedæ änönänimpa,

—Bitö mäningä ingante ñimpo cæbi bai bitö odömäno tæiyæ awënë Tetædo æmigo dicæ ïmiyaa. Æcämenque ïñömö edæ, Botö awënë ïnömoimpa, ante nê angä inte tömengä ïñömö Tetædo ingante nê piinongä ingampa.

13 Mäninö änäni ëñëninque Pidato ïñömö, Itota ingante ænte tao godinque awënë nänö apænte äimpa gote tæ contactantapa. Pidato nänö tæ contayömö ïñömö, Dicacoo ayadi bai nani caayömö impa, ante nani añömö ïninque ebedeo tededö, Gabata, nani añömö ïnönimpa. 14 Patowa nani ææmæ cæyedë ïinque bayö oodeoidi, ïimö ate guëmanguïönæ inguimpa, ante mönö ñöwoönæque cæcæimpa, ante nani cæönæ ïnönimpa. Ìñönæ wodo tæcæ bæcä bayonte Pidato oodeoidi inänite,

—Ìngä ïñömö minitö Odeye ïnogä ingampa.

15 Añongante yedæ äninque tömënäni,

—Tömengä ingante wænömi wængæe. Tömengä ingante wænömi wængæe. Awäa timpote ämi wænönäni wængæe.

Ante ancaa änewëñönäni Pidato wæætë,

—Botö ïñömö minitö Odeye ïñongante awäa timpote ämo wænönäni wængæe, ante änewëminitawo.

Angä ëñëninque Wængonguï quï, ante godönäni ñænænäni ïñömö,

—Tetædoque incæ mönitö awënë odeye ïnogä apa cæbii, änewënönänimpa.

16 Ancaa änewëñönäni Pidato, Awäa ämo timpote wænömini wængæedäni, ante Itota ingante tontadoidi inänite pædæ godongä ængadänimpa. Ayæ tömënäni Itota ingante ænte gogadänimpa.

Itota ingante awäa timpodäni wængäimpa

(Mäateo 27.32-44; Mäadoco 15.21-32; Odoca 23.26-43)

17 Itota incæ tömengä timpoquiwæ æninque mongænte taodique “Ocatainö” mönö añömö pongantapa. Mäniñömö ante ebedeo tededö, Godogota, nani añömö impa. 18 Mäniñömö pöñongante tömënäni awæ ñænquedimæ cædinque tömengä ingante töö godonte timpodinque wææ

tüwadinque ængæ gantidēnāni ongongantapa. Ayæ wada inate tömengä weca æmatæ inō æmatæ inō māmō adobai cæte ængæ gantidēnāni wægōñōna Itota tæcæguedē wægongä ingantapa. ¹⁹ Pidato angä yewæmointa, Nāni ēñenguinta, ante yewæmonte æninque ñænquedimæ iwāa wo cædānitapa. “Itota Nāatadeta quēwēningä oodeoidi Awēnē Odeye inongä ingampa,” ante yewæmonte wo cæte ongongatimpa. ²⁰ Itota ingante nāni timpodiñōmō eyequei i inique oodeoidi nangui ināni tömēnāni nāni quēwēñōmō ta pōninque Pidatoidi nāni yewæmōninta adānitapa. Māninta iñōmō ebedeo tededō datü tededō guidiego tededō ante yewæmonte ingatimpa. ²¹ Oodeoidi beyæ ante, Wængongui quü, ante nē godōnāni ñænænāni iñōmō Pidato weca godinque tömengä ingante,

–Bitō, “Oodeoidi Awēnē Odeye inongampa,” ante yewæmōnāmai inguēnē quēwē. Wæætē tömengä nāmā nānō angainō bai, “Botō oodeoidi Awēnē Odeyebo inōmoimpa, ante nē ānewēningä ingampa,” ante yewæmōe.

²² Ante ānewēñōnāni Pidato wæætē,

–Botō yewæmōninō ante yewæmōnimo inte botō wæætē wadō ante yewæmōnāmai incæboimpa.

²³ Tontadoidi iñōmō tömengä ingante awāa timpote ængæ gantidēnāni wægōñongä tömēnāni tömengä weocoo inī æninque mencooga go mencooga cōnōninque adocanque adocooque adocanque adocooque æninque tömānāni ænōnānimpā. Tāno mongæincōo guiquēnē ayæ oñoncoopā. Mānincoo iñōmō bæbængapaa badōnāmai incoo tömancoo adocooque da wēñaque badōi inimpā. ²⁴ Adocooque wānā ñænāmai ingæimpā, ante adodāni godongāmæ tededinque,

–Æcānō quınca nō ta adinque tömengä mānincoo æncæcāimpa, ante wææntodōnānitapa.

Edæ Wængongui angä ēñente dodāni iimāi ante nāni yewæmongainō bai ñōwo iinque baquinque tontadoidi mānōmai cædānitapa. “Edæ botō weocoo inī o æninque tömēnāni nāni caboque wacā ingä wacā ingä nēnempodānitapa. Ayæ, Æcānō quınca nō ta adinque tömengä mānincoo æncæcāimpa, ante wææntodōninque ænānitapa,” ante nāni yewæmongainō bai tontadoidi ñōwo cædānitapa.

²⁵ Itota ingä nāni ængæ gantidēñōmō tömengä wāānā tōnō wāānā tōññacā nāna caya ayæ Codeopato nānōogængä Māadiya tōnō wacā Māadiya Māagadadēnā māññōmō pōninque eyequei a ongōnānitapa. ²⁶ Itota iñōmō tömengä wāānā inante acantapa. Ayæ botō tömengä miñæ nē godimo iñōmō tömengä nānō nē waadebo inōmo inte tömēnā weca ongōmo adinque Itota tömengä wāānā inante,

–Badā ēñēmi. Māningä iñōmō minō wengä bacæcāimpa.

²⁷ Äninque tömengä emiñænimo iñōmote,

–Botō emiñænimi ēñēmi, Māñnā iñōmō botō badā incæ bitō badā bacædāimpa, angacāimpa.

Iinque botō Itota nānō nē emiñænimo inte tömengä nānō ānōñedē tāno ænte māmōmo pōninque tömengä wāānā iñōmō botō oncōnē cōwē owodōnāimpa.

Itota incæ wængäimpa

(Māateo 27.45-56; Māadoco 15.33-41; Odoca 23.44-49)

²⁸ Quinō bacæimpa, ante ñōwo iinque batimpa, ante nē ēñēngä inte Itota iñōmō edæ, Wængongui angä ēñente nāni yewæmongainō bai ñōwo iinque bacæimpa, ante cædinque,

–Botō gæwænte awædō, ante apænecantapa.

²⁹ Adoyömö biinömæ nani ämæ bai wædænque godonte nani ænimæ owætadê engate ongö adinque tömënäni dayömö bai æninque mänimænê pædæ guidonte aa beyonte wëä tadonte æninque iitopowænca nani äwænca ongontoca goto wencadodinque Itota önöne pædæ æænö pæ mänänitapa.

³⁰ Pæ mänönäni Itota oo guëmante bedinque,

—Ñowo iinque batimpa.

Ante apænedinque tömengä ocabo ædæ wææncadinque tömengä önöwoca wadæ goyöwoca do wængäimpa.

Itota betagonta inö tontado boo tænongä

³¹ Iimö ate, Mönö guëmanguïönæ iñömö Patowa inguiönæ beyæ godömenque waa eönæpa, ante oodeoidi, Ñowoönæque cæcæimpa, ante nani cæönæ inimpa. Oodeoidi awënëidi, Awäa nê ongönäni baö mäniwäa guëmanguïönæ ongönämai incædänimpa, ante Pidato weca godinque tömengä ingante, Iinäni nani timpodiwäa nê ongönäni quingæ wæncædänimpa, ante cædinque bitö tömënäni önömënê bamê ämi wadäni taa mænäni do wæncædänimpa. Ayæ tömënäni baö o togænte pædæ wæænonte ämi ænänie, änänitapa. ³² Mänii beyæ tontadoidi pöninque Itota weca täno nani nê ængæ gantidëningä önömënê bamê taa mæninque edæ ayæ nani nê timpodingä wægongä önömënê bamê taa mænänitapa. ³³ Taa mæninque Itota weca pöninque tömengä do wængäi adinque tömengä önömënê taa mænämai inönänimpa.

³⁴ Wæætê tontado adocanque Itota betagonta inö boo tænöñongä wepæ tönö æpæ guï gotimpa. ³⁵ Botö mäninö bayonte nê adimo inte, Æbänö näwangä batimpa, ante nö apænebopa. Ayæ, Botö äno ante näwangä impa, ante do ëñëmopa. Minitö adobai ëñente pönencæminimpa, ante apænebopa. ³⁶ Edæ, “Tömengä bamê adomenque incæ taa mænte wædämai incæcäimpa,” ante Wængongui angä ëñente nani yewæmongainö bai bacæimpa, ante mänömai batimpa. ³⁷ Ayæ edæ, “Waadäni nani nê boo tænöningä ingante aquinäni inänipa,” ante Wængongui angä ëñente wataa nani yewæmongainö bai iinque bacæimpa, ante mänömai batimpa.

Itota wodi baö inï mäo daga wënänipa

(Mäateo 27.57-61; Mäadoco 15.42-47; Odoca 23.50-56)

³⁸ Ayæ ate Adimatea quëwengä Ootee iñömö oodeoidi awënëidi inänite guïñente awädö, ante awëmö Itota emiñæningä inongäimpa. Tömengä iñömö Pidato Awënê ingante, Itota wodi baö pönömi ænte wëmoe, angantapa. Pidato Ao angä ëñëninque Ootee do pöninque Itota wodi baö timpodiwäa ongöñongante o togænte pædæ wæænonte ægantapa. ³⁹ Ayæ Niicodemö wëenëñedê Itota weca woyowotæ ëñacæ nê pöningä iñömö Ootee miñæ pongantapa. Tömengä miidamö nani änömö nangui ti nämö tönö aadoemö nani änömö nangui ogui wamö tönö adoyömö nani wempo cædimö todëinta quido ganca ænte pongantapa. ⁴⁰ Ootee tönö Niicodemö iñömö Itota wodi baö æninque ninocoo nani ancoo guiancoo incæ doyañcoo mänincoo ogui wamö nana ænte pönimö ænte wäne cædedatapa. Ayæ oodeoidi daga wencæte ante nani cægäi bai adobai cædinque tömëna nana wäne cædincoo inte tömengä baö wini wini cægadäimpa. ⁴¹ Itota ingante nani timpodinömwö eyequei gönea inimpa. Adodea iñömö miintatodê nani ææ wodiñömö önontatoque inimpa. ⁴² Iimö ate guëmanguïönæ inguüimpa, ante oodeoidi, Ñowoönæque cæcæimpa, ante nani cæönæ impa, ante beyæ, Ontato eyequei impa, ante tömënäni Itota wodi baö mäninömwö daga wengadänimpa.

20

Itota në wæningä incæ ñäni ömæmonte quëwengä
(Mäateo 28.1-10; Mäadoco 16.1-8; Odoca 24.1-12)

1 Oodeoidi guëmanguüönæ Tabado go ate mönō Dominco tæcæ ooque pönente bayedē Mäadiya Mäagadadēnä Itota wodido ponte ayongä dicabo ontato tee mönocæte ante nāni da pæñæninca incæ do wëä godō concæi intapa. 2 Botō Itota nānō në waadedimo tōnō Timōnō Pegodo iñōmō Itota miñæ möna në godincaya iñōmōnate Mäadiya Mäagadadēnä wæætē, Mänōmai impa, ante adinque mönatō weca pogodo ponte apænecantapa,

—Awēnē Itota wodi baō ontatodē öñöñongante ænte taodinque ædönō mao ñō cædāni, ante ëñēnāmai imōnipa.

3 Ante apæneyongä Pegodo tōnō botō Itota miñæ möna në godincaya iñōmō tömengä wodido quingæ gote pogodo pontamōnapa. 4 Guëa pogodo gomōna incæte tömengä ëmiñænimo botonque quingæ tömengä wodido täno pontabopa. Pegodo ayæ pongantapa. 5 Mäniñōmō täno pōninqe ædæ wæænte guiite ayōmo iñāna nāna wīni caadincōoque öñō abo incæte guidāmai intabopa. 6 Timōnō Pegodo botō miñæ ayæ në pōningä Itota wodido ontatodē ponte wäänē guicantapa. Wäänē guiyongante doyæncōoque iñāna nāna wīni caadincōoque mäniñōmō öñō acantapa. 7 Ayæ Itota wodi ocabo nāna ñāni cæcadincōo adobai öñō acantapa. Mänincōo doyæncōo tōnō wīi adoyōmō ñōnonte intapa. Wæætē iincoo nāä wēnente nānēnē ñō cæte öñō acantapa. 8 İninqe botō tömengä wodido ontatodē täno në pōnimo incæte ñōwo tæcæ adobai wäänē guitabopa. Guiite ayōmo, Itota nānō öñōniñōmō æbānō ï, ante adinque, Tömengä ñāni ömæmonte quëwengä ingampa, ante pōnentabopa. 9 Edæ Wængongui angä ëñente yewæmōninqe dodāni, Mönō Codito iñōmō do wæningä incæ ñāni ömæmonte quëwenguëngä incæcäimpa, ante mönatō mäniñedē ayæ ëñēnāmai inōmōnaimpa. 10 Ayæ mönatō tömengä miñæ në godimōna iñōmō wadæ godinque tömēmōna oncōnē ocæ ëmænte gotamōnapa.

Itota iñōmō Mäadiya Mäagadadēnä weca pongä
(Mäadoco 16.9-11)

11 Mäadiya guiquënë Itota wodido ontatodē yabæ inō a ongonte wædongäimpa. Mänōmai wædinque tömengä, Abote, ante ædæ wæænte guiite 12 adinque Wængongui anquedoda nāāmæntacoo mongæna inte Itota wodi baō öñōniñōmō tæ contada ina acantapa. Adocanque Itota wodi ocabo öñōniñōmō tæ contayongä wacä Itota wodi öñōwa öñōniñōmō tæ contate ongonä acantapa. 13 Tömēna iñōmō tömengä ingante,

—Onquiyæmi, minō quīnante wæmintawo.

Äna ëñēninqe tömengä wæætē,

—Botō Awēnē wodi baō inī ö ænte godāni awædō. Ædönō mao ñō cædāni, ante ëñēnāmai wæbopa.

14 Mäninō äninque Mäadiya dadi ëmænte ayongä Itota mäniñōmō a ongonä adinque Itota incæcä tömengä ëñēnāmai ingantapa. 15 Itota iñōmō,

Minō quīnante wæmintawo. Æcānō ingante ante diqui diqui mīmintawo.

Ante angä ëñēninqe Mäadiya, İngä iñōmō wabānō gönea ömæ wite në aacä ingampa, ante öñōwēnque pōñēninqe,

—Ëñēmi, bitō tömengä wodi baō inī wayōmō ænte mäobi inte bai ædönō gote ñō cæbitapa, ante apænebi ëñēmoe. Apænebi ëñēninqe botō tömengä wodi baō do gote æmaimopa.

16 Äñongante Itota tömengä ingante,

—Mäadiya, angantapa.

Angä eñëninque tömengä weca dadi emænte ebedeo tededö äninque,

—Adaböni, angantapa. Mäninö mönö tededö, “Awënë në Odömömi ïmi,” ante impa.

17 Itota ïñömö,

—Edæ botö ayæ botö Mæmpo weca ocæ emænte godämaï ïmopa, ante adinque minö botö ïmo pä mänämaï ïedä, angantapa. Wæætë minö botö töniñadäni weca godinque tömënäni ïnänite ïmaï apænebi eñencædänimpa. Botö ñowo botö Mæmpo weca ocæ emænte goquïmo ïmopa. Tömengä ïñömö munitö Mæmpo adobaï ïnongampa. Botö ñowo botö Wængonguï weca ocæ emænte goquïmo ïmopa. Tömengä ïñömö munitö Wængonguï adobaï ïnongampa, angantapa.

18 Itota angä ate Mäadiya Mäagadadënë ïñömö Itota nänö në emiñæninäni weca pöninque, Awënë Itota ingante atabopa, äninque, Tömengä ïmainö ante apænecä eñentabopa, ante tömënäni ïnänite mäo apænegacäimpa.

Itota ïñömö tömengä emiñæninäni weca pongä

(Mäateo 28.16-20; Mäadoca 16.14-18; Odoca 24.36-49)

19 Guëmanguïönæ go ate ïmö ate wëmö bayö tömengä emiñæninäni adoyömö pöninque, Oodeoidi awënëidi ïnänite ancaï guïñente awædö, ante odemö tee mönete ongönänitapa. Itota tömënäni weca pö guïite tæcæguedë a ongöninque,

—Guïñenämaï inte gänë pönencæminimpa, angantapa.

20 Mäninö angä ate tömengä önompo odömöninque tömengä betagonta odömongä adänitapa. ïninque mönö Awënë ingante adinque tömengä emiñæninäni nanguï watapæ todänitapa. 21 Itota wæætë adodö,

—Guïñenämaï inte gänë pönencæminimpa, angantapa. Botö Mæmpo ïñömö botö ïmote nänö da pönongäïmo ïmo bai botö adobaï munitö ïminite da godömo goquïmïni ïminipa.

22 Ante apænedinque tömënäni baonga woo öngate apænecä,

—Botö ñowo pöni munitonga Wængonguï Tæiyæ Waëmö Öñowoca ingante pönö pönömo æedäni. 23 Në wënæ wënæ cæcä ingante adinque munitö tömengä ingante godö ñimpo cæmïni ïninque Wængonguï adobaï tömengä ingante godö ñimpo cæcä quëwëmaingampa. Munitö wæætë në wënæ wënæ cæcä ingante godö ñimpo cædämaï ïmini ïninque Wængonguï adobaï cædämaï inte tömengä ingante pönö ñimpo cædämaï ïmaingampa.

Itota ñäni ömæmonte në quëwengä ingante Tömato acä

24 Itota emiñæninäni adoyömö a ongöñönäni tömengä pö guïite tömënäni weca tæcæguedë a ongöñongä tömengä emiñæningä adocanque Tömato mëwoga emongä Äncadænaque ïñömö dæ angampa. 25 Ayæ ate Itota nänö në emiñæninäni wadäni ïñömö,

—Mönö Awënë ingante atamönipa, ante Tömato ingante apænedäni eñëninque tömengä wæætë,

Botö ïñömö tömengä öñönempo nani daagö timpodinömmö, Äyömönö em-pocä, ante adinque öñongompoca gampodique ayæ tömengä betagonta ïnönäni tapa tænonte codinömmö botö tömëmö öñongompoca gampote ate pönëmaï wædö, angantapa.

26 Wacä tëmäna go ate Itota emiñæninäni wæætë oncönë adoyömö pö guïite a ongöñönäni Tömato tömënäni tönö godongämæ pö guïite a ongongantapa.

Odemö tee mönete ongö incæte Itota iñontobæ pö guiite tömënäni weca tæcæguedë a ongöningue,

—Guññänämaï inte gänë pöncæmïnimpa, angantapa.

²⁷ Ayæ Tömato ingante,

—Bitö tömëmi öngompoca pædæ pompodique botö önompo ae. Pædæ guipote botö betagonta inö gampoë. Ayæ, Wabänö incædö, ante änämaï incæbiimpa. Wæætë pönëe.

²⁸ Ante añongä Tömato,

—Botö Awënë inömi ïmipa. Ayæ adobaï botö Wængongui inömi ïmipa, angantapa.

²⁹ Ayæ Itota tömengä ingante,

—Botö ïmote ate pönëmi ïmipa. Wæætë në adämaï inäni incæ botö ïmote pönënäni ïninqe tömënäni näni toquinque ingæïmpa, angacäïmpa.

Wäo nänö yewæmongainta quñante yewæmongacäi

³⁰ Tömengä ëmiñænïnäni weca Itota, Ëñencädänimpa, ante wadö wadö cædinque tömengä nänö bamönengæ ayæ godömenque nanguï pönï cægacäïmpa. Botö iñömö ïntaa yewæmöninqe mäninö tömengä nänö cægainö ante wïl tömäa yewæmontabopa. ³¹ Wæætë mäninö ante yewæmöninqe botö, Itota mönö Codito ïnongäïmpa, ante ayæ, Tömengä Wængongui Wengä ïnongä ingampa, ante mïnitö pöncæmïnimpa, ante yewæmontabopa. Edæ tömengä ëmöwo beyænque mïnitö mänömaïnö ante pönëninque cöwë wænänämaï quëwencæmïnimpa, ante botö ïnta yewæmömopa.

21

Itota tömengä ëmiñænïnäni 7 ganca inäni weca pongä

¹ Ayæ ate tömengä ëmiñænïnäni Tibediapæ näni ämæ yæwedeca ëmönaiboga ongöñönäni Itota iñömö tömënäni weca pöninqe a ongongä adänitapa. Edæ ïmaï batimpa. ² Timönö Pegodo adocanque, Tömato Aancadënaque näni änogä tönö Gadideabæ Cänaa në quëwengä Näatänaedo mënaa, Tebedeo wëna nänä caya mënaa, ayæ Itota nänö në ëmiñænïna wada mënaa mänimpodäni adoyömö ongönönänimpa. ³ Timönö Pegodo iñömö tömengä tönö ongönäni inänite,

—Botö ñowo gæyæ dadoncæ tao gobopa.

Angä ëñëninque tömënäni iñömö,

—Bitö miñæ gocæmönimpa.

Äninqe, Ægodödäni gomompa, ante tao godinque wipodë godongämæ guidinqe tömäa woyowotæ gæyæ dadoncæ cædäni incæte gæyæ dæ ænämaï inönänimpa. ⁴ Näö bayonte Itota iñömö ëmönaiya yæwedeca a ongongä adinque, Itota ingampa, ante tömengä ëmiñænïnäni incæ ëñänämaï inänitapa.

⁵ Ayæ tömengä tömënäni inänite yedæ aa pedinque,

—Ïñänäni, gæyæ æmïnitawo.

Äñongante,

—Ænämaï ïmönipa.

⁶ Änäni ëñëninque tömengä wæætë,

—Mïnitö dicamonca wipo tömëmæ inö æpænë wo guitodonte gæyæ dadonte æedäni.

Tömengä nänö ämaï cædinque tömënäni nanguï pönï gæyæ dicamonca date owo adinque ædö cæte dicamonca wëä pönonte ænguñänii. ⁷ Itota

emiñænimo tömengä nänö nē waadebo inömo inte botö Pegodo ingante apænedinque,

— Ìngä iñömö mönö Awënë Itota ingampa.

Ämo eñëninque Timönö Pegodo iñömö tömengä yabæcoo nänö gä tadongate cönönincoo æninque daga wëñate æpænē to go ti wææninque ömaa taocantapa. ⁸ Wadäni Itota nänö nē emiñæninäni iñömö yæwedeca obo pöni tiëë mëetodo ganca bai iñömö wäi wocädäni iñinque wipodē ayæ owodäni iñömö Pegodo miñæ wogaa godinque dicamö gæyæ eyede pöni wëä pönö pönänitapa. ⁹ Tömënäni wipodē inte pædæ æænoncado ponte ayönäni, Æænonguï, ante gonga emöñömö gæyæ öñö adinque adoyömö wædænque päö cö cæte öñö adänitapa. ¹⁰ Itota tömënäni inänite,

— Gæyæ mïni ñöwo æñi wædænque ænte pödäni.

¹¹ Angä eñëninque Timönö Pegodo wipodē pö guidinque dicamö ænte emönaiya wëä tadongantapa. Edæ tiento tincoenta i todee ganca inäni mänimpodäni gæyæ ñænængade dicamö iñömö eyede owodäni incæte dicamö wangö tēmönämaï inimpa. ¹² Itota iñömö tömënäni inänite,

— Pö cæedäni,

Äñongante tömengä emiñæninäni tömänäni, Mönö Awënë Itota ingampa, ante eñëninque, Æbidö imi, ante tömengä ingante ædö cæte anguinäni. ¹³ Itota gongapamö iñömö pöninque päö ænte tömënäni inänite pædæ godongä ænäni iñinque tömengä ayæ gæyæ öñö æninque tömënäni inänite pædæ godongä cænänitapa.

¹⁴ Mänömaï cædinque Itota do wæningä incæ ñäni ömæmonte quëwente mempoga do ponte a ongöningä inte ñöwo tömengä emiñæninäni weca mempoga go adopoque pongacäimpa.

Timönö Pegodo ingante Itota apænecä

¹⁵ Tömënäni iñinque cænäni ate Itota iñömö Timönö Pegodo ingante,

— Timönö Wäo wëmi eñëmi. Botö imo mäninäni pönömenque waadete pönëñönäni bitö iñömö näwangä botö imote godömenque waadete pönëmitawo.

Äñongä,

— Awënë, Ao ämopa. Bitö imite botö waadedö ante bitö do eñëmipa.

Angä eñëninque Itota,

— Waodäni iñömö botö obegaidi wënäni bai iñönänite bitö tömënäni inänite botö angainö ante odömonte apænebi eñencädänimpa, angantapa.

¹⁶ Ayæ wæætē,

— Timönö Wäo wëmi eñëmi. Bitö näwangä botö imote waadete pönëmitawo.

Äñongä,

— Awënë, Ao ämopa. Bitö imite botö waadedö ante bitö do eñëmipa.

Angä eñëninque Itota,

— Waodäni botö obegaidi bai iñönänite bitö tömënäni inänite aacæbiimpa, angantapa.

¹⁷ Itota mempoga go adopoque tömengä ingante,

— Timönö Wäo wëmi eñëmi. Bitö botö imote waadete pönëmitawo, ante angantapa.

Itota mempoga go adopoque tömengä ingante, Bitö botö imote waadete pönëmitawo, ante angä eñëninque Pegodo wæwente inongäimpa. Incæte Itota ingante,

— Awënë bitö tömää eñëmi imipa. Bitö imite botö waadedö ante bitö do eñëmipa.

Ante wæyongä Itota wæætē,

—Waadäni iñömö nē botō obegaidi bai iñönānite bitō tōmēnāni inānite botō angainō ante odōmonte apænebi eñencædānimpā. ¹⁸ Bitō imite nāwangā ämopa. Bitō wēñæmiyedē tōmēmi nāmā daga wēñadinque, Ædönō goinēmo, ante bitō goinēnonque do gobi imitapa. Ñowo iñömö bitō picæmi bayedē bitō pædæ gopoyōmi wacā incæ bitō imite godō daga wēñadinque bitō goinēnāmaï iñömö māniñömö bitō imite mācā gocæbiimpā.

¹⁹ Pegodo ingante mānōmaïno ante apænedinque Itota iñömö, Tōmengā ingante æbānō wænönāni wæñongā Wængongui ñāo apāite bai nānō emōnō edonque bacæimpā, ante odōmoncæte ante apænegacæimpā. Ayæ godōmenque tōmengā ingante,

Botō miñæ tee empo pōe, angacæimpā.

Itota emiñceningā nānō nē waadecā

²⁰ Pegodo guiquēnē dadi emænte botō Itota emiñænimo nānō nē waadebo iñömö tōmēna miñæ tee empo pōmo acantapa. Mānimo iñömö do mōni cæñedē Itota tōnō āāñomonque tæ contadinque, “Awēnē bitō imi æcānō godō odōmonguinaa, apænebi eñēmōnie,” ante nē apænedimo inōmoimpā. ²¹ Pegodo botō imo adinque Itota ingante,

—Īngā iñömö nē tee empo pongā diyæ æbānō tōmengā beyæ bacæimpā.

²² Āñongā Itota wæætē,

—Botō ocæ emænte ponguinganca tōmengā ayæ quēwencæcæimpā, ämo bai bitō wæætē ædō cæte nē ämi inguimii. Botō iñömö nē anguimo imopa. Bitō guiquēnē botō miñæ tee empo ponguēnēmi imopa, angantapa.

²³ Mānōmaï beyæ pancadāniya mōni tōniñadāni weca godinque gode ä gode ä cædinque botō imotedō ante apænedinque, Īngā iñömö cōwē wænāmaï quēwenguingā ingampa, ante tedewengadānimpā. Itota iñæmpā, Īngā iñömö wænāmaï quēwencæcæimpā, ante ānāmaï ingacæimpā. Wæætē, “Botō ocæ emænte ponguinganca tōmengā ayæ quēwencæcæimpā, ante ämo bai bitō ædō cæte anguimii. Botō anguimo imopa,” ante māninqe angacæimpā.

²⁴ Tōmēnāni, Īngā wænāmaï quēwengā ingampa, ante nāni nē apænedimo iñömö edæ botō tōmengā nānō nē emiñænimo adobo imopa. Tōmēmo, Æbānō batimpā, ante botō apænedō iñömö nāwangā ante nē apænedimo inte botō adodō ante tōmānō ante nē yewæmōnimo imopa. Mānino ante botō angainō iñömö nāwangā impā, ante mōnitō eñēmōnimpā.

²⁵ Itota iñömö nanguï pōni godōmenque wadō wadō cægacæimpā. Æbānō cæcāā, ante tōmāā nānō cægainō ante adinque yewæmōmōni bai mānintacoo mōni yewæmōnintacoo ñonongui ante edæ inguipoga tōmāo incæ wii eyepæ incædōnimpā, ante pōnēmpā. Māninqe ante yewæmōmopa.

Itota nānō da godongaināni Nāni Cægainō

Wængonguī Tæiyæ Waēmō Ōnōwoca poncæcāimpa, ante

¹ Teopido bitō acæbiimpa, ante botō do yewæmōninque, Itota æbānō mā cægacāi, ante, Itota æbānō mā odōmonte apænegacāi, ante yewæmontabopa. Mānōmainō ante do yewæmōnimo inte botō adobo Odoca inōmo inte nōwo godōmenque yewæmōmo ae. ² Itota do iñōmō, Iñāni botō imotedō ante nē apænequināni inānipa, ante cædinque tōmēnāni inānite apænte æninque da godongacāimpa. Iñinque tōmengā nānō æite goquiōnæ iñonte tōmēnāni tōnō godongāmæ ongōninque Itota iñōmō Wængonguī Tæiyæ Waēmō Ōnōwoca tōnō cædinque tōmēnāni inānite, Botō dæ gobo ate mīnitō iīmaī cæcæmīnimpā, ante apænegacāimpa. Iñinque apænecā ate tōmengā ingante Wængonguī do ænte mæicā inque ingā æigacāimpa. Iñinque māninganca tōmengā nānō cægainō ante do yewæmōnimo inte botō iñōmō, Bitō Teopidobi godōmenque acæbiimpa, ante nōwo wæætē yewæmōmopa.

³ Itota adocā incæ nantate wægaingā inte nāni ōmæmonte ate coadenta eōnæ manimpoōnæ inguipoga quēwēninque tōmēnāni weca mīngā inte wæætē pō wæætē pō cædinque mā pōnī cædongāimpa. Iñinque, Tōmengā nāwangā mīngā inte mānōmaī cæcampa, ante adinque tōmēnāni ædō cæte wadō ante pōnenguīnāni. Ayæ tōmēnāni weca a ongōninque tōmengā tōmēnāni inānite, Wængonguī Awēnē Odeye nempo quēwencæmīnimpā, ante tōmānō ante adodō adodō ante apænecā eñengadānimpā.

⁴ Tōmēnāni tōnō godongāmæ ongōninque Itota iīmaī angantapa.

—Wīi wayōmō goedāni, Eedotadēē iñōmō ee quēwēdāni, angantapa. Botō Mæmpo iñōmō, Wacā ingante da pōnōmo æninque ewocæcæmīnimpā, ante do apænebo eñēmīnitawo. Tōmengā, Da pōnonguīmo, ante nānō nē angaingā ingante ante ænte ewocacæte ante mīnitō nōwo wānō cōedāni. ⁵ Edæ Wāō wodi iñōmō æpænē guidongacāimpa. Wængonguī Tæiyæ Waēmō Ōnōwoca guiquēnē mīnitō baonga wantæ iñō pō guicæcāimpa, ante Itota apænegacāimpa.

Itota ōncædē cæicampa

⁶ Ayæ Itota tōnō godongāmæ ponte ongōnāni iñōmō tōmengā ingante ānānitapa.

—Itota eñēmi. Mōnō idægocabo mōnō quēwengaimæ iñonte wadāni do ō ænāni incæte bitō nōwo wæætē adobæ æninque mōnitō Awēnē Odeyebi oo bacæ cæbitawo. Edæ, Bitō nempo oo pōnī godongāmæ quēwencæmōnimpā, ante cæbitawo, ante eñencæte ante wæmōnipa.

⁷ Ancaā āñōnāni,

—Iñæmpa mīnitō ante wæinō baī, Æyedēnō baquīi, ante, Æpogadō baquīi, ante mīnitō wīi eñenguēnēmīni iīmīnipa. Mæmpoque nē angaingā inte mānīnō ante eñengampa. ⁸ Wæætē Wængonguī Tæiyæ Waēmō Ōnōwoca pō guidinque pōnō cæcā ate mīnitō wæætē tæi pīñante ewocamīni edæ bacæmīnimpā. Iñinque, Botō æbānō cægaboī, ante nē adīmīni inte mānīnō botō cægainō ante mīnitō tāno Eedotadēē iñōmō quēwente apænedinque ayæ Oodeabæ māo apænedinque ayæ Tāmadiabæ māo apænedinque godōmenque tōmāmæ māo apænemīni eñencædānimpā, ante Itota angacāimpa.

⁹ Mānōmainō ante apæ necā ēñente a ongōñōnāni Itota māniñōmō ongonte æi boguimancodē ingæ æicā æmō agadānimpa. ¹⁰ Oōnædē æite ingæ gocā æmō ayōnāni edæ onguīñæna nāāmænta weocoo mongæna tōmēnāni weca a ongōninque edæ, ¹¹ tōmēnāni inānite apænedinque,

– Gadideabæ quēwēmīni inte onguīñæmīni ēñēedāni. Quīnante æmonga a cōmīni. Edæ Itota mīnitō tōnō ongōninque oōnædē æicā amīnitawo. Edæ oōnædē æicā mīni adī bai adocā Itota iincayæ ate ocæ emænte poncæcāimpa, ante apænedatapa.

Codaa nānō cæquēñēnō wacā cæcæcāimpa, ante cædāni

¹² Oodeoidi nāni guēmanguīōnæ cōwē nāni goganca māningancaquē i inique wīi gobæ i inique tōmēnāni Odibowænquidi nāni anquidi ongōninque ocæ emænte wææ Eedotadē pōnānitapa. ¹³ Tōmēnāni emōwo Pegodo tōnō Wāō, Tantiago tōnō Æntade, Pedipe tōnō Tōmato, Batodōmēē tōnō Māateo, Adepeo wengā Tantiago, wacā, Mōnō omæ ingæimpa, ante nē ānongā Timōnō, Tantiago wengā Codaa. Mānōmāi emōnāni inte pō guīdinque tōmēnāni nāni wānoncōnē æmongapaa æi guīdānitapa. ¹⁴ Ayæ iināni tōnō wadāni Wængonguī ingante godongāmæ apæ necæte ante cōwē pō pō cægadānimpa. Onquiyænāni adobai Itota badā Māadiya tōnō ayæ Itota biwīdi tōnō cōwē ponte apænedōnānimpa.

¹⁵ Māniñedē Itota ingante nāni tee empote quēwēnāni tiento bæinte ganca ināni inte ongōñōnāni Pegodo tæcæguedē ængæ gantite apæ necantapa.

¹⁶ “Inānāni ēñēedāni. Nōwocā Codaa wodi Itota wodi ingante nē æncædāni inānite nē godō odōmongā ingantawo. Edæ tōmēngā ingante ante Wængonguī Tæiyæ Waēmō Ōnōwo wēñēñedē apæ necā ēñēninque awēñē Dabii wodi nānō yewæmongainō bai cōwē iinque baquīnō angūēñē. ¹⁷ Edæ Itota mōnitō imōnite apænte æninque Codaa ingante adobai apænte ængacāimpa. Inique mōnō cabo mōnō nē cæquēñēnō ante Codaa wodi adocā incæ mōnō tōnō godongāmæ cæcā ingacāimpa. ¹⁸ Tōmēngā wīwa cæte tiguitamō nānō ænintamō incæ adodō godongā ænānitapa. Tōmēnāni wæætē tiguitamō æninque, Waodānido bacæimpa, ante omæ godonte ænānitapa. Tōmēngā iñōmō guidōmēmæ wæænte omēngō tæi æbæ godente æmæwo wængantapa. ¹⁹ Mānōmāi wængā ēñēninque Eedotadē quēwēnāni tōmānāni, ‘Wepæ onguipo ba awædō,’ ante tōmēnāni nāni tededō Atedāmæ pemōnānitapa. ²⁰ Edæ Āmotamīni nāni Angaintaa iimāi ante dobæyedē yewæmongatimpa.

‘Tōmēngā oncō æmæwo ōnonconque bacæimpa.

Wacā mānincōnē cōwē quēwēnāmāi incæcāimpa.’

Ante nāni Āmotamīni Angainta bai do batimpa. Ayæ,

‘Tōmēngā nē aacā bate nānō cæquēñēnō incæ wacā badinque cæcæcāimpa,’ ante yewæmonte ongompa.”

²¹ Ante apænedinque Pegodo godōmenque iimāi ante apæ necantapa. “Mānōmāi i inique Codaa wodi nē nānō cæquēñēnō incæ edæ wacā cæcæcāimpa, ante nōwo mōnō apænte angæimpa. Awēñē Itota imæca mōnō tōnō guæa cægongāñedē wadāni godongāmæ nē cægōnīnāni inānite adinque mōnō iimainō ante apænte ængæimpa. ²² Wāō wodi nānō guidōñedē cægōninque nōwoonæ Itota nānō æite goōnæ ganca æcānō æcānō mōnō tōnō godongāmæ cægōnīnāni ināni, ante adinque mōnō adocanque ingante apænte ængæimpa. Apænte æmō ate tōmēngā, Itota dobæ nāni omæmongantapa, ante nē againgā inte wæætē mōnō tōnō godongāmæ apæ necā incæcāimpa.” ²³ Ante Pegodo angā ēñente cædinque

tömēnāni wæætē, Æcānō æcānō nē againāni ināni, ante adinque mēnaa inate apænte ænānitapa. Adocanque Ootee, Badatabato näni ānongā inte tōmengā mæmæ beyæ, Yoto, ante näni pemongaingā iñongante tōmēnāni tōmengā ingante apænte æninque edæ wacā ingante Māatiya ingante apænte ænte gōnōnānitapa. ²⁴ Mānōmāi apænte æninque Wængongui ingante apænedānitapa. “Awēnē ēñēmi. Mōnitō æbānō pōnēmōnii, ante tōmāā ēñēmi inte bitō iina inate adinque æcānō ingante do apænte ængabiī, ante odōmōmi amōnii. ²⁵ Edæ Codaa wodi tōmengā nānō pante wænguinque oda cæcantapa. Iñinque bitō ñowo wacā ingante da godōmi godinque Codaa wodi nānō cæquēnēnō ante cæcæcāimpa, ante āmii, ante wæmōnīpa.”

²⁶ Ante Wængongui ingante apænedinque tōmēnāni, Æcānō iina, ante ēñencæte ante cædinque dicamō æninque, Wo godō wo godō cæyōmō to ta wææ acāi, ante cæte ayōnāni Māatiya nānō cæ to ta wæænca adinque, Mōnō imonte Itota da godongā nē godimō onompo tipæmpoga go adocanque iñomonte tōmengā mōnō cabo badinque godongāmæ cæcæcāimpa, ante cægadānīmpa.

2

Wængongui Tæiyæ Waēmō Ōnōwoca pongampa

¹ Tōmēmō incadepo ba ate Pentecotee ææmænoca näni äönæ iñonte tōmēnāni näni cabo adoyōmō ponte godongāmæ ongōnānitapa. ² Ongonte ēñēñōnāni woboyæ nanguī pæmænte ā bai iñontobæ öönædē pō ēñēñōnāni oncōnē näni ongoncōnē tōmancōnē wææ guite bai woboyæ nanguī pæmænte ā bai ēñēnānitapa. ³ Ayæ waodāniya incæ gonga bai onguēnē onguēnē bæco adānitapa. ⁴ Ayōnāni Wængongui Tæiyæ Waēmō Ōnōwoca incæ tōmānāniya pō guicā ewocadānitapa. Pō guiidinque Wængongui Ōnōwoca pōnō cæcā beyænque tōmēnāni wadāni näni tededō bai wadāni näni tededō bai mā apænedānitapa.

⁵ Māniñedē oodeoidi Wængongui ingante guñente quēwēnāni inte edæ wabæca wabæca tōmāmæ quēwēninque ñowo Eedotadēē ponte quēwēnōnānīmpa. ⁶ Iināni iñōmō woboyæ nanguī pæmænte bai ā ēñente wædinque ponte ēñēñōnāni Itota ingante nē pōnēnāni iñōmō ñowo pōnāni näni tededō bai tededāni ēñēnānitapa. Adocanque nānō tededō bai wacā nānō tededō bai tededāni ēñēnāni, Æbānō cæte tōmāmō tededō bai tededāni ēñēmōnii, ante wædānitapa. ⁷ Tōmēnāni nāmæneque apænedinque,

—Iñæmpa Gadideabæ quēwēnānique inte iināni mānōmāi tededāni awædō. ⁸ Iñinque ædō cæte mōnō ēñagaïōmæ mōnō tededō bai tededāni ēñēmōō, ante ancai guñente wædānitapa. ⁹ Edæ iñōmō nē ongōmō iñomonte pancadāniya Padatiabæ quēwente pōñōmō wadāni guiquēnē Mēediabæ, Edāmæ, Mēetopotāmiabæ, Oodeabæ, Capadotiabæ, Pontobæ, Atiabæ quēwente pōnāni inānīpa. ¹⁰ Wadāni guiquēnē Pidiguiabæ, Pampidiabæ, Équitobæ quēwente pōnāni inānīpa. Wadāni guiquēnē dibiabæidi ināni inte Tidēne iñōmō quēwente pōnānīpa. Wadāni guiquēnē Odōmā iñōmō quēwēninque ēñacæ ante ponte owodānīpa. ¹¹ Odōmā iñōmō nē quēwēnāni iñōmō pancadāniya oodeoidi ēñagāināni iñōnāni pancadāniya wæætē wadāni incæ oodeoidi pōnēnāni bai adodō pōnente oodeoidi bai bagāināni inānīpa. Ayæ wadāni guiquēnē codetenteidi tōnō adabeidi inte pōnāni inānīpa. Iñinque mōnō wabæca wabæca quēwēninque wadāni näni tededō bai wadāni näni tededō bai nē tedemō imompa. Incæte iināni guiquēnē, Wængongui waa

pōni cæcā ingampa, ante mōnō tededō bai mā pōni tededinque apænedāni ēñēmōmpa tōō.

¹² Ante wædinque tōmēnāni nāni cabo nāmāneque apænedinque,
—Ēbānō ēñēmōō, ante wæmōnīpa tōō.

¹³ Ante wæyōnāni pancadāniya babæ apænedinque,
—Bīnōmæ mūimæ tōmo pōni bedinque dowænāni inte tededānīpa, ante badete togadānīpa.

Pegodo tōmēnāni inānite apænecampa

¹⁴ Mānōmaī tedeyōnāni Pegodo iñōmō ōnōmpo tipæmpoga go adocanque ināni tōnō ængæ gantidīnque nanguī tedecā ēñengadānīpa. “Oodeoidi ēñēedāni. Ayæ wamīni guiquēnē Eedotadēē iñōmō ñōwo ponte owomīni inte mīnitō oodeoidi tōnō tōmāmīni ēamonca ongote ēñēedāni. Botō, Ēbānō ī, ante edonque apænebo ēñencæmīnīpa,” angatapa.

¹⁵ “Gāwadecæ impa diyæ tī nāmæ bete dowænte baquinānīi. Iñæmpa nænque ayaōnā ææñongā ædō cæte mīni ānō bai bete dowænte baquinānīi.

¹⁶ Wæætē Wængonguī beyæ nē apænegaingā Ooedo wodi do nānō angainō bai ñōwo cædānīpa, ante apænebo ēñēedāni. Ooedo wodi iñōmō iīmāinō ante yewæmongacāimpā.

¹⁷ Wængonguī iīmāi angampa, angacāimpā.

Iñque bayedē botō Ōnōwoca ingante tōmānāniya āmo pō guicā ēwocacædānīpa.

Māniñedē onquiyænāni incæ onguīñænāni incæ

mīnitō wēnāni Inōnāni inte botō beyæ apænecædānīpa.

Edēniñāni iñōmō ate bai mā pōni acædānīpa.

Picænāni guiquēnē nō wīlmonete bai acædānīpa.

¹⁸ Ayæ botō Ōnōwoca ingante āmo pō guicā ēwocadinque

onguīñænāni incæ onquiyænāni incæ

botō beyænque nē cædāni Inōnāni inte botō beyæ apænecædānīpa.

¹⁹ Edæ mīni ææmō ate pōnenguinque ante botō ōnōædē mā cæbo acæmīnīpa.

Ayæ iīmæca adobai pōnō cæbo ate wepæ gonga tēemā nanguī mongæ adinque

ēñencæmīnīpa.

²⁰ Edæ nænque tāno wentamō bayō apāicā wepæ emō ba acæimpā.

Ayæ ate tōmengā nānō ponguīōnæ iñonte

Wængonguī Awēnē incæ tæi piñængā inongā inte

ñāō apāite bai emōnīnque poncæcāimpā.

²¹ Iñque botō emōwo ante nē aa pedāni iñōmō

tōmānāni botō æmo beyænque quēwencædānīpa.

Ante Wængonguī Awēnē cæcæcāimpā, ante Ooedo wodi yewæmongacāimpā.”

²² Ante apænedinque Pegodo godōmenque iīmāi ante apænecantapa.

“Idægoidi, apænebo ēñēedāni. Itota Nāatadeta nē quēwengāingā nāwangā botō nē da pōnongā ingampa, ante pōnencæmīnīpa, ante mā cædinque Wængonguī

Itota tōnō godongāmæ tæi piñænte nanguī cæcā ate Itota mīnitō weca bamōnengæ cædinque nanguī cægacāimpā. Iñique mānōmaī cæcā nē agaīmīni

inte mīnitō, Nāwangā Itota ingante Wængonguī da pōnongā ponte cæcampa, ante do ēñēmīnīpa. ²³ Wængonguī nāmā pōnēnīnque, Codito ingante tōmēnāni

nempo pædæ godoncæboimpā, ante do angaingā inte, Mīnitō tōmengā ingante ænīnque mānōmaī cæcæmīnīpa, ante do ēñengacāimpā. Iñique mīnitō

iñōmō Itota ingante bæi ongote ænīnque ēñente cædāmāi ināni nempo pædæ godōnīnque, Mīnitō tōmengā ingante awāa timpodinque wææ tūwate wænōedāni, ante āmīni wænōnānitapa. Mānōmaī ōnōnecaque tedete beyæ

mīnitō tōmēmīni edæ nē wænōmīni baī bamīnīpa tōō. ²⁴ Mīnitō mǎnōmaī wadāni tōnō cædinque wænōmīni beyæ Itota iñōmō mōnō wænguēnēmāmo teēmē mongænte caate wædinque wængacāimpa. Ayæ pæ opate ōñōñongante Wængonguī wæætē, Idæwaa, ante wi ænote baī cædinque angā ate Itota ñāni ōmæmonte ta pongantapa. ²⁵ Adocā Codito beyæ ante apænedinque awēnē Dabii wodi iīmaī ante yewæmongacāimpa.

‘Botō, Mōnō Awēnē cōwē botō weca mæ ongongampa, ante atabopa.

Īnīnque tōmengā botō tōmēmæ īnō tōō æmænte ongongā Īnīnque botō īmote ædō cæte bæ tadāni wæquīmoō.

²⁶ Mǎnōmaī beyæ botō, Watapæ bacæimpa, ante mīmōnē pōnēmo inte botō ōñōneca āmotamīni ante baī nanguī tobopa.

Botō ñāni ōmæmonguinque nē wæwocabo īmopa, ante pōnēmo inte botō guīñēñate wædāmaī inte baō ēñate quēwencæboimpa.

²⁷ Wængonguī ēñēmi. Botō waodāni nāni wænte ongōñōmō ōñōñōmote bitō ēmō cæte godāmaī incæbiimpa.

Bitō īmite nē cæbo inte botō tōmēmī cædō ante cōwē cæbo iñōmote bitō ædæmō wææ aabi ate botō baō ñōmāadāmaī incæboimpa, ante edæ botō do ēñēmopa.

²⁸ Taadō botō quēwenguīnō ante bitō do odōmōmi agaboimpa.

Bitō weca æidinque bitō awinca adinque watapæ tocæboimpa, ante awēnē Dabii wodi āmotamīni ante baī apænegacāimpa.”

²⁹ Ante apænedinque Pegodo godōmenque apænecantapa. “Īñānāni ñōwo edonque apænebo ēñenguēnē quēwēmīni. Mōnō mæmæ Dabii wodi do wængacāimpa. Tōmengā mǎo do daga wengadānīmpa. Edæ tōmengā wodido nāni wengāiñōmō ñōwo ganca a ongō aminīpa. ³⁰ Incæte tōmengā ingante Wængonguī, Dabii ēñēmi, angacāimpa. Bitō pæñāni wææ pæyōnāni adocanque ingante botō bitō awēnē containpaa pōnō cōnōmo containdique tōmengā iñōmō nē Awēnē bacæcāimpa, ante apænecā ēñēnīnque awēnē Dabii wodi Wængonguī beyæ nē apænegaingā īnongā inte edæ, Wængonguī tōmengā nānō ānō baī cōwē cæcæcāimpa, ante do ēñengacāimpa. ³¹ Ayæ, Ābānō cæquingā, ante do ēñengaingā inte tōmengā, Mōnō Codito iñōmō waodāni nāni wænte ongōñōmō ōñōñongante Wængonguī ēmō cæte godāmaī inte wææ aacā beyænque tōmengā baō incæ ñōmāadāmaī ingæimpa, ante apænegacāimpa. Mǎnōmaīnō ante apænedinque awēnē Dabii wodi, Mōnō Codito ñāni ōmæmoncæcāimpa, ante do apænegacāimpa. ³² Itota ingante Wængonguī, Ñāni ōmæmōe, angā ñāni ōmæmongantapa. Īnīnque mǎnīnō tōmengā nānō ñāni ōmæmongāinō ante nē adīmōni inte mōnitō tōmāmōni edæ, Nāwangā impa, ante nē apænemōni īmōnīpa.”

³³ “Īnīnque Wængonguī angā beyænque Itota inque ingā ōñnædē æidinque Wængonguī tōmēmæ īnō tæ contate ongongampa. Ayæ Mæmpo Wængonguī, Botō Ōñōwoca ingante æncædānīmpa, ante nānō nē angaingā ingante do godongā ænīnque Itota wæætē mōnitō īmōnite ñōwo da pōnongā ænte ēwocamōnīpa. Īnīnque mīnitō guīquēnē gonga bæco ate wæmīnitawo. Wadāni nāni tede baī tedemōni ēñente wæmīnitawo. Edæ Wængonguī Ōñōwoca pōnō cæcā beyænque gonga bæco aminīpa. Wængonguī Ōñōwoca pōnō cæcā beyænque wadāni nāni tede baī tedemōni ēñēmīnīpa. ³⁴ Itota ōñnædē inque ingā æicā baī awēnē Dabii wodi wīī adobaī æigacāimpa. Incæte tōmengā godōmenque apænedinque iīmaī ante yewæmongacāimpa.

‘Awēnē Wængonguī incæ botō Awēnē ingante apænedinque, Nē Awēnē īmi ēñēmi. Botō tōmēmæ īnō tæ contayōmi,

35 botō bitō ĩmite nē pĩinte cædāni ĩnānite bæ tabo ate bitō tōmēnāni ĩnānite pĩnā gāwate bai cæcæbiimpa, ante Awēnē Wængongui angacāimpa,” ante Dabii wodi yewæmongacāimpa.

36 Ante apænedinque Pegodo godōmenque ĩmaĩ angantapa. “Mānōmaĩ beyæ mĩni idægocabo tōmāmĩni, ĩmaĩnō ante nāwangā pōni ĩmpa, ante ēñcæmĩnĩmpa. Māningā Itota ĩngante mĩnitō ñænquedĩmæ gōnonte wænōmĩni nē wæningā ĩngante ante apænedinque Wængongui ĩncæ, Itota nē Awēnē ĩnongā ĩngampa, ante ayæ, Nē Codito ĩnongā ĩngampa, ante edæ do cægacāimpa.”

37 Ante Pegodo apæneca ēñēninque tōmēnāni, Æ, wēnæ wēnæ cæte awædō, ante ancaĩ guĩñente wædinque Pegodoidi ĩnānite,

—ĩñānāni, æbānō cæquēñēmōni ĩmōni.

38 Āñōnānite Pegodo wæætē,

—ĩmaĩ cæedāni. Mĩnitō wēnæ wēnæ mĩni cædinō ante Wængongui pōnō ñĩmpo cæcæcāimpa, ante cædinque, Æmæwo wēnæ wēnæ cætabopa, ante Itota Codito ēmōwo ante apænedinque æpænē guiedāni. Mānōmaĩ cæmĩni adinque Wængongui tōmengā Ōnōwoca ĩngante da pōnongā ænte ēwocacæmĩnĩmpa. 39 Edæ mĩnitō ĩmĩnite aa pecā ĩncæ mĩni wēnāni ĩnānite aa pecā ĩncæ gobæ quēwēnāni ĩnānite aa pecā ĩncæ ayæ ate quēwēnāni ĩnānite aa pecā ĩncæ mōnō Awēnē Wængongui nānō nē aa pedāni ĩnānite apænedinque, Botō ānō bai cōwē cæcæboimpa, angampa.

40 Ante apænedinque Pegodo godōmenque nanguĩ āninque, Ēñenguēnē quēwēnāni, ante wantæpiyæ apænecantapa.

—Ñōwodāni ĩñōmō nāmanque nāni cæĩnēnō ante idiquibæ nāni cæi bai mĩnitō adobaĩ cædāmaĩ ĩnte nōingā cæte waa quēwēedāni.

41 Ante Pegodo ancaā angā ēñēninque pancadāniya Ao āninque æpænē do guidānitapa. ĩnĩnque edæ māñōnæ todee mĩido ganca ĩnāni mānimpodāni wede pōnēninque do pōnengāĩnāni tōnō adocabodāni bagadānĩmpa. 42 ĩñāni ĩñōmō adocabodāni badĩnāni ĩnte cōwē ñĩmpo cædāmaĩ ĩnĩnque godongāmæ pō pō cæyōnānite Itota nānō da godongaĩnāni apænedāni ēñēñōnānĩmpa. Ayæ nāni pōnencabo ĩnōnāni ĩnte wacā ĩngā wacā ĩngā watapæ apænedinque pāō pā ænte godongāmæ cæninque Wængongui ĩngante cōwē apænete quēwēñōnānĩmpa.

Nāni pōnencabo godongāmæ waa cæte quēwēnāni

43 ĩnĩnque edæ tōmānāni guĩñente wædinque ee quēwēñōnānĩmpa. Ayæ Itota nānō da godongaĩnāni ĩñōmō, Tōmānāni pōnencædānĩmpa, ante cædinque Wængongui Tæiyæ Waēmō Ōnōwoca tōnō cædinque tōmēnāni nāni pōnēninque ante mā cædinque bamōnengæ nanguĩ cædōnānĩmpa. 44 Nē pōnēnāni tōmānāni adoyōmō pō pō cædinque tōmēnāni nāni mānĩncoo ĩncæ, Tōmāmō qui ĩmpa, ante nē pōnēninque, Wacā ĩngā wacā ĩngā mōnō godongāmæ godonguinque māmompā, ante cædōnānĩmpa. 45 Māĩncoo tōnō ōmæ nāni ēadĩncoo ĩncæ godontē æ godontē æ cædinque wadāni nē ōmaadāni ĩnte wædāni ĩnānite pancæ pancæ godōnānĩmpa. 46 ĩnĩnque ĩmō ĩñō ĩmō ĩñō adoyōmō pōnĩnque Wængongui oncō ñænæncōnē yabæcōnē nē guĩ guĩ cædāni ĩnte mĩmōno nō pōnēninque tōmēnāni oncōnē adobaĩ pāō pā ænte watapæ todĩnque godongāmæ cæñōnānĩmpa. 47 Tōmēnāni edæ Wængongui ĩngante, Waa pōni nē cæbi ĩmpa, ante ancaā āñōnāni wadāni edæ tōmēnāni ĩnānite waa adōnānĩmpa. Ayæ mōnō Awēnē pōnō cæcā ate tōmēnāni edæ, Itota Codito ængā beyænque

mōnō quēwengæimpa, ante pōnēninque iīmō iīnō wacabomō iīmō iīnō wacabomō nē pōnēnāni badinque edæ tæiyæñāni bagadānimpa.

3

Cōmāwaingā ingante āna waa bawacampa

¹ Iīncayæ ate nænque ædæ wæicā ate oodeoidi nāni cōwē Wængonguī ingante apænedōñedē Pegodo tōnō Wāō iīnōmō Wængonguī oncōnē ñænæncō yabæcōnē guicæte ante ædatapa. ² Æite ayōna wadāni pōninque cōmāwaingā ēñate nē pædingā ingante næænte māmōnāni pongā adatapa. Iīngā cōmāwaingā iīnōmō nē pō guidāni inānite, Pōnōmi æmoe pōnōmi æmoe, ancæcāimpa, ante cædinque tōmēnāni tōmengā ingante iīmō iīnō iīmō iīnō næænte pō næænte pō cædinque edæ Wængonguī oncō ñænæncō boyæ yabædemō, Wainemō, nāni ānemō yabæque cō cædonānimpa. ³ Iīnque ñōwo Pegodo tōnō Wāō Wængonguī oncō ñænæncōnē yabæcōnē pō guicæ cæda adinque tōmengā tōmēna inate, Pōnōmīna æmoeda, angantapa. ⁴ Angā ēñēninque Wāō tōnō tōmengā ingante cōwā adinque Pegodoque apænecantapa.

—Mōnatō imōnate ææmō ae.

⁵ Angā ēñēninque cōmāwaingā, Botō imote wabānō pōnōna ænguīmo, ante pōnēninque ææmō ayongā ⁶ Pegodo iīnōmō,

—Quīnō māmopa pōnōmo ænguīmīi. Edæ oodo incæ tiguitamō incæ omæpobo imopa. Wæætē tæiyæ waēmō botō ewocadō ante bitō imite pōnō apænebo ate bitō æe. Nāatadeta quēwengaingā Itota Codito emōwo beyænque bitō dao dao goe, angacāimpa.

⁷ Änīnque Pegodo cōmāwaingā tōmēmæ inō pædæ wææmpo bæi ongonte tōō æmængā ate cōmāwadingā önōwa tōnō önoncaiwā tæi pīñæwacā. ⁸ Ate iīnontobæ ængæ gantite dao dao gocantapa. Ayæ Wāō tōnō Pegodo miñæ Wængonguī oncō ñænæncōnē yabæcōnē godongāmæ go guidīnque dao dao go togæi togæi godinque Wængonguī ingante waa ate apænedinque, Wængonguī, bitō cōwē waa pōnī inōmi inte pōnō cæbi æmopa, ante nanguī apænecantapa. ⁹ Wængonguī māmōmaī waa cæcampa, ante nanguī pōnī tededinque dao dao gocā adinque edæ tōmānāni, ¹⁰ Æ, iīngā iīnōmō, Pōnōmi æmoe pōnōmi æmoe, ante Wængonguī oncō ñænæncō boyæ yabædemō, Wainemō, mōnō ānemō gāānē mōnō nē ānecōningā adocā ingampa. Ante adinque, Quīnō bai cæte waa bacāi, ante ancaī guīñente wægadānimpa.

Tadōmōō yabætaa ongonte Pegodo apænecampa

¹¹ Mānīi cōmāwaingā iīngā incæ Pegodo tōnō Wāō inate wīnīmā wīnīmā cæcā adinque wadāni tōmānāni guīñente wædinque Tadōmōō yabætaa nāni āñōmō pogodo ponte tōmēnāni weca guidānitapa. ¹² Guidāni adinque Pegodo, “Mīni idægocabo ēñēdāni. Mōnatō imōnate quīnante wæmīnīi. Mōnatō edæ, Tōmengā dao dao gocæcāimpa, ante cædinque tæiyæ waēmōna imōnapa diyæ tæi pīñænte cæquīmōnaa. ¹³ Abadāō wodi Itæca wodi Aacobo wodi tōmēnāni, Mōnō Wængonguī inongā ingampa, ante nāni nē angaingā inte Wængonguinque cæcā ate waa bawacampa. Mōnō wæmæidi Wængonguī incæ, Itota botō imote nē cædongā ñāō bai emōñongante tōmengā ingante waa acædānimpa, ante māmōmaī cæcampa. Adocā Itota ingante mīnitō iīnōmō, Wængongæimpa, änīnque pædæ godōmīnitapa. Ayæ Pidato, Nīmpo cæbo gocæcāimpa, ante apænte angā ate mīnitō wæætē Pidato weca ongōninque

adocā ingante ante Baa āmīnitapa. ¹⁴ Īnīnque nē Tæiyæ Waēmō Īnongā inte nō cæyongante mīnitō Baa ānīnque wæætē nē wænōningā ingante ante ānīnque, Īngā ingante ĩmīpo cæbi pongæ, āmīnitapa tōō. ¹⁵ Īnīnque mōnō quēwenguīmāmo nē pōnongā ingante Baa ānīnque mīnitō nē wænōnīmīni ĩmīnīpa. Incæte Wængonguī tōmēngā ingante, Nāni ōmæmōe, angā ñāni ōmæmongantapa. Īnīnque tōmēngā ñāni ōmæmongā nē adīmōni inte mōnitō, Æbānō cægacāimpa, ante adodō ante nē apænemōni ĩmōnīpa. ¹⁶ Adocā Itota ēmōwē ante apænemōna ēñente pōnēnīnque māningā mōningā cōmāwādingā mīni nē adīngā ĩñōmō ñōwo tæi piñæwacampa. Edæ Itota pōnō cæcā beyæ mānī onguīñængā nē pōnēngā badīnque Ifota ēmōwo beyænque ædæmō waa bawate tæi piñængā bacā amīnīpa,” ante Pegodo apænecantapa.

¹⁷ Ayæ godōmenque apænedīnque Pegodo, “Ñōwo botō tōniñāmīni ēñēedāni. Mīnitō awēñēdi ēñēnāmāi nāni cæi bai cædīnque mīnitō ĩñōmō adobai, Æbānō nō cæquīi, ante ēñēnāmāi inte cæmīnitapa, ante awædō. ¹⁸ Incæte mīnitō mānōmāi ēñēnāmāi cædīnque Wængonguī beyæ nē apænēgāināni tōmānāni nāni apænēgāi bai do ĩnque cæmīnīpa. Tōmēnāni, Mōnō Codito caate wæte wæncæcāimpa, ante nāni angāinō bai mīnitō cædi beyæ ñōwo ĩnque batīmpa. ¹⁹ Īnīnque mīnitō wēnæ wēnæ mīni cædīnō ante wæwente pōnente ĩmīpo cædīnque wentamō mīni mongæñō mīni ñā mēnongaquinque Wængonguī gāmæñō pōedāni. ²⁰ Mōnō Awēñē weca mīni wampo pōnēnīnque pōedāni. Ayæ Wængonguī, Mīnitō Codito poncæcāimpa, ante do nānō angāingā ĩnongā inte Itota mīnitō weca poncæcāimpa, ante tōmēngā gāmæñō pōedāni.”

²¹ “Incæte edæ, Tōmancoo do ingāi bai adobai bacoocāimpa, ante Wængonguī badoncæcāimpa, ante tæiyæ waēmō ingāināni Wængonguī beyæ doyedē apænēgadānīmpa. Wængonguī mānōmāi nānō badompoga Itota ĩñōmō mānīmpoga ōōnædē quēwencæcāimpa angūēñē. ²² Edæ Mōitee wodi, ‘Botō wænte gobo ate mīnitō Awēñē Wængonguī wæætē mīnitō beyæ cædīnque mīni cabo ĩñōmīnīte adocanque ingante apænte Ao ante æncæcāimpa. Tōmēngā ingante ānīnque, Mōitee wodi botō beyæ nē apænecā ingāingā bai bitō adobai edæ botō beyæ nē apænēbi bacæbiīmpa, ancæcāimpa. Wængonguī mōnō Codito ingante mānōmāi angā ĩnīnque tōmēngā wæætē nē apænecā bagacāimpa. Īnīnque mīnitō ĩñōmō tōmēngā quīēmē ante apænēyongā ēamonca ongonte tōmānō ante ēñēncæmīnīmpa. ²³ Īnīnque edæ māningā Wængonguī beyæ nē apænecā ingante æcānō ēñēnāmāi ĩna ĩñōmō, tōmēngā guīdēnāni weca quēwēnāmāi edæ wæncæcāimpa,’ ante Mōitee wodi apænēgacāimpa,” ante Pegodo apænecantapa.

²⁴ Ayæ apænedīnque Pegodo, “Æpodānidō Wængonguī beyæ nē apænēgāināni ĩnānī. Edæ tōmēnāni Tāmoedo tōnō ayæ pōnāni tōnō tōmānāni adoyōmō apænedīnque Codito ñōwoōnæ nānō cædō ante apænēgadānīmpa. ²⁵ Īnīnque mīnitō guīquēñē Wængonguī beyæ nē apænēgāināni wēmīni ĩnōmīni inte tōmēnāni nāni angāinō ante nē ænguīmīni ĩmīnīpa. Ayæ edæ Wængonguī, Botō pōnō cæbo ate Ao āmīni ĩnīnque mōnō godongāmæ waa cæcāimpa, ante nānō angāinō ante mīnitō edæ mīni quēwēnīnque ēñente quēwēncæmīnīmpa. Abadāō wodi ingante apænedīnque Wængonguī, ‘Abadāō ēñēmi. Mīnitō mīni quēwēncabo tōnō wadāni tōmāmæ quēwēnāni nāni cabo nāni cabo tōnō tōmāmīni ĩñōmīnīte bitō Pæingā pōnō waadete cæcā beyænque waa quēwēnīnque tocæmīnīmpa,’ ante apænēgacāimpa. ²⁶ Wængonguī, Botō Wēngā pōnō aa pecā ēñēnīnque mīnitō wæætē wēnæ wēnæ cæte mīni gogāinō ocæ ēmænte wadæ pōnīnque wæætē waa quēwēnguīnō cægōnīnque waa

tocæminimpa. Ante cædinque tōmengā tāno mīnitō beyæ ante tōmengā ingante nē cædongā mōnō Codito ingante da pōnongā pongacæimpa,” Ante Pegodo inque apænegacæimpa.

4

Pegodo tōnō Wāō awēnēidi weca gongænte apænedapa

¹ Pegodo tōnō Wāō tōmānāni inānite tæcæ apæneyōna wadāni tōmēna weca māo godongāmæ pōnānitapa. Ināni inōmō nē, Wængonguī quī, ante godōnāni tōnō Tadoteoidi tōnō Wængonguī oncō ñænæncō ante nē wææ wānōnāni awēnē tōnō mānināni pongadānimpā. ² Itota ñāni ōmæmongā bai mōnō adobai ñāni ōmæmongæimpā, ante Pegodo tōnō Wāō apænedapa, ante do wædōnāni inte tōmēnāni ñōwo piinte māmō pōnānitapa.

³ Pōninque tōmēnāni ināna inate bæi ongōnānitapa. Ayæ wēmō ba inique baænæ ate nāna taquinque tōmēna inate tee mōnedāni guiddatapa. ⁴ Incæte tōmēna āna nē ēñēnāni guiquēnē pancadāniya nanguī ināni incæ nē pōnēnāni bagadānimpā. Inique onguīñænāni nāni nē pōnencabo inōmō wodo tinco mūido ganca ināni mānimpodāni bai bagadānimpā.

⁵ Baænæ ate oodeoidi awēnēidi tōnō tōmēnāni inānite nē aadāni nāni Picæncabo tōnō nē odōmōnāni tōnō Eedotadēē inōmō godongāmæ ponte ongōnānitapa. ⁶ Wængonguī quī, ante nē godongā ñænængā pōni Ānato ponte a ongōñongā tōmengā guiddēnāni Caiapato Wāō Adecantodo tōnō wadāni tōmengā guiddēnāni incæ tōmengā weca godongāmæ pō guiddānitapa. ⁷ Pō guidinque edæ Wāō tōnō Pegodo inate tæcæguedē māmō gōnōnāni gongæñōna ānānitapa.

—Mīnatō æcānō tōnō tæi piñænte cæmīna ate cōmāwadingā waa bawacantawo. Edæ æcānō ēmōwo apænete cæmīnai.

⁸ Ante āñōnāni Pegodo inōmō Wængonguī Tæiyæ Waēmō Ōnōwoca tōnō apænedinque,

—Awēnēidi imīni ēñēedāni, nē aamīni mīni Picæncabo ēñēedāni.

⁹ Cōmāwaingā æbānō cæte waa bawacāi, āmīnitawo. Edæ cōmāwaingā ingante mōna waa cædi beyænque mīnitō ñōwoōnæ pōnō apænte āmīni awædō.

¹⁰ Inique mīnitō tōnō idægoidi wadāni tōnō botō tōmāmīni imīnite adoyōmō apænebo ēñencæminimpā. Itota Codito Nāatadeta quēwēningā ingante awæ ñænquedimæ cæte mīni nē wænōningā ingante Wængonguī angā do ñāni ōmæmongacæimpā. Tōmengā adocā Itota ēmōwo beyænque cōmāwaingā iningā tæi piñængā badinque mīnitō weca a ongongā apa ānewēmīni. ¹¹ Edæ wainca nē mænōnāni nāni wido cædinca incæ wacā, Tæcæ manca pōni tæi manguimpā, ante cōnongampā. Itota inōmō māninca bai ææmonga pōni ongongampā.

¹² Inique Itota, Quēwencæminimpā, ante mōnō imonte ængā bai wacā ædō cæte adobai ænguingā. Itota ēmōwo beyænque quēwencæminimpā, ante pōnō cægāingā inte Wængonguī wæætē, Wawo adobai i, ante dicæ pōnō cæcantawogaa. Inæmpā inguipoga tōmāmæ inōmō edæ æcāmenque incæ adobai nē tæi piñænte ēmōnongā inōmō edæ dæ angampā, ante apænedatapa.

¹³ Ayæ Pegodo tōnō Wāō ōnōnaque ina inte nanguī adāmai ina incæte edæ guīñēnāmai edonque apænedapa, ante adinque tōmēnāni, Æbānō cæte edæ do ēñēnatawoo, ante wædinque, Itota miñæ nē godīna inte do ēñēnāni. Nāwangā impā, ante wædānitapa. ¹⁴ Edæ cōmāwadingā iningā tōmēnāni

weca a ongongā adinque tōmēnāni ædō cæte wadō ante tedequinānii. ¹⁵ Īninqe tōmēna inate, Mōnitō godongāmæ Apænte Āincabo weca ongōnāmaī godōmenque goeda, ānāni goda ĩninqe, Tōmēna inate æbānō cæquī, ante pōnēninqe godongāmæ tedecōnānitapa. ¹⁶ Īmaī ante apænedānitapa.

—Mānīna inate quīnō cæquīmōō. Īnæmpa tōmēna tæī piñænte bamōnengæ cædatapa, ante Eedotadēē quēwēnāni, Nāwangā impa, ante tōmānāni do ēñēnānīpa. ĩninqe, Waa cædāmaī inatapa, ante mōnō ædō cæte anguī. ¹⁷ Incæte mānīnō nāni apænedō ante wadāni wīī godōmenque ēñencædānīmpa, ante wææ cædinque mōnō tōmēna inate wææ angæīmpa. Mānīī emōwo ante mīnatō mīna wæquinque apænemīnāpa. Wacā æcāmenque ingante apænedāmaī imæweda, ante mōnō wææ angæīmpa, ante nāmāneque tedēnītapa.

¹⁸ Ayæ ĩninqe tededinque Wāō tōnō Pegodo inate āñete māmōnāni pōna adinque tōmēna inate wæætē, Ēñenguēñē quēwēmīnaa, ānānitapa. Edæ mīna panguinque ante Itota emōwo ante apænemīna. Īncayæ ate tōmengā emōwo ante apænedinque edæ adopoque incæ odōmōnāmaī imæweda. ¹⁹ Ante āñōnānite Pegodo tōnō Wāō wæætē,

—Īnæmpa æcānō ingante ēñente cæquīmōna, ante pōnēmīnī. Mīnitō ānō ēñēninqe wæætē Wængonguī nānō ānō ēñēnāmaī inte cæmōna adinque Wængonguī edæ, Nō cæmīna abopa, anguingā. ²⁰ Edæ mōna adīnō ante mōna ēñēnō ante ædō cæte apænedāmaī inguīmōnaa.

²¹ Ante apæneda ēñente wædinque awēnēidi wæætē, Mīni panguinque, ante ancaa apænedānitapa. Incæte wadāni, Cōmāiningā ingante Wængonguī waa pōnī cæcantapa, ante watapæ apænedāni ate wædinque awēnēidi wæætē Wāō tōnō Pegodo inate pancæte ante cædināni inte, Īnæmpa waodāni piīnāni ĩninqe mōnō æbānō cæte panguīmōō, ante guīñente wædinque pānāmaī inte ĩmpo cædāni godatapa. ²² Edæ waa nē bawadingā ĩñōmō do coadenta wadepo ayæ godōmenque tōmengā nānō ēñadi ĩñonte Wængonguī bamōnengæ cæcā waa bacā adinque tōmānāni ædō cæte wadō ante pōnenguīnānīi.

Wede pōnente tæī piñænte cæcæmōnīmpa, ante Wængonguī ingante apænedānīpa

²³ Mānīī ĩmpo cædāni godinque Pegodo tōnō Wāō ĩñōmō tōmēna tōnō godongāmæ pōnēnāni weca ponte apænedinque, Wængonguī quī, ante nē godōnāni ñænænāni tōnō nē aadāni nāni Picæncabo ĩñōmō mōnatō ĩmōnate ĩmaī ānāni wætāmōnāpa, ante tōmānō ante adodō ante apæneda. ²⁴ Ēñēninqe tōmēnāni nāni pōnencabo adoyōmō pōnēninqe Wængonguī ingante adotedæ tedete apænegadānīmpa. “Awēñē Wængonguī ēñēmi. Tæiyæ Awēñē ĩnōmi inte bitō oōnæ owocoo tōmancoo inguipoga tōmāmæ gāwapæntībæ tōmāmæ badōninqe oōnædē owodāni yæipodē quēwēnāni gāwapāa owodāni æyōmōmē quēwēnāni tōmānāni ĩnānite bitō adobique badongabiīmpa. ²⁵ ĩninqe mōnitō mæmæ Dabīi wodi ingante apænedinque bitō, Dabīi ēñēmi, Bitō botō ĩmote nē cædōmi ĩñōmite botō Tæiyæ Waēmō Ōnōwoca apænecā ēñēninqe bitō wæætē ĩmaī ante apænecæbiīmpa.

‘Wadāni nē ēñēnāmaī ĩnāni incæ quīnante ænguī badinque wido cæcæte ante cædānīi.

Waodāni nāni cabo waodāni nāni cabo incæ idiquibæ ante quīnante pōnēnānitawo.

²⁶ Inguipoga awēñē odeyēidi, Wido cæcæīmpa, ante tæī gongænte ongōnānīpa.

Pancabaa awēnēidi adobaī, Æbānō cæquīmōō, ante godongāmæ pōnēninque mōnō Awēnē ingante ayæ tōmengā nānō nē ōni pæcadongā Codito ingante piinte ānewēnānīpa tōō, ante apænebi ēñēninque mæmæ Dabii wodi wæætē bitō beyæ apænegacāimpa.”

27 Ante Wængongui ingante apænedinque ñowodāni nāni pōnencabo godōmenque apænedānitapa. “Wængongui ēñēmi. Tōmēmi Wengā bitō Tæiyæ Waēmō inongā iñongante bitō, Botō imote nē cæbi bacæbiimpa, ante ōni pæcagabiimpa. Nāwangā impa. Incæte bitō imite nē cædongā iñongante Itota bitō nē ōni pæcadongā ingante edæ Edode tōnō Pontio Pidato tōnō idægoidi tōnō wadāni tōnō piinte adoyōmō ponte mōni quēwēñōmō incæ ongōninque bitō imite nē cædongā ingante, Æbānō cæte wido cæquī, ante do cædānitapa.

28 Edæ bitō tæi piñæmi inōmi inte nāmā pōnēninque edæ, Ìimāi baquīnō anguēnē, ante do angabiimpa. Tōmēnāni guiquēnē bitō angainō bai wæætē cædinque piinte pō gongænte cædānitapa. 29 Ñōwo iñōmō bitō imite nē cæmōni iñōmōnite ñowodāni pōnō piinte ānāni ate wædinque bitō wæætē pōnō cæbi ate mōnitō tæi piñæninque bitō ānō ante guñēnāmāi apænecæmōnīpa.

30 Ayæ nē wēnæ wēnæ Ināni Inānite bitō ōnompoca pōnō gampobi ate waa bacædānīpa, āmōnīpa. Ayæ bitō Wengā Itota Tæiyæ Waēmō iñongante mōnitō tōmengā ēmōwo apænedinque, Wadāni pōnencædānīpa, ante mā cædinque hamōnengæ cæmōni adinque tōmēnāni guñēnte wæcædānīpa āmōnīpa,” ante Wængongui ingante apænedānitapa.

31 Ìinque apænedāni ate tōmēnāni nāni godāmæ ongōñōmō incæ iñontobæ ocæ ocæ cætapa. Cæyō tōmānāni inānite Wængongui Tæiyæ Waēmō Ōnōwoca pō guicā æninque ædæmō ēwocadinque tōmēnāni Wængongui nānō ānō ante guñēnedāmāi inte edonque apænegadānīpa.

Tōmāmō mōnō quincoo impa, ante cædānīpa

32 Ayæ tōmānāni nāni pōnencabo incæ tōmēnāni nāni ēwocadō adodō ēwocate bai ināni inte mīmōnē adodō ante pōnēninque tōmēnāni ēadincoo incæ, Botō quī impa, ante ānāmāi ināni inte, Tōmāmō mōnō quī impa, ante pæ gom-podāmāi inōnānīpa. 33 Ayæ Itota nānō da godongaināni iñōmō tæi piñænte apænedinque, Itota Codito ñāni ōmæmongantapa, ante cōwē nāni apænedī bai apænedōnānīpa. Edæ Wængongui tōmēnāni inānite waadete pōnō cæcā ate watapæ quēwēnōnānīpa. 34 Ayæ tōmēnāni nāni cabo incæ æcāmenque ōmæpocā i iñōmō edæ dæ angantapa. Edæ ōmæ nāni ēadi incæ godonte æninque oncō mænonte nāni ēadi incæ godonte æninque tōmēnāni nāni godonte æninta ænte pōninque 35 Itota nānō da godongaināni weca ænte māmō ñō cædāni æninque tōmēnāni wæætē ōmæpodāni inānite godōnāni eyepæ eyepæ ænōnānīpa. 36 Ìinque Itota nānō da godongaināni iñōnāni adocanque Debii wodi pæingā Ootee ingacāimpa. Tōmengā iñōmō, Wadāni wampo pōnente quēwencædānīpa, ante nē ædæmō apænedongā iñongante wadāni tōmengā ingante Bedēnabee ante pōnō pemongadānīpa. Ìingā Ootee Bedēnabee nāni pemōningā iñōmō Tipidebæ quēwente pōningā inte edæ, 37 tōmengā ōmæ ēadi godonte æninque tōmengā nānō godonte æninta Itota nānō da godongaināni weca māmō ñō cægacāimpa.

5

Ānāniya tōnō Tapidæ

1 Māniñedē Ānāniya nāni ānongā tōmengā nānōogængā Tapidæ tōnō tōmēnāni nāni cæi bai cædinque ōmæ nāna ēadīmæ godonte ænatapa. 2 Ayæ

nānōogængä ēñēñongä tömēna godonte nāna æninta incæ Änāniya iñōmō pancataa pæ gompote æninque wæætē pancataa ænte māmō Itota nānō da godongaināni weca ñō cæcantapa. ³ Ñō cæcä adinque Pegodo,

—Änāniya ēñēmi. Tatāna ingante ædæmō entawēmi inte ömæ beyæ bitō æninta pancataa, Botō qui, ante awēmō ñō cædinque edæ pancataa ænte māmō ñō cædinque bitō, Tömanta impa, ante quimæ änewēē. Iñæmpa, babæ cæðimi inte bitō Wængongui Tæiyæ Waēmō Öñowoca ingante babæ ämipa tōö. ⁴ Edæ bitō ömæ iñi incæ bitō qui cōwē intapa. Ayæ ñōwo mäninta æninque, Äbänō cæquii, ante tömēmi nē ämi iimitapa. Iñinque edæ mīmōno pönēninque quimæ wapiticæ cæbitawo. Bitō mänōmai cædinque waodāni inānite wii babæ apænedinque Wængongui ingante babæ apænebitapa tōö.

⁵ Angä ēñente wædinque Änāniya iñōmō tæ wæænte æmæwo wængantapa. Wængä adinque tededāni ēñēninque tömänāni guiñente wæðanitapa. ⁶ Wængä iñinque edēnīnāni ponte wīni caate næænte māo daga wēnānitapa. ⁷ Dobæ wængä ate todee ooda go ate tömengä æbänō wængä ante ēñēnāmai iñingä inte tömengä nānōogængä incæ pō guicä. ⁸ Adinque Pegodo tömengä ingante,

—Apænebi ēñēmoē. Mīnatō ömæ godōninque mänimpota æmīnatawo. Äñongä,

Ao, mänimpota.

⁹ Angä ēñēninque Pegodo wæætē,

Mīnatō iñæmpa edæ guëa pönēninque, Mönō Awēnē Öñowoca æbänō panguingäa, ante quimæ cæminatawo. Edæ bitō nānōogængä baō iñi nē daga wēnīnāni incæ do dao dao pönāni ēñēmii. Edæ bitō baō adobaī ænte gocæðänimpa tōö.

¹⁰ Tæcæ ante äñongä onquiyængä iñōmō tömengä öñowa gäänē tæ wææninque näñe wængantapa. Wængä ate mänii edēnīnāni pō guite ayönāni dobæ wænte a öñongä adinque tömengä baō iñi æninque tömengä nānōogængä wodido gäänē māo daga wēnānitapa. ¹¹ Mänōmai näñe wænapa, ante tededāni ēñēninque Codito ingante nāni nē godongämæ pönencabo tönō wadāni tömänāni ancaī guiñente wægadänimpa.

Ate ēñencæðänimpa, ante bamönengæ nangui cæðänipa

¹² Mänīñedē Itota nānō da godongaināni iñōmō Wængongui Öñowoca tönō cædinque, Ate pönencæðänimpa, ante wadāni ayönāni mā cædinque bamönengæ nangui cæðönänimpa. Ayæ adoyömō pönēninque tömänāni Wængongui oncō Tadömō yabæcōnē nāni änoncōnē pō guii pō guii cæðönänimpa. ¹³ Wadāni tömēnāni inānite adinque, Nē pönēnāni waa quēwēnāni ināni, ante pönēnāni incæte guiñente wædinque godongämæ pō guidāmai gomō adönänimpa. ¹⁴ Pancadāniya guiquēnē onguiiænāni tönō onquiyænāni tönō nangui ināni mönō Awēnē ingante ñōwo pönēnānitapa. Iñāni iñōmō do pönēnīnāni tönō adocabodāni bacoo ināni bagadänimpa. ¹⁵ Iñinque mänii bamönengæ cæðäni adinque wadāni wēnæ wēnæ ināni inānite ænte pöninque möimoga möincodē ñō cæðänitapa. Edæ, Pegodo nænque pämo wodo pänta goyongä tömengä gänēñōmō öñōninque adocanque adocanque waa bacæðänimpa, ante cædinque Pegodo nānō goquino ante ænte māmō ñō cæðäni öñönānitapa. ¹⁶ Ayæ adobaī Eedotadēē eyequei wayömō nāni quēwēñōmō wayömō nāni quēwēñōmō quēwēninque wadāni wēnæ wēnæ ināni inānite næænte māmō næænte māmō cōnōnāni ate tömänāni waa

badānitapa. Ayæ wænæ nē wentamō ēwocadāni inte yewænte wæwēnāni inānite adobai ænte māmō pōninque waa badānitapa.

Itota nānō da godongaināni inānite piinte tee mōnedānipa

¹⁷ Wængongui qui, ante nē godongā ñænængā pōni inongā tōnō wadāni tōmengā tōnō godongāmæ cædāni incæ Tadoteoidi inōnāni inte, Nāni omēmōnāmaī ingæimpa, ante nē pōnēnāni inōnānimpā. Ininque Itota nānō da godongaināni mānōmaī waa cædāni ate wædinque awēnē tōnō Tadoteoidi iñōmō tōmēnāni inānite piinte agadānimpā. ¹⁸ Ininque Itota nānō da godongaināni inānite yao ongote æninque tōmānāni ayōnāni tee mōnedānitapa. ¹⁹ Tee mōnedāni wæcōñōnānite Wængongui anquedo woyowotæ ponte odemō wi ænete mantacā tayōnānite apænecantapa. ²⁰ Goedāni. Wængongui oncō ñænæncō yabæcōnē go guiite næ gongæninque mīnitō māniñōmō pōnāni inānite apænedinque, Wængongui pōnō cæcā beyænque mōnō quēwengæimpa, ante ædæmō apænemīni ēñencædānimpā.” ²¹ Angā ēñente cædinque tōmēnāni baōnæ ñāō bayonte Wængongui oncō ñænæncō yabæcōnē do go guidinque odōmote apænedāni inānite agadānimpā.

Mānōmaī do go guiite apænedānipa, ante ēñēnāmaī ināni inte edæ, Wængongui qui, ante nē godongā ñænængā pōni inongā guiquēnē tōmengā tōnō godongāmæ cædāni tōnō adoyōmō pō guidānitapa. Pōninque tōmēnāni idægoidi inānite nē aadāni Picænāni godongāmæ nāni Apænte Anoncabo tōmānāni inānite āñete pōnānitapa. Ināni wæætē tontadoidi awēñēidi inānite āninque, Mīnitō tee mōneincōnē gote Itota nānō da godongaināni inānite āñete māmōmīni poncædānimpā. ²² Anāni tee mōneincōnē gote ayōnāni edæ dæ ānāni ante wædinque wææ wānōnāni awēñēidi gode ancæ pōninque, ²³ iīmaī ante apænedānitapa.

—Gote ayōmōni oncō ædæmō tee mōnete intapa. Ayæ tontadoidi odemō pōni a ongōnāni adinque mōnitō go wi ænete guiyōmōni edæ dæ ānāni ate wædinque wadæ pōmōnipa. ²⁴ Ante tededāni ēñēninque, Wængongui qui, ante nē godōnāni ñænænāni tōnō Wængongui oncō ñænæncō ante nē wææ wānōnāni tæiyæ awēnē tōnō guñente wædinque, Nōwo quiēmē bai bacæimpa. ²⁵ Ante wæyōnāni wacā do pō guidinque tōmēnāni inānite,

—Aquēnē quēwēmīni. Māniñāni mīni tee mōnedināni incæ Wængongui oncō ñænæncō yabæcōnē go guiite a ongōninque māniñōmō pōnāni inānite odōmote apænedāni ēñēnāni ataqueedāni.

²⁶ Ante apænecā ēñente wædinque wææ wānōnāni awēnē tōmengā nānō wææ wānoncabo tōnō Itota nānō da godongaināni inānite æncæ godinque, Godongāmæ ongōnāni incæ piinte tacadāni wæcæ wæ, āninque pānāmaī inte ee ænte pōnānitapa. ²⁷ Ante pōninque nē aadāni Picænāni godongāmæ nāni Apænte Anoncabo weca ænte māmō gōnōnāni gongæñōnānite, Wængongui qui, ante nē godongā ñænængā pōni inongā iñōmō tōmēnāni inānite angantapa.

²⁸ —Māningā Itota emōwā apænedinque wadāni inānite odōmōnāmaī imæwedāni, ante ancaā antamōnipa tōō. Incæte mīnitō māniñe mīni odōmōnte ānewēnō ante Eedotadēē tōmāo odōmote apænemīnipa. Ayæ godōmenque tedewēninque mīnitō, Māningā nē wængaingā ingante awēñēidi nē wænæ wænæ cædināni inānipa, ante mōnitō imōnitēdō ante ānewēmīnipa tōō.

²⁹ Ante nē ñænængā piinongā Pegodoidi wæætē,

—Mōnitō quiquēnē waomīni imīnite ēñēnāmaī inte Wængongui ingante ēñente cæquēnēmōni imōnipa. ³⁰ Mīnitō Itota ingante ñænquedimæ tim-pote wænōmīni wængā ate mōnō wæmæidi Wængongui incæ angā ñāni

ömæmongantapa. ³¹ Ayæ nē ñāni ömæmöningä ingante apænedinque Wængongui, Bitō, Quëwencædänimpa, ante nē Æmi bacæbiimpa, angacäimpa. Nē Æmi iñōmite idægoidi tömänāni, Idæwaa wënæ wënæ cæte quëwente awædo, ante botō gämænō poncædänimpa, ante cæcæbiimpa. Bitō æmi beyænque botō tömēnāni iñānite pōnō waadete ñimpo cæcæboimpa. Ante cædinque edæ Itota nānō Awënē baquinque Wængongui æmonga ænte mæicä æidinque Wængongui tömēmæ inō tæ contate ongongampa. ³² Itota ingante Wængongui ænte mæicä æigacäimpa, ante nē adimōni inte mōnitō mäninō ante nē apænemōni imōnipa. Ayæ nē eñēmō cæmō iñōmonte Wængongui tömengä Tæiyæ Waëmō Önōwoca ingante da pōnongä ænte ewocamompa. Tömengä Önōwoca adobaï mōnitō tōnō godongämæ nē apænecä ingampa, ante Pegodoidi apænedanitapa.

³³ Mänōmaï apænedāni eñēninque awënēidi ængui badinque tömēnāni iñānite edæ wænoncæ cædänitapa. ³⁴ Mäniñedē adocanque Paditeocä incæ tömengä emōwo Gämadiedo tömēnāni nāni wææ angainō ante nē eñengä iñongante tömänāni tömengä ingante waa adönänimpa. Ìninqe tömēnāni nāni Apænte Äincabo wænoncæ cæyönāni mäningä iñōmō tömēnāni nāni nē waadecä inongä inte ængæ gantidinqe, Itota nānō da godongaināni iñānite oncodo mantamini wantæ ongoncædänimpa. ³⁵ Angä dæ godāni Ìninqe Gämadiedo wæætē awënēidi iñānite apænecantapa.

–Idægoidi eñēedāni. Mänināni iñānite æbānō cæquï, ante ædæmō pōnente ate edæ ee cæedāni. ³⁶ Edæ doyedē wacä Teodo adobaingä ængæ gantidinqe, Botō nē nangui cæbo imopa, ante añongante edæ tömengä miñæ coatodo tiento ganca ināni godänitapa, ante pōñeedāni. Tömengä ingante wadāni mao wænönāni wængä ate tömengä emiñēnināni wæætē nāwæ godāni ate edæ dæ batimpa. ³⁷ Ayæ ate edæ awënē, Minitō emōwo ponte yewæmoncæminimpa, ante nānō äniñedē wacä Gadideabæ quëwëningä Oodaa adobaï awënē ingante wido cæcæte ante ængæ gantiyongä nangui ināni tömengä miñæ goyönāni tömengä ingante wænönāni wængä ate nāwæ adobaï gogadänimpa. ³⁸ Ìninqe, Mänōmaï batimpa, ante pōnente cæedāni. Nōwo iñōmō iñāni adobaï ængæ gantidāni adinque minitō tömēnāni iñānite ee ate gomō aedāni amopa. Tömēnāni waodänique inte cædāni bai ædō cæte cæquïnāni. Edæ dæ bacæimpa. ³⁹ Wæætē Wængongui angä eñente cædāni bai minitō ædō cæte Baa ante wido cæquïminii. Edæ minitō mänōmaï cædinque Wængongui ingante piimini inte wæbaiminipa.

Ante wææ angä eñente wædinque Ao ante tömengä nānō änō bai cædänitapa. ⁴⁰ Itota nānō da godongaināni iñānite aa pedāni pōnāni ate awënēidi, Pædāni, änāni eñēninque nē wææ wänönāni æmontaimenca tæi tæi pānänitapa. Ayæ awënēidi godōmenque, Itota emōwo ante apænedāmaï imæwedāni, ante äninque Itota nānō da godongaināni iñānite ñimpo cædāni godänitapa. ⁴¹ Nē Apænte nāni Äincabo weca ongonte tao godinque tömēnāni wæætē, Wængongui mōnō imonte adinque, Botō Wëñængä emōwo beyæ wadāni wënæ wënæ wænāni ate minitō eyepæ inte caate wæcæminimpa, ante do cæcampa, ante pōñeninque edæ nangui togadänimpa. ⁴² Ìninqe Wængongui oncō ñænæncō yabæcönē incæ waodāni oncönē incæ tömēnāni ñimpo cædāmaï inte cōwē go guii go guii cædinque cōwē odōmonte apænedinque, Itota tömengä nāwangä mōnō Codito ingampa, ante watapæ apænedāni eñengadänimpa.

Tiæte ganca ināni nē nēnempodāni badānīpa

¹ Itota ingante nē tee empote quēwēnāni māniñedē nanguī ināni badāni ate pancadāniya guidiego tededō nē tededāni iñōmō ebedeo tededō nē tededāni inānite piinte ānīnque, Mīnitō mīni cabo owæmpoīnāni inānite iimō iñō iimō iñō cænguī eyepæ godōnīnque mōni cabo owæmpoīnāni inānite pōnōnāmaī iimīnīpa tōō, ante ānāni. ² Itota nānō nē da godongaināni iñōmō dote ganca ināni iñōnānite wadāni, Dote inānīpa, ante pemonte bai apænedōnānīmpa. Ināni iñōmō guidiegoidi mānōmaīnō ante wædānīpa, ante ēñente wædīnque wadāni Itota ingante nē tee empote quēwēnāni inānite āñete godongāmæ pōnāni ate tōmēnāni inānite,

–Wængonguī nānō apænedō ante nē apænequēnēmōni inte mōnitō ædō cæte mōni cæquēnēnō ante ñimpo cædīnque cænguīnque ante godonguīmōnīi.

³ Inīnque botō tōniñamīni ēñēdāni. Mīni pōnencabo nāmā cōwā adīnque, Æcānō æcānō Wængonguī Ōnōwoca tōnō āāwocaque bai ēwocate nō cædāni inānīi, ante adīnque mīnitō tiæte ganca ināni mānimpodāni inānite apænte ædāni. Apænte æmīni adīnque mōnitō tōmēnāni inānite, Cænguī nē godōmīni bacæmīnīmpa, āmōni ēñente cæcædānīmpa. ⁴ Mōnitō wæætē Wængonguī ingante cōwē apænedīnque Wængonguī nānō apænedō ante godōmenque odōmonte apænedīnque māniñonque cæte quēwēncæmōnīmpa.

⁵ Mānōmaīnō ante ēñēnīnque tōmēnāni nanguī ināni iñōnāni inte tōmānāni Ao ante edæ, Ināni mānōmaī inānīpa, ante adīnque iimāi ēmōnāni inānite apænte ængadānīmpa. Adocanque Etebā nē wede pōnengā inte Wængonguī Tæiyæ Waēmō Ōnōwoca tōnō āāwocaque bai ēwocacā inongānīmpa. Tōmengā tōnō Pedipe, Podocodo tōnō Niicānodo, Timōnō tōnō Padōmēna, ayæ Antioquiya iñōmō nē quēwēningā Niicodato. Ingā iñōmō oodeoidi nāni pōnēnō bai pōnengā inte do oodeo bai bacā inongānīmpa. Mānimpodāni inānite apænte ænānīta. ⁶ Apænte ænīnque Itota nānō nē da godongaināni weca ænte mānō gōnōnāni ongōñōnānite iñāni iñōmō, Mīnitō nē godōmīni bacæmīnīmpa, ante cædīnque tōmēnāni inānite gampodīnque Wængonguī ingante apænedānīta.

⁷ Inīnque Wængonguī nānō apænedō ante gode ā gode ā cædīnque māo apænedāni ēñēnōnānīmpa. Inīnque Eedotadēē iñōmō Codito miñæ nāni tee empote quēwēncabo tæiyæñāni yebænte bagadānīmpa. Wængonguī quī, ante nē godōnāni incæ adobaī nanguī ināni wede pōnēnīnque ēñente bagadānīmpa.

Etebā ingante bæi ongōnānīpa

⁸ Etebā iñōmō Wængonguī waadete pōnō cæcā ate tæi piñænte ēwocadongā inte bamōnengæ nanguī cædongānīmpa. Ayæ, Cæbo ate pōnencædānīmpa, ante mā cæcā adīnque godongāmæ ongōnāni pancadāniya, Æbānō cæcāā, ante wædānīta. ⁹ Wadāni guiquēnē Etebā tōnō guēa wæætēdō wæætē ancæte ante cædānīta. Ināni iñōmō oodeoidi inōnāni incæ pancadāniya Tidēnebæ quēwēnīnāni iñōnāni pancadāniya Adecantodia iñōmō quēwēnīnāni iñōnāni pancadāniya Tiditiabæ quēwēnīnāni iñōnāni pancadāniya Atiabæ quēwēnīnāni inōnānīmpa. Tōmēnāni doyedē wadāni inānite nē cægānāni inōnāni inte ñōwo abæ tawænte godīnāni inōnāni inte godongāmæ pōnīnque adocabodāni bai badīnāni inōnānīmpa. Tōmēnāni odōmōncō ante, Mōni nē Abæ Tawænte Gocabo Odōmōncō impa, ante pemōnōnānīmpa. Inīnque tōmēnāni pancadāniya Etebā ingante wæætēdō wæætē ante cæyōnāni, ¹⁰ tōmengā nē nō ēñēnongā inte Wængonguī Ōnōwoca tōnō godongāmæ

apæneca ēñēninque tōmēnāni, Æ mōnō wæætē ædō cæte wææ anguii, ante wædānitapa.

¹¹ Īninque nē wæætēdō wæætē ānāni adodāni incæ wadāni Īnānite godō awēmō ānānitapa. Minitō babæ ante ĩ incæte, Mōitee wodi ingante ante Etebā godō wēnæ wēnæ apæneca ēñentamōnipa, ante ōnoncæ ædāni. Ayæ Wængongui ingante adobaĭ tōmengā godō wēnæ wēnæ ante babæ apæneca ēñentamōnipa tōō, ante incæ ædāni, ante nē abæ tawænte godīnāni ānānitapa. Mānōmainō ānāni Ao ante tōmēnāni nāni angainō bai cædinque Etebā ingante ante babæ ante piinānitapa. ¹² Mānōmainō ante babæ ante piināni ēñēninque wadāni ōnōnānique incæ nē aadāni nāni Picæncabo incæ nē odōmōnāni incæ tōmānāni ængui badānitapa. Mānōmai ængui badinque tōmēnāni Etebā wodi ingante bæi ongonte nē Apænte nāni Āincabo weca ænte māō gōnōnāni ongongantapa. ¹³ Pancadāniya Etebā ingante ante babæ apænedinque ĩmai ānānitapa. Īngā ĩñōmō ĩmpo cædāmai inte cōwē Wængongui oncō tæiyæ waēmō oncō ĩñonte wiwa tedewēninque tōmengā godōmenque Mōitee wodi nānō wææ angainō ante godō wiwa ante babæ apæneca ēñentamōnipa. ¹⁴ ĩñōmō oncō ante apænedinque adocā Etebā ĩñōmō, Itota Nāatadeta nē quēwēningā ĩi oncō bæ tadete wido cæcæcāmpa, ante ānewengampa. Ayæ adocā Itota ĩñōmō, ĩmai cæedāni, ante Mōitee wodi nānō wææ angainō ante Ao ānāmai inte edæ, Wadō ante cæquēnēmīni ĩminīpa, ante odōmongampa, ante ĩngā Etebā ĩñōmō adobaĭ ānewengā ēñentamōnipa tōō, ante babæ apænegadānimpa.

¹⁵ Mānōmai babæ apænedāni ēñēninque nē Apænte nāni Āincabo incæ Etebā ingante cōwā ayōnāni tōmengā awinca Wængongui anquedo nānō ēmōnō bai ēmongā agadānimpa.

7

Etebā nāmā wææ apænecampa

¹ Īninque, Wængongui qui, ante nē godongā ñænængā pōni ĩongā ĩñōmō Etebā ingante āninque, Bitō ĩmitedō nāni ānīnō nāwangā intawoo.

² Āñongante Etebā wæætē ĩmai ante nāmā wææ apænecantapa. “Botō wæmpoidi ēñēedāni. Botō tōniñamīni ēñēedāni. Mōnō wæmæ Abadāō wodi Mēetopotāmiabæ ayæ quēwēninque Cadāna ĩñōmō ayæ quēwēncæ godāmai ĩñongante Wængongui nē ñāō apāite bai ēmōngā inte Abadāō weca ponte a ongongā agacāmpa. ³ Ayæ Abadāō ingante apænedinque Wængongui, ‘Bitō guidēnāni ĩnānite ēmō cæte bitō ōmæ ēmō cæte godinque wabæca botō odōmonguimæca æmæwo wadæ goe,’ angacāmpa. ⁴ Angā ēñente cædinque Abadāō wodi māniōmæ Cadeabæ ēmō cæte wadæ godinque Cadāna nāni quēwēñōmō ganca pōninque quēwengacāmpa. Ayæ tōmengā wæmpo wodi wængā ate Wængongui tōmengā ingante angā ēñēninque Abadāō ĩmæca mōnō ñōwo quēwēnæcæ ponte quēwengacāmpa.”

⁵ “Incæte Wængongui, Tōmēni ōmæ, ante Abadāō wodi ingante cabo incæ ōmæ pōnōnāmai ingacāmpa. Wæætē Abadāō wodi wēñængā mæmpo ĩnāmai ĩñongante Wængongui, ĩmæ incæ bitō ænguiæ ĩñonte bitō pæināni adobæ tōmāō quēwēncædānimpa, ante odōmongacāmpa. ⁶ Ayæ godōmenque apænedinque Wængongui, Bitō pæināni ĩñōmō wabæca gote māniæ quēwēnāni weca quēwēñōnānite ĩnāni wæætē bitō pæināni ĩnānite edæ ō ænte bai cædinque, Mōnitō beyænque cæedāni, ante nanguī ānāni wæcædānimpa. Ayæ tōmēnāni nempo wantæpiyæ coatodo tiento wadepo ganca mānimpoga

quëwëñōnānite adodāni wënæ wënæ cædāni beyæ caate wæcædānimpa.
 7 Ante Wængonguī godōmenque apænedinque, ‘Bitō pæināni inānite nē ō ænte wënæ wënæ cædāni inānite botō wæætē apænte āninque pancæboimpa. Ayæ iincayæ ate bitō pæināni māniōmæ tōmēnāni nāni caate wædiōmæ emō cæte wadæ pōninque iimæca wæætē pōninque botō Wængonguimo iñōmote botō beyæ cæquīnāni inānipa.’ 8 Āninque Wængonguī, Mōnō godongāmæ cæcæimpa, ante pōnō cæbo ate mīnitō wæætē Ao ante ēñente cæcæmīnimpa. Mānōmaī ante cædinque mīnitō onguīñæmīnique eō togænte caate wædinque ēñencæmīnimpa. Angā ēñēninque Abadāō wodi wëñængā Itæca ēñacā ate tōmēngā nānō ēñadi adoque Wængonguī itadē go ate tōmēngā ingante eō togængacāimpa. Itæca wodi pæte wææ Aacobo wæmpo bagacāimpa. Aacobo wodi pæte wææ dote ganca ināni tapæicā wææ mōnō wæmæidi wodi baquinque pægadānimpa.”

9 Ante apænedinque Etebā godōmenque, “Mānīnāni mōnō wæmæidi ingaināni iñōmō tōmēnāni biwī Ootee ingante ante adinque piinte wædinque ūguitamō beyænque pædæ godōnāni ō æninque Equitobæ ænte māodāni gogacāimpa. Equitobæ pōninque tōmēnāni godonte æncæte ante cædinque Ootee wodi ingante māniñōmō quëwengā nempo pædæ godōnāni awēnē beyænque cæte quëwengantapa. Mānōmaī quëwengā incæte tōmēngā tōnō godongāmæ Wængonguī cōwē cægacāimpa. 10 Īninque Ootee wodi ingante nanguī wiwa cædāni wæyongante Wængonguī cōwē wææ aacā quëwengacāimpa. Ayæ Wængonguī pōnō apænecā ēñēninque nē ēñente bayongante Equitobæ tæiyæ awēnē Padaōnō incæ tōmēngā ingante waa adinque, Botō tæiyæ awēnē imo bai bitō wodo adobaī badinque Equitobæ wædæncque awēnē bacæbiimpa. Ayæ adobaī botō awēnē onconcoo bitō aacæbiimpa, angacāimpa.”

11 Ante apænecā ēñēñōnāni Etebā godōmenque, “Māniñedē Equitobæ tōmāo Cānaāmæ tōmāo to amīnte bayonte tepæmpo gæwænte wædōnānimpa. Mōnō wæmæidi cænguī æncæte ante cædinque ænāmaī iñōnānimpa. 12 Īninque, Equitobæ cænguī ayæ mæ ōñompa, ante tededāni ēñēninque wæmpocā Aacobo wodi mōnō mæmæidi nē baquināni inānite āninque, Botō wēmīni, Equitobæ godinque cænguī ænte pōedāni, angā mā gogadānimpa. 13 Gote pōninque ayæ wæætē mempoga gote a ongōnāni adinque Ootee wodi incæ tōmēngā mēmōidi inānite, Botō mīnitō biwīmo ēñagaīmō imopa, angā wægadānimpa. Ayæ, Ootee guidēnāni do pōnānipa, ante tededāni ēñēninque awēnē Padaōnō ingante gode ānāni edonque ēñengacāimpa. 14 Ayæ ate Ootee wodi tōmēngā wæmpo Aacobo wodi nāni pæincabo tetenta i tīnco ganca mānimpodāni āñecā gogadānimpa. 15 Aacobo wodi mānōmaī Equitobæ gote quëwēninque wængacāimpa. Ayæ tōmēngā pæināni wææ mōnō wæmæidi ingaināni inte adobaī māniñōmō gote quëwente wængadānimpa. 16 Abadāō wodi wëēñedē, Mōnitō wodido, ante Caāmōdo wēnāni nāni ānimpota mānimpota godonte æninque Tiquemō iñōmō ōmæ godonte ænongāimpa. Ante do againāni inte mōnō wæmæidi ñōwo Aacobo wodi bayetoca ingāi Cānaāmæ ænte pōninque, ayæ iincayæ ate wææ tōmēngā wēnāni bayetoca ingāi Abadāō wodi nānō ængaiāmæ tōmēnāni wodido ingāiñōmō māmo daga wængadānimpa.”

17 Ante apænedinque Etebā godōmenque apænecantapa. “Abadāō wodi ingante Wængonguī wëēñedē nānō, Botō wantæpiyæ ate bitō pæināni inānite adodō ænte māmōmo poncædānimpa, ante nānō angaiñedē wodo iinque bayonte tōmēnāni Equitobæ quëwēninque nanguī bacoo yebænte bagadānimpa. 18 Māniñedē wacā onguīñængā ñōwocā incæ, Ootee wodi æcānō ingacāi, ante ēñēnāmaī iñongā inte Equitobæ awēnē bagacāimpa. 19 Tōmēngā iñōmō mōnō

guidēnāni wodi inānite wapiticæ ante wēnæ wēnæ cægacāimpa. Tömengā, Mīnitō wēñænāni tæcæ ēñadāni inānite wido cædāni, ante pīngā ēñente wædinque mōnō wæmæidi wodi incæ tæcæ ēñadāni inānite yabæque wido yabæque wido cædāni wængadānimpa.”

²⁰ “Tömēnāni mǎnōmāi nāni cægāñedē incæ Mōitee wodi ēñate pægacāimpa. Tömengā wæmō wēñæ iñongante Wængongui waa acampa, ante pōnēninque mēa go adoque apāicā go ate tōmengā ingante mæmpo oncōnē pæ gompote pæpogada pæcantapa. ²¹ Ayæ, Wænōnāni wæncæ wæ, ante guiñente cædinque tōmēna tōmengā ingante yabæque gāwapæ yædopæ wo cæda ongōñongante awēnē Padaōnō wengā onquiyængā adinque, Botō wē, ante cædinque Mōitee ingante ænte pæpogacā pægacāimpa. ²² Mǎnōmāi cæcā beyæ equitoidi nāni ēñægainō ante tōmānō ante odōmōnāni ēñente pædinque Mōitee wodi nē angā baquinque nangu cæcā baquinque tæi piñænongā inte pægacāimpa.”

²³ Ante Etebā godōmenque apænedinque, “Ayæ æmæwo pædinque coadenta wadepo nānō ēñagāñedē Mōitee wodi, Idægoidi botō tōniñadāni inānite ēñacæ gobote, ante ēñacæ gocantapa. ²⁴ Gote ēñayongā, Equito onguiñængā incæ botō guidengā ingante wīwa cæcā caate wæcampa, ante adinque Mōitee wodi tōmengā guidengā ingante wææ cæcæte antē cædinque tiyæñō tiyæ cædinque Equito onguiñængā ingante wænongā wængacāimpa. ²⁵ Edæ, Wængongui botō imote āninque, Bitō idægoidi inānite ō ænte māobi wadæ gocædānimpa, ante do angā ēñentabopa, ante do ēñeningā inte Mōitee wodi, Idægoidi adobaī ante ēñente pōnencædānimpa, ante pōnente cæyongā tōmēnāni wæætē māninō ante ēñēnāmāi ingadānimpa. ²⁶ Mǎnōmāi i īninque Mōitee wodi iimō ate ponte ayongā idægoda wæætēdō wæætē cæda adinque, ‘Iñāna, mīna guidencaya incæ wacā ingante quimæ wēnæ wēnæ cæte quēwēmīnaa.’ ²⁷ Ante, Guēa waa waadete quēwencædaimpa, ante cæyongā adocanque tōmengā guidengā ingante nē wēnæ wēnæ cædingā guiquēnē Mōitee wodi ingante bæ tadinque angantapa. ‘Iñæmpa, Bitō mōnitō awēnē inōmi imipa, ante, Nē apænte āmi imipa, ante æcānō bitō imite nē ānāi. ²⁸ Edæ Equito ingante iimō bitō wænōmi bai ñowoōnæ adobaī botō imote wænnoncæte ante pōnēmi awædō.’ ²⁹ Angā ēñente wædinque Mōitee wæætē wodii wīnongacāimpa. Wodii wīnonte wabæca Māadiāmæ gote wadāni ōmæ quēwēninque wēñæna mēnaa wæmpocā bagacāimpa.”

³⁰ Ante apænedinque Etebā godōmenque awēnēidi inānite iimāi ante apænecantapa.

“Ayæ wæætē coadenta wadepo go ate Mōitee wodi ōnōmæca cægōninque onquiyabo Tinaiquidi gāmænō gote dadi ēmænte ayongā ocāñequiwæ gonga bæcōyōmō Wængongui anquedo ponte a ongongā agacāimpa. ³¹ Ate wædinque Mōitee wodi, Quīnō bai inte bæco ante botō wīmonte bai aboo, ante acæte ante pōnōmenque pōñongante mōnō Awēnē tōmengā ingante iimāi ante apænegacāimpa. ³² ‘Bitō wæmæidi Wængonguimo inōmo inte botō Abadāō wodi Itæca wodi Aacobo wodi Wængonguimo inōmo imopa.’ Ante apæncā ēñente wædinque Mōitee wodi do do wāate guiñente wædinque, Wīi āinente awædō, ante cægacāimpa. ³³ Mǎnōmāi cæyongante mōnō Awēnē wæætē, ‘Bitō næ gongænte ongōñōmō botō adoyōmō ongōmo beyænque onguipō tæiyæ wæmō impa, ante pōnēninque bitō awæncata gā tadōwæe āmpa. ³⁴ Botō edæ cōwā adinque, Botō quīnāni inānite equitoidi æbānō wēnæ wēnæ cædāni, ante do abopa. Tömēnāni caate ō ō wædāni do ēñente wædinque botō, Nīmpo cæbo ate abæ tawænte gocædānimpa, ante wææ pōmo imopa. Nōwo iñōmō

edæ ægodōe. Botō, Equitobæ gocæbiimpa, ante bitō ìmite adodō da godōmo gocæbiimpa, ante Wængonguī Mōitee wodi ingante angacāimpa.”

³⁵ Ante apænedinque Etebā iūmaī ante godōmenque apænecantapa. “Adocā Mōitee ingante pīninqe idægoidi doyedē, ‘Īnæmpa, Bitō mōnitō awēnē ĩnōmi ĩmpa, Nē apænte ānōmi ĩmpa, ante æcānō bitō ìmite nē ānai,’ ante ānōnāimpa. Nōwo ĩñōmō Wængonguī anquedo ocāñequi ĩñōmō pōninque tōmēnāni nāni nē pīngaingā adocā Mōitee ingante, Bitō idægoidi awēnē bacæbiimpa, angacāimpa. Bitō tōmēnāni ĩnānite ō æninque ænte māobi abæ tawænte gocādānimpa, ante cædinque Wængonguī bitō ìmite da godongā gocæbiimpa, ante Wængonguī beyæ apænedinque Wængonguī anquedo angacāimpa. ³⁶ Mōitee ĩñōmō, Ate pōnencādānimpa, ante mā cædinque ayæ Wængonguī tōnō bamōnengæ nanguī cædinque idægoidi ĩnānite ænte māocā gogadānimpa. Equitobæ ěmō cæte wadæ pōninque gāwapæntibæ Opatawæmæ yæwedecapæ pō ongōninque adocā Mōitee mantacā ĩmæmāa pongadānimpa. Ōnōmæca ta pōninque coadenta wadepo ganca cægōñōnāni tōmengā, Ate pōnencādānimpa, ante mā cædinque bamōnengæ nanguī cægacāimpa,” ante Etebā wodi apænecantapa.

³⁷ Ayæ, “Adocā Mōitee, Idægoidi ěñēedāni. Botō Wængonguī beyæ nē apænebo ĩmo baī wacā edæ mīnitō tōññacā incæ adobaī edæ Wængonguī beyæ nē apænecā bacæcāimpa. Tōmengā ponte apænecā ěñēninque mīnitō tōmengā ingante ædæmō ěñente cæcæmīnimpa, ante Mōitee wodi apænegacāimpa. ³⁸ Godongāmæ nāni Wængonguī ingante apæneincabo tōnō Mōitee wodi ōnōmæca cægōnongāimpa. Mōnō mæmæšidi tōnō cægōñōnāni Wængonguī anquedo wēēñēdē Tīnaiquidi nē ponte āningā incæ adocā tōnō Mōitee wodi ōnōmæca cægōnongāimpa. Māññēdē mōnō ĩmonte ante pōnō cædinque Wængonguī, Mōitee ěñēmi, angacāimpa. Īncayæ quēwenguīnāni ěñente quēwencādānimpa, ante cædinque botō, Mīnitō cæte quēwenguīmīni, ante apænebo ěñēninque bitō adodō ante yewæmoncæbiimpa, ante apænegacāimpa,” ante Etebā apænecantapa.

³⁹ Ayæ, “Mōitee wodi mānōmaī cæyongante mōnō wæmæšidi guiquēnē ěñēnāmaī ĩnāni ĩnte tōmengā ingante Baa āninque Equitobæ mōnō adodō gocæimpa, ante ōnōwēnenque pōnente wægadānimpa. ⁴⁰ Mānōmaī nē wædōnāni ĩnte tōmēnāni wæætē Aadōō wodi ingante apænedinque, ‘Aadōō ěñēmi. Māningā, Equitobæ nē ěmō cæte mōnō ĩmonte māmōningā Mōitee wodi ædōnō gote dæ angāā, ante adāmaī ĩmōnīpa cæbii. Wængonguīidi ĩnānīpa, ante mōnō ĩmonte nē tōō æmænte ænte goquīnāni ante bitō badōmi æmōnie.’ ⁴¹ Āninque māññēdē, Mōnō wængonguī ĩngampa, ante cædinque tōmēnāni wagada wē baī badongadānimpa. Ayæ, Mōnō wængonguī quī ĩmpa, ante cædinque cænīnāni wænōninque baō tōmēnāni nāni badōinca gāānē ænte māmō ñō cædinque ōnompoca nāni badōinca adinque ææmæ baī cæte togadānimpa. ⁴² Mānōmaī cædāni ate wædinque Wængonguī nāemæ, Pōnē cæmīniyaa, ante pīngacāimpa. Ayæ, Īnāni ōōnædē owocooque ante, Wængonguīidi ĩnānīpa, ante oda cæcædānīmpa, ante cædinque idægoidi ĩnānite ĩmpo cædinque dadi ěmæninque aadāmaī ĩngacāimpa. Edæ māññō tōmēnāni nāni cægainō baī ante pōnente yewæmōninque wacā wantæpiyæ ate Wængonguī beyæ iūmaī ante yewæmongacāimpa.

‘Idægoidi ěñēedāni. Ōnōmæca gote coadenta wadepo ganca cægōninque mīnitō,

Wængonguī quī, ante pōnoncæte ante cædinque cænināni wænōninque baō
tōnō mǎincoo ænte pō ænte pō cæmīni incæte
dicæ botō imote ante pōnēninque pōnōmīni æntawogaa.

⁴³ Īnæmpa, Mōnō wængonguīdi ĩñōnānite ædæ wæænte apænegæimpa,
ante cædinque mīnitō mīni badōninca adoca Mōnoco mīni ānonca beyæ
æmōntaicō oncō næænte godinque wocæ wocæ cædōmīni awædō.
Ayæ waca, Mōni wængonguī Adempaō nēmō bai owocæimpa, ante mīni
badōninca næænte æmōnga cō cæ cō cæ cædōmīnimpā tōō.
Ante adinque Wængonguī, Mānōmaī cæmīni beyæ botō mīnitō imīnite
Babidōnia ganca da godōninque godōmenque gobæ da godōmo gocæmīnimpā,
angampa, ante yewæmōngatimpā.” Ante apænedinque Etebā, Mōnō
wæmæīdi ĩmaī cægadānimpā, ante godōmenque apænegantapa.

⁴⁴ “Wængonguī doyedē Mōitee wodi ingante apænedinque, Mīnitō
æmōntaicō mænonte ate botō wææ ante yewæmōninca cō cæte
mancæmīnimpā. ĩmaī mænoncæmīnimpā, ante odōmongā adinque Mōitee
wodi wæætē mōnō wæmæīdi ĩnānite odōmongā ate ēñēninque tōmēnāni
wæætē Wængonguī nānō odōmōnō bai mānōmaīnonque æmōntaicō
mænongadānimpā. Mānōmaī mænonte ate dica wææ ante Wængonguī
nānō yewæmōngainca incæ mǎnincōnē cō cægadānimpā. Ayæ ōnōmæca
wayōmō wayōmō gocæte ante æmōntaicō capote mongænte māo wocæ
wocæ cægadānimpā. ⁴⁵ Ayæ wadāni mānōmæ nē quēwēnāni ĩñōnānite
Wængonguī wido cæcā ate mōnō wæmæīdi Ootowee wodi mīñæ ponte
ōmæ æninque Wængonguī oncō æmōntaicō nāni ænte mongængaincō
māmō wodongadānimpā. Wodōnāni ate Awēnē Dabii wodi nānō ēñate
quēwenguimpoga mǎnincō æmōntaicō incæ ayæ a owogatimpā. ⁴⁶ Awēnē
Dabii ingante Wængonguī pōnō waa agacāimpā. ĩninque Dabii wæætē
Wængonguī ingante apænedinque, Bitō Aacobo wodi Wængonguī ĩnōmi
īmipa, ante adinque botō, Bitō quēwenguīñōmō, ante oncō āmi mænonguīmo,
āñongante Wængonguī Baa angacāimpā. ⁴⁷ Wæætē Tadōmōō wodi Wængonguī
beyæ nē oncō mænongā ingacāimpā. ⁴⁸ Mānōmaī cægaināni incæte
Wængonguī ĩñōmō edæ æmōnga pōni nē ongongā inte waocā nānō ōnompoca
mænōnincōnē ædō cæte pōnō Ao ante guīte quēwenguingāā. Mānōmaīnō
ante pōnente wædinque Wængonguī beyæ nē apænegaingā ĩmaī ante
apænegacāimpā.

⁴⁹ ‘Botō Nē Tæiyæ Awēnē ĩnōmo ĩñōmote ōōnæ incæ botō Awēnē tæ contaquī
bai impa,

inguipoga wæætē botō ōnōwa podōwate quī bai impa.
Mānōmaī nē ongōmo beyæ mīnitō botō oncō ante ædō cæte mænonguīmīni.
Inguipoga æcōnēnō guīdinque guēmanguīmoo, ante Wængonguī angampa.

⁵⁰ Botō ĩnæmpa tōmēmo ōnompoca tōmāā nē badongaimo ĩnōmo ĩmopa,
ante Wængonguī Awēnē angampa, ante wacā yewæmōngacāimpā.”

⁵¹ Ante apænedinque Etebā godōmenque ĩmaī ante apænegantapa. “Ñōwo
ēñēdāni. Mīnitō mīmō ōmædē ĩmīni inte wīi pōnencædō. Ōnōmoncaque
ēñēninque wīi ædæmō ēñēmīni ĩmīni awædō. Mīnitō wæmæīdi nāni cægainō
ante ēñēmīnitawo. ĩnæmpa tōmēnāni nāni cægāi bai adobaī cædinque mīnitō
Wængonguī Tæiyæ Wæmō Ōnōwoca ingante Baa āninque cōwē wææ āmīnīpa
tōō. ⁵² Mīnitō wæmæīdi doyedē Wængonguī beyæ nē apænegaināni ĩnānite
togænte pāninque adocanque ingante ata cæpodāmaī inte tōmānāni ĩnānite
togænte pangadānimpā. Edæ nē apænedāni, Nē nō entawēnongā inte

ponguingā ingampa, ante apæneyōnānite tōmēnāni inānite do wænōnāni wængadānimpa. Nōwo iñōmō tōmēnāni nāni, Ponguingā, angaingā incæ do pongā adinque mīnitō godō wænōmīnitapa tōō. ⁵³ Edæ, Īmaī cæedāni, ante Wængonguī wææ angampa, ante Wængonguī anquedoidi ānāni ēñēninque yewæmōnāni ate mīnitō nē adōmīni incæ Baa āninque ēñēnāmaī cōwē cæmīnīpa tōō,” ante Etebā ĩnque apænecantapa.

Etebā ingante wænōnāni wængampa

⁵⁴ Mānī awēnēdi guiquēnē Etebā nānō apænedō ante ēñēnte wædinque āīnāni badinque бага wentoquēnē wentoquēnē angate pīīnānitapa. ⁵⁵ Etebā iñōmō Wængonguī Tæiyæ Waēmō Ōnōwoca ingante ædæmō ēwocadinque ōōnædē inō æmō adinque Wængonguī nīāo apāite bai nānō ēmōnō acantapa. Ayæ nē Waocā ēñagaingā inte Itota incæ Wængonguī tōmēmæ inō adiyæ ongongā acantapa. ⁵⁶ Adinque,

—Badogaa, tōnædē wi ænete bai ba abopa. Waocā nē ēñagaingā incæ Wængonguī tōmēmæ inō adiyæ ongongā abopa.

⁵⁷ Ante apæneçā ēñēnte wædinque tōmēnāni pīinte Yæ yæ āninque ēñēnāmaī cæcæte ante ōnōmonca nī māmoncate cædānitapa. Godongāmæ pīinte quingæ tōmengā weca pogodo pōninque, ⁵⁸ tōmengā ingante bæi ongōninque tōmēnāni nāni quēwēñōmō yabæque ænte māo dicaca tæi tacacæ cædānitapa. Tōmengā æbānō angāā, ante ēnēnīnāni inte nē apænedāni iñōmō edæ tacacæ cædinque tōmēnāni weocōo yabæcooque gā tadōngate tæacæ æmæwo pædingā Taodo nāni ānongā ōnōwaca inō nō cædōnānīpa. ⁵⁹ Dicaca tacayōnāni Etebā iñōmō Wængonguī ingante apænedinque, “Awēnē Itota, bitō botō ōnōwoca æncæbiīpa.” ⁶⁰ Ante da guicapodinque yedæ āninque, “Awēnē, tōmēnāni nāni wēnæ wēnæ cædōnō ante ee ae,” āninque edæ mō nōnte bai wængacāīpa.

8

¹ Etebā wodi ingante wænōncæte ante dicaca tacadāni adinque Taodo guiquēnē, Waa wænōmīni wængampa, ante Ao ante ongongacāīpa.

Nē godongāmæ pōnēnāni inānite Taodo togænte pangā

Mānīōnæ incæ mā togænte pāninque Eedotadēē iñōmō Codito ingante nāni nē godongāmæ pōnencabo inānite godōmenque nanguī togænte pīinte pangadānīpa. Ate wædinque Itota nānō nē da godongāīnānique godāmaī ongōñōnāni wadāni iñōmō nāwæ wodīi wīnōninque Oodeabæ Tāmadiabæ æmæñō æmæñō gogadānīpa. ² Mānī Etebā wodi ingante æmæwo wænōnāni wængā ate Wængonguī ingante nē waa adāni incæ Ca ca wædinque māo daga wenānitapa. ³ Taodo guiquēnē, Itota ingante nē pōnēnāni inānite wido cæcæīpa, ante nanguī wēnæ wēnæ cædinque wacōnē pō guīi wacōnē pō guīi cædinque onguīñānāni tōnō onquiyæñāni inānite bæi ongote wēā māo tee mōnegadānīpa.

Tāmadiabæ godinque Pedipe apæneçā ēñēnānīpa

⁴ Mānī nē wodīi wīnōnāni iñōmō ædōmē godinque Codito ingantedō ante cōwē watapæ apænedāni ēñēnōnānīpa. ⁵ Īnīque Pedipe iñōmō Tāmadiā nāni nanguī quēwēñōmō gote apænedinque, Mōnō Codito æbānō do ponte cægacāī, ante apæneçā ēñēnānitapa. ⁶ Mānōmaīnō ante apænedinque tōmengā, Ate pōnencædānīpa, ante mā cæcā adinque nanguī ĩnāni adoyōmō pōnēninque, Mōnō ēñengæīpa, ante cædānitapa. ⁷ Wadāni nanguī ĩnāni wēnæidi wentamō ēwocadāni tōnō quēwēñāni adinque Pedipe angā ēñēninque wēnæidi incæ Yæ āninque dæ tao godāni ate ōnōnānique badānitapa. Ayæ

cōmāināni incæ cabæināni incæ tæiyænāni inānite Pedipe cæcā ate waa badānitapa. ⁸ Ante adinque māniñōmō quēwēnāni wæætē watapæ togadānimpā.

⁹ Wacā idō tōmengā ēmōwo Timōnō iñōmō tōmengā adoyōmō quēwēninque wēnæ tōnō wantæpiyæ cæcā inongāimpā. Ininque Tāmadiabæ quēwēnāni tōmānāni, Ēbānō nangui cæcā, ante guiñente wæyōnānite tōmengā, Nē idōmo inōmo inte botō iñōmō edæ nangui cæte beyæ ñæñæmo pōñi imo aedāni. ¹⁰ Angā ēñēninque awēñēidi incæ ōnōnānique incæ tōmānāni adoyōmō pōñēninque, “Wængongui nānō tæi piñænō bai entawēninque ingā idō iñōmō nē Tæi Piñænongā ingampa,” ante pōñēwēninque, Nē Ñænængā pōñi inongā ingampa, ante pemongadinque tōmengā apæneccā ate ædæmō ēñēnōnānimpā.

¹¹ Ayæ tōmengā wantæpiyæ wēnæ tōnō wæætē wæætē mā cæcā adinque tōmēnāni, Tōmengā ingante mōnō ēñengæimpā, ante tee empo tee empo godōnānimpā. ¹² Mānōmāi cæyōnānite Pedipe guiquēñē, Wængongui Awēñē Odeye nempo mōnō quēwengæimpā, ante watapæ apæneccā ēñēnānitapa. Ayæ, Mōnō Codito iñōmō tōmengā ēmōwo Itota ēmongampa, ante apænebo ēñēdāni. Ante apæneccā ēñēninque onguiñænāni incæ onquiyænāni incæ wede pōñēninque æpænē guiddānitapa. ¹³ Ininque Timōnō incæ adobai pōñēninque æpænē guiddinque Pedipe miñæ tee empo tee empo gocantapa. Pedipe, Ate pōñēncædānimpā, ante mā cædinque tæi piñænte nangui cæcā ate wædinque Timōnō adocā cōwē guiñente wægacāimpā.

¹⁴ Ininque, Tāmadiabæ quēwēnāni Wængongui nānō apænedō ante ēñēninque do Ao ānānimpā, ante Eedotadēē ponte tedeyōnānite Itota tōmengā nānō da godongaināni incæ do ēñēnānitapa. Ēñēninque Pegodo tōnō Wāō inate Tāmadiabæ da godōnāni godatapa. ¹⁵ Godinque Tāmadiabæ pōninque tæcæ mā pōñēnāni beyæ ante tōmēna Wængongui ingante iimāi ante apænedatapa. Wængongui ēñēmi. Bitō Tæiyæ Waēmō Ōnōwoca ingante tōmēnāniya da pōñōmi pō guicā ate ēwocacædānimpā, āmōnapa. ¹⁶ Edæ Awēñē Itota ēmōwo apænedinque tōmēnāni mā æpænē guiyōnānite bitō Tæiyæ Waēmō Ōnōwoca tōmēnāniya wææ guiddāmāi ingantapa cæbii. Nōwo āmi pō guicæcāimpā. ¹⁷ Ante apænedinque Pegodo tōnō Wāō tōmēnāniya pōñō gampote apæneyōna Wængongui Tæiyæ Waēmō Ōnōwoca pō tōmēnāni baonga guicantapa.

¹⁸ Mānōmāi pōñō gampoyōna Wængongui Tæiyæ Waēmō Ōnōwoca tōmēnāniya pō guicā ate wædinque Timōnō guiquēñē tōmēnāni godonte æinta pædæ pōñōninque, ¹⁹ tōmēna inate,

—Mīnatō bai botō adobai nē cæbo bacæboimpā āmopa. Pōñō cæmīna ate botō nē cæbo badinque wadāniya pōñō gampobo ate Wængongui Ōnōwoca adobai pō guicæcāimpā, āmopa.

²⁰ Āñongante Pegodo,

—Bitō mīni godonte æintaque pædæ godōninque, Wængongui Ōnōwoca nānō da pōñōnongā ingante æncæboimpā, ante pōñēwēmii. Edæ tōmēmi tiguitamonque nææninque edæ bitō ōmæe ēwenguinque gobāwe. ²¹ Iñæmpā, Wængongui Ōnōwoca nānō da pōñōnongā ingante æninque godongāmæ cæcæboimpā, āmitawoo. Wængongui ayongā nō pōñente cæbipa ænguimii. Edæ mōnatō tōnō ædō cæte cæquimii. ²² Nōwo edæ māñinō bitō wiwa cædinō ante wæwente pōñēninque ñimpo cæe. Ayæ mōnitō Awēñē ingante apænebi ēñēninque tōmengā wabānō pōñō waadete cædinque mīmōno bitō pōñēwēnō

ante wadæ cædinqe ñimpo cæbaingampa. ²³ Bitō nāmā beyænque ante nē æinēmi inte bitō mīmōnē guinæmæ entawente bai quēwēmipa. Ayæ bitō tōmēmi wīwa cædō beyænque ñā cæyænte bai quēwēmipa, ante awædō.

²⁴ Angā ēñēninque Timōnō wæætē,

—Æ āmi awædō, āninque Pegodo ingante, Botō mīnatō ānō bai wīi bacæboimpa, ante cædinqe mīnatō botō beyæ Wængonguī ingante apæneedā, angantapa.

²⁵ Ayæ Wāō tōnō Pegodo iñōmō, Itota incæ mōnō Codito ingaingā ingampa, ante māñiñōmō quēwēnāni inānite mōnō Awēnē nānō ānō ante apæneda ēñēnānitapa. Īnque apænedinque adodō Eedotadēē gocæte ante wadæ gote Tāmadiabæ godinque tōmēna wayōmō wayōmō māo wædænque quēwēnāni weca pō pō cædinqe nangui ināni inānite apænedinque Codito ingantedō ante watapæ apæneda ēñēnānitapa.

Etiopæ awēnē ingante Pedipe bee tengampa

²⁶ Māningā Pedipe ingante anquedo ayæ ate ponte āninque, “Bitō ægodōe, Eedotadēē wæi Gata goquīnō pædæ taoquinque betamonca gocæbiimpa,” angantapa. Māñinō önōmæcaque wæidō ĩnompā. ²⁷ Māñōmāinō angā ēñēninque Pedipe ængæ gantidinque wadæ godinque anquedo nānō āninonque cægonte ayongā onguīnængā Etiopæ quēwēningā pō eyepæ bee tengā acantapa. Īngā iñōmō Etiopæ tæiyæ awēnē onquiyængā Cantate beyæ tōmēnāni godonte æinta nē aacā ĩnongā inte ñæñæ awēnē ĩnongāimpa. Tōmēngā ñōwo Wængonguī weca ædæ wææninque watapæ apænecæte ante Eedotadēē æidingā inte ocæ ēmænte pōninque Pedipe ingante eyepæ māmō bee tengantapa. ²⁸ Īngā iñōmō cabayo nānō wēā pōnoncadea æi tæ contate ocæ ēmænte pōninque Itaiya wodi Wængonguī beyæ nē apænegaingā nānō yewæmongainta næænte a congantapa.

²⁹ Māñōmāi a conte pōñongante Pedipe ingante Wængonguī Önōwoca, “Goe, Īi cabayo nānō wēā pōnoncade eyepæ godinque guēa goe,” angantapa. ³⁰ Angā ēñēninque Pedipe pogodo godinque obo ponte ēñēñongā Etiopæ awēnē iñōmō Itaiya wodi nānō Wængonguī beyæ yewæmongainta adinque apænecā ēñēninque,

—Bitō ate apænedō ante ædæmō ēñēmitawo.

³¹ Āñongante,

—Īñæmpa ēñēmogaa. Botō ĩmote apænedānīpa ēñenguīmoo.

Ante apænedinque Pedipe ingante, Bitō botō weca ææ guīte tæ contae, angā ææ guī tæ contacantapa.

³² Māñinta Wængonguī angā ēñente nāni yewæmongainta Etiopæ awēnē nānō aintaa ĩlmaī ante yewæmonte ongōñōnīmpā.

“Codotodo ingante wæñongæimpa, ante bæi ongonte æninque tōō godonte bai cædinqe

tōmēngā ingante adobaī wænoncæte ante bæi ongonte ænte godānitapa.

Obegaidi ocaguīncoo ēō toyōnāni wædāmaī pæ wēēnecā bai

tōmēngā adobaī wædāmaī inte pæ wēēnecantapa.

³³ Pīinte ānāni wæyongante nē apænte anguēñēnāni incæ, Pangæimpa, ante cædinqe nōingā ante ānāmaī ĩnānitapa.

Tōmēngā ingante æmæwo wæñōñāni wængaingā ĩñongante,

Tōmēngā nānō pæñāni, ante ædō cæte apænequīi.”

³⁴ Ante nāni yewæmongainō adingā inte Etiopæ awēnē ñōwo Pedipe ingante,

—Apænebi eñēmoe. Nē Wængongui beyæ apænegaingä iñömö æcänö ingante ante nē apænecäi. Tömengä nämä ingante ante yewæmongantawo. Edæ wacä ingante ante yewæmongantawo, ante eñencæte ante wæbopa.

³⁵ Ante añongante Pedipe iñömö Etiopæ awënë nänö adinta adotaa ate apænedinque ayæ wataa wataa adinque Itota ingantedö ante watapæ apænecä eñengantapa. ³⁶ Apæneyongä taadö godinque wapæ ganca pönatapa. Equitobæ awënë mänimæ adinque Pedipe ingante, Waa ae. Iñömö gäwapæ impa. Apænë guiddamai inguimo, ämitawoo.

³⁷ Angä eñëninque,

—Bitö mīmōno wede pönemi ate botö Ao ämaimopa, angantapa. Añongante,

—Ao botö, Itota Codito näwangä Wængongui Wengä inongä ingampa, ante wede pönëmopa.

³⁸ Äninque Etiopæ awënë angä cabayo næ gongæ ate Pedipe tönö guëa æpænë ti wææna ate Pedipe tömengä ingante æpænë guidongä guicantapa. ³⁹ Ayæ æpænë guite ate tömengä tao gongæñongä Wængongui Awënë Önöwoca Pedipe ingante iñæ æænonthe ö ængä. Ate æmæwo adinque Etiopæ awënë watapæ todirque oncönë goinö gocantapa. ⁴⁰ Pedipe guiquënë Atota iñömö iñontobæ a ongöninque godömenque wadani nāni quëwëñömö go apænedinque wayömö nāni quëwëñömö go apænedinque Tetadea ganca godinque Codito ingantedö ante watapæ apænecä eñengadänimpa.

9

Awënë Itota ingante Taodo acampa (Nāni Cægainö 22.6-16, 26.12-18)

¹ Taodo guiquënë mönö Awënë ingante nē tee empote quëwënāni inänite piininque, Wænongæimpa, ante bæi ongö bæi ongö cædinque cöwë ñimpo cædāmai ingacäimpa. Nöwo godömenque cæcæte ante Wængongui oncönë gote nē godongä ñænængä pönö inongä ingante apænedinque, ² Awënë eñëmi, angantapa. Bitö Ao ämi ininque botö Daämaco nāni quëwëñömö gote ayömo, Onguiñænāni incæ onquiyænāni incæ æcämenque Itota Taadö ante nē godāni ināni, ante adinque tömënāni inänite bæi ongonte goti winte Eedotadë ænte pömaimopa. Ininque bitö, Taodo mänömai cæcæcäimpa, ante botö beyæ cadota ante yewæmöninque pædæ pönömi æninque botö wæætë Daämaco iñömö mäo oodeoidi odömöincönë awënëidi weca gote pædæ godömo ænte adinque tömënāni Ao añönāni mänömai cæbaimopa. ³ Añongä awënë Ao ante yewæmöninque pædæ pönongä æninque Taodo Daämaco obo gote ayongante iñontobæ öönædë inö näinte bai cædinque tömengä nänö ongöñömö tömäo guinæ gongæ. ⁴ Adinque Taodo guidömëmæ tæ go wæængantapa. Ayæ wæænte öñöñongante tömengä ingante, “Taodo. Taodo. Quinante botö imote togænte pämi.”

⁵ Angä eñente wædinque Taodo wæætë, “Awënë, æmömidö inömi imii.” Ante eñëñongä, “Botö Itotabo inömo inte bitö nē togænte pänimo mänimotö imopa cæbii. Iñæmpa wagada päintoca bai bitö nämä iñæ æwate bai cædinque cowate bai edæ caate bai wæbipa töö.” ⁶ Mänömai apænecä eñëninque Taodo ancai guinente do do wäadinque, “Awënë, æbänö cæquimo ämii.” Añongante mönö Awënë wæætë apænecantapa. “Bitö ængæ gantidnque ināni nāni quëwëñömö goe. Botö, Taodo iimai cæcæcäimpa, ante wacä ingante Daämaco iñömö nē quëwengä ingante do apænebo eñengampa cæbii. Bitö

Daämaco iñömö gote ongöñömi tömengä wæætë bitö ìmite apæneçä eñente cæcæbiimpa.”

7 Taodo tönö godongämæ godäni guiquënë waocä ingante adämaï inäni incæte, Önonque tempa, ante pönëninque ançai guññente wædänitapa. 8 Taodo iñömö onguipoga ayæ a öñongä inte ængæ gantidinqe awinca adämaï ingä adinque wadäni tömengä ingante önonpo bæi ongöñinque Daämaco ganca ænte mäodäni gocantapa. 9 Mäniñömö gote ongöñinque tömengä adämaï ingöngä inte cænämaï bedämaï meönaa go adoönæque iñonte wæwengacäimpa.

10 Ayæ wacä ne pönengä Änäniya Daämaco iñömö quëwengä inte mä pöni wüimonte bai ayongä mönö Awënë, “Änäniya,” angä eñëninque, “Awënë, botö eñëe cömopa.”

11 Äñongä mönö Awënë wæætë, “Taodo ñöwo Wængongui ingante apæneçampa cæbii. Bitö ængæ gantidinqe taadö näni Töinö änonö godinque Codaa oncönë gote äninque, Tadoto ne quëwëningä Taodo iñömö owocantawo, ante acæbiimpa. 12 Wængongui ingante ñöwo apænedinque ate bai ayongä wacä Änäniya pö guidinque, Ñöwo edonque acæbiimpa, ante gampocampa, ante ate bai Taodo wæcantapa cæbii. Tömengä wüimonte bai adinque nänö wædö bai cædinque bitö ñöwo gote cæcæbiimpa.”

13 Angä eñente wædinque Änäniya wæætë, “Awënë iñæmpa botö, Mäningä Taodo iñömö quïnö bai onguiñængä ingää, ante nanguï tededäni do eñëmopa. Ayæ, Eedotadëe iñömö tömengä bitö quïnäni inänite wënæ wënæ cæcampa, ante tededäni eñente wæbopa. 14 Ayæ ne godönäni ñænænäni Ao ante yewæmönäni æninque tömengä iñæmpa ne angä badinque bitö ëmöwo ante ne apænemöni iñömönite bæi ongonte tee möneçæte ante pongampa cæbii.”

15 Ante wæyongante mönö Awënë wæætë Änäniya ingante, “Iñgä ingante do apænte æmo apa änewëe. Tömengä ingante, Bitö wabæca gote wadäni inänite botö ëmöwo ante apænedinque ayæ tömënäni awëñëidi inänite botö ëmöwo ante apænedinque idægoidi inänite adobaï botö ëmöwo apænebi eññecädänimpa, ante tömengä ingante do antabopa cæbii. Ñöwo tömengä weca gobæwe. 16 Ayæ botö ne æningä inte tömengä æbänö botö ëmöwo beyæ nanguï caate wæquënegä ingää, ante odömömo ate eññecäcäimpa.”

17 Angä eñëninque Taodo nänö owoyömo go guidinque Änäniya tömengä ingante gampomöninque,

—Taodo botö tönïñabi eñëmi. Bitö taadö pöninque Itota ingante abitawo. Tömengä iñömö ne Awënë inongä inte botö imote apæneçantapa. Bitö Taodo weca godinque cæbi ate tömengä wëenëñedë nänö ëmönö bai adinque Wængongui Tæiyæ Waëmö Önöwoca ingante da pönömo æninque ëwocacæcäimpa, ante mönö Awënë angä eñëninque botö bitö weca pontabopa.

18 Ante Änäniya tæcæ apæneyongä Taodo tömentagæ nänö ëmönitagæ tæ wæænte iñontobæ edonque acantapa. Ayæ ængæ gantiyongante Änäniya tömengä ingante apæñë guidongä guicantapa. 19 Ayæ cænguï cæninque tömengä baö wææpote tæï piñængä bacantapa. Ayæ Daämaco iñömö Itota ingante ne tee empote quëwënäni weca godömenque tæöñæ quëwengantapa.

Daämaco iñömö Taodo apæneçä eñënänipa

20 Mäniñömö quëwëninque Taodo do ooedeidi odömöincönë go guï go guï cædinque, Itota Cödito näwangä Wængongui Wengä ingampa, ante apæneçä eñënänitapa. 21 Mänömaï apæneçä eñëninque tömengä ingante ne eñënäni iñömö ançai guññëninque, “Æ. Iñgä adocä Eedotadëe iñömö Itota ëmöwo ante

nē apænedāni inānite nē wido cæcā īmaingampa. Tömengā adocā nē wido cæcā incæ adodāni inānite bæi ongonte æninque, Wængongui qui, ante nē godōnāni ñænānāni weca māo pædæ godoncæte ante ñowo iñōmō pōninque cæcā awædō. Edæ adocā ingānō anguenē.”

²² Ante wædāni incæte Taodo godōmenque tæi piñænte entawēninque īmaī ante apænecantapa. Awēnē bacæcāimpa, ante Wængongui nānō nē gao cæcadongā iñōmō mōnō Codito iñōmō edæ Itota adocā inongā ingampa, ante, Nāwangā impa, ante nōingā pōni apænecā. Adinque Oodeoidi Daāmaco iñōmō quēwēnāni guiquēnē, Ædō cæte wadō anguii, ante wægadānimpa.

Oodeoidi wænoncæ cæyōnāni Taodo aamō cæte gocampa

²³ Īninque tæōnæ go ate oodeoidi godongāmæ pōnente Ao āninque, Taodo ingante wængongæimpa, ante cædānitapa. ²⁴ Mānōmaī ante cæyōnāni Taodo mānīnō nāni ānīnō do ēñgantapa. Tömēnāni guiquēnē, Mōnō quēwēñōmō wææ cæinēmō tacā ate wænōmō wæncæcāimpa, ante itædē woyowotæ wææ wānōnānitapa. ²⁵ Wææ wānōñōnāni tōmengā ingante nē tee empote quēwēnāni wæætē yabæ wææ cæte iñōmō Taodo ingante woyowotæ mæi ayacōmoyāa inō otodē pædæ wæænōnāni ti wæænte gocantapa.

Taodo Eedotadēē ponte apænecampa

²⁶ Mānōmaī godinque Taodo Eedotadēē pōninque, Itota ingante nē tee empote quēwēnāni weca gobote, ante pongā. Adinque tōmānāni, Nāwangā Itota ingante nē pōngēngā ingantawogaa, ante guiñente awædō, ante pōnēninque wææ adānitapa. ²⁷ Bedēnabee guiquēnē Taodo ingante bæi ongōmænte æninque Itota nānō nē da godongaināni weca ænte māmongā pongantapa. Ayæ tōmēnāni inānite Bedēnabee apænecantapa. Taodo ñowo taadō godinque mōnō Awēnē ingante dobæ acāimpa. Mōnō Awēnē tōmengā ingante do apænecantapa. Daāmaco gote quēwēninque Itota emōwo ante tōmengā guiñēnāmaī apænedingā inte ñowo iñōmō pongā apa quēwēmīni. ²⁸ Bedēnabee mānōmaī angā ēñēninque Ao āñōnāni Taodo Eedotadēē iñōmō quēwēninque tao guiite ta tao guiite ta cædinque tōmēnāni tōnō godongāmæ cædinque mōnō Awēnē emōwo ante guiñēnedāmaī apænecantapa. ²⁹ Ayæ wadāni oodeoidi incæ guidiego tededō nē tededāni māniñōmō quēwēnōnānimpa. Īnāni inānite Pabodo mōnō Awēnē emōwo ante nanguī apænedinque wæætedō wæætē āñongante tōmēnāni wæætē wænoncæte ante cædānitapa. ³⁰ Mānōmaī cædānipa, ante ēñente wædinque tōmengā nānō tōniñadāni bai badināni inte pancadāniya Taodo ingante Tetadea ganca māo emōninque, Godōmenque Tadoto iñōmō wodii winonte goe, ante da godōnāni gogacāimpa.

³¹ Īninque Codito ingante nāni godongāmæ pōnencabo incæ Oodeabæ Gadideabæ Tāmadiabæ tōmāo quēwēninque māniñedē wædāmaī inte guēmānānitapa. Ayæ tæi piñænte entawēnāni badānitapa. Ayæ Wængongui Tæiyæ Waēmō Ōnōwoca ædæmō apænecā ate tōmēnāni wampo pōnēnāni badinque yebænte nanguī ināni bagadānimpa. Ayæ mōnō Awēnē ingante ædō cæte ēñēnāmaī cæquīi, ante guiñente wægadānimpa.

Ēnea ingante Pegodo angā waa bacampa

³² Mānōmaī tōmēnāni nāni pōnencabo nanguī yebænte bayōnāni Pegodo guiquēnē wayōmō wayōmō wodo tebæ wodo tebæ godinque Dida iñōmō pōninque mōnō Awēnē quīnāni weca ēñacæ pongantapa. ³³ Māniñōmō ponte apæneyongā wacā tōmengā emōwo Ēnea do ocho wadepo ganca mōimoga cōmāingā inte nē ongōningā ingā. ³⁴ Adinque Pegodo tōmengā ingante,

—Ēnea ēñēmi. Itota Codito cæcā ate waa babipa cæbii. Ængæ gantidinqe tōmēmi mōimo nī capoe.

Āñongā Ēnea īñōmō do edæ ængæ ganticā. ³⁵ Adinque Dida quēwēnāni tōnō Tadōō quēwēnāni tōnō wēnē nāni pōnēwengainō ante ēmō cædinque Wængonguī Awēnē gāmænō pōnānitapa.

Dodoca wodi ingante Pegodo angā nāni ōmæmongampa

³⁶ Māniñedē wacā onquiyængā nē pōnengā Tabita īñōmō Cope nāni quēwēñōmō quēwēnongāimpa. Tōmengā ēmōwo guidiego tededō Dodoca incæ mōnō tededō Cowāñe ēmongā īnongāimpa. Tōmengā īñōmō nē waa cædongā inte ōmæpodāni wæwēnāni inānite nanguī waa cædongā inte Cope īñōmō quēwēnongāimpa. ³⁷ Tōmengā māniñedē nangæ badinque æmæwo wængā. Ate tōmengā baō īni æpæ āadēninque wænōmēnæcapaa mæi nō cædānitapa. ³⁸ Cope īñōmō quēwēninque Dida wīi gobæ impa, eyequeī impa. Mānōmaī beyæ, Pegodo Dida īñōmō ongongampa, ante tededāni ēñente wædinque Itota ingante do tee empote quēwēnāni īñōmō onguīñæna mēnaa inate da godōninque, Cope īñōmō gote Pegodo ingante, “Quingæ pōe, ante æda.”

³⁹ Ānāni gote āñete pōñōnate Pegodo godongāmæ pongā adinque tōmengā ingante wænōmēnæcapaa mæidāni guiite acantapa. Owæmpoīnāni godongāmæ pōninque doyæncōo tōnō yabæcōo Dodoca mīngā quēwengāñedē nānō badongaincōo odōmōninque Ca ca wædāni. ⁴⁰ Adinque Pegodo tōmānāni inānite angā tao godāni adinque da guicapote Wængonguī ingante apæncantapa. Ayæ dobæ wænte onguite a ōñongā gāmænō dadi ēmænte adinque,

—Tabita, ængæ gantibi āmo.

Āñongā Tabita wodi awinca wi æmōninque Pegodo ingante adinque ængæ gantite contacantapa. ⁴¹ Ængæ ganti contayongante tōmengā ōnompō bæi ongōninque Pegodo tōō æmængā ate ædæmō ængæ gantite adiyæ gongængantapa. Ayæ owæmpoīnāni tōnō mōnō Awēnē quīnāni inānite Pegodo aa pecā pō guīdāni ate mīngā ingā odōmongā adānitapa. ⁴² Īninque, Mōnō Awēnē mānōmaī cæcantapa, ante Cope īñōmō nāni quēwēñōmō tōmāo gote tededāni ēñēninque nanguī ināni mōnō Awēnē ingante nē pōnēnāni badānitapa. ⁴³ Pegodo māniñedē æmontai nē aminengā Timōnō weca owodinqe Cope īñōmō tæōnæ quēwengacāimpa.

10

Pegodo tōnō Codōnedio

¹ Tetadea nāni quēwēñōmō odōmāno tontadoidi Itadiaidi nāni ānoncabo inte quēwengadānīmpa. Īninque tontadoidi tiēē ganca nāni cabo tiēē ganca nāni cabo īñōnānite adocabodāni capitāō tōmengā ēmōwo Codōnedio ēmongacāimpa. ² Tōmengā nāni wencabo nāni owocabo owodinqe, Mōnō wadō pōnēñōmonte Wængonguī pangā wæcæ wæ, āninque Wængonguī nānō ānō ante ēñente quēwēnōnānīmpa. Ayæ pæ gompodāmaī inte Codōnedio, Ōmæpodāni wæwēnāni quī, ante pædæ godō pædæ godō cæcā ænōnānīmpa. Ayæ Wængonguī ingante ñimpo cædāmaī cōwē apænedongāimpa. ³ Tōmengā īñōmō ædæ wæicā ate mā pōni wīlmonite baī acantapa.

Edonque wīlmonite baī ayongante Wængonguī anquedo tōmengā weca pō guīdinqe, “Codōnedio bitō īmi.” ⁴ Angā wædinque Codōnedio tōmengā ingante cōwā adinque ancai guīñente wædinque, “Awēnē, æbānō ante āmii.

Āmi ēñēmoe.” Āñongante, “Bitō Wængonguī ingante nē apænebi imitawo, òmæpodāni wæwēnāni Inānite nē godōmi imitawo. Māninō bitō apænedō ante māninō bitō godōnō ante adinque bitō imite waa abopa, Wængonguī angampa, angantapa. ⁵ Nōwo wadāni Inānite āmi Cope iñōmō gote Timōnō Pegodo nāni ānongā ingante āñete poncædānimpa. ⁶ Adowo emōnongā Timōnō weca Timōnō Pegodo gāwapæntibæ wedeca owocampa. Māningā Timōnō æmontai nē aminēnongā ingampa.”

⁷ Ante apænedingā inte Wængonguī anquedo ingæ gocā adinque Codōnedio wæætē tōmengā ingante nē cæda mēnaa inate aa pecā pōnatapa. Ayæ tontadoidi incæ pancadāniya tōmengā ingante nē cædāni Inōnānimpa. Ininque adocanque tontado incæ Codōnedio ingante nē cæcā incæ Wængonguī ingante nē ēñengā inongāimpa. Tōmengā ingante Codōnedio adobaī aa pecā pongantapa. ⁸ Mānōmāī aa pecā ate tōmēnāni godongāmæ pōnāni ate Codōnedio, Wængonguī æbānō angantawoo, ante tōmānō ante adodō apænedinque, Nōwo Cope iñōmō goedāni, angantapa.

⁹ Angā godinque iimō wææñō taadō godinque Cope iñōmō obo pōñōnāni māniñedē incæ tæcæbæcā incæ Pegodo guiquēnē Wængonguī ingante apænecæte ante oncōmanca æicantapa. ¹⁰ Ayæ ate gue ænente wædinque wadāni Inānite, Cæñinente awædō, āñongante cænguī iinque ææñōnāmāi inte cōñōnāmāi iñōnānite tōmengā wīimonte ate bai cæwēnengantapa. ¹¹ Ate bai æmō ayongante oōnædē wi ænete bai bayō mōincoo bai ñænæncoo pōni iñonte æmæñecoo bæi æmæñecoo bæi ongōnete bai inguipoga pædæ wæænonte bai wææ wāi wocæ acantapa. ¹² Wāi wocæñō nē ocaguī mongæñāni incæ, nē ocaguī omaadāni incæ, nē oōmā emænte æidāmæ godāni incæ babæidi tōmānāni weocoo cæncædencoo inō ongōnāni acantapa. ¹³ Ayongante wacā āninque, “Pegodo, ængæ gantidinke wænonte cæe.”

¹⁴ Angā ēñēninque Pegodo, “Awēnē, ēñēmi. Ōnōnānique iñōnānite botō, Baacā awædō, āninque cōwē cænāmāi imo apa ānewēē.” ¹⁵ Āninque wæætē ēñēñongā, “Wængonguī nānō ædæmō mēnongadongā incæ bitō ædō cæte baacā āmii.”

¹⁶ Āninque nē apænedingā iñōmō wæætē adodō adodō angā ēñēninque Pegodo wæætē, Baacā awædō, ante Baa angantapa. Ayæ mempoga go adopoque wæætedō wæætē adodō āna ate ñænæncoo pōni weocoo incæ oōnædē inō wēā ææñongā bai acantapa. ¹⁷ Ininque, Mānōmāinō ante wīimonte bai adimo inte botō quīnō bai cæquimoo, ante Timōnō Pegodo pōñē congantapa. Pōñē cōñongā Codōnedio nē nānō da pōñōnāni guiquēnē, Timōnō oncō æyōmōnō ī, ante diqui diqui mīnte adinque yabædemō inō næ gongæninque, ¹⁸ Timōnō Pegodo nāni ānongā iñōmō owocāā, ante ēñencæte ante aa pedānitapa.

¹⁹ Pegodo wīimonte bai nānō adinō ante ayæ pōñē cōñongante Wængonguī Ōnōwoca, “Timōnō ēñēmi, bitō imite ante onguīñænāni mengāa go adocanque diqui diqui mīnānīpa quēwēmii. ²⁰ Tōmēmo āmo pōnānīpa cæbii. Bitō ængæ gantidinke yæipodē wæidinque tōmēnāni tōnō ee goe,” angantapa.

²¹ Angā ēñēninque Pegodo yæipodē wæidinque tōmēnāni Inānite, Botō mīnitō nē diqui diqui mīnōmo adobo imopa. Mīnitō quīnante pōmīni.

²² Āñongante,

—Mōnitō awēnē capitāō Codōnedio incæ angā pōmōnīpa. Tōmengā iñōmō Wængonguī ayongante nō cæcā inongā inte Wængonguī ingante guīñente quēwengampa. Nē nō cæcā ingampa, ante pōnēninque oodeoidi tōmānāni

tömengā ingante waa adānīpa. Īnīnque Wængonguī anquedo tæiyæ waēmō ĩnongā inte wæætē Codōnedio ingante, Bitō wadāni ĩnānīte āmi gote Pegodo ingante āñete poncædānīmpa. Tömengā ĩñōmō bitō weca pōnīnque apæneçā ēñencæbiīmpa, angā ēñente wædinque Codōnedio wæætē mōnitō ĩmōnīte da pōnongā pōmōni ae.

²³ Ante apænedāni ēñēnīnque Pegodo angā pō guīte tōmengā weca owodānītapa. Īīmō ate Pegodo tōmēnāni tōnō tao goyongante Cope ĩñōmō quēwente nē pōnēnāni incæ pancadāniya godongāmæ tao wadæ godānītapa.

²⁴ Mānōmaī godinque Pegodo ĩñabæ wæængā Tetadea pongantapa. Codōnedio guīquēnē, Oo ponguingā, ante pōnēnīnque tōmengā guīdēnāni tōnō tōmengā æmigoidi ĩnānīte do āñecā ponte godongāmæ ongōnānītapa.

²⁵ Īnīnque Pegodo ĩñōmō oncōnē pō guīicæ cæyongā Codōnedio wæætē oncodo tao bee tēnīnque, Æ, bitō Wængonguī anquedo ĩnōmi ĩmīpa, ante baī cædinque ædæ wæænte Pegodo ōnōwa gāānē guidōmēmæ ñongængā. ²⁶ Adinque Pegodo wææ ānīnque,

—Īñæmpa bitō waobi ĩmi baī botō adobaī waobo ĩnōmo ĩmopa. Ængæ gantibi, ānīnque Pegodo angā ængæ ganticantapa.

²⁷ Ayæ Codōnedio tōnō guēa tededinque Pegodo oncōnē guīite ayongante nangū ĩnāni godongāmæ mæ ongōnāni. ²⁸ Adinque tōmēnāni ĩnānīte,

—Mīnitō do ēñēmīnīpa. Oodeoidi ĩnōmōni inte mōnitō Mōitee wodi nānō wææ angāinō ante Ao ante ēñente cæmōnīpa. Īnīnque, Oodeo ĩnāmaī ĩnāni tōnō godongāmæ cædāmaī incæmīnīmpa, ante ayæ, Tōmēnāni weca go guīdāmaī incæmīnīmpa, ante mōnitō ēñengāinō ante cæmōnīpa, ante mīnitō do ēñēmīnitawoo. Incæte Wængonguī wæætē botō ĩmote ĩmaī ante odōmongantapa. Bitō, Baacā awædō, ante tedete baī waocā ingantedō ante tededinque, Wentamō mongængampa, ante ānāmaī incæbiīmpa. Ayæ, Ōnonganque ingampa, ante ānāmaī incæbiīmpa, ante Wængonguī botō ĩmote do odōmongā atabopa. ²⁹ Āñete pōnāni ate botō, Wængonguī mānōmaīnō ante odōmongā atabopa, ante pōnēnīnque ee pontabopa. Īnīnque quīnante botō ĩmote aa pemīnīi, ante ēñencæte ante wæbopa.

³⁰ Āñongante Codōnedio wæætē,

—Do mēōnaa go mēōnaa ĩñonte botō tōmēmō oncōnē cænāmaī inte Wængonguī ingante apænetabopa. Botō mānōmaī ñōwo baī ædæ wæicā apæneyōmo onguīñængā weocoo nāāmænta pōni mongængā ponte botō weca a onongā atabopa. ³¹ Ayæ botō ĩmote apænedinque, “Codōnedio, bitō Wængonguī ingante apænebitawo, angantapa. Mānīnō bitō apænedō ante Wængonguī do ēñengantapa. Ōmæpodāni wæwēnāni quī, ante bitō godōmitawo. Mānīnō bitō godōnō ante adinque Wængonguī cōwē pōnengampa cæbii. ³² Ñōwo āmi Cope gote Timōnō Pegodo nāni ānongā ingante āñete poncædānīmpa. Tömengā wacā Timōnō æmontai nē amīnengā weca gāwapæntibæ wedeca owocampa.” ³³ Angā ēñēnīnque botō wæætē bitō ĩmote ante, Āñete pōedāni, antabopa. Ñōwo bitō do pōmi waa abopa. Īnīnque ñōwo ĩñōmō Wængonguī ayongā tōmāmōni godongāmæ a ongōñōmōni bitō, Wængonguī Awēnē mōnitō beyæ ante bitō ĩmote æbānō angāā, ante apænebi ēñencæte ante ongōmōnīpa, angantapa.

Codōnedio oncōnē ongōnīnque Pegodo apænecampa

³⁴ Codōnedio mānōmaī apænecā ēñēnīnque Pegodo ĩmaī ante apænecantapa.

—Wængonguī, Adoyōmō pōni īminīpa, ante tōmāmō īmonte pōnō adoyōmō pōni cæcampa, ante botō, Nāwangā impa, ante ſōwo tæcæ ēñēmopa. ³⁵ Īnīnque īīmæca quēwēnāni incæ wayōmō wabæca wabæca quēwēnāni incæ æcānō Wængonguī ingante guīñente wædinque nō cæte quēwēna ante adīnque Wængonguī māningā ingante Ao ante do ængampa. ³⁶ Mānōmaī cæbopa, ante idægōidi īnānite apænemīni ēñencædānīmpa, ante Wængonguī mōnitō īmōnite da godongā gote īīmaī ante apænemōni ēñēnānīpa. Tōmāmæ quēwēmō īñōmonte mōnō Tæiyæ Awēnē īñōmō Itota Codito ingampa. Tōmengā waa pōni pōnō cæcā beyænque Wængonguī piyænē nānō cægainō ante watapæ mōni apænedō impa. ³⁷ Wāō wodi, Æpænē mōnō guidongæimpa, ante apænecā ēñēnāni afe Itota Codito īñōmō Gadideabæ īñōmō mā cædinque Oodeabæ tōmāo cægente æbānō cægacāi, ante do ēñēmīnīpa. ³⁸ Īmaī ingatīmpa. Wængonguī tōmengā Ōnōwoca ingante angā Itota Nāatadeta nē quēwēngāngā baonga wææ guīgacāimpa. Wææ guicā ate Itota tæī piñænte entwēnīnque wayōmō wayōmō gote tōmāo cægōnīnque waa cægacāimpa. Edæ Wængonguī tōmengā tōnō godongāmæ quēwente cæcā beyæ Itota īñōmō, Wadāni wēnæ angā ēñēnīnque goti wīnte baī wæwēnānīpa, ante adīnque wēnæidi īnānite angā tao godānitapa. Ayæ wadāni wēnæ wēnæ inte wæyōnānite tōmengā godō cæcā ate edæ waa īnāni bagadānīmpa.

³⁹ Pabodo mānōmaīnō ante godōmenque apænecantapa. “Oodeoidi ōmæ cægōnīnque ayæ Eedotadēē īñōmō quēwēnīnque, Itota Codito æbānō cægacāi, ante nē adīmōni inte mōnitō īñōmō mānīnō tōmānō ante nē apænemōni īmōnīpa. Tōmengā ingante awæ ſnænedīmæ cæte godō wæñōnāni wængacāimpa. ⁴⁰ Incæte Itota do wæningā inte mēōna go adoōnæque ōñongante Wængonguī angā ſnāni ōmæmonte mīngā inte edonque pōni a ongongā agadānīmpa. ⁴¹ Wīī tōmānāni adānitapa. Pancamōniya atamōnīpa. Itota ſnāni ōmæmongā ate tōmengā tōnō nē godongāmæ cænte bedīmōni īñōmōnite Wængonguī, Mānīmpodānīque Itota mīngā ongongā ingampa, ante nē adīnāni inte nē apænedāni incædānīmpa, ante mōnitō īmōnite apænte ængacāimpa. Mōnitō adomōnīque tōmengā ingante atamōnīpa. ⁴² Ayæ mōnitō īmōnite ānīnque Wængonguī, Mīnitō īñōmō do ēñēnīmīni inte nē apænemīni bādīnque waodāni īnānite mānōmaīnō ante apænedīnque īīmaī ante apænecāmīnīmpa. Mīī quēwēnāni īnānite do wæñīnāni īnānite Itota Codito īñōmō edæ tōmānāni īnānite edæ nē apænte anguingānō anguēnē, ante apænemīni ēñencædānīmpa, ante Wængonguī mōnitō īmōnite angacāimpa. ⁴³ Ayæ, Mōnō Codito poncæcāimpa, ante do ēñēngāināni inte tōmānāni Wængonguī beyæ adoyōmō apænegadānīmpa. Tōmēnāni, Codito ingante nē pōnēnāni wēnæ wēnæ nāni cædō ante adocā Codito ēmōwo beyænque Wængonguī pōnō waadedīnque ſīmpo cæcā quēwencædānīmpa, ante doyedē apænegadānīmpa,” ante Pegodo Codōnedoidi īnānite apænecā ēñēnānitapa.

Oodeoidi īnāmaī īnāni Wængonguī Ōnōwoca ingante cēnāni

⁴⁴ Pegodo mānīnō ante tæcæ apænecā ēñēē cōñōnānite Wængonguī Tæiyæ Wæmō Ōnōwoca tōmēnāni tōmānāni baonga wææ guīcantapa. ⁴⁵ Pegodo tōnō godongāmæ pōnīnāni guīquēnē nē pōnēnāni īnāni incæte, Mōnō ēō togænte quēwēngæimpa, ante nē ānōnāni ingadānīmpa. Īnīnque tōmēnāni, Oodeoidi īnāmaī īnāni īnānite Wængonguī Tæiyæ Wæmō Ōnōwoca do wææ guīcampa, ante adīnque edæ guīñente wædānitapa. ⁴⁶ Edæ Codōnedoidi Wængonguī Ōnōwoca ingante ēwocadīnque wadāni nāni tede baī wadāni nāni tede baī īñontobæ apænedīnque Wængonguī ingante waa adīnque waa todāni

ēñente wædinqe oodeoidi mǎnōmǎi guiñente wæðanitapa. ⁴⁷ Adinqe Pegodo tōmengǎ tōnō nē pōnīnāni īnānite,

—Tōmēnāni mōnō bai Wængonguī Tæiyæ Waēmō Ōnōwoca do ænīnāni īnānite adinqe tōmēnāni, Æpænē guidōmi guīboe, āñōnānite mōnō ædō cæte wææ anguīi. ⁴⁸ Āninqe Pegodo angǎ ēñēninqe tōmēnāni Itota Codito ēmōwo apænedinqe æpænē guidōnāni guīdānitapa. Æpænē nē guīdēnāni īñōmō ayæ Pegodo ingante, Tæōnæ mōnitō weca quēwencæbiimpa, ānāni Ao ante quēwengacāimpa.

11

Eedotadēē īñōmō nē pōnēnāni īnānite Pegodo apæncā

¹ Oodeoidi īnāmǎi īnāni incæ Wængonguī nānō ānō ante do Ao ante ēñēnānīpa, ante wadāni Oodeabæ tōmǎo cægonte tededānitapa. Īninqe Itota nānō da gogāināni tōnō wadāni nē pōnēnāni tōnō mǎnīnō ante do ēñēnānitapa.

² Īninqe Pegodo Eedotadēē īñōmō æite quēwēñongante nē pōnēnāni incæ pancadāniya, Mōnō ēō togængæiimpa, ante nē ānōnāni inte tōmengǎ ingante pīininqe, ³ īimǎi ante ānānitapa.

—Quīmæ bitō togænāmǎi īnāni weca incæ go guīdinqe cæmitapa tōō.

⁴ Āñōnānite Pegodo, Æbānō cæte ī, ante adodō adodō ante apæncā ēñēnānitapa.

⁵ —Botō Cope nāni quēwēñōmō gote quēwēninqe Wængonguī ingante apænedinqe cæwēnente ongōninqe wīlonte bai atabopa. Wīlonte bai ayōmote weocoo ñænæncoo mōincoo bai æmænecoo yao æmænecoo yao oncōnete bai ōnædē īnō pædæ wæænonte bai ayōmote botō weca wææ wāi wocæ atabopa. ⁶ Wāi wocæñō botō acæte ante guīimō ayōmo babæidi bai īnāni inte ocaguī mongænāni, æmontaique mongænāni, ōōmǎ ēmænāni yæmīñæncoo īnō ongōnāni bai atabopa. ⁷ Ayæ wacǎ botīmote, “Pegodo, ængæ gantidinqe wænonte cæe.” ⁸ Angǎ ēñēninqe botō, “Awēnē ēñēmi. Baacǎ ingǎ ānewēē. Nāwāaquingǎ īnāmǎi īñongante cōwē cænāmǎi īmōi ae.”

⁹ Ante wæyōmote ōnædē apæncā botō nē ēñēningǎ godōmenque āninqe, “Wængonguī nānō ædæmō mēnongadongǎ ædō cæte baacǎ āmīi.” ¹⁰ Āninqe tōmengǎ wæætē wæætē mempoga go adopoque adodō angǎ ate ñænæncoo bai adodō ōnædē ingæ æi atabopa. ¹¹ Mǎnīñēdē Tetadea nē quēwengǎ da pōnongǎ pōninqe ongūīñænāni mengǎa go adocanque botō īmote ante diquī mincæte ante botō owocō boyæcæ pōninqe næ gongænānitapa.

¹² Ayæ Wængonguī Ōnōwoca incæ botō īmote angǎ ēñēninqe botō, Wadāni īnānīpa, ante pīināmǎi īmo inte guīñēnāmǎi tōmēnāni tōnō ee gotabopa. Ayæ botō tōnō īnāni īñōmō tel ganca īnāni mǎnimpodāni godongāmæ godānitapa. Gote ayōmōni, Codōnedio oncō impa, ante adinqe go guīitamōnīpa, ante Pegodo apæncantapa. ¹³ Ayæ, Go guīite ēñēñōmōnīte Codōnedio īñōmō, Æbānō cætīmpa, ante apænedinqe mōnitō īmōnīte īimǎi ante apæncantapa. Botō oncōnē Wængonguī anquedo a ongongǎ atabopa. Ayæ botō īmote āninqe anquedo īñōmō, “Bitō Cope īñōmō āmi wadāni gote Timōnō Pegodo nāni ānongǎ ingante āñete poncædānīmpa. ¹⁴ Tōmengǎ pōninqe, Mīni quēwencabo æbānō cæte wænāmǎi quēwenguīmīnīi, ante bitō īmote apæncā ēñencæbiimpa.” Mǎnōmǎinō ante Wængonguī anquedo apæncā ēñente cætābopa, ante Codōnedio mōnitō īmōnīte apæncā ēñentamōnīpa.

¹⁵ Mǎninganca apænedinqe Pegodo īimǎi angantapa. “Wængonguī Tæiyæ Waēmō Ōnōwoca mā pōninqe mōnitō īmōnīte nānō guidō bai ñōwo īñōmō

botō tæcæ apænecæ cæyōmo adocā edæ tōmēnāniya adobaī wææ gu-
icantapa. ¹⁶ Īnque botō, Mōnō Awēnē Itota æbānō angacāi, ante adodō
ante pōnentabopa. ‘Wāō wodi ĩñōmō æpænē guidongacāimpa. Wængonguī
Tæiyæ Waēmō Ōnōwoca guiquēnē mīnitō baonga pō guicæcāimpa,’ ante Itota
do apænecacāimpa, ante botō ōnōwēnque pōnentabopa. ¹⁷ Ayæ, Mōnō
Awēnē Itota Codito ingante wede pōnēmōni ate Wængonguī tōmengā Tæiyæ
Waēmō Ōnōwoca ingante da pōnongā æntamōnīte. Nōwo tōmēnāni adobaī
wede pōnēnāni ate Wængonguī mōnitō ĩmōnīte nānō da pōnongaingā ingante
tōmēnāniya adobaī da pōnongā ænānīpa, ante pōnentabopa. Mānōmaī cæcampa,
ante pōnēninque botō, Ædō cæte Wængonguī ingante Baa anguīmo.”

¹⁸ Ante Pegodo, Æbānō cætīmpa, ante tōmānō ante edonque apænecā
ēñēninque tōmēnāni wæætē, Mōnō ædō cæte godōmenque piīnte anguī, ante
piyænē cæte apænedānitapa.

—Nōwo idæwaa āmōnīpa. Wadāni oodeoidi ĩnāmaī ĩnāni incæ mōnō bai,
Idæwaa wēnæ wēnæ cæte awædō, ante guingo imonte wædāni ate Wængonguī
pōnō waadete cæcā ate quēwēnānīpa, ante nōwo tæcæ mā ēñēmōnīpa, ante
todinque Wængonguī ingante edæ watapæ apænecadānīpa.

Antioquiya ĩñōmō Itota ingante nāni pōnencabo

¹⁹ Māningā Etebā wodi ingante wænōnīnque oodeoidi godōmenque wadāni
nē pōnēnāni ĩnānīte wēnæ wēnæ togænte pānāni wædinque nē pōnēnāni
ĩñōmō wodiī wīnōnīnque nāwæ gote Pēnitā ganca Tipidebæ ganca Antioquiya
ganca godānitapa. Godinque tōmēnāni, Itota Codito æbānō cægacāi, ante
oodeoidique ĩnānīte apænedīnque wadāni ĩnānīte apænedāmaī ĩngadānīpa.
²⁰ Incæte Tipidebæ ĩñōmō quēwēnāni tōnō Tidēnebæ ĩñōmō quēwēnāni pan-
cadāniya Antioquiya ĩñōmō godinque guidiegoidi ĩnānīte adobaī Itota Codito
ingantedō ante watapæ apænedāni ēñēnānitapa. ²¹ Īnque mōnō Awēnē
tōmēnāni tōnō godongāmæ cæcā beyænque nanguī ĩnāni tæcæ pōnēninque
tōmengā gāmænō pōnānitapa.

²² Mānōmaī pōnēnānīpa, ante tededāni ēñēninque Eedotadēē ĩñōmō Codito
ingante nāni godongāmæ pōnencabo incæ Bedēnabee ingante, Bitō Antioquiya
ĩñōmō godinque ate pōe, ānāni. ²³ Māniñōmō gote pōnīnque Bedēnabee ĩñōmō,
Antioquiya ĩñōmō quēwēnāni ĩnānīte Wængonguī waadete pōnō cæcampa, ante
adinque nanguī todinque tōmānāni ĩnānīte, Mīnitō mīmōno wede pōnēninque
mōnō Awēnē mīñæ cōwē quēwēdāni, ante nanguī angantapa. ²⁴ Bedēnabee
ĩñōmō Wængonguī Tæiyæ Waēmō Ōnōwoca ingante ēwocadinque nē wede
pōnengā ĩnongā inte nē waa cæcā ĩnongāimpa. Īnque tōmengā apænecā
ēñēninque tōmēnāni nanguī ĩnāni mōnō Awēnē gāmænō pongadānīpa.

²⁵ Bedēnabee wæætē Taodo ingante diqui mincæte ante Tadoto ĩñōmō
gote, ²⁶ adinque tōmengā ingante Antioquiya ĩñōmō ænte pongantapa.
Pōnīnque adoque wadepo quēwēninque tōmēnāni Codito ingante nē tee em-
pote quēwēncabo tōnō cōwē godongāmæ ponte apænedīnque nanguī ĩnāni
ĩnānīte odōmonte apæneda ēñēnānitapa. Ayæ Antioquiya ĩñōmō quēwēnāni
Codito ingante nē tee empote quēwēnāni ĩnānītedō ante apænedīnque, Codi-
toidi ĩnānīpa, ante mā pemōnīnque apænedōnānīpa.

²⁷ Ayæ Wængonguī beyæ nē apænedāni pancadāniya māniñedē Eedo-
tadēē quēwēninque Antioquiya pōnānitapa. ²⁸ Tōmēnāni nāni Wængonguī
beyæ apæneincabo incæ adocanque Agabo nāni ānongā ĩñōmō Wængonguī
Ōnōwoca ingante ēwocate apænedīnque, Mōnō waocabo quēwēñōmō tōmāmæ
cænguī oo dæ ba adinque mōnō gæwænte wæquīmāmo baquīnō anguēnē,

ante angacāimpa. Īnque ĩncayæ ate Codaodio Awënë ingāñedē Agabo nō nānō ānīnō bai do batimpa. ²⁹ Ba adinque Antioquiya nāni pōnencabo godongāmæ pōnēnque, Mōnō tōniñadāni ĩñōmō Oodeabæ quēwēnque edæ tepæmpo gæwænte wædānipa cæmōō. Tōmēnāni beyæ mōnō godonte æinta pædæ godōnque adocanque eyepæ inte nānō godonganca wacā eyepæ inte nānō godonganca godongæimpa, ante godongāmæ Ao ānānitapa. ³⁰ Ānque eyepæ pædæ pōnōnque Bedēnabee tōnō Taodo ĩnate, Ænte māo godinque nē pōnēnāni ĩnānite nē aadāni nē Picānāni nempo pædæ godōmīna æncædānimpa, ante da pōnōnāni ænte gote godōna ængadānimpa.

12

Tantiago wængā ate Pegodo ingante tee mōnedānipa

¹ Māniñedē Codito ingante nāni godongāmæ pōnencabo ĩñōnānite awënë odeye Edode ĩñōmō pancadāniya ĩnānite wēnæ wēnæ cæcæte ante angā bæi ongonte ængadānimpa. ² Mānōmāi cædinque tōmengā angā ēñēnque Wāō tōniñacā Santiago ingante yaēmenca wænōnāni wængacāimpa. ³ Santiago wodi mānōmāi wængā adinque oodeoidi todāni ate wædinque Edode, Godōmenque cæbo ate nangui todinque botō ĩmote waa acædānimpa, ante cædinque Pegodo ingante adobai bæi ongongantapa. Edæ pāō yedæ æmpoquī ōmæmō ĩ nāni ææmæ cæyedē māniñedē tōmengā ingante bæi ongonte ængantapa. ⁴ Mānōmāi ænque Edode ĩñōmō, Oodeoidi Patowa ææmæ ĩnque bedāni ate botō Pegodo ingante ænte tadonte tōmānāni ayōnānite apænte ancæboimpa, ante pōnēnque tōmengā ingante tee mōnecantapa. Tee mōnedinque Edode godōmenque angā ēñēnque tontadoidi mengāa go mengāa nāni cabo pō wææ wānonte goyōnāni wacabo adopodāni pō wææ wānonte godōnānimpa. Mānōmāi wacabo pō wacabo pō cædinque mencabodāniya go mencabodāniya wæætē wæætē ponte wææ wānonte godōnānimpa. ⁵ Īnque Pegodo ayæ tee mōnete ongōngāimpa. ĩncæte tōmēnāni Codito ingante godongāmæ nāni pōnencabo Wængonguī ingante tōmengā beyæ cōwē nangui apænegadānimpa.

Pegodo ingante Wængonguī incæ ñimpo cæcā gocampa

⁶ Pegodo ingante tontadoda mēnaa tōnō æmæncaipo æmæncaipo yaēmengō tæī goti wincapodāni wæyongante wada odemō cōwē wānō cōnōnaimpa. Īnque Edode tōmengā nānō apænte anguīōnæ ado woyowotæ Pegodo mānōmāi goti winte wædongā inte mō ñongantapa. ⁷ ĩñontobæ Wængonguī Awënë nānō da pōnōningā anquedo a ongongantapa. Tee mōnete oncōñē ñāō gongæntapa. Pegodo mō ñōñongante Wængonguī nānō da pōnōningā ĩñōmō æmætæ ĩnō tao cædinque, “Pegodo, ñāni ōmæmonte quingæ ængæ gantibi.” Āñongā daagōmē nāni tæī wīni incæ tōmenque ñīmæncæ tæ wæængatimpa. ⁸ Ayæ, “Bitō weocooga pacadeyænta pacadeyænte awæncata wēwabi.” Angā ēñēnte cæcā adinque Wængonguī anquedo godōmenque, “Yacoo wīni caadinque botō miñæ pōe.”

⁹ Angā ēñēnque Pegodo, Awii cæmonte awædō. Anquedo dicæ ponte cæcāā. Mānōmāi ponte cæcampa, ante botō wīlmonte bai aboimpa, ante wawique pōnengā ĩncæte anquedo miñæ tee empote tao gocantapa. ¹⁰ Mānōmāi tao godinque guicōñē nē wānōna ongōñōna wodo tebæ tao godinque yabæcōñē tamongademō nē wānōna ongōñōna wodo tebæ tao godinque yaēmewæ odemō tōmēnāni quēwēñōmō ante nāni tao goquīnemō ganca pōnatapa. Māñimemō ganca ponte ongōñōna yaēmewæ odemō ĩncæ tōmenque

æ ænete bayō tao godinque taadō adodonque cægōna ate anquedo iñōmō ingæ gocā ate Pegodo guiquēnē adocanque a ongongantapa.

¹¹ Adoboque a ongōmopa, ante wædinque tōmengā wæætē nāmā pōnengā badinque, “Æ. Nāwangā incæ do tate ēñēmopa. Edode nempo wæwēninque botō oodeoidi nāni piñō wæquēnēmo imo adinque Wængonguī angā ēñēninque tōmengā anquedo ponte botō imote gā pe æmpote ō ængā ate aamō cæbopa, ante tæcæ pōnēmopa.”

¹² Ante pōnente wædinque Pegodo wadæ godinque Wāō Māadoco nāni ānongā tōmengā badā Māadiya oncō boyæ ponte næ gongængantapa. Mānincōnē wadāni nē pōnēnāni incæ do pōninque Wængonguī ingante godongāmæ apænee cōnōnānimpā. ¹³ Pegodo iñōmō yabædemō ongonte aa peyongā baquēcā nē ēacā ingante nē cæcā inte tōmengā ēmōwo Adoda iñōmō ēñencæte ante pongantapa. ¹⁴ Ponte ēñēñongā Pegodo incæ aa pecā ēñēninque watapæ tote wædinque tōmengā wīl pōnēninque odemō wi ænedāmāi pogodo gote edæ wadæ guidinque, Pegodo incæ oncodo a ongongā tamēñedāni. ¹⁵ Ante apænecā ēñēninque tōmēnāni wæætē,

—Adoque antedō amīni.

Ante wæyōnāni tōmengā, Nāwangā impā, ante ancaa angā ēñēninque tōmēnāni,

—Wa. Pegodo ingante nē aacā anquedo imaingampā.

¹⁶ Ante tedeyōnāni Pegodo iñōmō ayæ aa pete ongōnongāimpā. Ayæ ponte wi ænete ayōnāni Pegodo ingante adinque ancai guīñente wædānitapa.

¹⁷ Tōmengā wæætē, Apocænē iedāni, ante ōnompocaque compo cæcā adinque pæ wēneyōnāni tōmēnāni inānite apænecantapa. Botō tee mōnete wæyōmote Wængonguī æbānō pōnō cæcā ate tate pōmoo, ante tōmānō ante adodō ante apænedinque,

—Botō apænebo mīni ēñēnō ante mīnitō wæætē wacā Tantiago ingante apænedinque wadāni mōnō tōññadāni inānite apænemīni ēñencædānimpā.

Āninque Pegodo wayōmō wadæ gocantapa.

¹⁸ Īimō wæñō ñāō bayonte tontadoidi guiquēnē, Pegodo ædōnō gote dæ angāā, ante nanguī Yæ yæ ante cædānitapa. ¹⁹ Mānōmāi cætimpā, ante apænedāni ēñente wædinque Edode angā diqui diqui miññōnāni Pegodo ayæ dæ angantapa. Īininque nē wææ wānōnīnāni inānite Edode, Æbānō cætīi, ante ancaa angā wædinque tōmēnāni, Mōnō ædō cæte anguīi, ante wæyōnānite tōmengā wadāni inānite angā capo wænōnāni wængadānimpā. Edode tōmē Oodeabæ wadæ tao godinque Tetadea gote quēwengacāimpā.

Edode wængampā

²⁰ Tido iñōmō quēwēnāni tōnō Tidōō iñōmō quēwēnāni inānite awēnē Edode wodi māññedē ēnogate ænguī bacā adinque tōmēnāni wæætē godongāmæ pōnente Ao āninque Edode weca apænecæ pōnānitapa. Tōmēnāni, Mōnō iñōmō awēnē odeye Edode ōmæ quēwēnāni pōnōnāni æninque māññonque cænte quēwēmompā, ante wædōnāni inte tōmengā ingante, Bitō piñāmāi inte piyænē cæbi quēwēmōnie, ante ancæte ante pōnānitapa. Pōninque tōmēnāni Edode oncōnē owodāni inānite nē aacā Bodato ingante waa cædinque tōmengā ingante ānāni Ao ante tōmengā wæætē Awēnē Edode ingante tōmēnāni beyæ apænecā ēñengacāimpā. ²¹ Edode iñōmō, Īiōnæ ba ate botō ponte apænecæboimpā, ante tōmengā nānō āñiōnæ ĩinque ba ate tōmengā awēnē weocoo wæēmconco wēñate pōninque awēnē nānō apænte ante contaimpā tæ contadinque tōmānāni ayōnāni tōmēnāni inānite apænecantapa. ²² Apænecā ēñēninque tōmānāni Yæ yæ āninque, “Wīi waocanque tedecā ēñēmompā.

Wængonguīdi nāni tedepāmo bai tedecā ēñēmompa.” ²³ Ante Yæ āñōnāni Edode wodi wæætē, Nāwā Wængonguinque nē waa cæcampa, ante anguēnengā incæte ānāmaī pæ wēēnecā adinque tōmengā ingante Wængonguī anquedo wæætē godō cæcā ate ayago cæ æmæwo wængacāimpa.

²⁴ Incæte Wængonguī nānō angainō ante māniñedē wayōmō māo wayōmō māo apænedāni ēñēinque nanguī īnāni mōnō Awēnē ingante nē wede pōnēnāni badānitapa.

²⁵ Bedēnabee tōnō Taodo īñōmō Eedotadēē īñōmō godinque tōmēna nāna cæquēnēnō tōmānō īnque cædinque wadæ godinque Wāō Māadoco nāni ānongā ingante tōmēna tōnō æninque adodō godānitapa.

13

Wængonguī angā ēñente Bedēnabee tōnō Taodo godapa

¹ Antioquiya īñōmō Itota Codito ingante nāni godongāmæ pōnencabo īñōnāni īñōmō pancadāniya Wængonguī beyæ nē apænedāni īñōnāni pancadāniya guiquēnē nē odōmonte apænedāni īñōnānimpa. Bedēnabee tōnō wacā Timōnō Nēegodo nāni ānongā īñōnaimpa. Tidēnebæ nē quēwēningā Dotio īnongāimpa. Pancabaa awēnē Edode tōnō godongāmæ nē pædingā Mānāēnē tōnō Taodo īñōnaimpa. Mānimpodāni ingadānimpa. ² Īnque tōmānāni godongāmæ mōnō Awēnē ingante, Tæiyæ Waēmō īmipa, ante wat-apæ apænecæte ante cænāmaī apæneyōnānite Wængonguī Tæiyæ Waēmō Ōñowoca incæ īmaī angacāimpa. “Bedēnabee tōnō Taodo mīnitō tōnō nē cæda īñōtate āmīni botō beyænque cædinque nānēnē godinque botō āninō ante cæcædaimpa,” angacāimpa.

³ Īnque īnque cænāmaī inte apænedinque tōmēnāni Bedēnabee tōnō Taodo īnate gampocadinque Wængonguī ingante apænedinque ānāni ate wadæ gogadaimpa.

Wāā tēiwæñē Tipidebæ gote apæneda ēñēnāni

⁴ Bedēnabee tōnō Taodo īñōmō Wængonguī Tæiyæ Waēmō Ōñowoca mānōmaī angā godina inte Tedeotia īñōmō wæi wipodē ñænæmpodē go guīdinque wogaa godinque wāā tēiwæñē Tipidebæ nāni āmæ godatapa. ⁵ Tadamīna nāni quēwēñōmō pōninque oodeoidi odōmōincōnē wacōnē go guīi wacōnē go guīi cædinque Wængonguī nānō apænedō ante nōingā apæneda ēñengadānimpa. Ayæ Wāō tōmēna mīñæ godinque tōmēna beyæ nē cæcā īnongāimpa.

⁶ Mānōmaī wāā tēiwæñē tæcæguedē wodo tebæ cægōninque yæcado godinque Papo nāni quēwēñōmō ganca pōnānitapa. Pōninque tōmēnāni wacā idō tōmengā ēmōwo Baditota ingante māmō beē tēnānitapa. Tōmengā īñōmō oodeocā īnongā inte, Wængonguī beyæ nē apænebo īmopa, āninque nē babæ ānongā īnongāimpa. ⁷ Tōmengā wāā tēimæ awēnē Tedeguiio Pabodo nāni ānongā tōnō godongāmæ nē cædongā īnongāimpa. Awēnē Tedeguiio guiquēnē nē ocai encadongā inte Wængonguī nānō ānō ante ēñēinente wædinque Bedēnabee tōnō Taodo īnate āñete māmongā pōnatapa. ⁸ Tōmēna ponte apæneyōnate idō Baditota guiquēnē guidiego tededō Edīma nāni ānongā īnongā inte edæ, Awēnē nē pōnengā badāmaī incæcāimpa, ante wææ cæcæte ante pīinte cæcantapa. ⁹ Īnque Taodo Pabodo nāni ānongā īñōmō Wængonguī Tæiyæ Waēmō Ōñowocaque ēwocadinque idō ingante gomō adinque, ¹⁰ tōmengā ingante angantapa.

—Bitō iñōmō wēnæ awēnē nānōmōmi bai imidō anguēnē. Iñæmpa, Wadāni quīēmē nō impa, ante oda cæcædānimpa, ante bitō pūinte pōnēwēnonque entawēninque bitō nē babæ cædōmi imipa tōō. Wængonguī nānō tōinō ponguīnō ante idiquibæ bacæimpa, ante bitō æpogamē incæ cæbii. ¹¹ Nōwo iñōmō Wængonguī Awēnē nē piñægā inongā inte bitō imite pancæcāimpa. Tōmēgā pōnō gampomongā ate bitō babetamōmi badinque nænque ñāō tamōnō wantæpiyæ tōmēgā nānō ānimpoga adāmaī incæbiimpa.

Åñongā boguimā bai do wææ iñinque wēmō emōninque Edīma Baditota nāni ānongā gampo gampo cædinque, Æcānō botō imote tōō æmænte māoda goquīmoō, ante diqui diqui mingantapa. ¹² Mānōmaī bacā adinque wāā tēimæ awēnē wæætē Wængonguī Awēnē ingantedō ante iñāna nāna odōmonte apænedō ante pōnente guīñente wædinque nē pōnēgā bagacāimpa.

Pitidiabæ Antioquiya godinque cædapa

¹³ Pabodoidi iñōmō Papo iñōmō wadæ godinque wipodē ñæñæmpodē wogaa taodinque Pampidiabæ pōninque Pedegue iñōmō ti wææñōnāni Wāō wæætē adodō Eedotadēē gocæte ante tōmēna inate emō cæte wadæ gogacāimpa. ¹⁴ Tōmēna wæætē Pedegue wadæ godinque Pitidiabæ pōninque Antioquiya nāni quēwēñōmō pōnatapa. Ayæ tōmēnāni guēmanguionæ iñique bayō oodeoidi odōmōincōnē pō guite tæ contadatapa. ¹⁵ Tæ contate a cōñōna Mōitee wodi nānō yewæmongainta adinque Wængonguī beyæ nē apænegaināni nāni yewæmongainta ate apænedānitapa. Ayæ māniñōmō awēnēidi iñōmō tōmēnāni weca ongongā adocanque ingante apænedinque,

—Bitō ñōwo pōna inate māo āninque iīmaī apænecæbiimpa, Iñāna, mōni tōñiñamīna eñēmīna. Iñōmō ongōnāni wampo pōnēninque tæī gongænte ongoncædānimpa, ante cædinque mīnatō ædæmō apænemīna eñenguīnāni, ante āni apænebainapa.

¹⁶ Anāni eñente māo angā eñēninque Pabodo iñōmō ængæ gantidique ōnopoca compo compo cædinque tōmēnāni inānite apænecantapa.

—Mīnitō, pancamīniya idægoidi iñōmīnite pancamīniya wamīni incæ, Nāwā Wængonguī inongā ingampa, ante nē guīñente wæmīni iñōmīnite botō tōmāmīni imīnite apænebo eñēedāni. ¹⁷ Idægoidi, mīnitō imīnite tāno apænebo eñēedāni. Mōnō idægocabo Wængonguī incæ mōnō mæmæidi inānite apænte ængā ate wadāni nēmæ Equitobæ iñōmō quēwēñōnānite tōmēgā pōnō cæcā ate tōmēnāni tæiyæñāni yebængadānimpa. Ayæ Wængonguī tæī piñæñongā inte ingæ æmæninque tōō æmænte māocā wadæ gogadānimpa.

¹⁸ Godinque tōmēnāni coadenta wadepo mānimpoga ōnōmæca cægōninque æbāmē wēnæ wēnæ cæte quēwēnāni ate wæcā incæte tōmēgā pānāmaī inte ata cæpote ænte māocā gogadānimpa. ¹⁹ Ayæ wadāni Cānaāmæ quēwēnāni ōnopmo æmæmpoque go mencabodāniya iñōnānite wido cædinque Wængonguī, Tōmēnāni ōmæ inī mīnitō ōmæ wæætē bacāimpa, ante mōnō wæmæidi inānite pōnongā ængadānimpa. ²⁰ Edæ coatodo tiento tincoenta wadepo mānimpoga wabæca quēwēnāni ate māniñedē ate Wængonguī, Mīnitō ōmæ, āninque mōnō wæmæidi inānite pōnongā æninque quēwengadānimpa.

Ante apænedinque Pabodo, Idægoidi dodāni æbānō cægadāni, ante godōmenque apænecantapa. “Mānimæca ponte wantæpiyæ quēwēnāni ate pancadāniya nē apænte ānāni iñōnānite Wængonguī angā ate adodāni awēnēidi bai badinque wayedē wacā adocanque wayedē wacā adocanque wayedē wacā adocanque aagadānimpa. Tāmoedo Wængonguī beyæ nē apænecā nānō ponte apæneganca māniñānique aagadānimpa. ²¹ Iñcayæ ate mōnitō

dodāni iñōmō Wængongui ingante apænedinque, Bitō adocanque ingante āmi ate tōmengā tæiyæ awēnē bacæcāimpa, ante ancaa ānāni ēñente wædinque tōmengā wæætē Beencaminō wodi pæingā incæ Titæ wengā Taodo ingante angā bagacāimpa. Tæiyæ awēnē badinque tōmengā coadenta wadepo mānimpoga iñōnte aagacāimpa. ²² Ayæ ate Wængongui wæætē, Idæwaa, ante Taodo wodi ingante wido cædinque Dabii wodi ingante wæætē angā tæiyæ awēnē bagacāimpa. Adocā Dabii ingantedō ante apænedinque Wængongui, Botō waa pōni entawēmo bai Yæte wengā Dabii iñōmō adobaī entawengā abopa. Tōmengā iñōmō botō ānō bai edæ tōmānō cæquiringā ingampa, ante apænegacāimpa.”

²³ “Wængongui doyedē, Codito ængā beyænque idægoidi quēwencædānimpa, ante do nānō angainō bai ñōwo cædinque adocā Dabii pæingā Itota Codito ingante da pōnongā pongacāimpa. ²⁴ Itota ayæ pōnāmai iñongā Wāo wodi idægoidi tōmānāni inānite apænedinque, Minitō, Idæwaa wēnæ wēnæ cæte awædō, ante Wængongui gāmænō wadæ pōninque æpænē guiedāni, ante apænegā ēñengadānimpa. ²⁵ Ayæ adocā Wāo incæ, ‘Botō æbodō imoo, ante pōnēmini. Minitō pōnēnō bai wii imopa. Botō do pōnimo iñōmote mīni nē pōnēnongā iñōmō ayæ poncæcāimpa. Tōmengā ingante adinque botō waēmō imopa diyæ tōmengā awæncata godō ñi cæquimoo.’ Ante Wāo tōmengā nānō cæquēnēnō wodo iinque cæyedē apænegacāimpa.”

²⁶ Ante apænedinque Pabodo godōmenque apænegantapa. “Iñānāni, pancamīniya Abadāo wodi pæimīni iñōmīni pancamīniya wamīni incæ Wængongui ingante guīñēmīni iñōmīni edæ botō tōmāmīni imīnite apænebo ēñēedāni. Māninō, Codito ængā beyænque quēwencæmīnimpa, ante Wængongui tōmāmō beyæ pōnō apænegacāimpa. ²⁷ Eedotadēē quēwēnāni tōnō tōmēnāni awēnēdi iñōmō, Itota ecānō ingāā, ante pōnēnāmai ingadānimpa. Iinque guēmanguiōnæ iñō guēmanguiōnæ iñō Wængongui beyæ nē apænegānāni nāni yewæmongainta cōwē adāni incæte tōmēnāni, Itota nānō wænguinque wēnæ wēnæ cæcā ingampa tōō, ante babæ ante apænte ānewēninque edæ dodāni nāni yewæmonte angainō bai iinque cædānitapa. ²⁸ Tōmēnāni, Itota nānō wænguinque æbānō wentamō mongængāā, ante cōwā ayōnāni edæ dæ ampa. Ante wædinque awēnē Pidato ingante apænedinque tōmēnāni, Itota ingante āmi wænōnāni wængæe, ante ancaa ānāni ēñēninque Pidato Ao angā wænōnāni wængacāimpa. ²⁹ Iinque Itota ingante awāa timpote wænōninque tōmēnāni dodāni tōmengā ingante ante nāni yewæmonte angainō bai tōmānō ante iinque cædānitapa. Mānōmai cædāni ate wængā ate tōmēnāni ānāni ate tōmengā miñæ godināni wæætē tōmengā nānō ongōwāa pædæ æmpodinque ōnompō a togæmpote wæi ōnōwa o togæwadinque pædæ wæænōninque edæ ænte māo daga wengadānimpa.”

³⁰ “Incæte Wængongui guiquēnē do wæningā ingante, Ñāni ōmæmōe, angā ñāni ōmæmonte quēwengampa. ³¹ Ñāni ōmæmōninque tōmengā tæōnæ iñōnte pō pō cædinque a ongōñongante edæ tōmengā tōnō wēnēñedē Gadideabæ quēwēninque Eedotadēē iñōmō nē pongāināni iñōmō edæ tōmengā ingante wæætē adānitapa. Iinque tōmēnāni iñōmō nē adināni inte waodāni inānite, Itota nāwangā ñāni ōmæmonte mīingā quēwengampa, ante nē apænedāni inānipa.”

³² Ante apænedinque Pabodo, “Dodāni inānite Wængongui, Minitō beyæ botō cōwē pōnō cæcæboimpa, ante apænegacāimpa, ante ēñēmīnitawo. Māninō ante watapæ nānō apænegainō ante mōnitō ñōwo iīmai ante apænemōnipa.

³³ Mānīnō tōmengā dodāni inānite nānō angainō bai nōwo tōmēnāni mōmoidi beyæ linque cædinque Wængonguī Itota ingante, Nāni ōmæmōe, angā nāni ōmæmongacāimpa. Tōmengā nōwo linque cæcampa, ante Āmotamīni nāni Angainta tānota gao wæintaa Wængonguī beyæ īīmaī ante yewæmongatimpa. ‘Botō Wēmi Inōmi īmipa. Nōwoōnæ bitō Mæmpobo babopa.’ ³⁴ Ayæ mānīnō, Tōmengā Wengā do wæningā īñongante Wængonguī angā nāni ōmæmōninque baō nōmāadāmaī incæcāimpa, ante pōnēninque Itaiya wodi īīmaī ante Wængonguī beyæ ante yewæmongacāimpa. ‘Awēnē Dabii wodi ingante apænedinque botō, Tæiyæ waēmō botō cædō bai cædinque cōwē ædæmō aate cæcæboimpa, ante nō botō angainō bai cædinque mīnitō īmīnite pōnō adobaī cæcæboimpa,’ ante Wængonguī angampa, ante yewæmongacāimpa. ³⁵ Ayæ mānīnō ante wataa adobaī Wængonguī ingante apænete bai Dabii wodi yewæmongacāimpa. ‘Bitō imite nē Cæcā īñōmō bitō cædō ante cōwē cædongā inte wængā adinque bitō ædō cæte tōmengā ingante ænāmaī inte ee abi baō nōmāaquinḡā,’ ante yewæmongacāimpa.”

³⁶ “Awēnē Dabii wodi guīquēnē Wængonguī nānō ānōnō ante ēñēninque adoyedē quēwēnāni beyæ waa cædingā inte edæ nāñe wæninque tōmengā mæmæidi weca æiyongā tōmengā baō īñī nōmænte bagatimpa. ³⁷ Wæætē Wængonguī, Nāni ōmæmōe, angā ēñente nē ōmæmongaingā īñōmō tōmengā baō nōmāadāmaī ingatimpa. ³⁸ Īninque onguīñæmīni botō tōñīamīni ēñēdāni. Itota pōnō cæcā beyænque mōnitō mīnitō imīnite apænedinque, Wēnæ wēnæ mōnō cædō ante adinque Wængonguī pōnō nīmpo cæcā ate quēwēmōmpa, ante apænemōni ēñēmīnīpa. Mōītee wodi nānō wææ angainō ante ēñente beyænque mōnō īñōmō dicæ nō cæte quēwēmō īmongaa. ³⁹ Wæætē māningā onguīñængā īñōmō Itota īñōmō tōmengā nō pōñī nānō entawēnō ante pōnongā ænte entawēmō beyænque mōnō nē pōnēmō tōmāmō wæætē Wængonguī ayongā edæ nō cæte quēwēmō īnōmō īmōmpa. ⁴⁰ Īninque Wængonguī beyæ nē apænegaināni īīmaī ante nāni apænegainō ante pōnēninque mīnitō īñōmō, Mōnitō imōnite wīī bacæimpa, ante nāmā wææ aquēnē quēwēdāni. īīmaī ante edæ āmotamīni ante bai yewæmongadānīmpa. ⁴¹ ‘Mīnitō nē badete towēmīni inte cōwā aquēnē quēwēdāni. Botō cæbo adinque mīnitō ancai guīñente wæcæmīnīmpa. Mīnitō ayæ mīmīni quēwēñōmīni edæ botō mā pōñī cæcæboimpa, ante pōnēmīniyaa.

Wængonguī mānōmaī cæcæcāimpa, ante edonque pōñī apænedāni bai mīnitō wæætē, Babæ ancædō, ante wæcædōmīnīmpa.’ Ante nāni yewæmongainō ante adinque edæ badete todāmaī īedāni,” ante Pabodo apænecantapa.

⁴² Mānōmaīnō ante linque apænedinque Pabodo tōnō Bedēnabee tōmēnāni odōmōincōnē ongonte oncodo tao goyōnate Antioquiya īñōmō quēwēnāni īñōmō, Wacā guēmanguīōnæ bayonte mīnatō nōwoōnæ mīna apænedō bai godōmenque apænemina ēñencæmōnīmpa, ānānitapa. ⁴³ Ayæ godongāmæ nāni pōnte ongōnincabo tao goyōnāni oodeoidi pancadāniya ayæ oodeoidi bai nē bagaināni adobaī Wængonguī ingante guīñente quēwēnāni nanguī īnāni īñōmō Pabodo tōnō Bedēnabee īnate edæ tee empote godāni. Adinque īñāna wæætē tōmēnāni inānite apænedinque, Wængonguī waadete nānō pōnō cædōnō ante pōnēninque mīnitō cōwē nīmpo cædāmaī tæī ongōninque edæ waa quēwēdāni, ante nanguī apænedatapa.

⁴⁴ Ayæ adoque Wængonguī itædē go ate tōmēnāni nāni guēmanguīōnæ bayonte māñīñōmō quēwēnāni wodo tōmānāni Wængonguī Awēnē nānō ānō

ēñencæte ante godongāmæ pōnānitapa. ⁴⁵ Nanguī ināni mǎnōmaī pōnāni ate wædinque oodeoidi guiquēnē piinte badinque, Babæ ante ānewengampa, ante Pabodo ingante godō piinte tedewēnānitapa. ⁴⁶ Mǎnōmaī tedewēñōnānite Pabodo tōnō Bedēnabee wæætē guīñēnedāmaī inte apǣnedatapa.

—Mīnitō oodeoidi imīni inte edæ tāno ēñencæmīnīmpa, ante cædinque mōnatō Wængonguī nānō ānō ante edæ mā apǣnedinque mīnitō imīnite tāno apǣnequēnēmōna intamōnāna. Mīnitō iñāmpa mīni cōwē wænāmaī quēwenguīnō ante apǣneyōmōna mīni apǣnte pangā wæquinque edæ Baa āmīnīpa. Ante wāmōna inte mōnatō ñōwo ēmō cæte godinque edæ oodeoidi ināmaī ināni weca edæ apǣnecæ gomōna tamēñedāni. ⁴⁷ Mōnitō Awēñē iīmaī ante mōnatō imōnate angacāīmpa.

“Quēwencæmīnīmpa, ante botō cægāinō ante bitō inguīpoga tōmāmæ māo apǣnedinque

Oodeoidi ināmaī ināni beyæ tica ēnente baī cæcæbiīmpa, ante cædinque botō bitō imite da godōmo apǣnecæ gocæbiīmpa.”

Ante nē apǣnegaingā inte Wængonguī mōnatō imōnate angā ēñente apǣnemōnāpa.

⁴⁸ Mǎnōmaīnō ante apǣneda ēñēninque oodeoidi ināmaī ināni iñōmō, Awēñē nānō apǣnedō waa ēñēmōnīpa, ante watapæ apǣnedānitapa. Ayæ mōnō Awēñē doyedē apǣnedinque, Mānimpodānīque wede pōnēninque cōwē wædāmaī quēwenguīnāni incædānīmpa, ante tōmengā nānō nē angānānīque ñōwo pōnēnānitapa. ⁴⁹ Inīnque mōnō Awēñē tōmengā nānō apǣnedō ante māo apǣneyōnāni māñiōmæ tōmāo quēwēnāni ēñēnānitapa.

⁵⁰ Oodeoidi guiquēnē, Pabodo tōnō Bedēnabee inate mōnō wido cæcæīmpa, ante cædinque iīmaī cædānitapa. Onquiyæñāni nāni nē waa adāni inte Wængonguī ingante guīñente quēwēnāni iñōnānite tōmēnāni tōnō onguīñænāni māñiñōmō quēwēnāni awēñēidi baī inte ñænænāni iñōnānite oodeoidi, Badogaa, ante nanguī ānāni ēñēnānitapa. Oodeoidi nanguī ānāni ēñente cædinque māñināni wæætē Pabodo tōnō Bedēnabee inate togænte pāninque, Mōnitō ōmæ quēwēnāmaī, ante wido cædāni godatapa. ⁵¹ Mǎnōmaī cædāni godinque tōmēna iñōmō, Mānimæ nāwate awædō, ante baī cædinque piwacæ piwacæ cædinque Icōnio iñōmō gocæte ante wadæ godatapa. ⁵² Itota ingante nē tee empote quēwēnāni guiquēnē watapæ todāni badinque Wængonguī Tæiyæ Waēmō Ōnōwoca ingante ænte ēwocadinque edæ waa quēwengadānīmpa.

14

Pabodo tōnō Bedēnabee Icōnio iñōmō godapa

¹ Māñī godinque Icōnio nāni quēwēñōmō pōninque Pabodo tōnō Bedēnabee cōwē nāna cæi baī cædinque oodeoidi odōmōincōnē go guīdatapa. Go guīte apǣneyōna, Nō apǣneda, ante pōnēninque oodeoidi tōnō oodeoidi ināmaī ināni tōnō nanguī ināni nāni wede pōnēnginque ēñēnānitapa. ² Wæætē oodeoidi incæ pancadāniya nē Baa ānāni inte babæ wapitīcæ apǣnedinque, Iñāna nē wēnæ wēnæ apǣneda inate wīi ēñengæīmpa. Ante tedewēnāni ēñente wædinque wadāni oodeoidi ināmaī ināni wæætē piinte badinque mōnō tōñīñada inate ante wīwa adānitapa. ³ Incæte iñāna wantæpiyæ māñiñōmō quēwēninque guīñēnedāmaī inte mōnō Awēñē beyæ apǣnedatapa. Apǣneyōna mōnō Awēñē incæ, Pabodo tōnō Bedēnabee iñōmō botō pōnō waadete cægāinō ante nē nō apǣneda inōnāna, ante wadāni pōnencædānīmpa, ante cædinque tōmēna tōnō godongāmæ cæcā ate tōmēna, Ate pōnencædānīmpa, ante mā cædinque bamōngengæ cædatapa.

⁴ Mānōmaī cæda incæte māniñōmō quēwēnāni pancadāniya, Oodeoidi bai pōnēmōnīpa, āñōnānite wadāni guiquēnē, Itota da godongā nē pōna bai pōnēmōnīpa, ante pancadāniya wadō pancadāniya wadō cædānitapa. ⁵ Īnīnque oodeoidi tōnō oodeoidi ĩnāmaī ĩnāni tōnō tōmēnāni awēñēdi tōnō godongāmæ pōnēnīnque, Pabodo tōnō Bedēnabee ĩnate mōnō piinte cædinque dicaa tacamō wæncædaīmpa. ⁶ Ante Ao ante cæyōnāni Pabodo tōnō Bedēnabee ĩñōmō, Mānōmaī ante cædānīpa, ante ēñente wædinque wodii wīnōnatapa. Wodii wīnonte godinque Dicaōniabæ pōnīnque tōmēna Ditada nāni quēwēñōmō Dedebe nāni quēwēñōmō wayōmō wayōmō godinque, ⁷ mōnō Awēnē ingantēdō ante watapæ māo godōmenque apænedā ēñēñōnānīmpa.

Ditada ĩñōmō Pabodo ingante tacadānīpa

⁸ Māniñōmō Ditada ĩñōmō edæ wacā cabæwaingā tōmengā ōnōwa tipæwaa wēnæ wēnæ ēwacā ēñagaingā inte dao dao godāmaingā pægaingā inte tæ contate a ongongantapa. ⁹ A ongōñongā Pabodo ponte apænecā ēñēe congantapa. Pabodo wææmō adīnque ōnōwēnenque pōnēnīnque, Īngā nānō waa bawāquinque nē pōnengā ingampa, ante do pōnente wædinque, ¹⁰ tōmengā ingante ogæ tedete,

—Engæ gantidīnque adiyæ gongæmi āmopa.

Angā ēñēnīnque nē cabæwaīngā incæ quingæ ængæ gantidīnque dao dao gocantapa. ¹¹ Māniñōmō ongōnāni guiquēnē Pabodo mānōmaī cæcā ate wædinque dicaōniāidi tōmēnāni tēdedō yedæ ānīnque,

—Īñāna ĩñōmō wængonguīna incæ waoda bai bate mōnō weca wæænte ongōna abāīmpa.

¹² Ante pōnente wædinque Bedēnabee ingantedō ante apænedīnque, Mōnō wængonguī Deoto ingānō anguēnē, ante Deoto pōnō pemōnīnque, Īngā wæætē nē apænecā ingampa, ante pōnēnīnque Pabodo ingante, Mōnō wængonguī Edēme ingānō anguēnē, ante pemōnānitapa. ¹³ Ayæ tōmēnāni quēwēñōmō yæcado tōmēnāni wængonguī Deoto oncō mænonte ongōnīmpa. Deoto quī, ante nē godongā ĩñōmō edæ, Pabodo tōnō Bedēnabee nē wængonguīna ĩnāpa, ante wapiticæ pōnēnīnque, Mōnō wængonguīna quī, ante tōmānāni tōnō godoncæ cæcantapa. Mānōmaīnō ante cædinque tōmengā nāni que cædi ōngai ænte pōnīnque wagadāidi ōnguīñæñāni ĩnānite yabædemō ænte ponte wæñoncæ cæcantapa. ¹⁴ Mānōmaī cæcā ate wædinque nē ponte apænedā Bedēnabee tōnō Pabodo ĩñōmō, Wīwa cæmīnīpa, ante bai cædinque nāmā weocoo wānā ñæñīnque pogodo māmō nanguī ongōnāni weca tæcægedē næ gongæñīnque,

¹⁵ —Īñānāni, quīmæ quēwēmīnī. Mīnitō waomīni ĩmīnīpa, mōnatō mīnitō bai adobai waomōna ĩmōna apa quēwēmīnī. Mōnatō ĩñæmpa watapæ mōna ēñēnō ante apænecæte ante pōnīmōna inte mīnitō ĩmīnīte ĩmaī ante āmōnāpa. Īncoo mīni waa adīncoo incæ edæ, Ōnoncooque ĩmpa, ante adīnque mīnitō mānīncooque wido cædinque Wængonguī nē Quēwengā gāmæñō pōedāni. Tōmengā ĩñōmō ōnæ ĩnguipoga gāwapæntibæ nē badongaingā inte ōnædē quēwēnāni tōmānāni ĩnguipoga quēwēnāni tōmānāni gāwapāa quēwēnāni tōmānāni ĩnānite nē badongaingā Wængonguī ĩnongā ingampa. ¹⁶ Tōmengā wēñēñēdē tōmāmæ quēwēnāni nāmā pōnēnīnque nāni goquīnonque ee acā gogadānīmpa. ¹⁷ Incæte tōmēnāni ĩnānite wīl æmæwo ēmō cæte gogacāīmpa. Wæætē edæ, Wængonguī æbānō ĩngāā, ante ēñencædānīmpa, ante cædinque tōmengā ñīmpo cædāmaī cōwē odōmongacāīmpa. Edæ mīnitō ĩmīnīte pōnō

waadete cædinque Wængonguī cōönæ angā inguipoga wææ ïninqe incadepo incadepo cænguī eyepæ pōnongā cæninque mīnitō watapæ todinque quëwëminipa.

¹⁸ Mānōmaīnō ante Pabodo tōnō Bedēnabee wææ cæcæte ante apæneda ëñēnāni incæte godongāmæ ongōnāni guiquēnē, Mīnatō wængonguīmīna quī, ante cōwē pōnoncæmōnimpā, ante wawīque pōnēninque cædānitapā. Wodo edæ pōnōñōnānite ïñāna godōmenque wææ āna ëñēninque ñimpo cæte wīi pōnōñānitapā.

¹⁹ Ayæ ate oodeoidi Antioquiya ïñōmō quëwëninque Icōnio ïñōmō quëwëninque pō Ditada ïñōmō pōninque māniñōmō godongāmæ ongōnāni ïñānite, ïñā onguīñæna ïnate mōnō wīi ëñengæimpa, ante ānāni. Ëñēninque godongāmæ Ao āninque Pabodo ingante dicaca tacadāni wæyongā, Æmæwo wængampa, ante pōnēninque tōmēnāni nāni quëwëñōmō yabæ ïnō wëā māo wido cædānitapā. ²⁰ Incæte Itota ingante tee empote quëwëñāni godongāmæ ponte æænīmæ gongænte ayōnāni Pabodo yabæque æmæwo wænte bai oñōningā inte ængæ gantidinque adodō tōmēnāni quëwëñōmō pongantapā. Ayæ ïimō ate tōmēngā Bedēnabee tōnō wæætē Dedebe nāni quëwëñōmō adodō gocæte ante wadæ godatapā.

²¹ Godinque Dedebe ïñōmō pōninque Codito ingantedō ante watapæ apæneda ëñēninque tōmēnāni nanguī ïñāni Itota mīñæ quëwëñāni bagadānimpā. ïninqe tōmēna māniñōmō idæwaa apænete wadæ godinque Ditada ïñōmō adodō pō godinque Icōnio ïñōmō adodō pō godinque Antioquiya nāni quëwëñōmō wæætē pōnatapā. ²² Mānōmaī wayōmō wayōmō godinque Itota ingante nē tee empote quëwëñāni ïñānite bee tēninque Pabodo tōnō Bedēnabee nanguī apæneda ëñēninque ïñāni godōmenque tæi piñænte entawēñāni badānitapā. Ayæ tōmēnāni ïñānite, Mīni pōnēnō ante ñimpo cædāmaī inte godōmenque wede pōnēninque tæi ongoncæminimpā, ante ædæmō apæneda ëñēñānitapā. Ayæ waadete apænedinque, Mōnō nanguī nantate wædinque Wængonguī Awēnē Odeye nempo guicæimpa, ante apænedatapā. ²³ Ayæ wayōmō wayōmō tōmāo godinque Itota ingante godongāmæ nāni pōnencabo weca go guite ongōninque Pabodo tōnō Bedēnabee ïñōmō ïmaī cædatapā. Nē nō cædāni ïñānite adinque tōmēna, Itota Codito ingante mīni godongāmæ pōnencabo ïñōmīnite ïñānique edæ nē aadāni bacædānimpā, ante āna ate māniñānique nē Picænāni nāni ānōnāni badānitapā. Ayæ cænāmaī inte Wængonguī ingante apænete ate tōmēnāni ïñānite ïñāna, Mīnitō mōnō Awēnē ingante wede pōnēmīnitawoo. Tōmēngā mīni nē pōnēnongā incæ mīnitō ïmīnite wææ aacæcāimpa, ante apænedatapā.

Tidiabæ Antioquiya ïñōmō occæ ëmænte godapa

²⁴ Pabodo tōnō Bedēnabee ayæ Pitidiabæ wodo tebæ godinque Pampidiabæ pōnatapā. ²⁵ Māniñōmō ponte Pedegue nāni quëwëñōmō mōnō Awēnē nānō angainō ante apænedinque Ataya nāni quëwëñōmō wææ pōnatapā. ²⁶ Māniñōmō pōninque tōmēna ïmæmāa Antioquiya ïñōmō adodō tacæte ante ñænæ wipodē guiddatapā. Doyedē ïñōmō tōmēna ïñāna māniñōmō quëwente tō goyedē wadāni nē pōnēñāni inte tōmēna ïnate, Wængonguī pōnō waadete godongāmæ cæcā ate mīnatō eyepæ cæcæminaimpā, ante da godongaināni ïñōñānimpā. Nōwo ïñōmō tōmēnāni nāni āniñō do ïninqe eyepæ cædīna inte tōmēna adoyōmō nāni da godiñōmō occæ ëmænte pōnatapā. ²⁷ Māniñōmō pōninque tōmēnā Itota ingante godongāmæ nāni pōnencabo ïñānite āñete pōnāni ate tōmēnāni ïñānite apænedinque Wængonguī tōmēna tōnō nānō cædinō ante adodō adodō tōmānō ante apænedatapā. Oodeoidi ïnāmaī ïñāni wede pōnēninque guicædānimpā, ante Wængonguī odemō wi ænete bai cæcā

ate do pōnente badānīpa, ante apæneda ēñēnānitapa. ²⁸ Ayæ māniñōmō Itota ingate nē tee empote quēwēnāni tōnō wantæpiyæ quēwengadainpa.

15

Edotadēē iñōmō pōninque wæætedō wææte ānāni

¹ Māniñedē onguīñānāni Oodeabæ quēwēnāni pancadāniya Antioquiya iñōmō wææ pōninque nē pōnēnāni inānite iīmaī ante odōmonte wææ angadānīpa. Mīnitō bagāamīni inte Mōitee wodi nānō wææ angainō bai wīi cæmīni adinque Wængonguī dicæ ængampa quēwenguīmīni. ² Ante wææ ānewēnāni ēñente wædinque Pabodo tōnō Bedēnabee iñōmō, Quīmæ ānewēmīni, ante nāēmæ wææ ānatapa. Ininque Antioquiya iñōmō quēwēnāni guiquēnē Pabodo tōnō Bedēnabee tōnō wadāni nē pōnēnāni inānite, Mīnitō Edotadēē godinque Itota nānō da godongaināni tōnō nē aadāni Picænāni inānite bee tēninque, Oodeabæ quēwēnāni nāni wææ ānōnō ante æbānō cæquī, ante ēñencæte ante ædāni.

³ Āninque Itota Codito ingante godongāmæ nāni pōnencabo incæ Pabodoidi inānite da godōnāni wadæ godānitapa. Ayæ godinque Pēnitīabæ wodo tebæ godinque mānimæ quēwēnāni inānite apænedinque godōmence Tāmadiabæ adobaī wodo tebæ gote apænedinque, Wængonguī pōnō cæcā ante oodeoidi ināmaī ināni incæ mōnō Awēnē gāmænō do pōnānīpa, ante Pabodoidi apænedāni. Eñēninque mōnō tōniñadāni mānimæ quēwēnāni incæ watapæ tōdānitapa.

⁴ Pabodoidi Edotadēē iñōmō pōnāni adinque Codito ingante nāni godongāmæ pōnencabo tōnō Itota nānō da godongaināni tōnō nē pōnēnāni inānite nē aadāni nē Picænāni tōnō godongāmæ ponte ongōninque Pabodoidi inānite, Waa pōmīni amōnīpa. Ante añōnānite Pabodo tōnō Bedēnabee iñōmō, Wængonguī iīmaī mōnatō tōnō godongāmæ cæcampa, ante tōmānō ante adodō adodō apæneda ēñēnānitapa. ⁵ Māniñedē Paditeoidi incæ pancadāniya nē pōnēnāni badīnāni inte ængæ gantidinque iīmaī ante apænedānitapa.

—Iñæmpa oodeoidi ināmaī ināni inānite, Cōwē ēō togænguēnēmīni iīmīnīpa, ante mōnō wææ angæīmpa. Ayæ Mōitee wodi, iīmaī cæedāni, ante nānō angainō ante ēñenguēnēmīni iīmīnīpa, ante mōnō cōwē angæīmpa.

⁶ Ānāni ate Itota nānō da godongaināni tōnō nē pōnēnāni inānite nē aadāni Picænāni tōnō godongāmæ pōninque, Oodeoidi ināmaī ināni inānite mōnō æbānō anguī, ante tedecōnānitapa. ⁷ Māninō ante wæætedō wææte apænedāni adinque Pegodo guiquēnē ængæ gantidinque godongāmæ ongōnāni inānite iīmaī ante apænecantapa.

—Botō mēmōidi, mīnitō iīmaīnō ante do ēñēmīnīpa. Wængonguī do Inōñedē, Oodeoidi ināmaī ināni incæ Codito ingantedō ante watapæ ēñēninque edæ nē pōnēnāni bacadānīpa, ante cædinque mōnō imonte apænte æninque botō imote angā gote māninō ante apænebo ēñēnānitapa. ⁸ Da godongā gote apæneyōmo Wængonguī, Waocā æbānō mīmōno pōnengā ingā, ante nē ēñēnongā inte edæ tōmengā Tæiyæ Waēmō Ōnōwoca ingante oodeoidi ināmaī ināni inānite da pōnongā ænte ewocadānīpa. Ininque mōnō imonte pōnō cæcā bai tōmēnāni inānite adobaī cædinque tōmengā edæ, Oodeoidi ināmaī ināni inānite botō Ao ante do æmpopa, ante odōmongā abainpa. ⁹ Tōmēnāni wede nāni pōnēnō beyænque Wængonguī tōmēnāni mīmō ñā mēnongadinque, Oodeoidi ināmaī ināni incæ mīnitō bai adobaī ināni apa ānewēmīni, angampa. ¹⁰ Mōnō iñōmō mōnō mæmæidi tōnō teēmē mongænte bai wædinque edæ, Mōitee wodi nānō wææ angainō ante mōnō ædō cæte ēñente cæquī, ante godongāmæ

wægamoïmpa. Nōwo guiqüenē Oodeoidi ināmai ināni incæ tæcæ pönēñōnānite mīnitō iñōmō teēmē cōnōnancapænte bai cædinque tōmēnāni inānite, Cæedāni, ante wææ āminipa tōō. Mānōmai cædinque mīnitō, Wængonguī ōnonque cæcampa, ante bai cæminipa tōō. ¹¹ Iñæmpa mōnō Awēnē Itota pōnō waadete ængā beyænque tōmēnāni wænāmai inte quēwēnāni bai mōnō adobaī mānīnō beyænque wænāmai inte quēwēmōmpa, ante pōnēmōnīpa. Mānōmaīnō ante Pegodo iinque apæncā ēñēnānitapa.

¹² Ayæ Bedēnabee tōnō Pabodo wæætē tōmēnāni inānite apænedā ēñēninque godongāmæ ongōnāni tōmānāni edæ tededāmai inte ēñē cōnānitapa. Tōmēna iñōmō, Wængonguī mōnatō tōnō godongāmæ cædinque edæ, Mīnatō mā cæmīna adinque Oodeoidi ināmai ināni incæ pōnencādānīmpa, ante cædinque bamōnengæ wæætē wæætē cæcantapa, ante adodō adodō ante apænedatapa.

¹³ Iinque apænedā ate Tantiago wæætē tōmangā apæncantapa.

—Botō biwīdi, botō nōwo apænebo ēñēedāni. ¹⁴ Wængonguī tāno waadete pōnō cædinque oodeoidi ināmai ināni pancadāniya inānite apænte æninque, Botō quīmīni bacæminīpa, ante cæcantapa, ante Timōnō do apæncā ēñentamōmpa. ¹⁵ Ayæ Wængonguī beyæ nē apænegaināni incæ, Iincayæ ate Wængonguī mānōmai cæcæcāiimpa, ante pōnēninque adoyōmō ante iīmaīnō ante do yewæmongadānīmpa.

¹⁶ “Awēnē Dabii nempo nē quēwengaināni nāwæ godāni adinque botō iñōmō oncō wodintai wæætē tæi mænonte bai cædinque, iincayæ ate adodō pōninque pōnō cæbo ate nāwæ gogaināni iñōmō Awēnē nempo adodō pōninque quēwencādānīmpa.

¹⁷ Mānōmai cæbo ate edæ wadāni tōmāmæ quēwēninque oodeoidi ināmai ināni incæ botō ēmōwo ante nē ēwocadāni inte nāwā Awēnē ingante ante diqui diqui minte acādānīmpa,

¹⁸ ante mōnō Awēnē iñōmō edæ mānīnō ante nē cægāingā iñongā inte, do cæcā nāni ēñengainō ante apæncampa.”

¹⁹ Ante yewæmongatīmpa, ante Tantiago godōmenque apæncantapa. “Botō Wængonguī nānō apænegainō ante pōnente wædinque, Iīmai cæcæiimpa, ante pōnēmōpa. Oodeoidi ināmai ināni, Idæwaa wapiticæ pōnente awædō, ante wædinque ocæ ēmænte nāwā Wængonguī gāmænō pōñōnānite mōnō edæ ee cædinque tōmēnāni taadō ganta cædedāmai ingæiimpa. ²⁰ Ōnonque, Tōmēnāni acādānīmpa, ante iīmai ante yewæmongæiimpa, Wadāni, Wængonguīdi quī, ante cænguī nāni cōnōnī cænāmai incæminīmpa. Ayæ nānōogængā ināmai iñongante godō mōnāmai incæminīmpa. Ōōingā nē wēmencate wæningā ate cænāmai incæminīmpa. Baō wepæ owemōingā i adinque cænāmai incæminīmpa, ante mōnō yewæmongæiimpa, āmōpa. ²¹ Edæ doyedē pōnī oodeoidi nāni quēwēñōmō nāni quēwēñōmō tōmāā iñōmō māo Mōitee wodi nānō wææ angainō ante apænedāni ēñengadānīmpa. Ayæ nōwo ganca adobainō ante guēmanguīōnæ iñō guēmanguīōnæ iñō mōnō odōmōincōnē go guiite apænedāni ēñente mānōmaīnō ante ēñente cæquēnēnāni inānīpa. Mānīnonque ante mōnō yewæmongæiimpa, āmōpa,” ante Tantiago iinque apæncantapa.

Oodeoidi ināmai ināni acādānīmpa, ante yewæmōnānīpa

²² Mānōmaīnō ante apæncā ēñēninque Itota nānō da godongaināni tōnō nē aadāni Picānāni tōnō Itota Codito ingante godongāmæ nāni pōnencabo tōmancabo tōnō godongāmæ pōnēninque, Mōnō cabo incæ mēnaa inate apænte æninque tōmēna inate, Mīnatō Pabodo tōnō Bedēnabee miñæ Antioquiya goeda, āmō gocædaimpa. Ante Ao āninque tōmēnāni, Mōnō pōnencabo iñōmonte

Codaa Badatabato mōnō ānongā tōnō Tidato iñōmō nē āna inapa, ante adinque tōmēna inate apænte ænānitapa. ²³ Ayæ, Cadota ante ænte gocædānimpa, ante iīmaī ante yewæmongadānimpa.

Mōnitō pancamōniya Itota nānō da godongaimōni iñōmōni pancamōniya nē pōnēnāni inānite nē aamōni Picæmōni imōnipa. Mānōmaī imōni inte mōnitō mīnitō tōniīnamōni imōnipa. Mīnitō oodeoidi ināmaī imīni inte Antioquiya iñōmō Tidiabæ iñōmō Tiditiabæ iñōmō quēwēninque mīni pōnencabo mīni pōnencabo iñōmīnite mōnitō, Waa quēwēncæmīnimpa, āmōnipa.

²⁴ Iīmaī ante tededāni ēñentamōnipa. Mōnitō, Goedāni, ānāmaī iñōmōni wadāni mōni cabo incæ pancadāniya wadæ gote mīnitō weca pōninque mīnitō imīnite, Eō togæedāni, ante wææ ānāni. Eñēninque mīnitō tōmēnāni nāni wææ ānīnō beyænque teēmē mongænte bai, Æbānō cæquūī, ante wæmīnipa, ante tededāni ēñēmōnipa. ²⁵ Mānōmaīnō ante tededāni ēñente wædinque mōnitō godongāmæ pōnēninque onguīñæna mēnaa inate apænte æninque tōmēna inate iīmaī antamōnipa. Mīnatō Bedēnabee tōnō Pabodo mōnō nē waadedā tōnō godongāmæ godinque oodeoidi ināmaī ināni weca goeda, ante cætāmōnipa. ²⁶ Bedēnabee tōnō Pabodo iñōmō mōnō Awēnē Itota Codito ēmōwo beyænque cædinque nāna nāmā wodo wænguinque cædatapa. ²⁷ Iīninque, Iī cadota mōni yewæmōnō nāwangā impa, ante adodō ante apænecædaimpa, ante cædinque mōnitō Codaa tōnō Tidato inate da godōmōni godinque mīnitō weca pōna aedāni. ²⁸ Edæ, mōnitō Wængonguī Tæiyæ Waēmō Ōnōwoca tōnō godongāmæ pōnēninque, Mīnitō godōmenque teēmē mongænāmaī incæmīnimpa, antamōnipa. Iīninque, Mīnitō iīmaī cædinque idæwaa, ante pōnēmōnipa.

²⁹ Wadāni, Wængonguīdi quī, ante cænguī nāni cōnōnincoo ante cænāmaī gomō aedāni. Wepæ owemōingā adinque oōingā ñē wēmencate wæningā adinque cænāmaī iedāni. Ayæ nānōogængā ināmaī iñongante godō mōnāmaī iedāni. Mīnitō māninque ante ee ate cædāmaī imīni iīninque waa quēwēmaimīnipa. Māninque ante yewæmōmōnipa.

³⁰ Ante yewæmonte pædæ pōnōnāni ænte wadæ godinque Antioquiya iñōmō wæidinque nē pōnēnāni inānite āñete godongāmæ pōnāni ate Eedotadēē quēwente pōnāni tōmēnāni nāni yewæmōninta pædæ pōnōnāni ænte adānitapa. ³¹ Eedotadēē quēwēnāni, Mīnitō godōmenque teēmē mongænāmaī incæmīnimpa, ante nāni yewæmonte ānīnō adinque oodeoidi ināmaī ināni iñōmō wampo pōninque todānitapa. ³² Codaa tōnō Tidato iñōmō Wængonguī beyæ nē apæneda inte adobai, Tæī piñænte entwæncæmīnimpa, ante cædinque ædæmō apæneda ēñēninque tōmēnāni nāni pōnencabo mīmōnē gancæ batawente wede pōnēnānitapa. ³³ Iīninque tæōnæ quēwēna ate māniñōmō quēwēnāni nāni pōnencabo wæætē tōmēna inate waa apænedinque, Ñōwo gānē pōnēninque waa goeda, ante tōmēna inate nē da pōnōnāni weca wæætē adodō da godōnāni godatapa. ³⁴ Tidato guiquēnē, Iñōmō ongoncæboimpa, ante ayæ ongongantapa. ³⁵ Pabodo tōnō Bedēnabee guiquēnē Antioquiya iñōmō ayæ quēwēninque wadāni nangūī ināni tōnō godongāmæ odōmōninque Wængonguī nānō ānō ante watapæ apæneda ēñengadānimpa.

Pabodo ingante wæætē da godōnāni gocampa

³⁶ Iīncayæ ate Bedēnabee ingante Pabodo,

—Wēēnēñedē Wængongui nānō ānō ante mōna gote apænediñōmō wæætē adoyōmō gote mōnatō tōniñadāni weca gote ēñadinque, Æbānō quēwēnāni, ante acæmōnaimpa.

³⁷ Āñongā Bedēnabee Ao angantapa. Ayæ tōmengā, Wāō Māadoco nāni ānongā ingante mōnatō tōnō godongāmæ gocæcāimpa, ante cæcantapa. ³⁸ Pabodo guiquēñē, Īñæmpa wēēnēñedē Pampidiabæ iñōmō pōñōmōnate ĩngā Māadoco iñōmō mōnatō tōnō godōmenque cædāmai inte edæ wadæ gocantapa, āninqe, Ñōwo wīi ænte gocæimpa, ante Baa angantapa. ³⁹ Īninqe tōmēna wæætēdō wæætē āninqe tōmēna wadō wadō gote panguimæ godatapa. Bedēnabee guiquēñē Māadoco ingante ænte ñænæ gāwapāa gote wipodē ñænæmpodē guite wogaa godinqe wāā tēiwañē Tipidebæ tao gocantapa. ⁴⁰ Pabodo guiquēñē Tidato ingante apænte ænte gocæ cæyongante tōmēnāni nāni pōnencabo iñōmō tōmēna inate apænedinqe, Wængongui mīnatō beyæ pōnō waadete cæcæcāimpa, ānāni ēñēninqe wadæ godatapa. ⁴¹ Ayæ Tidiabæ tōmāo godinqe Tiditiabæ tōmāo godinqe Pabodo iñōmō Codito ingante nāni godongāmæ pōnencabo inānite apæneca ēñēninqe tōmēnāni wede pōnēninqe tæi piñænte batawengadāimpa.

16

Pabodo tōnō Tidato miñcē Īmoteo gocampa

¹ Mānīi godinqe Pabodo Dedebe iñōmō ponganque go Ditada iñōmō pongantapa. Itota ingante tee empote nē gocā Īmoteo māniñōmō quēwengacāimpa. Tōmengā wāānā oodea inōna incæ nē ædæmō cæte pōnēnā inōnāimpa. Īmoteo mæmpo wæætē guidiego ĩnongāimpa. ² Īmoteo iñōmō Itota ingante pōnente quēwengā adinqe nē pōnēnāni Ditada iñōmō quēwēnāni incæ Icōnio iñōmō quēwēnāni incæ, Īmoteo nē waa quēwēnongā ingampa, ante adoyōmō apænedānitapa. ³ Īninqe Pabodo, Botō tōnō Īmoteo guēa gocæcāimpa, angantapa. Wæætē, Oodeoidi mānimæ quēwēnāni tōmēnāni, Īmoteo mæmpo guidiego ingampa, ante do ēñēnāni inte pīnāni wæcæ wæ. Āninqe Pabodo angā yæcadogæ ēō togænāni ate Īmoteo ingante ænte gocantapa. ⁴ Godinqe Pabodoidi wayōmō nāni quēwēñōmō wayōmō nāni quēwēñōmō godinqe ĩmai ante apænedānitapa. Minitō oodeoidi ināmai ĩmīni inte æbānō ēñente cæte quēwengūmīnīni, ante Eedotadēē iñōmō nē aadāni Picænāni tōnō Itota nānō da godongaināni tōnō godongāmæ pōnēninqe do ānānipa. Ante apænedinqe Pabodoidi wæætē tōmēnāni nāni ānīnō ante adodō ante apænedāni ēñēnānitapa. ⁵ Mānōmai apænedāni ēñente wædinque Codito ingante nāni godongāmæ pōnencabo iñōmō wayōmō nāni cabo wayōmō nāni cabo tōmānāni wede pōnēninqe edæ tæi piñænte badinqe ĩmō ĩñō godōmenque ĩmō ĩñō godōmenque nanguī yebænte bagadānimpa.

Māatedōniabæ quēwengā ingante Pabodo wīmonte acā

⁶ Pabodoidi Atiabæ gocæ cæyōnānite Wængongui Tæiyæ Waēmō Ōnōwoca ĩmai ante apænecantapa. Minitō botō ānō ante mānimæ apænece godāmai incæmīnimpā, ante wææ angā ēñente wædinque tōmēnāni wæætē Gadatiabæ incæ pancabaa Pidiqiabæ tōmāo cægōninqe godānitapa. ⁷ Mānimæ cægōnaque go Miitiyabæ ganca pōninqe Bitiniabæ gocæ cæyōnānite Itota Tæiyæ Waēmō Ōnōwoca incæ, Godāmai, Baa angā wædinque tōmēnāni māniñōmō ĩmpo cæte godōmenque godāmai inānitapa. ⁸ Mānōmai beyæ tōmēnāni Miitiyabæ wodo pænta go Todoa iñōmō wæi godānitapa.

⁹ Māniñōmō wæi gote ongōninqe woyowotæ ba ate Pabodo wīmonte bai ayongā Māatedōniabæ onguñængā a ongōninqe tōmengā ingante ĩmai ante

apænecantapa. “Māatedōniabæ pōninqe bitō mōnitō imōnite pōnō cæquīmi āmōnīpa,” ante Pabodo ingante angā ēñgantapa. ¹⁰ Īninqe Pabodo, Mānōmāi wīimonte baī atabopa, ante apænecā ēñente wædinque mōnitō wæætē, Mīnitō Māatedōniabæ gote māo apænemīni ēñencædānīmpa, ante Wængonguī incæ cæbaingampa. Ante pōnente wædinque botō Odocabo tōnō wadāni Pabodo tōnō nē godongāmæ cædāni tōnō wæætē, Mōnō māniñōmō gote Codito ingantedō ante watapæ apænecæīmpa, ante pōnēninqe gocæte ante cætāmōnīpa.

Pabodo tōnō Tidato Pidipoto iñōmō ponte cædapa

¹¹ Mānōmāinō ante pōnēmōni inte mōnitō Todoa iñōmō gāwapæ wedeca quēwēninqe ñænæ wipodē guīte wogaa tao godinque wāā tēiwænē Tāmotadate tōingā gote mōninqe iimō ate tao Nēapodi pontāmōnīpa. ¹² Māniñōmō pō ti wææninque taadonque godinque mōnitō Pidipoto odōmānoidi nāni ponte quēwēñōmō adoyōmō pōninqe tæōnæ quēwentāmōnīpa. Māatedōniabæ incæ pancabaa quēwēñāni nāni yæcado quēwēñōmō Pidipoto impa. ¹³ Mōnitō māniñōmō ponte quēwēninqe guēmanguīōnæ iinque bayonte tōmēnāni nāni quēwēñōmō yabædemō tao godinque, Ōnō wedeca Wængonguī ingante godongāmæ apænebainānīpa, ante ōnōwēnenque pōnēninqe māniñōmō gotāmōnīpa. Māniñōmō ponte ayōmōni onquiyænāni do godongāmæ ponte a ongōnāni adinque mōnitō tæ contadinque tōmēnāni inānite apænetāmōnīpa. ¹⁴ Māniñōmō nē ēñēnāni tōnō adodanque tōmēnā ēmōwo Didia iñōmō Tiatida quēwēñōnā inte weocoo awēñēidi nāni opatawæ ēmoncoo godonte ænte quēwēñōnāīmpa. Tōmēnā Wængonguī ingante nē waa ate pōnēnā inonāīmpa. Īninqe Pabodo apænecā ēamonca ongonte ēñēñōnante mōnō Awēñē tōmēnā mīmō wi ænete baī cæcā ate tōmēnā wede pōnēnantapa. ¹⁵ Īninqe tōmēnā nāni owocabo pōnēninqe godongāmæ æpænē guīdāni ate tōmēnā iñōmō mōnitō imōnite apænedantapa.

—Botō imote ante adinque mīnitō, Mōnō Awēñē ingante Didia ædæmō cæte pōnengā ingampa, ante pōnēmīnitawoo. Mānōmāinō ante pōnēmīni inte mīnitō botō oncñē ponte owoedāni, āmpa.

Ante ancaa apænedā ēñente wædinque mōnitō Ao ante gote owotāmōnīpa.

¹⁶ Māniñēdē wacā onquiyængā obe badā inongā inte wadāni nempo quēwēninqe tōmēnāni beyænque nē cæte quēwengā inongāīmpa. Tōmengā iñōmō nē cæwēnengā inte wadāni inānite, Īncayæ ate æbānō baquīi, ante yewænte tedecā inongāīmpa. Tedecā ēñēninqe nē ēñēnāni wæætē tōmēnāni nāni godonte æinta bacoo pædæ pōnō pædæ pōnō cædāni incæte tōmengā awēñēidi wæætē ō æ ō æ cædōnānīmpa. Īninqe māniñōmō quēwēninqe mōnitō ayæ ate Wængonguī ingante nāni apæneiñōmō adodō gocæ cæyōmōnīte māningā onquiyængā māmō bee tengantapa. ¹⁷ Mānōmāi bee tēninqe tōmengā mōnitō Pabodo tōnō mōni gocabo iñōmōnīte tee empo tee empo pōninqe yedæ angantapa.

—Īnāni Wængonguī Æibæ pōni Quēwengā ingante nē cædāni inte mīnitō imīnīte apænedinque, Æcānō ængā beyænque quēwenguīi, ante apænedānīpa.

¹⁸ Āninqe tæōnæ iñōnte tōmengā tōmēnāni inānite tee empote godinque Yæ yæ ānewengā ēñente wædinque Pabodo, Ancaa ēñente awædō, ante dadi ēmænte wēnæ ingante āninqe,

—Bitō imite botō Itota Codito ēmōwo apænedinque, Tao gobāwe, āmpa.

Ante tæcæ apæneyongā wēnæ incæ baquecā ingante ēmō cæte tao gocan-
tapa.

19 Pabodo mǎnōmaī angā ate tao go ate wædinque onquiyængā awēnēidi guiquēnē, Æ tōmengā yewængā beyæ mōnō æincædō incæ dæ gotimpa. Nōwo æbānō cæte nanguī ænguimōō. Ante piinte wædinque tōmēnāni, Mōnō tōmēna inate odōmāno awēnēidi weca ænte gocæimpa, ante Pabodo tōnō Tidato inate bæi ongonte wēā mǎo tōmēnāni nāni godonte æiñōmō ænte godānitapa. 20 Ayæ odōmāno awēnēna tōmēnāni quēwēñōmō nē apænte āna iñōnate nē piinte cædāni mǎnīna awēnēna weca Pabododa inate ænte māmō gō cædinque,

—Īina iñōmō edæ oodeoda inōna inte mōnitō quēwēñōmō ponte wēnæ wēnæ apæneda ēñēninque tōmānāni ænguī badinque Yæ yæ ānānīpa. 21 Mōnō odōmānocabo mōnō wū cæquēnēnō ante odōmonte apænedinque tōmēna iñōmō, Mānīnonque cædāni, ante ancaa ānewēnāpa.

22 Ante tæcæ apæneyōnāni godongāmæ ongōnāni iñacabo cædinque Pabodo tōnō Tidato inate piinte cædānitapa. Ayæ odōmāno awēnēna iñōmō, Tōmēna weocoo gā tadongate tæi tæi pædāni. 23 Āna ēñente tæi tæi pānāni wæyōnate awēnēna godōmenque āna ēñente cædinque tōmēna inate bæi ongonte mǎo tee mōnedinque tee mōneincō nē aacā ingante, Īina inate bitō ædæmō wææ ae, ānatapa. 24 Īinque mǎnōmaī ānāni ēñente wædinque nē wææ wānongā wæætē Pabodo tōnō Tidato inate guimongacōnē mangucā guiddatapa. Ayæ godōmenque tōmēna ōnōwa awæmpaa goti guidōwate tæi tee mōnecā ongōñōna wadæ taocantapa.

25 Ayaōnænēnā bayō Pabodo tōnō Tidato mǎnōmaī goti guidōwate wægōninque Wængonguī ingante apænedinque āmotamīni ānecōñōnate wadāni nē tee mōnete ongōnāni ēñē cōnānitapa. 26 Īñontobæ goinque nanguī ocæ ocæ pōninque tee mōneincō tæñōninca incæ wanæ wanæ cæyō odemō tōmānemō wi æmænete gotapa. Ayæ tōmānāni inānite nāni tæi pōni yaēmengō nāni nāni nānimē incæ nīmæncæ nīmæncæ wææntapa. 27 Tee mōneincō nē aacā guiquēnē iñontobæ nāni ōmæmonte ayongā, Odemō dobæ wi æmænete gotimpa, ante wædinque tōmengā, Æ tee mōnete ongōnīnāni dobæ tao wodii wīnōnānīpa, ante pōnente wædinque, Botō awēnēidi piinte pānāni wænguī wæ, ante pōnēninque nāmā wænonte wæncæte ante yaēmē o togænte ængā. 28 Ate wædinque Pabodo iñontobæ ogæ tededinque,

—Nāmā wēnæ wēnæ cædāmaī. Ee ae. Tōmāmōni ayæ ongōmōni apa quēwēē.

29 Angā ēñēninque nē wææ wānongā iñōmō edæ, Tīca wodōnoi ænte pōedāni, angā ænte pōnāni æninque tōmengā pogodo pōninque ancai guñente wædinque do do wāate wædinque Pabodo tōnō Tidato ōnōwa inō wæængantapa.

30 Ayæ ængæ gantidinque edæ tōmēna inate oncado ænte mǎocā tayōnate,

—Minatō nē āmīna inte apænemīna ēñēmoeda. Botō æbānō cæte quēwenguimoo, ante wæcā.

31 Ēñēninque tōmēna wæætē,

—Awēnē Itota ingante edæ wede pōnēmi ate tōmengā ængā beyænque quēwæncæbiimpa. Mīni owocabo tōmāmīni adobaī wede pōnente quēwæncæmīnīpa, ānatapa.

32 Āninque tōmēna nē wææ wānongā ingante godōmenque Wængonguī Awēnē nānō apænegainō ante apænedinque tōmengā oncōnē nāni owocabo tōmānāni inānite apæneda ēñēnānitapa. 33 Ayæ woyowotæ incæ tōmēna inate æninque nē wææ wānongā iñōmō tōmēna inate tæi tæi pānāni nāna æbāate wædiñōmō nā mēnongacantapa. Ayæ tōmengā nāni wæncabo do æpænē guiddānitapa. 34 Ayæ tōmengā oncōnē ænte mængā ææ guiyōna tōmēna

inate cænguī godongā cænatapa. Ayæ tōmengā nāni wencabo nē Wængonguī ingante pōnēnāni badināni inte watapæ todānitapa.

³⁵ Baānæ ate odōmāno awēnēna guiquēnē poditiyaidi inānite nē wææ wānongā weca da godōninque, Pabodo tōnō Tidato inate űimpo cæbi gocædaimpa, āmīni ēñengāeda, angā ēñēninque godānitapa. ³⁶ Ponte odōmāno awēnēna ēmōwo ante apænedāni ēñēninque nē wææ wānongā wæætē Pabodo ingante apænedinque,

–Poditiyaidi űōwo ponte apænedinque, Pabodo tōnō Tidato inate űimpo cæbi gocædaimpa, ante odōmāno awēnēna ānapa, ante apænedānīpa. Īninque mīnatō űōwo taote godinque piyānē cæte ee goeda.

³⁷ Angā ēñēninque Pabodo wæætē poditiyaidi inānite apænedinque,

–Mōnatō odōmānomōna imōna incæte nē apænte āna weca apænedāmaī ĩñōmōnate tōmēna āna tōmānāni ayōnāni edæ mōnatō imōnate tæi tæi pāninque tee mōnedānitapa tōō. Tee mōnedāni wæyōmōna űōwo wæætē mōnatō imōnate awēmō wido cæcæte ante cædānīpa tōō. Mōnatō ĩñæmpa edæ Baa āmōnapa. Awēnēna incæ ĩñōmō pōninque mōnatō imōnate ænte māoda gocæmōnaimpa.

³⁸ Mānōmaīnō ante apæncā ēñente wædinque poditiyaidi tōmēnāni awēnēna weca adodō godinque Pabodo nānō apænedō ante adodō ante apænedānitapa. Ayæ, Pabodo tōnō Tidato odōmānoda ĩnapa, ante apænedāni ēñēninque odōmāno awēnēna guiquēnē guīñente wædatapa. ³⁹ Ayæ guīñente wædinque awēnēna incæ Pabodo tōnō Tidato weca ponte waadete apænedinque, Mōnatō oda cædinō ante mīnatō odōmānomīna imīna inte piñte ānāmaī ĩeda, ante āninque Pabodo tōnō Tidato inate ænte māoda taoda adinque tōmēna ĩnate, űōwo mōnitō quēwēñōmō ēmō cæte wadæ goeda, āmōnapa.

⁴⁰ Āna ēñente taodinque onquiyānā Didia oncōnē go guīdinque Pabodo tōnō Tidato ĩñōmō, Nē pōnēnāni wampo pōnēninque tæi ongoncædānīmpa, ante cædinque ædæmō apænedinque wadæ gogadaimpa.

17

Tetadōnica ĩñōmō quēwēnāni Yæ yæ ānānīpa

¹ Mānūi godinque Pabodo tōnō Tidato Ampipodi nāni quēwēñōmō wodo tebæ godaque go Apodōnia nāni quēwēñōmō wodo tebæ godaque go Tetadōnica nāni quēwēñōmō pōnatapa. Mānīñōmō oodeoidi Wængonguī apæncā nāni ēñente yewæmongainta ate odōmōincō nāni mænongaincō mæ ongō. ² Adinque Pabodo cōwē nānō cæi bai cædinque quēmanguīōnæ bayō quēmanguīōnæ bayō mēōnaa go adoñnæque ĩñonte tōmēnāni odōmōincōnē go guīdinque edæ Wængonguī angā ēñente nāni yewæmongaintaa ate adinque tōmēnāni ĩnānite, ĩmaī ĩmpa quēwēmīni, ante nō apæncantapa. ³ Tōmēnāni ĩnānite edonque apænedinque Pabodo, Wængonguī beyæ nē apænegaināni ĩmaī ante do yewæmongadānīmpa, angantapa. Mōnō Codito ĩncayæ ate pōninque cōwē caate wæquēnengā ĩngampa. Ayæ adocā wænte ate cōwē űāni ōmæmonte quēwenguēnengā ĩngampa, ante yewæmongadānīmpa, ante Pabodo apæncantapa. Ayæ godōmenque apænedinque,

–Itota botō nē ānongā incæ adocā mōnō Codito ĩnongā ĩngampa, ante apæncantapa.

⁴ Mānōmaī apæncā ēñēninque oodeoidi pancadāniya, Nō ĩmpa, ante pōnēninque Pabodo tōnō Tidato mīñæ godānitapa. Ayæ guīdiegoidi nangū ĩnāni Wængonguī ingante nē guīñēnāni inte adobai pōnēninque tōmēna mīñæ godānitapa. Ayæ awēnēidi bai ĩnāni onquiyānāni incæ nangū ĩnāni adobai pōnēninque tōmēna mīñæ godānitapa. ⁵ Mānōmaī pōnēnānīpa, ante

wædinqe oodeoidi guiquēnē piinte wædinqe iīmaī cædānitapa. Tōmēnāni nāni godonte æiñōmō gote ayōnāni nē wiwa cædāni ongōnāni adinqe tōmēnāni inānite ānāni Ao ante godongāmæ pōninqe oodeoidi tōnō iñacabo cædinqe Yæ yæ ante piinānitapa. Mānōmaī yedæ ānāni ēñente wædinqe māniñōmō quēwēnāni tōmānāni godongāmæ piinte badinqe Yæ yæ ānānitapa. Oodeoidi iñōmō, Mōnō Yatōnō oncōnē guidingue Pabodo tōnō Tidato inate da tadōninqe nē piinte cædāni inānite da godōmō æncædānimpa, ante cædinqe diqui diqui mincæte ante tee gāwade guidānitapa. ⁶ Wāānē guidingue tōmēna inate adāmaī ināni inte oodeoidi wæætē oncō nē ēacā Yatōnō ingante yao ongōninqe wadāni nē pōnēnāni inānite yao ongonte wēā tadō māo tōmēnāni nāni quēwēñōmō awēnēidi weca ænte godānitapa. Ayæ, ogæ tededinque,

—Iīna onguīñæna iñōmō tōmāmæ quēwēnāni inānite wapiticæ nē apænedina inte ñowo wæætē iñōmō pōna tamēñedāni. ⁷ Ayæ Yatōnō guiquēnē, Botō oncōnē pōeda, ante manguiçā guidatapa. Iīnāni tōmānāni edæ odōmāno tæiyæ awēnē Tetædo nānō ānino ante Baa āninqe wacā Itota nāni ānongā ingantedō ante, Tōmengā nē Awēnē Odeye ingampa, ante ānewēnānipa cæminii.

⁸ Ante piināni ēñente wædinqe godongāmæ ongōnāni tōnō awēnēidi adobaī piininqe, Quinō cæquīi, ante wædinqe Yæ yæ ānānitapa. ⁹ Iinque Yatōnōidi inānite āninqe awēnēidi, Minitō ñowo mānimpota pōnōmīni ænte māñōmōni mīnitō wēnæ wēnæ cædāmaī iīmīni adinqe mōnitō iincayæ ate wæætē adodō pōnōmōni æmaimīnipa, ante tōmēnāni godonte æinta ānāni pædæ godōnāni æninqe ñimpo cædāni abæ tawænte gogadānimpa.

Bedeā iñōmō quēwēnāni ēñente pōnēnānipa

¹⁰ Ayæ tæcæ wēmō bayonte nē pōnēnāni wæætē Pabodo tōnō Tidato inate, Bedeā iñōmō goeda, ante da godōnāni godatapa. Māniñōmō gote pōninqe tōmēna oodeoidi odōmōincōnē go guidatapa. ¹¹ Māniī Tetadōnica iñōmō quēwēnāni nē piinte cædāni iñōnānite bedeaidi guiquēnē piināmaī ināni inte mōnō Awēnē nānō apænedō ante do ēñēnānitapa. Ayæ ēñēninge, Wængonguī angā ēñente nāni yewæmongainō bai Pabodo nō apæncantawo, ante pōnente wædinqe bedeaidi iñōmō, Wængonguī æbānō angā ēñente yewæmongadānii, ante ēñencæte ante iīmō iñō iīmō iñō māninta æninqe cōwā adānitapa. ¹² Mānōmaī cædinqe oodeoidi tæiyæñāni wede pōnēnāni badānitapa. Ayæ guidiegoidi awēnēidi bai ināni onquiyæñāni incæ nangui ināni pōnēñōnāni guidiegoidi onguīñæñāni adobaī tæiyæñāni nē wede pōnēnāni badānitapa.

¹³ Incæte wadāni Tetadōnica iñōmō godinqe oodeoidi inānite apænedinque, Pabodo ñowo Bedeā godinqe māniñōmō quēwēnāni inānite apæncæ ēñēnānipa, ante tededāni. Eñēninque oodeoidi wæætē Bedeā iñōmō pōninqe, Pabodo wiwa apæncæçā apa ēñencæ quēwēmīni, āninqe wapiticæ tededāni ēñēninque godongāmæ ongōnāni guiquēnē ængui badānitapa.

¹⁴ Mānōmaī ængui badāni adinqe nē nāni pōnencabo iñōmō Pabodo ingante æpæ yæwedeca do ænte māodāni godinqe tōmengā wipodē ñæñæmpodē go guidingue godōmenque wogaa goyongante Tidato tōnō Timoteo wæætē Bedeā iñōmō ayæ ongōnatapa. ¹⁵ Pabodo tōnō godongāmæ godāni iñōmō Atēna ganca māodāni gocā ate tōmengā wæætē, Minitō adodō Bedeā iñōmō godinqe Tidato tōnō Timoteo inate apænedinque tōmēna eyepæ inte ate botō weca quingæ āmīni pōnæ, angā ēñēninque tōmēnāni adodō Bedeā iñōmō godinqe Pabodo nānō ānino bai iñāna inate apænedānitapa.

Atēna iñōmō Pabodo apæncæçā ēñēnānipa

16 Mānōmainō ante āningā inte Pabodo tōmēna nāna ponguinō ante ee ongongantapa. Ee ongōninquē ayongā māniñōmō quēwēnāni, Wængonguīdi inānīpa, ante badonte nāni cō cægainca bacoo mæ ongō ate wædinque Pabodo wæwēwocate quēwengantapa. 17 Mānōmai beyæ oodeoidi odōmōincōnē go guīdinque oodeoidi inānite apænedinque ayæ guīdegoidi incæ Wængonguī ingante nē guīñēnāni inānite apænedinque Pabodo, Mānōmai impa. Apænebo ēñēmāiminīpa, ante apænecantapa. Ayæ tōmēnāni nāni godonte æiñōmō adobaī iimō iñō iimō iñō godinque māniñōmō ponte ongōnāni inānite adobaī nō apænecā ēñēnānitapa. 18 Mānōmai cæyongā wadāni Epicodeoidi, Mōnō tote quēwengæimpa, ante nē ānewēnāni nāni cabo tōnō wadāni Etoicoidi, Waa iimō incæ caate wæmō incæ mōnō piyænē cæte quēwengæimpa, ante nē quēwēnāni nāni cabo tōnō tōmānāni adoyōmō ponte bee tēninque Pabodo ingante wæætēdō wæætē ānānitapa.

Pabodo iñōmō Itota ēmōwo ante apænecā beyæ ayæ Itota nānō ñāni omæmongainō ante apænecā beyæ Epicodeoidi nāni cabo tōnō Etoicoidi nāni cabo tōnō pancadāniya guiquēnē,

—Īngā iñōmō ōnonque ante tedewēnongā inte æbāmē ante tedewengā.

Ante wæyōnāni adodāni incæ pancadāniya guiquēnē,

—Tōmengā wabānō, Wabæca wængonguīdi inānite pōnencæminīpa, ante cæcā īmaingampa, ante wædānitapa.

19 Īnīnque Pabodo ingante bæi ongonte tōō æmænte ænte godinque tōmēnāni Adeopagoidi nāni ānōnāni nāni godongāmæ ēñente pōnencōñōmō māōdāni gocantapa. Go guīite ongōñongante,

—Mā bitō odōmōnte apænedō æbānō īi. Edæ apænebi ēñēmōnie. 20 Edæ bitō odōmōnte apænedō ante tæcæ ēñēmōni inte mōnitō, Æbānō ante apænebiī, ante ēñencæte ante wæmōnīpa, ānānitapa.

21 Edæ atēnāidi tōnō wadāni Atēna iñōmō ñōwo ponte quēwēnāni tōnō tōmānāni wadō cædāmāi inte ōnonque, Wadāni æbānō mā apænete pōnēnāniī, ante wædinque māniñonque ante tedete quēwēnōnānīpa.

22 Pabodo iñōmō Adeopagoidi godongāmæ nāni ēñente pōnenconcabo tæcæguedē ængæ gantidinque tōmēnāni inānite apænedinque,

“Atēnāidi, ēñēedāni. Wængonguīdi, mīni ānōnāni inānite waa ate baī mīnitō nanguī pōni cæmīni abopa. 23 Botō mīnitō quēwēñōmō tōmāo cægonte ayōmo, Wængonguīdi inānīpa, ante mīni waa adoncacoo nanguī ongō atabopa. Ayæ mīni waa adonca adocaque iñōmō mīni pōnō yewæmōnīmpaa īmāi ante yewæmōnte ongō atabopa. ‘Wacā wængonguī æcāmē ingāā, ante mōnō ēñēnāmāi nē īnongā beyæ mōnō waa adonca impa,’ ante mānīmpaa yewæmōi ongō atabopa. Mānīmpaa yewæmōi ongō adīmo inte botō mīni, Æcāmē ingāā, ante ēñēnāmāi inte mīni waa adongā ingante ante ñōwo, Æcānō ingāā, ante ñōwo apænebo ēñēedāni.”

24 Ante apænedinque Pabodo godōmenque, “Wængonguī inguīpoga nē badongaingā īnongā inte tōmāā iñōmō ongoncoo nē badongaingā īnongā inte tōmengā inguīpoga tōmāmæ Awēnē īnongā ingampa. Tōmengā adocā iñōmō ōōnædē Awēnē ingampa. Īnīnque Tæiyæ Awēnē īnongā inte tōmengā waomō ōnompoca mæñōnīncōnē ædō cæte guīite quēwenguingāā. 25 Ayæ waomō iñōmōnte tōmengā mōnō quēwengūimāmo pōnongā æmōmpa. Ayæ mōnō guēmanguīmāmo adocā pōnongā guēmāmōmpa. Ayæ tōmengā adocā nānō pōnōnonque tōmānō ænīnque quēwēmōmpa. Mānōmai nē pōnōnongā inte tōmengā mōnō waocabo iñōmōnte, Pōnōmi æmoe, ante ædō cæte anguingāā. Īnīnque tōmengā beyæ ante mōnō waomō ōnompoca ædō cæte cæquīmōō.”

²⁶ Ante apænedinque Pabodo godömenque apænecantapa. “Wængongui waocā adocanque ingante badöninque, Tömengä nänö pæināni nangui ināni yebæninque nāni cabo nāni cabo tömancabodāni bacædänimpa, angacäimpa. Ayæ edæ, Adocanque pæināni inönāni inte mänincabodāni iñömö nänëneto nänëne godinque adocaboque wabæca wacabo wabæca godinque inguipoga tömäo go go cædinque wayömö wayömö quëwencædänimpa, ante cægacäimpa. Mänömainö ante badöninque tömengä tömancabodāni inānite ante pönëninque, Æyömönö quëwenguināni, ante cædinque, Iināni iimæca mänimpoga quëwencædänimpa, äninque, Wadāni wabæca mänimpoga quëwencædänimpa, ante doyedë angacäimpa. ²⁷ Edæ tömämæ quëwënāni botö imote ante diqui diqui mincædänimpa. Ayæ botö imote ante pædæ æmpo cædinque wabänö bæe tenguināni, ante cædinque Wængongui mänömai badöninque angacäimpa. Incæte Wængongui mönö tömämö weca ongöninque wii gobæque quëwengampa. ²⁸ Wængongui tömäo quëwengä iñongante mönö waomö inömö inte wayömö wayömö gomö incæte tömengä nempo edæ cöwë quëwëmompä. Mini cabo incæ ämotamini ante bai nê tededāni pancadāniya, ‘Wængongui pæimö adomö imompä,’ ante do nāni änö bai edæ mänömai impä,” ante Pabodo apænecantapa.

²⁹ Ayæ, “Mänömai beyæ mönö Wængongui pæimö inömö inte edæ iimainö ante wii pönenguënemö imompä. Mönö, Waocā nangui pönëninque dicaa yewæmöninque waa pöni nänö badöinca bai Wængongui adobai ingampa, ante ædö cæte ænewenguii. Oodo tönö padata waocā nänö badöi bai Wængongui ingampa, ante mönö wii mänömainö ante pönenguënemö imompä. ³⁰ Incæte wënenëfedë mäninö nāni ëñënamai ingainö ante adinque Wængongui pönö waadete ata cæpogacäimpa. Nöwo guiquënë tömämæ quëwënāni inānite, Minitö ëñënamai cædö ante, Anca wæwente awædö, ante ñimpo cæedāni. ³¹ Ante Wængongui nê apænte anguingä inongä inte iimāi angampa. Iionæ iinque bayonte botö inguipoga tömämæ quëwënāni inānite apænte ancæboimpa, ante mänionæ æonædö i, ante do angacäimpa. Ayæ, Waocā adocanque tönö botö godongämæ cæyömo tömengä nöingä ante apænte ancæcäimpa, ante Wængongui mäningä onguiñængä ingante do apænte ængacäimpa. Ayæ tömānāni, Wængongui nänö angainö bai cöwë bacæimpa, ante pönencædänimpa, ante cædinque Wængongui mäningä Onguiñængä dobæ wængä ate, Nāni ömæmõe, angä iinque mäningä iñömö edæ do ñāni ömæmonte quëwengampa.”

³² Ante Pabodo mäninö Itota nänö ñāni ömæmongainö ante apænecä ëñëninque pancadāniya, Babæ ancædö, ante badete todānitapa. Wadāni guiquënë,

—Iincayæ ate mäninö ante adodö apænebi ëñëmönie, änānitapa.

³³ Mänömainö ante cædāni adinque Pabodo iñömö tömënāni inānite emö cæte godinque tao gogacäimpa. ³⁴ Incæte pancadāniya tömengä miñæ godinque nê pönënāni badānitapa. Adeopagoidi nāni ëñente pönëe concabo iñönānite adocanque Diönitio adobai nê pönengä bacantapa. Ayæ onquiyængä tömengä emöwo Daämadi tönö wadāni adobai nê pönënāni bogadänimpa.

¹ Atēna iñōmō ongonte apæneca ēñēninque mǎnōmaī cædāni ate Pabodo wadæ godinque Coodinto nāni quēwēñōmō pongantapa. ² Doyedē iñōmō odōmānoidi tæiyæ awēnē Codaodio oodeoidi inānite plinte āninque, Mōnitō quēwēñōmō Odōmā iñōmō ñowo quēwēnāmaī inte tōmāmīni wadæ goedāni, angā ēñente wædinque tōmānāni nāwæ wadæ godōnānimpa. Adocanque tōmengā emōwo Aquidæ Pontobæ ēñagaingā inte Itadiabæ gote māniñedē quēwēnongāimpa. Tōmengā adocā oodeocā inongā inte awēnē nānō ānō ante ēñente wadæ godinque tōmengā nānōogængā Piditida tōnō ñowo Coodinto iñōmō wadæ ponte quēwēnōnimpa. Īninque Pabodo ñowo Aquidæ ingante tæcæ adinque tōmēna weca ēñacæ pongantapa. ³ Tōmēna weca ponte ayongā tōmēna tōmengā nānō tadōmōnō bai adobai æmontai cadopa tadōmonte godonte ænte quēwēna adinque Pabodo tōmēna weca ee owod- inque tōmēna tōnō godongāmæ tadōmōnānitapa. ⁴ Mǎnōmaī cæte quēwēninque Pabodo guēmanguiōnæ iñō guēmanguiōnæ iñō oodeoidi odōmōincōnē go gu- idinque, Oodeoidi incæ oodeoidi ināmaī ināni incæ ēñente pōnencædānimpa, ante cædinque, Īlmaī impa ante apænebo ēñēmaīmīnīpa, ante nanguī apænecantapa.

⁵ Ayæ Tidato tōnō Tīmoteo Māatedōniabæ quēwente wadæ pōninque Coodinto iñōmō nāna wææ pōñedē Pabodo māniñedē æmontaicō nānō badōninō ñimpo cædinque wæætē, Wængonguī nānō apænedō ante ēñencædānimpa, ante nanguī cæinente wædinque nanguī apænedinque māninque cæte quēwengantapa. Mǎnōmaī cædinque tōmengā, Codito mōnō nē ānongā incæ Itota adocā inongā ingampa, ante botō nē agaimo inte apænebo ēñēmaīmīnīpa, ante oodeoidi inānite apænecantapa. ⁶ Mǎnōmaī apæneyongante oodeoidi wæætēdō wæætē godō wēnæ wēnæ ante pīnāni wædinque Pabodo wæætē, Wīi ēñēinē wædō, ante bai cædinque nāmā weocoo wancæ wancæ cæcantapa. Ayæ tōmēnāni inānite,

—Wængonguī weca mīni goquēñō ante apænebo ēñēninque mīnitō pōnō wææ āninque tōmēmīni wænguinque wentamō mongæmīnīpa. Botō wæætē mīnitō ĩmīnite edonque pōni apænedīmo inte mīni cædō wentamō mongænāmaī ĩmopa tō. Īninque botō Wængonguī taadō mīnitō ĩmīnite idæwaa odōmōninque edæ oodeoidi ināmaī ināni weca ñowo wadæ gobo tamēñedāni.

⁷ Āninque Pabodo wadæ tao godinque oodeoidi odōmōincō gāānē wacā oncōnē go guīi go guīi cædinque cōwē apænecantapa. Mānīncō nē ēacā Titio Yoto nāni ānongā iñōmō Wængonguī ingante nē waa ate pōnengā inongāimpa. ⁸ Oodeoidi odōmōincōnē nē aacā Codipo guīquēnē mōnō Awēnē ingante nē pōnengā bayongā tōmengā oncōnē nē owodāni tōmānāni pōnēnānitapa. Ayæ coodintoidi nanguī ināni pō ēñē pō ēñēē cædinque adobai wede pōnēninque æpænē guīgadānimpa. ⁹ Māniñedē woyowotæ iñō Pabodo wīlimate bai ayongante mōnō Awēnē tōmengā ingante apænecantapa. “Bitō guīñēdāmaī inte apænebi ēñencædānimpa. Pæ wēñedāmaī incæbiimpa. ¹⁰ Coodinto iñōmō botō quīnāni nanguī ināni inānīpa, ante cædinque botō iñōmō edæ bitō tōnō godongāmæ cōwē cæcæboimpa. Īninque wadāni bitō ĩmite māmō pīīninque wēnæ wēnæ cædāmaī incædānimpa.” ¹¹ Ante mōnō Awēnē tōmengā ingante apæneca ēñēninque Pabodo adoque wadepo go tæcæ iñonte Coodinto iñōmō ongōninque Wængonguī nānō apænedō ante tōmēnāni inānite odōmonte apæneca ēñēnōnānimpa.

¹² Māniñedē odōmānoidi ānāni ate Acayabæ awēnē Gadiōno inongāimpa. Tōmengā awēnē nānō inōñedē oodeoidi godongāmæ pōnēninque Ao āninque Pabodo ingante quīngæ māmō bæi ongonte æninque awēnē Gadiōno nānō

cōwē apænte ānōñōmō ænte māodāni gocantapa. ¹³ Awēnē weca pōninque Pabodo ingantedō ante piinte āninque,

—Īngā ĩñōmō, Mōnō wadō bai cædinque Wængonguī ingante waa ate apæneccæimpa, ante odōmōninque mōnitō awēnēidi nāni wææ ānōnō ante wido cæcampa. Mānōmaī wapiticæ cædinque ancaa ānewengā ēñēninque tōmānāni adobaī wapiticæ cædānīpa cæbii.

¹⁴ Ānāni ate Pabodo tæcæ apæneccæ cæyongante Gadiōno oodeoidi ĩnānite ĩmaī ante wææ apæneccantapa.

—Oodeoidi ēñēdāni. Mīnitō botō weca ponte apænedinque, Odōmāno awēnē nānō wææ ānō bai ĩngā ēñēnāmaī cæcampa, āmīni bai, Waocā ingante ædæmō wīwa cæcampa, ante āmīni bai botō mīni ānō do ēñēninque apænte ancædōmoimpa. ¹⁵ Mīnitō ĩñæmpa, Tōmengā tededonque ante oda cæcampa, āmīnīpa. Mīnitō ēmōwo ante oda cæcampa, āmīni. Mīnitō wææ angainō ante oda cæcampa, ante piimīnīpa. Māninonque ante oda cæcampa, ante ancaa tedewēmīni wædinque botō wæætē tōmengā ingante apænte ānāmaī ĩncæboimpa. Tōmēmīninque tōmengā ingante apænte āedāni.

¹⁶ Ante piinte āninque awēnē tōmēnāni ĩnānite, Botō apænte āñōmō ongōnāmaī gobæwedāni. ¹⁷ Ante wido cæcā tao godinque tōmānāni oodeoidi odōmōincōnē nē aacā Totēnē ingante wæætē bæi ongonte tæi tæi pānāni ĩncæte nē apænte anguēnengā ĩncæ Gadiōno ĩñōmō ōnonque adāmaī ĩnte bai ee acā pangadānīpa.

Pabodo Antioquiya ponte gocampa

¹⁸ ĩninque tæōnæ quēwente ate Pabodo Coodinto ĩñōmō nāni pōnencabo ĩnānite, Gobopa, āninque wadæ godinque Tidiabæ gocæte ante Tencodea ganca pongantapa. Tōmengā do apænedinque, Botō mānīmpoga ocaguī tocadāmaī ĩnte Wængonguī beyænque cædinque botō tōmēmo ānīnō ante cōwē cæcæboimpa, ante doyedē ānongāimpa. Nōwo ĩñōmō tōmengā nānō ānīnō bai ĩnque cædingā ĩnte Tencodea ĩñōmō pōninque ocaguī ēō tocantapa. Ayæ ēō tocacā ate tōmengā Pīditida tōnō Aquidæ nāna gæncaya tōnō godongāmæ ñænæ wipodē go guīdinque tōmēnāni Tidiabæ gocæte ante wogaa godānitapa. ¹⁹ Mānōmaī godinque Epeto ĩñōmō go ti wææñānitapa. Tōmēna nāna gæncaya mānīñōmō ti wææninque tæ contayōna Pabodo ĩñōmō oodeoidi nāni odōmōincōnē go guīdinque oodeoidi ĩnānite, ĩmaī ĩmpa apænebo ēñencæmīnīpa, ante apæneccā. ²⁰ Ēñēninque tōmēnāni, Bitō mōnitō weca wantæpiyæ quēwenguīmi, āñōnāni tōmengā Baa āninque, ²¹ wæætē, Gobopa, angantapa. Ayæ, “Nōwo Eedotadēē ĩñōmō ææmæ bequinque goquēnēmo ĩmo ĩncæte Wængonguī Ao angā ate botō mīnitō weca ayæ ate wæætē ocæ ēmænte poncæboimpa. Nōwo gobo tamēñedāni.”

Āninque Epeto ĩñōmō ñænæ wipodē go guī tæ contadinque Pabodo wogaa gocantapa. ²² Godinque Tetadea pō ti wææninque Eedotadēē ĩñōmō Itota Codito ingante godongāmæ nāni pōnencabo weca ēñacæte ante æicantapa. Ayæ ate Antioquiya wæicantapa. ²³ Ayæ ate mānīñōmō tæōnæ quēwēninque wadæ godinque Gadatiabæ adodō godinque Pīdiquiabæ tōmāo wayōmō wayōmō cægonte godinque Itota mīñæ nē tee empote quēwēnāni tōmānāni ĩnānite māo apænedinque, Mōnō ĩmpo cædāmaī ĩnte tæi piñænte cæcæimpa, ante apæneccā ēñēninque tōmēnāni tæi piñænte entawēninque quēwengadānīpa.

Epeto ĩñōmō Apodo apæneccā ēñēnānīpa

²⁴ Māniñedē wacā oodeo tōmengā ěmōwo Apodo iñōmō Equitobæ Adecantodia nāni quēwēñōmō ěñate pægaingā inte ñōwo Epeto nāni quēwēñōmō pongantapa. Tōmengā iñōmō nanguī adinque nē ěñēnongā inte Wængonguī angā ěñente nāni yewæmongainō ante do ěñēninque waa pōni apænecā inongāimpa. ²⁵ Mōnō Awēnē taadō ante apæneyōnāni do ěñēningā inte māninō ante ædæmō ěwocadinque tōmengā, ěñēcædānimpā, ante nanguī apænecantapa. Ayæ Itota nānō cægainō ante nō ante odōmonte apænecā incæte Apodo iñōmō Wāō æpæñē nānō guidongaiñonque ante māningancaque ěñēningā inte māningancaque ante tōingā odōmongā ěñēnōnānimpā. ²⁶ Tōmengā ñōwo oodeoidi odōmōincōnē go guī go guī cædinque guiñēnedāmaī inte apænecantapa. Pidotida tōnō Aquidæ nāna gæncaya guiquēnē tōmengā mānōmaī apænecā tæcæ ěñēninque edæ Apodo ingante, Mōnatō weca pōe, āna pōñongante, Wængonguī taadō iīmaī inompā, ante tōingā apænedā tæcæ mā ěñengantapa.

²⁷ Mānōmaī cæda ate Apodo wæætē Acayabæ gocæte ante cæyongante tōmēnāni nāni pōnencabo tōmengā ingante, Waa goe, ānānitapa. Ayæ, Acayabæ iñōmō Itota ingante nē tee empote quēwēnāni acædānimpā, ante iīmaī ante cadota ante yewæmōnānitapa. Mīnitō, Apodo pongā adinque tōmengā ingante waa cædāni, ante yewæmōninque tōmengā ingante pædæ pōnōnāni ænte godinque māo Acayabæ quēwēnāni inānite pædæ godongā adānitapa. Tōmēnāni Wængonguī waadete pōnō cæcā ate nē pōnēnāni iñōnānite Apodo nē waa pōni apænedongā inte māniñōmō ponte apænedinque tōmēnāni tōnō godongāmæ cægacāimpa. ²⁸ Edæ tōmānāni ayōnāni Apodo oodeoidi inānite nanguī wæætēdō wæætē apænedinque gomonga apænecā wædānitapa. Tōmengā, Mōnō Codito æbānō cæquingāā, ante Wængonguī angā ěñente nāni yewæmongainta adinque mōnō ěñengæimpa, angantapa. Ayæ, Itota māninō nāni yewæmongainō baī nē cædongā inte nāwangā mōnō Codito inongā ingampa, ante nō apænecā ěñēninque tōmēnāni ædō cæte wadō ante apænequināni.

19

Epeto iñōmō Pabodo ponte apænecampa

¹ Apodo ayæ Coodinto iñōmō ee ongōñongā Pabodo nānō cægōnimæ tæcæguedē ānanquidi owēñaque pō Epeto iñōmō wæængantapa. Ponte ayongā Itota ingante nē tee empote quēwēnāni pancadāniya a ongōnāni. ² Adinque tōmengā tōmēnāni inānite,

—Mīnitō pōnente bayōmīni Wængonguī tōmengā Tæiyæ Waēmō Ōnōwoca ingante da pōnongā æmīnitawo.

Āñongā tōmēnāni wæætē,

—Īñæmpa māningā Tæiyæ Waēmō Ōnōwoca ingantedō ante apænedānimpā ěñengūimōnii.

³ Ante apænedāni ěñēninque Pabodo wæætē,

—Īninque æcānō ěmōwo ante æpæñē guimīnitawo.

Āñongante,

—Wāō wodi nānō æpæñē guidongainō ante guitamōnimpā.

⁴ Mānōmainō ante apænedāni ěñēninque Pabodo wæætē,

—Wāō wodi nānō guidongainō ante guigaimīni inte mīnitō, Idæwaa wēnæ wēnæ cæte awædō, ante Wængonguī Awēnē gāmæñō ocæ ěmænte pongaimīni imīnimpā. Incæte Wāō wodi, Īncayæ ate nē Ponguingā ingante

pönencæminimpa, āninqe tōmēnāni inānite æpænē guidongacāimpa. Māningā iñōmō Wāō nānō, Nē Ponguingā, ānongā iñōmō Itota inongā ingampa.

⁵ Ante apænecā ēñente wæyōnāni Pabodo wæætē mōnō Awēnē Itota ēmōwo apænedinque æpænē guidongā guidānitapa. ⁶ Ayæ tōmengā gam-pocā ongōñōnāni Wængongui Tæiyæ Waēmō Ōnōwoca wææ tōmēnāni baonga guicantapa. Guicā ate tōmēnāni wadāni nāni tede bai mā tededinque Wængongui beyæ apænedānitapa. ⁷ Mānināni onguifænāni æpænē nē guidēnāni iñōmō ōnompō tipæmpoga go mengāa inōnānimpa.

⁸ Pabodo apāicā mengāa go adocanque pāmonque adoyōmō quēwēninque oodeoidi odōmōincōnē go guii go guii cædinque guifñenedāmaī apænedinque, Wængongui Awēnē Odeye do pongāimpa, ante apænebo ēñēdani, ante nōingā ante apænecā ēñēnānitapa. ⁹ Apænecā ēñēñōnāni pancadāniya guiquēnē, Wīi pōnēinente awædō, ante Baa āninqe Wængongui Awēnē taadō ante wīwa tedewēnānitapa. Mānōmaī tedewēnāni ēñente wædinque Pabodo iñōmō ēmō cæte godinque Itota ingante nē tee empote quēwēnāni inānite ænte wadæ gocantapa. Ayæ iimō iñō iimō iñō Tidānō nānō apæneincōnē go guii go guii cæte apænedinque Pabodo māniñōmō pō guidāni tōnō guēadō guēa apænedānitapa. ¹⁰ Ayæ mēnepoga wadepo ganca Pabodo mānōmaī cæyongā oodeoidi incæ guidiegoidi incæ Atiabæ quēwēnāni tōmānāni mōnō Awēnē nānō apænedō ante ēñēnānitapa.

¹¹ Ayæ Pabodo tōnō godongāmæ cædinque Wængongui tæi piñængā inte nanguī cæcantapa. ¹² Ininque tōmēnāni Pabodo weocoo wadæ cæcadoquincoo incæ padēincoo incæ æninque wēnæ wēnæ ināni inānite ænte māmō wo caayōnāni waa badānitapa. Ayæ mānōmaī cæyōnāni wēnæidi nē wīwa ēwocadāni tōmēnāni nāni nē ēwēnēnāni tao godānitapa.

¹³ Māniñedē oodeoidi Itota ingante pōnēnāmaī ināni incæ pancadāniya wayōmō wayōmō godinque wēnæidi nē wīwa ēwocadāni inānite nē wido cædāni inōnānimpa. Tōmēnāni nāmā mā pōnēwēninque, Nōwo Awēnē Itota ēmōwo apænedinque mōnō wēnæ ingante wido cæcæimpa, ante cædinque wēnæidi inānite iimāi ānōnānimpa. Pabodo nānō nē apænedongā Itota ēmōwo apænedinque botō, Wēnæbi tao gobāwe āmopa, ānewēnōnānimpa.

¹⁴ Māniñedē oodeoidi beyæ, Wængongui qui, ante nē godongā ñænængā adocanque Etequeba iñongā tōmengā wēnāni tiæte ganca inānitapa. Ināni iñōmō Itota ingante pōnēnāmaī ināni incæte adobai cæcæ cædānitapa. ¹⁵ Tæcæ cæcæ cæyōnānite wēnæ nē wīwa ēwocadongā incæ tōmēnāni inānite nāēmæ tededinque, “Itota ingante do abopa. Ayæ Pabodo æcānō ingāa, ante do ēñēmopa. Wæætē mīnitō guiquēnē æmīnidō imīni.”

¹⁶ Añongā wēnæ wīwa inongā ingante nē ēwēnengā inte wiyæmæ tōmēnāni inānite to māo yao ongōninque bæ tacantapa. Mānōmaī cædinque tōmēnāni weocoo gā tadongadinque tæi tæi pangā ate tōmēnāni weocoo ōmaadāni inte wepæ taate wædinque oncodo tao wodii winōnānitapa. ¹⁷ Mānōmaī batimpa, ante tedeyōnāni Epeto iñōmō quēwēnāni oodeoidi incæ guidiegoidi incæ tōmānāni ēñēninque ancai guifñente wædānitapa. Ininque mōnō Awēnē Itota ēmōwo wīi ōnonque ante tededāni inte tōmengā ēmōwo æwocæte bai cædinque, Tæi piñængā inte ēmongampa, ante wædānitapa.

¹⁸ Ayæ nanguī ināni ñōwo wede pōnente badinque adoyōmō pōninque tōmānāni ēñēñōnāni tōmēnāni nāni wēnæ wēnæ cædinō ante tōmānō ante edonque apænedinque, Idæwaa wēnæ wēnæ cæte awædō, ante wido cædānitapa. ¹⁹ Ayæ idō inte nē yewænīnāni incæ pancadāniya adobai pōnente badinque tōmēnāni nāni, Æbānō cæte yewænguīi, ante yewæmōninta

incæ adoyōmō ænte pōninque tōmānāni āñōnāni nē tānānitapa. Mānintacoo æpodō itædē cædinque padata nāni æinta beyæ godonte ænānii, ante cōwā ayōnāni tincoenta mīdo ganca mānimpota nāni godonte æninta incæ nē tānāni agadānimpā. ²⁰ Mānōmaī nē pōnēnāni badinque waa cædāni īninque mōnō Awēnē nānō ānō ante godōmenque wayōmō māo gode ānāni ēñēninque tōmengā ingante nāni pōnencabo incæ yebæninque tæi piñænāni bagadānimpā.

²¹ Mānōmaī cædāni ate Pabodo ōnōwēnenque pōnēninque, Māatedōniabæ ēñacæ godinque botō Acayabæ ēñacæ godinque Eedotadēē gocæboimpā, ante pōnēninque, ayæ, Māniñōmō gote ate Odōmā nāni quēwēñōmō cōwē goquēnēmo īmopa, angantapa. ²² Āninque tōmengā beyæ nē cædāni īñōnānīte mēnaa īnate Tīmoteo tōnō Edaato īnate apænedinque, Māatedōniabæ gote ongōñōmīna botō Atiabæ wantæ quēwente pōmoeda, ante da godongā godatapa.

Epetoidi nanguī Yæ yæ ānānīpa

²³ Māniñedē Epeto īñōmō quēwēnāni īñōmō, Itota Taadō mōnō wido cæcæimpā, ante nanguī Yæ yæ ānānitapa. ²⁴ Tōmēnāni, Mōnitō wængonguinā Diānā īnampa, ante onquiyæñā ēmōnō bai badōninque māninca weca ædæ wæante nē apænedāni īnōnānimpā. Tōmēnāni quēwēñōmō adocanque Deēmetedio nāni ānongā īñōmō padata aca podonte nē badongā īnongāimpā. Tōmengā īñōmō padatagæ æninque aca podonte badōninque, Mīni wængonguinā Diānā īnante mīni tæiyæ waēmō apæneincō bai impā, ante guīyanconque badonte quēwēnongāimpā. Mānōmaī badōñongā tōmengā tōnō godongāmæ cædāni wæætē wadāni īnānīte godonte æninque mānincoo beyæ tōmēnāni godonte æinta nanguī æninque quēwēñōnānimpā. ²⁵ Īninque tōmengā tōnō nē cædāni īnānīte ayæ wadāni adobai cædāni īnānīte āñēte pōnāni ate Deēmetedio īñōmō tōmēnāni īnānīte apænecantapa.

“Īñānāni, do ēñēmīnīpa. Mōnō badonte godōninque wadāni nāni pōnōnīnta nanguī æmompā. ²⁶ Ayæ nanguī īnāni Epeto īnōmō quēwēnāni incæ Atiabæ wodō tōmāmæ quēwēnāni incæ īngā Pabodo guīquēnē wapiticæ apænecā ēñēninque edæ oda cædinque tōmengā miñæ godānīpa, ante do ēñēmīnīpa. Tōmengā īñōmō, Ōnopoca badōninca wīi wængonguīdī īnānīpa, ante tedecā apa quēwēmīnīi. ²⁷ Mānōmaī tedecā beyæ mōnō badōnō ante wadāni nanguī īnāni piīnte anguīnāni awædō. Ayæ Diānā ñænænā wængonguinā īñōnante tōmengā ingante mōnō apæneincō incæ, Ōnonconque impā, anguīnāni awædō. Ayæ godōmenque, Mōnō wængonguinā Diānā waa pōnī wængonguinā īnampa, ante Atiabæ tōmāo quēwēnāni tōnō inguipoga tōmāo quēwēnāni nāni waa adōnā īñōnante wabānō wapiticæ tededinque godō piīnguīnāni badānīpa, ante awædō.”

²⁸ Ante Deēmetedio mānōmainō ante apænecā ēñēninque tōmēnāni ænguī badinque ogæ tededinque, “Epetoidi wængonguinā Diānā ñænænā īnampa,” ante wæætē wæætē ancaā ānānitapa.

²⁹ Mānōmaī padata nē badōnāni Yæ yæ ānāni ēñēnte wædinque māniñōmō quēwēnāni tōmānāni, Quiēmē bai cædānīpa, ante acæte ante wadō pō wadō pō pogodo pōnānitapa. Ponte ayōnāni Māatedōniabæ quēwente Pabodo tōnō godongāmæ nē pōnīna Gayo tōnō Aditadoco a ongōna adinque tōmēnāni tōmēna īnate bæi ongonte quingæ māo tōmēnāni nāni aīncōnē ñænæncōnē go guīdānītapā. ³⁰ Pabodo guīquēnē mānōmaī cædāni ate wædinque, Godongāmæ ongōnāni weca go guīdinque apænecæboimpā, ante cæyongante Itota ingante nē tee empote quēwēnāni wæætē, Wænompā, ante,

Go guiddāmaī incæbiimpa, ante wææ cædānitapa. ³¹ Ayæ mǎnimæ awēnēidi pancadāniya Pabodo æmigoidi Ināni inte adobaī māmō tōmengā ingante gode āninque, Bitō ædō cæte mǎniñōmō go guiquimii, ante wææ ānānitapa.

³² Īnonte godongāmæ ongōnāni guiquēnē, Quinante pōmoī, ante wodo tōmānāni ēñēnāmaī Inānitapa. Pancadāniya, Īmaī cæcæimpa, āñōnānīte wadāni guiquēnē, Wadō baī cæcæimpa, ante wæætedō wæætē ante ogæ tededinque nanguī pōni Yæ yæ ānānitapa. ³³ Yæ yæ āñōnāni oodeoidi guiquēnē Adecantodo ingante yæcado gō cædāni ongongā adinque godongāmæ ongōnāni pancadāniya tōmengā ingante, Īmaī cæcæimpa, ānānitapa. Tōmengā guiquēnē tōmēnāni Inānīte wææ apæneceate ante, Apocænē ĩedāni, ante baī cædinque pipo pipo cæcantapa. ³⁴ Oodeo Inongā inte mǎnōmaī cæcampa, ante wædinque tōmengā ingante ēñēnāmaī inte tōmānāni adoyōmō ogæ tededinque, “Epetoidi wængonguinā Diānā ñænænā ĩnampa,” ante mēa ooda ganca adodō adodō ante nanguī ānānitapa.

³⁵ Ayæ ate tōmēnāni awēnē Tequedetadio incæ ancaa tōmēnāni Inānīte angā ēñēnte apocænē cæyōnāni tōmengā, “Epetoidi ēñēmīni. Tōmāo quēwēnāni mǎnōmaīnō ante do ēñēnāniya. Mōnō Epeto ĩñōmō quēwencabo mōnō wængonguinā Diānā apæneincō nē aamō ĩmōmpa. Ayæ tōmengā awinca baī yewæmōinca oōnædē mōnō wæængainca adobaī nē wææ cæmō ĩmōmpa, ante adinque tōmāmæ quēwēnāni do ēñēnāniya cæmīnii. ³⁶ Mǎniñō ante nāwangā pōni ĩmpa, ante adinque, Babæ ĩmpa, ante ædō cæte anguinānii. Īnīnque mīnitō ēñēnāmaī mīni Yæ yæ ānewēnō ĩmōmpa cædinque piyænē cæquēnēmīni ĩmīniya. ³⁷ Īina mīni bæi ongonte ænte pōnōniya ĩñōmō mōnō wængonguinā Diānā apæneincōnē guiddāmaī ĩna inte wēnæ wēnæ cædāmaī ĩnāpa. Ayæ mōnō wængonguinā Diānā ĩnantedō ante wīi wēnæ wēnæ ante piīna apa quēwēnānii.”

³⁸ “Deēmetedio padatagæ nāni badoncabo incæ wacā ingante, Wiwa cæbitapa, piīnte wædānitawo. Edæ nē apænte nāni āincō cōwē wi ænete ongōmpa. Mǎnincōnē nē apænte ānāni cōwē ongōnāniya. Īnīnque Deēmetedioidi nē nāni piīnongā ingante mǎniñōmō ænte gote ānāni ēñēninque nē apænte ānāni wæætē tōmengā ingante do apænte anguēnēnāni Ināniya. ³⁹ Ayæ apænte ānāni, Īñōnæ tōmāmīni godongāmæ pōedāni, nāni āññōnæ bayonte mīnitō godōmenque piīnte āññēmīni inte mǎniñōnæ ponte āmīni ēñēnte apænte ānāni ate mīnitō piyænē cæquēnēmīni ĩmīniya. ⁴⁰ Edæ ñōwoōnæ mīni Yæ yæ ānewēniñō ante awēnēidi pōninque, Quinante mǎnōmaī cæmīnii, ante āññōnāni wæætē, Quiēmē beyæ cætīmpa, ante mōnō angæĩmpa. Tōmēnāni wæætē mōnō ĩmōnte āninque, Mīnitō awēnē ingante wido cæcæte ante cæmīniya, ante piīnāni wæcæ wæ.” ⁴¹ Āninque godongāmæ ponte ongōnāni Inānīte tōmengā angā gogadāniimpa.

20

Māatedōniabæ godinque Pabodo Guidetiabæ gocampa

¹ Mǎniī Yæ yæ ante nāni ānewēnō ĩnīnque cædāni ate Itota ingante nē tee empote quēwēnāni Inānīte wæætē āñēte pōññōnānīte Pabodo, Mīnitō gancæ pōnente godōmenque cæcæmīniimpa, ante godō ædæmō apænecantapa. Ayæ, Ñōwo gobopa, ante Māatedōniabæ gocantapa. ² Godinque tōmengā mǎniñōmō quēwēnāni Inānīte, Mīnitō gancæ pōnente godōmenque cæcæmīniimpa, ante godō ædæmō apæneccā ēñēnānitapa. Mǎnōmaī nanguī apænedinque tōmengā mǎnimæ tōmāo cægōninque wayōmō māo wayōmō māo apæneccā ēñēnāni ate

Guidetiabæ gote pongantapa. ³ Māniñōmō pōninque mēa go adoque apāicā quēwengantapa.

Ayæ, Tidiabæ goquimo, ante tæcæ ñænæ wipodē guicæ cæyongante wadāni, Oodeoidi bitō imite wænoncæte ante cædānipa атаке. Ante wææ ānāni wædinque tōmengā, Botō wæætē adodō godinque Māatedōniabæ wodo tebæ gocæboimpa, āninque taadonque gocantapa. ⁴ Goyongā tōmengā tōnō godongāmæ godāni iñōmō, adocanque Bedea quēwēningā inte Pidido wengā Topatede, ayæ wææ Tetadōnica quēwēningā Aditadoco tōnō Tegonto mēnaa, ayæ wææ Dedebe quēwēningā Gayo tōnō Timoteo mēnaa, ayæ wææ Atiabæ quēwēningā Tiquico tōnō Todopīmo mēnaa, mānipodāni iñānitapa. ⁵ Tōmēnāni tāno godinque Todoa nāni quēwēñōmō pōninque mōnitō wipodē ponguimōni ante ee ongōnānitapa. ⁶ Mōnitō guiquēnē oodeoidi pāō yedæ æmpoquī ōmēmō i nāni cænguñōnæ iinque baganca Pidipo iñōmō quēwēninque wipodē ñænæmpodē go guiidinque wogaa godinque ōnompo æmæmpoque ēōnæ gote ate tōmēnāni weca Todoa pōninque ōnompo æmæmpoque go mēōnaa quēwentamōnipa.

Todoa iñōmō Pabodo ponte apæncampa

⁷ Tōmēnāni nāni guēmanguñōnæ go ate mōnitō, Ñōwo gāwadecæ bayō Wængonguī itædē impa, ante pāō godongāmæ cæncæte ante æmongapaa æi wænōmēnæcapaa æi guiidinque tæ contatamōnipa. Pabodo iñōmō baānæ ate gocæ cædingā inte æi guīi tæ contadinque wantæpiyæ ayañænēñā pōni ayæ apæncæ ēñentamōnipa. ⁸ Wænōmēnæcapaa mōni godongāmæ ēñengoncōnē gongapæncade bacoo tī wodōnote mæ ongōnimpa. ⁹ Adocanque edēningā tōmengā ēmōwo Eotico ayamōnecā tæ contate ongongantapa. Īninque Pabodo wantæpiyæ apæneyongā edēningā iñōmō mōwocodē nanguī mōiñente ayæ wangæ monte wænōmēnæcapaa ongōninque yæipodē tæ go wæængantapa. Go wæænte do wængā adinque tōmengā ingante yao ongonte mānānitapa. ¹⁰ Nāñe wænte ōñōñongā Pabodo yæipodē wææninque, Quēwencæcāimpa, ante cædinque wīni ænte pæ mangantapa. Ayæ nē pōnēmōni mōni caipæ imōnite apænedinque,

—Mīi quēwengā ingampa. Guīñente wædāmaī iedāni, angantapa.

¹¹ Āninque Pabodo wæætē adodō æmongapaa æidinque pāō ænte pā ænte mōnitō tōnō godongāmæ cæninque wantæpiyæ godōmenque apæncēñōngā edæ ñāō batimpa. Ñāō ba ate Pabodo ñimpo cæte wadæ gocantapa. ¹² Ayæ, Edēningā mīingā quēwengampa, ante ænte wadæ godinque tōmēnāni wampo pōninque nanguī togadānimpa.

Ōmaaque godinque Pabodo Mīideto ganca pongampa

¹³ Pabodo guiquēnē taadonque gocæ cædinque mōnitō imōnite apæncantapa. Mīnitō wipodē ñænæmpodē go guiidinque māodāmæ wipodenque godāmæ goyōmīni, botō ōmaaque nāñe tebæ pōmoedāni. Atōnō iñōmō pō wāi wocænte owoyōmīni botō iñōmō ōmaaque pō adopodē guīibo ate gocæimpa, angā Ao ante mōnitō tāno go guīi tæ contadinque ōme tagamōnimpa. ¹⁴ Māñōmaī godinque Atōnō iñōmō pō wāi wocænte owoyōmōni tōmengā ōmaaque pō bee tēninque ñænæ wipodē adopodē pō guīite tæ contacā ate mōnitō godongāmæ wogaa godinque Mīitidēne nāni quēwēñōmō pontamōnipa. ¹⁵ Māniñōmō wāi wocænte monte ate ñāō ba wogaa godinque mōnitō Quiyo ganca pōninque wañnæ ate wodo pænta godinque wæætē Tāmo iñōmō pōmōnique go Todoguidio iñōmō pōmōnique go iñabæ guingā ate Mīideto pontamōnipa. ¹⁶ Edæ, Ææmæ Pentecotee nāni ānōmæ botō bequinque Eedotadēē eyepæ poncæte ante quingæ goquēnēmo

īmopa, ante do āningā inte Pabodo ñōwo, Atiabæ wantæpiyæ ongōninque ædō cæte Eedotadēē eyepæ pōmaimoo. Ante pōnente wædinque, Epeto iñōmō ti wæænāmaī yaatænque gocæboimpa. Āñongā mōnitō tōmengā tōnō Epeto wodo tebæ godinque Muideto iñōmō pontamōnīpa.

Epeto iñōmō nē Piccēnāni inānite Pabodo apcēnecampa

¹⁷ Mānī wīpo ñænæmpo Muideto iñōmō wogaa pō wāi wocæ ate ti wæænīnque Pabodo wadāni inānite da godōninque, Minitō Epeto iñōmō tōmæwæ æidinque Itota Codito ingante nē godongāmæ pōnēnāni weca godinque tōmēnāni inānite nē aadāni Piccēnāni inānite āñete pōedāni. ¹⁸ Angā āñete pōñōnānite tōmengā, “Botō Atiabæ mā ponte quēwēninque botō goganca æbānō mīnitō weca waa cæte quēwēnōmoī, ante do ēñēmīnīpa. ¹⁹ Edæ oodeoidi, Wænoncæ, ānāni ēñēninque nangui guīñente wæbo incæte botō, Ōnōmoque bai īmopa, ante pōnēninque Wængongui beyænque nangui cædinque Ca ca wædinque ee cætabopa. ²⁰ Īnīnque botō, Minitō beyænque quīnō waa ingui, ante pōnēninque pæ wēenedāmaī inte do apænebo ēñēmīnitapa. Ayæ edæ tōmānāni ayōnāni odōmōnte apænedinque botō wacōnē māo wacōnē māo go guīdinque apænebo ēñēmīnitapa. ²¹ Ayæ pancamīniya oodeoidi iñōmīnite pancamīniya guīdegoidi iñōmīnite botō tōmāmīni imīnite apænedinque īmaī ante apænetabopa. Minitō, Idæwaa wēnæ wēnæ cæte awædō, ante pōnente wædinque Wængongui gāmænō pōninque mōnō Awēnē Itota Codito ingante pōnencāmīnīpa, ante āmo ēñēmīnitapa. Mānōmaī tōmāā cætabopa, ante do ēñēmīnīpa.”

²² “Ñōwo guīquēnē Wængongui Ōnōwoca angā ēñēninque Eedotadēē gocæboimpa. Mānīñōmō pōñōmote quīēmē bai bacæīmpa, ante pōnente wædīmo incæte ee gocæboimpa. ²³ Ōnonque botō ñōwo wayōmō wayōmō nāni quēwēñōmō pōñōmote wadāni Wængongui Tæiyæ Waēmō Ōnōwoca tōnō apæneca ēñēnāni inte do botō imote īmaī ante wææ ānānīpa. Bitō tee mōnete nangui caate wæquinque Eedotadēē gobīpa, ānāni ēñēninque mānīnque ante ēñēmōpa. ²⁴ Incæte, Wængongui waadete pōnō cædinque nānō cægainō ante watapæ apænedinque bitō, Nō pōnī impa, ante apænebi ēñencædānīmpa, ante mōnō Awēnē Itota doyedē botō imote angacāīmpa. Īnīnque tōmengā nānō anganca īnque cæcæte ante cæyōmote wæñōnāni wæmo incæte botō, Godōmenque inguīpoga quēwenguēnēmo intabopa, ante wædāmaī incæboimpa. Ayæ pogodo gote bai botō goquīnō tōmānō gocæte ante nangui cæcæboimpa, āmopa,” ante Pabodo apæncantapa.

²⁵ Ante apænedinque tōmengā ayæ godōmenque apæncantapa. “Botō, Mōnō Awēnē Odeye do pongāīmpa, ante apænedinque wayōmō māo wayōmō māo apænebo ēñēmīnitapa. Idæwaa apænebo ēñēmīnīni inte mīnitō ñōwo æmæwo botō awīnca amīnīpa. ²⁶ Mānōmaī beyæ botō ñōwoōnæ apænedinque mīnitō imīnite īmaī āmopa. Botō, Quēwencāmīnīmpa, ante cædinque anca apænebo incæte pancadāniya tōmēnāni nāni wī ēñēnō beyænque wentamō mongænte nāni wænguinque goyōnāni botō wæætē mānīnō beyæ wentamō mongæñāmaī īmopa. ²⁷ Wængongui, īmaī cæbo bacæīmpa, ante nānō ānō ante botō iñōmō edæ pæ wēenedāmaī inte mīnitō imīnite tōmānō edonque pōnī apænebo ēñēmīnitapa.”

²⁸ “Mīnitō iñōmō edæ nāmā wææ aadinque waa cæte quēwēedāni. Wængongui Ōnōwoca mīnitō imīnite ānīnque, Īnāni cæningāidi bai inānīpa, ante nānō nē angāināni iñōnānite mīnitō wæætē nē aamīni inōmīni inte tōmēnāni inānite ædæmō wææ aadāni. Mōnō Awēnē Codito ingante nāni

godongāmæ pōnencabo inānite æncæte ante tōmengä nāmā wepæ godonte ængä ate Wængongui quināni bagadānimpa cæminii. Mīnitō tōmēnāni inānite nē aamīni inte waa aedāni. ²⁹ Edæ botō do ēñēmopa. Babæidi gāwæi ecate ade cænāni aminipa. Edæ botō emō cæte gobo ate woadāni incæ babæidi cædāni mīni abai adobai wēnæ wēnæ cædinque mīni pōnencabo iñōmīnite ata cæpodāmai incædānimpa. Tōmēnāni babæ wapiticæ ānāni ēñēninque mīni cabo incæ pancadāniya ēñēnāmai badingue wadæ godāni wæcæmīnimpa. ³⁰ Ayæ tōmēmīni mīni pōnencabo incæ pancadāniya, Mōnitō miñæ poncæmīnimpa, ante cædinque babæ wapiticæ odōmoncædānimpa cæminii. ³¹ Edæ wææ cæedāni. Botō, Mānōmai bacæmīnimpa, ante wadepō mēnepoga go adodepoque iñonte itædē incæ woyowotæ incæ ñimpo cædāmai inte Ca ca wædinque mīnitō tōmāmīni imīnite apænebo ēñēnōmīnimpa. Mānōmainō ante pōneedāni,” ante Pabodo apæneca ēñēnānitapa.

³² Āninque tōmengä, “Iñānāni, botō mīnitō imīnite Wængongui nempo ñōwo emō cæte gobo tamēñedāni. Tōmengä waadete nānō pōnō cædinō ante mōni apænedō ante ēñente ewocāmīni iñōmīnite tōmengä mīnitō imīnite godongāmæ cæcā ate tæi piñænte bacæmīnimpa. Ayæ Wængongui quimōni tōmāmōni tōnō mīnitō adocabomīni bayōmīnite tōmengä eyepæ da pōnongä ate mīnitō mōnitō tōnō godongāmæ æncæmīnimpa. ³³ Botō iñōmō æbānō quēwēmōi aedāni. Edæ wacā qui tigitamō incæ oodo incæ weocoo incæ, Botō qui bacæimpa, ante cōwē æinēnāmai inōmoimpa. ³⁴ Edæ tōmēmo ōnompoca botō cædinō beyænque quēmē ænguēnēmo ante eyepæ æninque quēwēnōmoimpa. Ayæ botō tōnō godongāmæ cædāni nāni ænguēnēnō ante adinque adobai botō tōmēmo ōnompoca cædinō beyænque æninque tōmēnāni inānite da godō da godō cæbo æninque quēwēnōnānimpa. Mānōmai botō cædinō ante do ēñēmīnipa. ³⁵ Mōnō Awēnē Itota incæ iimāi ante apænegacāimpa. ‘Māincō æninque mōnō wædænque tomōmpa. Wæætē wacā ingante pædæ godōninque mōnō nangui toquinque impa.’ Ante Itota nānō apænegainō ante pōnēninque botō, Mānōmai mōnō ōnompoca nangui cædinque æninque wadāni nē ænguēnēnāni inānite mōnō pædæ godongæimpa, ante mīnitō imīnite cōwē odōmonte apænebo ēñēmīnitapa.”

³⁶ Mānōmainō ante iinque apænedinque Pabodo tōmēnāni tōnō da guicapodinque Wængongui ingante apænecantapa. ³⁷ Ayæ tōmēnāni Ca ca wædinque, Waa goe, ancæte ante godongāmæ goto pōninque tōmengä ingante yaagō yaagō cædānitapa. ³⁸ Tōmengä nānō, Botō imote æmæwo aminipa, nānō ānīnō beyæ godōmenque nangui wædānitapa. Ayæ tōmengä ingante ñænæ wipo ganca ænte māodāni gogacāimpa.

21

Pabodo Eedotadē gocampa

¹ Mōnitō tōniñadāni tōnō godongāmæ wægōninque Pabodo tōnō mōni goquincabo iñōmō, Wipo ñænæmpo do wogaa gocæ cæpa, ante adinque edæ, Nōwo gomōnipa, ante tōmēnāni inānite emō cæte godinque mānimpodē go guitamōnipa. Guiddinque mōnitō tōingä wogaa godinque Coto nāni quēwēñōmō ponte tōmæwæ æite monte ate iimō ate Ododata gomōnique go Patada nāni quēwēñōmō pontamōnipa. ² Patada iñōmō pō ti wæænte ayōmōni, Wipo ñænæmpo Pēnitia goquimpo impopa, ante adinque mānimpodē go guiddinque wogaa gotamōnipa. ³ Wogaa godinque dipæmæ inō gomō ayōmōni wāa tēiwænē Tipidebæ a ongō adinque tæcæpæ inō wodo tebæ wogaa gomōnique

go Tidiabæ pontamōnipa. Ayæ ñænæmpo mōni goimpo Tido iñōmō māincoo ōwāaquī impa, ante eñēninque mōnitō māniñōmō adobai ti wææntamōnipa.

⁴ Ti wææninque mōnitō tōmēnāni quēwēñōmō ponte ayōmōni Itota ingante nē tee empote quēwēnāni a ongōnāni adinque mōnitō ōnōmpo æmæmpoque go mēōnaa iñōnte tōmēnāni tōnō godongāmæ quēwentamōnipa. Tōmēnāni guiqūēnē, Wængonguī Tæiyæ Waēmō Ōnōwoca apænecā eñēñināni inte Pabodo ingante, Bitō wæquinque Eedotadēē iñōmō gocæ cæbipa, ante wææ ānānitapa. ⁵ Mānōmaī ante wææ ānāni eñēmōni incæte mōnitō, Mānimpoōnæque quēwenguēnēmōni intamōnipa, ante adinque wadæ gotamōnipa. Īninque tōmēnāni nāni quēwēñōmō yabæ iñō tōmēnāni nāni wencabo tōmānāni ænte māodāni godinque mōnitō ēmōnaiya pōninque godongāmæ da guicapodinque Wængonguī ingante apænetamōnipa.

⁶ Apænete ate mōnitō, Gomōnipa, āninque go ñænæ wipodē adopodē guidinque wogaa gocæ cæyōmōnite tōmēnāni wæætē, Waa goedāni, āninque ocæ ēmænte tōmēnāni oncō godānitapa.

⁷ Mōnitō iñōmō Tido iñōmō wadæ tao wogaa godinque Todēmaida iñōmō pō tōmæwæ æidinque māniñōmō nāni pōnencabo iñānite adinque mōnitō, Pōmōnipa, āninque tōmēnāni tōnō adoōnæque quēwentamōnipa. ⁸ Īmō ate wadæ godinque Tetadea nāni quēwēñōmō pōninque Pedipe oncōnē pō guiite quēwentamōnipa. Wēēnēñedē Itota nānō nē ēmiñænāni, Mōnō pōnencabo beyæ ante nē cædāni tiæte ganca iñāni incædānimpa, ante nāni Tiæte āñōnāni iñōnāni adocā Pedipe tōmēnāni nāni pōnencabo beyæ ante nē cæcā inongā inte Codito waa pōni nānō pōnō cægainō ante nē apænecā inongāimpa. ⁹ Tōmengā wēnāni baquedānique mengāa go mengāa iñōnānite Wængonguī Ōnōwoca pōnō cæcā ate tōmēnāni Wængonguī beyæ nē apænedāni inōnānimpa. ¹⁰ Mōnitō Pedipe weca tæōnæ quēwēmōni ate wacā onguīñægā tōmengā ēmōwo Agabo Wængonguī beyæ nē apænedongā inte Oodeabæ quēwente wææ pongantapa. ¹¹ Mōnitō weca pōninque tōmengā Pabodo pacadeyænta æninque nāmā ōnōmpo goti wimpote wæi ōnōwa goti wēwadinque iīmāi ante apæncantapa.

—Wængonguī Tæiyæ Waēmō Ōnōwoca botō ĩmote æbānō ante apænecā, ante apænebo eñēedāni. Oodeoidi Eedotadēē nē quēwēnāni iñōmō ĩi pacadeyænta nē ēadingā ingante mānōmaī goti wīninque oodeoidi iñāmaī iñāni nempo pædæ godōnāni æncædānimpa, ante do apænecā eñēmopa, ante Agabo apæncantapa.

¹² Mānōmaī apænecā eñēninque mōnitō Tetadea quēwēnāni tōnō Pabodo ingante wææ wææ apænedinque, Eedotadēē godāmaī ĩmāwe. ¹³ Ante wææ āñōmōnite Pabodo wæætē,

—Mīnitō iñæmpa Ca ca wæmīni eñēnte wædinque wætawente awædō. Edæ Eedotadēē goyōmote bæi ongonte goti wīnāni incæte wænōnāni wæmo incæte botō iñōmō ñimpo cædāmaī inte mōnō Awēnē Itota ēmōwo beyænque cōwē gocæboimpa.

¹⁴ Ante mānōmaī apænecā eñēninque mōnitō ancaa wææ āñōmōnite Pabodo, Cōwē gocæboimpa, ante ñimpo cædāmaī inte angā wædinque mōnitō wæætē edæ, Wængonguī nānō ānō bai bacæimpa, ante adinque mōnitō ee ate pæ wēēnetamōnipa.

¹⁵ Īninque mānimpoōnæ māniñōmō quēwēninque, Nōwo mōnō Eedotadēē gocæimpa, ante cædinque Pabodo tōnō godongāmæ ee gotamōnipa.

¹⁶ Goyōmōni Tetadea iñōmō quēwēnāni inte Itota ingante nē tee empote quēwēnāni pancadāniya mōnitō tōnō godongāmæ godinque, Nāatōō oncōnē owocæmīnimpa, ante māninganca ænte māmōnāni pō guitamōnipa. Tōmengā

iñōmō wāā tēiwæne Tipidebæ nē quēweningā inte dobæyedē Itota nānō nē emiñægā badingā inte quēwēnongāimpa.

Tantiago weca Pabodo eñacæ gocampa

17 Tōmengā oncōnē pō guī mōmōnique go Eedotadēē pōñōmōni māniñōmō quēwente nē pōnēnāni iñōmō, Waa pōmīni amōnipa, ante todānitapa. 18 Ayæ iīmō ate Pabodo tōnō godongāmæ mōni poncabo Tantiago weca eñacæ gotamōnipa. Tōmengā weca pōñōmōnite nē pōnēnāni inānite nē aadāni nē Picænāni tōmānāni adoyōmō pōnānitapa. 19 Adinque Pabodo, Waa quēwēmini, āninque godōmenque iīmaī ante apæncantapa. Mēmōidi eñēedāni, āninque, Botō oodeoidi ināmaī ināni weca gote cæyōmote Wængonguī iīmaī godongāmæ waa cæcantapa, ante Wængonguī nānō cædinō ante tōmengā adodō adodō ante apæncā eñēnānitapa. 20 Eñēninque nē aadāni Picænāni guiquēnē, Wængonguī, Bitō waa pōni cæbitapa, ante godongāmæ watapæ apænedānitapa. Ayæ Pabodo ingante wæætē apænedinque,

–Biwī eñēmi. Oodeoidi æpodō mūido ganca ināni ñōwo do pōnente badāni abitapa. Tōmēnāni iñōmō Wængonguī nānō wææ angainō ante tōmānāni eñente cōwē cædāni abitawo. 21 Ayæ edæ bitō Pabodobi wēnæ wēnæ cædāmaī iñōmite wadāni bitō imitedō ante babæ wapiticæ godō oodeoidi inānite iīmaī ante tedewēnāni eñēnānipa. Tōmēnāni, Pabodo wayōmō wayōmō godinque oodeoidi wabæca quēwēnāni inānite bee tente odōmōninque iīmaī ante apænecampa, ante tedewēnānipa. Pabodo, Mīnitō wēnāni inānite ēō togænāmaī iedāni, āninque, Dodāni nāni angainō mīni eñēnō ante ñimpo cæedāni, ante ānewengampa, ante tedewēnānipa. Ayæ godōmenque āninque, Mōitee wodi nānō wææ angainō ante wido cæedāni, ante Pabodo ānewengampa tōō. Ante tōmēnāni bitō imitedō ante babæ ante tedewēnānipa. Iñæmpa bitō mānōmaīnō ante ānāmaī iñōmite tōmēnāni oodeoidi inānite babæ ante apænedāni eñēnānipa cæbi. 22 Iñinque, Pabodo do pongāimpa, ante oodeoidi do eñenguināni inānipa, ante pōnente wædinque mōnitō ñōwo, Æbānō cæte wææ cæquīl, ante wæmōnipa. 23 Iñinque, Pabodo nō cæcā iñongante wadāni babæ wapiticæ tededānipa, ante oodeoidi eñencædānimpa, ante wææ cædinque bitō iīmaī cæcæbiimpa āmōnipa.

“Pabodo eñēmi, ānānitapa. Mōnitō weca onguīñænāni mengāa go mengāa ināni ñōwo ongōninque, Wængonguī beyænque ante cōwē cæcæmōnimpa, ante nē ānānāni inte tōmēnāni nāni āninō baī iinque cæquināni inānipa. 24 Tōmēnāni, Mōnitō āninō ante do iinque cædimōni inte wentamō mongænāmaī imōni acædānimpa, ante cædinque, Wængonguī quī, ante godoncæ cædānipa. Iñinque bitō iñōmō māniñāni inānite ænte godinque tōmēnāni tōnō godongāmæ, Wængonguī quī, ante godōe. Ayæ bitō eyepæ pædæ godōmi æninque tōmēnāni nāni godonguēnecoo godonte æninque, Wængonguī quī, ante godōninque tōmēnāni ocaguī tōmanguī ocāa pōni ēō tocate incædānimpa. Bitō mānōmaī tōmēnāni tōnō iñacabo cædinque Mōitee wodi nānō angainō baī cæbi adinque oodeoidi wæætē, Æ, Pabodo nō cæcā iñongante wadāni iñōmō babæ wapiticæ tededānipa, ante eñencædānimpa,” ante nē Picænāni ānānitapa.

25 “Ayæ oodeoidi ināmaī ināni guiquēnē nē pōnēnāni badinque æbānō cæquēnēnāni inānipa, ante pōnente wædinque mōnitō do godongāmæ pōnēninque tōmēnāni inānite iīmaī ante yewæmontamōnipa. Wadāni, Wængonguīdi quī, ante cænguī nāni cōnōnincōo ante mīnitō cænāmaī gomō aedāni. Wepæ owemōingā adinque cæningā ñē wimencate wæningā adinque cænāmaī iedāni. Ayæ nānōogængā ināmaī iñongante mīnitō godō guēa mōnāmaī

iedāni, ante do yewæmontamōnīpa,” ante nē aadāni Picænāni Pabodo ingante apænegadānīpa.

Wængonguī oncōnē Pabodo ingante bæi ongōnānīpa

²⁶ Īmō ate nīāo bayonte nē aadāni Picænāni nāni ānīnō bai ēñente cædinque Pabodo mengāa go mengāa Īnāni Īnānite ænte māocā gote cæyōnāni tōmengā nānō tæiyæ waēmō baquinque ante tōmēnāni tōnō Mōitee wodi nānō wææ angainō ante ēñente cæcantapa. Mānōmaī cædingā inte tōmengā Wængonguī oncō nænæncō yabæcōnē go guīdinque māniñōmō cædāni Īnānite apænedinque, Mōnitō adoque Wængonguī itædē go ate Mōitee wodi nānō angainō Īnque cæmōni ate Īnāni Īñōmō, Wængonguī quī, ante baō pædæ pōnōnāni æninque tancæmīnīpa, ante Pabodo tōmēnāni beyæ ante apænecantapa.

²⁷ Ayæ ōnompō æmæmpoque go mēōnaa nānō ānīmpōnæ wodo Īnque ba ate oodeoidi Atiabæ quēwente nē pōnīnāni guīquēnē Wængonguī oncō nænæncō yabæcōnē ponte ayōnāni Pabodo a ongongā. Adinque māniñōmō ōnonque ongōnāni Īnānite, Mōnō pīnte cæcæīmpa, ante ānāni ēñēninque Īnāni wæætē ænguī badānīpa. Ayæ Pabodo ingante bæi ongote, ²⁸ aa pedinque tōmengā ingante nē pīnte ānāni Īñōmō, “Īdægoidi cōwā aedāni” ante, “Īngā ingampa cæmīnī. Pō godongāmæ cædāni. Tōmengā inguīpoga tōmāo godinque tōmāmæ quēwēnāni Īnānite māo apænedinque Īmāinō ante tedewengampa. Īdægoidi wēnæ wēnæ cædāni Īnānīpa, ante cōwē ānewengampa. Wængonguī oncō nænæncō Īncæ ōnonconque Īmpa, angampa. Ayæ Wængonguī nānō wææ angainō ante mōnō ēñēnāmaī Īngæīmpa, ante tōmengā ānewengampa tōō. Ayæ Īñōmō oncō tæiyæ waēmō oncō Īñonte tōmengā wæætē guidiegoidi Īnānite ænte mānō Īncōnē guīdinque otænē ōñō bai cæcantapa cæmīnī,” ante pīnānīpa.

²⁹ Do edæ wacā Todopīmo Īñōmō Epeto Īñōmō quēwēningā inte Eedotadēē pōninque Pabodo tōnō cægōna Īnōnānīpa. Mānōmaī guēa cægōna adinque oodeoidi, Æ, Īngā oodeocā Īnāmaī Īñongante Pabodo do Wængonguī oncō nænæncō yabæcōnē ænte māmongā wāānē guībaingampa, ante wawique pōnēninque mānīnō ante wapiticæ apænedānīpa.

³⁰ Mānōmaī ante ānewēnāni ēñēninque Eedotadēē quēwēnāni tōmāo Īñōmō Yæ yæ āninque pogodo pōnānīpa. Ponte Wængonguī oncō nænæncō yabæcōnē māo pō guīdinque Pabodo ingante bæi ongote æninque oncodo wēā mantao godinque odemō do tee mōnedānīpa. ³¹ Ayæ godōmenque, Wængōngæīmpa, ante tæcæ cæyōnāni adocanque mæi odōmāno tontadoidi awēnē cōmantante ingante apænecantapa. Eedotadēē tōmāo Yæ yæ āninque pogodo pōnānīpa cæbīi. ³² Ante mæi angā ēñente wædinque awēnē cōmantante Īñōmō tontado capitāōidi tontadoidi Īnānite, Pōedāni, āninque nē Yæ ānāni weca pogodo wææ do pōnānīpa. Īnque awēnē cōmantante tōnō tontadoidi do wæænte pōnānīpa, ante adinque wadāni wæætē Pabodo ingante nē tæi tæi pānīnāni inte nōwo nīmpo cædinque ee adānīpa. ³³ Pabodo weca pōninque awēnē cōmantante angā ēñēninque tontadoidi wæætē Pabodo ingante bæi ongōninque yaēmengō mēmēña goti wīnānīpa.

Awēnē cōmantante Īñōmō, Æcānō Īngāi, ante ayæ, Quīnō wēnæ wēnæ cæcāi. ³⁴ Āñongante pancadānīya, Īmaī cæcantapa, āñōnāni wadāni wæætē, Wīi Īmaī wadō cæcantapa, āninque wææ wææ āñōnānīte tontadoidi awēnē cōmantante Īñōmō, Nōingā ante æbānō cæte ēñenguīmoo, ante wædinque tontadoidi Īnānite angā ēñēninque Pabodo ingante tōmēnāni wææ cæte

īñōmō ænte mæicæte ante cædānitapa. ³⁵ Ænte godinque tēwaimpa ganca tæcæ pōñongante godongāmæ ongōnāni godōmenque ænguī badinque wiwa cæcæ cædāni wædinque tontadoidi wæætē Pabodo ingante wææ cædinque òñōnancapæ ængō cædinque adīmōngā næænte mæidāni tēwaimpaa æicantapa. ³⁶ Ayæ tōmānāni edæ tee empote pōnāni īñōmō Yæ yæ āninqe, “Cōwē wido cæcæimpa,” ante ancaa ānānitapa.

Pabodo nāmā wææ apænecampa

³⁷ Wææ cætīñōmō tæcæ mangui guicæte ante cæyōnāni Pabodo īñōmō tontadoidi awēnē cōmantante ingante apænedinque,

—Bitō Ao āmi ēñente ate botō adodeque bitō imite apænecæboimpa.

Āñongante,

—Īñæmpa bitō guidiego tededō tedebe imitawo. ³⁸ Bitō īñæmpa equitobi īnōmi inte edæ doyedē, Wido cæcæimpa, ante cædinque nē, Wæñongæimpa, ante nāni ānincabo īñōnānite coatodo mīdo ganca īnāni īnānite òñōmæca ænte māobi godānitapa. Botō ayōmo bitō adobi imitapa tōō.

³⁹ Āñongante Pabodo wæætē,

—Īñæmpa botō waobo ēñagaīmo inte oodeobo īnōmo imopa. Botō wīl òñōñomonque ēñagaīmo imopa. Tiditiabæ Tadoto nāni nanguī quēwēñōmō ēñagaīmo imopa cæbii. Ao āmi ate botō īnāni īnānite apænebo ēñēmaīnānīpa.

⁴⁰ Āñongante Ao angā ate tēwaimpaa adiyæ gongæninque godongāmæ ongōnāni īnānite Pabodo, Apocænē iedāni, ante baī cædinque compo compo cæcā. Adinque tededāmaī ongōnāni ate tōmēngā ebedeoidi nāni tededō tededinque īmaī ante apænecā ēñēnānitapa.

22

1 “Botō tōnīñamīni īmīni ēñēedāni. Botō wæmpomīni īmīni botō nāmā wææ apænebo ēñēedāni.”

2 Ante Pabodo ebedeo tededō apænecā ēñēninque tōmēnāni, Æ mōnō tededō apænecampa, ante wædinque godōmenque ēamonca nōwæ ongōñōnāni tōmēngā īmaī ante apænecantapa.

3 “Botō īñōmō oodeobo ingaīmo imopa. Tiditiabæ Tadoto īñōmō ēñagaīmo inte botō Eedotadēē ponte pægaboī aedāni. Īñōmō pædinque Gāmadiēdo nē odōmōngā weca adīmo inte botō mōnō mæmæidi nāni wææ angainō ante ædæmō ēñēninque adodō ante ēñente cæte pægaboimpa. Mīnitō, Wængonguī beyæ ante mōnō cōwē cæcæimpa, ante nōwoōnæ cæmīnīpa. Mīnitō cæmīni baī botō adobaī Wængonguī beyæ ante cæcæte ante cōwē nanguī cædinque quēwēngaboimpa. ⁴ Īninque, Itota òñædē godō Taadō baī ingampa, ante nē pōnēnāni īnānite botō, Pāmo wæncædānīpa, ante togæte pangaboimpa. Onguīñænāni incæ onquiyænāni incæ tōmānāni īnānite bæi ongōninque botō wadāni nempo pædæ godōmo æninque tōmēnāni wæætē nē pōnēnāni īnānite māo tee mōnedāni wægadānīpa.”

5 “Mānōmaī cædinque botō, Godōmenque Daāmaco īñōmō godinque botō, Taadō, ante nē pōnēnāni īnānite bæi ongonte goti winte adodō Eedotadēē īñōmō ænte māmō pædæ godōmo æninque awēnēidi wæætē tōmēnāni īnānite pānāni wæcædānīpa, ante cætabopa. Mānōmaī cæcæte ante cæbo adinque, Wængonguī qui, ante nē godongā ñænængā pōnī īnōngā tōnō nē aadāni nāni Picæncabo tōnō Ao āninqe, Mōnitō tōnīñadāni Daāmaco īñōmō quēwēnāni acædānīpa, ante cadota ante yewæmōnāni ænte gotabopa. Īninque, Botō æbānō cæboo, ante nē agānāni inte awēnēidi incæ edæ, Pabodo nāwangā angampa, ante nōwo nē apænequēnēnāni īnānīpa,” ante Pabodo angantapa.

Botō wēnē pōnēwengainō ante ñimpo cædinque wadō ante pōnēmopa, ante Pabodo apænecampa
(Nāni Cægainō 9.1-19, 26.12-18)

⁶ Äninqwe Pabodo, İımaı cægaboımpa, ante godömenque apænecantapa, “Botō taadō godınque tæcæbæcä İıonte Daämaco obo ponte ayömete öönædē İıontobæ ñäo botō weca pö godongämæ guınæ gongæ ate wædinque, ⁷ botō guıdömëmæ tæ go wææntabopa. Ayæ eñēñömote, ‘Taodo, Taodo. Botō İmote quınante togænte pämiı.’ ⁸ Äñongante, ‘Awënë, æbidö İnömi İmiı.’ Ante wæyömete tömengä, ‘İtota Nāatadeta quëwënımo inte mänımödö bitö nē togænte pänömo İmopa,’ ante apænecantapa. ⁹ Mänömaı apæneyongä botö tönö godongämæ godäni guıquënë ñäo gongæınque adınque botö İmote nē apænecä nänö tededö ante eñēnämäı İnänıtapa. ¹⁰ Botö İñömö, ‘Awënë, quıñö cæquënëmo İmoo, ante ämi eñēmoe.’ Äñömote mönitö Awënë wæætē, ‘Bitö ængæ gantıdınque Daämaco İñömö goe. Botö, Taodo İımaı cæcæcäımpa, ante wacä İngante Daämaco İñömö nē quëwengä İngante do apænebo eñngampa cæbiı. Bitö Daämaco İñömö gote ongöñömi tömengä wæætē bitö İmite apænecä eñente cæcæbiımpa,’ angantapa. ¹¹ Ayæ ñäo gongæ adınque botö bee wodömonte baı bayömete botö tönö godongämæ godınäni wæætē töö æmænte Daämaco İñömö mäodäni gotabopa,” ante Pabodo apænecantapa.

¹² Mänömainö ante apænedınque Pabodo godömenque apænecantapa. “Mänıñömö gote ongöñömo wacä tömengä emöwo Änäniya botö weca pongantapa. Tömengä İñömö Wængonguı İngante guıñente wædongä inte dodäni nāni wææ angainö ante cöwē eñente cæcä İnongäımpa. İninqwe oodeoidi mänıñömö quëwënäni tömänäni tömengä İngante waa adönänımpa. ¹³ Tömengä İñömö botö weca pö næ gongæınınque, ‘Taodo, bitö botö biwi İmi, ñöwo waa bamonte ae.’ Tæcæ äñongante botö æmö adınque tömengä İngante waa atabopa. ¹⁴ Tömengä ayæ apænedınque, ‘Mönö mämmæıdi Wængonguı incæ, Botö æbänö cæquımo İmoo, ante botö pönente angainö ante bitö eñencæbiımpa, ante cædinque bitö İmite apænte ængampa. Ayæ, Mönö nö cædongä İngante tömëmi acæbiımpa. Adocä apænecä eñencæbiımpa, ante cædinque Wængonguı bitö İmite do apænte ængampa. ¹⁵ İninqwe nē adımi inte nē eñëmi inte bitö İñömö edæ bitö adınö ante bitö eñëñınö ante, Nawangä İmpa, ante tömämæ quëwënäni İnänıte mäo apænebi eñencædänımpa. ¹⁶ Nöwo İñömö quıñante a ongömiı. Ängæ gantıdınque İtota emöwo apænedınque, Wënë wënë botö cædö pönö ñä mënongabi quëwëmoe, äninqwe æpæñe guıie.’ Ante Änäniya angä eñëñınque botö æpæñe guııtabopa,” ante Pabodo apænecantapa.

Oodeoidi weca gotabopa, ante Pabodo apænecampa

¹⁷ “Ayæ ate adodö Eedotadëe pontabopa. Ayæ Wængonguı oncö ñænæncö yabæcönē go guıdınque Wængonguı İngante apænedınque botö ate baı cæwënente ayömö, ¹⁸ mönö Awënë botö İmote İımaı ante apænecantapa. ‘Bitö botö İmote ante nö apænebi incæte İınäni eñēnämäı İnäni inte Baa anguınäni İnänıpa cæbiı. Nöwo Eedotadëe quıngæ wodıı tao gobäwe.’ ¹⁹ Äñongante botö, ‘Awënë eñëmi, antabopa. Oodeoidi odömöıncönē wacönē wacönē go guıdınque botö bitö İmite nē pönänäni İnänıte mäo tee mönedınque tæı tæı pänımo İmopa. Mänömaı İmpa, ante İınäni do eñëñänıpa. ²⁰ Ayæ, İtota incæ näwä Awënë İnongä İngampa, ante nē apænecä İñngante Etebä wodi İngante wænönäni wæñongä botö edæ Ao äninqwe nē wænönäni weocoo aate a ongontabopa, ante tömënäni do agäınäni inte botö İmote waa aquınäni

inānīpa.’ ²¹ Ante wææ apænebo incæte Wængongui Awënë wæætē, ‘Nōwo goe, āmopa, angantapa. Gobæ oodeoidi ināmaī ināni weca bitō imite da godōmo gocæbiimpa,’ ante da godongā gotabopa,” ante Pabodo apæncantapa.

Pabodo tontadoidi awënë cōmantante weca ongongampa

²² Pabodo, Oodeoidi ināmaī ināni weca angā gotabopa, ante nānō apænedī ganca godongāmæ ongōnāni ēñē gōnānitapa. Wæætē mānīne apænecā ēñente wædinque tōmānāni yedæ ānīnque, “Oodeoidi ināmaī ināni weca godingā iñōmō edæ quēwēnāmaī inguēnengā awædo. Tōmengā ingante mōnō wo ēwengæimpa.” ²³ Ānīnque tōmēnāni godōmenque ængui badīnque Yæ yæ ānīnque nāmā weocoo yabæcooqque gāni tadongadinque wancæ wancæ cædinque onguīpo guidimō ō ænīnque wo ææntodō wo ææntodō anca cædānitapa. ²⁴ Mānōmaī ængui bate wēnæ wēnæ cædāni adīnque tontadoidi awënë cōmantante angā ēñēnīnque Pabodo ingante wææ cæte iñōmō manguidāni guicantapa. Ayæ, Quīnō wēnæ wēnæ cæcāi ante pīinte ānānī, ante ēñencæte ante tontadoidi inānite apænedīnque, Mīnitō cōwē cædinō baī cædinque tæi tæi pāmīni caate wædinque Pabodo tōmāā tōmengā cædinō edonque pōnī apænecā ēñencæboimpa, angantapa. ²⁵ Ēñēnīnque tōmengā ingante pancæte ante æmontaimenca tæcæ goti wīnīnque nō cæyōnāni Pabodo iñōmō tontado awënë capitāō mānīñōmō ongongā ingante apænedīnque,

—Īñæmpa apænte ānāmaī iñōnāni botō odōmāno onguīñæmo iñōmote quīmæ pāwēmīnī. Mānōmaīnō cædinque mīnitō awēñēidi nāni wææ angāinō ante dicæ ēñente cæmīniyā.

²⁶ Āñongā capitāō wæætē awënë cōmantante weca godīnque,

—Īngā iñōmō odōmāno onguīñængā iñongā ingā ataqwe. Nōwo æbānō cæquīmī. ²⁷ Angā ēñente wædinque cōmantante iñōmō Pabodo weca pōnīnque tōmengā ingante,

—Bitō nāwangā odōmāno onguīñæmi imitawo.

Āñongante Pabodo,

—Ao, bitō ā baī botō mānīmodō imopa, angantapa.

²⁸ Pabodo apænecā ēñēnīnque cōmantante wæætē,

—Botō guīquēñē odōmāno ināmaī ēñagaīmo inte mānīnō bacæte ante cædinque nangui godōmo ænīnque odōmānoidi wæætē botō imote, Odōmānobi imīpa, ante yewæmōnāni bagaboimpa.

Apænecā ēñēnīnque Pabodo wæætē,

—Botō guīquēñē odōmānobo ēñagaīmo inte edæ odōmānobo iñōmo imopa, ante apæncantapa.

²⁹ Mānōmaī apæneyongā nē pancæ cædināni guīquēñē do tōmengā ingante emō cæte wadæ godānitapa. Ayæ cōmantante iñōmō, Pabodo odōmāno onguīñængā iñongante botō āmo yaēmengonca goti wīnānīpa tōō, ante guīñente wædinque, Botō awēñēidi pīnāni wæcæ wæ, ante wægacāimpa.

Oodeoidi nāni Apænte Āincabo weca Pabodo ongongā

³⁰ Īmō ate cōmantante iñōmō, Quīnō Pabodo wēnæ wēnæ cæcāi ante oodeoidi pīinte ānānī, ante ēñencæte ante Pabodo ingante āñecā ta pongantapa. Ayæ, Wængongui qui, ante nē godōnāni nāñænāni tōnō oodeoidi tōmēnāni nāni nē Apænte Āincabo inānite āñete godongāmæ ponte ongōñōnāni Pabodo ingante ænte māwæ tōmēnāni weca gō cæcā gongængantapa.

23

1 Pabodo iñōmō oodeoidi nāni nē Apænte Āincabo inānite gomō adīnque,

—Botō mēmōidi ēñeedāni. Botō mīmō entawente nāmā apænte cædinque Wængongui beyæ botō cæquēnēnō ante wēēnēñedē iinque cædinque cōwē ñowo ganca adobaī cædinque quēwēmopa.

² Ante mǎnōmai apæñecā ēñente wædinque, Wængongui qui, ante nē godongā ñǎxnægā pōni inongā Ānāniya guiquēnē Pabodo gǎānē ongōnāni inānite apænedinque, Ōñoneca tæi tæi tadeedāni, angantapa. ³ Āñongā Pabodo wæætē,

—Bitō iñǎmpa botō imote apænte ancæte ante Mōitee wodi nānō wææ angainō ante cæbitawo. Incæte adode nānō wææ angainō ante ēñēnāmai inte bitō edæ, Tæi tadeedāni, ante pōnō āmi awædō. Bitō weocoo waēmoncoo ēñabi incæte mīmō wentamō entawēninque cæyōmite Wængongui bitō imite nǎēmæ tæi tadeccæaimpa tōō.

⁴ Ante apæñecā ēñēninque Pabodo gǎānē ongōnāni wæætē,
—Bitō iñǎmpa, Wængongui qui, ante nē godongā ñǎxnægā pōni iñongante quimæ tedewēmii.

⁵ Āñōnānite Pabodo wæætē,
—Botō tōniñadāni ēñēedāni. Botō, “Wadāni awēnē iñongante tōmēngā ingante wēnæ wēnæ tededāmai incæbiimpa,” ante do wææ yewæmongatimpa, ante do ēñēmopa. Iinque botō, Iñōmō ongongā, Wængongui qui, ante nē godongā ñǎxnægā pōni inongā ingampa, ante ēñēnāmai inte botō mǎnōmainō ante apænetabopa.

⁶ Ante apænedinque Pabodo, Iināni pancadāniya Tadoteoidi iñōnānite pancadāniya Paditeoidi inānipa, ante adinque tōmēnāni nāni nē Apænte Āincabo inānite aa pedinque,

—Botō mēmōidi ēñēedāni. Botō Paditeo wēmo nē ēñagaīmo inte botō mǎmpo Paditeo nānō ingai bai botō adobaī Paditeobo inōmo imopa. Mǎnimodō inōmo inte botō, Mōnō ñāni ōmæmonte watapæ quēwēngæimpa, ante pōnēmopa. Iinque mǎniñe botō pōnēnō beyænque botō imote apænte āninque mīnitō pancæ cæmīni awædō, angantapa.

⁷ Pabodo mǎnōmainō ante apæñecā ēñente wædinque Paditeoidi tōnō Tadoteoidi dodāni nāni pōnēngainō ante wæætedō wæætē ānewēninque Paditeoidi nānēñē Tadoteoidi nānēñē nāni cabo nāni cabo badānitapa.

⁸ Iimāi impa. Tadoteoidi guiquēnē, Mēwoga waomō ēwocamō inte mōnō ñāni ōmæmongæimpa, ante, Babæ ancædō, ante Baa āninque, Ōñowocaidi tōnō anquedoidi Wængongui weca owodānipa, ante adobaī edæ Baa ānāni inōnānimpa. Paditeoidi guiquēnē mēnea ante pōnēninque Ao ānāni inōnānimpa.

⁹ Iinque wadō wadō tedete ogæ te deyōnānite Paditeoidi tōmēnāni nē odōmōnāni pancadāniya ængæ gantidinque,

—Iingā iñōmō mōnitō ayōmōni wēnæ wēnæ cædāmai ingampa tōō. Wæætē edæ anquedo incæ wacā ōñowoca incæ Wængongui weca owocā inongā inte tōmēngā ingante apæñecā imaingampa ānewēmīni.

¹⁰ Ante nanguī ogæ te deyōnāni tōmānāni godōmenque Yæ yæ ānāni ate wædinque tontadoidi awēnē cōmantante iñōmō, Pabodo ingante æmæmæ inō tōō godō æmæmæ inō tōō godō cædinque æi guīñānāni wæmaingampa. Ante pōnente guīñente wædinque tontadoidi inānite angā wæñānāni ate, Pabodo ingante bæi ongonte ō æninque wææ cæte iñōmō ænte mæi tee mōneedāni, angā ēñente tee mōnedānitapa.

¹¹ Iimō ate woyowotæ mōnō Awēnē iñōmō Pabodo weca ponte apæñecantapa. “Pabodo, Guīñente wædāmai incæbiimpa. Bitō doyedē Eedotadēē iñōmō botō imotedō ante apænedinque, Nāwā Awēnē inongā

ingampa, ante apænebitawo. Nōwo iñōmō do bitō apænedō bai Odōmā iñōmō godinque adobaī apæneceabiimpa,” angantapa.

Pabodo ingante wængongæimpa, ante cædānipa

12 Nāo bayonte Oodeoidi pancadāniya guiquenē godongāmæ pōnēninque iimainō ante Ao ānānitapa. Cænāmaī bedāmaī inimo inte mōnō Pabodo ingante wængongæimpa, ante cædinque, Pabodo miī quēwēñongante mōnō cabo incæ æcānō cæna æcānō beda māningā nānō wænguinque cæcampa. 13 Onguiñænāni nē ānāni iñōmō coadenta ganca ināni ayæ godōmenque nangui ināni godongāmæ pōnēninque mānōmaī anewēninque cædāni inānitapa. 14 Iināni iñōmō, Wængongui qui, ante nē godōnāni ñænænāni tōnō nē aadāni nāni Picæncabo weca godinque iimāi ante apænedānitapa.

—Mōnitō godongāmæ Ao āninque, Pabodo ingante wængongæimpa. Edæ miī quēwēñongante æcānō cæna æcānō beda nānō wænguinque, ante āmōnipa cæminii. 15 Minitō tōnō wadāni mīni Apænte Āincabo inōmīni inte mīnitō iñōmō, Pabodo æbānō cæcāi, ante ædæmō ēñencæte ante wæte bai apænedinque tontado awēnē cōmantante ingante babæ ante āmīni ēñēninque tōmengā wæætē Pabodo ingante mīnitō weca ænte poncæ cæcæcāimpa, āmōnipa. Mānōmaī babæ āmīni ēñente cædinque cōmantante wæætē Pabodo ingante māwængā tæcæ wææñongante mōnitō guiquenē taadō wææ wānōninque bæi ongente edæ wæñōmōni wæncæcāimpa āmōnipa.

16 Āñōnāni Pabodo nānōwāa iñōmō edæ do ēñengantapa. Ēñēninque tōmengā tontadoidi nāni wææ cæte iñōmō do go guidinque Pabodo ingante apæneceā. 17 Ēñēninque Pabodo wæætē tontadoidi awēnē capitāo ingante apænedinque,

—Īngā edēningā ingante mīnitō awēnē cōmantante weca ænte manguibi guicæe. Tōmengā cōmantante ingante adodeque apænececāimpa.

18 Angā Ao āninque capitāo wæætē māningā edēningā ingante ænte guidinque cōmantante ingante apæneceantapa.

—Pabodo mōnō nē tee mōnedongā iñōmō botō imote aa pedinque iimāi angantapa. Īngā edēningā ingante awēnē cōmantante weca ænte māobi guidinque tōmengā awēnē ingante adodeque apænececāimpa, angantapa.

19 Ante apæneceā ēñēninque cōmantante iñōmō edēningā ingante tōō æmænte nānēnē māocā goyongante,

—Botō imote æbānō apæneceæte ante pōmii.

20 Āñongante,

—Awēnē ēñēmi. Oodeoidi godongāmæ pōnēninque iimāi babæ cæcæte ante cædānipa. Tōmēnāni, Pabodo æbānō cæcāi, ante ædæmō ēñencæte ante bai apænedinque bitō imite babæ ante apæneceā cædānipa. Bitō iimō ate Pabodo ingante tōmēnāni nāni nē Apænte Āincabo weca ænte poncæbiimpa, ante cædinque babæ cæcæte ante cædānipa. 21 Tōmēnāni iñōmō, Pabodo mīngā quēwēñongante æcānō cæna æcānō beda nānō wænguinque, ante nē āñōnāni inte edæ, Wængongæimpa, āninque cædānipa. Adodāni nāni cabo incæ coadenta ganca onguiñænāni wænoncæte ante taadō do wææ wānōninque edæ, Wæñōmō wæncæcāimpa, ante edæ a ongōnānipa cæbii. Tōmēnāni, Bitō æbānō Ao anguiimi, ante ēñencæte ante ponte anewēñōnāni bitō iñōmō wæætē tōmēnāni nāni ānō bai cædāmaī incæbiimpa āmopa.

22 Ante edēningā apæneceā ēñēninque cōmantante iñōmō, Bitō, Awēnē ingante ante mānōmaī apænetabopa, ante wacā ingante apænedāmaī pæ wēneceabiimpa. Nōwo edæ goe, angantapa.

Pedique weca Pabodo ingante ænte mādāni gocampa

²³ Edēningā ingante mǎnōmaī angā gocā ate cōmantante wæætē awēnēna capitāōna mēnaa inate aa pecā pōñōnate tōmēna inate iīmaī angantapa. Mīnatō ñōwo tontadoidi ōnōwa nē godāni dotiento ganca ināni tōnō cabayo mongænte nē godāni tetenta ganca ināni ayæ tapa nē næænanī dotiento ganca ināni tōnō mǎnimpodāni inānite iīmaī ancæmīnaimpa. Mīnitō ñōwoōnæ eyepæ cædinque wantæ wantæ guīñongā wadæ godinque Tetadea ganca goedāni, ante da godōmīna tao gocædānīmpa. ²⁴ Ayæ Pabodo beyæ cabayoidi āmi ænte gocædānīmpa. Tōmengā ingante wææ aadinque pancabaa awēnē gobedōnadodo Pedique weca āmīna ænte mādāni cabayo mongænte adīmōngā gocæcāimpa. ²⁵ Ānīnque awēnē cōmantante iñōmō cadota ante iīmaī ante yewæmōngantapa.

²⁶ Pedique ēñēmi.

Bitō acæbiīmpa, ante botō Codaodio Ditia inōmo inte ñōwo yewæmōmopa. Bitō nē gobedōnadodo awēnē inōmi inte waēmō pōni īmīpa, āmopa. Waa quēwencæbiīmpa, āmopa.

²⁷ Īngā ingante oodeoidi bæi ongonte wænoncæ cæyōnānite botō wæætē, Īñæmpa īngā iñōmō odōmāno onguīñægā ingampa, ante do ēñente wædīmo inte tontadoidi tōnō godinque tōmengā ingante gā pe æmpote ō ænte wææ aatabopa. ²⁸ Ayæ oodeoidi, Pabodo wēnæ wēnæ cæcāi, ante quīnante piīnte ānāni. Ante ēñencæte ante cædinque botō tōmengā ingante tōmēnāni nāni nē Apænte Āincabo weca ænte gotabopa. ²⁹ Āente gote ēñēñōmo tōmēnāni dodānique nāni angāinonque ante, Pabodo ēñēnāmaī cæcampa, ante piīnte ānāni wætabopa. Īnīnque botō ayōmote tōmēnāni, Pabodo nānō wængūnque nānō tee mōnequinque wēnæ wēnæ cæcampa, ante piīnīnque ōnonquedō ante cædānīpa, ante awædō. ³⁰ Ñōwo iñōmō, Īngā onguīñægā ingante wænoncæte ante oodeoidi awēmō cædānīpa, ante tededāni ēñēnīmo inte botō tōmengā ingante bitō weca do da godōmo gocampa. Tōmengā ingante nē piīnte ānīnāni inānite bitō weca adobaī da godōmo godānīpa. Mānīnque ante yewæmōmopa.

Ante cadota ante yewæmōnīnque, Awēnē gobedōnadodo Pedique acæcāimpa, ante tontado awēnē cōmantante da godongā ænte godānitapa.

³¹ Īnīnque cōmantante nānō ānīnō ēñente cædinque tontadoidi woyowotæ tao godinque Pabodo ingante Antipati ganca adīmōngā mādāni gocantapa.

³² Īimō ate, Cabayo mongænte nē godāni tōnō Pabodo adīmōngā gocæcāimpa, ānīnque tōmēnāni nempo emō cæte godinque ōnōwa nē godānique tōmēnāni nāni cæte quēwencōnē ocæ emænte godānitapa. ³³ Cabayo mongænte nē godāni wæætē Pabodo ingante godōmenque ænte godinque Tetadea iñōmō pōnīnque awēnē gobedōnadodo ingante cadota pædæ godōnīnque Pabodo ingante awēnē nempo pædæ godōnāni ængantapa. ³⁴ Awēnē gobedōnadodo iñōmō cadota ænte adīnque, Bitō æbædō ēñagabiīmpa. Āñongā Pabodo, Tīditiabæ ēñagaboīmpa. ³⁵ Ante apænecā ēñēnīnque gobedōnadodo wæætē,

—Bitō imite nē piīnte ānīnāni pōnāni ate māniñfedē ate botō, Bitō æbānō apænequīmi, ante ēñencæboīmpa.

Ānīnque wææ wānōnāni inānite apænedīnque, Mīnitō Awēnē Edode wodi nānō apænte angaincōnē Pabodo ingante ænte gote wææ wānōedāni, ante gobedōnadodo angā ænte godānitapa.

24

Pedique weca ongōninque Pabodo nāmā wææ apæneca

¹ Ōnompō æmæmpoqe iūōnæ go ate, Wængonguī qui, ante nē godongā ñænængā pōni inongā Ānāniya iūōmō Eedotadēē quēwēninque wææ Tetadea gocantapa. Ayæ wacā tōmengā ēmōwo Tedetodo tōmēnāni nāni wææ angainō ante ædæmō adingā inte wadāni beyæ ante nē wææ apæneca īnongā inte nē abogado nāni ānongā īnongāimpa. Tōmengā tōnō oodeoidi nē aadāni nāni Picæncabo pancadāniya adobaī Ānāniya tōnō godongāmæ godānitapa. Godinque pancabaa awēnē gobedōnadodo weca ponte apænedinque, Pabodo nē wēnæ wēnæ cædongā īngampa tōō, ānānitapa. ² Pabodo īngante āñete māmōnāni pongā ate nē abogado Tedetodo iūōmō gobedōnadodo Pedique weca ongōninque apænecantapa.

—Awēnē gobedōnadodo ēñēmi. Bitō nempo quēwēninque mōnitō wantæpiyæ wæætēdō wæætē cædāmai inte godongāmæ piyænē cæte waa quēwēmōnipa. Ayæ bitō nē aabi īnōmi inte, Æbānō cæcæimpa, ante do ēñēninque mōnitō ōmæ iūōmō waa cæbi ate mōnitō godōmenque waa pōni quēwēmōnipa. ³ Awēnē Pedique, bitō waēmō pōni īnōmi inte īmæca tōmāo waa cæbi æninque mōnitō bitō īmite cōwē waa ate pōnēninque waa apænēmōnipa. ⁴ Incæte, Botō wantæpiyæ apænebo bai bitō wæcædōmiimpa, ante pōnente wædinque botō, Ao āmi ate wantæ iūō apænebo pōnō ēñēe, ante abogado Tedetodo angantapa.

⁵ Ayæ, “Mōnitō ayōmōni iūōmō ongongā iūōmō nē wēnæ wēnæ cædongā inte tōmāo godinque wapiticæ apæneca ēñēninque oodeoidi ænguī badinque Yæ yæ ānāni wæmōnipa. Edæ Nāatadēnōidi wapiticæ nāni cæcabo iūōnānite iūōngā iūōmō adocā īnongā inte nē angā īngampa tōō. ⁶ Ayæ Wængonguī oncō ñænæncō incæ ōnonconque bai baquinque tōmengā wēnæ wēnæ cæcā adinque mōnitō tōmengā īngante bæi īngontamōnipa. Ayæ mōnitō mæmæidi nāni wææ angainō ante Pabodo æbānō ēñente cæcāi, ante mōnitō apænte ancæte ante cætāmōnipa. ⁷ Mānōmai ante tæcæ cæyōmōni tōmengā mōnitō nempo ongōñongante cōmantante Ditia iūōmō māmō gā pe æmpote ō ængantapa. ⁸ Ayæ mōnitō adocā Pabodo īngantedō ante nē piinte āmōni iūōmōnite adocā cōmantante Ditia angā ēñēninque bitō weca ponte ongōmōni æ. Bitō Pabodo īngante āmi ēñēninque tōmengā, Æbānō cæboi, ante nāmā wææ apæneca cæimpa. Tōmengā mānōmai wææ apæneca ēñēninque bitō, Mōnitō æbānō nāwangā āmōnipa, ante do ēñæcæbiimpa.”

⁹ Ante Tedetodo mānōmainō ante apæneyongante oodeoidi godongāmæ apænedinque, Tedetodo nāwangā angampa. Pabodo wēnæ wēnæ cæcā īngampa tōō, ante adoyōmō ante apænedānitapa. ¹⁰ Gobedōnadodo Pedique guiquēnē Pabodo gāmæno opo cæpyongante Pabodo wæætē iūmai apænecantapa.

—Awēnē Pedique ēñēmi. Tæiyæ wadepo iūōnte bitō iūmæca nē apænte angāimi inte mōni oodeocabo æbānō cæmōni īmōni, ante do ēñēmipa, ante adinque botō, Bitō weca ponte nāmā beyæ wææ apæneca boimpa, ante tobopa.

¹¹ Bitō iūōmō ēñæcæte ante cæbi īninque iūmainō ante do ēñēnguīmi īmaimipa. Botō ōnompō tipæmpoga go mēōnaa mānimpoñæque iūōnte Wængonguī weca ædæ wææninque tōmengā īngante waa apæneca te ante Eedotadēē æitabopa.

¹² Māniūōmō æi pōninque botō tōmēnāni ayōnāni quino wēnæ wēnæ cæboi æ. Botō Wængonguī oncōnē ñænæncō yabæcōnē go guīibo incæ, oodeoidi odōmōincōnē go guīibo incæ taadō gobo incæ wadāni tōnō guēadō guēa piinte āmo dicæ adāniyaa. Botō ædōmē godinque Yæ yæ āmo dicæ ēñēnāniyaa.

13 Īninqe tōmēnāni nāni, Pabodo wēnæ wēnæ cæcampa, ante nāni pīnte ānewēnō ante edæ, Nāwangā impa, ante quīnō impa odōmonguīnānii. Edæ dæ ampa, ante Pabodo nāmā wææ apæncantapa.

14 “Incæte mōnitō, Quēwenguīnō Taadō impa, ante mōni pōnēnōnō ante oodeoidi wæætē, Wapiticæ goquīnō impa, ante pīnānīpa. Īninqe, Pabodo mānīnōnō ante pōnengampa, ante ĩnāni nō ante apænedānīpa. Nāwangā impa, ante bitō ĩmīte āmopa. Botō mānīnōnō ante pōnēnīnque mōnitō mæmæīdi Wængonguī ingante waa ate cædinque quēwēmopa. Ayæ Mōitee wodi nānō wææ angainō ante botō Ao āninqe Wængonguī beyæ nē apænedāni nāni yewæmongainō ante adobaī Ao āninqe quēwēmopa. 15 Wængonguī angā ate mōnō waocabo edæ nō cæmō incæ wīwa cæmō incæ tōmāmō wænte ate nāni ōmæmōnīnque mōnō quēwengæīmpa, ante ĩnāni pōnēnānīpa. Botō tōmēnāni nāni pōnēnō baī adobaī ante pōnente tobopa. 16 Mānōmāī beyæ botō, Wængonguī ayongā incæ wadāni ayōnāni incæ botō nāmā apænte botō pōnēnō tæiyæ wæmō entawencæboīmpa, ante cōwē nanguī cæbopa.”

17 Āninqe Pabodo godōmenque apæncantapa. “Botō wayōmō gote tæiyæ wadepo quēwente ate tōmēmō ōmæ adodō pōnīnque, Ōmæpodāni wæwēnāni quī, ante ænte pōnīnque botō guīdēnāni oodeoidi ĩnānīte wæætē pædæ godōmo ænānitapa. Ayæ, Wængonguī quī, ante baō pædæ godontabopa. 18 Mānōmāī cæyōmo ayōnāni botō ĩnōmō tæiyæ wæmō bacæte ante Mōitee wodi nānō angainō baī do eyepæ cædīmo ĩnte Wængonguī oncō nānæncō yabæcōnē pō guīdīnque, botō, Wængonguī quī, ante godōmo adānitapa. Wīī nanguī ĩnāni tōnō cædinque botō Yæ yæ ānāmāī ĩnte cæbo adānitapa. 19 Incæte botō ĩmotedō ante nāni pīnte ānīnō nāwangā ĩ baī wadāni guīquēnē oodeoidi incæ Atiabæ quēwente pōnāni ĩnōmō, tōmēnāni wæætē bitō weca do ponte anguēnēnāni ĩnānīpa. 20 Botō oodeoidi nāni nē Apænte Āincabo weca ongōnōmote, Pabodo æbānō nō cædāmāī ingāā, ante apænte āñōnānīte bitō weca nōwo ongōnāni guīquēnē mānīnō ante nē ēñēnāni ĩnānīpa. Īninqe wadāni dæ ānāni adīnque ĩnāni wæætē edæ tōmēnāni nāni ēñēnīnō ante nē anguēnēnāni ĩnānīpa. 21 Botō awēnēidi weca ongōnīnque yedæ āninqe, ‘Mōnō wænte ate nāni ōmæmongæīmpa, ante botō apænedō beyænque mīnitō nōwoonæ botō ĩmote apænte āninqe pīīmīnīpa,’ ante apænetabopa. Īninqe ĩnōmō ongōnāni wabānō adobaī adode botō ānīnō beyænque pīnte ānānīpa,” ante Pabodo nāmā wææ ante ĩnque apæncantapa.

22 Pabodo māninganca apæncæā ēñēnīnque Pedique, Taadō ante nē quēwēnāni æbānō ante pōnēnānīi, ante do ēñēningā ĩnte, Idæwaa, āninqe tōmēnāni ĩnānīte,

—Cōmantante Ditia pongā ate wæætedō wæætē mīni ānīnō ante apænte ancæboīmpa.

23 Āninqe tontadoidi capitāō ingante apænedīnque, Pabodo ingante tee mōnedāmāī ĩnte wææ wānōedāni. Ayæ tōmēngā quīēmē ante ænguēngā ingā adīnque tōmēngā æmīgoidi ponte pædæ pōnōnāni ængā ĩninqe mīnitō ee amīni æncæcāīmpa, angantapa.

24 Tæōnæ go ate Awēnē Pedique tōmēngā nānōogængā Dodotida tōnō nāna gæncaya pōnatapa. Tōmēngā nānōogængā oodea onquiyængā ĩnongāīmpa. Pedique ĩnōmō Pabodo ingante āñete mānōnāni pōnīnque Pabodo wæætē, Cedito Itota ingante mōnō wede pōnente quēwengæīmpa, ante apæncæā ēñēē cōnatapa. 25 Ayæ Pabodo godōmenque apænedīnque, Mōnō nō cæte quēwengæīmpa, āninqe, Mōnō nāmā wææ aate waa cæte quēwengæīmpa,

angantapa. Ayæ, Wængongui Awënē nānō apænte anguiōnæ oo baquīnō angüenē, ante apænecā ēñēninque Pedique wæætē guīñente wædinque, Idæwaa, āninque,

—Nōwo gobāwe, angantapa. Waōnæ ate botō eyepæ imo inte āmo bitō imite āñete māmōnāni ponte apænebi ēñēmaīmpa, angantapa.

²⁶ Mānōmaī āninque tōmengā, Pabodo wabānō, Nīmpo cæbi gocæboimpa, ante cædinque godonte æīnta pōnōmaingampa, ante pōngantapa. Īninque tōmengā wantæ wantæ iñō Pabodo ingante angā pōñongā guēa tedatapa.

²⁷ Mānōmaī ancaa cæyongā wadepo mēnepoga ba ate Pedique gobedōnadodo awënē ĩnque bayongante wacā Pontio Peto nāni ānongā pōninque wæætē awënē gobedōnadodo bacantapa. Īninque Pedique ĩnque awënē bayedē, Botō ĩmaī cæbo ate oodeoidi botō imote waa acædānīmpa, ante pōnente cædinque Pabodo ingante tee mōneincōnē oncodo tadōnāmaī ee adinque wadæ gogacāimpa.

25

Gobedōnadodo Peto weca Pabodo ongonte apænecampa

¹ Peto iñōmō pancabaa awënē gobedōnadodo tæcæ badingā inte mānimæ pōninque Tetadea nāni quēwēñōmō mēōnaa go adoōnæque quēwēninque Eedotadēē go æicantapa. ² Eedotadēē iñōmō ponte ongōñongante, Wængongui quī, ante nē godōnāni ñænænāni tōnō oodeoidi awënēidi tōmengā wæca pōninque, Pabodo ĩmaī wënæ wënæ cæcantapa tōō, ante apænedāni ēñengantapa.

³ Tōmēnāni doyedē adoyōmō pōnēninque, Gobedōnadodo Peto ingante āmō ate tōmengā wæætē Pabodo ingante Eedotadēē iñōmō da pōnongā pōñongante mōnō taadō wææ wānonte ō ænte wæñongæimpa. Ante nē pōnēwēnāni inte tōmēnāni ñōwo Peto weca pōninque ĩmaī ānānitapa. Gobedōnadodo Peto ēñēmi, Bitō Ao ante mōni āmaī pōnō cæquīmi. Bitō Pabodo ingante āmi Eedotadēē iñōmō ænte māmōnāni pongæe, ante ancaa ānāni. ⁴ Eñēninque Peto wæætē tōmēnāni inānite edæ, Pabodo iñæmpa Tetadea iñōmō tee mōnete ongongantawo. Botō tōmēmo edæ oo adoyōmō wæi gocæboimpa. ⁵ Āninque,

—Mānōmaī beyæ mīnitō mīni cabo iñōmīnite nē ānāni pancadāniya inānite da godōmīni botō tōnō godongāmæ Tetadea wæi gocædānīmpa. Pabodo wënæ wënæ cæcā ingā ĩninque tōmēnāni māniñōmō pōninque ancædānīmpa.

⁶ Āninque tōmēnāni tōnō wodo ōnompō tipæmpoga iñōnæ godōmenque quēwēninque Peto wadæ godinque Tetadea wæi gocantapa. Pōninque tōmengā ĩmō ate awënēidi apæncæte ante nāni containmpa tæ contadinque angā ate Pabodo ingante ænte māmōnāni pongā. ⁷ Ate oodeoidi Eedotadēē quēwente ñōwo wææ pōnināni inte pō godongāmæ gongæninque, Pabodo mānōmaīnō wīwa cæcampa, wadō wīwa cæcampa, ĩmaīnō wīwa cæcampa, ante ancaa ānēwēnānitapa. Incæte Petoidi inānite, Nāwangā ante apænemōnīpa, ante odōmōncæte ante tōmēnāni quīnō impa ante odōmōnāni aquīnānīi. ⁸ Pabodo iñōmō nāmā wææ apænedinque,

—Oodeoidi nāni wææ angaiñō ante Baa ānāmaī iñōmo inte botō ēñente cæte quēwēniimo ĩmpa. Wængongui oncō ñænæncō waa adinque botō mānincōnē yabæcōnē guiite wënæ wënæ cædāmaī intabopa. Odōmānoidi tæiyæ awënē Tetædo nānō ānō ante ēñente cædinque wadō ante cōwē cædāmaī intabopa.

⁹ Āñongante Peto, Oodeoidi tōmēnāni nāni āniñō baī cæbo ate botō imote waa acædānīmpa, ante babæ cædinque Pabodo ingante,

—Botō Eedotadēē go æibo ate adinque bitō botō weca pōñōmi ĩnāni piinte nāni āniñō ante apænte ancæboimpa. Bitō Ao ante, Gocæboimpa, āmitawo.

¹⁰ Āñongante Pabodo wæætē,

—Botō iñæmpa odömāno tæiyæ awënë Tetædo nānō Apænte ante Contaimpaa gäänē ñowo incæ ongōmo ae. Minitō iñōmō Tetædo beyæ ante nē apænte āmīni iñōmīni inte edæ botō imote nē apænte anguēnēmīni imīnitapa tōō. Bitō tōmēmī iñōmō edæ, Pabodo oodeoidi iñānite wēnæ wēnæ cædāmaī iñingā ingampa, ante edæ do ēñēmīpa. ¹¹ Iñinque wēnæ wēnæ cædinque botō tente wænguēnēmo imo bai botō edæ Baa ānāmaī inte edæ dobæ wæncædōmoimpa. Wæætē edæ, Wēnæ wēnæ cæbīpa, ante iñāni oodeoidi nāni ānewēnō guiquēnē ōnonquedō ante i iñinque waocā æcāmenque incæ ædō cæte tōmēnāni nempo pædæ godonguēnengā ingāā. Iñinque botō, Odömāno tæiyæ awënë Tetædo ingante āmo botō imote pōnō apænte ancæcāimpa, angantapa.

¹² Pabodo mānōmaī angā ēñente wædinque Peto tōmengā tōnō godongāmæ nē apænte ānāni tōnō, Æbānō cæquīmōō, ante adoyōmō pōnēnāni ate tōmengā Pabodo ingante,

—Ao āmōnīpa. Tæiyæ awënë Tetædo incæ apænte ancæcāimpa, ante do ānīmi inte bitō Tetædo weca edæ gocæbiimpa, angacāimpa.

Awënë odeye Agodīpa ingante Peto apæñecampa

¹³ Tæōnæ go ate wacā awënë odeye Agodīpa tōnō onquiyængā Bedēnite iñōmō gobedōnadodo awënë Peto ingante, Bitō iīmæca waa pōmi amōnāpa, ante apæñecæte ante Tetadea iñōmō pōninque Peto weca ēñacæ pōnatapa.

¹⁴ Pōninque tæōnæ quēwēna ate awënë Peto guiquēnē awënë odeye Agodīpa ingante, Pabodo ingante iīmaī cætāmōnīpa, ante apæñedinque,

—Gobedōnadodo awënë Pedique wodi nānō nē tee mōnete ēmō cæte godingā iñōmō onguīñængā adocanque ayæ a ongongampa. ¹⁵ Iñinque botō Eedotadēē æite quēwēñōmote, Wængonguī quī, ante nē godōnāni ñæñæñāni tōnō oodeoidi iñānite nē aadāni nāni Picæncabo guiquēnē botō imote āninque, Māningā iñōmō wīwa cæcā ingā adinque bitō tōmengā ingante apænte āninque āmi wæñōnāni wæncæcāimpa, ānānitapa. ¹⁶ Ēñēninque tōmēnāni iñānite botō wæætē iīmaī antabopa. Waocā nāmā beyæ apæñedāmaī iñongante mōnitō mōni odōmānocabo iñōmō nē pānāni iñānite pædæ godōnāmaī imōnīpa. Wæætē wadāni, Īngā iīmaī cæte wēnæ wēnæ cæcampa, ante pīinte ānāni ēñente wædinque mōnitō māningā tōnō nē pīināni iñānite āmōni godongāmæ pōnānīpa. Ponte awincadō awinca adinque wæætēdō wæætē āñōnānite mōnitō iñōmō, Tōmēnāni nāni pīinte ānīnō ante tōmengā æbānō nāmā wææ apæñecāā, ante ædæmō ēñente ate nōingā ante apænte āmōnīpa. Mānōmaīnō ante botō tōmēnāni iñānite apæñetabopa, ante awënë Peto apæñecantapa.

¹⁷ Ayæ, “Mānōmaī ante apænebo ēñēninque nē pīinte ānāni botō tōnō wææ Tetadea iñōmō godongāmæ pōnānitapa. Iñinque botō a ongōnāmaī do mōni apænte āimpaa iīmō ate go tæ contadinque, Māningā ingante ænte pōdāni, āmo ænte pōnānitapa. ¹⁸ Botō iñōmō, Pabodo wadāni iñānite wīwa cæcampa, ante pīinguīnāni iīmānānīpa, ante pōnentabopa. Incæte nē pīinte ānāni ængæ gantite apæñedinque edæ botō ante pōnēnīnō bai wīi pīinānitapa. ¹⁹ Wæætē edæ wadō ante pīināni ēñente wætabopa. Wængonguī ingante æbānō cæte waa aquīi, ante tōmēnāni Pabodo tōnō wæætēdō wæætē pīinānitapa. Ayæ tōmēnāni mæmæidi nāni wææ angainō ante tōmēnāni, Pabodo ēñēnāmaī ingampa tōō, ante pīinānitapa. Ayæ adocanque Itota wodi do wængaingā incæte Pabodo, Mīngā quēwengampa, ante tedecampa tōō, ante pīinānitapa. ²⁰ Iñinque botō, Quēmē bai ānewēnānī, Æbānō cæte nō ēñente apænte anguīmoo, ante wædinque botō Pabodo ingante iīmaī antabopa. Tōmēnāni nāni pīinte ānīnō

ante bitō Ao āninqe Eedotadēē gote ongōñōmite botō apænte ancæboimpa, antabopa.”

²¹ “Āñōmō tōmengā wæætē, Botō ĩmote ee wææ wānōñōmīni, Botō æbānō cætawoo, ante tæiyæ awēnē Empedadodo mōnō ānongā apænte ancæcāimpa, āmopa. Angā ēñēninqe botō, Æyedēmē eyepæ ĩ ate Pabodo ingante tæiyæ awēnē Tetædo weca da godōmo gocæcāimpa, ante pōnēninqe, Tōmengā ingante mānimpoga wææ wānōdāni, antabopa,” ante Peto apænecantapa.

²² Mānōmaī apænecā ēñēninqe awēnē Agodipa wæætē,

—Īngā onguīñāngā æbānō apænecāā, ante tōmēmo ēñēinente wætabopa.

Āñongante Peto,

—Īmō ate tōmengā apænecā ēñencæbiimpa, angantapa.

²³ Īmō ate awēnē odeye Agodipa tōnō Bedānite ĩñōmō waēmō pōnī weocoo wēñate mongæninqe tōmēnāni nāni ēñēincōnē ñænæncōnē pōninqe, Mōnatō awēnēmōna ĩñōmōnate waa aedāni, ante bai cædinque wæñee da da pō guīdatapa. Ayæ tontadoidi tæiyæ awēnēidi tōnō māññōmō quēwēnāni awēnēidi ñænæñāni tōnō tōmēna mīñæ dao dao pōnānitapa. Ayæ Peto angā ēñēninqe nē wææ wānōnāni wæætē Pabodo ingante ænte māmōnāni pō guīte ongōñongante, ²⁴ Peto ĩñōmō,

—Awēnē odeye Agodipa ēñēmi, angantapa. ĩñōmō ongōmīni tōmāmīni edæ ēñēedāni. Īngā ingante amīnii. Tōmengā ingante āninqe Eedotadēē quēwēnāni incæ ĩñōmō quēwēnāni incæ oodeoidi tōmānāni botō ĩmote yedæ āninqe, Īngā nē wēnæ wēnæ cæcā inte godōmenque wīī quēwenguēnengā ingampa cæbii, āninqe, Bitō apænte ancæbiimpa, ante wædānipa. ²⁵ Īninqe, Adocā Pabodo nānō wænguinque wēnæ wēnæ cæcantawoo, ante botō cōwā ayōmo edæ dæ antapa. Ante wæyōmo tōmengā guīquēnē, Tæiyæ awēnē empedadodo incæ botō ĩmote apænte ancæcāimpa, angā ēñente pōnēninqe botō, Ao, tæiyæ awēnē Tetædo weca da godōmo gocæbiimpa, antabopa.

²⁶ Incæte, Īngā nānō cædinō ante tæiyæ awēnē aquīnō ante botō ædō cæte yewæmonguīmoo, ante wæbopa. Mānōmaī beyæ botō, Mīnitō tōmāmīni apænte āmīni ēñencæboimpa, antabopa. Ayæ, odeye Agodipa bitō tōmēmi apænte āmi nō ēñente ate yewæmoncæboimpa, ante cædinque botō ñōwo Pabodo ingante ænte māmōmo ponte a ongongā aedāni. ²⁷ Īñæmpa botō, Mōnō nē tee mōnete ongongā wēnæ wēnæ nānō cædinō ante yewæmōnāmaī inte mōnō ædō cæte da godonguī, ante awædō, ante Peto apænegacāimpa.

26

Agodipa weca ongonte Pabodo nāmā wææ apænecampa

¹ Awēnē odeye Agodipa wæætē Pabodo ingante,

—Bitō ñōwo nāmā beyænque wææ apænecæbiimpa, āmopa.

Angā ēñēninqe Pabodo compo cædinque nāmā beyænque ante wææ apænecæ cæcantapa. ² “Awēnē odeye Agodipa, ēñēmi. Oodeoidi nāni pīinte ānīnō tōmānō ante nāmā beyænque wææ apænedinque botō bitō awēnē ĩmi weca ongonte apænebopa, ante adinque botō waa edæ tobopa. ³ Mōni oodeocabo dodāni nāni cægāi bai mōni cæinō ante bitō ĩñōmō edæ do ēñēmipa, ante tobopa. Ayæ adobaī, Oodeoidi ñōwodāni æbānō ante wæætēdō wæætē ante tēdedānii, ante do ēñēmi ĩnōmi inte bitō botō wææ apænedō ante edonque ēñenguīmi ĩmipa, ante pōnēninqe botō godōmenque tobopa. Īninqe bitō Ao ante ee ongōninqe ēñencæbiimpa, āmopa.”

Īmaī quēwengaboimpa, ante Pabodo apæ necampa

⁴ Ante apænedinque, “Botō nōwo ganca æbānō quēwēmoī, ante oodoidi tōmānāni do ēñēnānīpa. Edæ do wēñæmoyedē botō ēñagaimæ quēwente pædinque botō edēnimoyedē nōwo ganca æbānō Eedotadēē iñōmō quēwengaboī, ante do ēñēnānīpa. ⁵ Mōni oodeocabo incæ pancadāniya Wængonguī ingante wædæncque ēñente quēwēñōnāni mōni Paditeocaboquē wæætē, Dodāni nāni wææ angainō ante mōnō ēñente cæcæimpa, ante ēñente quēwēmōnīpa. Botō iñōmō Paditeobo iñōmo inte mānīnō ante cōwē Ao ante godōmenque nanguī cæte quēwentabopa. Īnīnque oodeoidi do agāināni iñōnāni inte Ao ante bai, Nāwangā Pabodo ēñente quēwengampa, ante apæ necædōnānīpa. ⁶ Mōnitō mæmæidi iñānīte apænedinque Wængonguī, Mīnitō beyæ cōwē pōnō waa cæcæboimpa, ante nānō angainō bai cæcā beyænque mōnō watapæ bacæimpa, ante botō pōnēmopa.”

“Nōwo iñōmō mānīne botō pōnēnō beyænque iñānī, Pabodo ingante apænte ancæmīnīpa, ante ænte māmōnāni pōnīnque botō mīnitō weca a ongōmo aedāni. ⁷ Wængonguī, Mīnitō beyæ pōnō waa cæcæboimpa, ante nānō angainō ante iīnque bacæimpa, ante mōni pōnēnō beyænque mōni oodeo pægāincabo ōnopmo tipæmpoga go mencaboga mānīmpomōni iñōni iñōmō woyowotæ itædē, Wængonguī ingampa, ante tōmengā beyæ cæte quēwēmōnīpa. Incæte awēnē odeyebi, ēñēmi. Wængonguī, Cōwē cæcæboimpa, ante nānō angainō ante mōni pōnēnō beyænque oodeoidi incæ botō ĩmote, Wiwa cæbīpa tōō, ante pīnānīpa. ⁸ Mīnitō iñīnīte āmo apænemīni ēñēmoedāni. Do wæñināni iñōnānīte Wængonguī, Botō pōnō cæbo ate nāni ōmæmoncædānīpa, angacāimpa. Mīnitō iñæmpa, Wængonguī ædō cæte mānōmai cæquingāā, ante pōnente wædinque quīnante Baa ānewēmīni,” ante Pabodo angacāimpa.

Pabodo, Coditoidi iñānīte togænte pantabopa, angampa

⁹ Ānīnque Pabodo godōmenque apæ necantapa. “Botō wēñēñedē edæ oodoidi nāni pōnēwēnō bai pōnengaboimpa. Mānīñedē botō Itota wodi Nāatadeta quēwengāngā ēmōwo ante nāni pōnēnō ante pīinte cædinque nanguī wido cæquēnēmo ĩmopa, ante pōnēwentabopa. ¹⁰ Īnīnque botō Eedotadēē iñōmō quēwēnīnque mānīnōnque ante cægaboimpa. Mānīñedē edæ, Wængonguī quī, ante nē godōnāni ñænænāni iñānīte antabopa. Āmo Ao ante tōmēnāni nē ānāni inte yewæmonte pædæ pōnōnāni ænīnque botō Wængonguī Awēnē quīnāni nanguī iñāni iñānīte bæi ongonte ænīnque nē tee mōnebo ingaboimpa. Ayæ tōmēnāni iñānīte wænoncæ cæyōnāni botō cōwē godō Ao angaboimpa. ¹¹ Botō wayōmō wayōmō godīnque oodeoidi odōmōincōnē wantæ wantæ iñō go guīdinque, Wængonguī Awēnē quīnāni tōmengā ingante godō wēnæ wēnæ ante pīincædānīpa, ante cædinque pædāni, ante nanguī āmo pangadānīpa. Ayæ tōmēnāni iñānīte nanguī pīnīnque godōmenque ænguī badīnque botō tōmēnāni iñānīte pancæte ante wabæca nāni quēwēñōmō wabæca nāni quēwēñōmō incæ togænte gogaboimpa,” ante Pabodo wææ apæ necantapa.

*Wadō ante pōnente babopa, ante Pabodo adodō angampa
(Nāni Cægainō 9.1-19, 22.6-16)*

¹² Ante apænedinque Pabodo godōmenque, “Mānōmai wabæca go wabæca go cædōmo inte Daāmāco iñōmō gocæte ante cætābopa. Cæyōmō, Pabodo ĩmaī cæcæcāimpa, ante Ao āmōnīpa, ante, Wængonguī quī, ante nē godōnāni ñænænāni nē ānāni iñōnāni inte botō beyæ cadota ante yewæmōnīnque pædæ pōnōnāni ænte gotābopa. ¹³ Awēnē odeyebi, ēñēmi. Mānōmai gote idōmæ goyōmo tæcæ bæcā pōnī bayonte nænque nānō nāwā bai godōmenque nāwā

öönædē inō botonga möni godongāmæ gocaboga pō tōmäo guinæ gongæ. 14 Ate wædinque tōmāmōni guidōmēmæ go go wææñōmōni adocanque möni ebedeo tededō tedete öönædē apæneca botō adoboque ēñentabopa. “Taodo. Taodo ämo. Botō ïmote quinante togænte pämi. Ìñæmpa wagada päintoca bai bitō nāmā ïñæ æwate cowate bai bitō caate wæquinque cæbipa, angacäimpa.”

15 “Angä ēñente wædinque botō, ‘Awënē, æbidō ïnōmi ïmii.’ Ante ēñente wæyōmote, ‘Botō Itota ïnōmo inte bitō nē togænte päni mo mänimodō ïmopa cæbii. 16 Nōwo edæ ængæ gantidique adiyæ næ gongæmi ämopa. Botō beyæ nē pōnō cæbi ämo edæ bacæbiimpa. Ayæ, Botō ïmote æbänō abii, ante bitō adinō ante nē apænebi ämo bayōmite botō ïncayæ ate godōmenque odōmōmo ate bitō aquinō ante bitō nē apænebi ämo bacæbiimpa. Mänōmainō ante ämo bacæbiimpa, ante apænecaete ante botō bitō weca ponte a ongōmopa. 17 Ayæ bitō guidēnāni oodeoidi incæ wadāni wabæca quēwēnāni incæ bitō ïmite wēnæ wēnæ cæcæ cæyōnāni ate botō bitō ïmite gä pe æmpote wææ gompobo beyænque bitō wæætē quēwēncæbiimpa. Tömēnāni weca botō bitō ïmite da godōmo gocabiimpa. 18 Tömēnāni botō ïmote wede pōnēnāni ate botō wēnæ wēnæ nāni cædinō ante godō ïmpo cæbo ate tōmēnāni do botō tæiyæ wæmō badongaināni tōnō adocabodāni bai badōmo badinque quēwēncædānimpa, ante cæbopa. Mänōmainō cæcæte ante botō, Bitō Taodobi ïñōmō tōmēnāni awinca wi æmote bai cædinque apænebi ēñēninque tōmēnāni wæætē edonque adinque ñāō inō gāmænō poncædānimpa, ante cæbopa. Tatāna nempo quēwēñōnānate bitō wæætē gä pe æmpote bai cædinque odōmote apænebi ēñēninque tōmēnāni wæætē edæ ocæ emænte pōninque Wængongui nempo quēwēncædānimpa, ante bitō ïmite da godōmo gocabiimpa.’ Ante Awënē Itota botō ïmote angä ēñente gotabopa,” ante Pabodo apænecantapa.

Pabodo, Ööncædē apæneca ēñente cætabopa, angampa

19 Mänōmai apænedinque Pabodo godōmenque, “Awënē odeyebi Agodipa, ēñēmi. Botō wiimonte bai ayōmo öönædē inō nē angä nānō angainō ante botō ædō cæte ēñēnāmai cæquimoo. Edæ do cætabopa. 20 Tāno Daāmaco ïñōmō quēwēnāni inānate apænedinque botō ayæ Eedotadē ïñōmō godinque mänñōmō quēwēnāni inānate apænedinque Oodeabæ quēwēnāni inānate go apæneboque go wayōmō oodeo ïnāmā ïnāni inānate māo apænedinque ïmainō ante apænebo ēñēnānitapa. Minitō wēnæ wēnæ mīni cædō ante, Åncaa wæwente awædō, ante ñimpo cædinque Wængongui gāmænō edæ pōedāni. Ayæ pōninque mīnitō, Mänñō wēnæ wēnæ botō cædinō edæ æmæwo ñimpo cæbopa, ante edonque acæimpa, ante cædinque waa cæte quēwēdāni, ante ämo ēñēnānitapa.”

21 “Ïninque botō mänōmai cæbo beyænque Wængongui oncō ñænæncō boyæ ongōñōmote oodeoidi botō ïmote bæi ongōninque edæ wænoncæ cædānitapa. 22 Mänōmai wēnæ wēnæ cædāni incæte Wængongui ñwoōnæ ganca botō tōnō cōwē godongāmæ cæcampa. Ìninque botō, Wængongui Awënē æbänō cæcää, ante guñēnāmai inte næ gongæninque awēñēdi inānate önōnānate inānate apænedinque apæneboi aedāni. Mōitee wodi tōnō wadāni Wængongui beyæ nē apænegaināni tōnō, Æbänō baquii, ante apænegadānimpa, ante apænebopa. Mänine tōmēnāni nāni apænegainēque adodō ante apænedinque botō godōmenque apænedāmai ïmo inte edæ ïmainō ante apænebopa. 23 Mōiteidi ïñōmō, Mönō Codito cōwē caate wæqingā ingampa, ante apænegadānimpa. Ayæ, Wænte ate tōmēngä tānocā nē ñāni ömæmōningä ïnongä inte, Acædānimpa, ante cædinque ñāō tica ēnente bai tōmēngä guidēnāni inānate wadāni inānate edæ odōmoncæcäimpa, ante

yewæmongadānimpa. Botō iñōmō, Mōiteidi nāni angainō do edæ iinque batimpa, ante apænedinque wadō ante apænedāmai īmopa,” ante Pabodo apænegacāimpa.

Agodipa, bitō Codito ingante pōnenguēnēmi īmipa, angā

²⁴ Pabodo mǎnōmai nāmā beyænque tæcæ wææ apæneyongante awēnē Peto do ogæ tededinque,

–Īñæmpa Pabodo ocai ōmæcabi inte tedebi awædō. Nanguī wantæpiyæ dibodo adimi inte idiquibæ pōnente bābiimpa tōō.

²⁵ Ante wææ tedecā ēñēninque Pabodo,

–Awēnē Peto bitō waa pōni awēnē gobedōnadodo īmi incæte botō wīi bitō ānō bai īmopa. Botō wīi idiquibæ pōnēmo inte tōingā pōnēninque nāwangā ante apænebopa. ²⁶ Awēnē odeye Agodipa guiquēnē tōmengā mǎnīnō botō apænedō ante tōmāā ēñengā īñongante tōmengā ingante edonque apænebo ēñengampa. Edæ mǎnīnō botō ānīnō wīi awēmō cætimpā, ante pōnēninque botō, Awēnē odeye incæ do adingā inte ædō cæte ēñēnāmā inguingāā, ante awædō. ²⁷ Awēnē odeyebi Agodipa, ñōwo bitō imite apænebo ēñē. Wængonguī beyæ nāni apænegainō ante bitō pōnēmitawo. Do pōnēmi īmitapa, ante ēñēmopa.

²⁸ Āñongante Agodipa wæætē,

–Īñæmpa bitō botō imote wantæ iñō tededinque, Agodipa bitō Codito ingante do pōnencæbiimpa, ante cæcæte ante cæbitawo.

²⁹ Āñongā Pabodo wæætē,

–Wantæ iñō apænebo incæ wantæpiyæ apænebo incæ bitō botō bai pōnēmi waa tobaīmopa. Edæ bitō tōnō godongāmæ ēñēē cōnāni tōnō mōnitō tōmāmīni botō bai entawencāmīnimpa, ante botō Wængonguī ingante apænebopa. Incæte, Botō bai baedāni, ānīnque botō, Yaēmengoncoo empocāmīnimpa, ante apænedāmai intabopa.

³⁰ Ante Pabodo mǎnōmai apænecā ēñēninque awēnē odeye Agodipa ængæ ganticantapa. Ayæ pancabaa awēnē Peto, Bedānite, godongāmæ ongōnāni adobaī tōmengā tōnō ængæ gantidinque, ³¹ mǎnīncōnē tao godinque īimāi ante tededānitapa.

–Īngā Pabodo wēnæ wēnæ cædāmāi īñongante quīnante wææ wānonguī. Quīnante apænte wænonguī. Edæ wēnæ wēnæ nānō cædinō dæ ampa.

³² Ante tedeyōnāni Peto ingante Agodipa apænecantapa.

–Tetædo incæ botō imote apænte ancæcāimpa, ante Pabodo wīi angā bai botō edæ tōmengā ingante do ñimpo cæcædōmoimpa, angacāimpa.

27

Pabodo ingante Odōmā iñōmō da godōnāni gocampa

¹ Mǎnōmāinō ante wædinque mǎnīmæ awēnēidi, Pabodoidi inānite ñōwo Itadiabæ āmō wogaa gocædānimpa, ante godongāmæ Ao ānānitapa. Mǎniñōmō tontadoidi iñōmō tæiyæ awēnē empedadodo beyænque nāni wææ wānoncabo inōnāni inte Empedadodoidi nāni ānoncabo inōnānimpa. Tōmēnāni capitāō Codio nempo Pabodo tōnō wadāni nē tee mōnete ongōnīnāni inānite pædæ godōnāni ō ænīnque ænte gocantapa. Ayæ botō Odocabo nē yewæmōmo tōnō wadāni adobaī Pabodo tōnō godongāmæ gotamōnipa. ² Gāwapæntibæ wedeca gote ayōmōni wipo ñæñæmpo Adadāmītio wāi wocænte nāni ænte pōnimpo inte ñōwo Atiabæ godinque wayōmō go ti wææ wayōmō go ti wææ nāni goquimpo adinque mōnitō mǎnimpodē go guīite gāwapæntibæ wogaa gotamōnipa. Ayæ wacā Aditadoco Māatedōniabæ Tetadōnica iñōmō

quēwēningā inte mōnitō tōnō pō äampodenque gocantapa. ³ Īimō ate Tidōō nāni quēwēñōmō pō wāi wocæñōmōni Pabodo ingante capitāō Codio waa cædinque pōnō apæncantapa. Bitō æmigoidi weca quiēmē bitō ænguēnēnō ante gote ænte pōe, āninqe ee acā tōmæwæ gote ēñadinque ænte pongantapa. ⁴ Ayæ mānī Tidōō iñōmō ēñate wogaa goyōmōnite mōni nē gocæ cædō woboyæ betamonca pæmæ ate wædinque mōnitō wāā tēiwænē Tipidebæ nāni āniwænē wææ cæteinō wogaa gotamōnipa. ⁵ Wāā tēiwænē go wodo tebæ gomōnique go tæcæpæ pōni wogaa godinque Tidiabæ wodo tebæ pōmōnique go Pampidiabæ wodo tebæ pōmōnique go Ditiabæ godinque Mīida nāni quēwēñōmō pō wāi wocætamōnipa.

⁶ Māniñōmō wacā wipo ñænæmpo Adecantodia nāni ænte pōnimpo adinque capitāō Codio, Ifadiabæ goquimpo impa, āninqe mōnitō imōnite angā godongāmæ guite wogaa gotamōnipa. ⁷ Tæñōnæ iñonte wæñee godinque mōnitō, Aiquedō goquimōnī, ante ancaa cæmōnique go Gōnido nāni quēwēñōmō go wodo tebæ gotamōnipa. Ayæ woboyæ cōwē mōnitō gocæ cædō inō nanguī pōni pō ate wæmōnique go wāā tēiwænē Tadamōne wodo tebæ godinque wawænē Cædeta nāni ānōwænē yaætænque gotamōnipa. ⁸ Māniwænē wææ cæteinō yæwedecaque ancaa cædinque wæñee godinque mōnitō Datea wēmonca wodōiñōmō nāni Waa Wodōiñōmō nāni āniñōmō pontamōnipa. Māniñōmō pōmōni ate wipodē nē cædāni iñōmō, Wipo ñænæmpo wāi wocæñōmpo nāmā godāmaī ingæimpa, ante cædinque teēmenca gæguincamē inte nāni ñā cæcadodınca guitodōnāni nāñe ñongæ ate wipo godāmaī wāi wocæntapa.

⁹ Māniñōmō wāi wocænte owodinqe mōnitō, Quingæ pongamō incæ wæñee pōmōmpa, ante wædinque mōnitō, Woboyæ nanguī pæmæ tedæ baquinque mōnitō Wængonguī beyæ ante mōnō cænāmaī ēōnæ do iinque batimpa, ante pōnentamōnipa. Īinque mōnitō, Ñōwo mōnō wænguinque wipodē godōmenque gomōmpa, ante wæyōmōni wipo ñænæmpo nē ænte godāni inānite Pabodo nō pōnēninque wææ angantapa.

¹⁰ –Īñānāni, botō ayōmo mōnō ēwente wæquinque godōmenque gomōmpa. Māincōo mīni ænte gocōo wido cæquinque wipo nā tobæ go ate mōnō becadote wænguinque impa cæmīnī.

¹¹ Añongā wipo ñænæmpo nē ēacā tōnō wipo capitāō wadō ante apæneda ēñēninque tontado capitāō Codio iñōmō Pabodo nānō āninō ante ēñēnāmaī cæcantapa. ¹² Wæætē edæ, Īñōmō ponte mōnō wodōiñōmō woboyæ pæmæ tedæ iñonte wīi wooinente wæmōmpa. Ante wædinque wodo tōmānāni, Pēnite nāni wēmonca wodōiñōmō nænque tamōnō imætæ inō ongōnīque woboyæ ante wææ cæte impa cæmōō. Ñōwo wadæ godinque Pēnique nāni wēmonca wodōiñōmō go ti wæænte quēwēninque woboyæ pæmæ tedæ iinque pæmænte go ate mōnō gomonga gocæimpa, ante adoyōmō ānānitapa.

Wini cai pompa

¹³ Mānōmainō, Gocæimpa, āñōnāni ñænæ wipo goquinque woboyæ dipæmæ inō betamonca wædænque pæmæ ate wædinque, Mōnō āninō bai ñōwo mōnō waa goquinque impa, ante todānitapa. Ayæ wipo ñænæmpo wāi wocæñō teēmenca nāni guitodōnīnca ñōwo gæguincamenca quingæ iñæ æænō ñænæ wipodē cō cædāni ate mōnitō wogaa go Cædeta nāni ānōwænē yæwedecaque gotamōnipa.

¹⁴ Māniñō tæcæ gocæ cæyōmōni do woboyæ wīni cai Yodocodōno nāni ānō wāā tēiwænē ayaēnēmāa inō mānō pæmæ pōninque, ¹⁵ wipo ñænæmpo mānō ō ænīnca. Mōnitō, Mōnō wodōiñōmō adodō gocæimpa, ante cædinque woboyæ pōnō gāmænō ædō cæte wiya wēnente goquī. Ante wædinque mōnitō

ee amōni woboyæ betamonca inō quingæ māmō dadi wēnente da godō māo gotamōnipa. ¹⁶ Wāā tēiwænē guiyāwænē Caoda nāni ānōwænē dipæmæ inō yæwedeca woboyæ wææ cæteinō godinque mōnitō guiyampo mōni wēā wēā ænte pōnimpō ante, Tobæñāmai impacæimpa, ante pæ pagænte ancaa cædinque wēā pōnonte pæ mantamōnipa. ¹⁷ Ayæ nē cædāni guiyæmpo gæguincamenca wēā ææñonte ñænæmpodē da wēñanitapa. Guiyæmpo da wēnente ate tōmēnāni, Ñænæmpo awæmpacoo wīi bede wænecæimpa, ante cædinque ñænæ wipo incæ gæguincamenca wīni wīni cæte goto winānitapa. Ayæ, Ōnætāmō Tidite nāni ānontāmō impa, ante adinque tōmēnāni, Æ quingæ gomō bai mōnō wænguinque Tidite emōnāiboga go nāñe ñongæncædōnimpā. Ante pōnente guīñente wædinque wæñee gocæte ante cædinque weocoo ñænæmpodē pæmænte māo nāni gocoo incæ wēā wænonte ñō cædinque ee adāni woboyænque wæñee māo gotamōnipa.

¹⁸ Wīni cai iñōmō godōmenque woboyæ pæmæninque æpæ mængonta mængonta ante cæ wædinque wipo ñænæmpo incæ æmætæ dadiimæ æmætæ dadiimæ go wætāmōnipa. Ininque iimō ate tōmēnāni, Wipo omædē bate wodæi bacæimpa, ante cædinque māincoo ñænæmpodē ongōnincoo incæ æpæñē edæ wido wido cædāni gotapa. ¹⁹ Waōnæ bayonte tōmēnāni, Ñænæ wipo quincoo, ante nāni cæincoo incæ nāmā ōnompoca pancacooga æpæñē wido cædāni gotapa. ²⁰ Ayæ tæōnæ iñonte nænque edæ tamōnāmai nēmō tamōnāmai ī ate mōnō, Ædōmē gomompa, ante ēñēnāmai inte edæ wætāmōnipa. Ayæ woboyæ godōmenque māmō pæmæñō æpæ nanguī mængonta mængonta cæ wædinque mōnitō, Ñōwo quēwenguīnāmai imompa, ante edæ pōnēninque wætāmōnipa.

²¹ Māñināni wantæpiyæ cæñāmai iñāni adinque Pabodo tæcæguedē ængæ gantidinque tōmāmōni ayōmōni tōmēnāni inānite iimāi apæñecantapa.

—iñānāni, botō āmo ēñēninque Cædeta nāni ānōwænē emō cæte pōnāmai inte ee owoquēnēmini imīnitapa. Edæ mānōmai ee ongōmīni bai wipo tobæñāmai iñonte mīnitō māincoo ēwēnāmai inte wædāmai incædōmīnimpā. ²² Ñōwo guiquēnē guīñēnāmai piyæñē cæte quēwēedāni. Ñænæ wipo mōnō goimpo incæ tobænte bacæimpa. Nāwangā impa. Incæte waomō iñōmō wænāmai tōmāmō mīimō quēwenguīmō imompa. ²³ Botō iñōmō edæ Wængonguī quīmo inōmo inte botō, Wængonguī ingampa, ante tōmēngā beyæ cæbopa. Ñōwoōnæ woyowotæ tōmēngā anquedo botō weca pōninque, ²⁴ botō imote apæñecā ēñentabopa. “Pabodo, guīñēnāmai īe. Tæiyæ awēnē Tetædo weca bitō cōwē gote gongæncæbiimpā. Ayæ bitō beyæ waadete pōnō cædinque Wængonguī bitō tōnō adopodē godongāmæ godāni inānite do angā quēwencædānimpā.”

²⁵ Ante mānōmai pōnō apæñecā ēñēnīmo inte botō wæætē mīnitō imīnite, Guīñēnāmai imīni inte pōnencæmīnimpā, āmopa. Tōmēngā nānō apæñedō baquīnō anguēnē, ante botō Wængonguī ingante nē wede pōnēmo inte āmopa.

²⁶ Incæte wipo ñænæmpoque wāā tēiwænē wawænē godinque tobænte ba wæcæimpa, ante Pabodo angantapa.

²⁷ Ininque mēa Wængonguī itædē iñonte woboyæ ayæ pæmæ māo godinque mōnitō Adodiaticopæ nāni ānōmāa wadō wadō wogaa gotamōnipa. Māñimpoōnæ iinque go ate woyowotæ ayaōnæñēñā iñonte wipo ñænæmpodē nē cædāni iñōmō, Onguipoiya obo pōmompā, ante pōnēñanitapa. ²⁸ Tōmēnāni, Ægancađō īi, ante acæte ante cædinque pædæ guidonte adinque todēnta ī tei mēetodo impa, ante adinque ayæ godōmenque godinque pædæ guidonte adinque tōmēnāni, Ñōwo edæ pōnōmenque bæintitiæte mēetodo impa, ante wædānitapa. ²⁹ Dicaboga pōñi edæ gomō tamēñedāni, ante guīñente

wædinque, Ænænæ wipo wāi wocængæimpa, ante teēmenca nāni guitodōninca menca go mencaa yæmiñæmpo inō edæ guitodōnānitapa. Ayæ, Ænō ba waa tobaimpa, ante Wængonguī ingante apænedinque edæ wāi wocænte a owotamōnīpa. ³⁰ Wipo Ænænæmpo nē cædāni guiquēnē, Mōnō wodii wīnongæimpa, ante awēmō cædinque waca nāni guitodōninca yæcadopo inō guitodōncæte ante cæte bai babæ cædinque, Mōnō awēmō goquimpo, ante guiyā wipo incæ pædæ wæænnoncæ cædānitapa. ³¹ Guiyæmpo tæcæ pædæ wæænōñōnāni Pabodo iñōmō tontado capitāō tōnō tontadoidi inānite angan-tapa.

— Ænāni wipo Ænænæmpo nē cædāni inte Ænænæ wipodē ongōnāmai ināni bai mīnitō ædō cæte nāmā cæte quēwenguimīni.

³² Angā ēñente wædinque tontadoidi guiquēnē Ænænæ wipo nē cædāni nāni awēmō gocæ cædimpo gæguincamē aa wiyænāni ininque guiyæmpo tæi guite æmæwo gotimpa.

³³ Tæcæ oque pōnente iñonte Pabodo iñōmō, Tōmāmīni cænguī cædāni, ante nanguī āninque,

— Nōwo mēa Wængonguī itædē iñonte mīnitō ancai guīñente wædinque ee ate cænāmāi quēwēmīni abopa. ³⁴ Nōwo iñōmō mīnitō imīnite, Cæedāni, āmopa. Cænte quēwenguēñ cæmīni, āmopa. Mīnitō æcāmenque incæ tōmāmīni wænāmāi incæmīnimpa.

³⁵ Āninque tōmānāni waa ayōnāni Pabodo pāō æninque Wængonguī ingante, Waa pōnōmi cæmōnīpa. Ante apænedinque ao mænte cængā. ³⁶ Adinque tōmēnāni, Mōnō quēwengæimpa, ante gancæ pōnente wædinque tōmānāni cænānitapa. ³⁷ Wipodē mōni adopodē gocabo iñōmō dotiento tetenta i tei mānīpomōni intamōnīpa. ³⁸ Mānōmai cædinque tōmēnāni eyepæ cænāni ate edæ, Wipo teēmē ēmiñænte ònætāmō iñōmō gobaimpa, ante guīñente wædinque, Wodæi bacæimpa, ante cædinque mōnitō cænguī tōmēmō incæ æpænē gāwapænē wido cægadānimpa.

Wipo Ænænæmpo incæ goyæ guīpa

³⁹ Mānīi Ænō bayō òmæ adinque Ænænæ wipo nē cædāni iñōmō, Æmæ quīmæmē impa, ante ēñēnāmāi ināni inānitapa. Wæætē cōwā ayōnāni, Æpæ wedeca togaā paodāmæ iñōmō ēmōnai impa, ante adinque, Eyepæ imō ininque mōnō ēmōnaiboga wipo nāñe ñongæimpa. ⁴⁰ Ante cædinque teēmenca nāni guitodōnīncacoo ēmō cæte gocæte ante gæguincamē aa wiyænīnque ñimpo cædāni tadōmengadæ ee ongontapa. Ayæ wiyaimpa mēmpaa tōmēnāni wāi wocæñedē yæmiñæmpo inō nāni goti wīnimpa incæ ñowo wæætē edæ, Wipo tōō gocæimpa, ante ñī cædinque æpænē wæætē pædæ guidōnānitapa. Ayæ, Woboyæ pæmænte māō gocæimpa, ante Ænænæ wipo weocoo adocooque yæcadopo pædæ æænonte wo cædāni ate ēmōnaiboga togaa paodāmæ iñōmō tōingā māō gotamōnīpa. ⁴¹ Incæte tæcæ goyōmōni ònætāmō iñōmō nāñe ñongæntapa. Wipo yæcado nāñe ñongæ adinque mōnitō, Mōnō ædō cæte goquīi, ante wæyōmōni æpæ nanguī mængonta mængonta cæ beyænque yæmiñæmpo nā tobænīnque panguīmæ panguīmæ æmæwo gopotapa.

⁴² Tæcæ tobænō tontadoidi guiquēnē, Nē tee mōnete ongōnāni wīi tæi tæi pante wodii wīnonguīnāni, ante wææ cædinque tōmēnāni inānite wænoncæ cædānitapa. ⁴³ Adinque tontado capitāō iñōmō, Pabodo cōwē quēwencāimpa, ante cædinque tōmēnāni nāni cæcæ cædinō ante wææ angā ēñente ñimpo cædānitapa. Ayæ mōnitō imōnite, Nē ipo cæmīni iñōmō tāno æpænē tæi guīdinque ònompoca compo compo go tōmæwæ òmaa goedāni,

angä eñente gotamōnipa. ⁴⁴ Wadāni ipo cädāmaī ināni inānite tōmengä, Minitō guiquēnē awæmpaa incæ wipopa tobænipaa incæ nāñe ñongæninque wiyacæ wiyacæ goedāni, angä eñente godānitapa. Mānōmaī eñente cædinque mōnitō edæ tōmāmōni æpæmpo becadote wænāmaī inte ömaa edæ tōmæwæ pongamōnipa.

28

Wää tēiwæcnē Mānatabæ Pabodo ponte quēwengampa

¹ Æpæmpo becadote wænāmaī inte tōmāmōni ömaa taote eñeñmōnite, Wää tēiwæcnē iŵæcnē Mānatabæ impa, ante apænedāni eñentamōnipa. ² Māniömæ quēwēnāni iñömō wīi wadāni baī cædinque mōnitō imōnite waadete cædānitapa. Cöönæ ayæ nanguī cæ ate yoguite wæyömōnite tōmēnāni gonga tånōninque, Pō ootoedāni, ānāni gonga tōmāmōni bæcøyōmō oototamōnipa. ³ Pabodo iñömō önompoca gæte tēnewæ bacoo ænte māmō ñō cæyongä gonga ocoī ä wædinque tæntæ gongapamō manta Pabodo önompo æo pocænte ñinga cädāmaī ee engate owo wæcä. ⁴ Adinque iñömō quēwēnāni wæætē nāni cabo nāmāneque tededinque, “İngä iñömō waocä ingante nē wæningä ingä awædō. Tōmengä æpæmpo becadote wænāmaī iñongante edæ mōnō nō cæte pānongä incæ tōmengä ingante ata cæpodāmaī inte angä ate ñōwo quēwenguñāmaī incæcāmpa.”

⁵ Ante wapiticæ ante pōnente tedeyōnānite Pabodo iñömō pongadāmaī ingä inte pipo cæcä tæntæ ñingacæ gongapamō togodo guiite gonga gonte wængantapa. ⁶ Adinque tōmēnāni, Tincadō pæncæ pæncæ mempoquingää, ante ayæ, Tincadō iñontobæ tæī go wæænte wænguingää, ante acæte ante wantæpiyæ cōwä ayōnāni, Ayæ dæ pongadāmaī i inque ingampa, ante adinque tōmēnāni wæætē edæ, Æ İngä wacä wængonguī İnongä inte ponte a ongongampa, ante wapiticæ ante pōnēnānitapa.

⁷ Ayæ māniwæcnē awēnē Pobidio iñömō tōmengä quincodē mōni ömaa pōñömō eyequei intapa. Tōmengä, Oncōnē pō guiite quēwēdāni, angä pō guiite mōnitō mēōnaa go adoönæque quēwēñömōni tōmengä waadete pōnō cæcä ate waa quēwentamōnipa. ⁸ Pobidio mānōmaī waa cæcä quēwēñömōni, Tōmengä mæmpo wepæ tōnō gōmæ cæte daicawo gawænte mōīmoga a öñongampa. Ante apænedāni wædinque Pabodo tōmengä weca guiddinque Wængonguī ingante apænedinque gampocä ate waa bacantapa. ⁹ Pabodo mānōmaī cæcä adinque māniwæcnē tōmāo gode ānāni eñente wædinque nē wēnæ wēnæ ināni inānite Pabodo weca ænte māmō ænte māmō cæyōnāni tōmānāni Wængonguī cæcä waa badānitapa. ¹⁰ Māniñömō quēwēnāni mōnitō imōnite wæætē pōnō waa apænedinque cōwē waa cædānitapa. Ayæ wogaa tæcæ gocæ cæmōni adinque quiēmē mōni ænguēnēnō ante adinque tōmēnāni, Minitō ænte goquī, ante eyepæ pōni ænte māmō da wēnāni ænte gotamōnipa.

Odömä iñömō Pabodo pongampa

¹¹ Ayæ mōnitō Mānatabæ iñömō mengäa go adocanque māmonque quēwēninque gocæte ante cædinque, Åncadēnaquepo, Adecantodia iñömō quēwēnāni nāni pemonte ānimpodē go guittamōnipa. Tōmēnāni wængonguīna Catodo tōnō Podoco awinca baī ante badōninque tōmēnāni ñæñæ wipocado gō cædinque wipo ñæñæmpo emōwo, Åncadēnaquepo impopa, ante pemōnōnānipa. Māniŵpō Mānatabæ wēmonca wodōiñömō do pōninque pæmæ tedæ wāi wocæ adinque mōnitō iñömō mānimpodē go guiddinque wogaa gotamōnipa. ¹² Godinque Tidacota iñömō nāni wēmonca wodōiñömō

pō wāi wocæninque mōnitō mēōnaa go adoōnæque quēwentamōnipa. ¹³ Ayæ wadæ godinque Odeguio nāni quēwēñōmō pontamōnipa. Īimō ate dipæmæ gāmæñō woboyæ betamonca wædænque pæmæ wædinque mōnitō wadæ godinque waōnæ ate Poteodi quēwēñāni nāni wēmonca wodōiñōmō æmæwo pō ti wææninque tōmæwæ gotamōnipa.

¹⁴ Tōmæwæ godinque Poteodi nāni quēwēñōmō ponte ayōmōni nē pōnēnāni nāni cabo ongōnāni atamōnipa. Tōmēnāni, Adoque Wængongui itædē mōnitō tōnō ee owoedāni, ānāni Ao ante mōnitō tōmēnāni nāni ānimpoga māniñōmō quēwentamōnipa. Ayæ ate Odōmā taadonque gotamōnipa. ¹⁵ Odōmā iñōmō quēwēntē nē pōnēnāni iñōmō, Pabodoidi oo pōnānipa, ante do ēñēnāni inte doōnæ tadinque mōnitō imōnite bee tencæte ante pōnānitapa. Pancadāniya iñōmō Apio nāni godonte æiñōmō ganca pōninque mōnitō imōnite māmō bee tēnāni ate godongāmæ gotamōnipa. Godinque, Cæincō, ante Menconga go Adoconque, nāni āñōmō māniñōmō pōñōmōni wadāni māmō bee tēnānitapa. Mānināni inānite adinque Pabodo iñōmō, Nōwo iñōmō wampo pōnēmopa, āninque Wængongui ingante waa ate pōnēninque apænecantapa. ¹⁶ Ayæ odōmānoidi nāni nanguī quēwēñōmō Odōmā nāni āñōmō pōñōmōni tontado capitāō iñōmō nē tee mōnedināni wadāni inānite tōmengā awēnē nempo pædæ godōninque Pabodo ingante tee mōnedāmaī ingantapa. Wæætē wacōnē nānēnē ænte māodāni quēwēñongante tontado adocanque tōmengā ingante wææ wānōnongāimpa.

Odōmā iñōmō Pabodo quēwengampa

¹⁷ Māniñōmō ponte ate Pabodo mēōnaa go adoōnæque ate oodeoidi nē ānāni inānite āñecā godongāmæ pōnāni ate tōmēnāni inānite,

—Botō tōniñamīni, ēñēdāni. Mōnō guidēnāni inānite wēnæ wēnæ cædāmaī inte botō dodāni nāni angainō ante wido cædāmaī iñōmote oodeoidi incæ Eedotadēē iñōmō botō imote bæi ongōninque æninque odōmānoidi nempo pædæ godōnāni gotabopa. ¹⁸ Odōmānoidi guiquēnē botō imote apænte āninque, Æbānō cæcantawo, ante ancaa ante adinque, Pabodo dicæ tōmengā nānō wænguinque wēnæ wēnæ cæcāa, ante adinque botō imote ñimpo cæcæte ante cædānitapa. ¹⁹ Odōmānoidi botō imote ñimpo cæcæte ante cæyōnāni oodeoidi wæætē ancaa Baa ānāni ēñente wædinque botō iñōmō edæ, Odōmānoidi tæiyæ awēnē Tetædo incæ botō imote apænte anguēnengā ingampa, antabopa. Mānōmaī ānimo incæte botō awēnē Tetædo weca ongōninque, Botō guidēnāni wēnæ wēnæ cædānitapa, ante wæætē piinte ānāmaī incæboimpa.

²⁰ Mānōmaī beyæ mīnitō imīnite apænecæte ante botō, Pōedāni, antabopa. Nōwo apænebo ēñēdāni. Mōnō idægocabo iñōmō, Mōnō nē ponguingā Codito pōnō cæcā beyænque watapæ bacæimpa, ante mōnō pōnēmompā. Māniñō mōnō pōnengainō beyænque botō daagōmē ñānoncapoīmo a ongōmo aedāni.

²¹ Ante apæneyongante tōmēnāni wæætē Pabodo ingante apænedinque, —Odeabæ quēwēñāni bitō imite ante yewæmōninque cadota pædæ pōnōnāni dicæ æmōniyaa. Mōnitō tōniñadāni Oodeabæ quēwēntē pōninque bitō imitedō ante dicæ wiwa ānāniyaa. Bitō wiwa cædinō ante yewæmōninque odōmōnāmaī inōnānimpa. ²² Mānōmaī ī incæte wayōmō wayōmō tōmāmæ quēwēñāni, Mānināni Coditoidi iñōmō wēnæ wēnæ cædāni inānipa, ante piinte tededāni do ēñēmōni īninque mōnitō, Bitō ayōmi Coditoidi æbānō cædāni ināni. Æbānō pōnēmi, ante ēñencæte ante wæmōnipa.

²³ Āninque tōmēnāni, Īiōnæ godongāmæ bee tēninque ēñengæimpa, āninque wadæ godānitapa. Ayæ wæætē māniñōnæ nāni āniñōnæ īinque ba ate ocæ ēmænte pōñōnāni tæiyæñāni bee tēninque Pabodo weca godongāmæ

pönānitapa. Pönāni adinque Pabodo iñōmō baänæ contadingä gäwadecæ pöni apænedinque, Wængongui Awënë Odeye nempo mōnō quëwengæimpa, ante apænegaināni, Mōnō Codito ponte cæcæcäimpa, ante nāni angaiñō bai Itota iñōmō ñōwo ponte tōmānō ante do iñque cægacäimpa. Nāwangä impa, ante botō apænebo ëñëmaimīnīpa, ante Pabodo oodeoidi inānite apænegaināni. ²⁴ Angä ëñëninque pancadāniya, Pabodo nāwangä angampa, änānitapa. Pancadāniya guiquënë, Wīi pönëinente awædō, änānitapa. ²⁵ Nāni cabo incæ mänōmai wæætēdō wæætē apænete wadæ gocæ cæyönānite Pabodo wæætē æmæwo apænegaināni.

—Wængongui Tæiyæ Waëmō Öñowoca apænegä ëñëninque Itaiya wodi doyedë mīnitō mæmæidi inānite nāwangä ante apænegacäimpa.

²⁶ “Itaiya ëñëmi, bitō oodeoidi weca godinque iīmai ante apænebi ëñëncädänīpa.

Mīnitō öñōmoncaque ëñëninque ëñënämai incæmīnīpa.

Awıncaque adinque cōwë adāmai incæmīnīpa, ante apænebi ëñëncädänīpa.

²⁷ Iñāni edæ mīmō ömædënāni inte wīi ëñëinente wæwædō, äninque ædō cæte ëñënguñāni.

Awınca wīi äinente awædō, änāni inte ædō cæte aquñāni.

Edæ mīmō ëñëñāni inte bai tōmënāni awınca wi æmonte adinque öñōmonca wi æmoncate ëñëncädönānīpa.

Edæ mīmō nō pönëninque dadi ëmænte botō gämænō pönāni bai botō do godō cæbo waa bacädönānīpa.”

Ante Itaiya wodi mīnitō mæmæidi beyæ ämotamīni ante bai yewæmongacäimpa. ²⁸ Iñinque mīnitō oodeoidi inōmīni inte ëñënämai imīni adinque Wængongui ñōwo wæætē, Botō pönō æmo beyænque quëwengæmīnīpa, ante oodeo ināmai ināni inānite do apænegæ cæcampa.

Tömënāni guiquënë ædæmō waa ëñënguñāni inānīpa, ante apænebo ëñëmaimīnīpa, ante Pabodo apænegaināni.

²⁹ Mänōmai apænegä ëñente wædinque oodeoidi nāni cabo nangui pöni wæætēdō wæætē äninque wadæ godānitapa. ³⁰ Pabodo iñōmō oncō ænte quëwengæte ante tōmënāni nāni godonte æinta pædæ godöninque wacä oncō incæ tōmengä oncō bai bayō mänincönë wadepo mënepoga quëwengantapa. Ayæ, Æcänō ëñacæ pöinëna cōwë botō weca waa ponguimīni, ante quëwëninque tōmengä nē pönāni inānite apænegä ëñëñönānīpa.

³¹ Ayæ nē wææ wänönāni cōwë Baa änāmai iñönāni tōmengä guñëñämai apænedinque, Wængongui Awënë Odeye nempo mōnō quëwengæimpa, ante apænedinque, Mōnō Awënë Itota Codito æbänō cægacäi, ante edonque odömonte apænegä ëñëngadänīpa.

Odömånoidi inånite **Pabodo nånö cadota ante yewæmongainta**

Waa quëwencæminimpa, ante

¹ Itota Codito ingante nê cædōmo inte botō Pabodobo inōmo inte ī cadota ante nê yewæmōmo imopa. Wængonguī botō imote apænte æninqwe īimainō ante aa pegacāimpa. Bitō Pabodobi gote botō pōnō cædō ante watapæ apænebi ēñencædānimpa, ante angacāimpa.

² Māninō, Wængonguī æbānō pōnō cæquingā, ante watapæ apænedinqwe tōmengā beyæ nê apænegaināni wēēnēñedē pōni nāni tæiyæ waēmō yewæmongainō ante botō māninō ante nê apænebo imopa. ³ Māninō waa pōni nānō cæquīnō ante īinqwe cæcæte ante cædinque Wængonguī tōmengā Wengā ingante da pōnongā pongacāimpa. Tōmengā īñōmō waocā onguīñengā nānō baquinque Awēnē Dabii wodi Pæingā inte ēñagacāimpa.

⁴ Adocā Itota īñōmō botō Wengā inongā ingampa, ante tōmānāni edonque acædānimpa, ante odōmoncæte ante cædinque Wængonguī tæi piñænongā inte īimāi cægacāimpa. Īngā Itota Codito mōnō Awēnē īñōmō Tæiyæ Waēmō ēwocacā inte do wæningā īñongante Mæmpo Wængonguī wæætē nangui angā ate nāni ōmæmongacāimpa.

⁵ Ayæ adocā tōnō godongāmæ cædinque tōmengā emōwo beyæ mōnitō imōnite Wængonguī pōnō waadete cægacāimpa. Ayæ, Minitō wabæca wabæca gote apænemīni ēñēninque tōmāmæ quëwēnāni Itota Codito emōwo ante wede pōnēninque nê ēñente cæte quëwēnāni bacædānimpa, ante cædinque Wængonguī adobaī Itota ōnompō inte mōnitō imōnite da godongā gotamōnipa. ⁶ Īninqwe tōmāmæ quëwēnāni inånite Itota Codito, Botō gāmæñō pōedāni, ante aa pedinqwe mīnitō imīnite adobaī aa pecampa. ⁷ Minitō botō quimīni badinqwe botō ayōmō tæiyæ waēmō ēwocate quëwēmīni bacæminimpa, ante Wængonguī cægacāimpa. Īninqwe mīnitō Odōmā īñōmō quëwēninque Wængonguī quimīni īñōmīnite botō, Acæminimpa, ante īimāi ante yewæmōmopa. Mōnō Mæmpo Wængonguī tōnō Awēnē Itota Codito waadete pōnō cæyōnate mīnitō wæætē gānē pōnente bacæminimpa, āninqwe yewæmōmopa.

Odōmā īñōmō ēñacæ pōinēmopa, ante

⁸ Minitō æbānō wede pōnēmīni, ante tōmāmæ quëwēnāni tededāni ēñēnānipa. Īninqwe botō īñōmō Itota Codito emōwo apænedinqwe Wængonguī ingante waa ate apænebopa. Wængonguī bitō adobique pōnō cæbi ate odōmånoidi wede pōnēnānipa, ante apænebopa. ⁹ Wængonguī Wengā ingantedō ante watapæ apænedinqwe botō Wængonguī ingante nê cædōmo inte tōmengā nānō ānō ante ædæmō ēwocadinque apænebo ēñēnānipa. Botō mānōmāi cæbopa, ante nê adingā inte Wængonguī īñōmō edæ, Odömånoidi beyæ ante Pabodo botō imote woyowotæ incæ itædē incæ apænecampa, ante nê ēñengā ingampa. ¹⁰ Edæ, Wængonguī, bitō Ao āmi ate botō fīwo odōmånoidi weca ēñacæ gobaimopa, ante Wængonguī ingante mīnitō beyæ ante botō cōwē apænebopa. ¹¹ Wængonguī Ōnōwoca beyæ apænebo ēñēninque mīnitō tæi piñænte ēwocacæminimpa, ante cæcæte ante botō mīnitō weca ēñacæboimpa, ante wæbopa. ¹² Edæ mīnitō botō wede pōnēnō beyæ wampo pōnente bayōmīni botō wæætē, Minitō wede pōnēmīni, ante adinqwe adobaī

wampo pönemo inique mōnō pōnencabo godongāmæ wampo pōnēninque godōmenque tæi piñænte entawengæimpa, ante pōnēninque botō mīnitō imīnite aīnente wæbopa.

¹³ Botō wabæca quēwēnāni weca gote apænebo ēñēninque pancadāniya wede pōnēnāni badānitapa. Inique, Botō mīnitō weca gote apæneyōmo wadāni pancadāniya adobaī wede pōnencadānimpa, ante cædinque botō æpogamē incæ poncæ cæyōmo edæ wææ cæte intapa. Inique botō, Tæmpo poncæ cætabopa, ante yewæmōmo ate ēñencæmīnimpa, ante yewæmōmopa.

¹⁴ Edæ guidiegoidi incæ wadāni incæ, ocai encadāni incæ ocai omæcadāni incæ ædānimē iñōnānite botō debe inte baī edæ tōmānāni inānite odōmonte apænequēnēmo inōmo imopa. ¹⁵ Mānōmaī beyæ mīnitō Odōmā iñōmō quēwēmīni iñōmīnite botō mīnitō imīnite adobaī mōnō Codito ingantedō ante watapæ apænecæte ante nangui cæinente wæbopa.

Mōnō tæi piñænte ewocadō Codito beyænque impa, ante

¹⁶ Mōnitō oodeomōni iñōmōnite tāno apænedinque Wængongui iñōmō mīnitō oodeoidi ināmaī iñōmīnite ayæ adobaī apænedinque, Mīnitō wede pōnēmīni adinque Codito waa pōni pōnō ængā beyænque quēwencæmīnimpa, ante tæi piñænte cægacāimpa. Inique mānīnō Codito ingantedō ante botō iñōmō watapæ apænedinque, Wængongui tæi piñænte nānō cægaiñō impa, ante pōnente wædinque edæ guiñenedāmaī inte do apænebopa.

¹⁷ Mōnō wede pōnēmō iñōmonte Wængongui mānīne ante odōmonte watapæ apænecā beyænque mōnō nō cæte quēwēmō bagamōimpa. Mānīne beyænque godōmenque wede pōnente badinque mōnō wede pōnēnō beyænque quēwēmōmpa. Inique docā iñōmō Wængongui beyæ yewæmōninque, “Nē nō cæte quēwēnōngā incæ tōmengā nānō wede pōnēnō beyænque quēwencæcāimpa,” ante nānō yewæmongaiñō baī edæ do batimpa.

Mōnō waocabo wentamō mongænte wæmōmpa, ante

¹⁸ Nē wīwa cædāni guiquēnē wīwa nāni cædō beyænque wadāni edæ Wængongui nō pōni nānō apænegaiñō ante ædō cæte ēñenguīnāni. Inique Wængongui ingante nē wīwa cædāni nāni ēñēnāmaī inīnō ante godō piīninque tōmengā oōnædē ongōninque wīwa nāni cædinō beyænque do pangā wædāni edonque amōmpa. ¹⁹ Wængongui, Botō æbodō imoo, ante tōmāmīni edonque pōni ēñencæmīnimpa, ante cædinque tōmāmō imonte odōmōninque tōmēnāni inānite adobaī edonque pōni odōmongā wægadānimpa. ²⁰ Wēēnēñedē pōni nē quēwengaiñāni tōnō fiwo ganca quēwēmō adobaī, Wængongui mōnō nē adāmaī inongā inte æbānō quēwengāā, ante ēñencæte ante wægaimō inōmō inte mōnō tōmengā nānō badongaincooque adinque edæ edonque pōni acāimpa. Edæ, Tōmengā ñimpo cædāmaī inte cōwē nē tæi piñænongā ingampa, ante ayæ, Nē Wængongui inongā ingampa, ante wædinque mōnō waocabo edonque aquēnēmō imōmpa. Iñæmpa ēñēnāmaī intabopa, ante ædō cæte angui.

²¹ Wængongui ingante do ate baī ingaiñāni incæte woadāni tōmengā ingante edæ, Bitō Wængongui ñāō emōnōmi imipa, ante edæ ānāmaī inōnānimpa. Wængongui ingante waa ate pōnente apænedāmaī inōnānimpa. Mānōmaī ocai omæcadāni baī mīmō omædēnāni baī badinque tōmēnāni wentamō entawēnāni bagadānimpa. ²² Ocai encamōni imōnipa, ante ānāni incæte tōmēnāni wæætē mānōmaī cædinque ocai omæcadāni bagadānimpa. ²³ Edæ Wængongui wænāmaī nē Quēwengaiñā iñongante tōmēnāni wæætē godō Baa

angadānimpa. Tömengā nānō n̄āō ēmōnō ante p̄iinte cædinque tōmēnāni wæætē waomō nē wæwocamō mōnō ēmōnō bai badōninque, oōmā ēñadāni nāni ēmōnō bai badōninque, ocagui ēñadāni nāni ēmōnō bai badōninque, ocagui oōmadāni nāni ēmōnō bai badōninque tōmēnāni, Mōnitō wængongui ingampa, ante cædōnānimpa.

24 Mānōmaī cædāni ate wædinque Wængongui, Mīnitō mīni cæinente wædō ante ee abo cæcæminimpa, ante da godongā wadæ godinque tōmēnāni baonga nāni n̄ōmāī mongænte quēwenguinque cædōnānimpa. Īnque nāna gæncaya nāna gæncaya nāni monguēnēnō ante Baa ante guīñēñadāmaī inte cædinque wacā ingā wacā ingā godō wīwa cædōnānimpa. 25 Wængongui nāwangā pōni nānō apænegaīnō ante tōmēnāni Baa ānque mā pōnēnque nāni babæ apænegaīnonque ante Ao ānōnānimpa. Mānōmaī cædōnāni inte tōmēnāni wæætē Wængongui nānō nē badongaincoo weca ædæ wæānque, Mōnitō wængongui impa, ante cædinque nē Badongaingā ingante edæ ēmō cæte wadæ gogadānimpa. Incæte tōmengā nē Badongaingā ĩñongante mōnō waocabo inguipoga mōnō quēwēñedē ayæ ate m̄inguipo bayonte wantæpiyæ mōnō quēwēñedē Wængongui ingante, Bitō tōmēmi toquinque pōnō waa cæbi æmōnīpa, ante mōnō apænecæimpa. Mānōmaī impa, ante Amēē, āmopa.

26 Mānōmaī cæyōnānite Wængongui, Mīnitō guīñēñadāmaī mīni toīnente wædonque gobæwedāni, ante da godongā gogadānimpa. Īnque onquiyæñāni incæ, Nē onquiyæmō ĩnōmo inte botō onguīñængā tōnō monguēnēmo ĩmopa, ante ānāmaī ĩnāni inte godō wacā onquiyængā tōnō towente mōwēnōnānimpa. 27 Ayæ onguīñæñāni incæ adobāi cædinque, Botō onguīñæmo ĩnōmo inte onquiyængā tōnō monguēnēmo ĩmopa, ānāmaī ĩnāni inte godō wacā onguīñængā tōnō mōinente gonga bæco bai toīnente wædāni bagadānimpa. Īnque cōwē nāni waa quēwengūēnēnō ante Baa ānque nāni onguīñæncabo ĩnōnāni inte wīwa cædōnānimpa. Mānōmaī cæyōnānite Wængongui eyepæ pōni godō pangā wædinque tōmēnāni wīwa nāni cædō beyænque nāmā baonga caate wæwengadānimpa.

28 Wængongui ingante mōnō pōnente ēñengæimpa, ante tōmēnāni, Ōnonquedō ante impa, ante tedeyōnānite Wængongui wæætē, Ocaidē wentamō encadōmīni inte edæ waomīni mīni wīi cæquēnēnō incæ ee abo cæbæwedāni, ante da godongā gogadānimpa.

29 Tōmēnāni ĩñōmō nō cæquīnāmaī ĩnāni inte do wīwa cædānique badinque ĩmaī cædānīpa. Wacā ingā godō towēnque tōmēnāni wadāni ĩnānite nē wēnæ wēnæ cædānique ĩnānīpa. Māincoo ante æinente wæwēnāni inte tōmēnāni, Wacā gomonga ængā ingante godō p̄iinte adānīpa. Ayæ edæ, Mōnō godō wæñongæimpa, ante cædinque do cædānīpa. Guēadō guēa p̄iinte cædānīpa. Wacā oda cæcæcāimpa, ante ancaa cædinque tōmēnāni godō babæ cædānīpa. Ayæ nē wīwa pōnēwēnāni inte tōmēnāni, Wadāni wæcædānīpa, ante godō p̄iinte cædānīpa. Godō wæntaa godō wæntaa tedewēnāni ĩnānīpa. 30 Ayæ wadāni ĩnānite p̄iinque ĩnāni ĩñōmō godō babæ ante tedewēnāni ĩnānīpa. Wængongui ingante p̄iinte cædāni ĩnānīpa. Ayæ, Tōmēmoque waēmō ĩmopa, ante nāmā ængō cæte bai cædinque wadāni ĩnānite wææntodonte bai ānque, Ōnonquedō cæcantedō abii, ante godō p̄iinte todāni ĩnānīpa. Edæ, Æbānō godōmenque wēnæ wēnæ cæte toquimoo, ante edæ pōnēē cōinque edæ nangui cædānīpa. Mæmpocā tōnō badā, Cædāni, āñōnate tōmēnāni ēñēnāmaī cædānīpa. 31 Mīmō ōmædēnāni inte tōmēnāni ocai ōmæcadāni bagadānīpa. Cæcæboimpa, ānque edæ ĩnque cædāmaī ĩnōnānīpa. Wacā caate wæcā

adinque godō waadedāmaī īnōnāni inte tōmēnāni edæ godōmenque pīnāni inte cædōnānimpā.

³² Mānōmaī cædāni īñōmō nāni wænguinque cædānimpā, ante Wængonguī nō pōni nānō angainō ante tōmēnāni ōnōmoncaque nē ēñēnāni inte tōmēnāni nāni wēnæ wēnæ cæinēnonque ante cædānimpā. Ayæ tōmēnāni wīwa nāni cædō bai wadāni adobaī cædāni adinque tōmēnāni, Waa cæminimpā, āninque nē cædāni īnānite waa adānimpā.

2

Nōingā ante Wængonguī apænte angampā, ante

¹ Tōmēnāni mānōmaī cædānimpā. Incæte bitō adobaī wīwa cædōmi inte tōmēmi pante wæquinque tōmēnāni īnānite apænte āmimpā. Īninque bitō wacā ingante, Bitō pante wæquinque wīwa cæbimpā, ante apænte āmi inte bitō īñæmpā adobaī wīwa cædōmi inte edæ æbānō cæte nāmā ante wææ angūmii.

² Wīwa cædāni īnānite apænte āninque Wængonguī cōwē nōingā ante apænte angampā, ante edæ do ēñēmompā. ³ Īninque waobi ōnōmique īnōmi inte bitō īñæmpā tōmēnāni īnānite apænte āmi incæte tōmēnāni nāni cædō bai adobaī cædōmi inte edæ, Wængonguī botō imote pānāmaī inte ata cæpocæcāimpā, ante pōnēmitawo. ⁴ Bitō wīwa cæbi inte Ca ca wæquēnēmi īñōmite Wængonguī wæætē ee pānāmaī inte nanguī waadete pōnō cæyongante bitō wæætē edæ pīininque Baa āmitawo. Īñæmpā tōmengā, Bitō, Æmæwo wēnæ wēnæ cætabopa, ante wædinque botō gāmænō poncæbiimpā, ante Wængonguī pōnō waadete cæcampā, ante pōnēmyiaa.

⁵ Incæte bitō mīmō ōmædēmi inte ancaa Baa āninque edæ wēnæ wēnæ bitō cædō ante ñimpo cædāmaī īñōmite Wængonguī nānō ænguī baquīōnæ ĩnque bayonte tōmengā ænguī pōni badinque godōmenque pangā wæcæbiimpā. Tōmengā æbānō nō apænte angāā, ante māniñedē ate edæ edonque acæimpā.

⁶ Edæ, Tōmāmō mōnō cægai ganca ante Wængonguī eyepæ pōni pædæ pōnongā æncæmōimpā, ante dodāni nāni yewæmongainō bai edæ ĩnque bæcæimpā.

⁷ Īninque, Mōnō ñāō bai entawengæimpā, ante cædinque ayæ, Wængonguī mōnō imonte waa adinque pōnō cæcā ate mōnō wæwocadāmaī ēwocacæimpā, ante cædinque mōnō wæntædāmaī inte ee waa cæte quēwēmō ĩnque Wængonguī pōnō cæcā ate mōnō cōwē wænāmaī quēwēmaīmompā. ⁸ Wæætē, Wængonguī nāwangā nānō apænedō ante Baa āninque, Tōmēmo beyænque quēwæncæboimpā, ante nē ānāni īnānite ayæ wadāni wīwa nāni cæquīnonque ante nē tee empote godāni īnānite Wængonguī ænguī badinque godō pīinte cæcæcāimpā. ⁹ Edæ mōnō waocabo wēnæ wēnæ cæmō adinque Wængonguī oodeomōni īñōmōnite tāno pāninque oodeomōni īnāmaī ĩmini ĩminite adobaī pāñongā nē wēnæ wēnæ cæmō tōmāmō īñōmō edæ caate wæwæncæmōimpā. ¹⁰ Wæætē waa cæmō adinque Wængonguī oodeomōni ĩmōnite tāno pōnō waadete cædinque oodeomōni īnāmaī ĩmini ĩminite adobaī pōnō waadete cæyongā nē waa cæmō wæætē gānē entawēninque ñāō apāite bai entawēñōmonte edæ Wængonguī tōmāmō imonte waa acæcāimpā.

¹¹ Edæ mōnitō oodeomōni ĩmōni incæ mīnitō oodeomōni īnāmaī ĩmini incæ Wængonguī tōmāmō imonte adoyōmō pōni adinque wadō wadō ate pōnente cædāmaī ingampā. ¹² Mōitee wodi, ĩmaī cædāni, ante nānō wææ angainō ante ōmæmoncadāni inte wīwa cædāni ĩninque tōmengā nānō wææ angainō dæ ante bai mānināni wæncædānimpā. Wæætē Mōitee wodi nānō wææ angainō ante do ēñente ēmoncadīnāni incæte wīwa cædāni adinque Wængonguī māñine

ante ēñēnāmaī cædāni beyænque apænte āninqe pangä wæcædānīmpa. ¹³ Edæ Mōitee wodi nānō wææ angainō ante önōmoncaque ēñēnāni inte tōmēnāni nāni önōmoncaque ēñēnō beyænque Wængonguī ayongä dicæ nō cædāni badāniyaa.

Wæætē edæ mǎnīne ante ēñente cædāni inānite guiquēñē Wængonguī pōnō angä ate tōmēnāni iñōmō nō cædāni bacædānīmpa. ¹⁴ Edæ Mōitee wodi nānō wææ angainō ante òmæmoncadāni inte oodeoidi ināmaī ināni incæ pancadāniya tōmēnāni dodāni nāni wææ angainonque ante Ao ante cædinque Wængonguī nānō wææ angainō bai edæ do cædānīpa. Mǎnōmaī ēñente bai cædinque tōmēnāni mīmō entawēnāni inte mǎnīne ante òmæmoncadāni ināni incæte nāmā nāni wææ ānonque ēñente cædānīpa. ¹⁵ Edæ, Tōmēnāni dodāni nāni wææ angainō ēñēninque waa cædāni inte tōmēnāni Wængonguī nānō wææ angainō bai do entawēnānīpa, ante edonque acæīmpa. Mīmō entawēnāni inte tōmēnāni nāni caboque godongāmæ pōnēninque wēnæ wēnæ nāni cædōnō ante nǎēmæ apænte wææ ānīnīpa. Ayæ wæætē waa cædāni ate tōmēnāni nǎēmæ apænte ñīmpo cædānīpa.

¹⁶ Codito ingantedō ante watapæ ēñengāimo inte botō iīmaī ante apænebopa. Wængonguī angä ēñente cædinque Itota Codito wæætē waomō mōnō awēmō entawēnō ante edonque pōni adinque apænte ancæcāīmpa. Tōmengä nānō apænte anguīōnæ iīnque bayedē edæ mǎnīnō ante botō yewæmonte apænedō bai edæ iīnque bacæīmpa.

Mōitee nānō wææ angainta adinque oodeoidi wīi ēñēnāni

¹⁷ Bitō iñōmō edæ, Oodeobo inōmo īmopa, ante āmīpa. Ayæ, Mōitee wodi nānō wææ angainta nē ēñēmo inte botō Wængonguī ayongante waa quēwēmo īmopa, ante edæ nāmā ængō cædinque āmīpa. ¹⁸ Wængonguī æbānō angä, ante do ēñēmīpa. Ayæ tōmengä nānō wææ angainō ante do ēñēmī inte bitō, Quīnō waa ī, ante do ēñēninque Ao ante æmīpa. ¹⁹ Bitō, Wadāni babetamō bai ēwocayōnānite botō tōō æmānte mǎobo godānīpa. Wēmō iñōmō quēwente bai adāmaī iñōnānite botō iñōmō, Acæmīnīmpa, ante tīca ēnente bai odōmonte apænebopa, ante edæ, Nāwangä āmopa, ante bitō apænebitawo. ²⁰ Ayæ adobai, Mōnō Mōitee wodi nānō wææ angainō ante ēñente beyænque mōnō ēñenguēnēnō ante entawēninque mōnō nō cæquēnēnō ante adobai tōmānō ante entawengæīmpa, ante bitō pōnēmitawo. Ayæ mǎnōmāinō ante bitō pōnēnō beyæ bitō, Nē oda cædāni inānite botō nē tōingä odōmōmo īmopa, ante pōnēmitawo. Wēñænāni bai wædænque ēñēnāni iñōnānite botō nē odōmonte apænebo īmopa, ante pōnēmitawo.

²¹ Iñæmpa mǎnōmaī inōmi inte bitō edæ dicæ nāmā odōmonte apænete ēñēmitawogaa. Wadāni inānite odōmonte apænedinque, Awēmō ænāmāī iedāni, ante odōmonte apænedōmi inte tōmēmī awēmō æmitawo. ²² Bitō wadāni inānite odōmonte apænedinque, Nānōgængä ināmaī iñongante godō guēa mōnāmāī īe, ante nē wææ āmi inte bitō adobai wacā tōnō guēa mōmitawoo. Ayæ, Wængonguī ingampa, ante nāni badōinca ante nē pīimi inte bitō edæ tōmēnāni nāni apæneincōnē go guīdinque edæ ò æmitawoo.

²³ Iñæmpa bitō, Mōitee wodi nānō wææ angainō ante botō ēñente cæbo īmopa, ante tededinque nāmā ængō cædōmi inte edæ mǎnīne ante ēñēnāmaī cæbi adinque wadāni wæætē Wængonguī ingante waa adāmaī inānīpa tōō. ²⁴ Edæ, “Mīnitō cædinō beyæ oodeoidi ināmaī ināni incæ Wængonguī ēmōwo ante godō habæ ante wēnæ wēnæ ānewēnānīpa,” ante tōmengä beyæ dodāni nāni yewæmongainō bai do batīmpa.

²⁵ Edæ Wængonguī nānō wææ angainō ante ēñente cæbi iīnque bitō, Nāwā oodeobo īmopa, ante nē ēō togæīmi badinque waa īmāīmpa. Wæætē

edæ ēñēnāmaī cæbi īninque oodeo īnāmaī ingā bagāacā ingā bai bitō īñōmō edæ do babaīmipa. ²⁶ Oodeoidi īnāmaī īnāni guiquēnē bagāadāni īnāni incæte tōmēnāni Wængonguī nānō wææ angainō ante ēñente cædāni īninque Wængonguī ayongā tōmēnāni do ēō togæīnāni bai īnōnāni inte oodeoidi bai īnānīpa. ²⁷ Bitō īñōmō Mōitee wodi nānō wææ yewæmongainta mānīmi inte nē ēō togæīmi īmitawo. Bitō mānōmaī īmi incæte ēñēnāmaī cæbi īñōmi wacā wæætē bagāacā īnongā inte ēñente cæcā īninque tōmēngā ēñente nānō cædō beyænque Wængonguī wæætē bitō īmite apænte āninque pancæcāimpa.

²⁸ Īñæmpa oodeo ēñagaingā inte baō beyænque oodeocā ingā incæte tōmēngā wīī mānōmaī ingā beyænque nāwā oodeocā ingampa. Adobaī nē ēō togæīngā īñōmō baonque nānō ēō togæīnō beyænque tōmēngā Wængonguī ayongā ædæmō ēō togæīngā bai wīī ingampa. ²⁹ Wængonguī Ōnōwoca ingante nē ēwocacā guiquēnē tōmēngā īñōmō edæ nāwā oodeo bai badinque Wængonguī wēñængā ingampa. Edæ Mōitee wodi nānō wææ yewæmongainō ante ēñente ēō togæīninque waocā tōmēngā wentamō nānō entawēnō dicæ wido cæqinggā. Wængonguī Ōnōwoca guiquēnē pōnō wido cæcā beyænque waocā wæætē waēmō entawengampa. Mānōmaī entawēngā ingante wadāni waa adāmaī īnāni incæte Wængonguī wæætē, Bitō waa entawēmi abopa, āninque tōmēngā ingante waa apæñecampa.

3

¹ Īninque oodeocā īñōmō edæ, Oodeobo īmopa, ante toquēnēngā ingantawo. Ayæ adobaī, Botō ēō togæīmo īmopa, ante toquēnēngā ingantawo. ² Ao āmopa. Nē oodeoidi īnōnāni inte tōmēnāni cōwē nangui toquēnēnāni īnānīpa. Edæ Wængonguī apæñecā ēñēngaināni inte edæ oodeoidi tōmēngā nānō apæñedō ante nē mangaināni inte nē toquēnēnāni īnānīpa. ³ Mānōmaī ī incæte pancadāniya īñōmō edæ wede pōñēnāmaī īnānīpa. Īninque mōnō æbānō anguīī. Tōmēnāni nāni pōñēnāmaī īnō beyænque Wængonguī tōmēnāni īnānite dicæ nīmpo cædinque ædæmō aadāmaī ingantawogaa. ⁴ Ædō cæte mānōmaī inguīī. Mōnō waocabo tōmāmō nē babæ apænēmō īñōmonte Wængonguī īñōmō nō pōnī cæcā ingainō anguēnē. Edæ tōmēngā beyæ īīmaī ante yewæmongatimpa.

“Wængonguī bitō æbānō apæñebīī, ante apænte ancæ cædāni incæte tōmēnāni, Wængonguī nō pōnī ante apæñecampa, ante edonque acædānīmpa.

Bitō nē tæī ēmōmi inte edæ bitō īmite nē apænte ancæ cædāni īnānite nāēmæ edæ wææntodonte bai cædinque edæ gānā cæcæbīimpa.”

Ante nāni yewæmongainō bai edæ bacæimpa.

⁵ Waodāni mā pōñēninque īīmaī ante tedewēnānīpa. Mōnitō wīwa cæyōmōnite Wængonguī nō cæcā adinque wadāni, Wængonguinque nē nō cædongā ingampa, ante godōmenque edonque acædānīmpa. Īninque wīwa cæyōmōnite Wængonguī quīnante pīinte pangāā, ante tedewēnānīpa. Mānōmaī tedewēnāni adinque mōnō wæætē æbānō anguēnēmō imōō. Īñæmpa waodāninque nāni ānewēnō bai dicæ anguēnēmō īmongaa. ⁶ Ædō cæte mānōmaī ānewēnguīī. Mānīnō nāni tedewēnō nāwangā ī bai inguipoga quēwēmō īmonte Wængonguī apænte ānāmaī inguēnēngā.

⁷ Wadāni guiquēnē īīmaī ante tedewēnānīpa. Wængonguī cōwē nāwangā ante apæneyongante botō babæ apænebo adinque wadāni, Wængonguinque nāwangā ante apæñecampa, ante tōmēngā ingante godōmenque waa acædānīmpa. Īninque babæ botō apæñedō beyænque Wængonguī godōmenque

ñāō apāite bai ēmongā ingampa. Īnque, Bitō nē wēnæ wēnæ cæbi ĩmipa, ante Wængonguī quĩnante botō ĩmote apænte angāā, ante tedewēnānīpa. ⁸Tōmēnāni, Wængonguī ĩngante godōmenque waa acædānīpa, ante mōnō godōmenque wēnæ wēnæ cæcæĩmipa, ante tedewēnānīpa. Tōmēnāni nāni tedewēnō nāwangā ĩ bai mōnitō adobai ante ancædōmōnīpa. Edæ, Tōmēnāni nāni tedewēnō bai edæ Pabodoidi adobai ante apænedānīpa, ante pancadānīpa pōnō wēnæ wēnæ ante babæ apænedānīpa. Mānōmaĩ ante nē apænewēnāni ĩnānite pānīnque Wængonguī nō cæte pangampa.

Tōmāmō mōnō pante wæquinque wentamō mongæmōmpa

⁹ Īnque æbānō ante anguīī. Mīnitō oodeoidi ĩnāmaĩ ōnōmīnīque ĩñōmīnite mōnitō mōni oodeocabo dicæ godōmenque waa pōni ĩmōnīyaa. ĩñæmpa mōnitō oodeomōni incæ mīnitō oodeomīni ĩnāmaĩ ĩmīni incæ tōmāmō nē wēnæ wēnæ cædōmō ĩmōmpa, ante do odōmonte yewæmōmōni abāimīnīpa. ¹⁰ Edæ ĩmaĩ ante Wængonguī beyæ ante āmotamīni ante bai yewæmongatīmpa.

“Nē nō cædongā ĩñōmō edæ dæ angampa.

Adocanque incæ edæ dæ angampa.

¹¹ Nē ēñente pōnengā ĩñōmō edæ dæ angampa.

Wængonguī ĩngante ante nē diqui diqui mīnongā ĩñōmō edæ dæ angampa.

¹² Tōmānāni edæ oda cæte wapiticæ godīnque,

nāni waa cædāmaĩ incaboque badānitapa.

Nē waa cædongā ĩñōmō edæ dæ angampa.

Adocanque incæ edæ dæ angampa.

¹³ Waodāni ĩnānite wænoncæte ante ææ ænete bai ēmencadinque,

tōmānāni babæ ante enguēnēwate tedewēnānīpa.

Edæ tæntæ tōmēmæ ēnete bai, Wængongæĩmipa, ante ēnedānīpa.

¹⁴ Tōmēnāni pīinte nāni tedewēnō beyænque moncapæ tī nā bai enguēnēwadānīpa.

¹⁵ Tōmēnāni wængonguīwaque pogodo goquīwaque ēwadānīpa.

¹⁶ Tōmēnāni nē godō wæñōnāni inte māincoo wido cæte wodii godāni ate edæ mīī quēwēnāni ponte adīnque caate bai wæwēnānīpa.

¹⁷ Nē pīinte cædōnāni inte tōmēnāni Wængonguī taadō tōmengā gānē entawente nānō godōnō ante adāmaĩ inte cædānīpa.

¹⁸ Tōmēnāni, Wængonguī ĩngante mōnō guīñente ēñengæĩmipa, ante pōnēnāmaĩ ĩnānīpa.”

Ante dodāni nāni yewæmongainō bai ĩmpa.

¹⁹ Æcānō Mōitee wodi nānō wææ angainō ante nē ēñente quēwenguēnēna ĩnaa tōmengā beyænque ante wææ yewæmongatīmpa. Mānōmaĩ ĩ beyæ, Botō eyepæ cæbo ĩmopa, ante mōnō ædō cæte anguīī. Edæ guīñēnete mōnō pæ wēnecæĩmipa. Ayæ ĩnguipoga tōmāo quēwēmō tōmāmō Wængonguī nē apænte angā weca ongōnīnque edæ, Æbānō cætaboo, ante Wængonguī ĩngante mōnō edonque apænequēnēmō ĩmōmpa. Mānōmaĩnō ante edæ do ēñēmōmpa.

²⁰ Mānōmaĩ beyæ Wængonguī, Mōitee wodi nānō wææ angainō ædæmō ēñente cæbi beyæ bitō botō ayōmo nē nō cæbi babīpa, ante adocanque ĩngante edæ ānāmaĩ ĩncæcāĩmipa. Wæætē mānīne nānō wææ angainō ēñente beyæ mōnō, Nē wēnæ wēnæ cæmō ĩmōmpa, ante edonque amōmpa.

Mōnō wede pōnēnō beyænque nō cæte quēwēmōmpa, ante

²¹ Wīī Mōitee wodi nānō wææ angainō ante ēñēmīni beyæ wæætē edæ Wængonguī incæ pōnō badongā beyænque mōnō tōmengā ayongā nō cæmō bamōmpa, ante ñowo pōni odōmongatīmpa. Dodāni Mōitee wodi tōnō

Wængonguī beyæ nē apænegaināni iñōmō, Īncayæ ate mǎnōmaī bacæimpa, ante do yewæmongadānimpa. ²² Wængonguī pōnō badongā ate mōnō nē wede pōnēmō iñōmō Itota Codito ingante mōnō wede pōnēnō beyænque edæ tōmāmō tōmengā ayongā nō cæmō bamompa. Edæ mōnō adoyōmō ingaimō inte ònōmonque ìmopa. ²³ Īnque mōnō tōmāmō wēnæ wēnæ cæmō inte Wængonguī nānō ñāo bai quēwēñōmō guicæte ante cædinque wī eyepæ cæmō inte wīi guimompa. ²⁴ Incæte Itota Codito ængā beyænque abæ tawænte gote bai quēwēmō iñōmōnte Wængonguī ònonque ānāmaī inte waadete pōnō badongā ate mōnō tōmengā ayongā nō cæmō bamompa. ²⁵ Wængonguī iñōmō Itota Codito ingante da pōnōninque, Tōmengā mīnitō wēnæ wēnæ cædō ante teēmente wængā beyænque botō wæætē piyænē cædinque mīnitō ìmīnite pānāmaī incæboimpa, ante cægacāimpa. Īnque tōmengā, Mǎnōmaī pōnō cæbo ate mīnitō, Itota wepæ mōnō beyæ pe tæ pe tæ wæænimpa, ante wede pōnēninque wede mīni pōnēnō beyænque quēwencæmīnimpa, ante pōnō cægacāimpa.

Mǎnōmaī cædinque Wængonguī wēēnēñedē mōnō waocabo mōnō wēnæ wēnæ cægainō ante ee adinque nē pānāmaī ingaingā incæte edæ, Botō cōwē nōingā ante apænte ānōmo ìmopa, ante ēñencæmīnimpa, ante odōmongacāimpa. ²⁶ Īnque, Wængonguī nē nō cæcā ìngā ingampa, ante mōnō acæimpa. Ayæ adobai, Itota ingante nē pōnēmō iñōmōnte Wængonguī nē panguēngā ìngā incæ mōnō ìmōnte ata cæpodinque pōnō badongā ate mōnō wæætē tōmengā ayongā edæ nē nō cæmō bamompa, ante mōnō acæimpa. Īnque tōmengā mǎnōmaī cædinque tōmengā nō nānō cædō ante odōmoncæte ante ñōwo cægacāimpa.

²⁷ Īnque mōnō waocabo iñōmō nāmā ængō cæte bai cædinque mōnō, Nāmā cædinque nō cæmō bamompa, ante ædō cæte anguimō. Īñæmpa mǎnōmaī āninque cædāmaī ingæimpa. Quinante nāmā wīi ængō cæquī, ante wæmīnitawo. Mōitee wodi nānō wææ angainō ædæmō ēñente cæmō inte bai mōnō, Tōmēmō cætamompa, ancædōmōimpa. Incæte ædæmō ēñente dicæ cæmongaa. Wæætē tōmengā ingante wede mōnō pōnēnō beyænque tōmengā ayongā nō cædōmō bamompa, ante adinque mōnō, Tōmēmō cætamompa, ante ædō cæte anguī. ²⁸ Īñæmpa waocā Wængonguī nānō wææ angainō ante ēñente cæcā incæ wīi tōmengā nānō ēñente cædō beyæ nē nō cæcā bacampa. Wæætē wede nānō pōnēnō beyænque Wængonguī ayongā edæ nē nō cæcā bacampa, ante do edæ apænebo ēñēmaimīnipa.

²⁹ Oodeomōni iñōmōnite Wængonguī mōnitō Wængonguī ìngā ingampa. Oodeomīni ìnāmaī ìmīni guiquēnē, Wīi mōnitō Wængonguī ingampa, ante pōnēmīnitawo. Īñæmpa oodeomīni ìnāmaī iñōmīnite adocā Wængonguī mīnitō Wængonguī ingampa. ³⁰ Edæ adocanque Wængonguī ìngā ingampa. Īnque nē ēō togæimōni ìmōni mōni wede pōnēnō beyænque tōmengā pōnō badongā ate tōmengā ayongā edæ nō cæmōni bamōnīpa. Adobai bagāmīni mīni wede pōnēnō beyænque Wængonguī adocanque ìngā inte pōnō badongā ate mīnitō adobai tōmengā ayongā nō cæmīni bamīnīpa. ³¹ Mōnō pōnēnō beyænque ìmpa, ante apænedinque mōnitō Wængonguī nānō wææ angainō ante dicæ wēā godonte bai cæmōniyaa. Wīi mǎnōmaī cæmōnīpa. Wæætē mǎnōmainō ante apænedinque tōmengā nānō wææ angainō ante Ao āninque mōnitō, Ēñēedāni, ante odōmōnte apænemōnīpa.

4

Abadäo wodi æbänö cægacäi, ante pönengæimpa

¹ Mäninö ante mönitö mæmæ Abadäo wodi iñömö æbänö ante eñengacäi, ante mönö ñowo pönente apæ necæimpa. ² Abadäo wodi nē eñente cæcä ingaingä incæte tömengä nänö eñente cædö beyænque dicæ nö pöni entawengä bacantawogaa. Mänömaï cædinque nö cæcä bagacäimpa, ante näwangä i bai tömengä waodäni eñeñonänite, Waa cæbo imopa, ante do ancægacäimpa. Incæte tömengä Wængongui eñeñongante mäninö ante cöwē änämaï inguēnengä ingacäimpa. ³ Wængongui æbänö ante apæ necä eñente yewæmongadäni, ante aminii. Edæ iïmaï ante apæ necä eñente yewæmongadänimpa. “Wængongui nöingä ante apæ necampa, ante Abadäo wede pönengacäimpa. Ìninqe tömengä wede nänö pönēnö beyænque Wængongui wæætē edæ, Botö ayömo Abadäo nē nö entawengä ingä abopa, angacäimpa,” ante yewæmongadänimpa.

⁴ Edæ wadäni beyæ waocä nanguï cæcä ate tömēnāni debe badināni inte edæ, Önonque pönömöni æe, ante ædö cæte anguinānii. Ìñæmpa wii önonque godonte impa. Wæætē tömengä nänö nanguï cædinö beyænque paga ante nē godonguēnēnāni inte awēnēidi, Bitö nanguï cæbitapa, ante godönāni ængampa. ⁵ Wængongui guiquēnē önonque pönö cæcä æmöimpa. Waocä wiwa cæcä incæ wede pönengä adinque Wængongui pönö badongä ate tömengä Wængongui ayongante wæætē nö cæcä bacampa. Ìninqe waocä waa cædämaï incæ edæ wede pönengä adinque Wængongui wæætē tömengä ingante pönö badöninque, Nö pöni bitö entawenguinque bitö wede pönēmi abopa, angampa. ⁶ Waocä waa cædämaï iñongante Wængongui pönö badongä ate tömengä Wængongui ayongä nö pöni entawengä Ìninqe tömengä watapæ quēwencæcäimpa, ante apænedinque Dabii wodi adobaï ämotamini ante bai yewæmongacäimpa.

⁷ Adocä yewæmöninque, “Waodäni eñenāmaï cædäni Inänite Wængongui pönö ñimpo cæcä ate tömēnāni wæætē watapæ quēwencædänimpa. Edæ tömēnāni eñenāmaï nāni cædö ante ö ænte mäo tee moncate bai cæcä adinque nanguï tocædänimpa.”

⁸ Æcänö ingante Wængongui, Bitö pante wæquinque wēnæ wēnæ cæbipa, ante cöwē piinte änämaï ingä Ìninqe mäningä waocä wæætē nanguï tocæcäimpa.”

⁹ Ante Awēnē Dabii wodi, Eö togæninānique tocædänimpa, ante dicæ yewæmongantawogaa. Bagäadäni adobaï tocædänimpa, ante ancæte ante yewæmongacäimpa. Abadäo wodi Wængongui ingante wede nänö pönēnö beyænque Wængongui, Botö ayömo Abadäo nē nö entawengä ingä abopa, angacäimpa. Mänömaïnö ante edæ botö do yewæmömo abaïminipa. ¹⁰ Abadäo wodi æbänö engæñongante Wængongui mänömaï angacäi. Dicæ eö togæningä iñongante angantawogaa. Wæætē bagäacä iñongante angacäimpa. ¹¹ Ìninqe, Abadäo bagäacä inte wede pönengä beyænque botö pönö badömo ate nö cæcä bacampa, ante eñencædänimpa, ante cædinque Wængongui angä eö togænte bagacäimpa.

Mänömaï cæcä beyæ mīnitö bagäamini inte wede pönēmīni iñömīni Abadäo wodi mīnitö wæmængä bai bagacäimpa. Abadäo wodi pæimīni bai wede pönēmīni adinque Wængongui adobaï, Nö entawēmīni bamīni acæboimpa, ante pönö badongacäimpa. ¹² Mönitö wæmæ Abadäo wodi doyedē bagäacä ingänedē incæ wede pönengä ingacäimpa. Möni idægocabo iñömö nē eö togæimöni inte edæ tömengä wede pönente nänö cængongainö adodö tee

empote gomönipa. Īninqe mäninönö möni wede pönente godönö gomöni beyænque möni eö togæncabo wæmængä adocä Abadäo wodi ingacäimpa.

Mönö wede pönönö beyænque Wængongui nänö angainö ante cæcampa, ante

¹³ Wængongui, Inguipoga incæ bitö nē ænguimi incæbiimpa, äninque Abadäo wodi tönö tömengä nänömoidi inänite pönö angä ængadänimpa. Mänömainö äninque Wængongui dicæ, Botö wææ angainö ante eñente cædänique æncædänimpa, ante angantawogaa. Wæætē edæ wede pönente tömengä ayongä nö entawēnāni badāni beyænque Wængongui, Inguipoga incæ pönömo æncæminimpa, ante apænegacäimpa. ¹⁴ Wængongui dicæ, Botö wææ angainö eñente nē cædänique nē ænguīnāni inänipa, ante angantawogaa. Edæ mänömainö angä bai mönö wede pönönö ante önonque pönencædömöimpa. Tömengä nänö angainö incæ wo ewente bai bacædönimpa. ¹⁵ Edæ mäninö tömengä nänö wææ angainö ante eñenāmai cædāni beyænque Wængongui ængui badinque pangampa. Wæætē wææ änāmai inte bai Wængongui, Botö wææ angainö ante eñenāmai cæbipa, ante ædö cæte anguingää. Edæ dæ ancædönimpa.

¹⁶ Mänömai beyæ Wængongui, Botö waadete pönö cædö beyænque æminipa, ante edonque acæimpa, ante cædinque Abadäo wodi wede nänö pönönö beyænque ante, Pönömo æncæminimpa, angacäimpa. Mönitö Möitee wodi nänö wææ angainö ante nē eñemöni iñömönite wii adomönique imönite angacäimpa. Wæætē Abadäo wodi nänö wede pönengai bai adobai wede pönemö iñömonte mönö tömämö imonte Wængongui, Cöwē pönömo æncæminimpa, angacäimpa. Edæ mönö wede pönencabo iñömonte Abadäo wodi tömämö wæmængä bai ingacäimpa. ¹⁷ Wængongui edæ do wængaināni inänite pönö cæcä ate tömēnāni iñömö nāni ömæmonte edæ münnāni quēwēnānipa. Dæ angaincoo incæ tömengä do badongä ate edæ a ongoncoopa. Wængongui mänömai nē badongä iñongante Abadäo wodi tömengä ingante nē wede pönengä ingacäimpa. Īninqe Wængongui, “Abadäo eñēmi. Botö pönö badömo ate bitö pæināni yebæninque wacabodāni nāni cabo wacabodāni nāni cabo nangui ināni iñönānite edæ bitö adobique tömēnāni wæmæmi incæbiimpa.” Ante Wængongui beyæ ante yewæmongatimpa. Īninqe Wængongui ayongante mönö wede pönemö iñömonte Abadäo wodi mönö wæmængä bagacäimpa.

¹⁸ Tömengä ingante, “Bitö pæināni edæ mänimodāni bacædänimpa,” ante Wængongui do angacäimpa. Mänömainö angä eñēninque, Ædö cæte baquii, ante wædongä incæ Abadäo wodi, Wængongui cöwē cæcä beyæ watapæ bacæimpa, ante wede pönengä ingacäimpa. Īninqe tömengä wede nänö pönönö beyænque “wacabodāni nāni cabo wacabodāni nāni cabo nangui ināni bayönānite tömēnāni wæmængä” Abadäo bagacäimpa.

¹⁹ Tömengä, Botö picængadebo wodo tiē wadepo quēwengäimo inte edæ botö baö wænte bai eñabo inte edæ ædö cæte wēñæ tapæiquimoo, ante eñengacäimpa. Ayæ, Tada adobai wēñæ cöwē mänāmai ingaingä inte picængacä badinque ædö cæte wēñæ manguingää, ante pönengacäimpa. Incæte mäninö nänö wædö beyænque guñēñadāmai inte Abadäo wodi Wængongui nänö äninö ante godömenque pönengacäimpa. ²⁰ Tömengä, Wængongui wabänö cæbaingää, ante wædāmai inte wæætē Wængongui nänö, Cöwē pönö cæcæboimpa, äninö ante wede pönengacäimpa. Ayæ, Wængongui bitö nāö entawēmi inte tæi emonte waa cæcæbiimpa, ante godömenque tæi piñænte entawēninque Abadäo wodi wede pönengacäimpa. ²¹ Edæ, Wængongui

nē tæi piñnongā inte, Cōwē cæcæboimpa, ante nē angaingā inte edæ cōwē cæcæcāimpa, ante Abadāo do ēñēninque edæ wede pōnengacāimpa. ²² Tōmengā mǎnōmaī wede pōnengā beyænque Wængongui, Abadāo bitō nō entawēmi imi abopa, angacāimpa.

²³ Mānīne, Bitō nō cæbi imi abopa, ante nānō angāine iñōmō wīi tōmengā beyænque yewæmongatimpa. ²⁴ Wæætē mōnō beyæ adobaī yewæmongatimpa. Edæ, Mōnō Awēnē Itota ingante Wængongui angā ñāni ōmæmongacāimpa, ante nē angaingā ingante wede pōnēmō iñōmonte Wængongui, Botō ayōmo mīnitō nō cæmīni imīni abopa, ante badongampa. ²⁵ Wēnæ wēnæ mōnō cædō beyænque mōnō Awēnē Itota ingante Wængongui pædæ godongā wængacāimpa. Ayæ mōnō beyæ ante cædinque tōmengā mōnō Awēnē Itota ingante, Bitō nē nō cædōmi inte ñāni ōmæmōmi beyænque tōmēnāni botō ayōmo nō entawēnāni bacædānīmpa, ante cædinque angā ñāni ōmæmongacāimpa.

5

Wængongui badongā ate mōnō nō cæmō bamompa

¹ Mōnō wede pōnēnō beyænque Wængongui pōnō badongā ate mōnō tōmengā ayongante edæ nō cæmō bamompa. Iñinque mōnō Awēnē Itota Codito nānō cægāinō beyænque Wængongui piyænē cæcā ate mōnō tōmengā tōnō godongāmæ gānē entawente quēwēmompa. ² Mōnō wede pōnēnō beyæ adocā Codito mōnō imonte pōnō ænte māmongā ate Wængongui waadete pōnō cædinque mōnō imonte ængampa. Ayæ Wængongui nē ñāō ēmongā weca ongōñōmō tōmengā pōnō badongā ate mōnō godongāmæ ñāō ēmonte mōnō watapæ bacæimpa, ante wede pōnēninque tomompa.

³ Ayæ wīi māninque beyæ tomompa. Iñæmpa, Waocā nānō wæntædāmaī inte ee cæquinque caate wæcampa, ante ēñēmō iñinque mōnō caate wæmō incæte caate mōnō wædō beyæ adobaī tomompa. ⁴ Ayæ nē wæntædāmaī inte ee cæmō adinque mōnō Wængongui ayongā nē waa cæmō edæ bamompa. Mānōmaī bamō iñinque mōnō, Watapæ bacæimpa, ante pōnente tomompa. ⁵ Mānōmainō ante nē pōnente tomō iñōmō edæ mōnō ænguēnēnō ante do æninque mōnō guingo imonte wædāmaī imompa. Edæ Wængongui tōmengā Tæiyæ Waēmō Ōnōwoca ingante da pōnōninque tōmengā nānō waadete pōnēnō adobaī do pōnongā æninque mīmōnē entawēmompa.

⁶ Edæ iīmāi impa. Mōnō aquīimō pōni inōmo inte, Ædō cæte cæmōō, ante wæyōmonte mōnō Codito iñōmō eyepæ pōni pōninque, Mīnitō Wængongui ayongante wīwa cæmīni imīnīpa, ante adinque wīwa mōnō cædō ante teēmente wæætē wængacāimpa. ⁷ Waocā guiquēnē wacā nē nō cædongā ingā adinque tōmengā beyæ wæætē dicæ wænguingāa. Incæte, Nē waa cædongā wæætē quēwęcæcāimpa, ante cædinque adocanque adocanque wabānō Ao ante tōmengā beyæ wæætē wæmāinānīpa. ⁸ Incæte, Wængongui mīnitō imīnite nanguī waadete pōnengampa, ante odōmoncæte ante cædinque mōnō Codito iñōmō nē wēnæ wēnæ cæmō iñōmonte mōnō beyænque wæætē wængacāimpa. ⁹ Codito wepæ mōnō beyæ pe tæ pe tæ wææ beyænque mōnō Wængongui ayongante nō entawēmō do batamompa. Codito mōnō beyæ mǎnōmaī wængaingā inte cōwē godōmonque cæcæcāimpa.

Āmo ēñēedāni. Wængongui nē piinte panguēnengā iñongante adocā Codito gā pe æmpote ængā beyænque Wængongui wæætē mōnō imonte edæ ata cæpocā quēwęcæmōimpa. ¹⁰ Mōnō edæ Wængongui tōnō mōnō godongāmæ

piincabo iñõmonte tõmengä Wengä mõnõ beyæ wæætë wængä beyænque mõnõ Wængongui tõnõ godongämæ piyænë cæmõ bagamõimpa. Mõnõ Wængongui tõnõ godongämæ piyænë cæmõ ininque tõmengä Wengä iñõmõ cõwë godõmenque cæcæcäimpa. Ämo eññedäni. Tõmengä adocä do wængaingä inte ñäni õmæmonte müingä quëwëninque mõnõ imonte ængä beyænque mõnõ wænämäi inte cõwë quëwëncæmõimpa. ¹¹ Ayæ mõnõ godõmenque iimainõ ante eñngæimpa. Mõnõ Awënë Itota Codito ængä beyænque Wængongui piyænë cæcä ininque mõnõ ñõwo Wængongui nempo quëwëninque edæ Itota Codito beyæ ante watapæ tomompa.

Tānocä Adäo wodi bai Codito adobai Tānocä ingampa

¹² Docä mæmæ adocanque tãnocä incæ eññänämäi cæcä ininque mõnõ wënæ wënæ cæpãmo inguipoga do pongatimpa. Ayæ tõmengä nãnõ eññänämäi cægainõ beyænque në wæwocacä bagacäimpa. Tõmengä wënæ wënæ cæcä ingaingä bai mõnõ tõmãmõ adobai në wënæ wënæ cæmõ imõ ininque edæ mõnõ waocabo tõmãmõ në wæwocamõ edæ do bagamõimpa. ¹³ Edæ wëenëñedë Mõitee wodi nãnõ wææ äñämäi iñedë incæ waodäni do wënæ wënæ cædäni ingadänimpa. Wënæ wënæ cædäni incæte Wængongui, Botõ wææ äñõ ante eññänämäi cæminipa, ante ædõ cæte apænte anguingä. Iñæmpa mäniñedë ayæ wææ äñämäi ingacäimpa. ¹⁴ Në Ponguingä, ante dodäni nãni në angaingä iñõmõ Tãnocä nãnõ ingai bai docä Adäo wodi adobai tãnocä ingacäimpa. Incæte Adäo wodi Wængongui nãnõ wææ äñõ ante eññänämäi cædinque wënæ wënæ cægacäimpa. Wæætë Wængongui edæ Mõitee wodi nãnõ quëwenganca wææ äñämäi iñongante Adäo wodi pæinãni guiquënë wënæ wënæ cædäni incæte tõmengä nãnõ eññänämäi cægai bai wii adobai eññänämäi cægadänimpa. Incæte tõmënäni në wæwocadäni inte wægadänimpa.

¹⁵ Incæte Wængongui nãnõ wææ angainõ ante adocanque nãnõ eññänämäi cægai bai Wængongui nãnõ põnongai iñõmõ wii adobai impa. Edæ adocanque nãnõ eññänämäi cægai beyænque nangui inäni inte wægadänimpa. Incæte Wængongui guiquënë nangui põni waadete põnõ cædinque Itota Codito ingante da põnongä põninque tõmengä adocanque inongä waadete eyepæ põni põnõ cæcä ate mõnõ nangui põni imõ inte quëwëmompa. ¹⁶ Onguiñængä adocanque wënæ wënæ nãnõ cægai beyæ në wæwocadäni bagadänimpa. Wængongui nãnõ põnongai iñõmõ edæ wii adobai impa. Adocanque nãnõ adopoque eññänämäi cægainõ ante adinque Wængongui tõmengä ingante apænte äninque edæ, Bitõ tente wæquinque impa, angacäimpa. Wæætë Wængongui nãnõ wææ angainõ ante eññänämäi wæætë wæætë cæmõ incæte tõmengä, Botõ ayõmo mini nõ entawënguinque impa, ante õnonque põnongä ænte entawëmompa.

¹⁷ Waocä adocanque incæ Wængongui nãnõ wææ angainõ ante eññänämäi cæcä ininque tõmengä adocanque nãnõ eññänämäi cægai beyænque mõnõ wæwocamõ do bagamõimpa. Wængongui guiquënë godõmenque eyepæ põni waadete põnõ badongä ate tõmengä ayongä mõnõ nõ entawëmõ bagamõimpa. Ininque Itota Codito adobai Adocanque iñongante mõnõ tõmengä nempo wæwocadämäi inte quëwëninque awënëidi bai badinque quëwëmompa.

¹⁸ Mãnõmäi beyæ adocanque adopoque eññänämäi cæcä beyænque Wængongui mõnõ tõmãmõ imonte apænte äninque, Mini wænguinque wënæ wënæ cæminipa, angampa. Ayæ adobai Adocanque adopoque nãnõ nõ cægainõ beyænque mõnõ Wængongui ayongä nõ cæmõ bamõ ininque Wængongui apænte äninque mõnõ tõmãmõ imonte, Mini quëwënguinque

mīnitō botō ayōmo nō entawēmīni bamīnipa, angampa. ¹⁹ Edæ adocanque nānō adopoque ēñēnāmaī cægāi beyænque mōnō nanguī imō incæ edæ nē wēnæ wēnæ cæmō bagamōimpa. Adobaī Adocanque nānō adopoque ēñente cægāi beyænque mōnō nanguī imō incæ edæ Wængonguī ayongā nō cæmō bagamōimpa.

²⁰ Mōnō waocabo wēnæ wēnæ cæyōmonte Wængonguī, Botō wææ ānō ēñēnāmaī inte cæmīnipa, ante edonque acæmīnipa, ante wææ angacāimpa. Wææ angā ate edonque adinque mōnō waocabo wæætē, Nanguī ēñēnāmaī inte cæte awædō, ante wæyōmonte Adocā incæ godōmenque nanguī waadete pōnō cæcā æmōmpa. ²¹ Īninque mōnō ēñēnāmaī cægāi beyæ mōnō nē wæwocamō bagamōimpa. Wæætē mōnō Awēnē Itota Codito waadete pōnō nō cæte badongā ate mōnō cōwē wænāmaī quēwēnguinque Wængonguī ayongā nō entawēmō bagamōimpa.

6

Codito nempo quēwēninque mōnō nē wīwa cædongā nempo wīi quēwēmōmpa

¹ Īninque mōnō æbānō angūī. Pancadāniya ĩmaī ānewēnānipa. Wængonguī godōmenque waadete pōnō cæcæcāimpa, ante cædinque mōnō godōmenque wēnæ wēnæ cæcæīmpa, ante tedewēnānipa. Mōnō ĩñōmō dicæ mānōmaīnō ante tedewenguēnēmō ĩmongaa. ² Īñæmpa ædō cæte mānōmaīnō ante tedewenguī. Wēnæ wēnæ mōnō cæte quēwēmāmo pædæ godōmo æninque Codito teēmē mongæninque wæñongante mōnō tōmēngā tōnō godongāmæ wænte baī ĩñōmo inte ædō cæte godōmenque wēnæ wēnæ cæte quēwenguī. ³ Mōnō Itota Codito nempo quēwēngæīmpa, ante æpænē guīdinque mōnō tōmēngā tōnō godongāmæ wængaimō baī batamōmpa, ante mīnitō ĩñōmō ēñēnāmaī ĩmīnitawo. ⁴ Tōmēngā wænte õñõñongante Mæmpo Wængonguī nē ñāo entawēnongā inte tæī emōnongā inte, Nāni õmæmōe, angā ñāni õmæmongacāimpa. Īninque mōnō ĩñōmō edæ, Codito tōnō ñāni õmæmonte baī mōnō mīimō quēwēngæīmpa, ante cædinque æpænē guīdinque tōmēngā wodido godongāmæ guīite baī wænte baī õñontamōmpa.

⁵ Edæ tōmēngā wængā ate godongāmæ wænte baī bagaimō ĩninque mōnō tōmēngā ñāni õmæmongā ate tōmēngā tōnō āāwocaque baī ewocate ñāni õmæmonte baī quēwēmāimōmpa. ⁶ Waocā nānō nē õ æñināni inte tōmēngā beyænque cæte nē quēwēnāni baī mōnō adobaī wēnæ wēnæ mōnō cædō beyænque wægāmōimpa. Mānōmaī inte wæyōmonte mōnō Codito ĩñōmō, Aamō cæte gocæmīnipa, ante cædinque wēnæ wēnæ cæte mōnō wentamō mongæñō õ ænte teēmē mongængantapa. Ee mongæñongante tōmēngā ingante awāa timpodāni wængā adinque baonque ante mōnō wēnæ wēnæ cæpāmo ĩñōmō ĩwente baī ba ĩninque mōnō do aamō cæte baī māñinō ante emō cæte gomōmpa. ⁷ Waocā æmæwo wængaingā inte edæ ædō cæte wēnæ wēnæ cæqingāā. Edæ tōmēngā nānō wēnæ wēnæ cægāinō ante emō cæte aamō cæte baī gogaingā ingampa.

⁸ Mōnō Codito tōnō āāwocaque baī ewocadinque adopoque wængaimō inte mōnō tōmēngā tōnō godongāmæ quēwēngæīmpa, ante wede pōnēmōmpa. ⁹ Edæ do wænte ñāni õmæmonte mīingā quēwēnongā inte Codito wæætē mempoğa wænguingā ĩnāmaī ingampa. Tōmēngā ñōwo wæwocadāmaī ĩñongante tōmēngā ingante, Wæmāwe, ante ædō cæte angūī. Īñæmpa, wænāmaī incæcāimpa, ante do ēñēmōmpa. ¹⁰ Tōmēngā adopoque wæninque mōnō wēnæ wēnæ cægāinō ante æmæwo wido cæcæte ante teēmē

mongænte wængacäimpa. Wæætê ñäni ömæmonte müngä quëwëningue tömengä, Wængongui beyænque cæte quëwencæboimpa, ante quëwengampa. ¹¹ Minitö adobaï Codito nempo quëwënömini inte wiwa mini cægäinö ante æmæwo wido cæcæte ante cædinque, Itota Codito tönö adopoque wængaimö ðompa, ante wæætê, Mönö Wængongui beyænque cæte quëwengæïmpa, ante pönëningue quëwëedäni.

¹² Mänömaï beyæ minitö, Baonga mönö ñömænguïñö quëwëningue mönö wënæ wënæ cæinënö ante mönö ëñente cædämaï ingæïmpa, ante nämä wææ aadinque edæ wënæ wënæ mini cæinëwënö ante edæ ëñënämaï inte quëwëedäni. ¹³ Ayæ minitö, Bado, ante edæ, Botö baonca wiwa cæcæïmpa, ante edæ minitö baö quïomë i inca wënæ wënæ cæquinque ante edæ godö cædämaï ðedäni. Wæætê do wæwocagaimini inte ñäni ömæmonte mümini quëwëningue minitö wæætê Wængongui ingante nämä godömini æncæcäimpa. Edæ, Botö baö inï edæ tömão Wængongui qui impa, ante pædæ godöningue mümini quëwëñöminite tömengä wæætê minitö tönö godongämæ cædinque nö pönï cæcæcäimpa. ¹⁴ Edæ Möitee wodi nänö wææ angäinö ante ëñëmini incæte wii mäninö beyænque quëwëminipa. Wæætê Wængongui waadete pönö cæcä beyænque quëwëmini inte minitö wënæ wënæ mini cæinëwënö ante ëñente cædämaï inte quëwencæminipa.

Wiwa mönö cæinëwënö ante mönö ëñënämaï ingæïmpa

¹⁵ Möitee wodi nänö wææ angäinö ante ëñente beyænque wii quëwëmö inte mönö Wængongui waadete pönö cæcä beyænque quëwëmompä. Näwangä impa. Ìnningue mönö æbänö cæquii. Wadäni inñomö idiquibæ ante pönëningue, Wængongui pönö cæcä beyænque në quëwënömö inte mönö wæætê wënæ wënæ cæcæïmpa, ante tedewëñänipa. Mönö inñomö ædö cæte mänömainö ante cæquimö.

¹⁶ Wacä ingante në cæte quëwëmini bacæte ante cædinque minitö, Bado, bitö botö awënë badinque edæ ämi ëñente në cæbo baboe, ämini inningue edæ mäningä minitö inñinite ö ængä ate tömengä beyænque cæte quëwëmaïminipa. Mäninö ante pönëminiyaa. Ayæ adobaï minitö wënæ wënæ cæinente mini wædö ante Ao ante cæmini inningue mini wænguinque edæ mäninö beyænque cæte në quëwëmini inte wæbaïminipa. Wæætê Wængongui ingante, Bado, bitö botö Awënë inñomi inte edæ ämi ëñente në cæbo baboe, äningue minitö nö cæte mini quëwëningue tömengä beyænque në cæmini babaïminipa.

¹⁷ Minitö doyedë mini wënæ wënæ cæinëwënouque ante cædinque minitö awënë beyænque cæte në quëwëmini baï ingamïnipa. Ñöwo guiquënë Wængongui nö nänö änö ante odömömöni ëñëningue minitö innonque ante edæ në ëñente cæmini baminitapa. Mänömaï bamïnipa, ante adinque botö Wængongui ingante waa ate pönëningue apænebopa. ¹⁸ Ayæ wënæ wënæ mini cædö beyænque cæte në quëwëmini inte wæyöminite Wængongui ñimpo cæcä ate minitö abæ tawænte ee gote baï quëwëminipa. Ñöwo wæætê tömengä nänö nö cædonque ante ëñente cæmini inningue minitö edæ në nö cædongä nempo quëwëningue tömengä beyænque cæte në quëwëmini bamïnipa.

¹⁹ Minitö önöminique inte æiquedö ædæmö ëñenguimïni, ante wædinque botö, Waocä nänö cæi baï impa, ante tededinque odömömo ædäni. Wëenëñedë wënæ wënæ cædinque godömenque quingämë baï quëwencæte ante minitö, Bado, ante quïomë inca mini baonga wiwa cæquinque pædæ godö cæminitapa. Mänömaï beyænque ëñënämaï mini cæinëwënö ante ëñente cædinque edæ minitö mäninonque ante në cæte quëwëmini ingamïnipa. Ñöwo guiquënë tæiyæ waëmö mini ewocate quëwëningue ante minitö baö inï edæ,

Wængonguī qui impa, ante tōmāo pædæ godōedāni. Ayæ mīni nō cæquinque ante edæ tōmengā beyænque nē cæmīni inte quēwēedāni. ²⁰ Wēēnēñedē iñōmō mīnitō wēnæ wēnæ mīni cæinēnō beyænque cæte nē quēwēmīni bai inte wægāmīnīmpa. Māniñedē mīnitō nē nō cædongā nempo quēwēnāmaī ingāmīni inte tōmengā nānō angainō ante edæ ēñēnāmaī ingāmīnīmpa. ²¹ Māniñedē quingāmē bai mīni cægāinō ante pōnente wædinque mīnitō ñōwo iñōmō guingo imonte bamīnīpa. Edæ mānīnō mīni wīwa cægāinō beyæ ante dicæ watapæ tote bamīniyaa. Iñæmpa edæ mīni wænguinque mānōmaī cægāmīnīmpa.

²² Ñōwo guiquēnē, Wēnæ wēnæ mīni cæinēwēnō ante idæwaa ēñencæmīnīmpa, ante cædinque Wængonguī gā pe æmpote ængā ate mīnitō abæ tawænte bai Wængonguī nempo wæætē ee pongāmīnīmpa. Iñinque nē gā pe æmpocā nempo quēwēnīnque mīnitō tōmengā ingante cæte nē quēwēmīni inte mīni cōwē wænāmaī quēwenguinque tæiyæ waēmō ēwocāmīni bamīnīpa. ²³ Mōnō waocabo mōnō wēnæ wēnæ cædō beyæ ante paga cæte bai cædinque Wængonguī mōnō imonte pōnō pangā wænguēnēmō imōmpa. Wæætē, Wantæpiyæ quēwencæmīnīmpa, ante adocā incæ mōnō Awēnē Itota Codito tōnō godongāmæ cædinque mōnō imonte ònonque pōnō ængā beyænque mōnō cōwē wænāmaī quēwēmōmpa.

7

Ēñente cæquēnēmō inte ñā cæyænte bai ingamōimpa

¹ Iñānāni ēñēedāni. Mōitee wodi nānō wææ ante yewæmongainō ante do adīmīni iīmīni incæte mīnitō iīmaī ante ēñēmīniyaa. Edæ, Ēñente cæedāni, ante tōmengā mīināni quēwēnānīnque Iñānite wææ ante yewæmongacāimpa. Iñinque wacō do wæningā iñongante, Cæe, āñōmō tōmengā mīingā ingampa diyæ cæqingāā. Edæ dobæ wængāimpa.

² Iīmaīnō ante pōnēedāni. Onquiyængā ingante ñānōnāni mongā ate tōmengā nānōogængā mīingā nānō quēwenganca onquiyængā iñōmō tōmengā nānōogængā ingante ēñente quēwencæcāimpa, ante wææ ante yewæmongatimpa. Wæætē edæ tōmengā nānōogængā wængā ate onquiyængā owæmpoingā inte adocanque quēwēñongante mānōmaīnō ante edæ ædō cæte wææ anguū. ³ Iñinque nānōogængā ayæ mīingā quēwēñongante onquiyængā wacā ingante godō guēa mongā adinque, Bitō nānōogængā mīingā iñongante bitō wacā ingante guēa godō mōmīpa tōō, ante pīinānīpa. Incæte tōmengā nānōogængā wængā ate abæ tawænte gote bai tōmengā adocanque quēwēñongante, Wacā ingante mōnāmaī incæbiimpa, ante ædō cæte wææ anguīnānīi. Do owæmpoingā inte wacā ingante mongā adinque tānocā quēwengampa diyæ wææ anguīnānīi. Edæ owæmpoingā inte tōmengā do mongampa.

⁴ Mānōmaī beyæ botō tōniñfamīni, Mōnō adobai imōmpa, ante āmo ēñēedāni. Ñānōnāni nē mōningā iñōmō ēñente cæquēnengā ingā bai mīnitō wēēnēñedē adobai Mōitee wodi nānō wææ angainō ante ēñente cæquēnēmīni inte ñā cæyænte bai ingāmīnīmpa. Mānōmaī inte wæyōmīnite Codito iñōmō, Mīnitō botō nempo quēwēnīnque waincate bai cæmīni badinque Wængonguī beyænque ante ēñente cæcæmīnīmpa, ante pōnō cægacāimpa. Tōmengā baonga ponte ēñadinque mōnō beyæ wæñinque ñāni òmæmongacāimpa. Iñinque mōnō tōmengā tōnō adobai wænte bai ingaimō inte mōnō wēēnēñedē mōnō ēñenguēnengainō ante edæ ædō cæte wæætē ēñenguēnēmō inguīmōō. Wæætē

edæ nē ñāni òmæmongaingā nempo quēwēnōmo inte mōnō tōmengā quimō inōmō imōmpa.

⁵ Doyedē iñōmō mōnō nē wæwocamō inōmō inte baonque ante pōnente mōnō quēwēñedē Mōitee wodi nānō wææ angainō ante ēñente wædinque godōmenque wīwa cæinēwente wæmō batamōmpa. Īninqe mōnō baaca incate botō cædinque mōnō wænguinque wēnæ wēnæ cætamōmpa. ⁶ Wēēñēñedē wææ ānāni ate mōnō. Ædō cæte ēñente cæquī, ante ñā cæyænte bai wægaīmō inte mōnō edæ Codito tōnō adopoque wænte bai ñī cæyænte bai bagamōimpa. Ñōwo guiquēñē adopoque wængaīmō inte mōnō Mōitee wodi pedæne ante nānō wææ ante yewæmongainō ante wī ēñente cæquēñēmō inte abæ tawænte bai gomōmpa. Wæætē edæ Wængonguī Tæiyæ Waēmō Ōnōwoca beyæ quēwēmō inōmō inte mōnō tōmengā mīine nānō ānonque ante ēñente cæmō imōmpa.

Wēnæ wēnæ botō cædō beyæ ante wæbopa, ante

⁷ Īninqe æbānō ante anguimoo. Mōitee wodi, Wēnæ wēnæ cæquī, ante yewæmongacāimpa, ante botō dicæ antawogaa. Ædō cæte edæ mǎnōmaī anguī. Īñæmpa tōmengā wææ ānāmaī ingā bai botō, Quinō wēnæ wēnæ cæte ī, ante ēñēnāmaī incædōmōimpa. Botō edæ, Wacā quī æinente wæbo incæte botō ænāmaī inte ee abo inte waa cæbopa, ante pōnengaboimpa. Mōitee wæætē, “Wacā quī ante æinente wædāmaī īe,” ante wææ angā beyænque botō, Æ æinente botō wædō incæ wēnæ wēnæ impa, ante tæcæ ēñentabopa. Mǎnīnō ante ānāmaī ingā bai botō, Wēnæ wēnæ impa, ante ēñēnāmaī incædōmōimpa. ⁸ Īninqe nē wēnæ wēnæ cædōmo inte botō Mōitee nānō wææ angainō ante ōnōmoncaque ēñente ate botō quingāmē bai tōmancoo ante godōmenque æinente wætābopa. Edæ tōmengā wææ ānāmaī ingā bai mōnō wēnæ wēnæ cædō iñōmō edonque ināmaī inte edæ dæ ante bai incædōnīmpa.

⁹ Mōitee wodi wææ ante nānō yewæmongainō ante botō adāmaī imoyedē botō ōnonque wædāmaī quēwengaboimpa. Wæætē, Īmaī wææ ante yewæmonte ongōmpa, ante adinqe botō, Æ, wēnæ wēnæ cæbo imōpa, ante tæcæ ēñēninqe, ¹⁰ edæ nāñe wænte bai botō, Wæwocabo imōpa, ante wætābopa. Edæ, Īmaī cædinque quēwencæmīnīmpa, ante wææ ante nānō yewæmongainta adinqe botō edæ, Botō wænguinque wī ēñente cæbopa, ante tæcæ ēñēninqe wætābopa. ¹¹ Edæ Mōitee wodi wææ ante nānō yewæmongainta do adimo inte mǎnīnō ante ēñēnāmaī cædinque botō pante wænguinque wēnæ wēnæ cætābopa. Edæ, Ōnonque wēnæ wēnæ cæte tocæī, ante wapiticæ pōnente cæyōmote tōmengā nānō wææ angainō ante odōmōnāni ēñēmō beyænque botō, Æ, botō wænguinque wēnæ wēnæ cæbopa, ante wægabōimpa.

¹² Wængonguī nānō wææ angainō iñōmō tæiyæ waēmō inepa. Ayæ Mōitee wodi adobāi mǎñine tæiyæ waēmō īnedō ante apænedinqe, Īmaī cæedāni, ante wææ āninqe, Mīni waa cæte quēwenguinque ēñente cæcæmīnīmpa, ante nōingā pōnī angacāimpa.

¹³ Īninqe tōmengā, Mīni waa quēwenguinque impa, ante nānō wææ angainō incæ botō imote ædō cæte wænonguī. Wængonguī wæætē, Quinō wēnæ wēnæ cæte ī, ante edonque acæmīnīmpa, ante pōnō waa cædinque, Mīnitō ēñēnāmaī imīni beyænque mīni wænguinque impa, ante wææ angacāimpa. Īninqe Wængonguī nānō wææ angainō beyænque botō iñōmō, Wēnæ wēnæ cægabōimpa, ante edonque atābopa.

14 Minitō tæiyæ wæmō ēwocæmīnīmpa, ante Wængonguī mōnō ōnōwoca beyænque ante wææ angacāīmpa, ante do ēñēmōmpa. Incæte botō wīwa cædōnō beyænque cæte nē quēwēmo inte botō edæ ōmæwocate bai inte wæbopa. 15 Edæ botō waa cæīnente wædō ante cædāmai inte botō wæætē edæ, Wīi cæīnente awædō, ante botō pīinte adō incæ edæ do cæte wæbopa. Īnīnque botō, Æbānō cæbo, ante ēñēnāmai Īmopa. 16 Wængonguī nānō wææ angainō ante ēñēnāmai cæbo incæte botō ēñēnāmai botō cædō ante wīi cæīnēmōmpa. Mānōmai botō wīi cæīnēnō beyænque botō, Wængonguī waa cæīnīnque wææ angacāīmpa, ante bai cæīnīnque tōmēngā nānō wææ angainō ante edæ Ao ante bai cæbopa. 17 Incæte botō wodi wīi tōmēmō ānō ante cæbopa. Wæætē edæ botō wīwa entawēnō beyæ wīi cæīnente botō wædō ante do ēñēnte cæīnīnque wæbopa. 18 Edæ ancaa waa cæīnente wæbo incæte botō dicæ waa cæbogaa. Mānōmai beyæ botō, Botō baonga quēwēnīnque botō waa cæquīnō ĩñōmō edæ dæ ampa, ante do ēñēmōmpa. 19 Waa pōnī botō cæīnēnō incæ cædāmai inte wæbopa. Wæætē edæ wēnæ wēnæ cæte botō wīi cæīnente wædō ante ancaa cæte wæbopa. 20 Īnīnque botō wīi cæīnēmō inte do cæbo ĩnīnque wīi tōmēmō cæbopa. Wæætē wīwa cæquīnīnque botō entawēnō beyænque edæ wēnæ wēnæ cæte wæbopa.

21 Waa cæīnente wæbo incæte botō wēnæ wēnæ cæquīnō edæ do entawente wæbopa. Īnīnque botō nā cæyænte bai Īmopa, ante do abopa. 22 Edæ botō Wængonguī nānō wææ angainō ante mīmōnē pōnēnīnque watapæ tobopa. 23 Incæte, Wængonguī nānō wææ angainō ante botō pōnēnō incæ ēñēnāmai ingæīmpa, ante botō edæ wade wææ ante entawente bai inte wæbopa. Īnīnque nāmā wææ ante bai mīmōnē botō pōnēnō tōnō wade, Ēñēnāmai ingæīmpa, ante wææ ante botō entawēnō tōnō nāēmæ guēadō guēa cæ bai inte wæbopa. Edæ mānīne beyæ wīwa botō cæquīnō entawēnīnque botō yæguīncamenca nā cæyænte bai inte wæwēmōmpa.

24 Edæ cætawente wænguī wæ. Botō wīwa cæquīnō entawente beyæ botō wænguīnō ēñate wæyōmote æcānō edæ æna beyænque quēwēmāīmoo, ante wæbopa. 25 Edæ, Itota Codito beyænque quēwēnguīmo Īmopa, ante botō Wængonguī ingante waa ate pōnente apænebopa. Īnīnque Wængonguī nānō wææ angainō ante ēñēnīnque botō tōmēmō mīmōno tōmēngā beyænque cæte nē quēwēmo ĩnōmō Īmopa. Incæte botō ēñayō beyæ botō wīwa cæīnēnō beyænque cæte nē quēwēmo inte wæbopa.

8

Wængonguī Ōnōwoca ingante ēwocate quēwēngæīmpa

1 Īnīnque mōnō Itota Codito nempo quēwēnīnque mōnō wīwa cæīnente wæwēnō ante cædāmai ĩnōmō inte wæætē tōmēngā Ōnōwoca pōnō angā ēñēnīnque cæte quēwēmō adīnque Wængonguī ĩñōmō, Mīnī wænguīnque, ante apænte ānāmai ingampa. 2 Edæ wīwa cæīnente mōnō wæwēnō ante mōnō wænguīnque ēñēnte cæyōmōnte Itota Codito ĩñōmō pōnō gā peyæmpote bai ō ængā beyænque mōnō abæ tawænte ee gote bai quēwēmōmpa. Ayæ tōmēngā Ōnōwoca nē quēwēnōngā nānō wææ ānō ante wæætē mōnō ēñēnte cæīnente quēwēmōmpa.

3 Edæ Mōītee wodi, Īīmai cæedāni, ante wææ āñongā mōnō ĩñōmō wīwa cæīnente mōnō wæwēnō beyænque aquīī pīñænāmai ēñadōmō inte, Mōnō ædō cæte ēñēnte cæquīī, ante wægamōīmpa. Mōnō waocabo mānōmai wēnæ wēnæ cædōmō inte wæyōmō Wængonguī wæætē, Waocā bacæcāīmpa, ante

tömengä Wengä ingante da pönongä pöninque mönō wīwa cæinintai bai adotai bai ēñate pægacäimpa. Ēñate pædinque tömengä nämä baō nānō ēñayō ante edæ, Wængonguī quī impa, ante pædæ godonte bai cædinque wënæ wënæ mönō cædō beyænque ante wængacäimpa. Mänōmaī cædinque Wængonguī mönitō imönite apænedinque, Mini wænguinque mīnitō baonga ēñadinque wënæ wënæ cæmīni awædō, ante apænte angacäimpa. ⁴ Mänōmaī pönō cædinque tömengä, Wīwa cæinente mīni wæwënō ante ēñente cædāmaī inte mīnitō ñowo wæætē botō Önowoca ingante ewocadinque tömengä beyænque quëwëminipa. Īninque nō pōni botō wææ angainō ante tömänō ante ēñëninque nō cæte quëwëncæmīnipa, ante cægacäimpa.

⁵ Adopoque ēñadinque baonque nē ēñadāni guiquënë wīwa cæinente nāni wæwënō ante pönente cædānipa. Mempoga ēñadinque Wængonguī Önowoca ingante nē ewocadāni guiquënë tömengä nānō änonque ante pönente cædānipa. ⁶ Wīwa cæinente nāni wæwënō ante cæcæte ante nē pönëwënāni guiquënë tömënāni nāni wænguinque māninō ante pönëwënānipa. Wæætē Wængonguī Önowoca angä ēñente nē pönënāni guiquënë tömënāni nāni gänē entawente quëwënguinque edæ mänōmaī pönënānipa. ⁷ Waodāni wīwa nāni cæinente wæwënō ante cæcæte ante nē pönëwënāni ĩñōmō edæ Wængonguī ingante pīinte cædānipa. Wængonguī nānō wææ äno ante tömënāni önömoncaque ēñënāni inte edæ wīi ēñente cædānipa. Īñæmpa tömengä Önowoca ingante ewocadānipa diyæ ēñente cæquīnānii. ⁸ Wīwa cæinente nāni wæwënō ante cæcæte ante nē cædāni ĩñōmō, Wængonguī waa acæcäimpa, ante ancaa cædāni incæte Wængonguī wæætē edæ waa todāmaī incæcäimpa.

⁹ Mīnitō guiquënë Wængonguī Önowoca ingante ewocamīni ĩninque edæ wīwa cæinente mīni wæwënō ante cædāmaī inte quëwëmīni ĩmaimīnipa. Wæætē edæ tömengä Önowoca angä ēñente cæte quëwëmaimīnipa. Incæte waocä æcāmenque incæ Codito Önowoca ingante ewocadāmaī ingä ĩninque tömengä wæætē Codito nempo quëwënāmaī ĩmaingampa. ¹⁰ Mīnitō guiquënë Codito ingante entawëmīni ĩninque wënæ wënæ mīni cægāinō beyænque mīnitō baō incæ tömengä tönō adopoque wænte bai ēñaminipa. Incæte Codito nānō nō cædōnō entawëmīni inte mīnitō önowoca mempoga ēñate bai mīiwoca ewocamīnipa. ¹¹ Itota ingante Wæmpocä, Nāni ömæmōe, angä ēñëninque ñāni ömæmongacäimpa. Ayæ mīni baō ñömæintai ēñayōmīnite tömengä Önowoca pō guidinque quëwengä ĩninque Wæmpocä wæætē mīnitō imīnite, Nāni ömæmōe, ante adobaī angä ñāni ömæmoncæmīnipa. Edæ tömengä Önowoca mīni nē ewocadongä tönō tömengä pönō cæcä ate mīnitō baō incæ ñömænāmaī intai bacæimpa.

¹² ĩninque botō tönĩñamīni ēñëedāni. Wængonguī Önowoca angä ate mönō ēñente cæquënëmö ĩmōmpa. Wæætē wīwa cæinente mönō wæwënō ante wīi ēñente cæte quëwënguënëmö ĩnōmō ĩmōmpa. ¹³ Īñæmpa wīwa cæinente mīni wæwënō ante ēñente cæmīni ĩninque mīni æmæwo wænguinque cæbaimīnipa. Wæætē Wængonguī Önowoca ingante ewocadinque mīnitō wīwa mīni cædinō ante wido cæmīni ĩninque mīni quëwënguinque ĩmaimpa.

¹⁴ Adānidō ĩnānite Wængonguī Önowoca tōō æmænte angä ate ēñente goda ĩñōmō tömënāni ĩñōmō edæ Wængonguī wënāni ĩnānipa. ¹⁵ Mīnitō guīñente mīni wægāinō beyænque ñā cæyænte bai nē quëwëngaimīni inte ñowo wæætē Wængonguī Önowoca ingante æninque wīi adobaī guīñente

wæmīni īmīnīpa. Wæætē Wængonguī Ōnōwoca pōnō cæcā beyænque mīnitō nāwā wēmīni bamīnīpa. Ayæ tōmengā Ōnōwoca pōnō cæcā ænte ēwocadinque mōnō guīñēnedāmaī inte edæ, Mæmpo, botō Wæmpo, ante apænemompa. ¹⁶ Edæ mōnō mīmōnē ponte apænedinque Wængonguī Ōnōwoca incæ, Bitō Wængonguī nāwā wēmi īnōmi īmīpa, ante apænecampa. ¹⁷ Īnīnque mōnō Wængonguī wēmō īnōmō inte tōmengā nānō pōnonguincoo nē ænguīmō īmōmīpa. Edæ Codito tōnō āanque baī caate wæmō īnīnque mōnō tōmengā ñāō baī nānō ēmō baī ñāō adobaī ēmōnīnque tōmengā tōnō edæ godongāmæ ænguīmō īmaīmōmīpa.

Ñāō baī mōnō entawenguīmāmo

¹⁸ Botō īmaī ante pōnēmōpa. Ñōwo caate mōnō wæpāmo īñōmō pōnōmenque īñonte īncayæ ate ñāō baī mōnō ēmonguīmāmo guīquēnē wīī adobaī wædænque inte godōmenque nanguī pōnī ingæīmpa. ¹⁹ Eyedēnō Wængonguī wēnāni tæī ēmonte badinque edonque a ongonguīnānī, ante acæte ante edæ Wængonguī nānō badongaincoo incæ nanguī aīnente wædinque wānō conte baī ongoncoopa. ²⁰ Edæ wēnæ wēnæ cædāmaī incoo īñonte mōnō waocabo mōnō ēñēnāmaī cægālnō beyæ Wængonguī nānō badongaincoo ōnoncooque baī bagatīmpa. Wīī nāmā ānō beyæ mānōmaī bagatīmpa. Wæætē Wængonguī nē, Īncayæ ate watapæ bacæīmpa, ante angaingā inte adocā angā beyænque ōnoncooque baī bagatīmpa. ²¹ Edæ Wængonguī nānō badongaincoo ñōmænguīncooque inte yæguīncamenca ñā cæyænte baī wæyoncoote Wængonguī gā pe æmpote baī godō cæcā beyænque ñōmæñāmaī īnguīncooque bacæcoīmpa. Mōnō Wængonguī wēñæmō īñōmonte tōmengā pōnō ñīmpo cæcā ate mōnō abæ tawænte baī tæī ēmonte bamō baī tōmengā nānō badongaincoo adobaī abæ tawænte baī mīincooque bacæcoīmpa. ²² Wēñæ nantate, Æīquedō ēñaquingāā, ante nāni wæ baī Wængonguī nānō badongaincoo incæ ñōwo ganca godongāmæ nantate baī, Æīquedō waa baquīī, ante ō ō wæconcoopa.

²³ Ayæ Wængonguī mōnō īmonte mā pōnōnīnque tōmengā Ōnōwoca īngante pōnongā ænte do ēwocamō īnōmō inte mōnō adobaī, Mōnō baō mīñō ēñaquinque æīquedō Wængonguī wēñæmō ædæmō baquīī, ante nanguī æīnente wānō conte ō ō wæmōmīpa. ²⁴ Edæ Codito, Botō īncayæ ate badōmo ate watapæ bacæīmpa, ante pōnēedāni, ānīnque mōnō īmonte edæ ængā beyænque quēwēmōmīpa. Īnīnque mānīnō edæ, Watapæ bacæīmpa, ante nānō angāīnō īñōmō īnīnque ba acæte ante mōnō ayæ wānō cōmōmīpa. Mānīnō watapæ do ba amō baī mōnō, Ayæ ate watapæ ba acæīmpa, ante ānāmaī īncēdōmōīmpa. Waocā do ænīngā inte, Æīnente wæbōpa, ante quīnante angūingāā. Īñæmpa edæ dobæ ængantapa. ²⁵ Īnīnque mōnō æīnente wædō ante mōnō cōwē ængæīmpa, ante wede pōnēmō īnīnque mōnō wæntædāmaī inte ee wānō cōmōmīpa.

²⁶ Ayæ adobaī mōnō aquīmō pōnī īñōmonte Wængonguī Ōnōwoca mōnō beyæ cæcampa. Æbānō cæte Wængonguī īngante apænequīī, ante ēñēnāmaī inte wæyōmonte tōmengā wīī waomō tededō ante apænedinque tōmengā ōnōwēnenque mōnō beyæ apænecampa. Mānīnō tōmengā nānō tededōnō ante mōnō guīquēnēnō inte ōnōneca ædō cæte tedequīī. ²⁷ Mōnō Wængonguī quīmō tæiyæ wæmō ēwocamō īñōmonte Wængonguī Ōnōwoca īñōmō mōnō beyæ apænedinque, Mæmpo Wængonguī nānō angāīnō baī bacæīmpa, ante pōnēnīnque apænecampa. Īnīnque mōnō mīmōno do adongā inte Mæmpo

Wængonguï iñömö edæ, Botö Öñöwoca æbänö pönëningue apæñecää, ante do eñngampa.

Në tæi emöningue mönö gänä cæmö imompa, ante

²⁸ Wængonguï, Botö äñö bai iinque bacæimpa ante cæcæminimpa, ante mönö imonte aa pegacæimpa. Iinque tömengä nänö äñö bai në cæmö inte mönö tömengä ingante waadete pönëmö iñömönte Wængonguï wæætë mönö beyænque cöwë waa pönö cæcä ate mönö edæ, Inguipoga æbämë ba incæte mönö waa pöni quëwëningue impa, ante edæ do eñëmompa. ²⁹ Doyedë badöningue Wængonguï iñömö, Botö Wengä Bamoncadengä iñongante iñäni tömengä biwliidi badingue nangui inäni yebænte bacædänimpa, angacæimpa. Iinque tömengä mänömaï cæcæte ante cædingue, Do botö në agäinäni iñömö tömëñäningue botö Wengä nänö entawënö bai adobai entawencædänimpa, ante badongacæimpa. ³⁰ Ayæ, Botö Wengä nänö entawënö bai entawencæminimpa, ante nänö në angäinäni iñönäñite do aa pegacæimpa. Ayæ tömengä nänö aa pegäinäni adodäni inäñite, Botö ayömo mñitö nö cæmini bacæminimpa, ante badongacæimpa. Tömengä ayongä nö cædäni në bagäinäni inäñite tömengä, Mñitö tæi emonte badingue ñäö bai emonte bacæminimpa, ante do badongacæimpa.

³¹ Iinque æbänö ante angüimoo. Edæ Wængonguï mönö tönö godongämæ cæcä iñongante æcänö mönö imonte bæ taquingää. Edæ dæ angampa. ³² Tömengä Wengä adocanque iñongante Wængonguï pæ gompodämaï inte da pönongä pöninque tömengä wæætë mönö tömäö beyæ teëmente wæætë wængacæimpa. Mäningä ingante da pönöningue Wængonguï tömengä nänö ëagaincoo ante ædö cæte pönönämaï inguingää. Edæ, Botö Wengä tönö godongämæ entawencæminimpa, ante Wængonguï tömancoo do pönongä æmompa. ³³ Wængonguï mönö imonte apænte ængä ongöñömönte æcänö, Wiwa cæbipa töö, ante apænte anguingää. Iñæmpa Wængonguï incæ, Botö ayömo mñitö edæ nö cæmini iminipa, ante badongä bamöimpa. ³⁴ Itota Codito në wængaingä inte godömenque ñäni ömæmongaingä inte Wængonguï tömëmæ inö do tæ contate a ongongampa. Ayæ mönö beyæ Wængonguï ingante cöwë apæñecampa. Tömengä mänömaï cæcä adinque mönö imonte æcänö, Bitö wænguingue, ante apænte anguingää. Iñæmpa wii eyepæ inäñipa.

³⁵ Codito mönö imonte waadete pönente aayongä æcänö gä pe æmpote ö ænguingää. Edæ, Ædö cæte cæquimöö, ante wæmö incæ caate wæwëmö incæ mönö imonte togente pänäni wæmö incæ mänömaï wæyömönte mönö Codito dicæ mäñiñedë edæ waadedämaï inguingää. Mönö wænguingue gue ænente wæmö incæ weocoo ömaamö inte wæmö incæ tömengä mönö imonte dicæ waadedämaï inguingää. Quiëmë beyæ, Mñi wænguingue, ante wææ äñäni wæyömönte yaëmenca tacadäni wæyömönte Codito mäñiñedë dicæ waadedämaï inguingää. ³⁶ Edæ Wængonguï ingante ämotamñi ante bai yewæmongatimpa.

“Bitö beyænque wænönäni wængui wæ, ante

mönitö tömää itædë wæmönipa.

Obegaidi inäñite, Wænongæimpa, ante äñäni bai,

mönitö imönite adobai, Wænongæimpa, ante piñäni wæmönipa,”

ante yewæmonte ongö aedäni.

³⁷ Edæ mäñinämo mönö wæpämö tömämämo pö ate wædömö incæte mönö imonte në waadete pönengä nempo ongöningue mönö tæi emonte godömenque gänä cæte ongömompa. ³⁸ Botö do eñente pönëmopa. Mönö

nē waadete pōnengā nempo ongōñōmonte mōnō wænguimāmo incæ mōnō quēwenguimāmo incæ anquedoidi incæ wēnæidi incæ ñōwopāmo incæ ñincayæ ponguimāmo incæ tæi nāni piñæmāmo incæ mānimāmo tōmāmāmo ædō cæte mōnō ñmonte gā pe æmpote ö ænguī. ³⁹ Ayæ edæ æibæ mōnō æite wæquimāmo incæ guilbæ mōnō wæænte wæquimāmo incæ quiemē Wængonguī nānō badongaimāmo incæ mānimāmo tōmāmāmo ññōmō mōnō Codito nempo ongōñōmonte ædō cæte gā pe æmpote ö ænguī. Edæ Wængonguī nānō waadete pōnēnō entawēninque mōnō Awēnē Itota Codito ññōmō mōnō ñmonte waadete pōnēninque pæ gompyongante mānimāmo tōmāmāmo incæ gā pe æmpote ö ænāmaī ingæimpa. Åmo ēñēmāimīnīpa.

9

Idægoidi ñnānite Wængonguī apænte angacāimpa, ante

¹ Botō ññōmō edæ mīmō entawēmo inte nāmā apænte pōnēñōmote Wængonguī Tæiyæ Waēmō Öñōwoca adoyōmō ante apæncā ñinque botō ædō cæte babæ wapiticæ anguimoo. Edæ Codito nempo quēwēnōmo inte botō nō pōni apænedinque ñmaī āmopa. ² Mīmōno cōwē cæwēnente wæwēmo inte botō ñmaī ante pōnēninque nanguī wæbopa. ³ Botō guidēnāni botō tōnō adodāni ññōnāni ññōnānite Wængonguī ængā beyæñque quēwencædānīma, ante botō nanguī āninque wæbopa. ñinque Wængonguī tōmēnāni ñnānite, Quēwencæmīnīma, ante æninque wæætē botō Codito nempo quēwēñōmote botō ñmote piñinque tatodonte wido cæcā baī botō Ao ante piyænē cæcædōmoimpa.

⁴ Tōmēnāni ññōmō idægoidi ñnānīpa. Wængonguī pæpogacā pædāni ñinque tōmēnānique tōmengā wēnāni ingadānīma. Tōmēnāni ñnānite Wængonguī ññō entawente nānō tæi ēmōnō ante odōmongā adinque tōmēnānique nē agāñnāni ñnānīpa. Tōmēnāni ñnānite apænedinque Wængonguī, Botō pōnō cæbo ate mīnitō Ao āmīni ñinque mōnō godongāmæ waa cæcæimpa, ante cægacāimpa. ñmaī cæedāni, ante tōmengā tōmēnāni ñnānite tāno wææ angā ēñente māññō nānō wææ angāñnō ante tōmēnānique nē mangāñnāni ñnānīpa. Wængonguī oncōnē ñænæncōnē wadāni guidāmaī ññōnānite idægoidique guite tōmengā ingante waa ate ædæ wæænte apænedānīpa. Tōmēnānique ñnānite Wængonguī, Cōwē waa cæcæboimpa, ante mā apænegacāimpa. ⁵ Mōnitō, Mæmæidi, ante mōni nē angāñnāni incæ idægoidi mæmæidi adodāni ñnānīpa. ñinque tōmēnāni Pæingā badinque mōnō Codito inguipoga ēñagacāimpa. Tōmengā ññōmō tōmāmō Wængonguī ñnongā ingampa, ante adinque mōnō tōmengā ingante apænedinque, Tōmēmi toquinque pōnō waa cæbi æmōnīpa, ante mōnō cōwē ñimpo cædāmaī apæncæimpa. Māñōmaī impa, ante botō, Amēē, āmopa.

⁶ Idægoidi quēwencædānīma, ante nānō angāñnō baī Wængonguī cædāmaī ingacāimpa, ante botō dicæ āmogaa. Wæætē edæ ñmaī impa. Nāwā idægoidi nāni wede pōnēnō baī pancadāniya pōnēnāmaī ñnāni ññōnānite botō tōmēnāni ñnānite, Nāwā idægoidi ñnānīpa, ante apænedāmaī ñmopa. ⁷ Edæ Abadāo wodi pæññāni incæ pancadāniya ññōmō, Abadāo wodi wēnāni, mōnō āññōnāni wīi ñnānīpa. Wæætē, “Botō ayōmo Itæca wēnānique bitō pæññāni inguññāni ñnānīpa,” ante mæmæ Abadāo ingante Wængonguī angampa, ante yewæmōngatīma. ⁸ Māñōmaī ñ ñinque Abadāo tapæicā nē ēñate pædāni ñnānite Wængonguī, Abadāo wēnāni, ante angantawogaa. Wæætē Abadāo wodi ingante apænedinque, Bitō wēnāni bacædānīma, ante Wængonguī nānō nē angāññāni guiquēnē tōmēnānique tōmengā wēnāni ñnānīpa. ⁹ Edæ, “ññedē

impa, ante botö änoñedë botö adodö pömo ate mäniñedë ate edæ Tada incæ wëñængä onguiñængä ingante mancæcäimpa,” äninque Wængongui, Mäninö botö äno bai cöwë cæcæboimpa, angacäimpa.

¹⁰ Wii mäninque impa, ante eñengæimpa. Godömenque iimaï ante mönö pönengæimpa. Wæmpocä adocanque tapæicä ate Adebeka wodi wëna äancadënaque eñagadäimpa. Mänina wæmpocä iñömö mönö wæmæ Itæca wodi ingacäimpa. ¹¹ Tömënä wëna ayæ eñadämaï iñedë ædö cæte wënæ wënæ cæquïnaa, ædö cæte waa cæquïnaa. Incæte edæ Wængongui, Ìngä ingante apænte æncæboimpa, ante nänö angainö ante cöwë bacæimpa, ante cædinque, ¹² tömëna ayæ cædämaï iñönte Wængongui nè aa pedongä inte, “Bamoncadengä incæ ayæmengä ingante nè cæcä incæcäimpa,” ante Adebeka wodi ingante apænegacäimpa. ¹³ Adobainö ante Wængongui beyæ yewæmongadänimpa. “Aacobo ingante waadete pönengboimpa. Etawoo ingante guiquënë piinte agaboimpa,” ante yewæmongatimpa.

¹⁴ Ìninque mönö æbänö anguii. Wængongui dicæ nö cædämaï ingantawogaa. ¹⁵ Wæætë Möitee wodi ingante apænedinque Wængongui iimaï angacäimpa. “Waacä adocanque ingante botö, Wii päinëwædö, äninque tömengä ingante do godö ñimpo cædinque pänämaï incæboimpa. Adocanque ingante nè waadete cæinëmo inte botö tömengä ingante do godö waadete waa cæcæboimpa,” angacäimpa, ante yewæmongatimpa. ¹⁶ Ìninque waocä nanguï cæinengä incæte waocä nanguï cæcä incæte Wængongui wii waocä nänö cædö beyænque apænte ængampa. Wæætë nämä nänö waadete waa cæinënö beyænque Wængongui waocä ingante godö apænte ængampa. ¹⁷ Edæ awënë Padaönö wodi ingante apænedinque Wængongui, “Botö iimaï ante cæcæte ante bitö ìmite ængö cætäbopa. Edæ bitö ìmite ængö cædinque tæi piñante pönö cæbo adinque waodäni, Wængongui tæi piñængä inte mänömaï cæcampa, ante botö ëmowo ante inguipoga tömäo apænedäni do eñencädänimpa, ante cætäbopa.” Wængongui mänömainö ante Padaönö ingante apæncantapa, ante yewæmongatimpa. ¹⁸ Ìninque Wængongui, Adocanque ingante godö waadete ñimpo cæcæboimpa, äninque tömengä ingante do godö waadete ñimpo cæcampa. Wæætë wacä ingante guiquënë, Godö cæbo ate mimö ömædengä bacæcäimpa, äninque Wængongui tömengä ingante do cæcä ate edæ mimö ömædengä bate wæcampa.

¹⁹ Mänömainö ante yewæmömo adinque bitö wabänö iimaï anguiimi, ante awædö. “Ìñæmpa mönitö Wængongui nänö äno ante Baa änämaï iñömönite tömengä, Minitö beyænque impa, ante quïnante piinte angää.” Mänömainö ante ämitawoo. ²⁰ Bitö iñæmpa önomique inömi inte Wængongui ingante wæætedö wæætë ämii. Nè badongä ingante tömengä nänö nè badöinca incæ dicæ, “Botö ìmote quïnante mänömaï badöwëmmii,” ante dicæ anguii. ²¹ Nè bædongä iñömö daiö pancaiya æninque waa pönï wamocade bædinque ado daiö pancaiya æninque önonque ewinguincade bæyongante æcänö nè bædingä ingante Baa anguingää. Nè bædongä iñömö nè änogä inte bæcampa. Edæ Baa anguiimii.

²² Wængongui nänö nè piinäni iñömö tömënäni nani ömæte ewente wæquinque wiwa cæyönänite tömengä piyænë cædinque wantæpiyæ pänämaï inte ee ongongantawo. Ìñæmpa tömengä nänö piimämo ante adinque do wæcädänimpa, ante cædinque ayæ tömengä nänö tæi piñæmämo ante edonque acædänimpa, ante cædinque Wængongui mänömaï ee ongongä apa anewëe. ²³ Ayæ wæætë, Botö waadete godö waa cæbo ænäni inte edæ tömënäni iñömö botö ñäo bai

botō ēmōnō ante acædānimpā, ante cædinque Wængonguī mǎnōmaī pǎnāmaī inte edæ ee cæcampa. Wæætē, Tōmēnāni nǎo iñōmō quēwencædānimpā, ante tōmengā godō badongā ate tōmēnāni nǎo bai ēmōnānīpa. ²⁴ Edæ mōni oodeocabo iñōmōnīte mīnitō oodeomīni ināmaī iñōmīnīte Wængonguī mōnō tōmāmō imonte mǎnōmaī cæcæte ante aa pegacāimpā. ²⁵ Wængonguī iīmaī angampa, ante Ootea wodi yewæmongacāimpā.

“Botō guīdēnāni ināmaī iñōnānīte botō wæætē,

Botō guīdēmīni, ante apænecæboimpā.

Onquiyængā botō nē waadedāmaī ingainga iñongante botō wæætē,

Botō nē waadebi imīpa, ancæboimpā.

²⁶ Ayæ, ‘Botō guīdēmīni ināmaī imīnīpa,’ ante botō ongonte āñōmō adoyōmō ongōnīnque

botō wæætē edæ, ‘Botō Wængonguīmo nē Quēwēmo wēmīni imīnīpa,’ ancæboimpā.”

Ante adocā Wængonguī nānō ānō ante yewæmongacāimpā. ²⁷ Idægoidi inānitēdō ante yedæ ānīnque Itaiya wodi iīmaī apænecacāimpā. “Gāwapæ wedeca ēmōnaicoo nanguī pōnī ōñō bai idægoidi adopodāni nanguī pōnī ināni incæte pancadāniya guiyā wææntodōnī bai mǎnimpodānīque quēwencædānimpā. ²⁸ Edæ Wængonguī, Inguipoga quēwēnāni inānīte apænte ānīnque botō angainō bai do edæ cæcæboimpā, ante nē apænecacāimpā,” ante Itaiya wodi yewæmongacāimpā. ²⁹ Adocā Itaiya wēēnē iīmaīnō ante nānō apænecacāimpā bai impā.

“Mōnō Awēnē nē Tæiyæ Awēnē tæī piñængā inte dodāni inānīte, Mīnitō pæināni yebænte nanguī ināni bacædānimpā, ante cædinque pancadāniya inānīte ata cæpocā quēwengadānimpā. Mǎnōmaī ante cædāmaī ingā bai,

mōnō wæætē Todōmā quēwengaināni bai dæ badīnque Gōmoda nāni quēwēñōmō dæ ba bai mōnō adobaī edæ dæ bacædōmōimpā,” ante nānō angainō bai impā.

Idægoidi adobaī pōnēnīnque quēwenguēnēnāni inānīpa

³⁰ Inīnque æbānō ante anguīī. Oodeo ināmaī ināni guīquēnē, Nō entawēmōni bacæmōnimpā, ante ānāmaī ingadānimpā. Incæte Wængonguī godō cæcā beyænque tōmēnāni wede pōnēnīnque wede nāni pōnēnō beyænque Wængonguī ayongā nō entawēnāni do badānīpa. ³¹ Idægoidi guīquēnē, Nō cædāni, ante mōni wææ angainō beyænque nō entawēmōni bacæmīnimpā, ante nē angaināni inte eyepæ cædāmaī inānīpa. ³² Quīnante eyepæ cædāmaī inānīi. Tōmēnāni wede pōnēnāmaī ināni inte wæætē edæ, Mōnō nanguī cædinque nō cæmōni bacæmōnimpā, ānīnque oda cæte nāni pōnēnō beyænque dicaboga tee tēwate bai cædinque eyepæ cædāmaī ingadānīpa. ³³ Edæ do Wængonguī beyæ yewæmongatimpā.

“Aquēnē quēwēnānīi. Botō Codito ingante Tiōno nāni quēwēñōmō dica bai gō cæbo gongængā adīnque edæ

waodāni dicaboga tee tēwate bai pōnēnāmaī ināni inte tæ go wææncædānimpā. Tōmengā adocā ingante nē pōngā guīquēnē cōwē edæ guingo imōnāmaī inte quēwencæcāimpā,”

ante yewæmongatimpā.

10

¹ Botō tōnīnāmīni ēñēedāni. Idægoidi quēwencædānimpā, ante botō mīmōnē nanguī aīnente wædinque Wængonguī ingante apænedīnque botō, Bitō æmi

beyænque quëwencæðänimpa, ante cöwë apænebopa. ² Wængongui beyæ nõ cæcæimpa, ante cæinente wæðänipa, ante näwangä impa. Incæte tömëñani, Wængongui beyæ nõ cæcæte ante æbänö cæquü, ante ëñëñamaï inäni inte önonque cæte wæðänipa. Botö, Mänömaï impa, ante në apænebo inömo impa. ³ Edæ Wængongui pönö badongä ate mönö tömengä ayongä nõ entawëmö bamompa, ante ëñëñamaï inäni inte idægoidi inömo, Nämä mönö cæðö beyænque nõ cæmö bacæimpa, ante cædinque edæ oda cægadänimpa. Mänömaï cædinque tömëñani Wængongui nänö nõ cægainö ante edæ Baa angadänimpa. ⁴ Nö cæmö bacæte ante Wængongui nänö wææ angainö ante ëñente cæquëñemö inte mönö tömämö wü eyepæ inte wægamöimpa. Mänömaï inte wæyömonte Codito inömo, Mini pönencabo Wængongui ayongä nõ entawëmini bacæminimpa, ante cædinque mäninö Wængongui nänö wææ angainö ante tömännö ante inque cægacäimpa. Inique tömengä mänömaï inque cæcä adinque Wængongui mönö imonte wæætë wææ änamaï ingampa.

⁵ Iïmaï cæedäni, ante botö wææ angainö ëñente cædinque nõ cæðäni badänipa, ante Möitee wodi iïmaï ante yewæmongacäimpa. “Në ëñente cæcä inömo tömengä nänö ëñente cæðö beyænque quëwencæcäimpa,” ante yewæmongacäimpa. ⁶ Wæætë, Mönö wede pönencabo æbänö cæte Wængongui ayongä nõ entawëmö imö, ante iïmaï ante adocä yewæmongacäimpa. “Bitö, ‘Æcänö öönæðë æi ãñete wæænguingää,’ ante nämæneque änamaï ie.” Mänömaï ante tömengä, Codito ingante æi ãñete wææncæte ante mönö pönëñamaï ingæimpa, ante ancæte ante yewæmongacäimpa. Inæmpa Codito pönämaï ingampa diyæ æite mäwæmi wæænguingää. Dobæ edæ inguipoga pongacäimpa. ⁷ “Ayæ, ‘Æcänö tadömengadæ wæi ãñete ænguingää,’ ante änamaï ie.” Inæmpa Codito ayæ öñongampa diyæ wæite mæmi æænguingää. Edæ Codito dobæ ñäni ömæmte quëwengampa.

⁸ Inique, Mönö wede pönencabo æbänö nõ cæmö bamö, ante æbänö ante yewæmongacäi. Edæ, Wede pönengæimpa, ante mönitö apænemöni mini ëñëñine ante adode ante iïmaï ante yewæmongacäimpa. “Wængongui nänö nõ änöne inömo edæ bitö weca eyequei pöni ënepa. Edæ bitö önöne tedeyömi bitö mimöno pönëñömi tömengä nänö nõ änöne edæ adoyömo pöni ënepa.” ⁹ Æbänö cæte quëwenguü, ante iïmaï ante ënepa. Itota Codito Tæiyæ Awënë inongä ingampa, ante bitö önöneca apænedinque, Itota Codito wænte öñöñongante Wængongui angä ñäni ömæmongacäimpa, ante bitö mimöno pönëmi adinque tömengä ængä beyænque quëwencæbiimpa, ante adode incæ ënepa. ¹⁰ Mimöno edæ wede pönëninque mönö Wængongui ayongä nõ entawëmö bamompa. Mänömainö ante wede pönëmopa, ante önöneca apæneyömonte tömengä ængä beyænque mönö quëwëmopa.

¹¹ Codito ingantö ante apænedinque, “Tömengä ingante në wede pönengä inömo tömengä edæ guingo imönämaï incæcäimpa,” ante Wængongui angä ëñente yewæmongadänimpa. ¹² Edæ mönitö oodeomöni inömonite munitö wæætë oodeomöni inämaï inöminite mönö tömämö imonte adinque mönö Awënë inömo edæ, Adoyömo pöni iminipa, ante acampa. Inique tömengä adocä tömämö Awënë inongä ingampa. Ayæ tömengä ingante aa pemö ëñëñinque tömengä inömo edæ tömämö imonte nangui pöni pönö cæcä æmompä.

¹³ Iïmaï ante Wængongui beyæ ante yewæmongatimpa. “Möno Awënë ëmowo ante apænedinque aa pedäni ëñëñinque mönö Awënë inömo edæ tömëñani tömännäni inänite ængä beyænque quëwencæðänimpa.” ¹⁴ Inique

tömengä ingante nē pōnēnāmaī ināni iñōmō ædō cæte tömengä ingante aa pequīnānii. Ayæ tömengä emōwo ante eñēnāmaī ināni iñōmō tömengä ingante ædō cæte pōnenguīnānii. Ayæ tömengä emōwo ante wadāni gote apænedāmaī iñōnāni tömēnāni ædō cæte eñenguīnānii. ¹⁵ Ayæ edæ wadāni da godōnāmaī iñōnāni nē apænequēnēnāni wæætē ædō cæte gote apænequīnānii. Iīmāinō ante edæ Wængonguī beyæ ante yewæmongatimpa. “Tömengä waa pōni nānō cægāinō ante nē watapæ apænedāni iñōmō tömēnāni nāni apænece gote cægōniwa iñōmō edæ waa pōni ewadānipa,” ante nāni yewæmonte angāinō baī impa. Edæ nē apænece godāni inānite Wængonguī waa acampa.

¹⁶ Mōnō Awēnē ingantedō ante watapæ apænedāni eñēninqe idægoidi pancadāniya Ao angadānimpā. Pancadāniya guiquēnē Baa angadānimpā. Tömēnāni mānōmāinō nāni cædinō ante Itaiya wodi iīmāi ante yewæmongacāimpā. “Awēnē Wængonguī eñēmi. Mōnitō apænēmōni tömēnāni nāni eñēnō ante edæ æcānō eñēnte pōnengā. Iñæmpa nē pōnengā iñōmō edæ dæ angā awædō,” ante yewæmongacāimpā. ¹⁷ Iñinqe gode ānāni ate nē eñēnānique wede pōnēnāni badānipa. Ayæ Codito nānō ānōnō ante gode ante apænedāni beyænque nē eñēnāni badānipa. ¹⁸ Iñinqe botō, Māninō ante idægoidi gobæ ongōnānipa diyæ eñēnāmaī inguīnānii, āmopa. Do eñēnānitapa, ante edæ iīmāi ante Wængonguī beyæ yewæmongatimpa.

“Nē apænedāni inguipoga tōmāo gote tededāni eñēnānipa. Waodāni inguipoga nāni quēwenganca quēwēñōnānite māninō tömēnāni nāni apænedō ante do eñēnānipa,” ante yewæmongatimpa.

¹⁹ Ayæ wæætē, Idægoidi ōnōmonca eñēninqe ōmæcadāni inānipa diyæ eñēnāmaī inguīnānii. Do eñēnānitapa. Edæ Mōitee wodi incæ iīmāi ante yewæmongacāimpā.

“Wadāni ōnōnānique iñōnānite botō godō waa cæbo adinqe mīni idægocabo wæætē, Mōnitō imōnite wīi pōnō cæbii, ante piinte wæcæmīnimpā.

Ayæ wadāni ocāi ōmæcadāni iñōnānite botō godō waa cæbo adinqe mīnitō wæætē nē piinte amīni bacæmīnimpā,” Ante cæcæte ante Wængonguī pōnō cægacāimpā. ²⁰ Itaiya wodi guiquēnē Wængonguī beyæ ante guīñēnāmaī inte apænegacāimpā.

“Wadāni iñōmō botō imote ante diquī diquī mīnāmaī ināni incæte do adānitapa. Ayæ, Wængonguī ingante ainēmōnipa, ante ānāmaī iñōnānite, Botō imote aedāni, ante botō odōmōmo adānitapa.”

²¹ Āninqe Itaiya wodi idægoidi inānitedō ante apænedinqe, “Eñēnāmaī inte Baa ānōnāni iñōnānite botō, Pōedāni, ante tōmāā itædē ōnompō compō compō cæbo incæte pōnāmaī inānitapa.”

11

Idægoidi pancadāniya inānite Wængonguī apænte cængä

¹ Iñinqe botō iīmāi ante apænebopa. Tömengä quīnāni iñōnānite Wængonguī dicæ idægoidi inānite Baa angantawogaa. Iñæmpa botō adobo nāwā idægobō imopa. Abadāo wodi pæimo inōmo inte botō edæ Beencamīnō wodi pæimo inōmo inte tömengä pæināni tōnō adocabobo tömēmo inōmo imopa. ² Idægoidi botō quīnāni incædānimpā, āninqe Wængonguī wēēnēñedē pōni mōnitō imōnite adinqe do apænte ængacāimpā. Iñinqe mōnitō tömengä nānō nē agāimōni iñōmōnite tömengä cōwē Baa ānāmaī ingacāimpā. Idægoidi inānite

piinte āninqe Ediya wodi Wængonguī ingante apænegacāimpa, ante æbānō yewæmonte ongompa, ante mūnitō adāmaī īminitawo.

³ “Awēnē ēñēmi. Bitō beyæ nē apænedāni īnānite wænōninqe idægoidi godōmenque cædinque, Wængonguī qui, ante nāni iya tāinca bæ tadinque edæ wido cædānitapa. Ayæ botō adoboque inte edæ ayæ quēwēñōmote botō īmote wænoncæte ante cædāni wæbo abi.” ⁴ Āñongante Wængonguī, “Īñæmpa botō tiæte mliido ganca mānimpodāni īnānite, Botō quīnāni īnānipa, ante wææ gompobo quēwēnāni apa quēwēe. Wadāni nāni, Mōnitō wængonguī Baado ingampa, nāni ānongā weca botō quīnāni īñōmō edæ da guicapodāmaī īnānipa cæbii,” angacāimpa, ante nāni yewæmongainta adāmaī īminitawoo.

⁵ Nōwo īñōmō edæ adobaī impa. Idægomōni mōni cabo incæ mēa pōni īmōni inte Wængonguī ingante Baa ānāmaī īñōmōnite tōmengā mōnitō īmōnite waadete pōnō cædinque, Botō quīmīni īminīpa, ante apænte ængampa. ⁶ Īninqe, Wængonguī waadete pōnō cædinque apænte ængampa, ante adinqe tōmēmonque waa cæmō beyæ ædō cæte Wængonguī apænte ænguingāā. Īñæmpa tōmēmonque waa cæmō beyæ Wængonguī mōnō īmote apænte ængā baī, Wængonguī waadete pōnō cæcampa, ante ædō cæte anguēnē ī. Wæætē edæ tōmēmonque waa cæmō beyæ Wængonguī apænte ængā baī tōmengā adocā ædō cæte nānō waadete pōnō cædō beyænque mōnō īmote apænte ænguēnengāā. Īñæmpa Wængonguī waadete pōnō cædinque apænte ængā īninqe, Tōmēmonque waa cæmōmpa, ante ædō cæte anguī.

⁷ Mānōmaī ī Īninqe æbānō ante anguī. Edæ idægoidi tōmēnāni nāni nanguī æinēnō ante diqui diqui minte ænāmaī īñōnāni mōnō īñōmō Wængonguī nānō nē apænte ængāimō īmō īñōmō edæ do æntamōmpa. Nē ænāmaī īnāni īnānite Wængonguī ee ayongante mīmō ōmædēnāni bagadānimpa. ⁸ Īmaī ante Wængonguī beyæ nāni yewæmongainō baī ingatimpa. “Tōmēnāni īnānite Wængonguī godō cæcā ate mōwo mōinente baī wædāni inte tōmēnāni awinca ēmōnāni incæ nōwo ganca adāmaī inte wædānipa. Ōnōmonca ēmoncadāni incæ edæ ēñēnāmaī inte wædānipa,” ante yewæmongatimpa. ⁹ Ayæ awēnē odeye Dabii wodi Wængonguī ingante apænedinque īmaīnō ante apænegacāimpa. “Wængonguī ēñēmi. Waodāni nāni wænguinque gote ææmæ bedāni baī cædinque īnāni īñōmō edæ wapiticæ nāni towēnōnō ante gote towēnānipa. Incæte bitō godō cæbi ate tōmēnāni nāni towēnō beyæ edæ wæncædānimpa, āmopa.

Tōmēnāni tee tēwate baī oda cæte wæyōnāni bitō godō pāmi wæcædānimpa, āmopa.

¹⁰ Bitō godō cæbi ate tōmēnāni awinca edæ mæ māmonte baī bamōninqe adāmaī incædānimpa.

Ayæ teēmē mongæninque bocæ ñongænte cōwē wæcædānimpa, āmopa,” ante awēnē Dabii wodi Wængonguī ingante apænegacāimpa.

Idægoidi īnāmaī īnāni quēwēnānipa, ante

¹¹ Nōwo wæætē īmaī āmopa. Do oda cædāni incæ idægoidi īñōmō dicæ æmæwo tæ go wæænguīnāni īnānitawogaa. Īñæmpa ayæ ate ængæ gantidinqe tōmēnāni nē quēwenguīnāni īnānipa. Incæte Wængonguī, Tōmēnāni ēñēnāmaī cædāni beyæ wadāni quēwēnāni adinque idægoidi wæætē, Mōnō quēwengade impa, ante piinte wæcædānimpa, ante godō cæcā ate idægoidi edæ oda cægadānimpa. ¹² Īninqe idægoidi ēñēnāmaī cædinque ænāmaī īnāni beyæ mōnō inguipoga tōmāmæ mōnō quēwencabo wæætē edæ nanguī pōni

æmompā. Tömēnāni ænāmaī inte ömæpodāni wædāni beyænque mīnitō idægōmīni īnāmaī īmīni wæætē nangūi pōni æmīnīpa. Īnīnque idægōidi nāni quēwenguīmāmo īncayæ ate eyepæ pōni ænāni ate edæ æbānō baquūi. Edæ idægōidi īncayæ ate eyepæ pōni ænte entawēnāni beyænque mōnō waocabo tōmāmō godōmenque nangūi pōni ænte entawengæīmpā.

¹³ Idægōmīni īnāmaī īmīni īmīnite apænebo ēñeedāni. Botō īmote Codito, Idægōidi īnāmaī īnāni īnānite apænecæbiīmpā, ante da godongā gotabōpa. Īnīnque botō, Mīnitō īmīnite nē apænebo inte tobōpa, ante nangūi tede-bōpa. ¹⁴ Edæ, Idægōidi īnāmaī īnāni incæ do quēwēnānīpa, ante botō tedebo ēñente wædinque botō guīdēnāni idægōidi wæætē, Mōnitō adobaī quēwēncæmōnīmpā, ante pīinte wæcædānīmpā, ante tede-bōpa. Ayæ adodāni pancadāniya godōmenque pōnēnīnque quēwēncædānīmpā, ante cædinque botō edæ nangūi tede-bōpa.

¹⁵ Idægōidi īnānite Baa ante wido cædinque Wængongūi wæætē inguīpoga tōmāmā quēwēmō īñōmonte piyænē cædinque edæ waadete pōnō cægacāīmpā. Īnīnque tōmengā īncayæ ate idægōidi īnānite Ao ante ængā ate edæ æbānō baquūi. Māniñedē ate edæ mōnō wænte õñonte baī īnōmō inte edæ mōnō nāni ömæmonte quēwengæīmpā. ¹⁶ Īmaī ante pōnengæīmpā. Pāo pancaboga pancæte baī wædænque īnāni inte tāno nāni pōnente quēwēncabo īñōmō tæiyæ waēmō īnāni īnīnque īncayæ nāni pōnente quēwēncabo guīquēnē pāo babo baī adobaī īnāni inte tōmēnāni adobaī tæiyæ waēmō īnānīpa, ante pōnengæīmpā. Tāno pōnengāīnāni guīquēnē tæcæguinto baī īnōnāni inte tæiyæ waēmō īnāni īnīnque edæ īncayæ pōnēnāni guīquēnē yæpænto baī īnōnāni inte adobaī tæiyæ waēmō īnānīpa.

¹⁷ Odibowæ õnonque pæwæ incæ wainca incacæīmpā, ante cædinque waocā tōmengā nānō mingaiwæ waa pōni incawæ adīnque yæpængō nāmænte godō õnonque pæwæ yæpæntoga mīne tūmongā amīnīpa. Idægōidi īñōmō waocā nānō mīnte pæwæ baī īñōnānite Wængongūi pancadāniya īnānite yæpængō wæi ñæmænte baī wido cæcā wædānīpa. Tömēnāni mānōmaī wæyōnāni bitō guīquēnē õnonque pæwæ yæpængō baī īmitapa. Incæte Wængongūi, Odibowæ yæpængoncoo baī tæcæguinto beyænque odæ yate baī pæte incacæīmpā, ante odibowāa yæpæntoga godō mīni tinte baī cædinque bitō īmite waadete pōnō cæcā ate bitō idægōidi beyænque mīlmi inte ongōmīpa. ¹⁸ Mānōmaī ī īnīnque bitō wæætē edæ, Wængongūi botō īmote pōnō cæcæte ante tōmēnāni īnānite wido cæcampa, ante bitō nāmā ængō cæcæte ante cædinque idægōidi īnānite ante wīi pīinte ancæbiīmpā. Īñæmpa tæcæguinto ēwa baī īnāni inte idægōidi īñōmō edæ bitō beyæ dicæ quēwēnāniya. Wæætē edæ tæcæguinto ēwa baī īnāni beyænque bitō quēwēmīpa, ante apænebo ēñēnīnque bitō pīlmi īnīnque, Mānōmaī īmpā, ante tāno pōnē.

¹⁹ Īnīnque bitō, “Odæ yacæīmpā, ante cædinque godō mīne tūmōnāni baī Wængongūi botō īmote pōnō cæcæte ante cædinque idægōidi īnānite wæætē wido cæcampa,” ante pōnēmitawoo. ²⁰ Bitō pōnēnō edæ nāwangā īmpā. Incæte edæ tōmēnāni nāni pōnēnāmaī īnō beyænque Wængongūi tōmēnāni īnānite wido cægacāīmpā. Bitō guīquēnē wede bitō pōnēnō beyænque mīlmi inte ongōmīpa. Īnīnque bitō guīñente wædinque edæ nāmā ængō cædāmaī inte edæ, Botō waēmō īmo beyæ cæcantapa, ante pōnēnāmaī īmāwe. ²¹ Īñæmpa nāwā yæpængō baī īnāni īnānite Wængongūi tapodāmaī īnongā inte bitō õnōmīque īñōmīte dicæ ata cæpoquingāā.

²² Īnque, Wængongui nè waadete cædongä incæ cōwē nè apænte pangä ingampa, ante pōnēe. Tömengä ĩñōmō nè oda cædāni ĩnānite pangampa. Wæætē bitō nè waadete cædongä nempo quēwēmi ĩnque tōmengä bitō ĩmite waadete cæbaingampa. Incæte tōmengä nempo wīi quēwēmi ĩnque tōmengä wæætē bitō ĩmite edæ wæi ñæmænte bai wido cæbaingampa. ²³ Idægoidi guiquēñē, Idæwaa pōñēnāmaĭ inte awædō, ante ocæ ēmænte pōñāni adinque Wængongui nè tæi piñænongä inte tōmēnāni ĩnānite wæætē ado awæ yæpæntoga godō mīni tūmonte bai pōñō cæcā ate mīñāni edæ ongōmāñānipa. ²⁴ Waodāni waa incawæ yæpængō nāmænte ōnonque pæwæ yæpæntoga godō nāni mīne tūmōñō bai Wængongui wīi adobai cæcampa. Wæætē edæ bitō ōnonque pædiwæ yæpængō bai ĩñōmite tōmengä waadete pōñō nāmænte bai cædinque, Nāwā idægobi babipa, ante waa pæwæ yæpæntoga godō mīni tūmonte bai cæcampa. Bitō ĩmite māñōmaĭ waa cæcā ĩnongä inte tōmengä idægoidi ĩnānite æbāñō godōmenque waa cæbaingāā. Tōmēnāni ĩñōmō waa pōñi pæwæ yæpængoncoo tōmengä nāñō wæi ñæmæncōo bai inte wæyōñānite adowæñē yæpæntoga godō mīne tūmonte bai cædinque tōmengä tōmēnāni ĩnānite, Nāwā idægomiñi inte mūnitō wæætē mīmīni ongoncæmīnimpā, ante do cæcæcāimpā.

Idægoidi ĩnque bayonte quēwencædānimpā, ante

²⁵ ĩñāñāni ēñēedāni. Mīnitō nāmā ængō cædāmaĭ incæmīnimpā, ante cædinque botō wēēñēdē mīni ēñēnāmaĭ ĩngainō ante edæ wææ āmopa. Mīnitō idægomiñi ĩnāmaĭ ĩmīni mīni pōñencabo eyepæ pōñi mīni yebænganca idægoidi ĩñōmō ñōwo mīmō ōmædēñāni inte wædōñāni inte edæ māñinganca cōwē mīmō ōmædēñāni inte wæcædānimpā. ²⁶ ĩncayæ ate guiquēñē idægoidi tōmāñāni quēwenguñāni ĩñānipa. Edæ ĩmaĭ ante yewæmonte ongompa.

“Mōñō ñā cæyænte bai tee mōnete bai wæwēñōmonte nè Ñimpo Cæcā ĩñōmō Tīño ĩñōmō quēwente poncæcāimpā.

Aacobo wodi pæñāni Wængongui ĩngante ēñēnāmaĭ cæte quēwēñāni adinque nè Ñimpo Cæcā ĩñōmō tōmēñāni nāni ēñēnāmaĭ entawēñō wadæ cæcā ate tōmēñāni wæætē ēñente cæte quēwencædānimpā.

²⁷ ĩnque wēñæ wēñæ nāni cægainō ante wadæ cæte wido cædinque Wængongui tōmēñāni ĩñānite ĩmaĭ angampa.

Botō pōñō cæbo ate mūnitō Ao āmīni ĩnque edæ mōñō godongāmæ waa cæte quēwengæimpā, ante Wængongui angampa,” ante yewæmongadānimpā.

²⁸ Codito ĩngantedō ante watapæ ēñente pōñēnque mīnitō idægomiñi ĩnāmaĭ ĩmīni do quēwēmiñi beyæ idægoidi wæætē Wængongui ĩngante piñte adānipa. Incæte tōmēñāni mæmæidi ĩñānite nè apænte ængaingä inte Wængongui wæætē mæmæidi beyænque ante pōñēnque ñōwodāni ĩñānite waadete pōñengampa. ²⁹ Edæ waomō ĩmonte quincōomē pōñongä æñōmōnte Wængongui adodō ō æñāmaĭ ĩngampa. Ayæ adobai waomō ĩmonte aa pedinque tōmengä wadō ante āñāmaĭ inte edæ adodō ante edæ cōwē aa pecampa.

³⁰ Mīnitō wēēñēdē ēñēnāmaĭ cæmīni incæte Wængongui ĩñōmō idægoidi ēñēnāmaĭ cædāni beyæ mīnitō ĩmīnite wæætē waadete cædinque pōñō ata cæpocā quēwēñānipa. ³¹ Ayæ adobai mīnitō ĩmīnite pōñō waadete ata cæpocā quēwēñāni beyæ idægoidi ēñēnāmaĭ cædāni ĩñōñānite Wængongui ñōwo tōmēñāni ĩñānite adobai waadete cædinque godō ata cæpocā quēwēñānipa.

³² ĩnque tōmengä, Mīni waocabo tōmāmīni ĩmīnite botō waadete cædinque pōñō ata cæpocæboimpā, ante cædinque, Mīni ēñēnāmaĭ cæcabo ĩñōmīni inte

mīnitō nāmā ēō toyænte aamō cædāmaī incæmīnīmpa, ante tōmāmō īmonte ñā cæyænte baī cæcā wæcongāmōīmpa.

³³ Īnīnque Wængonguī nanguī pōnī waadete entawēnongā īñongante tōmēngā nānō pōnō cædōnō ante mōnō ædō cæte tee mante aquīī. Tōmēngā tōmancoo do adongā inte nanguī pōnī ēñēnongā inte cæcā ingānō anguēnē. Tōmēngā edæ, Æbānō ī, ante do againgā inte edæ, Æbānō cæquīī, ante do apænte āñongante mōnō waocabo wæætē tōmēngā nānō cædō ante ædō cæte ēñēnguīī. Tōmēngā ædōnō ponte ædōnō gocāā, ante pōnente wædinque mōnō tōmēngā ōnōwa amompa diyæ taadō aquīī. ³⁴ Edæ īmaī ante nānī yewæmongainō baī impa. “Mōnō Awēnē æbānō pōnēngāā, ante pōnente wædinque æcānō ēñēngāā. Ayæ, īmaī cæquī impa, ante mōnō tōmēngā ingante edæ ædō cæte odōmonte apænequīī. ³⁵ Wængonguī ingante æcānō do godongā inte wæætē, Bitō debe īmpa, ante anguingāā. Īñæmpa tōmēngā ingante godōmōmpa diyæ debe inguingāā,” ante Itaiya wodi nānō yewæmongainō baī impa. ³⁶ Edæ tōmēngā nānō pōnongaincooque inte edæ tōmancoo ongōmpa. Mōnō waocabo īñōmō tōmēngā badongā beyænque tōmēngā quīmō baquinque ongōmōmpa. Ayæ adobaī edæ tōmēngā badongā beyænque tōmancoo tōmēngā quīncooque edæ baquinque ongoncoopa. Edæ tōmēngā adocanque pōnī ñāō entawente edæ cōwē tæī ēmoncæcāīmpa. Mānōmaī impa, ante mōnō, Amēē, ante apænecæīmpa.

12

Wængonguī quīmō īmōmpa, ante cæte quēwēngēīmpa

¹ Botō tōnīñāmīnī ēñēedānī. Wængonguī waadete pōnō waa cæcā ængāīmīnī inte mīnitō īmaī cæedānī, ante botō nanguī āmōpa. Wængonguī quī, ante baō pædæ godōnānī waa ængā baī mīnitō adobaī edæ, Wængonguī quīmōnī īmōnīpa, ante mīīmīnī inte edæ tōmēngā ingante nāmā pædæ godōmīnī ængæedānī. Mānōmaī cædinque mīnitō tōmēngā ōnōwa īnō mīnī edæ wæænte nanguī cæquēnēnō ante edæ do cæmīnī incæmīnīmpa. Mānōmaī godōmīnī ænīnque tōmēngā wæætē edæ, Botō ayōmo tæiyæ waēmō pōnōmīnī æmōpa, ante tocæcāīmpa. ² Inguīpogaque ante pōnente mīnī cægāinō ante ñōwo ñīmpo cædinque mīnitō mīīmīnī mīnī quēwēngūnque ante edæ ocaī mīnque encate baī nōingā ante pōnēedānī. Mānōmaī cædinque mīnitō, Wængonguī waa pōnī nānō ānōnō ante, Æbānō ī, ante ædæmō ēñēnīnque, Tōmēngā nānō ānō īñōmō eyepæ pōnī impa, ante ēñēncæmīnīmpa. Mānīnō ante ēñēnte cæte quēwēmō inte mōnō tōmēngā tōnō godongāmæ waa tocæīmpa.

³ Wængonguī waadete pōnō cæcā ate botō nē apænebo badīmo inte īmaī ante apænebōpa. Mīnitō nāmā pōnēnīnque, Ñænæmo īmōpa, ante pōnēnāmāī iedānī. Wængonguī pōnō badongā ate mīnitō wede pōnēmīnī badīmīnī inte mīnī wede pōnēnganca māningancaque pōnēnīnque īmaīnō ante pōnēedānī. Botō ōnōmoque baī īnōmo īmōpa, ante ocaī encāmīnī inte tōō pōnī pōnēedānī.

⁴ Mōnō baō adoyonque pōnī ēñāmō incæte wīī adodonque mōnō cæquēnēnō ante ēñāmōmpa. Īnīnque mōnō aquīnō ante awīnca ēmōnīnque mōnō dao dao goquīnō ante ōnōwa ēwamōmpa. Ayæ wadō mōnō cæquīnō ante wayō ēñadinque mōnō wæætē wadō mōnō cæquīnō ante wayō ēñadinque wayō wayō mōnō ēñacoo ēñāmōmpa. ⁵ Īnīnque wayō wayō ēñāmō incæ mōnō baō pæ pagængūncoo adoyonque ī baī mōnō adobaī Codito nempo mōnō quēwēncabo nanguī pōnī īmō incæte adocabomō īnōmō īmōmpa.

⁶ Īnīnque mōnō adocabomō īñōmonte Wængonguī waadete pōnō cædinque mōnō īmonte wadō wadō mōnō cæquīnō ante tōmānō pōnongā æmōmpa.

Īninqe mōnō tōmengā da pōnongā mōnō ænganca edæ adoganca wadō wadō cæmompā. Mānōmaī ænte cædōmō īñōmonte pancāmīniya īmīnite Wængonguī pōnō apæneccā ēñēninqe mīnitō tōmengā beyæ nē apænemīni do badinqe wede mīni pōnenganca apæneedāni. ⁷ Wæætē wamīni īmīnite Wængonguī pōnō cæcā æninqe mīnitō wadāni īnānite nē cæmīni do badinqe wadāni beyæ cæcæmīnimpā. Wæætē wamīni īmīnite tōmengā pōnō cædinque odōmonte apæneccā ēñēninqe mīnitō nē odōmonte apænemīni do badinqe odōmonte apænecæmīnimpā. ⁸ Ayæ wæætē wamīni īmīnite Wængonguī pōnō waadete apæneccā ēñēninqe nē waadete apænemīni badinqe mīnitō īñōmō wæntæye inte wædāni īnānite ædæmō apænemīni ēñēninqe tōmēnāni wæætē edæ wampo pōnēninqe tæī piñænte cæcædānimpā. Wamīni īmīnite Wængonguī pōnongā æninqe nē nēnempomīni badinqe mīnitō, Tōmēmōni quī, ante wædāmaī inte wæætē wadāni nāni ænguēnēnō ante eyepæ godōmīni æncædānimpā. Wamīni īmīnite Wængonguī pōnō angā ēñēninqe mīnitō wæætē awēnēidi bai nē āmīni badinqe wadāni īnānite nōingā cæte awēnēidi bai ancæmīnimpā. Wamīni īmīnite Wængonguī ædæmō waadete pōnō waa cæcā æninqe mīnitō wæætē ædæmō waadete cæmīni do badinqe wadāni īnānite ædæmō waadete godō waa cædinque edæ wædāmaī inte tocæmīnimpā.

Codito nempo quēwēninqe īmaī cæccæīmpā, ante

⁹ Botō waadete pōnēmpō, ante tedemīni īninqe mīnitō nōīnō cæte waadete pōnencæmīnimpā. Wīwa mīni cædōnō ante piñinqe wido cæedāni. Wæætē, Quīnō waa cæquīī, ante adinqe mānīnō ante ænte mīnitō mīmōnē ædæmō entawēninqe cōwē waa cæte quēwēedāni. ¹⁰ Mōnō waadete pōnencabo īmompā, ante pōnēninqe wacā ingā wacā ingā waadete pōnente cæedāni. Wadāni ñænænāni īnānīpā, ante mīnitō tōmēnāni īnānite ængō cæte bai cædinque wæætē, Botō wædāmo īmōpā, ante nāmā ængō cædāmaī īedāni.

¹¹ Tæī piñænte ēwocadinque mōnō Awēnē beyæ ante wæntædāmaī inte cæedāni.

¹² Watapæ bacæīmpā, ante pōnēninqe tocæmīnimpā. Caate wæwēmīni incæte wæntæye badāmaī inte ee cæedāni. Ñīmpo cædāmaī inte Wængonguī ingante cōwē apæneedāni.

¹³ Wængonguī quīnāni ænguēnēnāni inte wædāni adinqe mīnitō māīncōo wæætē nēnempomīni æncædānimpā. Ayæ, Botō oncōnē pō guīite cænte mōedāni, ante wadāni īnānite waadete cæedāni.

¹⁴ Mīnitō īmīnite nē piīnte cædāni īñōnānite mīnitō tōmēnāni īnānite waadete godō apæneedāni. Edæ tōmēnāni īnānite waadete apænedinqe, Wængonguī mīnitō īmīnite waa cæcæcāīmpā, ante apænedinqe wæætē piīnte ānāmaī īedāni.

¹⁵ Nē watapæ todāni tōnō godongāmæ watapæ toedāni. Nē Ca wædāni tōnō mīnitō godongāmæ Ca ca wæedāni.

¹⁶ Mōnō pōnencabo īmompā, ante adoyōmō pōnente quēwēedāni. Ōnōnānīque nāni nē ānōnāni tōnō godongāmæ cædinque, Botō ñænæmo īmōpā, ante pōnēnāmaī īedāni. Mīnitō, Wadāni pōnōmenque ocaī encayōnāni botō godōmenque nangūī pōnī encabo īmōpā, ante nāmā ante pōnēnāmaī īedāni.

¹⁷ Wadāni mīnitō īmīnite pōnō wēnæ wēnæ cædāni adinqe mīnitō wæætē godō wēnæ wēnæ cædāmaī īedāni. Ayæ, Quīnō waa cæquīī, ante tōmānāni nāni waa adōnō ante adinqe mīnitō mānīnōnque ante cæedāni. ¹⁸ Eyepæ īmīni inte mīnitō cæganca cædinque tōmānāni tōnō godongāmæ piyænē cæte quēwēedāni. ¹⁹ Botō nē waademīni ēñēedāni. Mōnō Awēnē beyæ īmaī ante yewæmongatimpā. “Wēnæ wēnæ cædāni adinqe botō wēnæ wēnæ nāni

cædinō beyæ ante nē apænte panguēnēmo inte tōmēmo eyepæ wæætē godō cæbo wæcædānīmpa, ante Awēnē angampa,” ante yewæmonte ongōmpa cæmīni. Minitō īmīnite pōnō wēnæ wēnæ cædāni wæmīni īnīnque edæ wæætē godō cædāmaī ee aedāni. Edæ nē āingā bate pānongā inte Wængonguī incæ pancæcāīmpa. ²⁰ Wæætē, “Bitō īmite nē piinte cædongā incæ gæwænte wæcā adīnque godōmi cængæe. Gue ænente wæcā adīnque godōmi becæe. Edæ mǎnōmaī waa cædinque edæ tōmengā guingo imonte nānō wæwengūnque bitō tōmengā ingante waa cæcæbiīmpa,” ante Wængonguī beyæ yewæmonte ongō apa cæbii. ²¹ Tōmēnāni wēnæ wēnæ nāni cædō beyæ oda cædāmaī inte wæætē mǎnīnō ante wido cæte baī cædinque bitō waa cædinque edæ tæī ēmonte gānā cæe.

13

¹ Gobiedōno awēnē nempo waodāni ēñente cæte quēwencædānīmpa, ante Wængonguī incæ godō gō cæcā beyænque gobiedōno awēnēidi badānīpa. Edæ Wængonguī mǎnōmaī ante gō cædāmaī ingā baī quingānō awēnē inguēngā. Edæ dæ ancædōnīmpa. Īnīnque gobiedōno awēnēidi inānite mōnō tōmāmō Ao ānīnque ēñente cæcæīmpa. ² Īnīnque awēnē ingante æcānō Baa ānaa tōmengā nānō apænte pantē wæquinque Wængonguī nānō goncægāinō ante ēñēnāmaī inte edæ Baa angampa. ³ Nē waa cædāni guīquēnē awēnēidi īnīnque waa ate todīnque guīñēnāmaī inānīpa. Wæætē wēnæ wēnæ cædāni guīquēnē awēnēidi inānite quīñente wædānīpa. Gobiedōno awēnē ingante guīñēnāmaī inte quēwencæboīmpa, ante bitō āmitawoo. Īnīnque bitō guīñēnāmaī inte quēwencæte ante waa cæcæbiīmpa. Waa cæbi adīnque tōmengā, Bitō waa cæbi abopa, ante pōnō waa cæcā īnīnque bitō guīñēnāmaī īmaīmpa.

⁴ Botō īmote nē cædongā inte mīnitō beyæ waa cæcæcāīmpa, ante Wængonguī gobiedōno awēnē ingante godō gō cæcā ongongampa. Edæ Wængonguī ingante nē cæcā īnongā inte tōmengā nē wēnæ wēnæ cæcā ingante nō cæte nē panguēngā ingampa. Īnīnque awēnē yaēmē nē næængā inte wīī ōnonque næængampa cæbii. Wēnæ wēnæ cæbi īnīnque edæ quīñente wæcæbiīmpa. ⁵ Īnīnque mōnō, Pangā wæcæ wæ, ānīnque awēnē ingante ēñente cæcæīmpa. Ayæ pangā wæmō incæ wīī pangā wæmō incæ mōnō mīmō nē entawente nāmā apænte ānōmō inte mōnō awēnē ingante Ao ante ēñente edæ nōingā cæcæīmpa. ⁶ Wængonguī beyæ nē cædōnāni inte awēnēidi īñōmō tōmēnāni nempo quēwēnāni inānite cōwē aadīnque mǎnīnque cæte quēwēnānīpa. Mǎnōmaī ī Īnīnque mīnitō, Awēnēidi eyepæ ænīnque mōnitō beyæ cæcædānīmpa, ante tōmēnāni nāni āinta pædæ godōmīni ænānīpa.

⁷ Æcāmenque ingante cæquēnēmīni īmīni inte mīnitō tōmānāni inānite mīni cæquēnenganca do godō cæmīni æncædānīmpa. Awēnē nempo quēwēñōmonte tōmengā eyepæ ænīnque mōnō beyæ cæcæcāīmpa, ante mīnitō awēnē nānō āinta godonguēnēmīni inte do godōmīni ængædāni. Waocā ingante mīnitō quīñente ēñinguēnēmīni īmīni īnīnque tōmengā ingante quīñente ēñēedāni. Waocā ingante mīnitō waa aquēnēmīni īmīni īnīnque edæ tōmengā ingante waa aedāni.

⁸ Wacā ingante mīni cæquēnēnō ante edæ ee ongōnāmaī inte godō cæmīni ængā ate abæ tawænte gocæbiīmpa. Wæætē wacā ingā wacā ingā waadete mīni pōnenguēnēnō ante edæ godongāmæ cōwē waadete pōnenguēnēmīni īmīnīpa. Wadāni inānite nē waadete pōnengā īñōmō tōmengā īñōmō Wængonguī nānō, Īmaī cædāni, ante nānō wææ angāinō ante do ēñente cæcā ingampa. ⁹ Tōmēmi nāmā bitō waadete pōnēnō ganca wacā ingante adoganca

waadete pönencæbiimpa, ante Möitee wodi yewæmongacäimpa. Mānīne adodeque ante ēñente cædinque waocā Wængonguī nānō wææ angainō ante tōmānō do īinque cæcampa. Edæ, “Bitō nānōogængā īnāmai īñongante godō guēa mōnāmai īe. Wacā ingante godō wænōnāmai īe. Wacā nānō ēadincōo adinque godō ænāmai īe. Wacā wēnæ wēnæ cæcā atabopa, ante godō babæ wapiticæ apænedāmai īe. Wacā quī ante æinente wædāmai īe.” Mānīnecōo Wængonguī nānō wææ angainecōo ante bitō waadete pōnēmi beyænque tōmāne do īinque cætimpā. Ayæ quīnemē godōmenque wææ ante ī mānīne adobai bitō waadete pōnēmi beyænque tōmāne do īinque cætimpā. ¹⁰ Nē waadete pōnengā īñōmō edæ wacā ingante cōwē wīwa cædāmai ingampa. Mānōmai beyæ nē ædæmō waadete pōnēnānique Wængonguī nānō wææ angainō ante īinque cædānīpa.

¹¹ Īinque, Nōwoyedē æbānō oo baquī, ante do ēñēinque mīnitō waadete pōnente quēwēdāni. Edæ wēēnēñedē mā mōnō wede pōnēñedē mīinguipo mōnō quēwenguīmāmo īñōmō edæ mānīñedē edæ oo bacæ cædāmai ingatimpā. Nōwo guiquēnē, Oo pōnī bacæimpā, ante pōnente wædinque mīnitō mōwocodē ōñōmīni inte edæ ñāni ōmæmōninque mūimīni quēwēdāni. ¹² Wēmō īñōmō mōnō wæwēmāmo idæwaa edæ bapa. Mīinguipoga ñāo bai baquinque edæ oque pōnente impa cæmōō. Wēmō īñonte mōnō wēnæ wēnæ cædō æmæwo wido cædinque, mōnō wæætē ñāo īñōmō quēwēninque edæ wææ cæquincoo wēñate bai cædinque nāmā wææ gompotawengæimpā. ¹³ Mānōmai cædinque mōnō itædē quēwēnōmō inte nō pōnī cæcæimpā. Baonque ante mōnō cæinēwēnō ante towēnāmai inte mōnō tī nāmæ nangui bete quidi dōwænāmai ingæimpā. Mōnō wacā tōnō godō guēa mōnāmai, cængui eyepæ cæninque godōmenque nangui cænāmai ingæimpā. Wæætedō wæætē pīinte cædāmai inte mōnō, Wacā bai bacæboimpā, ante pīinte adāmai ingæimpā. ¹⁴ Wæætē wææ cæquincoo entawente bai cædinque mīnitō nāmā wææ gompotawencæte ante cædinque mōnō Awēnē Itota Codito ingante entawente quēwēdāni. Ayæ baonque ante mīni cæinēwēnō ante wido cædinque, Æbānō cæte wēnæ wēnæ cæquimoo, ante cæcæte ante wædāmai īedāni.

14

Mīnitō tōnīñadāni īnānite pīinte ānāmai īedāni, ante

¹ Wacā wīi ædæmō pōnengā incæte mīnitō, Mōnō pōnencabo īmōmpa, ante pōnēninque tōmēngā adocabocā nānō baquinque āmīni pongædāni. Tōmēngā nānō pōnēnō ante wæætedō wæætē ānāmai īedāni. ² Pancadāniya wede pōnēnāni inte cængui adinque, Nāwā cængui impa, ante guīñēnāmai inte quīēmē cængui incæ edæ dobæ ade cænānīpa. Wadāni guiquēnē æmæ pōnente beyæ, Tōmāā baō bacā impa, ante awente bai cædinque quingāmenque baō incæ cænāmai inte onguipoīya pæcōoque edæ cænānīpa. ³ Incæte tōmāā cængui nē cænongā īñōmō onguipoīya pæcōoque nē cænongā ingante pīinte adāmai incæcāimpā. Wacā ingante, Bitō ōnōmique bai īnōmi inte edæ awente cænāmai īmīpa, ante ānāmai incæcāimpā. Ayæ wæætē onguipoīya pæcōoque nē cænongā guiquēnē baō nē cænongā ingante, Baacā apa cæwēe, ante apænte ante pīnāmai incæcāimpā. Edæ nē cænongā ingante Wængonguī Ao āninque, Botō quīmi īmīpa, ante do ængampa. ⁴ Īñæmpa tōmēngā wacā awēnē ingante nē cæcā īñongante bitō ædō cæte apænte āmīi. Edæ tōmēngā awēnē incæ, Waa cæbīpa, angā wædinque edæ tōmēngā adiyæ tæī ongōmaingampa. Wæætē adocā tōmēngā awēnē, Wēnæ wēnæ cæbīpa, angā wædinque edæ tæ go wææmaingampa. Incæte edæ tōmēngā mōnō Awēnē

ingante nē cæcā iñongante mōnō Awēnē adocā incæ tæi piñænongā inte eyepæ cædinque edæ æænō gō cæcā tæi ongoncæcāimpa.

⁵ Ayæ wacā guiquēnē, Pancaōnaa godōmenque waa ēōnæpa, ante cæcæimpa, ante pōnēñongante wacā guiquēnē, Tōmāā itædē ōnōnæque impa, ante pōnengampa. Īninqe mōnō pōnencabo wacā wadō wacā wadō pōnēmō incæte mōnō tōmāmō iñōmō edæ, Nāmā botō pōnēnonque ante botō nō pōnente cæcæboimpa, ante edæ mānīnonque ante cæcæcāimpa. ⁶ Edæ, Pancaōnaa godōmenque waa ēōnæpa, ante nē pōnengā guiquēnē tōmengā mōnō Awēnē ingante waa adinque mānōmāinō ante cæcampa. Pancaōnaa wīl godōmenque waa ēōnæpa, ante nē pōnengā guiquēnē tōmengā adobaī mōnō Awēnē ingante waa adinque mānōmāinō ante cæcampa. Baō nē cæñongā guiquēnē Wængonguī ingante, Waa pōnōmi cæmopa, ante adobaī mōnō Awēnē ingante waa adinque cængampa. Baō ate nē awente cænāmaī iñongā guiquēnē tōmengā adobaī Wængonguī ingante, Waa pōnōmi cæmopa, ante onguipoiya pæcooque cæninque mōnō Awēnē ingante waa adinque baō cænāmaī ingampa.

⁷ Mōnō pōnencabo iñōmonte æcāmenque incæ nāmā beyænque dicæ quēwengāā. Dicæ nāmā beyænque wængāā. ⁸ Wæætē edæ quēwēmō ĩninqe mōnō Awēnē beyænque quēwēmōmpa. Wæætē edæ wæmō ĩninqe mōnō Awēnē beyænque wæmōmpa. ĩninqe quēwēmō incæ wæmō incæ mōnō Awēnē quīmō iñōmō inte quēwēninqe tōmengā quīmō inte edæ wæmōmpa. ⁹ Edæ do wængaināni beyæ ante mīlmō quēwēmō beyæ ante Codito tōmāmō Awēnē nānō baquinque edæ wænte ñāni ōmæmongacāimpa.

¹⁰ Bitō guiquēnē bitō tōñīfacā ingante ædō cæte apænte āmii. Ayæ bitō tōñīfacā ingante, Ōnōmique baī ĩmpa, ante quīnante āmii. Edæ Wængonguī nānō apænte anguimpaa gāānē ongōñōmonte tōmengā tōmāmō ĩmonte apænte ancæcāimpa cæbii. ¹¹ Edæ Wængonguī beyæ ante ĩmaī ante yewæmonte ongōmpa.

“Mōnō Awēnē incæ, ‘Nē Quēwēmō iñōmō inte edæ āmo ēñēdāni,’ angampa.

Ayæ, ‘Mīnitō tōmāmīni botō ōnōwa ĩnō da guicapodinque,

Bitō Wængonguī ĩnōmi ĩmpa, ante adoyōmō apænecæmīnimpā,’ angampa.”

¹² Ante nāni yewæmongainō baī ĩninqe cædinque mōnō tōmāmō Wængonguī weca ponte ongōninque mōnō pōnengainō ante mōnō apænegainō ante mōnō cægainō ante tōmengā ingante edonque pōñi apænecæimpa.

Wacā oda cæcæcāimpa, ante cædāmaī incæbiimpa, ante

¹³ Mānōmaī beyæ mōnō wacā ingante apænte ānāmaī ingæimpa. Wæætē mīnitō, Waa cæcæboimpa, ante nāmā wææ cædinque, Botō tōñīfacā taadō nānō goquīnō ante ee acæboimpa, ante pōñēdāni. Tōmengā tee tēwate baī oda cædāmaī incæcāimpa, ante nōingā cæquinque ante pōnecæmīnimpā. ¹⁴ Botō iñōmō Itota Codito nempo quēwēmō inte edæ nōingā pōnēninqe, Tōmāā cænguī nāmā incæ nāwāaquiringā ĩmpa, ante do ēñēmōpa. Incæte wacā, Pancaa cænguī baacā ĩmpa, ante nē pōnengā inte tōmengā beyæ baacā iñonte tōmengā nānō, Baacā ĩmpa, ānō cænāmaī inguēnengā ingampa.

¹⁵ Bitō quingāmē cæmi adinque bitō tōñīfacā, Baacā apa cæwēe, ante wæwente bacā ĩninqe bitō waadedāmaī inte godōmenque cæmaīmīpa. Edæ bitō tōñīfacā beyæ Codito wængacāī apa quēwēe. Bitō tōñīfacā nānō pōñēnāmaī bate wænguinque baō cæmīpa, ante wædinque bitō tōmengā ingante nāwangā waadete pōñēmi inte tōmengā beyænque ante cōwē baō cænāmaī incæbiimpa. ¹⁶ Botō mānōmaī cædinque waa pōñi cæbopa, ante

pönemi incæte wadäni bitö waa cædö ante, Wiwa cæbipa, ante pönö babæ ante tedewënäni ate wædinque bitö wæætê waadete pönëninque wææ ämi tedewënämai incædänimpa. ¹⁷ Wii cænguinque ante wii bequingue ante Wængongui nempo quëwëmompä. Wæætê Wængongui Tæiyæ Waëmö Önöwoca nempo quëwëñomonte tömengä pönö cæcä æninque mönö nö entawenguinque impä. Ayæ mönö gänê pönenguinque ante mönö watapæ tote quëwenguinque ante tömengä nempo quëwëmompä. ¹⁸ Edæ Codito nempo quëwëninque waocä mänömai cæcä adinque Wængongui tömengä ingante waa ate tocampa. Waodäni adobai, Waa cæbipa, ante waa adänipa.

¹⁹ Mänömai impä, ante adinque, Mönö pönencabo godongämæ piyænê cæte quëwengæimpä, ante, Ayæ mönö godongämæ wede pönëninque tæi mænonte bai ongongæimpä, ante mönö nangui cæcæimpä. ²⁰ Æninque cængui cæinente beyænque bitö Wængongui nänö nê badongainäni inänite bæ tadämai incæbiimpä. Tömää cængui edæ näwäauringä impä. Incæte bitö cæninö beyænque wacä ëñënamäi inte tee tēwate bai oda cæbaingampa, ante do ëñëmi inte bitö godömenque cæmi Æninque wiwa cæbaimipa töö. ²¹ Waa cæcæte ante bitö iïmai cæcæbiimpä. Bitö baö cæmi beyæ, biïnömæ nani wædænque ti nämæ bebi beyæ, quiëmê cæbi beyæ bitö tönïñacä oda cæte wæcantawo. Æninque bitö iñömö, Botö tönïñacä oda cædämai incæcäimpä, ante wææ cædinque ee cædämai Æmi Æninque waa imaimpā.

²² Mäninö, Æbänö cæte waa inguii, ante bitö pönënö beyænque wadäni inänite apænte änämai inte bitö adobique inte Wængongui ayongante cæcæbiimpä. Waa cæqui impä, ante mïmönö bitö pönënonque ante mäninonque cædinque bitö tente wæquinque cædämai inte waa tobaïmpä. ²³ Wæætê nê æmæ pönengä guiquënê, Cæmo beyæ Wængongui pangä wæcæ wæ, ante wædingä inte tömengä nämä nänö apænte pante wæquinque ade cængampa. Edæ æcänö wede pönënamäi inte cæda tömengä nänö cædönö tömänö edæ wiwa cætimpä. Æninque bitö cædö tömänö wede pönente cæcæbiimpä.

15

Wadäni incæ watapæ quëwencædänimpa, ante cæe, ante

¹ Mönö nê wede pönëmö iñömö tæi piñænte entawëmö inömö inte nämanque ante mönö cæinënö ante edæ wædämai ingæimpä. Wæætê edæ nê æmæ pönënanäi guiquënê tömënäni aguïi pönï inäni inte, Ædö cæte cæquïmoo, ante wædäni adinque mönö tömënäni wædö ante ænte mongænte bai cædinque tömënäni tönö iñacabo cæcæimpä. ² Godongämæ godö cæmö æninque waa todinque tömënäni wæætê wede pönëninque oncö tæi mænonte bai tæi ongoncædänimpa, ante mönö ædæmö cæcæimpä. ³ Edæ mönö Codito incæ nämanque ante nänö cæinënö ante cæcæte ante edæ wædämai inte piyænê cægacäimpä. Wængongui ingante do nani apæneginö bai tömengä wadäni beyænque ante cægacäimpä. “Wængongui ëñëmi. Wadäni bitö imite piinte badete tocæte ante cædinque botö imote wæætê piinte badete todänipa,” ante apænete bai Codito ee cægacäimpä. ⁴ Edæ mönö imonte odömonte apænecæte ante Wængongui angä ëñëninque dodäni tömantaa yewæmongadänimpa. Æninque mäninta ædæmö adinque wampo pönëninque wæntædämai inte ee cæmö Æninque edæ mönö, Watapæ bacæimpä, ante pönente tocæäimpä.

⁵ Æninque Codito Itota miñæ tee empote goyömonte Wængongui iñömö edæ, Minitö wampo pönëninque wæntædämai inte ee cæcæminimpä, ante nê ædæmö cæcä ingampa. Tömengä mänömai pönö cæcä ate minitö iñömö

adoyōmō ante mīni pōnencabo bacæmīnīmpa, āmopa. ⁶ Mānōmaī bamīni īnīnque mīnitō āanque baī adodō ante pōnēnīnque īlmaī ante Wængonguī ingante apænecæmīnīmpa. Mōnitō Awēnē Itota Codito Mæmpobi inōmi inte bitō tōmengā Wængonguī adobi īmi īñōmō bitō tæī ēmōmi inte ñāō apāite baī īmi amōnīpa, ante adoyōmō ante apænecæmīnīmpa, ante botō mānōmainō ante yewæmōmopa.

Oodeoidi ināmaī ināni ēñencædānīmpa, ante

⁷ Codito mīnitō īmīnite Ao ante ængacāīmpa. Īnīnque tōmengā mīnitō īmīnite nānō ængāī baī mīnitō adobaī wacā ingā wacā ingā godongāmæ Ao ante æedāni. Mānōmaī cæmīni adīnque wadāni Wængonguī ingante apænedīnque, Bitō waa pōnī cæbi amōnīpa, ante watapæ pōnī apænecædānīmpa. ⁸ Edæ apænebo ēñeedāni. Mōnitō mæmæīdi inānite Wængonguī, Mīnitō beyæ pōnō waa cæcæboīmpa, angacāīmpa. Īnīnque, Wængonguī tōmengā nānō angāinō ante cōwē cæcæcāīmpa, ante oodeoidi ēñencædānīmpa, ante cædinque mōnō Codito tōmēnāni beyæ nē cæcā bagacāīmpa. ⁹ Tōmengā īñōmō, Idægoidi ināmaī ināni incæ Wængonguī ingante, Bitō ñāō baī ēmōmi inte pōnō waadete waa cæbi æmōnīpa, ante apænecædānīmpa, ante mānōmaī cægacāīmpa. Īlmaī ante Wængonguī beyæ nāni yewæmongāinō baī īmpa.

“Botō mānōmaī beyæ, Bitō æbānō nē waa cæbi īmīi, ante idægo ināmaī ināni weca gote apænecæboīmpa.

Bitō ēmōwo ante āmotamīni watapæ pōnī ancæboīmpa,” ante nāni yewæmongāinō baī Codito cægacāīmpa.

¹⁰ Ayæ wataa īñōmō īlmaī ante yewæmongatīmpa.

“Idægoidi ināmaī īmīni incæ mīnitō Wængonguī quīnāni tōnō godongāmæ watapæ toedāni.”

¹¹ Ayæ wæætē,

“Idægoidi ināmaī īmīni mōnō Awēnē ingante apænedīnque, Bitō waa pōnī cæbi amōnīpa, ante watapæ pōnī apæneedāni.

Wamīni mīni cabo mīni cabo tōmāmīni āmotamīni ante baī apænedīnque, Waa pōnī cæbi amōnīpa, ante watapæ pōnī apæneedāni.”

¹² Itaiya wodi adobainō ante yewæmongacāīmpa.

“Ingūipoga quēwēnāni tōmānāni Awēnē baquinque

Awænguinto tā bocate baī cædinque Yæte Pæingā īñōmō ængæ ganticæcāīmpa.

Tōmengā cæcā beyænque watapæ bacāīmpa, ante idægoidi ināmaī ināni incæ pōnencædānīmpa,” ante Itaiya wodi yewæmongacāīmpa.

¹³ Wængonguī īñōmō, Watapæ bacāīmpa, ante nē badongaingā īnongā inte īlmaī cæcæcāīmpa, āmopa. Tōmengā Tæiyæ Waēmō Ōnōwoca tæī pīñænte cæcā æte mīnitō, Watapæ bacāīmpa, ante godōmenque wede pōnencæmīnīmpa. Mānōmaī cæcæte ante cædinque Wængonguī pōnō apænecā ēñēnīnque mīnitō tōmengā ingante wede pōnēnīnque edæ gānē entawēnīnque watapæ tocæmīnīmpa, āmopa.

¹⁴ Botō tōñīfamīni ēñeedāni. Botō tōmēmo ayōmote mīnitō nē waa cæmīni īmīni abopa. Ayæ, Æbānō waa cæquīi, ante do ēñēmīni īmīnīpa. Ayæ adobaī mīnitō eyepæ īmīni inte wacā ingā wacā ingā do odōmonte apænemīni īmīnīpa, ante pōnēmopa. ¹⁵ Īnīnque botō, Mīnitō ēñēnīnō ante mīnitō ocai encadōmīni inte edæ adodō ante pōnencæmīnīmpa, ante baī cædinque pancade ante yewæmontabopa. Botō īñōmō Wængonguī waadete pōnō cæcā ænte nē entawēmo inte mānōmainō ante yewæmōnīnque edæ guīñēnāmaī inte nanguī ante yewæmōmopa. ¹⁶ Edæ tōmengā waadete pōnō cæcā ænte entawēnīnque botō Itota Codito beyænque ante idægoidi ināmaī ināni

inānite nē cæbo badinque Wængonguī ingantedō ante watapæ apænebo ēñēnānīpa. Mānōmainō ante apænebo ēñēñōmīnite Wængonguī Tæiyæ Waēmō Ōnōwoca pōnō badongā ate idægoidi ināmaī ināni incæ tæiyæ waēmō ēwocate quēwēnāni badānīpa. Mānōmaī bayōnānīte botō iñōmō, Wængonguī quī, ante pædæ godōnāni bai cædinque tōmēnāni inānite ante edæ, Wængonguī quīmīni bacæmīnīmpa, ante pædæ godōmo ænīnque Wængonguī wæætē waa tocampa.

¹⁷ Mānōmaī beyæ botō Itota Codito nempo quēwēnīnque Wængonguī beyæ cædinque edæ nanguī tobopa. ¹⁸ Codito botō tōnō guēa cæcā beyænque botō nanguī apænedīnque nanguī cæbo ate tōmēngā iñōmō tōō æmængā pōnīnque edæ idægoidi ināmaī ināni incæ edæ Wængonguī ingante ēñēnte cædāni badānīta. Botō Codito mānōmaī botō tōnō nānō cædinō ante apænedīnque edæ mānīnque ante apænedīnque guīñēnete wædinque godōmenque apænedāmaī incæboīmpa. ¹⁹ Wængonguī Tæiyæ Waēmō Ōnōwoca tæī piñænongā inte botō tōnō godongāmæ cæcā ate botō, Eñencædānīmpa, ante bamōnengæ cæbo ate nē pōnēnāni badānīta. Mānōmaī Eedotadēē iñōmō mā cæte godīnque Ididiabæ ganca tōmāo godāmæ godīnque botō Codito ingantedō ante watapæ apænedīnque adodō adodō ante tōmānō ante apænebo ēñēnānīta.

²⁰ Botō, Codito emōwo ante wadāni nāni apænedāmaī iñōmō gote tōmēngā ingantedō ante watapæ apænebo ēñencædānīmpa, ante cōwē goīnente wætabopa. Wacā onguitanca nānō tæñōnīncōnē æmōnga mæñōnāmaī incæboīmpa, ante bai cædinque botō, Wacā do nānō apænedīñōmō botō wæætē apænedāmaī incæboīmpa, ante cætābopa. ²¹ Wæætē iīmaī ante Itaiya wodi nānō yewæmongainō bai cætābopa. “Tōmēngā ingante ante ēñēnāmaī inīnāni incæ edæ do ate bai ēwocacædānīmpa. Ōnōmonca ēñēnāmaī inīnāni incæ edæ, ‘Ebānō ī,’ ante do ēñencædānīmpa.” Ante nānō yewæmongainō bai botō, Eñencædānīmpa, ante cætābopa.

Odōmā iñōmō pōinēmopa, Pabodo angampa

²² Mānōmaī beyæ botō mīnitō weca poncæ cæyōmote edæ, Wææ cæte ī, ate wædinque pōnāmaī intābopa. ²³ Iñōmō omæ idæwaa cæbo inte botō æpomē wadepo iñōnte mīnitō īmīnite aīnente wædōmopa. ²⁴ Iñinque botō, Iñicayæ ate Epāñabæ gocæ cædinque wodo tebæ godīnque mīnitō weca ēñate aboque gocæboīmpa, āmopa. Edæ botō wantæpiyæ ēñate tote quēwente ate godōmenque Epāñabæ gote cæyōmo mīnitō botō beyæ cædinque da godōmīni gocæboīmpa.

²⁵ Nōwo guiquēnē botō tāno Eedotadēē iñōmō Wængonguī quīnāni beyæ godō cæcæte ante gobopa. ²⁶ Wængonguī quīnāni incæ Eedotadēē quēwēnāni pancadōniya omæpodāni inte wædānīpa, ante pōnente wædinque wabæca Māatedōniabæ quēwēnāni tōnō Acayabæ quēwēnāni tōnō, Mōnō da godō da godō cæcæīmpa, ante pōnēnīnque watapæ todīnque tōmēnāni, Wængonguī quīnāni quī, ante do godōnānīta. ²⁷ Mānōmainō ante watapæ pōnente cædāni incæte tōmēnāni Eedotadēē iñōmō quēwēnāni inānite nē godonguēñēnāni inte da godōnānīmpa. Edæ Wængonguī Ōnōwoca nānō pōnongaincoo ante idægoidi pōnō apænedāni ēñēnte ænte ēwocadīnāni inte wabæca quēwēnāni iñōmō tōmēnāni nāni ēadīncoo incæ idægoidi beyæ ante wæætē godonguēñēnāni badīnāni inānīpa. ²⁸ Iñinque botō iñōmō mānīncoo tōmēnāni nāni da godōnīncoo idægoidi weca ænte gocæboīmpa. Godīnque botō cōwā adīnque, Nē omæpodāni inte nē wædānīque æncædānīmpa, ante wææ cæcæboīmpa.

Ædæmō cæbo ænāni ate botō māniñedē ate Epāñabæ gocæte ante cædinque mīnitō ōmæ wodo tebæ godinque mīnitō weca eñacæ poncæboimpa. ²⁹ Codito pōnō waa cædinque da pōnongā pōninque botō cōwē tōmengā tōnō waa pōni botō cæquinque mīnitō weca poncæboimpa, ante do eñēmopa.

³⁰ Botō tōniñamīni eñēedāni. Botō pæ pagænte bai nanguī cæyōmote mīnitō iñacabo cædinque botō beyæ Wængongui ingante nanguī apæneedāni, ante botō mōnō Awēnē Itota Codito beyænque āninque ayæ Wængongui Ōnōwoca nē waadete pōnengā beyænque āninque mīnitō imīnite nanguī āmopa. ³¹ Oodeabæ pōnēnāmaī ināni iñōmō Pabodo ingante wēnæ wēnæ cædāmaī incædānīmpa, ante botō beyæ ante apæneedāni. Ayæ, Eedotadēē iñōmō botō gote cæbo adinque Wængongui quīnāni incæ botō cædō ate Ao ancædānīmpa, ante apæneedāni. ³² Mānōmaī ī adinque botō, Awēnē Wængongui angā ate botō watapæ todirque mīnitō weca pōmo ate mōnō godongāmæ guēmāninque wampo pōnengāiimpā, āmopa. ³³ Wængongui nē gānē pōnengā inte mīnitō tōnō godongāmæ ongōninque pōnō cæcā ate gānē pōnencæmīnīmpa, āmopa. Mānōmaī impa diyæ, ante botō, Amēē, āmopa.

16

Waa quēwencæmīnīmpa, ante

¹ Botō iīmaī āmopa. Mōnō tōniñacā tōmengā ēmōwo Pebe mīnitō weca nōwo poncæ cæcampa. Tencodea iñōmō Codito ingante nāni godongāmæ pōnencabo iñōnānite tōmēnāni beyæ nē waa cæcā inte līngā onquiyængā iñōmō waingā pōni ingampa. ² Tōmengā nanguī ināni beyæ wææ gompodinque waa cædongā inte botō beyæ adobaī nanguī cæcantapa. Īninque edæ botō mīnitō imīnite iīmaī āmopa. Wængongui quīmō iñōmō inte mōnō Awēnē nempo quēwēñōmte Pebe adocā inte adobaī ingampa, ante adinque mīnitō tōmengā ingante waa adinque Ao ante æedāni. Ayæ tōmengā quiēmē æīnente wæcā iñongante mīnitō wæætē edæ godō cæedāni āmopa.

³ Ayæ wada Piditida tōnō Aquidæa nāna gæncaya iñōmō Itota Codito nempo quēwēninque edæ botō tōnō godongāmæ cæda īnāpa. Īninque mīnitō tōmēna īnate, Waa quēwencæmīnīmpa, ante botō beyæ ante apænemīni eñēcædaīmpa. ⁴ Wadāni botō īmote wænoncæ cædāni wæyōmote tōmēna nāna wodo wænguinque edæ botō īmote wææ cædatapa. Mānōmaī cædapa, ante botō tōmēna īnate waa ate pōnente apænebopa. Ayæ idægoidi ināmaī ināni Codito ingante nāni wayōmō pōnencabo wayōmō nāni pōnencabo adobaī tōmānāni Aquidæa nāna cædīnō ante eñēninque tōmēna īnate waa ate pōnēninque apænedānīpa.

⁵ Ayæ Itota Codito ingante nē pōnēnāni Aquidæa oncōnē godongāmæ pō guīdāni inānite, Waa quēwēedāni, ante apænemīni eñencædānīmpa. Botō æmigo Epēneto botō nē waadecā iñongante mīnitō botō beyæ apænedīnque, Waa quēwencæbiimpā, ante apæneedāni. Atiabæ iñōmō Codito ingante wadāni pōnēnāmaī iñōnāni tōmengā iñōmō tāno pōnengantapa. ⁶ Ayæ Māadiya mīnitō beyæ nanguī cædingā iñongante mīnitō wæætē tōmengā ingante Waa quēwencæbiimpā, ante apæneedāni. ⁷ Botō guīdēna Antodōnico tōnō Nōniato iñōmō botō tōnō godongāmæ tee mōnete wædīna īnāpa. Tōmēna iñōmō botō pōnēnāmaī iñōmote wēēnēñedē Itota Codito nempo quēwēna iñōnate Codito incæ tōmēna īnate da godongacāīmpa. Īninque, Itota Codito nānō nē da godongāina tānoda īna adinque mīnitō botō beyæ ante tōmēna īnate waa apæneedāni.

⁸ Ayæ wacā mōnō Awēnē nempo quēwēninqe Ampidiato ingante waadete pōnēmo inte edæ botō, Waa quēwencæbiimpa, āmopa. ⁹ Ayæ adobaī Odōmāno mōnitō tōnō godongāmæ Codito nempo quēwente nē cæcā iñongante, Waa quēwencæbiimpa, ante botō beyæ ante apæneedāni. Botō nē waadecā Etaquito ingante adobaī ante apæneedāni. ¹⁰ Ayæ Apede iñōtō Codito nempo quēwēñongante tōmengā æbānō cæcāā, ante adinque Codito tōmengā ingante wæætē, Waa cæbi abopa, angampa. Tōmengā ingante botō beyæ ante waa apæneedāni. Ayæ Aditobodo nāni quēwencabo iñānite adobaī waa apæneedāni. ¹¹ Botō guidengā Edodiyaōnō ingante waa apæneedāni. Ayæ Nāadotito guidēnāni incæ æcānō mōnō Awēnē nempo quēwēna tōmēnāni iñānite adobaī, Waa quēwencæmīnimpa, ædāni.

¹² Ayæ wada mōnō Awēnē nempo quēwēna onquiyæna Tidipina tōnō Tidipota iñōmō nē nanguī cæda iñapa. Tōmēna iñate botō beyæ ante waa apæneedāni. Ayæ wacā onquiyængā mōnō nē waadecā Pedetida iñōmō tōmengā mōnō Awēnē nempo quēwēninqe nanguī cæcantapa. Tōmengā ingante adobaī, Waa quēwencæbiimpa, ædāni. ¹³ Ayæ mōnō Awēnē nānō nē apænte ængaingā Odopo ingante waa apæneedāni. Tōmengā badā incæ adobaī botō badā bai iñōnante tōmēnā iñante botō beyæ ante waa apæneedāni. ¹⁴ Ayæ adobaī Atincodito, Pedegonte, Edēme, Patodobato, Edēma tōmēnāni nāni pōnencabo tōmānāni iñānite, Waa quēwencæmīnimpa, ante apæneedāni. ¹⁵ Ayæ wadāni Pidodogo tōnō Oodia, Nēdeo tōmengā mængā tōnō, Odimpa tōnō Wængonguī quīnāni tōmānāni iñānite, Waa quēwencæmīnimpa, ante apæneedāni.

¹⁶ Edæ, Waa quēwencæmīnimpa, ante mīnicabo incæ tōmāmīni godongāmæ waa waadete apænecæmīnimpa. Codito ingante wayōmō nāni pōnencabo wayōmō nāni pōnencabo tōmānāni mīnitō iñānite wæætē, Waa quēwencæmīnimpa, ante ānānipa.

¹⁷ Botō tōniñamīni ēñēedāni. Mīnitō adocabomīni iñōmīnite wadāni æmæmoncadō æmæmonca pā cædāni iñānite cōwā adinque edæ Baa ædāni. Doyedē mīnitō ēñēnō ante ēñēnāmai iñāni inte tōmēnāni, Mīnitō tee tēwate bai oda cæcæmīnimpa, ante cædinque wadō ante edæ odōmōnānipa cæmīni. Tōmēnāni iñānite gomō aquēnē cæmīni. ¹⁸ Mānōmai cædāni iñōmō mōnō Awēnē Codito ingante cædāmai inte nāmā nāni cæiñēnonque ante cædānipa. Tōmēnāni ante, Mīnitō iñānite waa amōnipa, ante waa tedete bai tededāni ēñēninqe pancadāniya guiquēnē, Babæ wapiticæ impa, ante cōwā adāmai iñāni inte, Nō impa, ante do pōnēnānipa. ¹⁹ Mīnitō cōwē ēñēnte cæmīni iñānipa, ante tōmānāni do ēñēnānipa. Mānōmai beyæ botō iñōmō nanguī tobopa. Incæte, Quīnō waa cæquī, ante mīnitō ædæmō ēñēncæmīnimpa, ante ainēmopa. Quīnō wēnæ wēnæ cæquī, ante edæ ædæmō ēñēnāmai inte edæ gomō acæmīnimpa, ante ainēmopa. ²⁰ Wængonguī, Gānē pōnente quēwencæmīnimpa, ante nē pōnō cæcā iñōmō edæ Tatāna ingante mīnitō ōnōwa gāānē wææntodongā ate mīnitō wæætē do pinā gāwate bai cæcæmīnimpa. Nōwo iñōmō mōnō Awēnē Codito nānō waadete pōnō cædō incæ entawencæmīnimpa, āmopa.

²¹ Botō tōnō guēa cædongā Timoteo iñōmō mīnitō iñānite, Waa quēwencæmīnimpa, angampa. Ayæ botō guidēnāni Dotio tōnō Yatōnō adobaī Totipatedo adobaī mīnitō iñānite, Waa quēwencæmīnimpa, ānānipa.

²² Nōwo botō Tedetiyoibo iñōmō Pabodo ōnōneque tedecā ēñēninqe iñā cadota ante nē yewæmōnimo inte botō adobaī, Waa quēwencæmīnimpa, āmopa.

²³ Gayo adobaī mīnitō iñānite, Waa quēwencæmīnimpa, angampa. Tōmengā oncōnē Codito ingante nāni pōnencabo cōwē godongāmæ ponte apænedānipa.

Ayæ tōmengā botō imote adobaī, Pōe, angā ēñēninqe edæ botō ñōwo tōmengā oncōnē owobopa. Ayæ iñōmō quēwēnāni awēnē nānō äinta æninqe adocanque Edaato nāni ānongā iñōmō tōmengā, Tōmānāni beyæ æbānō cæquī, ante nē angā iñōmō tōmengā tōnō mōnō tōññacā Coadoto adobaī, Waa quēwēdāni, ānāpa.

²⁴ Mōnō Awēnē Itota Codito mīnitō imīnite pōnō waadete cæcæcāimpa. Mānōmaī impa, ante botō, Amēē, ante āmopa.

Wængonguī ingante waa ate apænecæimpa, ante

²⁵ Ñōwo iñōmō Wængonguī ingantedō ante watapæ botō apænedō ante ayæ Itota Codito ingantedō ante mōnō apænedō ante nē pōnēmīni inte mīnitō tæī piñænte ongoncæmīnimpā. Wængonguī eyepæ inte mānōmaī pōnō cæcæcāimpa. Tōmengā māñinō ante ñōwo tæcæ nānō odōmōnō ante wēēñēñedē pedæmāmo iñonte cōwē wantæpiyæ wē wodonte bai cægacāimpa.

²⁶ Ñōwo guiquēnē, Codito æbānō cægacāī, ante inguipoga tōmāmæ quēwēnāni ēñente wede pōnēninqe botō imote ēñente cæcædānimpā, ante cædinque Wængonguī cōwē nē Quēwēnongā inte do odōmongā acæimpa. Tōmengā angā ēñēninqe tōmengā beyæ nē apænegaināni wæætē edonque pōni yewæmōnāni acæimpa.

²⁷ Īninqe Wængonguī nō pōni ēñēnongā inte adocanque Wængonguī ingampa, ante adinque mōnō, Bitō adobique ñāō bai ēmōmi inte edæ waa cæbi amōnīpa, ante mōnō Itota Codito ēmōwo apænedinque Wængonguī ingante edæ cōwē apænecæimpa. Mānōmaī impa diyæ, ante botō, Amēē, āmopa.

1 Coodintoidi inänite Pabodo cadota ante tänota nänö yewæmongainta

Coodinto iñömö Codito ingante nāni pönencabo

¹ Wængonguī angä eñëninque Itota Codito botö imote aa pedinque da godongä godömo inte botö Pabodobo yewæmömopa. Mönö tönifnacä Totënë tönö guëa apænete ate yewæmömo aedäni. ² Coodinto iñömö mñitö Codito ingante mñi godongämæ pönencabo inömini inte eñëedäni. Wængonguī, Botö quimñi badingque mñitö Itota Codito nempo quëwëninque täiyæ waëmö ewocate quëwencæmñinipa, ante cædinque añecä pönimñi inte mñitö acæmñinipa, ante yewæmömopa. Ayæ adobaī, Mönö Awënë Itota Codito emöwo ante nē aa pedäni tömämæ quëwënäni incæ acædäninipa, ante yewæmömopa. Itota Codito iñömö mönö Awënë ingä incæ tömënäni Awënë adocä ingampa. ³ Mönö Mæmpo Wængonguī tönö mönö Awënë Itota Codito godongämæ waadete pönö cæda ate mñitö gänë pönente quëwencæmñinipa, ante botö Totënë tönö ämönapa.

Codito nänö entawënö bai nanguī entawëmompä, ante

⁴ Wængonguī waadete pönö cæcä ate mñitö Codito Itota nempo quëwëninque tömengä nänö entawënö bai nanguī entawëmñinipa, ante adinque botö mñitö beyæ ante Wængonguī ingante waa ate pönëninque cöwë apænebopa. ⁵ Edæ Codito nempo quëwëñömñinite tömengä nänö ate eñgëainö ante pönö apænecä eñëninque mñitö do entawëmñinipa. Ìnque mäninö nänö ate eñgëainö ante eyepæ entawëmñi Ìnque mñitö nō apænemñi bamñinipa. ⁶ Edæ mönitö, Itota iñömö adocä mönö Codito inongä ingampa, ante apænemöni eñëninque mñitö Ao äninque, Näwangä impa, ante wede pönëninque waa cæte quëwëmñi acæimpa.

⁷ Mäninö beyæ, Mönö Awënë Itota Codito æyedëno pöninque edonque pöni a ongonguingä, ante wänö cöninque mñitö wæntæye badämaī incæmñinipa, ante cædinque Wængonguī Önöwoca pönö apænecä eñëninque mñitö eyepæ inte waa cæquimñi Ìmñinipa. ⁸ Mñitö cöwë Ìnque baganca täī ongonte oda cædämaī incæmñinipa, ante Wængonguī pönö cæcä ate mönö Awënë Itota Codito pöñedë mäniñedë ate mñitö wentamö ædö cæte entawenguimñi. Edæ dæ ampa. ⁹ Wængonguī, Botö Wengä Itota Codito iñömö mñitö Awënë inongä ingampa. Ìnque mñitö tömengä nempo quëwëninque tömengä tönö godongämæ cæte quëwencæmñinipa, ante mñitö Ìmñinite añete aa pecantapa. Mänömaī ante nē aa pecä iñömö tömengä nänö angainö bai edæ cöwë nē ædæmö cæcä ingampa cæmñi.

Wæætë godö wæætë godö cædämaī Ìedäni, ante

¹⁰ Botö tönifnamñi, botö mönö Awënë Itota Codito emöwo apænedinque Ìmaī ante ämo eñëmaimñinipa. Mönö pönencabo Ìmompä, ante adodö pönëninque mñitö tömämñi godongämæ Ao ante adodonque cædinque näwæ godämaī Ìedäni. ¹¹ Botö tönifnamñi apænebo eñëedäni. Codoeidi mñitö Ìmñitedö ante apænedinque, Coodintoidi nāni pönencabo incæ wæætë godö wæætë godö tedewënäni. ¹² Ante apænëdäni eñëninque botö, Ìmaī impa, ante apænebo eñëedäni. Pancamñinipa, “Mönitö Pabodo nänö nē emiñæmöni Ìmönipa,” ante cæmñinipa. Pancamñinipa guiquënë, “Apodo nänö nē emiñæmöni Ìmönipa,” ante

cæminipa. Pancamīniya guiquēnē, “Pegodo nānō nē ēmiñæmōni imōnipa,” ante cæminipa. Ayæ wæætē pancamīniya guiquēnē, “Codito nānō nē ēmiñæmōni imōnipa,” ante cæminipa. Mānōmāinō ante mīnitō wadō wadō ante tedewēmīni awædō.

¹³ Iñæmpa Codito nāmā incæ ante dicæ wadō wadō ante apænecantawogaa. Incæte Codito nempo quēwēmīni inte mīnitō, Pabodo ēmiñæmōni imōnipa, āmīni. Apodo ēmiñæmōni imōnipa, āmīni. Pegodo ēmiñæmōni imōnipa, āmīni. Ayæ botō Pabodobo iñōmote wadāni awæ ñænquedimæ gōnōninque mīnitō beyæ wænōnāni dicæ wæntawogaa. Ayæ botō Pabodobo ēmōwo apænedinque mīnitō dicæ æpænē guimīnitawogaa.

¹⁴ Botō mīnicabo weca quēwēninque Codipo tōnō Gayo inate mānīnaque inate æpænē guidōmo guiidatapa, ante pōnēninque waa tobopa. ¹⁵ Mānōmāi ī adinque mīnitō, Pabodo ēmōwo apænedinque æpænē guitamōnipa, ante ædō cæte angūmīni, ante tobopa.

¹⁶ Æ, tæcæ pōnēmopa. Etepānāidi inānite adobaī guidōmo guiidānitapa. Wadāni inānite wabānō guidōmoī, ante wīi pōnēmopa. ¹⁷ Edæ Codito, Bitō æpænē guidōmi guicædānimpā, ante botō imote ānāmāi ingacāimpā. Wæætē, Tæi piñænongā inte Codito mōnō wædō ante teēmē mongænte ñænquedimæ wængā beyænque mōnō quēwengæimpā, ante apænebi ēñencædānimpā. Ayæ, Mānīne ante wadāni, Ōnonque impā, ante ānāmāi incædānimpā, ante wææ cædinque bitō waodānique nāni nanguī ēñente apænedō ante apænedāmāi incæbiimpā. Wæætē, Codito ingantedō ante watapæ apænebi ēñencædānimpā, āninque Codito botō imote da godongā gobo imopa.

Codito Wængonguī nānō ēñēnō entawēninque tæi nānō pñæno entawengampa

¹⁸ Itota ingante nāni timpogaiwæ ante apænemōni adinque nē wænguināni guiquēnē, Māniwæ ante apænete wædānitedō abi, ante badete todānipa. Codito ængā beyænque nē quēwēmōni guiquēnē, Codito māniwāa wængā beyænque Wængonguī tæi piñænte pōnō cæcampa, ante wede pōnente apænemōnipa. ¹⁹ Edæ Wængonguī, Iīmāi cæcæboimpā, angampa, ante yewæmonte ongompa.

“Nē adāni ōnonquedō ante ēñēnānipa, ante botō nanguī nāni ēñēnō ante wido cæcæboimpā. Nē nāmā mā pōnente ēñēnāni guiquēnē ōnonque ēñēnānipa, ante botō nāmā nāni ēñēnō ante Baa ancæboimpā,” ante Wængonguī cæcampa, ante yewæmongatimpā.

²⁰ Mānōmāi cædinque Wængonguī, Inguipogaque quēwēnāni nāni nanguī ēñēnō incæ ōnonque impā, ante ēñenguēnē quēwēmīni, ante do odōmongampa. Iñinque adocanque ingante, Nanguī ēñēmipā, ante Wængonguī dicæ anguingāa. Dodāni nāni wææ angainō ante nē nō odōmōmi imipā, ante Wængonguī dicæ anguingāa. Nāmā mā pōnēninque nē nō apænebi imipā, ante Wængonguī dicæ anguingāa. Edæ dæ ampa. ²¹ Edæ, Inguipogaque quēwēnāni ocaidē nanguī ēñēnāni incæ ōnonque nāni ēñēnō beyænque botō imote ædō cæte ate baī pōnenguīnāni, ante Wængonguī nē nō ēñēnongā inte cæcampa. Codito nānō cægainō ante apænemōni adinque iñāni iñōmō, Ōnonque tedewēnānitedō abi, ante badete todānipa. Iñæmpa Codito nānō cægainō ante badete nāni todō beyænque mīnitō wæætē nē wede pōnēmīni inte quēwēncæmīnipā, ante Wængonguī nōingā pōnēninque pōnō cæcampa.

²² Oodeoidi, Ōönædē nāni mā cæi baī bamōnengæ cæmīni ate ēñēmaimōnipā, ante ānewēnānipā. Guidiegoidi guiquēnē, Nāmā mā

pönëninque eñëmaimönipa, ante cædänipa. ²³ Mönitö guiquënë, Codito ingante awænëmæ timpote wænönäni wængacäimpa, ante mäninonque ante apænemöni eñëminipa. Mänömainö ante apænemöni eñëninque oodeoidi guiquënë Baa ante tee tæwate bai oda cædänipa. Guidiegoidi guiquënë mänine ante eñëninque badete todänipa. ²⁴ Mönitö oodeomöni iñömönite minitö guidiegomöni iñömönite ædänimë inänite Wængongui apænte ængä ingaimö inte mönö iñömö edæ iimaï ante pönëmompä. Wængongui nänö nö eñënö incæ Codito encacampa, Wængongui nänö tæi piñænö incæ Codito entawengampa, ante do edæ eñente pönëmompä.

²⁵ Wængongui önonque ante cæcampa, ante pönëwëminitawoo. Mönö waocabo nanguï eñëmö imompä, ante pönëminitawoo. Iñæmpä, Nanguï eñëmö, ante tedewëmö incæ önonque wædämö inte cæmompä. Wæætë Wængongui guiquënë önonque cæte bai cæcä incæ godömenque gomonga nanguï eñengä inte cæcampa. Ayæ, Wængongui aquingä inte cæcampa, ante pönëminitawoo. Iñæmpä mönö waocabo tæi piñæmö imompä, ante tedewëmö incæ mönö önonque aquimö inte cæmompä. Wæætë Wængongui guiquënë në önonque cæte bai cæcä incæ godömenque gomonga tæi piñænongä inte cæcampa.

²⁶ Iñänäni, æbänö iñömönite Wængongui aa pecantapa, ante pönëedäni. Tömämöni dicæ nanguï eñëminö ingaminiyaa. Inguipogaque quëwënäni nanguï nani encadö bai minitö tömämöni dicæ adobai nanguï encamöni ingaminiyaa. Tömämöni dicæ nanguï tæi piñæmöni ingaminiyaa. Awëndi pæingä nänö awënë baquinque eñacä bai minitö tömämöni dicæ adobai awënë baquinque eñaminiyaa. Mänömaï iñömönite Wængongui dicæ aa pecantawogaa. Incæte adocanque adocanque mänömaï iñömönite Wængongui aa pegacäimpa.

²⁷ Wæætë, Në nanguï eñënäni incæ guñente wæcædänimpa, ante cædinque Wængongui iimaï cægacäimpa. Inguipoga quëwënäni inänite cöwä adinque në önonque cæi bai cædäni inänite apænte ængacäimpa. Ayæ, Në tæi piñænäni incæ guñente wæcædänimpa, ante cædinque Wængongui inguipoga në wæntæte cædäni inänite apænte ængacäimpa. Ininque tömengä mänömaï cæcä ate waa cædänipa, ante adinque në tæi piñænäni wæætë guñente wædänipa. ²⁸ Wængongui inguipoga quëwënäni nani waa pönö mäincoo ëwente bai bacæimpa, ante cædinque, Inguipoga pancacooga wiwa incoo impä, ante adinque mäincooque æninque waa cægacäimpa. Ayæ, Önoncooque impä, ante mönö änoncoo adinque tömengä ingante do æninque nö cægacäimpa. Ayæ, Dæ ampa, mönö änoncoo incæ do adinque Wængongui mäincoo æninque nanguï cægacäimpa. ²⁹ Ininque Wængongui weca ongöninque waocä adocanque incæ, Wæëmö imopa, ante ædö cæte anguingä.

³⁰ Wængongui pönö ængä beyænque minitö Codito Itota nempo quëwëminipa. Wængongui Codito Itota ingante da pönongä æninque mönö Codito nänö eñënö bai ænte entawëmompä. Tömengä nempo quëwëninque mönö tömengä nänö nö cæte quëwënö bai adobai ænte entawëmompä. Ayæ tömengä tæiyæ waëmö nänö ëwocadö adobai pönongä æninque tæiyæ waëmö ëwocate quëwëmompä. Ayæ Codito ængä beyænque mönö abæ tawænte gote bai quëwëmompä. ³¹ Ininque Wængongui beyæ nani yewæmongainö bai iimaï ante bacæimpa. “Waocä, botö nanguï waëmö pönö imopa, ante nämä waa ate apæneinente wædongä iñömö tömengä wæætë, Mönö Awënë adocanque waëmö pönö ingampa, ante apænecä ininque waa cæbaingampa.”

2

Itota Codito ingante awāa timpodāni wængacāimpa, ante

¹ Iñānāni botō mīnitō weca apæneceate ante mā pōninque nē nangui ēñēnāni nāni waa ēñēnō bai ēñēnāmai imo inte bai pontabopa. Waodāni nāni waa tede bai tededāmai imo incæ pontabopa. Wæætē, Wængongui nāwangā waa pōni cægacāimpa, ante māninonque ante apæneceate ante pontabopa. ² Itota Codito ingante do adimo inte botō, Tōmenganque nānō cægañonque ante ēñente bai cædinque botō coodintoidi weca gote apænebote, ante godāmai iñedē do ānōmoimpa. Iñinque, Wadō nāni nangui ēñēnō ante ēñēnāmai inte bai cædinque botō, Itota Codito ingante awāa timpodāni wængacāimpa, ante māninonque ante ēñente bai gote apænebote, ante pōnēninque mīnitō weca pontabopa. ³ Ayæ botō aqūiimo pōni inōmo inte mīnitō weca pōninque, Ædō cæte apænequimoo, ante guñēnete wædinque nangui do do wāate pōmo aminitapa. ⁴ Pōninque botō, Mānōmai impa, ante dicæ tōmēmo nangui ēñēnō ante tedetabogaa. Wængongui beyæ apænebo ēñēdāni, ante ānimo incæ botō dicæ waa pōni tedete bai apænetabogaa. Wæætē Wængongui Ōnōwoca tōnō āawocaque bai ēwocadinque botō tōmengā nānō tæi piñænō beyænque apænebo aminitapa. ⁵ Mānōmai cædinque botō, Waomō mōnō nangui ēñēnō beyænque ante wii pōnencæmīnimpā. Wæætē Wængongui nānō tæi piñænō beyænque wede pōnēmīni bacæmīnimpā, ante cæcæte ante mānōmai ponte apænetabopa.

Wængongui cebānō emongāā, ante tōmengā Ōnōwoca odōmongā ēñēmompā, ante

⁶ Wæætē ædæmō pōnēnāni æmæwo pæte bai iñōnānite mōnitō tōmēnāni weca ongōninque mōni nangui ēñēnīnō ante apænemōnīpa. Incæte ñowodāni nāmā nāni ēñēnō ante apænedāmai imōnīpa. Ayæ imæca awēnēidi nāni dæ goquincabo tōmēnāni nāni ēñēnō ante apænedāmai imōnīpa.

⁷ Wæætē Wængongui awēmō iñonte nānō ēñengainō ante apænemōnīpa. Tōmengā iñōmō, Botō nangui ēñēnōmo inte pōnō cæbo beyænque botō nē apænte ænānique ñāō apāite bai entawencædānimpā, ante inguipoga dæ āñedē wēēñēdē pōni incæ mōnō imonte ante pōnō cægacāimpa. Incæte, Mānōmai cæcæboimpā, ante tōmengā nānō ēñēnō ante wadāni ēñēnāmai incædānimpā, ante wææ cædinque wē wodonte bai cædinque tōmengā nānō ēñengainō ante ñowo ganca awēmō iñōmō entawēnongāimpā. Ñowo iñōmō tōmengā awēmō nānō ēñengainō ante tæcæ apæneca ēñēnimōni inte mōnitō wæætē mānīnō ante ñowo apænemōnīpa. ⁸ Inguipoga awēnēidi guiquēnē Wængongui nānō wē wodonte ēñengainō ante dicæ ēñēnāniyaa. Edæ mānīnō ante ēñente bai tōmēnāni mōnō Awēnē ñāō bai entawēnongā iñongante awāa timpote wæñōnāmai incædōnānimpā. ⁹ Wæætē iīmai ante yewæmongatimpā. “Botō imote nē waadete pōnēnāni iñōmō watapæ quēwencædānimpā, ante Wængongui do pōnō badongacāimpa.

Mānīnō nānō pōnō cægañō ante waocā dicæ acāa.

Mānīnō ante dicæ ēñengāa.

Edæ waocā nāmanque mā pōnēninque dicæ ēñengāa,”

ante nāni yewæmongai bai iñque bacæimpā, ante mōnitō apænemōnīpa.

¹⁰ Wængongui Ōnōwoca guiquēnē tōmāā cōwā adinque Wængongui awēmō nānō pōnō badongainō ante edonque adinque do ēñengampa. Iñinque mōnonga pō guidinque tōmengā mōnō imonte edonque odōmongā ēñēmompā.

¹¹ Edæ mōnō waocabo incæ, Adocanque ōnōwēnenque pōnēē cōñongante wacā, Æbānō ante pōnēē congāā, ante ædō cæte ēñenguingāā. Edæ nē pōnēē

congä guiquenë, Botö æbänö ante pönëe cōmoo, ante tōmengä adocanque önōwēnenque pōnente eñengampa. Wængonguī adobaī ingampa. Wængonguī æbänö ante awēmö pönëe congää, ante waocä ædö cæte eñenguingää. Wængonguī æbänö ante pönëe congää, ante tōmengä Önōwoca adocanque eñēñongä wadäni eñēñamaī Inānipa. ¹² Wængonguī iñōmō, Botö æbänö pönōmo æmīni, ante edonque acæminimpa, ante cædinque tōmengä Önōwoca ingante da pōnongä ænte ewocate amompa. Īnīnque inguipogaque quēwēnāni nāni pōnēnō baī entawēnāmaī Inōmō inte mōnō Wængonguī tōmengä Önōwoca tōnō äawoacque baī ewocamō inte do eñēmompa.

¹³ Mōnitō iñōmō, Wængonguī mänōmaī pōnō cæcampa, ante odōmoncæte ante mā pōnente mōni eñēnō ante apænedāmaī ĩmōnīpa. Wæætē Wængonguī Önōwoca pōnō odōmonte apænecä eñente ewocadinque tōmengä nānō odōmōnō mōni eñēnō ante apænemōnīpa. Edæ Wængonguī Önōwoca nānō pōnēnō ante eñencæte ante Wængonguī Önōwocaque nānō apænede ante apænete eñente ewocacæimpa, ante pōnēnīnque mōnitō mānīneque ante apænemōnīpa.

¹⁴ Edæ, Wængonguī Önōwoca nānō pōnēnō æbänö ĩ, ante tōmengä Önōwoca tōnō äawoacque baī nē ewocadānīque pōnente eñēñānīpa. Īnīnque nē ömæwocacä baī ingä guiquenë tōmengä ædö cæte edonque eñenguingää. Edæ oda cæcampa. Mānīnō ante apænemōni eñēnīnque tōmengä, Önōnquedō ante apænete wæcantedō abi, ante badete todingue edæ, Baa angampa.

¹⁵ Wængonguī Önōwoca tōnō äawoacque baī nē ewocacä guiquenë, Tōmää æbänö ĩ, ante cōwä adīnque edonque pōni eñengampa. Wæætē edæ, Tōmengä æbänö ewocacää, ante wadāni cōwä adāni incæte ædö cæte apænte anguīñāni.

¹⁶ Ayæ, “Wængonguī Awēnë æbänö nanguī eñente pōnengää, ante æcänö eñenguingää. Edæ Wængonguī ingante godōmenque odōmōñānīpa diyæ eñente baquingää,” ante yewæmongatimpa. Mōnō guiquenë Codito eñente nānō pōnēnō ante entawēmompa.

3

Wængonguī ingante nē cæmō mōnō godongāmæ cæcabo

¹ Īñāñāni eñēedāni. Codito Önōwoca tōnō nē ædæmō ewocadāni ĩñānite botö Wængonguī Önōwoca nānō apænedō ante do apænebopa. Mīnitō guiquenë nempoga eñāmīni inte Codito nempo quēwēmīni incæ tæcæ eñādāni baī pædāmāi Inōmīni inte mīnitō inguipogaque ante pōnēmīni awædō. Mänōmaī beyæ botö adobaīnō ante ædö cæte mīnitō ĩmīnite apænequīmoo. ² Edæ tæcæ eñādāni iñōmō tæēmō mōnō cænguī capo capo cænāmaī Inānīpa. Mīnitō iñōmō tōmēñāni baī adobaī ĩmīni inte Wængonguī Önōwoca nānō apænedō ante ædö cæte eñenguīmīni. Īnīnque tæcæ eñādingä ingante goōmæ di godōnete baī cædinque botö mīnitō ĩmīnite apænedīnque adodeque adodeque apænebo eñēmīnitapa. Īñæmpa ñowo ganca tæcæ eñādāni baī ĩnōmīni inte mīnitō æiquedō eñenguīmīni. ³ Edæ cōwē inguipogaque ante pōnēmīni inte pancamīniya, Wacä gomonga cæcampa, ante pīinte wæmīnīpa. Pancamīniya guiquenë wæætē godō wæætē godō pīinte ānewēmīnīpa. Mänōmaī cæte quēwēnīnque mīnitō ömæwocadāni baī ĩmīni inte inguipogaque ante pōnente quēwēmīni abopa. ⁴ Edæ ĩmāi ante tedewēmīnīpa. Adocanque, “Botö Pabodo nānō nē ēmīñæmo ĩmopa,” ante cæcampa. Wacä, “Botö guiquenë Apodo nānō nē ēmīñæmo ĩmopa,” ante cæcampa. Mänōmaīnō ante mīnitō ömæwocamīni inte baī cæmīni awædō.

⁵ Īñæmpa, Apodo æcănō ingää, ante pönēmīni. Pabodo æcănō ingää, ante pönēmīni. Edæ botō mōnō Awēnē nānō pōnō anganca tōmengā ingante nē cæbo bagaboimpa. Apodo adobai mōnō Awēnē nānō pōnō anganca Awēnē ingante nē cæcā bagacāimpa. Īnque tōmengā beyæ nē cæmōnaque ĩmōna inte mōnatō mīnitō ĩmīnite apænemōna ēñente pönēmīnitapa. ⁶ Tōmēmō mīnte bai cædinque botō mā apænebo ate mīnitō tæcæ ēñēmīnitapa. Apodo guiquēnē, Cōñe bate pæcæimpa, ante æpæ gao caadāni bai cædinque mīnitō ĩmīnite godōmenque nanguī odōmonte apænecā ēñēmīnitapa. Incæte mōnatō apænemōna beyænque ædō cæte tā bocate bai pæwocaquīmīni. Wængonguī adocanque nē apænecā beyænque mīnitō tā bocate bai pæwocate ēwocamīnīpa. ⁷ Īnque mīnte bai nē apænebo inte botō tōnō Apodo æpæ gao cæte bai nē odōmonte apænecā tōnō mōnatō ĩñōmō ōnōmōnaque ĩmōnāpa. Wængonguī tōmenganque, Pæe, ante nē ānongā ingampa. Tōmengā adocanque angā beyænque pæmīnitapa.

⁸ Botō nē apænebo tōnō Apodo nē odōmonte apænecā tōnō mōnatō, Pæcæimpa, ante āanque bai Wængonguī beyænque cæmōnāpa. Īnque botō nē apænebo ĩñōmote tōmengā nē odōmonte apænecā ĩñongante Wængonguī ĩñōmō, Mīnatō apænegainō beyæ æeda, ante eyepæ pōnī pōnongā æncæmōnaimpa. ⁹ Mōnatō ĩñōmō Wængonguī tōnō godongāmæ cæmōni inte mōni nē cæcabo ĩmōnīpa. Mīnitō guiquēnē Wængonguī quīmīni ĩnōmīni inte tōmengā gōnea bai pæwocamīni ĩmīnīpa.

Ayæ adobai tōmengā nānō mænōincō bai ĩmīnīpa. ¹⁰ Nē ēñente mænongā ĩñōmō, Wænōmænæca ĩnō mænongæimpa, ante cædinque dicaco cō cō cæcampa. Botō ĩñōmō Wængonguī waadate pōnō cæcā ate nē ēñente mænongā bai adobai bagaimo inte botō mīnitō weca mā ponte apænebo ēñēmīnitapa. Nōwo guiquēnē botō mānōmaī cō cæte bai mā apænebo ēñēmīni ate wadāni ponte botō cō cædinca wænōmænæca mænonte bai cædinque godōmenque odōmonte apænedāni ēñēmīnīpa. Īnque edæ æcănō mānīnca mænonte bai odōmōna tōmengā tōingā mænonte bai nō ēñente odōmonte apænequēngā ingampa. ¹¹ Waodāni, Dica adocaa wænōmænæca ĩnō mænongæimpa, ante tāno nāni cō cædinca bai Itota Codito adocanque Tānocā ingampa. Īnque, Wacā tānocā ingampa, ante bai cædinque mīnitō ædō cæte wacā mīñæ gomīnīi. Īñæmpa, Dica wacaa wænōmænæca ĩnō mænonte bai babaimpa.

¹² Ayæ tānoca nāni gō cædinca bai Itota Codito Tānocā ĩñongante mōnitō, Mānīnca adocaa wænōmænæca mænongæimpa, ante bai cædinque odōmonte apænemōnīpa. Nē mænōnāni ĩñōmō oodo ænīnque padata ænīnque dica nāni waa pōnī adīnca ænīnque, Quīncamē ēwēnāmaī ĩnguīnca, ante ænīnque tōmēnāni nāni mænōnō bai cædinque pancamōniya nō pōnī odōmonte apænemōni ate mōnitō apænedō wido cædāmaī ĩngæimpa. Wadāni guiquēnē awæ ænīnque gaguīmæ amīmō ī ænīnque ayawāa amīwæ ænīnque quīncōmē ēwēnguīncoo ænīnque godō mænōnāni bai cædinque tōmēnāni ōnonque odōmonte bai apænedānīpa. ¹³ Edæ Wængonguī nānō apænte anguīōnæ ĩnque ba ate gonga nāni angā nanguī bæcocæimpa. Mānīñedē ate edæ, Mōnitō æbānō nōwo odōmonte apænemōnīi, ante nāō gongæ edonque acæimpa. Wængonguī mānīñedē mōnitō apænedō apænte ancæte ante cædinque nē tante bai cæcā ate pancadea æmæwo montæ gōne ate pancadea ongō æncæcāimpa.

¹⁴ Īnque, Æcănō mænongāincō montæ gōnāmaī ī, ante adīnque Wængonguī eyepæ pōnongā ænīnque nē mænongāingā wæætē watapæ quēwencæcāimpa. ¹⁵ Wacā guiquēnē tōmengā nānō mænongāincō do montæ gō adīnque Wængonguī mānīncō nē mænongāingā ingante

pönönämaï incæcäimpa. Incæte mäningä waocä gonga bæcoyömö wodii tao winongä bai ömæpocä wæyongante Wængongui ængä beyænque tömenganque quëwencæcäimpa.

¹⁶ Minitö iñömö, Wængongui Önöwoca ingante do æninqe tömengä ingante ëwocamompa, ante ëñenämaï iminitawo. Wængongui tæiyæ waëmö oncö bai mönö baö ëñamompa, ante ëñenämaï inte bai cæmini awædö. ¹⁷ Wængongui oncö tæiyæ waëmö oncö i iñonte waocä bæ tate wido cæcä adinqe Wængongui näëmæ tömengä ingante edæ ömæe ëwencæcäimpa. Ayæ adobai Wængongui tæiyæ waëmö oncö bai baö ëñayöminite waocä wapiticæ odömonte apænecä beyæ mini godongämæ apænedincabo incæ oda cæte näwæ gomini adinqe nê wapiticæ apænecä ingante Wængongui adobai wido cæcæcäimpa.

¹⁸ Minitö, Ñowodäni nani ëñenö ante do nangui ëñemönipa, ante pönëminitawoo. Iñæmpa mänömainö ante minitö nämä babæ pönëwëninge apænemini awædö. Nê nö ëñëmini bacæte ante minitö ñowodäni nani nangui ëñëwënö ante wido cædinque ömæcamini badinqe nê ëñëmini bacëminimpa. ¹⁹ Inguipogaque quëwënäni nangui ëñënäni incæte Wængongui, Önonquedö ante ëñëmini awædö, angampa. Edæ Wængongui beyæ apænedinqe iïmaï ante yewæmongadänimpa. “Ömë nämä nänö ñönömë incæ waocä näëmæ wini wini dawacä bai nê nangui ëñënäni adobai nämä nani ëñënö beyænque näëmæ oda cædänipa, ante cæbopa,” Wængongui angampa. ²⁰ Ayæ adobai, “Nê ëñënäni iñömö tömënäni nani nangui ëñente pönënö incæ idiquibæ impa, ante edæ mönö Awënë do ëñengampa,” ante yewæmonte ongompa.

²¹ Iñinque, Botö waocä adocanque nänö nê ëmiñæmo inte tobopa, ante änämaï incëminimpa. Iñæmpa mönitö waomini inte tömämöni minitö beyæ ante cæte quëwëmönipa. ²² Botö Pabodobo inömo incæ Apodo ingä incæ Pegodo ingä incæ minitö beyæ ante cæte tömämöni quëwëmönipa. Inguipo incæ inguipoga ongoncoo incæ minitö beyæ ongompa. Mönö quëwëmämö incæ mönö wænguiämö incæ minitö beyæ ongompa. Ñöwopämo incæ müimämö iñcayæ ponguiämö incæ quincöomë incæ edæ minitö beyæ tömancoo ongompa. ²³ Ayæ minitö wæætë Codito beyænque quëwëmini iminipa. Codito wæætë Wængongui beyænque quëwëngä ingampa, ante ämo ëñëmaïminipa.

4

Itota nänö nê da godongäimöni inte iïmaï cæmönipa

¹ Iñinque mönatö Pabodobo tönö Apodo iñömönate minitö iïmaï ante ëñenguëñëmini iminipa. Codito tönö godongämæ cædinque tömengä beyæ ante Pabodo tönö Apodo nê cæda inapa. Ayæ godömenque, Wængongui tömengä nänö awëmö ëñengainö ante pönö apænecä ëñëna inte tömëna mäninö ante nê apæneda inapa, ante ëñenguëñëmini iminipa. ² Iñinque Awënë Wængongui iïmaï angampa. Botö waocä ingante quiëmë pönö cæbo æninqe tömengä botö pönönonque entawëninge nö pönente ædæmö aaquëngä ingampa, ante Wængongui cöwä adinqe, Æbänö botö beyæ wææ aabii, ante apænte angampa. ³ Iñinque minitö, Pabodo æbänö cæcää, ante apænte ancæte ante cöwä amini incæte botö wædämaï imaimopa. Nê apænte nani änoncabo incæ botö imote adobai cöwä adinqe apænte änäni ëñëninge botö wædämaï imaimopa. Tömëmo incæ, Æbänö botö cöwë wede pönente cæbo imoo, ante ædö cæte nämä angui moo. ⁴ Botö, Tömëmo wënæ wënæ cædämaï inömo imopa, ante

pönēmopa. Incæte, Wentamō mongænāmaī īmopa, ante ædō cæte botō nāmā anguimoo. Mōnō Awēnē adocanque botō īmote nē apænte angā ingampa.

⁵ Mānīnō beyæ mīnitō, Īnque bayedē tōmāā apænte angæīmpa, ante mōnō Awēnē ponganca ee adinque apænte ānāmaī īedāni. Tōmengā ĩñōmō waomō mōnō awēmō cægāinō ante, Edonque pōni acæīmpa, ante ñāō ĩñōmō māo odōmoncæcāīmpa. Ayæ, Æbānō cæcæboīmpa, ante mōnō ōnōwēnence pōnengāinō incæ edonque odōmongā gongæ nāwæ acæīmpa. Ayæ, Adocanque æbānō waa cægacāi, ante, Wacā æbānō waa cægacāi, ante watapæ apænedinque tōmāmō mōnō cægāinō ante Wængonguī pōnō apæneccā ēñente mōnō tocæīmpa.

⁶ Īñānāni ēñēedāni. Waocā adocanque ingante, Waingā ingampa, ānīnque wacā ingante wīi pīncæmīnīmpa, ante yewæmongatīmpa. Īnīnque botō mīnitō beyæ ante, Mōnatō æbānō cæmōna, ante yewæmontabopa. Mīnitō, Apodo tōnō Pabodo æbānō cæda īnaa, ante pōnēnīnque Wængonguī beyæ nāni yewæmongāinonque ante mānīnonque ēñente cædinque godōmenque cædāmaī incæmīnīmpa, ante cætabopa. ⁷ Īñæmpa tōmāmō ōnōmonque ĩñōmonte Wængonguī, Bitō gomonga waēmōmi pōnī īmīpa, ante dicæ apænte angantawogaa. Bitō entawēnō ĩñōmō tōmēmi ocaidē mā bitō pōnēnō beyænque dicæ entawēmītawogaa. Mōnō Codito adocanque edæ pōnō apæneccā ēñente nē ænte entawēmi ĩnōmi inte bitō, Tōmēmoque nāmā beyænque entawēmopa, ante ædō cæte ānewēmīi.

⁸ Mīnitō, Eyepæ pōni do entawēmōnīpa, ante baī cæmīni awædō. Mīnitō waa quēwēnīnque ante do eyepæ ænte baī cæmīni awædō. Edæ Pabodoidi mōnitō beyæ cædāmaī ĩñōnānite tōmēmōni nāmā beyænque awēnē odeyemōni bamōnīpa, ante cæte baī cæmīni awædō. Īñæmpa mīnitō nāwangā awēnē odeyemīni bamīni baī mōnitō adobaī awēnē odeyemōni badīnque nanguī tocædōmōnīpa. ⁹ Wæætē Itota nānō nē da godongaincabo ĩñōmōnīte Wængonguī incæ, Yæmīñæ pōni gote nāni wængūinque godānītedō amīni, ante badete tote baī odōmongā awædō. Mānōmaī cæcā adinque waodāni incæ anquedoidi incæ Wængonguī nānō nē badongāināni tōmānāni mōnitō ĩmōnīte adīnque badete todānīpa, ante awædō.

¹⁰ Edæ mīnitō adobaī cædinque ĩmaī pīimīni wæmōnīpa. Mōnitō Codito beyæ cæyōmōnīte mīnitō, Ocai ōmæcamīni inte cæmīnīpa, ante pōnēmīnitawoo. Wæætē nāmanque ante pōnēnīnque, Codito nempo quēwēnīnque mōnitō ocai encamōni inte nanguī ēñēmōnīpa, ante tedewēmīni awædō. Ayæ, Pabodoidi aquīi pōnī ĩñōnānite mōnitō wæætē tæēmō pīñæmōni ĩmōnīpa, ante pōnēmīni awædō. Wadāni adobaī mīnitō ĩmīnīte ante apænedīnque, Wāimīni pōnī ĩmīnīpa, ānīnque mōnitō ĩmōnīte ante wæætē, Ōnōmīnīque ĩmīnīpa, ante pīñānīpa.

¹¹ Ayæ mōnitō ñōwo ganca cænguī cænāmaī inte gue ænente awædō. Tepæ bedāmaī inte gæwænte awædō. Weocoo wāā tēincōo mongænte awædō. Ayæ tæi tæi pānāni caate wæmōnīpa. Ayæ oncō ōmaamōni inte ¹² mōnitō ōnompoca nanguī cædinque ænte quēwēmōnīpa. Wēnæ wēnæ ĩmīnīpa, ante pīñāni wædinque mōnitō wæætē, Mīnitō ĩmīnīte Wængonguī pōnō waadete cæcæcāīmpa, ante cæmōnīpa. Ayæ togænte pānāni ate wædinque mōnitō wæætē pīñāmaī piyænē cæmōnīpa. ¹³ Mōnitō ĩmōnīte ante apænedīnque, Wīwa cædānīpa tōō, ante babæ ānāni ēñente wædinque mōnitō wæætē waadete apænemōnīpa. Edæ, Ēwēmōīmæ gadonguīmæ baī ĩmīnīpa. Ōmæpocoo wido cæquincoo baī ĩmīnīpa tōō, ante pīñīnque inguīpogaque

quëwënanî iñômô mônîto ïmônîte ñôwo ganca cõwë wîdo cædâni wædômônî ïmônîpa.

¹⁴ Mônîto beyæ cædinque Pabodoidi wæwente quëwënanîpa, ante adinque mînitô wæætë guingo imonte wæcæmînimpa, ante botô dicæ mânômainô ante yewæmômogæa. Wæætë botô wëmîni baî iñômînite botô, Mânômaî cædinque mîni wæquinque ïmpa, ante wææ yewæmômopa. ¹⁵ Mînitô ïmînite nè aadâni iñômô diete mîido ganca mânîmpodâni iñônânîte mônîto mînitô mæmpoidi baî ïmônî guiquënë mëmônîya pônî ïmônîpa. Edæ, Itota Codito nempo quëwëninque botô, Itota Codito pônô cæcâ beyænque mônô watapæ quëwengæïmpa, ante apænebo ëñëmînitapa. Mânômainô ante apænebo ëñëninque mînitô mēmpoga ëñamîni ate botô mînitô mæmpo baî bagaboïmpa. ¹⁶ Mânômaî beyæ botô mînitô ïmînite waadete apænedinque, Botô mæmpobo cædô baî mînitô adobaî cæcæmînimpa, ante nanguî âmopa.

¹⁷ Botô tømâmæ godinque wayômô Codito ingante nâni godongâmæ pønencabo weca wayômô nâni pønencabo weca go guidinque ïmaî ante apænebopa. Mônô Itota nempo quëwëninque nô ëñëninque waa cæte quëwengæïmpa, ante odômte apænebopa. Mânômainô ante botô odômte apænedô baî botô tømëmo adodô ëñente quëwëmo abaimpa. ïninque mînitô, Pabodo mânômaî quëwengampa, ante ëñencæmînimpa, ante botô nè waadecâ Tîmote ingante da godômo mînitô weca ponte apænecæcæïmpa. Tômengâ iñômô botô wengâ baî ïnongâ inte Codito nempo quëwëninque cõwë nô pønente cæcâ ingampa. Tômengâ mînitô weca ponte apænedinque, Pabodo nânô odômte apænedô baî tømengâ nâmâ adodonque ante cõwë ëñente quëwengampa, ante apænecâ ëñëninque adodô ante pønencæmînimpa.

¹⁸ Pancamîniya, Pabodo wîi pongâ awædô, ante, Tømëmônique wæætë nè ämônî incæmônîmpa, ante botô ïmote piinte tedewëmîniya. ¹⁹ Incæte mônô Awënë Ao angâ ate botô oo poncæboïmpa. Ponte adinque botô, Tømëmônique nè ämônî incæmônîmpa, ante nè tedewëmîni æbânô tedewëmîni, ante änâmaî incæboïmpa. Wæætë adomîni mîni tæî piñænô ante cõwâ adinque apænte ancæboïmpa. ²⁰ Wængonguî Awënë Odeye nempo nè quëwëmô iñômô wîi õnonque mônô tedequinô beyænque quëwëmopa. Wæætë edæ tæî piñænte mônô quëwënguîno ante mônô tømengâ nempo quëwëmopa. ²¹ Mînitô æbânô cæmîni ate mînitô weca ponguîmo. Edæ mîni cædinô adinque botô panguënëmo inguîmo, ämînitawo. Wæætë waadete pønëninque ædæmô cæquënëmo inguîmo, ämînitawo.

5

Në wîwa towengâ ingante apænte angæïmpa, ante

¹ Edæ, Në wîwa towengâ incæ coodintoidi nâni pønencabo tönô godongâmæ ongongampa, ante tededâni ëñentamônîpa. Mînitô weca ongongâ adocanque tømengâ wæmpo nânôogængâ incæ manguîwengampa töö. ïñæmpa Wængonguî ingante nè ëñënamâi ïnâni incæ mânômaî wënæ wënæ cædâmaî iñônânî mînitô weca ongonganque do cæcâ apa cæmîni. ² Në wîwa towengâ tönô godongâmæ ongômîni incæte mînitô, Tømëmônique waa cæmônî ïmônîpa, ante tedewëmîni awædô. Incæte Ca ca wæmîni baî waa incædônîmpa. Në wîwa cæcâ ingante, Mônîto weca ongônâmaî gobæwe, ante da godômîni gocâ baî waa incædônîmpa. ³ Botô guiquënë nânënë quëwëmo incæte mînitô weca owote baî õnõwënenque pønëmo ïmpa. ïninque mînitô weca owote baî botô nè wîwa cæcâ ingante do apænte âmopa. ⁴ Mînitô Awënë Itota ëmõwo apænedinque godongâmæ põñômîni botô nânënë quëwëmo incæte adoyômô

owote bai pöncæboimpa. Ayæ Awënë Itota tæi piñængä inte mînitö tönö adoyömö ongoncæcäimpa. Ìnînce mînitö ìmaï cæedäni. ⁵ Awënë nänö ponguionæ ìfedë nè wîwa cædongä tömengä önöwoca quëwencæcäimpa, ante ìmaï cæedäni. Tömengä nänö wîwa ëñayö ëwente bacæimpa, ante cædinque mînitö tömengä ingante Tatäna nempo pædæ godömini æncæcäimpa.

⁶ Mînitö, Waa ìmöni ìmönipa, ante tædîncque wîwa tedewëminipa töö. Edæ dodäni nani yewæmongainö ante adämaï inte bai tedewëminipa. “Päö tömäo yedæ æmpoquinque wædænque da wënäni” bai mînitö adobai adocanque wîwa cæcä ingante mini oda cæquinque ee amîni ongongampa. ⁷ Mîni pönencabo waëmö pöni mîni entawenguinque päö yedæ æmpoqui wido cæte bai cædinque nè wîwa cædongä ingante da tadömini gocæcäimpa. Edæ mönö Codito ìñömö wîwa mönö cædinö ante ñä mënongacæte ante nämä wepæ godongacäimpa. Edæ dodäni, Nè wænonguëngä wænönämaï inte wodo pænta gocæcäimpa, ante, Patowa, ante codotedo nani nè wænongaingä bai mönö Codito ìñömö adobai ìngongä inte wængacäimpa. ⁸ Ìnînce mönö päö yedæ æmpoqui ömæmö i cænte bai cædinque wîwa mönö cædö ante wido cædinque mönö piinte cædämaï inte waa cæte quëwengæimpa. Ayæ ææmæ watapæ bete bai cædinque, Quinö näwangä pöni i, ante Ao ante æninque mönö nö pönente quëwengæimpa.

⁹ Nè wîwa towënäni tönö godongämæ cædämaï ìedäni, ante botö cadota ante do yewæmömo amînitawo. ¹⁰ Mänömainö ante yewæmöninque botö, Inguipoga quëwënäni tönö godongämæ cædämaï ìedäni, ante dicæ antabogaa. Ìñæmpa wîwa towënanique, wacä qui nè æinente wædänique, wacä qui nè ö æänanique inguipoga quëwënänipa. Ayæ, Wængongui impa, ante badönicque nè ædæ wæænte quëwënänique mänimpodänique inguipoga quëwënänipa. Ìnînce ædö cæte tömënäni weca cædämaï inguü. Edæ inguipo ëmö cæte gote bai tömënäni weca ongönämaï inguü.

¹¹ Wæætë mäninö ante yewæmöninque botö, Mîni pönencabo incæ adocanque wîwa cæcä adinque mînitö tömengä tönö godongämæ cædämaï ìedäni, ante wææ ämpa. Edæ, Nè pönengä incæ wîwa towengantawo. Nè pönengä incæ wacä qui æinente wæcantawo. Wængongui impa, ante badonte nè pönengä ædæ wæængantawo. Wacä ingante, Wënæ wënæ ìmipa, ante angantawo. Tî nämæ bete nè pönengä incæ quidi quidi dowængantawo. Wacä qui æncæte ante babæ cædinque ö ængantawo. Ìnînce tömengä, Nè pönëmo ìmpa, ängongä incæ mänömaï wîwa cæcä adinque mînitö tömengä tönö godongämæ cædämaï ìnte godömenque tömengä tönö godongämæ contate cænämaï ìedäni, ante botö wææ ancæte ante ämpa.

¹² Mînitö Codito nempo mîni quëwencabo incæ näëmæ apænte änämaï ìmîni ìnte oda cæminipa. Wadäni ìnänite Codito nempo quëwënämaï ìñönänite botö, Tömënäni æbänö wënæ wënæ cædäni, ante ædö cæte apænte anguümo. ¹³ Wængonguinque tömënäni ìnänite apænte ancæcäimpa. Incæte mîni cabo incæ adocanque wîwa cæcä adinque mînitö tömëminî, Mönitö weca ongönämaï gobæwe, ante da tadömini tao gocæcäimpa.

6

Nè pönënämaï ingä apænte ancæcäimpa, ante änämaï ìe

¹ Mîni pönencabo ìñöminite adocanque bitö ìmite wënæ wënæ cæcantawo. Ìnînce bitö, Tömengä ingante apænte ancædänimpa, ante cædinque ëñënämaï ìnani weca ædö cæte ænte gobii. Wæætë Wængongui quinäni ìnänite angä

ēñēninque tōmēnāni wæætē, Tōmengā æbānō wēnæ wēnæ cæcāā, ante apænte adinque nō ancædānimpa. ² Edæ mōnō Wængonguī quimō iñōmō edæ, Inguipoga tōmāmæ quēwēnāni æbānō wēnæ wēnæ cædāni, ante nē apænte anguimō imōmpa. Incæte mīnitō, Mānōmaī cæcæmōnimpa, ante ēñēnāmaī inte baī cæmīni awædō. Tōmāmæ quēwēnāni Inānite nē apænte anguimīni inte mīnitō ñōwo wædænque mīni apænte anguēnēnō incæ quīnante ānāmaī imīnii. ³ Mōnō iñōmō Wængonguī anquedoidi Inānite nē apænte anguimō inōmōimpa, ante ēñēnāmaī imīnitawo. Mānināni Inānite nē apænte anguimō inōmō inte mōnō pōnencabo ñōwo mōnō wædō ante mōnō godōmenque apænte angæimpa, ante pōnēmīniyaa.

⁴ Codito ingante mīni godongāmæ pōnencabo incæ mīni wædō ante apænte ancædānimpa, ante mīnitō ædānidō Inānite āmīni apænte ānāni. Īñæmpa, Ōnōnānique Inānīpa, ante mīni ānōnāni incæ mānīnō ante nē apænte ānāni badānitawo. ⁵ Mīnitō guingo imonte mīni wæquinque cæmīnīpa, āmo ēñēmaimīnīpa. Nāna pōnēcaya incæ nāēmæ wæætēdō wæætē āna wædinque mīnitō, Mōnō pōnencabo incæ æcānō nē nō ēñēnongā inte apænte anguingāā, ante adinque tōmengā ingante anguēnēmīni imīnīpa. Īñæmpa mīnitō weca nē nō ēñengā adocanque dæ angantawogaa. ⁶ Wæætē nāna pōnēcaya incæ nāēmæ pīnīnque adocanque, Botō beyæ apænte ānīnque ĩngā ingante pancædānīpa, angampa. Ayæ godōmenque wēnæ wēnæ cædinque tōmengā nānō tōñīnācā ingante nē pōñēnāmaī Ināni weca ænte godinque, Apænte ānīnque pancæmīnīpa, angā pānānīpa.

⁷ Īñæmpa mīni pōnencabo incæ nāēmæ pīnīnque, Apænte ante pangæimpa, ante dobæ oda cæmīnīpa tōō. Edæ wacā wīwa cæcā ate wædinque bitō wæætē piyænē cæbi waa imaimpa. Tōmengā babæ wapiticæ ānīnque ō ængā wædinque bitō piyænē cæbi waa imaimpa. ⁸ Incæte piyænē cæquēnēmīni incæ mīnitō wæætē babæ cædinque ō æmīni awædō. Wacā ingantē wīwa cæmīni awædō. Mānōmaī cædinque mīnitō mīni pōnencabo incæ wæætē godō wæætē godō wīwa cæmīnīpa tōō.

⁹ Wīi ēñēnte cædāni iñōmō Wængonguī Awēnē Odeye nempo cōwē guīdāmaī inguināni Inānīpa, ante mīnitō iñōmō ēñēnāmaī inte baī cæmīnīpa tōō. Mānōmainō ante pōñēninque mīni oda cæquinque i apa cæmīni. Nōwo godōmenque āmo ēñēdāni. Pancadāniya towente cædānīpa. Pancadāniya guīquēnē, Wængonguī impa, ante nāni badōñīñōmō gāānē ædæ wæænānīpa. Pancadāniya guīquēnē nānōogæ Ināmaī iñongante godō guēa mōwēnānīpa. Pancadāniya guīquēnē nāna onguīñēcaya incæ nāna gæncaya inte baī cædinque guēa monte quēwēnāpa. ¹⁰ Pancadāniya guīquēnē awēmō ænānīpa. Pancadāniya guīquēnē wacā māincoo ante æñēnte wædānīpa. Pancadāniya guīquēnē tī nāmæ bete quīdi dowæñānīpa. Pancadāniya guīquēnē wacā ingante, Bitō wēnæ wēnæ imīpa tōō, ante pīnīnque babæ ānānīpa. Pancadāniya guīquēnē babæ apænedīnque ō ænānīpa. Mānōmaī wīwa cædōnāni inte tōmēnāni Wængonguī Awēnē Odeye nempo cōwē guīdāmaī inguināni Inānīpa, āmo ēñēmaimīnīpa. ¹¹ Mīni pōnencabo incæ pancamīniya mānōmaī ingaimīni inte ñōwo iñōmō æbānō imīnii. Edæ mōnō Awēnē Itota Codito emōwo beyānque Wængonguī Ōñowoca pōñō ñā mēnongacā ate mīnitō tæiyæ waēmō ēwocate quēwēmīni adinque Wængonguī, Botō ayōmo mīnitō waa cæmīni imīnīpa, angampa.

Baonga quēwēninque mōnō tæiyæ waēmō entawente quēwengæimpa

¹² “Botō cæñēnonque ante cæbo incæ Wængonguī wææ ānāmaī ingampa,” ante apænedānīpa. Incæte botō cæñēnonque ante quēwēmo baī wīi botō waa

quēwenguinque incædōmoimpa. Botō cæinēnonque ante cæbo incæ Wængongui wææ ānāmaī ingampa, ante nāni ānō iñōmō edæ nāwangā impa. Incæte botō cæinēnonque ante cæbo bai botō ñā cæyænte bai wæwenguēnēmo inte awædō.

¹³ Ayæ cængui iñōmō. “Mōnō cæncadē guiquinque cængui æmompā. Ayæ adobaī mōnō cæncadē cæī cængui beyænque ēnēmompā,” āmīnitawo. Iñæmpa cængui incæ cæinca incæ, Idæwaa impa, ante Wængongui wo ēwencæcāimpa. Ayæ adobaī mōnō baō iñōmō wīī towenguinque beyæ ēñamompā. Wæætē mōnō Awēnē beyænque mōnō baō ēñate quēwēmompā. Ayæ mōnō baō beyæ ante mōnō Awēnē pō guicā ate tōmēngā tōnō āawoacque bai ēwocamompā.

¹⁴ Iñinque edæ mōnō Awēnē ingante Wængongui tæēmō piñæninque angā ñāni ōmæmongā bai mōnō imonte adobaī tæēmō piñæninque angā ñāni ōmæmonguīmō imompā.

¹⁵ Edæ, Codito qui, ante mōnō baō incæ godōmō ængā ate mōnō tōmēngā baō bai ēñamompā, ante ēñēnāmaī imīnitawo. Iñinque Codito baō bai ēñabo inte botō iñōmō edæ onquiyængā māincoo beyæ ante nē towente quēwēngā tōnō edæ ædō cæte godō monguīmoo. ¹⁶ Edæ, Æcānō mānōmaī godō mōna tōmēngā nē tote quēwēngā tōnō adocanque bai bacampa, ante ēñēnāmaī imīnitawo. Edæ, “Mēnaa iñina incæ tōmēna wæætē nāna gæncaya mōninque adocanque bai bacædaimpā,” ante apænete yewæmōnte ongompā. ¹⁷ Ayæ mōnō Awēnē nempo quēwēngā tōmēngā iñōmō mōnō Awēnē tōnō āawoacque bai ēwocacampa cæmīnii.

¹⁸ Æcānō godō towēna tōmēngā nāmā baō cædingā inte nāmā baō nānō wæwenguinque wēnæ wēnæ cæcampa. Wæætē yabæque mōnō wēnæ wēnæ cædō beyæ mōnō baō ædō cæte wæwenguī. Mānōmaī i ñinque mīnitō iñōmō wodii winonte towēnāmaī quēwēdāni. ¹⁹ Edæ Wængongui tōmēngā Tæiyæ Waēmō Ōnōwoca ingante mīnitonga da pōnongā pō guiite owocampa. Iñinque mīnitō, Botō baō tōmēmo qui ēñabopa, ante ædō cæte āmīnii. Iñæmpa Wængongui Ōnōwoca tæiyæ waēmō oncō bai ēñate apa ānewēmīnii.

²⁰ Wængongui nanguī pōni godonte ængā beyænque mīnitō baō tōmēngā qui ēñapa. Mānōmaī beyæ mīnitō, Tōmānāni Wængongui ingante waa ate ēñencædānimpā, ante cædinque mīnitō baonga quēwēninque edæ waa cædāni.

7

Nāna gæncaya iñōna inte iīmaī cæbainapa

¹ Ñōwo iñōmō mīni wædō ante yewæmōmīni ænte adinque botō iīmaī āmopa. Onguiñængā iñōmō onquiyængā ingante mōnāmaī ingā waa tobaimpā.

² Incæte, Wīī towēinente wæcæcāimpa, ante cædinque onguiñæñāni tōmānāni, Botō nānōogængā incæcāimpa, ante mōnāni waa iīmampa. Ayæ onquiyæñāni adobaī tōmānāni, Botō nānōogængā incæcāimpa, ante mōnāni waa iīmampa.

³ Onguiñængā iñōmō tōmēngā nānōogængā āñongante, Botō nānōogæmi iīmipa, ante Ao āninque āāodenque moncæcāimpa. Ayæ onquiyængā adobaī, Botō nānōogæmi iīmipa, ante āninque tōmēngā nānōogængā āñongante āāodenque moncæcāimpa. ⁴ Monte ate nānōogængā tōnō adocanque bai ba adinque onquiyængā wæætē, Onguiñængā qui, ante ēñadinque, Tōmēmo baonque ēñabopa, ante ædō cæte anguingāā. Ayæ adobaī onguiñængā wæætē, Onquiyængā qui, ante ēñadinque, Tōmēmo baonque ēñabopa, ante ædō cæte anguingāā.

⁵ Nānōogængā angā ēñente edæ Baa ānāmaī. Pancaguēnēa Wængongui ingante nanguī apænecæte ante guēa Ao āninque nānēneto nānēnē

wantæ iñō mōninque idæwaa. Edæ, Tatāna angā wacā ingante towēinente wæcæ wæ, ante wææ cædinque adodē iñōmō wæætē moncædaimpa.

⁶ Incæte mǎnōmaī āninque botō, Mīnitō botō ānō baī cōwē cæcæmīnīmpa, ante wææ ānāmaī īmopa. Wæætē, Mīnitō mǎnōmaī cæmīni waa īmaimpa, ante mǎnīnonque ante apænebopa. ⁷ Onguiñænāni tōmānāni botō baī wēmō cædāni quēwēnāni baī waa incædōnīmpa, ante pōnēmopa. Incæte Wængongui pancadāniya īnānite pōnō apænedinque, Bitō mōnāmaī inte adobique wēmō cæte botō beyæ cæcæbiimpa, āninque wadāni īnānite, Bitō mōmi ate mīna gæncaya botō beyæ cæcæmīnīmpa, angampa.

⁸ Botō, edēningā ingante apænedinque ayæ owæmpoingā ingante apænedinque, Botō baī wēmō cæbi waa īmaimpa, āmopa. ⁹ Incæte adocanque, Onquiyængā ingante cōwē moncæboimpa, ante wæcā adinque botō, Bitō cōwē moncæbiimpa, āmopa. Edæ tōmengā towēinente wædāmaī incæcāimpa, ante wææ āninque botō, Tōmengā godōmenque waa quēwencæcāimpa, ante ee abo moncæcāimpa.

¹⁰ Do mōningā ingante edæ botō īīmaī āmopa. Æ, wadō āmopa. Wīī botō āmopa. Mōnō Awēnē incæ īīmaī angampa. Onquiyængā incæ tōmengā nānōogængā ingante ēmō cæte godāmaī incæcāimpa, angampa. ¹¹ Incæte ēmō cæte gocā īninque wæætē adodō pōninque adocā ingante mongā waa īmaimpa. Wæætē adodō pōnāmaī ingā īninque tōmengā ee quēwēinente wacā ingante cōwē mōnāmaī incæcāimpa. Ayæ onguiñængā incæ nānōogængā ingante pāmænte godāmaī incæcāimpa, ante mōnō Awēnē angampa.

¹² Wamīni īmīnite guiquēnē mōnō Awēnē ānāmaī īñongā botō wæætē īīmaī āmopa. Onguiñenganque nē pōnengā inte, Botō nānōogængā pōnēnāmaī ingā incæ botō tōnō ee quēwengampa, ante adinque tōmengā nānōogængā ingante pāmænāmaī incæcāimpa. ¹³ Onquiyenganque nē pōnengā inte, Botō nānōogængā pōnēnāmaī incæ botō tōnō ee quēwengampa, ante adinque tōmengā nānōogængā ingante pāmænāmaī incæcāimpa. ¹⁴ Onquiyenganque nē pōnengā īñongante tōmengā adocanque nānō pōnēnō beyænque Wængongui, Mīna gæncaya botō quīmīna īmīnāpa, ante onguiñængā ingante edæ do ængampa. Ayæ adobaī onguiñenganque nē pōnengā īñongante tōmengā nānō pōnēnō beyænque Wængongui, Mīna gæncaya botō quīmīna īmīnāpa, ante onquiyængā ingante adobaī do ængampa. Wængongui mǎnōmaī cæcā beyænque mīnatō wēnāni nāni waa quēwenguinque Wængongui quīnāni badānīpa. Wængongui wīī mǎnōmaī cæcā baī mīnatō wēnāni iñōmō Wængongui quīnāni īnāmaī inte nōwadāni baī nānēnē pæcædōnānīmpa.

¹⁵ Bitō adobique nē pōnēmi iñōmite bitō nānōogængā pāmænte gocā wædinque ee abi gocæ. Mǎnōmaī ēmō cæte gocā adinque bitō tōmengā ingante nānōnāmaī inte baī badinque ee quēwencæbiimpa. Edæ, Piyænē cæte quēwēdāni, ante Wængongui tōmāmō īmonte aa pegacāimpa. ¹⁶ Bitō onquiyæmi tōmēmi waa cæbi adinque bitō nānōogængā wabānō waa pōnente quēwēmaingā, ante ædō cæte ēñēmīi. Edæ onguiñæmi adobaī tōmēmi waa cæbi adinque bitō nānōogængā wabānō waa pōnente quēwēmaingā, ante ædō cæte ēñēmīi.

¹⁷ Incæte mōnō Awēnē, īīmaī cæe, angā ate ēñente wædinque bitō tōmengā nānō ānōnonque ante cæte quēwencæbiimpa. Ayæ, Æbānō botō nānōogængā ēayōmo mōnō Awēnē aa pecantapa, ante pōnēninque bitō māniñedē bitō nānōogængā ēagai baī adobi inte quēwencæbiimpa. Botō iñōmō Codito ingante nāni pōnencabo wayōmō nāni godongāmæ poncabo wayōmō nāni godongāmæ

poncabo weca gote apænedinque, Mänömaï cædäni, ante tömänäni inänite ante apænebopa.

¹⁸ Onguïñæmi ïmi do ëö togæñimi ïñömite Wængongui aa pecantawo. ïninqe bitö, Bagäacä bai babote, ante cædämaï incæbiimpa. Eö togæmi inte ee quëwëe. Wæætë ëö togænämaï ïñömite Wængongui aa pecantawo. ïninqe bagäabi inte ee quëwëe. ¹⁹ Edæ ëö togæmö incæ bagäamö incæ waomö önömonque ïmopa. Wïi mäninö beyænque waa quëwëmö ïmopa. Wæætë Wængongui nänö wææ angainö ëñente beyænque waa quëwëmopa. ²⁰ ïninqe, Æbänö engæñömo Wængongui aa pecantawoo, ante pönëninque bitö adobi inte cöwë quëwëe. ²¹ Bitö wacä beyænque cæte nê quëwëmi ïñömite Wængongui bitö ïmite aa pecantawo. ïninqe bitö nê cæbi inte piyænë cæte wædämaï incæbiimpa. Incæte bitö ïmite ñimpo cædinque, Abæ tawænte goe, angä ëñëninque ee goe.

²² Waocä beyænque cæte nê quëwëmi ïñömite mönö Awënë aa pecantawo. ïninqe mönö Awënë incæ pönö ñimpo cædinque, Abæ tawænte goe, angä ëñëninque ee gote bai ëwocabipa. Wæætë bitö waocä beyænque nê cæbi inämaï ïñömite mönö Awënë aa pecantawo. ïninqe Codito nê aa pete ængä beyænque bitö cæte nê quëwëmi babipa. ²³ Edæ Wængongui tömengä nänö Tæiyæ Waëmö Wengä ingante godongä beyænque mönö wæætë tömengä quimö bagamöimpa, ante pönëninque munitö wæætë waocä beyænque nê cæte quëwëmi badämaï ïedäni. ²⁴ ïñänäni ïmaï ante cædäni. Botö Wængongui Awënë nempo quëwëninque tömengä nänö änonque ëñente cæcæboimpa, ante cædinque munitö Wængongui nänö aa peyedë mïni ëagai bai adomïni inte quëwëedäni.

²⁵ Ayæ, Mönämaï inäni æbänö quëwenguënänäni inänii, ante mönö Awënë angampa diyæ ëñenguimoo. Incæte Wængongui waadete pönö apænecä ëñëninque botö nê ëñënömo bagaimo inte mä pönëninque ämo ëñëmaïmïnipa.

²⁶ Mönö wæwenguimämo oo pönï impa, ante pönëninque bitö, Ñöwo botö nänöogængä ingante æbänö ëate quëwëmoo, ante pönëninque ñöwo bitö ëadö bai adobi inte cöwë quëwenguënëmi ïmipa, ante pönëmopa. ²⁷ Onguïñæmi ëñëmi, Bitö nänöogængä ingante do mömitawo. ïninqe, Pämæncæboimpa, ante änämaï ïe. Wæætë wacä ingante ämopa. Bitö wëmö cæbitawo. ïninqe, Botö nänöogængä, ante diqui diqui minämaï ïmi waa ïmaimpa. ²⁸ Incæte ñöwo mömi incæ wënæ wënæ cædämaï inte mömipa. Ayæ baquécä adobai tö mongä incæ wënæ wënæ cædämaï inte mongampa. Incæte æcänö möna tömengä inguipoga quëwente nänö caate wæquinque mongampa. Mänömainö ante yewæmöninque botö, Minitö caate wædämaï incæmïnipa, ante wææ ämopa.

²⁹ ïñänäni, Ñöwopämo wïi wantæpiyæ ingæimpa, ante wædinque ämopa. Edëningä nänö pönënö bai nê manguiwengä incæ adobai pönengä bai waa ïmaimpa. ³⁰ Æcänö Ca ca wæda tömengä ïñömö wïi wæcä bai bacä ïninqe waa ïmaimpa. Æcänö Ca ca toda tömengä wïi tocä bai bacä ïninqe waa ïmaimpa. Æcänö godonte æna tömengä ömæpocä bai bacä ïninqe waa ïmaimpa. ³¹ Inguipoga mönö cædö ante æcänö cæda tömengä mäninö ante änämaï inte bai cæcä ïninqe waa ïmaimpa. Edæ inguipoga quëwëninque mönö cædö oo pönï ëwente baquinö angüënë.

³² Edæ munitö, Æbänö cæquimoo, ante wædämaï incæmïnipa, ante botö ïmaï ante wææ ämopa. Nê wëmö cæcä guiquënë, Æbänö cæbo ate mönö Awënë waa toquingä, ante pönëninque tömengä mönö Awënë beyænque ante quëwengampa. ³³ Do möingä guiquënë inguipoga nänö quëwenguinö ante

pönëninque, Æbänö cæbo ate botö nänöogængä waa toquingä, ante wæcampa. ³⁴ Ìninque tæcæ tæcæ pönente cæcampa. Onquiyængä guiquënë owæmpoingä ingä incæ baquēcä ingä incæ mönö Awënë beyæ ante pönëninque, Æbänö botö baö tæiyæ waëmö ëñaquimoo, ayæ, Æbänö botö önöwoca tæiyæ waëmö ëwocaquimoo, ante cæcampa. Do möingä guiquënë, Æbänö cæbo ate botö nänöogængä waa toquingä, ante inguipogaque nänö quëwenguinö ante wæcampa.

³⁵ Mäninö ante botö wii minitö iminite wææ cæcæte ante ämopa. Wæætë minitö mini watapæ quëwenguinque ante botö, Mönö Awënë ingante æmæ pönënamäi inte nöingä cæte quëwencæminimpa, ante ämopa.

³⁶ Onguïñængä adocanque guiquënë, Botö wengä baquēcä do picængä bacampa, ante adinque botö tömengä ingante godonguënemo ìmopa, angä ìninque tömengä nänö änö bai cædinque ee godongä moncæcäimpa. Edæ mänömaï godöninque tömengä wii wënæ wënæ cæcä ingampa. ³⁷ Wacä guiquënë mimöno ædæmö nö pönëninque, Botö wengä baquēcä picængä bacä incæte botö piyænë cæte godönämaï incæboimpa, angampa. Ìninque wadäni tömengä ingante wææ änämaï iñönäni tömengä, Tömëmoque botö äninö bai cæcæboimpa, ante në ëñente pönëninque godönämaï ingampa. Tömengä adobai waa cæcampa. ³⁸ Ìninque tömengä wengä baquēcä iñongante edæ, Moncæcäimpa, ante në godongä guiquënë waa cæcampa. Wæætë wacä, Mönämaï incæcäimpa, ante wii godongä guiquënë tömengä godömenque waa cæcampa.

³⁹ Nänöogængä ayæ miingä quëwëñongante onquiyængä iñömö tömengä tönö cöwë quëwenguënengä ingampa. Wæætë nänöogængä wængä owæmpote ate tömengä abæ tawænte bai adocanque quëwengampa. Do owæmpoingä inte, Wacä ingante möinëmopa, angä ëñëninque minitö, Tömëna mönö Awënë nempo nana quëwencaya ìnapa, ante adinque möinente nänö wædö ante ee godömini moncædaimpa. ⁴⁰ Incæte botö, Owæmpoingä ee wëmö cædinque godömenque watapæ quëwëmaingampa, ante pönëmopa. Edæ Pabodo ìmo Wængonguï Önöwoca tönö äawocaque bai ëwocabo inte mänömainö ante pönëmopa.

8

Mönitö wængonguï cænguï, ante wadäni nani cönöni ante

¹ Wadäni, Mönitö wængonguï cænguï impa, ante nani cönönincoo ante adinque minitö, Önonque cænguï impa, ante abaimpa, ämñitawo. Näwangä tömämö mini änö bai do ëñëmoppa. Incæte, Tömëmoque do ëñëmopa, ante në angä iñömö tömengä nämä ængö cæte bai cædinque wadäni inänite piinte bai cæcampa. Wæætë në waadecä guiquënë wadäni inänite ængö cæte bai cædinque tömënäni inänite waadete cæcampa. ² Waocä, Tömëmo do ëñëmopa, ante në anewengä guiquënë tömengä nö nänö ëñenguënönö ante ayæ ëñënamäi inte cæcampa. ³ Wæætë Wængonguï ingante në waadedäni inänite do againgä inte tömengä tömënäni inänite pönengampa.

⁴ Ìninque, Mönitö wængonguï cænguï impa, ante wadäni nani cönönincoo ante ñöwo apænebo ëñëedäni. Tömënäni nani, Mönitö wængonguï impa, ante nani cönöninca önoncaque impa, ante mönö do ëñëmoppa. Ayæ adobai, Näwä Wængonguï adocanque pöni ingampa, ante do ëñëmoppa. ⁵ Wængonguïidi nani änönäni incæ awënëidi nani änönäni incæ nanguï pöni inänipa. Näwangä impa. Incæte tömënäni, Wængonguïidi inänipa, ante nani änönäni inguipoga

incæ öönædë incæ ongönäni incæte, ⁶ Wængongui mönö Wæmpocä iñömö adocanque pöni ingampa. Öönæ incæ inguiipo incæ öönædë ongoncoo incæ inguiipoga ongoncoo incæ tömancoo incæ tömengä adocanque badonte aacä beyænque edæ ongoncoopa. Ayæ adobaï mönö tömengä nempoque quëwëmoppa. Ayæ Itota Codito mönö Awënë adocanque pöni ingampa. Tömengä tönö godongämæ cædinque Wængongui tömancoo badongacäimpa. Adocä Codito tönö godongämæ cædinque Wængongui pönö cæcä ate mönö quëwëmoppa.

⁷ Mäninö ante pancamonga guiquënë ëñëmoppa. Pancadäniya guiquënë nê pönänäni incæ mäninö ante ëñänämaï inänipa. Inäni Codito ingante tæcæ pönänäni iñömö tömënäni wëenëñedë, Mönitö wængongui impa, ante badonte cönonte ædæ wæænte cægäinäni inänipa. Nöwo iñömö tömënäni Codito ingante tæcæ pönente ate, Wadäni wængongui cængui incæ cæninque wentamö mongænte wæcæ wæ, ante guïñente wädäni incæte do edæ cænänipa. Mänömaï Codito ingante æmæ pönänäni inte tömënäni wadäni nänäni wængongui cængui cæninque nämanque nänäni æmæ pönënö beyænque nämä apænte do wentamö entawënäni inänipa. ⁸ Incæte cængui önonque iñonte mönö cænänämaï imö beyænque ædö cæte wiwa entawenguii. Wæætë mönö cæmö beyænque ædö cæte waa entawenguii. Edæ mönö imonte cængui beyænque Wængongui dicæ waa aquingäa.

⁹ Wængongui wææ änämaï ingä adinque minitö do cæminitawoo. Inäempa mänömaï cæmini adinque wadäni nê æmæ pönänäni adobaï cænänäni ininque tömënäni tee tëwate bai oda cæbäinänipa. Mänömaï impa, ante pönëninque minitö, Oda cædämaï incædänimpa, ante cædinque ee cænänämaï imæwedäni ämopa. ¹⁰ Edæ, Mönitö wængonguiidi oncö impa, ante tömënäni nänäni äninconë bitö nê ëñëmi inte go guidinque cængömitawoo. Inäempa bitö mänömaï go guii cængömi adinque wacä nê æmæ pönengä guiquënë bitö cæbaï adobaï do cædinque nämä apænte änämaï inte tömengä nänö oda cæquinque do go guite cæmaingampa. ¹¹ Codito tömämö beyæ wæninque nê æmæ pönengä beyæ adobaï wængacäimpa cæbii. Bitö tömënäni nänäni wængongui oncö ante, Önonconque impa, ante nê ëñëmi inte do guite cæmi beyænque bitö töninacä nê æmæ pönengä iñongante wapiticæ mäobi oda cæte wæwente bacampa töö. ¹² Mänömaï cædinque minitö töninadäni inänite minitö waadedämaï inte wënæ wënæ cæminipa. Tömënäni nänäni nämä apænte æmæ pönënö ante wido cæte bai cædinque minitö mönö Codito ingante do wiwa cæmini iminipa. ¹³ Ininque botö cæmo beyænque botö töninacä oda cæcä adinque botö, Tömengä oda cædämaï incæcäimpa, ante cædinque baö incæ cöwë cænänämaï incæboimpa.

9

Codito nänö da godongäinäni iimaï cæquënëñänäni inänipa

¹ Botö Pabodobo æbänö imoo, ante minitö æbänö ante pönëmini. Edæ, Botö Itota nänö nê da godongaïmo imopa. Tömengä botö imote pönö ñimpo cæcä beyænque quëwëmoppa. Mönö Awënë Itota ingante do agaïmo imopa. Minitö guiquënë, Pabodo mänömaï ingampa, ante pönëminiyaa. Ayæ mönö Awënë nempo quëwëninque botö Pabodobo tömengä beyæ apænebo ëñëmini inte minitö wæætë, Pabodo apænacä beyænque mönitö nê pönëmoni imönipa, ante pönëminiyaa. ² Wadäni guiquënë, Pabodo ingante Awënë Itota da godönämaï ingacäimpa, änänitawoo. Tömënäni mänömainö ante tedewënäni incæte minitö guiquënë, Pabodo ingante mönö Awënë Itota näwangä da godongacäimpa,

ante apænequënëmîni imînipa. Edæ botô pönô apænebo beyænque mînitô wede pönëninque mönô Awënê nempo quëwëminipa, ante edonque abaimpa.

³ Pancamîniya botô imote apænte ancæte ante cæyömîni botô nämä wææ cæcæte ante iïmaï ämopa. ⁴ Mönatô apænemöna ëñëmîni incæte mînitô iñômô, Mînatô eyepæ cæmînapa diyæ cænguï tönô bequï ænguimînaa, ante wææ ante bai tedemîni awædô. ⁵ Wadâni mönô Awënê Itota nânô nê da godongainâni iñômô nâna gæncaya nâna gæncaya godânipa. Mönô Awënê tönîñadâni adobaï Pegodo adobaï tömënâni nâna gæncaya nâna gæncaya godânipa. Mönatô imönate guiquënë mînitô, Mînatô godinque nânôogængä ænâmaï inte goeda, ante wææ ante bai tedemîni awædô. ⁶ Wadâni önompoca cædâmaï inte quëwëñönâni botô tönô Bedënabee adomónaque önompoca möna cædô beyænque ænte quëwenguënëmöna imönatawo.

⁷ Tontadoidi guiquënë dicæ tömënâni nämä nâni godonte æinta beyæ quëwënâniyaa. Ayæ æcänô yowementacoo mingä pæ inca ate nê mîningä iñômô ædô cæte yowepæ ænte bedâmaï inguingä. Edæ dobæ ade becampa. Cæninâni nê aacä guiquënë dicæ goömæ yopænte ænâmaï inguingä. Edæ do yopænte ænte becä apa änewëmîni.

⁸ Mänömaïnô ante apænedinque botô waodânique nâni änönô ante wîi ämopa. Wæætê Wængonguï nânô wææ angainô ante mäninonque ante ämopa. ⁹ “Wagada onguïñængä nê cæcä inte tömentapo æ yacæimpa, ante ämi pinä pinä gäwate cægöñongä bitô tömengä önöne wææ wodönedâmaï inte ee abi cæncæcäimpa,” ante Möitee wodi wææ yewæmongacäimpa. Ìnînque Wængonguï dicæ wagada beyænque ante pönëninque mänömaïnô ante angantawogaa. ¹⁰ Wæætê mönô beyænque ante Wængonguï angampa, ante pönengæimpa. Nâwangä mönô beyænque yewæmongatimpa. Waocä dicæ, Wadânique cæncædänimpa, ante onguipoi mangæ mangæ tæñongä. Wæætê, Mönitô godongämæ cæncæmönimpa, ante mangæ mangæ tæñongampa. Ayæ tömëmô nê æ yeyacä guiquënë dicæ, Wadânique cæncædänimpa, ante æ yeyacampa. Wæætê edæ, Mönitô godongämæ cæncæmönimpa, ante pönengä inte æ yeyacampa. ¹¹ Ìnînque, Mönitô mîmönô cænte bai ëwocacæmînipa, ante cædinque mönatô tömëmô mînte pæ bai pönô apænemöna do ëñente ëwocamînitapa. Incæte mönatô imönate wæætê mæincooque pönömîni wënæ wënæ ænguënëmöna ämînitawo. ¹² Ìñæmpa wadâni inånite mæincoo ee godömîni ænânipa. Mönatô iñômô godömenque apænedinque godömenque ænguënëmöna iñömönate mînitô Baa ämînitawoo.

Mönatô nê ænguënëmöna incæte cöwë ænâmaï imönapa. Edæ, Mönô Codito ingantedô ante watapæ apænedinque mönatô mæincoo æmöna bai wadâni, Pabodoidi mæincoo æncæte ante apænedapa, ante piïnînque wææ ancædönänimpa. Ìnînque, Wææ änâmaï incædänimpa, ante cædinque mönatô, Cöwë ænâmaï incæmönainpa, ante piyænê cæte ee apænemönapa. ¹³ Nâwä Wængonguï cænguï, ante ænte mämô cönönâni ongö adinque Wængonguï oncönê ñænæncönê nê cædâni incæ pancaa ænte ade cænte quëwënânipa. Ayæ, Wængonguï quï, ante baô nâni iya täimpaa nê cædâni adobaï iya täimpaa nâni cönönîngä incæ pancacäa ænte cænte quëwënânipa, ante pönëmîniyaa. ¹⁴ Mönô Awënê adobaï, Botô imotedô ante watapæ apænedâni ate nê ëñënâni wæætê nê apænedâni inånite cænguï pædæ godönâni ænte cænte quëwëncædänimpa, angampa. ¹⁵ Botô guiquënë nê ænguënëmô incæte cænguï ante änâmaï inte cöwë apænebo inömoimpa. Nöwo mînitô imînite yewæmönînque botô dicæ, Pönömîni æncæboimpa, ante yewæmömogaa. Cænguï ante änâmaï inte botô Wængonguï beyænque apænebo ëñëmînipa,

ante pönëninque mäninö beyænque tobopa. Mänömainö ante todömo inte botö, Gæwænte wædinque nãñe wæmo incæ wacã mäincoo edæ ænãmai incæboimpa.

16 Itota Codito ingantedö ante apænebi ëñencædänimpa, angã ëñente botö nè apænebo bagaimo inte edæ ædö cæte wadö cæquimoo. Ìninqe botö mänömainö ante nè apænedömo inte edæ, Tömëmo waa cædinque apænebopa, ante ædö cæte tedequimoo. Edæ botö Itota ingantedö ante möni watapæ apænedö ante wii apænebo bai edæ botö wæquinque incædönimpa. 17 Edæ Itota Codito, Apænebi ëñencædänimpa, angã ëñëninque botö Ao ante watapæ todinque apænebo adinque tömengã, Waa cæbi ïmipa, ante eyepæ pönongã æmaimopa. Wæætë, Wii apæneinente wæbo incæte botö cöwë apænebo ïninqe edæ tömengã nänö angainonque cæte apænebopa. Edæ botö nè apænequënëmo inte ædö cæte apænedãmai inguimoo. 18 Ìninqe botö ëñente cæbo beyænque quinë ænguimoo. Botö Itota Codito ingantedö ante watapæ apænebo beyænque Wængongui ïmai pönö cæcã æninque tocæboimpa. Botö apænebo beyæ minitö nè pönonguënëmini incæte pönönãmai ïmini Ìninqe botö wæætë ænãmai inte tocæboimpa.

19 Ayæ waodani wii botö awënëidi ïnänipa. Ayæ botö wacã ingante nè cæbo ïnãmai inte abæ tawænte bai quëwëmopa. Incæte botö, Waodani godömenque nangui ïnani Codito gãmænö poncædänimpa, ante cædinque tömänani ïnãnite nè cæte quëwëmo bai botö baquinque nãmä pædæ godonte bai quëwëmopa. 20 Godongãmæ cæbo ate oodeoidi incæ Itota gãmænö poncædänimpa, ante cædinque botö oodeoidi nãni pönënö bai pönëninque tömënani nãni quëwënö bai quëwëmopa. Pancadäniya, Mõitee wodi nänö wææ angainö ëñëmö beyænque mönö quëwengæimpa, ante pönëninque mäninonque ante ëñente cædänipa. Botö guiquënë, Wii Mõitee wodi nänö wææ angainö ëñëmö beyænque mönö quëwengæimpa, ante pönëmopa. Incæte, Godongãmæ cæbo ate mäninonque ante nè ëñente cædäni adobai Itota Codito gãmænö poncædänimpa, ante cædinque botö tömënani ëñënö bai adobai ëñente bai cæbopa.

21 Wadani guiquënë Mõitee wodi wææ ante nänö yewæmongainta adãmai ïnänipa. Botö guiquënë, Wængongui, ïmai cæedani, ante nänö wææ angainö ante cöwë ëñenguënëmo inte botö mönö Awënë Codito nempo quëwëninque tömengã nänö angainö ante cöwë ëñente quëwëmopa. Incæte godongãmæ cæbo ate nè adãmai ïnani adobai Itota Codito gãmænö poncædänimpa, ante cædinque botö wadö pönëmo incæ tömënani adãmai inte nãni quëwënö bai adobai inte bai quëwëmopa. 22 Ayæ, Godongãmæ cæbo ate æmæ pönënani adobai Codito gãmænö poncædänimpa, ante cædinque botö tömënani æmæ pönente quëwënani bai æmæ pönëmo inte bai quëwëmopa. Ìninqe, Godongãmæ cæbo ate pancadäniya Codito gãmænö ponte quëwencædänimpa, ante cæcæte ante botö æbänö cæquimoo, ante wædinque ïmai cæbopa. Wadani nãni quëwënö bai wadani nãni quëwënö bai wadani nãni quëwënö bai adobai cædinque botö tömänani nãni quëwënö bai adodö ante pönëmo inte bai quëwëmopa. 23 Edæ, Itota Codito watapæ pönö cæcã beyænque tömãmö tömengã nempo quëwëninque godongãmæ watapæ tocæimpa, ante cædinque mäninö wadani nãni quëwënö bai wadani nãni quëwënö adodö ante pönëmo inte bai quëwëmopa.

24 Edæ nè quingæ pogodo godani ïñömö tömënani nãni pogodo goimancadë tömänani pogodo godänipa. Incæte adocanque quingæ pogodo gocã inte täno gote næ gongængã adinque edæ, Bitö adobique quingæ pogodo gote gänä cæbipa, ante pædæ pönönani ængampa, aminitawoo. Minitö guiquënë

quingæ pogodo gote bai gänä cæte æncæte ante tæi piñænte cædäni. ²⁵ Gänä cæcæimpa, ante cædinque tøménäni wadö nani cælnenö ante cædämaï inte wæntæye inämaï inte mäninonque ante cædänipa. Tøménäni guiquenë gänä cædinque poganta aquii guinë wænguiñabo nani que cædintaque ænte wencacæte ante mänömaï cædänipa. Mönö guiquenë poganta guinë wænämaï inta mönö cöwë encaquinta æncæte ante mänömaï cæmompä. ²⁶ Mänömaï impä, ante pönëninque edæ wiñatæ wiñatæ guidämaï inte pogodo godäni bai botö töingä gobopa. Ayæ, Æcänö gänä cæcää, ante tiyæmäa tamonte guëa cæda bai cædinque botö, Gänä cæcæboimpa, ante tæimö piñænte nö cæbopa. ²⁷ Æninque godömenque godömenque apænebo eñenäni ate tömönte oda cædämaï incæboimpa, ante cædinque botö, Tæi piñænte quingæ gobæwe, ante bai cædinque botö nämä incæ da godö da godö godoncæte ante nämä tæi tæi pante bai cæbopa.

10

Wængongui impä, ante nani cönöninca

¹ Botö tönñamini iïmaï ante apænebo eñeedäni. Mönö wæmæidi wodi tømänäni boguimä gänëñomö quëwente cægongadänipa. Ayæ tømänäni gäwapæntibædë tæcæguedëmæ ti wææ tao gogadänipa. ² Æninque æpænë guite bai cædinque tøménäni Möitee wodi nempo tømänäni nani quëwenguinque edæ boguimämodë godinque gäwapæntibæ tæcæguedëmæ gogadänipa. ³ Ayæ cænguï Wængongui öönædë da pönongä wææ nani cæ bai tömengä Önöwoca nänö apænedö adobai eñente ewocate quëwengadänipa. ⁴ Wængongui Önöwoca apæncä eñëninque tømänäni godongämæ bete bai ewocate quëwengadänipa. Edæ dicabo tæëmonca iñonte Möitee wodi ongonto tæi tæi äayongä æpæ ompade ba begadänipa. Æncayæ Ponguingä mönö Codito adobai tæi piñænongå inte tøménäni tönö godongämæ godinque tömengä Önöwoca ingante pönongä æninque tøménäni ompade bete bai äawocaque bai ewocagadänipa. ⁵ Incæte wodo tømänäni eñenämäi cædäni adinque Wængongui wii togacäimpa. Edæ piïninque wænöninque önömæca yabæque wido cæcä ñömængadänipa.

⁶ Æninque, Tøménäni wænæ wænæ cæcæte ante nani toïnente wædö bai minitö wii adobai toïnente wæcæminipa, ante mönö imonte wææ odömoncæte ante Wængongui tøménäni nani toïnenö beyæ ante pangä wængadänipa, ante abaimpæ. ⁷ Pancadäniya nani badonte cönöninca weca ædæ wæænte, Wængongui impä, ante babæ apænete towengadänipa. Edæ, “Cæncæte ante becæte ante tæ contadinque tøménäni Yæ yæ owempocæte ante ængæ gantidänitapa,” ante yewæmongatimpæ cæminii. Minitö iñömö edæ, Wængongui impä, ante nani babæ towengai bai wii adobai cædäni. ⁸ Pancadäniya guiquenë nänöögængä inämaï iñongante wiwa towengadänipa. Edæ bæintitodee mïido ganca inäni mänimpodäni edæ mänömaï towénäni inte adoönæque iñonte näñe wængadänipa, ante adinque pönente wædinque mönö wæætë towénämäi ingæimpa. ⁹ Pancadäniya guiquenë, Quiëmë cæmö iñömonte Awënë dicæ pangäa, ante ancaa wænæ wænæ cædäni adinque Wængongui tæntæ angä pocæ wængadänipa. Æninque tøménäni nani wænæ wænæ cægainö ante mönö Baa ante wænæ wænæ cædämaï ingæimpa. ¹⁰ Pancadäniya guiquenë Wængongui nänö pönönincoo adinque, Wængongui wii wæmö pönongä awædö, ante piïnte tededäni ate Wængongui anquedo në wido cædongä inongä inte tøménäni inänite wænonte edæ wido cægacäimpa.

Mänömaï cæcä ante adinque mīnitō, Pangä wæncæ wæ, ante wædinque tōmēnāni nāni piinte tedewengai bai adobai piinte tededāmaï imæwedāni.

11 Īninqe, Wamīni mīni adobai panguinque cæmīnīpa, ante wææ odōmoncæte ante pancadāniya inānite Wængonguï mänömaï pangacäimpa. Ayæ iimāmo wodo iinque bayonte quēwēmō iñōmonte dodāni mōnō imonte wææ ancæte ante yewæmōninque, Wēnæ wēnæ cædāni ate Wængonguï æbānō pangacäi, ante aedāni, ante wææ yewæmongadānīpa. 12 Mänömaï impa, ante adimīni incæte mīnitō, Mōnitō nāmā ongonte cōwē oda cædāmaï incæmōnīpa, ante pōnēmīnitawo. Edæ mīni ædocæ tæ go wæænguinque mänömaï ānewēmīnīpa tōō. 13 Mīnitō wēnæ wēnæ cæinente wæmīnitawo. Edæ wīi mīnitō adomīnique mänömaï wēnæ wēnæ cæinente wæmīnīpa. Mōnō waocabo mōnō wēnæ wēnæ cæinente wæcabo tōmāmō imōmpa. Incæte mīnitō mīni oda cæquinque wēnæ wēnæ cæinente wæmīni adinque Wængonguï mōnō imonte cōwē nē pōnengä inongä inte, Oda cædāmaï incæmīnīpa, ante wææ āninque edæ, Idæwaa, angampa. Ayæ wēnæ wēnæ cæinente wæmīni incæte tōmengä tōō æmænte ængä beyænque mīnitō eyepæ inte ate adiyæ næ gongæninque oda cædāmaï inguimīni imīnīpa.

14 Mänīnō beyænque botō nē waademīni, āmo ēñēedāni. Wængonguï impa, ante nāni babæ ante gōnōninca gomō adinque ocæmæ wodii winōedāni āmopa. 15 Mīnitō ocāi encadōmīni imīnīpa, ante adinque botō mänömainō ante yewæmōmopa. Īninqe botō ānō ante, Nō intawo, babæ intawo, ante mīnitō nē encadōmīni inte apænte ante bai ēñencæmīnīpa. 16 Mōnō pōnencabo owæta æninque Wængonguï ingante waa ate pōnente apænedinque, Mōnō Codito wepæ tōmāmō beyæ godonte impa, ante pōnēninque mōnō pōnencabo iñōmō godongāmæ bemōmpa. Ayæ pāo mōnō pā ænō æninque, Mōnō Codito tōnō godongāmæ caate wængaimō bai imōmpa, ante pōnēninque mōnō godongāmæ cæmōmpa. 17 Mōnō pāo adocaque æninque pā ænte godongāmæ cæninque mōnō, Pāo adocaque i bai mōnō tæiyæmō pōni imō incæte adocabomō imōmpa, ante pōnengæimpa.

18 Idægoidi ēñagāināni iñōmō, Wængonguï quī, ante baō ænte māmō ñōnōninque iya tānānīpa. Mänīi baō tōmēnāni nāni iya tāimpaa ñōnōningä pancacāa æninque tōmēnāni, Baō Wængonguï quī i bai mōnō adobai Wængonguï quimō imōmpa, ante bai cædinque godongāmæ cænānīpa, ante do ēñēmīnīpa. 19 Mänömaï āninque botō æbānō āmo, ante pōnēmīni. Nē ēñēnāmaï ināni nāni babæ cōnōninca iñōmō edæ nāwā Wængonguï ingampa diyæ tōmēnāni tōmengä quīnāni ināniyaa. Ayæ, Wængonguï cænguī impa, ante babæ nāni ānongä iñōmō nāwā Wængonguï cænguī impa diyæ tōmēnāni Wængonguï tōnō godongāmæ cænāniyaa. Botō iñōmō edæ mänömainō ante dicæ āmogaa.

20 Mänömaï ānāmaï imo inte botō iimāi āmopa. Tōmēnāni, Wængonguï quī, ante babæ cōnōninque dicæ nāwā Wængonguï ingante godōnāniyaa. Īñæmpa wēnæidi inānite godōnānīpa cæmīnīi. Wēnæ tōnō cædāni awædō, ante mīnitō gomō adinque godongāmæ cænāmaï imæwedāni, āmopa. 21 Edæ mōnō Awēnē bepæ godongāmæ bemīni inte mīnitō wēnæidi bepæ ædō cæte godongāmæ bequimīnīi. Mōnō Awēnē cæimpaa tæ contate godongāmæ cæmīni inte mīnitō wēnæidi cæimpaa ædō cæte godongāmæ tæ contate cænguimīnīi.

22 Æmæ pōnente bai wēnæidi nāni bepæ bemō adinque mōnō Awēnē piinte badinque pāmaingampa, ante ēñēnimō inte mōnō ædō cæte wēnæidi bepæ bequimōō. Tæi piñænte wææ cæmōmpa mōnō Awēnē pānāmaï inguingää.

Ñi cæyænte gote bai quēwente waadete pōnengæimpa

²³ Mīnitō iīmaī apænedinque, “Mōnō quiēmē bai cæinēmo incæ Wængongui wææ ānāmaī ingampa,” āmīnitawo. Iīnæmpa mōnō cæinēnonque cæte quēwēmō bai wīl mōnō waa quēwenguinque incædōnīmpa. Ayæ adobaī, “Mōnō cæinonque cæmō incæ Wængongui wææ ānāmaī ingampa,” āmīnitawo. Iīnæmpa mōnō cæinēnonque cæte quēwēmō bai wacā, Botō adobaī cæbote, ante oda cæcædongāīmpa cæmōō. Oda cædāmaī incæcāīmpa, ante wææ cædinque mōnō Wængongui nānō ānōnonque ante ēñente cæcæīmpa. ²⁴ Edæ, Mōnō æbānō cæte eyepæ æninque quēwenguīmōō, ante nāmā beyænque wædāmaī inte wæætē wadāni beyæ ante pōnēninque, Tōmēnāni nōingā ante ēñente waa quēwencædānīmpa, ante mōnō nanguī cæcæīmpa.

²⁵ Iīnque baō godonte æncæte ante nē mānāni nāni æī pancadē gote æninque mīnitō mīmō entawēmīni incæte, Baacā bai intawo, nāwāaquinḡā intawo, ante apænte ānāmaī inte guīñenedāmaī ade cæedāni. ²⁶ Edæ, Inguipo Wængongui quī impa. Iīnque inguipoga ongoncoo tōmancoo adobaī Wængongui quī inte nāwāaquincoo impa, ante yewæmongatūī apa guīñewēmīni.

²⁷ Ayæ nē pōnēnāmaī ingā mīnitō iīmīnite, Pō cæedāni, angā ēñēninque mīnitō goinēmīni inte godinque tæ contayōmīni cænguī pædæ pōnongā adinque ee ō ænte cæedāni. Baacā intawo, Nāwāaquinḡā intawo, ante nāmanque apænte ānāmaī inte ade cæedāni. ²⁸ Wæætē wacā tōmengā nānō mīmō pōnēnō beyænque ante wææ āninque, “Wadāni tōmēnāni, Mōnitō wængongui cænguī impa, ante do nāni godōnī impa iīnæmpa cæmīni,” angantawo. Mānōmānō wææ angā ēñente wædinque mīnitō nē wææ āningā beyæ ante ayæ tōmengā nānō nāmā apænte æmæ pōnēnō beyæ ante edæ cænāmaī iedāni. Iīnæmpa inguipo incæ inguipoga ongoncoo tōmancoo incæ mōnō Awēnē quī impa cæmīni. ²⁹ Wīl tōmēmīni mīmō entawēnō beyæ ante nāmā apænte āninque wæætē nē wææ āningā beyæ ante tōmengā nānō nāmā apænte æmæ pōnēnō beyænque ante mīnitō cænāmaī incæmīnīmpa.

Incæte bitō wabi iīmaī ante wæbitawo. “Mōitee wodi nānō wææ angāinō beyæ nā cæyænte wægaīmo bai inte botō nōwo nī cæyænte gote bai īmo adinque wacā tōmengā nānō nāmā apænte æmæ pōnēnō beyænque ædō cæte botō īmote apænte anguingāā,” ante wæbitawo. ³⁰ Ayæ, “Wængongui ōnonque pōnongā æninque botō tōmengā ingante waa ate pōnente apænedinque ade cæmo adinque wadāni iñōmō edæ, Baacā incæ iīnæmpa cæmīni, ante quīnante pōnō babæ ante tedewēnāni,” ante bitō wæbitawo. ³¹ Incæte mīnitō cæmīni incæ bemīni incæ quiēmē bai cæmīni incæ mīnitō cædinō adinque wadāni, Wængongui nāō apāite bai ēmōnongā ingampa, ante acædānīmpa, ante cædinque waa cæedāni. ³² Edæ mīnitō iñōmō, Waa cæmōni adinque wadāni oodeoidi incæ guidiegoidi incæ Codito ingante nē godongāmæ pōnēnāni incæ tōmānāni tee tēwadāmaī inte oda cædāmaī incædānīmpa, ante pōnēninque edæ waa cæedāni. ³³ Botō adobaī, Botō tōmēmo ænguīnō ante wædāmaī īmopa. Wæætē, Botō waa cæbo adinque wadāni Itota gāmæñō pōninque tōmengā ængā beyænque quēwencædānīmpa, ante pōnēninque botō quiēmē cæbo incæ cōwē waa cæbopa.

11

¹ Mōnō Codito tōmengā nānō cæī bai botō adobaī cæbo adinque mīnitō botō cæī bai adobaī cæbaīmīnīpa.

Iīmaī cæte Wængongui ingante apænecæīmpa

² Minitō botō imote cōwē pōnēmīni adinque botō mīnitō imīnite waa adinque apænebopa. Ayæ do pōnengaināni nāni apænegainō ante botō adodō ante apænebo ēñēninque mīnitō, Nāwangā impa, ante ēñente cæminipa, ante adinque botō mīnitō imīnite waa ate pōnēninque apænebopa.

³ Nōwo iñōmō iīmaī āmo ēñēdāni. Mōnō Codito ñænængā inongā inte onguiñængā ingante nē angā ingampa. Waoda nāna gæncaya adinque onguiñængā ñænængā bai Inongā inte onquiyaængā ingante nē angā ingampa. Mæmpo Wængongui guiquēnē ñænængā pōni inongā inte mōnō Codito ingante nē angā ingampa. ⁴ Inique onguiñængā iñōmō Wængongui ingante apænedinque ayæ, Wængongui æbānō angāā, ante apænedinque wencadāmaī apænecæcāimpa. Edæ bee ocadinque tōmengā nāmā ocabo ante guīñencate bai apænebaingampa.

⁵ Onquiyaængā guiquēnē bee ocadinque Wængongui beyæ apænecæcāimpa. Bee ocadinque tōmengā, Wængongui æbānō angāā, ante apænecæcāimpa. Edæ bee ocadāmaī inte nāmā ocamō ante guīñencate bai onquiyaængā apænebaingampa. Mānōmaī cædinque tōmengā nē ēñēnāmaī cædingā ingante nāni ēō tocadingā bai inongā inte encabaingampa. ⁶ Edæ onquiyaængā bee ocadāmaī ingā inte godōmenque ēō tocacā bai waa incædōnimpa. Wæætē, Eō tocate wæcæ wæ, ante wæcā inique tōmengā iñōmō edæ bee ocabaingampa. ⁷ Edæ onguiñængā ingante badōninque Wængongui tōmengā nānō emōnō bai adobaī badongā emongacāimpa. Inique Wængongui nānō ñāō apāidō bai adobaī emōnongā inte onguiñængā bee ocadāmaī incæcāimpa. Onquiyaængā guiquēnē onguiñængā nānō emōnō māninque emōnongā ingampa. ⁸ Onguiñængā ingante tāno badōninque Wængongui ayæ onquiyaængā ingante badoncæte ante onguiñængā iyapa ænte badongacāimpa. ⁹ Edæ wīi onquiyaængā beyæ ante onguiñængā ingante Wængongui badongacāimpa. Wæætē, Bitō onguiñængā beyæ quēwencæbiimpa, ante onquiyaængā ingante badongacāimpa. ¹⁰ Inique onquiyaængā iñōmō, Botō nānōogængā beyæ Wængongui botō imote badongacāimpa, ante pōnente wædinque bee ocacæcāimpa. Ayæ, Bee ocabo adinque Wængongui anquedoidi incaē, Botō nānōogængā nē angā ingampa, ante ēñencædānimpa, ante cædinque onquiyaængā waa cædinque bee ocacæcāimpa.

¹¹ Incæte mōnō Awēnē nempo quēwēninque onguiñængā dæ angā bai onquiyaængā ōnonganque baquēnengainō anguēnē. Wæætē onquiyaængā dæ angā bai onguiñængā wæætē ōnonganque baquēnengainō anguēnē. ¹² Edæ onquiyaængā ayæ dæ āñongante tōmengā ingante badoncæte ante Wængongui onguiñængā iyapa æninque badongacāimpa. Wæætē wēñængā onguiñængā ingante onquiyaængā mangā beyænque ēñacampa. Incæte Wængongui beyænque tōmāmō quēwēmompa.

¹³ Onquiyaængā bee ocadāmaī inte Wængongui ingante apænecā inique waa intawoo, ante mīnitō tōmēmīni godongāmæ pōnēē cōninque ædāni. ¹⁴ Edæ dodāni nāni cægā bai cæquēnēmō inte mōnō iīmaī ante pōnengæimpa. Onguiñængā doyaængui encadinque guīñencate wæquēnengā ingampa, ante edonque ate pōnēmaimpa. ¹⁵ Onquiyaængā guiquēnē tōmengā doyaængui pæ inique edæ waa impa. Edæ, Doyaængui bee ocacæbiimpa, ante onquiyaængā ingante Wængongui badongā encacampa. ¹⁶ Botō mānōmaīnō ante apænebo ēñēninque mīnitō pancamīniya wæætēdō wæætē āinēmīnitawo. Iñæmpa botō ānīnō bai mōnitō cōwē cæmōnipa. Ayæ Codito ingante godongāmæ

nāni pōnencabo adobaī Wængonguī quīnāni īnōnāni inte edæ cōwē mǎnōmaī cædānīpa cæmīni.

Awēnē ææmæ ante bedinque pancamīniya wīwa cæmīni

¹⁷ Mīnitō mīni waa quēwenguinque ante godongāmæ ponguēnēmīni incæte mīni godōmenque wīwa quēwenguinque godongāmæ pōmīni awædō. Īnīnque botō, Waa cæmīnīpa, ante ædō cæte anguīmoō. ¹⁸ Īmaīnō ante nōwo tāno apænebo ēñēedāni. Codito ingante mīni pōnencabo godongāmæ pōnīnque mīnitō īñōmō mīni caīpæ incæ wæætē godō wæætē godō tedewēnīnque wacabo nānēnē wacabo nānēnē bamīnīpa. Ante apænedāni ēñēnīnque botō, Wabānō nōīngā ante apænedānīpa, ante pōnēmopa. ¹⁹ Nāwangā impa, ante pōnēmopa. Edæ, Ædānidō īnānite Wængonguī waa acāā, ante edonque acæīmpa, ante tōmēngā angā ate mīnitō mīni cabo wadō ante mīni cabo wadō ante tedemīnīpa, ante awædō.

²⁰ Īnīnque, Awēnē ææmæ impa, ante godongāmæ pōnīnque mīnitō wīī mōnō Awēnē ææmæ bete baī cæmīni awædō. ²¹ Edæ mīni godongāmæ cæñfedē incæ mīnitō, Wadāni adobaī cæncædānīmpa, ante ee ongōnāmaī īmīni inte tōmāmīni cænguī ade cæmīnīpa. Pancadāniya ayæ gæwæante ongōñōnāni edæ pancamīniya do tōmo bete dowænte wæmīni awædō. ²² Īñæmpa oncō ōmaamīni baī inte mīnitō tōmēmīni oncōnē cænte wīī bemīni. Edæ Codito ingante mōnō godongāmæ pōnencabo Wængonguī quīmō īmō incæte mīnitō nāēmæ pīinte cæmīni awædō. Ōmæpodāni incæ tōmēnāni nāni guingo imonte wæquinque ante mīnitō pæ gompote ade cæmīnīpa tōō. Mānōmaī cæmīni adīnque botō dicæ, Waa cæmīnīpa, āmogaa.

Mōnō Awēnē ææmæ

(Māateo 26.26-29; Māadoco 14.22-25; Odoca 22.14-20)

²³ Edæ mōnō Awēnē botō īmote pōnō apænecā ēñēnīnque botō wæætē īīmaī ante mīnitō īmīnīte pōnō apænetabopa. Mōnō Awēnē Itota ingante Codaa nānō odōmōnte godongaīōnæ woyowotæ īñōnte Itota pāō ænīnque, ²⁴ Wængonguī ingante waa ate pōnente apænedīnque pāō pā ænīnque angacāīmpa. “Īī pāō botō baō baī impa. Botō, Mīnitō quēwencæmīnīmpa, ante botō baō godonte baī cædīnque wæncæboīmpa. Botō pā ænte pædæ pōnōmo baī mīnitō adobaī īncayæ ate botō īmote ante pōnēnīnque godongāmæ cæedāni,” angantapa.

²⁵ Mānōmaī angā īīnque cæñāni ate owæta adobaī ænīnque tōmēngā, “Botō wepæ īīmæ baī impa. Wængonguī do apænedīnque, Botō pōnō cæbo ate mīnitō Ao āmīni īnīnque mōnō godongāmæ waa cæte quēwengæīmpa, angacāīmpa. Nōwo adobaī mīīne ānīnque apænebopa. Botō wepæ ante Ao ante æmīni inte mōnō godongāmæ waa cæte quēwengæīmpa. Īnīnque mīnitō wantæ wantæ īñō bedīnque botō īmote ante pōnente becæmīnīmpa.” Ante Itota angā begadānīmpa. ²⁶ Īnīnque Itota nānō ponguīōnæ ganca mīnitō mānōmaī pāō wæætē wæætē cænīnque mānīmæ baī wæætē wæætē bedīnque, Mōnō Awēnē tōmāmō beyæ wængacāīmpa, ante odōmōnte baī cæmīni adīnque wadāni ēñēncædānīmpa.

Nōīngā ante pōnēnīnque mōnō Awēnē ææmæ beccæīmpa

²⁷ Mānōmaī ī īnīnque waocā pōnēnāmaī inte mōnō Awēnē pāō ōnonque cænīnque Awēnē nānō bequīmæ ōnonque bedīnque tōmēngā nānō wentamō mongænguinque mōnō Awēnē baō ante, Ōnonque impa, ante pīinte baī cædīnque tōmēngā wepæ ōnonque wīdo cæte baī cæcampa. ²⁸ Īnīnque,

Æbānō entawēmōō, ante mīnitō nāmā nāēmænte cōwā adinque nōingā ante pōnēninque pāō cæninque mānimæ bequēnēmīni imīnīpa. ²⁹ Edæ, Mōnō Awēnē baō bai impa, ante æcānō pōnēnāmaī inte cænte beda iñōmō tōmengā nāmā nānō apænte pante wæquinque mānōmaī cænte becampa. ³⁰ Edæ mānōmaī cæmīni beyænque pancamīniya aquīimīni badinque wæntæye bamīnīpa. Pancamīniya wīi pōnente wæmīnīpa. Ayæ wadāni æpodānimē mānīnō beyænque do æmæwo wænānīmpa.

³¹ Incæte mōnō cōwā adinque nāmanque apænte āninque nōingā cæmō īninque mōnō Awēnē wæætē mōnō īmonte apænte ante pīnāmaī īmaingampa.

³² Mōnō Awēnē mīnitō imīnite apænte ante pīngantawo. Edæ mōnō Awēnē, Inguipogaque quēwēnāni īnānite apænte āninque botō pāñedē mīnitō wīi adobaī pante wæquīmīni, ante wææ cædinque ñōwo iñōmō edæ, Ēñguēnē quēwēdāni, ante wædænque pangā wæmōmpa.

³³ Botō tōñīnamīni ēñēdāni. Mānōmaī ī, ante pōnēninque mīnitō cæncæte ante pōninque ee ongōñōmīni tōmānāni adoyōmō pōnāni ate godongāmæ cæedāni. ³⁴ Godongāmæ pōninque mōnō wīi apænte panguēnēmō bacæīmpa, ante wææ cædinque mīnitō nē gæwænte wæcā ingante āmīni oncōnē tāno cæncæcāīmpa. Ñōwo māninque ante yewæmōninque botō mīnitō weca īncayæ ate pōninque wadō mīni ānīnō ante godōmenque apænebo ēñencæmīnīmpa.

12

Wængonguī Ōnōwoca pōnō cæcā æninque cæccæīmpa

¹ Īñānāni ēñēdāni. Wængonguī Ōnōwoca mōnō īmonte pōnō cæcā ate tōmengā nānō pōnōnoncoo eyepæ ænte ēwocadinque mōnō æbānō cæquī, ante ēñēninque mīnitō oda cædāmaī incæmīnīmpa, ante ñōwo yewæmōmo aedāni.

² Doyedē iñōmō mīnitō ēñēnāmaī iñōmīnite wadāni, Mōnitō mīñæ pōedāni, ante æbāmē cæte ænte māodāni gogamīnīmpa. Tōmēnāni mīñæ mānōmaī go go cædinque mīnitō do oda cædinque babetade nāni badōninca weca ædæ wææninque, Mōnitō wængonguī impa, ante cædinque quēwengamīnīmpa.

³ Īninque mīnitō imīnite botō ñōwo, Ēñguēnē quēwēmīni, ante īmaī ante apænebopa. Æcānō Wængonguī Ōnōwoca tōnō āawocaque bai ēwocacā guiquēnē tōmengā, Itota nānō panguinque nē wentamō mongængā ingampa, ante ædō cæte tedewenguingāā. Ayæ wæætē Wængonguī Tæiyæ Waēmō Ōnōwoca tōnō ēwocadāmaī ingā guiquēnē tōmengā, Itota Tæiyæ Awēnē ingampa, ante ædō cæte apænequingāā.

⁴ Adocanque ingante wadō pōnō cædinque Wængonguī Ōnōwoca wacā ingante wadō pōnō cædinque tōmengā nānō pōnōnincoo nēnempote bai cæcā æninque mōnō wadō wadō nē cæmō īmōmpa. Wængonguī Ōnōwoca adocanque pōñī īnongā incæ mānōmaī wadō wadō pōnō cæcampa. ⁵ Ayæ mōnō Awēnē adocanque pōñī īnongā inte waocā adocanque ingante, Īmaī cæe, āninque wacā ingante, Wadō bai cæe, angā ēñēninque mōnō tōmāmō wadō wadō nē cæmō īmōmpa. ⁶ Ayæ Wængonguī adobaī adocanque pōñī incæ tæī piñængā īnongā inte waocā adocanque ingante pōnō cæcā æninque tōmengā tæī piñængā badinque inte wadō cæcampa. Wacā ingante wadō pōnō cæcā æninque tōmengā tæī piñængā badinque wadō wadō cæcampa. Īninque Wængonguī mānōmaī wadō wadō pōnō cæcā æninque mōnō tōmāmō eyepæ badinque cæmōmpa.

7 Wængongui Ōnōwoca, Tōmānāni waa quēwencædānimpa, ante cæedāni, ante tōmāmō imonte wadō wadō pōnō odōmonte apænecā ēñēninque tōmāmō mōnō waa quēwenguinque ante godongāmæ cæmompā.

8 Īninque Wængongui Ōnōwoca pancadāniya inānite, Wængongui nō nānō ēñēnō ante apænecā ēñēninque tōmēnāni nē nō ante apænedāni badānipa. Ayæ adocā Ōnōwoca ĩñōmō Wængongui nānō cædō ante edonque odōmongā adinque pancadāniya nē adināni badinque, Wængongui mǎnōmaī cæcampa, ante nō apænedānipa. 9 Adocā Wængongui Ōnōwoca apænecā ēñēninque pancadāniya, Wængongui eyepæ pōnō cæcampa, ante wede pōnēnāni inte tōmēnāni wede nāni pōnēnō beyænque nanguī cædānipa. Ayæ Wængongui Ōnōwoca adocanque ĩnongā inte pōnō cæcā æninque pancadāniya wēnæ wēnæ ināni inānite gampote apænedāni ate waa badānipa. 10 Pancadāniya inānite guiquēnē Wængongui Ōnōwoca godō cæcā æninque tōmēnāni tæī piñæsnāni badinque nanguī pōni cædānipa. Wængongui Ōnōwoca apænecā ēñēninque wadāni Wængongui beyæ nē apænedāni inānipa. Ayæ wacā yewænte baī tedecā adinque, Wængongui Ōnōwoca tedecantawo, wēnæ tedecantawo, ante wæyōnāni Wængongui Ōnōwoca pancadāniya inānite edonque odōmongā adinque tōmēnāni, Æcānō ōnōwoca nē tedecāā, ante do ēñēnānipa. Pancadāniya guiquēnē Wængongui Ōnōwoca tōnō apænedinque wadāni nāni tede baī nē tededāni inānipa. Ayæ ĩnāni wadāni nāni tede baī tededāni ēñēninque pancadāniya Wængongui Ōnōwoca apænecā ēñēninque, Nē tededāni æbānō ante tededāni, ante do ēñēnāni inte wadāni inānite edonque pōni apænedāni ēñēnānipa.

11 Īninque adocā Ōnōwoca adocanque ĩnongā inte tōmengā nānō nō angai baī cædinque mōnō imonte apænte æninque, Pancamīniya ĩmaī cæcæmīnimpa, wamīni ĩmaī cæcæmīnimpa, ante pōnō cæcā æninque adocanque nānō cæquēnēnō ante wacā nānō cæquēnēnō ante edæ tōmāmō mōnō cæquēnēnō ante cæmompā.

Adocabomō baī ĩmompā

12 Mōnō baō adoyonque pōni ēñamō incæ mōnō wīī adodonque cæquīnō ante ēñamō inte mōnō pæ pagænguincōo watai watai ēñamompā. Edæ wadō mōnō cæquīnō ante watai ēñadinque mōnō wæætē wadō cæquīnō ante watai watai ēñamompā. Īninque watai watai nanguī mōnō ēñacōo ĩñōmō adoyonque pōni ĩmpā. Ayæ Codito nempo quēwēninque mōnō adobaī adocabomō ĩmompā. 13 Mōnō adocabomō mōnō tōmāmō baquinque Wængongui Ōnōwoca mōnonga pō guīte owocampa. Īninque oodeocā incæ guidiegocā incæ wacā ingante nē cæcā incæ abæ tawænte ee gote baī nāmā beyænque nē cæcā incæ mōnō tōmāmō adotaca bete baī Wængongui Ōnōwoca tōnō āāwoaque baī tōmāmō ēwocampa.

14 Mōnō baō adoyonque pōni ēñamō incæ mōnō wīī adodonque cæquīnō ante ēñamō inte mōnō ēñacōo watai watai nanguī ēñamompā. 15 Īninque mōnō ōnōwa incæ, “Ōnompō ōmæpobo inte botō waocā baō ōmaabo ĩmopa,” ante ædō cæte anguingāā. Īñæmpā mǎnōmaī wæte tedecā incæ ōnōwa cōwē waocā baō ēñate ēwacampa. 16 Ayæ mōnō ōnōmonca incæ, “Awīnca ōmæmōmo inte botō waocā baō ōmaabo ĩmopa,” ante ædō cæte anguingāā. Īñæmpā mǎnōmaī ante tedecā incæ ōnōmonca cōwē waocā baō ēñate ēmoncampa. 17 Īñæmpā mōnō baō tōmāñō awincaque ēmōmō baī edæ quīmoncadō ēñenguēnēī. Ēñēnāmaī

incædömöimpa. Ayæ mōnō baō tōmāñō ònōmoncaque èmoncamō bai quin-
cadodō ongoncadoquēñēi.

18 Incæte Wængonguī iñōmō edæ, Waomīni mīni cæquēñēnō ante eyepæ cæcæmīnīmpa, ante badoncæboīmpa, ante Wængonguī angacāīmpa. Iñīnque tōmengā nāmā nānō angainō bai badōnīnque mōnō pæ pagænguīncoo adoyon-
que baquinque ante wadō cæquīnō ante wadō cæquīnō ante tōmāñō badongacāīmpa. 19 Edæ adodonque pōnī mōnō cæquēñēnō ante Wængonguī badongā bai mōnō wadō mōnō cæquēñēnō ante quīodō pæ pagænte cæquēñēi. 20 Wængonguī nānō nē badongaimō iñōmō inte wadō mōnō cæquīnō ante watai wadō mōnō cæquīnō ante watai nanguī mōnō èñacoo èñamō incæ mōnō baō adoyonque pōnī èñamōmpa.

21 Mānōmaī èñamō iñōmonte edæ mōnō awīnca incæ ònompo inte apænedīnque, “Bitō dæ āmi bai botō tōmēmo eyepæ cæcædōmoīmpa,” ante ædō cæte anguīi. Ayæ wæætē mōnō ocāmō incæ ònōwa inte apænedīnque, “Bitō dæ āmi bai botō tōmēmo eyepæ cæcædōmoīmpa,” ante ædō cæte anguīi.

22 Wæætē mōnō baō pancayonga pæ pagænāmaī i incæte māniñō ante mōnō godōmenque waa adīnque, Mōnō quēwenguīñō īmpa, ante angæīmpa.

23 Wayō guiquēñē, Wīi waēmōngā awædō, ante mōnō āñō ante, Waa acædānīmpa, ante cædīnque waēmōncoo pōnō dadi ompogate māniñō beyæ godōmenque waa ate bai cæmōmpa. Wayō guiquēñē mōnō guīñēñate wædō ante, Wīi edonque acæīmpa, ante pōnō bee ogate cædīnque mōnō guīñēñayō beyæ godōmenque waa cæmōmpa. 24 Wæmō mōnō ayō guiquēñē, Edonque acæīmpa, ante bee ogadāmaī cæmōmpa.

Incæte, Adoyonque bacæīmpa, ante mōnō baō wayō wayō badōnīnque Wængonguī, Wīi waēmōngā, ante mōnō wæyō ante pōnēnīnque, Māniñō botō godōmenque waa abopa, ante badongacāīmpa. 25 Iñīnque, Mīnitō baoncoo nāēmæ pūnāmaī incæmīnīmpa, ante cædīnque Wængonguī mōnō baō adoyon-
que badongacāīmpa. Wæætē mīnitō nāmā baoncoo incæ nāēmæ waadete waa cæcæmīnīmpa, ānīnque Wængonguī tōmāñō waa acāmpa. 26 Iñīnque mōnō baō adoyōmonque nantate wæyōmō tōmāo wootæ wootæ nantate wæmōmpa. Ayæ wæætē adoyōmonque adīnque, Waēmō īmpa, ānāni èñēnte wædīnque tōmāo watapæ tomōmpa.

27 Mīnitō iñōmō, Wayō wayō èñamō incæ adoyonque èñamōmpa, ante do pōnēnīnque, Mōnō adobai nāñēñē nāñēñē ingaimō inte ñōwo wæætē Codito nēppo quēwēnīnque adocabōmō īmōmpa, ante pōnencæmīnīmpa. 28 Iñīnque Codito ingante godongāmæ mōnō pōnencabo īmō adīnque Wængonguī angā èñēnīnque īmaī cæmōmpa. Yæcadomōni īmōni iñōmō Codito nānō da godon-
gaīmōni īmōnīpa. Gao wæi ināni iñōmō Wængonguī beyæ nē apænedāni inānīpa. Ayæ tæcæguedēnāni ināni iñōmō nē odōmonte apænedāni inānīpa. Wæænōmenque ināni iñōmō tæi piñēnte entawente nē nanguī cædāni inānīpa. Yæmīñæ gao ædīnque ināni iñōmō Wængonguī Ònōwoca tōnō āawocaque bai èwocadīnque īmaī cædānīpa. Pancadāniya, Wēnæ wēnæ ināni waa bacædānīmpa, ante nē waa cædāni inānīpa. Pancadāniya wadāni beyæ nē waa cædāni inānīpa. Pancadāniya nē ānāni inōnāni inte awēñēdi inānīpa. Ayæ yæmīñæ pōnī ināni iñōmō wadāni nāni tede bai nē tededāni inānīpa.

29 Mānōmaī īmō incæte edæ Codito nānō nē da godongaimō dicæ tōmāmō īmongaa. Ayæ Wængonguī beyæ nē apæñēimō dicæ tōmāmō īmongaa. Nē odōmōnōmō dicæ tōmāmō īmongaa. Nē tæi piñēnte entawente nanguī cædōmō dicæ tōmāmō īmongaa. 30 Ayæ Wængonguī Awēñē pōnō cæcā incæte wēnæ wēnæ ināni nāni waa baquinque ante dicæ tōmāmō nē waa cæmōngaa.

Edæ wadāni nāni tede bai dicæ tōmāmō tedomongaa. Wacā mǎnōmaī wadāni nāni tede bai tedecā ēñēninque tōmāmō dicæ mōnō tededō adodō edonque apǣnemongaa. ³¹ Incǣte mīnitō Wǣngonguī ingante, Bitō Ōnōwoca pōnō cǣcā ate mōnitō eyepǣ inte ate yǣcado ongōnāni nāni cǣi bai adobai cǣcǣte ante nanguī wǣmōnīpa, ante apǣnedinque nanguī cǣedāni.

Mōnō waadete pōnente cǣccǣmpa, ante

Ōnōwo īñōmō botō, Æbānō godōmenque waa pōni cǣquī, ante yewǣmonte odōmōmo aedāni.

13

¹ Botō waodāni nāni tede bai tede bopa, āmīnitawo. Wǣngonguī anquedoidi nāni tede bai tede bopa, ante tomīnitawo. Īñǣmpa mōnō wadāni īnānite waadedāmaī inte tedemō īninque ampoincade ōnonque ampoi bai imaimpa. Waadedāmaī inte tedemō īninque adoyōmō pōnō wo pōnō wo pōnō wǣcainta bai mōnō adobai ōnonque tedewēmō imaimmopa.

² Wǣngonguī Ōnōwoca pōnongā æninque botō tōmengā beyǣ nē apǣnebo īmopa, ante tomīnitawo. Waodāni nāni wē wodonte ēñengainō tōmānō ante edonque pōni ate ēñēmopa, ante tomīnitawo. Waodāni nāni nanguī ēñēnō ante adinque tōmānō ante ēñēmopa, ante tomīnitawo. Edæ nē wede pōnēmīni inte mīnitō ānanquidi incǣ āmīni ēñente cabǣnte gotawo. Īñǣmpa mǎnīnō tōmānō waa pōni cǣmō incǣ mōnō wadāni īnānite waadedāmaī inte cǣmō īninque wǣǣtē ōnōmonque edæ mōnō babaimpa.

³ Ōmǣpodāni īnānite botō mǎincoo tōmāā nēnempote godōmopa, ante tomīnitawo. Wǣngonguī beyǣ ante cǣyōmote wadāni botō baō botō ēñayō incǣ iya tancǣ cǣdāni ate wǣdinque botō piyǣnē cǣbaimopa, ante mīnitō, Waa cǣbopa, ante tomīnitawo. Īñǣmpa mǎnīlī tōmāā waa cǣdinque mōnō waadedāmaī inte cǣmō īninque mōnō waa cǣdō beyǣ ænāmaī imaimmopa.

⁴ Nē waadete pōnengā īñōmō tōmengā pīnāmaī inte edæ piyǣnē cǣdinque godō waadete cǣcampa. Wadāni gomonga cǣdinque godōmenque nanguī ænāni adinque nē waadecā wǣǣtē waadete pōnēninque pīinte wǣdāmaī inte piyǣnē cǣcampa. Nāmā nānō cǣdīnō ante pōnēninque nē waadete pōnengā īñōmō, Botō gomonga cǣbopa, ante tededāmaī ingampa. Tōmēmōque waēmō īmopa, ante nāmā waa adāmaī ingampa. ⁵ Wacā tǣcǣ cǣyongante nē waadete pōnengā īñōmō, Tāno cǣbote, ante wǣǣ cǣdāmaī ingampa. Nāmā nānō æīnēnō ante cǣdāmaī inte tōmengā wadāni beyǣnque cǣcampa. Wǣǣtē wīlī īñontobǣ ængūī bacampa. Wadāni wēnǣ wēnǣ cǣdāni ate wǣdinque tōmengā nē waadecā īnongā inte wǣǣtē piyǣnē cǣcampa.

⁶ Īninque, Wacā wēnǣ wēnǣ cǣcampa, ante tededāni ēñente wǣdinque nē waadete pōnengā īñōmō mǎnīnō ante todāmaī ingampa. Wǣǣtē, Wacā nōingā cǣcampa, ante tededāni ēñēninque tōmengā watapǣ pōni tocampa.

⁷ Æbāmē cǣdāni incǣ nē waadete pōnengā īñōmō piyǣnē cǣdinque tōmānāni īnānite wǣǣ gomocampa. Wǣǣtē, Waa cǣdānīpa, ānāni ēñēninque tōmengā, Nāwangā impa, ante do ēñengampa. Æbāmē ba incǣte tōmengā, Ayǣ ate watapǣ bacǣmpa, ante cōwē pōnēninque wǣntǣdāmaī inte ee cǣcampa.

⁸ Mōnō waadete pōnēmāmo īñōmō cōwē dǣ badāmaī ingǣmpa. Wǣǣtē Wǣngonguī īincayǣ ate, Idǣwaa, angā īninque inguipoga tōmengā beyǣ mōnō apǣnedō guiquēnē edæ dǣ angǣmpa. Wadāni nāni tede bai mōnō tededō incǣ pǣ wēēnecǣmpa. Inguipoga nanguī adinque mōnō ēñēnō ante Wǣngonguī, Idǣwaa, ancǣcǣmpa. ⁹ Ōnōwo mōnō ēñēnō īñōmō pancaa ēñēninque pancaa wǣǣtē oda cǣmōmpa. Wǣngonguī beyǣ mōnō apǣnedō

iñōmō pancaa apænedingue māninqe apænemompa. ¹⁰ Ìnque bayedē guiquēnē Wængonguī nānō apænedō ædæmō ēñēninqe mōnō nōingā pōnī odōmonte apænecæmōimpa. Oda cæte mōnō ēñēnō ante, Idæwaa, āninqe Wængonguī māniñedē edæ mōnō wīi eyepæ apænete wædō ante, Idæwaa, ancæcāimpa.

¹¹ Botō iñōmō wēñæmoyedē wēñængā nānō tede bai tededingue wēñængā nānō ocai ēñēnō bai ēñengaīmo inte wēñængā, Ìimai impa, ante nānō pōnēnō bai botō māniñedē adobai pōnengaboimpa. Nōwo guiquēnē picæmo badinqe wēñæmoyedē botō cægāinō ante ñimpo cæbopa. ¹² Awocawænta wēmō ate bai cædinque mōnō ñōwo Wængonguī Ōnōwoca nānō odōmōnō ante edæ wīi edonque amompa. Ayæ ate guiquēnē mōnō awincadō awinca edonque pōnī acæimpa. Botō ñōwo pancaa adinqe oda cæte ēñēmo ñimpa. Ayæ ate guiquēnē Wængonguī pōnō odōmongā adinqe tōmēngā botō ñimote edonque pōnī acā bai botō adobai tōmāā eyepæ pōnī acæboimpa.

¹³ Ìninqe mōnō entawēnoncoo ante adinqe mēnonque go adodonque mānimponque ayæ ongompa. Mōnō wede pōnēnō ante ædæmō entawengæimpa. Watapæ bacæimpa, ante mōnō pōnēnō ante ædæmō entawengæimpa. Mōnō waadete pōnēnō ante ædæmō entawengæimpa. Ìninqe mānimponque ayæ ongō incæte mōnō waadete pōnēnō iñōmō edæ ñænænō pōnī Ìninqe mōnō māniñō ante tāno ædæmō entawengæimpa.

14

Wadāni nāni tede bai cæbānō tedequīi, ante

¹ Ìninqe mīnitō, Nē waadete pōnēmō bacæimpa, ante māniñonque ante pogodo gote bai nanguī cæedāni. Ayæ adobai, Wængonguī Ōnōwoca mōnō ñimonte nānō pōnōnō bai mōnō eyepæ ēwocadinque cæcæimpa, ante nanguī æñinente wæedāni. Māniñō Wængonguī Ōnōwoca nānō pōnōnoncoo ate adinqe mīnitō, Wængonguī beyæ nē apænemō mōnō tāno adodonque ante bacæimpa, ante godōmenque æñinente wædinque cæedāni. ² Edæ wadāni nāni tede bai æcānō tededā tōmēngā wīi waodāni ñānite apænecampa. Wængonguinque ingante apænecampa. Edæ tōmēngā ōnōwocaque tedecā ñinque tōmēngā ingante Wængonguī æbānō awēmō apænecāā, ante ædō cæte ēñēnguīñāni. ³ Wængonguī beyæ nē apænecā guiquēnē waodāni ñānite waadete pōnēninqe ñimāi cæcæte ante apænecā ēñēñāni. Mīnitō tæi piñæmīni mīni entawenguinque wede pōnencæmīnimpa, ante apænecampa. Ayæ, Wæwente quēwēmīni incæ mīnitō wampo bawēnente tæi piñænte cōwē cæcæmīnimpa, ante tōmēngā Wængonguī beyæ ante pōnō apænecampa. ⁴ Wadāni nāni tede bai nē tedecā guiquēnē, Tōmēmo tæi piñæmo botō entawenguinque ante nanguī ēñencæboimpa, ante nāmā beyænque ante tedecampa. Wængonguī beyæ nē apænecā guiquēnē Codito ingante nāni godongāmæ pōnencabo beyæ ante apænedingue, Mīnitō tæi piñænte mīni entawenguinque ēñencæmīnimpa, ante apænecampa.

⁵ Ìninqe mīnitō tōmāmīni wadāni nāni tede bai apænemīni adinqe botō wædænque tobaīmopa. Wæætē tōmāmīni Wængonguī beyæ apænemīni adinqe botō godōmenque watapæ tobaīmopa. Wængonguī beyæ nē apænecā iñōmō ñænængā ñōngā wacā tededō nē tedecā guiquēnē wædangā ingampa. Incæte, Codito ingante mīni godongāmæ pōnencabo tæi piñænte entawencæmīnimpa, ante cædinque tōmēngā wacā tededō tedete ate, Ìimai ante tedetabopa, ante mīnitō tededō adodō ante edonque apænecā ñinque

tömengä adobaï ñænængä ñongä ïmaingampa. ⁶ Ìñänäni ëñëedäni. Wængonguï nänö wë wodönö incæ tömengä nänö nö ëñënö incæ tömengä nänö nö odömönö incæ ante botö mìnito weca pöninque odömonte apænebo ëñëinque mìnito godömenque pönëmaïminipa. Wængonguï ïmaï cæcæcäimpa, ante apænebo ëñëinque mìnito guïñente wædinque waa cæbaïminipa. Wæætë mìnito weca pöninque botö wadäni nani tedebaï tedete apænebo baï mìnito ædö cæte godömenque në pönëminipa baquënëminipi.

⁷ Edæ gobæ ongonte aa pedinque önonque ante pedäni ëñëinque mönö wæætë, Ædemë ante pedänipa, ante ædö cæte ëñenguï. Në ampoinca ampodäni adobaï ämotamini ñnämaï önonquedö ante ampodäni ëñëinque mönö, Ædemë ante ampodänipa, ante ædö cæte ëñenguï. ⁸ Ayæ tontado adobaï, Wæætedö wæætë cæcæcäimpa, ante todompeta nani ancadeca we ööninque idiquibæ we öongä ñinque wadäni, Æbämë cæcæte ante we öongä, ante wædinque oda cæte ee ongonte wæætedö wæætë cædämaï ïmaïnänipa. ⁹ Ayæ mini cabo adobaï wii edonque apænëminipi ëñëinque wadäni, Æbämë ante tedecä, ante wædinque oda cæte wæbaïnänipa. Woboyæ mämoque ïñæmpa tedewëmaïminipa.

¹⁰ Waodäni inguipoga tömäo quëwëninque nanguï nani tededoncoo tededänipa. Näwangä impa. Incæte wadäni nani tededö wadäni nani tededö tömäo tedequinö i ñinque adodeque incæ önonque tedete ñnämaï impa. ¹¹ Ìninque wacä apænecä ëñëinque botö, Æbänö ante tedecä, ante ëñënämaï imo adinque tömengä wæætë, Wabi inte wii ëñëmipa, ancædongäimpa. Tömengä ingante botö adobaï, Wabi inte botö tededö wii tedebipa, ante ancædömoimpa. ¹² Ìninque mìnito, Wængonguï Önöwoca pönö cæcä æninque mönö eyepæ ewocadinque cæcæcäimpa, äminitawo. Mänömaïnö äninque mìnito, Wængonguï Önöwoca pönö cæcä ænte ewocadinque cædömö inte mönö Codito ingante mönö godongämæ pönencabo godömenque tæï piñænte entawengäimpa, ante pönëninque mìnito, Mäninonque ante botö ewocate cæquïnö ante pönongä æncæboimpa, ante täno æñinente cæedäni.

¹³ Mänömaï beyæ wadäni nani tede baï në tedemini ññömö mìnito töninädäni adobaï ëñëcædänipa, ante cædinque Wængonguï ingante ïmaï ante äedäni. Wængonguï ëñëmi. Wadäni nani tede baï do tededinque botö æbänö ante tedetawoo, ante bitö odömonte apænëbi ëñëmoe. Mänömaïnö ante apænëbi ëñëinque botö wæætë mönitö tededö adodö ante edonque apænëbo ëñëinque mìnito Wængonguï ingante apænëte cæedäni. ¹⁴ Wadäni nani tede baï tededinque Wængonguï ingante apænëbo inte botö önöwocaque pönente apænëdinque ocäi ömædæcabo baï inte apænëbaïmopa.

¹⁵ Mänömaï impa, ante adinque æbänö cæquimoo. Edæ önöwoca pönente apænëdinque botö ocäi adobaï ëñente pönëninque Wængonguï ingante apænëcæboimpa. Ayæ Wængonguï ingante waa pönä apænëcæte ante önöwoca pönente ämotamini äninque adobaï ocäi ëñente pönëninque ämotamini ancæboimpa. ¹⁶ Bitö, Wængonguï ingante waa pönä cæcampa, ante önöwocaque pönëninque apænëbitawoo. Ìñæmpa Wængonguï ingante waa ate pönëninque önöwocaque pönente apænëbi ëñëinque wacä në önonganque ingä guiquënë, Bitö æbänö apænëbi, ante ëñënämaï inte, Ædö cæte Ao anguimoo, ante wæbaingampa. ¹⁷ Bitö waa ate pönëninque önöwocaque waa apænëbi ëñëinque tömengä wæætë, Bitö æbänö ancæte ante tedëbi, ante ëñënämaï inte ædö cæte godömenque tæï piñænte entawengungä. ¹⁸ Botö ññömö, Mìnito wadäni nani tede baï wædænque tedeyöminipi botö godömenque nanguï tedebopa, ante Wængonguï ingante waa ate pönëninque apænëbopa. ¹⁹ Incæte Codito

ingante mōnō pōnencabo tōnō godongāmæ pōninqe botō wadāni nāni tede bai tæne tincō mūido ganca tedequī incæ wīi tededinqe wæætē, Wadāni ēñencædānimpa, ante mēnea pōni edonque apænedinqe waa tobaimpa.

²⁰ Iñānāni ēñēdāni. Tæcæ ēñādāni iñōmō wēnæ wēnæ mōnō cæpāmo ante ēñēnāmai iñāni. Minitō adobai mānīnō wēnæ wēnæ mōnō cæpāmo ante ēñēnāmai inte bai pōñēdāni. Wæætē ocai mōnō pōñēnō guiquēnē mīnitō mānīnō ante wēñænānique wædænque nāni encadō bai wīi pōñēninqe wæætē picænāni nāni nanguī encadō bai adobai nanguī encate pōñēdāni. ²¹ Dodāni mōnō Awēnē beyæ ante wææ āninqe iīmai ante yewæmongadānimpa. “Wadāni nāni tede bai nē tededāni iñānite botō āmo ēñēninqe tōmēnāni wæætē botō quīnāni iñānite apænecædānimpa. Incæte iñāni guiquēnē botō imote cōwē ēñēnāmai inguināni awædō, ante mōnō Awēnē angampa,” ante yewæmongatimpa.

²² Iinque, Wadāni nāni tede bai tedemīni ēñēninqe nē pōñēnāni wædāmai iñōnāni nē pōñēnāmai iñāni guiquēnē mānōmai tedemīni ēñēninqe guīñente wæcædānimpa, ante cædinque Wængonguī Ōnōwoca pōnō cægacāimpa. Wæætē Wængonguī beyæ ante edonque apænemīni ēñēninqe nē pōñēnāmai iñāni wædāmai iñōnāni nē pōñēnāni guiquēnē do ēñencædānimpa, ante cædinque Wængonguī Ōnōwoca pōnō cægacāimpa. ²³ Codito ingante mīni pōnencabo godongāmæ pōninqe tōmāmīni wadāni nāni tede bai wadāni nāni tede bai tedemīni adinqe ayæ pōnāni guiquēnē nē ēñēnāmai iñāni incæ nē pōñēnāmai iñāni incæ æbānō anguināni. Mānōmañonque tedemīni ēñēninqe tōmēnāni wæætē, Mīnitō ōmædæcamīni inte ōnonque tedewēmīnīpa, ante wæbainānīpa.

²⁴ Tōmāmīni wæætē Wængonguī beyæ edonque apæneyōmīni nē pōñēnāmai ingā incæ nē ēñēnāmai ingā incæ ponte ēñēninqe tōmāmīni mīni apænedō beyæ tōmēngā, Botō wēnæ wēnæ cætābopa, ante wæbaingampa. Ayæ Wængonguī beyæ āmīni ēñente wædinque tōmēngā, Botō nāwangā wēnæ wēnæ cædōmo inte wentamō mongæante awædō, ante nāmā apænte āmaingampa. ²⁵ Ayæ tōmēngā mīmōno nānō wentamō wē wodōnincoo da tadonte ate bai edonque ate wædinque tōmēngā ædæ wæænte guidōmēmæ ñongæninqe Wængonguī ingante, Bitō adobique nē waa cæbi iimīpa, ante waa apænebaingampa. Ayæ mīnitō iimīnite, Nāwangā Wængonguī Ōnōwoca tōnō āawocaque bai ēwocamīnīpa, ante apænebaingampa.

Quiēmē cæmīni incæ nōingā pōnente cædæmō cæedāni

²⁶ Mānōmai i iinque iñānāni, mōnō æbānō cæquī. Wængonguī Ōnōwoca pōnō cæcā æninqe eyepæ inte mīnitō tōmāmīni godongāmæ pōninqe iīmai cæmīni incæmīnīpa. Adocanque āmotamīni adodeque angā ingampa. Wacā odōmoncæte ante adodeque apænecā ingampa. Wacā ingante Wængonguī edonque odōmonte apænecā ēñēningā inte tōmēngā adodō ante adodeque ante odōmonte apænecā ingampa. Wacā guiquēnē wadāni nāni tede bai adodeque tedecā ingampa. Tōmēngā æbānō ante tedecā, ante wacā do ēñēninqe mīnitō tededō wæætē edonque apænecā ingampa. Mānōmai wade wade ante nē apænemīni inte mīnitō tōmāmīni, Godongāmæ tæi piñēnte entawengæimpa, ante iīmai cæte tedecæmīnīpa. ²⁷ Wadāni nāni tede bai tedeyongā wacā adotedæ wææ tededāmai incæcāimpa. Māningā iinque tedecā ate wacā tedecæcāimpa. Ayæ wæætē wacā, Tedecæboimpa, angā Ao āmīni tedecā ate idæwaa. Mānimpodānique tedete ñīne cædāni adinqe wacā ēñēninqe, Æbānō ante tededāni, ante mīnitō tededō edonque apænecā ēñencæmīnīpa. ²⁸ Codito ingante mīni pōnencabo weca nē ēñente adodō apænequēnēngā dæ angā iinque edæ wadāni nāni tede bai nē tedeñente

wæcā iñōmō wæætē ee adinque tededāmaī inte pæ wēenecæcāimpa. Tōmengā nāmā incæ ōnōwēnenque tedete Wængonguī ingante tedecæcāimpa.

²⁹ Wængonguī beyæ nē apænedāni adobai mengāa pōni apænedāni ate idæwaa. Mānimpodānique apænedāni ēñēninque mīnitō, Nō ante apænedāni, idiquibæ ante apænedāni, ante apænte ante ēñencæmīnimpā. ³⁰ Ayæ adocanque tæcæ apænee gōñongā wacā nē ēñē congā ingante Wængonguī

Ōnōwoca iñontobæ apæneca ēñēninque tōmengā, Botō apæneceboimpa, angā ēñēninque nē apænedingā wæætē apocænē edæ ēamonca ēñēē concæcāimpa.

³¹ Edæ Wængonguī beyæ apænedinque adocanque tāno apænete ñine cæcā ate wæætē wacā wæætē wacā apænete ñine cæcæcāimpa. Mānōmaī cædinque mīnitō godongāmæ ēñente badinque wampo bawēnente ongoncæmīnimpā.

³² Wængonguī beyæ nē apænedāni iñōmō tōmēnāni nāmā ōnōwoca wææ āninque ōnōwēnenque wædāmaī inte ocai pōnente apænedāni. ³³ Edæ Wængonguī incæ nē gānē pōnēnongā inte Yæ yæ wapiticæ godō tededāmaī ingampa cæmīni.

Wængonguī quīnāni Codito ingante nāni pōnencabo tōmānāni wayōmō nāni cabo wayōmō nāni cabo godongāmæ pōninque nāni cæi bai cædinque, ³⁴ mīnitō adobai Codito ingante mīni pōnencabo godongāmæ pōñōmīni onquiyænāni iñānite āmīni tededāmaī incædānimpā. Edæ, Apocænē ēñēmæwedāni, ante Mōitēe wodi nānō wææ angai bai cædinque onquiyænāni wæætēdō wæætē ānāmaī inte onguīñænāni nāni ānonque ēñēninque edæ ēñēē concædānimpā.

³⁵ Æbānō ante apænedāni, ante ēñencæte ante wædinque onquiyængā oncōnē gote ate angā ēñēninque tōmengā nānōgængā wæætē adodō apæneca ēñencæcāimpa. Edæ Codito ingante mīni pōnencabo godongāmæ pōñōmīni onquiyængā iñōmō, Guīñēnete awædō, āninque ee tededāmaī incæcāimpa.

³⁶ Iñæmpa, Wængonguī nānō angainō ante mīnitō adomīnique dicæ mā pōnēninque odōmōmīnitawogaa. Wadāni ēñēnāmaī iñōnānite mīnitō dicæ adomīnique Wængonguī nānō apænedō ante ēñēmīnitawogaa. ³⁷ Bitō, Wængonguī beyæ nē apænebo iropa, āmitawo. Wængonguī Ōnōwoca pōnō cæcā æninque botō eyepæ ewocadinque nē nanguī cæbo iropa, āmitawo. Mānōmaī ewocabi inte do ēñēmi iñinque bitō, Mōnō Awēnē nānō wææ angainō ante Pabodo māñinonque ante yewæmongampa, ante, Nāwangā impa, ante apænebaīmimpā. ³⁸ Wæætē māñinō ante æcānō ēñēnāmaī ina tōmengā ingante wæætē mōnō ēñēnāmaī ingæimpa.

³⁹ Iñānāni, Mānōmaī impa, ante pōnēninque mīnitō, Wængonguī beyæ apæneceāimpa, ante cæcæte ante cōwē nanguī cæedāni. Ayæ, Pancadāniya wadāni nāni tede bai apænedāni, ante adinque mīnitō Baa ānāmaī iedāni.

⁴⁰ Incæte quīēmē cæmīni incæ mīni pōnencabo mīni godongāmæ watapæ quēwengūnque ante nōingā pōnente ædæmō cæedāni.

15

Codito ñāni ōmæmongacāimpa, ante

¹ Nōwo botō tōñiñamīni ēñēdāni. Codito ingantedō ante botō do watapæ apænebo ēñēninque mīnitō māñineque ante Ao ante wede pōnēninque edæ tæi ongōmīnitapa. Nōwo guiquēnē mīnitō, Māñine ante æbānō intawoo, ante oda cædāmaī incæmīnimpā, ante botō adodō ante ædæmō odōmonte yewæmōmōi aedāni. ² Māñine ante watapæ apænebo ēñēninque edæ mīnitō adode ante wede pōnēninque tæi ongōmīni inte edæ māñine beyænque quēwēmaimīnimpā. Wæætē māñine botō watapæ apænedō ante æmæ pōnēmīni iñinque mīni pōnēnimāmo incæ ōnōmāmoque pōni babaiimpa.

³ Edæ mōnō Codito tōmengā nānō pōnō cægainō ante botō ēñēnō ante botō doyedē, Mānīne ante mōnō tāno pōnengæimpa, ante pōnō apænebo ēñēmīnitapa. Nōwo wæætē, Ēñencæmīnimpa, ante botō adode ante yewæmōmo acæmīnimpa. Wængonguī angā ēñente nāni yewæmongainō bai īnque cædinque mōnō Codito īñōmō wēnæ wēnæ mōnō cægainō ante teēmē mongænte wæætē wængacāimpa, ante impa.

⁴ Ayæ, Wængā ate tōmengā baō īnī ō ænte māo daga wengadānimpa. Ayæ Wængonguī angā ēñente nāni yewæmongainō bai cædinque Codito mēōnaa go adoōnæque īñonte do nāni ōmæmonte mīngā quēwengacāimpa, ante mānīne ante impa. ⁵ Ayæ nāni ōmæmonte quēwēnongā inte tōmengā dobæ Pegodo weca ponte a ongongā acantapa. Ayæ ate tōmengā nānō nē ēmīñængaināni, Dote, nāni ānōnāni weca dobæ ponte a ongongā adānitapa. ⁶ Ayæ ate mōnō tōñīñadāni quīniento ganca ayæ godōmenque nanguī īnāni godongāmæ ongōñōnāni tōmengā tōmēnāni weca do ponte edæ a ongongā adotedæ agadānimpa. Īnāni īñōmō pancadāniya nōwo do wængadānimpa. Pancadāniya nanguī īnāni nē agāināni incæ ayæ mīnāni quēwēnānipa. ⁷ Mānīnāni adāni ate Itota wæætē Tantiago weca a ongongā agacāimpa. Ayæ ate tōmengā nānō nē da godongaināni weca adocā Itota ponte a ongongā agadānimpa. Itota mānōmaī cægacāimpa, ante botō, Mānīne tāno pōnengæimpa, ante yewæmōmopa.

⁸ Botō guiquēnē nē wæmpodingā bai inte wæyōmote tōmengā nōwo pōni botō weca a ongongā atabopa. ⁹ Edæ Codito tōmengā nānō nē da godongaimo imo incæ botō wadāni tōmengā nānō nē da godongaināni bai wīi adobai imopa. Edæ Itota ingante godongāmæ nāni pōnencabo īnānite nē togænte pangaimo inte botō wædāmo pōni imopa. ¹⁰ Edæ æbāmē imo incæte Wængonguī waadete pōnō cæcā beyænque botō mānōmaī imopa. Edæ tōmengā nānō pōnō cædō ante botō wīi ōnonque cæcæte ante æmoimpa. Wæætē wadāni wædænque cæyōnāni tōmengā waadete pōnō cæcā ænīnque botō godōmenque nanguī cætabopa. Incæte botō dicæ tōmēmoque adoboque cæbogaa. Wæætē Wængonguī nānō waadete pōnō cædō ænīmo inte botō tōmengā tōnō cædinque nanguī cæbo imopa. ¹¹ Īnīnque botō apænebo incæ tōmēnāni apænedāni incæ mōnō Codito tōmengā nānō pōnō cægainonque ante tōmāmōni apænemōnipa. Mānīneque ante apænemōni ēñēnīnque mīnitō mānīneque ante pōnēmīnitapa.

Do wængaināni incæ nāni ōmæmoncædānimpa, ante

¹² Īnīnque, Codito do nāni ōmæmongacāimpa, ante apænemōni ēñēmīni incæte pancamīniya, Nē wængaināni dicæ nāni ōmæmōnāniyaa, ante ædō cæte ānewēmīni. ¹³ Īñæmpa, Cōwē nāni ōmæmōnāmaī īnāni bai mōnō Codito incæ adobai nāni ōmæmōnāmaī incædongāimpa. ¹⁴ Ayæ Codito nāni ōmæmōnāmaī ingā bai tōmengā waa pōni nānō pōnō cægainō ante quīnante apænequēnēmōnīi. Edæ ōnonque pōni bacædōnimpa. Ayæ ōnonquedō ante apænemōni bai mīnitō mānīne ante pōnēmīni incæ ædō cæte quēwenguēnēmīni. ¹⁵ Mōnitō godōmenque Wængonguī ingante ante apænedīnque, Codito ingante Wængonguī incæ angā nāni ōmæmongacāimpa, ante apænetamōnipa. Īnīnque, Nē wængaināni cōwē nāni ōmæmōnāmaī īnānipa, ante mīni ānewēnō īñōmō nāwangā ī bai mōnitō Wængonguī nānō cægainō ante babæ wapiticæ ante edæ apænecædōmōnimpa. Edæ, Cōwē nāni ōmæmōnāmaī īnānipa, ante mīni ānewēnō nāwangā ī bai Wængonguī, Nāni ōmæmōe, ante ædō cæte anguēnengāā.

16 *Īnæmpa*, *Ŋāni* *ōmæmōnāmaī* *īnānīpa*, ante *mīni* *ānewēnō* *nāwangā* *ī* *baī* *Codito* *incæ* *adobaī* *ŋāni* *ōmæmōnāmaī* *incægacāimpa*. 17 *Ayæ* *Codito* *ŋāni* *ōmæmōnāmaī* *īngā* *baī* *mīnitō* *mīni* *wede* *pōnēnō* *incæ* *ōnonque* *pōni* *pōnente* *incædōnīmpa*. *Īnīnque* *wentamō* *mīni* *mongæñō* *ædō* *cæte* *ŋā* *mēnongaquēnēmīni*. *Mīni* *wēnæ* *wēnæ* *cædinō* *beyæ* *wentamō* *mongænte* *wæcædōmīnīmpa*. 18 *Māniñō* ante *mīni* *ānewēnō* *nāwangā* *ī* *baī* *Codito* *nempo* *quēwēnīnque* *do* *wəngaināni* *incæ* *do* *nempo* *ga* *wənīnque* *ædō* *cæte* *quēwenguēnēnāni*. *Quēwēnāmaī* *incædōnānīmpa*. 19 *Codito* *pōnō* *ængā* *beyænque* *mōnō* *adopoque* *wənīnque* *wæætē* *wəñāmaī* *quēwengæīmpa*, ante *mōnō* *īnguipogaque* *pōnēnīnque* *wæmo* *baī* *wadāni* *wædænque* *wæwēñōnāni* *mōnō* *godōmenque* *nanguī* *wəwenguēnē* *incædōnīmpa*.

20 *Incæte* *Codito* *dobæ* *ŋāni* *ōmæmongacāī* *apa* *ānewēmīni*. *Edæ* *wadāni* *tānomō* *amīñayonte* *tā* *pedāni* *baī* *cædinque* *Wəngonguī* *adobaī*, *Do* *wəngaināni* *īnānite* *āmo* *ŋāni* *ōmæmoncædānīmpa*, ante *cæcæte* ante *cædinque* *Codito* *Tānocā* *īngante* *do* *angā* *ēñēnīnque* *ŋāni* *ōmæmongacāīmpa*. *Nāwangā* *īmpa*, ante *āmo* *ēñēmaīmīnīpa*. 21 *Edæ* *waocā* *incæ* *adocanque* *ēñēnāmaī* *cæcā* *beyænque* *mōnō* *wənguīmāmo* *pongatīmpa*. *Ayæ* *nē* *wənguēnēmō* *īnte* *wəyōmonte* *Ŋōwocā* *Waocā* *ēñagaingā* *īnte* *wənīnque* *ŋāni* *ōmæmongā* *beyænque* *mōnō* *ŋāni* *ōmæmonte* *quēwenguīmāmo* *adobaī* *pongatīmpa*. 22 *Edæ* *mæmæ* *Adāō* *wodi* *tōmengā* *tōnō* *tōmāmō* *godongāmæ* *nē* *wənguēnēmō* *bagaimō* *īnte* *mōnō* *tōmāmō* *adobaī* *Codito* *tōnō* *godongāmæ* *nē* *ŋāni* *ōmæmonguīmō* *bagamōīmpa*. 23 *Incæte* *to* *amīñayedē* *tānomō* *nāni* *tā* *pedōmō* *baī* *īnongā* *īnte* *mōnō* *Codito* *adobaī* *Tānocā* *īnongā* *īnte* *edæ* *tāno* *ŋāni* *ōmæmongacāīmpa*. *Codito* *nempo* *nē* *quēwēnōmō* *guiquēnē* *mōnō* *ayæmō* *īnōmō* *īnte* *edæ* *tōmengā* *nānō* *ponguīōnæ* *īnque* *ba* *ate* *mōnō* *māniñedē* *ate* *nē* *ŋāni* *ōmæmonguīmō* *īmōmpa*.

24 *Māniñedē* *ate* *īnguipoga* *awēnē* *odeyeidi* *nempo* *ongoncoo* *incæ* *Codito* *tōmancoo* *ō* *ænte* *ōmæe* *ēwencæcāīmpa*. *Ŋænænāni* *nāni* *ānōmāmo* *adobaī* *tōmāmāmo* *ōmæe* *ēwencæcāīmpa*. *Tæī* *pīñænāni* *nāni* *nanguī* *cædoncoo* *incæ* *Codito* *adocā* *incæ* *tōmancoo* *wido* *cæcæcāīmpa*. *Ayæ* *adocā* *nē* *Awēnē* *Odeye* *īnongā* *īnte* *tōmengā* *nempo* *ongoncoo* *wæætē* *edæ* *Mæmpo* *Wəngonguī* *nempo* *edæ* *pædæ* *godongā* *ænīnque* *Mæmpo* *Wəngonguīnque* *tōmenganque* *adocanque* *Awēnē* *Odeye* *īnongā* *īncæcāīmpa*. *Māniñedē* *ate* *edæ* *ŋōwo* *mōnō* *quēwēmāmo* *īñōmō* *edæ* *īnque* *baquīnō* *anguēnē*. 25 *Incæte* *Wəngonguī* *Codito* *īngante*, *Bitō* *īmite* *nē* *pīinte* *cægaināni* *tōmānāni* *īnānite* *mō* *gongæncæbiīmpa*, ante *cædinque* *tōmengā* *ōnōwa* *gāānē* *nānō* *wææntodonganca* *edæ* *adocā* *Codito* *incæ* *māniñō* *nānō* *īnque* *cæganca* *nē* *Awēnē* *īnongā* *īngampa*.

26 *Ayæ* *tōmengā* *īngante* *nē* *pīinte* *cædāni* *īnānite* *æmæwo* *bæ* *tacā* *adīnque* *adoque* *pōni* *mōnō* *wənguīmāmo* *incæ* *ayæ* *ongō* *adīnque* *Wəngonguī*, *Māniñmāmo* *dæ* *bacæīmpa*, ante *māo* *ōmæe* *ēwencæcāīmpa*. 27 *Tōmengā* *nempo* *Wəngonguī* *tōmancoo* *pædæ* *godongā* *ænīnque* *tōmengā* *nē* *Awēnē* *bacæcāīmpa*, ante *do* *yewæmōngatīmpa*. *Mānōmainō* ante *yewæmōnte* *ongō* *īncæte* *Wəngonguī* *nē* *pædæ* *godōnongā* *īnte* *ædō* *cæte*, *Nāmā* *pædæ* *godōmopa*, *anguingāā*, ante *edonque* *acæīmpa*. 28 *Ayæ* *ate* *Wəngonguī* *Wengā* *īncæ*, *Mæmpo* *Wəngonguī* *botō* *nempo* *tōmancoo* *nē* *pædæ* *pōnongā* *īnte* *tōmengā* *adocanque* *pōni* *Tæiyæ* *Awēnē* *badinque* *tōmenganque* *tōmancoo* *ēnempocæcāīmpa*, ante *cæcæcāīmpa*. *Mānōmaī* *cæte* *ate* *tōmengā* *adobaī* *Mæmpo* *Wəngonguī* *nempo* *quēwēnīnque* *Mæmpo* *nānō* *ānonque* *ante* *ēñente* *cæcæcāīmpa*.

²⁹ Pancadāniya edæ, Do wængaināni beyænque cæmōnipa, ante cædinque tōmēnāni beyæ æpænē guiddānipa. Īnīnque, Nāni ōmæmōnāmai ingæimpa, ante mīni ānewēnō nāwangā ī bai tōmēnāni æbānō cæquēnēnāni īnāni. Edæ, Nāni ōmæmōnāmai ingæimpa, ante nāwangā ī bai edæ tōmēnāni nē wængaināni beyæ quīnante æpænē guīquēnēnāni. ³⁰ Ayæ mīni ānewēnō nāwangā ī bai mōnitō īfōmō quīnante mōni wantæ īfō wantæ īfō wodo wænguīfō ante wæquēnēmōni. ³¹ Botō īfō īfō īfō do wæwocabo īnōmo īmopa, ante nāwangā āmopa. Botō mōnō Awēnē Itota Codito nempo quēwēnīnque mīnitō īmīnīte ante pōnēnīnque watapæ tobopa, ante nāwangā antawoo. Edæ botō tōnīfāmīni īfōmīnīte botō mānīnō ante nāwangā ānīmo īnte, Wæwocabo īmopa, ante adobaī, Nāwangā īmpa, ante āmo ēfēmāimīnīpa. ³² Waomō mōnō æīnēnō æncæte ante botō epetoidi babæidi bai īnāni tōnō guēa wæætēdō wæætēdō cæbo bai ōnonque cæte incædōnīmpa. Edæ, Do wængaināni fāni ōmæmōnāmai incædānīmpa, ante nāwangā ī bai botō, “Īfō ate mōnō æmæwo wænguīnque ante cænte bete tocæimpa,” ante nāni ānewēnō bai ante ee quēwēncædōmoimpa.

³³ Īnæmpa mānōmānō ante tedewēnāni ēfēnīnque mīnitō wæætē oda cædāmai īmæwedāni. Edæ do yewæmōnīnque, “Wiwa cædāni tōnō guēa cædinque bitō adobaī wapiticæ quēwēnguīnque godongāmæ cæbīpa.” ³⁴ Ante wææ ānāni ēfēdāni. Edæ, mīnitō wēnæ wēnæ cæmīni adīnque Wængonguī īngante ante ēfēnāmai īnāni īfōmō oda cæbāinānīpa. Mānōmai beyæ mīnitō guīngo īmonte wæquēnēmīni īnōmīni īnte nō cæte quēwēnīnque edæ wēnæ wēnæ cædāmai īedāni.

Do wængaināni īfōmāi fāni ōmæmōncædānīmpa, ante

³⁵ Bitō, Do wængaināni æbānō cæte fāni ōmæmonguīnāni, ante āmitawo. Ayæ, Nāni ōmæmōnīnque mōnō baō quīnō bai ēfāte ponguīmōō, ante ēfēncæte ante wæbitawo. ³⁶ Īnæmpa ōnonquedō ante wæbi awædō. Edæ waoçā tōmēmō quīyacā ate yabæque fōmāate ate tā bocate pædīmō bai mōnō baō adobaī īnte fōmængæimpa. ³⁷ Īnæmpa todigo incæ wawæ incæ bitō, Tā bocate pæcæimpa, ante cædinque do pædīwæ tōmēwæ ænāmai īnte tōmēmonque ænte godō quīyabi ate tā bocate pæpa. ³⁸ Incæte, Tōmēwæ æbānō īwæ pæquīwæ, ante nāmā nānō angainō bai cædinque Wængonguīnque pōnō badongā ate tā bocate pæpa. Wamō tā bocate pædinque æbānō incaquīī, wamō æbānō incaquīī, ante do ēfēngaingā īnte Wængonguī pōnō badongā ate wainca wainca incapa.

³⁹ Tōmāfō baō wīī adoyō bai ēfōmpa. Mōnō waomō baō wayō ēfāmōmpa. Ōōngāidi baō wayō ēfādānīpa. Ayamōidi baō wayō ēfādānīpa. Gæyæidi baō wayō ēfādānīpa. ⁴⁰ Ayæ ōōnædē quēwēnāni wayō mongæfōnāni īnguīpoga quēwēmō īfōmō wayō ēfāmōmpa. Īnīnque ōōnædē quēwēnāni waa nāni ēfādō wayō īfōnte īnguīpoga quēwēmō waa pōni mōnō ēfāyō guīquēnē wīī adobaī ēfāmō īmopa. ⁴¹ Woyowotæ apāicā īfōmō itædē nænque nānō apāi bai wīī apāicampa. Pōnōmenque pōni apāicampa. Nēmōidi guīquēnē wādō bai apāidānīpa. Edæ nēmōidi incæ pancadāniya fāmōināni īnte wædænque apāiyōnāni pancadāniya waa pōni ēmōnāni īnte guīnæ nanguī apāidānīpa.

⁴² Mānīī quīyadīmō yabæque fōmāate ate tā bocate pædīmō bai mōnō adopōque wæmō ate mōnō baō adobaī aquīfō īnte fōmæmpa. Wæætē īncayæ ate mōnō baō fōmāadāmai īnguīnque wæætē fāni ōmæmonguīmō īmōimpa. ⁴³ Ayæ mōnō guīfēfāte wægāifō wido cæte ate mōnō waa pōni ēfāquīnque fāni ōmæmongæimpa. Edæ mōnō aquīfō wido cædinque mōnō

tæi piñæñño baaquinque ñani òmæmongæimpa. ⁴⁴ Edæ inguipogaque quëwëninque mõnõ ðñayõ wido cæte ate mõnõ õõnædë põniwoca ðñate êwocadinque mõnõ waiñõ põni ðñate ñani òmæmongæimpa.

⁴⁵ “Adäo wodi tänocä ðnongä inte nê êwocacä badinque quëwengacäimpa,” ante yewæmongatimpa. Ayæ adobaï Adäo wodi bai Ñõwocä mõnõ Codito incæ nê êwocacä inte quëwëninque mõnõ ðmote põnongä æninque êwocate quëwëmopma. ⁴⁶ Inguipogaque nê quëwengä guiquenê tâno pongacäimpa. Mempoga nê Quëwënongå guiquenê ñõwoque ayæ põningä inte nê Quëwengä ingampa. ⁴⁷ Tãnocä ingante badoncæte ante Wængonguï onguipoi guidimõi æninque badongacäimpa. Ñõwocä guiquenê õõnædë quëwengaingä inte pongacäimpa. ⁴⁸ Inguipogaque ante quëwënani guiquenê inguipoga tâno quëwengaingä bai adobaï ðñanipa. Õõnædë mõnõ goquincabo guiquenê õõnædë quëwente Pongaingä bai adobaï ðmopma.

⁴⁹ Inguipogaque quëwengä nãno ðñayõ bai mõnõ adobaï ñõwo ðñamopma. ðñayæ ate guiquenê õõnædë quëwente nê Pongaingä nãno ðñayõ bai mõnõ adobaï ðñaquimõ ðmopma.

⁵⁰ Botõ tõniñamini apænebo ðñeedäni. Adopoque ðñagaingä inte Wængonguï Awënë Odeye nempo ædõ cæte guite quëwenguingää. Nê aquiiñõ ñõmænguiñõ ðñadongä incæ tõmengä mempoga ðñadamaï inte ædõ cæte baõ ñõmäädamai ðñõ ðñaquingää. ⁵¹ Mõnõ waocabo wëenëñedë mõnõ ðñenãmai ingainõ ante botõ tæcæ ðñenimo inte ñõwo edonque apænebo ðñeedäni.

Wii tõmãmõ wænguimõ ðmopma. Incæte tõmãmõ ðñontobæ wayonque ðñaquimõ ðmopma. ⁵² Edæ todompeta mõnõ ancadeca æmæwo põni nanguï õõnani ate mõnõ awinca adopoque bomõ cæyõmonte ðñontobæ bacæimpa. Edæ todompeta tæcæ we õõñõnani do wængainäni incæ ñõmænãmai nãni inguinque ñani òmæmoncædänimpa. Mãnifedë edæ wayonque põni mõnõ tõmãmõ ðñacæmõimpa. ⁵³ Edæ mõnõ baõ mõnõ aquii ñõmænguiñonque wido cæte ate mõnõ ñõmænãmai inguiñonque ðñaquingue impa. Ayæ mõnõ aquii wænguiñõ êwente ate waiñonque mõnõ wænãmai inguiñõ ðñacæimpa. ⁵⁴ Mõnõ ñõmænguiñõ ðñamõ adinque Codito waiñõ põnongä ænte ðñadinque mõnõ baõ ñõmænãmai ingæimpa. Ayæ mõnõ wænguiñõ ðñamõ adinque tõmengä mõnõ wænãmai inguiñõ ante waiñõ põni põnongä ðñacæimpa. Mãnõmai cæcä ate dodäni nãni yewæmonte angainõ tõmää ðñinque cæte ingæimpa. Edæ ðñimai ante yewæmongadänimpa. “Mõnõ Codito nê tæi piñænongå inte mõnõ wænguimãmõ godõ òmæe êwëninque gãnä cæcæcäimpa. ⁵⁵ ðñinque õnonque bagai inte mõnõ wænguimãmõ ðñõmõ dicæ tæi piñænte cæpa æmæwo wænguimõõ. Mõnõ wænguimãmõ incæ dicæ daapa ðmiñæmpa guii wænguimõõ.”

⁵⁶ Mõnõ wënæ wënæ cægainõ beyænque mõnõ daapa guite bai pante wæquinque nê wænguënëmõ ingamõimpa. Ayæ ðñenãmai cæyõmonte Wængonguï wææ angä beyænque mõnõ nê pante wæquinque nê wænguënëmõ bagamõimpa. ⁵⁷ Wæætë mõnõ Awënë Itota Codito gãnä cædinque mõnõ wænguënëmãmõ ante godõ òmæe êwengä beyænque Wængonguï mõnõ ðmote põnõ cæcä ate gãnä cæmõimpa. ðñinque, Mãnõmai waa põni cæcampa, ante põnëninque mõnõ Wængonguï ingante waa ate põnëninque apænecæimpa.

⁵⁸ Mãnõmai beyæ botõ nê waadete tõniñamini ðñeedäni. Minitõ, Mõnõ ðmote bæ tadãmai incædänimpa, ante adiyæ tæi ongonte wææ cæedäni. Edæ, Mõnõ Awënë nempo quëwëninque nanguï cæmõ ðñinque mõnõ cædinõ ðñõmõ

edæ cōwē ēwēnāmaī ingæimpa, ante pōnēninque mīnitō mōnō Awēnē beyæ ante cōwē godōmenque gomonga cæcæmīnimpā, āmopa.

16

Wængonguī quīnāni beyæ iūmaī cæte godongcæimpa, ante

¹ Nōwo iñōmō mīnitō godonte æinta ante, Wængonguī quīnāni beyæ impa, ante mīni godonguēnēnō ante apænebo ēñēedāni. Gadatiabæ iñōmō Itota ingante godongāmæ nāni pōnencabo inānite do ānimo inte botō mīnitō īmīnite adobaī ante iūmaī āmo cæedāni. ² Mīnitō tōmāmīni, Botō ænincoo æpodō ī, ante adinque, Pancaa Wængonguī quīnāni quī baquimpa, ante cædinque Wængonguī itædē iñō pancacooga nānēnē cō cædinque wacā Wængonguī itædē iñō pancacooga nānēnē cō cædinque ee mæedāni. Īnīnque wæætē wæætē cō cæte eyepæ māmīni adinque botō mīnitō weca ponte adinque, Godōmenque cōō cæedāni, ante ānāmaī inguēnēmo īmopa. ³ Edæ botō mīnitō weca ponte āñōmo mīnitō, Īnāni nō cædōnāni inte mōnitō godōnincoo ænte māo godoncædānimpa, ante odōmōmīni adinque botō wæætē tōmēnāni beyæ cadota ante yewæmoncæboimpa. Ayæ cadota tōnō mīnitō pōnōnoncoo tōnō botō iūnāni inānite pædæ godōninque da godōmo ænte māo Eedotadēē gote nēnempocædānimpa. ⁴ Ayæ Wængonguī Ao angā ate botō tōmēnāni baī adobaī gobo adinque tōmēnāni botō tōnō godongāmæ edæ gobainānīpa.

Īmaī gocæboimpa, ante

⁵ Cōwē Mæatedōniabæ wodo pænta gocæboimpa. Īnīnque mānīmæ tāno wodo pænta gote ate botō ayæ wæætē mīnitō weca poncæboimpa. ⁶ Ayæ mīnitō weca pōnīnque wabānō wantæ iñō quēwente goquīmo. Æbāmē cæcæboimpa. Edæ, Quēwente ate ædōmē gomonga gocæ cæyōmo mīnitō botō tōnō godongāmæ waa cæmīni ate waa gocæboimpa, ante pōnēninque botō wabānō godōmenque quēwēninque tōmāā mōnō yoguīntedæ incæ mīnitō weca quēwencæboimpa. ⁷ Edæ, Botō wodo pænta gocæ cædinque mīnitō weca nōwo pōmo baī wantæ iñō ēñāquinque incædōnimpa, ante pōnente wædinque botō wīī nōwo pōinēmo īmopa. Wæætē, Wængonguī Ao angā ate botō īincayæ ate mīnitō weca ponte wantæpiyæ quēwēninque tocæboimpa, ante pōnēmopa. ⁸ Wæætē mōni oodeocabo ææmæ Pentecotee mōni ānōmæ īinque beganca botō Epeto adoyōmō quēwencæboimpa. ⁹ Edæ Epeto iñōmō quēwēnāni wede pōnente bacædānimpa, ante botō guīte apænequinque odemō baī wī ænete baī ongō abopa. Ayæ adobaī, Nē piinte cædāni nanguī ināni mæ ongōnānīpa, ante adinque botō adoyōmō quēwēninque nanguī wææ apænecæboimpa.

¹⁰ Tīmoteo mīnitō weca wabānō ponguīgā. Pongā īnīnque mīnitō wæætē, Mōnitō weca guīñēnāmaī inte quēwencæbiimpa, ānīnque tōmēngā ingante waa cæedāni. Edæ botō nē cæbo īmo baī tōmēngā adobaī Wængonguī beyænque nē cæcā ingampa. ¹¹ Īnīnque, Tīmoteo ōnonque cæcampa, ante tedewēnāmaī inte mīnitō tōmēngā ingante Baa ānāmaī incæmīnīmpa. Wæætē waadete cædinque da pōnōmīni ate tōmēngā piyænē cæte botō weca adodō poncæcāimpa, āmopa. Edæ, Mōnō tōniñadāni tōnō Tīmoteo godongāmæ poncæcāimpa, ante pōnēninque botō wānō cōmopa.

¹² Botō mōnō tōniñacā Apodo ingante guīquēnē, Mōnō tōniñadāni tōnō bitō coodintoidi weca ēñate pōe, ante ancaa āmo incæte tōmēngā wæætē, Nōwo wīī goquīmo, ante Baa angantapa. Incæte Wængonguī Ao angā ate tōmēngā īincayæ ate mīnitō weca cōwē poncæcāimpa.

Waa quēwencæmīnīmpa, ante

¹³ Mīnitō guiquēnē cōwā ate nāmā wææ aadedāni. Wede pōnēmīni inte tæi gongæante ongedāni. Æmæwo pægāimīni inte tæi piñænte entawēninque guifēnāmaī inte ee cæedāni. ¹⁴ Ayæ tōmāā quīēmē cæmīni inte waadete pōnēninque cæedāni āmopa.

¹⁵ Botō tōniñamīni mīnitō iīmaī ante do ēñēmīnipa. Acayabæ iñōmō tāno pōnengaināni inte Etepanā nāni quēwencabo iñōmō, Wængonguī quīnāni inānite nē cæmōni bacæmōnimpa, ante ñōwo cædānipa cæmīni. ¹⁶ Inique mīnitō Wængonguī quīnāni beyæ nē cædināni inānite Ao āninque piyænē cædinque tōmēnāni nāni ānō bai do ēñente cæedāni. Ayæ, Wadāni adobaī, Mōnō tōnō godongāmæ nangui cædānipa, ante adinque mīnitō tōmēnāni nāni ānō bai do ēñente cæedāni.

¹⁷ Etepanā tōnō Podotōnato ayæ Acaico botō weca pōninque mīnitō botō beyæ mīni cæinēnō ante do cædāni ate nangui totabopa. ¹⁸ Edæ tōmēnāni pōnō apænedāni ēñēninque mīnitō wampo pōnente tæi piñænte ēwocamīnitawo. Ayæ adobaī pōnō apænedāni ēñēninque mōnitō wampo pōnente tæi piñænte ēwocamōnipa. Mānōmaī nē pōnō cædināni inānite mīnitō wæætē waa ate pōnēninque cæquēnēmīni imīnipa.

¹⁹ Atiabæ iñōmō Codito ingante godongāmæ nāni pōnencabo nāni cabo nāni cabo tōmānāni mīnitō imīnite ante pōnēninque, Waa quēwencæmīnimpa, ante apænedānipa. Aquidæ tōnō Pidica nāna gæncaya adobaī ayæ tōmēna oncōnē Codito ingante pōnente godongāmæ pōninque nāni pōnencabo adobaī mīnitō imīnite waadete pōnēninque, Mōnō Awēnē nempo waa quēwencæmīnimpa, ānānipa. ²⁰ Mōnō tōniñadāni tōmānāni, Waa quēwencæmīnimpa, ante apænedānipa. Mīnitō guiquēnē mīni cabo godongāmæ pō bee tēninque waadete pōnente waa apæneedāni, āmopa.

²¹ Botō Pabodobo iñōmō tæcæ tōmēmo ōnompoca yewæmōninque, Waa quēwencæmīnimpa, ante tōmēmo yewæmōmopa.

²² Æcānō mōnō Awēnē ingante waadete pōnēnāmaī ina iñōmō tōmengā nānō wænguinque mānōmaī cæcampa tōō. Botō iñōmō wæætē, Mōnitō Awēnē imi pōe, ante wæbopa.

²³ Mōnō Awēnē Itota waadete pōnō cæcā æninque mīnitō tōmengā nānō waadete pōnō cædō entawēninque waa quēwencæmīnimpa. ²⁴ Codito Itota nempo mōnō quēwencabo imopma, ante pōnēninque botō mīnitō imīnite waadete pōnēmpa. Māninque ante yewæmōmopa.

2 Coodintoidi inänite Pabodo cadota ante ayænta nänö yewæmongainta

Waa quëwencæminimpa, ante

¹Wængongui pönö angä beyæ Itota Codito botö Pabodobo imote da godongä godongaimo inte botö mönö töninacä Timoteo tönö guëa apænemöna ate botö iimäi ante yewæmömopa. Coodinto inömö quëwëmini inte minitö inömö Codito ingante mini godongämæ pönencabo incæ acæminimpa, ante yewæmömopa. Ayæ Acayabæ tömäo inömö quëwente Wængongui quinäni inte tömënäni adobai adota acædänimpa, ante yewæmömopa. ²Mönö Awënë Itota Codito tönö Mæmpo Wængongui tönö guëa waadete pönö cæda adinque minitö gänë pönente waa quëwencæminimpa, ämönapa, ante yewæmömopa.

Codito iimäi waadete pönö cæcampa, ante

³Mönö Awënë Itota Codito Wæmpocä inongante Itota inömö adocä ingante, Botö Wængongui inongä ingampa. Ayæ Itota Wængongui adocä inongä inte tömengä mönö wæwënö ante adinque godongämæ wæte bai pönö waadete apænecä ëñëninque mönö wampo pönëmö imompa. Mänömai beyæ, Itota Mæmpo Wængongui cöwë waa cæcampa, ante mönö watapæ apænecæimpa.

⁴Adocä Wængongui mönö imonte äninque, Wënë wënë wæwëmini adinque botö waadete pönö apænëbo ëñëninque minitö wampo pönëminitapa. Ininque wadäni wënë wënë wæwënäni adinque minitö botö apænëdö ante waadete godö apænëmini ëñëninque tömënäni wæætë wampo pönencædänimpa, ante botö minitö iminite pönö cætabopa, Wængongui angampa.

⁵Edæ iimäi beyæ mänömai angampa. Codito në nantate wægingä beyæ nantate wæwëninque mönö tömengä tönö äanque bai nantate wæwëmompä. Ayæ adobai nantate wæwëmö adinque adocä Codito waadete pönö apænecä ëñëninque mönö tömengä tönö äanque bai ëwocadinque wampo pönëmompä. ⁶Mönitö nantate wæwëmöni aminitawo. Edæ mönitö nantate wæwente apænëmöni beyæ Wængongui minitö iminite wæætë pönö waadete apænecampa. Apænecä ëñëninque minitö wæætë wampo pönëninque wænämai quëwencæminimpa, ante Wængongui cæcampa. Ayæ mönitö wæwëñömönite tömengä pönö waadete apænecä ëñente wampo pönëmöni aminitawo. Edæ minitö nantate wæwëmini inte wampo pönencæminimpa, ante Wængongui mänömai cæcampa. Ayæ wampo pönëmini badinque minitö iincayæ ate mönitö nantate wæwënö bai adobai nantate wæwëmini incæte piyænë cæte ee cæte quëwencæminimpa, ante Wængongui pönö cæcampa.

⁷Ayæ mönitö tönö äanque bai minitö nantate wæwëminitawo. Edæ tömengä waadete pönö apænecä ëñëmini ate minitö adobai mönitö tönö äanque bai wampo pönëngulmini iminipa. Ante do ëñëninque mönitö, Nawangä minitö watapæ quëwencæminimpa, ante do pönëmönipa.

⁸Inänäni, mönitö Atiabæ quëwëninque æbänö wënë wënë bate wætämöni, ante ñowo yewæmömö aedäni. Tæi piñæmöni inämai inte mönitö godömenque teëmë mongænte bai nangui wënë wënë bate wædinque, Nangæ bate wængui wæ, ante wætämönipa. ⁹Wængongui do angä wænguënëmöni imönipa, ante nãmæneque pönente wætämönipa. Incæte mönitö, Tömëmöni nämä tæi piñænö beyæneque quëwencæmönimpa, ante pönënëmai incæmönimpa, ante odömoncæte ante Wængongui pönö cæcä wætämönipa. Wæætë tömengä, Do

wængaināni quēwencædānimpā, ante botō nē āmo iñōmote mīnitō wæætē botō imote wede pōnente quēwencæmīnimpā, ante cæcæte ante Wængonguī mānōmaī pōnō cæcā wætāmōnīpā. ¹⁰Mōnitō mānīnō mōni oo wænguinque ante wæyōmōnite tōmengā do bæi ongonte ængā beyænque quēwentāmōnīpā. Ayæ ate wæyōmōnite tōmengā ængā beyænque quēwencæmōnīpā. Ayæ, Adocā wæætē wæætē ængā beyænque quēwencæmōnīpā, ante pōnēninque mōnitō tōmengā ingante wede pōnente tomōnīpā. ¹¹Īninque mīnitō iñacabo gongænte bai mōnitō beyæ Wængonguī ingante apænemīni ēñēninque tōmengā cōwē bæi ongonte ængā beyænque quēwencæmōnīpā. Mānōmaī cæcā adīnque nanguī iñāni wæætē Wængonguī ingante waa ate pōnente iīmaī ante apænecædānīpā. Wængonguī ēñēmi. Nanguī iñāni apænedāni ēñēninque bitō Pabodoidi beyæ pōnō waa cæbi amōnīpā, ante apænequīnāni iñānīpā.

Coodinto iñōmō quīnante pōnāmaī īmoī, Pabodo angampa

¹²Mōnitō iīmaī ante nāmā waa ate pōnēninque apænemōnīpā. Wængonguī quīmōni iñōmōni inte mōnitō tōmengā, Tæiyæ waēmō ēwocacæmīnīpā, ante ænte entawēmōnīpā. Mānōmaī beyæ Wængonguī nō cæcā bai mōnitō adobai inguipoga quēwēninque nō cæte quēwēmōnīpā. Ayæ mīnitō weca pōninque mōnitō godōmenque waa cætāmōnīpā. Mānōmaī cædinque mōnitō inguipoga quēwēnānīque nāni ēñēnō beyænque dicæ cætāmōnīyā. Wæætē mīmō entawēmōni inte nāmā apænte āninque mōnitō Wængonguī waadete pōnō apænecā ēñēninque eyepæ cætāmōnīpā, ante tomōnīpā. ¹³Mīnitō acæmīnīpā, ante yewæmōmōninque mōnitō dicæ idiquibæ ante yewæmōmōnīyā. Wæætē, Edonque adinque do ēñencæmīnīpā, ante edonque yewæmōmōni abaimīnīpā. Ayæ botō, Mīnitō nāwangā godōmenque ēñencæmīnīpā, ante iīmaī ante pōnēmopa. ¹⁴Mōnitō æbānō īmōnī, ante mīnitō panca ante do ēñēmīnīpā. Ayæ, Mōnō Awēnē Itota tōmengā nānō ponguīōnæ īinque bayonte mōnitō mīnitō īmīnite adinque, Mīnitō nē wede pōnengāimīni īmīnīpā, ante adinque tocæmōnīpā, ante do ēñēmīnitawo. Ayæ mānīōnæ bayonte mōnitō īmōnite adinque mīnitō adobai, Waa nē cægāimīni īmīnīpā, ante tocæmīnīpā, ante āmo ēñēmaīmīnīpā.

¹⁵Mānōmaī impā, ante pōnēninque botō, iīmaī cæcæboimpā, ante pōnentabopa. Wayōmō ayæ godāmaī inte botō tāno mīnitō weca ponte waadete apænecæboimpā. Apænebo ēñēninque mīnitō wæætē mempoga tocæmīnīpā, ante iīmaī cædimō intabopa. ¹⁶Mīnitō weca tāno ponte ēñadinque godōmenque godinque botō Māatedōniabæ gote pōninque wæætē mīnitō weca adodō ocæ ēmænte poncæ cædimō intabopa. Ayæ pōmo ate mīnitō botō imote godongāmæ cædinque da godōmīni godōmenque Oodeabæ gocæ cædimō intabopa. ¹⁷Incæte botō, Mānōmaī cæquimo īmopa, ante pōnēninque dicæ ōnonque ante pōnentawogaa. Mānōmaī pōinēmo inte botō fīmpo cæte pōnāmaī īmo adinque mīnitō, Pabodo æmæ pōnente, Wīī pōinente wabānō wīī pongā, ante pōnēmīnitawo. Īñampa inguipogaque quēwēnāni mānōmaīnō ante nāni æmæ pōnēnō bai botō iñōmō edæ dicæ adobai pōnentawogaa.

¹⁸Wængonguī nāwangā mōnō imonte cōwē pōnēninque nē aacā ingampa, ante nō pōni impā. Mānōmaīnō ante nō pōni ī bai mīnitō īmīnite mōnitō apænedō iñōmō adobai nō pōni impā. Īninque mōnitō ædō cæte wadō ante apænequīmōnī. ¹⁹Tidibānō tōnō Tīmoteo botō tōnō mīnitō weca pōninque, Wængonguī Wengā Itota Codito ingampa, ante nō impā, ante apænemōni ēñēmīnitawo. Īninque mōnitō Itota Codito nempo quēwēninque nē Ao āmōni inte ædō cæte æmæ pōnente bai wadō ante apænequīmōnī. ²⁰iīmaī impā.

Wængonguī, Cōwē cæcæboimpa, ante æpogamē wæætē wæætē angacāimpa. Wæætē wæætē angā incæte Codito iñōmō edæ cōwē Ao āninque, Wængonguī nānō angainō tōmānō iinque cæcæimpa, ante cæcampa. Iinque mōnitō tōmengā tōnō cædinque, Wængonguī ñāō apāite bai ēmōñongante tōmānāni tōmengā ingante waa acædānimpa, ante cædinque, Ao, mǎnōmaī impa, ante, Amēē, ante watapæ apænemōnipa. ²¹ Wængonguī incæ mōnitō imōnite apænte æninque ayæ mīnitō imīnite apænte æninque, Mīnitō Codito nempo quēwēninque nē tæī piñæmīni bacæmīnimpa, ante mōnō tōmāmō imonte pōnō ōni pæte bai cædinque iīmaī cæcampa. ²² Tōmengā ēmōwo yewæmōnte bai cædinque, Botō quīmīni imīnīpa, ante pōnō cæcampa. Ayæ, Iīncayæ ate mīni godōmenque nangūī ænguinque mīnitō ñōwo botō Ōnōwoca ingante ænte ēwocaedāni, ante tōmengā Ōnōwoca ingante ñōwo da pōnongā ænte ēwocamīnīpa.

²³ Iinque Coodinto iñōmō botō quīnante wæætē pōnāmaī ingaboī. Edæ wēnæ wēnæ cæmīni adinque mīnitō imīnite nē pangūēnēmo incæ botō, Wīī pāinente awædō, ante wīī pontabopa. Wængonguī ayongante botō, Mǎnōmaī impa, ante nō apænebo ēñēmaīmīnīpa. ²⁴ Iīmaī ante wede pōnencæmīnimpa, ante mōnitō dicæ nē wææ āmōni imōniyaa. Wæætē edæ, Mīnitō mīni wede pōnēnō beyænque tæī ongōninque edæ nangūī cæmīnīpa, ante adinque mōnitō wæætē, Mīnitō watapæ tocæmīnimpa, ante cædinque mīnitō tōnō godongāmæ cæmōnīpa.

2

¹ Botō wēēñēdē mīnitō weca ēñacæ pōninque nangūī āmo wæmīnitapa. Iinque, Wīī wæætē āmo wæcæmīnimpa, ante ñōwo ēñacæ pōnāmaī incæboimpa, ante nāmāneque pōnēninque antabopa. ² Edæ pīmo wæwēmīni bai æcānō wæætē, Tocæbiimpa, ante botō imote waadete pōnente apænequēnengā. Iñæmpa botō pīmo beyæ nē wæwēnimīnique ongōmīni bai botō imote nē waadete pōnente apænequēnengā iñōmō edæ dæ ancædongāimpa. ³ Botō quiēmē beyæ tobo adinque mīnitō godongāmæ watapæ toquēnēmīni imīnīpa, ante pōnentabopa. Mīnitō botō beyæ āninque, Pabodo mōnō weca pongā adinque mōnō cæmō tocæcāimpa, ante nē cæquēnēmīni imīnīpa, ante awædō. Iinque, Mīnitō weca pōninque botō mīnitō wæwēnō ante wædāmaī incæboimpa, ante cædinque botō, Botō cadota ante yewæmōmo adinque mīnitō ēñente cæcæmīnimpa, ante wæbopa. ⁴ Botō nangūī caate wædōmo inte mīmōnoque pōnente wæwēninque yabæque adobai Ca ca nangūī pōnente wædinque mǎnōmānō ante wæbopa. Incæte botō, Mīnitō wæwencæmīnimpa, ante dicæ āmogaa. Wæætē, Botō æbānō mīnitō imīnite nangūī waadete pōnēmopa, ante ēñencæmīnimpa, ante odōmoncæte ante yewæmōmopa.

Nē wīwa cæcā ingante æbānō godō waadete ñimpo cæquīī

⁵ Adocanque wīwa cæcā adinque botō tōmengā nānō wīwa cædō beyæ wæwēmo incæte mīnitō tōmāmīni wædænque incæ nangūī incæ wæwēmīni adobai imīnīpa. Botō, Tōmengā ingante piñāmaī incæboimpa, ante pōnēninque, Wædænque wæwēmīnīpa, ante apænebopa. ⁶ Nē ēñēñāmaī cædingā ingante mīnitō pancamīniya wodo tōmāmīni do pāmīnitapa. Iinque botō, Idæwaa pāmīnīpa, āmopa. ⁷ Tōmengā, Ancaa pāmīni awædō, ante godōmenque wæwente bacantawo. Iinque mīnitō pōnō ñimpo cædinque tōmengā ingante, Idæwaa pāmōni wæbīpa, ante ædæmō waadete apænēmīni ēñēninque tōmengā iinque

wædinqe wampo pönencæcäimpa. ⁸ Minitö wæætë, Bitö ìmite nāwangā waadete pönēmōnīpa, ante adodö apænemīni ēñencæcäimpa, ante botö mīnitö ìminite nanguī āmopa. ⁹ Botö ānō ante æbānō tōmānō ante ēñente cæmīni, ante ēñencæte ante botö wēēñēñedē yewæmontabopa. Eyepæ cæmīni ate wædinqe botö, Eyepæ cæmīnīpa, āmopa. ¹⁰ Nē ēñēñāmaī cæcā ingante mīnitö ñimpo cæmīni ee gogantawo. Mānōmaī cæmīni ìninqe botö ñōwo adobaī ñimpo cæbopa. Waocā æcāmenque ēñēñāmaī cæcā adinqe godö pōnō ñimpo cæbo ìninqe botö Codito ayongante mīnitö beyænque ante mānōmaī godö ñimpo cæbo intabopa. ¹¹ Ìñæmpa Tatāna incæ angā ēñente beyænque mōnō oda cæte wæquinque edæ godōmenque pīmaīmōmpa, ante aquēñē quēwēdāni. Tatāna æbānō, Oda cæte wæcædānīpa, ante cæcampa, ante edæ do ēñēmōmpa.

Tito beyæ ante Pabodo wæcampa

¹² Botö Tooda nāni quēwēñōmō tāno pōninqe, Mōnō Codito ingantedö ante watapæ apænecæte ante cæyōmo mōnō Awēñē, Botö beyæ guīte apænee, ante odemö wi ænete bai do cæcā atabopa. ¹³ Incæte botö tōññacā Tito dæ angā wædinqe botö, Ædö cæte ññōmō a ongonte apænequīmoo, ante tōmēñāni ññānite, Gobopa, ante Māatedōniabæ gocæte ante wadæ gotabopa.

Codito nempo quēwēninqe tæī ēmōmōnīpa, ante

¹⁴ Nē tæī ēmōngā inte mōnō Codito ññōmō nē piinte cædāni ññānite gāñā cæcampa. Ìninqe mōnitö Codito nempo quēwēñōmōnīte Wængonguī, Nē tæī ēmōngā ingante waa acædānīpa, ante cædinqe mōnitö ñmōnīte nē tæī ēmōngā mīñæ ænte māocā dao dao godinqe mōnitö tōmēngā nānō ēmōnō bai adobaī tæī ēmōmōnīpa. Ayæ oguī wa woboyæ wodo wodo cædinqe tōmāo māo oguī wa bai Wængonguī adobaī cædinqe mōnitö ñmōnīte angā ēñēninqe mōnitö wæætë, Mōnō Codito æbānō ingāā, ante wayōmō wayōmō māo apænemōni ēñēñānīpa. Wængonguī mānōmaī cæcā beyæ mōnō Wængonguī ingante waa ate pōñēninqe apænecæcäimpa.

¹⁵ Ìmaī edæ impa. Codito ængā beyænque nē quēwēngūñāni weca quēwēmōni incæ nē wængūñāni weca quēwēmōni incæ mōnitö Codito nempo quēwēninqe tōmēngā nānō oguī wamōnedö bai mōnitö adobaī, Wængonguī wē ongonte bai tocæcäimpa, ante oguī wamōnete bai apænemōnīpa. ¹⁶ Mōnitö oö wa wamōnete bai cædinqe nē wængūñāni ññānite tōmēñāni nāni wænguīmāmo ante apænemōni ēñēninqe tōmēñāni nāni wængūninqe wē ongonte ocado cæte bai ēñēñānīpa. Wæætë oguī wamōnete bai mōnitö nē quēwēngūñāni ññānite guīquēñē tōmēñāni nāni quēwēngūīmāmo ante apænemōni ēñēninqe tōmēñāni wæætë nāni quēwēngūninqe wē ongonte ocado cæte bai ēñēñānīpa.

Ìninqe māññō mōnitö cæquēñēñō ante æcānō eyepæ cæquingāā. ¹⁷ Edæ nanguī ññāni nāmā beyænque ante æncæte ante cædinqe Wængonguī nānō apænedö ante apænēwēñāni bai mōnitö wīī adobaī wēñæ wēñæ cæcæte ante apænemōni ñmōnīpa. Wæætë Wængonguī mōnitö ñmōnīte da godongā godinqe māo nē apænemōni inte mōnitö Wængonguī ayongā mōnō Codito nempo quēwēninqe nō pōñente apænemōnīpa.

3

Wængonguī mīñe pōnō angā beyænque quēwēmōmpa

¹ Mōnitö ñmōnītedö ante pōñēninqe mīnitö, Pabodoidi, Waa cæmōni aedāni, ante tedewēñānīpa, ante wēēñēñedē āmīnitawo. Ayæ, Ñōwo wæætë adodö ante tedewēñānīpa, ante pīimīnitawo. Mōnitö ññæmpa nāmanque ante, Waa

cæmōni aedāni, ante dicæ ämōniyaa. Wadāni mōnitō imōnite waa acædānimpa, ante cædinque pancadāniya guiquēnē mīnitō imīnite āninque, Cadota ante pōnō yewæmōedāni, ānāni ēñēninque yewæmōmīni ate tōmēnāni ænte māo odōmōnāni adāni. Ayæ wadāni inānite adobaī, Cadota, ānāni ēñente yewæmōnāni āninque mīnitō imīnite odōmōnāni. Mōnitō guiquēnē, Cadota ante pōnō yewæmōedāni, ante dicæ ämōniyaa. ² Wæætē mīnitō guiquēnē waa quēwēmīni adinque wadāni, Pabodoidi tōmēnāni inānite apænedāni beyænque coodintoidi wede pōnēnāni inte waa quēwēnāni amōnipa, ante pōnēninque cadota ate baī do ēñēnāni. Mānōmaī pōnō cæmīni āninque mōnitō cadota næænte odōmonte baī cædinque, Coodintoidi æbānō waa cædāni, ante tōmānāni inānite odōmōmōni adinque ēñēnāni. ³ Īninque, Pabodoidi apænedāni beyænque waa cædāni, ante edonque acædānimpa, ante cædinque Codito ĩñōmō Wængonguī nē Quēwengā Ōnōwoca ingante da pōnongā ænte ēwocamīni. Mānōmaī cædinque Codito cadota ante yewæmonte baī pōnō cædinque wīi tōmengonca yewæmongampa. Wīi dicaboga yewæmōninque tōmengā Ōnōwoca ingante mīnitō baonga da pōnongā ænte ēwocamīni.

⁴ Codito godongāmæ cæcā beyænque mōnitō Wængonguī ayongā nōingā ante apænemōnipa, ante pōnēninque mōnitō guīñēnedāmaī inte do edæ apænemōnipa. ⁵ Mōnitō nāmanque ante, Æbānō waa cæmōnii, ante eyepæ imōnipa diyæ apænte anguīmōnii. Wæætē Wængonguinque pōnō godongāmæ cæcā ate mōnitō eyepæ badinque cæmōnipa. ⁶ Wængonguī, Botō pōnō cæbo ate mīnitō Ao ämīni ĩninque mōnō godongāmæ waa cæte quēwengæimpa, ante cōwē angampa. Tōmengā doyedē ĩñōmō, Botō wææ angainō ante ēñente cædinque quēwencæmīnimpa, ante nānō wææ angaine ante ñōwo wæætē ānāmaī ingampa. Māñine ante ñōwo ganca wææ angā baī mōnō wænguinque incædōnimpa. Ñōwo guiquēnē Wængonguī wæætē, Botō Ōnōwoca ingante ænte ēwocadinque quēwencæmīnimpa, ante mīline ante apænecā ēñēninque mōnō quēwenguinque Wængonguī Ōnōwoca ingante ænte ēwocamompa edæ. Mōnitō ĩñōmō tōmengā Ōnōwoca ingante nē ēwocamōni inte eyepæ badinque mīline Wængonguī ñōwo nānō pōnō apænede ante nē apænemōni imōnipa.

⁷ Wængonguī, ĩmaī cædāni, ante dicaboga wææ yewæmongā ate mōnō ēñēnāmaī imō beyænque māñine tōmengā nānō wææ yewæmongaine beyænque mōnō wænguimāmo bagatimpa. Incæte māñine beyæ edæ ñāo nanguī apāigatimpa. Īninque māñine ænte godōmenque wææ āninque Mōitee wodi awinca ñāo apāite baī ēmongacāimpa. Māñii ñāo wodēmæmō ēmongā incæte idægoidi tōmengā awinca adinque, Ædō cæte Mōitee awinca cōwā aquīmōnii, ante wægadānimpa.

⁸ Mōnitō guiquēnē, Wængonguī Ōnōwoca ingante ænte mōnō quēwengæimpa, ante mōni apænedō beyænque quīēmē baī godōmenque nanguī apāite baī apāicæimpa. ⁹ Mōnō apænte tente wænguinque edæ māñine pedæne ante ēñēnāmaī cægamōimpa. Incæte māñine ante nānō wææ angainō beyænque Mōitee wodi awinca ñāo apāite baī ēmongacāimpa. Īninque ñōwo ĩñōmō, Mōnō nō cæte quēwenguinque ante Wængonguī Ōnōwoca ingante wænguimā, ante mōni apænedō guiquēnē ñāo quīēmē baī godōmenque nanguī nāwante baī ēnepa. ¹⁰ Wængonguī Tæiyæ Waēmō Ōnōwoca ingante ante mōni apænedō ĩñōmō godōmenque ñāo nānō apāidō beyænque Mōitee wodi nānō wææ angainō guiquēnē pōnōmenque apāidinque edæ wodēmā

badinque edæ dæ bapa. ¹¹ Edæ mänine mönō wodēmāa baquēnēmāmo incæ ñāō apāite bai iñonte Möitee wodi ænte apænegacāimpa. Wængongui ñōwo nānō pōnō āne guiquēnē cōwē wodēmāa badāmai ēne inte godōmenque nangui guinæ nāwante bai ēnepa.

¹² Īninqe, Wængongui Tæiyæ Waēmō Ōnōwoca pōnō cæcā beyænque mönō nō cæte watapæ quēwengæimpa, ante pōnente quēwēmōni inte mönitō guīñēdāmai inte do apænemōnipa. ¹³ Möitee wodi guiquēnē, Ñāō apāi bai botō ēmōnō incæ wodēmāa bamōñōmote idægoidi adāmai incædānimpa, ante cædinque weocoo ñāne cæmongacāimpa. Mönitō guiquēnē Möitee wodi nānō ñāne cæmongai bai cædāmai imōni inte edonque apænemōnipa. ¹⁴ Māninta, Botō wææ angainō ante ēñente cædinque quēwencæminimpa, ante Wængongui nānō pedænta ante adinque idægoidi do nāni ñāne cæmongaincōo ñōwo ganca edæ ñāne cæmonte bai ēmōnānipa. Īninqe tōmēnāni ocai ōmæcadāni bai bagadānimpa. Edæ Codito nempo quēwēnānique mānincoo wi cæmonte bai ēmōnāni inte tōmēnānique edonque adāni iñānipa. Īninqe idægoidi wæætē Codito nempo quēwēnāmai iñāni inte ayæ edæ wi cæmōnāmai inte wædānipa. ¹⁵ Īninqe idægoidi ñōwo ganca mimō bee otawente bai inōnāni inte Möitee wodi nānō yewæmongainta adinque ēñēnāmai iñānipa.

¹⁶ Incæte Awēnē gāmænō æcānō pōna tōmengā Möitee wodi nānō wi cæmōnō bai badinque do wi cætawente bai bacampa. ¹⁷ Mōnō Awēnē incæ Wængongui Ōnōwoca ingampa. Ayæ waocā mönō Awēnē Ōnōwoca ingante ēwocacā Īninqe tōmengā wi cætawente bai entawente quēwēnongā inte wii tee mönete wæcā bai ingampa. ¹⁸ Mōnō tōmāmō iñōmō awinca wi cæmonte bai ēmōnōmō inte mönō awocawænta bai bamompa. Īninqe wadāni mönō imonte adinque, Mōnō Awēnē æbānō ñāō apāite bai ēmongāā, ante awocawænta ate bai edonque acædānimpa. Ayæ godōmenque ayæ godōmenque mönō ñāō apāidō mönō ēwocaquinque mönō Awēnē nānō ēwocadō bai mönō ayæ godōmenque ayæ godōmenque ēwocamō imompa. Mōnō Awēnē incæ Wængongui Ōnōwoca inongā inte mānōmai pōnō cæcā entawēmompa.

4

¹ Wængongui, Botō pōnō cægāinō ante mīnitō nē apænemīni incæminimpa, ante waadete pōnō angā beyænque mönitō māninō ante nē apænemōni bagaimōni inte ñōwo wæ guemōnāmai inte cōwē apænemōnipa. ² Wadāni guiquēnē tōmēnāni nāni guingo imonte wæquinque awēmō cædānipa. Mönitō iñōmō tōmēnāni nāni cæwēnō bai cædāmai incæmōnimpa, ante do ānimōni inte babæ cædāmai imōnipa. Wængongui nānō apænedō ante idiqubæ apænedāmai imōnipa. Wæætē Wængongui ayongā mönitō tōmengā nō nānō apænegāinō ante edonque pōni odōmote apænemōni ēñēninque tōmānāni mimō entawēnāni ĩninqe edæ, Pabodoidi nō ante cædānipa, ante apænebainānipa. ³ Incæte mönō Codito ingantedō ante watapæ möni apænedō iñōmō ñāne cædete bai intawo. Īñæmpa ñāne cædete bai ĩ ĩninqe nē wē womonte wænguñāni beyænque ñāne cædete bai impa. ⁴ Wængongui nānō ēmōnō nē ēmōnongā inte mönō Codito iñōmō mönō beyæ ñāō apāite bai cæcampa, ante watapæ mönō ēñente pōnēnō ante apænemōnipa. Nōwoquipogaque quēwēnāni beyæ guiquēnē tōmēnāni awēnē wængongui bai Tatāna nē cæcā ingampa. Tōmengā iñōmō mānīne watapæ möni apænedō ante pīininqe, Nē pōnēnāmai iñāni adāmai incædānimpa, ante tōmēnāni awinca ñāne cæmonte bai wææ cæcampa.

⁵ Mönitō iñōmō, Nāmā incæ waa cæmōnipa, ante tededāmaī imōnipa. Wæætē, Itota Codito incæ mōnō Awēnē ingampa, ante mōnitō, Tōmengā beyænque mōnitō munitō iminite nē cæmōni imōnipa, ante māninque ante apænemōnipa. ⁶ Wēmō iñōmō ñāō apāicæimpa, ante Wængongui incæ badongacāimpa. Adocā ñāō ante nē angaingā inte ñōwo wæætē mōnitō mimōno tica éente bai cædinque iimāi ante odōmongā amōnipa. Tōmengā iñōmō, Botō æbānō guinæ nāwante bai émōmoo, ante munitō Codito awinca adinque edonque pōni acæminimpa, ante pōnō tica éente bai odōmongā amōnipa.

Itota ingante mōnō wede pōnēnō beyænque quēwēmō

⁷ Nanguī ñāō apāite bai ewocamōni incæ ōnoncadedē mante bai edæ ewocamōnipa. Edæ daigænē cængæmoncadenque bai mōnitō baō mongæñmōnite Wængongui, Wii munitō nāmā tæi piñænō beyænque ewocamīnipa, wæætē botō tæi piñænō beyænque ewocamīnipa, ante acædānimpa, ante badongampa. Īninque tōmengā tæi piñænte pōnō badongā æninque mōnitō ñāō apāidō mōni mānō iñōmō ōnoncadedē mante bai ewocamōnipa. ⁸ Mōnitō imōnite tōmānō māmō mō ongonte bai cædāni wæmōni incæ gueogæ godāmaī imōnipa. Æbānō cæte quēwēmō imōō, ante wæmōni incæ mōnitō guñente wædāmaī imōnipa. ⁹ Ancaā togænte pānāni wæyōmōni Wængongui mōnitō imōnite cōwē émō cæte godāmaī ingampa. Ayæ wæñoncæte ante bæ tadāni incæte æmæwo wæñāmāi imōnipa.

¹⁰ Itota tōmengā nānō quēwēnō pōnongā æmōni beyænque mōnitō, Baō ayæ mongænte quēwēmōni acædānimpa, ante cæmōnipa. Tōmengā nānō wængainō bai mōnitō adobai wæætē wæætē wænte bai baō mongæmōnipa. ¹¹ Mōnitō nē quēwēmōni iñōmōnite wadāni wæætē mōnitō imōnite bæi ongonte æninque, Itota beyænque wæncæminimpa, ante nanguī cædānipa. Īninque mōnitō baō ñōmænguiñō ēñayōmōnite wadāni, Itota tōmengā nānō quēwēnō ēñate beyænque ayæ quēwēñānipa, ante edonque acædānimpa, ante mōnitō wæncæ cæte bai ēñate wæmōnipa. ¹² Īninque mōnitō mōni wænguimāmo beyæ ante wæyōmōni munitō wæætē mīni quēwenguimāmo ēñate quēwēmīnipa.

¹³ Docā do apænedinque, Botō nē wede pōnēmo inte apænetabopa, ante yewæmongacāimpa. Tōmengā wede nānō pōnengainō bai adobai ewocadinque mōnitō nē wede pōnēmōni inte adobai apænemōnipa. ¹⁴ Īimainō ante ēñēninque wede pōnēmōni inte mōnitō apænemōnipa. Itota ingante, Nāni ōmæmōe, ante nē cægaingā adocā mōnitō imōnite angā ate mōnitō Itota tōnō godongāmæ ñāni ōmæmoncæmōnimpa, ante do ēñēmōnipa. Ayæ munitō tōnō mōnitō tōmāmō iñōmonte Wængongui ænte māmō gōnongā ate mōnō tōmengā weca godongāmæ gongænguimō imompa. Mānōmāinō ante do ēñēmōni inte mōnitō nē wede pōnēmōni inte apænemōni imōnipa. ¹⁵ Wængongui godōmenque nanguī ināni inānite waadete pōnō cæcā ate tōmēnāni wæætē Wængongui ingante waa ate pōnēninque apæncædānimpa. Ayæ mānōmaī pōnō cæcā adinque, Wængongui ñāō apāite bai émōnongā inte mānōmaī cæcampa, ante mōnō tōmāmō watapæ apæncæimpa. Īninque, Mānōmaī bacæimpa, ante munitō beyæ ante mōnitō tōmāā edæ cæmōnipa.

¹⁶ Mānōmaī beyæ mōnitō, Æbānō cæquimōni, ante wædāmaī imōnipa. Edæ iimō iñō iimō mōnō baō godōmenque wænguñō bai mongæñmō mōnō ōnōwoca wæætē iimō iñō godōmenque iimō iñō godōmenque miwoca badonte bai ewocamompa. ¹⁷ Īñæmpa wēnæ wēnæ mōnō wæwēnō incæ wantæ iñō wodēmāa pōni badinque wodæi bai bapa. Incæte māni mōnō wæwēnō beyæ mōnō godōmenque ñāō apāite bai ewocacæimpa. Īninque mōnō

wæwēnō wodæi pōni inte dæ bayō mōnō ñāō apāidō mōnō ēwocadō wæætē cōwē wodēmāa badāmaī ingæīmpa. Wæætē mōnō watapæ quēwenguinque godōmenque nangūi apāite bai bacæīmpa. ¹⁸ Inguipogaque mōnō quēwēnō guiquēnē wantæ iñō dæ gocoopa. Ōōnædē ñōwo mōnō adāmaī incoo guiquēnē cōwē dæ badāmaī inte ongongæīmpa. Īnīnque inguipogaque mōnō quēwēnō ante mōnō adāmaī inte bai pōnengæīmpa. Wæætē ōōnædē mōnō adāmaī incoo ante mōnō cōwē ate bai pōnengæīmpa.

5

¹ Oncontai wido cæquintai bai mōnō æmontai mongænte quēwēmompā. Īnīnque mānintai wido cæmō incæte Wængongūi wæætē, Ōōnædē mīintai mīni cōwē owoquintai, ante do mæñongacāīmpa. Mānintai iñōmō waocā ōnopoca mæñōnāmaī intai iñonte mōnō ōōnædē æite owoquimō ĩmompā, ante do ēñēmompā. ² Ñōwo iñōmō mōnō wido cæquintai mongæñīnque ō ō ante nantate wæwēmompā. Mānōmaī beyæ mōnō ōōnædē æidinque mōnō owoquintai ēñacæte ante wæmompā. ³ Edæ, Baō ōmaamō inte wæcæ wæ, ante guīñēwocate wædinque mōnō, Mīintai ēñacæīmpa, ante wæmompā. ⁴ Mōnō ĩntaique ēñadinque, Baō ōmaamō inte wædāmaī incæmōnīmpā, ante guīñēwocate wæmompā. Mōnō wænguintai mongænte nantate wæmō inte ō ō ante wæmompā. Wængongūi, Mīnitō ēñate quēwenguintaique, ante yabæque wīni caate bai pōnongā ēñayōmō mōnō wænguēnēñō edæ dæ bacæīmpa, ante æncæte ante wæmompā.

⁵ Ñōwo āmo ēñēedāni. Wængongūi incæ edæ, Mīni mīintai wēñate mongænguinque, ante mōnō ĩmonte badongacāīmpa. Ayæ, Mīnitō mīintai cōwē pōnōmo æncæmīnīmpā, ante, Nāwangā ĩmpā, ante odōmoncæte ante Wængongūi tōmengā Ōñōwoca ingante ñōwo da pōnongā æmompā. Īnīnque tōmengā Ōñōwoca ingante ænte ēwocadinque mōnō, Mīintai ēñate mongænguinque ēwocāmompā, ante do ēñēmompā.

⁶ Mānōmaī beyæ mōnitō cōwē, Wængongūi cæcæcāīmpā, ante wede pōnente tomōnīpā. Oncōnē owote bai ĩntaidē mōnō quēwenganca mōnō Awēnē oncōnē owodāmaī ĩmompā, ante do ēñente wædinque, ⁷ mōnitō mānīnō ante ayæ adāmaī ēmōmōni inte wīi mōni adīnō beyæ quēwēmōnīpā. Wæætē mōni wede pōnēnō beyænque quēwēmōnīpā. ⁸ Īnīnque edæ, Wængongūi cōwē cæcæcāīmpā, ante wede pōnēmōni inte mōnitō, ĩntaidē owodāmaī inte wæætē mōnō Awēnē oncōnē gote owote waa tobāīmpā, ante pōnēmōnīpā. ⁹ Īnīnque oncōnē owote bai tomōni incæ oncōnē owodāmaī inte bai wæmōni incæ mōnitō, Mōnō Awēnē waa tocæcāīmpā, ante cædinque cōwē nō cæte quēwēmōnīpā. ¹⁰ Codito tōmengā nānō apænte anguīmpā gāānē mōnō tōmāmō ponte edæ a ongonguēnēmō ĩmompā. Mōnō edæ inguipoga ĩntai ēñate quēwēnīnque mōnō cædō ante do againgā inte tōmengā iñōmō apænte ancæcāīmpā. Edæ waa cægāimō ĩmō adīnque tōmengā mōnō ĩmonte edæ eyepæ pōni pædæ pōnongā ænguīmō ĩmaīmompā. Wæætē edæ wēnæ wēnæ cægāimō ĩmō adīnque tōmengā wæætē eyepæ pōni pangā wæbāīmompā.

Wængongūi piycēnē cædinque, Pōedāni, angampa

¹¹ Īnīnque mōnō Awēnē ingante guīñente wæmōni inte mōnitō waodāni ĩnānite godō waadete apænēmōnīpā. Codito gāmæñō pōnīnque watapæ quēwengæīmpā, ante pōnencædānīmpā, ante mōnitō godō waadete apænēmōnīpā. Edæ, Mōnitō æbānō ēwocāmōnīi, ante Wængongūi do edonque acampā. Ayæ adobāi mīnitō mīmō entawēmīni inte mōnitō ēwocadō ante

edonque amīni īnīnque botō waa tobaīmopa. ¹² Mānōmaīnō ante apænedīnque mōnitō, Wæmō pōni īmōnīpa, ante nāmā ante dicæ āmōniyaa. Wæætē īmaī ante apænemōnīpa. Pancadāniya īñōmō mōnitō awīncaque adīnque, Pabodoidi æbānō ēwocadāni, ante adāmaī īnāni īnte tōmēnāni nāni adōnonque, ante pōnēnīnque nāmā ængō cæte baī todānīpa. Mīnitō guīquēnē, Mōnitō æbānō ēwocamōnī, ante do amīnitapa. Īnīnque tōmēnāni mōnitō īmōnite ante pīinte ānāni ēñēnīnque mīnitō wæætē edæ, Pabodoidi nō ēwocadāni īnte waa cædāni amōnīpa, ante wææ apæncæmīnīmpa, ante cæbopa. ¹³ Edæ ōmæcamōni baī cæmōni incæte Wængonguī beyænque ante mānōmaī cæmōnīpa. Wæætē nō pōnente cæmōni incæ mīnitō beyæ ante cæmōnīpa.

¹⁴ Īmaīnō ante pōnente wædīnque edæ mānōmaī cæmōnīpa. Tōmāmō beyæ adocanque wængacāīmpa, ante adīnque mōnitō, Mōnō tōmāmō do wængamōīmpa, ante edonque ēñēmōnīpa. Īnīnque, Mōnō Codito nangūī waadete pōnengā īnte pōnō cæcampa, ante pōnēnīnque mōnitō ædō cæte wapiticæ cæquīmōnī. ¹⁵ Mōnō Codito īñōmō tōmāmō beyæ wæñīnque, Mīnitō idæwaa nāmā beyænque quēwēmīnīpa, ante wængacāīmpa. Ayæ, Botō nē wænte nāni ōmæmongaīmo īñōmote mīnitō botō beyæ ante quēwencæmīnīmpa, ante cædīnque tōmengā tōmāmō beyæ wængacāīmpa. ¹⁶ Mānōmaī īmpa, ante pōnēnīnque mōnitō nōwo īncayæ ate waodāni īnānite adīnque, Inguīpogaque ēñate quēwēnānīpa, ante pōnēnāmaī īmōnīpa. Edæ mōnō Codito incæ īnguīpoga ēñate quēwēñongante mōnitō mānōmaīnō ante pōnengāīmōni incæte mōnitō nōwo wæætē mānōmaīnō ante wīī pōnēmōnīpa. ¹⁷ Īnīnque Codito nempo æcānō quēwēnaa tōmengā īngante Wængonguī mīngā badongā ate mīngā bate quēwengampa. Tōmengā nānō īnguīpogaque nānō quēwēnīmāmo edæ dæ gotīmpa. Nōwo wæætē edæ mīīmāmoque ēwocampa.

¹⁸ Mānīnō botō ānō ante tōmānō nē pōnō badongā īñōmō edæ Wængonguī adocanque īngampa. Tōmengā īñōmō, Mīnitō ēñēnāmaī cæmīni incæte Codito pōnō cæcā beyænque botō piyænē cæcæboīmpa, āngampa. Īnīnque botō piyænē cæbo adīnque mīnitō botō gāmænō pōedāni, āngampa. Ayæ mōnitō īmōnite pōnō āngā ēñēnīnque mōnitō wæætē edæ wadāni īnānite, Wængonguī piyænē cædīnque, Pōedāni, āngampa, ante nē cæmōni batamōnīpa. ¹⁹ Īnīnque īmaī ante apænemōnīpa. Codito tōnō godongāmæ cædīnque Wængonguī īñōmō piyænē cædīnque, Inguīpoga quēwēmīni tōmāmīni bōtō gāmænō pōedāni, āngampa. Pōmīni adīnque botō, Æpogadō wēnæ wēnæ cæmīnitawo, ante tee mante adāmaī īnte pīnāmaī incæboīmpa, āngampa.

Tōmengā mānōmaī āngā ēñēnīnque mōnitō wæætē mānīne ante nē waadete apænemōni badīnque edæ, Wængonguī piyænē cæcā adīnque pōedāni, ante apænemōnīpa. ²⁰ Īnīnque Wængonguī mōnitō īmōnite ānīnque, Mīnitō wæætē botō beyæ wadāni īnānite waadete apænemīni ēñēnīnque poncædānīmpa, āngā ēñēnīnque mōnitō wæætē Codito beyænque nē waadete apænemōni bamōnīpa. Īnīnque mīnitō īmōnite waadete pōnō apænedīnque mōnitō, Wængonguī gāmænō pōedāni, ante Codito beyænque ante apænemōnīpa. ²¹ Wængonguī, Mīnitō Codito nō nānō ēwocadō ænte ēwocacæmīnīmpa, ante pōnō cædīnque Codito īngante āngā ēñēnīnque tōmengā īñōmō edæ wēnæ wēnæ ēwocadāmaī īnte wæætē edæ mōnō beyæ ante nē wēnæ wēnæ cæcā baī badīnque mōnō wentamō ēwocadō incæ mongængacāīmpa. Īnīnque mōnitō tōmengā nempo quēwēnīnque nō pōnī tōmengā nānō ēwocadō wæætē ænte ēwocamōmpa.

6

¹ Tömengä tönö godongämæ nē cæmōni inte mōnitō mīnitō imīnite iīmaī ante waadete apænemōnipa. Wængonguī waadete pōnō cæcā æmīni inte mīnitō wīī ōnonque oda cæcæte ante æncæmīnīmpa, ante nanguī ämōni ēñēmāimīnīpa.

² Edæ Wængonguī do angacäimpa,

“Mīnitō imīnite botō waadete pōnō cæyedē mäniñedē mīnitō apænemīni ēñentabopa.

Ayæ, Mīni quëwenguīönæ impa, ante Codito nänō bæi ongonte æñedē botō mäniñedē mīnitō beyæ pōnō cægaboimpa.”

Ante yewæmongatimpa. İnīnque botō iīmaī ämo ēñeedäni. Wængonguī tōmengä nänō waadete pōnō cæyedē do ba apa quëwēmīnī. Codito edæ ængä beyænque mīni quëwenguīönæ iñōmō edæ do batimpa cæmīnī.

³ Mōnō quëwenguīnō ante adocanque incæ Wængonguī beyæ mōni apænedō ante piñāmaī incæcäimpa, ante wææ cædinque mōnitō iñōmō idiquibæ cædāmaī imōnipa. ⁴ Wæætē mīnitō, Pabodoidi Wængonguī beyæ nē cædāni inānīpa, ante acæmīnīmpa, ante odōmoncæte ante mōnitō cōwē iīmaī cæmōnīpa. Cōwē nantate wæmōni incæ wënæ wënæ cædāni wæmōni incæ mō ongonte wææ cædāni wæmōni incæ æbāmenque wæmōni incæte mōnitō cōwē wæntæye badāmaī inte ee cæmōnīpa. Ædō cæte quëwenguī, ante wæmōni incæ Wængonguī beyæ nē cæmōni inte mōnitō godōmenque cæmōni aedāni.

⁵ Ayæ tæi tæi pānāni wæmōni incæ tee mōnedāni wæmōni incæ Yæ yæ ante mōnitō imōnite wido cædāni incæte mōnitō wæætē Wængonguī ingante nē cæmōni inte edæ nanguī cæmōnīpa. Ayæ woyowotæ nanguī cædinque mōnitō mōwo mōnāmaī inte cæmōni incæ cænguī cæñāmaī inte gæwænte wædinque cæmōni incæ mōnitō godōmenque cæmōni aedāni.

⁶ Mänōmaī cædinque mōnitō wentamō mongænāmaī inte cæmōnīpa. Ayæ wadāni æbāmenque cædāni incæ mōnitō nō ēñēmōni inte edæ piyænē cæte piinte änāmaī imōnipa. Wæætē waadete cæmōnīpa. Edæ Wængonguī Tæiyæ Waëmō Ōnōwoca nempo quëwēnīnque nāwangä waadete pōnēmōnīpa. ⁷ Wængonguī nänō tæi piñænō ewocadinque mōnitō Wængonguī nō nänō angainō ante apænemōnīpa. Ayæ tontadoidi guëadō guëa wænoncæte ante tipæmaa næænāni bai cædinque mōnitō nō pōni cæcæte ante Wængonguī nänō tæi piñænō ante eyepæ næænte bai cæmōnīpa.

⁸ Mōnitō imōnite waa adāni incæ wīwa adāni incæte mōnitō Wængonguī beyænque ante cæmōnīpa. Pabodoidi waa pōni cædānīpa, ante nō apænedāni incæ wæætē, Pabodoidi wënæ wënæ cædānīpa, ante tedewēnāni incæ mōnitō cōwē godōmenque cæmōnīpa. Pabodoidi babæ cædānīpa, ante piñāni incæte mōnitō nōingä pōnente Wængonguī beyænque ante cæmōni aedāni. ⁹ Edæ tōmānāni mōnitō imōnite do edonque pōni adāni incæ adāmaī inte bai cædinque, Ōnōmīnīque imīnīpa, ante tededānīpa. Wæncæ cæmōni incæte ee quëwēmōnīpa. Pānāni wæmōni incæte mōnitō imōnite wænōnāmaī inānīpa.

¹⁰ Wæwēmōni incæte mōnitō cōwē mīmōno watapæ towocamōnīpa. Mōnitō māincoo ōmæpomōni incæ wadāni inānīte godō cæmōni ænīnque tōmēnāni māincoo nanguī pōni ænte bai eyepæ pōni entawēnānīpa. Edæ nē ōmæpomōni inte wæmōni incæte mōnitō tōmancoo pōni entawēmōni inte Wængonguī ingante nē cæmōni imōni aedāni.

¹¹ Coodintoidi ēñeedāni. Mīnitō imīnite mōnitō edonque pōni apænetamōnīpa. Mīnitō imīnite nanguī pōni waadete pōnēmōnīpa. ¹² Mōnitō dicæ pæ gompote mīnitō imīnite waadedāmaī imōniyaa. Wæætē edæ tōmēmīni pæ gompodīnque edæ mōnitō imōnite waadedāmaī imīni inte wæwēmīnīpa.

13 Ìnque botö wēñæmīni bai ìñömīnite ìmaī ämopa. Mīnitö ìmīnite waadete pönēmōni adinque mīnitö näēmæ waadete pönēedāni.

Wængonguī nē Quēwengä nänö owocö bai ìmopa, ante

14 Guëa mangæ mangæ woquīna, ante wagada tönö bodo guëa goti wēmencadāmaī ìedāni, ante do yewæmongatimpa cæmīni. Pönēnāmaī ìnāni tönö godongāmæ cædāmaī ìedāni. Ìñæmpa nē nō cæcä tönö guëa äantawente bai nē ēñēnāmaī cæcä guiquēnē dicæ adobai entawengä. Ayæ ñāo entawengä tönö guëa gocæte ante cædinque nē wēmö entawengä ìñömö mīmö ñāo entawengampa diyæ guëa goquingä. 15 Codito nänö pönēnö ante edæ wēnæ awēnē Bediado ìñömö edæ adodö ante pönengampa diyæ guëa cæquingä. Nē wede pönengä nänö pönēnö ante nē pönēnāmaī ingä ìñömö edæ adobai pönengampa diyæ adobai quēwengingä. 16 Ayæ, Wængonguī impa, ante waodāni nāni badōninca ænīnque edæ nāwä Wængonguī tæiyæ waēmö oncönē ædö cæte mangui cö cæquī. Mönö guiquēnē Wængonguī nē Quēwengä nänö tæiyæ waēmö owoquincö bai ìñömönte tömengä Öñowoca mönonga pö guīte owocampa. Ìnque tömēnāni tönö mönö ædö cæte godongāmæ cæquī. Wængonguī incæ, Mänömaī impa, ante ancæte ante ìmaī angacāimpa.

“Wadāni weca owodīnque botö tömēnāni tönö godongāmæ cægoncæboimpa. Botö tömēnāni Wængonguī ìñömöte tömēnāni wæætē botö quīnāni incædānīmpa,” angacāimpa.

17 Mänömainö ante apænedīnque mönö Awēnē adobai ante, “Wadāni ìnānite taayænte pönīnque nänēnē ponte quēwēedāni, angampa. Wentamö ì adinque gampodāmaī ìedāni.

Mänömaī cæmīni adinque botö mīnitö ìmīnite, Pöedāni, ante ee æncæboimpa.

18 Ænīnque, Mīnitö Wæmpobo ìñömö inte botö, onguīñæmīni incæ onquiyæmīni incæ, Botö wēmīni ìmīnīpa, ante æncæboimpa,

ante nē Tæī Pīñængä inte Awēnē Wængonguī angampa.”

Ante Wængonguī beyæ yewæmongatimpa.

7

1 Ìnque botö nē waademīni ēñēedāni. Mönö ìñömö, Wængonguī, Cöwē cæcæboimpa, ante nänö angainö ante do ēñengamöimpa. Ìnque baonga wentamö mönö ēñadö tönö mīmö mönö wentamö entawēnö adobai ñā mēnongate bai cædinque edæ mönö tæiyæ waēmö ewocate quēwengæimpā. Ayæ, Wængonguī ingampa, ante guīñte wædinque mönö, Cöwē nō cæte waa quēwengæimpā, ante nanguī cæcæimpā.

Coodintoidi Codito gämænö pönānīpa

2 Mönitö dicæ wacä ingante wēnæ wēnæ cæmönīyaa. Wacä wentamö nänö mongænguinque mönitö dicæ wēnæ wēnæ cæmönīyaa. Dicæ wapiticæ apænedīnque wacä quī ö æmönīyaa. Ìnque, Pabodoidi mänömaī cædāmaī ìnānīpa, ante adinque mīnitö wæætē mönitö ìmönite waadete pönēnīnque ēñēedāni, ämopa. 3 Mänömainö ante ämo incæte botö, Mīni pante wæquinque, ante dicæ apænte ämogaa. Edæ botö do antabopa. Mīnitö tönö möni quēwenguinque incæ mīnitö tönö möni wænguinque incæ mönitö mīnitö tönö äanque bai entawente mīnitö ìmīnite cöwē waadete pönēmönīpa, antabopa.

4 Edæ, Mīnitö nō pönente cæmīni ìmīnīpa, ante pönēmopa. Mönitö apænēmōni ēñēnīnque mīnitö nē waa cæmīni bamīnitāpa, ante adinque botö mönitö apænedö ante nanguī tobopa. Mīnitö mänömaī cæmīni ìmīnīpa, ante ēñente

wædinqe botō gancæ pōnēmopa. Īninqe mōnitō wēnæ wēnæ inte wæwēmōni incæte botō wæætē godōmenque watapæ tobopa.

⁵ Īmaī edæ Māatedōniabæ pōninqe cætamōnipa. Āmætæ æmætæ gote apænecæte ante cæyōmōnite wadāni bæ ta bæ ta cædāni wædinqe mōnitō ædō cæte guēmanguīmōnii. Edæ nanguī piinte cædāni wædinqe mōnitō baonga nantate wædinqe ōnōwoca adobai guīfente wæwocatamōnipa.

⁶ Incæte mōnitō wæwēñōmōnite, Nē wæwēnāni gancæ bacædānimpa, ante nē pōnō cæcā ĩnongā Wængonguī ĩñōmō Tito ingante da pōnongā pongā adinqe mōnitō wæætē gancæ pōnentamōnipa. ⁷ Tōmengā ponte a ongongā beyæ gancæ pōnēñōmōnite tōmengā, Coodintoidi botō ĩmote waa cædāni adinqe botō wæætē gancæ pōnentabopa, ante apænecā ēfente mōnitō godōmenque totamōnipa. Ayæ botō ĩmote ante apænedinque tōmengā, Bitō ĩmite ante nanguī aīnente wædinqe coodintoidi Ca ca wædānipa. Tōmēnāni ĩñōmō, Mōnō ñōwo Pabodo beyæ ante nanguī cæcæĭmpa, ante wædānipa, ante Tito tedecā ēñēninqe botō godōmenque nanguī totabopa.

⁸ Botō doyedē cadota ante yewæmōninqe da godōmo æninqe mīnitō wæwente bamīnitawo. Nāwangā botō cadota beyæ wæwente bamīnitapa, ante wædinqe botō, Quīnante mānōmaī yewæmōmōi, ante wætabopa. Incæte ayæ ate, Coodintoidi wantæ ĩñō wæwēninqe ñōwo ĩñōmō edæ wæwēnāmaī ĩnānipa, ante adinqe botō ñōwo edæ, Nō cædinqe yewæmōmoimpa, ante piyænē cæbopa. ⁹ Edæ mīnitō wæwēmīni beyæ todāmaī ĩnimo inte botō wæætē, Mīni wēnæ wēnæ cædīnō ñimpo cædinqe mīnitō Codito gāmæñō mīni ponguinque wæwente bamīnitapa, ante adinqe mānōmaī beyænque totabopa. Edæ Wængonguī nānō ānōnō mīni ēñēninqe wæwente bamīni ĩninqe mōnitō cædō beyæ dicæ wæmīniyaa.

¹⁰ Edæ Wængonguī nānō ānōnō ante wæwēmō bai mōnō ocæ ēmænte ponte quēwenguinque impa. Īninqe, Quīnante mānōmaī wæwēmōi, ante wædāmaī ĩmopa. Wæætē inguipoga mōnō quēwenguīmāmo ante wæwēmō bai mōnō wænguinque impa. ¹¹ Edæ Wængonguī nānō ānōnō ante do wæwēnīmīni inte mīnitō ñōwo, Mānīnō mōni wæwēnō beyæ æbānō entawēmōnii, ante nāmā aedāni. Edæ mānōmaī wæwēmīni inte mīnitō, Mōnō ee ongōnāmaī inte cæcæĭmpa, ante do cæmīnitapa. Cædinqe, Mōnō pōnencabo wentamō mongænāmaī ingæĭmpa, ante nanguī cædinqe mīnitō nē wēnæ wēnæ cædingā ingante edæ do pīīmīnitapa. Ayæ, Pabodo æbānō anguingāā, ante guīfente wæmīni incæte botō ĩmote ante aīnente wæmīnitapa. Ayæ, Nē wēnæ wēnæ cædingā ingante mōnō nō ante pangæĭmpa, ante do cæmīnitapa. Mānōmaī eyepæ cædīmīni inte mīnitō wentamō mongænāmaī ĩmīnipa, ante edonque abaimpa.

¹² Īninqe mīnitō ĩmīnite yewæmōninqe botō nē wēnæ wēnæ cædingā beyæ ante wīi yewæmontabopa. Tōmengā wēnæ wēnæ cæcā wædingā beyæ ante adobai yewæmōnāmaī intabopa. Wæætē mīnitō Wængonguī ayongā nāmā adinqe, Mōnitō Pabodoidi ĩnānite waadete amōnipa, ante, Nāwangā impa, ante edonque acæmīnimpa, ante botō mīnitō beyænque ante yewæmontabopa. ¹³ Mīnitō mānōmaī cæmīni adinqe mōnitō wēēñēñedē nē wæwēmōni inte ñōwo ĩñōmō gancæ pōnēmōnipa.

Mīnitō waa cæmīni beyæ wēēñēñedē wæwēningā inte Tito adobai gancæ pōnente ñōwo watapæ pōnengampa, ante adinqe mōnitō do gancæ pōnēmōni inte ñōwo godōmenque nanguī tomōni ĩmōnipa. ¹⁴ Botō do ĩñōñedē Tito ingante apænedinque, Coodintoidi waa cædāni abopa, antabopa. Nōwo mīnitō waa cæmīni adinqe botō, Tito ingante botō apænedinō nō impa, ante adinqe botō guingo ĩmōnāmaī ĩmopa. Edæ botō mīnitō ĩmīnite nōñō

ante apænetawo. Edæ mīnitō īmīnite nōinō ante apænebo bai botō Tito ingante, Coodintoidi waa cædānīpa, ante apænedinque adobaī nōinō ante apænetabopa. ¹⁵ Ayæ Tito īñōmō, Coodintoidi tōmānāni botō imote waa adinque guīñte wædānitapa. Ayæ, Pōe, āninque tōmēnāni botō apænebo ēñēninque Ao ante ēñēnte cædānitapa, ante pōnēninque tōmēngā mīnitō īmīnite godōmenque waadete pōnēngampa. ¹⁶ Ayæ, Mīnitō cōwē waa cæmīni īmīnīpa, ante pōnēninque edæ botō adobaī watapæ tobopa.

8

Mōnō godōmenque nanguī godongæimpa, ante

¹ Nōwo botō tōnīñadāni apænebo ēñēdāni. Māatedōniabæ īñōmō Codito ingante godongāmæ nāni pōncencabo wayōmō nāni cabo wayōmō nāni cabo ongōñōnānite Wængonguī Ōnōwoca pōnō apænecā ēñēninque tōmēnāni wæætē waadete cædinque īlmaī cædānīpa. ² Nanguī wēnæ wēnæ nantate wæwēnāni incæ tōmēnāni cōwē piyænē cæte watapæ todānīpa. Īninque ōmæpodāni incæte tōmēnāni nanguī mānāni bai cædinque, Wængonguī quīnāni quī, ante godōmenque toдинque nanguī gomonga godōnānitapa. ³ Tōmēnāni edæ nāni godonguēnēnō ganca do godōninque ayæ godōmenque nanguī godōnāni adimo inte botō, Nāwangā impa, ante apænebopa. Ayæ edæ tōmēnāni nāni nāmā pōnēnō bai cædinque, ⁴ Wængonguī quīnāni beyæ impa, ante mōnitō wadāni tōnō godongāmæ godoncæmōnimpa, ante tōmēnāni mōnitō īmōnite nanguī āninque ancaā ānānitapa. ⁵ Mōnitō guīquēnē, Māatedōniabæ quēwēnāni tōmēnāni nāni godonte æintaque godonguīnāni īnānīpa, ante edæ pōnentamōnīpa. Incæte tōmēnāni, Wængonguī quīmōni īmōnīpa, ante edæ Wængonguī ingante nāmā godōninque ayæ, Mīnitō īmīnite nē cæmōni bacæmōnimpa, āninque mōnitō īmōnite edæ adobaī nāmā pōnōnānitapa. Ayæ mōnitō pōnēnō ganca adobaī godōninque tōmēnāni nāni godonte æinta ayæ godōmenque godōnānitapa.

⁶ Māatedōniabæ quēwēnāni mānōmaī cædāni adinque mōnitō Tito ingante īlmaī antamōnīpa. Bitō doyedē āmi ēñēninque coodintoidi waadete pōnēninque tæcæ godoncæ cædānitapa cæbii. Nōwo wæætē āmi ēñēninque tōmēnāni nē waadete godōnāni badinque eyepæ godoncædānimpa, ante mōnitō Tito ingante nanguī antamōnīpa. ⁷ Mīnitō īñōmō wede pōnēmīni inte edæ nē waa pōni apænēmīni īmīnīpa. Ayæ godōmenque gomonga ēñēmīni inte mīnitō, Mōnō cōwē cæcæimpa, ante nanguī cædōmīni īmīnīpa. Ayæ mōnitō īmōnite nē waadete pōnēmīni īmīnīpa. Mānōmaī tōmānō ante do cædōmīni inte mīnitō ñōwo adobaī, Wængonguī quī, ante mōnō nē waadete godōmō bacæimpa, ante edæ nanguī cædāni, āmpa.

⁸ Mānōmaīnō āninque botō, Cædāni, ante wææ ānāmaī īmpa. Wæætē, Mīnitō æbānō cæmīnīi, ante ēñencæte ante cædinque botō wadāni nāni nanguī cædīnō ante apænetabopa. Mānōmaīnō ante apænedinque botō, Mīnitō adobaī tōmēnāni nāni cæbaī nanguī waadete pōnente cæmīnitawo, ante acæte ante cædinque, Nē godōmīni baedāni, antabopa. ⁹ Mīnitō do ēñēmīnīpa. Mōnō Awēnē Itota Codito ōdnædē quēwēninque nanguī gomonga ēñempogāngā inte mōnō īmonte waadete pōnēninque īlmaī ante pōnō cægacāimpa. Botō ōmæpobo babo beyænque mīnitō nanguī wæætē entawencæmīnimpa, ante cædinque tōmēngā edæ mīnitō beyænque ante inguipoga pōninque edæ ōmæpocā bagacāimpa.

¹⁰ Ayæ, Mānīnō mīni godonguīnō ante æbānō cæquēnēmīni īmīnīi, ante botō nāmā pōnēninque īlmaī āmpa. Wadepo inōñedē wadāni godōnāmaī īñōnāni mīnitō īñōmō edæ do tāno godōmīnitawo. Mōnō godongæimpa, ante

edæ mīnitō cōwē tāno cæinēmīni īmīnitawo. ¹¹ Īnīnque, Mōnō godongæīmpa, ante quīngæ ānīmīni inte nōwo edæ īnque cæedāni. Mīni ēadīncoo adīnque mīnitō, Eyepæ inte botō pancacooa godoncæboīmpa, ante mīni ānīncoo edæ godōmīni adīnque, Eyepæ godōmīnīpa, ante acæīmpa. ¹² Edæ æcānō godōīnengā tōmēngā nānō godonte æīnta tōmanta adīnque, Æpotadō botō godonguēnēmo īmoo, ante adīnque mānīmpotaque godōnīnque idæwaa. Godōmenque nanguī mangāmpa diyæ nanguī godonguīngāā.

¹³ Mānōmaī ānīnque botō, Wadāni pōnōmenque godōnīnque guēmāñōnāni mīnitō wæætē mīni eyepote wæquinque godōmenque nanguī godoncæmīnīmpa, ante dicæ āmogaa. ¹⁴ Wæætē, Cōwē eyepæ bacæīmpa, ante āmopa. Edæ māīncoo nōwo eyepæ mānīnque mīnitō nē ænguēnente wædāni īnānīte godōmīni ænānīpa. Īnīnque īncayæ ate mīnitō wæætē nē ænguēnēmīni bamīni ate tōmēnāni wæætē eyepæ mante ate mīnitō īmīnīte pōnōnāni æñōmīni adopo adopo edæ eyepæ babāīmpa. Mānōmaīnō ancæte ante āmopa. ¹⁵ Edæ do yewæmongatīmpa. “Cænguī gomonga wææmpo ænīngā incæ tōmēngā nānō ænguēnenganca ænte baī mānīnque godōmenque mānāmaī īngantapa. Wæætē edæ wædænque wææmpo ænīngā guīquēnē tōmēngā nānō ænguēnenganca eyepæ ænte baī eyepæ mangantapa.” Ante nāni yewæmongānō baī īnque bacæīmpa, ante mīnitō īmīnīte āmopa.

Mīnitō weca Titoidi poncædānīmpa, ante

¹⁶ Botō cōwē, Coodintoidi beyæ cæcæīmpa, ante mīnitō īmīnīte waadete pōnēmopa. Ayæ, Wængonguī pōnō apænecā ēñēnīnque Tito īñōmō botō pōnēmo baī adobaī pōnente cæcampa, ante adīnque botō wæætē Wængonguī īngante waa ate pōnēnīnque apænēbopa. ¹⁷ Edæ mōnitō, Coodintoidi weca goe, āmōni ēñēnīnque edæ Tito do Ao ante pongā æedāni. Incæte wīi mōnitō ānīnō beyænque pongāmpa. Wæætē nāmanque pōīnente wædīnque tōmēngā nanguī todīnque mīnitō weca pongāmpa.

¹⁸ Ayæ Tito tōnō wacā mōnō tōnīñacā īngante da pōnōmōni pongāmpa. Īngā Tito tōnō nē pongā īñōmō tōmēngā Codito īngantedō ante watapæ mōni apænedō ante nē apænecā īngāmpa. Īnīnque Codito īngante godongāmæ nāni pōnencabo wayōmō nāni cabo wayōmō nāni cabo tōmānāni tōmēngā īngante waa ate waa apænedānīpa. ¹⁹ Codito īngante nāni pōnencabo incæ adocā īngante apænte ænīnque, Pabodoidi tōnō gocæbiīmpa, ante da godōnāni ate tōmēngā mōnītō tōnō godongāmæ goquīngā īngāmpa. Edæ mōnītō, Mōnō Awēnē nāō apāite baī ēmongā īngāmpa, ante acædānīmpa, ante cædīnque ayæ, Mōnītō wadāni beyæ cæinēmōnīpa, ante acædānīmpa, ante cædīnque mīnitō da godonguīncoo ænte goquīmōni īmōnīpa. Mānōmaī cæcæte ante goyōmōni, Tōmēngā godongāmæ gote cæcæcāīmpa, ante da godōnāni gocæcāīmpa. ²⁰ Edæ wadāni, Pabodoidi babæ cædānīpa, ante ānāmaī incædānīmpa, ante wææ cædīnque mōnītō nō pōnī cædīnque nanguī pōnī mīnitō godonguīncoo ænte godīnque pædæ godoncæmōnīmpa. ²¹ Edæ, Mōnītō Wængonguī ayongā nō cæmōni inte waodāni ayōnāni adobaī edonque pōnī cædīnque nō pōnī cæcæīmpa, ante cæmōnīpa.

²² Ayæ wacā mōnō tōnīñacā īñongante mōnītō æpogamē cōwā ayōmōni tōmēngā cōwē tōmāā nō cæcā īngāmpa. Ayæ nōwo tōmēngā, Coodintoidi nō cædānīpa, ante pōnēngā inte godōmenque waa cædongā īngāmpa. Mānōmaī īngāmpa, ante adīnque mōnītō nōwo tōmēngā īngante da godōmōni godīnque tōmēngā īñāna tōnō mīnitō weca poncæcāīmpa. ²³ Tito īñōmō botō tōnō godongāmæ cōwē cæcampa. Īnīnque mīnitō beyæ guēa nē cæmōna īmōnāpa. Codito īngante nāni godongāmæ pōnencabo incæ mōnītō tōnīñada

Tito tönö wada inate da godönäni godinque tömënäni, Mönö Codito ingante waa acädänimpa, ante nangui cæda inapa. ²⁴ İinäni inänite apænedinque mönitö, Coodintoidi nê waa cædäni inänipa, ante do apænetamönipa. İinque minitö eyepæ godömini adinque tömënäni, Nawangä impa, ante edonque acädänimpa. Ayæ adobai, Minitö waadete pönö cæmini adinque Pabodoidi wæætê minitö iminite waa adänipa, ante acädänimpa, ante cædäni. Mänömai cæmini adinque Codito ingante godongämæ nani pönencabo wayömö nani cabo wayömö nani cabo tömänäni adobainö ante edonque acädänimpa.

9

Mönö wædämai eyepæ pönî godongæimpa, ante

¹ Nöwo mäninö, Wængongui quinäni beyæ minitö godoncæminimpa, ante botö idæwaa yewæmömopa. ² Edæ, Minitö wædämai inte do cæminipa, ante êñëninque botö Mäatedöniabæ quëwënäni inänite apænedinque, Acayabæ quëwënäni inömö wadepo inöñedê do godoncæte ante cædönänimpa, ante do apænetabopa. Apænebo êñëninque tömënäni wodo tömänäni, Æ Acayabæ quëwënäni nani quingæ cæbai mönö adobai cæcæimpa, ante cædänipa.

³ Incæte botö nöwo mönö tönîñadäni inänite da godömo pöninque tömënäni minitö iminite apænedäni êñëninque minitö wæætê eyepæ godoncæminimpa. Mänömai cæmini ate botö babæ apænedämai imoi, ante edonque êñengæimpa. ⁴ İinæmpa Mäatedöniabæ quëwënäni botö tönö godongämæ ponte ayönäni minitö wii eyepæ cæmini adinque tömënäni wæætê, Minitö dicæ cæminiyaa, ante badete tobainänipa. Ayæ mönitö guiquenê, Coodintoidi iinque cæcædänimpa, ante nê änimöni inte odadete guingo imonte wæbaimönipa. Minitö adobai, Mönî cæquënênö cædämai imönipa, ante guingo imonte wæbaimönipa. ⁵ İinque minitö, Godoncæmönimpa, ante mîni äninö bai eyepæ godoncæminimpa. Ante cædinque botö mönö tönîñadäni inänite äninque, Minitö gote apænemîni êñëninque coodintoidi ædæmö pönente cæcædänimpa, ante da pönömo pönäni aedäni. İinque minitö tönö godongämæ cædäni ate minitö ædæmö pönëninque, Botö wææ gompodämai inte waa todinque godömopa, ante godoncæminimpa.

⁶ İimai ante pönëedäni. Wædænque quiyadingä inömö amîñaimö wædænque pete æncæcäimpa. Nangui quiyadingä guiquenê amîñaimö nangui pete æncæcäimpa. ⁷ Wadäni qui, ante æcänö watapæ todinque godönaa, ante adinque Wængongui tömengä ingante waadete pönengampa. İinque wadäni wææ änämai inönäni minitö, Botö æpotadö godonguimoo, ante pönëninque tömämîni wædämai inte mîni änimpota adopota godöninque do godonguënemîni iminipa. ⁸ Ayæ, Eyepæ pönî æamîni inte minitö quïëmê cæmini incæ tömänäni beyæ ante cöwê godö waa cæcæminimpa, ante Wængongui cæcampa. İinque, Minitö eyepæ ænte ëadinque mänömai cæcæminimpa, ante tömengä nangui cædongä inte cöwê eyede tate bai waadete pönö cæcä ingampa. ⁹ Edæ docä ingante ante iimai ante yewæmongatimpa.

“Yepanca quiyacä bai inongä inte tömengä, Ömæpodäni qui, ante wayömö wayömö godongantapa.

İinque tömengä nö nanö cædinö inömö edæ cöwê ewënämai ongongæimpa.”
¹⁰ Inte yewæmongatimpa. Nê quiyacä ingante Wængongui, Tömëmö quiyaquimö, ante eyepæ pönöninque adobai, Cængui, ante tömämö imonte eyepæ pönongä ænte cæmompä. Minitö inömö eyepæ æamîni inte wacä ingä wacä ingä quiyate bai nënempocæminimpa, ante cædinque Wængongui mîni

godonganca da pönöninge godömenque gomonga da pönongä æncæmīnīmpa. Mānōmaī eyepæ da pönongä ænīnque mīnitō wæætē nō cædinque wadāni nanguī īnāni īnānite nēnempomīni ænīnque tōmēnāni wæætē amīñaimō tā pete bai watapæ quēwēncædānīmpa. ¹¹ Mīnitō pæ gompodāmaī inte wadāni īnānite cōwē pædæ godoncæmīnīmpa, ante cædinque mīnitō īmīnite Wængonguī nanguī pōni pönongä æncæmīnīmpa. Ænīnque mīnitō pæ gompodāmaī inte pædæ godō pædæ godō cæmīni adīnque mōnitō wæætē, Coodintoidi mānōmaī cædānīpa, ante tedemōni ēñēnīnque wadāni wæætē Wængonguī ingante waa ate pönēnīnque apænecædānīmpa.

¹² Wadāni quī, ante do godōmīni ænīnque Wængonguī quīnāni tōmēnāni nāni ænguēnēno ante eyepæ pōni æncædānīmpa. Ayæ mīni godōnō ænīnque tōmēnāni mīmōno eyede tate bai Wængonguī ingante waa ate pönēnīnque nanguī apænecædānīmpa. ¹³ Mōnō Codito ingantedō ante watapæ ēñēnīnque mīnitō Ao ante do pönēmīnitapa. Īnīnque Wængonguī nānō ānōnō ante do ēñēnte cædinque mīnitō, Ōmæpodāni quī, ante pædæ godōmīni ænīnque nē ænāni wæætē Wængonguī ingante, Bitō ñāo bai nō pōni cæbi ate coodintoidi bitō ānōnō ante ēñēnte cædānīpa, ante watapæ apænecædānīmpa. Ayæ nē ænīnāni inte adodāni godōmenque apænedīnque, Nē ōmæpodāni tōmānāni īnānite da godōnīnque coodintoidi īñōmō mōnitō īmōnite adobaī eyepæ pönōnāni æmōnīpa, ante Wængonguī ingante godōmenque waa ate apænecædānīmpa. ¹⁴ Ayæ, Coodintoidi īnānite Wængonguī godōmenque nanguī waadete pönō cæcā beyænque tōmēnāni waa cædāni īnānīpa, ante pönēnīnque nē ænīnāni īñōmō edæ mīnitō īmīnite waadete pönēnīnque mīnitō beyæ ante Wængonguī ingante apænecædānīmpa.

¹⁵ Wængonguī īñōmō godōmenque waa cædinque mōnō Codito ingante da pönongä ængamōīmpa. Īnīnque mōnō, Wængonguī, bitō waa pōni pönō cægabiīmpa, ante mōnitō ædō cæte eyepæ inte waa ate pōnente apænequīmōnīi, ante mōnō Wængonguī ingante apænecæīmpa.

10

Pabodo, Itota nānō nē da godōnīmo īmopa, angampa

¹ Mīnitō, Wayōmonque quēwēnīnque Pabodo nanguī pīnte angampa, ante pönēmīnitawo. Wæætē mōnitō weca pōnīnque awīncadō awīnca adīnque tōmēngā guīñēnete wædinque pæ wēēnecampa, ante pönēmīnitawo. Īñæmpa mīni ānōmo mānīmotō inte īmaī āmopa. Codito īñōmō edæ gānē pōngēngā īnongā inte pönō piyænē cæcantawo. Botō adobaī ñōwo piyænē cædinque mīnitō īmīnite pönō waadete apænebopa. ² Pabodoidi īñōmō inguipogaque ante pōnente cædānīpa, ante pancadāniya odadete ānewēnānīpa. Tōmēnāni īnānite botō guīñēnedāmaī inte nanguī ancæboīmpa. Mīnitō guīquēnē adobaī odadete āmīni Īnīnque botō mīnitō weca pōnīnque pīnte anguēnēmo īmaīmopa. Īnīnque, Wīi pīnte anguīmo bacæboīmpa, ante wææ cæcæte ante botō ñōwo mīnitō īmīnite, Ee aquēnē quēwēmīnīi, ante waadete pōnente yewæmōmopa.

³ Edæ inguipoga quēwēmōni incæte mōnitō Wængonguī beyæ ante wæætēdō wæætē cæcæte ante cædinque inguipogaque quēwēnāni nāni wæætēdō wæætē cæi bai cædāmaī īmōnīpa. ⁴ Wæætē edæ mōnitō Wængonguī beyæ ante wæætēdō wæætē cæcæte ante cædinque inguipogaque quēwēnāni nāni wænoncaquīncoo næænāmaī inte cæmōnīpa. Wæætē Wængonguī tōmēngā nānō tæi pīñæmāmo ænte mīmōno entawēnīnque eyepæ næænte bai badīnque mōnitō tōmēnāni nāni tæi mænōincō bæ tate bai cædinque wæætēdō

wæætē nāni godō ānewēnō ante wido cæte bai cæmōnīpa. ⁵ Wængonguī ingante pōnēnāmaī ingæīmpa, ante nē pōnēwēnāni inte ængæ gantidīnque tōmēnāni īñōmō, Wadāni tōmānāni adobaī Wængonguī ingante pōnēnāmaī incædānīmpa, ante cædīnque babæ wapiticæ cædānīpa. Māniī babæ wapiticæ nāni cædōnō ante mōnitō wæætē bæ tate wido cæmōnīpa. Edæ, Codito ingante mōnō ēñengæīmpa, ante nō apænemōni ēñēnīnque wadāni idiquibæ pōnēwēnāni īñōnāni mōnitō wæætē mānīnō nāni pōnēwēnō tōmānō o ænte bai wido cæmōnīpa. ⁶ Ayæ mīnitō ædæmō nē ēñente cæmīni bamīni ate adocanque incæ ēñēnāmaī cæcā adīnque mōnitō wæætē tōmēngā ingante do panguiñmōni īmōnīpa.

⁷ Ēbānō ī, ante edonque ongō abaiñmīnīpa. Pancamīniya, Botō nāwangā Codito nempo quēwēmo īmopa, ante pōnēmīnitawo. Mīnitō mānōmaī pōnēmīni inte godōmenque īīmaī ante pōnenguēñēmīni īmīnīpa. Botō Codito nempo quēwēmo īmo bai Pabodoidi adobaī Codito nempo quēwēnāni īnānīpa, ante nāwangā īmpa, ante pōnenguēñēmīni īmīnīpa. ⁸ Īñæmpa Wængonguī mōnitō īmōnite ānīnque, Mīnitō nē āmīni badīnque coodintoidi īnānite bæ tate wido cædāmaī incæmīnīmpa. Wæætē ædæmō āmīni ēñēnīnque coodintoidi wæætē oncō tæī mænonte bai gongæncædānīmpa, ante cæedāni, ante Wængonguī pōnō angā ēñēnīnque mōnitō nē āmōni batamōnīpa. Īnīnque botō, Nē āmo inte nāmā tocæboīmpa, ante tedebo incæte guīñēnedāmaī tedecæboīmpa.

⁹ Botō, Cadota ante botō yewæmōinta adīnque mīnitō guīñente wæcæmīnīmpa, ante dicæ āmogaa. ¹⁰ Pancamīniya, Pabodo tæī piñænongā bai inte cadota ante yewæmōnīnque nanguī angā awædō, ante wæmīnīpa. Wæætē edæ adocā incæ mōnitō weca ponte ongōnīnque edæ aquī ingā amōnīpa. Tōmēngā nānō tedepāmo onōmāmoque bai īmpa, ante pōnēmīni awædō. ¹¹ Īñæmpa, Tæī piñæmōni inte cadota ante nē yewæmōmōni incæ mōnitō adomōni inte mīnitō weca ponte ongōnīnque adobaī tæī piñænte cæcæmōnīmpa, āmo ēñēmaīmīnīpa.

¹² Pancadāniya nāmā incæ, Waēmō pōni īmopa, ante tededāni incæte tōmēnāni nāmā nāni tede bai mōnitō ædō cæte adobainō ante tedequīmōniī. Tōmēnāni īñōmō, Ægancadō waa cæbo eyepæ inguīī, ante nāmā nāni cægancaque ante adīnque edæ, Eyepæ cætābopa, ante pōnēwēnānīpa. Tōmēnāni nāni cædō ante, Waa cætawo, ante tee mancæte ante, Do botō cædīnō bai adobaī cæbopa, ante adīnque, Eyepæ īmpa, ante pōnēwēnānīpa. Mānōmaī nāmā nāni pōnēwēnonque ante cædīnque tōmēnāni ēñēnāmaī inte oda cæte cædānīpa.

¹³ Mōnitō guīquēñē, Īngancaque goedāni, ante Wængonguī nānō angancaque cōwē gomōnīpa. Īnīnque tōmēngā, Coodintoidi ganca godīnque apænēdāni, angā ēñēnīnque mōnitō do gote apænēdīnque, Māningancaque waa cæmōnīpa, ante nāmā waa ate tedemōnīpa. Godōmenque ante tededāmaī īmōnīpa. ¹⁴ Mīnitō ganca pōnāmaī inte bai mōnitō, Coodintoidi weca gote do cætāmōnīpa, ante tedemōni bai babæ wapiticæ incædōnīmpa. Incæte mīnitō ganca do pōnīnque Codito ingantedō ante mōnitō watapæ mōni ēñēnō ante apænētāmōnīpa. Īnīnque edæ, Māninganca cætāmōnīpa, ante mānīnque ante tedemōnīpa. ¹⁵ Ayæ wadāni nāni cædīnō ante adīnque mōnitō, Tōmēmōni cædīnō īmpa, ante ānāmaī īmōnīpa. Wæætē mīnitō godōmenque godōmenque wede pōnēñōmīni mōnitō wæætē adodō mīnitō weca ponte quēwēnīnque godōmenque gomonga cæyōmōni mōnō watapæ bacæīmpa, ante pōnēmōnīpa. ¹⁶ Ayæ mīnitō weca īnīnque cædīnque mōnitō godōmenque gomonga godīnque mōnō Codito ingantedō ante watapæ mōni ēñēnō ante apænecæmōnīmpa,

ante pönēmōnīpa. Mänōmaī cædīnque mōnitō wacā nānō cædīñōmō ante, Mōnitō māniñōmō cætāmōnīpa, ante tededāmaī incæmōnīmpa.

¹⁷ Æcānō, Botō waēmō pōnī inōmo inte waa cæbopa, ante toīnēna tōmengā wæætē, Mōnō Awēnē waēmō pōnī inongā inte pōnō waa cæcampa, ante toquēnengā ingampa. ¹⁸ Edæ, Waēmō inōmo imopa, ante nāmā ānongā ingante Wængonguī waa adāmaī ingampa. Wæætē, Īngā waēmō inongā ingampa, ante mōnō Awēnē nānō ānongā ingante ante Wængonguī wæætē waa acampa.

11

Wængonguī beycē, ante pancadāniya babæ apænedānīpa

¹ Nōwo botō adodeque ōnonque tedete baī yewæmōmo adīnque mīnitō ee amīni īnīnque botō waa tobaimopa. Wadō āmo, Mīnitō ee ayōmīni edæ botō ōnonque tedete baī do yewæmōmopa. Īnīnque ĩīmaī ante odōmoncæte ante yewæmōmoī aedāni. ² Wængonguī wææ gompoçā baī botō adobaī mīnitō beyæ ante wææ gompote āmopa. Mīnitō baquēcā mōnāmaingā baī ĩñōmīnite Codito ængā beyænque mīni pōnencabo tōmengā nempo nō cæte quēwencæmīnīmpa, ante pædæ godoncæte ante cædīnque botō tōmengā adocanque ingante, Bitō quīnāni inānīte æe, antabopa. ³ Mīnitō nōingā cædīnque wacā mīñæ godāmaī inte Codito ingante waadete pōnēmīni incæte botō, Mīnitō oda cæmīni wæcæ wæ, ante guīñente wæbopa. Eba wodi ingante Tæntæbo nangūi ēñengā inte babæ cædīnque apænecā ēñēnīnque tōmengā nānō oda cægāi baī mīnitō wīī adobaī oda cæcæmīnīmpa, ante botō wææ ante apænebopa.

⁴ Mōnitō, Itota ingante pōnengæīmpa, ante do apænemōni ēñēmīnitapa. Incæte wacā mīnitō weca pōnīnque nāwā Itota ingante apænedāmaī inte, Wacā Itota ingante pōnēdāni, ante babæ apæneyongante mīnitō edæ ēñēē cōmīni awædō. Adobaī Wængonguī Ōnōwoca do ængāimīni ĩñōmīnite wacā ōnōwoca pō guīyongante mīnitō ee æmīni guīicā awædō. Ayæ wadāni mōnō Codito ingante ante apænedāmaī ināni inte, Wacā ængā beyæ quēwengæīmpa, ante babæ apæneyōnāni mīnitō edæ ēñēē cōmīni awædō. ⁵ Mänōmaīnō ante nē tededāni ĩñōmō nāmā ante pōnēnīnque, Nē gode āmōni inte mōnitō ñænæmōni pōnī imōnīpa, ante edæ babæ ānewēnānīpa. Tōmēnāni nāwangā ñænænāni ināni baī botō dicæ wædāmo inguēnēmogaa, ante pōnēmpa. ⁶ Botō æbānō tedeboo, ante ēñēnīnque mīnitō ĩñōmō, Ōnōnepāmoque tedecampa, ante pīīmīnitawo. Incæte botō ædæmō adimo inte nē ēñēnīmo inte apænebopa. Pabodo mänōmaī inongā inte apænecampa, ante acæmīnīmpa, ante mōnitō cōwē mīnitō ĩmīnite edonque odōmōmōni amīnitapa.

⁷ Mīnitō ĩmīnite ængō cæte baī cæcæte ante botō Wængonguī ingantedō ante watapæ apænebo beyæ ænāmaī intabopa. Mänōmaī ænāmaī inte botō nāmā edæ pīinte baī cædīnque dicæ wīwa cætābogaa. ⁸ Codito ingante godongāmæ nāni pōnencabo wayōmō nāni cabo wayōmō nāni cabo da pōnōnāni ō ænīnque botō mānīntaque godonte ænte quēwēnīnque mīnitō beyæ cætābopa. ⁹ Ayæ mīnitō weca ongōnīnque botō quīēmē æīnente wæbo incæ edæ waa atabopa. Wadāni edæ mōnō tōñīñadāni incæ Māatedōniabæ quēwente pōnīnque tōmēnāni botō ænguēñēnō ante eyepæ pōnōnāni æntabopa. Īnīnque coodintoidi botō ānō beyæ wædāmaī incædānīmpa, ante wææ cædīnque botō ĩñōmō edæ, Pōnōmīni æmoedāni, ante cōwē ānāmaī intabopa. Ayæ ĩncayæ ate cōwē ānāmaī incæboīmpa. ¹⁰ Mōnō Codito nō nānō apænedō ante ēñente

entawēmo inte āmopa. Botō, Mānōmaī cædinqe waa cæbopa, ante cōwē edæ tedeyōmote mīnitō Acayabæ quēwēmīni inte edæ wææ cædāmaī incæmīnīmpa. ¹¹ Quīnante mānōmaī ante tedeboī. Mīnitō īmīnite waadedāmaī inte mānōmaī ante tedeboī. Īñæmpa botō æbānō mīnitō īmīnite waadete pōnēmoō, ante do againgā inte Wængonguī tōmēngā ancæcāīmpa.

¹² Wadāni guiquēnē, Mōnitō Codito nānō nē godongaīmōni īmōnīpa, ante nē ānāni guiquēnē, Æbānō cæte odōmōmōni adinqe wadāni Pabodoidi īnānite waa adō bai mōnitō īmōnite adobai waa acædānīmpa, ante wædānīpa. Īninqe botō īñōmō, Īnāni mānōmaīnō ante odōmōnāmaī incædānīmpa, ante mānōmaī tedete wææ cæbo inte edæ cōwē godōmenque wææ cæcæboīmpa.

¹³ Tōmēnāni īñōmō edæ, Wadāni oda cæcædānīmpa, ante awēmō cædāni īnānīpa. Mōnō Codito tōmēnāni īnānite da godōnāmaī ingā incæte tōmēnāni īñōmō edæ, Codito nānō da godongaīmōni īmōnīpa, ante babæ apænedānīpa. Ayæ edæ mōnitō Codito nānō da godongaīmōni mōni ēmōnō bai ōnōmoque ēmōnīnque babæ cædānīpa. ¹⁴ Mīnitō, Tōmēnāni quīnante wacā bai ēmōnāni, ante wæmīnitawo. Īñæmpa tōmēnāni awēnē Tatāna incæ babæ cædīnque Wængonguī anquedoidi nāō nāni ēmōnō bai nāō ēmonte bai ēmongampa.

¹⁵ Īninqe Tatāna beyæ nē cædāni īñōmō tōmēnāni awēnē Tatāna nānō babæ cædō bai adobai babæ cædīnque, Nē nō Cædongā ingante nē cæmōni īmōnīpa, ante ōnōmoque ēmōnānīpa. Īninqe tōmēnāni nē ōnōmoque ēmōnāni inte ōnonque ēwente baquīnānidō anguēnē.

Æbānō caate wæboo, ante Pabodo yewæmongampa

¹⁶ Botō nōwo adodō ante yewæmōmopa. Mīnitō, Pabodo ocai ōmædæcacā īngā inte ōnonque tedecampa, āmīnitawo. Mānōmaīnō ante ānāmaī imæwedāni. Incæte wacā ocai ōmædæcacā tedeyongante mīnitō ee amīni tedecā bai botō adobai ocai ōmædæcabo inte bai, Nāmā waa cæbo īmopa, ante adodeque tedebo īninqe ee amīni tedeboedāni. ¹⁷ Botō nōwo mānōmaī nāmā waa ate bai tedete yewæmōnīnque mōnō Awēnē nānō āmaī wīi yewæmōmopa. Wæætē ocai ōmædæcacā mā nānō pōnente tede bai adobai ōnonque tedete bai yewæmōmopa. ¹⁸ Pancadāniya nanguī īnāni incæ, Mōnitō nāmā waa cæmōnīpa, ante edæ inguipogaque quēwēnāni tededāni bai adobai tededānīpa. Tōmēnāni mānōmaī tededāni īninqe botō adobai, Nāmā waa cæbopa, ante tedecæboīmpa. ¹⁹ Nē ēñēmōni īmōnīpa, ante nē amīni inte mīnitō īñōmō ocai ōmædæcadāni ōnonque tedeyōnānite ee ēñē cōmīnīpa tōō. ²⁰ Wacā edæ mīnitō īmīnite bæi ongongā wædīnque mīnitō tōmēngā ingante ee nē cæmīni bawēmīni awædō. Wacā babæ wapiticæ cædīnque mīnitō quī inguēnē incæ ō ængā incæte mīnitō edæ ee amīnīpa. Wacā mīnitō awēnē bai nāmā ængō cæte angā incæ ee ēñēmīnīpa. Wacā mīnitō īmīnite pōnō tamongā incæte mīnitō ee ate wæmīni awædō. ²¹ Botō wæætē aquīmo inte, Tōmēnāni nāni nanguī cædō bai ædō cæte cæquīmoō, ante botō guingo imonguīnque ōnonque tedeboipa tōō.

Tōmēnāni nāmanque waa adinqe edæ guīñēnāmaī inte tededānitawo. Botō adobai nāmanque waa adinqe edæ guīñēnāmaī inte tedecæboīmpa. Incæte mānōmaī tedinge botō ōnonque badete tote bai tedeboipa. ²² Tōmēnāni guiquēnē ebedeoidi īnānitawo, ante pōnēmīni. Botō īñōmō edæ tōmēnāni nāni īmaī adobo īmopa. Tōmēnāni idægoidi īnānitawo. Edæ botō tōmēnāni nāni īmaī adobo īmopa. Tōmēnāni Abadāō wodi pæīnāni īnānitawo. Edæ botō tōmēnāni nāni īnō bai adobo Abadāō wodi pæīmo īmopa. ²³ Mōnō Codito beyæ nē cædōnāni īnānīpa, ante pōnēmīni. Botō edæ tōmēnāni nāni īmaī inte edæ gomonga īmopa. Incæte mānōmaīnō ante tededīnque botō ocai ōmædæcacā bai inte ōnonque tedeboipa. Tōmēnāni īnānite adopoque adopoque wædænque

cæyönāni botō godōmenque nanguī cægaboimpa. Tömēnāni inānite wædænque tee mōnedāni wæyönāni botō imote godōmenque wæætē wæætē tee mōnedāni wægaboimpa. Tömēnāni inānite wædænque tæi pānāni wæyönāni botō imote godōmenque nanguī tæi pānāni wægaboimpa. Ayæ botō wæætē wæætē wodo wængaboimpa.

²⁴ Oodeoidi æmontaimenca wodo coadenta ganca adoyedē nāni cōwē tæi pāimpoga botō imote adoyedē mānimpoga tæi tæi pānīnque ōnompō æmæmpogoncaque wæætē adopoga adopoga tæi tæi pānāni wægaboimpa.

²⁵ Ayæ cantaca mempoga go adopoque botō imote tæi tæi pānāni wægaboimpa. Ayæ adopoque botō imote dicaca tacadāni wangæ wængaboimpa. Ayæ wipodē wogaa godinque mempoga go adopoque wipo tente tobæmpō wægaboimpa. Edæ wīl eyepæ gote botō tōmāā itædē tōmāā woyowotæ tæcæpæno pōnī wæwogaboimpa.

²⁶ Wayōmō wayōmō botō ancaa godinque wætabopa. Ōnō æpæmpo wodo bete wæntabopa. Nē ō ænāni incæ botō guidēnāni incæ wadāni incæ wodo wæñōnāni wæmo adinque botō wænguinque ante wægaboimpa. Ayæ tōmēnāni nāni quēwēñōmō quēwēnīnque, Ōnōmæca quēwēnīnque, gāwapæno owodinque botō wænguinque ante wægaboimpa. Ayæ wadāni incæ, Mōnō pōnencabo imompa, ante babæ ānāni adinque botō iñōmō edæ, Babæ cædāni wænca wæ, ante wægaboī aedāni. ²⁷ Botō pancaōnaa tōmāā woyowotæ mīlmo inte nanguī cædinque wægaboimpa. Tepæ pancaōnaa gæwænte wægaboimpa. Pancaōnaa cænguī dæ ä ate gue ænente wægaboimpa. Edæ æpogamē pōnī cæñāmaī inte wægaboimpa. Pancayedēna botō weocoo ōmaabo inte yoguite wægaboimpa.

²⁸ Mānōmaī wædōmo inte botō, Codito ingante godongāmæ nāni pōnencabo tōmancabodāniya nāni wædō ante æbānō cæquīmoo, ante wædinque iīmō iñō iīmō iñō nanguī cæbopa. ²⁹ Edæ wacā aquīngā inte wæcā inīnque botō adobai aquīlmo inte bai wæbopa. Ayæ, Wēnæ wēnæ cæe, ānāni ēñēnīnque adocanque oda cæcā ēñente wædinque botō ædō cæte wæwēnāmaī ingūlmo.

³⁰ Inīnque, Nāmā tæēmō inte cæbopa, ante tededāmaī incæboimpa. Wæætē, Æbānō aquīlmo inte cæbopa, ante acædānīmpa, ante botō mānīnonque ante tedecæboimpa. ³¹ Wængonguī iñōmō mōnō Awēnē Itota Wæmpocā inongā inte edæ tōmēngā adocā iñōmō Itota Wængonguī ingampa. Tōmēngā waēmō pōnī inongā inte cōwē waa pōnī cæcampa, ante mōnō tōmēngā ingante cōwē apænecæimpa. Tōmēngā iñōmō edæ, Pabodo nō angampa, ante do ēñēngampa. ³² Ayæ iīmaī cædāni wægaboimpa. Adeto Tidiabæ awēnē nānō iñōñedē mānīñedē botō imote bæi ongoncæte ante cædinque tōmēngā nānō emīñēngā wædænque awēnē iñōmō iīmaī cæcantapa. Tōmēngā wadāni inānite angā ēñēnīnque tōmēnāni wæætē Daāmācō iñōmō tōmēnāni nāni wīni wææ cæincō boyæ yabædemō gāānē wānō cōñōnāni, ³³ botō tōnō cædāni guiquēnē Daāmācō nāni wīni wææ cæincō boyæ cæimpiticæ inō otodē ñā cædete botō imote pædæ wææñōnāni ti wææ aamō cæte wodii wīnongaboimpa.

12

Pabodo, Īmaī wūmōnte bai atabopa, angampa

¹ Ōnonque tedebo incæte botō, Waa cætabopa, ante cōwē tedequēnēmo imopa. Inīnque botō ñōwo edæ, Wīlmo tæi ayōmo mōnō awēnē mā pōnī odōmōngā atabopa, ante yewæmoncæboimpa. Ayæ tōmēngā, Æbānō ī, ante edonque pōnī nānō odōmōnōnō ante godōmenque yewæmoncæ cæbopa. ² Codito nempo nē quēwēmo iñōmote Wængonguī do catodote wadepo iñōnte botō

imote oönædē wænömēnæcaönæ mæicā æigaboimpa. Incæte wacā æicā ate baī nāmā incæ agaboimpa. Wabānō ōnōwocaque inte æigaboī. Īntai ēñate wabānō inque inte æigaboī, ante botō adāmaī ĩmopa. Wængonguinque nē æente mæigaingā inte tōmenganque ēñengampa. ³ Edæ baō ēñate æibo incæ baō ōmaabo inte æibo incæ Wængonguinque ēñēñongā botō, ĩmaī ingatimpa, ante māninque ēñēmopa. ⁴ Waēmōnædē tōmengā ōmæ ĩñōmō Wængonguī æente mæicā æigaboimpa. Mānñōmō waa pōnī apænedāni ēñēmo incæte tōmengā, ĩñōmō mōni apænedō ante mīni waocabo apænedāmaī incæmīnimpa, ante wææ angā ēñēninque botō waobo inte ædō cæte apænequimoo.

⁵ Īnque wacā mānōmaī oönædē æite ēñengā ĩnque botō, Tōmengā waa pōnī cæcampa, ante do apænebaīmopa. Wæætē nāmā botō waa cædōnō ante apænedāmaī incæboimpa. Incæte, Tōmēmo aquīmo inte ōnonque cætabopa, ante māninonque ante botō nāmā waa ate baī apænecæboimpa. ⁶ Waa cægaboiampa, ante tedebo ĩnque botō wīī ocāi ōmæcabo inte edæ tedeboiampa. Īnæmpa nāwangā waa cægāimo ĩnōmo inte botō nō ante edæ tedeboiampa. Incæte botō wædænque apænete pōnōmenque cæyōmote æcāmenque incæ, Pabodo godōmenque waa pōnī cæcampa, ante ānāmaī incæcāimpa, ante wææ cædinque botō waa cægāinō ante tededāmaī inte edæ pæ wēēnebopa.

⁷ Wængonguī mā nānō odōmongāinō æbānō waa pōnī ingateī, ante wadāni adāmaī ĩñōnāni botō adoboque atabopa. Īnque, Pabodo, Botō adoboque nē agāimo ĩmopa, ante nāmā waa adāmaī incæcāimpa, ante wææ cædinque Wængonguī angā ate Tatāna botō imote pōnō da boo codongate ocæ ocæ coingā baī cæcā wætabopa. ⁸ Mānōmaī cæcā wædinque botō mempoga go adopoque Wængonguī Awēnē ingante apænedinque, Botō daa cogate baī wæyōmote o tongaate baī cæbi quēwēmoe, ante nangūi ante wætabopa. ⁹ Ca wæyōmote mōnō Awēnē wæætē, “Nē aquīī pōnī ĩnāni ĩñōnānite botō tæī piñæmāmo eyepæ pōnī pōnōmo æninque tōmēnānique wæætē tæī piñænte entawencædānimpa. Īnque bitō nē aquīīmi ĩmi beyænque botō waadete pōnō cædō ĩñōmō edæ eyepæ pōnī impa.”

Īnque mōnō Codito nānō tæī piñænte cæpāmo ænte entawencæte ante cædinque botō ĩñōmō edæ, Nāmā aquīīmo inte botō wædinō beyæ ante botō nāmā waa ate tobopa, ante tedinque godōmenque tocæboimpa. ¹⁰ Æyedēnō aquīīmo ĩmoī mānñedē edæ tæī ēwocaboimpa. Mānōmaī beyæ aquīīmo inte botō Codito beyænque nangūi tobopa. Badete tote piñte cædāni wæbo incæte botō piyænē cædinque tobopa. Ancaā nangūi caate wædinque nangæ babo incæ, tōgænte pānāni wæbo incæ, Ædō cæte quēwenguimoo, ante wæbo incæ mānñō tōmāā beyæ wædōmo inte botō Codito beyænque ante piyænē cæte nangūi tobopa.

Coodintoidi æbāmē cædānii, ante wæbopa, Pabodo angā

¹¹ Ocāi ōmædæcacā ingā baī Pabodo ōnonque tedete yewæmongampa, ante pōnēmīnitawo. Īnæmpa tōmēmīni botō beyæ wææ apænedāmaī ĩmīni beyænque botō tōmēmo nāmā wææ cæcæte ante cædinque mānōmaī tedete yewæmōmopa. Wadāni nē gode ānāni guiquēnē nāmā nāni waa acabo ĩnānīpa. Incæte tōmēnāni nāwangā ñænænāni ĩnāni ĩnque botō ĩñōmō dicæ wædāmo ĩmogaa. Īnque mīnitō tōmēmīni, Pabodo waa cæcā ingampa, ante tedequēnēmīni ĩmīnīpa tōō.

¹² Wacā mīnitō weca pōninque æbānō cæcā ate mīnitō, Īngā ĩñōmō mōnō Codito nānō nē da godongaingā ingampa, ante ēñēmīnī. Īmaī impa.

Tömengä, Ēñencæminimpa, ante mā pōni cæcā ate do ēñēmīnīpa. Tömengä bamōnengæ nanguī odōmongā ate ēñēmīnīpa. Wadāni cædāmaī īñōnāni tōmengā tæī piñænte cæcā ate wædinque mīnitō wæætē edæ, Codito nānō nē da godongaingā ingampa, ante do ēñēmīnīpa. Īnīnque botō mīnitō weca quēwēnīnque edæ Codito nānō nē da godongaingā mā cæte nāni odōmōnī bai adobāi odōmōnīnque edæ wæntædāmaī inte ee cæbo abaīmīnīpa. ¹³ Īnīnque wadāni Codito ingante nāni godongāmæ pōnencabo īnānte waa cædinque botō mīnitō īmīnite dicæ pōnōmenque cætabogaa. Wabānō mīnitō īmīnite, Pōnōmīni æmoedāni, ante ānāmaī inte botō mīnitō īmīnite wīwa cæbopææ.

¹⁴ Botō do mīnitō weca mempoga pōnīmo inte fīwo wæætē poncæ cæbopa. Pōnīnque botō mīnitō māincoo ante ānāmaī incæboīmpa. Wæætē, Mīnitō botō wēmīni bacæmīnīmpa, ante cæbopa. Wēñænāni tōmēnāni mæmpoidi beyæ ante dicæ godonguēnēnāni īnāniyaa. Wæætē edæ mæmpoidi īñōmō wēñænāni beyæ ante nē godonguēnēnāni īnānīpa. ¹⁵ Īnīnque, Mīnitō quēwencæmīnīmpa, ante botō māincoo tōmancoo godōnīnque waa tocæboīmpa. Ayæ, Mīnitō quēwencæmīnīmpa, ante cæte wæmo īnīnque waa tobaīmopa. Botō mānōmaī mīnitō īmīnite gomonga waadete pōnēmo īnīnque mīnitō wæætē botō imote pōnōmenque waadete pōnēmīni īmīnitawo.

¹⁶ Incæte edæ idæwaa āmopa. Mīnitō māincoo ante botō ānāmaī intabopa. Incæte mīnitō, Pabodo nē wēnæ wēnæ pōnengā inte awēmō æncæte ante babæ cæcampa, ante pōnēwēmīni awædō. ¹⁷ Wadāni īnānīte mīnitō weca da godōnīnque botō awēmō æntawo, ante pōnēmīnitawo. ¹⁸ Tito ingante, Coodintoidi weca ate pōe, nanguī ānīnque botō wacā mōnō tōniñacā tōnō tōmengā tōnō da godōmo guēa godatapa. Īnīnque Tito mīnitō weca pōnīnque dicæ wīwa cædinque māincoo ō ængantawogaa. Īñæmpa tōmengā tōnō botō guēa āawocaque bai ēwocamōna inte mōnatō guēa cægōmōna adīnque mīnitō adāmaī inte bai tedewēmīni awædō.

¹⁹ Mīnitō, Pabodoidi nāmā wææ cæcæte ante apænedānīpa, ante pōnēmīni awædō. Īñæmpa mōnō Codito nempo quēwēnōmo inte mōnitō Wængonguī ayongante apænetamōnīpa. Edæ, Botō nē waademīni īmīni inte mīnitō tæī piñænte bacæmīnīmpa, ante cædinque mōnitō mānōmaīnō ante apænetamōnīpa. ²⁰ Botō īñōmō edæ mīnitō waa cæmīni acæte ante ponte ayōmo mīnitō wadō cæmīni bai botō nanguī wæcædōmoīmpa, ante guīñente wæbopa. Ayæ mīnitō wæætē, Pabodo waa cæcæte ante pongampa, ante pōnēñōmīni botō wadō cæbo bai mīnitō nanguī wæcædōmīnīmpa, ante pōnente wædinque botō, Mōnō mānōmaī wædāmaī ingæīmpa, ante wææ cæcæte ante cæbopa. Edæ mīnitō wæætēdō wæætē piinte amīnitawo. Wacā ingante waa cædāni wædinque mīnitō godō piinte amīnitawo. Īñontobæ ænguī bamīnitawo. Nānanque pōnente cæmīnitawo. Wacā ingante piīnīnque godō babæ ante tedewēmīnitawo. Godō wæntaa wæntaa amīnitawo. Nāmā waa adīnque cæmīnitawo. Wīī ēñente cædinque mīnitō Yæ yæ tedemīnitawo. Mānīnō tōmānō wabānō cæmīni, ante guīñente wædinque botō mānōmaīnō ante edæ yewæmōntabopa.

²¹ Īnīnque botō ponte ayōmo pancamīniya wēēñēdē mīni cægāi bai fīwo adobāi cæmīni adīnque botō guingo imonte wæconguēnēmo ante awædō. Edæ pancamīniya wēēñēdē wentamō mīni mongænō ee mongæmīni adīnque botō Ca ca wæbaīmopa. Wēēñēdē mīni godō towengāinō ayæ towēmīni intawo. Wēēñēdē ēñēnāmaī inte mīni wīwa cædinō ayæ cæmīni intawo. Edæ wentamō mongæmīni inte guingo imōnāmaī īmīni inte pancamīniya Wængonguī gāmænō ocæ ēmænte pōnāmaī īmīnīpa, ante guīñente wæbopa.

13

Idæwaa mäninque yewæmômopa, ante

1 Botō mīnitō weca mempoga do pongaimo inte ñōwo wæætē poncæ cæbopa. Īmaī ante do yewæmongatimpa. Nō nō æbānō cætimpā, ante ēñencæte ante waoda mēnaa incæ mengāa go adocanque incæ nē adināni inte adodō ante apænedāni ēñēninque do apænte angæimpā, ante nāni yewæmongainō ante ēñēninque cæcæboimpā. ² Wēēñēdē wēnæ wēnæ cædināni tōnō wadāni tōmānāni inānite botō mīnitō weca doyedē pōninque, Āmo ēñēdāni, ante wææ āninque ñōwo wæætē wayōmō ongōninque adodō ante wææ ante yewæmômopa. Ayæ ate wæætē mīnitō weca ponte ongōninque tōmanga apænte āninque adodāni inānite ata cæpodāmai incæboimpā.

3 Pabodo wabānō mōnō Codito tōnō godongāmæ cæte apænecāā, ante wæmīnitawo. Māninō ante mīni wædō ante edæ, Nāwangā impā, ante odōmoncæte ante botō mānōmaī apænte ancæboimpā. Mōnō Codito incæ botō tōnō godongāmæ nē cædongā iñōmō tōmengā iñōmō aquīngā ināmaī inte mīnitō imīnite apænte angā abaīmīnīpā. Tōmengā iñōmō nanguī tæī piñænongā inte mīnitō weca cæcā apa ānewēmīnī. ⁴ Nāwangā impā. Mōnō Codito adocā incæ aquīngā baī inte cæyongante waodāni wæætē ñænquedīmæ cæte māo timpodāni wængacāimpā. Incæte Wængonguī nānō tæī piñænō beyænque adocā ñāni ōmæmonte quēwengampa. Mōnitō adobaī tōmengā nempo quēwēninque aquīlmōni inte edæ Wængonguī nānō tæī piñænō beyænque mōnō Codito tōnō godongāmæ quēwēninque mīnitō beyæ ante cæquīmōni imōnīpā.

5 Mīnitō tōmēmīni iñōmō, Æbānō wede pōnēmo imoo, ante nāmā waa aedāni. Mīni cædinō adinque, Æbānō nōingā cæbo imoo, ante aedāni. Īñæmpā, Itota Codito ingante entawēmompā, ante ēñēnāmaī imīnitawo. Wabānō mīnitō pancāmīniya nāmā adinque, Botō nōingā cædāmaīmo inte edæ wede pōnēnāmaīmo inte awædō, ante ēñencæte ante aquēnēmīni imīnīpā. ⁶ Ayæ nāmā mīni a baī mōnitō imōnite adobaī apænte adinque mīnitō, Pabodoidi guiquēnē nōingā cædōnāni inte nē wede pōnēnāni inānīpā, ante edonque amīni waa tobāimpā. ⁷ Mīnitō beyæ ante mōnitō Wængonguī ingante apænedinque, Coodintoidi cōwē wēnæ wēnæ cædāmaī incædānīmpā, ante apænēmōnīpā. Incæte mōnitō, Mīnitō wēnæ wēnæ cædāmaī imīni ate wadāni, Pabodoidi ædæmō cædāni beyænque impā, ante mōnitō imōnite waa acædānīmpā, ante wīī cæmōnīpā. Wæætē wadāni, Pabodoidi wīī eyepæ cædānīpā, ante piinte ānāni incæte mīnitō wæætē nōingā cæcæmīnīmpā, ante mōnitō mānīnōnque ante cōwē cæmōnīpā.

8 Edæ Wængonguī nōingā nānō ānō ante nē cæmōni inte mōnitō adode ante ædō cæte wido cæquīmōnī. ⁹ Īninque mōnitō æyedēmē aquīlmōni iñōmōni mīnitō wæætē tæī piñænte cæmīni adinque mōnitō nanguī tomōnīpā. Mīnitō beyæ edæ Wængonguī ingante apænedinque mōnitō, Coodintoidi eyepæ entawēninque picænāni baī nō cæcædānīmpā, ante apænēmōnīpā. ¹⁰ Botō imote apænedinque Wængonguī, Bitō wadāni inānite bæ tadāmaī inte tæī mænonte baī pōnō cæcæbiimpā, ante pōnō cæcā ate botō tæī piñæmo badinque nē āmo batabopa. Nē āmo imo incæte botō mīnitō weca ponte ayōmo wīwa cæmīni adinque piinte panguēnēmo ināmaī incæboimpā, ante wææ cædinque botō ñōwo wayōmō quēwēninque, Nāmā apænte aedāni, ante wææ yewæmômopa.

¹¹ Īñānāni, māninque ante ñōwo yewæmōmopa. Minitō eyepæ entawēninque, Mōnō picænāni bai badinque nō cæcæimpa, ante nanguī cæedāni, āmopa. Wæntædāmaī inte tæi piñænte cæedāni. Mini cabo incæ adoyōmō pōnēninque gānē pōnente quēwēedāni. Wængonguī incæ nē Waadecā inte nē gānē entawengā inte minitō tōnō cōwē quēwencæcāimpa, āmopa. ¹² Mini cabo incæ godongāmæ pō bee tēninque waadete pōnente waa apæneedāni. ¹³ Wængonguī quīnāni eyequeī quēwēnāni ĩñōmō, Minitō waa quēwencæminimpa, ante apænedāni ēñente yewæmōmopa.

¹⁴ Minitō tōmāmīni mōnō Awēnē Itota Codito waadete nānō pōnō cægānō ante entawencæminimpa, āmopa. Mæmpo Wængonguī tōmengā nānō waadete pōnēnō ante entawencæminimpa, āmopa. Wængonguī Tæiyæ Waēmō Ōnōwoca tōnō āāwocaque bai ēwocadinque tōmāmīni godongāmæ waa quēwencæminimpa, ante botō Pabodobo māninque ante yewæmōmopa.

Gadataidi inänite Pabodo nänö cadota ante yewæmongainta

Gadataidi inänite Pabodo, Waa quëwëedäni, angampa

¹ Botö Pabodobo inömo inte, Minitö acæminimpa, ante yewæmömopa. Mæmpo Wængongui incæ Itota Codito ingante, Nāni ömæmoe, angä nāni ömæmongacäimpa. Mæmpocä iñömö Itota Codito tönö guëa cædinque botö imote da godonga gotabopa. Inique botö dicæ waodänique änāni ëñente gotabogaa. Botö imote edæ dicæ waocanque da godongä gotabogaa. ² Minitö Gadatiabæ wayömö wacabo wayömö wacabo quëwëmini inte Codito ingante mini godongämæ pönencabo inömini inte edæ ëñencæminimpa, ante mönitö möni pönencabo tömämöni iimaï ante apænemönipa.

³ Wængongui mönö Mæmpo tönö mönö Awënë Itota Codito godongämæ pönö waadete cæda ate munitö gänë pönente waa quëwencæminimpa, ämönipa. ⁴ Adocä mönö Mæmpo Wængongui iñömö, Minitö pedænguipogaque wīwa cæte mini wæwëñömö edæ abæ tawænte ponte bai botö gämænö ponte quëwëedäni, angampa. Inique, Wængongui nänö angainö bai cæcæminimpa, ante cædinque mönö Awënë Itota Codito mönö imonte ö æncæte ante cægacäimpa. Mini wënæ wënæ cæpāmo mongæncæboimpa, ante tömgängä nāmā wepæ pædæ godonte bai cædinque pönö ængä beyænque mönö wæætë quëwëmopa. ⁵ Edæ pedænguipoga iñonte miinguipoga bayonte edæ, Mänömaï bacæimpa, ante nē angaingä inongä inte mönö Mæmpo Wængongui iñömö edæ cöwë nāö apäite bai waëmö pöni ëmönongä ingänö anguënë. Mänömaï impa, ante botö, Amëë, ämopa.

Codito ingantedö ante watapæ ëñengëimpa

⁶ Minitö iñömö æbämë pöni cæmini awædö. Mönö Codito waadete pönö cæcä beyænque munitö Wængongui añecä pöminitawo. Nöwo guiquënë nē añecä iñongante quimæ panguimæ gomīnii. Wadāni, Quëwengui taadö wadö inopa, ante tededäni ëñëninque munitö do Ao änewëmini awædö. ⁷ Iñæmpa wadö incæ wīi quëwenguiñö inopa. Wæætë edæ, Minitö oda cæcæminimpa, ante cædinque wadāni pancadāniya, Codito ingantedö ante watapæ möni apænëdö ante edæ, Idiquibæ bacæimpa, ante cædāni apa ëñëwëminii.

⁸ Mönitö Codito ingantedö ante watapæ apænemöni ëñëminitapa. Incæte mönitö adomöni incæ wadö ante apænemöni bai Wængongui wæætë pönö piinte apænte angä wæquimönidö anguënë. Ayæ adobai Wængongui anquedo incæ öönædë owodinique wææ pöninque wadö ante apænecä bai Wængongui tömgängä ingante wæætë godö piinte apænte angä wæquingänö anguënë. ⁹ Edæ doyedë möni äninö bai botö nōwo wæætë adodö ante ämopa. Codito ingantedö ante watapæ apænemöni ëñëninque munitö Ao äminitawo. Inique mäninö ante æcæmenque pönënamāi inte wadö ante apænecä ëñëninque Wængongui tömgängä ingante wæætë godö piinte apænte angä wæquingänö anguënë.

¹⁰ Botö dicæ, Minitö waomīnique botö imote Ao ancæminimpa, ante apænëbogaa. Wængonguinque, Ao ancæcäimpa, ante apænëbo aedāni. Ayæ, Waomīnique tocæminimpa, ante dicæ cæbogaa. Waomīnique tocæminimpa, ante cæbo inte bai edæ Codito ingante nē cædömo ināmaï incædömoimpa.

Pabodo Wængonguinque da godongä gotabopa, angampa

¹¹ Botō tōniñamīni ēñēedāni. Codito ingantedō ante watapæ botō apænedō iñōmō edæ wīi waodānique nāni mā pōnengainō impa, ante āmo ēñēedāni.

¹² Mānīnō ante waocanque dicæ pōnō apæneçā ēñente æntabogaa. Waocanque dicæ odōmonte apæneçā ēñēninque apænetabogaa. Wæætē Itota Codito edonque odōmonte apæneçā ēñēninque botō nē æmo inte adodō ante apænebopa.

¹³ Oodeobo iñōmō inte botō iñōmō edæ mōni oodeocabo pōnengainō ante wēēñēdē mānīnonque ante ēñēninque quēwengaboī aedāni. Botō māniñedē edæ Codito ingante nāni godongāmæ pōnencabo inānite wido cæcæte ante cædinque ancaæ togænte edæ nanguī pōnī pāmo wægadānimpa, ante do ēñēmīnīpa. ¹⁴ Ayæ botō tōnō guēa pægaināni incæ nanguī ināni guiquēnē mōni oodeocabo mōni ēñengainō ante wædænque ēñente cæyōnāni botō iñōmō godōmenque nanguī pōnī ēñente cægaboimpa. Edæ mōnitō mæmæidi nāni odōmonte angainō ante botō, Mōnō Ao ante adodō ēñente cæte quēwengæimpa, ante nanguī cæbo ingaboimpa.

¹⁵ Incæte botō badā cæncadē ongōñōmote Wængonguī, Botō beyæ cæcæbiimpa, āninque edæ māniñedē botō imote apænte ængaingā inte ñōwo botō imote pōnō waadedinque āñecantapa. Ayæ ñōwo pōnī tōmengā nāmā nānō pōnēnō ante cæte todirque edæ, ¹⁶ botō imote pōnō angantapa. Bitō oodeoidi ināmaī ināni inānite apænebi ēñēninque tōmēnāni botō Wengā ingante edonque ate bai ēwocacædānimpa, ante tāno botō imote edonque odōmongā adinque botō tōmengā Wengā ingante do ēwocabo inte apænebo ēñēnānitapa. Īninque botō waocā ingante, Ebānō cæquimoo, ante edæ ānāmā intabopa. ¹⁷ Botō imote da godongā ate botō Codito tāno nānō nē da godongaināni inānite apæneçæte ante Eedotadēē iñōmō æidāmāi intabopa. Wæætē edæ wadæ godinque botō wayōmō Adabiabæ do godinque ayæ ate Daāmāco iñōmō ocæ ēmænte gotabopa.

¹⁸ Ayæ wadepo mēnepoga go adodepoque ĩnque go ate botō Pegodo weca mā ēñacæte ante Eedotadēē æidinque mēa Wængonguī itadē tōmengā weca quēwentabopa. ¹⁹ Ayæ wadāni Itota nānō nē da godongaināni iñōnānite botō adocanque ingante mōnō Awēnē Itota biwī Tantiago ingante adinque wadāni inānite adāmāi intabopa. ²⁰ Mānōmainō ante botō Wængonguī ayongā babæ ānāmāi inte nāwangā ante yewæmōmo aedāni.

²¹ Mānīi gote ēñate ate botō Tidiabæ godinque godōmenque Tiditiabæ gotabopa. ²² Īninque Oodeabæ quēwente Codito ingante nāni godongāmæ pōnencabo mōnō Codito nempo nē quēwēnāni iñōmō botō awinca cōwē adāmāi ināni inte onōwēnenque pōnengadānimpa. ²³ Tōmēnāni iñōmō ĩmainō ante onōmoncaque ēñengadānimpa. “Wēēñēdē mōnō imonte nē togænte pangāingā iñōmō mōnō pōnente quēwenguīne ante, Mānīne ante wido cæcæimpa, angantawo. Ñōwo guiquēnē tōmengā, Wido cæquīne, ante nānō angāine incæ adode ante edæ watapæ apæneçā ēñēnānīpa,” ante tededāni ēñengadānimpa. ²⁴ Īninque, Pabodo ñōwo waa cæcampa, ante adinque tōmēnāni Wængonguī ingante apænedinque, Bitō waēmō pōnī emōnōmi inte nē waa cæbi ĩmpa, ante watapæ apænegadānimpa.

2

Itota nānō nē da godongaināni Pabodo ingante Ao ānāni

¹ Ayæ mānīi pō godinque ĩncayæ ate catodote wadepo go ate botō Bedēnabee tōnō Eedotadēē iñōmō adodō æidinque Tito ingante māomōna

gocantapa. ² Wængongui do botō imote apænete bai edonque odōmongā adinque botō Eedotadēē iñōmō ædinque iīmaī ante apænetabopa. Botō iñōmō oodeoidi ināmaī ināni weca godinque, Codito ingantedō ante cōwē watapæ apænebopa, ante botō ñænænānique inānite awēmō apænebo eñēnānitapa. Mānōmaī cædinque botō, Æbānō cæboī, ante adodō adodō ante apænebo eñēninque tōmēnāni pīināmaī incædānimpā, ante cætābopa.

³ Ayæ, Botō tōnō guēa pōningā Tito ingante adinque pancadāniya, Īngā iñōmō Guidiego inongā iñongante āmīni ēō togæncædānimpā, ante piinte ānāni incæte nē ānāni guiquēnē, Eō togæedāni, ante ānāmaī inānitapa. ⁴ Eō togængæimpā, ante nē piinte ānāni nāni wææ angainō ante mōnitō iñōmō Codito Itota gā pe æmpote æængā beyænque abæ tawænte ee gote bai quēwēmōnīpa. Mānōmaī iñōmōnte pancadāniya, Æbānō quēwēnānīi, ante edæ awēmō acæte ante cædinque edæ, Mōnō caipæ imōmpā, ante bai babæ cædinque mōnitō weca pōnāni wætāmōnīpa. Ayæ edæ mōnitō tōmēnāni nāni wææ ānō beyænque nē cæte quēwēmōni bacæmōnīpa, ante cædinque tōmēnāni godōmenque, Cæedāni cæedāni, ante wææ ānewēnāni wætāmōnīpa. ⁵ Incæte edæ, Mōnō Codito ingantedō ante watapæ mōni apænedō nāwangā ante impā, ante mīnitō oda cædāmaī incæmīnimpā, ante wææ cædinque mōnitō wantæ iñō incæ nē wææ ānewēnāni inānite eñēnte cædāmaī intāmōnīpa.

⁶ Ñænænāni inānīpa, ante wadāni nāni nē waa adōnāni iñōmō æbāmē emōnānīi, ante botō iñōmō edæ wædāmaī imōpa. Edæ Wængongui incæ waocā ingante apænte acæte ante cædinque adāmaī ingampā. Mīmōnoque acampā. Īninque botō idæwaa apænebo ate iīnāni incæ ædō cæte godōmenque apænequīnāni. ⁷ Īñæmpā iīnāni incæ edæ do eñēnānitapa. Pegodo ingante mōnō Awēnē incæ pōnō angā ate tōmengā oodeoidi inānite mōnō Awēnē ingantedō ante nē watapæ apænecaī ingampā. Botō imote adobaī mōnō Awēnē incæ pōnō angā ate botō wæætē oodeoidi ināmaī ināni inānite nē apænebo imōpa. Īninque botō mānōmaīnō ante apænebo ate nē ānāni iñōmō, Pegodo cæcā bai Pabodo adobaī cæcampā, ante do eñēnānitapa. ⁸ Pegodo oodeoidi weca gote cæyongante Wængongui tōmengā tōnō godongāmæ cæcā bai botō guiquēnē oodeoidi ināmaī ināni weca edæ gote cæyōmote adocā incæ botō tōnō adobaī edæ godongāmæ cæcampā, ante do eñēnānitapa.

⁹ Tantiago, Pegodo, Wāō iñōmō nē tæī emōnāni inānīpa, ante adinque wadāni, Gōnōniwæ onguitanca bai inānīpa, ante apænedānīpa. Īninque botō apænebo eñēninque mānīnāni, Onguitancaidi, nāni ānāni iñōmō edæ, Pabodo ingante Wængongui mānōmaī pōnō waadete cæcampā, ante adinque botō imote ayæ Bedēnabee ingante, Mōnitō tōniñamīna iīmīnāpa, ante tōmēmāī inō pædæ pompote bæi ongompodānitapa. Ayæ, Mōnitō oodeoidi weca gote apæneyōmōni mīnitō wæætē oodeoidi ināmaī ināni weca gote apæneceāmīnīmpā, ante godongāmæ Ao ānānitapa. ¹⁰ Ayæ, Mīnitō nē ōmaadāni inte wædāni inānite ante cōwē pōnēninque waa cæcæmīnīmpā, āninque mānīnque ante wææ ānānitapa. Mānīnō nāni ānīnō incæ botō cōwē pōnēninque edæ nangui cæinente wæbo intabopa.

Pegodo ingante Pabodo angā wæcampā

¹¹ Ayæ Pegodo Antioquiya iñōmō pōninque wīī nō cæcā adinque botō tōmengā awīnca waa adinque, Bitō pante wæquinque wēnæ wēnæ cæbi īmīpa, āmo wæcantapa. ¹² Īīmaī edæ Pegodo cæcā inongāimpā. Tæcæ Antioquiya pōninque tōmengā oodeoidi ināmaī ināni weca wæætē wæætē pō guīi pō guīi ongōninque godongāmæ cænongāimpā. Incæte Tantiago nānō da pōnōnīnāni

pönäni ate Pegodo iñömö edæ, Mönö eö togængæimpa, ante nē äñönäni pünäni wæcæ wæ, ante guiñenongä inte edæ oodeoidi inämaï inäni weca ñöwo cænämaï inte edæ gomonga gote cængongäimpa. ¹³ Mänömaï wadonque cædingä inte ñöwo wadonque cæyongante tömengä tönö oodeoidi tömänäni wadonque cædinäni inte edæ ñöwo wæætê wadonque cædänipa, ante adinque Bedënabee incæ oda cæte wapiticæ cæcantapa.

¹⁴ Ìnque edæ Codito ingantedö ante watapæ mönö eñenö nö pönï i incæte tömēnāni nö cædāmaï inte wapiticæ cædänipa, ante adinque botö tömänäni ayönäni edæ Pegodo ingante iïmaï ante ämo wæcantapa. “Bitö iñömö oodeobi inömi inte edæ oodeo inämaï inäni bai ñimpo cæte quëwëningue edæ wii oodeoidi nāni wææ angainö ante eñente quëwëmipa. Incæte bitö, Oodeo inämaï inäni incæ oodeoidi nāni wææ angainö ante eñente quëwencædänimpa, ante quimæ wææ änewëmii,” ämo wæcantapa.

Mönö pönēnō beyænque mönö tömāmō quëwëmōmpa

¹⁵ Oodeoidi inämaï inäni nāni eñenāmaï quëwencabo bai inämaï imöni inte mönitö iñömö edæ oodeomöni nē eñagaimöni imönipa. ¹⁶ Incæte edæ iïmaï ante do eñēmönipa. Iïmaï cædäni, ante Möitee wodi nänö wææ angainö ante eñente cæcä beyænque waocä dicæ Wængongui ayongä edæ nö cæcä baqinggä. Wæætê Itota Codito ingante wede nänö pönēnō beyænque waocä nö cæcä bacampa, ante mönitö do eñēmönipa. Ìnque, Waocä æcämenque incæ mäninö Möitee wodi nänö wææ angainö ante tömengä nänö eñente cædö beyænque edæ nö cæcä badämaï incæcäimpa, ante do eñēmöni inte mönitö adobai. Ædö cæte mäninö beyænque nö cæmöni baquimöni, ante eñēmönipa. Wæætê, Codito ingante möni wede pönēnō beyænque nö cæmöni bacæte ante mönitö adobai tömengä ingante wede pönēmönipa.

¹⁷ Ìnque mönitö oodeoidi imöni iñömö, Mönö Codito nempo quëwëningue Wængongui ayongä mönö nö cæmö bacæimpa, ante cæmönipa. Mänömainö ante cædingue mönitö nē wënæ wënæ cæmöni inte wæmöni incæte dicæ Codito angä beyæ wënæ wënæ cætamöniyaa. ¹⁸ Mäninö Möitee wodi nänö wææ angainö ante eñente cæte quëwengæimpa, ante botö pönengainö ante do wido cægaboimpa. Mänömainö ante botö pönengainö ante nē wido cægaimo inte botö ædö cæte wæætê adodö ænte bai cædingue, Mäninö ante eñente mönö quëwengæimpa, ante anguimoo. Mänömainö ante ämo inte bai botö Wængongui nänö wææ angainö ante edæ nē eñenāmaï imo bacædömoimpa. ¹⁹ Edæ, Wængongui nänö wææ angainö ante ædö cæte tömänö ante eñente cæquimoo, ante botö wædö beyænque nē wæwocaimo bagaboimpa. Ìnque botö nē wæwocagaimo inömo inte mänine ante eñente cæcæte ante quinante wæquimoo. Wæætê edæ Wængongui beyænque ante botö quëwenguinque imopa.

²⁰ Mönö Codito ingante awäa timpodäni wæñongante botö tömengä tönö godongämæ wænte bai bagaboimpa. Ìnque botö baonga eñate quëwëmo incæte botö wii tömëmo quëwenguimämo ewocate quëwëmopa. Wæætê Codito nänö quëwenguimämo ewocate quëwëmopa. Ìnque adocä Codito Wængongui Wengä botö imote waadete pönëningue nämä tömengä wepæ ante, Wængongui qui, ante botö beyæ pædæ godongä adinque botö baö eñate quëwëningue tömengä ingante wede pönëningue quëwëmopa. ²¹ Ìnque, Iïmaï cædäni, ante Möitee wodi nänö wææ angainö ante eñente cædingue mänömainö cæmö beyænque ñä mënongate nö entawëmö bamö bai mönö Codito önonque pönï wæncægacäimpa. Mänömaï beyæ Wængongui nänö pönö waadete cægainö ante botö Ao ante ö æningue cöwë wido cædämaï imopa.

3

Mönö pönëno beyænque mönö quëwengcäimpa, ante

¹ Gadataidi önonque pöni mïni cæcabo ïnömïni inte ëñëedäni. Æcänö wadö ante apænecä ëñëninque mïnitö dowænte bai önonque tedewëminipa. Ìñæmpa botö doyedë, Itota ingante æbänö awäa timpodäni wængacäi, ante botö edonque pöni odömonte apænebo ëñëninque mïnitö önöwënenque ante bai do pönëmïnitapa. ² Adodeque ämo ate apænemïni ëñëmoedäni. Mïnitö Wængonguï Önöwoca ingante æbänö cæte æmïnii. Möitee wodi wææ nänö angainö ante ëñente mïni cædö beyæ mïnitö tömengä ingante æmïnitawogaa. Wæætë edæ mönitö apænemöni ëñëninque wede pönëmïni inte æmïnitawo.

³ Ìñæmpa mïmö ömædé ïmïni inte ëñënämaï incædö. Mïnitö wëenëñedë mä pöni pönëninque Wængonguï Önöwoca tönö në cægäimïni inte ñöwo wæætë edæ ömæwocamïni inte bai edæ baonga ëñädinque nämanque cædinque ïnque cæmïnii. ⁴ Wængonguï nanguï pöni pönö cæcä caate wædinque mïnitö önonque beyæ caate wæmïnitawo. Tömengä dicæ önonquedö ante cæcæte ante pönö cæcä wæmïniyaa. ⁵ Wængonguï tömengä Önöwoca ingante da pönöninque mïnitö weca bamönengæ pöni cæcampa. Quinante mänömaï cæcää. Edæ, Möitee wodi nänö wææ angainö ante ëñente mïni cædö beyæ ante dicæ cæcää. Wæætë mönitö apænemöni mïni ëñente pönëno beyæ Wængonguï tömengä Önöwoca ingante da pönöninque mïnitö weca bamönengæ pöni pönö cæcä æmïnipa.

⁶ Wængonguï apænecä ëñëninque Abadäo wodi, Nöingä ante apænecampa, ante wede pönengacäimpa. Ìnque tömengä wede nänö pönëno beyænque Wængonguï, Botö ayömo Abadäo ïñömö në nö cæte quëwëngä ingampa, angacäimpa, ante yewæmongatimpa. ⁷ Mänömainö ante adinque mïnitö ïmaï ante ëñëedäni. Mönö në wede pönëmö ïñömö Abadäo wodi pæïmö bai adomö ïmoppa, ante ëñente pönëedäni. ⁸ Wængonguï, Oodeoidi ïnämaï ïnäni incæ wede näni pönëno beyænque botö ayömo edæ në nö cæte quëwënäni bacædänimpa, ante badoncæcäimpa, ante dodäni edonque adinque Wængonguï beyæ yewæmongadänimpa. Ayæ Abadäo wodi ingante apænedinque tömengä, “Botö bitö ïmite pönö waa pöni cæbo æmi ïnque bitö beyænque wadäni näni cabo wadäni näni cabo tömancabodäniya edæ watapæ quëwënguänidö angüënë,” ante apænecäimpa. Mänömaï impa, ante yewæmöninque dodäni wëenëñedë pöni Wængonguï waa pöni nänö cæquinö ante yewæmongadänimpa. ⁹ Abadäo wodi cöwë ædæmö cæte pönengaingä ïñongante Wængonguï pönö waa pöni cægacäimpa. Mönö në wede pönëmö ïñömö tömengä adobai pönö waa pöni cæcä æninque mönö ïñömö edæ Abadäo wodi tönö godongämæ watapæ quëwëmö ïmönö angüënë.

¹⁰ Wæætë edæ, “Wææ ante botö yewæmongainta adinque æcänö tömänö ante dicæ cæcää tömengä ïñömö Wængonguï piinte angä wæwocaingä ingänö angüënë,” ante Möitee wodi incæ do yewæmongacäimpa. Ìnque Wængonguï edæ nänö wææ angainö ante waodäni, Botö ëñente cædö beyænque quëwëncæboimpa, ante në änewënäni incæ wii eyepæ ëñente cædäni ïnönäni inte tömënäni tömänäni ïnänite Wængonguï piinte angä wæwocainäni ïnänidö angüënë. ¹¹ Ayæ wacä Wængonguï beyæ yewæmöninque, “Në nö cæte quëwëngä incæ tömengä nänö wede pönëno beyænque quëwëncæcäimpa,” angacäimpa. Ìnque ïmaï ante mönö edonque ëñengæimpa. Möitee wodi nänö wææ angainö ante ëñente cæte beyænque waocä dicæ Wængonguï

ayongä nē nō cæcä badinque quëwenguingää. ¹² Wængongui nänö wææ angainö ante ëñente quëwengæïmpa, ante nē cædönäni iñömö tömënäni dicæ nāni wede pönënö beyæ quëwënäniyaa. Wæætë, “Mäninö ante nē ëñente cæcä iñömö tömengä nänö ëñente cædö beyænque quëwencæcäïmpa,” ante Möitee wodi nänö yewæmonte angainö bai ïmpa.

¹³ Ayæ adobai, “Æcänö ingante awäa wodoncædäni a ongöna tömengä ingante Wængongui piingä wæwocaingä ingänö angüenë,” ante Möitee wodi yewæmongacäïmpa. Ìninqe Wængongui nänö wææ angainö ante wii eyepæ ëñente cæmö beyæ mönö wæwocaimö inte wæyömonte mönö Codito iñömö, Abæ tawænte gote bai quëwencæminïmpa, ante cædinque mönö beyæ wæætë wæwocaingä badinque edæ awäa wæninque a ongongacäïmpa. ¹⁴ Abadäo wodi ingante Wængongui waa pönï pönö cægacäïmpa. Ayæ, minitö oodeoidi inämai iñöminite Itota Codito pönö cæcä beyænque Abadäo tönö godongämæ watapæ quëwencæminïmpa, ante Wængongui adobai pönö waa cæcampa. Mänömai bacæïmpa, ante cædinque Codito tömämö ïmonte, Minitö wede pönëninque botö Önöwoca ingante ænte ëwocæminïmpa, ante cædinque mönö ïmonte æncæte ante nämä wepæ godonte ængä beyænque quëwëmompä.

Wængongui täno, Cæquïmo, aninque aycë ate wææ angacäïmpa

¹⁵ Botö tönïfamini ëñëdäni. Botö, Waomö mönö cæi bai Wængongui mönö beyæ wodo adobai cæcampa, ante odömoncæte ante ïmai ante yewæmömö aedäni. Waoda, Möna guëa cæcaya ïmönäpa, ante Ao äna ate adocanque inte ædö cæte wadö ante cæquëngää. Ayæ, Mönö godömenque cæcæïmpa, ante waocä adocanque inte ædö cæte edæ ante cæquëngää. Nöwo edæ ämo ëñëdäni. Wængongui, Mönö godongämæ cæcabo bacæïmpa, ante botö pönö cæcæboïmpa, angä ëñëninque mönö Ao ante cæquëñënö iñömö edæ wodo adobai ïmpa. ¹⁶ Mæmæ Abadäo wodi ingante apænedinque Wængongui, Bitö Pæingä ingante botö cöwë pönö waa cæcæboïmpa, angacäïmpa. Mänömai äninque tömengä Abadäo wodi ingante, “Bitö pæinäni,” ante änämai ingacäïmpa. Wæætë, “Bitö Pæingä ingante pönö cæcæboïmpa,” äninque Abadäo wodi Pæingä adocanque Codito ingante ante pönëninque angacäïmpa.

¹⁷ Mänömainö ante apænedinque botö ïmainö ante odömoncæte ante apænetabopa. Abadäo wodi ingante Wængongui, Botö pönö cæbo ate minitö Ao ämini ïninque mönö godongämæ waa cæcæïmpa, ante wëñëñëdë cægacäïmpa. Ayæ wantæpiyæ coatodo tientö todënta wadepo go ate Möitee wodi ingante apænedinque adocä, ïmai cæedäni, ante pönö wææ änogäïmpa. Ìninqe Wængongui wantæpiyæ ate wææ äninque do nänö angaine ante wëä godönämai ingacäïmpa. Edæ, Cöwë pönö cæcæboïmpa, ante doyedë nē angaingä inte tömengä ñöwo wææ äninque mänine ante dicæ wëä godongantawogaa. ¹⁸ Möitee wodi nänö wææ angainö ëñente cæmö beyænque mönö angüenencö do æmö bai Wængongui, Cöwë pönö cæcæboïmpa, ante önonque ancægacäïmpa. Incæte Wængongui pönö waadete cædinque mæmæ Abadäo wodi ingante apænedinque, Cöwë pönömo æncæminïmpa, ante nänö angainö bai cædinque do cægacäïmpa.

¹⁹ Ìninqe, Cöwë pönömo æedäni, ante nē angaingä inte Wængongui quïnante ñöwo wæætë, ïmai cæedäni, ante wææ angacäi. Ìñæmpa tömengä, Minitö botö äno ante ëñënämai cædinque wënæ wënæ mini cædinö edonque bacæïmpa, ante odömoncæte ante wææ angacäïmpa. Mänömai cædinque tömengä, Abadäo wodi Pæingä botö nē angaingä incæ tömengä nänö ponganca minitö ëñente cædinque quëwencæminïmpa, ante wææ angacäïmpa. Mänine nänö

wææ angaine ēñente cæcæðanima, ante Wængongui tõmengä anquedoidi inänite da pönongä pöninque tõmënäni Mõitee wodi ingante mämö odömönäni agacäimpa. Tõmengä iñömö tæcæguedē ongonte bai nē anguingä badinque Wængongui nänö angaine ante idægoidi inänite wæætē angä ēñengadänimpa. ²⁰ Nõwo apænebo ēñeedäni. Adocanque eyepæ cæcä adinque tõmengä beyæ ancæte ante wacä tæcæguedē ongönämaï iimaingampa. Wængongui iñömö, Cõwē pönö cæcæboimpa, nē angaingä inte adocanque incæ eyepæ cædongä ingampa.

Īimaï cæedäni, ante quïnante angacäi, ante

²¹ Īinque Wængongui, Cõwē pönö cæcæboimpa, ante nē angaingä inte wantæpiyæ ate, Īimaï cæedäni, ante wææ äninque tõmengä doyedē nänö angaine dicæ wëä godongantawogaa. Edæ tõmengä mönö imonte apænedinque, Botö wææ angainö beyæ quëwencæminimpa, ante mänine pönongä ænte quëwëmö bai mänine beyænque edæ nē nō quëwëmö bacædömöimpa. Wæætē edæ wii mänömaï impa. Wængongui, Cõwē pönö cæcæboimpa, angä ēñēninque mönö quëwenguinque edæ nē nō cæmö bamompa. ²² Īinque Wængongui, Cõwē pönömo æncædänimpa, ante nē angaingä inte Īimaï ante cæampa. Botö angaincoo ante Itota Codito ingante nē pönënäni inänite da pönömo ate tõmënäni wede nani pönënö beyænque ænte ewocacædänimpa, ante Īimaï cæampa. Tõmengä mönö inguipoga tõmäo quëwëmö mönö wënæ wënæ cædimämo adinque mönö imonte pönö tee mönete bai cæcä ongömompa. Mänömaï pönö cæcä ongongaïmö iñömönte Wængongui mönö wede pönencabo adomönque iñömönte tõmengä nänö angaincoo ante pönongä ænte ewocamompa. Wængongui, Mänömaï cæbopa, ante apænecä ēñēninque yewæmongadänimpa.

²³ Doyedē iñömö mönö, Mõitee wodi nänö wææ angainö tõmänö ante mönö ædö cæte eyepæ cæquii, ante tee mönete bai wægämöimpa. Edæ Itota Codito mönö nē wede pönënongä edonque pönï nänö ponte a ongonganca mönö tee mönete bai wægämöimpa. ²⁴ Īinque, Minitö Codito ingante wede pönëninque nē nō cæmini bacæminimpa, ante cædinque Wængongui Codito gämænö töö æmænte bai cædinque wææ angacäimpa. Mänömaï i Īinque tõmengä nänö wææ angainö beyænque mönö wapiticæ godämaï inte Codito gämænö pongämöimpa. ²⁵ Ayæ nõwo iñömö, Mönö nē wede pönënongä do pongäimpa, ante adinque Wængongui nõwo wæætē wææ änämaï ingampa.

²⁶ Minitö Itota Codito ingante wede pönëmini inte tõmämïni Wængongui wëñæmïni ĩminipa. ²⁷ Edæ tõmämïni mönö Codito tõnö godongämæ guiite bai æpænē guidinque tõmengä nänö ewocadö adodö ewocadinque tõmengä nempo quëwëmïnipa. ²⁸ Tõmengä nempo adocabomö inömö inte mönö adocanque ingantedö ante apænedinque, Oodeocä ingampa, ante änämaï ingæimpa. Ayæ wacä ingantedö ante adobai, Guidiego ingampa, ante änämaï ingæimpa. Ayæ, Waocä nänö nē ö æningä inte awënë beyænque cæte nē quëwengä ingampa, ante mönö änämaï ingæimpa. Wacä ingantedö ante, Abæ tawænte gocä ingampa, ante mönö änämaï ingæimpa. Ayæ adocanque ingantedö ante, Onguiñængä ingampa, ante mönö änämaï inte wacä ingantedö ante adobai edæ, Onquiyængä ingampa, ante änämaï ingæimpa. Īñæmpa Codito Itota nempo quëwëninque adocabomö ĩmompa. ²⁹ Ayæ minitö iñömö Codito nempo quëwëmïni inte mæmæ Abadäo wodi pæimïni bai ĩminipa. Īinque Wængongui nänö, Cõwē pönömo æncæminimpa, ante nänö angaincoo ante minitö nē ænguimïni ĩminipa.

4

¹ Mānīnō ante yewæmōninque botō, Waodāni æbānō cædānii, ante odōmōninque iīmāi ante apænecæte ante yewæmōmopa. Wæmpocā wængā ate tōmengā wengā iñōmō wæmpocā nānō ēadincōo nē ænguīgā ingampa. Īninque wæmpocā ayæ mīngā quēwengāñedē mānincōo tōmancōo do ænte bai tōmengā wengā nē ēacā ingampa. Incæte tōmengā wengā tōmancōo nē ēacā incæ edæ tōmengā wēñængāñedē guiquēnē wæmpocā beyænque cæte nē quēwengā bai ĩnongā ingampa. ² Īninque wæmpocā do āninque, Īiōnæ ĩnque bayonte botō wengā do picængā badinque nāmā nē angā bacæcāimpa, ante nānō angaiōnæ ĩnque baganca nē aadāni inānite wæmpocā angā ēñēninque tōmēnāni wæætē wēñængā ingante wææ aadānīpa. Ayæ, Wēñængā nānō manguincōo ante æbānō cæquīi, ante nē aadānique ānāni ēñente wēñængā incæ cæcampa.

³ Mōnō iñōmō doyedē māningā wēñængā bai adobai picæmō ināmāi mōnō ingaiñedē inguipogaque nāni wææ angaiñonque ante ēñente cægamōimpa. Waocā beyænque cæte nē quēwengā bai mōnō adobai inguipogaque nāni wææ angaiñonque ante ēñencæte ante cædinque mānīnō beyænque cæte nē quēwēmō bai ĩnte wægamōimpa.

⁴ Incæte Mæmpo Wængonguī iñōmō, Īiōnæ da pōnōmo poncæcāimpa, ante doyedē nānō angaiōnæ ĩnque bayonte tōmengā Wengā ingante da pōnongā pongacāimpa. Īngā Wēñængā ingante onquiyængā mangā ēñadinque tōmengā Wængonguī nānō wææ angaiñō ante nē ēñente cæquēnengā nānō baquinque pægacāimpa. ⁵ Īninque mōnō Mōitee wodi nānō wææ angaiñō beyæ tee mōnete bai wæyōmonte adocā Wængonguī Wengā incæ, Minitō abæ tawænte bai picæmīni badinque nāwā wēmīni bate quēwencæmīnīpa, ante mōnō ĩmonte ængā beyænque mōnō abæ tawænte bai quēwēmōmpa. ⁶ Mæmpo Wængonguī iñōmō, Minitō nāwā wēmīni ĩmīni beyæ, ante tōmengā Wengā Ōnōwoca ingante mōnonga da pōnongantapa. Īninque tōmengā Ōnōwoca iñōmō, “Mæmpo, botō Wæmpo,” ante nē apænecā ĩnongā ĩnte mōnō mīmōnē owodique adodō ante mōnō beyæ apænecampa. ⁷ Īninque bitō iñōmō bitō ĩmite nē wææ angaingā beyænque idæwaa cæte quēwengā ĩmi ĩnte ñōwo abæ tawænte bai æmæwo pædīmi ĩnte nāwā wēmi ĩnōmi ĩmīpa. Ayæ nāwā wēmi iñōmite Wængonguī pōnō cæcā ate bitō tōmengā nānō ēagāincōo ante nē ænguīmi babīpa.

Nē pōnēmīni æbāmē cæte quēwēmīni, ante wæcampa

⁸ Wængonguīdi ināmāi iñōnānite wadāni iñōmō, Wængonguīdi inānīpa, ante babæ apænedānīpa. Minitō wēēñēñedē Wængonguī ingante mīni adāmāi iñedē, Wængonguīdi, ante tōmēnāni babæ ante nāni nē ānōnāni beyænque cæte nē quēwēmīni ĩnte ñæ cæyænte bai wægamīnīpa. ⁹ Ōnōwō iñōmō mīnitō Wængonguī ingante ate bai nē pōnēmīni ĩmīni ĩnte ædō cæte wapiticæ ante ēñēmīni. Æ wadō ante godōmenque āmo. Wængonguī incæ mīnitō ĩmīnite do ate pōnengāingā ĩngā incæte mīnitō ædō cæte ĩnguipogaque quēwēnāni nāni ōnonquedō ante wææ angaiñō ante ēñente quēwēmīni. Īñæmpa, Mānīne nāni wææ angaiñō ante wæætē ēñengæ ĩmpa, āninque mīni ñā cæpote wæquinque āmīni awædō. ¹⁰ Edæ Wængonguī ānāmāi iñōngante mīnitō mā pōnēninque, Wængonguī beyæ, ante mōnō iñōnæ cædāmāi ĩnte ongōninque ææmæ cæte becæ ĩmpa, ānewēmīnīpa. Ayæ, Īi apāicā iñōnte adobai, ĩntedæ iñōnte adobai, ĩnepo iñōnte adobai, Wængonguī beyæ, ante mōnō cædāmāi ĩnte ææmæ cæte becæ ĩmpa, ante ōnonque pōni ante cæmīnīpa tōō. ¹¹ Īninque, Minitō ēñēnāmāi

inte mīni wæquinque cæmīnīpa, ante adīnque botō mīnitō beyæ ante guīñente wæbopa. Botō pōnō nanguī cæbo incæte edæ ōnonque wabānō cægaboīmpa, ante wæbopa.

¹² Botō tōnīñamīni ēñēedāni. Botō wēēñēñedē mīnitō bai Mōitee wodi nānō wææ angāinō nē cæbo bai inte wæbo amīnitawo. Wæætē botō nē wææ angāingā ingante idæwaa ēñente cædīnque abæ tawænte gobo bai mīnitō adobai cæmīni waa tobaiūmpa. Mīnitō dicæ botō īmote wēnæ wēnæ cæmīnitawogaa.

¹³ Wēēñēñedē wēnæ wēnæ mānīmo inte botō mānōmai beyæ mīnitō weca pōnīnque mōnō Codito ingantedō ante watapæ apænedīnque mā apænebo ēñēmīnitapa. ¹⁴ Īnīnque mānōmai wēnæ wēnæ bate pōmo ate wædīmīni incæte mīnitō guīñēñate wædāmai inte towæ tånongadāmai īmīnitapa. Wæætē edæ botō īmote adīnque mīnitō, Wængonguī anquedo ingampa, ante pōnente bai cædīnque watapæ todīnque, Pōe, amīnitapa. Ayæ edæ, Itota Codito ingampa, ante pōnente bai cædīnque, Pōe, amīnitapa. ¹⁵ Mīnitō māñīñedē watapæ mīni todīnō bai ñowo guiquēñē quīmæ todāmai īmīni. Mīnitō māñīñedē edæ eyepæ inte bai nāmā awīnca o togæmōnīnque botō īmo pōnō mīne tīmoncædōmīnīmpa, ante pōnēnīnque apænebopa.

¹⁶ Īñæmpa mīnitō īmīnite nāwangā apænebo beyænque mīnitō ñowo wæætē botō īmote pīnte bamīnitawo. ¹⁷ Wadāni īñōmō, Mōnitō gāmænō ponte ēñēedāni, ante nanguī cædāni īñōmō mīnitō īmīnite wēnæ wēnæ cæcæte ante ānewēñānīpa. Tōmēñāni īñōmō, Pabodoidi īñānite ēñēñāmai inte mīnitō wæætē mōnitō tōnō godongāmæ cædīnque mōnitō cæñēnōnque ante amōni ēñēñīnque cæcæmīnīmpa, ante babæ cædānīpa.

¹⁸ Wacā nānō cæñēñō ante godongāmæ cæmīni cōwē waa īmaīmpa. Nāwangā īmpa. Incæte tōmēngā nānō waa cæquēñēnōnque ante cæcā adīnque mīnitō, Māñīnōnque edæ cæcæīmpa, ante nanguī cæquēñēmīni īmīnīpa. Ayæ edæ botō mīnitō weca quēwēmoyedē cæmīni bai mīnitō botō dæ āmo īñedē cōwē adobai cæmīni waa īmaīmpa. ¹⁹ Botō wēmīni ēñēedāni. Yædēmadā inte nantate wædā bai botō īñōmō wæætē nantate wædīnque edæ, Mīnitō mīmōñē Codito ingante ædæmō entawencæmīnīmpa, ante nanguī pōñī cædīnque wæbopa. ²⁰ Edæ, Mīnitō æbāmē cæmīnī, ante ēñēñāmai īmo inte botō mīnitō weca pōnīnque wīi gobæ tedete botō ānō bai wædedīnque wæætē wadō bai tedecæte ante pōñente nanguī wæbopa.

Tada wodi tōnō tōmēñā īnante nē cægāingā Agada

²¹ Mīnitō, Mōitee wodi nānō wææ angāinō ante mōnō ēñēngæīmpa, ante nē amīni inte apænēmīni ēñēmōedāni. Mīnitō wææ ante tōmēngā nānō yewæmōngāinta incæ adāmai inte ēñēñāmai īmīnitawo. ²² Īmai ante yewæmōngatīmpa. Abadāo wodi īñōmō wēñæna onguīñæna mēnaa īnate tapægācāīmpa. Adocanque guiquēñē nānōogængā beyænque nē cæte quēwēngā wēñængā īñōngā wacā guiquēñē nāwā nānōogængā wēñængā īngacāīmpa. ²³ Nē cæte quēwēngā wēñængā guiquēñē cōwē mōnō ēñadō bai adobai ōnonque ēñægācāīmpa. Nāwā nānōogængā wēñængā guiquēñē Wængonguī, Cōwē pōnōmo æncæbiīmpa, ante nānō āñīnō beyænque ēñægācāīmpa.

²⁴ Wængonguī īñōmō, Botō pōnō cæbo ate mīnitō Ao amīni īnīnque mōnō godongāmæ waa cæcæīmpa, ante mempoga apænægācāīmpa. Īnīnque, Wængonguī mēna nānō apænægāinō æbānō īnei, ante ēñēncæte ante mōnō māñīna onquīyæna īnate adīnque pōñēngæīmpa. Wængonguī īñōmō adopoque apænecæte ante Tīnaiquidi wæænte ongōnīnque wææ angacāīmpa. Māñīneque tōmēngā nānō wææ angāīneque ante nē ēñente cædāni īñōmō

Agada wodi wēnāni mānīne beyænque nē cæte quēwēnāni bai nāni baquinque ēñadānīpa. ²⁵ Māningā Agada tōmengā nāni wencabo iñōmō wacā ingante nē cædonāni inte cæningā nā cæyænte bai inte wægadānīpa. Īnīque Adabiabæ ongonquidi Tinaiquidi ongōnīque Wængonguī wææ angā ate mōnō iñōmō Agada bai wacā ingante nē cæmō bagamōīpa. Edæ Agada wodi nāni wencabo wacā beyænque nē cæte quēwēnāni inte nāni wægānō bai nōwo Eedotadēē quēwēnāni adobai wacā beyænque nē cæte quēwēnāni bai iñōnāni inte wæwente quēwēnānīpa. ²⁶ Eedotadēē inguipoga ongōñōmō bai mōnō ōōnædē æite Eedotadēē bai iñōmō ongongæīpa. Māniñōmō Eedotadēē nāni āñōmō mōnō badā Tada wodi bai īpa. Tada iñōmō wīi wacā ingante nē cæcā bai iñōnante mōnō tōmēnā wēmō bai īmōpa. ²⁷ Edæ īīmai ante Wængonguī beyæ yewæmōngatīpa,

“Bitō owæntabi ēñēmi. Wēñæ mānāmai īnīmi inte bitō, Īncayæ ate mancæboīpa, ante watapæ tocæbiīpa.

Bitō wēñæ nantadāmai īnīmi inte, Botō Īncayæ ate toquinque īpa, ante yedæ ancæbiīpa.

Edæ nānōogængā ēmō cæte gocā ate adocanque inte wēñæ mānāmai iñongante,

Wængonguī, Botō pōnōmo æncæbiīpa, angā ēñengā inte owæmpocā iñōmō godōmenque nanguī wēñæñāni īnānite māñongā nānōogængā ēacā guiquēñē wēñæñāni wædænque mancæcāīpa,” ante yewæmōngatīpa.

²⁸ Botō tōniñamini, ēñēdāni. Wængonguī, Bitō wēñængā cōwē pōnōmo æncæbiīpa, ante nānō angānō beyænque Itæca wodi ēñagacāīpa. Wængonguī, Cōwē cæcæboīpa, ante mīnitō īmīnite adobai angā beyænque mīnitō mempoga ēñadinque tōmengā wēmīni bagamīnīpa. ²⁹ Māniñedē iñōmō Wængonguī Ōnōwoca beyænque ēñacā iñongante Itæca ingante ōnonque nē ēñagāingā Itūmædo guiquēñē pīinte cægacāīpa. Mānōmai nānō pīinte cægāi bai inguipogaque quēwēnāni Wængonguī wēnāni īnānite nōwo adobai cædānīpa. ³⁰ Īnīque Wængonguī æbānō angā ēñente yewæmōngadānīi. Īīmai īpa. “Nāwā nānōogængā wēñængā mæmpocā ēadīncoo æñlongā nānōogængā beyænque cæte nē quēwengā wēñængā wæætē ænāmai incæcāīpa. Īnīque nē cæte quēwengā nāna wencaya īnate mōnō wido cæcæīpa.” Ante yewæmōngatīpa. ³¹ Īnīque botō tōniñamini ēñēdāni. Mōnō iñōmō nāwā nānōogængā wēñæmō bai iñōmō inte mōnō nānōogængā beyænque nē cæte quēwengā wēñæmō bai wīi iñōmō īmōpa, ante āmo ēñēdāni.

5

Abæ tawænte bai mōnō quēwēnō ante

¹ Mōnō īīne Mōītee wodi nānō wææ angānō ante ēñente nē cæmō inte nā cæyænte bai wæyōmonte Codito, Abæ tawænte bai inte quēwencæmīnīpa, ante pōnō ō ænte nīmpo cæcā beyænque mōnō abæ tawænte gote bai ee quēwēmō īmōpa. Īnīque mīnitō iñōmō nē abæ tawænte gogaīmīni inte tæī ongōnīque edæ wæætē mānīne beyænque nā cæyænte bai badāmai īedāni.

² Īñānāni, botō Pabodobo apænebo ēñenguēñē quēwēmīni. Mīnitō, Mōnō ēō togæīmō inte quēwengæīpa, ante cæmīni Īnīque ædō cæte Codito ængā beyænque quēwenguēñēmīni. Īñæmpa mānōmai cæmīni Īnīque Codito mīnitō beyæ ædō cæte pōnō cæquingā. ³ Bitō, Botō ēō togæīmo inte quēwencæboīpa, ante cæbitawo. Edæ botō bitō īmīte īīmai ante apænebo ēñē. Bitō quēwencæte

ante cædinque eö togæimi babi inique Mōitee wodi nānō wææ angainō tōmānō ante bitō eñente cæte quēwenguēnēmi babaīmipa tōō. ⁴ Pancamīniya, Nō cæmō mōnō baquinque Mōitee wodi nānō wææ angainō ante eñente cæcæimpa, ante amīnitawo. Iñæmpa mānōmaī ante nē amīni inte mīnitō mōnō Codito ingante do pango cæte bai cæmīnīpa tōō. Edæ pango cæte nānēnē goyōmīnite tōmengā ædō cæte pōnō waadete cæquingāā. ⁵ Mōnitō guiquēnē, Wængonguī ayongā mōnō nē nō entawēmō bacæmōimpa, ante nanguī pōni æinente wānō cōñōmōnite Wængonguī Ōnōwoca pōnō apænecā eñēninque mōnitō, Mōnō nē nō entawēmō badinque watapæ bacæimpa, ante wede pōnēmōnīpa. ⁶ Edæ Codito Itota nempo quēwēninque eö togæimō imō incæ bagæmō imō incæ tōmāmō adobaī ōnōmōnque inōmō imōmpa. Wæætē edæ Codito ingante wede pōnēninque nē waadete pōnēmō iñōmō mānīnō mōnō pōnēnō beyænque waa pōni entawēmōmpa.

⁷ Mīnitō guiquēnē wēnēñedē godongāmæ pogodo gote bai nanguī cædinque waa cæmīnitapa. Edæ ñowo guiquēnē mīnitō waa pōni pogodo gote bai cæyōmīni æcāmē wææ āna eñēnimīni inte wæætē Wængonguī nō ante nānō apænegainō ante eñēnāmaī cæmīnitawo. ⁸ Wængonguī mīnitō imīnite nē aa pegaingā inte tōmengā iñōmō edæ, Eñēnāmaī cæedāni, ante dicæ wææ angantawogaa. ⁹ Edæ, “Yedæ æmpocæimpa, ante cædinque guiyā pōni da wente ate pāō cæquimo tōmāō guipæñō pāō yedæ æmpopa,” ante pōnēninque iīmaī ante eñengæimpa. Adocanque wapiticæ wææ angā eñēninque nanguī ināni wæætē oda cæte wæcædānīpa. ¹⁰ Mōnō Awēnē nempo mōnō quēwencabo imōmpa, ante pōnēninque botō, Mīnitō botō pōnēnō bai pōnēmīni inte wīi wapiticæ ante pōnengulimīni imīnīpa, ante pōnēmōpa. Wæætē edæ æcāmēnte mīnitō imīnite wapiticæ ante wææ angāā, ante adinque Wængonguī nē apænte angā ingante cōwē godō pangā wæcæcāimpa.

¹¹ Botō tōniñamīni eñēedāni. Botō Itota awāa wængacāimpa, ante apænebo eñēninque, Eö togæimīni baedāni, ante nē ānāni iñōmō botō imote cōwē pīinque pānāni wæbo aedāni. Incæte botō tōmēnāni nāni ānō bai, Eö togæimīni baedāni, ante āmo bai tōmēnāni botō imote wīi bæi ongōninque pancædōnānīpa. Edæ mānōmaīnō āmo bai tōmēnāni wæætē pīināmaī ināni inte, Pabodo Itota nānō wængaiwæ ante apænecā awædō, ante tee tēwate bai oda cædāmaī incædōnānīpa. ¹² Mīnitō imīnite nē wapiticæ ante wææ ānāni iñōmō nāmā wido togænte bai cædinque nāmā ta ñænte Codito ingante nē pōnēmīni weca pōnāmaī ināni inte waa imāimpa, ante awædō.

¹³ Mīnitō botō tōniñamīni abæ tawænte gote quēwencæmīnīpa, ante mōnō Awēnē mīnitō imīnite apænte aa pegacāimpa. Incæte mīnitō, Abæ tawænte godimōni inte inguipogaque mōni cæinēnō ante godōmenque cæcæmīnīpa, ante cædāmaī iedāni. Wæætē edæ wadāni inānite godō waadete pōnēninque tōmēnāni beyæ ante cæedāni. ¹⁴ Edæ Itota, “Nāmā bitō waadete pōnēnō bai pōnēninque bitō wacā ingante adobaī edæ waadete pōnencæbiimpa,” angacāimpa. Iīne adodeque eñente cæmō inique Wængonguī nānō wææ angainō incæ tōmānō ante do nē cæmō edæ babaīmōmpa. ¹⁵ Edæ babæidi bai nāēmæ pocænte bai cædinque nāēmæ gāwæi cænte bai cæmīni bai mīnitō nāēmæ wido cædinque wantæ biquēnēmīnidō anguēnē, ante apa quēwēmīni.

Mōnō Wængonguī Ōnōwoca nempo quēwengæimpa, ante

¹⁶ Ñowo āmo eñēedāni. Wængonguī Ōnōwoca ewocadinque quēwēedāni. Mānōmaī quēwēninque mīnitō inguipogaque mīni cæinēwēnō ante wīi eñēninque nāmā beyænque ante cædāmaī inguimīni imīnīpa. ¹⁷ Edæ

inguipogaque mōnō cæinēwēnō ante adinque Wængongui Ōnōwoca iñōmō edæ Baa angampa. Ayæ wæætē æcānō inguipogaque mōnō cæinēwēnō ante cæte quēwēna tōmengā Wængongui Ōnōwoca ingante nāēmæ Baa angampa. Īninqe mōnō inguipogaque cæinēwēnō ante wæyōmō Wængongui Ōnōwoca guiquēnē, Wadō cæedāni, angampa. Mānōmaī beyæ mīnitō mīmōnē wæætēdō wæætē ante baī entawēmini inte mīnitō nāmā mīni ānō ante ædō cæte cæquimīni. ¹⁸ Incæte mīnitō imīnite Wængongui Ōnōwoca nōinō tōō æmænte māōcā gomīni inte mīnitō Mōitee wodi nānō wææ angainō ante do abæ tawænte gomīni imīnipa.

¹⁹ Inguipogaque mōnō cæinēwēnō ante ēñēninqe nē cædāni iñōmō æbānō cædāni, ante edonque abaimpa. Edæ iīmaī impa. Tōmēnāni nānōogængā iñāmaī iñongante do godō guēa towēnānipa. Wentamō pōnēwēninqe cædānipa. Ōnonque guīñēñadāmaī inte nāmā baonque pōnēwēninqe towēnānipa.

²⁰ Wængonguīdi inānipa, ante badōninqe ædæ wæænte waa adānipa. Idō baī yewæninque ōnonque tedewēnānipa. Piinte quēwēnānipa. Tiyæno tiyæ tedewēnānipa. Wacā godōmenque ængā ate wædinque piinte awēnānipa. Ængui bawēnānipa. Nāmā waa tobote, ante ānewēnānipa. Wæætēdō wæætē āninqe nāwæ godānipa. Wadō ante nāni cabo wadō ante nāni cabo badinque wæætēdō wæætē cædānipa. ²¹ Wacā gomonga ængā ingante godō piinte adānipa. Ti nāmæ nanguī bedinque dowænte badānipa. Ayæ nanguī pōni godōmenque bedinque nanguī pōni cæninqe guīñēñadāmaī inte towēnānipa. Ayæ godōmenque quīēmē baī nē cæināni inānipa. Mānōmaī cæte quēwēnāni iñōmō Wængongui Awēnē Odeye nempo ædō cæte edæ guīquīnāni, ante do botō ānīnō baī nōwo wæætē āmo ēñēdāni.

²² Wængongui Ōnōwoca ingante ēñēnte nē cæmō guīquēnē mōnō waincawæ incate baī iīmaī cæmompā. Waadete pōnēmompā. Watapæ tomompā. Gānē entawente pōnēmompā. Ee cæte piināmaī imompā. Waadete cæmompā. Wadāni beyæ ante waa pōni cæmompā. Wæntædāmaī inte cōwē cæmompā.

²³ Gānē pōnēninqe ædæmō cæmompā. Nāmā wææ āninqe nō cæmō imompā. Wængongui Ōnōwoca ingante ēñēninqe mānōmaī cæmō adinque Wængongui mōnō cædōnō ante wææ ānāmaī ingampa. ²⁴ Mōnō Codito quīmō iñōmō inte mōnō baō tōmengā tōnō awænēmæ timpote baī wængaimō ĩninqe inguipogaque mōnō cæinēwēngainō adobaī awæ timpote baī iñonte mōnō abæ tawænte baī godīmo inte baonque ante mōnō cæinēwēnō ante ēñēnāmaī inte cæmompā. ²⁵ Edæ Wængongui Ōnōwoca ængā beyænque quēwēmō inte mōnō tōmengā Ōnōwoca tōnō guēa godongāmæ cægonte baī quēwēngæimpā.

²⁶ Mānōmaī quēwēninqe mōnō nāmā waa adāmaī ingæimpā. Edæ wacā tōnō guēa wæætēdō wæætē ānāmaī ingæimpā. Wacā gomonga ængā ingante mōnō godō piinte adāmaī ingæimpā.

6

Mōnō wacā ingā wacā ingā iñacabo cæcæimpā, ante

¹ Botō tōniñamīni ēñēdāni. Wacā ēñēnāmaī cædinque oda cæte wæcantawo. Īninqe mīnitō Wængongui Ōnōwoca ingante mīni ēwocacabo iñōmō, Māningā nē ōda cædingā inte Wængongui taadonque adodō pō gocæāmpa, ante cædinque tōmengā ingante ædæmō cæedāni. Mānōmaī cædinque nē apænecā guīquēnē, Botō adobaī ēñēnāmaī cæinente wīl bacæboimpā, ante pōnente wædinque nāmā wææ cæedāni. ² Wacā teēmente mongænte baī entawengā ate wædinque

mīnitō mōnō Codito nānō, Īlmaī cæedāni, angaiñō ēñente cædinque tōmengā nānō mongæncōo ĩñacabo mongænte bai cædinque waa cæedāni.

³ Ēcānō ōnonganque ĩna inte, Botō ñænæmo ĩnōmo ĩmopa, ante pōñēna, tōmengā ĩñōmō nāmā babæ apænete bai oda cæte pōngampa. ⁴ ĩnque adocanque nāmā nānō cæinō cōwā adinque adocanque nāmā nānō cæinō cōwā adinque tōmāmini, Tōmēmo æbānō cæboo, ante nāmā apænte anguēñēmini ĩminipa. Mānōmaī cædinque wacā nānō cæinō adāmaī inte waocā nāmā nānō cæinonque cōwā adinque apænte ānque, Tōmēmo nō cæbo ĩmopa, ante adinque tobaingampa. ⁵ Edæ adocanque nāmā nānō cæquēñēnō ante teēmente mongænte bai cædinque adocanque nāmā nānō cæquēñēnō ante teēmente mongænte bai cædinque tōmāmini eyepæ cæbaiminipa.

⁶ Ayæ Wængongui nānō apænedō ante wacā apænece ēñēnque nē ēñengā ĩñōmō tōmengā māincoo pancacooga waincooga ænque nē apænece ingante eyepæ pædæ godongā æncæcāimpa.

⁷ Tōmēmō tā bocate pæte incayō waocā wānā adomō bai tā pete ængampa. Mānōmaī ingæimpa, ante nē angaingā inte Wængongui ĩñæmpa oda cæcampa diyæ waocā wamō ængingā. ĩnque, Waocā æbānō cæcāā, ante adinque Wængongui pōnō cæcā ate waocā nānō cægai bai adobaī ænte wæcæcāimpa. Āmo ēñēnque mīnitō wīi wacā wapiticæ nānō apænedō beyæ oda cæquēñēminidō anguēñē. ⁸ Edæ mīnte pædimō bai tā pete ængā bai cædinque ĩmæcaque ante nāmā pōñente nē cæcā guiquēñē adobaī ĩmæcaque nānō ñōmænginque æncæcāimpa. Wæætē Wængongui Ōñōwocaque ante pōñēnque nē cæcā guiquēñē Wængongui Ōñōwoca pōnō cæcā beyænque tōmengā nānō cōwē wænāmaī quēwenginque æncæcāimpa. ⁹ ĩnque mōnō wæntæye badāmaī inte wadāni beyæ godōmenque waa cæcæimpa. Ñimpo cædāmaī ĩmō ĩnque edæ Wængongui, ĩñēdē æncæminipa, ante nānō angaiñēdē ĩnque bayonte māñēdē mōnō edæ tā pete bai eyepæ pōñi æmaĩmōmpa. ¹⁰ Mānōmaī beyæ mōnō eyepæ ĩmō ĩñēdē tōmānāni ĩnānite mōnō waa cæcæimpa. Ayæ wadāni nē wede pōñēnāni ĩñōñānite mōnō, Adomō ĩmopa, ante pōñēnque tōmēnāni ĩnānite godōmenque nanguī cædinque waa cæcæimpa.

Waa quēwæncæminipa, ante

¹¹ Botō ōnompoca yewæmōnque tōmēmo ñænæmōmo yewæmōmoī aedāni. ¹² Codito mōnō beyæ awāa wængacāimpa, ante nē pōñēnāni incæ pancadāniya, Māñine ante ēñēnque oodeoidi pīñāni wæcæ wæ, ante nāmā wæcæ cæcæte ante cædānipa. ĩnque tōmēnāni, Ēō togænte cæmōni ĩnque oodeoidi wæætē mōnitō ĩmōnite waa acædānipa, ante cædinque mīnitō ĩminite, Ēō togæimīni bacæminipa, ānānipa. ¹³ Nē ēō togæināni incæ edæ Wængongui nānō wæcæ angaiñō ante dicæ ēñente cædāniyaa. Incæte tōmēnāni, Mōnitō ānō bai mīnitō do ēō togæimīni bamīni ate wadāni mōnitō ĩmōnite waa acædānipa, ante cædinque mīnitō ĩminite, Ēō togæimīni baedāni, ante cædānipa.

¹⁴ Botō guiquēñē quēmenque ante, Waa aedāni, ante dicæ āmogaa. ĩñæmpa ĩmæcaque ante botō cæinēmāmo ante botō, Codito nānō wængaiwāa tente bai wæinēmāmo ĩmpa, ante bai cædinque edæ mānimāmo ante æmæwo wido cætabopa. Ayæ tōmēmo adobaī Codito tōnō ānque bai awāa wænte bai ingaimo inte edæ ĩmæcaque botō cæinēnō ante cædāmaī ĩnōmo ĩmopa. ĩnque, Mōnō Awēñē Itota Codito awāa wænque mōnō beyæ waa pōñi pōnō cæcæimpa, ante pōñente wædinque botō māñiwænque tōmengā nānō

wængaiwænque ante waa ate apænedinque edæ wade ante cōwē waa ate tededāmai incæboimpa, ämopa. ¹⁵ Ìninqe eö togæimö incæ bagäamö incæ önonque pöni edæ impa. Edæ Itota Codito badongä beyænque mönö müimö quëwëmopa. ¹⁶ Mänömainö ante pönente cæmini ìñöminite Wængongui pönö waadete piyænë cæcä adinque munitö gänë pönente waa cæcæminimpa. Idægoidi iminipa, ante Wængongui nē nänö angaimini incæ munitö mänömai cæte quëwencæminimpa.

¹⁷ Botö Itota beyæ ante cæyömö wadäni pänäni wädimo inte botö do baonga ämogate ee ëñabo ìñömote ñöwo ìncayæ ate munitö tömämimi edæ ee amini quëwëmoedäni. ¹⁸ Botö tönifämimi waa quëwencæminimpa, ämopa. Mönö Awënë Itota Codito pönö waadete apænecä ëñëninque munitö müimönë adobaï waadete entawencæminimpa. Mäninque ante yewæmömopa, ante Amëë ämopa.

Epetoidi

inānite **Pabodo nānō cadota ante yewæmongainta**

Waa quēwencæminimpa, ante

¹ Wængonguī angā ēñēninque Itota Codito botō ĩmote da godongā gogaĩmo inte botō Pabodobo ĩnōmō inte yewæmōmopa. Epeto ĩñōmō quēwēmini incæ mēnitō Wængonguī quimīni inte Itota Codito nempo quēwēninque nē ædæmō cæte pōnēmini ĩñōminite botō, Minitō acæminimpa, ante yewæmōmopa.

² Mōnō Mæmpo Wængonguī tōnō mōnō Awēnē Itota Codito piyænē cæte waadete pōnō cæda ate mīnitō gānē pōnēninque waa quēwencæminimpa, ante yewæmōmopa.

Codito nempo quēwēninque mōnō eyepcē ēwocamompa

³ Mōnō Awēnē Itota Codito Wæmpocā ĩñongante Itota ĩñōmō adocā ingant-edō ante, Botō Wængonguī ĩnongā ingampa, ante apænegacāimpa. ĩninque mōnō ĩñōmō Codito tōnō do oōnædē æite bai tōmengā nempo quēwēñōmonte adocā Itota Wængonguī incæ tæiyæ waēmoncoo nē ēwocagaingā inte pōnō cæcā æninque mōnō tōmengā nānō ēwocadoncoo tōmancoo bai adobai eyepcē pōni ænte ēwocamompa. Mānōmai cæcā adinque mōnō tōmengā ingante apænedinque, Bitō waa pōni cæbi æmōnipa, ante watapæ apænecæimpa.

⁴ Tōmengā ĩñōmō edæ, Codito nempo quēwēninque mīnitō botō ayōmo edæ tæiyæ waēmō ēwocamini inte edæ wentamō mongænāmai incæminimpa, ante tōmengā inguipoga nānō badōnāmai ĩñedē incæ mōnō ĩmonte pōnō apænte ængacāimpa. Ayæ mōnō ĩmonte waadete pōnēninque tōmengā, ⁵ Botō pæpogate bai æmo beyænque mīnitō ĩñōmō Itota Codito nempo quēwēninque botō wēmīni baquimīni incæminimpa, ante cædinque tocæboimpa, angacāimpa. ĩninque tōmengā doyedē nānō angainō bai cædinque pōnō angā ate mōnō Wængonguī wēmō cōwē baquēnēmō ingamōimpa.

⁶ Edæ nanguī waadete pōnō cædinque tōmengā nānō nē Waadecā ingante da pōnongā æmompā. Mānōmai beyæ mōnō ĩñōmō tōmengā ingante, Bitō nāo apāite bai emōnōmi inte mānōmai waadete pōnō cæbi æmōnipa, ante watapæ apænecæimpa. ⁷ Edæ tōmengā nānō nē Waadecā ĩñōmō mōnō ĩmonte æncæte ante nāmā wepæ godonte ængā beyænque mōnō abæ tawænte quēwēmompā. Ayæ adobai tōmengā wepæ inte nā mēnongacā beyænque ēñēnāmai mōnō cædō ante Wængonguī nanguī waadete pōnō cædinque ĩimpo cæcā quēwēmōimpa. ⁸ Tōmengā ĩñōmō edæ, Æbānō i, ante tōmānō ante nē ēñēnongā inte, Æbānō cæquī, ante edæ nōingā ēñēninque mōnō beyæ ante godōmenque nanguī pōnō cæcā æmōimpa. ⁹ Ayæ edæ, Codito tōnō guēa cædinque nāmā botō ānō bai cæte tocæboimpa, ante Wængonguī angacāimpa. Tōmengā mānōmainō ante nānō wēmō ĩñōmō angainō ante mōnitō ĩmōnite nōwo edonque pōni odōmonte apænecā ēñēmōnipa. ¹⁰ Tōmengā, ĩñedē cæcæboimpa, āninque tōmengā nānō angaiñedē ĩnque ba ate tōmengā nānō angainō bai edæ ĩnque cæcæcāimpa. Edæ oōnædē ongoncoo tōnō inguipoga ongoncoo tōmancoo tē gæte māmō adocanque nempo Codito Awēnē nempo godōmo æncæcāimpa, ante cæcampa.

¹¹ Nāmā pōnente nānō angainō bai tōmānō ante adobai pōni nē cædongā inte Wængonguī, ĩmai cæcæboimpa, ante pōnente ate cōwē cæcampa. ĩninque

tömengä, Codito nempo quëwënanî inänite æncæboimpa, ante nänö pönente angainö bai cædinque, Minitö Codito nempo quëwenguimîni incæminimpa, ante pönëninque mönitö ïmönite apænte ængacäimpa. ¹² Mönitö, Codito beyæ watapæ bacæimpa, ante täno pönëmöni ïñömönite tömengä, Botö ñäö ëmönö ante watapæ apænemîni bacæminimpa, ante mönitö ïmönite pönö apænte ængacäimpa.

¹³ Ayæ, Codito pönö ængä beyænque mînitö quëwencæminimpa, ante Wængonguî watapæ nänö apænegainö ante ëñente pönëninque mînitö epe-teomîni adobai Codito nempo quëwëmîni ïminîpa. Wede pönëmîni adinque Wængonguî, Botö wëmîni ïminîpa, ante edonque acæimpa, ante odömoncæte ante tömengä ëmöwo ante mînitonga yewæmante bai cædinque tömengä Tæiyæ Waëmö Önöwoca ingante da pönongä ænte ëwocaminîpa. ¹⁴ Edæ Wængonguî, Botö quimîni ïnomîni inte mînitö abæ tawænte mîni goyedë mînitö ænguincoo mänîñedë ate eyepæ pönî æncæminîpa, angampa. Äninque tömengä, Nö pönî impa, ante ëñencæminîpa, ante cædinque tömengä Önöwoca ingante ñöwo da pönongä ænte ëwocamompa. ïninque pancacooga do ænte bai ëwocamö inte mönö, ïncayæ ate mönö tömancoo ænguinque impa, ante edonque ëñengæimpa. Tömengä mänömai cæcä adinque mönö, Wængonguî bitö godömenque ñäö apäite bai bitö ëmonguinque mänömai cæbîpa, ante watapæ apænecæimpa.

Nö ëñënanî bacædänîpa, ante Pabodo apænecampa

¹⁵ Botö ïñömö, Epeteoidi mönö Awënë Itota ingante wede pönënanî ïnänîpa, ante tededänî ëñentabopa. Ayæ adobai, Wængonguî quînanî tömänänî inänite epeteoidi ïñömö waadete pönënanî ïnänîpa, ante ëñënimö inte, ¹⁶ botö ñimpo cædämai inte Wængonguî ingante cöwë waa ate pönëninque apænebopa. Ayæ mînitö beyæ ante cöwë apænebopa. ¹⁷ Itota Codito mönö Awënë ïñongante Wængonguî ïñömö adocä Coditö Wængonguî ïñongä ingampa. Ayæ nê Mæmpocä ïñongä inte tömengä ñäö ëmönongä ingampa. Tömengä ingante apænëdinque botö, Bitö Önöwoca ingante da pönömi æninque epeteoidi ïñömö nê ëñënanî bacædänîpa, ante apænebopa. Ayæ, Bitö Önöwoca pönö odömongä adinque epeteoidi wæætë Itota Codito ingante do ate bai ædæmö pönencædänîpa, ante botö mînitö beyæ ante Wængonguî ingante cöwë apænebopa.

¹⁸ Wængonguî pönö cæcä beyænque watapæ bacæimpa, ante mînitö pönente tocæminîpa, ante cædinque Wængonguî mînitö ïminite aa pegacäimpa. Ayæ adobai, Mönö tömengä quimö inte tæiyæ waëmö bayömonte tömengä nänö godömenque ñäö ëmonguinque mönö ïmonte ængacäimpa. Mänîne mënea edæ nâwangä ïnepa, ante mînitö ëñencæminîpa, ante botö, Wængonguî bitö tömënanî mîmönë tica ënente bai odömonte apænëbî ate do ëñencædänîpa, ante Wængonguî ingante apænebopa. ¹⁹ Mönö nê pönëmö ïñömönte Wængonguî nänö pönö cæquînö ante tömengä nänö tæî piñæmämö æpodö ï, ante mönö ædö cæte tee mante aquî. Incæte mînitö, Mänîmämö ante æpodö ï, ante epeteoidi ëñencædänîpa, ante botö Wængonguî ingante apænebopa. Edæ, Tömengä nänö tæî piñæmämö ïñömö æbänö ï, ante ëñencæte ante mönö, Tömengä gomonga tæî piñæñongä inte ïimai cægacäimpa, ante ëñengæimpa.

²⁰ Nê tæî piñæñongä inte Wængonguî angä ate mönö Coditö ïñömö do wæningä inte edæ do ñänî ömæmongacäimpa. Ayæ godömenque tæî piñæninque Coditö ingante öönædë ænte mæidinque Wængonguî tömëmæ ïnö angä Coditö tæ contagacäimpa. ²¹ Edæ æcämëneque pedænguipoga ïñonte

mīnguipoga iñonte ñænængä inte nē angä inaa, æcämenque nē awënë inaa, æcämenque tæi piñante ongongä inaa, æcämenque ingante, Awënë ingampa, ante godō pemōnāni mānīnāni tōmānāni ōnōnānique incädānīmpa. Mōnō Codito adocante ingante ogæ æænonte bai cædinque Wængongui angä ate tōmengä wæætē Tæiyæ Awënë bacä acæīmpa. ²² Ayæ Wængongui tōmāo iñōmō ongongoo Codito ōnōwaca inō pōnō wæætodōninque edæ, Bitō edæ Tæiyæ Awënë inōmi inte edæ æmonga pōni ongongcæbiīmpa, angacāīmpa. Ayæ, Bitō imite godongāmæ nē pōnēnāni tōmēnāni Ocamō bai iñōmite, ²³ tōmēnāni wæætē bitō baō bai adoyonque bai incädānīmpa. Codito ingante mānōmaīnō ante apænedinque Wængongui, Bitō nē Awënë inōmi inte tōmāo iñōmō ongongoo tōmancoo bitō nempo ongongooque bacæīmpa. Ayæ bitō imite nē pōnēnāni iñōmō bacoo ināni yebænāni īninque bitō enempodō eyede pōni bacæīmpa, ante Wængongui Codito ingante pōnō cægacāīmpa.

2

Wængongui nānō waadete pōnēnō beyænque quēwēmō

¹ Mīnitō guiquēnē wēēñēdē ēñēnāmaī cæte quēwēmīni inte wēnæ wēnæ mīni cædō beyæ dobæ edæ wæwocaimīni ingamīnīmpa. ² Nē inguipogaque ante pōnēnāni taadō adodō cægonte bai mīnitō māññēdē edæ wēnæ wēnæ cæte quēwengamīnīmpa. Ayæ wēnæidi tæi piñante nāni owocabo awēmō iñōmō nāni cægōnō adodō gote bai mīnitō tōmēnāni awënë miñæ tee empote godinque wēnæ wēnæ cægamīnīmpa. Nōwo incæ Wængongui nānō ānō ante nē ēñēnāmaī cæte quēwēnāni guiquēnē adocā wēnæ awënë nānō pōnēwēnō ante ēñente ēwocadinque cædānīpa. ³ Wēēñēdē tōmēnāni tōnō godongāmæ quēwēninque mōnō tōmāmō adobai imæcaque ante pōnēninque mōnō tōwēmāmoque ante quēwengamōīmpa. Quiēmēnque ante towencæte ante mōnō cæinēwēnō ante cædinque mōnō ocaidē ædēmenque pōnēninque mōnō cæinēwēnonque cæte quēwengamōīmpa. Īninque wadāni nāni tente wæquēnēnō bai mōnō adobai imæcaque ante pōnente nē cæmō inōmō inte edæ Wængongui nānō piinte panguēnēmāmo ante edæ do tente wæquēnēmō ingamōīmpa.

⁴ Mānōmaī ingaimō iñōmōnte Wængongui mōnō imonte nangui waadete pōnēninque īmaī nangui waadedongä inte pōnō waa cægacāīmpa. ⁵ Mōnō ēñēnāmaī cægāinō beyæ ante wæwocate wæyōmōnte tōmengä pōnō cæcä beyænque mōnō Codito tōnō godongāmæ quēwēmōmpa. Mīnitō edæ Wængongui nānō waadete pōnō cægāinō beyænque quēwēmīni imīnīpa. ⁶ Wængongui angä Codito ñāni ōmæmōñongä mōnō tōmengä tōnō godongāmæ ñāni ōmæmōnte bai mīlmō badinque quēwengamōīmpa. Ayæ mōnō tōmengä nempo quēwēmō iñōmōnte Wængongui iñōmō Itota Codito ingante ææntodōninque mōnō imōnte ōōnædē ææntodote Itota tōnō pōnō gōnongä tæñ contate bai ongōmōmpa. ⁷ Mānōmaī Itota Codito nempo quēwēñōmōnte Wængongui iñōmō, Botō pōnō waadete cædinque godōmenque gomonga cæbo acädānīmpa, ante cægacāīmpa. Ayæ, Mīnguipo badōmo ate botō māññēdē ate odōmōmo adinque tōmānāni, Wængongui nānō waadete pōnō cæganca wadāni dicæ adoganca cædāniyaa, ante wæcädānīmpa, ante cæcæte ante mānōmaī cægacāīmpa.

⁸ Edæ Wængongui nānō waadete pōnō cægāinō beyænque mīnitō mīni quēwenguinque wede pōnēmīni bamīnitapa. Incæte mīnitō dicæ nāmā mīni cæinō beyænque nē wede pōnēmīni bamīnitawogaa. Wæætē edæ Wængongui pōnongä æninque mīnitō nē wede pōnēmīni bamīnitapa. ⁹ Īninque, Nāmanque

cæte quëwëmo aedäni, ante mönō edæ änämaï ingæïmpa. Ìñæmpa wïi mönō cædō beyæ quëwëmōmpa. ¹⁰ Edæ Wængonguï nänō nē badongaimō ìnömō ìmōmpa. Ayæ, Codito nempo nē quëwënäni ìmaï cædinque waa cæcædänimpa, ante tömengä wëñëñedē mönō cæquënēnō ante eyepæ badongacäimpa. Ìninqe mönō ìmonte badōninqe tömengä, Codito Itota nempo quëwëninque mìnitō mīni waa cæquënēnō ante edæ cæte quëwencæmīnimpa, ante pōnō badongä bagamōimpa.

Codito beyænque gancæ pönēmōmpa, ante

¹¹ Mänōmaï beyæ mìnitō, Doyedē ìmaï ingatimpa, ante pönëedäni. Ood-eoidi ìñömō ònompoca æmontaique eō togæïnäni inte nāmanque ante edæ, “Nē eō togæïmōni ìmōnipa,” ante pemonte bai apænëdänipa. Wæætē mìnitō odeomīni ìnāmaï nē èñagāmīni ìñōmīnite, “Bagāamīni ìmīnipææ,” ante mänīñäni pīwënäni wægāmīnimpa. Ìninqe mìnitō mänīñedē æbänō ingāmīni ìñōmīni, ante yewæmōmo ate pönëedäni. ¹² Mänīñedē edæ mönō Codito nempo quëwënämaï ingāmīni inte mìnitō möni idægocabo nempo adobaï edæ quëwënämaï inte nänënë quëwengāmīnimpa. Ìninqe Wængonguï, ìmaï cōwē pōnō cæcæboimpa, ante nänō angainō ante mōnitō godongāmæ Ao ante èñente quëwëñōmōnite mìnitō wæætē gobæ nänënë quëwëninque Wængonguï nänō angainō ante edæ ænāmaï ingāmīnimpa. Watapæ bacæimpa, ante mōnitō pōnënë ante mìnitō ìñömō nänënë quëwente ædō cæte watapæ pōnente toquīmīni. Gobæ quëwëninque mìnitō Wængonguï nempo edæ quëwënämaï ingāmīnimpa. ¹³ Incæte mìnitō gobæ nē quëwënōmīni ìñōmīnite Itota Codito nāmä wepæ godonte æninqe mìnitō ìmīnite ænte māmōngä eyequeï pōni pōninqe mìnitō ñowo tömengä nempo quëwëmīnipa.

¹⁴ Wëñëñedē mōnitō tōnō mìnitō guëadō guëa cædōmō ingaimō inte mönō, Nänënë incæmīnimpa, ante wææ cæ ìmpa tæcæguedē wææ gōnonte bai cægāmōimpa. Codito ìñömō nē piyænē cædongä inte, Wææ cæ ìmpa, mönō änōmpa bæ tate wido cæte bai cædinque mönō ìmonte äänōmonque badongä bamōimpa. Ìninqe tömengä mīmōnē nē piyænē cæte entawëñōngä ingä beyænque mönō adobaï gänē pönēmōmpa. ¹⁵ Edæ Wængonguï, ìmaï cæedäni, ante wade wade ante nänō wææ angainō ante èñëninque dodäni godōmenque wææ angadänimpa. Mōnō Codito ìñömō inguipoga pōninqe mänīne ante tömānō ante èñente cæte quëwengacäimpa. Ayæ, Idæwaa wææ ante ìmpa, ante bai cædinque tömengä mänīne ante nāmä baonga mongænte wæninqe tee moncate bai cægacäimpa.

Mänōmaï cædinque tömengä, Mìnitō mencaboga inte nänënë quëwëmīni incæte ñowo piyænē cæte botō nempo godongāmæ quëwencæmīnimpa, ante cædinque mönō ìmonte ænte wempo cægacäimpa. Ìninqe mönō edæ piyænē cæte quëwënguinque edæ äänōmonque bagamōimpa. ¹⁶ Itota Codito ìngante awāa tīmpodäni wængä ìninqe tömengä mönō guëadō guëa pīinte cægaimāmo ante ænte mongænte wido cæte bai wængä beyænque mönō piyænē cæmō bagamōimpa. Ayæ ado tömengä awāa nänō wængainō beyænque mönō tömāmō adocabomō bamō adinqe Wængonguï wæætē piyænē cædinque mönō ìmonte Ao äninqe ængacäimpa. ¹⁷ Mìnitō guiqüënë gobæ nänënë quëwëñōmīnite mōnitō guiqüënë Wængonguï weca eyequeï quëwëñōmōnite Codito ìñömō inguipoga pōninqe mönō tömāmō ìmonte apænëdinqe, Piyænē cæte gänē pōnente quëwëedäni, ante pōnō apænecä èñentamōmpa. ¹⁸ Tömengä nänō pōnō cægainō beyænque möni odeocabo adobaï mìnitō

wamīni adobaī mōnō tōmāmō Wængonguī Ōnōwoca adowocaque ingante ēwocamō inte mōnō Wæmpocā weca tōmāmō do pōmōmpa.

¹⁹ Īnīnque mōnitō Wængonguī quīmōni do bagaīmōni inte Wængonguī nempo quēwēmōni ingaīmōni bai Codito nānō pōnō cægāinō beyænque mīnitō adobaī mōnitō tōnō adocabomīni do badīnque edæ Wængonguī nempo quēwēmīni ĩmīnīpa. Īnīnque mīnitō űōwo idæwaa wamīni ingamīnīpa. Wīī wabæca quēwente bai edæ tōmēmīni oncōnē ponte owote bai mīnitō űōwo Wængonguī nempo quēwēmīnīpa. ²⁰ Waodāni dica tāno gōnōnīnque tānocaa wænōmēnæca mænōnāni bai Wængonguī adobaī cædinque Itota Codito ingante tāno gōnongā ongōñongante tōmengāa godō mænonte bai cædinque mōnō ĩmonte ĩmaī cædinque pōnō gōnongā gongæmōmpa. Codito nānō nē da godongaīmōni tōnō tōmengā beyæ nē apænemōni tōnō ĩñōmōnite Wængonguī mōnitō ĩmōnite ænīnque wænōmēnæca gōnongā gongæñōmōnite wadāni ĩnānīte gā æænō tæī mænonte bai gōnongā gongæñānīpa. ²¹ Codito nempo quēwēñōmōnite Wængonguī mōnitō ĩmōnite adocooga gō cæte bai pōnō tæī mænongā ate mōnitō æicō bai bacō bai bamōnīpa. Edæ Wængonguī Tæiyæ Waēmō Ōnōwoca ingante āanque bai ēwocadinque mōnitō godongāmæ Awēnē tæiyæ waēmō oncō bai bamōnīpa. ²² Bayōmōnite mīnitō adobaī tōmengā nempo ongōñōmīnīte Wængonguī mīnitō ĩmīnīte ænīnque mōnitō tōnō godongāmæ māmō adocooga gō cæte tæī mænonte bai cædinque, Mīnitō botō Ōnōwoca tōnō āawocaque bai ēwocadinque botō owoquincō bai bamīnīpa, ante pōnō badongacāīmpa.

3

Oodeoidi ĩnāmaī ĩnāni ĩnānīte apæneccæ gotabopa, ante

¹ Mānīnō beyæ ĩmaī ante apænebopa. Botō Pabodobo ĩñōmō Codito beyæ ante oodeomīni ĩnāmaī ĩmīni ĩmīnīte apæneccæte ante cæyōmote botō ĩmote edæ tee mōnedāni wædōmo inte yewæmōmōpa.

² Mīnitō oodeomīni ĩnāmaī ĩmīni ĩñōmō ĩmaī ante wabānō ēñēmīnitawo. Wængonguī pōnō angā ēñēnīnque botō mīnitō beyæ tōmengā nānō waadete cædōnō ante nē apænequēnēmo batabopa. ³ Mānīnō ante botō, Wængonguī awēmō nānō cægāinō ante botō ĩmote edonque odōmongā atabopa, ante do wædænque yewæmōmo amīnitawo. Edæ adodō ante űōwo yewæmōmōpa.

⁴ Īnīnque mānōmaīnō ante botō do yewæmōnīnta adīnque mīnitō, Mōnō Codito awēmō nānō cægāinō ante Pabodo do ate bai ēñengampa, ante ēñēmaīmīnīpa. ⁵ Mōnitō wæmæīdi nāni quēwēñedē nē quēwengānāni ĩñōmō, Mōnō Codito ĩncayæ ate pōnīnque æbānō awēmō cæquingāā, ante ēñēnāmaī inte wægadānīpa. űōwo guīquēnē Codito beyæ nē apænedāni tōnō mōnitō tōmengā nānō nē da godōnīmōni tæiyæ waēmō bamōni ĩñōmōnite Wængonguī Ōnōwoca mānīnō ante edonque odōmonte apæneccæ ēñēmōnīpa.

⁶ ĩmaī ante ĩmpa. Mōnitō Wængonguī nānō pōnonguincoo nē ænguīmōni ĩñōmōnite mīnitō oodeoidi ĩnāmaī ĩmīni inte mōnitō tōnō adocabomīni badīnque edæ mōnitō tōnō godongāmæ nē ænguīmīni adobaī bamīnīpa. Ayæ, Itota Codito tōnō pōnō cædinque Wængonguī nānō, Cōwē cæcæboīmpa, ante angāinō do cægacāīmpa, ante watapæ pōnēnīnque mīnitō mōnitō tōnō edæ godongāmæ quēwencæmīnīpa.

⁷ Wængonguī nē tæī piñænongā inte waadete pōnō nanguī cæcā adīnque edæ tōmengā beyæ nē cæbo badīnque botō Codito ingantedō ante nē watapæ

apænebo batabopa. ⁸ Mönö tömämö Wængongui quimö iñömonte botö iñömo wamini bai wii imopa. Botö adoboque wädämo pöni imo incæte Wængongui waadete cædinque pönö angä eñemo inte botö minitö iminite nê apænebo batabopa. Codito nänö pönö cægainö ante æpodö i, ante mönö ædö cæte tee mante eñenguü. Incæte Wængongui waadete pönö cæcä beyænque botö iñömo Codito waa pöni nänö pönö cægainö ante edæ oodeo inämaï imini iminite nê apænequênemo batabopa. ⁹ Ayæ Wængongui tömancoo nê badongaingä inte wëenëñedê namanque entawëninque awëmö nänö wê wodongäinö ante botö imote odömonte apænecantapa. Ayæ, Pabodo mäninö ante edonque odömonte apænequênengä ingampa, ante tömänäni eñencædänimpa, ante pönö apænecä æntabopa.

¹⁰ Codito ingante mönö godongämæ pönencabo iñömonte tömengä wadö wadö ante tömänö ante nê eñengaingä inte mönö tönö godongämæ cæcampa. Mönö tönö mänömaï cædinque tömengä, Botö wadö wadö ante tömänö ante botö eñengainö ante adinque öönæde quëwënäni awënëidi tönö mäninö nê änäni tönö wæcædänimpa, ante cægacäimpa. ¹¹ Wëenëñedê pedæmämo iñonte Wængongui, Cæbo ate awënëidi incæ wæcædänimpa, ante cöwê pönengacäimpa. Nöwo iñömö tömengä mäninö ante nänö pönengainö ante tömengä mönö Awënê Itota Codito tönö godongämæ cædinque do cægacäimpa. ¹² Codito nempo nê quëwëmö inte mönö tömengä ingante wede mönö pönënö beyænque guñënämaï inte Wængongui weca do pöninque apænemompa. ¹³ Mänömaï impa, ante edæ minitö do eñëminipa. Inique botö minitö beyæ ante cædinque botö caate wädö ante pönëninque minitö wæætê wädämaï iedäni. Wæætê, Mönitö godömenque ñäo bai ëmoncæmönimpa, ante Pabodo caate wæcampa, ante pönëninque minitö wädämaï incæminimpa ämopa.

Codito nänö pönënö ante

¹⁴ Mäninö beyæ mönö Awënê Itota Codito Wæmpocä iñongante botö tömengä önöwaca inö da guicapodique apænebopa. ¹⁵ Tömengä iñömo edæ adocanque näwä Wæmpocä ingampa. Inique inguipoga quëwëmö incæ öönæde quëwënäni incæ tömengä ingante, Mæmpo, ante nê tedemö iñömo mönö tömengä tönö mönö wæmpocabo bai imompa.

¹⁶ Inique mönö Wæmpocä ingante apænedinque botö minitö beyæ ante iïmaï ante apænebopa. Wængongui bitö nê ñäo bai entawëmi inömi inte bitö Tæiyæ Waëmö Önöwaca ingante epeteoidi inänite da pönömi æninque tömënäni wæætê edæ mimö tæi piñænte entawencædänimpa, ante apænebopa. ¹⁷ Ayæ, Mönö Codito adobaï minitö weca pöñongante minitö mimönê wede pönëninque tömengä ingante ædæmö entawencæminimpa, ante mönö Wæmpocä ingante apænebopa. Ayæ, Awæ ædæmö guiwa inte tömëmæ äwäate pæwæ bai cædinque minitö iñömo adobaï tömengä nänö waadete pönëmämo entawëninque edæ mimönê tæi ongömini bacæminimpa. ¹⁸ Ayæ mönitö Wængongui quimöni tönö minitö adocabomini inte tæi piñæmini badinque, Itota Codito nänö waadete pönënö ante ægancadö owoo, ante eñencædänimpa, ämopa. Ayæ, Tömengä nänö waadete pönënö iñömo edæ yepanca pöni owopa, oopänö pöni owopa, æibæ pöni owopa, wincamö pöni owopa, ante eñencædänimpa, ante apænebopa. ¹⁹ Ayæ edæ, Mönö Codito waadete nänö pönënö æbänö gomonga pöni owoo, ante mönö ædö cæte eñenguü, ante mönö wädö incæte minitö mäninö ante eñencæminimpa. Ayæ edæ, Mäninö ante eñëmini inte minitö Wængongui nänö nanguï entawënö

edæ eyepæ pōni entawencæminimpa, ante botō mōnō Wæmpocā ingante apænebopa.

²⁰ Mōnō ānō ante ayæ mōnō pōnēnō ante eyepæ cædongā inte Wængonguī iñōmō mōnō imonte tæi piñante nānō cæpāmo ganca cædinque nanguī gomonga cæcā ingampa. Īniquē ñōwo iñōmō mōnō Wængonguī ingante waa ate pōnente apænecæimpa. ²¹ Edæ do wænte æigaināni tōnō ayæ ate ēñate quēwenguināni tōnō mōnō tōmāmō Codito ingante godongāmæ mōnō pōnencabo iñōmō inte Itota Codito ingante ēwocadinque mōnō godongāmæ apænecæimpa. Mæmpo Wængonguī ēñemi. Bitō adobique ñāō ēmongaimi iñōmi ĩmipa, ante mōnō ñimpo cædāmaī inte cōwē waa ate apænecæimpa. Mānōmaī impa, ante botō, Amēē, āmopa.

4

Codito nempo quēwēniquē adocabomō ĩmompā

¹ Waa cæte quēwencæminimpa, ante Wængonguī aa pecantapa, ante ēñēmīni inte mīnitō tōmengā nānō ānonque ante ēñente cædinque quēwencæminimpa. Botō mōnō Awēnē beyæ tee mōnete wæcōmo incæ āmo ēñēdāni. ² Mīnitō nāmā ængō cædāmaī inte, Ōnōmoque baī ĩmopa, ante pōnēniquē wadāni ĩnānite edæ ædæmō cæedāni. Æiquedō waa cæquīnāni, ante wædāmaī inte edæ piyænē cæte quēwēdāni. Ayæ wadāni mīnitō ĩmīnite wēnæ wēnæ cædāni wædinque tōmēnāni ĩnānite wæætē piñāmaī inte ædæmō waadete cæedāni. ³ Mīnitō, Mōnō pōnencabo piyænē cædinque cōwē adodō ante pōnente edæ Wængonguī Ōnōwoca tōnō āanque baī ee ēwocacæimpa, ante nanguī cædinque wacā ingā wacā ingā edæ waa cæedāni.

⁴ Mōnō Awēnē pōnō cæcā ate watapæ bacæimpa, ante mīnitō adodēque ante pōnente tocæminimpa, ante Wængonguī mīnitō ĩmīnite edæ adodēque ante aa pegacæimpa. Īniquē māñine, Watapæ bacæimpa, ante mīni pōnēne adodeque ĩ baī Wængonguī Ōnōwoca edæ adobaī adowocaque inte quēwengampa. Tōmengā adowocaque nempo quēwēnōmō inte mōnō adobaī edæ adocabomonque iñōmō ĩmompā. ⁵ Mōnō Awēnē edæ adocanque pōni ĩnongā iñongante tōmengā ingante mōnō wede pōnēnō adobaī adodeque pōni ĩnepa. Ayæ adodō ante pōnēniquē æpænē guīdinque mōnō adopænenque guīte baī guītamompā. ⁶ Wængonguī adocanque pōni ĩnongā inte tōmengā tōmāmō Wæmpocā adocanque ingampa. Tōmengā iñōmō edæ Tæiyæ Awēnē pōni ĩnongā inte tōmāmō imonte nē aacā ingampa. Tōmengā adocanque pōni nempo quēwēnōmonte tōmengā wæætē mōnō tōmāmō mīmōnē quēwengampa.

⁷ Incæte mōnō Codito, Mīmōnē bitō entawenganca ænte cæe, ante tee mante baī cædinque adocanque ingante waadete pōnō cædinque wacā ingante waadete pōnō cædinque edæ tōmāmō imonte tōmengā nānō pōnō cæcoo eyepæ pōnongā æninque entawēmompā. ⁸ Codito mānōmaī cæcæcæimpa, ante pōnēniquē awēnē Dabii wodi ĩmaī ante yewæmongacæimpa.

“Tōmengā æibæ æicæ cædinque wadāni ĩnānite bæi ongonte ñā cæyænte tōmengā miñæ ænte mæicā æigadānimpa.

Ayæ æidinque tōmengā mōnō waocabo iñōmonte, Mīnitō entawenguīnō, ante eyepæ pædæ pōnongā ænte entawengāmōimpa,”
ante Dabii nānō yewæmonte angainō baī impa.

⁹ Māñine, “Æigacæimpa,” ante nāni angaine iñōmō quīnante yewæmongatīi. Edæ, Tōmengā inguipoga tadōmengadæ do wææningā inte æigacæimpa, ante odōmoncæte ante yewæmongatimpa. ¹⁰ Nē wæængaingā ĩnongā iñōmō

adocā do oönæde gömonga æidinque inguipoga tömäo oönæde tömäo tömäo iñömö edæ godömenque æibæ pōni quēwengä inongä ingampa. ¹¹ Tömengä tömancoo nē enempocā inongä inte adocā mönö waomö imonte pönö angä ænte entawēninque mönö iimaī cæmö bamöimpa. Pancamöniya imönite tömengä angä eñēninque tömengä nänö nē da godongaimöni batamönipa. Pancamöniya guiquēnē Wængongui waa pōni nänö pönö cægainö ante nē apænemöni batamönipa. Pancamöniya guiquēnē Wængongui beyæ nē apænemöni batamönipa. Pancadäniya guiquēnē nē aadäni badänitapa. Ayæ pancadäniya guiquēnē nē odömonte apænedäni badänitapa. ¹² Mänömaī pönö cædinque mönö Codito mönö ocamö bai inongä inte, Botö baö bai adoyonque bai inäni iñömö ñancæ äate bai tæi piñænäni ewocacædänimpa, ante pönö cægacäimpa. Mönö imonte tömengä, Minitö Wængongui quimöni inömini inte tömänäni inänite nē cæmīni inte godö cæcæmīnimpa, ante pönö cægacäimpa.

¹³ Mini wede pönönö ante mīnitö tömämīni adoyömö ante pönencæmīnimpa, ante mönö Codito pönö cægacäimpa. Ayæ, Botö Wængongui Wëmo iñömote mīnitö botö imote ate bai pönencæmīnimpa, ante tömengä pönö cæcampa. Ayæ æmæwo pæmīni bai mīni baquinque mīnitö botö entawönö ædæmö entawencæmīnimpa, ante Codito edæ da pönongä eyepæ æmompä. ¹⁴ Inique æmæwo pædimö inte wēñæmö inämaī imö inique mönö edæ oda cædämaī ingæimpa. Wadäni guiquēnē mä pönēninque, Æbänö cæmö ate oda cæquinänii, ante edæ nämæneque tedewänäni. Tömēnäni iñömö edæ babæ cæcæte ante cædinque waa cæte bai cædäni ataqeedäni. Woboyæ ædæ go ædæ go pæmænte bai cædinque tömēnäni wadö ante odömonte tedewänäni. Mänömaī wido piñænte bai cædäni incæte mönö iñömö Codito nänö entawēnoncoo ænte entawēninque ää mænämaī ingæimpa.

¹⁵ Wæætē Wængongui, Näwangä pōni impä, ante nänö apænægäinö ante mönö tömänäni inänite waadete pönēninque apænecæimpa. Mänömaī cædinque mönö Codito baö bai iñömote tömengä nē Ocamö bai inte pönö angä beyænque mönö ñancæ äadinque godömenque picæmö bamompä.

¹⁶ Mönö baonga wepæ eyepæ eñädinque ñancæ äadinque tæi piñænte pæte quēwëmompä. Adobai mönö Codito baö tönö adoyonque bai inömö inte mönö tömengä nänö apænedö ante eñēnomo inte ñancæ äate pæte bai quēwëmompä. Ayæ wæætē ocäi encamö inte mönö pæ pagænguinque wangö tēnämaī oguincai bamē impä. Ayæ adobai mönö Codito nänö pæ waadete pönönö ante mīmönē entawëmö inte mönö wacä ingä wacä ingä godö aamö inte mönö pönencabo incæ edæ tæi piñænte entawëmompä.

Codito nempo mönö iimaī quēwëmompä, ante

¹⁷ Inique mönö Awēnē nempo quēwënömo inte botö nö ämo eñēedäni. Wadäni nē eñēnämaī inäni önonquedö ante pönēninque quēwänäni. Minitö guiquēnē adobai quēwengaimīni inte ñöwo wæætē ñimpo cædinque mänömaī cædämaī inguēnē quēwëmīni. ¹⁸ Tömēnäni guiquēnē mīmö eñänäniya diyæ Wængongui weca ponguinänii. Mīmö ömædēnäni inte tömēnäni ocäi eñēnämaī badäni beyænque Wængongui weca pönämaī inäni. Edæ wentamö mongæninque tömēnäni ocäi wëmö encadäni inte idiquibæ ante pönänäni.

¹⁹ Inäni iñömö tömēnäni nāni cæquēnönö ante ñimpo cædinque ñöwo wæætē guñēnämaī inte baö nāni towēinönö ante cæcæte ante nämä pædæ godonte bai edæ cædänipa. Edæ, Quiēmē wīwa cæqui, ante mäninonque cæcæte ante godömenque cæinente wædänipa.

²⁰ Wæætē mīnitö guiquēnē, Mönö Codito æbänö ingäa, ante pönēninque edæ wīi tömēnäni nāni cæinewönö bai mīni cæquinque edæ pönēmīnitapa.

²¹ Tömengä apænecä edæ wii eñeminitawo. Inæmpa, Wængongui nõ pöni nänö apænegainö eñenique Itota inömö mimöné entawengampa, ante minitö tömengä nempo quewenöminite tömengä mänömainö ante adodö ante edæ do odömonte apænecä eñeminitapa. ²² Minitö weeneñedé mini cæte quewengainö ante tömengä iimai ante odömonte apænegacäimpa. Babæ pömente mini cæinente wæwönö beyæ minitö mimöné wentamö mongænte wæwemini inte do mini entawengainö ante edæ wido cæedäni, ante odömonte apænegacäimpa. ²³ Edæ mempoga eñagaimini inte minitö eñenö do müi pöni encamini inte müinonque ante pönencæminimpa, ante odömonte apænecä eñeminitapa. ²⁴ Ayæ, Botö pönö badömo ate minitö botö bai tæiyæ waemö ewocadinque nõ pöni cæte quewencæminimpa, ante Wængongui pönö badongä ate minitö müimini bagaminimpa. Inique tömengä, Mäninö Wængongui nõ pöni nänö entawenö æninque minitö ædæmö entawencæminimpa, ante odömonte apænecä do eñeminitapa.

²⁵ Mänömai beyæ minitö tömämäni, Mönö adocabomö imompa, ante adinque babæ mini tedeweninö ante ñimpo cædinque wacä ingante wacä ingante näwangä ante apæneedäni.

²⁶ Ængui bamini incæte minitö piyænë cædinque wacä ingante wænæ wænæ cædämai ee aedäni. Edæ gawadecæ ganca nangui püinique edæ mini wæquinque imaimpa. ²⁷ Mänömai cædinque minitö, Wænæ incæ pönö cæcä ate botö ængui batabopa, ante pömente wædinque ñöwo wæætë, Wænæ botö weca pönämai incæcäimpa, ante nämä wææ cæedäni.

²⁸ Nè awemö æningä inömö ñöwo edæ ee cædinque awemö ænämai incæcäimpa. Wæætë, Botö önompoca nangui cædinque ænte quewenique nè ænguënenäni inänite adobai godömo æncædänimpa, ante cæcæcäimpa.

²⁹ Minitö nämä önöne wææ aadinque wiwa ante tededämai iedäni. Wæætë edæ, Wadäni æbänö ante eñenguënenäni inänii, ante pönëninque minitö, Tömënanäni tæi piñænte entawencædänimpa, ante cædinque nè eñenäni beyænque ante waadete godö cædinque apæneedäni. ³⁰ Wængongui Tæiyæ Waemö Önöwoca inömö munitonga pö guidinque, Botö æmo beyænque minitö iincayæ ate æmæwo abæ tawænte gote bai quewencæminimpa, ante odömoncæte ante yewæmonte bai cægacäimpa. Inique minitö, Wænæ wænæ möni cædö beyæ ante Wængongui Önöwoca wæwente badämai incæcäimpa, ante wææ cædinque edæ eñente cæedäni.

³¹ Ayæ, Wii waemö awædö, ante mini püiwëninö ante edæ ñimpo cæedäni. Äimö ante mini pönëwëmämö adobai ñimpo cædinque ængui pöni mini badimämö edæ ñimpo cæedäni. Yæ ante mini piinte ogæ tedewëmämö, wacä ingante ante mini piinte tedewëmämö edæ ñimpo cæedäni. Ayæ piinte cæquinque ante mini entawëninö ante tömänö edæ wido cæedäni. ³² Wæætë godongämæ waadete cædinque wacä caate wæcä adinque minitö godongämæ Ca ca wæcæminimpa. Ayæ Codito ængä beyænque Wængongui minitö iminute pönö ñimpo cæcampa cæminii. Tömengä ñimpo cæcä quewemini bai minitö adobai cædinque wadäni wænæ wænæ cæyönänite wacä ingä wacä ingä ñimpo cæmini quewënanii.

5

Wængongui wëmini, iimai cæte quewëedäni, ante

¹ Inique Wængongui wëmini inömö minitö tömengä nänö nè waademini inömöni inte Wæmpocä nänö cæi bai ante cöwä adinque adobai cæedäni.

² Baö, Wængongui qui, ante godöningue, Ogui wacæimpa, ante iya tänäni bai cædinqe Codito mönö imonte waadete pönëningue edæ adobaï cægacæimpa. Tömengä iñömö, Botö Wængongui quimo imopa, ante nämä wepæ pædæ godöningue mönö imonte wæætë ængacæimpa. İningue tömengä nänö waadete pönënö bai minitö adobaï waadete pönëningue quëwëedäni.

³ Wæætë edæ mini pönencabo iñöminite waocä adocanque incæ nänöögängä inämaï iñongante godö guëa mönämaï iedäni. Wentamö mongæ wæcæ wæ, ante edæ wiwa cædämaï iedäni. Nanguï mäincoo ante æinente wædämaï iedäni. Mäninö tömänö cædämaï imini inte mäninö ante edæ adopoque incæ tededämaï imæwedäni. Edæ Wængongui quimini tæiyæ waëmö entawëmini inte minitö mäninö tömänö cædämaï incæminimpa.

⁴ Wentamö ante näni pönëwënö bai minitö wæætë adobaïnö ante pönënämaï iedäni. Önonque ante näni tedewënö bai minitö wæætë adobaï tededämaï iedäni. Wënæ wënæ ante pönente näni badete towënö bai minitö wæætë adobaï badete todämaï iedäni. İñæmpa Wængongui quimini inömini inte minitö mäninö ante wii pönenguënëmini iminipa. Wæætë Wængongui ingante waa ate pönëningue apænequënëmini iminipa.

⁵ Awënë Odeye Wængongui nempo ayæ Awënë Odeye Codito nempo edæ ædänidö nê guite ængünäni inäni. Nänöögängä inämaï iñongante nê towënäni tönö wentamö pönente nê cædäni iñömö tömënäni edæ dicæ guite ængünäniyaa. Ayæ mäincoo ante wacä qui nê æinente wæwënäni iñömö edæ, Mäincoo incæ mönitö wængongui impa, ante bai cædäni inönäni inte tömënäni adobaï edæ guite ænämaï incædänimpa. Ante ämo ëñëedäni. ⁶ Wadäni, Minitö oda cæcæminimpa, ante önonquedö ante tedete cæyönänite minitö wæætë tömënäni näni tededö ante edæ ëñënämaï iedäni. Edæ tömënäni ëñënämaï inte näni wënæ wënæ cædö beyæ Wængongui ængui badinque tömënäni inänite pancæcæimpa. ⁷ İningue minitö gooque gomö adinque tömënäni tönö godongämæ cædämaï iedäni.

⁸ Minitö iñömö wëenëñedë wentamö mongæmini ingaimini inte ñowo wæætë edæ mönö Awënë nempo quëwëningue edæ ñäö bai entawëminipa. İningue Mæmpo nänö ñäö ëmönö bai entawëmini inte minitö ñäö iñömö cægonte bai edæ waa quëwëedäni. ⁹ Edæ waiwæ waincate bai cædinqe mönö wadäni inänite godö waa cæquinque mönö edæ ñäö iñömö quëwëmompä. Ayæ nö pönï mönö cæquinque näwangä pönï ante mönö apænequinque edæ ñäö iñömö quëwëmompä. ¹⁰ Ayæ, Æbänö cæmö ate mönö Awënë, Waa cæmini abopa, ante apænequingä, ante ëñencæte ante cædinqe do ëñënimi inte tömengä nänö waa adonque cæedäni. ¹¹ Wadäni wëmo iñömö önonque näni cædö ante adinque minitö iñömö edæ gooque gomö aedäni. Ayæ tica ënente bai cædinqe, Tömënäni näni cædö wënæ wënæ impa, ante edonque odömömini acædänimpa. ¹² Awëmö näni cædö beyæ guingo imonte wæquënänäni iñönäni mönö iñömö edæ guifënete wædinqe mäninö ante edæ tededämaï ingæimpa. ¹³ Wæætë edæ, Awëmö iñömö æbänö cædänii, ante tömänö ante edæ tica ënente edonque acæimpa. ¹⁴ Ñäö beyænque edæ edonque amoppa. Mänömaï i beyæ iïmaï ante ämotamini ante bai apænedänipa.

“Bitö wangæ möimi inte ñäni ömæmonte ængæ gantie.

Edæ ængæ gantiyömite

Codito incæ pönö tica ënente bai cæcä ate ñäö entawencæbiimpa,” ante apænedänipa.

15 Mänömaï beyæ minitö ocai ömæcamini inämaï inömini inte wæætë ocai në encamini inte cædinque, Æbänö waa cæte quëwenguimo, ante nämä waa ate waa cædäni. 16 Wadäni ñöwo incæ godömenque wiwa cædänipa cæminii. Eyepæ ññonte mïni cæquëñnonque ante edæ do cædäni. 17 Edæ wëñænäni owempote cædäni bai minitö adobaï cædämaï iedäni. Wæætë, Wængongui æbänö angantawo, ante ëñëningque mäninonque ante ëñente cædäni. 18 Waodäni biïnömæ nani ämæ bedinque dowænte badinque godömenque pönënamaï cædinque tömëñäni nani ëwente wæwenguinque bewëñänipa. Ñinque minitö ññömö bete dowænte badämaï iedäni. Wæætë Wængongui Öñöwoca ingante ædæmö ëwocate quëwëedäni. 19 Ämotamini ante bai godongämæ watapæ ante tedeedäni. Awënë Dabii wodi nanö ämotamini angaintaa adinque edæ adodö äedäni. Ayæ minitö nämä mä pönëningque, ñmaï Wængongui beyæ mönö ämotamini angæimpa, ante adodö äedäni. Wængongui Öñöwoca angä ëñente ëwocadinque tömengä ämotamini nanö änönö ante adodö äedäni. Mïmöno ämotamini ante bai pönëningque minitö mönö Awënë ingante watapæ pönente äedäni. 20 Æbämë bayonte minitö tömänö beyæ ante edæ Mæmpo Wængongui ingante cöwë waa ate pönëningque mönö Awënë Codito ëmöwo ante apæneedäni.

Mæmpoidi nani wencabo ñmaï quëwencædänimpa

21 Mönö Codito ingante guññente wædinque minitö wiï nämä mïni pönënonque bai cædinque wæætë edæ, Në äñäni æbänö äñänii, ante Ao ate nöñö ante cædäni.

22 Onquiyæmïni ëñëedäni. Minitö, Mönö Awënë nanö angainö bai mönö ëñente cæcæimpa, ante tömëmïni nanöögænäni inänite Ao ante ëñente cædäni. 23 Edæ Codito ingante mönö godongämæ pönencabo ññömonte mönö Codito adocä ññömö, Quëwencæminimpa, ante në Ængaingä ñinongä ingampa. Tömengä töñö mönö adoyonque bai ññömonte tömengä ññömö mönö Ocamö bai ñinongä ingampa. Ayæ onquiyængä töñö onguññængä adobaï adoyonque bai ññöñate onguññængä ññömö në ocamö bai ñinongä ingampa. 24 Ñinque Codito ingante mönö godongämæ pönencabo incæ tömengä ingante Ao ante ëñente cæmö bai onquiyænäni adobaï tömëñäni nanöögænäni inänite cöwë edæ Ao ante ëñente cæquëñëñäni inänipa.

25 Wæætë onguññämïni ëñëedäni. Minitö Codito nanö waadete pönëno bai tömëmïni nanöögænäni inänite adobaï waadete pönëedäni. Tömengä ingante mönö godongämæ pönencabo ññömonte tömengä ññömö mönö ñmonte waadete pönëningque mönö ñmonte æncæte ante pönö cædinque nämä wepæ godongacäimpa. 26 Ayæ, Wængongui nanö apænedö waëmömæ ñmæ bai ññonte minitö ññömö mäninö ante ëñëningque tæiyæ waëmö ëwocate quëwencæminimpa, ante mönö Codito adocä mönö ñmonte edæ ñä mëñongate bai cægacäimpa. 27 Mänömaï tæiyæ waëmö badinque mönö wentamö mongænämaï inte Codito ingante mönö pönencabo adocabomö ññömonte tömengä ññömö edæ nanöögængä ænte bai cædinque mönö pönencabo ñmonte, Bitö, ante apænegacäimpa. Ayæ mönö cabo ññömonte tömengä, Bitö idiquibæ entawëñämaï ññömite ædö cæte bitö ñmite piinte anguiï, ante pönö cægacäimpa. Ayæ wæætë edæ, Ñä mëñongate bai tæiyæ waëmö ëmömi ñinque mönö edæ guëa ñäö apäite bai ëmongæimpa, ante Codito nanöögængä ænte bai mönö ñmonte pönö ængacäimpa.

28 Onguññænäni ññömö adobaï tömëñäni, Botö baö, ante nani pönë bai tömëñäni nanöögænäni inänite adobaï waadete edæ pönenguëñäni inänipa.

Æcänö tömengä nänöogængä ingante waadete pönena iñömö tömengä nämä baö ante waadete pönente bai edæ cæcampa. ²⁹ Iñæmpa waocä nämä baö cöwë piñämaï ingampa. Wæætë, Botö baö, ante edæ pæ gompodinque pönö aacampa. Ayæ adobai Codito ingante mönö godongämæ pönencabo iñömonte edæ tömengä adobai, Botö baö, ante bai cædinque mönö imonte wææ gompodinque pönö aacampa. ³⁰ Edæ mönö Codito nê Ocamö bai inongä inte nê angä iñongante mönö wæætë tömengä tönö adoyonque bai inte ëñente quëwëmpa. ³¹ “Mänömaï beyæ onguiñængä mæmpo tönö badä inate ëmö cæte godinque onquiyængä ingante, Botö nänöogængä, ante æmæwo monte quëwencæcäimpa. Ménaa inina incæ tömëna wæætë nana gæncaya badinque adocanque bai bacædaimpa,” ante yewæmongatimpa.

³² Mänömaïnö ante nani yewæmongainö ante edæ wë wodonte bai i iñönte wii tömänö ante ëñëmmpa. Incæte, Codito ingante mönö godongämæ pönencabo iñömonte mönö tömengä tönö adocanque bai imöimpa, ante minitö ëñencæminimpa, ante botö apænetabopa. ³³ Incæte onguiñæmi nämä bitö waadete pönënonanca tömëmi nänöogængä ingante edæ adoganca waadete pönencæbiimpa. Onquiyæmi adobai, Botö nänöogængä ingampa, ante adinque edæ ëñente cæcæbiimpa.

6

¹ Wëñæmïni guiquënë ëñëedäni. Minitö mönö Awënë nempo quëwënömiñi inte tömëmiñi mæmpoidi inänite edæ ædæmö ëñente cæedäni. Æcänö edæ mänömaï cædaa tömengä edæ nö pönï cæcampa. ² “Wæmpocä ingante wäänä inante waa adinque tömëna inate godö waadete cæe,” ante Wængongui incæ wææ angacäimpa. Tömengä wade nänö wææ angainö äninque, Mini waa quëwenguinque cæcæminimpa, ante apænedämaï ingaingä inte ñöwo iine ante wææ äninque, Mini waa quëwenguinque cæcæminimpa, ante mä apænegacäimpa. ³ Edæ iine ante wææ äninque tömengä, “Mänömaï cæmïni ininque minitö watapæ quëwëninque iimæca wantæpiyæ quëwencæminimpa,” ante mä apænegacäimpa.

⁴ Wæmpomïni guiquënë ëñëedäni. Minitö wënäni wii äinäni bacædänimpa, ante wææ cædinque minitö tömënäni inänite piinte cædämaï iedäni. Wæætë, Mönö Awënë wææ aadinque mönö imonte päninque odömonte apænecampa, ante adinque minitö tömengä nänö cæi bai adobai cædinque wëñæñäni inänite ædæmö wææ aadinque mönö Awënë nänö apænedö ante odömonte apænemïni ate tömënäni waa pæcædänimpa.

⁵ Waodäni minitö iminute ö ænäni inte tömënäni beyænque cæte nê quëwëmiñi iñöminite apænebo ëñëedäni. Iimæca minitö awënëidi inänite minitö waa adinque guïñente wædinque tömënäni nani änö ante ëñente cæedäni. Minitö Codito angä ëñente mïmönê nö pönente cæmïnitawo. Ininque edæ iimæca awënë angä ëñente edæ adobai mïmönê nö pönente cæedäni. ⁶ Minitö edæ, Awënë botö imote waa acæcäimpa, ante tömengä ayongante ëñente cæmïnitawo. Iñæmpa awënë dæ goyongante adobai cöwë ëñente cæedäni. Codito botö imote nê godonte Ængaingä ingante nê cæte quëwëmö imompa, ante pönëninque minitö edæ Wængongui nänö äñönö ante mïmönöque pönente cæedäni.

⁷ Minitö mïmöno piyænê cædinque iimäi ante pönente cæedäni. Iimæca awënë ingante cædinque botö wii waocä beyænque ante cæbopa. Wæætë Wængongui Awënë beyænque ante botö iimæca awënë ingante cæbopa, ante pönëninque pæ piñænte bai cæedäni. ⁸ Minitö iimäi ante edæ do ëñëmïnipa.

Minitō wacā nānō ō ænimīni inte tōmengā beyænque nē cæte quēwēmīni incæ abæ tawænte ee gote bai nāmā beyænque cæte quēwēmīni incæ mīnitō īmīnite mōnō Awēnē īñōmō, Bitō ægancadō waa cæbii, ante adinque wæætē eyepæ pōni pædæ pōnongā ænguīmīni īmīnipa.

⁹ Waocā ingante nē ō æmīni guiquēnē ēñēedāni. Mīni nē ō ængaināni īnānite adobai waa cæedāni. Tōwēmīni Awēnē incæ tōmēnāni Awēnē adocā īnongā inte oōnædē owocampa cæmīnii. Tōmengā īñōmō wacā ingante wadō wacā ingante wadō ate pōnente cædāmaī īngampa. Mānōmāinō ante do ēñēmīni inte mīnitō beyænque cæte nē quēwēnāni īnānite edæ piīnte āninque edæ pæmēnāmaī īedāni.

Tæinta wēñate bai mōnō tæi piñænte ēwocacæimpa

¹⁰ Nōwo īmaī yewæmōninque botō idæwaa yewæmōmopa. Mīnitō mōnō Awēnē nempo nē quēwēnōmīni īñōmīnite tōmengā nānō tæi piñænō pædæ pōnongā æninque tæi piñænte entawente quēwēedāni. ¹¹ Mīnitō wææ caaquincoo, ante Wængonguī eyepæ pōni nānō da pōnōnincoo tōmancoo æninque wēñate bai cædinque tæi ongōedāni. Edæ mānincoo tōmancoo wēñate ongōñōmīni wēnæ awēnē, Oda cæcæmīninpa, ante nanguī ēñente cæcā incæte mīnitō wæætē oda cædāmaī inte edæ tæi ongoncæmīninpa.

¹² Edæ wīi waodāni īnānite mōnō guēadō guæa cæcæimpa. Wæætē wēnæidi awēnēidi tōnō wēnæidi īnānite nē ānāni īñōnānite mōnō tōmēnāni īnānite wæætē guēadō guæa cæcæimpa. Inguipoga wēmō īñōmō tæi piñænte ēnemopdāni tōnō oōnædē īñōmō wēnæcōo nē wīwa ēwocate cædāni tōnō mānimpodāni mānō ti gotodoncæ cæyōnānite mōnō wæætē guēadō guæa cæcæimpa. ¹³ Īninque tōmēnāni piīnte mānō nāni wīwa cæōnæ īinque bayonte mōnō wodii winōnāmaī inte tōmēnāni īnānite wæætē da godongæimpa. Ante ayæ, Tōmāā edæ eyepæ cæte ate mōnō edæ tæ go wæænāmaī inte adiyæ ongongæimpa, ante cædinque mīnitō Wængonguī nānō, Wææ caaquincoo, ante tæinta bai nānō da pōnōnincoo edæ do eyepæ æninque tōmancoo edæ da wēñæedāni.

¹⁴ Wēñadinque edæ wodii winōnāmaī inte edæ næ gongænte tæi ongōedāni. Edæ, Tæi wææ caaquincoo, ante pōnō tæi pacadeyænte bai cædinque mīnitō Wængonguī nānō nō pōnēnō entawēninque adobai nō entawente quēwēedāni. Tæcætawē īnō tæīneta mīni wææ wodontawēinta ante wēñate bai cædinque Wængonguī tæiyæ waēmō nānō cædō ante edæ entawente tæi cæte ongōedāni.

¹⁵ Mōnō Codito pōnō cæcā beyænque mōnō godongāmæ piyænē cæcæimpa, ante watapæ mōnō ēñēnō beyæ pogodo gote apænecæte ante cædinque mīnitō wæwæncata tæi wææ cæwainta wēwate bai cædinque gānē pōnente cæedāni.

¹⁶ Yabæque pōni wææ cæquinta tæinta bai næænte bai cædinque mīni wede pōnēnō ædæmō entawēninque quēwēedāni. Īninque nē wīwa cædongā ponte gonga encado bai to piyæncate bai cædinque, Mīnitō oda cæcæmīninpa, ante cæcā ate mīnitō mīni wede pōnēnō beyænque tōmengā wīwa nānō ānō ante edæ ēñēnāmaī incæmīninpa. ¹⁷ Ayæ, Ocamō incainta tæinta bai impa, ante wææ wencate bai cædinque mīnitō Codito pōnō ængā beyænque mīni quēwēnguīnō ante ænte entawencæmīninpa. Mīnitō yaēmē wææ næænte bai cædinque Wængonguī Ōnōwoca apænecā ēñēninque nāni yewæmongainta ate ædæmō ēñēninque edæ cōwē entawēedāni.

¹⁸ Ayæ Wængonguī Ōnōwoca ingante ēwocadinque mīnitō tōmengā ingante, Wængonguī bitō cōwē cæcæbiimpa, ante godōmenque nanguī apænedinque ñine cædāmaī īedāni. Mānōmaī cæcæte ante mīnitō mīmīni ongōninque wæntæte badāmaī inte Wængonguī quīnāni tōmānāni beyæ ante cōwē

apæneedäni. ¹⁹ Ayæ botö beyæ ante adobaï apænemîni ëñëninque Wængongui pönö cæcä ate botö edonque tedecæboimpa, ämopa. Edæ Codito ingantedö ante wëenëñedë mönö ëñënämaï ingaine ante botö ñöwo watapæ ëñëninque guiñënedämaï inte apænebo ëñencädänimpa, ämopa. Mänömaïnö ante mînitö Wængongui ingante apæneedäni, ämopa. ²⁰ Mänine ante botö wadäni weca në gote apænebo beyænque ñöwo gæguincamë encaipobo inte wæbopa. Ìninque, Mänine ante në apænequëngä inte Pabodo cöwë guiñënedämaï inte apænecæcäimpa, ante mînitö botö beyæ ante apæneedäni.

Waa quëwencæminimpa, ante

²¹ Botö Pabodo ïñömö æbänö quëwëmoö, ante, Quinö baï cæboo, ante ëñencæte ante wæmînitawo. Edæ Tiquico mönö tönïñacä mönö në waadecä ïnongä inte tömengä ñöwo pöninque mînitö ïmînite mäninö tömänö ante apænecä ëñencæminimpa. Tömengä ïñömö mönö Awënë nempo quëwëninque tömengä beyæ në cædongä inte cöwë në pönengä inte ædæmö cæcä acæimpa.

²² Ìninque, Pabodoidi æbänö quëwënanii, ante tömengä pönö apænecä ëñëninque mînitö wampo pönëninque tæï piñante entawencæminimpa. Ante cædinque botö, Ædæmö apænebi ëñencädänimpa, ante tömengä ingante mînitö weca da godömo pongä aedäni.

²³ Mæmpo Wængongui tönö mönö Awënë Itota Codito mînitö ïmînite waadete pönö cæda ate mînitö mîni caipæ incæ gänë entawëninque wede pönëninque godongämæ edæ waadete pönencæminimpa, ämopa. ²⁴ Æcänö mönö Awënë Itota Codito ingante cöwë waadete pönente ñimpo cædämaï ïna ïñömö tömengä ingante Wængongui pönö waadete cæcæcäimpa, ante botö Wængongui ingante apænebopa. Mäninque ante yewæmömopa.

Pidipenteidi

inānite Pabodo nānō cadota ante yewæmongainta

Waa quēwēdāni, ante

¹ Itota Codito ingante nē cæmōna inte botō tōnō Timoteo guēa apænemōna ininque botō Pabodobo adoboque yewæmōmopa. Minitō Pidipoto iñōmō quēwēninque Wængonguī quimīni inōmīni inte Itota Codito nempo nē quēwēmīni iñōmīnite botō, Acæmīnimpa, ante yewæmōmopa. Mīni pōnencabo beyænque ante pancamīniya nē aamīni iñōmīnite pancamīniya guiquēnē nē cæmīni iñōmīnite pancamīniya guiquēnē ōnōmīnique iñōmīnite botō edæ, Tōmāmīni edæ acæmīnimpa, ante yewæmōmopa. ² Mōnō Mæmpo Wængonguī mōnō Awēnē Itota Codito tōnō waadete pōnō cæda ate gānē pōnēninque waa quēwēdāni, āmopa.

Nē pōnēmīni beyæ Wængonguī ingante apænebopa, ante

³ Æyedēmē mīnitō imīnite ante pōnēmo inte botō Wængonguī ingante waa ate pōnēninque apænebopa. ⁴ Ininque mīnitō beyæ ante Wængonguī ingante wantæ iñō wantæ iñō apænedinque botō, Waa quēwēmīnipa, ante watapæ todirque apænebopa. ⁵ Edæ, Botō tāno goyedē mīnitō godongāmæ cæmīnitapa. Ayæ, Mōnō Codito ingantedō ante mīnitō ñōwo ganca godōmenque watapæ apænemīnipa, ante pōnēninque botō, Wængonguī bitō pōnō cæbi ate pidipenteidi waa cædānipa, ante apænebopa. ⁶ Mīnitō botō ayōmo tæiyæ waēmō entawencæmīnimpa, ante nē mā badongaingā inongā inte Wængonguī ñōwo Itota Codito nānō ponguinganca godōmenque pōnō badōninque cōwē iinque badongā ate mīnitō ædæmō pæimīni bacæmīnimpa. Mānōmaī impa, ante botō, Nāwangā impa, ante do ēñēmopa.

⁷ Mōnō Codito ingantedō ante watapæ mōni ēñēnīnō ante botō wææ āninque, Nāwangā impa, ante apænebopa. Mānīne botō apænede beyænque pancayedēña botō imote tee mōnedāni wæbopa. Incæte tee mōnedāni wæbo incæ, Nāwangā impa, ante wææ āmo incæ Wængonguī nānō waadete pōnō cægāinō ante ænte entawēñōmo mīnitō adobaī mānīnō ante æninque botō tōnō godongāmæ entawēmīnipa. Ininque, Mōnō mānīnō ante āanque baī entawēmō imopa, ante mīnitō imīnite waadete pōnēninque botō, Mīnitō ædæmō pæimīni bacæmīnimpa, ante nōingā cæte pōnēmopa. ⁸ Itota Codito mōnō imonte nanguī waadete pōnengantawo. Edæ tōmengā waadete nānō pōnēnō ante entawēninque botō mīnitō imīnite waadete pōnēmopa, ante adinque Wængonguī incæ, Pabodo nāwangā mīnitō imīnite nanguī waadete pōnengampa, ante apænebaingampa.

⁹ Ininque mīnitō beyæ ante botō Wængonguī ingante iīmaī ante apænebopa. Mīni waadete pōnencabo iñōmīnite Wængonguī pōnō cæcā ate godōmenque waadete pōnencæmīnimpa. Ayæ waadete pōnēmīni inte mīnitō, Quīnō wēnæ wēnæ ī, Quīnō waa ī, ante edonque adinque nō apænte āmīni bacæmīnimpa.

¹⁰ Mōnō æbānō cæte waa quēwēnguī, ante edonque adinque mīnitō Ao ante waa quēwēninque Itota Codito nānō ponguinganca wentamō mongænāmaī inte tee tēwadāmaī imīni incæmīnimpa. ¹¹ Ayæ Itota Codito pōnō cæcā ate mīnitō nō cædinque waa quēwēmīni adinque wadāni Wængonguī ingante waa ate pōnēninque apænecædānimpa, ante botō Wængonguī ingante apænebopa. Ayæ mīnitō mānōmaī inte waa cæmīni adinque tōmānāni wæætē Wængonguī

ingante apænedinque, Wængongui eñëmi. Bitö ñäö bai emönömi inte waa põni cæbipa, ante apænecædänimpa, ante cædinque botö minitö beyæ ante Wængongui ingante apænebopa.

Pabodo, Codito beyænque quëwëmopa, angampa

¹² Ìñänäni apænebo eñëedäni. Mänömaï cædäni botö wædö incæ wii önonque cætimpa. Wæætë, Codito beyænque Pabodo caate wæcampa, ante adinque wadäni godömenque nanguï ñäni Codito ingantedö ante watapæ möni apænedö eñëninque wede pönëñäni badäni. ¹³ Edæ, Codito emöwo apæneçä beyænque Pabodo ingante tee mönedänipa, ante tededäni eñëninque odömäno tæiyæ awënë oncö wææ wänönäni incæ wadäni wayömo quëwënäni incæ tömännäni do eñëñäni. ¹⁴ Mönö Awënë nempo quëwënäni incæ, Pabodo tee mönete wæcampa, ante wædinque wodo tömännäni godömenque wede pönente badäni. Ìninque wede pönëninque tæï piñænte entawëninque tömëñäni guiñëñämaï inte Wængongui nänö apænedö ante godömenque apænedänipa.

¹⁵ Pancadäniya, Pabodo miñæ godömenque nanguï ñäni godänipa, ante põno piunte adinque Codito emöwo ante apænedäni incæte botö imote guëadö guëa piincæte ante apænedänipa. Mänömaï i incæte wadäni guiquënë, Pabodo tönö mönö godongämæ cæcäimpa, ante gänë pönëninque Codito emöwo ante apænedänipa. ¹⁶ Nè gänë pönente apænedäni guiquënë, Codito ingantedö ante watapæ mimi eñëñinö ante Pabodo wææ ancæcäimpa, ante botö imote godö gö cæcampa, ante do eñëñäni. Ìninque tömëñäni botö imote waadete pönëninque apænedänipa. ¹⁷ Nè wæætëdö wæætë tededäni guiquënë, Pabodo tee mönete wæyongante mönö apænete tomö wæcä tocæi, ante cædänipa. Tömëñäni nämä beyænque ante cædäni incæte waa cæte bai cædinque Codito emöwo ante apænedänipa. ¹⁸ Incæte pancadäniya nämä beyænque ante apænedäni incæ pancadäniya nö pönente apænedäni incæ mänñäni tömännäni Codito nänö cægäinö ante nawangä ante do edæ apænedänipa. Mänömaï impa, ante pönëninque botö watapæ tobopa.

Ayæ iïmaï ante pönëninque cöwë godömenque nanguï tocæboimpa. ¹⁹ Minitö Wængongui ingante botö beyæ nanguï apænemini eñëninque Itota Codito Öñowoca põnö cæcæcäimpa, ante eñente tobopa. Ìninque ñöwo botö caate wædö ante edæ iincayæ ate ñimpo cædäni ate edæ botö abæ tawænte gote quëwenguinque edæ impa, ante do eñëninque tobopa. ²⁰ Botö wëenëñedë botö cæbo bai ñöwo adobaï cæinëmo imopa. Ìntai eñate miïmö quëwëmo incæ baonque wænönäni wæmo incæ, Mönö Codito ingante waa acædänimpa, ante cædinque botö cöwë guiñëñämaï inte tæï ongöninque nanguï cædinque watapæ edæ bacæboimpa, ante pönëmo. ²¹ Edæ inguipoga quëwëmo incæ botö Codito ingante entawëninque tömengä beyænque ante quëwëmopa. Wæætë wæmo incæ tömengä beyæ botö godömenque nanguï entawenguïmo imopa.

²² Incæte, Waiwæ nanguï incate bai botö cæquinque inguipoga ayæ quëwenguëñëmo imopa, ante pönëninque botö, Æbänö anguïmo, ante eñencæte ante wæbopa. Edæ, Wæncæboimpa, ante angüñëmo imoo. Wæætë, Ayæ quëwencæboimpa, ante angüñëmo imoo. Edæ, Æbänö angüñëmo imoo, ante botö edæ eñëñämaï imopa. ²³ Edæ wada bæi ongonte æmatæ töö æmatæ töö godöna wæcä bai wædömo inte botö, Ædönö gämænö goquïmo, ante wæbopa. Codito weca godömenque wæmö põni quëwencæboimpa, ante botö wadæ goinëmo imopa. ²⁴ Incæte inguipoga quëwëninque minitö beyænque ante cæquëñëmo inte botö ædö cæte wayömo goquïmo. ²⁵ Ante pönente wædinque botö, Minitö mönö pönëno ante godömenque wede pönëninque watapæ tote quëwencæminimpa, ante cæquïmo imopa, ante eñëmo. Ayæ, Nöwo wænämaï

inte botō mīnitō weca quēwenguīmo īmopa, ante do ēñēmopa. ²⁶ Īnīnque botō mīmo inte mīnitō weca pōmo adīnque mīnitō Itota Codito ingante waa adīnque botō beyænque nanguī tocæmīnīmpa.

²⁷ Codito ingantedō ante watapæ mōnō ēñēnīnō beyæ ante mōnō waa cæquēnēmō īmopa, ante ēñēmīni inte mīnitō edæ waa cæte quēwēedāni. Mānōmaī cæmīni Īnīnque botō ōnōmoncaque ēñēmo incæ mīnitō weca ponte abo incæ, Pidipenteidi adoyōmō pōnēnīnque tæī ongōnānīpa, ante tededāni ēñēnīnque tobaīmopa. Ayæ, Codito ingantedō ante watapæ mōnō ēñēnīnō ante wadāni ēñēcædānīmpa, ante pidipenteidi īñacabo cædīnque nanguī cædānīpa, ante botō edæ ēñente tobaīmopa. ²⁸ Ayæ pīinte cædāni incæte mīnitō wæætē guīñēnāmaī inte tæī ongōmīnīpa, ante adīnque botō tobaīmopa. Mīnitō mānōmaī guīñēnāmaī inte tæī ongōmīni ate wædīnque nē pīinte ānāni wæætē, Mōnitō wængūnque īmpa, ante adīnque tōmēnāni godōmenque wæcædānīmpa. Nē pōnēmīni mīni quēwenguīnque īmpa, ante adīnque tōmēnāni godōmenque wæcædānīmpa. Edæ Wængonguī ængā beyænque quēwencæmīnīmpa.

²⁹ Wængonguī waadete pōnō cæcā ate mīnitō Codito ingante wede pōnēmīnitawo. Edæ adocā pōnō cæcā ate mīnitō Codito beyænque cædīnque cōwē caate wæquīmīni īmīnīpa. ³⁰ Pabodobo doyedē Codito beyæ ante wææ ancæte ante caate wætabopa, ante amīnitawo. Nōwo godōmenque wææ cædīnque caate wæbopa, ante ōnōmoncaque ēñēmīnitawo. Īnīnque botō wææ ānīnque caate wæbo baī mīnitō adobaī botō tōnō godongāmæ wææ ānīnque caate wæmīni īmīnīpa.

2

Codito ōnonganque bayongante Wængonguī da æcænongā

¹ Mōnō Codito nempo quēwēnīnque mīnitō wampo pōnēmīnitawo. Tōmēngā waadete pōnēngā beyænque ganca pōnēmīnitawo. Mōnō Codito Ōnōwoca tōnō āawocaque baī ēwocadīnque godongāmæ watapæ quēwēmīnitawo. Nē wæcā ingante godō waadete pōnēmīnitawo. Adocanque wæwēngā adīnque mīnitō āanque baī wæwēnīnque tōmēngā beyæ cæmīnitawo. ² Mānōmaī ī Īnīnque adodonque pōnēnīnque mīnitō waa waademīni adīnque botō watapæ pōnī tobaīmopa. Tōmāmīni āanque baī ēwocadīnque, Mōnō adoyōmō cæcæīmpa, ante godongāmæ cæmīni adīnque botō godōmenque nanguī watapæ tobaīmopa.

³ Īnīnque mīnitō nāmanque ante pōnēnīnque, Botō īmote waa acædānīmpa, ante cædāmaī īedāni. Yæcado ongoncæboīmpa, ante cædāmaī īedāni. Wæætē, Botō ōnōmoque baī īñōmote wadāni wæætē waa pōnī īnānīpa, ante pōnēnīnque wadānīque īnānite ængō cæedāni. ⁴ Nāmā mīni cæīnēnō ante cædīnque mīnitō wīī mānīnonque ante cædīnque wæætē edæ wadāni nāni cæīnēnō adobaī ante cæedāni.

⁵ Mānōmaī cædīnque mīnitō Itota Codito nānō pōnēngāīnō baī adodō ante pōnēedāni.

⁶ Tōmēngā īñōmō cōwē nāwā Wængonguī īnongā īngampa. Incæte, Botō nāwā Wængonguīmo īngāīmo inte Mæmpo Wængonguī ganca botō īngāīnō ante nīmpo cædāmaī incæboīmpa, ante tōmēngā ānāmaī īngacāīmpa.

⁷ Wæætē edæ, Mānīnō botō īngāīnō incæ botō edæ nīmpo cæcæboīmpa, ānīnque wææ, ōnonganque baī bagacāīmpa. Ayæ, Wængonguī ingante nē cædōmo edæ bacæboīmpa, ante badīnque wææ, tōmēngā waomō mōnō ēmōnō baī nānō ēmongūnque waocā ēñagacāīmpa.

- ⁸ Mänömai ēñate pæte wææ tömengä önonganque inte bai cæyongä Wæmpocä, Bitö wænguino taadö gocæbiimpa, angä ēñēninqe edæ Ao ante goyongante wææ, tömengä nänö guiñēñäquinque awæ ñænquedimæ cæte mao timpodäni wææ tiwadäni ate tömengä caate wægöninque wææ bacaa edæ wængacäimpa.
- ⁹ Mänömai cæcä adinque Wængongui wæætē tömengä ingante æmonga pöni da æængacäimpa. Ayæ wadäni emöwo önöwoque emönäni bai tömengä Tæiyæ Awënë Inongä inte wii adobai önöwoque bai emoncæcäimpa, ante cædinque Wængongui edæ, Itota Codito ingampa, ante pönö pemongacäimpa.
- ¹⁰ Edæ öönædē quëwēnāni incæ inguipoga quëwēnāni incæ guimonga quëwēnāni incæ tömänāni edæ Itota emöwo ēñente waa adinque da guicapocädänimpa, ante Wængongui tömengä ingante pönö pemongacäimpa.
- ¹¹ Ayæ, Itota Codito ingante adinque tömänāni, Mönö Tæiyæ Awënë Inongä ingampa, ante edæ Ao ancädänimpa, ante Wæmpocä cægacäimpa. Mänömai cæcä adinque, Mæmpo Wængongui waa pöni cæcampa, ante mönö edæ watapæ apænecäimpa.

Nëmoncoo äo äo cædote bai nöinö cæte quëwëdäni

- ¹² Mänömai beyæ botö nē waademini iñöminite botö apænebo ēñeedäni. Minitö weca botö quëwëñedē minitö do ēñente cædimini inte ñöwo botö wayömö quëwëmo incæ godömenque ēñente cæmini abopa. Ininque cöwë mini ēñente cædinö bai adobai cædinque ñöwo mönö watapæ quëwënguino taadonque gocæte ante cædinque, Oda cæte wæcæ wæ, ante cöwä aquënë quëwëminii. ¹³ Wii cæinente awædö, ante wæminitawo. Edæ Wængonguinque apænecä ēñente entawëninque minitö tömengä waa pöni nänö äno ante nē ēñente cæinëmini bamnipa. Oda cæte awædö, ante wæminitawo. Adocä Wængonguinque mongæncadæ mongæncadæ cæcä ate tæi piñæmini bate ate weypæ cæminipa.
- ¹⁴ Ininque, Wii cæinente awædö, ante änämai inte minitö piyænë cæte mini cæquëñenö ante do cæedäni. ¹⁵ Edæ mänömai cæmini adinque wadäni, Wentamö mongænämai imnipa, ante abainäni. Ayæ inguipogaque quëwëñäni ēñänämai inte idiquibæ pönente cæyönäni minitö wæætē Wængongui wëñæmini inömini inte tömënäni weca quëwëninque nëmoncoo äo äo cædote bai nöingä cæte quëwëncæminimpa. ¹⁶ Edæ, Codito pönö cæcä beyænque mönö quëwëngæimpa, ante edonque apænemini ēñencädänimpa. Ininque, Doyedë botö apænedö ante minitö nē ēñente cæminipa, ante adinque botö nangui todinque iimäi ante pönëmopa. Minitö beyæ pæ pagænte cædömo incæte botö wii önönque cæboimpa. Wæætē mönö Codito nänö ponguiönæ iñonte botö, Minitö nö apæneminitapa, ante adinque botö tocæboimpa. ¹⁷ Ayæ, Wængongui qui, ante baö godöninque waodäni baonga tepæ gao caadänipa. Minitö iñömö wede pönëmini inte, Wængongui qui, ante nämä godö cæyömini botö quëwënguimämo incæ mini godönincooga gao caate bai ba edæ waa tobaïmopa. Minitö tönö godongämæ edæ tobaïmopa. ¹⁸ Minitö adobai, Pabodo mönö beyæ cæcampa, ante tocæminimpa. Edæ mönö edæ godongämæ tocæimpa.

Timoteo tönö Epapodito

¹⁹ Minitō æbānō quēwēmīnī, ante ēñēnīnque Tīmoteo wæætē apænecā ēñente tocæboimpa, ante cædinque botō, Itota Codito Ao angā ate Tīmoteo ingante oo da pōnōmo mīnitō weca poncæcāimpa, ante pōnēmopa. ²⁰ Minitō æbānō quēwēmīnī, ante wæyōmo tōmēngā adocanque mīnitō beyæ ante botō tōnō guēa wæcampa. Wadāni guiquēnē mīnitō beyæ ante wædāmaī inānīpa. ²¹ Tōmānāni edæ nāmā beyænque ante cæinente wædinque Itota Codito nānō ānōnō ante wīī cæinēnāni inānīpa. ²² Cōwā ayōmīni, Tīmoteo iñōmō cōwē waa cæcampa, ante do ēñēmīnitapa. Ayæ mōnō Codito ingantedō ante watapæ apænedīnque Tīmoteo tōnō mōna wencaya baī guēa cæmōnāpa, ante do ēñēmīnitapa. ²³ Inīnque, Botō imote awēnēidi æbānō apænte anguīnāni, ante ēñente ate botō Tīmoteo ingante mānīñedē ate mīnitō weca do da pōnōmo poncæcāimpa, ante pōnēmopa. ²⁴ Ayæ mōnō Tæiyæ Awēnē Ao angā ate tōmēmo do pōmaīmopa.

²⁵ Ayæ Epapododito mōnō tōnīñacā incæ botō tōnō guēa cæmōna imōnāpa. Wadāni piīnte cædāni adinque mōnatō guēa wææ cæmōnāpa. Tōmēngā ingante mīnitō, Pabodo beyæ ante godō cæcæbiimpa, ante do da pōnōmīni ponte cæcā æntabopa. Tōmēngā ingante ñōwo wæætē adodō mīnitō weca edæ da pōnōmo ponguēnēngā ingampa, ante pōnēmopa. ²⁶ Adocā Epapododito iñōmō mīnitō pidipenteidi imīnite acæte ante edæ nanguī wæcampa. Ayæ, Epapododito daicawo gawængampa, ante apænedāni ēñēnīnque pidipenteidi do wædānīpa, ante ēñente wædinque tōmēngā wæætē mīnitō beyæ ante nanguī wæwente bacampa. ²⁷ Nāwangā impa edæ. Tōmēngā daicawo gawænte wodo wængantapa. Incæte Wængonguī tōmēngā ingante waadete pōnō gampocā waa bacantapa. Mānōmaī cædinque Wængonguī botō beyæ adobaī ante pōnēnīnque, Pabodo wīī godōmenque wæcæcāimpa, ante pōnēngā inte edæ Epapododito ingante gampocā waa bacantapa.

²⁸ Mānōmaī beyæ, Epapododito wæætē pongā adinque tocæmīnīmpa, ante cædinque ayæ, Mīnitō tomīni adinque botō wæwēnāmaī bacæboimpa, ante cædinque botō tōmēngā ingante ñōwo da godoncæboimpa, āmopa. ²⁹ Pongā ate mīnitō, Mōnō Awēnē nempo quēwēnōmi inte pōe, ānīnque Epapododito ingante waa adinque godongāmæ watapæ tote cæedāni. Ayæ wadāni tōmēngā baī adobaī waa cædānīpa, ante adinque tōmēnāni inānite waa adinque waa cæedāni. ³⁰ Mīnitō, Pabodo beyæ ædō cæte cæquīmōnī, ante, Gobæ awædō, ante wæyōmīnite Epapododito iñōmō edæ, Wæmo incæ cōwē cæcæboimpa, ante mīnitō cæquēnēnō ante cæcantapa. Codito beyæ ante cæcæte ante edæ tōmēngā wodo wængantapa cæmīnī. Tōmēngā ingante edæ waa cæedāni, āmopa.

3

Tæi piñænte cæcæimpa, ante

¹ Ñōwo iñōmō botō tōnīñamīni ēñēedāni. Mōnō Awēnē nempo quēwēnīnque mīni watapæ toquinque imīnīpa. Mīnitō oda cædāmaī incæmīnīmpa, ante botō adodō adodō ante ancaā yewæmōmo incæte wædāmaī imopa.

² Iīmaī āmopa. Wadāni iñōmō, Mōnō ēō togænte quēwēngæimpa, ante nē ānewēnāni inte gūintaidi baī wēnæ wēnæ cædinque nāmā baō ēō ēō towēnānīpa. Ante adinque mīnitō tōmēnāni inānite gomō adinque wææ cæedāni. ³ Edæ tōmēnāni inānite ee adinque Wængonguī mōnō imote wæætē pōnō ēō togænte baī cædinque mōnō wentamō mongænō do wido cægacāimpa. Wængonguī Ōnōwoca ingante ænte ewocamō inōmō inte mōnonque edæ, Wængonguī ingampa, ante tōmēngā beyæ cæmōmpa. Itota Codito

nempo quēwēmō inte mōnonque wīi inguipoga beyænque quēwēmō ïmopa, ante mōnō tōmengā ingante waa ate apænemompa. ⁴ Tōmēnāni guiquēnē inguipogaque ante pōnēninque, Mōnitō cædō beyænque quēwencæmōnimpa, ante pōnēwēnānipa. Tōmēnāni nāni pōnēwēnō bai adobai pōnente bai botō, Tōmēnāni wædænque cæyōnāni botō godōmenque nanguī cædōmo ïmopa, ante pōnēwencædōmoimpa. Edæ, Nanguī botō cædō beyænque quēwencæboimpa, ante pōnēwencædōmoimpa.

⁵ Edæ tōmēnāni nē ēō togæināni ïnānitawo. Botō ïñōmō adobai ïmopa. Tæcæ ēñayōmote ònompo æmæmpoque go mēōnaa go adoōnæque mænimpōōnæ ïñonte botō ïmote do ēō togæināni wægaboimpa. Tōmēnāni idægoidi ïnānitawo. Botō ïñōmō idægo wodi pæimo ïnōmo inte tōmengā nānōmocā Beencaminō wodi pæimo ïnōmo ïmopa. Tōmēnāni ebēdeoidi ïnānitawo. Botō ïñōmō ebēdeobo ēñagaïmo inte nāwā ebēdeobo ïnōmo ïmopa. Tōmēnāni Paditeoidi ïnānitawogaa. Edæ botō Paditeobo ïnōmo inte Mōitee wodi nānō wææ angainō ante mōni Paditeocabo wædō ante tōmāā ēñente cædōmo ïmoī aedāni. ⁶ Ayæ tōmēnāni, Wængonguī beyæ nanguī cæcæimpa, ante apænedānitawo. Edæ, Wængonguī beyæ cæbote, ante edæ botō ïñōmō doyedē Codito ingante nāni pōnengaincabo ïnānite ancaa togænte pancæte ante cægaboī aedāni. Ayæ odeoidi guiquēnē, Mōnitō wææ angainō ante nē ēñente cædānique nē nō cædāni ïnānipa, ante ānānitawo. Botō ïñōmō edæ mæninonque ante cōwē cædōmo inte wentamō mongænāmaï ïnōmo ïmopa.

⁷ Doyedē ïñōmō botō mænōmaï godōmenque waa cædimo inte, Botō to-quinque waa pōni cægaboimpa, ante pōnēwentabopa. Nōwo guiquēnē botō waa cægainō ante, Ōnonquedō ante cægaboī, ante do ēñēmopa. ⁸ Ayæ wææ, Itota Codito botō Awēnē ingante adimo inte botō tōmengā ingante pōnēninque tōmengā tōnō godōmenque waa pōni quēwencæboimpa, ante botō, Wēēnēñedē botō entawengaincoo botō waa againcoo incæ edæ ēwenguincooque impa, ante pōnēmopa. Edæ Codito beyæ ante cæyōmo botō wēēnē mænincoo tōmancoo edæ dæ ba wætabopa. ïninque, Codito ingante godōmenque ēwocacæboimpa, ante nanguī cædinqe botō, Wēēnē botō entawengainō ompotacoo bai impa, ante wido cæbopa.

⁹ Edæ, ïmaï cædāni, ante nāni wææ angainō ante ēñente cæbo incæte Wængonguī ayongante botō ædō cæte mæninō beyænque nō entawēmo baquimoo. Wæætē Codito mōnō nē nō cædongā ingante wede pōnēmo inte tōmengā nempo quēwēñōmote Wængonguī pōnō badongā ate nō cæbo bacæboimpa, ante nanguī cæbopa. ¹⁰ Mōnō Codito ingante ate bai pōnencæboimpa, ante cæbopa. Ayæ tōmengā adocā nanguī tæi piñæninque ñāni òmæmongacāimpa, ante wede pōnēninque botō mæninō tōmengā nē ñāni òmæmongaingā nānō tæi piñænō bai adobai entawencæboimpa, ante cæbopa. Ayæ adobai, Tōmengā caate nānō wængai bai botō tōmengā beyæ wæncæboimpa, ante pōnēninque botō tōmengā tōnō godongāmæ caate wænte bai tōmengā nānō ēwocadō bai ēwocacæboimpa, ante cæbopa. ¹¹ Mænōmaï cædinqe botō, Tōmengā wænte ate ñāni òmæmonte nānō quēwengai bai botō adobai wænte ate ñāni òmæmoncæboimpa, ante nanguī cæbopa.

Mænōmaï bacæboimpa, ante nanguī cæbopa, ante

¹² Mænōmainō ante apænedinque botō, Codito nānō entawēnō bai do entawēmopa, ante dicæ apænebogaa. Picænāni bai do badinqe nō cædinqe oda cædāmaï ïmopa, ante dicæ apænebogaa. Incæte Itota Codito incæ edæ, Botō ēwocadō bai adobai ēwocacæbiimpa, ante botō ïmote do bæi ongongacāimpa. ïninque botō wæætē, Tōmengā waa pōni nānō ēwocadō bai

adobaī ēwocacæboimpa, ante bæi ongoncæte ante nanguī cæbopa. ¹³ Īñānāni ēñēdāni. Botō Codito nānō ēwocadō ante dicæ eyepæ æmogaa, ante wæbopa. Incæte, Eyepæ ænāmaī ĩmopa, ante adinque wæwēnāmaī ĩmopa. Wæætē, Īncayæ ate Codito nānō ēwocadō baī ædæmō ēwocacæboimpa, ante cædinque botō māñinonque ante pōñēninque pogodo gote baī cōwē cædinque. ¹⁴ Wængonguī do, Bitō Itota Codito nempo quēwēnōmi inte eyepæ cædinque æmonga ponte æe, ante botō ĩmote aa pegacæimpa. Īninque tōmengā, Pædæ pōnōmo æncæbiimpa, ante nānō angaincoo ante ænte ēwocacæte ante botō gānā cæcæte ante pogodo gote baī edæ nanguī cæbopa.

¹⁵ Mōnō æmæwo picæmō badōmō ĩñōmō tōmāmō adobaīnō ante pōnenguēnēmō ĩmopa. Pancamīniya guiquēnē māñōmaīnō ante wīī pōñēmīni adinque Wængonguī, Mīnitō æbānō nō pōnenguēnēmīni ĩmīni, ante pōnō odōmongā ate ēñencæmīnīmpa. ¹⁶ Mōnō do ēñente quēwenganca māninganca mōnō cōwē nō cæte quēwengæimpa.

¹⁷ Īñānāni ēñēdāni. Botō Pabodobo æbānō cæboo, ante adinque mīnitō botō cædō baī adobaī godongāmæ cædāni. Ayæ, Mōnitō cæmōni baī mīnitō adobaī cædāni, ante odōmōmōni baī pancadāniya adobaī cædāni adinque mīnitō ĩñōmō, Adobaī cæcæimpa, ante tōmēnāni ĩnānite cōwā aedāni. ¹⁸ Mīnitō ĩmīnite wantæ wantæ ĩñō wantæ wantæ ĩñō apæñedīmo inte botō ñōwo Ca ca wædinque adodō ante ĩmaī ante godōmenque apænebopa. Mōnō Codito awāa wængā incæte nanguī ĩnāni tōmengā ingante Baa āninque tōmengā nānō wængaiwæ ante piunte baī cædānīpa, ante awædō. ¹⁹ Tōmēnāni nāni ōmæe ēwente wæquinque māñōmaī cædānīpa. Cænguī beyænque ante pōñente quēwēnānīpa. Wēnæ wēnæ nāni cædō beyæ guingo imonte wæquēñāni incæ tōmēnāni wæætē guiñēñadāmaī inte edæ, Waa pōñi cæmōnīpa, ante nāmā incæ waa adānīpa. Edæ inguipoga beyænque ante cæñente wædānīpa.

²⁰ Mōnō ĩñōmō mempoga ēñagaimō inte mōnō ōñædē ōmæ do ēamō edæ ĩmopa. Īninque mōnō Awēñē Itota Codito, Quēwencæmīnīmpa, ante nē Ængaingā ingante nanguī aīnente wædinque mōnō, Tōmengā æyedēnō ōñædē edæ wææ ponguingāā, ante wānō cōmopa. ²¹ Tōmengā ĩñōmō tæī piñæñongā inte tōmāncoo edæ bæ tadinque ō æñinque Tæiyæ Awēñē incæcæimpa. Īninque, Mōnō quēwenguīnāmaī aquīñō ēñamopa, ante adinque tōmengā tæī piñæñongā inte, Botō baō baī tæīñō mongæncæmīnīmpa, ante badongā ēñaquīmō ĩmopa.

4

Mōnō Awēñē nempo quēwēninque watapæ tocæimpa

¹ Wængonguī botō ĩmote poganta pōnō wencate baī cædinque, Bitō waa apæñebi ēñente beyænque pidipenteidi ēñente waa cædāni abopa, angā ēñēninque botō mīnitō beyæ ante watapæ tobopa. Mīnitō ĩmīnite ædæmō waadedinque botō, Æyedēnō bee tenguīmoo, ante wæbopa. Īninque botō nē waademīni āmo ēñēdāni. Māñinō botō āñinō ēñente cædinque mīnitō mōnō Awēñē nempo quēwēninque tæī ongōedāni.

² Ñōwo Eodia, Tintique, mīna onquiyæncaya ĩmīnate āmo ēñēda. Mōnō Awēñē nempo quēwēninque mīnatō piyæñē cæte adodonque ante cæbæweda, āmopa. ³ Botō mōnō Awēñē ingantedō ante watapæ apæñecæte ante nanguī cæyōmote Codēmente tōnō wadāni botō tōnō ĩñacabo cædānitapa. Wængonguī, Nāni quēwenguinta, ante tōmengā nānō yewæmongaintaa tōmēnāni ēmōwo

dobæ yewæmunte mæ öñompa. Tömēnāni botō tönō cæyönāni iina onquiyæna Eodia tönō Tintique iñömō botō tönō adobaī iñacabo nanguī cæda inatapa. Inique bitō cōwē botō tönō guēa cædōmi iñōmite bitō imite āmopa. Iina inate bitō waadete apænebi ēñēninque piyænē cæte quēwencædaimpa.

⁴ Ayæ tōmāmīni imīnite, Mōnō Awēnē nempo quēwēninque watapæ tote quēwēdāni, āmopa. Edæ, Watapæ pōni tote quēwēdāni, ante adodō ante āmo ēñēdāni. ⁵ Mōnō Awēnē edæ oo pōni poncæcāimpa cæmīni. Ee ædæmō cæte quēwēñōmīni tōmānāni waadete mīni cædōnō ante edonque acædānimpā.

⁶ Ayæ, Quiēmē bacæ wæ, ante mīni wædō ante guiñente wædāmaī iedāni. Wængonguinque ingante apæneedāni. Apænedinque, Wængonguī, bitō pōnō cæbi ate eyepæ inte quēwencæmōnimpā, ante quiēmē mīni æncæ wædō incæ ante apæncæmīnimpā. Ayæ tōmengā pōnō cæcā adinque mīnitō, Bitō pōnō cæbi waa æmōnimpā, ante Wængonguī ingante wæætē waa ate pōnente apæneedāni. ⁷ Ayæ, Wængonguī piyænē cædinque pōnō aacā beyæ mīnitō Itota Codito nempo quēwēninque piyænē cædinque mīmōnē wædāmaī inte nō pōnēninque quēwencæmīnimpā. Edæ mōnō, Æbāmē cæte Wængonguī pōnō piyænē cæte aacā, ante mōnō waocabo ēñēnāmaī imō incæte tōmengā cōwē godōmenque aacā ate wædāmaī inte quēwēmompā.

Quiñō waa ī, ante mānīnonque ante pōnēē cōedāni, ante

⁸ Iñānāni ēñēdāni. Mīnitō æbānō ante pōnēē congruēnēmīni imīnimpā, ante yewæmōninque botō ñowo æmæwo pōni yewæmōmōi aedāni. Nāwangā nāni apænedō ante pōnēē cōedāni. Æbānō waa cæquī, æbānō nō cæquī, ante pōnēē cōedāni. Quiēnō nō ī, ante mānīnō ante pōnēē cōedāni. Mōnō æbānō waadete pōnenguī, ante pōnēninque mōnō waa adoncoo ante adobaī pōnēē cōedāni. Wadāni waa nāni cædinō ante pōnēē cōedāni. Mānōmaī cædāni ate wadāni waa adānitawo. Inique tōmēnāni nāni waa adīnō ante mīnitō mānīnō ante pōnēē cōedāni. Inique, Quiēmē waa pōni ī, ante adinque mānīnonque ante pōnēē cōedāni.

⁹ Botō odōmonte apænebo ēñēmīnitawo. Inique botō pōnō apænebo ēñēninque mīni ēñēnīnō baī tōmānō ante edæ cædāni. Botō pædæ pōnōmo æmīnitawo. Inique botō pædæ pōnōmo mīni ænīnō incæ ee mædāni. Botō entawēnō ante, Æbānō entawēmoo, ante edonque amīnitawo. Inique botō entawēnō mīni adīnō baī mīnitō adobaī entawēninque edæ waa cædāni. Mānōmaī cæmīni adinque Wængonguī nē gānē pōnēnongā inte mīnitō tönō godongāmæ quēwēninque pōnō cæcā ate mīnitō wæætē gānē pōnēmīni bacæmīnimpā.

Pidipenteidi mīni pōnōni waa æntabopa, Pabodo angampa

¹⁰ Botō wædō ante mīnitō doyedē pōnō cædimīni inte ñowo wæætē tæcæ pōnente wædinque wæætē pōnō cæmīni æninque botō, Mōnō Awēnē beyænque pōnō cæmīnimpā, ante adinque nanguī waa tobopa. Edæ botō wædō ante cōwē waadete pōnēmīni incæte mīnitō da pōnōncæ cæyōmīnite wæcæ cæte ī æiquedō da pōnonguīmīnī. ¹¹ Incæte mānōmaī apænedinque botō wī ænguēnēmo inte apænetabopa. Edæ wædænque ēabo incæ nanguī ēabo incæ quiēmē ēabo incæ botō, Æbānō quēwenguī, ante do ēñēmo inte edæ piyænē cæte wædāmaī cōwē quēwēmopa. ¹² Ōmæpobo wædimō inte botō, Ōmaadāni æbānō quēwēnāni, ante do ēñēmopa. Adobaī nanguī ēate quēwēnīmo inte botō, Nanguī ēadāni æbānō quēwēnāni, ante do ēñēmopa. Edæ tōmo cæmo incæ, gæwænte wæbo incæ, nanguī ēabo incæ, ōmæpobo incæ mānīnō tōmānō ante wægāimo inte botō mānōmaī ingāimo beyænque ēñente batabopa. Inique

æyömömë quëwëmo incæ quiëmë bai quëwëmo incæ piyænë cæte wædāmai quëwëmopa. ¹³ Edæ quiëmë beyæ wæbo incæ mōnō Codito pōnō cæcā ate botō wæætë edæ eyepæ entawëningue tōmāā edæ cæbopa.

¹⁴ Incæte botō òmæpobo inte wæyōmote mīnitō pōnō cæmīni waa æntabopa. ¹⁵ Ayæ adobai mōnō Codito ingantedō ante watapæ mōni apænedō ante tæcæ ëñëmīni ate botō Māatedōniabæ iinque apænedinque wadæ goyōmote wadāni Codito ingante nāni godongāmæ pōnencabo pōnōnāmai iñōnānite mīnitō adomīnique da pōnōmīni æntabopa, ante mīnitō pidipenteidi do ëñëmīnīpa. ¹⁶ Edæ, Tetadōnica nāni quëwëñōmō quëwëningue Pabodo òmæpocā bacampa, ante tededāni ëñente wædinque mīnitō wīl adopoque wæætë wæætë da pōnōmīni æntabopa.

¹⁷ Botō dicæ botō æncæ wædō ante apænetabopa. Wæætë, Pidipenteidi wadāni iñānite nē godōnāni iñānīpa, ante adinque Wængonguī wæætë mīnitō imīnite godōmenque pōnongā æncæmīnīpa, ante apænetabopa. ¹⁸ Iinque botō iñōmō idæwaa æntabopa. Botō ænguënēnō æninque godōmenque nanguī ænte ëabopa. Edæ, Pabodo quī, ante mīni da pōnōnincoo Epapododito wæætë botō imote pædæ pōnongā æninque botō eyepæ pōnī ëate quëwëmopa. Mīnitō, Wængonguī quī, ante oguī waquī bai pōnō iya tante bai cædinque, Pabodo quī, ante da pōnōmīni adinque, Waa pōnī pōnōmīnīpa, ante Wængonguī incæ waa acampa. ¹⁹ Botō Wængonguī ñāō bai entawëningue tæi ëmongā iñongā inte tōmengā nānō ëadoncoo iñōmō edæ bacoo pōnī ongompa. Iinque, Mīnitō ænguënēmīni imīnīpa, ante adinque tōmengā Itota Codito beyænque cædinque eyepæ pōnī edæ da pōnongā æncæmīnīpa.

²⁰ Mōnō Wængonguī mōnō Mæmpo iñongante, Bitō waëmō pōnī iñōmi imīpa, ante mōnō cōwë watapæ apænecæimpa. Edæ ñōwopāmo incæ mīimāmo incæ mōnō cōwë mānōmai apænecæimpa. Mānōmai impa, āninque botō, Amëë, āmopa.

Māninque ante yewcēmōmopa, ante

²¹ Wængonguī quīnāni Itota Codito nempo quëwënōnāni iñōnānite mīnitō, Waa quëwencæmīnīpa, ante botō beyæ ancæmīnīpa. Ayæ botō tōnō godongāmæ ongōnāni incæ, Mīnitō æbānō quëwëmīnīi, ante wædānīpa. ²² Edæ Tæiyæ Awënë Tetædo oncōnē quëwënāni tōnō wadāni Odōmā iñōmō wayōmō quëwënāni tōnō Wængonguī quīnāni incæ tōmānāni adobai mīnitō imīnite, Waa quëwencæmīnīpa, ānānīpa.

²³ Mōnō Awënë Itota Codito mīnitō imīnite waadete pōnō cæcæcāimpa, āmopa. Māninque ante yewcēmōmopa.

Codotenteidi inānite **Pabodo nānō cadota ante yewæmongainta**

Waa quēwencæminimpa, ante

¹ Wængonguī angā ēñēninque Itota Codito botō imote da godongā gogaimo inte botō Pabodobo inōmo inte yewæmōmopa. Mōnō tōniñacā Tīmoteo tōnō guēa tedete ate botō, Acæminimpa, ante yewæmōmopa. ² Mōnitō tōniñamīni ēñēdāni. Codota inōmō quēwēninque Wængonguī quimīni inte mīnitō mōnō Codito nempo quēwēninque ædæmō cæte pōnēmīni inōmīnite botō iīmaī ante yewæmōmopa. Mōnō Mæmpo Wængonguī tōnō mōnō Awēnē Itota Codito waadete pōnō cæda ænte entawēninque mīnitō gānē pōnēninque watapæ quēwencæminimpa, āmopa.

Nē pōnēnāni beyæ Pabodo Wængonguī ingante apænecā

³ Mōnō Awēnē Itota Codito Wæmpocā inŋongante mōnitō mīnitō beyæ ante apænedinque Wængonguī ingante waa ate pōnente apænemōnīpa. ⁴ Edæ, Mīnitō Itota Codito ingante wede pōnēmīni imīnīpa, ante do ēñēmōnīpa. Ayæ, Wængonguī quīnāni inānite tōmānāni inānite mīnitō waadete pōnēmīnīpa, ante mōnitō do ēñēmōnīpa. ⁵ Edæ, Ōōnædē æidinque mīnitō watapæ quēwenguinque impa, ante edæ Codito do badongampa. Mānōmainō ante, Nāwangā impa, ante watapæ mīni ēñēnō ante mīnitō godōmenque wede pōnēmīni badinque godongāmæ waadete pōnēmīni imīnīpa. Ininque, Mīnitō mānōmaī imīnīpa, ante adinque mōnitō wæætē Wængonguī ingante waa ate pōnēninque apænemōnīpa.

⁶ Doyedē mīnitō weca ponte apænedinque mōnitō, Mōnō Codito ingantedō ante watapæ apænemōni ēñēninque mīnitō, Wængonguī nāwangā waadete pōnō cæcampa, ante do ēñēmīnitapa. Mānōmainō ante mīni ēñēniōnæ incæ mīnitō waincawæ nanguī incawæ bai tæcæ badinque nōwo ganca nanguī apænemīni ēñēninque wadāni mīnitō weca nē pōnēnāni tæiyænāni badānīpa. Ayæ tæiyænāni badāni bai mōnō pōnencabo adobai tōmāmæca tæiyæmō pōni bamōmpa. ⁷ Epapada mōni nē waadedongā incæ, Codito waa pōni nānō pōnō cægainō ante do odōmonte apænecā ēñēmīnitapa. Tōmengā inōmō Itota Codito beyæ nē cæcā inongā inte mōnō imōnite pōnēninque ædæmō cæcā ingampa. ⁸ Ayæ mōnitō imōnite apænedinque tōmengā, Codotenteidi inōmō Wængonguī Ōnōwoca nempo quēwēninque nē waadete pōnēnāni inānīpa, ante do apænecā ēñentamōnīpa.

⁹ Mānōmaī beyæ mōnitō, Mīnitō æbānō imīni, ante tæcæ ēñēninque mīnitō beyæ ante Wængonguī ingante apænedinque nīmpo cædāmaī inte cōwē apænemōnīpa. Edæ, Wængonguī æbānō angāā, ante mīnitō ēñente ēwocæmīnīpa, ante mōnitō, Wængonguī ēñēmi. Bitō ēñēnō ante apænebi ēñente ēwocadinque Codotenteidi wæætē, Æbānō waa cæte quēwenguiī, ante ēñencædānīpa, ante apænemōnīpa. ¹⁰ Wængonguī apænecā ēñēninque mīnitō, Mōnō Awēnē tocæcāmpa, ante cædinque tōmengā nānō waa cædō bai mīnitō adobai waa pōni cæcæmīnīpa, ante apænemōnīpa. Ayæ Wængonguī ingante mīnitō doyedē æmæ ate bai æmæ pōnēmīni inte nōwo wæætē ædæmō ate bai ædæmō pōnencæmīnīpa. Ayæ waa incawæ bai mīnitō adobai bate cædinque nō mīni waa cæquēnēnonque cæcæmīnīpa, ante apænemōnīpa. ¹¹ Wængonguī nāō emōninque tæ piñænongā inte pōnō cæcā ate mīnitō edæ

tömengä nänö tæi piñænö bai adobai tæi piñæmini ewocacæminimpa, ante apænemönipa. Ayæ, Tömengä mänömai pönö cæcä ænte ewocamini inte minitö wæntæye badāmai inte ee cædinque piyænē cæte ee cæcæminimpa, ante ämönipa. Ayæ watapæ todinque, ¹² minitö mönö Mæmpo ingante waa ate pönëninque apænecæminimpa, ante mönitö Wængongui ingante apænemönipa.

Edæ Wængongui quimöni imöni bai tömengä minitö iminite pönö badongä ate minitö tömengä quimini do bamnipa. Inique minitö tömengä ñäö emömämodë mönitö tönö godongämæ pöñöminite tömengä nangui pöni pönongä æninque minitö mönitö tönö godongämæ nē eamini incæminimpa. ¹³ Edæ nē wëmö enempodongä nempo wæwëñömonte Wængongui wæætë mönö imonte gä pe æmpote ö æninque, Botö Wengä botö nē Waadedongä iñömö nē Awënë Odeye iñongante minitö tömengä nempo quëwencæminimpa, ante mämongä pongamöimpa. ¹⁴ Tömengä Wengä nämä wepæ petæ petæ wææ beyænque mönö wënæ wënæ cægainö ante Wængongui pönö ñimpo cæcä æninque mönö abæ tawænte bai quëwëmompä.

Codito wængä beyænque Wængongui piyænë cæcampa

¹⁵ Mönö adāmai ingaingä Wængongui æbänö emongää, ante adāmai iñömonte Wængongui Wengä iñömö Mæmpocä bai nē emongä inte mönö weca pöninque, Mæmpocä æbänö emongää, ante do odömongacäimpa. Wëëñedë Wængongui nänö badönāmai ingäñedë adocä incæ Bamoncadengä bai inongä inte do quëwengacäimpa. ¹⁶ Inique Mæmpocä pönö angä ëñëninque tömengä Wengä incæ tömancoo edæ badongacäimpa. Mönö nē adincoo incæ mönö adāmai incoo awëmö ongoncoo incæ adocä tömancoo badongacäimpa. Awënëidi incæ nē änäni incæ, awënëidi nāni enempodö incæ nē tæi piñænäni incæ, öönädë owodönäni incæ inguipoga quëwëñöñäni incæ mäninäni edæ tömänäni inäñite Mæmpocä pönö angä ëñëninque Wængongui Wengä iñömö badongacäimpa. Badöñongante Wæmpocä, Bitö qui bacæimpa, angä Ao ante badongacäimpa. ¹⁷ Adocä Wængongui Wengä incæ Tänocä quëwengaingä ingampa. Tömengä pönö angä beyænque tömengä nänö badongaincoo iñömö adoyömö pönente bai cædinque tömengä nempo godongämæ gongænte cægompä.

¹⁸ Ayæ tömengä nē Önoncamö bai nē angä iñongante adonyö tömengä ingante mönö godongämæ pönencabo wæætë tömengä tönö adoyonque bai inömö imompä. Adocä tömengä nänö Tæiyæ Awënë baquinque nē badongaingä inongä inte tänocä pöni ingacäimpa. Ayæ æmonga pöni nänö ongonguinque tömengä wænte ate tänocä nē ñäni ömæmongaingä inongä ingampa. ¹⁹ Edæ, Botö entawënö incæ botö Wengä tömänö entawencæcäimpa, ante pönö cædinque Mæmpocä iñömö nangui togacäimpa. ²⁰ Ayæ tömengä Wengä wepæ awäa gowete wædinque wængä beyænque Wængongui mönö tömämö beyæ pönö cædinque piyænë cægacäimpa. Tömengä Wengä tönö mänömai pönö cæcä beyænque mönö inguipoga tömäo quëwëmö tönö öönädë tömäo quëwëñäni tönö tömengä ingante Ao äninque tömengä tönö godongämæ piyænë cæte quëwëmö adinque Wængongui iñömö nangui togacäimpa.

²¹ Ayæ minitö guiquënë Wængongui ingante näwæ pämwænte gogaïmini inte wiwa cædimini inte ocaidë nē pünte bagaïmini iñöminite, ²² Wængongui wæætë, Adocä Codito tömengä baö ewëñente wængä beyænque minitö botö quimini badinque botö ayömo tæiyæ wæmö entawencæminimpa, ante cæcampa. Inique tömengä ñä mënongacä ate minitö tömengä ayongä wentamö mongænāmai imini adinque, Wënæ wënæ cæbitapa, ante ædö cæte

piinte angui. ²³ Edæ mīnitō tæi mænonte bai ongōninque do mīni wede pōnēnonque ante cōwē godōmenque pōnēmīni īninque tōmengā weca ponte ongōmāimīnīpa. Mōnitō mōnō Codito ingantedō ante mōnō pōnēnō beyæ mōnō watapæ bacæimpa, ante apænemōni ēñēmīnitawo. Mānīne ante ñimpo cædāmai īmīni inte mīnitō tōmengā weca cōwē ongōmāimīnīpa. Mānīne mīni ēñēnīne ante mōnitō ñōwo inguipoga tōmāo quēwēnāni īnānite apænemōni ēñēnānīpa. Mānīne beyænque ante botō Pabodobo nē cæbo batapoba.

Mōnō pōnencabo beyæ botō nē cæbo batapoba, ante

²⁴ Mīnitō beyæ nanguī cædinque nantate wædīmo incæte botō nanguī tobopa. Ayæ Codito beyæ ante godōmenque wæquēnēmō inte botō tōmengā tōnō guēa baonque nantate wæbopa. Codito mōnō Ōnoncamō bai nē angā īñongante mōnō tōmengā ingante mōnō godongāmæ pōnencabo īñōmō tōmengā tōnō adoyonque bai īmoppa. Botō īñōmō edæ mōnō cabo beyænque caate wæbopa. ²⁵ Ayæ, Codito ingante nē pōnēnāni beyæ bitō nē cæbi badinque botō angāine ante adodō adodō ante tōmānō ante edonque pōni apænebi ēñencædānīpa, ante Wængongui angā ēñēninque botō mīnitō beyæ nē cæquēnēmō do bagaboimpa.

²⁶ Mānīne Wængongui nānō angāine ante wantæpiyæ wē wodonte bai īñonte mōnō mæmæidi cōwē ēñēnāmai ingadānīpa. Ñōwo guiquēnē Wængongui tōmengā quimō īñōmonte mānīne ante edonque pōni odōmonte apæneca ēñēmoppa. ²⁷ Īninque mōnitō īmōnite āninque, Waa pōni botō angāine ante mīni waocabo wēēnēdē mīni ēñēnāmai ingāine ante mīnitō ñōwo tæcæ ēñēmīni inte oodeoidi īnāmai īnāni īnānite odōmonte apænemīni ēñencædānīpa, ante Wængongui cæcampa. Mānōmai beyæ mānīne ante apænemōni ēñēninque mīni waa pōni ñāō bai entawēninque ēñencæmīnīpa. Edæ, Mīnitō mōnō Codito ingante ēwocadinque mīni ñāō ēmāmodē æiyōmīni watapæ bacæimpa, ante mōnō pōnēnō ante mānīneque impa.

²⁸ Mōnō Codito tōmengā nānō ēñēnō ante entawēninque mōnitō adocā ingante mōnō Codito ingante ante apænemōnīpa. Tōmengā nempo quēwēninque mīnitō picænāni bai nē ēñēmīni bayōmīnite Wængongui mīnitō īmīnite waa acæcāimpa, ante mōnitō tōmānāni īnānite waadete odōmonte apænemōnīpa. Ayæ, Ēñenguēnē quēwēdāni, ante tōmānāni īnānite wææ ante apænemōnīpa. ²⁹ Mōnō Codito nānō tæi piñænō pōnongā ænte entawēninque botō, Nē ēñēmīni bacæmīnīpa, ante cædinque tæi pæ pagænte cōwē nanguī cæbo īmopa.

2

¹ Botō mīnitō beyæ nanguī cædinque Daoditea īñōmō quēwēnāni beyæ adobai nanguī cæbo aedāni. Ayæ wadāni botō awinca adāmai īnāni beyæ adobai tæi pæ pagænte cædinque nanguī cæbopa, ante apænebo ēñēdāni. ² Botō, Tōmānāni wæwēnāmai inte wampo pōnēninque godongāmæ waadete pōnēninque adocabodāni bai bacædānīpa, ante ædæmō cæbopa. Edæ, Mānōmai badinque tōmēnāni Codito nānō ēñēnō ædæmō pōni nāni entawēnguinque impa, ante pōnēninque cæbopa. Ayæ, Mānōmai badinque tōmēnāni Wængongui nānō nē wē wodongaingā ingante Codito ingante edonque acædānīpa, ante botō mānōmai beyæ ante ædæmō pōni odōmonte apænebopa. ³ Edæ, Æbānō ī, ante, Æbānō waa cæquīi, ante Wængonguinque nānō nō pōnēnō incæ mōnō Codito mānīnō tōmānō ante ēñēninque waēmō pōni incoo bai wē wodonte nante bai entawēngampa. ⁴ Mānōmāinō ante apænedinque botō, Mīnitō oda cædāmai incæmīnīpa, ante yewæmonte apænebopa. Edæ wadāni waa pōni tededāni incæ babæ

wapiticæ odömoncæte ante tededäni inäni adinque eñenāmaī iedäni, ante wææ ämopa. ⁵ Edæ wayömo quëwëmo incæ mīnitö weca owote bai botö önöwoca pönëmopa. Ininque botö ayömo mīnitö mönö Codito ingante wede pönente tæī piñænte ongöningue iñacabo cædinque töingä pöni cæminipa, ante pönëmopa. Mänömaī iminipa, ante ate bai adinque botö nanguī tobopa.

Codito nempo quëwëninque mīmō quëwëmōmpa, ante

⁶ Mänömaī beyæ botö iīmaī ämopa. Mīnitö Itota Codito ingante mönö Awënë ingante Ao ante do æmīnitawo. Ininque tömengä ingante do Ao ante ænimīni inte mīnitö ñöwo adobaī tömengä ingante cöwë Ao ante tömengä nempo quëwëedäni. ⁷ Mīnitö waomīni incæ awæ tæimöwæ ædæmö guiwate pæwæ bai Codito nempo quëwëninque cöwë godömenque picæmīni bacæminimpa. Ayæ mönitö odömonte apænemöni mīni eñenö bai cædinque godömenque wede pönëninque tæī piñænte ongödäni. Ayæ Wængonguī ingante waa ate pönëninque watapæ apænëedäni.

⁸ Wadäni mä pönente önönquedö ante apænëdäni eñente wædinque mīnitö, Mönö imonte ö æncæte ante babæ apænëdänipa, äninque wææ cæedäni. Edæ tömënäni dicæ Codito nänö odömonte apænëgainö ante apænëdäniyaa. Wæætë waodänique nāni odömonte apænëgainonque ante Ao äninque tömënäni inguipogaque ante nē pönënäni nāni pönënö bainonque ante cædänipa töö.

⁹ Edæ Wængonguī tömengä nänö entawënoncoo incæ mönö Codito Waocä nē eñagaingä inongä inte mänincoo tömancoo entawëninque nämä baonga eñacampa. ¹⁰ Öönædë awënëidi incæ inguipoga awënëidi incæ nanguī inäni iñönäni mönö Codito adocanque Ñænængä pöni inongä inte Tæiyæ Awënë inongä ingampa. Incæte tömengä nempo quëwëmīni inte mīnitö tömengä nänö entawënö incæ ædæmö entawëminipa. ¹¹ Ininque tömengä nempo quëwëninque mīnitö wao önompoca eö togænāmaī imīni incæte mönö Codito iñömö eö togænte bai cædinque mīnitö baonque ante mīni wiwa cægainö ante wido cæcä ate mīnitö tæiyæ wæmö entawente quëwëminipa. ¹² Wængonguī nē tæī piñænongä inte Itota ingante angä ñāni ömæmongacäimpa, ante wede pönëmīni inte mīnitö, Itota tönö godongämæ näñe wænte bai imopa, ante æpænë guimīnitapa. Ayæ adobaī adocä nē tæī piñænongä ingante wede pönëninque mīnitö æpænë guidinque Itota tönö ñāni ömæmonte godongämæ tao gongænte quëwëminipa.

¹³ Doyedë eñenāmaī cædinque do wænguënëmīni ingaimīni inte mīnitö inguipogaque ante mīni cæinëwënö ante ee mongæñöminite Wængonguī angä ate mīnitö Itota tönö ñāni ömæmonte quëwëngämīnimpa. Edæ wënæ wënæ mīni cægainö ante adinque Wængonguī pönö ñimpo cæcä quëwëminipa. ¹⁴ Mīnitö pante wæquinque eñenāmaī cæminipa, ante Wængonguī wade wade ante wææ angä eñëninque dodäni adodö adodö ante yewæmönäni ate wægämöimpa. Mänömaī mönö imonte ancaa wææ änäni wæmö adinque Codito iñömö mänincoo mönö wægäincoo ante wëä godonte bai cæcä ate dæ batimpa. Edæ awæ timpodäni wænīnque Itota Codito mäninö ante do teëmente mongæ mão wido cægacäimpa. ¹⁵ Ayæ mäniwäa wænīnque adocä tæī emongä inte wënæidi awënëidi tönö nē änäni nāni wænonguënencacoo gä pe æmpote ö æninque tömengä, Wænnoncaincoo nææmīnipa wænonguimīni, ante bai wadäni ayönänite badete tote bai cægacäimpa.

Öönædë mönö entawënö ante æncæte ante cæedäni, ante

16 Mönö ee aquenönö incæ bitö quimæ cæmii, Quimæ bebi, ante pönö apænte piinte änänitawo. Wængongui beyæ ante ææmæ cæcæimpa, ante apænte ancæ piinänitawo. Wacä mämö i ate becæimpa, ante wææ änänitawo. Guëmangulönæ incæ quimæ cæbii, ante minitö iminite apænte pancæ cædänitawo. Edæ æcämenque mänömainö ante apænte ancæ cæyönänite minitö wæætë, Tömënanî nâni wææ äninö ante Codito wëä godonte bai cægacäimpa, ante pönëninque guifente wädämaï incæminimpa. 17 Cænguï cænte bai bequi bete bai mönö önowoca beyæ Codito incæ mönö guëmanguimämo bai inongä ingampa. Ìninqe Codito ingante ænte entawëninque mönö æbänö cænte bai guëmante bai quëwenguï, ante odömoncæte ante cædinque dodäni iñömö öwocodenganque odömonte bai cædinque wææ angadänimpa. Mänömaï beyængæ tömënanî, Ìmaï cæedäni, Ìmaï beedäni, Ìmaï guëmäedäni, ante wææ angadänimpa.

18 Pancadäniya mä pönëninque, Önömonque bai inömö inte mönö anquedoidi inänite waa adinque waa cæcæimpa, ante babæ ante wææ anewënanîpa. Ayæ mönitö änö bai cädämaï Ìninqe edæ minitö ænte entawënö ænämaï inte wæbäimînipa, ante anewëñönäni minitö wæætë guifente wädämaï iedäni. Edæ, Mönitö ate bai do adimöni inte ämöni ëñëedäni, ante tömënanî Codito Önowoca ingante ëwocadämaï inäni inte mä pönëninque anewënanîpa. Edæ, Nämäneque ante pönëninque tömënanî, Mönitö adomönique waa cæmöni imönîpa, ante nämä waa adänîpa. 19 Mönö ocai encamö inte cænguï cæninque mönö baonga wepæmë tömäo gogadinque pæmompæ. Ayæ adobaï mönö ocai encadinque ogüemë tönö baö beyæ cöne pö cöne pö cæmompæ. Mönö pönencabo adobaï Codito tönö adoyonque bai iñömönte tömëngä Önoncamö bai inongä inte nê angä ingampa. Mönö mänömaï imö incæte tömënanî wæætë nê Önoncamö bai inongä ingante Baa äninque nämä wido tote wææiñö bai edæ wadæ godänîpa. Ìninqe wææiñö bai inäni incæ minitö iminite wææ änäni apa quëwëminii.

20 Wëëñëedë inguipogaque ante nâni wææ angainö ante nê ëñengaimîni incæte ñowo wæætë Codito tönö godongämæ wænîmîni inte minitö wænte bai imîni inte mänine ante ædö cæte ëñenguimîni. Inguipogaque quëwëminii imînipa diyæ mänine ante ëñente cæquëñëminii inguimîni. 21 “Gampodämaï, Yædæ bedämaï, Bæi ongönämaï,” ante tömënanî nâni wææ anewënö ante quinante ëñente cæminii. 22 Ìnæmpa waodänique edæ, Gampodämaï, ante nâni änoncoo iñömö tæcæ ænte cæyöminii edæ dobæ wote ba apa ëñëwëminii. Inguipogaque quëwënanî nâni anewëngainö ante ëñëninque tömënanî wææ änänîpa. Dodäni nâni odömonte apænëgainö ante ëñëninque wææ änänîpa. 23 Tömënanî, Önömonque bai inömö inte mönö anquedoidi inänite waa adinque waa cæcæimpa, ante wææ anewënanîpa. Ayæ mä pönëninque, Cädämaï, Cädämaï, ante nämä baö incæ pänänîpa. Ìnänî ocai encadönäni inte wææ änänîpa, ante pönëninque wadäni edæ wæætë oda cädänîpa. Ìnæmpa, Cädämaï, Cädämaï, ante nâni wææ anewënö wî eyepæ i Ìninqe nê ëñënanî inguipogaque nâni cæinëwënö ante godömenque wîwa cädänîpa, ante ämo ëñëmaimînipa.

3

1 Ìninqe mönö Codito nê ñäni ömæmongaingä tönö nê ñäni ömæmongaimîni inte minitö æmonga ongongoo edæ æinente pönëedäni. Codito ñowo Mæmpo Wængongui tömëmængä inö æi tæ contate ongongampa, ante pönëninque edæ minitö, Æmonga pönî nê quëwëngä tömëngä nänö entawënö bai adobaï entawëngæimpa, ante æinente wædinque quëwëedäni.

² Inguipogaque mōnō quēwēmāmo ante edæ wædāmaī inte wæætē æmonga mōnō quēwenguīnō ante cōwē pōnente quēwēedāni. ³ Edæ do wænte baī ingaimini inte mīnitō nōwo Codito tōnō Wængonguī nempo awēmō quēwēñmīnite mīnitō quēwenguīnō ante wīī edonque acæimpa. ⁴ Mōnō Codito mīnitō quēwenguīnō ante nē pōnongaingā inte ponte a ongōñongā māññedē tōmengā nāō entawēninque nānō tæī ēmōmāmodē mīnitō adobaī tōmengā tōnō a ongōmīni acæimpa.

Inguipogaque ante wægaimō inte mōnō mīimō quēwēmō

⁵ Mānōmaī impa, ante wædinque mīnitō inguipogaque ante mīni cæinēwēnō ante wænonte baī æmæwo wido cæedāni. Nānōogængā ināmaī iñongante godō mōnāmaī ee aedāni. Wīwa mīni pōnēwēnō ante æmæwo wido cæedāni. Wacā ingante mīni toīnente wædō ante æmæwo wido cæedāni. Wīwa mīni cæinēwēnō ante æmæwo wido cædinque ee ate quēwēedāni. Mīni mīnīcooque ante æinēwēnō ante æmæwo wido cæte ñimpo cæedāni. Edæ mīnīcoo ante æinente nē wæcā iñōmō tōmengā, Māincoo incæ botō wængonguī impa, ante baī wæcā apa cæmīni. ⁶ Nē ēñēnāmaī cædāni inguipogaque nāni cæinēwēnonque ante cæyōnānite Wængonguī nānō pīnguīmāmo oo ponguīnō anguēnē. ⁷ Mīnitō incæ doyedē inguipogaque ante quēwēninque adobaī mīni cæinēwēnonque ante cægāimīni iñinipa. ⁸ Nōwo guiquēnē ænguī badāmaī iedāni. Āimīni badāmaī iedāni. Pīinte cædāmaī iedāni. Babæ godō wēnæ wēnæ ānewēnāmaī iedāni. Wīwa apænedāmaī iedāni. Wæætē, Idæwaa wēnæ wēnæ cæte awædō, ante māñnō tōmānō ñimpo cæte ee aedāni. ⁹ Wēēññedē mīni entawengaimāmo ante wido cædinque māññedē mīni cægāinō ante adobaī nē wido cædimīni inte nōwo iñōmō edæ wacā ingā wacā ingā babæ wapiticæ apænedāmaī iedāni.

¹⁰ Wæætē mīimīni edæ quēwencæmīnimpā, ante Wængonguī do pōnō badongā entawēminipa. Ayæ māñnō ante nē Badongaingā iñōmō cōwē pōnō odōmonte apæneccā ēñēninque mīnitō mīimīni quēwēmīni inte tōmengā nānō entawēnō baī godōmenque godōmenque adobaī entawēminī bamīnipa. ¹¹ Mōnō Codito nempo adoyōmō pōni inōmō inte mōnō guidiegoidi incæ oodeoidi incæ adomō inōmō iñompa. Nē ēō togæñāni incæ bagāadāni incæ adomō inōmō iñompa. Waodāni incæ cowodēidi incæ adomō inōmō iñompa. Wacā beyænque nē cæte quēwēnāni incæ abæ tawænte ee gote baī nāmā beyænque nē cæmōni incæ mōnō tōmāmō adomō pōni inōmō iñompa. Edæ mōnō tōmāmō Codito adocanque nempo quēwēninque tōmengā adocanque ingante nē ēwocamō iñompa.

¹² Wængonguī, Mīnitō botō quīmīni badinque tæiyæ waēmō bacæmīnimpā, ante mīnitō imīnite waadete pōnēninque do apænte ængacāimpā. Iñinque tōmengā nānō nē apænte ængāimīni inte mīnitō wadāni inānite waadete pōnente godō waa cæedāni. Nāmā ōnōmoque baī iñompa, ante pōñēdāni. Wadāni inānite ædæmō cæedāni. Æiquedō waa cæquīñāni, ante wædāmaī inte piyænē cæte quēwēedāni. ¹³ Ayæ wacā nānō cæinēnō ante cæcā adinque mīnitō pīñāmaī ee amīni cæcæedāni. Wacā adobaī mīnitō imīnite wīwa cæcā ate wædinque mīnitō godō ñimpo cæmīni quēwencæcāimpā. Edæ mōnō iñomte mōnō Awēnē nānō ñimpo cægāi baī mīnitō adobaī pīñāmaī inte godō ñimpo cæedāni. ¹⁴ Ayæ, Adocabomō mōnō baquinque mōnō waadete pōnengæimpā, ante pōnēninque mīnitō tāno wadāni inānite waadete pōnēninque ayæ tōmēñāni inānite mīni godōmenque cæquēñēnō ante cæedāni. ¹⁵ Mīnitō adocabomīni badinque piyænē cæte quēwencæmīnimpā, ante Wængonguī mīnitō imīnite aa pegacāimpā cæmīni. Mōnō Awēnē Codito nānō piyænē cædō pōnongā

æningue mīnitō piyænē cæte quēwēedāni. Ayæ Wængonguī ingante cōwē waa ate pōnente quēwēedāni.

¹⁶ Mōnō Codito nānō apænegainō ante ēñēningue mīnitō ædæmō entawēningue nanguī ēñente baedāni. Īningue nanguī ēñēmīni badinque mīni cabo incæ wacā ingā wacā ingā godongāmæ odōmonte apænēedāni. Ayæ nanguī ēñēmīni inte mīnitō wacā ingā wacā ingā waadete pōnēningue, Īmaī cæcæimpa, ante apænēedāni. Ayæ dodāni Wængonguī ingante waa adinque āmotamīni ante nāni yewæmongainta adinque mīnitō wæætē adodō tee empote ædāni. Ayæ Itota Codito nānō cægainō ante pōnēningue āmotamīni ædāni. Ayæ adobai Wængonguī Ōnōwoca pōnō apænecā ēñente ēwocadinque mīnitō āmotamīni ante adodō tee empote ædāni. Mānōmaī āmotamīni āningue Wængonguī ingante cōwē waa ate pōnēningue ædāni. ¹⁷ Ayæ æbāmenque ante apænēmīni incæ æbāmenque cæmīni incæ mīnitō, Mōnō Awēnē Itota ēmōwo beyæ impa, ante tōmāā cæedāni. Ayæ tōmengā pōnō cæcā beyænque mīnitō eyepæ inte Mæmpo Wængonguī weca pōninque tōmengā ingante waa ate pōnēningue apænēedāni.

Mōnō godongāmæ quēwencabo ĩmaī cæte quēwengæimpa

¹⁸ Onquiyæmīni ēñēedāni. Mōnō Awēnē nempo quēwēningue mōnō ēñente cæcæimpa, ante wædinque mīnitō nānōogænāni ĩnānite Ao ante ēñente cæedāni. ¹⁹ Onguīñæmīni ēñēedāni. Mīnitō nānōogænāni ĩnānite ædæmō waadete pōnēningue tōmēnāni ĩnānite pīnte cædāmaī ĩedāni.

²⁰ Wēñæmīni ēñēedāni. Mīnitō mæmpoidi ĩnānite ædæmō ēñente cæedāni. Edæ mānōmaī cæmīni adinque mōnō Awēnē, Waa pōni cæbi abopa, ancæcæimpa. ²¹ Wæmpomīni ēñēedāni. Mīnitō, Ancaa āmo bai botō wēñængā ænguī badinque guingo imonte wæquēnengā, ante pōnente wædinque wæætē wēñænāni ĩnānite nanguī ānāmaī inte waadete pōnō cæedāni.

²² Wacā nānō nē ō ænimīni inte tōmengā beyænque nē cæte quēwēmīni ĩñōmō ēñēedāni. Mīnitō ĩmīnite nē ō ængaingā ingante nē cæmīni inte mīnitō tōmengā nānō ā bai tōmāā ēñente cæedāni. Edæ, Awēnē Wængonguī incæ botō ĩmote cōwē acampa diyæ, ante guīñente wædinque mīnitō ĩmīnite nē ō ængaingā nānō ayedē incæ tōmengā nānō adāmaī ĩñedē incæ cōwē ēñente cæedāni. Waodānique botō ĩmote waa acædānimpā, ante pōnēnāmaī inte mīnitō nō pōnēningue cōwē ēñente cæedāni. ²³ Æbāmenque cædinque mīnitō, Wīi waocā beyænque ante cædinque botō Wængonguī Awēnē beyænque ante cæcæboimpā, ante pōnēningue tæī ēwocadinque ee cæedāni. ²⁴ Mōnō Awēnē ĩñōmō tōmengā do nānō angainō bai cædinque mīnitō cægainō beyæ ante eyepæ pōni pōnongā æncæmīnimpā. Mānōmaīnō ante pōnente cæedāni. Edæ, Mōnō Awēnē Codito ingante adocanque ingante nē cæmīni ĩmīnīpa, ante āmo ēñēmaīmīnīpa. ²⁵ Nē wēnæ wēnæ cæcā guīquēnē tōmengā nānō wēnæ wēnæ cægainganca eyepæ æncæcæimpā. Edæ Wængonguī ĩñōmō wacā ingante wadō wacā ingante wadō ate pōnēnāmaī inte tōmāmō ĩmote apænte āningue pōnō nō pōni paga cæcæcæimpā.

4

¹ Awēnēidi ēñēedāni. Mīnitō waocā ingante nē ō ænimīni inte ēñēedāni āmopa. Edæ mīnitō Awēnēidi ĩmīni bai mīnitō ĩmīnite nē Ængaingā incæ adobai mīnitō Awēnē ĩnongā inte oōnædē quēwengampa cæmīni. Mīnitō beyænque cæte nē quēwēnāni ĩnānite mīnitō nōingā cædinque tōmēnāni nāni ænguēnēnō ante adinque eyepæ pædæ godōmīni æncædānimpā.

² Wængonguī ingante cōwē apænedinque, Tömengä æbänö cæcää, ante cōwä adinque tömengä ingante waa ate pönëninque apæneedäni. ³ Codito æbänö cæcää, ante dodäni nāni ëñënamai ingaine incæ botö mänine ante do ëñënimō inte apænebo beyænque botö imote tee mönedäni wæbopa. Incæte mönitö mänine ante apæneyömöni mīnitö wæætē mönitö beyæ ante Wængonguī ingante apænedinque iimāi ante apæneedäni ämopa. Wængonguī ëñëmi. Bitö wi ænete bai cæbi ate Pabodoidi nāni apænede wadäni mīmönë guicæimpa, ante apæneedäni. ⁴ Codito æbänö cæcää, ante botö edonque apænequënemo imopa. Ìninqe mīnitö botö beyæ ante apænedinque, Pabodo edonque apænecæcäimpa, ante Wængonguī ingante apæneedäni ämopa. ⁵ Wadäni inänite bee téninque mīnitö ocai encamīni inte ëñente cæedäni. Pönënamāi ināni do ëñencædänimpa, ante waa apænete cæedäni. ⁶ Ayæ Wængonguī waadete pönö apænecä ëñëninque mīnitö adobai wadäni inänite waadete pönö apænedinque waa pöni apæneedäni. Wadäni, Æbänö ii, ante ëñencæte ante wæyönänite mīnitö wæætē nō pöni ëñëmini inte nöingä apænemini ëñencædänimpa.

Waa quëwencæminimpa, änänipa

⁷ Botö Pabodobo æbänö quëwëmoo, ante nē ëñëningä inte Tiquico ñöwo mīnitö weca pöninqe mäninö ante apænecä ëñencæminimpa. Tömengä mönö tönñacä bai iñongante mönitö tömengä ingante waa waadete pönëmönipa. Tömengä mönö Awënë nempo quëwëninque mönitö tönö godongämæ cæcä inongä inte mönö pönencabo tömämö imonte pönëninque mönö beyæ cōwë ædæmō cæcä ingampa. ⁸ Mīnitö, Pabodoidi æbänö quëwënanii, ante ëñencæte ante wæmīnitawo. Édæ, Tiquico mäninö ante apænedinque mīnitö imīnite ædæmō apænecä ëñëninque mīnitö wampo pönencæminimpa, ante cædinque botö ñöwo tömengä ingante mīnitö weca da godomo pongä aedäni. ⁹ Tiquico goyongä tömengä tönö Önetimo mīni cabo nē inongä incæ guëa gocæcäimpa. Önetimo cōwë ædæmō cæte nē pönengä ingampa, ante adinque mönitö tömengä ingante waadete pönëmönipa. Ìninqe tömëna iñömö, Pabodoidi weca æbänö cædänii, ante tömänö ante apæneda ëñencæminimpa.

¹⁰ Botö tönö guëa tee mönete ongongä Aditadoco iñömö tömengä mīnitö imīnite, Waa quëwëedäni, angampa. Ayæ Bedënabee nänö wænquicä Mäadoco adobai, Waa quëwencæminimpa, angampa. Tömengä ingante æbänö waa cæquūi, ante do ämo ëñëmīnitapa. Ìninqe tömengä pongä adinque waa cæedäni. ¹¹ Ayæ wacä Itota Yoto nāni änogä adobai, Waa quëwencæminimpa, angampa. Botö Wængonguī Awënë Odeye nempo quëwënanii beyæ cæyömo oodeoidi incæ wadäni cædämai iñönänite mäninänique botö tönö godongämæ cædinque pönö ædæmō cædäni æninque botö wampo pönentabopa.

¹² Ayæ mīni cabo inongä inte Epapada iñömö tömengä Itota Codito ingante nē cædongä inte adobai, Waa quëwëedäni, angampa. Tömengä Wængonguī ingante nanguū apænedinque, Codotenteidi inänite bitö godö cæbi ate tömënanii picænāni bai bacædänimpa. Ayæ bitö angainö tömänö ante ëñente cædäni inte tömënanii tæi piñante ëwocacædänimpa, ante tömengä mīnitö beyæ ante cōwë apænecampa. ¹³ Mīnitö beyæ tömengä nanguū cæcampa. Daoditea iñömö nāni pönencabo beyæ adobai Yedapodi iñömö nāni pönencabo beyæ adobai tömengä nanguū cæcampa, ante botö näwangä apænebo ëñëedäni. ¹⁴ Ayæ, Waa bacædänimpa, ante mönö nē cædongä tömengä ëmōwo Odoca tömengä iñömö mönö nē waadecä ingampa. Tömengä tönö Deëma, Waa quëwencæminimpa, ante adobai änapa. ¹⁵ Ayæ botö Pabodobo beyæ ante wæætē Daoditea iñömö

mönö tönñadäni inänite munitö, Waa quëwëedäni, äedäni. Diimpa inante, Waa quëwëedä, äedäni. Ayæ Codito ingante nani pönencabo tömënä oncönë godongämæ ponte apæneyönänite munitö wæætë botö beyæ apænedinque, Pabodo, Waa quëwëedäni, angampa, äedäni.

¹⁶ Ayæ iinta botö cadota ante yewæmöninta iinque adinque munitö, Daoditea iñömö Codito ingante nani godongämæ pönencabo adobaï acædänimpa, ante cædinque da godömini ænte acædänimpa. Ayæ daoditeaidi inänite botö cadota ante yewæmöninta adobaï ämïni da pönönäni æninque aedäni.

¹⁷ Ayæ Adoquipo ingante apænedinque, Bitö mönö Awënë pönö angä ëñëniimi inte bitö cæquënënö ante tömää ædæmö cæe, äedäni. ¹⁸ Botö Pabodobo tömëmo önompoca yewæmöninque, Waa quëwëedäni, ante tömëmo ëmöwo ante yewæmömopa. Botö æbänö yæguincamë encapote wæboi, ante pönëninque munitö Wængonguï ingante apæneedäni ämopa. Wængonguï waadete nänö pönö cædö ænte entawencæminimpa, ante mäninque ante yewæmömopa.

1 Tetadönitenteidi inänite **Pabodo cadota ante tänota nänö** yewæmongainta

Pabodo, Waa quëwëdäni, ante apcë necäimpa

¹ Botö Pabodobo inömo imopa. Mönö töninada Tidibänö tönö Timoteo tönö godongämæ apænete ate yewæmömo aedäni. Mönö Mæmpo Wængongui nempo ayæ mönö Awënë Itota Codito nempo quëwëningue minitö Tetadönica inömo quëwëningue Codito ingante godongämæ mïni pönencabo ëñëedäni. Mönö Wængongui waadete pönö cæcä ate minitö gänë entawencæminimpa, ante yewæmömönipa.

Tetadönitenteidi nani wede pönëno

² Mönitö möni apæneyedë minitö tömämïni beyæ ante Wængongui ingante cöwë waa ate pönëningue apænemönipa. ³ Minitö Itota ingante æbänö wede pönente cæmïni iminipa, ante ayæ tömengä ingante waadete pönëningue æbänö cæmïni iminipa, ante cöwë apænemönipa. Ayæ minitö wæwëmïni incæ, Mönö Awënë Itota Codito pongä ate watapæ bacäimpa, ante pönëningue æbänö wëntæye inämaï ee cæmïni iminipa, ante adingue mönitö Wængongui mönö Mæmpo weca æyedëmë ponte apænedingue cöwë mäninö ante pönëningue apænemönipa. ⁴ Mönitö töninämïni, minitö Wængongui nänö në waademïni inömïni inte ëñëedäni. Tömengä minitö iminïte apænte ængacäimpa, ante do ëñëmönipa. ⁵ Edæ Itota ingantedö ante mönitö watapæ möni apænedö ante wii onongedö ante apænetamönipa. Wæætë Wængongui nämä tæï piñænte në angä beyænque mönitö minitö iminïte apænedingue Awënë inte bai apænetamönipa. Wængongui Önöwoca mönitö tönö godongämæ cæcä beyænque mönitö mäninö möni watapæ apænedö ante, Nö impa, ante ædæmö pönëningue apænetamönipa. Mänömaï apænemöni ëñëmïni adingue mönitö, Wængongui minitö iminïte apænte ængacäimpa, ante do ëñëmönipa. Ayæ minitö weca quëwëningue mönitö æbänö minitö beyæ ante quëwentamönii, ante do ëñëmïnipa.

⁶ Wængongui Önöwoca watapæ nänö topämo ante pönongä ænimïni inte minitö nanguï caate wæmïni incæte Wængongui nänö angainö ante ëñëningue Ao ante æmïnitapa. Mönitö æbänö cæmönii, ante adingue Awënë Itota Codito æbänö cæcää, ante adingue minitö adobaï möni cæbaï cæmïni bamïnitapa. ⁷ Ininque Mäatedöniabæ quëwënanï tönö Acayabæ quëwënanï inömo Itota Codito ingante në pönënanï inönäni inte tömënanï tömänäni mïni cædi adingue mïni cæbaï adobaï cædänitapa. ⁸ Minitö wede pönëningue apænemïni beyænque Wængongui nänö angainö ante Mäatedöniabæ quëwënanï tönö Acayabæ quëwënanï ëñënanï incæte wii mänii mëñömongaque inömo quëwënanï ëñënanipa. Wæætë ædömë quëwënanï inönänite wadäni minitö Wængongui ingante mïni wede pönëmämo ante tededäni do ëñënanipa.

Ininque mönitö mänii beyæ quinante godömenque apænequii. ⁹ Edæ, Mönitö minitö weca ëñacæ pöninque apænemöni ëñëningue minitö æbänö watapæ ëñëmïnitapa, ante mäninänï në pönënanï incæ apænedänï ëñëmönipa. Ayæ adodänï minitö iminitedö ante iïmaï ante apænedänipa. Minitö, Mönitö wængonguüidi impa, ante mïni cönönicacoo incæ ëmö cæte wadæ pöninque mönö Wængongui gämænö pömïnitapa, ante apænedäni ëñëmönipa. Ayæ, Näwä Wængongui në Quëwëngä ingante ëñente cæcæmönimpa, ante

pömīnitapa, ante apænedāni ēñēmōnīpa. ¹⁰ Ayæ tōmengā Wengā ōönædē nē quēwēnongā inte ocæ ēmænte poncæcāimpa, ante mīnitō wānō cōmīni īmīnīpa, ante apænedāni ēñēmōnīpa. Tōmengā do wængaingā īñongante Wængonguī, Ñāni ōmæmōe, angā nē ñāni ōmæmongaingā ingampa. Īnīnque Wængonguī mōnō īmonte nānō piinte panguīmāmo ante wæyōmonte tōmengā Wengā īñōmō angā beyænque quēwēnguīmō īmōmpa.

2

Pabodo Tetadōnica īñōmō nānō cædō

¹ Mōnitō tōññāmīni ēñēedāni. Mōnitō mīnitō weca mōni ēñacæ pōñedē mōni cædinō wīl ōnonque impa, ante mīnitō do ēñēmīnīpa. ² Mōnitō do mīni ēñēnīnō bai mōnitō wēēñēñedē Pidipoto īñōmō quēwēñōmōnite māñīñōmō quēwēñāni mōnitō īmōnite wēnæ wēnæ cædāni beyænque wæwente intamōnīpa. Adodāni mōnitō īmōnite, Mīnitō wēnæ wēnæ cæmīni īmīnīpa, ante tedewēñāni ēñēnīnque wætāmōnīpa, ante mīnitō adobai ēñēmīnīpa. Ayæ mīnitō weca ponte quēwēñōmōnite waodāni tæiyæñāni mōnitō īmōnite Baa ante, Mīnitō apænedāmai incæmīnīpa, ante wææ ānāni incæte Wængonguī mōnitō tōnō godongāmæ cæcā beyænque tōmengā ingantedō ante watapæ mōni apænedō ante mīnitō īmīnite guīñēñāmai apænetāmōnīpa.

³ Edæ mōnitō, Wængonguī ingante pōñēmīni īnīnque waa īmāimpa, ante mīnitō īmīnite nanguī apænemōni inte wīl babæ wapiticæ pōñēnīnque apænemōnīpa. Wīl wentamō entawēnīnque pōñente apænemōnīpa cæmīnīi. Ayæ adobai, Mīnitō oda cæcæmīnīpa, ante cædāmai inte mōnitō wīl wapiticæ apænemōnīpa. ⁴ Wæætē Wængonguī mōnitō īmōnite apænedīnque, Waa cæmīni abopa, ānīnque, Mīnitō Itota ingantedō ante botō watapæ apænedō ante nē apænemīni ēñencædānīpa, ante angā ēñēnīnque mōnitō nē apænemōni īmōnīpa. Mōnitō, Waodāni mōnitō īmōnite waa acædānīpa, ante cædāmai inte wæætē, Wængonguīnque mōnitō īmōnite waa acæcāimpa, ante cædinque apænemōnīpa. Edæ tōmengā, Æbānō entawēmīnīi, ante mōnō entawēñōmō ante nē acā ingampa. ⁵ Wadāni nāmā beyænque ante, Waa tedemōni ēñēnīnque mōnitō īmōnite wæætē pōnō cæcædānīpa, ante babæ cædāni bai mōnitō īñōmō dicæ māñōmāinō ante mīnitō īmīnite babæ cætāmōniyaa. Māñōmāinō ante do ēñēmīnīpa. Ayæ, Mōnitō wīl mīnitō godonte æinta ante beyæ apænetāmōnīpa, ante do ēñēmīnīpa. Æbānō cætāmōnīpa, ante Wængonguī nē acā ingampa. ⁶ Waodāni mōnitō īmōnite waa acædānīpa, ante mōnitō dicæ āmōnitawogaa.

Ayæ, Mīnitō incæ wadāni incæ mōnitō īmōnite waa acædānīpa, ante dicæ āmōnitawogaa. ⁷ Edæ, Itota Codito nānō da godongaīmōni īñōmōni inte mōnitō mīnitō īmīnite, Pōñōmīni ænīnque quēwēncæmōnīpa, āmōni bai waa incædōnīpa. Wæætē mīnitō weca quēwēnīnque mōnitō wāñā nānō wēñæñāni guiyāñāni inānite ædæmō cædā bai adobai mīnitō īmīnite cætāmōnīpa. ⁸ Mīnitō īmīnite nanguī pōni waadete pōñēmōni inte mōnitō, Itota ingantedō ante Wængonguī nānō watapæ apænedō ante mīnitō īmīnite apænedīnque watapæ totāmōnīpa. Ayæ mīnitō nō mōni nē waademīni īñōmīnite mōnitō mīnitō beyæ quēwentāmōnīpa. Ayæ mīnitō beyæ wæmōni incæ adobai watapæ tobaīmōnīpa. ⁹ Mōnitō tōññāmīni ēñēedāni. Nanguī pōni mōni cædinō ante mīnitō do ēñēmīnīpa. Itota ingantedō ante Wængonguī nānō watapæ apænedō ante mōnitō mīnitō weca quēwente apænedīnque, Mōni quēwēngæīmpa, ante wīl eyepæ godō wædō ante dicæ antāmōniyaa. Wæætē edæ, Mīnitō wædāmai incæmīnīpa, ante mōnitō itædē incæ woyowotæ incæ tōmēmōni nanguī cædinque ænte quēwentāmōnīpa.

10 Minitō nē wede pönēmīni weca quēwēninque mōnitō tæiyæ waēmō ēwocamōni inte nō cæte quēwēñōmōnite mīnitō, Wēnæ wēnæ cæmīnīpa, ante ædō cæte anguīmīni. Wæætē mōnitō cædinō adinque mīnitō, Mōnitō æbānō quēwēmōni īmōnī, ante do amīni inte nē apænēmīni īmīnīpa. Wængonguī adobaī ante do acā ingampa. 11 Edæ waocā mæmpocā tōmengā wēñænāni īñōnānite tōmengā, Mīnitō ēñenguīmīni, ante odōmengā baī mōnitō adobaī mīnitō tōmāmīni īñōmīnite adocanque adocanque ingante, Bitō ēñenguīmi, ante odōmonte apænetamōnīpa. Mānōmaī cætāmōnīpa, ante mīnitō do ēñēmīnīpa. 12 Mīni quēwēnō adinque Wængonguī tocæcāimpā, ante cædinque mīnitō tæiyæ waēmō quēwencæmīnīpa, ante mōnitō nanguī apænetamōnīpa. Ayæ, mīnitō mānōmaī cæte quēwencæmīnīpa, ante waadete apænetamōnīpa. Ayæ adobaī mōnitō wæætē wæætē apænedinque mīnitō īmīnite adodō ante ancaā apænetamōnīpa. Wængonguī īñōmō, Botō Awēnē Odeye nempo quēwēninque mīnitō botō ñāō ēmōñōmō botō tōnō godongāmæ quēwencæmīnīpa, ante tōmengā mīnitō īmīnite aa pedinque apænte ængampa.

13 Ayæ adobaī mōnitō Wængonguī nānō angainō ante mīnitō īmīnite apænemōni ēñēninque mīnitō ō ænte do pönēmīnitapa. Nāwangā Wængonguī nānō angainō impa, ante adinque mīnitō, Wīi waodānique nāni angainō impa, ante pōnēninque wæætē, Nāwangā Wængonguī nānō angainō impa, ante pōnēninque ō æmīnitapa. Īninque mīnitō nē wede pönēmīni inte Wængonguī nānō angainō entawēmīni beyænque nanguī cæmīni īmīnīpa, ante ēñēninque mōnitō Wængonguī ingante cōwē waa ate pōnente apænemōnīpa. 14 Oodeabæ īñōmō Wængonguī ingante godongāmæ nāni pōnencabo īñōmō tōmengā nempo quēwēñōnānite oodeoidi tōmēnāni īnānite togænte pānāni wædāni baī mīnitō mōnitō tōniñamīni īñōmīni mīnitō ōmæ īñōmō nē quēwēnāni incæ mīnitō īmīnite adobaī cædāni wæmīnitapa. Mānōmaī cædāni wædinque mīnitō Oodeabæ īñōmō Wængonguī ingante godongāmæ nāni pōnencabo wædāni baī adobaī wæmīni bamīnitapa.

15 Oodeoidi īñōmō Wængonguī beyæ nē apænegaināni īnānite wænōnāni wængadānīpa. Ayæ ate tōmēnāni pæināni īñōmō Itota Codito ingante wænōnāni wængacāimpā. Ayæ ñōwodāni adocabodāni incæ mōnitō īmōnite adobaī togænte wido cædānitapa. Mānīnāni nāni cædinō adinque Wængonguī tōmēnāni īnānite ædō cæte waa aquingā. Adodāni incæ waodāni tōmānāni īnānite pīnte quēwēnōnānīpa tōō. 16 Edæ oodeoidi īnāmaī īnāni īnānite, Codito ængā beyænque mīnitō quēwencæmīnīpa, ante apænedāmaī incæmīnīpa, ante cæcæte ante mānīnāni oodeoidi incæ mōnitō īmōnite Baa āninque wææ cædānīpa tōō. Mānōmaī cōwē wēnæ wēnæ cædinque tōmēnāni wæætē wæætē nāni wēnæ wēnæ cædincoo idæwaa cædānīpa. Idæwaa ī Īninque Wængonguī nānō ænguī bate pīlmāmo tōmēnāniya do pongatīpa.

Tetadönitenteidi weca Pabodo ēñacæ pōinente wæcampā

17 Incæte mōnitō tōniñamīni ēñēdāni. Tōmēnāni ānāni beyæ mōnitō mīnitō īmīnite emō cæte godinque wīi wantæpiyæ ante gotamōnīpa. Godinque mīnitō īmīnite adāmaī īmōni incæte mōnitō mīnitō beyæ ante cōwē pōnentamōnīpa. Mīnitō īmīnite nanguī aīnente wæmōni inte mōnitō, Æbānō cæte goquīmōnīi, ante pōnēninque nanguī cætāmōnīpa. 18 Edæ mīnitō weca pōinente wætāmōnīpa. Botō Pabodobo īñōmo inte wæætē wæætē nō pōinēmo intabopa. Mōnitō pōinēmōni incæte Tatāna wæætē mōnitō īmōnite wææ cæcā wætāmōnīpa. 19 Mōnō Itota Codito nānō ponguionæ tōmengā weca ongōninque mōnitō æbānō ante beyæ watapæ bacæimpā, ante pōnēmōni īmōnīi. Wīi mīnitō beyænque toquīmōnīi. Edæ nē pönēmīni īñōmīni inte mīnitō do mōni

nē watapæ todömīni imīnitapa. Ayæ waodāni tæi ēmonte gānā cædinque poganta ænte todāni bai mīnitō beyænque ante mōnitō nē toquīmōni imōnīpa. ²⁰ Nāwangā impa. Waa pōni cæmīni īninque mīnitō mōni nē waa amīni īnōmīni inte mōni nē watapæ todömīni imīnīpa.

3

¹ Mānōmaī beyæ mōnitō, Mīnitō imīnite adāmaī inte awædō, āninque, Ædō cæte godōmenque wānō cōmōni inguīmōnīi, ante pōnēninque mōnatō adomōnaque Atēna īñōmō ongonguēnēmōna imōnāpa, ante pōnente wætāmōnāpa. ² Ayæ Timoteo nē mōnō tōniñcā ingante mīnitō weca ante da pōnōmōna pongantapa. Tōmengā īñōmō Wængonguī tōnō godongāmæ cædongā īñongante Itota mōnō Codito ingantedō ante mōnō watapæ apænedō ante ēñencædānīmpa, ante odōmonte apænedongā ingampa. Tōmengā mīnitō imīnite, Mīni wede pōnēnō ante tæi ongonte quēwēedāni, ante ayæ, Wampo pōnēninque tæi piñænte cæddāni, ante ædæmō apæncæcāmpa, ante mōnatō tōmengā ingante da pōnōmōna pongantapa. ³ Wadāni mīnitō imīnite quiēmē cædāni caate wæmīni incæte tōmāmīni wadō pōnēnāmaī inte ñimpo cædāmaī incæmīnīmpa, ante cædinque Timoteo ingante da pōnōmōna pongantapa. Mōnō imonte cōwē mānōmaī cædāni caate wæquēnēmō imōmpa, ante mīnitō do edonque pōni ēñēmīnīpa. ⁴ Ayæ mīnitō weca mōni quēwēñedē mōnitō mīnitō imīnite apænedīnque,

Mōnō imonte quiēmē bai togænte panguīnānidō anguēnē, ante wæætē wæætē apænetāmōnīpa. Edæ mīnitō ēñēnō bai mānīnō do batīmpa.

⁵ Mānōmaī beyæ botō, Ædō cæte godōmenque wānō cōmo inguīmoo, ante, Mīni wede pōnēnō æbānō impa, ante botō ēñencæboīmpa, ante Timoteo ingante da pōnōmo pongantapa. Wēnæ awēnē, Oda cæe, ante nē ānewēnongā īñōmō mīnitō imīnite, Oda cæedāni, angā ēñēninque mīnitō wabānō ēñēmīnīmpa, ante botō ancaī guīñente wætābopa. Mānōmaī ēñente cæmīni īninque mōnitō cædinō wō ēwente babāīmpa, ante pōnentābopa.

⁶ Incæte Timoteo mīnitō weca quēwēninque ñōwoque mōnitō weca ocæ ēmænte pongantapa. Mīni wede pōnēnō ante apænedīnque tōmengā, Wede pōnēnānīpa, angantapa. Ayæ, Nē waadete pōnēnāni inānīpa, ante apæncæcā ēñentāmōnāpa. Mīnitō mōnatō beyæ cōwē waa pōnēmīni imīnīpa, ante tōmengā apæncæcā ēñentāmōnāpa. Ayæ mōnatō mīnitō imīnite aīnēmōna inte wæmōna bai mīnitō adobāi mōnatō imōnate aīnēmīni inte wæmīni imīnīpa, angantapa.

⁷ Mānōmaī beyæ mōnitō tōniñamīni ēñēedāni. Quiēmē beyæ wæmōna incæ ayæ mōnatō imōnate togænte pānāni wæwēmōna incæte mōnatō mīni wede pōnēnō beyænque wæætē wampo pōnente batāmōnāpa. ⁸ Mīnitō mōnō Awēnē ingante ñimpo cædāmaī pōnēmīni beyænque mōnatō ñōwo wampo pōnente bai quēwēmōna imōnāpa. ⁹ Mōnatō mōnō Mæmpo Wængonguī weca ongōninque mīnitō beyæ nanguī watapæ tomōna inte wæætē apænemōnāpa. Incæte mīnitō beyæ ante Wængonguī ingante ædō cæte waa ate pōnente eyepæ apænequīmōnaa. ¹⁰ Mīnitō mīni wede pōnēnō ante æbānō ayæ wīi eyepæ pōnēmīni, ante wæmōnīpa. Īninque, Mīnitō imīnite wæætē adīnque mōnitō odōmonte apænemōni ēñēninque mīnitō eyepæ pōnencæmīnīmpa, ante cædinque mōnitō woyowotæ itædē Wængonguī ingante nō nangūi pōni apænemōni imōnīpa.

¹¹ Wængonguī mōnō Mæmpo incæ mōnō Awēnē Itota Codito tōnō mōni goquīnō ante tōinō pīnonte bai cæda ate mīnitō weca gocæmōnīmpa. ¹² Mōnitō mīnitō imīnite godōmenque waadete pōnēmōni bai mōnō Awēnē Itota pōnō cæcā ate mīnitō adobāi mīnitō weca wacā ingā wacā ingā godōmenque godōmenque waadete pōnencæmīnīmpa, āmōnīpa. Ayæ waodāni tōmānāni

inänite godömenque waadete pönencæminimpa, ämönipa. ¹³ Tömengä pönö cæcä beyænque mīnitō tæimō entawente incæminimpa, ämönipa. Edæ mönō Awënë Itota quināni nē tæiyæ waemō ewocadāni tōmānāni tōmengä tōnō godongämæ poncædānimpā. Tömēnāni nāni pōñedē mīnitō iñōmō Wængonguī mönō Mæmpo weca pōmīni adinque tōmengä ædō cæte, Wēnæ wēnæ cæminī imīnīpā, ante anguingāā. Mīnitō tæiyæ waemō ewocamīni incæminimpā, ämönipa.

4

Wængonguī waa acæcäimpa, ante mönō quēwēnō ante

¹ Mōnitō tōniñamīni eñeedāni. Adodeque ayæ apænequimōni imönipa. Mīni quēwēnō ante Wængonguī waa acæcäimpa, ante mönitō, Iīmaī quēwēedāni, ante do wææ odōmonte apænemōni eñēmīnitawo. Iīnīnque mīnitō Ao ante quēwēnōmīni imīnīpā. Nōwo iñōmō mönitō Awënë Itota emōwo ante apænedinque mīnitō imīnīte, Mānīnonque ante gomonga cæte quēwencæminimpā, ante ancaā apænemōnīpā.

² Awënë Itota nānō äno ante eñente cædinque mönitō mīnitō imīnīte wææ äninque, Iīmaī cæedāni, antamönipa. Mānīnō möni wææ ante odōmonte apænedō ante mīnitō do eñēnīmīnīpā. ³ Wængonguī nānō äno iñōmō iīmaī impā. Mīnitō iñōmō tæiyæ waemō ewocate quēwenguēnēmīni imīnīpā. Wacā nānōogæ ingante godō towente cædāmaī inte edæ önonque mīni nānōogænque quēwenguēnēmīni imīnīpā. ⁴ Onguīñæmīni tōmāmīni iñōmō, Botō moncæboimpā, ante cædinque mīnitō, Æbānō cæte nānōogæ æmo ate Wængonguī tōnō waodāni waa aquīnānīi, ante eñenguēnēmīni imīnīpā. Mīnitō, Tæiyæ waemō ewocadinque ængæimpā, ante eñenguēnēmīni imīnīpā. ⁵ Wīi wadāni baī, Wængonguī ingante æbānō ingaingā ingāā, ante eñēnāmaī ināni baī onquiyænque ante nāni towēnonque ante pōñēnāmaī quēwencæminimpā. ⁶ Mānīnō ante nē pōnengā iñōmō, Botō tōniñacā nānōogængā ingampā, ante pōñēninque tōmengä nānōogæ ingante towente cædāmaī iīnīnque tōmengä ingante wēnæ wēnæ cædāmaī incæcäimpa.

Iīmaī wēnæ wēnæ cædāni inänite Awënë Itota pancæcäimpa. Wēēnēñedē mānīnō ante mīnitō imīnīte apænedinque do wææ angamönimpā. ⁷ Edæ Wængonguī mönō imonte wīi, Towencæminimpā, ante apænte ængacäimpa. Wæætē, Mīnitō tæiyæ waemō ewocate quēwencæminimpā, ante tōmengä mönō imonte apænte ængacäimpa. ⁸ Mānōmaī beyæ æcānō mānīnō ante Pabodo nānō, Iīmaī cæedāni, ante nānō wææ odōmonte apænedō eñēninque Baa äna iñōmō tōmengä wīi waodānique inänite eñēnāmaī inte Baa angā ingampā. Wæætē Wængonguī mīnitō imīnīte nānō Tæiyæ Waemō Önōwoca nē pōnongā ingante eñēnāmaī inte Baa angā apa quēwēmīni.

⁹ Mīni pōnencabo mīni tōniñadāni iñōnānīte mīni waadete pōñēnō ante mönitō quinante yewæmonguimōnīi. Edæ mīnitō tōmēmīni imīnīte, Wacā ingā wacā ingā waadete pōnencæminimpā, ante Wængonguī odōmonte apæñecā eñēmīnitapā tōō. ¹⁰ Nō impā. Māatedōniabæ tōmāmæ iñōmō mönō pōnencabo mönō tōniñadāni tōmānāni inänite do waadete pōñēmīni imīnīpā. Incæte möni tōniñamīni, Mīnitō mānīnō ante gomonga cæte quēwencæminimpā, ante ancaā apænemōnīpā. ¹¹ Mīnitō piyænē cæte quēwencæminimpā. Wadāni, Æbānō cæquēñēnāni ināni, ante cōwē änāmaī incæminimpā. Ayæ, Wæntæye ināmaī inte mīni önopoca cæte quēwencæminimpā. Mānīnō do möni apænedō baī mīnitō, Cæinēmōnīpā, ante cæcæminimpā, ämönipa. ¹² Mānōmaī cæmīni baī

īimō īñō īimō īñō mīni quēwēnō adinque wadāni nē pōnēnāmaī īnāni wæætē mīnitō īmīnite waa acædānīmpa. Ayæ adobaī mīnitō waodāni īnānite, Pōnōmīni æncæmōnīmpa, ante ānewēnāmaī quēwēncæmīnīmpa.

Mōnō Awēnē Itota nānō occæ ēmænte ponguīōnæ

¹³ Mōnitō tōniñamīni ēñēedāni. Nē æmæwo wængaināni īñōmō æbānō baquīnāni, ante mīnitō ēñencæmīnīmpa, ante yewæmōmōnīpa. Wadāni, Mōnō ñāni ōmæmongæīmpa, ante pōnēnāmaī īnāni inte wæwēnāni bai mīnitō wīī adobaī wæwēmīni incæmīnīmpa, ante yewæmōmōnīpa. ¹⁴ Itota æmæwo wæningā incæ ñāni ōmæmonte īnongāīmpa, ante pōnēmō īmōmpa. Itota ingante pōnente nē wængaināni īñōnānite Wængonguī īñōmō mānīnāni īnānite Itota tōnō tōmengā weca ænte māmōngā poncædānīmpa, ante adobaī pōnēmōmpa.

¹⁵ Wængonguī nānō apænedō bai mōnitō īīmaī ante mīnitō īmīnite apænēmōnīpa. Awēnē Itota nānō ponguīōnæ mōnō nē mīimō quēwēmō inte ayæ ongōmō īñōmō mōnō wīī tāno tōmengā weca gocæmōīmpa. Wæætē tōmengā ingante pōnēnīnque nē æmæwo wængaināni inte mānīnāni īñōmō tāno goquīnānidō anguēnē. ¹⁶ Edæ mōnō Awēnē Wængonguī nānō wææ ānonque ante yedæ āñōngā Wængonguī anquedoidi tæiyæ awēnē aa pecæcāīmpa. Wængonguī todompeta nāni ancadeca adocanque we we ōncæ cæyōngā mōnō Awēnē Codito incæ ōōnædē quēwente pō wææncæcāīmpa. Pō wææñōngā tōmengā ingante nē pōnente wængaināni tōmēnāni tāno ñāni ōmæmoncædānīmpa. ¹⁷ Ayæ ate Wængonguī cæcā beyænque mōnō nē mīimō quēwēmō inte ayæ ongōmō īñōmō mōnō tōmēnāni tōnō godongāmæ boguīmancodē æicæmōīmpa. Boguīmancodē æidinque mōnō Awēnē ōōnædē īnō wææ pōñongante mōnō tōmengā ingante bee tencæmōīmpa. Īnīnque cōwē Awēnē weca quēwēncæmōīmpa. ¹⁸ Mānōmaī beyæ, Mōnō Awēnē Codito incæ ōōnædē quēwente pō wææncæcāīmpa, ante pōnēnīnque wampo pōnencædānīmpa, ante cædinque mīnitō wacā ingā wacā ingā ædæmō apæneedāni.

5

¹ Ñōwo mōnitō tōniñamīni ēñēedāni. Æōnædō mānīī baquīī, ante mīnitō īmīnite ædō cæte yewæmonguīmōnīī. ² Edæ mōnō Awēnē Itota nānō ponguīōnæ īñōmō nē awēmō ængā woyowotæ īñontobæ pō guicā bai īñontobæ baquīnō anguēnē, ante mīnitō tōmēmīni waa ēñēmīnīpa edæ. ³ Waodāni, Mōnō piyænē cæte guīñēnāmaī quēwēmōmpa, ante nāni tedeyedē ēnēngā īñontobæ wēñæ nantate wæcā bai tōmēnāni adobaī īñontobæ ñāni ōmāe ēwēnguīnō baquīnō anguēnē. Īnīnque ædō cæte wodīī wīnonguīnāni.

⁴ Incæte mīnitō mōnitō tōniñamīni ēñēedāni. Mānīōnæ nāni wæwente ēōnæ nē awēmō ænōngā pō guicā bai īñontobæ Īnque bayonte mīnitō wīī wēmō īñōmō quēwēmīni inte guīñēnāmaī incæmīnīmpa. ⁵ Mīnitō Wængonguī wēñæmīni īmīni Īnque ñāō īñōmō tōmāmīni quēwēmīni īmīnīpa. Mōnō cōwē wentamō īñōmō cædōnāni bai wīī īmōīmpa. ⁶ Mānōmaī beyæ mōnō wīī wadāni mō ñōnāni bai mongæīmpa. Wæætē mōnō ñāni ōmæmōnīnque nāmā wææ ante quēwēmō ingæīmpa. ⁷ Edæ tōmēnāni nē mōnāni īñōmō woyowotæ mōnāni īnānīpa. Ayæ wadāni tī nāmæ bedīnque nē quīdī quīdī dowænte īnāni īñōmō woyowotæ bete badānīpa. ⁸ Incæte mōnō ñāō īñōmō cægōmō inte nāmā wææ ante quēwēmō ingæīmpa. Tæīneta wææ wēñate bai cædinque Itota ingante mōnō wede pōnēnō ante mōnō waadete pōnēnō ante mōnō entawente quēwēngæīmpa. Tæīneta ocabogata wææ encate bai

cædinqwe mōnō edæ, Wængonguī ængā beyænque quēwencæmōimpa, ante pōnēnō ante mōnō ēwocate quēwengæimpa. ⁹ Edæ Wængonguī nānō ænguī bate pīnguimāmo ante tōmengā, Wīl wæwencæminimpa, ante mōnō imonte apænte ængacæimpa. Wæætē mōnō Awēnē Itota beyæ tōmengā mōnō imonte ængā beyænque quēwencæmōimpa. ¹⁰ Tōmengā, Botō tōnō quēwencæminimpa, ante mōnō beyæ wængacæimpa. Ininqwe mīl imō incæ wænte imō incæ mōnō cōwē tōmengā weca quēwencæmōimpa. ¹¹ Mānōmaī beyæ mīnitō iñōmō do cæmīni baī gomonga cæedāni. Wampo pōnencædānimpa, ante cædinqwe mīnitō wacā ingā wacā ingā ædæmō apænedinqwe, Æmæwo pægaimīni inte tæi pīñænte cæedāni, ante odōmonte apæneedāni.

Mōnō tōnñāāni inānite Pabodo nānō ānō

¹² Nōwo mōnitō tōnñāmīni ēñēedāni. Mīnitō imīnite iīmaī apænemōnīpa. Mīnitō weca nē nangūi odōmonte apæneedāni iñōnānite mīnitō tōmēnāni inānite waa acæminimpa, āmōnīpa. Edæ Awēnē Itota apænte nānō ænināni inte tōmēnāni, Mīnitō iīmaī waa quēwēedāni, ante mīnitō imīnite nē aadāni inānīpa. ¹³ Tōmēnāni nāni cædō beyænque mīnitō tōmēnāni inānite godōmenque nangūi waa amīni inte waadete pōnēedāni. Mīnitō wacā ingā wacā ingā piyænē cæte quēwēedāni.

¹⁴ Mōnitō tōnñāmīni ēñēedāni. Mīnitō imīnite iīmaī ante ancaa āmōnīpa. Wæntæye ināni inānite wææ ante apæneedāni. Guīñente ināni wampo pōnencædānīpa, ante tōmēnāni inānite ædæmō apæneedāni. Æmæ pōnēnāni tōnō godongāmæ cæedāni. Wadāni tōmānāni inānite mīnitō waadete ee cæedāni āmōnīpa.

¹⁵ Æcæminque ingante wadāni wēnæ wēnæ cædāni adinqwe mīnitō Baa āmīni beyænque mānīnāni wæætedō wæætē nāēmæ wēnæ wēnæ cædāmaī incædānīpa. Wæætē wacā ingā wacā ingā cōwē waa cæcæmōnīpa, ante pōnēnīnque cæedāni. Ayæ wadāni tōmānāni inānite adobaī cæedāni.

¹⁶ Mīnitō cōwē watapæ tote quēwēedāni. ¹⁷ Wængonguī ingante woyowotæ itædē apænete quēwēedāni. ¹⁸ Mīni quēwenganca quīēmē baī ba incæte mīnitō cōwē Wængonguī ingante waa ate pōnēnīnque apæneedāni. Edæ Itota Codito nempo nē quēwēmīni inte mānīnō ante mīnitō beyæ ante Wængonguī nānō ānō impa.

¹⁹ Wængonguī Ōnōwoca nānō cæinō adinqwe mīnitō tōmengā ingante ædō cæte, Cædāmaī Ie, ante wææ angūimīni. ²⁰ Wængonguī beyæ nē apæneedāni nāni apænedō ēñēnīnque mīnitō badete todāmaī quēwēedāni. ²¹ Wæætē woadāni nāni apænedō tōmānō ante ēñēnīnque, Æbānō i, ante edonque ēñengæimpa, ante cædinqwe mīnitō, Nō nāni ānō i, Babæ nāni ānō i, ante pōnēnīnque do ēñencæminimpa. Waa ānō impa, ante ēñēnīnque mīnitō mānīnō ante ō ænte baī quēwēedāni. ²² Quīēmē wēnæ wēnæ cæquīl, ante adinqwe mīnitō Baa ante gomō aedāni.

²³ Wængonguī incæ nē piyænē cædongā inte pōnō cæcā beyænque ædæmō tæiyæ wæmō entawēmīni incæminimpa. Awēnē Itota mōnō Codito tōmengā nānō pōnguinganca mīnitō iñōmō Wængonguī pōnō cæcā ate mīnitō mīmō incæ ōnōwoca incæ baonga incæ wēnæ wēnæ cædāmaī incæminimpa. ²⁴ Wængonguī nānō nē apænte ænīmīni iñōmīnite tōmengā mīnitō imīnite cōwē pōnēnīnque tōmengā nānō ānō baī ædæmō cæcæcæimpa.

Pabodo, Waa quēwencæminimpa, angampa

²⁵ Mōnitō tōnñāmīni iñōmō ēñēedāni. Mīnitō mōnitō beyæ ante Wængonguī ingante apæneedāni. ²⁶ Mīnitō pōnencabo iñōmīnite mōnitō tōmāmīni waa

quēwencæmīnīmpa, ante waadete pōnēnīnque āmōnīpa. ²⁷ Edæ Awēnē Itota ēñēñongā botō mīnitō īmīnīte wææ ante, īī yewæmōīnta adīnque mīnitō mīnī pōnencabo īñōmīnīte adocanque īngante āmīnī tōmānānī ēñēñōnānī tōmengā adotaa adīnque apānecā ēñencædānīmpa, āmopa. ²⁸ Awēnē Itota mōnō Codito mīnitō īmīnīte waadete pōnō cæcæcāīmpa, ante botō mānīnque ante yewæmōmopa.

2 Tetadönitenteidi inänite Pabodo cadota ante ayænta nänö yewæmongainta

Pabodo, Waa quëwëedäni, ante apæncampa

¹ Botö Pabodobo inömo imopa. Mönö töninada Tidibänö tönö Timoteo tönö godongämæ apænete ate yewæmömo aedäni. Tetadönica inömo quëwëmini inte Codito ingante godongämæ mini pönencabo inömini inte ëñeedäni. Minitö mönö Mæmpo Wængongui nempo ayæ mönö Awënë Itota Codito nempo quëwëmini iminipa. ² Mönö Mæmpo Wængongui tönö mönö Awënë Itota Codito waadete pönö cæda ate minitö ganë entawencæminipa, ante yewæmömönipa.

Itota Codito pongä ate Wængongui apænte pancæcäimpa

³ Mönitö töninämäni ëñeedäni. Mini wede pönönö godömenque pæte bai impa, ante ayæ tömämäni wacä ingä wacä ingä mini waadete pönönö waa pönä pæte bai iminipa. Mänömaï beyæ mönitö minitö beyæ ante Wængongui ingante cöwë waa ate pönëninque apænequënömöni imönipa. ⁴ Wadäni minitö iminite quiëmë togæwëninque wënæ wënæ cädäni caate wæmini incæ quiëmë beyæ wæwëmini incæ minitö wæntæye inämaï inte ee cæminipa. Mänömaï beyæ Wængongui ingante godongämæ nänä pönencabo wayömö wayömö quëwëñönänite mönitö incæ mini cæinö ante waa adinque cöwë apænemönipa. Ayæ mini wede pönönö ante cöwë apænemönipa. ⁵ Mäninö ante beyæ Wængongui apænte nänö panguinö ante, Tömengä cöwë nö panguingänö angüenë, ante do ëñëmompä. Mänömaï beyæ minitö Wængongui Awënë Odeye nempo guicæte ante eyepæ waa pönä bacæminipa. Minitö do mäninö Wængongui nempo mini öönæde quëwënguino beyæ wæwente quëwëminipa.

⁶ Wængongui në nö cædongä ingampa. Edæ wadäni minitö iminite wënæ wënæ cädäni ate wæwëmini inömini tömengä wæætë tömënäni inänite wënæ wënæ cæcä ate wæwencædänimpa. ⁷ Ayæ minitö në wæwëmini inöminite pönö cædinque tömengä mönitö imönite adobai pönö cæcä ate tömämö mönö wæwënamäi baquimö imoppa.

Mönö Awënë Itota tönö tömengä anquedoidi në tæi piñænte cädäni tönö öönæde ongonte pö gonga bæcote bai godongämæ wææñönäni tömämö ayömö mänömaï bacæimpa. ⁸ Mönö Awënë Itota ingantedö ante mönö watapæ apænedö ante në ëñënamäi cädäni inömo, Wængongui æbänö ingaingä ingäa, ante ëñënamäi inäni inönänite tömengä mäninäni inänite pante cæcæcäimpa. ⁹ Wængongui adodäni inänite päninque æmæwo wo ewencæcäimpa. Tömënäni inömo Awënë Itota weca tömengä nänö tæi piñæmämö waëmö pönä nänö emöñömö mäninömo pö guidämäi incædänimpa, ante Wængongui wææ cæcæcäimpa. ¹⁰ Awënë Itota nänö ponguionæ Wængongui mänömaï cæcæcäimpa. Mänionæ Itota quinäni inömo në tæiyæ waëmö ewocate quëwënanäni inte tömengä ingante waa acædänimpa, ante poncæcäimpa. Ayæ tömengä në pönënäni weca pöñongante tömënäni tömänäni, Tömengä waa pönä cæcä amönipa, ante watapæ ancædänimpa, ante cæcæte ante poncæcäimpa. Ayæ minitö adobai mönitö apænedö ante ëñëninque pönëmini inte tömengä quimäni inömo mönitö tönö adobai cæcæminipa, ante cæcæte ante poncæcäimpa.

¹¹ Mänömaï beyæ mönitö münitö beyæ ante woyowotæ itädë Wængongui ingante apænemönipa. Wængongui, Mini quëwenguinö ante quëwencæminimpa, ante münitö iminite apænte ængä ininque mönitö, Münitö eyepæ waa pöni bacæminimpa, ante mönö Mæmpo Wængongui ingante apænemönipa. Münitö, Mönitö waa cæcæmönimpa, ante mini äno bai tömänö ante Wængongui nänö tæi piñæmämo inte inque cæcæcäimpa, ante apænemönipa. Ayæ mini wede pönëno beyæ münitö cæquïnö tömänö ante tömengä adobai inque cæcæcäimpa. ¹² Mönö Awënë Itota pönö cæcä beyænque münitö waa pöni cæmini adinque wadäni tömengä ëmöwo ante waa atë apænecædänimpa. Ayæ tömengä mänömaï cæcä beyænque wadäni, Münitö waa quëwëmini iminipa, ante münitö iminite waa acædänimpa. Mönö Mæmpo Wængongui tönö mönö Awënë Itota waadete pönö cæda bai mänömaï bacæimpa, ante mönitö mäninö ante Wængongui ingante apænemönipa.

2

Mönö Awënë Itota nänö ponguïönæ cëbänö baquïi, ante

¹ Mönitö töniñamini ëñëdäni. Mönö Awënë Itota Codito nänö ponguïönö ante ämönipa. Ayæ tömengä cëbänö, Botö weca pöedäni, ante gæcä goquïmö imompä, ante apænedinque münitö iminite iïmaï ämönipa. ² Münitö weca quëwënanäni pancadäniya iñömö, Mönö Awënë nänö ponguïönæ do batimpa, ante änanäni ëñëninque münitö idiquibæ pönënamai bacæminimpa, ämönipa. Ede mönitö Wængongui beyæ në apænemöni inte möni apæneyedë incæ möni odömönte apæneyedë incæ möni yewæmointaa yewæmönëdë incæ æyedëmë incæ apænemönipa, ante mäninäni iñömö mönitö imönitedö ante apænedinque, Pabodoidi mäninö ante apænedäni inänipa, ante tededäni ëñëninque münitö guïñente wædämaï iedäni ämönipa. ³ Æcämenque angä cëbämë nänö äno ëñëninque münitö oda cæte godämaï iedäni.

Ede waodäni tæiyæñäni Wængongui ingante Baa ante wadæ godäni ate wacä në wiwa cæcä inte pongä acæimpa. Ayæ tömengä pongä ate mönö Awënë nänö ponguïönæ bacæimpa. Mäningä në wiwa cædongä iñömö Wængongui æmæwo nänö në wo ëwenguingä ingampa. ⁴ Æcämenque ingante, Wængongui ingampa, ante waodäni waa adinque ædæ wææninque apænedäni incæ ayæ quïëmë adinque, Wængongui impa, ante waa adinque apænedäni incæ mäningä në wiwa cædongä iñömö wængonguidi nänö në änonänäni tömänänäni inänite Baa äninque nämä ængö cæte bai cæcä inongampa. Wængongui oncö tæiyæ waëmö oncönë adocä pö guite tæ contadinque, Botö tömëmö wængonguïmo inömo imopa, angä ingampa.

⁵ Botö münitö weca quëwëñedë mäninö ante münitö iminite apænetabopa. Wiï ëñëmünitawo. ⁶ Adocä në wiwa cædongä iñömö Wængongui nänö äönæ mäniönæque edonque pongä acædänimpa. Ininque quïnö beyæ ante mäningä ayæ pönämaï ingäa, ante münitö ñöwo do ëñëmünipa. ⁷ Adocä awëmö nänö möni cæpämö incæ do ëñente cædäni inte waodäni tæiyæñäni quïëmë wiwa i, ante do cædänipa. Incæte tömënanäni inänite, Wiwa cædämaï iedäni, ante në wææ cædongä iñömö adodö ante godömönque wææ cæcä ingampa. Në wææ cæcä ingante guiquënë wacä wæætë, Mäninganca idæwaa, äninque ö ængä wadæ gocæcäimpa. ⁸ Mäniñedë në wiwa cædongä iñömö edonque pongä acædänimpa. Incæte Awënë Itota pöninque tömengä nänö öö guëmämämo inte mäningä ingante wæñongä wænguingä ingampa. Tömengä nänö apäite ëmönongä inte pongä adinque në wiwa cædongä guiquënë æmæwo wo ëwente bacæcäimpa. ⁹ Wiwa cædongä ingante Tatäna nänö tæi

piñæmāmo inte da pönongä ponguingä ingampa. Tömengä nānō mā cæ bai quïemē bamönengæ cæcä adinque waodāni, Æbānō cæcää, ante oda cæte gocædānimpa. ¹⁰ Ayæ quïemē wënæ wënæ nānō cæpāmo beyæ nē æmæwo wo ewente baquīnāni iñōmō oda cæte godānīpa. Edæ Wængonguī nāwangä nānō angaiñō ante waadete pönēnāmai iñōnānite Wængonguī tōmēnāni inānite, Quëwencæminimpa, ante ædō cæte ænguingää. Mānōmai beyæ tōmēnāni æmæwo wo ewente bacædānimpa.

¹¹ Mānōmai beyæ, Tōmēnāni nē wīwa cædongä wapiticæ nānō angaiñō ante pönencædānimpa, ante cædinque Wængonguī tæi piñænte cæcä beyænque tōmēnāni babæ ante pönente oda cædānīpa. ¹² Edæ Wængonguī nāwangä nānō angaiñō ante nē pönēnāmai iñināni inte wæætē, Mōnō wentamō mongæmāmo incæ waa impa, ante watapæ todināni iñōnānite Wængonguī mānināni tōmānāni inānite apænte ante pancæte ante mānōmai cæcampa.

Wængonguī, Quëwencæminimpa, ante nē apænte cænīnāni

¹³ Mōnitō tōniñamīni mīnitō mōnō Awënë Itota nānō nē waademīni inte eñēedāni. Inguipoga badōnāmai iñedē Wængonguī mīnitō imīnite do, Quëwencæminimpa, ante apænte ængacāimpa, ante mōnitō mīnitō beyæ ante tömengä ingante waa ate pönēninque cōwē apænequēñēmōni imōnīpa. Tömengä iñōmō, Botō Önōwoca pōnō cæcä ate tæiyæ waēmō ewocamīni inte mīnitō nāwangä botō angaiñō ante pönēmīni beyæ quëwencæminimpa, ante mīnitō imīnite ængacāimpa. ¹⁴ Itota ingantedō ante mōnitō watapæ apænedō beyæ Wængonguī, Quëwencæminimpa, ante mīnitō imīnite apænte ængacāimpa. Tömengä, Awënë Itota Codito ñāō nānō emōnō bai mīnitō adobai ñāō bai entawencæminimpa, ante cædinque mīnitō imīnite apænte ængacāimpa.

¹⁵ Mōnitō tōniñamīni eñēedāni. Mānōmai beyæ tæi ongonte quëwēedāni. Edæ mōnitō önōne inte tedemōni eñēñimīni incæ yewæmōinta yewæmōmōni adinque eñēñimīni incæ mīnitō mōnitō odōmonte apænedinō ante ñimpo cædāmai quëwēedāni. ¹⁶ Mōnō Mæmpo Wængonguī mōnō imonte nē waadecä inte pōnō ædæmō cæcä ate mōnō, Tömengä weca cōwē quëwenguiñmō imōmpa, ante pönēninque wampo pönēmō inte quëwēmōmpa. Ayæ, Waa bacæimpa, ante mōnō pönēmōmpa. Inique tömengä tōnō mōnō Awënë Itota Codito, Iīmai cæcædaimpa, ante amōnīpa. ¹⁷ Tōmēna ædæmō apænedā beyænque mīnitō wampo pönēninque tæi ongonte quëwencæminimpa. Ayæ tōmēna cæda beyænque mīnitō æmæwo pægaīmīni inte tōmää mīni waa cædō ante mīni waa añō ante tæi piñænte cæcæminimpa.

3

Mīnitō mōnitō beyæ ante Wængonguī ingante apæneedāni

¹ Adodeque ante iñque yewæmōmōnīpa. Mōnitō tōniñamīni eñēedāni. Mīnitō mōnitō beyæ ante Wængonguī ingante iīmai apæneedāni. Mōnitō wayōmō wayōmō gote mōni apæneyōmō mōnō Awënë nānō angaiñō ante nangūi ināni quingæ eñencædānimpa, ante apæneedāni. Ayæ, Mīnitō bai wadāni adobai iī añō ante Wængonguī ingante waa ate pönēninque æncædānimpa, ante māninō ante Wængonguī ingante apæneedāni. ² Wadāni nē wënæ wënæ cædāni inte wīwa cædāni iñōmō tōmēnāni mōnitō imōnīte wënæ wënæ cædāmai, ante māniī beyæ ante mīnitō adobai Wængonguī ingante apæneedāni. Edæ wīi waodāni tōmānāni pönēnāni inānīpa.

³ Incæte mōnō Awënë cōwē ædæmō aacä inongä ingampa. Tömengä pōnō cæcä ate mīnitō æmæwo pægaīmīni inte tæi piñænte cæcæminimpa. Ayæ,

Tatäna münitö iminite wänæ wänæ cædämaï incæcäimpa, ante Wængongui adobaï aacä incæcäimpa. ⁴ Münitö iminite möni wææ änö ante eñëningue do cæmini incæ godömenque adodö cæcæminimpa, ante Wængongui pönö cæcæcäimpa, ante mönitö do pönëmönipa. ⁵ Wængongui nänö waadete pönënö ante eñencæminimpa, ante mönö Awënë taadö eñente odömönte bai pönö odömöngä ate münitö münönë eñencæminimpa. Itota Codito pönö cæcä beyænque münitö wæntæye inämaï inte ee cæcæminimpa.

Cæcæte ante mönö cæquënë

⁶ Mönitö töninämïni eñëedäni. Mönitö mönö Awënë Itota Codito emöwo ante münitö iminite wææ ämönipa. Mönö töninädäni pancadäniya wæntæye inäni adinque ayæ möni odömönte apænedö mini eñente æninö bai quëwënämaï inäni adinque münitö inömö mäninäni tömänäni inänite gomö aedäni.

⁷ Mönitö cægä bai münitö æbänö adobaï cæquënëmini iminipa, ante edæ tömëmïni do eñëmïnipa. Mönitö münitö weca quëwënedë wæntæye inämaï quëwentamönipa. ⁸ Ayæ adobaï æcæmenque cængui ante näni pönöni æningue mönitö önonque ænämaï inte wæætë paga cæte cætamönipa. Ayæ, Münitö cænguinque ante pönëningue wædämaï incæminimpa, ante mönitö, Tömëmöni cængui cæncæmönimpa, ante woyowotæ itædë nanguï cædinque quëwentamönipa. ⁹ Mönitö münitö iminite, Möni quëwengæimpa, ante, Cængui tönö mönitö owoquincö pönömïni æncæmönimpa, ante änämaï intamönipa. Mönitö mänömaï ante bai waa incædönimpa. Wæætë æbänö mönitö cætamönii, ante adinque münitö adobaï cæcæminimpa, ante cætamönipa.

¹⁰ Edæ möni münitö weca quëwënedë incæ mönitö münitö iminite, Iïmaï cæedäni, ante wææ antamönipa. Adocanque në mönö cæquënëö ante, Wïi cæinëmo, angä inongante münitö tömengä ingante cængui godönämaï inguënëmini iminipa.

¹¹ Münitö weca pancadäniya önonque cædämaï a ongonque quëwënäni inänipa, ante änäni eñëmönipa. Adodäni në Baa äninque cædämaï inäni inte wæætë, Wädäni æbänö quëwënänii, ante godö wæntæ godö wæntæ tededäni inänipa.

¹² Mönitö mäninäni inänite mönö Awënë Itota Codito emöwo äninque, Münitö inömö inö inö inö nanguï cæte quëwëedäni, ante wææ ämönipa. Tömëmïni cæte beyænque münitö cængui ænte cæncæminimpa, ante ancaa apænemöni imönipa.

¹³ Mönitö töninämïni münitö guiquënë, Quiëmë waa impa, ante wæntædämaï inte cöwë cæedäni. ¹⁴ Mönitö münitö iminite ii yewæmöntaa möni yewæmongainö ate adocanque eñënëmaï cæcä ininque, Tömengä æcänö ingäa, ante aedäni. Ayæ tömengä guingo imonte wæcæcäimpa, ante tömengä ingante gomö aedäni. ¹⁵ Münitö adocä ingante, Wïi wacä ingampa, ante pönëningue wæætë tömëmïni biwïidi inänite ante bai tömengä ingante wææ ämïni eñencæcäimpa.

Waa quëwencæminimpa, ante Pabodo angampa

¹⁶ Mönö Awënë Itota në piyænë cædongä incæ tömengä pönö cæcä ate münitö æbæmenque bamïni incæ cöwë piyænë cæte quëwencæminimpa. Mönö Awënë münitö tömämïni weca a ongoncæcäimpa, ämopa. ¹⁷ Botö Pabodobo ñöwo tömömo önopoca yewæmöninque, Münitö iminite waa pönëmopa, ante yewæmömo aedäni. Pabodo nänö yewæmöntaa impa, ante eñencæminimpa, ante cædinque botö tömanta yewæmöninque mänömaï bai yewæmömopa. ¹⁸ Mönö Awënë Itota Codito münitö iminite waadete pönö cæcæcäimpa, ante botö mäninque ante yewæmömopa.

1 Tímoreo

ingante Pabodo cadota ante tänota nänö

yewæmongainta

Tímoreo ingante Pabodo yewæmongampa

¹ Botö Pabodobo inömo imopa. Itota Codito nänö nē da godongaïmo imopa. Itota Codito waa pöni nänö inö bai mönö adobai bacæmöimpa, ante pönëmompa. Ìninqe Itota Codito mönö nē pönënongå tönö Wængongui mönö imonte nē Ængaingä tönö botö imote äna eññömotē da godöna godïmo imopa.

² Tímoreo eñëmi, Bitö acæbiimpa, ante bitö imite yewæmömopa. Edæ mönö wede pönënö ante apænebo nē eñënimi inte bitö Itota Codito quimi badinque näwä botö wëmi bai inömi imipa. Ìninqe botö, Mæmpo Wængongui tönö Awënë Itota mönö Codito tönö bitö imite waadete pönö waa cæda ate bitö gänē entawencæbiimpa, ämopa.

Wadäni wapiticcæ näni odömonte apænedö

³ Botö Mäatedöniabæ ìfömö pöningue bitö imite, Epeto ìfömö ee ongöe, nangui antabopa. Mäniñömö wadäni babæ wapiticcæ näni odömonte apænedö ante nē odömonte apænedönäni inänite bitö, Minitö godömenque mäninö ante odömonte apænedämai ìedäni, ante ämi eñencædänimpa. Mänömainö ante do botö äninö bai ñowo adodö ante bitö imite ämopa. ⁴ Ayæ, Dodäni önonque ante näni tedegainö ante pönënamai quëwëdäni, ante bitö ancæbiimpa. Ayæ adobai tömënäni wæmæidi tæiyænäni ante pönëninque, Æmönänidö ingainäni, ante ancaa änewëñönäni bitö tömënäni inänite, Minitö mäninö ante pönënamai ìedäni, ancæbiimpa. Edæ mäninö näni tedewënö beyæ tömënäni, Æbänö ì, ante nangui wæætëdö wæætë änewëñänipa töö. Wæætë edæ, Wængongui nänö cædö ante wede pönëninque mönö cæquenëno guiquënë tömënäni näni tedewënö beyæ pönömenque cætimpa.

⁵ Mänömainö ante äninque botö, Tömënäni mímö iïmai entawëninque waadete pönencædänimpa, ante ämopa. Edæ mímö waëmö pöni entawëninque tömënäni Wængongui ingante wede näni pönënö beyæ waadete pönencædänimpa. Ayæ adobai nämä apænte adinque wentamö mongænämai entawënäni inte tömënäni waadete pönencædänimpa. ⁶ Ìnæmpa pancadäniya mäninö ante eñëninque Baa ante ñimpo cæte wadæ godinque önonque ante quëwëñänipa. ⁷ Möitee wodi nänö wææ yewæmongainö ante odömonte apæneinëmönipa, ante nē änäni incæ tömënäni näni odömonte apæneyedë quinö apænedänii, ante eñëñämai inänipa töö. Adobai quiëmë ante apænedinque tömënäni, iïmai impa, iïmai impa, ante apænedäni incæte eñëñämai inäni inte apænedänipa.

⁸ Möitee wodi nänö wææ yewæmongainö ante adinque nöingä cæmö ìninqe mäninö tömengö nänö wææ angainö ìfömö waa ante imaimpa, ante do eñëmompa. ⁹ Möitee wodi nänö wææ yewæmongainö ante Wængongui wii nē nö cædäni beyæ pönö wææ angacäimpa. Wæætë nē eñëñämai cædäni tönö wadäni mäninö ante eñëñäni incæ nē godömenque wënæ wënæ cædäni tönö tömënäni beyæ pönö wææ angacäimpa, ante do eñëmompa. Ayæ adobai Wængongui ingante Baa ante nē quëwëñäni tönö wënæ wënæ cædäni beyæ wææ angatimpa. Nē tæiyæ waëmö entawëñämai inönäni beyæ ayæ adobai Wængongui ingante nē badete todönäni beyæ wææ angatimpa. Mæmpocä ingante wäänä inante nē wænönäni beyæ ayæ adobai waocä ingante nē

plinte wænönäni beyæ wææ angatimpa. ¹⁰ Nänöogængä inämai iñongante nē towänäni beyæ ayæ adobaī onguñænäni nāna onguñæncaya guëa towänäni beyæ wææ angatimpa. Nē cæte quëwengä bacæcäimpa, ante waocä ingante nē godonte ænäni beyæ ayæ adobaī nē babæ ænäni beyæ wææ angatimpa. Wadäni inänite, Nö ämönipa ëñëdäni, ante nē babæ ænewänäni beyæ ayæ adobaī nō odömonte apænedö incæ nē wadö ante cædäni beyæ wææ angatimpa. Mäninäni tömänäni ëñencædänimpa, ante Wængonguī mäninö ante pönö wææ angacäimpa, ante ëñëmompa.

¹¹ Edæ Wængonguī ñäo apäite ëmongampa, ante odömonte apænecæbiimpa, ante tömengä nē waa inongä inte edæ tömengä watapæ nänö apænedö ante pönongä æntabopa. Ayæ nō nänö odömonte apænedö ante Wængonguī nänö pönö angainö ante adodö äno impa.

Wængonguī waadete nänö pönö cædö ante

¹² Itota Codito mönö Awënë pönö cæcä beyænque botö tæī ëwocabo batabopa. Tömengä iñömö botö imote waa adinque, Bitö nē pönëmi inte cöwë ædæmö cæbi imipa. Inique bitö botö beyæ wadäni inänite nē cæbi bacæbiimpa, ante pönö cægacäimpa. Mänömai beyæ botö tömengä ingante waa ate pönente apænebopa. ¹³ Botö wëenëñedë Itota Codito ingante nē godö babæ ante ænewengäimo imopa. Tömengä ingante nē pönänäni inänite wënæ wënæ cæquimo, ante nē togænömo inte botö nē plinte quëwengäimo imopa. Incæte botö nē pönänämai inömo inte, Quinö cæquī, ante ëñänämai inte cæbo adinque Wængonguī, Quëwencæbiimpa, ante pönö waadete waa cægacäimpa. ¹⁴ Mönö Awënë botö imo nanguī waadete pönö cæcä adinque botö Itota Codito nempo quëwëningue nē wede pönëmo badinque nē waadete pönëmo bagaboimpa.

¹⁵ Iīmai ante nō pönī nāni äno näwangä ante impa, ante ämo ëñëmaimīnīpa. Itota Codito iñömö, Wënæ wënæ cæmīni iminīte æmo beyænque quëwenguimīni, ante inguipoga wææ pongacäimpa. Tömengä mänömai cæcä incæte wadäni wënæ wënæ cædäni iñönäni botö tömëmoque godömenque wënæ wënæ nē cægäimo imopa. ¹⁶ Mänömai beyænque tömëmoque godömenque wënæ wënæ cægäimo iñömote Itota Codito pönö waadete angä beyænque quëwengaboimpa. Wëenëñedë botö bai nē wënæ wënæ cægäināni inänite adinque Itota Codito, Botö weca cöwë wantæpiyæ nāni quëwëningue pancadäniya botö imote pönenguināni inänīpa, ante do ëñengacäimpa. Inique tömengä, Botö nē waadete cædinque ee abo imopa, ante tömënäni inänite odömoncæte ante cædinque tömengä botö Pabodobo imote mänömai pönö waadete waa cægacäimpa.

¹⁷ Mönö Wængonguī iñömö cöwë wænāmai nē quëwengäingä inongä inte tömengä iincayæ ate adobaī cöwë wænāmai inte Awënë Odeye inongä ingampa. Tömengä awëmö iñömö quëwënongå iñongante mönö waocabo tömengä ingante ædö cæte aquī. Tömengä wææte tömäa nē ëñengäingä inongä ingampa. Inique tömengä adocanque Wængonguī inongä iñongante mönö tömengä ingante cöwë waa aquimö angüenë. Tömengä ingante, Bitö ñäo bai ëmömi inömi imipa, ante apænedinque mönö ñine cædāmai inte cöwë watapæ angæimpa. Cöwë iīmai babaimpa, ante Amëë, ämopa.

¹⁸ Tímoteo, botö wëmi ëñëmi. Nē pönänäni wëenëñedë Wængonguī beyæ apænedinque bitö imitedö ante nāni angainö bai adobainö ante apænedinque botö iīmai ämopa. Edæ tömënäni nāni angainö ante ëñente cædinque bitö tontadoidi nāni cæbai adobaī bitö cæquënëno ante guñënämai

inte wæætē tæi ewocate nanguī cæcæbiimpa. ¹⁹ Wængonguī ingante cōwē wede pōnente incæbiimpa. Adobaī mīmō entawēmi inte nāmā apænte pōnēninque wentamō mongænāmaī inte bitō cōwē quēwencæbiimpa. Edæ mīni pōnencabo iñōmīnite pancadāniya nāmā apænte ānāmaī ināni inte Codito ingante nāni pōnēnīno ante dobæ ñimpo cæte wadæ godānimpa. ²⁰ ñimēneo tōnō Adecantodo adobaī Wængonguī ingante ñimpo cædinque wadæ godatapa. Ñinque, Tōmēna, Wængonguī ingante mōnō wēnæ wēnæ ante babæ ānāmaī ingæimpa, ante ēñencædaimpa, ante cædinque tōmēna inate Tatāna nempo pædæ godontabopa.

2

Wængonguī ingante mōnō ñīmaī apænecæimpa

¹ Mīni pōnencabo iñōmīnite botō tāno ñīmaī āmopa. Wængonguī ingante mīni apæneyedē quiēmē mīni æinēnō ante apænecæmīnimpa. Tōmengā ingante waa ate pōnente apænedinque waodāni tōmānāni beyæ ante apænecæmīnimpa āmopa. ² Awēnē odeyeidi incæ pōnōmenque awēnēidi tōmānāni incæ mōnō imonte waa aayōnāni mōnō piyænē cæte quēwengæimpa, ante cædinque mīnitō tōmēnāni beyæ ante Wængonguī ingante apænecæmīnimpa. Edæ Wængonguī ingante mōnō cæquēnēnō ante ayæ waodāni inānite mōnō cæquēnēnō ante mōnō waa cæte quēwencæmōimpa, ante Wængonguī ingante awēnēidi beyæ ante apænecæmīnimpa. ³ Mānōmaīnō ante mōnō apænedō iñōmō waa impa. Wængonguī mōnō imonte nē Ængāingā inongā inte mānīnō mōnō apænedō ante waa acampa. ⁴ Waodāni tōmānāni nāwangā botō angāinō ante ēñencædānimpa, ante Wængonguī pōnō ængā beyænque quēwencædānimpa, ante nē waa cæinēnongā ingampa.

⁵ Edæ adocanque Wængonguī inongā ingacāimpa. Tōmengā waodāni inānite adinque, Wadāni baī inānipa, ante nānēnē quēwengacāimpa. Ñinque Itota Codito nē Waocā ēñagaingā inte tæcæguedē adocanque nē pongā inte, Waodāni Wængonguī guiddēnāni badinque adoyōmō bee tente godongāmæ quēwencædānimpa, ante pōnō cægacāimpa. ⁶ Tōmengā iñōmō mōnō imonte ante godonte æncæte ante cædinque nāmā wepæ incæ godoncæte ante nē pongā ingacāimpa. Wængonguī, ñiōnæ, ante nānō angāiōnæ incæ ñinque bayonte mānīnō Codito nānō cægāinō ante, Nō impa, ante tōmānāni inānite nē odōmongā ingacāimpa. ⁷ Mānīnō ante bitō nē apænebi bacæbiimpa, ante Wængonguī botō imote angā ēñēninque botō tōmengā nānō nē da godōmo batabopa, ante nāwangā āmopa. Edæ babæ ānāmaī ñimpo. Ayæ nāwangā mōnō pōnēnō ante Wængonguī, Wadāni oodeoidi ināmaī ināni adobaī pōnencædānimpa, ante cædinque botō imote angā ēñēninque botō tōmengā nānō nē odōmōnte apænedōmo ñimpo.

⁸ Wayōmō wayōmō godongāmæ mīni pōnencabo ongonte mīnitō onguīñæmīni iñōmō nē piñāmaī ñimīni inte Wængonguī ingante apænemīni adinque botō waa tobaimpa. Wadāni inānite nē piinte wæætedō wæætē ānāmaī inte wæætē tæiyæ waēmō entawēmīni inte Wængonguī ingante pædæ æmpote apænecæmīnimpa, ante aīnēmopa.

⁹ Ayæ onquiyæmīni iñōmō waēmō weocoo mongæmīni incæte mīnitō, Botō waēmō weocoo mongæmo adinque wadāni botō imote waa acædānimpa, ante ānāmaī inte nāmā baō ante guīñēñate pōnēninque weocoo ædæmō wēñate mongænecæmīnimpa. Mīnitō ocaguī que que cæmīni incæte oodo badōi tōnō pededamō nāni āmō wente cædāmaī incæmīnimpa. Waēmōncoo nāni nanguī

godonte ænincoo nāni waa acoo ante mīnitō mongænāmaī incæmīnīmpa. ¹⁰ Wæætē edæ Wængonguī ingante, Bitō Wængonguī Awēnē imidō anguēnē, ante nē watapæ apænemīni imīni īnīnque mīnitō mīni apæneī bai cædinque mīni waa cæquēnēnō ante pōnencæmīnīmpa. Mānōmainō ante pōnente quēwencæmīnīmpa, ante adobai aīnēmopa. ¹¹ Wadāni apæneyōnāni mīnitō onquiyæmīni tededāmaī inte ēamonca ongonte ēñencæmīnīmpa. Ayæ nē āmōni mōni ānō ante ēñēnīnque wadō pōnēnāmaī inte do ēñente cæcæmīnīmpa, āmopa.

¹² Godongāmæ mīni pōnencabo weca ongote mīnitō onquiyæmīni īñōmō odōmonte apænedāmaī incæmīnīmpa, ante botō wææ āmopa. Ayæ adobai onguīñæmīni imīnite onquiyæmīni īñōmō, Īmaī cædāni, ante ānāmaī incæmīnīmpa, ante wææ āmopa. Wæætē tededāmaī ēñencæmīnīmpa. ¹³ Wængonguī edæ onguīñængā Adāō ingante tāno badōnīnque ayæ onquiyængā Eba ingante badongacāīmpa. ¹⁴ Ayæ Tatāna wīi Adāō ingante wapiticæ māocā oda cægacāi. Wæætē Eba ingante apēiticæmē māocā oda cædinque do wēnæ wēnæ cæcā bagacāīmpa. ¹⁵ Incæte onquiyæñāni Wængonguī ingante godōmenque pōnēnīnque cōwē waadete pōnēnāni īnōnāni inte nē nō pōnente tæiyæ waēmō entawēnāni īnīnque tōmēnāni wēñænāni īnānite māñōnānite Wængonguī wææ aacā beyænque quēwencædānīmpa, āmopa.

3

Godongāmæ mōnō pōnencabo īñōmonte nē aadāni

¹ Īmaī ante nāni ānō nō pōni ante impa. Godongāmæ mōnō pōnencabo īñōmonte, Aacæboīmpa, ante nē angā īñōmō tōmengā waa cæquīnō ante pōnō cæīnængā ingampa. ² Incæte wadāni, Wēnæ wēnæ cæcā ingampa, ante ānāmaī incædānīmpa, ante cædinque nē aacā wæætē waa quēwenguēngā ingampa. Edæ tōmengā nānōogæñā adodanque nē manguiwengā incæcāīmpa. Tōmengā tōō pōnente nō quēwengā incæcāīmpa. Nōinō cæcæīmpa, ante pōnēnīnque nāmā wææ ante nē cæcā incæcāīmpa. Waodāni botō Īmote waa acædānīmpa, ante cædinque waa quēwencæcāīmpa. Waodāni īnānite, Botō oncōnē pō cædāni, ante cōwē nē watapæ angā incæcāīmpa. Ayæ tōmengā nē waa odōmonte apænecā incæcāīmpa. ³ Nē aacā ti nāmæ bete beyæ quidi quidi dowænāmaī quēwenguēngā ingampa. Wacā ingā do piinte cædāmaī īnongā inte wæætē ædæmō cæcā inte quēwencæcāīmpa. Tōmengā piyænē cæcā incæcāīmpa. Tōmengā godonte nāni æinta ante waadete pōnente wædāmaī incæcāīmpa āmopa.

⁴ Nē aacā tōnō godongāmæ quēwēnāni īnānite tōmengā waa aaquēngā ingampa. Tōmengā wēñænāni īnānite ædæmō aacā beyæ tōmēnāni wæætē tōmengā ingante waa adīnque tōmengā nānō ānō ante ēñente cæte quēwencædānīmpa. ⁵ Edæ nē aacā tōnō godongāmæ quēwēnāni īnānite tōmengā wīi waa aacā īnīnque Codito ingante godongāmæ mōnō pōnencabo īñōmonte ædō cæte waa aacā inguingā.

⁶ Itota Codito ingante ñowo tæcæ pōnēningā wīi nē aacā baquēngā ingampa. Edæ mānōmaī īnongā īñongante mīnitō, Nē aabi Īmipa, āmīni īnīnque tōmengā nāmā incæ, Adoboque waa cæbo Īmopa, ante pōnengā Īmaingampa. Wēnæ awēnē mānōmaī pōnengā beyænque Wængonguī tōmengā ingante apænte nānō panguiñō bai nē aacā ingante adobai apænte pāmaingampa. ⁷ Ayæ adobai Itota Codito ingante nē pōnēnāmaī īnāni nē aacā ingante adīnque, Tōmengā nē waa cæcā ingampa, ante acædānīmpa, ante cædinque

tömengä waa quëwenguënengä ingampa. Tömengä waa cædämaï ingä adinque tömënäni wæætë, Tömengä wënæ wënæ cæcä ingampa, ante pïlmäinänipa. Tömengä waa cædämaï ingä pïlnäni Ìninqe wënæ awënë ìñömö, Tömengä oda cæcæcäimpa, ante godö cæcä ate tömengä do wënæ wënæ cæcä babaingampa.

Mönö pönencabo tönö godongämæ në cædäni

⁸ Mönö pönencabo tönö godongämæ në cædäni ìñömö adobaï, Mönö eyepæ cæte quëwëmö Ìninqe wadäni mönö ìmonte waa acædänimpa, ante cædinque waa quëwenguënänäni Ìnänipa. Në cædäni nämä näni änö baï ante nö cæcædänimpa. Tömënäni yowepæ wædenque ti nämæ biinömæ näni ämæ wïi nanguï becædänimpa. Babæ cæmöni incæte godonte näni æinta cöwë godömenque æncæmönimpa, ante wadäni näni pönëwënonque ante ìnänäni wæætë mäninö ante pönënamäi incædänimpa. ⁹ Edæ nämä apænte pönëninque wentamö mongænämaï entawënäni inte tömënäni Wængonguï nänö wë wodonte angainö ante tæcæ ëñëninque tömënäni, Nö pöni mönö pönëno impa, ante cöwë wede pönënguënänäni Ìnänipa. ¹⁰ Ayæ mäninäni Ìnänite mïnitö, Quïnö cæmïni ìmïni, ante ëñencæte ante cöwä acæmïnimpä. Ayömïni tömënäni cöwë waa cæte quëwënäni adinque mïnitö wæætë tömënäni Ìnänite, Mïnitö mönö pönencabo tönö godongämæ në cæmïni bacæmïnimpä, ante ämïni bacædänimpa.

¹¹ Tömënäni nänöögæidi Ìnänite wadäni waa acædänimpa, ante cædinque adobaï eyepæ cæte waa quëwenguënänäni Ìnänipa. Mäninäni ìñömö wadäni Ìnänitedö ante babæ änämaï incædänimpa. Wæætë adodäni cöwë töö pönente nö quëwënäni incædänimpa. Tömënäni cöwë pönëninque, Ìmaï cæcæmönimpä, ante näni äninö baï ædæmö cæcædänimpä. ¹² Mönö pönencabo tönö godongämæ në cæcä ìñömö tömengä nänöögænä adodanque në manguïwengä incæcäimpa. Tömengä wëñænäni Ìnänite ayæ tömengä tönö godongämæ quëwënäni Ìnänite tömengä në waa aaquënegä ingampa. ¹³ Mönö pönencabo tönö godongämæ në cædäni ìñömö, Në waa cædinäni Ìnänipa, ante adinque mönö tömënäni Ìnänite waa ämompä. Ayæ mänömaï waa cædinäni inte mäninäni, Itota Codito ingante pönëedäni, ante quïñänämaï apænecædänimpä.

Wë wodonte näni angainö edonque pöni batimpä, ante

¹⁴ Quingæ bitö weca acæ poncæboimpä, ante pönëmo incæte botö, Ìmaï cæe, ante bitö ìmite yewæmömopä. ¹⁵ Botö wæætë wïi quingæ pömo Ìninqe bitö, Mönö Wængonguï tönö godongämæ quëwencabo ìñömö inte mönö æbänö cæquï, ante bitö ëñencæbiimpä, ante yewæmömopä. Edæ Wængonguï në Quëwengainä quïmö ìñömö inte mönö Codito ingante godongämæ mönö pönencabo ìñömö mönö cobacadewæ tæi ongö baï tömengä nö nänö angainö ante ñimpo cædämaï inte wæætë wææ cæmö ìmompä. ¹⁶ Ìmaï ante nö pöni impä. Wængonguï ayongä mönö æbänö waa cæte quëwenguï, ante Wængonguï wë wodonte nö nänö angainö incæ ñwoyedë edonque pöni mönö ëñëno ìñömö waa pöni impä. Ìmaï impä.

Wængonguï inguipoga ìñömö ponte ëñadinque Waocä bacä agadänimpä.

Tömengä ingantedö ante Wængonguï Önöwoca, Mäningä waëmö quëwëngä ingampa, angacäimpä.

Tömengä ingante Wængonguï anquedoidi do agadänimpä.

Wabæca wabæca näni quëwencabo Ìnänite Itota nänö cægäinö ante apænecatimpä.

Tömämæ quëwënäni pancadäniya tömengä ingante pönente bagadänimpä.

Ayæ tömengä ñäö bai ëmöniñque öönædë iñömö ocæ ëmænte gogacäimpa. Mänömainö ante nani ämotamini äno bai impa.

4

Në pönënnäni pancadäniya wadæ goquinnäni inänipa, ante

¹ Wængongui Önöwoca iimaï ante edonque pöni apænecampa. Ìnque iñönæidi bayonte Codito ingante në pönënnäni incæ pancadäniya ñimpo cæte tömengä ingante pönënnämaï bacædänimpa. Ìnque önöwocaidi incæ në, Wapiticæ oda cæcædänimpa, ante në wënæ wënæ cædönäni miñæ tee empo gocædänimpa. Goyönäni wënæidi nani odömonte apænewënö ëñente cæquinnäni inänipa. ² Në babæ ännäni në wadö tedete wadö cædäni iñömö tömënnäni mäninö wënæidi nani odömonte apænewënö ante në odömonte apænedäni inänipa. Ìnnäni guiquënë tömënnäni nämä nani apænte pönëno ante ömætawënäni inte wënæ wënæ nani cædinö ante wædämaï quëwënnäni. ³ Mäninäni iñömö waodäni inänite wææ äniñque, Minitö, Botö nänöogængä, ante onquiyængä ingante mönämäï iedäni, ännäni. Ayæ adobai mönö waa cængui adinque pancaa ante, Cænämäï iedäni, ante wææ ännäni. Ìñæmpa Wængongui edæ tömää cængui badongacäimpa. Tömengä, Botö imote waa ate pönente apænedinque në pönënnäni iñömö botö nö angainö ante ëñënnäni inte cængui ænte cæncædänimpa, angampa.

⁴ Edæ Wængongui nänö badongaincoo tömancoo waa pöni i iñonte mönö Wængongui ingante waa ate pönente apænedinque tömää cængui æmö ìnque pancaa ante ædö cæte Baa ante ænnämaï inguii. ⁵ Ìñæmpa Wængongui nänö angainö beyænque ayæ tömengä ingante waa ate pönente apænemö beyænque tömää cængui iñömö tæiyæ wæmö cængui bapa.

Itota Codito ingante në waa cæcä

⁶ Bitö godongämæ mini pönencabo iñöminite bitö mäninö botö äno ëñëniñque bitö töniñadäni inänite wæætë odömömi Ìnque Itota Codito beyæ në waa cæquimi incæbiimpa. Ayæ Wængongui nänö angainö ante mönö pönëno ante ëñente quëwëniñque bitö waa mönö odömonte apænedö ante në ëñente cædämi inte edæ tömo cænte bai në nö cæbi incæbiimpa.

⁷ Babæidi bai në tedewënnäni inänite ëñënnämaï inte bitö onquiyænäni picænäni incæ önonquedö ante nani tedewënnö ante ëñënnämaï incæbiimpa. Wæætë, Wængongui ayongä mönö waa cæte quëwencæte ante cædinque bitö iñömö tæi ewocabo badinque cæcæboimpa, ante godömenque godömenque cæcæbiimpa. ⁸ Mönö baö tææmö bacæimpa, ante cædinque mönö ñimpo cædämaï inte adodö adodö cæmompä. Mäninonque ante mönö cædö guiquënë wædenque waa impa. Wæætë Wængongui ayongä mönö waa cæte quëwëmö ìnque mönö ñöwoyedë waa quëwëniñque adobai ìncayæ ate waa quëwenguimö incæmöimpa. Ìnque mäninö ante mönö cæquino iñömö tömää beyæ nö waa pöni i ìnque, Mönö tæi ewocaquimö, ante cædinque mönö ñimpo cædämaï inte adodö adodö cæcæimpa.

⁹ Mänömainö ante nö pöni nani äno näwangä ante impa, ante ämo ëñëmaimäni. ¹⁰ Mänömaï beyæ tæi piñæninque nanguï cæmö imompä. Edæ, Wængongui në Quëwengäingä beyænque mönö watapæ quëwengæimpa, ante pönengaimö imompä. Tömengä iñömö mönö waocabo tömämö imonte, Quëwenguimäni, ante në Ængängä incæ tömengä ingante në pönëmö iñömonte nö ængä beyænque mönö quëwengæimpa.

¹¹ Mäninö botö änö ante bitö tömënäni inänite, İımaı cæedäni, ante odömonte apænecæbiimpa, ämopa. ¹² Bitö wıı picæmi incæte æcämenque İfongante bitö, Botö İmote piınte adämaı incæcäimpa, ante pönente quëwencæbiimpa. Wæætê edæ bitö Wængongui ingante nê pönënäni beyæ ante, Botö cæbaı tömënäni adobaı cæcædänimpa, ante İımaı cæcæbiimpa. Apænebi incæ waa cæte quëwëmi incæ waadete pönëmi incæ wede pönëmi İmi incæ nō pönente waa cæbi incæ bitö, Botö baı bacædänimpa, ante cædinque bitö cædö ante odömömi adinque tömënäni adobaı cæcædänimpa. ¹³ Botö pönämaı inguinganca bitö ongönömö İfömö Wængongui angä êñente nani yewæmongainö adinque adodö ante ædæmō apænebi êñencædänimpa. Ayæ Wængongui ingantedö ante apænebi inte odömonte apænebi êñencædänimpa. Mäninonque cæte ongoncæbiimpa. ¹⁴ Mİni pönencabo İföminite nê aadäni nani Picæncabo İfömö bitonga gampo cædinque Wængongui beyæ apænedinque bitö İmite, Bitö nê aabi badinque nê odömonte apænebi bacæbiimpa, ante pönö apænedänitapa. İninque bitö do nê aabi badinque nê odömonte apænebi bagaiıi inte godömenque godömenque cæcæbiimpa.

¹⁵ Edæ waodäni tömänäni bitö æbänö godömenque waa cæbi İmi adinque êñencædänimpa, ante cædinque bitö mäninonque ante pönëninque godömenque godömenque cæcæbiimpa. ¹⁶ Bitö quëwënö ante, Æbänö quëwëmoo, ante nämä wææ aacæbiimpa. Ayæ bitö odömonte apænedö ante, Botö nō pönëninque odömonte apænecæboimpa, ante wææ cæcæbiimpa. Edæ mänömaı cæte wæntædämaı inte cöwê cæcæbiimpa. Bitö mänömaı cæbi İninque tömëmi nämä incæ wantæpiyæ quëwencæbiimpa. Bitö odömonte apæneyömi nê êñënëni İfömö adobaı bitö cædö beyænque wantæpiyæ quëwencædänimpa.

5

Nê pönënäni inänite æbänö cæcæbiimpa, ante

¹ Onguiñængä picængä wënæ wënæ cæcä incæte tömengä ingante piınte änämaı incæbiimpa. Wæætê tömëmi mæmpocä ingante ante baı tömengä ingante waadete ämi êñencæcäimpa. Edëninäni İfömö tömëmi biwııdi İnänite ante baı tömënäni inänite waadete ämi êñencædänimpa. ² Onquiyænäni picænäni İfömö tömëmi wäänä İnante ante baı bitö tömënäni inänite adobaı waadete ämi êñencædänimpa. Ayæ baquedäni İfömö tömëmi biwinqueidi İnänite ante baı tömënäni inänite waëmö mımönê waadete ancæbiimpa.

³ Owæmpoinäni nê näwangä ömæpodäni inte quëwënanipa, ante tömënäni inänite waa adinque pönö cæcæbiimpa. ⁴ Incæte owæmpoingä wëñænäni næængä İninque nänömoidi næængä İninque mäninäni wæætê tömengä beyæ cæquënenänipa. Edæ mäninäni täno tömënäni tönö godongämæ quëwënanäni inänite waa adinque näëmæ nani cæquëñenö ante, Æbänö cæquıı, ante êñente cæcædänimpa. Mänömaı cædinque tömënäni mæmpoidi tönö mæmæidi tömënäni inänite waadete nani cædi baı İınäni adobaı mæmpoidi tönö mæmæidi inänite näëmæ waadete cæcædänimpa. Edæ mänömaı cædäni adinque Wængongui waa acæcäimpa. ⁵ Nê nō ömæpocä İnongä inte adodanque quëwengä İninque tömengä nê owæmpoingä İnongä inte Wængongui beyænque watapæ quëwengæimpa, ante pönengä ingampa. İtædé incæ woyowotæ incæ tömengä İmpo cædämaı inte, Botö beyæ cæquıımi, ante Wængongui ingante apænete quëwengampa. ⁶ Wæætê owæmpoingä tote quëwengæimpa, ante nämanque pönente nê quëwënongå guiquënë tömengä mıı quëwengä incæte do wænte baı ingampa töö.

7 Töménáni inánitedö ante wënæ wënæ änämaï incädänimpa, ante wææ cædinqwe bitö mäninö botö änö ante adodö ante ämi eñencädänimpa. 8 Æcänö guidénáni inánite pönö cädämaï inaa ayæ tömengä nāni wencabo inánite pönö cädämaï inaa tömengä iñömö Wængonguï nānō angainō monō pönēnō ante do Baa äninque wīi eñente cæcampa. Ayæ nē pönēnāmaï ingä wënæ wënæ cæcä iñongante mäningä iñömö godömenque wënæ wënæ cæcä ingampa töö.

9 Owæmpoinä do tetenta wadepo ganca godömenque nē picänä inönä inte tömēnä nānōgængä wodi ingante nē möninanque quēwēnä ingadäimpa, ante adinque bitö, Wængonguï qui, ante mönō godonte æninta mäninä owæmpoinä nē ænguina incädäimpa, ante tömēnä emöwo ante yewæmoncæbiimpa. 10 Edæ tömēnä wēñænāni inánite waa cädä pædāni inānitawo. Wadāni inánite tömēnä, Botö oncönē pō beedāni, ante waa apænedä inantawo. Wængonguï quinäni iñönānite tömēnä nāmā pönēnāmaï inte waa cædantawo. Nē wæwēnāni inánite adinque tömēnä tömēnāni tönō godongämæ cædantawo. Ayæ, Quiēmē waa cæcæimpa, ante mäninonque ante pönēninque cæte quēwēnantawo. Mänōmaï quēwēnä adinque waodāni, Mäninä nöinä waa cädä inönampa, ante do eñēnāni inānitawo, ante adinque bitö wæætē tömēnä emöwo ante yewæmoncæbiimpa. Ayæ wadāni mäninä bai iñönānite bitö, Wængonguï qui, ante mönō godonte æninta mänimpodānique nē ænguina incädänimpa, ante tömēnäni emöwo ante yewæmoncæbiimpa.

11 Wæætē edæ owæmpoināni wīi picänāni iñönānite bitö tömēnāni emöwo ante yewæmönāmaï inte Baa ancæbiimpa. Ayæ toinente wæwēninque Codito ingante ñimpo cæte wadæ godinque wæætē, Wacā nānōgængä ingante möinēmopa, ante quēwēnānipa. 12 Edæ tömēnāni Codito ingante, Botö bitö beyenque cæcæboimpa, ante täno nāni angainō ante ñimpo cædāni beyæ Wængonguï apænte pangä wæcädänimpa. 13 Ayæ godömenque iūmaï cædānipa. Tömēnāni cädämaï inte wæntæye badinque adobaï wacönē wacönē acæte ante önonque godāni inānipa töö. Ayæ wīi önonque wæntæyedānique badinque tömēnāni, Wadāni æbānō cædāni, ante gote adinque wadāni nāni cædönō ante godö wæntæ godö wæntæ tededāni inānipa. Edæ wīi nāni anguēnēnō ante do änewēnānipa. 14 Mänōmaï beyæ botö owæmpoināni wīi picänāni inánite iūmaï ämopa. Minitö wæætē möninque wēñænāni mäedāni. Ayæ oncönē mīni cæquēnēnō ante cædāni. Wadāni edæ mönō imontedö ante wënæ wënæ nāni tedewēnō ante tededāmaï incädänimpa, ante mīnitö mänōmaï cæte waa quēwēdāni, ämopa. 15 Iñæmpa owæmpoināni pancadāni do Itota Codito ingante emö cæte godinque Tatāna miñæ tee empocæ godānitapa töö.

16 Onquiyængä nē pönängä iñömö tömengä guidénāni owæmpoināni næængä ininque tömengä tömēnāni beyæ cæcæcæimpa. Codito ingante godongämæ mīni pönencabo iñöminite tömengä, Botö guidénāni inánite godömīni æncädänimpa, ante änāmaï incæcäimpa. Mänōmaï cædinqwe Codito ingante mīni godongämæ pönencabo wæætē, Owæmpoināni nāwangä ömæpodāni inānipa, ante adinque tömēnāni inánite godömīni æncädänimpa, ämopa.

17 Wængonguï ingante godongämæ mīni pönencabo iñöminite nē aadāni nāni Picæncabo iñömö nö waa aadāni iñönānite mīnitö tömēnāni inánite waa aquēnēmīni imīnipa. Mänināni Wængonguï nānō angainō ante nē apænedāni inte ayæ nē odömōnte apænedāni iñönānite mīnitö godömenque nangui waa æmēnimpa. 18 Edæ Wængonguï iūmaïnō ante apænecä eñēninque yewæmongadänimpa. “Wagada onguïñængä nē cæcä inte tömentapo æ yacæimpa, ante ämi pinä pinä gawate cægöñongä bitö tömengä önöne wææ wodönedāmaï inte ee abi cæncæcäimpa,” ante yewæmongatimpa. Ayæ

godömenque iimaí ante impa. “Né cæcä iñömö tömengä nänö cædinö beyæ ante né ænguënegä ingampa.” Mänömaí yewæmongadänimpa.

¹⁹ Godongämæ míni pönencabo iñöminí waocä adocanque iñömö bitö imite apænedinque, Mäningä né aacä Picængä iñömö wënæ wënæ cæcantapa töö, ante añongante bitö eññenámaí incæbiimpa. Wææté waoda mënäa né babæ wapiticæ añámaí ina inte bitö imite apænedinque, Tömengä né wënæ wënæ cæcantapa, ante adodö apæneda eññëninque bitö né äna inate eññencæbiimpa. Ayæ waodáni mengäa go adocanque adobaí adodö apænedáni eññëninque bitö né änáni inänite eññencæbiimpa.

²⁰ Né wënæ wënæ cædönáni incæ ñimpo cædámaí inänipa, ante adinque bitö wææté godongämæ ongönáni eññëñönáni mänináni inänite nanguí ancæbiimpa. Godongämæ ongönáni eññëñönáni bitö mänömaí ämi ininque tömënáni wææté guññëninque, Wënæ wënæ mönö cæquinö ante cædámaí incæmöimpa, ante pönencædänimpa.

²¹ Mönö Wængonguí ayongä Itota Codito ayongä Wængonguí nänö apænte æñináni anquedoidi ayönáni botö iimaí ämopa. Mäninö botö äninö ante eññente cædinque bitö, Adoyömö pöní inänipa, ante tömänáni inänite adoyömö godö cæbi incæbiimpa. Wíi adocanque ingante, Botö né waa adími ímipa, ante tömengä ingante wadö cædámaí incæbiimpa. ²² Æcämenque ingante, Mönö pönencabo beyæ bitö né cæbi baquími, ante pönëmi inte bitö tömengäa quingæ gampo cædámaí íe. Edæ quingæ gampo cæbi né cæcä badinque edæ tömengä wënæ wënæ cæcä ininque bitö adobaí tömengä tönö wënæ wënæ cæbi baquëñëmi ímipa. Bitö tömëmique godömenque wënæ wënæ náni cæpámo ante tömänö ante Baa ante waa cæte quëwëe.

²³ Bitö cæinca cædente wæbitawo. Ayæ wantæ wantæ iñö wantæ wantæ iñö wënæ wënæ inte wæbitawo. Ininque wíi æpænque bee ämopa. Wææté biñnömæ wædænque bete quëwëncæbiimpa.

²⁴ Wængonguí nänö apænte angüionæ badämaí iñedé incæ waodáni pancadániya wënæ wënæ náni cægainö do edonque pöní impa. Wadáni guiquëné wënæ wënæ náni cægainö wë wodonte í incæ mäníñedé edonque pöní baquinö angüënë. ²⁵ Ayæ adobaí waodáni waa náni cægainö do edonque pöní impa. Ayæ ñöwoyedé pancaa waa náni cægainö wíi edonque pöní í incæte wíi cöwë wë wodonte ingæimpa. Wææté edonque pöní aquinö angüënë.

6

¹ Waodáni awënëidi náni né ö æñináni inte awënëidi beyænque cæte ñä cæyænte baí né quëwëñáni iñömö tömënáni tömänáni awënëidi inänite waa eññente cæcædänimpa. Iñæmpa tömënáni né pönënáni inte wíi waa eññente cædäni baí wadáni wææté Wængonguí emöwo ante wënæ wënæ ante babæ angüënëñänimpa. Adobaí mönö odömonte apænedinö ante, Wënæ wënæ impa, ante angüënëñänimpa. ² Tömënáni awënëidi iñömö né pönënáni ináni beyænque né cædäni iñömö, Botö töníñacanque inongä inte botö awënë iñömö önonganque ingä awædö, ante piñnámaí incædänimpa. Wææté edæ né cædäni iñömö, Botö cæbo né ængä iñömö né pönengä inongä inte Wængonguí nänö né waadecä ingampa, ante adinque tömënáni awënëidi inänite godömenque waa eññente cæcædänimpa.

Näwä mäincoo ante

Ininque Timoteo eññëmi. Mäninö ante tömënáni inänite odömonte apænedinque bitö adodö adodö ante ancaa ancæbiimpa, ämopa.

³ Pancadániya wadö ante odömonte apænedinque mönö Awënë Itota Codito

nō pōni nānō angainō ante Baa ānānīpa. Ayæ mōnō odōmonte apænēdō ante tōmēnāni Wængonguī ayongā mōnō waa cæte quēwenguēnēnō ante Baa ānānīpa. Īnīnque æcānō mānōmaī Baa āna ĩñōmō ⁴ tōmengā nāmā incæ, Botō gomonga waa ēñēmopa, ante nē pōnēnongā ingā incæte tōmāā ēñēnāmaingā ingampa. Tōmengā nāmanque nānō pōnēwēnō ante wæætēdō wæætē tēdēdinque, Ædēdō ĩ, ante wacā tōnō guēadō guēa āñēwēnte wæcampa. Tōmengā mānōmaī tēdecā beyænque wadāni nē gomonga ēñengā ingante godō piinte adānīpa. Godongāmæ wadodō wadō piinte tedewēnānīpa. Wacā ingā wacā ingā, Bitō wēnæ wēnæ cæbi ĩmīpa, ante ānewēnānīpa. Nāmā nāni wēnæ wēnæ pōnēnonque ante, Wadāni wēnæ wēnæ cædānīpa, ante pōnēwēnānīpa. ⁵ Ayæ ocāidē pōnēnte wentamō wēcādāni inte tōmēnāni Wængonguī nāwangā nānō angainō incæ ēñēnāmaī badānīpa. Īnīnque nāni cabo wacā ingā wacā ingā guēadō guēa apænēte nāni piincabo ĩnānīpa. Ayæ mānīnāni adobaī, Wængonguī ayongā waa cæte quēwēmō beyænque nangūī ēate baquīmō, ante pōnēwēnānīpa.

⁶ ĩñæmpa māincoo quīncoomē ēacā incæte, Mānīnque ēabopa, ante piyænē cæte quēwēnongā ĩñōmō tōmengā Wængonguī ayongā waa cæte quēwengā beyænque watapæ quēwēnongā inte nō nangūī ēacā ingampa. ⁷ Edæ mōnō ĩ ĩnguīpoga ĩñōmō ōmaamō pontamompa. Adobaī ōmaamō inte tao goquīmō ĩmōmpa. ⁸ Incæte mōnō cængūī tōnō weocoo ēamō inte mānīnque beyæ mōnō watapæ quēwenguīnque ĩmōmpa. ⁹ Wadāni guīquēnē, Māincoo nangūī ēainēmōnīpa, ante quēwēnāni inte tōmēnāni wēnæ wēnæ nāni cæīnēmāmo badīnque oda cæte goquīnānidō anguēnē. Mānōmaī cædinque tōmēnāni, Quīnō ōnonque ĩmpa, ante æīnēnte badānīpa. Ayæ wēnæ wēnæ nāni baquinque edæ æīnēwēnāni inte quīēmē incæ tōmēnāni æmæwo ōmæ nāni ēwenguīnonque gocædānīmpa. ¹⁰ Wadāni nāni godonte æīnta waadete pōnēnte nāni wædō beyæ wadō wadō nāni wēnæ wēnæ cæpāmo pompa. Edæ pancadāniya, Mōnō godonte ænguīnta ængæīmpa, ante pōnēnīnque tōmēnāni nāni wēde pōnenguēnēnō ĩmpo cæte wadæ godīnque nāmā nāni cædō beyænque nangūī wæwēnte badānītapa.

Mōnō wēde pōnēnō ante mōnō tæī ēwocate cæcæīmpa

¹¹ Bitō guīquēnē Wængonguīnque ingante nē cædōmi inte mānīnō tōmānō ante ĩmpo cæte wodīi gote baī quēwēncæbiīmpa, āmopa. Wæætē mōnō nō cæquēnēnō ante cæte quēwēncæbiīmpa. Wængonguī ayongā mōnō waa cæte quēwengæīmpa, ante cæcæbiīmpa. Mōnō wēde pōnēmāmo, ante godōmēnque pōnēnte quēwēncæbiīmpa. Wadāni ĩnānīte godōmēnque waadete pōnēncæte ante cæcæbiīmpa. Ayæ tæī piñænte entawēnīnque wæntæye badāmaī inte ee cæcæbiīmpa. Cōwē ædæmō cæte quēwēncæbiīmpa. ¹² Wængonguī ingante mōnō wēde pōnēnō ante mōnō cæquēnēnō ante bitō tæī ēwocate cæcæbiīmpa. Mōnō wænāmaī quēwenguīnō goquīmō, ante pōnēnte ĩmpo cædāmaī incæbiīmpa. Edæ wadāni tæiyænāni ēñēñōnāni, bitō, Wængonguī ingante wēde pōnēnte babopa, ante āñōmi Wængonguī edæ, Mānīnō quēwenguīnō gocæbiīmpa, ante bitō ĩmīte apænte aa pecantapa. ¹³ Wængonguī pōnō cæcā beyænque quīngāmenque incæ tōmānāni quēwēnāni ĩnānīpa. Itota Codito ĩñōmō Pontio Pidato ingante apænedīnque, Quīnō nō ĩmpa, ante edonque pōni apænegaingā ingampa. Edæ Wængonguī tōnō Itota Codito mānōmaīnō ĩngāna ĩñōna botō tōmēna ayōna bitō ĩmīte, ĩmaī cæe, āmopa. ¹⁴ Mōnō Awēnē ĩtota Codito nānō ocæ ēmænte ponguīnganca bitō mānīnō botō wææ ānō tōmānō ante waa ēñēnte cæcæbiīmpa, āmopa. Bitō ēñēnte cædō adīnque

wadāni ædō cæte, Wēnæ wēnæ impa, ante anguinānii, ante pōnente cōwē waa pōni cæcæbiimpa. Mānōmaī ante āmopa.

¹⁵ Wængongui nānō ainenguiōnæ bayonte Itota ocæ ēmænte poncæcāimpa. Mōnō Awēnē Wængongui īñōmō tōmengā adocanque Wængonguinque ingaingā inte nē waa pōni īnongā ingampa. Tōmēnāni awēnē odeyēidi īñōnānīte tōmengā Tæiyæ Awēnē Odeye īnongā ingampa. Ayæ tōmengā īñōmō awēnēidi tōmānāni Awēnē īnongā ingampa. ¹⁶ Tōmengā adocanque nē wantæpiyæ wænāmaī īnongā inte nē Quēwengā ingaingā ingampa. Tōmengā tōmāā ñāō īñōmō quēwēnongā īñongante waodāni ædō cæte tōmengā weca go-quinānii. Tōmengā mōnō waocabo mōnō nē adāmaī ingaingā ingampa. Edæ tōmengā ingante mōnō ædō cæte aquīī. Tōmenganque ingante waodāni tōmānāni waa aquinānidō anguēnē. Tōmenganque cōwē nē tæi piñænongā inte quingāmenque quēwēnāni īñōnānīte tōmengā tōmānāni Awēnē inguingānō anguēnē. Mānōmaī babaiimpa, ante, Amēē, āmopa.

¹⁷ Inguipogaque māincōo nē nanguī ēadāni īnānīte bitō īmaī ancæbiimpa. Nanguī ēamōni inte mōnitō godōmenque waa pōni īmōnipa, ante pōnēnāmaī iedāni. Īñæmpa māincōo mōnō ēadincoo īñōmō quingæ dæ ā apa quēwēnānii. Īnīnque mīni māincōoque ante wīī māincooque ante pōnēedāni. Wæætē, Wængonguinque beyænque watapæ quēwengæiimpa, ante pōnēedāni, ancæbiimpa, āmopa. Edæ, Mōnō quī quīnō dæ ā, ante wæmō adīnque tōmengā mōnō īmonte, Mīni watapæ quēwenguinque, ante tōmāā nē pōnongā ænguīlmō īmopa. ¹⁸ Mānīnāni nē nanguī ēadāni īnānīte bitō, Mīnitō quīnō waa cæquīī, ante mānīnonque cæcæmīnīmpa, ancæbiimpa. Waa mīni cæquīnō ante mīnitō nanguī cæte quēwēncæmīnīmpa. Ayæ do Ao ante mīnitō māincōo mīni ēadincoo pancacooga pædæ godōmīni æncædānie, ancæbiimpa, āmopa. ¹⁹ Mānīnō bai nē cædōnānīque, Mōnō nāmā beyæ ēaquīncoo, ante oōnædē īñōmō do cō cæte bai cædānīpa. Mānōmaī cædinque tōmēnāni, Nō pōni mōnō quēwenguinque impa, ante īncayæ ate æncædānīmpa.

Timoteo ingante, Pabodo iinque wæcæ angampa

²⁰ Timoteo ēñēmi. Wængongui, Wææ aacæbiimpa, ante bitō īmite quīnō pōnongā bitō ō ænīnō ante wææ ae. Tæiyæ waēmō ēwocadāmaī inte wadāni ōnonquedō ante nāni ānōnō ante ēñēnāmaī iē. Adobaī wadāni, Mōnitō ēñente ate nanguī encaīmōni īmōnipa, ante nē babæ ānāni īñōnānīte bitō wadodō wadō nāni ānewēnō ante ēñēnāmaī iē. ²¹ Tōmēnāni nāni ānewēnō ante pōnēnīnque waodāni pancadāniya Wængongui ingante nāni pōnēnīnō ante do ñīmpo cædinque wadæ godīnāni īnānīpa.

Wængongui bitō īmite waadete pōnō cæcæcāimpa, ante botō mānīnque ante yewæmōmopa.

2 Tímoteo ingante Pabodo cadota ante ayænta nänö yewæmongainta

Tímoteo ingante Pabodo yewæmongampa

¹ Botö Pabodobo inömo imopa. Wængongui nänö änö bai Itota Codito nänö në da godongaïmo imopa. Itota Codito nempo quëwënonäni iñönänite Wængongui, Minitö wantæpiyæ mini quëwënguino ante pönömo ænguimini iminipa, angacäimpa. Mänömaï beyæ tömengä botö imo, Mäninö ante apænebi ëñencädänimpa, angä ëñëninque botö tömengä nänö në da godongaïmo imopa. ² Tímoteo ëñëmi. Bitö botö wëmi bai inömi inte botö në waadebi inömi imipa. Bitö acæbiimpa, ante bitö imite yewæmömopa. Mönö Mæmpo Wængongui tönö Awënë Itota mönö Codito tönö bitö imite waadete pönö waa cæda ate bitö gänë entawencæbiimpa, ämopa.

Itota Codito waa pönö nänö ingainö ante

³ Wëenëñedë botö wæmæidi nani cægäi bai botö adobai nämä apænte pönente adinque wentamö mongænämaï entawëmo inte Wængongui beyæ në cæbo imopa. Botö itadë incæ woyowotæ incæ bitö beyæ ante mäningä Wængongui ingante botö apæneyedë adocä ingante cöwë waa ate pönente apænebopa. ⁴ Botö bitö æbänö wëñapæ tamömitapa, ante pönëninque, Botö watapæ tocæboimpa, ante bitö imite aïñente imopa. ⁵ Bitö Wængongui ingante nö wede pönëmi imipa, ante adimo inte botö adodö ante wæætë pönëmopa. Edæ bitö nænænæ Doida bitö wäänä Eönita tönö tömëna täno Wængongui ingante nö wede pönente nana ingäi bai bitö iñömö ñowo adobai imipa, ante do ëñëmopa.

⁶ Mänömaï beyæ bitö imite iïmaï ämopa. Wængongui nänö cædonö ante bitö cæcæbiimpa, ante botö bitonga gampo cæyömo Wængongui pönö cæcä æninque ëwocabi imipa. Ìninque mäninö bitö ëwocadö beyænque bitö godömenque godömenque cæcæbiimpa. ⁷ Wængongui tömengä Tæiyæ Waëmö Önöwoca ingante mönö imonte pönongä æmö ìninque mönö wii tömengä beyæ guinente ëwocamompa. Wæætë mäniwoca beyæ tæi ëwocamö imompa. Ayæ adowoca ingante ëwocadinque waodäni inänite waadete pönëmö imompa. Adowoca beyæ mönö, Nöinö cæcæimpa, ante pönëninque nämä wææ ante cæmö imompa.

⁸ Mönö Awënë Itota Codito nänö angainö bitö ëñëninö ante bitö guingo imönämaï inte apænecæbiimpa. Botö adobai, Tömengä nänö angainö botö ëñëninö ante botö apænebo beyæ botö imote tee mönedäni wæyömote bitö mäniñö adinque guingo imönämaï inte apænecæbiimpa. Wæætë botö tönö Itota ingantedö ante möna watapæ apænedö ante apænedinque bitö Wængongui nänö tæi piñæmämö ante ëwocadinque botö tönö adobai guëa caate wæcæbiimpa. ⁹ Wængongui, Quëwëncæminimpa, ante mönö imonte æninque, Minitö tæiyæ waëmö entawente quëwëncæminimpa, ante mönö imonte aa pegacäimpa. Mänömaï cædinque tömengä wii mönö waa cædinö beyænque wæætë tömengä nänö aïnëñö ante cægacäimpa. Ayæ wëenëñedë inguiopoga badönämaï iñedë tömengä, Itota Codito beyænque, ante pönëninque mönö imonte waadete pönö cægacäimpa. Mäninö nänö waadete pönö cægainö beyænque tömengä mönö imonte æninque aa pegacäimpa. ¹⁰ Incæte ñowoyedë

mönö imonte, Quëwenguimīni, ante nē Ængaingā Itota Codito pongā inique tömengä waadete nänö pönö cægainö ante edonque odömongantapa. Ayæ Itota ingantedö ante mönö watapæ apænedö beyæ tömengä, Minitö mem-poga wænāmaī incæminimpa, ante cædinque wantæpiyæ wænāmaī mönö quëwenguimāmo ante edonque odömongacäimpa.

¹¹ Wængonguī botö imote apænedinque, Itota ingantedö ante watapæ botö apænedö ante bitö apænebi ëñencädänimpa, angantapa. Angä ëñëninque botö adobaī tömengä nänö nē da godömo imo inte ayæ nē odömonte apænebo imopa. ¹² Mänīī beyæ botö mänömaī wæwente quëwëmopa. Incæte, Æcänö ingante nē wede pönëmo imopa, ante do ëñëmo inte botö guingo imönāmaī imopa. Edæ botö quinä tömengä ingante godönimo incæ tömengä mäninö æninque nanguī tæī ëwocacä inongä inte tömengä nänö apænte anguiönæ ganca wææ cæcæcäimpa. Mäninö ante botö ædæmö ëñëmopa.

¹³ Botö bitö imite odömonte apænebo bitö ëñëninö ante bitö ñimpo cädämaī ee nææncæbiimpa. Wæætë, Mäninö nö ante mönö adodö adodö ante odömonte apænedö impa, ante bitö adobaī adodö ante odömonte apæncæbiimpa. Mönö Itota Codito nempo quëwëmi inte wede pönëninque waadete pönente odömonte apæncæbiimpa. ¹⁴ Wængonguī, Wææ aacæbiimpa, ante bitö imite pönongä ænimi inte bitö tömengä waa pönī nänö pönongainö ante wææ aacæbiimpa. Edæ mönö Wængonguī Önöwoca tönö ëwocate quëwëmopa. Inique bitö tömengä tönö cædinque wææ aacæbiimpa.

¹⁵ Atiabæ quëwënäni iñömö tömänäni botö imote ëmö cæte godänitapa, ante bitö do ëñëmipa. Edæ Piguado tönö Edömogænæ incæ tömënäni tönö botö imote ëmö cæte godatapa. ¹⁶ Önetipodo guiquënë botö wæwëmo adinque tömengä wæætë wæætë pönö cæcä beyænque botö wampo pöntabopa. Ayæ adobaī botö imote yæguincamë inte ñä cæyænte tee mönedäni wæyömete tömengä guingo imönāmaī ingacäimpa. Inique tömengä tönö godongämæ quëwënäni inänite mönö Awënë Itota Codito waadete pönö waa cæcæcäimpa, ämopa. ¹⁷ Edæ Odömä näni quëwëñömö iñömö pöninque Önetipodo botö imo ante nanguī diqui diqui minique ate ate iinque mingacäimpa. ¹⁸ Botö Epeto näni quëwëñömö mänñömö quëwëñömete tömengä æbänö botö beyæ pönö nanguī cæcantapa, ante bitö do ædæmö ëñëmipa. Mänömaī beyæ botö iinque baquionæ iñonte Wængonguī tömengä ingante pönö waadete waa cæcæcäimpa, ämopa.

2

Itota Codito beyæ waa tontado bai cæcæcäimpa

¹ Ayæ bitö botö wëmi bai iñömi inte ëñëmi. Itota Codito nempo quëwëñömite tömengä waadete pönö cæcä beyænque bitö tæī ëwocabi incæbiimpa, ämopa. ² Waodäni tæiyænäni ëñëñönäni botö æbänö ante apænebo bitö ëñëninö ante bitö wæætë wadäni nē pönënäni inte cöwë ædæmö cædäni iñönänite adodö ante odömonte apænebi ëñencädänimpa. Æñëninque tömënäni nē nö cædönäni inte adobaī wadäni inänite odömonte apænequinäni inänipa, ante tömënäni inänite ämi gocädänimpa.

³ Bitö Itota Codito beyæ waa tontado bai iñömi inte bitö wæwëmi incæ ee ongonte godömenque cæcæbiimpa, ämopa. ⁴ Waocä tontado badinque nänö cæyedë tömengä, Botö awënë botö imote waa acæcäimpa, ante tömengä nänö änonque ante ëñente cæcæboimpa, äninque wadäni tontado inämaī inäni näni cæbaī cädämaī inongä ingampa. ⁵ Gänä cæcæte ante nē owempocä iñömö,

Cōwē nāni cægai bai owempoedāni, ante nāni wææ angainō ante ēñente cæcā ĭninqe tōmenganque godōmenque waa owempodinqe gānā cædinque poganta æmaingampa. ⁶ Amiñā bayedē pancamonga pancamonga æññōnāni gōnea ante nē nanguī cæcā ĭñōmō tōmengā tāno ænguēnengā ingampa. ⁷ Mānīnō ĭmæca quēwēnāni nāni cæ bai ante mēnea go adodeque botō ānīnō ante pōñēñōmō mōnō Awēnē edæ bitō ĭmite odōmongā ēñēninqe bitō edonque pōñi ēñencæbiimpa.

⁸ Itota Codito awēnē Dabii wodi nānō pæingā ĭnongā inte do wæninque nē ñāni òmæmongaingā ingante ante pōnencæbiimpa. Mānīnō ante watapæ botō apænedō impa. ⁹ Mānīne beyænque botō caate wæwēmo ĭmopa. Edæ nē wēnæ wēnæ cæcā ingante tee mōnecōnē ñā cæyænāni bai botō ĭmote adobai mānīne botō apænedō beyænque ñā cædāni wæbopa. Incæte Wængongui nānō angainō ædō cæte ñā cæyænte inguī. ¹⁰ Mānōmai beyæ Wængongui nānō apænte ænīnāni beyænque ante cæyōmote wadāni anca wēnæ wēnæ cædāni wæbo incæte botō ñimpo cædāmai inte godōmenque cæbopa. Edæ Wængongui nānō ñāo apāiyōmō nāni cōwē quēwenguinqe mānīnāni Itota Codito ængā beyænque tōmengā nempo quēwencædānimpa, ante cædinque botō wæwēmo incæte godōmenque cæbopa.

¹¹ ĭmai ante nāni ānō nāwangā ante impa.

Mōnō Itota Codito tōnō godongāmæ wængaimō inte adobai tōmengā tōnō cōwē wæñāmai quēwencæmōimpa.

¹² Mōnō tōmengā tōnō ñimpo cædāmai inte ee cæte wæwēmō inte adobai tōmengā tōnō nē awēñēdi badinqe godongāmæ aacæmōimpa.

Mōnō, Tōmengā ingā dicæ abogaa, āmō ĭninqe tōmengā adobai nāemæ mōnō ĭmote, Dicæ abogaa, āmaingampa.

¹³ Mōnō wede pōñēnō ante ædæmō cædāmai ĭmō incæte tōmengā guiquēnē mōnō ĭmote cōwē pōñēninqe cōwē ædæmō cædongā ingampa.

ĭñæmpa tōmengā ĭñōmō nāmā nānō ingainō ante ñimpo cædāmai ĭnongā inte tōmengā wadō ante pōñēnāmai ingampa.

Wængongui bitō ĭmi, Waa cæbi abopa, anguingā, ante

¹⁴ Wadāni ĭnānite apænedinqe bitō, Mānīnō ante pōñēdāni, ante wæætē wæætē ancæbiimpa. Mōnō Wængongui ayongā ĭmai ante wææ ante nanguī apænebi ēñencædānimpa. Mīnitō, Ædedō ĭ, ante wadodō wadō ante pīnte tededāmai incæminimpa. ĭñæmpa mānōmai bai āninqe mōnō ānō ĭñōmō ōnōnque ante impa. Ayæ mānōmai ante tedemō ēñēninqe nē ēñēnāni ĭñōmō æmæ pōnente babainānipa, ante bitō wææ ancæbiimpa, āmopa. ¹⁵ Bitō Wængongui ayongā, Botō nē waa cæbo incæboimpa, ante nanguī cæcæbiimpa. Nē cæbo inte guingo ĭmōnāmai incæboimpa, ante cædinque Wængongui nō nānō angainō ante tōmēmi nē ædæmō ēñente entawēninqe mānīnōnque ante tōinō ante wadāni ĭnānite waa odōmote apænecæbiimpa. ¹⁶ Tæiyæ wæmō ēwocadāmai inte wadāni ōnonquedō ante tedeyōnāni bitō tōmēnāni ĭnānite ēñēnāmai inte nāñēnē wadæ goe. Edæ mānīnāni Wængongui ingante ēmō cædinque cōwē godōmenque wīwa nāni cæquinque wadæ godānipa. ¹⁷ Baō ñōmæ ĭñōmō aca podinqe nanguī godōmenque baayō bai mānīnāni nāni odōmote apænewēnō adobai wodo wodo go ĭninqe wadāni tæiyænāni ēñēninqe oda cæcædānimpa.

Mānīnāni nāni tedewencabo ĭñōnāni ĭmēneo tōnō Pideto adodaque ĭnapa.

¹⁸ Tōmēna Wængongui nāwangā nānō angainō ante ñimpo cæte wadæ godīna ĭnapa. Ayæ, Mōnō ñāni òmæmōnō ĭñōmō ĭnque bagatimpa, ante tedewēna

ēñēninque wadāni pancadāniya nāni wede pōnēnō incæ wido cæte bai quēwēnānīpa. ¹⁹ Incæte Wængonguī nāwangā nānō angainō mōnō pōnēnō iñōmō tæi gōnonte bai cōwē ongompa. Mānīnō ante mēnea ante īmaī yewæmonte bai ongompa. Edæ Wængonguī Awēnē tōmengā quīnāni ædānidō inānī, ante do ēñengampa. Ayæ tōmengā ēmōwo ante, Botō Awēnē īnongā ingampa, ante nē ānāni iñōmō tōmēnāni tōmānāni, Mōnō wīwa cædimāmo ante wæte wædinque wadæ goquēnēnāni inānīpa.

²⁰ Nē ēacā oncōnē ñænæncōnē tōmengā nānō waa waa cō cæincade iñōmō oodo inte padata inte nāni badōincade mæ ongompa. Adobai wacade awæmpaincade daicade incade mæ ongompa. Pancacadea iñōmō waēmnoncooque da wēincade incadepa. Wacade guiquēnē omæpocoque da wēincade incadepa. ²¹ Waocā wēnæ wēnæ nānō entawēnō ante ñimpo cædinque nāmā ñā mēnongate bai quēwengā īnīnque tōmengā iñōmō waēmnoncooque da wēincade bai īnongā inte Wængonguī beyæ waa cæcā īmaingampa. Tōmengā tæiyæ waēmō ēwocate quēwengā babaingampa. īnīnque tōmengā Awēnē nānō ānō ante do cæcā īmaingampa. Ayæ, Quīnō waa cæquīnō ī, ante tōmengā do cæcā īmaingampa.

²² Edēnīnāni wīwa nāni cæinēnō ante bitō ñimpo cæte wodii gote bai quēwencæbiimpa. Wæætē waodāni mīmō ñā mēnongate entawēnāni inte Wængonguī ingante nē apænedāni tōnō bitō nō cæquēnēnō ante cæte quēwencæbiimpa. Mōnō wede pōnēnō ante godōmenque pōnente quēwencæbiimpa. Waodāni inānite godōmenque waadete pōnencæte ante cæcæbiimpa. Ayæ mōnō piyænē cæte quēwenguimāmo ante pōnēnīnque cæcæbiimpa. ²³ Ōnonquedō ante apænedīnque nē, Ædedō ī, ante wacā tōnō guēadō guēa tedewengā mānōmaī tedecā beyænque wadodō wadō piinte tedewēnānīpa, ante do ēñēmīpa. īnīnque tōmēnāni nē pōnēnāmaī ināni inte ōnonquedō ante apæneyōnāni bitō tōmēnāni tōnō godongāmæ apænedāmaī incæbiimpa.

²⁴ Mōnō Awēnē ingante nē cæcā iñōmō tōmengā wadāni tōnō wadodō wadō piinte tededāmaī incæcāimpa. Wæætē tōmānāni inānite ædæmō cæcæcāimpa. Ayæ wadāni tōmengā ingante wēnæ wēnæ cædāni adīnque tōmengā wæætē piīnāmaī inte piyænē cæcæcāimpa. Ayæ tōmengā nē waa odōmonte apænecā incæcāimpa. ²⁵ Tōmengā apænecā ēñēnīnque nē ēñēnāni iñōmō Baa ante wadō ānāni inānite tōmengā ædæmō cæte, īmaī impa, ante odōmonte apænecā ēñencædānīmpa. Edæ Wængonguī pōnō cæcā ate tōmēnāni nāmā incæ, Wēnæ wēnæ cæmō awædō, ante wædinque tōmengā nāwangā nānō angainō ante ēñencædānīmpa, ante pōnente cæcæcāimpa. ²⁶ Ayæ tōmēnāni ēñēnāmaī encadāni incæ nē ēñenguīnāni wæætē bacædānīmpa, ante pōnente cæcæcāimpa. Wēnæ iñōmō tōmēnāni inānite bæi ongōnīnque tōmengā, Botō ānō ēñente quēwencæmīnīmpa, ante godō cæcā ate tōmengā nānō nē bæi ongōnāni wæætē aamō cæte wodii gocædānīmpa, ante adobai pōnente cæcæcāimpa.

3

Īnque bayedē waodāni æbānō quēwenguīnānī, ante

¹ Timoteo ēñēmī. Īnque ēōnæ bacæ cæyedē wēnæ wēnæ ba wæquīnō anguēnē. ² Māñīfēdē edæ waodāni nāmanque waadete pōnenguīnāni inānīpa. Tōmēnāni nāni godonte ænīnta waadete pōnente nāni wædō ante quēwenguīnāni inānīpa. Tōmēnāni nāmanque, Botō gomonga waa cæbo īmopa, ante pōnenguīnāni inānīpa. Wængonguī ingante godō wēnæ wēnæ ante babæ

anguināni inānīpa. Wadāni inānite badete toquināni inānīpa. Wēñænāni incæ wæmpoda inate eññēnāmaī cæquināni inānīpa. Wadāni pōnō waa cædāni incæte tōmēnāni nē waa cædāni inānite wæætē waa cædāmaī inguināni inānīpa. Ayæ tæiyæ waēmō entawēnāmaī inguinānīpa. ³ Adobaī waadete pōnēnāmaī quēwenguināni inānīpa. Mānīnāni inānite wēnæ wēnæ cædāni ad-
 ingue tōmēnāni wæætē pīinīque ūmpo cædāmaī inte wēnæ wēnæ cæquināni inānīpa. Wadāni inānitedō ante babæ ante ānewenguināni inānīpa. Tōmēnāni nāni cæinēwēnō ante nāmā wææ ānāmaī inte do cæquināni inānīpa. Ayæ wadāni inānite ædæmō cædāmaī inte piinte cæquināni inānīpa. Wadāni, Quinō waa impa, ante pīinguināni inānīpa. ⁴ Tōmēnāni nāni guidēnāni incæ, Wēnæ wēnæ bate wæcædānīpa, ante godō odōmonguināni inānīpa. Tōmēnāni pōnēnāmaī inte do wēnæ wēnæ cæquināni inānīpa. Tōmēnāni nāmā incæ, Botō gomonga waa eññēmpo, ante pōnēwenguināni inānīpa. Wængonguī ingante waadete pōnēnāmaī inguināni inte wæætē tote quēwengæimpa, ante nāmanque waadete pōnenguināni inānīpa. ⁵ Tōmēnāni Wængonguī ayongā waa cæte quēwēnāni bai adobaī cædāni incæte Wængonguī nānō tæī pīñæmāmo pīwēnīque nāmanque cæte quēwēnānīpa tōō.

Īnīque bitō mānīnāni inānite gomō ae. ⁶ Mānōmaī bai cædāni iñōmō waa apænedīnīque waodāni oncōnē wāānē guidānīpa. Onquiyænāni wīī tæīmō entawēnāni inte tōmēnāni nāni wēnæ wēnæ cædī teēmēmō mongænte bai ināni iñōnānite oncōnē nē guidāni iñōmō, Onquiyænāni mōnitō apænedō ante eññente cæcædānīpa, ante cædāni ate onquiyænāni wæætē oda cæte godānīpa. Mānīnāni onquiyænāni iñōmō, Quiēmē nāni wēnæ wēnæ cæinēmāmo, ante wadō gote wadō gote oda cædānīpa. ⁷ Tōmēnāni cōwē eññencæte ante cædāni incæte wapiti wapiti cædāni Īnīque Wængonguī nāwangā nānō angāinō ante cōwē eññente badāmaī inānīpa. ⁸ Wēñēñedē Mōitee wodi Equitobæ tæiyæ awēnē ingante apæneyongā Aānee tōnō Aāmodee nē idōna inte Mōitee ingante pīinīque, Ōnonque angampa, āna ingadāmpa. Īnīque bayedē nē wēnæ wēnæ cædāni guiquēnē ĩina inōna nāna cægāī bai adobaī cædīnīque Wængonguī nāwangā nānō angāinō ante Baa ante wadō ānāni inānīpa. Tōmēnāni ocadīdē pōnente wentamō encadāni inte oda cæte godānīpa. Īnīque Wængonguī ingante mōnō pōnēmāmo incæ dicæ pōnēnānīyaa. Wængonguī tōmēnāni inānite Baa ancæcāmpa. ⁹ Īñēmpa ædō cæte godōmenque cæquinānīi. Mānīna nē idōna nāna ōnonque cægāinō ante edonque agadāni bai tōmēnāni nāni ōnonque cædīnō ante waodāni tōmānāni adobaī edonque pōnī acædānīpa.

Tímoteo ingante Pabodo ĩnīque wææ angampa

¹⁰ Bitō iñōmō, Æbānō botō odōmonte apæneboo, ante, Æbānō waa quēwēmo, ante, Æbānō pōnente ante, Īmaī cæcæboīmpa, ante cæboo, ante bitō tōmānō ante do eññēmpa. Ayæ Wængonguī ingante botō pōnēmāmo ante waodāni inānite botō ee cæpāmo ante botō waadete pōnēmāmo ante botō wæntædāmaī inte cæpāmo ante bitō adobaī do eññēmpa. ¹¹ Ayæ botō ĩmote togænte pānāni botō wæpāmo ante ayæ botō wæwēmāmo ante bitō do eññēmpa. Wadāni quiēmē wēnæ wēnæ cæcæte ante botō ĩmote togænte pānāni wæbo incæ botō wæntæye ināmaī intabopa. Antioquiya iñōmō Īcōnio iñōmō adobaī Ditada nāni quēwēñōmō mānīñōmō wēnæ wēnæ cædāni wæbo incæte mōnō Awēnē ō ængā beyænque ayæ quēwēmo ĩmpa. ¹² Nō ante impa. Æcānō, Botō Itota Codito nempo quēwēmo inte Wængonguī ayongā waa cæte quēwēncæboīmpa, ante āna tōmengā ingante togæwēnīque wēnæ

wënæ cædāni wæquingā ingampa. ¹³ Waodāni wënæ wënæ cædāni tönö, Oda cæcædānimpā, ante nē cædāni iñömö tömēnāni nē wënæ wënæ cædīnāni inte godōmenque wënæ wënæ cæquīnāni inānīpā. Edæ mānīnāni inānīte wapitīcæ māodāni oda cæte cædīnāni inte tömēnāni wæætē wadāni inānīte adodō, Æpīticæmē oda cæquīnānidō, ante cæcædānimpā.

¹⁴ Bitō guiquēnē æbānō ēñēnīmi inte, Nō impā, ante pōnēninque cōwē ñimpō cædāmaī incæbiimpā. Edæ bitō īmi ædānidō odōmonte apænedānīi, ante do ēñēmīpā. ¹⁵ Wængonguī angā ēñente tæiyæ waēmō nāni yewæmongainō ante bitō wēñæmiyedē mā ēñēninque ñōwo ganca do ēñēmitawo. Mānīnō ante nāni yewæmongainta ate ēñēninque bitō Itota Codito ingante pōnēñōmi tōmengā ængā beyænque quēwencæbiimpā.

¹⁶ Wængonguī pōnō apæneccā ēñēninque waodāni tömēnāni nāni ēñēnonque ante Wængonguī beyæ yewæmongadānimpā. Tömēnāni Wængonguī nānō odōmonte apænegainō ante nāni yewæmongainta adinque mōnō, Æbānō waa impā, ante ēñēninque mōnō odōmonte apæneccāimpā. Wængonguī angā ēñente nāni yewæmongainta adinque, Quīnō mōnō wënæ wënæ cædīnō īi, ante mōnō do ēñēninque nē wënæ wënæ cæcā ingante mōnō wææ angæimpā. Ayæ Wængonguī angā ēñente nāni yewæmongainta adinque nē oda cæte wæcā ingante, Mōnō nōinō cæquēnēnō īīmaī impā, ante mōnō odōmonte apæneccāimpā. Nō cæte quēwencæmīnimpā, ante odōmonte apænete ongō ate mōnō ēñēnō ante mōnō waodāni inānīte odōmonte apæneccāimpā.

¹⁷ Edæ Wængonguī beyæ nē odōmonte apæneccā iñömō eyepæ ēñengā inte tōmengā nānō waa cæquīmāmo tōmāmāmo ante cæcæcāimpā, ante odōmonte apæneccæte ante yewæmongadānimpā.

4

¹ Waodāni mīlnāni quēwēnāni incæ do wængaināni incæ tōmānāni inānīte mōnō Itota Codito nē apænte anguingā inte tōmengā Awēnē Odeye badinque ponte a ongongā acæimpā. Tōmengā ayongā ayæ mōnō Mæmpo Wængonguī ayongā botō bitō īmite, īīmaī cæe, āmopa. ² Wængonguī nānō angainō ante apænebi ēñencædānimpā. Waodāni Ao ante, Ēñēinēmōni ante ānāni incæ Baa ante ēñēnāmaī ināni incæ bitō cōwē apænebi ēñēnānie. Wængonguī nānō angainō ante oda cæte wædāni adinque bitō, Mōnō nōinō cæquēnēnō ante cæcæmīnimpā, ancæbiimpā. Wënæ wënæ cædāni inānīte, Ædō cæte mānōmaī cæmīnīi, ante nangūi ancæbiimpā. Ayæ adobaī, Wampo pōnencædānimpā, ante ædæmō apænebi ēñencædānimpā. Mānīnō tōmānō cædinque nangūi waadete ee cædinque adodō adodō ante odōmonte apænebi ēñencædānimpā.

³ Īncayæ ate nō odōmonte mōnō apænedō ante waodāni Baa angūināni inānīpā. Mānīnō ante ēñēnāmaī incæmōnimpā, ante ānāni inte tömēnāni wæætē, Mōnō ēñēinēnonque ante odōmonte apæneedāni, ante nē odōmonte apænedōnāni nangūi ināni inānīte diquī diquī mīnte acædānimpā. Mānīnquedō ante ēñencæmōnimpā, ante angūināni inānīpā. ⁴ Mānīnāni nāwangā angainō ante ēñēnāmaī inte wadæ godinque wæætē ōnonquedō ante dodāni nāni angainō ante ēñente cæquīnāni inānīpā. ⁵ Bitō guiquēnē tōmēmi quēwenganca æbāmē baquīi incæ godōmenque cæcæbiimpā. Caate wæbi incæte bitō ñimpō cædāmaī inte godōmenque cæcæbiimpā. Wængonguī waa pōnī nānō apænedō ante apænebi ēñencædānimpā. Bitō cæquēnēnō tōmāā īinque cæcæbiimpā.

⁶ Wængonguī quī, ante nāni godōnō baī botō adobaī iñōmote wantæ īñonte wæñōnāni wæncæboimpā. Edæ botō wænguīōnæ oō pōnī impā.

⁷ Botō tæī ēwocabo inte Awēnē Itota beyæ botō cæquēnēnō waa pōnī īinque cætabopa. Gānā cæcæte ante nē pogodo godāni næ gongænāmaī nāni īinque

gonganca godāni bai botō adobai tōmēmo quēwenganca wæntæye ināmaī inte linque cætabopa. Mōnō wede pōnēnō ante botō ñimpo cædāmaī inte cōwē pōnentabopa. ⁸ Mōnō Awēnē nē nō apænte anguingā iñōmō tōmengā nānō apænte anguiōnæ iñonte tōmengā, Bitō nō pōnente waa cædimi inte bitō waa cædinta ante poganta æncæbiimpa, ante botō imote pōnongā æncæboimpa. Wīi botō adoboque iñōmote pōnongā æncæboimpa. Wadāni adobai tōmengā nānō pongā aquioñæ ante nangui aīnente nē wānō cōnāni ināni adinque tōmengā, Mīnitō nō cæte quēwēnīmīni inte mīnitō waa cædinta ante poganta æncæmīnimpa, ante tōmēnāni tōmānāni inānite pōnongā æncædānimpa.

Tímoteo quīnō cæcæcāimpa, ante

⁹ Bitō eyepæ inte botō weca quingæ pōe, āmopa. ¹⁰ Deēma iñōmō inguipogaque ante botō imote emō cæte Tetadōnica nāni quēwēñōmō gocantapa. Ayæ Quedetente iñōmō Gadatiabæ iñōmō gocantapa. Adobai Tito Dadāmātiabæ iñōmō gocantapa. ¹¹ Odoca adocanque botō weca ongongampa. Māadoco ingante adinque tōmengā ingante botō weca ænte māmōmi pongāi. Edæ botō cæquēnēnō ante cæyōmote tōmengā botō tōnō guēa nangui cæcā ingampa. ¹² Ayæ Tiquico ingante botō Epeto iñōmō da godōmo gocantapa. ¹³ Botō yacoo ocoi ā weocoo Todoa iñōmō Cadopo oncōnē botō emō cæte pōnincoo bitō ponte ate ænte pōe. Adobai botō dibodocoo ænte māmōmi æmoe. Botō tæinetacoo yewæmōintacoo, ante godōmenque wæbopa. Māninta cōwē māmōmi æncæboimpa, āmopa.

¹⁴ Adecantodo tæineta nē badongā inongā iñōmō botō imote nangui wēnæ wēnæ cæcā wætābopa. Mānōmaī cæcā adinque Wængongui edæ tōmengā nānō wēnæ wēnæ cædinganca māninganca tōmengā ingante wæætē pancæcāimpa, āmopa. ¹⁵ Māningā bitō imite adobai wēnæ wēnæ cædāmaī incæcāimpa, ante bitō adobai wææ cæcæbiimpa. Edæ mōnō odōmote apænedō ante tōmengā cōwē Baa ante wadō ante quēwēnongā ingampa.

¹⁶ Botō imote nē apænte ānongā weca ænte māodāni gote ongōninquē botō nāmā incæ wææ ancæte ante mā apæneyōmo æcānō botō tōnō godongāmæ āna edæ dæ ānāni wætābopa. Tōmānāni edæ botō imote emō cæte wadæ godānitapa. Mānōmaī nāni cædinō beyæ Wængongui tōmēnāni inānite pīināmaī incæcāimpa, āmopa. ¹⁷ Incæte, Wadāni wīi oodeoidi ināni tōmāmæ quēwēnāni Wængongui waa pōni nānō apænedō ante eñencædānimpa, ante cædinque mōnō Awēnē iñōmō botō gāānē ongōninquē botō tōnō godongāmæ cæcā beyænque tæi ewocabo inte apænetābopa. Ìmæca awēnē nempo wæwente quēwēñōmote mōnō Awēnē wæætē gā pe æmpote ō ængā beyænque quēwēmopa. ¹⁸ Mānōmaī bai cædinque botō imote quīēmē wēnæ wēnæ cædāni wæbo incæ mōnō Awēnē Odeye botō imote ænguingā beyænque quēwencæboimpa. Adobai tōmengā oōnædē nānō aayōmō botō imote adīmōngā ænte mæicā æite goquīmo ñimpo. Wængongui ñāo apāite bai emōnongā ingante mōnō cōwē waa acæiimpa, āmopa. Mānōmaī babaiimpa, ante Amēē, ante āmopa.

Tímoteo ingante Pabodo, Waa quēwencæbiimpa, angampa

¹⁹ Pidica tōnō Aquidæ nāna gæncaya waa quēwencædāimpa, āmopa. Bitō tōmēna inate adodō apænebi eñēnae. Adobai Ōnetipodo tōnō godongāmæ quēwēnāni waa quēwencædānimpa, āmopa. Bitō tōmēnāni inānite adodō apænebi eñēnānie. ²⁰ Edaato Coodinto iñōmō ayæ a ongongantapa. Ayæ Todopimo nē wēnæ wēnæ iñongā botō tōmengā ingante Mīideto iñōmō emō cæte gotābopa. ²¹ Bitō eyepæ inte cōōnædepo badāmaī iñedē botō weca quingæ pōe, āmopa. Eobodo iñōmō tōmengā, Bitō waa quēwencæbiimpa, angā

ẽñẽninque botõ bitõ ìmite adodõ ämo ẽñẽ. Podænta tõnõ Diino ayæ Codaodia tõnõ mõni pønencabo tõmämõni bitõ ìmite, Waa quẽwencæbiimpa, ämõnipa.

²² Mõnõ Awènẽ Itota Codito bitõ tõnõ ongonte incæcäimpa, ämopa. Ayæ Wængonguĩ bitõ ìmite waadete põnõ cæcæcäimpa, ante mäninque ante yewæmõmopa.

Tito

ingante Pabodo cadota ante nänö yewæmongainta

Tito ingante Pabodo yewæmongampa

¹ Botö Pabodobo inömo imopa. Wængongui ingante nē cæbo iñömote Itota Codito, Bitö Wængongui nänö nē apænte æninäni inänite apænebi eñencædänimpa, ante da godongä ate botö tömengä nänö nē da godongaimo imopa. Tömengä, Tömënanäni botö imote nänäni wede pönënö ante godömenque wede pönencædänimpa, ante cæcæbiimpa, ante da godongä gotabopa. Ayæ, Wængongui nawangä nänö angainö ante eñente entawëninque tömënanäni tömengä ayongä waa cæte quëwencædänimpa, ante cædinque Itota Codito botö imote da godongä godimo imopa. ² Edæ, Ìncayæ ate mönö wænämaï quëwenguinö gocæmöimpa, ante eñëninque pönencædänimpa, ante Wængongui nē babæ änämaï inongä inte wëenëñedë inguipoga badönämaï iñedë iïmaï angacäimpa. Mïni wænämaï quëwenguimämo ante pönömo æninque mïnitö wæætë wantæpiyæ cöwë quëwencæmïnimpa, ante cægacäimpa. ³ Mänömaï cædinque tömengä, Iñedë cæcæboimpa, ante nänö angaiñedë iñque bayedë tömengä nänö angainö ante edonque pönï odömonte apænecäcäimpa. Edæ, Quëwencæmïnimpa, ante mönö imonte nē Ængaingä inte Wængongui mäninö nänö angainö ante, Bitö odömonte apænebi eñencædänimpa, ante botö imote angä eñëñömote da godongä godimo imopa.

⁴ Tito eñëmi. Bitö acæbiimpa, ante yewæmömopa. Edæ godongämæ mönö wede pönënö ante apænebo nē eñëmi inte bitö Itota Codito quimi badinque botö näwä wëmi bai inömi imipa. Ìnque botö, Mæmpo Wængongui tönö Itota Codito mönö imonte nē Ængaingä tönö waadete pönö cæda ate bitö ganë entawencæbiimpa, ämopa.

Cædeta nänäni änowæñë iñömö Tito nänö cædö ante

⁵ Cædeta nänäni änowæñë iñömö botö cæquëñënö ante wïi eyepæ cæbo adinque botö, Bitö godömenque quëwëninque tömänö iñque cæcæbiimpa, ante botö bitö imite emö cæte gotabopa. Adobai wayömö wayömö nänäni quëwëñömö godinque bitö botö äninö bai cædinque, Mïni pönencabo iñöminite iñänäni nē aadäni Picænäni bacædänimpa, ante cæcæbiimpa, ante cædinque botö bitö imite mäniñömö emö cæte gotabopa. ⁶ Wadäni, Nē aacä Picængä wënæ wënæ cæcä ingampa, ante änämaï incædänimpa, ante wææ cædinque nē aacä Picængä wæætë waa quëwenguëngä ingampa. Edæ tömengä nänöögæñä adodanque nē manguiwengä incæcäimpa. Tömengä wëñæñänäni Itota Codito ingante nē pönënanäni incædänimpa. Ayæ tömënanäni inänite adinque, Babæidi bai quëwënanäni inänäni, ante ayæ, Eñëñämaï cæte quëwëñänäni, ante wadäni änämaï incædänimpa, ante nē aacä Picængä iñömö wææ aacæcäimpa.

⁷ Mönö pönencabo iñömonte nē aacä ingante Wængongui, Botö cædö ante cæcæbiimpa, ante pönö angä eñëninque tömengä Wængongui beyæ ante nē cæcä ingampa. Ìnque woadäni, Nē aacä wënæ wënæ cæcä ingampa, ante änämaï incædänimpa, ante wææ cædinque nē aacä wæætë cöwë waa quëwenguëngä ingampa. Wadäni tömengä ingante apænedäni incæ tömengä wæætë, Botö ædö cæte eñenguimoo, ante änämaï incæcäimpa. Tömengä wïi quingæ piinte bacæcäimpa. Tömengä ti nämæ nē nanguï bewengä inämaï incæcäimpa. Tömengä piyænë cæcä incæcäimpa. Babæ cæbo

incæte godonte nāni æinta cōwē godōmenque æncæboimpa, ante wadāni nāni pōnēwēnonque ante nē aacā iñōmō mānīnō ante pōnēnāmaī incæcāimpa. ⁸ Wadāni inānite, Botō oncōnē pō cædāni, ante cōwē nē watapæ angā incæcāimpa. Ayæ, Quinō waa impa, ante mānīnonque cæinengā incæcāimpa. Nōinō cæcæimpa, ante pōnēninque nāmā wææ ante cæcā incæcāimpa. Wængonguī nānō cædō ante cōwē cædongā inte nē aacā wæætē nāmā wææ ānīnque nāmā nānō cæinēwēnō ante cædāmaī incæcāimpa.

⁹ Ayæ adobaī Wængonguī nō pōnī nānō angainō ante mōni odōmonte apænegainō baī adobaī entawēninque tōmengā iñimpo cædāmaī quēwenguēnengā ingampa. Edæ mōnō pōnencabo iñōmonte tōmengā ædæmō apænedinque nō pōnī mōnō odōmonte apænedō ante odōmonte apænecæcāimpa. Tōmengā odōmonte apænecā ēñēninque pancadāniya, Baa ante wadō ānāni incæ tōmengā wæætē tōmēnāni inānite, Mānīnō ante mīni odōmonte apænedinō wapiticæ ī apa quēwēmīni, ante nē aacā inongā inte wææ ancæcāimpa, āmopa.

¹⁰ Edæ nē odōmonte apænedāni inānite, Mōnitō ēñēnāmaī cæinēmōnīpa, ante nē ānāni tæiyænāni inānīpa. Tōmēnāni iñōmō ōnonquedō ante tedewēnōnāni inte, Wadāni oda cæcædānīpa, ante nē cædōnāni inānīpa tōō. Pancadāniya, Mōnō ēō togænte quēwengæimpa, ante nē pōnēnāni nāni cæcabo iñōmō godōmenque nanguī pōnī mānōmaī babæ cæte quēwēnānīpa. ¹¹ Tōmēnāni, Babæ cæmōni incæte mōnitō odōmonte apænedō beyænque godonte nāni æinta cōwē æncæmōnīpa, ante pōnente cædānīpa. Mōnō odōmonte apænedāmaī inguēñēnō ante odōmonte apænedāni ēñēninque nē ēñēnāni pancadāniya tōmēnāni nāni godongāmæ quēwencabo tōnō oda cæte wædānīpa cæbii. Edæ mānīnō tōmēnāni babæ cæte nāni odōmonte apænewēnō ante odōmonte apænedāmaī incædānīpa, ante bitō, Apocænē inguēñē quēwēdāni, ante wææ ante cæquēñēmi iñīpa.

¹² Edæ Cædetabæ iñōmō nāni quēwencabo incæ adocanque tōmēnāni wængonguīdi beyæ nē apænecā iñōmō iīmaī ante apænegacāimpa. “Cædetabæ quēwēnāni iñōmō cōwē babæ ante quēwēnāni inte babæidi baī wīwa cædānīpa. Tōmēnāni wæntæye ināni incæ cæowæodāni inte cænānīpa tōō.” ¹³ Mānīnō ante tōmengā nānō angainō nāwangā ante impa. Iñinque Itota ingante nē pōnēnāni incæ oda cæte wædāni adinque bitō, Nō pōnēnāni incædānīpa, ante tōmēnāni inānite nanguī ancæbiīpa. ¹⁴ Ayæ, Oodeoidi dodāni nāni ōnonquedō ante angainō ante pōnēnāmaī incædānīpa, ante bitō tōmēnāni inānite nanguī ancæbiīpa. Ayæ wadāni Wængonguī nāwangā nānō angainō ante Baa ante ēñēnāmaī inōnāni incæ wadō ante wææ ānewēñōnāni bitō wæætē nē pōnēnāni inānite, Mānīnō tōmēnāni nāni wææ ānewēnō ante mīnitō ēñēte cædāmaī iedāni, ante nanguī ancæbiīpa, āmopa.

¹⁵ Edæ nē waēmō entawente quēwēnāni iñinque edæ tōmēnāni ayōnāni quīncoomē ī incæ tōmancoo edæ waēmōncoo iīmaīpa. Wadāni guīquēñē nē wentamō entawente quēwēnāni inte Itota ingante pōnēnāmaī ināni iñinque edæ tōmēnāni ayōnāni quīncoomē ī incæ tōmāancoo edæ wīi waēmōncoo iīmaīpa. Iñæmpa adodāni nāmā nāni apænte pōnēnō incæ wentamō entawente quēwēnāni inte tōmēnāni nāni ocaidē pōnēnō adobaī wentamō encadāni inānīpa tōō. ¹⁶ Iñāni iñōmō Wængonguī ingante, ate baī pōnēmōni iñōnīpa, ante ānāni incæte tōmēnāni cædō beyænque, Iñāni Wængonguī ingante nē Baa ānāni inānīpa, ante edonque pōnī bapa. Mānīnāni Wængonguī ingante ēñēnāmaī cædōnāni inte edæ mōnō waa cæquēñēnō ante ædō cæte cæquīnāni. Iñinque tōmēnāni mōnō nē baacā baī inōnāni inānīpa.

2

Nō pōni mōnō odōmonte apænedō

¹ Bitō wæætē nō pōni mōnō odōmonte apænedō ante odōmonte apæneceabiimpa. ² Onguiñænāni picænāni inānite iīmaī ante odōmonte apænebi ēñencædānimpa. Tōmēnāni tī nāmæ nanguī bete quidi quidi dowænte badāmaī incædānimpa. Waodāni mōnitō imōnite waa acædānimpa, ante onguiñænāni picænāni iñōmō nē eypæð cæte quēwenguēñēnānimpa. Nōiñō cæcæimpa, ante pōnēninque nāmā wææ ante cæte quēwencædānimpa. Itota ingante mōnō pōnēnō ante waodāni inānite mōnō waadete pōnēnō ante tōmēnāni nōingā cædinque quēwencædānimpa. Wæntædāmaī inte ee mōnō cædō ante tōmēnāni adobaī nōingā cædinque quēwēnāni incædānimpa, ante bitō odōmonte apænebi ēñencædānimpa, āmopa.

³ Ayæ onquiyænāni picænāni inānite adobaī iīmaī ante odōmonte apænebi ēñencædānimpa. Tōmēnāni, Wængongui nānō angaiñō bai mōnō tæiyæ waēmō entawengæimpa, ante quēwencædānimpa. Wadāni inānitedō ante babæ ānāmaī incædānimpa. Wadāni nanguī yowepæ wædænque tī nāmæ biñōmæ nāni āmæ ante, Beboe beboe, ante nē bedāni bai iñāni iñōmō adobaī cæte quēwēnāmaī incædānimpa. Adodāni, Quinō waa impa, ante māniñō ante odōmonte apæneceadānimpa, ante bitō onquiyænāni picænāni inānite odōmonte apænebi ēñencædānimpa, āmopa.

⁴ Mānōmaī cæte quēwēnāni inte tōmēnāni wæætē onquiyænāni wī picænāni inānite, iīmaī cædāni, ante āninque, Minitō nānōogæidi inānite waadete pōnēninque mīnitō wēñænāni inānite adobaī waadete pōnente quēwēdāni, ante odōmonte apænedāni ēñencædānimpa. ⁵ Ayæ adobaī onquiyænāni wī picænāni inānite odōmonte apænedinque, Nōiñō cæcæimpa, ante pōnēninque mīnitō nāmā wææ ante cæte quēwencæmīnimpa. Mīnitō oncōnē mīni cæquēñēnō cōwē cædinque wadāni inānite ædæmō cæte quēwencæmīnimpa. Ayæ, Mīnitō nānōogæidi nāni ānō ante ēñente cædāni, āmi ēñente odōmonte apæneceadānimpa. Edæ onquiyænāni picænāni mānōmaīñō ante odōmonte apænedāni ēñēninque onquiyænāni wī picænāni wæætē waa cæte quēwēnāni adinque wadāni Wængongui nānō angaiñō ante ædō cæte, Wēnæ wēnæ impa, ante babæ anguiñāni.

⁶ Onguiñænāni wī picænāni ināni iñōmō adobaī tōmēnāni, Nōiñō cæcæimpa, ante pōnēninque nāmā wææ ante cæte quēwencædānimpa, ante ædæmō apænebi ēñencædānimpa. ⁷ Bitō tōmēnāni beyæ ante, Botō cæbaī tōmēnāni adobaī cæcædānimpa, ante bitō quīēmē cæbi incæ cōwē waa cæe. Ayæ bitō odōmonte apænedō incæ nōingā ante odōmonte apænedinque bitō ònōneque ānāmaī incæbiimpa. ⁸ Ayæ bitō imite nē Baa ante wadō ānāni wæætē mōnō imonte ante apænedinque, Mōnitō ædō cæte wēnæ wēnæ anguiñōni, ante wædinque edæ guingo imonte wæcædānimpa, ante cædinque bitō tōmēnāni inānite nōingā ante odōmonte apæneceabiimpa. Edæ mānōmaī nōiñō odōmonte apænebi ēñēninque nē ēñēnāni wæætē, Wēnæ wēnæ odōmonte apænediñō impa, ante ānāmaī incædānimpa.

⁹ Waodāni inānite ò ænāni ate awēñēidi beyænque cæte nē quēwēnāni bate wæyōnānite bitō tōmēnāni inānite iīmaī ante odōmonte apænebi ēñencædānimpa. Edæ tōmēnāni awēñēidi nāni ānō ante tōmānō ēñente cæcædānimpa. Adobaī tōmēnāni, Mōnitō imōnite adinque awēñēidi tocædānimpa, ante cæcædānimpa. Ayæ tōmēnāni awēñēidi ānāni ēñēninque wæætēdō wæætē ānāmaī incædānimpa. ¹⁰ Adodāni iñōmō awēmō ænāmaī quēwēnāni inte wæætē, Mōnitō cōwē nō ēñente cæmōni imōnīpa, ante adinque mōnitō awēñēidi wæætē, Waa cæmīni imīnīpa, ante pōnencædānīpa, ante nē cædāni iñōmō waa cæcædānīpa. Tōmēnāni quīēmē cædāni incæ cōwē waa

cædāni adinque wadāni Wængonguī mōnō imonte nē Ængaingā ingante nāni odōmonte apænegainō waa impa, ante pōnencædānimpa, ante bitō nē cædāni inānite mǎnōmainō ante odōmonte apænecæbiimpa, āmopa.

¹¹ Edæ waodāni quīnānidō ināni incæte mōnō Mæmpo Wængonguī tōmānāni inānite waadete pōnō cædinque, Botō æmo beyænque quēwenguīmīni, ante odōmongā ininque edonque pōni ba agadānimpa. ¹² Tōmengā nānō waadete pōnō cædōnō ante edonque pōni adinque mōnō iīmaī ante ēñēmō imompa. Wængonguī ingante wapiticæ pōnēninque mōnō cædō ante mōnō Baa ante űimpo cæte quēwengæimpa. Inguipoga ante nāni wēnæ wēnæ cæinēwēnō ante mōnō Baa ante űimpo cæte quēwengæimpa. Nōwoyedē mōnō, Nōinō cæcæimpa, ante pōnēninque nāmā wææ ante cæte quēwengæimpa. Wængonguī ayongā waa cæte quēwēninque ¹³ mōnō Itota Codito nānō pōōnē watapæ mōnō toquīōnæ ante wānō cōmō imompa. Edæ Itota Codito adocā mōnō Wængonguī mōnō nē tæī piñænogā inongā inte mōnō imonte nē Ængaingā ingacæimpa. Tōmengā iñōmō nē ñāō apāite bai ēmōnogā inte poncæcæimpa, ante wānō cōmompā. ¹⁴ Mōnō wiwa cægainō tōmānō adinque tōmengā iñōmō, Botō æmo beyænque quēwenguīmīni, ante nāmā wepæ godōninque wængacæimpa. Ayæ tōmengā, Botō tōmēmo beyæ ante mīnitō iminite ñā mēnongate bai cæyōmote mīnitō botō quīmīni badinque, Quinō waa impa, ante cæinente bacæminimpa, ante cægacæimpa.

¹⁵ Ayæ māninonque ante odōmonte apænedinque bitō waodāni inānite, ædæmō apænebi ēñencædānimpa. Wadāni wēnæ wēnæ cædāni iñōnānite tōmēnāni inānite, Ædō cæte mǎnōmaī cæmīni, ante nanguī āninque awēnē bai inte apænebi ēñencædānimpa. Bitō imite, Ædō cæte awēnē bai cæbii, ante piinte anguīnāni, ante pōnente quēwencæbiimpa.

3

Nē pōnēmō, Quinō waa impa, ante mōnō cæquēnēnō

¹ Bitō weca nē pōnēnāni iñōnānite do mōnitō angainō nāni ēñēnīnō incæ bitō tōmēnāni inānite adodō ante apænebi ēñencædānimpa. Nē aadāni tōnō gobiedōno beyæ nē ānāni inānite ēñēninque mīnitō tōmēnāni nāni ānō ante ēñente cæcæminimpa, ante apænebi ēñencædānimpa. Ayæ, Quinō waa i, ante mānīnō do cæcæminimpa, ante apænebi ēñencædānimpa. ² Ayæ æcāmenque ingante wēnæ wēnæ ante babæ ānāmaī incæminimpa. Piyænē cæte quēwēninque mīnitō wadāni tōnō wadodō wadō tedete piñāmaī incæminimpa. Waodāni tōmānāni inānite mīnitō ædæmō cæte quēwencæminimpa, ante bitō mǎnōmainō ante apænebi ēñencædānimpa.

³ Edæ wēēnēñedē mōnō adobai ocai ōmædæca ingaimō inte ēñēnāmaī cæte quēwengamōimpa. Mōnō wapiticæ pōnēninque oda cæte quēwengamōimpa. Quīēmē mōnō wēnæ wēnæ cæinēnō ante cæte quēwengamōimpa. Quīēmē nāmanque pōnente, Waa tote quēwengæimpa, ante cædinque mōnō cōwē űimpo cædāmaī inte quēwengamōimpa. Waodāni inānite cōwē wiwa pōnente quēwengamōimpa. Wadāni godōmenque ēadāni adinque godō piinte agamōimpa. Wadāni mōnō imonte piñōnāni mōnō wacā ingā wacā ingā piinte quēwengamōimpa. ⁴ Incæte mōnō Wængonguī mōnō imonte, Quēwenguīmīni, ante nē Ængaingā pōninque tōmengā nānō waadete pōnēmāno ante ayæ tōmengā nānō ædæmō cædōmāmo ante do odōmongacæimpa. ⁵ Tōmengā wiī mōnō nō cægainō beyænque, Quēwenguīmīni, ante mōnō imonte ængacæimpa. Wæætē tōmengā nānō waadete pōnō waa cæinēnō beyænque mōnō imonte, Quēwenguīmīni, ante ængacæimpa. Mīnitō mempoga ēñacæminimpa, ante

Wængonguī mōnō mīmō mēnongacā entawēmōmpa. Ayæ Wængonguī mōnō īmonte æñongā tōmengā Tæiyæ Waēmō Ōnōwoca pōnō cæcā beyænque mōnō mīmō entawente quēwēmōmpa. ⁶ Itota Codito mōnō īmonte, Quēwenguīmīni, ante nē Ængaingā beyænque Wængonguī īñōmō mōnō īmonte eyepæ pōni pōnō cædinque tōmengā Ōnōwoca ingante angā pō guicā ate entawente quēwēmōmpa. ⁷ Īnīnque Wængonguī waadete pōnō cæcā ate mōnō tōmengā ayongā nō cæte quēwengaimō īmōmpa. Ayæ tōmengā nānō waadete pōnō cægainō beyænque nē ænguīmō inte mōnō, Wænāmaī quēwengæīmpa, ante ee pōnente quēwēmōmpa.

⁸ Mānōmaīnō ante nō ante impa. Edæ Wængonguī ingante do pōnēnāni īñōmō, Quīnō waa ī, ante nāni pōnēnonque cōwē cæcædānīmpa, ante bitō mānīnō ante wæætē wæætē adodō ante apænebi ēñencædānīmpa, āmōpa. Mānīnō ante waa pōni ī Īnīnque tōmānāni beyæ adodō ante waa ingæīmpa. ⁹ Wæætē, Æbānō ī, ante nanguī wæætēdō wæætē ōnonquedō ante tedewēnāni bai bitō īñōmō tōmēnāni bai tededāmaī incæbiīmpa. Dodāni, Æmōnānidō ingaināni, ante ancaā nāni ānewēnō ante pōnēnāmaī incæbiīmpa. Ayæ wæætē godō wæætē godō tedewēnāni ēñēnīnque bitō wæætē tededāmaī incæbiīmpa. Ayæ idægoidi nāni wææ angainō ante godongāmæ wadodō wadō pīinte tedewēñōnāni bitō īñōmō īnāni tōnō tededāmaī incæbiīmpa. Edæ mānōmaī nāni tededō īñōmō ōnonque tedete ī Īnīnque edæ æcāmenque beyæ waa impa, ante dæ ampa cæbii.

¹⁰ Mīni pōnencabo incæ adocanque mānōmaī tedewengā beyænque wadāni nānēneto nānēnē godīnque wacabo wacabo badāni adīnque bitō wæætē nē tedewēnongā ingante adopoque wææ āmi ēñencæcāīmpa. Adopoque wææ āmi ate tōmengā ēñēnāmaī inte gomonga adobai cæte tedewengā adīnque bitō tōmengā ingante wæætē wææ āmi wæcæcāīmpa. Mānōmaī mempoga wææ āmi ēñēnīnque tōmengā ñīmpo cædāmaī inte gomonga tedewengā ate wædinque bitō tōmengā ingante Baa ānīnque gomō ae. ¹¹ Edæ mānōmaī cædongā īñōmō tōmengā idīquibæ pōnēnongā inte nē wēnæ wēnæ cæcā ingampa. Tōmengā nāmā nānō apænte panguīnque mānōmaī cæcampa, ante do ēñēmīpa.

Tito quīnō cæcæcāīmpa, ante

¹² Botō cōōnædepo īñonte Nīncopodi nāni quēwēñōmō quēwencæboīmpa, ante pōnentabōpa. Īnīnque Adotēma incæ Tīquico incæ æcānō bitō weca goquīnaa, ante pōnēnīnque botō adocanque ingante āmo go pōñongā bitō eyepæ inte botō weca quīngæ pōe, āmōpa. ¹³ Abogado inte nē cæcā Teēna tōnō Apodo gocæ cæyōnate tōmēna nāna goquīnō ante nāna ænguēnēnō wī eyepæ ēada adīnque bitō pædæ godōmi ænte godæ. ¹⁴ Mōnō tōnō godongāmæ nē pōnēnāni īñōmō wī ōnonque cæte quēwencædānīmpa. Wæætē edæ wadāni wī eyepæ ēadāni adīnque tōmēnāni pædæ godōnāni æncædānīmpa, ante cædinque bitō apænebi ēñēnīnque tōmēnāni wæætē, Quīnō waa ī, ante adīnque mānīnonque ante cæte quēwencædānīmpa.

Waa quēwencæmīnīmpa, ante Pabodo yewæmōngampa

¹⁵ Botō tōnō nē ongōnāni tōmānāni bitō īmite, Waa quēwencæbiīmpa, ante apænedānīpa, ante botō, Bitō acæbiīmpa, ante yewæmōmōmpa. Mōnitō īmōnite nē waadete pōnēnāni īnānite bitō, Waa quēwencæmīnīmpa, ante mōnitō beyæ ante apænebi ēñencædānīmpa. Wængonguī mīnitō tōmāmīni īmīnite waadete pōnō cæcæcāīmpa, ante mānīnque ante botō yewæmōmōmpa.

Pidemöö ingante Pabodo cadota ante nänö yewæmongainta

Pidemöö ingante Pabodo yewæmongampa

¹ Botö Pabodobo inömo inte Itota Codito ingantedö ante apænebo beyænque botö imote tee mönedäni tee mönegaïmo imopa. Mönö tönifnacä Tímoteo tönö yewæmömönäpa. Pidemöö möna në waadebi inömi inte mönatö tönö godongämæ cædömi iñömite mönatö, Bitö acæbiimpa, ante yewæmömönäpa. ² Bitö oncönë iñömö Itota Codito ingante mini pönencabo godongämæ pöñöminite mönatö minitö iminite adobaï yewæmömöna acæminimpa. Ayæ mönö mængä Apia tönö Adoquipo mönitö tönö godongämæ në tontado bai cædongä tönö tömëna acædaïmpa, ante yewæmömönäpa. ³ Mönö Mæmpo Wængongui tönö Awënë Itota Codito tönö godongämæ waadete pönö cæda ate minitö gänë entawencæminimpa, ämönäpa.

Pidemöö në waadete pönengä inte wede pönengä ingä

⁴⁻⁵ Bitö Awënë Itota ingante wede pönëmi imipa, ante tömengä quinäni inönäni inänite waadete pönëmi imipa, ante bitö imitedö ante änäni ëñëniimo inte botö bitö beyæ ante Wængongui ingante botö apæneyedë adocä ingante cöwë waa ate pönente apænebopa. ⁶ Mäninö Itota Codito ingante bitö wede pönënö ante wädäni inänite cöwë apænebi ëñëninque tömënäni, Mönö tömengä waa pönï nänö entawënoncoo incæ quincodö entawëmö imöö, ante ædæmö ëñente bacædänimpa, ante nanguï cæcæbiimpa, ante botö bitö beyæ ante Wængongui ingante apænebopa. ⁷ Botö tönifnabi ëñëmi. Itota Codito quinäni inönäni inänite bitö waadete pönente cæbi ate tömënäni gançæ entawente todänitapa, ante apænedäni ëñëninque botö nanguï watapæ todinque wampo pönentabopa.

Pabodo Önetimo beyæ ante Pidemöö ingante angampa

⁸ Mänömai beyæ mönö Awënë Codito botö imote angä ëñëninque botö awënë bai äninque bitö cæquënëno ante, Iïmai cæe, ante guiñënëmai inte bitö imite wææ ämo bai waa incædonimpa. ⁹ Incæte botö wææ änämai inte wæætë mönö waadete pönëmämo beyænque ædæmö apænebopa. Botö Pabodobo inömo inte në picæmo imopa. Ayæ ñowo botö Itota Codito ingantedö ante apænebo beyænque botö imote tee mönedäni tee mönegaïmo inte ämopa. ¹⁰ Ininque botö wengä onguiñængä Önetimo beyæ ante bitö imite ædæmö apænebopa. Edæ tee mönecönë botö quëwëñedë Önetimo ingante apænebo ëñëninque tömengä në pönengä badinque botö wengä bai bacä æntabopa cæbii.

¹¹ Wëenëñedë tömengä bitö beyæ waa cædämai inte önonque quëwengacäïmpa. Incæte tömengä ñowo iñömö bitö beyæ incæ botö beyæ incæ në waa cæcä bacäïmpa. ¹² Tömengä botö në waadecä ingä incæte tömengä ingante botö bitö weca ocæ ëmænte da godömo poncæcäïmpa. ¹³ Itota ingantedö ante mönö watapæ apænedö beyænque botö imote tee mönedäni ongöninque botö, Pidemöö dæ äñonte Önetimo iñömö tömengä beyæ botö weca ongöninque botö tönö guëa cæcæcäïmpa, ante pönëninque äinentabopa. ¹⁴ Incæte æbämenque pönö waa cæbi incæ wiï botö wææ änö beyænque cæcæbiimpa. Wæætë tömëmique pönente cæcæbiimpa, ante cætabopa. Bitö ëñënëmai inte Ao änämai iñömite botö ædö cæte Önetimo ingante, Bitö botö

weca ongoncæbiimpa, ante anguimoo. ¹⁵ Önetimo bitö imite wantæyö wodii godingä inte ñowo adodö pöñongante bitö tömengä ingante wæætë æñömi tömengä cöwë bitö tönö quëwencæcäimpa. Wabänö mänii ante beyænque wantæyö wodii gocantawo. ¹⁶ Tömengä ingante bitö godonte ænte mämi ate tömengä bitö beyænque cæte nê quëwëningä ingä incæte tömengä ñowo wii nê cæte quëwënanique bai inongä ingampa. Wæætë edæ Itota Codito ingante pönengä badinque tömengä ñowo godömenque bitö töniiñacä inongä inte bitö nê waadecä ingampa. Edæ tömengä botö nê nangui waadecä ingampa. Ayæ wii bitö nê cædonganque inongä inte tömengä wæætë mönö Awënë quingä ingampa. Mänömai beyæ tömengä godömenque bitö nê waadecä inongä ingampa.

¹⁷ Ìniquë bitö, Pabodo tönö guëa cæmöna imönapa, ante pönëmi ìniquë bitö botö imote æmi bai Önetimo ingante adobai æmaimipa. ¹⁸ Bitö imite wënæ wënæ cæcantawo. Bitö imi quiëmë ante æninque wæætë pönönämai ingantawo. Ìniquë tömengä nänö pönönämai ìninö ante bitö botö imote wæætë, Pönömi æmoe, ämi ëñëninque botö pædæ pönömo æmaimipa. ¹⁹ Botö Pabodobo inömo inte tömëmo önompoca inte imainö ante yewæmömopa. Tömengä quino nänö pönönämai ìninö ante botö wæætë tömänö pönömo æncæbiimpa. Botö edæ bitö imite wii Itota Codito ingantedö ante odömonte apænebo bai bitö ayæ pönënamai inte quëwencædömiimpa. Ìniquë botö apænedö beyæ bitö botö imote wæætë pönönämai ingä bai inömi imipa. Incæte botö mänömai beyæ bitö imite wii ancæboimpa. ²⁰ Botö töniiñabi ëñëmi. Mönö Awënë beyænque bitö botö beyæ pönö cædinque Önetimo ingante waadete pönencæbiimpa, ante wæbopa. Edæ mönö Codito nempo quëwëmöna ìniquë bitö waadete pönente cæbi ate botö gançæ entawente tocæboimpa, ämopa.

²¹ Bitö cöwë ëñente cæquimi imipa, ante do ëñënimö inte botö, Bitö acæbiimpa, ante yewæmömopa. Edæ botö änö ëñente cædinque bitö godömenque cæquimi imipa, ante ëñëmopa. ²² Ìniquë adodeque ayæ äinëmopa. Minitö botö beyæ ante Wængongui ingante mini apænedö beyæ botö imote ñimpo cædäni ate bitö weca acæ poncæboimpa, ante pönëmopa. Ìniquë bitö oncönë adocönë botö owoquincö ante tömäa ædæmö cö cæquimi, ämopa.

Pidemöö ingante Pabodo, Waa quëwencæbiimpa, angä

²³ Epapada botö bai adobai Itota Codito beyænque nani nê tee mönegaingä ìñömö tömengä botö imote, Pidemöö waa quëwencæcäimpa, ante angä ëñëninque botö bitö imite yewæmömopa. ²⁴ Mäadoco tönö Aditadoco ayæ Deëma tönö Odoca botö tönö godongämæ cædäni ìñömö adobai botö imote, Pidemöö waa quëwencæcäimpa, ante änäni ëñëninque botö bitö imite yewæmömopa.

²⁵ Mönö Awënë Itota Codito bitö imite waadete pönö cæcæcäimpa. Mäniquë ante botö yewæmömopa.

Ebedeoidi inānite cadota ante nāni yewæmongainta

Wængonguī beyæ tōmengā Wengā pōnō apænegacāimpa

¹ Wængonguī wēēnēñedē wantæ wantæ iñō apænedinque wantæ iñō wadō bai cædinque wantæ iñō wadō bai cædinque tōmengā beyæ nē apænedāni inānite tæmpo pōnō apænegā ēñengadānimpa. Ēñēninque tōmēnāni wæætē adodō ante mōnō mæmæidi inānite tæmpo apænegadānimpa.

² Nōwo guiquēnē mānīnō ante Wængonguī dodāni inānite nānō apænegaiōnæ idæwaa bayonte tōmengā apænegā ēñēninque tōmengā Wengā wæætē mōnō imonte pōnō apænegacāimpa. Wēēnē pōni inguipoga dæ iī ēmōnæ dæ āñonte Wæmpocā tōmengā Wengā ingante, Badōe, angā ēñente cæyongā tōmengā nānō cædō beyæ Wæmpocā tōmancoo badongacāimpa. Mānōmai beyæ nē badongā iñongante Mæmpo Wængonguī wæætē, Tōmancoo nē ænguīgā iñōmō botō Wengā adocanque nē ænguīgā ingampa āmopa, angacāimpa. ³ Mæmpocā nē tæi ēmōnongā inte nāō ēmongā iñongā tōmengā Wengā iñōmō adobai nē tæi ēmōnongā inte nāō ēmongā ingampa. Īnīnque, Wængonguī Wengā nō pōni entawēninque nānō quēwengāinō bai Mæmpocā iñōmō edæ adobai pōni entawēnongā inte edæ nōingā cæte quēwengā ingampa, ante mōnō edonque ēñengæiimpā. Īnguipo incæ iī ēmōnæ incæ a ongoncoo incæ awēmō iñōmō ongoncoo incæ tōmengā Wengā adocā tæi piñænte nānō angāinō beyænque tōmancoo edæ nōwo ganca cōwē ongoncoo incoopa. Ayæ nāmā wepæ godonte wæninque adocā iñōmō wēnæ wēnæ mōnō cæpāmo ante nā mēnongagacāimpa. Mānōmai nē nā mēnongaingā iñongā inte tōmengā do æidinque Wængonguī nē tæi ēmongā tōmēmængā inō tæ contadinque ongongampa.

Tōmengā n̄cæncængā iñongā anquedoidi pōnōmenque ināni

⁴ Mānōmai æi contadinque tōmengā nē n̄cænægā iñongante Wængonguī iñōmō, Bitō ēmōwo bitō cōwē ænguēnengāiwo, ante pemongacāimpa. Wængonguī anquedoidi guiquēnē wīi adobai n̄cænænāni iñōnānite Wængonguī tōmēnāni inānite adobai ante pemōnāmai ingacāimpa. ⁵ Edæ anquedoidi iñōnānite æcāmenque ingante Wængonguī dicæ,
“Botō Wēmi inōmi imipa.

Nōwoōnæ bitō Mæmpobo babopa,”
Ante angantawogaa. Ayæ adobai,
“Botō tōmengā Mæmpobo incæboimpa.

Īnīnque tōmengā botō Wengā incæcāimpa,” ante anquedo ingante ānāmai ingacāimpa.

⁶ Wæætē tōmengā Wengā Tānocā iñongante inguipoga da pōnōninque Wængonguī,

“Botō anquedoidi tōmānāni iñgā ōnōwa inō ædæ wææninque, Bitō Wængonguī Wēmi imidō anguēnē, ante watapæ apænegadānimpa,” ante apænegacāimpa.

⁷ Ayæ wæætē anquedoidi inānitedō ante apænedinque,
“Tōmengā godō cæcā ate tōmengā anquedoidi iñōmō woboyæ nanguī pæmæ bai quingæ pōni cæcædānimpa.

Ayæ tömengä godö cæcä ate tömengä beyæ nê waa cædäni iñömö gonga bæcoguënêwate bai nangui cæcædänimpa.”

⁸ Ante apænedinque tömengä Wengä ingante guiquënê Wængongui incæ iimaï angacäimpa.

“Bitö nê Wængongui inömi inte ëñëmi. Awënê Odeye badinque Awënê contaimpaa tæ contagäimi inte bitö ñimpo cædämaï inte cöwê Awënê Odeyebi inömi inte ongoncæbiimpa.

Ïninque Awënê Odeyebi inömi inte bitö nempo quëwënäni inänite nö pönï cæte aadinque yaëmê töëmê pönï næænte bai nê ämi incæbiimpa.

⁹ Nê Wængonguimo inömo inte botö iñömö bitö Awënê Wængonguimo imopa. Ïninque botö, Nö cæte mönö quëwenguinö ante nê waadebi inömi inte bitö ëñënamäi nani cæinö ante edæ wïi ainëmi imipa.

Mänömaï imi ante adinque botö iimaï pönö cæbopa. Bitö tönö godongämæ ongönäni Awënê badinque bitö watapæ tocæbiimpa, ante cædinque botö,

oguinguipæ pönö gao caate bai nangui cægaboimpa.”

¹⁰ Ante Mæmpo Wængongui angacäimpa. Ayæ adobaï tömengä Wengä ingante apænedinque,

“Bitö Tæiyæ Awënê inömi inte wëenëñedê pönï inguipo mä cö cæte bai cædinque tömëmi badongabiimpa, angacäimpa.

Ayæ öönædê ongoncoo adobaï tömëmi bitö öonmpoca badongaincoo inte ongoncoopa.

¹¹ Mänincoo guiquënê iincayæ ate wido cæte bai bayonte

Bitö guiquënê cöwê ongonguimi imipa.

Mänincoo guiquënê mönö weocoo pedæncoo woincoo bai bayonte,

¹² waocä yacooque æninque topo cæcä bai cædinque bitö wæætê bitö badongaincoo ænte topo cæte bai cæcæbiimpa.

Wæætê müincoo wëñacä bai cædinque bitö wæætê tömancoo müincoo badömi ongongæimpa.

Bitö iñömö do bitö ingäi bai adobaï cöwê inguimi imipa.

Bitö quëwenguimämo cöwê inguinö anguënê.”

¹³ Äninque Wængongui tömengä Wengä ingante iimaï angacäimpa.

“Botö tömëmæ inö tæ contate ongönömite,

botö bitö imite nê pïinte cædäni inänite bæ tabo tæ wæænäni ate bitö tæi ëmömi inte pinä gawate bai godö cæbi wæcædänimpa,” angacäimpa.

Tömengä Wengä ingante mänömainö ante nê angaingä inte Wængongui dicæ anquedoidi inänite adobaï angantawogaa. ¹⁴ Iñæmpa Wængongui anquedoidi iñömö baö ömaadäni inte Wængongui beyæ nê waa cædäni inänipa. Mänömaï iñönänite tömengä, Botö æmo beyænque nê quëwënäni beyæ munitö godö cæcæminimpa, ante da pönongä pöninque tömënäni mönö beyæ pönö waa cædänipa.

2

Wængongui ængä beyænque quëwëmompä, ante

¹ Mänömaï beyæ mönö Awënê apæneçä ëñëninque mönö ëñengainö ante mönö ñimpo cædämaï inguinque ante mönö wede pönente ædæmö ëñente cæcæimpa. ² Edæ anquedoidi incæ Wængongui beyæ apæneyönäni tömënäni nani änö ante dodäni wæætê nê ëñente cæquëñänäni ingadänimpa. Ïninque æcänö wïi ëñëninque wapiti cæda tömengä nê tente wæquëñengä iñongante dodäni nö cædinque pangadänimpa.

³ Īñānāni ēñēedāni. Wængonguī nānō, Quēwencæmīnīmpa, ante angainō ante æcānō mōnō ĩmonte tāno apæñecantawo, ante pōñēedāni. Wængonguī Awēñē ĩnongā ĩncæ tānocā apæñegaingā inte, Botō tōmēmō æmo beyæñque quēwencæmīnīmpa, ante apæñegacāīmpa. Ayæ Wængonguī nānō apæñegainō ēñēnte Ō āñinque wadāni godōmenque mōñō ĩmonte, Nāwangā ĩmpa, ante apæñedāni ēñēñīmō inte mōñō ædæmō ēñengæīmpa. Edæ ēñēñāmaī inte baī ñīmpo cæmō ĩnīnque Wængonguī dicæ pāñāmaī inte ata cæpocampa quēwengūīmōō.

⁴ ĩnīnque, Quēwencæmīnīmpa, ante nāwangā botō ānō ante ēñēncædānīmpa, ante cædinque Wængonguī godōmenque cægacāīmpa. Tōmēngā, Æcānō tōñō cæquīmoo, ante, Æyōmōñō cæquīmoo, ante, Æyedēñō cæquīmoo, ante nāmā nāñō angainō baī cædinque ĩmaī pōñō cægacāīmpa. Tōmēngā, Botō mā cæbo ate wadāni ēñēncædānīmpa, ante nanguī cægacāīmpa. Ayæ, Æbāñō cæcāā, ante wæcædānīmpa, ante tæī piñæñinque wadō wadō cædinque bamōñengæ edæ nanguī cægacāīmpa. Tōmēngā Ōñōwoca ĩngante da pōñongā pōñinque tōmēngā wæætē Wængonguī nāñō angaināni ĩñānite pōñō cæcā æñinque tōmēñāni tōmāñāni Wængonguī Ōñōwoca nāñō pōñongā ænganca cægadānīmpa. ĩnīnque Wængonguī māñōmaī pōñō cæcā adīmō ĩncæ mōñō ēñēñāmaī cæmō baī tōmēngā wæætē mōñō ĩmonte ædō cæte ata cæpoquēñengāā.

Itota Codito tōmēngā tōñīñadāni baī adobaī bagacāīmpa

⁵ Ayæ mīnguipoga Awēñē nempo mōñō quēwengūīmāmo ante apæñemōñīpa. ĩnīnque mīnguipoga mōñi āñonguipoga Wængonguī, Æcāmenque ĩngante āmo awēñē baquingā, ante cædinque, Anquedoidi ĩncæ awēñēdi bacædānīmpa, ante dicæ angantawogaa. ⁶ Wacā wataa yewæmōñinque ĩmaī ante Wængonguī ĩngante āmotamīni ante baī yewæmongacāīmpa. “Wængonguī ēñēmi. Waomōñi ōñōmōñique ĩñōmōñite bitō ædō cæte waadete cæbii.

Wao wēdōmi ēñagāimōñi ĩñōmōñite bitō ædō cæte pōñō waadete cæbii.

⁷ Anquedoidi ĩñānite æmōnga ææntodōñinque bitō waocā ĩngante gao wæñō gō cæbi ate tōmēngā wantæ ĩñō pōñōmenque ongongantapa.

Ayæ, Waocā nē tæī ēmōñongā inte ñāō ēmōñongante wadāni tōmēngā ĩngante waa acædānīmpa, ante pōñō badongabiīmpa.

⁸ Edæ bitō badongaincoo tōmancoo waocā nempo pōñōmi æñinque waocā tæī ēmōngā inte nē angā bagacāīmpa.”

Ante nāñō yewæmōngāine baī cædinque Wængonguī tōmēngā nāñō badongaincoo tōmancoo Waocā nempo pōñongā æñinque Waocā nē angā bayongā wacoo wayōmō ongoncoo edæ dæ ampa. ĩncæte, Tōmēngā nempo tōmancoo do ongōmpa, ante mōñō ñōwo ganca ayæ adāmaī ĩmōmpa. ⁹ Doyedē mōñō waocabo ĩñōmonte Wængonguī waadete pōñō cædinque Itota ĩngante angā ēñēñinque tōmēngā wæætē mōñō tōmāmō wængūīmāmo beyæ ante cōwē wæwocate wæquingā bagacāīmpa. Māñōmaī cædinque Wængonguī anquedoidi ĩñānite æmōnga ææntodōñinque, Itota wæætē caate wæncæcāīmpa, ante cædinque tōmēngā ĩngante gao wæñō ĩñōmō gōñongā ongongacāīmpa. ĩncæte Itota caate wængā beyæ Wængonguī poganta tæiyæ waēmō da wencate baī cædinque, Itota nē tæī ēmōñongā inte ñāō ēmōngā adinque wadāni tōmēngā ĩngante waa acædānīmpa, ante pōñō cægacāīmpa. ĩnīnque Itota Tæiyæ Awēñē wencate ongōngā ĩngante do amōmpa.

¹⁰ Tōmancoo nē badongāingā ĩnongā inte Wængonguī tōmancoo nē ēñempodōngā inte ĩmaī angacāīmpa. Botō Wēmi ēñēmi. Wadāni ĩncæ botō

wēnāni nanguī īnāni quēwencædānimpā, ante nē badōmi bitō baquinque caate wæcæbiimpā. Mānōmaī caate bitō wædō beyænque ædæmō picæmi bate nē ēñēniṁi inte bitō botō wēnāni īnānite ñāō īñōmō ænte mānōmi poncædānimpā. Pōnṁique tōmēnāni botō ñāō ēmōmo bai adobaī ñāō ēmoncædānimpā, ante Wængonguī nō pōni cægacāimpā. ¹¹ Itota mōnō imonte, Tæiyæ wæmō ēwocate quēwencæmīnimpā, ante nē badongā īñongā mōnō tōmengā tōnō adomō mōnō cabo īmompā. Mānōmaī īmō beyæ tōmengā mōnō imonte ante apænedinque, Botō tōniñamīni īminipā, ante guīñēnedāmaī tedecampā.

¹² Īīmaī ante apænecampā.

“Wængonguī ēñēmi. Bitō ēmōwo ante botō tōniñadāni īnānite apænebo ēñencædānimpā.

Tōmēnāni godongāmæ ongonte ēñēñōnāni botō, Wængonguī īñōmō Tæiyæ Wæmō īnongā inte waa pōni cæcā abopā, ante āmotamīni ante bai ancæboimpā.”

¹³ Ayæ adobaī apænedinque,

“Wængonguī ingante botō wede pōnente quēwencæboimpā,” angacāimpā.

Ayæ wæætē adobaī apænedinque,

“Wængonguī botō imote apænedinque, Bitō wēnāni, ante pōnongā ænōmo inte botō, Mōni wencabo mā ongōmōni aedāni, āmopā.”

Itota incæ Wængonguī beyæ nāni yewæmongainō bai adobaī apænecampā.

¹⁴ Mōnō wænguīmāmo ante wēnæ awēnē incæ nē angā īñongante Itota, Botō nāñe wæñinque tōmengā ingante edæ ōmæe ēwencæboimpā, ante īīmaī cægacāimpā. Mōnō Itota wēñæmō īnōmō inte mōnō baō tōnō wepæ ñōmænguīñō ēñamō bai tōmengā nānō wænguinque adobaī ñōmænguīñō ēñagacāimpā. Īnṁique tōmengā nāmā nānō wænō beyænque wēnæ awēnē ingante bæ tacā ate tōmengā wæætē piñænāmaī aquī bate nē angā īnāmaī ingampā. ¹⁵ Ayæ wēnæ awēnē nempo ñā cæyænte bai quēwēninque mōnō wænguīmāmo ante guīñente wæyōmōnte Itota mōnō beyæ ante wæætē wæñinque mōnō imonte gā pe æmpote ō ængā beyænque quēwēmompā.

¹⁶ Edæ wīī anquedoidi īnānite ænte pæ mancæte ante cædinque tōmengā wæætē Abadāō wodi pæimō īñōmōnte mōnō imonte pōnō æninque pæ mangampā. ¹⁷ Māninō beyæ Wængonguī, Bitō tōniñadāni bai adobaī badinque bitō, Wængonguī quī, ante nē nō Pōnōmi Ñænæmi pōni incæbiimpā. Ayæ bitō tōniñadāni īnānite cōwē pōnēninque waadete pōnō waa cædinque ædæmō aacæbiimpā, ante tōmengā ingante da pōnongā pongacāimpā. Ayæ adobaī, Bitō tōmēnāni wēnæ wēnæ nāni cædō beyæ nāmā wepæ godoncæbiimpā, ante cædinque Wængonguī Itota ingante da pōnongā pōninque tōmengā mōnō ēñamō bai adobaī ēñadinque waomō mōnō īnōmō bai adobaī badinque Waocā īnongā ingacāimpā. ¹⁸ Mōnō inguipoga quēwēninque wēnæ wēnæ mōnō cæinēnō beyæ wæwēmompā. Wēnæ awēnē, Itota oda cædinque Wængonguī ingante ēñēnāmāi cæcæcāimpā, ante cæyongā Itota īñōmō mōnō wæwēnō bai adobaī wæwengā incæte oda cædāmāi ingacāimpā. Īnṁique wēnæ wēnæ cæinente wæwēñōmōnte tōmengā adobaī do wægaingā inte, Mīnitō tæī piñænte ongōninque oda cædāmāi incæmīnimpā, ante pōnō tōō æmænte cæcampā.

3

Itota Ñænængā īñongā Mōitee wodi wædangā ingacāimpā

¹ Mōnitō īmōnite aa pedinque Wængonguī mīnitō īmīnite adobaī aa pedinque, Tæiyæ wæmō entawencæmīnimpā, ante badongacāimpā. Īnṁique botō

tōnīfamīni ēñēdāni. Itota īñōmō Wængonguī nānō nē da pōnongāingā ingacāimpa, ante mōnō pōnēnō ante mōnō, Nāwangā impa, ante apænemompa. Ayæ, Wængonguī quī, ante nē Godongā Nænængā pōni īñōmō Itota adocā ingampa, ante mōnō pōnēnō ante, Nāwangā impa, ante apænemompa. Īnīnque mīnitō guiquēnē, Itota æbānō ingacāimpa, ante ōnōwēnque pōnente quēwenguēnēmīni īmīnīpa. ² Wængonguī angā ēñēnīnque Mōitee wodi guiquēnē tōmēngā ingante cōwē pōnente cædinque Wængonguī tōnō nāni godongāmæ quēwencabo īnānite ædæmō cæte aagacāimpa. Tōmēngā nō cæte nānō aagai bai adobai cædinque Itota īñōmō Wængonguī angā ēñēnīnque tōmēngā ingante cōwē pōnente cædinque tōmēngā tōnō mōnō godongāmæ quēwencabo īmonte ædæmō cæte aacantapa.

³ Edæ, Oncō waa ongompa, ante waa amō incæ mōnō oncō nē badōningā ingante godōmenque waa ate apænecæimpa. Adobai, Mōitee wodi nē waa aacā ingacāimpa, ante tōmēngā ingante waa amō incæ mōnō edæ Itota nē badongaingā ingante godōmenque nangūi waa ate apænecæimpa. ⁴ Waocā oncō guiquēnē wīi tōmenque ongompa. Edæ waocā mænongā ate oncō edæ ongō aminīpa. Inguipo incæ adobai ōnōnædē ongoncoo adobai wīi tōmenque ongoncoopa. Mānīncoo tōmancoo Wængonguī nānō badongaincooque ongoncoo acæimpa. ⁵ Mōitee wodi guiquēnē Awēnē Wængonguī ingante nē cæcā īnongā inte tōmēngā tōnō nāni godongāmæ quēwencabo īnānite cōwē pōnēnīnque ædæmō cæte aagacāimpa. Mānōmai cædinque tōmēngā, Wængonguī æbānō īncayæ ate apænequingā, ante odōmōnīnque, Nāwangā impa, ante apænecacāimpa. ⁶ Mōnō Codito guiquēnē Wæmpocā Wēngā Onguīñængā īnongā inte Wæmpocā tōnō nāni godongāmæ quēwencabo īnānite cōwē pōnente nōingā pōni cæte pōnō aacampa. Edæ mōnō guiquēnē, Codito waa pōni pōnō cæcā beyænque watapæ bacæimpa, ante mōnō pōnēnō ante wadāni ēñēñōnāni waa tote apænemompa. Īnīnque mōnō guīñēnāmai inte mānīnō mōnō pōnēnō ante ædæmō entawēnīnque īnque baganca ñimpo cædāmai īmō īnīnque tōmēngā tōnō mōnō godongāmæ quēwencabo īmaīmompa.

Wængonguī quīnāni nāni guēmanguīmāmo ante

⁷ Mānōmai beyæ Wængonguī Tæiyæ Waēmō Ōnōwoca nānō angainō ante mōnō ēñente cæcæimpa. Tōmēngā nānō apænegainō ante īimainō ante yewæmongatimpa.

“Nōwoōnæ incæ tōmēngā apænecā ēñēnīnque,

⁸ mīnitō, Mīmō ōmædē bawēnāmai incæmōnīmpa, ante cædinque Baa ānāmai īedāni.

Dodāni īñōmō, Wido cæcæimpa, ante nāni ōnōmæca quēwente cæyedē, Wængonguī ingampa diyæ panguingā, ante pōnēnīnque wīwa cægadānīmpa. Mānōmai cædinque tōmēnāni Baa ante mīmō ōmædēnāni nāni bawengai bai mīnitō adobai bawēnāmai īedāni.

⁹ Mīnitō mæmæīdi mānīñōmō quēwēnīnque botō īmote wīwa cædāni wægaboimpa.

Incæte botō mānīñedē coadenta wadepo īñonte waa cæbo agadānīmpa.

¹⁰ Mānīñedē quēwēnāni mānōmai cædāni beyæ botō tōmēnāni īnānite pīīnīnque īimai angaboimpa.

‘Botō taadō goquēnēnāni incæ taadō cōwē adāmai īnāni inte tōmēnāni ancaa oda cædinque mīmō ōmædēnāni inte bai wadō godānīpa.’

¹¹ Ānīnque botō ænguī badīnque, Botō nē Quēwēmo ingāimo inte nōingā āmopa, ānīnque,

Guëmæedāni, ante botō angaiñōmō tōmēnāni cōwē guite guēmānāmai incædānimpa, angaboimpa.”

Ante Wængonguī nānō angaiñō ante yewæmongadānimpa.

¹² Iñānāni ēñēnāni. Mīni pōnencabo iñōmīnite mīnitō wacā ingā wacā ingā waa adinque adocanque incæ mīmō òmædengā badāmai incæcāimpa, ante wææ aedāni. Ayæ adocanque incæ wēnæ wēnæ entawengā badinque wiya æmænte Wængonguī nē Quēwengā ingante emō cæte godāmai incæcāimpa, ante wææ aedāni. ¹³ Nōwoōnæ, ante nē angā nānō angaiñōnæ iñōmō ayæ ñōwo ganca eōnæpa. Iñinque mīnitō ñōwoōnæ incæ wacā ingā wacā ingā ædæmō apænedinque, Æcāmenque incæ wīwa nāni cædō beyænque oda cæte wēnæ wēnæ cædāni inānite badāmai incæcāimpa, ante cædinque iīmō iñō iīmō iñō godongāmæ iñacabo cædinque tæi ongōedāni. ¹⁴ Edæ mōnō wēēñēdē wede pōnengamōimpa. Nōwo adobaī pōnēninque iñinque baganca wede pōnēmō iñinque mōnō Codito nempo godongāmæ quēwēmaimompa.

¹⁵ Iñinque adode ante pōnente cæcæimpa.

“Nōwoōnæ incæ tōmengā apæneçā ēñēninque mīnitō, Mōnitō mīmō òmædēmōni bawēnāmai incæmōnimpa, ante wææ cædinque Baa ānāmai iedāni.

Edæ dodāni, Wido cæcæimpa, ante cædinque edæ Baa ante mīmō òmædēnāni nāni bawengāi bai mīnitō adobaī bawēnāmai iedāni.”

¹⁶ Wængonguī angā ònōmoncaque ēñēninque, Wido cæcæimpa, ante ædānidō cægadāni. Edæ Mōitee wodi Equitobæ nānō nē ænte gogaināni adodāni incæ, Wido cæcæimpa, ante cægadānimpa. ¹⁷ Ayæ adobaī Wængonguī coadenta wadepo iñonte ædānidō inānite pīinque ænguī bagacāi. Edæ nē ēñēnāmai inte wēnæ wēnæ cædāni inānite Wængonguī pīinte ænguī bacā ate tōmēnāni baō ingāi ònōmæca yabæque wæænte òñongatimpa. ¹⁸ Ayæ, Pō guite guëmæedāni, ante botō angaiñōmō cōwē guite guēmānāmai incædānimpa, ante Wængonguī, Botō nē Quēwēmo inōmo inte nōingā angaboimpa, angacāimpa. Edæ ædānidō inānite mānōmai angacāi. Edæ nē ēñēnāmai cædāni inānite mānōmai angacāimpa. ¹⁹ Iñinque nē pōnēnāmai ināni inte tōmēnāni nāni pōnēnāmai inō beyænque guidāmai ingadānimpa.

4

¹ Botō nempo guidinque guēmancæmīnimpa, ante wēēñēdē nānō angaiñō ante Wængonguī ñōwo incæ adodō ante cōwē angampa. Mānōmai beyæ mīni pōnencabo tōmāmīni tōmengā nempo guidinque guēmanguēnēmīni iñōmīnite adocanque incæ oda cædāmai incæcāimpa, ante cædinque mōnō godongāmæ waa adinque wææ aacæimpa. ² Edæ dodāni inānite Wængonguī ingantedō ante watapæ nāni apænegaiñō bai mōnō imonte adobaī ante watapæ apænedāni ēñēmompa. Incæte dodāni guiquēnē ònōmoncaque ēñēninque wede pōnēnāni beyænque guēmānāmai inte wægadānimpa. ³ Mōnō nē wede pōnēmō imō guiquēnē Wængonguī nempo guidinque mīmōnē do guēmāompa. Edæ Wængonguī nempo mōnō guēmanguēnēnō ante botō āninta adotaa iīmāinō ante yewæmonte ongō bai batimpa.

“Botō ænguī badinque, Botō nē Quēwēmo ingāimo inte āmopa, āninque, Pō guite guëmæedāni, ante botō angaiñōmō tōmēnāni cōwē guidāmai incædānimpa, angaboimpa.”

Ante Wængonguī beyæ ante yewæmongadānimpa. Incæte doyedē ingui-poga iī emōnæ badōninque Wængonguī tōmengā nānō cæquēnēnō ante iñinque badōninque, Idæwaa, angacāimpa. ⁴ Wængonguī ònompō æmæmpoque go

adoönæque ïñonte ïnque cædinque ïimö wæiyö nanö guëmangaïönæ ingatimpa, ante ïimai ante wataa yewæmonte ongompa.

“Önompö æmæmpoque go adoönæque ïñonte ïnque cædinque ïimö wæiyö ñimpo cædinque Wængongui guëmangacäimpa.”

⁵ Ayæ botö äñinta adotaa ïimai ante yewæmonte ongompa.

“Pö guite guëmäädäni, ante botö äñömö tömëñäni cöwë guidämaï incædäñimpa,” angampa, ante yewæmongatimpa.

⁶ ïnque Wængongui nanö pönö cædö ante watapæ ante apæñecä ëñëñinque dodäni ïñömö önömoncaque ëñëñäni inte tömëñäni nani ëñëñämaï cægäinö beyæ guidämaï ingadäñimpa. ïnque, Wængongui tömengä nanö angäinö ïnque cæcæimpa, ante cædinque ïncayæ quëwëñäni pancadäniya cöwë guiquëñëñäni ïñöñimpa. ⁷ Mänömaï beyæ, Æönædö ëñenguëñëmïni ïmïni, ante odömoncæte ante cædinque Wængongui, “Nöwoönæ,” ante awënë Dabii ingante wantæpiyæ ate apæñecä ëñengacäimpa. ïnque mäninö botö do ante yewæmömö mïni adinö bai ante Dabii wodi ïimainö ante yewæmongacäimpa.

“Nöwoönæ incæ tömengä apæñecä ëñëñinque mïnitö, Mïmö ömædëmöni bawëñämaï incæmönimpa, ante cædinque Baa äñämaï ïedäni,” ante yewæmongacäimpa.

⁸ Edæ docä Ootowee wodi tömëñäni ïñante doyedë mangucä guidinque Cänaämæ quëwengadäñimpa. Incæte tömëñäni mänïömä do guidinäni inte näwangä guëmänäni bai Wængongui ïncayæ ate, Nöwoönæ guëmancæmïnimpa, ante wæætë äñämaï incædongäimpa. ⁹ ïnque mönö Wængongui quimö ïñömö edæ guëmanguïönæ guëmante bai mönö tömengä nempo quëwëñinque mïmönë guëmäninque cætawente wædämaï ingæimpa. ¹⁰ Wængongui ïnque badöñinque tömengä nanö cæquëñëñö tömää cædinque ñimpo cædinque guëmangacäimpa. Tömengä nanö ñimpo cæte guëmangaï bai waocä ïñömö Wængongui nempo guidinque në guëmangä ïñömö adobai tömengä nanö cæquëñëñö ante, Tömänö do cætimpa, ante adinque ñimpo cædinque guëmangampa. ¹¹ Dodäni nani ëñëñämaï cægäi bai ñöwodäni adobai cædäni ïnque tömëñäni nani tæ go wæænguinque cæbäñänipa. Mänömaï i ïnque, Adocanque incæ mänömaï cæte tæ go wæænämaï incæcäimpa, ante wææ cædinque mönö tömäömö, Wængongui nempo guite mïmönë guëmangæimpa, ante nangui cæcæimpa.

¹² Wængongui nanö äñö ïñömö mïlne quëwëne inte tæi piyänë ënepa. Edæ yaëmë yægämë tipængaa engamë bamencaä guilbæ watiu co bai Wængongui nanö äñö ïñömö adobai cædinque mönö önöwoca incæ do cote bai guipa. Ayæ bamë tadömengadæmë tæi guilñænte bamïi edonque a bai Wængongui nanö äñö ïñömö adobai mönö mïmö incæ tadömengadæ tæi guilñænte bai cædinque mönö pönëñö ante mönö cæinëñö ante do edonque ba adinque adode incæ apænte bai ampa. ¹³ Wængongui në apænte äñongä ïñongante mönö nämä incæ, Æbänö cægämönii, ante tömengä ingante töngä apænequëñëñö ïmomba. Edæ, Wængongui ayongä tömengä nanö badöngainco tömancoo edæ gä ængate ömægacoo bai inte wodönämaï ongompa.

Wængongui ingante në Godongä Næñcængä Itota ingampa

¹⁴ Mönö beyæ, Wængongui qui, ante në Godongä Næñcængä pönï ïñömö Wængongui Wengä Itota ingampa. Tömengä ïñömö nämä wepæ godonte do wængaingä inte ñäni ömæmöninque öönædë æite ongongampa. ïnque mönö, Tömengä ingante wede pönëmönipa, ante në apæñemö inte mönö wede pönëñö ante ædæmö pæ mangæimpa. ¹⁵ Wængongui qui, ante mönö beyæ

nē Godongā Ñænængā pōni Ìnongā Ìñōmō wēnæ wēnæ cædāmaī ingacāimpa. Incæte aquīi Ìmō inte wæmō adinque tōmengā wæætē, Botō Waobo ēñadinque aquīi bate wægaimo inte, Aquīi Ìmīni wædō æbānō Ì, ante do edæ ēñēmopa, angampa. Edæ wēnæ awēnē tōmengā ingante, Wēnæ wēnæ cæe, angā do wægaingā inte tōmengā mōnō wēnæ wēnæ cæinēnō, Æbānō Ì, ante do ēñengampa. ¹⁶ Ìninque mōnō Awēnē Ìñōmō nanguī waadete pōnengā inte Awēnē contaimpaa ongongampa cæmōō. Mōnō wēnæ wēnæ cædinō ante tōmengā pōnō ñimpo cæcæcāimpa, ante cædinque mōnō tōmengā weca ponte apænecæimpa. Mōnō caate wæyedē tōmengā pōnō tōō æmænte cæcæcāimpa, ante mōnō tōmengā weca ponte apænecæimpa. Mānōmaī Awēnē ongompaa gāanē pōninque mōnō guīñēnāmaī inte apænemō ēñēninque tōmengā waadete pōnō waa cæcā ængæimpa.

5

¹ Wængonguī quī, ante bitō botō Ìmote nē pōnōmi ñænæmi pōni bacæbiimpa, ante æcānō ingante Wængonguī angā bacāā.

Edæ waocā adocanque ingante apænte æninque Wængonguī angā ate tōmengā Ìñōmō nē waocā Ìnongā inte waodāni beyæ Wængonguī weca cæcampa. Ìninque waodāni Ìngā weca pōninque, Wængonguī quī, ante pædæ pōnōnāni æninque tōmengā wæætē Wængonguī ingante godongampa. Ayæ, Wēnæ wēnæ cæmōni incæte Wængonguī waadete pōnō ñimpo cæcæcāimpa, ante cædinque waodāni, Wængonguī quī, ante cæningā ænte pōninque pædæ pōnōnāni ængampa. Æninque nē godongā ñænængā Ìñōmō nē waocā Ìnongā incæte cæningā ingante ænte wænōninque nē ænte pōnāni nāni wēnæ wēnæ cædinō beyæ ante baō iya tangampa. ² Ìninque wadāni, Æbāmē impa, ante ēñēnāmaī nāni wædō ante nē godongā ñænængā Ìñōmō nē waocā Ìnongā inte adobaī pancaā ēñēnāmaī inte wæcampa. Ayæ oda cæte nāni wædō ante tōmengā adobaī oda cæte wæcampa. Ìninque wadāni baī aquīingā Ìnongā inte tōmengā gānē pōnēninque wadāni Ìnānite ædæmō cæte odōmongā adānipa. ³ Mānōmaī Ìnongā inte tōmengā wadāni wēnæ wēnæ nāni cædinō beyæ ante, Wængonguī quī, ante iya tāninque adobaī, Botō nāmā wēnæ wēnæ cædinō beyæ godōmopa, ante iya tante Wængonguī ingante godongampa.

⁴ Waocā nāmā incæ, Botō, Wængonguī quī, ante nē godōmo ñænæmo bayōmote wadāni botō Ìmote waa acædānimpa, ante ædō cæte angingāā. Ìñæmpa Wængonguī angā beyænque Aadōō wodi nē godongā ñænængā bacā baī wadāni adobaī Wængonguī angā beyænque nē godōnāni ñænænāni badānipa. ⁵ Codito incæ, Nē godōmo ñænæmo badinque nē tæī ēmōmo inte ñāō ēmōmo acædānimpa, ante nāmā ante wīi angacāimpa. Wængonguī incæ tōmengā ingante,

“Bitō botō Wēmi Ìnōmi Ìmipa.

Ñōwoōnæ bitō Wæmpobo babopa.”

⁶ Angacāimpa. Ayæ godōmenque Wængonguī nānō angainō ante wataa yewæmongatimpa.

“Wængonguī quī, ante nē pōnongā Mēequitedeco nānō cōwē ingāi baī, bitō adobaī ñimpo cædāmaī inte nē Pōnōmi cōwē incæbiimpa,” ante Codito ingante angacāimpa.

⁷ Codito Ìñōmō Waocā ēñate quēwēninque Ca ca wædinque Yæ yæ āninque Wængonguī ingante nanguī apænecæcāimpa. Wængonguī bitō adobique eyepæ Ìmi inte wææ āmi Ìninque botō wænāmaī Ìmaimopa, angacāimpa.

Incæte, Bitō, Wæe, ämi ate botō wæncæboimpa, ante nānō Ao ānīnō beyænque Wængonguī tōmengā ingante do ēñengacāimpa. ⁸ Wæmpocā Wēñængā īnongā incæte Itota nānō caate wæwēmāmo beyænque Wængonguī nānō ānō ante ædæmō ēñente cædinque picængā bagacāimpa. ⁹ Tōmengā nānō ānō ante nē ēñente cædōmō īñōmonte tōmengā ædæmō ēñēninque picængā bagaingā inte edæ mōnō imonte ængā beyænque mōnō cōwē wænāmaī inte quēwēmōmpa. ¹⁰ Tōmengā ingante Wængonguī apænte æninque, Mēequitedeco nē pōnongā ñænængā pōni nānō ingai bai bitō adobai botō imote nē Pōnōmi Ñænæmi pōni īnōmi īmpa, angacāimpa.

Mōnō wede pōnēnō ante Baa ānāmaī ingæīmpa, ante

¹¹ Mānīnō ante botō mīnitō īmīnite godōmenque nanguī apænequēnēmo īmōpa. Incæte, Æīquedō ēñenguīmīni, ante pōnente wædinque botō, Æbānō cæte apænebo ēñenguīmīni, ante wæbōpa. ¹² Īñæmpa mīnitō doyedē mīni ēñengainō ante ñōwo nē odōmōmīni baquēnēmīni īmīnīpa. Incæte wacā wæætē mīnitō imīnite Wængonguī nānō angainō ante adodeque adodeque ante odōmonte apæneca ēñenguēnēmīni adodō bamīni awædō. Edæ wēñænāni nē goōmæ gānāni bai wæætē bamīni īñōmīnite botō ædō cæte tæēmō cænguī godonte bai apænebo ēñenguīmīni. ¹³ Goōmæ nē gangā bai ingā īñōmō tōmengā wēñængā bai īñongante mōnitō, Æbānō nō cæquīi, ante odōmonte apænemōni incæte tōmengā īñōmō cōwē ēñēnāmaī ingampa. ¹⁴ Wæætē æcānō cōwē waa cæda īna īñōmō tōmengā, Quīnō waa īi, ante, Quīnō wēnæ wēnæ īi, ante wæætē wæætē ante cædinque do ēñente badinque picængā bai bacampa. Īnīnque ædæmō picænāni nē badāni beyænque mōni nō odōmonte apænedō īñōmō cænguī tæēmō bai ongōmpa.

6

¹ Mōnō Codito inguipoga quēwēninque æbānō cægacāi, ante do ēñēmōmpa. Mōnō wænguīnō goquinque wēnæ wēnæ cæmōmpa, ante wædinque, Idæwaa wēnæ wēnæ cætabōpa, ante mōnō Wængonguī gāmænō æbānō cæte ocæ ēmænte ponguīi, ante do ēñēmōmpa. Tōmengā ingante æbānō cæte pōnenguīi, ante do ēñēmōmpa. Īnīnque mānīnō tōmānō ante do ēñēnīmō inte mōnō mānīnō ante idæwaa tēdetamōmpa. Wæætē, Æbānō cæte godōmenque picæmō bai ēñente baquīi, ante mōnō ñōwo apænecaīmpa. ² Adobai, Æpæñē quīnante guīquīi, ante, Ōnompoca quīnante godō gampoquīi, ante do ēñēmō inte mōnō mānīnō ante godōmenque tēdedāmaī ingæīmpa. Ayæ, Wænte ate ñāni mōnō ōmæmongæīmpa, ante do ēñēmō Īnīnque, Wængonguī cōwē apænte ancæcāimpa, ante do ēñēmō Īnīnque mōnō mānīnō ante ñōwo godōmenque tēdedāmaī ingæīmpa. ³ Īnīnque Wængonguī Ao angā ate botō mānīnō mīnitō do ēñēnīnō ante tēdedāmaī incæboimpa. Mīnitō ēñēnāmaī īnīnō ante wæætē nanguī apænebo ēñencæmīnīmpa.

⁴ Wængonguī mōnō mīmōnē pōnō tīca ēnente bai cædinque edonque odōmonte apæneca ēñēninque mōnō ñāo bai entawēmōmpa. Tōmengā ōōnædē waa pōni nānō da pōnongaincoo do ænte quēwēmōmpa. Ayæ tōmengā Tæiyæ Waēmō Ōnōwoca ingante da pōnongā æninque mōnō tōmengā tōnō āanque bai ēwocamōpa. Mānōmaī ēwocamō incæte pancadāniya wadæ godāni inte edæ ædō cæte, Wēnæ wēnæ cæte awædō, ante ocæ ēmænte ponguīnāni. ⁵ Tōmēnāni īñōmō, Wængonguī nānō ānō waa pōni ĩmpa, ante do ēñēnīnāni inte ayæ, Wængonguī mīnguipo nānō badōñedē māniñedē mīimāmoque ba ate tæi pīñænte cæcæīmpa, ante do ēñēnānīpa. ⁶ Incæte mānīnō nāni wede

pönēnīnō ante Baa ante wadæ godāni bai tōmēnāni edæ ædō cæte iincayæ ate, Idæwaa wēnæ wēnæ cæte awædō, ante oca ēmænte ponguinānii. Inæmpa dodāni Wængonguī Wengā ingante awæ timpote wænōnāni bai cædinque iināni wæætē tōmengā ingante adodō wænonte bai cædānīpa. Ayæ tōmēnāni nāni æmæwo ēwente wæquinque tōmānāni ayōnāni Wængonguī Wengā ingante badete tote bai cædānīpa.

7 Edæ cōōnæ wantæ wantæ cæ ate waodāni cōfē inguipoga tōmēmō quiyadāni wææ pæte incapa. Incate amīmō ba ate nē quiyadīnāni nanguī tā pete eyepæ ænāni iinque Wængonguī wæætē onguipo tōmenguiipo waa pæ ate adinque, Waa pæguipo abopa, angampa. Adobai tōmengā nānō ānō ante wantæ wantæ iñō apænedāni ēñēnque waodāni gānē pönēnāni badinque wadāni inānite waadete cædāni ate Wængonguī mānīnāni inānite, Mīnitō waa ēñente cæmīni abopa, ante pōnō waa cæcampa. 8 Ömentacooque pæguipo daacamenque pæguipo guiquēnē nānō æmæwo tante ewenguinque ōnonguiipoque impa. Māninguipo iya tanguī bai waocā adobai Wængonguī nānō ānō ante nē Baa angā iñōmō tōmengā nānō æmæwo ewenguinque Baa angampa.

Watapæ baccēimpa, ante pönēnīnque tæi ongōmōmpa

9 Inānāni ēñēdāni. Wadāni mānōmai inānīpa, ante yewæmōmōni incæte mōnitō ayōmōni mīnitō wīi tōmēnāni bai imīni amōnīpa. Wæætē Codito angā beyænque nē quēwenguīmīni inōmīni inte mīnitō cōwē waa cæmīni imīni amōnīpa. 10 Edæ mīnitō cōwē waa cædinque Wængonguī ingante waadete pönēnīnque tōmengā quīnāni beyæ godō waa cægāimīni inte fīwo godōmenque cæmīnīpa, ante adingā inte Wængonguī dicæ mīni cædō ante pönēnāmai ingu-ingāā. Wæætē nē nō cædongā inte tōmengā mīni cædō ante cōwē pönengampa. 11 Codito beyænque watapæ bacæimpa, ante mīnitō wede pönēmīnīpa. Iinque mīnitō mānīnō mīni wede pönēnō ante iinque baganca wede pönencæte ante cædinque mīni waadete pōnō cægāinō bai adobai iinque baganca cōwē cæedāni, amōnīpa. 12 Edæ nē wede pönēnāni wæntæye ināmai ināni iñōmō edæ Wængonguī, Pōnōmo æedāni, ante nānō angaincoo cōwē æncædānīmpa. Mīnitō iñōmō, Tōmēnāni æbānō cædānī, ante adinque tōmēnāni nāni cædō bai adobai cædinque wæntæye ināmai inte Wængonguī nānō angaincoo adobai æncæmīnīmpa, amōnīpa.

13 Wængonguī, Botō ānō bai cōwē cæcæboimpa, ante Abadāo wodi ingante angacāimpa. Mānōmainō ante nāwangā impa, ante Abadāo ēñencæcāimpa, ante cædinque tōmengā, Wacā emōwo godōmenque tæi piñængā emōwo ante apænebo ēñēnīnque do ēñencæcāimpa, ante cæyongante wacā nē tæi piñængā guiquēnē edæ dæ angacāimpa. Iinque Wængonguī iñōmō nāmā emōwo ante apænedīnque, Wængonguīmo nē Quēwēmo inte nōingā ante āmo ēñē, ānīnque iīmai angacāimpa. 14 “Botō bitō imite pōnō waa cæbo ate bitō pæināni nanguī yebæninque bacco baccædānīmpa. Botō Wængonguīmo nē Quēwēmo inte āmopa.” 15 Ante do angā ēñengāingā inte Abadāo wodi wantæpiyæ ænāmai inte wānō cōñongante Wængonguī tōmengā nānō angainō bai pōnō cæcā ængacāimpa.

16 Waodāni guiquēnē, Nāwangā āmopa, ante ēñencædānīmpa, ante cædinque wacā emōwo godōmenque tæi piñængā emōwo apænedīnque ānānīpa. Mānōmai cædinque waocā, Botō godōmenque nē tæi piñængā tōnō guēa cæte bai ānīmo inte ædō cæte babæ ante wadō cæquīmoo, ante bai apæneyongante wacā Ao angā ate tōmēna nāna guēa cæcaya badapa.

¹⁷ Wængongui iñömö, Botö wadö bai änämaï inömo inte mänüi botö angainö bai cöwë cæcæboimpa, angacäimpa. Ayæ, Mänömaï impa, ante botö angaincoo nê ænguïnäni ædæmö eñencædänimpa, ante cædinque Wængongui nämä emöwo apænedinque, Botö Wængonguimo nê Quëwënömo inte näwangä ämopa, angacäimpa. ¹⁸ Tömengä, Botö pönö cæbo beyænque watapæ bacæimpa, ante nänö angainö ante æncæte ante mönö Wængongui gämæñö do wodüi winonte pömöimpa. Ìninqe tömengä weca do pönimö iñömonte tömengä wæætë, Mënea beyæ mönö watapæ bacæimpa, angampa. Ayæ, Minitö wampo pönëninque edæ botö tönö edæ godömenque cæcæminimpa, ante tömengä ædæmö apæncampa. Mënea ante apænebo eñëedäni. Botö Wængonguimo inömo inte nämä Wængongui emöwo apænebo beyæ nê eñëmüni inte minitö mänine beyæ pönencæminimpa. Ayæ godömenque wade ante, Wængongui incæ ædö cæte babæ wapiticæ anguingäa, ante pönencæminimpa. Mänömaï Wængongui mënea ante cægacäimpa.

¹⁹ Ìninqe wipo gæguincamë inte tæi ñänoncadödni ate wäi wocæ bai mönö iñömö edæ, Mänine mënea beyæ watapæ bacæimpa, ante mönö wede pönëno beyæ tæi ongömö inte mönö ædö cæte wadæ goquü. Mönö wede pönëno beyænque edæ Wængongui oncönë weocoo wææ owoyömo tadömengadæncönë guii öönædë ñä cæte bai i Ìninqe mönö öñöwoca iñömö edæ tæi ongonte bai ewocamopa. ²⁰ Itota iñömö täno beyænte öönædë ædinque mönö beyæ ante mänincönë do wäänë guigacäimpa. Ìninqe Mëequitedeco nê godongä ñænængä nänö ingai bai badinque Itota, Wængongui qui, ante nämä wepæ nê Godongä Ñænængä pönü inongä inte edæ cöwë ongongampa.

7

Mëequitedeco bai Itota nê Godongä Ñænængä ingampa

¹ Mëequitedeco guiqüenë Tadëë nani äñömö quëwënäni awënë odeye inongä inte tömengä, Wængongui Æibæ pönü nê Quëwengä qui, ante nê godongä ingacäimpa. Ìñongante Abadäo wodi wadäni awënë odeyeidi Inänite wænonte pönongante Mëequitedeco eyepæ pö bee tëninqe, Abadäo eñëmi, angantapa. Bitö ìmite Wængongui pönö waa cæcæcäimpa. ² Ante pönö waa apæneyongante Abadäo iñömö awënëidi wodi nani mangaincoo tömengä nänö ö ænincoo bacoo pönü incoo adinque önompo tipæmpoga mänimpocato cabo ti gæte cö cædinque, Wængongui qui, äninque Mëequitedeco ingante adocatoque pædæ godongä ængacäimpa.

Mëequitedeco nê awënë odeye iñongante tömengä emöwo pemonte bai cædinque wadäni, “Awënë inongä inte tömengä nê nö cæcä ingampa,” ante angadänimpa. Ayæ, Tadëë “Gänë pönëñömö” nani angaiñömö quëwënäni awënë odeye ingampa, ante pönëninque tömënäni, “Awënë odeye inongä inte tömengä nê gänë pönengä ingampa,” ante wawo pemongadänimpa. ³ Tömengä badä ömaacä ingä bai, tömengä wæmpocä ömaacä ingä bai, tömengä nänö eñgäiönæ ömaacä ingä bai, tömengä nänö wængäiönæ ömaacä ingä bai ante dodäni tömengä ingantedö ante yewæmongadänimpa. Mänömaï i Ìninqe mönö, Wængongui Wengä nänö cöwë ingai bai Mëequitedeco adobai, Wængongui qui, ante nê cöwë godongä ingampa, ante pönengæimpa.

⁴ Tömengä ñænængä pönü ingacäimpa, ante botö iümaï ante apænebo pönëedäni. Wængongui qui, ante nê godongä ñænængä pönü Mëequitedeco ingampa, ante pönëninque mönö wæmæ Abadäo wodi incæ tömengä nänö

ō ænincoo ðonmpo tipæmpoga mænimpocato ongō adinque adocatoque æninque Mēequitedeco ñænængā ingante pædæ godongā ængacāimpa. ⁵ Mōnō Abadāō wodi pæimō iñōmō tōmancabomō inōmō incæte adocabodāniya mōnō tōniñadāni Debiidi pancadāniya guiquēnē, Wængongui quī, ante nē godōnāni bagadānimpa. Bayōnānite Mōitee wodi tōmēnāni inānite iīmaī angacāimpa. Minitō tōniñadāni inānite āmini ēñēninque tōmēnāni wæætē tōmēnāni nāni ænincoo ðonmpo tipæmpoga mænimpocato ongō adinque adocatoque pædæ pōnōnāni æncæminimpa, ante wææ angā ēñēninque tōmēnānique, Wængongui quī bacæimpa, ante nē ænāni inānipa. ⁶ Mēequitedeco guiquēnē Debii wodi pæingā ināmaī ingaingā incæte adocatoque angā ēñēninque Abadāō wodi pædæ godongā ængacāimpa. Do iñōmō Wængongui incæ Abadāō ingante apænedinque, Bitō quī, ante botō cōwē pōnōmo æncæbiimpa, angacāimpa. Incæte wantæpiyæ ate Wængongui nānō nē angaingā iñongante Abadāō ingante apænedinque Mēequitedeco iñōmō, Wængongui bitō imite pōnō waa cæcæcāimpa, ante pōnō waa apænegacāimpa.

⁷ Mōnō ayōmō guiquēnē, Ñænænāni inōnāni iñōmō tōmēnānique ðonōnānique inānite nē godō waa apænedāni inānipa, ante do ēñēnimo inte mōnō wadō ante ædō cæte pōnenguiī. Īninque, Abadāō wodi ðononganque iñongante Mēequitedeco nē ñænængā inongā inte edæ mænōmaī waa apænegacāimpa, ante mōnō edonque ēñēmompā. ⁸ Mānināni Debiidi guiquēnē nē ñōmæintai ēñadāni inānipa. Incæte tōmēnāni inānite wadāni, Wængongui quī bacæimpa, ante adocatoque cōwē pōnōnāni ænānipa. Īngā Mēequitedeco guiquēnē ñōmæintai ēñadāmaī bai ingaingā inte nē quēwengā ingampa, ante yewæmongatimpa. Tōmengā mænōmaī nē quēwengā bai iñongante Abadāō wodi tōmengā ingante, Wængongui quī, ante adocatoque godongā ængacāimpa.

⁹ Mānōmaī impa, ante pōnēninque botō, Ēñencæminimpa, ante ñōwo godōmenque yewæmōmo aedāni. Tōmēnāni nāni æninō ðonmpo tipæmpoga ganca mænimpocato ongō adinque, Wængongui quī, ante adocatoque pædæ godōñōnāni Debii nāni pæincabo incæ nē ænāni inōnānimpa. Incæte Debii wodi wæmpocoo ingaingā inongā inte Abadāō wodi adocatoque do godongā ĩninque tōmengā pæingā inguingā Debii iñōmō wæmpocoo tōnō ānque bai adocatoque do godonte bai ayæ ate ēñate quēwengacāimpa. ¹⁰ Edæ Abadāō wodi nānō pæināni Debiidi inānipa. Īninque Debii ayæ ēñadāmaī iñongante tōmengā wæmpocoo Abadāō wodi ingante Mēequitedeco pō bee tente adocatoque æninque Debii nānō ænguēnecoo incæ pancacooa adobai ængacāimpa.

¹¹ Wængongui doyedē angā ēñēninque Debiidi pancadāniya, Wængongui quī, ante nē godōnāni bagadānimpa. Ayæ Wængongui, Īmaī cæedāni, ante angā ēñente yewæmōninque Debiidi wæætē wadāni inānite odōmonte apænedāni ēñengadānimpa. Incæte Debiidi, Wængongui quī, ante nāni godōnō beyænque mōnō Wængongui ayongā mōnō ædæmō pædāni bai edæ dicæ entawente bamongaa. Īñæmpa mānināni nāni godōnō beyænque nē picænāni bai bamō bai ñōwo wacā nē Godongā ingante Wængongui da pōnōnāmaī incædongāimpa. Ayæ, Wængongui quī, ante nē Pōnongā incæcāimpa, ante Codito ingante da pōnōninque Wængongui, Debii wodi pæingā Aadōō nānō pōnongāi bai Codito adobai pōnoncæcāimpa, ante ānāmaī inte wæætē, Mēequitedeco nānō pōnongāi bai cædinque Codito pōnongā beyænque waodāni botō ayōmō nē nō cædāni bacædānimpa, angacāimpa. ¹² Ayæ, Wængongui quī, ante nāni godoncabo iñōnānite Wængongui, Idæwaa cæminipa, āninque wacā ingante, Bitō wæætē botō imote nē Pōnōmi bacæbiimpa, angacāimpa. Ayæ wacā mænōmaī nē

Godongä bacä beyæ Wængongui, İlmaı cæedäni, ante nänö wææ angainö ante wëä godonte bai cædinque wæde äninque wææ angä ingacäimpa.

¹³ İninque Wængongui ñowo, Nê Pönömi bacæbiimpa, ante nänö nê angaingä İñömö Debiidi nani cabo İnāmaı inte wæætê wacabocä İnongä Ingampa. Incæte ñowocä Codito guidênäni İñömö, Wængongui quı, ante nani İya täimpaa cöwê godönāmaı İnönānımpa. ¹⁴ Edæ, Wængongui quı, ante odaaidi nani cabo nê godönāni İncädānımpa, ante Möitee wodi dicæ angacäİñaa. Incæte, Mönö Awënë İñömö Oodaa wodi pæingä İngacäimpa, ante edonque acæimpa.

¹⁵ İninque Mëequitedeco nänö İngai bai wacä wæætê, Wængongui quı, ante nê Godongä bacä adımö inte mönö godömenque edonque êñengæimpa. ¹⁶ Edæ Ñowocä tömengä mæmæidi wıı nê godönāni İngadānımpa. İninque, Bitö mæmæidi nani godongai bai bitö adobai godonte êñê, ante ædö cæte anguiı. Wıı tömengä mæmæidi nani cægai bai cædinque tömengä nê Godongä bagacäimpa. Wæætê cöwê nê wænāmaı Quëwenguingä inte tömengä nāmā nänö tæı piñænö beyænque nê Godongä bagacäimpa. ¹⁷ Edæ tömengä İngante apænedınque Wængongui,

“Mëequitedeco, Wængongui quı, ante nê pönongä cöwê nänö İngai bai, bitö adobai ñımpo cædāmaı inte nê Pönömi cöwê İncæbiimpa,” ante apænegacäimpa.

¹⁸ İninque, İlmaı cæedäni, ante Möitee wodi wëênêñedê nänö wææ angaine İncæ aquıne inte önöneque bai İñonte wëä godonte bai bagatımpa. ¹⁹ Edæ Möitee wodi, İlmaı cæedäni, ante nänö wææ angainö êñente beyænque mönö Wængongui ayongä ædæmö pædāni bai dicæ entawente baquımöö. Wængongui wæætê, Codito pönö cæcä beyænque watapæ quëwencæmıniıpa, ante ñowo pönö apænegacäimpa. İninque, Mänömaı İmpa, ante pönëninque mönö Wængongui weca pömpopa.

²⁰ Wængongui wıı önönque angacäimpa. Wæætê tömengä nāmā êmowo apænedınque, Botö Wængonguımo nê Quëwënömo inte nāwangä ämopa, äninque Codito İngante angä ate tömengä wæætê, Wængongui quı, ante nê Godongä bagacäimpa. Wæætê wadāni İnānite guiquënë tömengä wıı nāmā êmowo apænedınque, Nāwangä ämopa, ante änāmaı İngä İncæte tömënāni önönque, Wængongui quı, ante nê godönāni bagadānımpa. ²¹ Codito İngante guiquënë Wængongui İlmaı ante apænegacäimpa.

“Bitö ñımpo cædāmaı inte, Wængongui quı, ante nê Pönömi cöwê İncæbiimpa. Ante botö nê Tæıyæ Awënë İnömo inte nöingä äninque İncayæ ate wadö ante cöwê änāmaı İncæboımpa.”

²² Wængongui, İtota botö İmote nê Pönongä İnongä inte mınıtö beyæ cæcä ate mınıtö Ao ämıni İninque mönö godongāmæ waa cæcæımpa, äninque Wængongui mönö İmonte ñowo godömenque waa pönı apænegacäimpa. İninque Wængongui mänömaı nāmā êmowo apænedınque, Nāwangä ämopa, äninque İtota nänö nê angaingä İñongante mönö İtota İngante pönëninque, Wængongui nänö angainö bai cöwê cæcæcäımpa, ante do êñemopa. ²³ Mänıñani guiquënë nê ñömæıntai êñagāñāni inte ædö cæte ñımpo cædāmaı inte Wængongui İngante nê godönāni cöwê İnguınāni. İninque wıı adocanque nê godongä İngacäimpa. Wacä wacä nê godönāni bagadānımpa. ²⁴ İtota İñömö nê wænāmaı quëwengongä inte tömengä, Wængongui quı, ante nê Godongä İnongä inte cöwê quëwengampa. ²⁵ Edæ tömengä nê wænāmaı Quëwënonğä inte Wængongui İngante mönö beyæ ante cöwê apænedınque, Botö bitö gāmænö nê māmömo pönāni İnānite bıfö pönö waa cæcæbiimpa, ante ñımpo cædāmaı inte cöwê

apænecampa. Wængongui ingante cōwē apænecā inongā inte tōmengā cōwē quēwēningue ædæmō pōnō ængā beyænque mōnō wæætē cōwē wænāmai quēwengulmō imōpa.

²⁶ Wadāni nāni ēñēnāmai cæcabo bai wīi inongā inte Itota iñōmō tæiyæ waēmō inongā ingampa. Wentamō mongænāmai inongā iñongante tōmengā ingante ædō cæte pīnte apænte anguināni. Mānōmai ingā adinque Wængongui tōmengā ingante oōnædē æmōnga pōni mēngō cæcā ongongampa. Inique tōmengā adocanque pōni, Wængongui qui, ante nē nō Godongā Ñænængā pōni inongā inte mōnō wædō ante eyepæ pōni pōnō cæcampa. ²⁷ Wadāni nē godōnāni ñænænāni pōni ināni guiquēnē tōmēnāni tāno godōningue nāmā nāni wēnæ wēnæ cædō beyæ ante, Wængongui botō imote waa acæcāimpa, ante cæningā wepæ iimō iñō iimō iñō godōnāni. Ayæ ate wadāni nāni wēnæ wēnæ cædō beyæ adobai godōnāni. Itota guiquēnē wēnæ wēnæ nāni cædō bai cædāmai inongā inte nāmā beyænque godōnāmai ingacāimpa. Ayæ wamō mōnō wēnæ wēnæ cædō beyæ wæætē wæætē godōnāmai inte tōmengā eyepæ inongā inte adopoque pōni godongacāimpa. Inique tōmengā nāmā wepæ godōningue eyepæ pōni godongā adinque Wængongui wæætē mōnō imonte waa acampa.

²⁸ Mōitee wodi nānō wææ angainō ante ēñente cædinque waodāni aquī ināni nāni cabo iñōnānite pancadāniya inānite ānāni Wængongui ingante nē godōnāni ñænænāni do badāni. Wængongui guiquēnē iincayæ ate nāmā emōwo apænedinque, Botō Wengā ædæmō Picængā nē ēñengā bagaingā ingante āmo ate tōmengā nē Pōnongā Ñænængā bacæcāimpa. Botō Wængonguimo nē Quēwēnōmo inte nāwangā āmopa, angacāimpa.

8

Wængongui ñōwo nānō angainō ante Itota iinque cæcā

¹ Mānōmainō ante quīnante yewæmōmōnii. Edæ, Mōnō wædō beyæ ante, Wængongui qui, ante nē Godongā Ñænængā pōni inte ongongampa, ante, Nāwangā impa, ante edonque ēñencæminimpa, ante yewæmōmōni. Tōmengā iñōmō oōnædē æidinque Awēnē Wængongui tōmēmængā inō tæ contadinque Tæiyæ Awēnē inte ongongampa, ante yewæmōmōni adinque ēñencæminimpa. ² Mānōmai inongā inte tōmengā wīi waocā nānō mænongaincōnē cæcampa. Wæætē Wængongui, Owocæboimpa, ante tæiyæ waēmō nānō mænongaincōnē Itota iñōmō mōnō beyæ ante, Wængongui qui, ante nē Godongā Ñænængā pōni inte cæcampa.

³ Inguipoga quēwēnāni guiquēnē adocanque ingante, Wængongui qui, ante bitō nē godōmi ñænæmi pōni bacæbiimpa, ānāni badinque tōmengā nē tā nē tā cædinque mǎincoo cōwē godonguēnengā ingampa. Inique māningā Itota guiquēnē adobai nē Godongā Ñænængā pōni inongā inte adobai godonguēnengā ingampa. ⁴ Edæ, Iincooque godoncæminimpa, ante Mōitee wodi wææ angā ēñente cædinque inguipoga nē godōnāni guiquēnē do eyepæ pōni godōnāni ināni. Inique tōmēnāni nāni godō bai Itota iñōmō ædō cæte godonguēnengā ingungā. Inguipogaque quēwēngā inte bai tōmengā iñōmō edæ Wængongui ingante nē godongā ināmai incædongāimpa.

⁵ Tōmēnāni guiquēnē, Wængongui oōnædē nānō owocō cōwē ongō bai inguipoga adobai mænonte mǎnincō owocodenganque bai iñonte acæimpa, ante adobai pōni mænongadāni. Mānōmai mænōningue tōmēnāni

mānincōnenque, Wængonguī quī, ante nē godōnāni inte cædānīpa. Īnīnque Wængonguī, Adobaī pōnī mænōincō ongongæīmpa, ante cædinque Mōitee wodi nē mænonguingā ingante doyedē angacāīmpa. “Mōitee ēñēmi. Bitō, Æbānō mænonguī, ante, Æbānō badonguī, ante botō onquiyabo ĩñōmō bee tente odōmōmo adīnque badoncæbiīmpa. Bitō cōwā adīnque botō odōmōnō baī ĩncō adobaī mænōnīnque ĩncōnē ongoncoo tōmancoo adobaī pōnī badoncæbiīmpa,” angacāīmpa. ⁶ Wængonguī, Botō Mōitee tōnō wææ ānīnque, Īmaī cæedāni, āmo ate Ao āmīni ĩnīnque mōnō godongāmæ waa cæte quēwengæīmpa, ante wēēnēñedē nānō angainō wædænque waa ingatīmpa. Nōwo guiquēnē tōmengā, Itota ængā beyænque quēwēmīni inte Ao āmīni ĩnīnque mīnitō botō tōnō godongāmæ waa cæte quēwengæmīnīmpa, ante nānō ānō ĩñōmō godōmenque waa pōnī ĩmpa. Edæ Wængonguī nānō ānō ĩnīnque bacæīmpa, ante Itota incæ nō cægacāīmpa. Ayæ adobaī mānīnō nē godōnāni nāni cædō guiquēnē wædænque waa ĩñonte Itota nānō nō cædō guiquēnē godōmenque waa pōnī ĩmpa.

⁷ Mānīne edæ, Mōnō godongāmæ waa cæte quēwengæīmpa, ante Wængonguī wēēnēñedē nānō angainē ĩñōmō mōnō quēwenguīnō ante eyepæ ĩ baī Wængonguī nōwo wade ante ānāmaī incædongāīmpa. ⁸ Incæte waodāni wentamō mongænāni adīnque Wængonguī doyedē apænedīnque, “Botō pōnō cæbo ate mīnitō Ao āmīni ĩnīnque mōnō godongāmæ waa cæte quēwengæīmpa, Ante botō nē Awēnē ĩñōmo inte idægoidi ĩnānite oodaaidi ĩnānite ĩncayæ ate mīne ante mā pōnī apæneceboīmpa.

⁹ Mæmæīdi doyedē Equitobæ quēwēñōnānīte botō tōō æmænte ænte poncæte ante cædinque, tōmēnāni ĩnānite, Mōnō godongāmæ waa cæcæīmpa, āñōmote tōmēnāni wæætē pango cæte godadānīmpa. Pango cæte godāni ate botō wæætē dadi ēmæmonte tōmēnāni ĩnānite adāmaī ĩngaboīmpa. Mānōmaī beyæ botō wēēnēñedē botō angainō baī nōwo wæætē adobaīnō ante ānāmaī incæboīmpa, ante botō nē Awēnēmo ĩñōmo inte āmopa.

¹⁰ Mānīñedē ate edæ idægoidi ĩnānite botō, Īmaī pōnō cæbo ate mīnitō Ao āmīni ĩnīnque mōnō godongāmæ waa cæte quēwengæīmpa, ānīnque edæ ĩmaī cæcæboīmpa. Īmaī cæedāni, ante botō wææ ānō ante godō apænebo ēñēnīnque mānīne ante mīmōnē yewæmonte baī entawēnīnque tōmēnāni nē wede pōnēnāni incædānīmpa. Tōmēmo tōmēnāni Wængonguīmo ĩñōmote tōmēnāni wæætē botō quīnāni incædānīmpa.

¹¹ Mānīñedē botō angaiñedē ba ate edæ waocā tōmengā guīdengā ingante ayæ wacā ingante odōmonte apænedīnque, Bitō Wængonguī ingante ate baī pōnencæbiīmpa, ante quīnante anguingāā. ĩñæmpa mānīñedē ate guīyanga pōnī ĩnongā incæ ñænængā pōnī ĩnongā incæ tōmēnāni tōmānāni botō ĩmote do adīnque pōnencædānīmpa.

¹² Edæ tōmēnāni ēñēnāmaī nāni cædō ante botō pānāmaī inte waadete godō ñīmpo cæcæboīmpa. Ayæ tōmēnāni wēnæ wēnæ nāni cægānō ante adāmaī inte baī botō pōnēnāmaī incæboīmpa,” ante Wængonguī apænegacāīmpa.

¹³ Ānīnque nōwo, Æmo beyænque quēwēmīni inte mīnitō Ao āmīni ĩnīnque mōnō godongāmæ waa cæte quēwengæīmpa, ante mā pōnī ānīnque Wængonguī

wëenëñedë, Ìlmaì cæedäni, ante nänö wææ angainë ante, Woine inte eyepæ Ìnāmaì ingaine ënepa, ante bai cæcampa. Woine Ìñömö oo dæ baquine ënepa.

9

Wængonguì Tæiyæ Waëmö oncö bai æmontaicö impa

¹ Wængonguì wëenëñedë dodäni Ìnānite, Botö pönö cæbo ate munitö Ao ämīni Ìninqe mönö godongämæ waa cæte quëwengæimpa, angacäimpa. Ìninqe tömengä nänö wææ angainö bai cædinque tömënäni, Wængonguì ingampa, ante tömengä beyæ cæquënënäni ingadänimpa. Ayæ inguipoga tömengä owoquincö tæiyæ waëmö oncö mænöninque tömengä weca pöninque cæquënënäni ingadänimpa. ² Angä ëñëninque dodäni, Wængonguì nänö owoquincö, ante æmontaicö badöninque weocoo odemontai wodönedinque mencönea badongadänimpa. Yabæcönë, Tæiyæ Waëmö Oncö impa, ante nāni ancönë Ìñömö mäniñömö gongapæncade doyæncade tæiyæ ti wodönoqui encadocade ongongatimpa. Ayæ awæmpaa badöninque tömënäni, Wængonguì beyæ tæiyæ waëmö päö ðongæimpa, ante cædinque mänimpaa päö ðö cædäni ðongatimpa.

³ Weocoo wacoo nāni guimongademö wodöñömö guimongacö Ìñömö Tæiyæ Waëmoncö Pönì nāni angaincö ingatimpa. ⁴ Mänincönë oguì wacæimpa, ante cædinque, Oguì waquì iya tangæimpa, ante awæmpa oodo nāni pönö tee bæimpa badonte cö cædäni ongongatimpa. Ayæ, Mönö godongämæ waa cæcæimpa, ante wææ äninque Wængonguì nänö yewæmongainca Tæiyæ Waëmoncönë Pönì ongongæimpa, ante cædinque awæmpa badöninque oodo yabæpa tee baadinque cæncadempa adobai tee baate nāni cönöimpa ongongatimpa. Ayæ oodo æninque aca podonte wamoncade bai bædinque tömënäni ðnömæca nāni cængaimö Mänää nāni angaimö æninque oodo nāni bædincadedë da wëninque mänincade wæætë oodo ëmompaa cæncadë Ìnö da wente cö cæte mangadänimpa. Ayæ adobai Aadö wodì nänö ongonto tä bocagainto æninque ado oodo ëmompaa cæncadë Ìnö da wente ðö cædäni ðongatimpa. Ayæ Wængonguì dicaboga nänö, Ìlmaì cæedäni, ante yewæmongainë adoyömö ongongæimpa, ante cædinque mäninca æninque ado oodo ëmompaa cæncadë Ìnö da wëninque cö cædäni ongongatimpa.

⁵ Mänimpaa yædopaa waomīni mīni wënæ wënæ cædö beyæ wepæ godonte impa, ante Wængonguì, Botö pönö waadeimpa impaa, angacäimpa. Ayæ Wængonguì nē ðäö ëmongä weca nē owoda Ìñömö adobai ðäö bai ëmöna Ìñöñate tömëna nāna ëmönö bai dodäni adobai badonte oodo ëmompaa æmatæ æmatæ tæi goncædäni ongongatimpa. Ayæ tömëna öömä tiyæmäa pömæna gänë Ìñömö Wængonguì, Botö pönö waadeimpa, ante nänö angaimpa ðongatimpa. Mänimpacoo æbänö impaa, ante mäninque ðöwo yewæmömönipa.

⁶ Tömancoo mänömāi cöo cædäni ongöñonte, Wængonguì qui, ante nē godönäni que Ìimö Ìñö Ìimö Ìñö yabæcönë pö guidinque, Wængonguì ingampa, ante cægadänimpa. ⁷ Guimongacönë guiquënë nē godongä ðænængä Ìñömö wadepo Ìñö adopoque wadepo Ìñö adopoque pö guidinque tömengä adocanque guidongæimpa. Incæte tömengä nē godongä ðænængä pönì Ìnongä incæ wepæ næænāmaì inte ædö cæte guiquingä. Edæ wepæ cöwë ænte guidinque tömengä nämä beyæ godö pipo pipo cædinque, Wadäni ëñëñāmaì inte nāni wënæ wënæ cægainö incæ ðä mënongacæimpa, ante tömënäni beyæ adobai godö pipo pipo cædongäimpa. ⁸ Mänincö æmontaicö ayæ ongöñedë

Tæiyæ Waëmoncönë Pöni wii önonque guuigadänimpa. Wængongui nänö owodö æidö mänñedë adobai wii edonque ingatimpa, ante odömoncæte ante Wængongui Tæiyæ Waëmö Önöwoca angä guuidämaï ingadänimpa.

⁹Mänömaïnö ante odömöningue tömengä mönö ñöwomö ïmonte wæætë, ïïmaï ante ëñencæminimpa, ante cægacäimpa. Waocä, Wentamö mongænte awædö, ante në wædongä inte waëmö ïñömö pöningue, Wængongui qui, ante baö iya tangui tönö bequi cængui godongampa. Mänömaï ancaa godongä incæte tömengä mimö nämä nänö apænte entawënö ñä mënongadämaï inte wentamö ayæ mongænte entawënongäimpa. ¹⁰Mänömaï cænguingue bequingue ante wææ äningue, Æbänö cæte godonguii, ante ayæ, Æpænneque æbänö cæte mënongaqui, ante dodäni mänincooque ante nani wææ angainö ante ëñente cægadänimpa. Ìningue, Waguiipo ïnque bayonte önöwoca ædæmö mënongate quëwengæimpa, ante miinguiipo ïnque bagancaque tömënäni mänincooque ante cædönänimpa.

¹¹Wapämo mïni waa quëwenguingue pömämo, ante badoncæte ante mönö Codito ïñömö, Wængongui qui, ante në Godongä Ñænængä pöni ïnongä inte do pongacäimpa. Pöningue tömengä waodäni önompoca nani mænongaincönë guuidämaï inte Wængongui nänö badongaingui-poga cædämaï ingacäimpa. Wæætë adodö go æidingue tömengä öönædë Wængongui nänö owocönë ñænæncönë guuidingue näwä owocönë cægacäimpa. ¹²Caboda wepæ næænte guuidämaï inte wagada wë wepæ næænte guuidämaï inte mönö Codito ïñömö edæ nämä wepæ godöningue öönædë Tæiyæ Waëmoncönë Pöni æmæwo guuigacäimpa. Ìningue tömengä ængä beyænneque mönö æmæwo pöni abæ tawænte bai cöwë quëwëmompä.

¹³Ñömæï incæ gampodingue, do wæningä baö incæ gampodingue waocä näate bai wædongä inte edæ Wængongui weca ædö cæte ponguingä. Wæætë, Tömengä waiñacä bate poncæcäimpa, ante cædingue, Wængongui qui, ante në godönäni ïñömö caboda wepæ tönö wagada onguiñængä wepæ æningue në näadingä baonga pipo pipo cædänipa. Ayæ wagada baquécä ingante wænonte në täningue gönaique adobai æningue tömengä baonga pipo pipo cædingue, Bitö në näadimi inte waiñabi babipa, ante cægadänimpa.

¹⁴Mönö Codito guiquënë Tæiyæ Waëmö ïnongä inte në cöwë Quëwengä Önöwoca tönö guëa cædingue Wængongui ingante, Bitö quimo ïmopa, ante nämä wepæ godongacäimpa. Tömengä wepæ ïñömö wii cæningä wepæ bai inte godömenque eyepæ pöni wepæ ïmæmpä. Ìningue mönö wænguingue wënæ wënæ cæyömönte tömengä, Minitö mimö entawëmini inte ñä mënongate entawente nämä apænte pöente quëwencæminimpa, ante nämä wepæ do godongacäimpa. Ayæ mönö wënæ wënæ cægainö ante wadæ cædingue godömenque pönö cæcä ate mönö Wængongui në Quëwengä ingante në cæmö badingue cæmompä.

¹⁵Wængongui mïine ante apænedingue, Mönö godongämæ waa cæte quëwengæimpa, äñongante mönö waocabo wæætë ëñënamä inte wënæ wënæ cæmö adingue Codito ïñömö mönö wënæ wënæ cægainö beyæ ante wæætë wængä beyænneque mönö abæ tawænte bai quëwëmompä. Ñöwo ïñömö Wængongui mïine ante apænedingue, Botö pönö cæbo ate mïnitö Ao ämïni ïningue mïni ænguingoo æmæwo æningue mïnitö cöwë mante quëwencæminimpa, ante aa pecä pongamönpä. Ìningue mönö Codito wæætë,

Wængonguī nānō angaincoo æncæmīnīmpa, ante cædinque iinque cæcā ate mōnō nē pōnīmō inte do ænte quēwēmōmpa.

¹⁶ Waocā, Nāñe wæmo adinque botō māincoo īnī iinānique æncædānīmpa, ante ēmōwo ēmōwo yewæmongā adinque wadāni wæætē, Nāwangā æmæwo wængāīmpa, ante ēñente ate, Nē wængaingā nānō ante yewæmongainō baī bacæīmpa, ante iinque cædānīpa. ¹⁷ Īnæmpa, Īnāni quī bacæīmpa, ante yewæmongā incæte nē yewæmōningā mīingā quēwēñongā tōmēngā māincoo ædō cæte tōmēnāni quī baquīī. Wæætē tōmēngā æmæwo wængā ate māniñedē ate tōmēngā nānō yewæmongai baī iinque cædānīpa.

¹⁸ Mānōmaī beyæ wēēñēñedē Wængonguī, Mōnō godongāmæ waa cæcæīmpa, ante yewæmongā ate dodāni cæningā wæñonte ate wepæ gowete ate godongāmæ Ao āninque iinque cægadānīmpa. ¹⁹ Wængonguī, Īīmaī cæedāni, nānō wææ angainō tōmanta adinque Mōitee wodi iñōmō tōmānāni īnānite apæñecā ēñēñāni ate wepæ gowete ate cægacāīmpa. Wagada wēñāni wepæ tōnō caboda wepæ æninque æpæ tōnō ænte wempe cædēninque iitopowæ nāni āwæ yæpængō æninque obega ocaguī opatawæmæ nāni guipæninguī ænte pæ dacadinque wepæ nāni wempe cædēnimæñē bee podonte Mōitee iñōmō, Māninta adinque ēñēngæīmpa, ante cædinque mānintaa wepæ pīpo pīpo cægacāīmpa. Ayæ nē ēñēñānī tōmānāni baonga wepæ pīpo pīpo cædinque tōmēngā Īīmaī angacāīmpa. ²⁰ “Wængonguī, Botō pōnō āmo ēñēninque mīnitō Ao ante ēñente cæmīni īninque mōnō godongāmæ waa cæcæīmpa, ante nānō wææ angainō beyænque īī wepæ īmpa. Īninque īī wepæ ēmontaa adinque mōnō Ao ante māñine ante ēñente cæcæīmpa,” ante Mōitee wodi apæñegacāīmpa. ²¹ Ayæ æmontaīconga wepæ pīpo pīpo cædinque tōmēngā māñincōnē Wængonguī beyæ nāni cæincooga wepæ pīpo pīpo cægacāīmpa. ²² Ayæ wodo tōmancooga ante Wængonguī, Wepæ tōnō ñā mēñongacæīmpa, āninque wææ angā cægadānīmpa.

Īnæmpa wepæ gowedāmaī iñonte mōnō wēñæ wēñæ cæmō adinque Wængonguī nē panguēngā inte ædō cæte pōnō ata cæpoquingāā.

Codito wepæ beyænque mōnō mīmō mēñongacæīmpa

²³ Ōōnædē ongoncoo baī inguipoga nāni adobaī badongaincoo incæ cæningā wæñonte ate wepæ tōnō ñā mēñongaquēñēñāni ingadānīmpa. Wæætē nāwā ōōnædē Wængonguī weca gote mōnō ongonguinque mōnō adocanque nē waēmō pōni īnongā wepæ beyænque ñā mēñongaquēñēmō īmōmpa. ²⁴ Edæ ōōnædē Wængonguī nānō owocōnē baī ante waodāni ōñompoca nāni tæiyæ waēmō pōni badongaincōnē mōnō Codito guīdāmaī ingacāīmpa. Wæætē ōōnædē incæ æidinque tōmēngā mōnō beyæ ante Wængonguī weca guīdinque a ongongampa.

²⁵ Wængonguī quī, ante inguipoga nē godongā ñæñængā pōni īnongā guīquēñē wīī nāmā wepæ ænte pōninque cæningā wepæ incæ ænte pōninque wadepo iñō adopoque wadepo iñō adopoque Tæiyæ Waēmoncōnē Pōni guīcampa. Mōnō Codito guīquēñē inguipoga nē quēwēngā baī wīī adobaī īnongā inte wīī wæætē wæætē godoncæte ante ōōnædē æi guīgacāīmpa. Wæætē ōōnædē adopoque æi guīdinque tōmēngā nāmā wepæ adopoque godongacāīmpa. ²⁶ Edæ inguipoga nē quēwēñāni nāni cæi baī cæcā baī tōmēngā Wængonguī inguipoga nānō badōñedē mā caate wædinque wantæ wantæ iñō cædinque ñōwo ganca tæmpo caate wæcædongāīmpa. Wæætē mōnō waocabo tōmāmō pedænguipoga mōnō quēwēñō wodo iinque bayonte tōmēngā

ñowo pōni adopoque pōni pōninque wēnæ wēnæ mōnō cædō ante æmæwo wido cæcæte ante nāmā wepæ godongacāimpa.

²⁷ Mōnō waocabo guiquēnē nē wænguimō inōmo inte adopoque wænte ate Wængongui weca pō gongæñōmonte tōmengā apænte ancæcāimpa. ²⁸ Mōnō waocabo nanguī imō iñōmonte mōnō Codito iñōmō wēnæ wēnæ mōnō cædō ante mongæninque adopoque nāmā godōninque wængacāimpa. Ayæ wæætē pōninque tōmengā wīi mōnō wēnæ wēnæ cædō mongæncæte ante poncæcāimpa. Wæætē tōmengā nānō ponguinō ante nē wānō cōmō iñōmonte tōmengā, Quēwencæminimpa, ante mōnō imonte æncæte ante poncæcāimpa.

10

¹ Īncayæ ate nē Ponguingā iñōmō, Wængongui quī, ante nāmā wepæ eyepæ godoncæcāimpa, ante odōmoncæte ante cædinque Wængongui, Īmaī cæte cæningā wepæ pōnōedāni, ante do wææ angacāimpa. Incæte mānīi wepæ Wængongui nānō wææ angaimæ iñōmō wīi eyepæ godongui ængui impa. Īninque mānimæ tōmengā nānō wææ angaimæ beyænque waocā ædō cæte ædæmō ēñente picængā bai baquingāā. Īñæmpa idægoidi iñōmō wadepo iñō wadepo iñō wepæ ancaa godōninque Wængongui weca pō ædæ wææninque, Bitō Tæiyæ Waemō imidō anguēnē, ante apænecæte ante pōnāni incæte tōmēnāni tōmengā nānō wææ angainō beyænque picænāni bai dicæ badāniyaa. ² Tōmengā nānō wææ angainō eyepæ ī bai tōmēnāni adopoque godōninque idæwaa godoncædōnānimpā. Edæ, Wængongui ingampa, ante nē cædāni iñōmō māninque godōninque ædæmō ñā mēnongate bacædōnānimpā. Ayæ Īncayæ ate tōmēnāni, Wentamō entawente wængui wæ, ante nāmā apænte wædāmaī incædōnānimpā.

³ Edæ wīi mānōmaī impa. Wæætē, Botō wēnæ wēnæ cæte awædō, ante wæætē wæætē nāni pōnente wæquinque tōmēnāni wadepo iñō wadepo iñō godōnōnānimpā. ⁴ Edæ, Mōni wēnæ wēnæ cægāinō ante mēnongacæimpā, ante godōñōnāni wagada onguīñæ wepæ tōnō caboda wepæ eyepæ imæmpa diyæ mēnongaquīi.

⁵ Cæningā wepæ wīi eyepæ impa, ante wædinque Codito inguipoga pōninque Īmaī ante apænegacāimpa.

“Wængongui ēñēmi. Cæningā baō nāni wænonte pōnōnō tōnō cængui bequī nāni, Wængongui quī, ante pōnōnō adinque bitō edæ wīi æīnēmi ingabi-impā.

Wæætē botō Waobo baquinque bitō botō baō ante badongabiimpā.

⁶ Waodāni, Wængongui quī, ante iya tāmōni ate Wængongui waa acæcāimpa, ante tāñōnāni bitō wīi tobi ingabiimpā. Tōmēnāni, Wēnæ wēnæ mōni cædō ante Wængongui pōnō wido cæcæcāimpa, ante pōnōñōnānite bitō Baa angabiimpā.

⁷ Ante adinque botō, ‘Wængongui ēñēmi. Dodāni botō imotedō ante yewæmōninque, Tōmengā inguipoga pōninque Īmaī cæcæcāimpa, ante nāni yewæmongainō bai cædinque botō bitō ānō ēñente cæcæte ante pōninque a ongōmoī ae,’ antabopa,”

⁸ Mōitee wodi guiquēnē, Cænināni inānite wænōninque mīnitō, Wængongui quī, ante pædæ godōninque cængui tōnō bequī godoncæminimpā, ante wææ angacāimpa. Incæte mōnō Codito Mæmpocā ingante tāno apænedinque, Waodāni cæningā nāni wænonte pōnōnō tōnō cængui bequī nāni, Wængongui quī, ante pōnōnō adinque bitō wīi æīnēmi ingabiimpā. Wængongui quī, ante iya tāmōni ate Wængongui waa acæcāimpa, ante ayæ, Wēnæ wēnæ mōni cædō

ante Wængongui pönö wido cæcæcäimpa, ante pönö täññöni bitö Baa ante wii tobi ingabiimpa, ante Codito apænegacäimpa. ⁹ Ayæ, “Bitö äno cæcæte ante pöninque a ongömoï ae,” angacäimpa. Äninqe tömengä, Ìine botö angainö ìñömö ædæmö ëñenguine bate ongongæimpa, ante cædinque Möitee wodi wëñëñedë nänö angaine ante da godonte bai cægacäimpa. ¹⁰ Ayæ Wængongui nänö äno ante nê ëñente cæcä inte Itota Codito, Wængongui qui, ante baonga ëñadinque adoquoque wæninque nämä wepæ eyepæ godongä beyænque mönö wæætë Wængongui ayongä täiyæ waëmö ëwocamö bate quëwëmompä.

¹¹ Wængongui qui, ante nê godönäni guiquënë tömänäni ìimö ìñö ìimö ìñö adiyæ gongænte Wængongui beyæ ante cædänipa. Mänömaï wæætë wæætë godöninque ado ado godönäni beyænque tömënäni wënæ wënæ nänäni cædö ante ædö cæte wido cæte baquii. ¹² Mäningä mönö beyæ nê nö Godongaingä guiquënë adoquoque godöninque ìinque baganca eyepæ pöni godöninque Wængongui tömëmængä inö æi tæ contate ongongampa. ¹³ Mänömaï ongöninque, Botö ìmote pïinte cædäni ìnänite Wængongui æyedëno botö nempo pönongä æninque botö tæi ëmömö inte nê ämo baquimoo, ante Codito ñowo ganca wänö congampa. ¹⁴ Edæ tömengä pönö badongä ate mönö täiyæ waëmö ëwocate quëwëmö bayömonte tömengä adoque pöni nänö godongainö beyænque, Ædæmö picæmïni bacæminipa, ante do badongacäimpa. ¹⁵ Mäninö ante Wængongui Täiyæ Waëmö Önöwoca mönö ìmonte adobai apænecampa. Tömengä täno apænegacäimpa.

¹⁶ “Mönö Awënë ìimaï angacäimpa. Mänïñedë ate ìincayæ ate, botö pönö cæbo ate Ao änäni ìinque mönö godongämæ waa cæte quëwengæimpa, ante ìinque cæcæte ante ìimaï cæcæboimpa, angacäimpa.

Botö pönö apænebo ëñëninque tömënäni, ìimaï cædäni, ante botö wææ angainö incæ mïmönë entawcædänipa.

Botö pönö apænebo ëñëninque mänine ante ocäi encate ëñencædänipa.

¹⁷ Ayæ, Wënæ wënæ nänäni cædö ante ñimpo cædinque botö pönënamäi incæboimpa. Æñënamäi nänäni cædö ante botö wæætë wæætë änämaï incæboimpa,” angampa.

¹⁸ Ìinque tömengä pönö ñimpo cæcä ate mönö edæ, Wënæ wënæ mönö cædö beyæ pänämaï incæcäimpa, ante quïnante godömenque godonguii. Ìñæmpä tömengä dobæ ñimpo cægacäimpa.

Mönö Wængongui weca pongcäimpa, ante

¹⁹ Ìñänäni ëñëdäni. Täiyæ Waëmö Pöni Oncönë pö guite bai mönö Itota wepæ beyænque guïñënamäi inte Wængongui weca do guiquënëmö ìmompä. ²⁰ Weocoo mänincönë nänäni wææ cægaincoo wægo tē bai Itota baö adobai wangö cote ingatimpa. Mänömaï beyæ odemö mïñemö wi ænete bai ì adinque mönö quëwenguinemö guïdinque Wængongui weca edæ do guimompä. ²¹ Wængongui nänö godongämæ owocabo ìñömonte, Wængongui qui, ante nê Godongä Ñænængä pöni inongä ìñömö adocä Itota ìñömö mönö ìmonte nê aacä inongä ingampa. ²² Mänömaï beyæ mönö Wængongui weca pö guicæimpa. Wëñëñedë wentamö mönö entawëno ante Itota nämä wepæ inte ñä mëngacä ate mönö nämä apænte nö cæinmö inte guicæimpa. Ayæ mönö baö waëmömæ äate bai ëmömö ìinque mönö, Wængongui tömengä nänö äno bai cöwë ædæmö cæcæcäimpa, ante wede pönëninque mönö guïñënamäi inte tömengä weca do guicæimpa. ²³ Botö cöwë pönö cæcæboimpa, ante nê

angaingä iñömö nē ædæmō cæcā ingampa, ante adinque mōnō, Tömengä nānō äno bai cæcā beyænque watapæ bacæimpa, ante mōnō pōnēnō ante cōwē wido cædāmai inte mōnō pōnengæimpa.

²⁴ Ayæ, Mōnō pōnencabo tōmāmō waadete pōnēninque waa cæte quēwengæimpa, ante cæcæte ante pōnente adinque mōnō wacā ingä wacā ingä iīmai godō cæcæimpa. ²⁵ Pancadāniya Wængongui ingante godongāmæ apænecæte ante pōnāmai inte wadæ godāni incæte tōmēnāni nāni cæi bai mōnō adobai cædāmai ingæimpa. Wæætē, Codito nānō ponguionæ oo pōni impa, ate pōnente wædinque mōnō pōnencabo iñōmonte mōnō wacā ingä wacā ingä edæ waadete apænedinque, Wængongui gāmænō pōninque watapæ quēwēmīni incæmīnimpā, ante apænecæimpa.

²⁶ Wængongui nō nānō äno ante do ēñēnimō inte mōnō, Wīi ēñēinewædō, āninque godōmenque wēnæ wēnæ cæmō iīninque edæ wēnæ wēnæ mōnō cædō ante mēnongaquimæ ante edæ wepæ dæ ä bai babaimpa. ²⁷ Wæætē mänōmai ancaa ēñēnāmai cæmō iīninque mōnō Wængongui nānō apænte ante panguimāmoque ante guñente wæcōmaimompa. Edæ mōnō Baa ante godōmenque wēnæ wēnæ cæmō iīninque Wængongui ingante nē piīnāni nāni gonte wænguimāmoque ante, Mōnō adobai gonte wæncæ wæ, ante guñente wæcōmaimompa. ²⁸ Mōitee wodi nānō wææ angainō ante, Wīi ēñēinewædō, ante adocanque nē angä iñongante Waoda mēnaa ina incæ waodāni mēngāa go adocanque iñāni incæ, Mänōmainō ante apænecæ ēñentamōnīpa, ante apænēdāni ēñēninque nē āningä ingante waadedāmai inte godō wænongadānimpā.

²⁹ Iīninque adocanque Wængongui Wengä ingante pinä gāwate bai cædinque Baa angä adinque tōmengä ingante Wængongui ædō cæte pānāmai inguingāa. Wængongui, Botō pōnō æmo ate mīnitō Ao āmīni iīninque mōnō godongāmæ waa cæte quēwengæimpa, ante nānō angainō iīnque bacæimpa, ante cædinque Itota nāmā wepæ inte mōnō imonte nā mēnongacā beyæ tōmengä ayongä tæiyæ waēmō ewocamō bagamōimpa. Incæte adocanque Itota nānō nē nā mēnongadingä inongä inte, Itota wepæ wīi waēmō i awædō, ante piīngä adinque Wængongui ædō cæte apænte ante pānāmai inguingāa. Ayæ Wængongui Onōwoca nē waadete pōnō cædongä iñongante adocanque badete tocā adinque Wængongui tōmengä ingante ædō cæte pānāmai inguingāa. Edæ Mōitee wodi nānō wææ angainō ante Baa ānāni iñānite wædænque pāninque Wængongui iīnāni iñānite godōmenque nanguī pōni pancæcäimpa, ante pōnēmīniyaa.

³⁰ Wængongui, “Botō tōmēmō nē panguimo imopa. Wiwa nāni cædinō beyæ eyepæ pōni godō pāmo wæcædānimpā,” angacäimpa. Ayæ, “Botō nē Awēnē inōmo inte botō quīnāni iñānite apænte ancæboimpā,” angacäimpa. Mōnō iñömō, Mänōmainō ante nē apænte pancæ angaingä ingante æbānō ingāa, ante do ēñēmōmpa. ³¹ Edæ Wængongui nē Quēwengä iñongä inte edæ ænguī badinque bæi ongote pangä wæcæ wæ, ante mōnō nanguī guñēñate wæcæimpa.

³² Wēēnēñedē Wængongui apænecā ēñēmīni inte mīnitō tæcæ nāō bai entawēmīni ate wadāni pō piīnte guēadō guēa cæyōnāni mīnitō mīni caate wæquinque tæi ongōninque godōmenque cæmīnitapa. Mänōmai mīni cædinō ante nōwo pōnēdāni. ³³ Pancayedēña iñömō nē piīnte cædāni tōmānāni ayōnāni mīnitō imīnite badete todinque pānānitapa. Pancayedēña guiquēnē mīnitō tōniñadāni adobai caate wæyōnānite mīnitō, Adocabomōni imōnīpa, ante bai cædinque nē caate wædāni tōnō godongāmæ ongōmīnitapa. ³⁴ Wadāni

inänite tee mönedäni adinque munitö tömënäni tee mönete nani wædö ante pönëninque tömënäni tönö godongamæ wæminitapa. Ayæ, Mönö maincoo öönædë godömenque waa pöni ongoncoo inte cöwë ongongæimpa, ante ëñëmïni iñömïnite wadäni inguipoga munitö éadincoo ö ænäni adinque munitö wädämaï inte watapæ tomïnitapa. ³⁵ Ìnïnque, Mönö wede pönënö beyænque eyepæ pöni ænguimö ïmompä, ante ëñëninque mänïnö mïni wede pönënö ante wido cædämaï iedäni. ³⁶ Ayæ, Wængonguï nänö änö ante ëñente cæmöni ate tömengä, Pönömo æncæmïnïmpä, ante nänö angaincoo ante cöwë pönongä æncæmönïmpä, ante cædinque munitö wæntædämaï inte ee cæquënëmïni ïmïnipä. ³⁷ Edæ Wængonguï beyæ ante do yewæmongatïmpä.

“Wantæ wantæ ate në Ponguingä mönö änongå iñömö do poncæcäïmpä.

Edæ tömengä nänö angaiönæ ïnque bayonte tömengä eyepæ pöni poncæcäïmpä.

³⁸ Në nö cæte quëwënongå incæ tömengä nänö wede pönënö beyænque quëwëncæcäïmpä.

Adocä wæætë guñente wædinque wodii winongä adinque, botö tömengä ingante adinque wïi tobaimopa,” ante Wængonguï beyæ yewæmongatïmpä.

³⁹ Mönö guiquënë tömënäni nani cæi bai cædämaï inömö inte wïi guñente wædömö inte wodii winönämaï ïmompä. Edæ wodii winonte bai mönö æmæwo ewente baquënëmö ïmompä. Wæætë edæ tömengä ængä beyænque mönö quëwënguïnque tömengä ingante wede pönëmö ïmompä.

11

Mönö wede pönënö ante

¹ Wængonguï pönö cæcä ate watapæ bacæïmpä, ante mönö pönënö ante mönö, Wængonguï ayæ cædämaï ingä incæte cöwë cæqingä ingampa, ante wede pönëmompä. Awinca adämaï ëmömö incæ mönö mïmöno wede pönëninque awinca do ate ëmonte bai ëwocamö inte mönö, Näwangä bacæïmpä, ante do ëñëmö ïmompä. ² Dodäni wede pönënanï iñönänite Wængonguï, Mïni wede pönënö beyænque botö munitö ïmïnite waa abopa, ante apænegacäïmpä.

³ Wængonguï inguipo tönö ïimönæ tömäo badoncæte ante cæyongä quïëmë ïmpä æntë badonguingäa. Ìnæmpä dæ angatïmpä. Ìnïnque mönö në acoo dæ äñonte mänincoo ænämaï inte tömengä wæætë mä pönëninque angä beyænque mönö në acoo do bagatïmpä. Mänömaï ingatïmpä, ante wede pönëninque mönö Ao ämompä.

Dodäni nani wede pönengäinö

Abedo wodi

⁴ Abedo wodi iñömö Wængonguï nänö angainö ante wede pönëninque, Wængonguï qui, ante nö cæte godöninque Cainö wodi wæætë önömonque nänö godönö bai wïi godongacäïmpä. Tömengä mänömaï wede pönente cæcä adinque Wængonguï, Abedo bitö nö cæte pönömi æmopa, ante apænegacäïmpä. Ìnïnque do wænte gogaingä ïnongä incæte Abedo wodi, Botö wede pönente cægäi bai adobai wede pönente cæedäni, ante ñöwo ganca ayæ apænete bai apæncampa.

Ënoco wodi

⁵ Ënoco wodi guiquënë në wede pönengä iñongante Wængonguï, Ënoco ëñëmi. Bitö botö në waa adömi inte bitö wænguënëmämo ante wädämaï inte

pöe, äninque inque iñongante ö ænte wo ææntodongä æigacäimpa. Æite goca ate wadäni ancaa diqui diqui minique Wængongui nänö nê wo æntodongä ingante adämaï ingadänimpa. Edæ tömengä ingante Wængongui ayæ ææntodönämaï iñongante wadäni, Ænoco wede pönengä ingante Wængongui waa acampa, ante do ëñënönänimpa. ⁶ Edæ Wængongui weca poncæte ante cædinque waoca, Wængongui nê Quëwengä ingampa, ante wede pönenguëngä ingampa. Ayæ adobaï, Wængongui ingante nê diqui diqui mimö iñömonte tömengä, Pöe, äninque pönö waa cæcampa, ante wede pönëninque nê poncæ cæcä pongampa. Mänömainö ante nê wede pönënanique Wængongui weca pönänipa. Mäninö ante nê wede pönënämaï ingä guiquënë tömengä ingante Wængongui ædö cæte waa aquingää. Edæ waa adämaï ingampa.

Docä Nöwee wodi

⁷ Nöwee wodi Docä nani änogä guiquënë, Æbänö baquïi, ante adämaï iñongante Wængongui, Nöwee ëñëmi. Bitö adämaï imämo oo pongæimpa cæbii. Angä ëñente guïñente wædinque nê wede pönengä inte tömengä nani wencabo nani guïite quëwenguinque wipo ñænængade impo incæ ñænæ oncö bai badongä ate guïite quëwengadänimpa. Nê wede pönënanique nani nö entawëno bai adobaï nö nänö entawenguinque Nöwee wodi wede pönente cægacäimpa. Æninque tömengä adocanque wede pönëninque mänömaï cædingä iñongante wadäni guiquënë nani apænte wænguïnque Baa angadänimpa.

Abadäo wodi

⁸ Abadäo wodi guiquënë tömengä wede pönengä iñongante Wængongui, Abadäo ëñëmi. Botö pönömo bitö ænguïmæ ante botö odömömo goe. Angä ëñëninque, Æbæmë impa, ante adämaï inongä inte Abadäo wede pönëninque ëñente cædinque do gogacäimpa. ⁹ Mänömaï wede pönëninque wadäni nëmæ gote wacä inongä inte wantæ iñö quëwengä bai inte æmontaicönë owogacäimpa. Ayæ Wængongui nänö angaimæ nê ænguïna inöna inte tömengä wengä Itæca wodi adobaï tömengä wengä Aacobo wodi adobaï wantæ iñö quëwente bai æmontaicönenque owote quëwengadäimpa. ¹⁰ Wængongui doyedë pönï, Waodäni nani öönædë quëwenguïñömo ante botö imämaï badoncæboimpa, ante nämä nänö pönëno bai tæi gönonte mænongacäimpa. Abadäo iñömo, Botö mänü iñömo owocæboimpa, ante nê wædongä inte wede pönëninque piyænë cædinque æmontaicönenque owote inguïpoga quëwengacäimpa.

¹¹ Mönö imonte pönëninque nê ædæmö aacä inongä inte Wængongui iñömo tömengä nänö äninö bai cöwë cæcæcäimpa, ante nê wede pönënä iñömo Tada wodi ingadäimpa. Mänömaï beyæ tömënä owæntadä iñönante Wængongui pönö cæcä æninque tömënä picængadedä inönä inte tæi piñæninque yædëmadä bate wëñængä mangadäimpa. ¹² Abadäo wodi wede pönëninque tæi piñænte tapæicä ate wëñængä ëñagacäimpa. Æninque adocanque picængadecä inte nê wænte bai inongä inte wede pönengä beyænque mönö tömengä nänö pæimö yebæninque nëmoncoo öönædë owocoo nanguï pönï i bai mönö iñömo adobaï nanguï pönï imompa. Æmönaicoo gäwapæ yæwedeca öñoncoo nanguï pönï i bai mönö tömengä pæimö imö adobaï nanguï pönï iñömonte mönö, Mänimpomö imompa, ante ædö cæte angüi.

¹³ Mäninäni tömänäni wede pönente quëwënönäni inte wængadänimpa. Wængongui nänö, Pönö cæcæboimpa, angaincoo ayæ ænämaï inäni inte tömënäni gobæ ongoncoo gomö ate bai, Cöwë æncæmönimpa, ante wede

pönente piyænë cæte quëwengadänimpa. Wadäni nëmæ wabæca quëwente bai quëwëninque tömënanï, Wïi mönitö ömæ iñonte mönitö wamöni inte quëwëmönipa, ante inguipoga owogadänimpa. ¹⁴ Mänömainö ante në änäni iñömö, Tömëmöni ömæ ante diqui diqui mëmöni imönipa, ante quëwënanipa. ¹⁵ Dodäni iñömö do näni emö cæte pongaimæ ante pönente wädäni inte bai tömënanï do adodö gocædönänimpa. ¹⁶ Wæætë adodö mänïömæ näni quëwengaimæ wïi goinëninque tömënanï, Mönö öönædë godömenque waëmömæ pönï gote quëwengæimpa, ante goinente wægadänimpa. Ìninque wadäni Wængonguï ingante, Bitö në waëmömæ goinente wädäni tömënanï Wængonguïmi Ìnipa cæbii, ante änäni incæ tömengä wæætë, Ìñæmpa në wædönäni tömënanï quëwenguïñömö näni wædö ante botö do eyepæ mænongaboimpa, äninque guïñënamäi inte nanguï tocampa.

Abadäö tönö Itæca

¹⁷ Wængonguï, Abadäö æbänö botö imote ëñente cæquiringäa, ante acæte ante angä ëñëninque Abadäö wodi në wede pönënongå inte tömengä wengä Itæca ingante, Wængonguï qui, ante godongacäimpa. Edæ Abadäö ingante doyedë apænedinque Wængonguï, Bitö pæinänï nanguï inänï inte ïimæ æncædänimpa, ante do angä ëñengacäimpa. Incæte Wængonguï mänömainö angä ante në ëñëningä incæ tömengä wengä adocanque pönï inongä inte Abadäö, Wængonguï quingä ingampa, ante godoncæ cægacäimpa. ¹⁸ Adocä tömengä wengä ingantedö ante Wængonguï doyedë Abadäö ingante apænedinque, Bitö wengä Itæca pæinänïque inänitedö ante botö, Abadäö pæinänï inänipa, angacäimpa. ¹⁹ Incæte Itæca wodi adocanque pönï iñongante Abadäö wodi, Botö wengä do wængä incæte Wængonguï, Nänï ömæmöe, angä ïininque do ñäni ömæmömaingampa, ante wede pönëninque godoncæ cægacäimpa. Wængonguï guiquënë, Ee ae, ante wææ angä beyænque tömengä wengä ingante wænönämäi ingacäimpa. Ìninque Itæca wodi do wæningä inte bai ñäni ömæmonte bai ayæ quëwengacäimpa.

Itæca, Aacobo, Ootee

²⁰ Itæca wodi adobai, Wængonguï æbänö cæquiringäa, ante wede nänö pönëno beyænque ëñëningä inte edæ picængadecä badinque Aacobo wodi tönö Eta-woo wodi inate apænedinque, Wængonguï minatö iminate ïimäi pönö waa cæcæcäimpa, ante waa apænegacäimpa.

²¹ Aacobo wodi iñömö, Wængonguï æbänö cæquiringäa, ante wede nänö pönëno beyænque do ëñëningä inte wæncæ cæte öñöninque tömengä nänömoda Ootee wodi wëna inate, Minatö iminate Wængonguï pönö waa cæcæcäimpa, ante waa apænegacäimpa. Ayæ ongotoca da cæte ongonte ædæ wææninque, Wængonguï bitö waëmö pönï inömi inte cæquimido angüënë, ante watapæ apænegacäimpa.

²² Ootee wodi guiquënë, Wantæ iñö wæncæboimpa, äninque, Mönö idægocabo mönö pæinänï incæ Equitobæ wantæpiyæ quëwënanï ate Wængonguï ænte mäocä wadæ gocædänimpa, ante tömengä nänö wede pönëno beyænque ëñëninque ïimäi angacäimpa. Godinque botö bayetoca ingai ee ænte næænte godinque da wencæminimpa, angacäimpa.

Möitee wodi

²³ Möitee wodi mæmpoda guiquënë wëñængä ëñacä ate, Wïi önonganque ingampa. Waëmö wëñængä awædö, ante adinque ïimäi cægadäimpa. Mänïñedë Equitobæ awënë odeye iñömö, Onguïñængä ëñacä adinque do

wænongæimpa, angä incæte tömëna guïñênämaï inte tömëna wede nänä pönënö beyænque weñængä Möitee ingante apäicä mengäa go adocanque mämonque wë wodonte mangadaimpa.

²⁴ Möitee wodi guiquënë picængä bayongante wadäni, Awënë Padaönö wengä wææ Möitee badä ingampa, ante Möitee ingante waa ayönäni tömengä wæætë Wængonguï ingante në wede pönënongä inte edæ Baa angacäimpa. ²⁵ Wæætë edæ, Botö caate wæquinque botö Wængonguï quinäni tönö godongämæ cæcæboimpa, ante cædinque Möitee wodi, Equitoidi nänä wiwa cæte töinö adinque botö wantæ iñö incæ wii toinente awædö, ante wido cægacäimpa. ²⁶ Wængonguï iincayæ ate eyepæ pöni pönongä æncæboimpa, ante wede pönëninque tömengä mäninö ante mimöno gomö ate bai pönengacäimpa. Ayæ Equitobæ quëwënäni waëmoncoo pöni nänä mäincoo ante adinque, Önoncooque ëwenguincooque i awædö, ante Möitee edæ Baa angacäimpa. Wæætë edæ piinte badete todäni wæcä incæte tömengä, Codito beyænque impa, ante pönëninque godömenque waa pöni togacäimpa.

²⁷ Tömengä iñömö, Awënë odeye Padaönö ænguï badinque piingä wæcæ wæ, ante guïñente wædämaï inte wæætë wede pönëninque Equitobæ ëmö cæte gogacäimpa. Ayæ Wængonguï në Quëwengä mönö awinca adämaï inongä ingante Möitee wodi iñömö në awinca gomö acä bai ëmongä inte wæntæye badämaï inte godömenque cægacäimpa. ²⁸ Ayæ, Bamoncadë ëñadäni inänite në ëwënongä incæ godö wænoncæcäimpa, ante Wængonguï angä ëñëninque Möitee wodi wæætë, Në ëwënongä nänö wodo pänta goquï ingæimpa, ante wede pönëninque cægacäimpa. Tömengä wadäni idægoidi tönö Patowa ææmæ mönö cæmæ bai mä cængacäimpa. Ayæ, Në ëwënongä incæ mönö idægocabo bamoncadë ëñadäni inänite wæñönämaï incæcäimpa, ante wææ cæcæte ante cædinque Möitee në wede pönënongä inte wadäni tönö godongämæ odemom-paa wepæ öni paagacäimpa.

²⁹ Idægoidi guiquënë wede pönëninque gäwapæ Opatawæmæ nänä ämæ goyæ go næ gongæmæ ate tæcæguedëmæ pöni tao gogadänimpa. Equitoidi guiquënë, Taadö bapa, mönö taocæimpa, ante cæyönänite æpæmpo becadote wængadänimpa.

Adacaba wodi

³⁰ Idægoidi nänä wede pönënö beyænque Eedicoo nänä quëwëñömö yabæque nänä wææ cægainca incæ näwæ cabænte wæængatimpa. Edæ idægoidi önonpo æmæmpoque go mëönaa mäniimpönaë iñonte yabæque godongämæ cængonte godäni ate cabænte wæængatimpa. ³¹ Onquiyængä Adacaba iñömö mäincoo beyæ ante në towente në quëwengä inongä incæte tömengä wede nänö pönënö beyænque iïmaï cæte mïngä quëwengacäimpa. Idægoda mënaa, Eedicoo iñömö æbänö quëwënäni, ante acæte ante awëmö pö guïda adinque Adacaba wodi, Ee pöda, angä beyænque idægoidi wæætë ëñênämaï inäni inänite wæñöninque tömengä ingante ata cæpodäni quëwengacäimpa.

Wadäni nänä wede pönëngäinö

³² Quinante godömenque ante apænequïmoo. Iïnäni në wede pönënanäni nänä cægainö ante botö æiquedö apænequïmoo. Guedeönö wodi tönö Badaco wodi ingadäimpa. Ayæ wææ Tantö wodi tönö Yepete wodi ingadäimpa. Ayæ wææ Awënë Dabii wodi tönö Tämoe wodi ingadäimpa. Mäninäni tönö Wængonguï beyæ në apænegainäni wodi tömänäni wede nänä pönënö beyænque iïmaï cædinque nanguï cægadänimpa.

³³ Nē wede pōnēnāni iñōmō tæi ēmonte badinque wabæca awēnē odeyēidi nempo quēwēnāni inānite bæ tadinque wido cægadānimpa. Pancadāniya wede pōnēninque wadāni beyæ wææ āninque nō cægadānimpa. Wacā, Cæcæboimpa, āninque do cæquēnengā incæ wīi cæcā īninque nē pōnēnāni pancadāniya, Bitō ānō cæcæbiimpa, ānāni ēñēninque do cægacāimpa. Pancadāniya nāni wede pōnēnō beyænque mēñēidi incæ ecadāmai ināni bagadānimpa. ³⁴ Gongā nanguī wo bæco adinque pancadāniya wede nāni pōnēnō beyænque mōnæ ēmongatimpa. Wadāni yaēmenca tamencacæ cædāni wædinque nē pōnēnāni pancadāniya aamō cædinque mūnāni quēwengadānimpa. Aquīi pōni ināni inte nē wede pōnēnāni pancadāniya tæi piñænte bagadānimpa. Wabæca tontadoidi wænoncæ pōnāni adinque nē pōnēnāni pancadāniya wæætē tæi piñæninque wido cædāni gogadānimpa. ³⁵ Tōmēnāni guidēnāni nāñe wænāni ate onquiyænāni wede nāni pōnēnō beyænque do wænīnāni quēwēnāni ate ængadānimpa.

Nāni caate wægāinō

Ayæ adobaī nē pōnēnāni inānite wīwa cædāni caate wæyōnānite wacā, Ata cæpobo goquīmi, angā incæte nē caate wædōnāni pancadāniya wæætē, Ee abi caate wæwēmoē, ānānitapa. Tōmēnāni, Botō īincayæ ate iñāni ōmæmōninque caate botō wædō beyænque godōmenque waa quēwencæboimpa, ante wææ āninque Ao ānāmai ingadānimpa. ³⁶ Tōmēnāni nāni wede pōnēnō beyæ pancadāniya inānite wadāni badete togadānimpa. Wadāni inānite wæætē tæi tæi pangadānimpa. Wadāni inānite wæætē yaēmengō ñā cæyæninque tee mōnedāni wægadānimpa. ³⁷ Pancadāniya inānite dicaca tacadāni wægadānimpa. Pancadāniya inānite ta wiyænāni wægadānimpa. Pancadāniya inānite yaēmenca yedāni wægadānimpa. Pancadāniya obega æmontai tōnō caboda æmontai badōninque māninque wēñate mongæninque ōmæpodāni inte wæyōnānite wadāni togænte pāninque wīwa cægadānimpa. ³⁸ Tōmēnāni nē wede pōnēnāni inte waa pōni ināni iñōnānite inguipogaque quēwēnāni wæætē wīi tōmēnāni bai ināni inte wænæ wænæ cægadānimpa. Nē pōnēnāni iñōmō pancadāniya, Æyōmōmē gote quēwenguimoo, ante pōnente wædinque wodii wīnonte ōnōmæca wayōmō godinque ānanquidi wayōmō godinque oncontatodē guidīninque pancadāniya wē womōñōnāni pancadāniya onguipodē ææ wote wē womongadānimpa.

³⁹ Īninque Wængonguī tōmēnāni inānite, Wede mīni pōnēnō adinque botō waa tobopa, ante apænegacāimpa. Incæte tōmengā nānō, Pōnō waa cæcæboimpa, angāinō ante tōmēnāni māñifedē ayæ ænāmai ingadānimpa. ⁴⁰ Edæ tōmēnāni adodānique wīi æncædānimpa, angacāimpa. Wæætē Codito godōmenque pōnongā æninque mōnō watapæ quēwēñōmonte tōmēnāni mōnō tōnō godongāmæ æninque ædæmō picæñāni bai bacædānimpa, ante Wængonguī mōnō imonte waa cædinque tōmēnāni beyæ adobaī waa cægacāimpa.

12

Itota ingante mōnō cōwē adinque quēwengcæimpa, ante

¹ Īninque boguimā bacoo owo bai māñināni iñōmō, Wængonguī cōwē pōnō cæcæcāimpa, ante nē wede pōnengāināni iñōmō adobaī bacoo ongōnāniya. Edæ, Mōnitō wede pōnente mōni cægāi bai mīnitō adobaī wede pōnēninque īmai cædāni, ante a ongonte bai apænedāniya cæmōō. Tōmēnāni quingæ pogodo gocæte ante cædāni teēmencoo gā āadāni bai cædinque mōnō adobaī oda caate mōnō wædoncoo ante iñimpo cæcæimpa. Wænæ wænæ mōnō

cægaincoo ante, Ancaa cæte awædō, āninqe mōnō wido cæcæimpa. Ayæ taadō ante Itota nānō odōmongainonque ante mōnō edæ wæntædāmaī inte tæī piñæninque pogodo gocæimpa. ² Mōnō wede pōnente æite godō taadō ante tōmengā iñōmō nē tāno beyænte gogaingā ingampa. Tōmengā adocā incæ mōnō wede pōnēnō ante, Cōwē mānōmaī bacæimpa, ante ædæmō badon-gaingā ingampa. Tōmengā iñōmō wadāni tōmengā ingante awæ timpodāni wæyongante badete todāni adinque tōmengā, Mānōmaī cædāni botō caate wædō beyænque botō iincayæ ate watapæ tocæboimpa, ante nē ēñeningā inte piyænē cædinque caate wædinque wængacāimpa. Tōmengā ñowo iñōmō ñāni omæmōnte æite godinque Awēnē Wængongui nānō contaimpaa tōmēmængā inō tæ contate Awēnē bate ongōñongā mōnō adocā Itota ingante æmō ate baī pōnēninque edæ tōmengā miñæ tee empote pogodo gocæimpa.

³ Tōmengā iñōmō nē wiwa cædāni nanguī piinte cædāni wæcā incæte piyænē cægacāimpa. Īninqe mīnitō iñōmō, Wæntædāmaī inte mīmō nangæ batawēnāmaī ingæimpa, ante cædinque, Tōmengā æbānō cægacāī, ante pōnēdāni. ⁴ Ñowo ganca mīnitō wēnæ wēnæ mīni cæinente wædō ante wido cæcæte ante mīnitō wængui beyæ wepæ dicæ gowete cæmīniyaa. ⁵ Ayæ Wængongui mōnō wampo pōnencæmōimpa, ante mōnō imonte, Botō wēmīni godōmenque cæcæmīnimpa, ante æbānō pōnō angacāī, ante mīnitō dicæ pōnēmīniyaa. Īmaī angacāimpa, ante yewæmongatimpa.

“Botō wēmi ēñēmi. Mōnō Awēnē bitō imite, Ēñente cæcæbiimpa, ante pangā wædinque,

bitō wæætē badete todāmaī incæbiimpa.

Bitō imite, Ēñenguēnē quēwēe, angā ēñente wædinque wæwēnāmaī incæbiimpa.

⁶ Īñæmpa tōmengā nānō nē waadete pōnēnānique inānite pāninque

mōnō Awēnē iñōmō, Ēñencæmīnimpa, ante cæcampa.

Botō wēmīni, ante nānō nē ængainānique inānite tōmengā pangampa.”

⁷ Ante yewæmongatimpa cæmīnii. Mīnitō caate wæmīni imīnitawo. Īñæmpa wēñænāni inānite wæmpoidi dicæ pānāmaī inguināniyaa. Mæmpo Wængongui iñōmō adobaī, Botō wēmīni imīnīpa, ante edonque acæimpa, ante nanguī āninqe pangā caate wæmīnīpa. Īninqe tōmengā pangā wædinque mīnitō wæætē, Mōnō ēñente quēwenguinque ante Mæmpo Wængongui pangampa, ante piyænē cæte ee amīni pancæcāimpa. ⁸ Tōmengā wēñæmō iñōmōnte tōmengā tōmāmō imonte edæ nanguī pante angampa. Incæte mīnitō pancamīniya imīnite tōmengā pante ānāmaī ingantawo. Īninqe mīnitō, Wīī Wængongui wēmōni imōnīpa. Wacā wēmōni imōnīpa, ante wæquēnēmīni imīnīpa.

⁹ Mōnō mæmpoidi waodānique inōnāni inte nanguī āninqe pānāni adinque mōnō, Mæmpocā inongā inte tōmengā nānō cæquēnēnonque cædinque mōnō imonte waa cæte pangantapa, ante tōmēnāni inānite waa atamompa. Mōnō Mæmpo Wængongui adobaī mōnō imonte nanguī āninqe pangā adinque mōnō quēwenguinque mōnō tōmengā ingante godōmenque Ao ante ēñente cæcæimpa.

¹⁰ Mōnō mæmpoidi guiquēnē, Ēbānō pōnō waa cæquimoo, ante pōnente ate mōnō imonte edæ, Ēñencæmīnimpa, ante wantæ iñō nanguī ānāni ēñente cætamompa. Wængongui iñōmō edæ, Tæiyæ waēmō botō ewocabo baī mīnitō adobaī tæiyæ waēmō ewocadinque watapæ quēwencæmīnimpa, ante cædinque mōnō waa quēwenguinque ante pōnō pangampa. ¹¹ Ēcāmenque mōnō imonte nanguī āninqe pāna incæ tōmengā pangā ate mōnō caate wædinque dicæ quingæ watapæ tomongaa. Īñæmpa, Caate awædō, ante cōwē āmōmpa.

Wæætē iincayæ ate edæ doyedē nāni pānō beyænque mōnō nē ēñente badōmo ate mōnō nō cæmō badinque gānē pōnente entawēmōmpa.

Mōnō wæquinque Wængonguī apæneçā ēñēnāmaī imōmpa

12 İninque mīnitō guepænte wædimīni inte edæ tæi piñænīnque wæntædāmaī inte nanguī cæedāni. Önoncapo nanguī guēcāpote wædimīni inte edæ guēcāpodāmaī inte ængæ gantite pogodo gote bai nanguī cæedāni.

13 Mōnō cægonguīnō, ante mīnitō taadō ante engā womīni mæmō ba ate nē podā cædināni incæ podā cædāmaī inte tōmēnāni nāni waa baquinque mānīnōnō tōinō gote waa cægoncædānimpa, ante godō waadete cæedāni.

14 Mōnō godongāmæ piyænē cæte quēwengæimpa, ante mīnitō nanguī tæi piñænīnque waodāni tōmānāni inānīte gānē pōnente cæedāni. Ayæ, Æcānō tæiyæ waēmō ewocadāmaī ingāā tōmengā iñōmō mōnō Awēnē ingante cōwē adāmaī incæcāimpa, ante pōnente wædinque mīnitō, Mōnō tōmāmō Wængonguī ayongā tæiyæ waēmō ewocate quēwengæimpa, ante nanguī cæedāni. 15 Wængonguī pōnō waadete nānō cædō ante mōnō tōmāmō ænte entawengæimpa, ante cædinque mīnitō cōwā adinque, Adocanque incæ ömætawengā ināmaī incæcāimpa, ante wææ cæedāni. Adocanque wæwente nānō quēwēnō beyæ piinte bate tedecā ēñēnīnque mīnitō, Wadāni nāni wentamō mongænguinque adobai piinte badāmaī incædānimpa, ante wææ cædinque nē piingā ingante godō wææ æedāni. 16 Ayæ mīni cabo incæ, Nānōogængā ināmaī iñongante adocanque incæ godō mōnāmaī incæcāimpa, ante cōwā adinque wææ cæedāni.

Etawoo wodi iñōmō tōmengā bamoncadengā inongā inte nānō nanguī ænguēnenco ante piinte bai cædinque cænguinque æncæte ante tōmanco godonte beyæ adopoque ænte cængacāimpa. Mīnitō guiquēnē, Inguipogaque ante ænte to wædō, ante Etawoo wodi nānō pōnēwente cægainō bai adocanque incæ cædāmaī incæcāimpa, ante edæ wææ cæedāni.

17 Bamoncadengā inte nānō ænguēnenco ante do piinte bai godōningā inte Etawoo wodi iincayæ ate, Pōnōmi æmoe, āñongante mæmpocā wæætē Baa angacāimpa, ante do ēñēminīpa. Edæ Ca ca wædinque tōmengā, Æbānō cæte ænguimoo, ante anca angā incæte mæmpocā do Baa āningā inte ñōwo wæætē wadō ante ædō cæte anguingāā.

18 Onquiyabo Wængonguī nānō gonga tånongā bæcobo ñænoque dodāni ponte godongāmæ ongonte cægōnāni bai mīnitō wīi onquiyabo ñænoque pōminīpa. Tōmēnāni wēmō mæ māmonte bai iñōmō wīni cai pæmæmāmo iñōmō nāni ponte wægaiñōmō bai mīnitō wīi pōminīpa. 19 Todompeta nāni ancadeca nanguī we öömāmo dodāni nāni ēñente wægaimāmo bai mīnitō wīi adopāmo ēñēminīpa. Wængonguī wææ ante nānō tedepāmo tōmēnāni nāni ēñente wægaimāmo bai mīnitō wīi adopāmo ēñēminīpa. Mānimāmo ēñente guīñente wædinque tōmēnāni, Idæwaa āmīpa. Ædō cæte godōmenque ēñenguimōnīi, ante wægadānimpa. 20 Edæ “Cæningā incæ onquiyaboga ponte cægongā adinque mīnitō tæi tacamīni wæncæcāimpa,” ante wææ āñongante tōmēnāni ancai guīñente wædinque, Wængonguī nānō wææ angainō ante mōnitō ædō cæte ædæmō ēñente cæquimōnīi, ante wægadānimpa.

21 Onquiyaboga nāni ate guīñēmāmo adinque Mōitee wodi incæ, “Ancai guīñente botō do do wāate bai wæbopa,” angacāimpa.

22 Mīnitō guiquēnē Tiñoquidi nāni ānonquidi do ponte bai ewocamīnīpa. Edæ Wængonguī nē Quēwengā öönædē Eedotadēē bai nānō waēmō pōni owoyōmō mīnitō māniñōmō do ponte bai ewocamīnīpa. Wængonguī anquedoidi æpodō

mīido ganca īnōnāni inte nanguī pōnī īnāni godongāmæ pō bee tente tōmēnāni nāni watapæ ongōñōmō mīnitō māniñōmō do ponte baī ēwocamīnīpa. ²³ Mōnō Codito ingante godongāmæ mōnō pōnencabo īñōmō bamoncadēnāni nē ænguimō bayōmonte mōnō ēmōwo ante oōnædē yewæmōintaa do yewæmonte ongompa. Īnīnque mīnitō adocabomīni badīnque Wængonguī weca mōnō waocabo tōmāmō īmonte nē apænte anguingā weca do pōmīni īmīnīpa. Nē nō cæte quēwengāināni wænte goyōnānīte Wængonguī īnīnque badongā ate do ædæmō picænāni baī badānīpa. Tōmēnāni ōnōwoca weca mīnitō do ponte baī ēwocamīnīpa. ²⁴ Wængonguī, Botō pōnō cæbo ate mīnitō Ao āmīni īnīnque mōnō godongāmæ waa cæte quēwengæīmpa, ante nānō angainō ante Itota, Īnīnque bacæīmpa, ante ædæmō badongacāīmpa. Mīnitō īñōmō nē badongaingā weca do pōmīni īmīnīpa. Abedo wodi wepæ onguipoīya gowecā adīnque Wængonguī wæætē nē wænōningā ingante, Botō weca ongōnāmaī gobāwe, angacāīmpa. Itota wepæ wīī Abedo wodi wepæ baī īmæ adīnque Wængonguī wæætē, Itota wepæ petæ petæ gowedīmæ beyænque botō weca pōedāni, ante cægacāīmpa. Mānīmæ Itota wepæ nānō petæ petæ gowegāiñōmō mīnitō do ponte baī ēwocamīnīpa.

²⁵ Mānōmaī waēmō pōnī īñōmō do pōmīni inte mīnitō nē apænecā ingante Baa ānāmaī īedāni. Onquiyabo godongāmæ ongōnāni guiquēnē inguipoga wææ angaingā ingante Baa ānīnāni īñōnānīte tōmengā ata cæpodāmaī inte pangacāīmpa cæmīnīi. Oōnædē ongonte nē wææ angaingā ingante ēñēnāmaī inte dadi ēmænte wadæ gomō baī mōnō godōmenque pante wæquēnēmō īñōmonte tōmengā cōwē ata cæpodāmaī incæcāīmpa.

²⁶ Māniñedē tōmengā nānō tedepāmo beyænque inguipo wancæ wancæ cægatīmpa. Nōwo īñōmō tōmengā, “Botō īncayæ ate inguipo adopoque pōnī wancæ wancæ cædinque oōnædē adobaī wancæ wancæ edæ cæcæboīmpa,” angacāīmpa. ²⁷ Tōmengā, “Īncayæ ate adopoque pōnī cæcæboīmpa,” angacāīmpa, ante pōnēnīnque mōnō īīmaī ante ēñengæīmpa. Tōmengā adopoque wancæ wancæ cæcā ate tōmengā nānō badongaincōo oo pōnī ongoncōo īñōmō tōmancōo adoyedē ēwente bacæīmpa. Quincōodō oo ongōnāmaī tæī ongoncōo ī mānīncōoque ayæ a ongongæīmpa, ²⁸ Īnīnque mōnō Awēnē Odeye nempo quēwēmō īñōmō wancæ wancæ cædāmaī inte tæī ongonguimō īmōmpa, ante pōnēnīnque mōnō Wængonguī ingante waa ate pōnente apænecæīmpa. Mānōmaī cædinque Wængonguī ñāo baī nānō tæī ēmōmāmo ate guīñente wædinque tōmengā beyæ cæcæīmpa. ²⁹ Edæ mōnō Wængonguī īñōmō edæ gonga wo bæcoquī baī ingānō anguēnē, ante āmo ēñēmaīmīnīpa.

13

Īīmaī cæmō adīnque Wængonguī waa tocæcāīmpa, ante

¹ Mīnitō īñōmō, Mōnō caipæ īmōmpa, ante mīni waadete pōnēnō baī cædinque cōwē godongāmæ waadete pōnente cæedāni. ² Tōmānāni īnānīte edæ, Pōedāni, ante waadete cæedāni. Mānōmaī cædinque pancadāniya, Botō weca ædānidō ēñacæ pōnānīi, ante ēñēnāmaī īnāni incæte do waa cædāni ate edæ, Æ, Wængonguī nānō da pōnōnāni anquedoidi incæ botō weca pōnānitapa, ante tæcæ abopa, ante todānīpa.

³ Tee mōnete ongōnāni tōnō botō godongāmæ tee mōnete wæcōmo baī īmōpa, ante pōnēnīnque mīnitō tōmēnāni īnānīte ante cōwē pōnēedāni. Pancadāniya īnānīte wadāni wīwa godō cædāni ate caate wæwēñōnāni mīnitō adobaī pōnēnīnque, Mōnō baō adobaī ēñamō inte tōmēnāni tōnō godongāmæ caate wæmō baī īmōmpa, ante tōmēnāni īnānīte cōwē pōnēedāni.

⁴ Nänöögängä ināmaī iñongante waocā nē godō guēa mongā tōnō nē godō wīwa towēnāni iñōnānite Wængonguī mānīnāni tōmānāni inānite do apænte ante pancæcāimpa cæminii. Mīna gæncaya adomīnaque guēa moncæmināimpa. Ayæ ñānōnāni mōninque nāna gæncaya quēwēna ate, Waa impa, ante mōnō waa acæimpa.

⁵ Wængonguī incæ, “Mīnitō imīnite cōwē emō cæte godāmaī inte botō cōwē aacæboimpa,” angacāimpa. Mānōmaī beyæ mīnitō godonte æinta ante æinente wædāmaī inte mīni ēadincooque ēadinque piyænē cæte quēwēedāni. ⁶ Inique Wængonguī beyæ iīmaī ante nāni yewæmongainō bai ante mōnō wede pōnente apænemompa.

“Mōnō Awēnē botō tōnō godongāmæ cæcā adinque botō, Waocā ædō cæte botō imote wēnæ wēnæ cæquingāā, ante ēñemo inte guīñēnāmaī incæboimpa.”

⁷ Nē aadāni iñōmō mīnitō imīnite Wængonguī nānō ānō ante nē apænedāni inānite ante pōnēninque mīnitō, Tōmēnāni iñōmō waa cædinque edæ watapæ quēwēnānipa, ante pōnēedāni. Ayæ tōmēnāni nāni wede pōnēnō bai adobai wede pōnēedāni.

⁸ Itota Codito iñōmō wēēnēñedē nānō ingāi bai ingā ñōwoonæ adobai ingā inte tōmengā adocā iīncayæ ate cōwē adobai incæcāimpa.

⁹ Wadāni, Wacā taadō odōmonte apænebo ēñēe, āñōnānite tōmēnāni mīñæ godāmaī iedāni. Iñæmpa tōmēnāni cænguinque ante, Æbānō waa pōni cō cæquīi, ante wææ ānāni incæte mānīi cænguincoo beyæ tōmēnāni wīi godōmenque watapæ quēwēnānipa. Inique mānīncoo cænte beyæ mōnō mīmō ædō cæte tæi piñænte entawengūi. Wæætē edæ Wængonguī nānō waadete pōnō cædō beyænque mōnō tæi piñænte entawengæimpa. ¹⁰ Æmontaicōnē cædinque, Wængonguī quī, ante nē godōnāni iñōmō tōmēnāni nāni iya tāimpaa godōninque pancaā cænguī ænte nē cænguēnēnāni inōnāni incæte tōmēnāni mōnō Codito mōnō beyæ nāmā nānō wepæ godongainō guiquēnē ædō cæte ænguīnāni.

¹¹ Cænīnāni inānite wænōnāni ate nē godongā ñænængā pōni inongā iñōmō wepænque æninque, Wēnæ wēnæ mōni cædinō ante Wængonguī pōnō ñā mēnongacæcāimpa, ante cædinque Tæiyæ Waēmō Pōni Oncōnē wāānē guīdinque godongampa. Godongā ate baonque, Wentamō mongænte awædō, ante æninque tōmēnāni nāni quēwēñōmō yabæque māo iya tangadānipa.

¹² Itota adobai, Botō wepæ pōnō mēnongabo ate botō quīmīni iñōmō tæiyæ waēmō ewocate quēwēncæminīmpa, ante cædinque wentamō mōnō entawēnō ænte teēmē mongænte godinque tōmēnāni quēwēñōmō wææ cædinemō tao godinque yabæque pōni guīñēñate wædinque caate wængacāimpa cæmōō.

¹³ Tōmengā yabæque pōni guīñēñate wædinque nānō tao gogai bai mōnō adoyōmō tōmengā weca tao gote ado guīñēñate wæcæimpa. ¹⁴ Iñæmpa inguipoga mōnō quēwēñōmō tæi ongompa diyæ wantæpiyæ quēwengūi. Wæætē oōnædē iīncayæ ate edæ mōnō cōwē quēwengūiñōmō ante æinente wædinque wānō cōmopa.

¹⁵ Inique, Wængonguī quī, ante cænguī godōnāni bai cædinque mōnō iñōmō edæ, Itota emōwo beyænque quēwēmōnipa, ante nē apænemō inte tōmengā emōwo ante Wængonguī ingante apænedinque, Bitō tæi emōmi inte waa pōni cæbipa, ante watapæ apænecæimpa. ¹⁶ Ayæ ñimpo cædāmaī inte mīnitō wadāni inānite cōwē waa cæedāni. Ayæ wadāni inānite mīni mānīncoo godō nēnempomīni æncædānipa. Mīnitō mānōmaī, Wængonguī quī, ante godonte bai cædinque nēnempomīni adinque Wængonguī mīni godōnō ante waa acampa. ¹⁷ Mīnitō, Mōnō imonte nē ānāni inānite mōnō Ao

ante eñengæimpa, ante pönëninque nê aadâni inânite cōwê eñente cæedâni. Tömënanî, Æbânô cæboo, ante adinque Wængonguî apænte ancæcæimpa, ante eñëninque guifente wædâni inte nô cædinque aadânipa cæminîi. Tömënanî mânômaî aadinque watapæ tote quëwencædânimpa, ante mînitô wæætê tømënanî nâni ânônô antê eñente cæedâni. Mînitô wæætê eñënanîmaî imîni adinque tømënanî wæætê edæ, Ædô cæte aaquimônîi, ante wæwente badâni ininque mînitô adobaî todâmaî imaîminîpa.

¹⁸ Mönitô beyæ ante Wængonguî ingante apæneedâni. Mönitô mîmô entawëmônî inte wentamô entawënâmaî imônîpa, ante nâma apænte pönëmônîpa. Edæ, Quiëmê cæmô mônô cōwê nô cæte quëwengæimpa, ante cæmônîpa. ¹⁹ Botô mînitô weca ocæ ëmænte pöinëmopa. Ininque mînitô Wængonguî ingante apænedinque, Wængonguî, bitô pönô cæbi ate Pabodo mönitô weca poncæcæimpa, ante apæneedâni, ante nangui ämopa.

Mînitô imînite Wængonguî waa cæcæcæimpa, ante

²⁰ Wængonguî inguipoga nanô badônâmaî iñedê wëenëñedê pönî äninque edæ, Mönô godongämæ waa cæte quëwengæimpa, ante tømengä nanô angainô bai cōwê nê badongäingä inte iîmaî pönô cægacæimpa. Edæ mönô obe-gaidi bai iñömonte Awënë Itota iñömô mönô imonte nê Aacä ñænængä inongä inte tømengä wepæ gowegaîmæ eyepæ pönî godongä ate Wængonguî tømengä ingante, Eyepæ i, äninque, Nâni ömæsmöe, angä ñâni ömæmongacæimpa. Mânômaî gänê pönente nê cægaingä inte Wængonguî iñömô, ²¹ waa pönî pönongä ænte eyepæ entawëninque mînitô iñömô tømengä nanô äno bai cæcæminîpa. Tømengä Itota Codito tönô godongämæ cædinque pönô cæcä æninque mönô tømengä nanô waa adoncooque entawengæimpa, ämopa. Itota Codito iñömô ñöwopämo incæ iñcayæmämo incæ cōwê nê tæi ëmönongä inte ñäö ëmongä amônîpa, ante mönô tømengä ingante cōwê watapæ apænecæimpa. Mânômaî ingæimpa, ante botô, Amëë, ämopa.

²² Inânâni eñëedâni. Botô mänînö tömänô ante apænecæte ante wædænque pönî yewæmömopa. Ininque mänînö botô ædæmô apænedinô ante mînitô piyænê cædinque eñëedâni, ämopa. ²³ Mönô tönîñacä Timoteo tee mönete wæyongante ñöwo ñimpo cædâni gocantapa, ante apænebo eñëedâni. Tømengä botô weca quingæ pongä ininque botô tømengä tönô guëa mînitô weca eñacæ pömaîmönäpa. ²⁴ Mönitô beyæ apænedinque mînitô imînite nê aadâni inânite, Waa quëwencæminîpa, ante apæneedâni. Ayæ adobaî Wængonguî quînanî tömänâni inânite, Waa quëwencæminîpa, ante mönitô beyæ äedâni. Ayæ, Mînitô imînite ante apænedinque Itadiabæ quëwënanî adobaî, Mînitô waa quëwencæminîpa, ante apænedânîpa, ante ämo eñëedâni. ²⁵ Mînitô tömämîni imînite Wængonguî pönô waadete cæcæcæimpa. Mänînque ante yewæmömopa.

Tantiago cadota ante nānō yewæmongainta

Tantiago īīmaī yewæmongacāimpa

¹ Botō Tantiagobo īīnōmō Mæmpo Wængonguī tōnō mōnō Awēnē Itota Codito īinate nē cædōmo īmopa. Idægoidi mīni cabo tipæmpoga go mencabomīniya inte wabæca nāni quēwencabo wabæca nāni quēwencabo weca pangocæte godīmīni īīnōmīnite botō waa pōnēmo inte īī yewæmōintaa yewæmōimpa.

Wængonguī nānō ēñēmāmo ante mōnō cængcēimpa, ante

² Botō tōniñamīni ēñēdāni. Quīēm beyæ wæwente bamīni incæ mīnitō æyedēmē mānōmaī bamīni īninque edæ māniñedē incæ cōwē, Mōnō watapæ toquinque impa, ante pōnēdāni. ³ Mīni wede pōnēnō æbānō ī, ante edonque acæimpa, ante cædāni ate caate wæmīni incæte mīnitō, Mōnō caate wædō beyænque mōnō godōmenque pædinque wæntæye īnāmaī inte ee cæquīmō īmopa, ante do ēñēmīnīpa. ⁴ Īninque, Mōnō æmæwo pæcæimpa, ante cædinque mīnitō wæntæye īnāmaī inte ee cædāni. Mānōmaī cæte pæmīni īninque, Mīni cædīmāmo æbānō cæmīni īmīnī, ante adinque edæ, Tōmānō waēmō cæmīni īmīnīpa, ante abaimpa.

⁵ Mīnitō weca æcānō nānō ēñēmāmo wīī eyepæ īna adinque tōmēngā, Pōnōmi ēñēmoe, ante Wængonguī ingante apænequēnengampa. Apæneyongā Wængonguī wæætē pōnō cæcā æncæcāimpa. Edæ Wængonguī īīnōmō nē, Pōnōmi æmoe, ante ānongā ingante wæætē piinte ānāmaī inte godōnongā ingampa. Ayæ tōmānāni īnānīte pōnō cædinque tōmāā godōnongā ingampa.

⁶ Īnæmpa nē angā īīnōmō wede pōnenguēnēngā inte wīī æmæ pōnēninque apænecæcāimpa. Edæ nē æmæ pōnēngā īīnōmō gāwapæ æpæ woboyæ pæmæninque mæ conta mæ conta gopæ ocæmæ pō cæpæ nānō cægāimæ bai tōmēngā adobai gocā ingampa. ⁷ Māningā īīnōmō Wængonguī pōnongā æncæboimpa, ante ædō cæte īīmaī ante pōnenguīngāā. Wængonguī edæ tōmēngā ingante tōmāā godōnāmaī incæcāimpa. ⁸ Tōmēngā mēnongā pōnente quēwēngā ingampa. Æbānō cæcāā, ante ēñēnāmaī īnongā inte ædō cæte waa cæquīngāā.

⁹ Adocanque mōnō tōniñacā incæ īmæca quēwēnāni nāni ēadincoo nē wīī eyepæ ēacā incæte tōmēngā Wængonguī pōnō cæcā beyænque, Æbānō ēaboo, ante pōnēninque watapæ toquēnēngā ingampa. ¹⁰ Wacā mōnō tōniñacā guīquēnē īmæca quēwēnāni nāni ēadincoo nē ēacā incæte tōmēngā wæætē, Botō ōnōmoque īmopa, ante pōnēninque watapæ toquēnēngā ingampa. Edæ ongai ōnonque pododīnque guīñē wæmpa bai tōmēngā adobai wæncæcāimpa. ¹¹ Edæ nænque tamō tī nāwāñonte awæ guingo icate to amīnte æmæwo wæmpa. Ongai yædōi gueo odote wæninque nānō waēmō ēnōdī wo ēwente bapa bai nē ēacā īīnōmō adobai ingampa. Tōmēngā godonte æ godonte æ tæcæ cædinque quīngæ wæninque edæ dæ anguīngā.

Mōnō caate wæpāmo

¹² Wængonguī ingante nē waadedāni īnānīte tōmēngā wæætē, Mīni cōwē quēwēnguīnta, ante poganta bai mīnitō īmīnīte pōnōmo æncæmīnīmpa, ante angacāimpa. Mānīnta Wængonguī weca cōwē mōnō quēwēnguīnō impa. Īninque waocā caate wæcā incæte tōmēngā wæntæye badāmaī ingā īīnōmō tōmēngā nānō toquinque. Wæntæye īnāmaī inte ee cæcā adinque Wængonguī, Mīni

cōwē quēwenguinta, ante tōmengā nānō angainō bai māningā ingante pōnongā æncæcāimpa. ¹³ Waocā nānō cæinēwente wædō beyæ, Wēnæ wēnæ cæboe, ante cædinque tōmengā, Wængonguī botō imote, Wēnæ wēnæ cæcæbiimpa, ante ingampa, ante wīī anguēnengā ingampa. Edæ Wængonguī ingante, Wēnæ wēnæ cæcæbiimpa, ante waocā ædō cæte anguingāā. Wængonguī wæætē wadāni inānite, Wēnæ wēnæ cæcæmīnīmpa, ante ānāmaī inongā ingampa cæmīnīi. ¹⁴ Æcāmenque incæ, Wēnæ wēnæ botō cæinente wædō incæ ante waēmō impa, ante pōnēninque tōmengā do wēnæ wēnæ mōnō cæinente wædō beyænque wēnæ wēnæ cæinengā ingampa. ¹⁵ Yædēmadā wēñængā pæcā adinque ēñauingā bai mōnō cæinēwente wæpāmo adobai entawente pætawēmō inque mōnō do wēnæ wēnæ cæmōmpa. Ayæ wēnæ wēnæ mōnō cæpāmo beyæ mōnō æmæwō wænguinqe impa.

¹⁶ Botō nē waadete tōniñamīni ēñēedāni. Mīnitō nāmā incæ oda cædāmaī incæmīnīmpa. ¹⁷ Ōnonque mōnō ænō ante mōnō waēmō ñāō emōnoncoo tōmancoo incæ mōnō Mæmpo Wængonguī oōnædē owote nē pōnōnongā ingampa. Mæmpo Wængonguī oōnædē owodinque apāidāni ināni badongacāimpa. Adocā nænque wēmō cæbai wayōmō wayōmō go bai entawēnāmaingā ingampa. Tōmengā wæætē adodonque ingaingā ingampa. ¹⁸ Botō cæinēmōpa, ante nē angaingā inte Wængonguī, Nāwangā botō angainō beyænque mīnitō botō wēñæmīni bacæmīnīmpa, ante wāānā mangā bai cædinque mōnō imonte pōnō badongacāimpa. Tōmengā nānō badongaincoo tōmancoo iñonte mōnō tānomō inōmō imōmpa.

Wængonguī ingante mōnō nō ēñente cædō

¹⁹ Botō nē waadete tōniñamīni ēñēedāni. Wacā āñongā mīnitō tōmāmīni quingæ ēñenguēnēmīni imīnīpa. Mīnitō wæætē quingæ apænedāmaī inte adobai quingæ piinte ināmaī inguēnēmīni imīnīpa. ²⁰ Wængonguī, Nō cæte quēwēedāni, ante waa nānō cæinēmāmo ante waocā nānō pīimāmo beyæ wīī edæ cæcampa. ²¹ Mānōmaī beyæ mīnitō wentamō entawēninque mīni wīwa cædō tōmāā ñimpo cæedāni. Adobai quiēmē mīni wēnæ wēnæ cæpāmo tōmāmāmo ñimpo cæte iedāni. Ayæ Wængonguī nānō angainō ante mīnitō mīmōnē nānō mingainō ante Ao ante gānē pōnente æncæmīnīmpa. Edæ iī angainō beyænque mīnitō quēwencæmīnīmpa.

²² Mīnitō, Nāmā incæ oda cædāmaī ingæimpa, ante cædinque Wængonguī nānō angainō ante wīī Ōnonque ēñēmīnique inte wæætē, Æbānō ante i, ante ēñente cæedāni. ²³⁻²⁴ Waocā nāmā awinca awocawænta adinque nāmā ate ate wadæ godinque, Quinō bai intawo, ante nānō adinca do oda cæte wæcampa. Mānōmaī oda cæte wæcā bai Wængonguī nānō angainō ante nē ēñenganque wīī ēñente cæcā iñōmō tōmengā adobai oda cæte wæcā ingampa. ²⁵ Wængonguī nōingā nānō wææ angainō ante nāni yewæmongainō ante nē ædæmō cōwē acā guiquēnē tōmengā iñōmō nānō ēñēñinō ante wīī pōnente badāmaī inte wæætē cōwē ēñente cæcā ininque tōmengā mānōmaī cædinque nānō toquinque cæcampa. Wængonguī nōingā nānō wææ angainō beyænque waocā ñimpo cæte quēwengā ingampa.

²⁶ Wængonguī ingante botō nē ēñente cæbo imōpa, ante pōnengā incæte tōmengā Ōnonguēñēwa ñā cæguēñēwate bai cædāmaī inte wæætē wīwa tedecā ininque tōmengā nāmā incæ oda cæte gobaingampa. Ayæ Wængonguī ingante botō ēñente cæbo imōpa, ante tōmengā nānō ānō ante Ōnonque angā imaingampa. ²⁷ Nōwadāni tōnō owæmpōināni nāni wæwēñedē mōnō tōmēñāni tōnō godongāmæ cæcæimpa. Ayæ adobai imæcaque ante quēwēñāni nāni wēnæ wēnæ cædimāmo bai mōnō, Wentamō badāmaī ingæimpa, ante wææ

cæcæimpa. Mänömaï cæmō īninque mōnō Mæmpo Wængonguī ayongante mōnō wapiticæ cædāmaï inte wæætē nō ēñente cæmō īmopa.

2

Wacā ingante wadō wadō ate pōnente cædāmaï ingæimpa

¹ Botō tōniñamīni ēñeedāni. Mōnō Awēnē Itota Codito ñāō ēmonte nē apāigaingā ingante nē pōnēmīni inte waodāni īnānite wadō wadō ate pōnente cædāmaï īedāni. ² Īmaï nāni cæbaï ante ōnōwēnenque pōñeedāni. Edæ onguñængā nē ēacā īñōmō tōmengā nānō ōnongompo timpoi odo badōi wempocā īninque waēmoncoo mongængā inte mīni a ongōñōmō guī pongampa. Ayæ onguñængā nē wīi eyepæ ēacā īñōmō pedæncoo mongængā inte mīni a ongōñōmō adobaï pongampa. ³ Adinque mīnitō waēmoncoo mongængā ingante, “Bitō īñōmō waa tæ containpaa tæ contae,” ante apænemīni īmīnitawo. Wæætē wīi eyepæ ēacā ingante, “Bitō māniñōmō adiyæ ongōe. Botō ōnōwa īñōmō tepataa tæ contae,” ante apænemīni īmīnitawo. ⁴ Mänömaï apænedinque mīnitō weca wīi godongāmæ wadō wadō ate pōnente cæbaïmīnitawo. Ayæ wēnæ wēnæ pōñēninque apænte āmīni babaïmīnitawo.

⁵ Botō nē waadete tōniñamīni ēñeedāni. Wængonguī Awēnē Odeye ingante nē waadedāni īnānite tōmengā, Botō pōnō cæbo ate mīnitō botō nempo cōwē quēwencæmīnimpa, angacāimpa. Īmæca quēwēnāni weca māincoo wīi eyepæ ēadāni īñōnānite tōmengā, Mīni wede pōñēnō nanguī ēwocadinque mīnitō botō angainō baï botō nempo quēwencæmīnimpa, ante tōmēnāni īnānite wīi apænte ængantawo. ⁶ Mīnitō wæætē wīi eyepæ ēacā ingante pīinte tēdemīni ate tōmengā guingo imonte badingā ingampa. Īñæmpa nē ēadāni guiquēñē mīnitō īmīnite nāni wēnæ wēnæ cædinō beyænque wīi wæmīnitawo. Ayæ adodāni mīnitō īmīnite apænte anguñāni weca godoncæte ante wīi ænte godānitawo. ⁷ Ayæ mīnitō, Coditoidi īmōnipa, ante Codito waa pōni ēmōwo ante ēmōmīni īñōmīnite tōmēnāni adodāni incæ māniwo ante babæ āninque nē wēnæ wēnæ ānāni wīi īnānitawo.

⁸ Wængonguī angā ēñēninque nāni yewæmongainō ante adinque mīnitō waa pōni Awēnē nānō wææ angainō ante nō ēñente cæmīni īninque waa cæbaïmīni īmīnipa. Īmaï ante yewæmonte impa. “Bitō nāmā ante pōnente, Nāmā waadebo imopa, ante nāmā bitō waadete pōnenganca wadāni īnānite adoganca waadete pōñēe.” ⁹ Mänömaï cædinque mīnitō māincoo ēacā ingante waa cæmīni incæte wīi eyepæ ēacā ingante wadō wadō ate pōnēmīni inte wīwa āmīni īninque wēnæ wēnæ cæmīni īmaïmīnipa. Ayæ Wængonguī nānō wææ angainō ōnonque wido cæte baï cædimīni inte mīnitō wentamō mongæmīni īmaïmīnipa. ¹⁰ Wængonguī beyæ Mōitee wodi nānō wææ yewæmongainō ante tōmānō ante æcāmenque nē ēñente cæcā incæte māniñō adodonque pōni incæ ēñēnāmā cæcā inte tōmengā māniñō tōmānō ante ōnonque wido cæte baï cædingā inte wentamō mongængā ingampa. ¹¹ Edæ Wængonguī, “Nānōogæ īnāmā īñongante godō guēa mōnāmā īedāni,” ante nē angaingā inte tōmengā adocā godōmenque īmaï angacāimpa, “Wacā ingā wænōnāmā īedāni.” Mīnitō wacā nānōogæ īñongante godō guēa mōnāmā īmīni incæte wacā ingante wænōmīni īninque mīnitō Wængonguī nānō wææ angainō ōnonque wido cæte baï cædimīni inte wentamō mongæmīni īmaïmīnipa.

¹² Wængonguī nānō apænte anguñōnæ mōnō imonte tōmengā nānō wææ angainō baï cæcæcāimpa. Māniñō nānō wææ angainō beyænque waocā ñimpo cæte quēwengā ingampa. Īninque mīnitō tēdemīni incæ cæmīni incæ, Cōwē

mānōmaī impa, ante pōnēninque tedecæmīnimpā. Adobaī ante cæcæmīnimpā. ¹³ Wadāni wæwēnāni iñōnānite æcāmenque wīi waadete godō waa cædingā ingāā, ante Wængonguī wæætē tōmengā ingante godō waadete waa cædāmaī inte apænte āninque pancæcāimpā. Wadāni wæwēnāni inānite æcāmenque guiquēnē nē godō waadete waa cædingā iñongante Wængonguī wæætē tōmengā ingante nānō apænte anguiōnæ godō waadete waa cæcæcāimpā.

Wængonguī ingante pōnēninque mōnō cæquēnēnō

¹⁴ Botō tōniñamīni eñēedāni. Waocā, Botō Wængonguī ingante wede pōnēmo īmopa, angā incæte tōmengā nānō waa cædinō wæætē dæ ā īninque tōmengā mānīnō, Wede pōnēmopa, ante nānō ānō beyænque ædō cæte wænāmaī quēwengingāā. ¹⁵ Īmaī nāni cæbaī ante onōwēnenque pōnēedāni. Wængonguī ingante wede pōnengā iñōmō onguiñængā incæ onquiængā incæ æcāmenque incæ tōmengā weocoo tōnō cænguī ōmaacā ingampa, ¹⁶ adinque mīnitō weca adocanque tōmengā ingante, “Waa goe, āmopa. Bitō, Yoguidāmaī, ante weocoo wēñæ, cænguī eyepæ æninque cæe,” ante angā incæte nē ōmaacā nānō ænguēnēnō ante edæ tōmengā ingante godōnāmaī īninque tōmengā waa cæcantawogaa. ¹⁷ Adobaī Īmaī impa. Mōnō waa cædinō dæ ā īninque Wængonguī ingante mōnō wede pōnēnō incæ ōnonque bapa.

¹⁸ Incæte wacā Īmaī anguingā. “Bitō Wængonguī ingante tōmēmi wede pōnēnō ēabi īmipa. Botō guiquēnē tōmēmo waa cædinō ēabo īmopa,” ante āñongā botō wæætē, Bitō nē cædāmaī inōmi inte Wængonguī ingante bitō wede pōnēnō ante botō īmote odōmōmi aboe, āmopa. Odōmōmi adinque botō guiquēnē botō cædinō ante odōmōmo adinque bitō wæætē botō wede pōnēnō edonque pōni abaīmipa. ¹⁹ Wængonguī nāwangā adocanque ingaingā ingampa. Bitō mānōmaīnō ante pōnēmi inte waa pōni pōnēmi īmipa. Wēnæidi diyæ adodō ante pōnēnānīpa tōō. Incæte ancaī guīñente do do wāate wædānīpa. ²⁰ Bitō mānōmaīnō ante nē ōnonque tedebi īmi eñēe. Botō, Mōnō waa cædāmaī īmō īninque Wængonguī ingante mōnō wede pōnēnō incæ ōnonque īmaīmpa, ante odōmōmo ate bitō edæ Ao ante eñenguiīmyaa. ²¹ Edæ mōnō docā Abadāō wodi Wængonguī nānō āmaī cædinque tōmengā wengā onguiñængā Itæca ingante æninque iya tāimoga cōnōninque wænoncæ cæyongante Wængonguī adinque, Bitō nō cæte entawēmi āmopa, ante apænegacāimpā. Abadāō wodi nānō cædinō beyænque Wængonguī mānōmaī angacāimpā. ²² Bitō eñēnāmaī īmitawo. Abadāō wodi edæ Wængonguī ingante wede pōnēninque eñente cægacāimpā. Wīi eñente cægailingā inte baī tōmengā Wængonguī ingante nānō wede pōnengainō ōnonque pōnēmaingā incægacāimpā. Ayæ waa nānō cægainō beyæ Abadāō wodi nānō wede pōnengainō eyepæ pōni bagatīmpa. ²³ Wængonguī angā eñente nāni yewæmongainō baī īnque batīmpa. Īmaī ante impa. “Abadāō iñōmō Wængonguī, Botō Īmaī pōnō cæcæboīmpa, ante nānō angainō ante pōnengacāimpā. Īninque Wængonguī, Mānōmaī pōnēmi beyæ bitō botō ayōmo nō cæte entawēmi īmipa,” ante tōmengā ingante wæætē pōnō angacāimpā. Ayæ Abadāō, Wængonguī æmigo ingampa, ante angadānīmpa.

²⁴ Bitō eñēnāmaī īmitawo. Waocā Wængonguī ingante wīi nānō wede pōnēnō beyænque wæætē, Tōmengā æbānō waa cæcāā, ante adinque Wængonguī tōmengā ingante, Bitō nō cæte entawēmi abopa, ante cæcā ingampa. ²⁵ Idægoidi, Ōmæ awēmō ate pōeda, ante mēnaa īnate da godōnāni gote

pöñönote Adacaba wodi në towente quëwengä incæ, Botö oncönë guieda, ante tömëna inate wë wodongacäimpa. Ayæ, Wadäni tömëna inate bæi ongönämaï incädänimpa, ante, Wadö taadö goeda, ante da godongä gogadäimpa. Mänömaï cæcä adinque Wængongui, Bitö cædinö beyænque bitö botö ayömo nö cæte entawëmi ïmipa, ante Adacaba ingante adobainö ante pönö angacäimpa. ²⁶ Mönö baö ömæwocä inte do wænte i bai Wængongui ingante mönö waa cædämaï wede pönëno adobaï do wæningä bai inte edæ önonque impa.

3

Mönö önonquënewa

¹ Botö töniñamini ëñeedäni. Minitö weca wii tæiyænäni, Në odömonte apænemöni bacæmönimpa, ante bainente wæquënenäni incädänimpa. Edæ wadäni inänite pönömenque apænte äninque Wængongui wæætë mönö në odömonte apænemö ïñömonte, Æbänö odömonte apænemini, ante mönö ïmonte godömenque apænte äninque pancæcäimpa. Minitö do ëñëminipa. ² Mönö tömämö nanguï ægodawate tæi go wæninque bai oda cæmö ïmompä. Në tedeçä ïñömö tömengä, Æbänö ante tedeboo, ante tömengä önonquënewa cöwë wææ aadinque tömengä wënæ wënæ änämaï ïninque nöingä cæbaingä ingampa. Ayæ wënæ wënæ cædämaï incæboimpa, ante nämä baonga tömão wææ aate quëwëngä ingampa.

³ Cabayo mönö ïmonte ëñente cæcæcäimpa, ante tæinta badöinta önöne da wënemö ate, Cabayo baö tömånö incæ ïñaimæ ïñaimæ gocæcäimpa, ante cæmö ïninque cabayo do ëñente gocampa. ⁴ ïimainö ante ïñænængade wipo ante adobaï ante pönëedäni. Ñænængade pönï wipo incæ woboyæ nanguï pæmænte gopa incæte wipo në dadongä nänö cæinënö bai, Ædönö dadüimæ ædönö dadüimæ wiyate goquü, ante guiyä awæmpa inte wiyate cæcä gopa. ⁵ Ayæ adobaï mönö baö tömão ëñayömö mönö önonquënewa guiyä enguënewamö ïmompä. Incæte mönö önonquënewa inte tededinque, Mönö nanguï cæmompä, ante tedewëmompä. Ñænængade pönï ömædë incæ amimö bayedë guiyä gonga beyæ ömædë tömão gonga bæcodote bapa. ⁶ Ayæ mönö önonquënewa adobaï gonga bæcodote bai tedepa. Mönö baö tömão ëñayömö mönö önonquënewa tömão mönö wiwa tedewënguinque wënæ wënæ enguënewamö ïmompä. Waomö incæ mäninguënewa beyænque mönö baö tömão inte ëñënamäi cæmompä. Ayæ gonga wacæ tænömonte bæcododäni bai ado önonquënewa beyæ mönö quëwenganca tömanganca wo ëwente ïmompä. Edæ ïi gonga tadömengadænguipodë öñonte ö ænte wacæ tænömonte bæcodote bai cædinque wënæ incæ mönö ïmonte cæcä beyænque mönö wiwa tedewëmö ïmompä.

⁷ Babæidi incæ öömä ëadäni incæ tæntæidi incæ æpænë quëwënanäni incæ quingänöidi incæ tömänäni inänite waocä, Botö pæpogate cænünäni bacæminimpa, ante cæcä ingampa. Waocä doyedë nänö cægäi beyænque cænünäni bate quëwengadänimpa. ⁸ ïñæmpa æcänö, Mönö önonquënewa pæpogate bai bacæimpa, ante cædaa edæ dæ angampa. Edæ, Babæidi cöwë incæmönimpa, ante cænünäni badämaï inäni bai mönö önonquënewa adobaï wënæ wënæ i ïninque ædö cæte waa tedemöö. Wæætë mönö önonquënewa nanguï wænguimæ enguënewamö bai ïmompä.

⁹ Mäninguënewa inte mönö Mæmpo Wængongui ingante, Bitö tæiyæ waëmö ïmidö angüënë, ante waa apænemompä. Wæætë waodäni Wængongui

tömengä nänö ingai bai nänö nē badongainäni iñönänite tömēnāni inänite ante mönō adoguēnēwa inte wēnæ wēnæ apænemompa. ¹⁰ Ado önöne incæ wade wade ante mēnea ante apænemompa. Adodeque ante waa impa. Adodeque ante wēnæ wēnæ impa. Botō tōniñamini ēñēedāni. Mānīnō bai mönō edæ wīi cæquēnēmō ingæimpa. ¹¹ Æpæ tayōmō ado tayōmō ædō cæte waēmōmæ wentamōmæ äññōmonque ta goquimææ. ¹² Botō tōniñamini ēñēedāni. Iigowæ nāni äwæ incayō odibomō nāni änōmō ædō cæte incaquīi. Yowewæ incayō iigo mæñeca ædō cæte incaquīi. Adobai ado tayōmō ædō cæte waēmōmæ wentamōmæ äññōmonque ta goquimææ.

Mönō nō ēñēmāmo

¹³ Minitō weca æcänō nō ēñengä ingantawo. Tömengä iñōmō, Nō ēñēmo imopa, ante wadāni ēñencädānimpa, ante cædinque tömengä nänö waa quēwēnō inte odōmoncæcāimpa. Ayæ tömengä nō ēñengä incæ, Botō önōmoque imopa, ante pönēninque tömengä nänö cædinō beyæ odōmongä acädānimpa. ¹⁴ Minitō guiquēnē wacā quincōo adinque piinte entawēmini ayæ nāmanque ante, Mönō ñænæmō badinque waa quēwengæimpa, ante pönente entawēmini iñinque minitō nō ēñēmīni incæ, Mönō waa cæmōmpa, ante ædō cæte anguimīnii. Ayæ mænōmai bai godōmenque entawēmini iñinque nāwangä mīni anguēnēnō ante edæ Baa änāmai iedāni. ¹⁵ Mānīnō ēñēmāmo wīi Wængonguī nänö nō ēñēmāmo i. Wæætē ii inguipogaque ante quēwengä inte waocā mā pönēninque wēnæ nänö ēñēmāmo ante entawengä ingampa. ¹⁶ Edæ waocā æyedēmē wacā quincōo adinque piinte entawengä ayæ nāmanque ante, Botō ñænæmo badinque waa quēwencæboimpa, ante pönente entawengä iñōmō tömengä ædō cæte töingä pönente cæcāā. Iñæmpa quēmē nāni wēnæ wēnæ cæpāmo ante cæcampa.

¹⁷ Waocā Wængonguī nänö nō ēñēmāmo ante nē entawengä guiquēnē waēmō entawengä ingampa. Ayæ wacā ingante cōwē piyænē cæte quēwēnongä ingampa. Tömengä nē waadete pönengä inte wacā ingante waa ēñēnongä ingampa. Wacā ingante ēñente cædongä ingampa. Tömengä, Wæwēnāmai incæbiimpa, ante wacā ingante godō waadete waa cædongä ingampa. Ayæ, Quīnō waa inguīi, ante mānīnō ante cædongä ingampa. Nē waodāni inänite wadō wadō ate pönente cædāmai inte tömengä nō pönente quēwēnongä ingampa. ¹⁸ Wadāni inänite, Botō piyænē cæcæboimpa, ante nē cæcā iñōmō tömengä nänö piyænē cædinō beyæ tömēmō nē minongä bai ingampa. Tömengä nänö piyænē cædinō beyæ waodāni wæætē, Quīnō nō cæte impa, ante cædāni iñinque tömengä edæ amiñayedē tömēmō tā pete ængä bai incæcāimpa.

4

Inguipoga nāni quincōo ante pönēnāmai incæmōimpa

¹ Mīni cabo quīnō beyæ ante guēa wæætēdō wæætē piīninque wæætē godō wæætē godō änewēmīnitawo. Minitō nāmā wadō wadō mīni cæinēnō ante entawente guēa cæte quēwēmini beyænque cōwē godongāmæ mīni piinte quēwenguinque imīnīpa tōō. ² Minitō æñnente wæmīni incæte ænāmai imīnīpa. Iñinque nē ēcā ingante wænōmīni incæ tömengä nänö quincōo ante æñnēmīni incæte mīni æñnēnō, ante ænāmai imīnīpa. Mānōmai beyæ minitō wæætē godō wæætē godō änewēninque guēa wæætēdō wæætē piīninque guēadō guēa cæte quēwēmini imīnīpa. Mīni äno ante minitō, Pönōmī æmōnie, ante minitō Wængonguī ingante apænedāmai imīni inte mīni ænāmai quēwenguinque impa. ³ Minitō Wængonguī ingante mīni äno ante apænēmīni incæte wēnæ wēnæ

ante pönëninque apænemini beyæ ænāmaī īminipa. Edæ Wængongui nānō pönōni æninque mōnō edæ nāmanque pönente tote quëwengæimpa, ante æinente wæmini inte ænāmaī īminipa tōō.

⁴Wacā nānōgæ ingante wido cæcā bai mīnitō adobai Wængongui ingante wido cæmini īminipa. Mīnitō eñenāmaī īminitawo. Inguipoga nāni quincōo ante mōnō pönēnō beyæ mōnō Wængongui ingante piinte imōmpa. Incæte, Inguipoga nāni quincōo ante nē pönencæboimpa, ante æcānō angā Wængongui ingante piinte bacæcāimpa. ⁵Wængongui angā eñëninque nāni yewæmongainō īmaī ante ōnonquedō ante intawogaa. “Wængongui cæcā beyænque mōnō tōmēngā Ōnōwoca ingante ëwocate quëwēmō imōmpa. Īninque māniwoca mōnō imonte waadete pönëninque, Botō imote waadete pönenguënēmīni īminipa, ante wæætē edæ godō piinte acā ingampa.” ⁶Incæte tōmēngā mōnō imonte godōmenque waadete pōnō cædinque mōnō tōnō godongāmæ cædongā ingampa. Mānōmaī beyæ Wængongui angā eñente nāni yewæmongainō īmaī ante impa. “Nāmanque ante, Mōnitō gomonga waa cæmōni īmōnipa, ante nē pönēnāni inānite Wængongui Baa angampa. Wæætē edæ, Mōnitō ōnōmōnique bai īmōnipa, ante nē ānāni inānite tōmēngā pōnō waadete cæcampa.”

⁷Mānōmaī beyæ mīnitō Wængongui ingante eñente cæedāni. Wēnæ ingante Baa ante quëwēedāni. Baa āmīni Īninque tōmēngā nānēnē wodii winōmaingampa. ⁸Wængongui gāmænō pōedāni. Pōmīni ate tōmēngā wæætē mīnitō weca poncæcāimpa. Mīnitō wēnæ wēnæ cæmīni inōmīni inte ōnōmpo mempote bai waēmō pōni quëwēedāni. Ayæ, Wængongui ingante waadete pōnēmōpa, ante āmīni incæ adobai inguipoga nāni quincōo pōnēmīni inte mīnitō mēnonga ante pönente quëwēnōmīni īminipa. Īninque edæ mīmō nā mēnongate bai cædinque tōingā pönente entawēmīni baedāni. ⁹Mīni nāmā wēnæ wēnæ cædinō ante pönëninque mīnitō, Ancaa wæwente awædō, ante wæedāni. Mīnitō Ca ca tote quëwēnō nīmpo cædinque Ca ca wædinque edæ wæwente quëwēedāni. ¹⁰Mīnitō incæ, Wēnæ wēnæ cæmōnipa, ante ōnōmōnique īmōnipa, ante Wængongui ingante āñōmīni tōmēngā wæætē, Wadāni mīnitō īminite waa acædānīmpa, ante mīnitō īminite ængō cæte bai cæqingānō anguënē.

Mōnō tōniñacā ingante apænte ānāmaī incæmōimpa

¹¹Botō tōniñamīni eñēedāni. Mīnitō wacā ingā wacā ingā wēnæ wēnæ ante apænedāmaī iedāni. Æcānō tōmēngā tōniñacā ingantedō ante wēnæ wēnæ āna ayæ tōmēngā ingante, Wēnæ wēnæ cæbipa, ante æcānō apænte āna Īna māningā Wængongui nānō wææ angainō incæ wēnæ wēnæ ante apænecampa. Ayæ Wængongui nānō wææ angainō ante wēnæ wēnæ impa, ante apænte angampa. Wīi tōmēngā nānō eñente cæquinque Wængongui nānō wææ angainō ante apænte angampa. Wæætē edæ, Māniñō ante nē apænte āmo imōpa, ante bai cæcampa. ¹²Wængongui tōmenganque nānō wææ angainō ante nē angaingā ingampa. Mānōmaī beyæ tōmēngā adocanque nē apænte anguingā īnongāimpa. Adocā pōnō cæcā beyænque, Botō æmo beyænque quëwenguiñāni, ante cædongā ingampa. Adobai tōmēngā apænte angā beyænque, Wadāni wo ëwente bacædānīmpa, ante cædongā ingampa. Bitō giuquēnē nē angāimi īmipa diyæ wacā ingante apænte anguënēmi īmīi.

Baænæ ate cæbānō baquīi, ante Wængonguinque eñengā

¹³Mīnitō nōwo botō imote eñēedāni. Mīnitō nē īmaī ante tedemīni īminipa. “Nōwoñæ incæ baænæ ate incæ mōnitō īi wadāni quëwēñōmō goquimōni īmōnipa, ante māniñōmō godinque adoque wadepo īfōnte mōnitō

godonte ænguinta æncæte ante cæquimōni imōnipa,” ante ämini iminipa. ¹⁴ Iñæmpa, Baänæ ate æbänö bacæimpa, ante tömää eñenāmaï iminipa. Cöwë quëwenguimompa diyæ eñenguimöö. Awænæcaque owo boguimä nænque tamōninque quingæ dæ ba bai mönö quëwënö adobai do dæ bacæimpa. ¹⁵ Minitö guiquenë iïmaï ante anguenëmini iminipa. “Wængongui Ao angä iinque mönitö quëwenguimōni imōnipa. Ayæ Ao angä iinque mönitö iï waa cæqui cæcæmōnimpa.” ¹⁶ Iñæmpa minitö, Tömëmōnique äninque cæcæmōnimpa, ante pōneninque tedete quëwënōmini iminipa. Mäninö ante tömänö wënæ wënæ impa. ¹⁷ Waocä, Äbänö waa impa, ante eñengä incæte cædämaï ingä inte mäningä wënæ wënæ cæcä ingampa.

5

Mäincoo në ëadäni näni pōnenguënënö

¹ Minitö mäincoo në ëämini iñömö ñöwo eñëedäni. Minitö nanguï Ca ca wæedäni. Edæ, Mönö caate wæquinque nanguï ingæimpa, ante tedecōninque Ca ca wæcæminipa. ² Minitö mäincoo ëadincoo do wote batimpa. Ayæ minitö waëmoncoo tömancoo cayæ ade cænimpa. ³ Minitö oodo tönö padata tæinta to tamōninque bai batimpa. Mänii to tamōni beyæ mini wënæ wënæ cædinö edonque pōni odōmonte ingæimpa. Ayæ quincōomë gonga bæcodōñömö concædinque æmæwo gonte ba bai minitö iï to tamōni beyæ mini baö incæ adobai æmæwo gonte ba bai bacæimpa. Iñæmpa iïmæca wodo iinque bayedë incæ tömëmini mäincoo ëadincoo do wote baquincoo gæte da wente cæminipææ.

⁴ Aedäni. Wadäni edæ tömëmini quëwencodencōo cædinäni iñönänite minitö, Paga, ante mini godonguënenta pæ gompodinque godönāmaï iminitapa. Iinque ænāmaï inäni minitö iminitedö ante piinte wædinque, Në ëadäni iñömö, Mönitö cædinö beyæ ante dicæ pōnönäni æntamōniyaa, ante wædönänimpa. Mönö Awënë në adocanque Tömää Cægaingä iñömö në cædinäni näni wædinö do eñëningä ingampa. ⁵ Iïmæca quëwëñedë minitö quincoo waëmoncoo tömancoo mante quëwëmini inte minitö cöwë, Nämä möni wat-apæ tote quëwengæimpa, ante quëwënimini iminipa. Waocä nänö wæñongä wænguiönæ iñonte cæningä nänö wænguinque oguïmo pōni ba bai minitö cæningä bai adobai oguïmo pōni bamini iminitapa töö. Mänionæ edæ do batimpa. ⁶ Wadäni nö cæte quëwënäni minitö iminite Baa änāmaï iñönänite minitö iñömö, Mini pante wæquinque wënæ wënæ cædänipa, ante wapiticæ apænte ämini inte tömënäni inänite wænōmini wænänitapa.

Mönö ee cæpāmo ayæ Wængongui ingante mönö apænedö

⁷ Mänōmaï beyæ botö tōniñamini eñëedäni. Minitö mönö Awënë nänö ponguinganca ante wæntædāmaï inte ee cæte wänö cōnōedäni. Aedäni, Në quiyacä tömëmö wæænte ate onguipo cōñe ba ate, Tä bocate pæqui, ante cōönæ tedænque ee ongongampa. Cōönæ tedæ iinque baganca amiña bayedë waëmö pōni nänö tömëmoncoo tä pete gæcæte ante wiï ee ongongantawo. ⁸ Mönö Awënë nänö ponguiönæ oo pōni impa, ante minitö adobai ee cæte wänö cōnōedäni.

⁹ Botö tōniñamini eñëedäni. Minitö wacä ingä wacä ingä wæætedö wæætë, Wiwa cæcampa, ante godö änāmaï iedäni. Minitö mänōmaï cæmini iinque Wængongui wæætë minitö iminite apænte ante pämaingampa. Edæ mönö Apænte Anguingä oo poncæcäimpa cæminii. ¹⁰ Botö tōniñamini eñëedäni. Wëenëñedë Wængongui beyæ në apænegainäni iñömö tömengä ëmöwo apænedinque wæwënäni incæte wæntædāmaï inte ee cæte quëwengadänimpa,

ante pönëninque munitö tömënanï nãni cægaï bai adobai cæedãni. ¹¹ Wadãni wæwënãni incæte wæntæye inãmaï inte ee cædãni ïninque nãni toquinque impa, ante mönö pönënö ante do ëñëmïnipa. Docã Coba wodi ïñömö tömengä nanguï pönï wæwengä incæte wæntædãmaï inte pïñãmaï ingacãimpa. Mãnïnö ante do ëñëmïmini inte ayæ tömengä nãnö wæwëñedë ïnque ba ate Wængonguï æbãnö tömengä ingante nanguï godongä ængaingä ingacãimpa, ante adobai ëñëmïnitawo. Edæ waodãni wæwënãni ïñönãnte mönö Awënë Wængonguï ædæmö waadete waa cædongä ingampa.

¹² Botö tönïñãmïni ëñëedãni. Wadö mïni pönënö ante pönömenque pönëninque munitö ïmaï ante godömenque pönëedãni. Munitö änö näwangä impa, ante wadãni pönencædãnimpa, ante cædinque, Botö änö nöingä baquïñö angüënë, ante änãmaï ïedãni. Edæ, Öönæ beyænque ïmæca beyænque quïëmë beyænque mönö apænemönö näwangä baquïñö angüënë, ante tömänö ante edæ apænedãmaï ïedãni. Munitö wæætë Ao älnëmïni inte “Ao” ante mäningque æedãni. Ayæ munitö Baa äinëmïni inte “Baa” ante mäningque æedãni. Edæ wïl mãnömaï cæmïni ïninque Wængonguï wæætë munitö ïmïnite apænte ante pämaingampa.

¹³ Munitö wæwëmïni ïninque Wængonguï ingante apænëquënëmïni ïmïnipa. Munitö watapæ tomïni ïninque Wængonguï ingante, Bitö tæiyæ waëmö ïmidö angüënë, ante ämotãmïni ancæmïnimpa. ¹⁴ Æcãnö munitö weca wënæ wënæ ïna ïñömö tömengä Codito ingante mïni godongãmæ pönencabo ïñömïnite në aadãni nãni Picæncabo mïni änãni ïnãnite, Pöedãni, ante aa pequënegä ingampa. Aa pecã pönãni ate tömënanï Awënë Itota ëmowo ante apænedinque wædænque uguï wapæ æninque në wënæ wënæ ïnongä ingante oo paacædãnimpa. Ayæ adoyedë wënæ wënæ ïnongä ingante nãni oo paayedë tömengä beyæ ante Wængonguï ingante apænecædãnimpa. ¹⁵ Ayæ, Wængonguï ingante apænëyömonte tömengä ëñengampa, ante wede pönëninque apænëmö beyænque waocã në wënæ wënæ ïningä incæ edæ gancæ bacæcãimpa. Wængonguï tömengä ingante pönö cæcã ate waa ba ñãni ömæmoncæcãimpa. Ayæ adocã nãnö wënæ wënæ cædinö beyæ wënæ wënæ ingä ïninque Wængonguï tömengä nãnö wënæ wënæ cædinö adinque ñimpo cæcã quëwëmaingampa. ¹⁶ Mãnömaï beyæ munitö wacã ingante wacã ingante apænëdinque, Botö wiwa cædïmo inte wæbopa, ante æedãni. Mãnömaï cædinque munitö, Gancæ bacæmönimpa, ante wacã beyæ ante wacã beyæ ante Wængonguï ingante apænëedãni. Waocã në nö cæte quëwënongå ïñömö Wængonguï ingante apænëdinque edæ tæi piñænte apænecã ingampa. Mäningä nãnö apænëdö beyænque Wængonguï cæcæcãimpa. ¹⁷ Ediya wodi mönö waomö ïmö bai tömengä adobai ingacãimpa. Incæte tömengä Wængonguï ingante, Cöönæ ämi cædãmaï ingæimpa, ante ædæmö apænecã ate mæa go adoque tæcæ wadepo ganca edæ cöönæ cædãmaï ingatimpa. ¹⁸ Ayæ ate tömengä, Cöönæ ämi cæcæcãimpa, ante Wængonguï ingante wæætë apænëgacãimpa. Apænecã ate öönædë ïnö wææ cöönæ cægatimpa. Cöönæ wææ cæ ate onguipoga tömëmö do tä bocate pägatimpa.

¹⁹ Botö tönïñãmïni ëñëedãni. Munitö weca æcãmenque nö taadö oda cæte gocã adinque wacã tömengä ingante ocæ æmænte mämongä ponguënegä ingampa. ²⁰ ïmaï pönëedãni. Në wënæ wënæ cæcã wapiticæ taadö gocã adinque æcãmenque tömengä ingante nö taadö ïnö ocæ æmænte në mämongä ingää tömengä mämongä beyænque në wapiticæ gocã ïñömö æmæwo nãnö wænguënënö ñimpo cæte edæ quëwëncæcãimpa. Ayæ nanguï pönï nãnö

wënæ wënæ cædinö incæ wadæ cæte ingæimpa, ämopa. Mäninque ante
yewæmömopa.

1 Pegodo

cadota ante nānō tānota yewæmongainta

Waa quēwencæminimpa, ante

¹ Botō Pegodobo Itota Codito nānō nē da godongaimo inōmo inte nē yewæmōmo imopa. Minitō iñōmō tōmēmīni ōmæ quēwēnāmaī imīni inte nāwæ godinque wadāni nēmæ ponte quēwēmīni inte pancamīniya Pontobæ quēwēñōmīni wamīni guiquēnē Gadatiabæ quēwēmīni. Wamīni Capadotiabæ quēwēñōmīni wamīni guiquēnē Atiabæ quēwēmīni. Wamīni guiquēnē Biñiabiabæ quēwēmīni. Mānōmaī wayōmō wayōmō quēwēmīni iñōmīnite botō, Acæminimpa, ante yewæmōmopa. ² Mæmpo Wængonguī iñōmō mīnitō imīnite wēēnēñedē pōni do adinque, Minitō Itota Codito ingante nē ēñente cæmīni bacæminimpa, ante apænte ængacāimpa. Ayæ, Botō ayōmo mīnitō tæiyæ waēmō ēwocamīni bacæminimpa, ante cædinque Wængonguī Ōnōwoca incæ Itota wepæ inte pōnō ñā mēnongacāimpa. Mānōmaī cæcā bagaimīni iñōmīnite botō ñōwo iñōmō edæ, Wængonguī nanguī waadete pōnō cæcā ate mīnitō nē gānē pōnēmīni bacæminimpa, ante yewæmōmopa.

Watapæ bacæimpa, ante pōnēninque quēwēmompā, ante

³ Itota Codito Wæmpocā iñongante Itota incæ, Botō Wængonguīmi inōmi imīpa, ante Wængonguī ingante waa apænecampa. Adocā iñōmō mōnō Awēnē Itota Codito wænte ōññongante, Ñāni ōmæmōe, angā ñāni ōmæmongacāimpa. Tōmengā ñāni ōmæmongā beyænque Wængonguī mōnō imonte adobaī pōnō cæcā ate mōnō mempoga ēñate bai inōmō inte edæ, Mōnō mīimō quēwēninque watapæ quēwengæimpa, ante pōnente quēwēmompā. Īninque mōnō iñōmō Wængonguī ingante apænedinque, Bitō tæī ēmōnōmi inte waa pōni cæbi æmōniya, ante edæ watapæ apænecæimpa. ⁴ Ayæ Wængonguī, Īncayæ ate mīni ænguincoo, ante ōōnædē do edæ cō cæte mangampa. Mānincoo iñōmō ñōmāadāmaī incoo Īninque cōwē wentamō badāmaī incoo inte edæ wodāmaī inguincoo ingæimpa. ⁵ Īnguipo pedænguipo ĩnque bayedē edæ Wængonguī pōnō ængā beyænque mōnō cōwē quēwenguīnō ante edonque pōni acæimpa. Īninque mīnitō wede pōnēmīni beyænque mīnitō quēwenguīmāmo ĩnque baquinganca Wængonguī nē tæī piñænongā inte edæ mīnitō imīnite wææ gompocampa.

⁶ Minitō ñōwo wantæ iñō incæ quiēmē beyænque wēnæ wēnæ bate wæmīni incæte Wængonguī pōnō wææ gompocā beyænque edæ watapæ tomīni imīniya. ⁷ Oodo waēmō bamongæimpa, ante waodāni gongapamō godō acā podōnāni ate oodoque badingque waēmonca pōni ongoncapa. Incæte oodo iñōmō ĩncayæ ate ōmæe ēwente ate edæ dæ bacæimpa. Oodo mīni æīnēnonca waēmonca ĩ iñonte mīni wede pōnēnō iñōmō edæ godōmenque waēmō pōni impa. Īninque mīni wede pōnēnō iñōmō wīi wido cæqui impa. Cōwē edæ ongongæimpa. Wæætē, Mīni wentamō entawēniñō edæ dæ go ate mīni wede pōnēnonque edæ waēmō pōni entawencæminimpa, ante cædinque Wængonguī pōnō angā ate mīnitō gonga gonte caate bai wæmīniya. Mānōmaī mīni caate wædō beyænque edæ godōmenque wede pōnēmīni hamīniya. Īninque Itota Codito mōnō weca ponte a ongoñongante mīnitō cōwē wede pōnēmīni inte tōmengā ōnōwa gāānē ædæ wæænte apænedinque, Nē tæī ēmōnōmi inte bitō

waa pōni cæbi æmōnipa, ante watapæ apæneceaminimpa, ante Wængongui cæcampa.

⁸Itota Codito ingante mīnitō awinca adāmaī īnimīni incæte tōmengā ingante cōwē waadete pōnēmīnipa. Edæ ñōwo ganca adāmaī īnimīni inte mīnitō tōmengā ingante wede pōnēninque mīni ñāō bai entawenguinque watapæ todirque æbāmē ante tomīni īmīnipa. ⁹Ōnōwoca mīni ēwocate quēwenguinō ante æncæte ante wede pōnēmīni inte mīnitō ñōwo īñōmō edæ do æmīni īmīnipa.

¹⁰Wængongui beyæ nē apænegaināni īñōmō, Īncayæ ate quēwenguināni īnānite Wængongui pōnō cæcā beyænque quēwencædānimpa, ante ñōwomīni īmīnitedō ante apænegadānimpa. Mānōmaīnō ante apænedāni incæte tōmēnāni, Ādānidō īnānite ante Wængongui apæneccā, ante ēñēnāmaī inte ēñencæte ante nanguī cægadānimpa. ¹¹Codito Ōnōwoca tōmēnāni ōnōwoca quēwēninque pōnō apænedinque, Īncayæ ate Codito nanguī caate wæccæcāimpa, angacāimpa. Ayæ, Caate wædingā inte tōmengā wæætē ñāō bai entawengā inte tæī ēmongā edæ bacæcāimpa, ante pōnō apæneccā ēñēninque tōmēnāni wæætē adodō ante apænegadānimpa. Incæte tōmēnāni, Āyedēnō Codito mānōmaī cæqingāā, ante ēñencæte ante wægadānimpa. Ābānō ba ate mānōmaī cæqingāā, ante ēñencæte ante edæ nanguī cægadānimpa.

¹²Ñōwo īñōmō Wængongui ōnædē quēwēninque tōmengā Tæiyæ Waēmō Ōnōwoca ingante mōnitonga da pōnogā pōninque apæneccā ēñēninque mōnitō wæætē Codito ingantedō ante mīnitō īmīnite watapæ apænemōni ēñēmīnitapa. Mānīne adode ante Wængongui beyæ nē apænegaināni īñōmō, Codito waa cæccæcāimpa, ante apænegadānimpa. Incæte Wængongui tōmēnāni īnānite apænedinque, Wī tōmēmīni beyæ ante apænemīnipa, angacāimpa. Īncayæ ate quēwēnāni beyæ ante apænemīnipa, ante tōmēnāni īnānite angacāimpa. Mānīnō ante Wængongui beyæ ante æbānō apænedāni, ante ēñēnāmaī īnāni inte Wængongui anquedoidi incæ, Wadāni beyæ Wængongui æbāmē waa pōni cæcā, ante ēñēnīnente wædānipa.

Wængongui, Tæiyæ waēmō ēwocædāni, angampa

¹³Mānōmaī beyæ mīnitō, Mōnō nanguī cæccæcāimpa, ante edæ tāno pōnente ate cædāni. Nāmā wææ gompotawente bai ēñente cædāni. Itota Codito ponte a ongōninque mōnō īmonte waadete pōnō cæcā ate watapæ bacæcāimpa, ante edæ mānīnonque ante cōwē pōnente cædāni. ¹⁴Wēñænāni wæmpoidi īnānite nāni ēñente cæbai edæ mīnitō adobaī ēñente cædāni. Mīnitō ēñēnāmaī īñedē mīni cæīnēwēnō ante do cægaminimpa. Nōwo īñōmō nē ēñēmīni badinque mīni ēñēnāmaī īñedē mīni cæīnēwēnō ante edæ cædāmaī īedāni. ¹⁵Mīnitō īmīnite nē apænte aa pegaingā īñōmō edæ tæiyæ waēmō ēwocadongā ingampa cæmīni. Quiēmē cædinque edæ tōmengā bai adobaī tæiyæ waēmō ēwocadinque edæ tōmāā cædāni. ¹⁶Wængongui incæ, “Botō tæiyæ waēmō ēwocabo īmopa cæmīni. Botō ēwocabo bai mīnitō adobaī edæ tæiyæ waēmō ēwocacæmīnimpa,” angampa, ante yewæmongatimpa.

¹⁷Tōmāmō īmonte adoyōmō pōni cædinque mōnō Mæmpo īñōmō mōnō cædīnō ante cōwā adinque nōingā pōni ante apænte angampa. Īnīnque, Botō Wæmpo, ante nē apænemīni īnōmīni inte mīnitō īñōmō edæ nē nōingā ante apænte angā ingante edæ guīñente wædinque quēwēdāni. Inguipoga quēwēninque mīnitō, Wabæca bai ongonte awædō, āninque, Wængongui weca edæ mōnō ōmæ ingæimpa, ante pōnente quēwēdāni. ¹⁸Edæ, Dodāni nāni quēwengā bai adobaī quēwengæimpa, ante ānāni ēñēninque mīnitō Ao ante

ōnonque pōni cæte quēwengamīnīmpa. Mānōmaī quēwēñōmīnite Codito wæætē, Mīnitō abæ tawænte baī quēwencæmīnīmpa, ante cædinque edæ, Quīnō godongantawo, ante mīnitō do ēñēmīnīpa. Īñæmpa oodo incæ padata incæ mōnō, Woquincoo, ancoo ĩñonte tōmengā dicæ mānīncooque godongantawogaa.

¹⁹ Wæætē quiipi wē, Codotedo, nāni ānongā ĩñōmō quenta mongænāmaī wentamō ēñadāmaī ĩmaī Codito adobaī ĩnongā ĩnte edæ tōmengā nāmā wepæ tēyæ wæmō wepæ godonte ængā beyænque quēwēmīnīpa. ²⁰ Inguipoga badoncæte ante cædinque Wængonguī ayæ gō cædāmaī ĩngāñedē wēēñēnedē pōni incæ Codito ĩngante edæ, Mānōmaī cæcæbiīmpa, ante do apænte ængacāīmpa. Codito mīnitō beyæ ante edæ ñowo pōni incæ ĩnguipoga pōnīnque ongongantapa. ²¹ Inguipoga pōnīnque tōmengā do wænte ōñōñongante Wængonguī, Nāni ōmæmōe, angā ñāni ōmæmongacāīmpa. Ayæ tōmengā ĩngante godōmenque godō æantodongā ate tōmengā ñāō entawēnongā ĩnte tōmengā nānō tæī ēmoungūnque edæ æite gogacāīmpa. Wængonguī mānōmaī nē cægaingā ĩñongante Codito mīnitō ĩmīnite pōnō cæcā beyænque mīnitō wæætē Wængonguī ĩngante pōnēmīnitapa. Mānōmaī beyæ mīnitō, Wængonguī pōnō cæcā beyænque watapæ bacæīmpa, ante pōnēnīnque tōmengā ĩngante wede pōnēmīni bamīnitapa.

²² Wængonguī nō nānō ānō ante ēñente cædinque mīnitō mīmō ñā mēnongate baī badīnque mīnitō tōñīñadāni ĩnānite nē waadete pōnēmīni bagamīnīmpa. Nōwo ĩñōmō mīmōno nō pōnēnīnque mīnitō godongāmæ ædæmō waadete pōnēnīnque wacā ĩngā wacā ĩngā godō waa cæedāni. ²³ Edæ waomō mōnō yate pōñiwoca wæwocaquī ĩñonte wīī māñinō beyænque mempoga ēñagamīnīpa. Wæætē Wængonguī nānō ānōnō mīī quēwenguīnō ĩñōmō edæ wodāmaī ĩnte cōwē ongongæīmpa. Māñinō Wængonguī nānō ānōnō beyænque mīnitō mempoga ēñagamīnīpa. ²⁴ Edæ,

“Waomō gaguīmænque baī ĩñōmōte gaguīmæ do to aminca baī mōnō adobaī aquīī pōni ĩñōmō ĩnte wæwocamōmpa.

Waemō pōni mōnō ēmōnō ĩñōmō edæ ongai waemō ængado baī ĩñonte ongai edæ do guīñē wæno baī mōnō ēmōnō adobaī bacæīmpa.

²⁵ Incæte Wængonguī nānō ānō ĩñōmō edæ cōwē wodāmaī ongongæīmpa.” Ante edæ āmotamīni ante baī Wængonguī beyæ nāni yewæmongainō baī ĩmpa. Māñinō Wængonguī nānō ānōnō ante mīnitō ĩmīnite do watapæ apænemōni ēñēmīnitapa.

2

¹ Māñinō beyæ mīnitō pīnte mīni pōnēwēnō edæ ñīmpo cæedāni. Wacā adāmaī ĩñongante babæ mīni cædō ante edæ cædāmaī ñīmpo cæedāni. Mīnitō wadō apænente wadō mīni cædō ante ñīmpo cæedāni. Mānōmaī cæte mīni quēwēñinō ante edæ æmæwo ñīmpo cæedāni. Wacā gomonga ængā ĩngante godō pīnte adāmaī ĩedāni. Wacā ĩngantedō ante babæ ante mīni pīnte ānewēnō ante edæ ñīmpo cæedāni. ² Wēñænāni tæcæ ēñadīnāni ĩnte goōmæ gāñente wædāni baī mīnitō adobaī Wængonguī nānō apænedonque ante ēñencæte ante wæedāni. Edæ tōmengā ængā beyænque mīnitō nē quēwēmīni ĩnte mīnitō ōñowoca ædæmō picæmīni mīni pæquinque edæ tōmengā nānō apænedō ante edæ goōmæ wæmōmæ beīnente baī ēñencæte ante wæedāni. ³ Waēmepæ ĩmpa, ante adīnque wēñængā goōmæ wæætē wæætē becā baī mīnitō adobaī, Mōnō Awēnē waingā pōni ĩngampa, ante do adīmīni ĩnte tōmengā weca wæætē wæætē ponte bete baī edæ ēñēedāni.

Nē quēwengā inongā inte Codito wainca bai ingampa, ante

⁴ Oncō dicaca mænoncæte ante cædinque waodāni, Wīwa inca awædō, ante pancacaa wido cædāni bai waodāni pancadāniya mōnō Awēnē ingante adobai wido cædānipa. Wængonguī guiquēnē mōnō Awēnē nē quēwengā ingante waa adinque, Botō owocō mænonquinca wainca pōni bai tōmengā ingampa, ante tōmengā ingante apænte æninque ee mangampa. Īninque mīnitō ĩñōmō tōmengā weca pōñōmīnite tōmengā, ⁵ Mīnitō mīmīni quēwēñōmīni Wængonguī mīnitō ĩmīnite ænte cabo tingæte adoconque mænonte bai cædinque edæ, Botō Ōnōwoca owoquincō, ante badongā quēwēmīnipa. Quēwēñōmīnite godōmenque tæiyæ waēmō badongā badīmīni inte edæ mīnitō ĩñōmō edæ Wængonguī Ōnōwoca tōnō āawocaque bai ēwocadinque, Wængonguī quī, ante nē godōmīni bamīnipa. Īninque mīnitō Itota Codito ēmōwo ante apænedinque, Wængonguī quī, ante godōmīni ate tōmengā edæ waa ængampa. ⁶ Edæ Wængonguī apæneca ēñēninque ĩmaī ante do yewæmongadānipa.

“Tīonoquidi dæguīmonga mænoncæte ante cædinque dica tānoca gō cæte bai cædinque,
Botō nē waa adongā ingante ænte pōnō Tānocā pōni gōnōmo gongæncæcāimpa.

Tōmengā ingante nē wede pōnengā ingante wadāni ædō cæte bæ taquīnāni guingo ĩmonte wæquingāā,” angacāimpa.

⁷ Mīni pōnencabo ĩñōmō, Tānocā nē ongongā ĩñōmō waingā pōni ingampa, ante adinque tōmengā ingante æninque ee māmīnipa. Wīi pōnēnāni guiquēnē tōmengā ingante Baa ānānipa.

“Nē mænonāni nāni wido cædinca inca
ñænænca pōni gōnōninca bate tānoca inte tæi gongæncapa,”
ante Wængonguī beyæ nāni yewæmongainō bai cædānipa. ⁸ Ayæ adobai,
“Dicaa nē tao tencawa tæ go wæængā bai ĩnāni inte
tōmēnāni nē Tānocā ingante pīnte adinque tæ go wæænte bai oda cædānipa.”
Ante yewæmongatīmpa. Tōmengā nānō angainō ante ēñēnāmaī nāni cædō
beyæ oda cædinque tæ edæ go wæænānipa. Tōmēnāni edæ māñinonque
cædinque nē tæ go wæænguēnēnāni cōwē ingadānīmpa.

⁹ Wængonguī nānō nē apænte ængāīmīni guiquēnē wēmō ĩñōmō quēwēñōmīnite tōmengā aa pedinque, Botō weca botō waēmō pōni ñāō ēmōñōmō pōedāni, ante cægacāimpa. Mānōmaīnō cægāingā ĩñongante mīnitō, Bitō Wængonguī Waēmō pōni ēmōnōmi inte waa pōni cæbi edæ æmōnīpa, ante anguēnēmīni ĩmīnīpa. Mānōmaīnō ante wafapæ ancēmīnīmpa, ante cædinque tōmengā mīnitō ĩmīnite do apænte ængacāimpa. Īninque mīnitō Awēnē wēmīni ĩnōmīni inte, Wængonguī quī, ante mīnicabo nē godōmīni bai bamīnīpa. Wængonguī, Botō quīmīni ĩmīnīpa, āninque tæiyæ waēmō badongā bagāīmīni inte mīnitō Wængonguī nempo nē quēwēmīni ĩmīnīpa. ¹⁰ Mīnitō wēēnēñedē adocabomīni ĩnāmaī ingāmīnīmpa. Nōwo guiquēnē Wængonguī tōnō godongāmæ quēwēmīni inte edæ adocabomīni ĩmīnīpa. Wēēnēñedē guiquēnē tōmengā mīnitō ĩmīnite pōnō waadete cædāmaī ingacāimpa. Nōwo guiquēnē tōmengā pōnō waadete waa cæcā ate quēwēmīnīpa.

Wængonguī ingante nē cæmō ĩmōmpa, ante quēwēedāni

¹¹ Botō nē waademīni edæ ēñēedāni. Mīnitō ĩnguipoga quēwēmīni incæte ĩnguipo wīi tōmēmīni ōmæ bai ĩmpa. Wæætē wabaca quēwente bai quēwēmīni ĩntē mīnitō ōnōwoca wentamō mongænāmaī ĩngāīmpa, ante edæ wææ cædinque mīnitō baonque ante mīni cæñewēnō ante ĩmpo cædinque edæ

cædāmaī iedāni āmopa. ¹² Nē ēñēnāmaī ināni weca quēwēningue mīnitō wæætē waa cæte quēwēedāni. Tōmēnāni guīquēnē mīnitō imīnite piīningue, Wēnæ wēnæ cæmīnīpa, ante babæ ānānitawo. Incæte mīnitō waa cæmīni īinque tōmēnāni, Waa cæcampa, ante do abainānīpa. Īinque Wængonguī Awēnē nānō apænte añēdē tōmēnāni do againāni inte Wængonguī ingante, Bitō ñāō bai ēmōmi inte cæbi ate bitō wēnāni waa cædāni amōnīpa, āmaīnānīpa. Īinque tōmēnāni waa adīnque waa apænecædānīpa, ante cædīnque mīnitō ñōwo incæ waa cæte quēwēedāni.

¹³ Waodāni inānite wadāni edæ, Awēnēidi inānīpa, ante godō gōnōnāni ongōnānīpa. Æcāmē ingante ānāni bayōnānite mīnitō wæætē Wængonguī Awēnē beyænque ante cædīnque tōmēnāni inānite edæ ēñente Ao ante cædāni. Adocanque ingante, Awēnē Odeye, ānīnque godō gōnōnāni ate mīnitō īñōmō, Tōmengā tæiyæ awēnē inte nē angā īnongā ingampa, ante adīnque tōmengā ingante ēñente cædāni. ¹⁴ Ayæ pancabaa awēnēidi gobedōnadodoidi mīni ānōnāni inānite godō gōnōnīnque awēnē odeye wæætē īlmaī angampa. Mīnitō wēnæ wēnæ cædāni inānite edæ godō pædāni. Ayæ waa cædāni adīnque mīnitō, Waa cæmīni imīnīpa, ānīnque edæ godō waa cædāni, ante gobedōnadodoidi inānite godō gōnongā ongōnānīpa cæmīnīi. Mīnitō tōmēnāni inānite adobai ēñente cædāni. ¹⁵ Ēñēnāmaī ināni wīwa tedeyōnānite mīnitō waa cæmīni ate wædīnque tōmēnāni ædō cæte godōmenque wīwa tedequīnānīi. Īinque, Tōmēnāni pæ wēenedīnque tededāmaī incædānīpa, ante cædīnque mīnitō īñōmō edæ waa cæte quēwēedāni, ante edæ Wængonguī angampa cæmīnīi.

¹⁶ Tōmengā ñimpo cæcā quēwēmīni inte mīnitō, Wacā wææ ānāmaī īñongante botō æbānō cæte waa quēwenguīmoo, ante adīnque nāmā wææ ante cædāni. Incæte mīnitō wacā wææ ānāmaī ingā beyænque awēmō wēnæ wēnæ cæmīnitawo. Edæ cædāmaī iedāni. Wæætē Wængonguī ñimpo cæcā quēwēmīni inte mīnitō tōmengā ingante nē cæmīni inte edæ ēñente cæte quēwēedāni. ¹⁷ Tōmānāni inānite mīnitō, Waodāni inānīpa, ante edæ waa aedāni. Mīni pōnencabo īñōmīnite edæ godongāmæ waadete pōnēedāni. Wængonguī ingante, Wængonguī ingampa, ante guīñente wæedāni. Awēnē odeye ingante, Tæiyæ awēnē ingampa, ante edæ waa aedāni.

Codito æbānō caate wægacūi, ante pōnēedāni, ante

¹⁸ Pancamīniya imīnite wadāni ō ænāni wædīmīni inte mīnitō tōmēnāni beyænque cæmīni bamīnīpa. Īinque nē ō ænāni īñōmō pōnō waa cædāni incæ pōnō piinte cædāni incæ mīnitō wæætē, Botō awēnē ingampa, ante piyænē cædīnque tōmēnāni nāni anganque edæ ēñente cædāni. ¹⁹ Edæ waocā wēnæ wēnæ cædāmaī īnongā inte quīēmē beyænque wæwente caate wæcā incæte tōmengā, Wængonguī acampa, ante pōnēnīnque nangæ batakēnāmaī ingā īnque edæ waa imāimpa.

²⁰ Wæætē mīnitō wēnæ wēnæ cæmīni beyæ pānāni ate mīnitō piyænē cæmīni īinque Wængonguī mānīnō beyænque dicæ waa aquingāa. Waa adāmaī īmaingampa. Wæætē waa cæmīni beyænque pānāni caate wædīnque mīnitō piyænē cæte ee cæmīni adīnque Wængonguī edæ, Waa cæbīpa, āmaingampa. ²¹ Botō caate wædōnō adodō taadō tee empote pōedāni, ānīnque mīnitō beyæ Codito caate wægacāimpa cæmīnīi. Botō caate cægōngainō adodonque cægonte wæcæmīnīpa, ante mīnitō imīnite do aa pecā pongamīnīpa. ²² Tōmengā īñōmō edæ cōwē wēnæ wēnæ cædāmaī ingacāimpa. Ayæ cōwā ayōnāni tōmengā dicæ babæ ante cæcā agadāniyaa. ²³ Tōmengā ingante piinte badete toyōnāni tōmengā wæætedō wæætē piīnāmaī

ingacäimpa. Caate wædinque tōmengä wæætē piinte änāmaï ingacäimpa. Wæætē, Nē nō apænte änongä Wængongui incæ botō beyæ cæcæcäimpa, ante pōnēninque piyænē edæ cægacäimpa. ²⁴ Minitō wēnæ wēnæ mīni cægaincoo ante Baa äninque mongænāmaï inte nō pōni cæte quēwencæmīnīmpa, ante cædinque tōmengä nāmā baonga teēmē mongæñlongante tōmengä ingante awāa timpodāni edæ wængacäimpa. İninque tōmengä mongænte nānō wængainō beyæ mōnō wæætē māninō wēnæ wēnæ mōnō cægainō ante wænte bai inōmō inte nō pōni cæcæte ante quēwēmō inguēnēmō imōmpa. Tōmengä ingante tæi pānāni nānō ämogate wægainō beyænque mīnitō wæætē gançæ bamīnīpa. ²⁵ Edæ obegaidi pāmænte godāni bai ingaimīni inte mīnitō ñowo nē aacā weca adodō ocæ emænte pōmīni adinque tōmengä iñōmō edæ mīnitō önōwoca beyæ ante wææ aacā ewocāmīnīpa.

3

Mīna gæncaya iūmaï quēwencæmīnīmpa, ante

¹ Onquiyæmīni eñēedāni. Mīnitō nānōogænāni nāni änonque ante Ao ante eñente cæedāni. Mīni nānōogænāni pancadāniya Wængongui nānō änō ante pōnēnāmaï inānitawo. Mānōmaï i İninque mīnitō iñōmō, Wīi mōnitō tededō beyæ pōnāni inte tōmēnāni wæætē eñente mōni cædinō ante adinque Wængongui gāmænō poncædānīmpa, ante cædinque piyænē cæte edæ tōmēnāni inānite eñente cæedāni. ² Mīnitō Wængongui ingante guiñente wædinque waēmō entawēmīni inte eñente cæte waa quēwēmīni adinque tōmēnāni wæætē Wængongui ingante Ao ante pōmāinānīpa. ³ Mīnitō, Waēmō pōni bacæboīmpa, ante cædinque ocagui waa pōni wao wincate oodo mongænte wamoncoo mongænte weocoo waēmoncoo wēñate mongæmīnitawo. İñæmpa mānōmaï cæmīni beyænque mīnitō dicæ waīmīni bamīniyaa. ⁴ Wæætē tōmēmīni waa entawēnō beyænque waīmīni pōni baquēnēmīni imīnīpa. Mīnitō önōwoca gānē pōnēninque ædæmō cæmīni beyæ mīni waa entawēnō edæ wodāmaï inte godōmenque waēmō pōni ongongæīmpa. Māninō mīni waēmō entawēnō bai ante æncæte ante edæ quēmē impa diyæ godonte ænguīi. Incæte Wængongui māninō ante adinque, Waēmō pōni entawēmi abopa, ante nanguī tocampa.

⁵ Dodāni pōni mōnō wængānāidi iñōmō, Wængongui pōnō cæcā beyænque waa bacæīmpa, ante wede pōnēninque tæiyæ waēmō entawengadānīmpa. Tōmēnāni waēmō pōni bacæte ante tōmēnāni önōwoca gānē pōnēninque ædæmō waadete cægadānīmpa. Tōmēnāni nānōogæīdi nāni änonque ante eñēninque Ao ante cægadānīmpa. ⁶ Dodā ñæñænā Tada wodi iñōmō Abadāo wodi ingante eñente cædinque tōmengä ingante, Nē ämi imīpa, angacäimpa. Mīnitō iñōmō tōmēnā nānā cægai bai waa cædinque mīni guiñente wæpāmo æbāmē ba incæte guiñente wædāmaï imīni İninque nāwangä nō tōmēnā nānōmomīni babaīmīnīpa.

⁷ Onguiñæmīni guiquēnē eñēedāni. Mīnitō gænāni tōnō quēwēninque tōmēnāni beyæ ante cōwē pōnēninque waa cæedāni. Botō gængä onquiyængä inongä inte aquingä ingä incæte mōna guēa cæcaya imōnāpa, ante eñente wædinque mīnitō gænāni inānite edæ cōwē waa aedāni. Ayæ, Mōna gæncaya Wængongui ingante apæneyōmōna tōmengä do eñencæcäimpa, ante cædinque iūmaï pōnente cæedāni. Wængongui iñōmō, Mīna quēwenguimāmo, ante waadete pōnō cæcā beyænque mōna guēa ænguincaya imōnāpa, ante edæ eñente cæedāni.

Mini waa cædō beyænque caate wæquīmīni, ante

8 Tōmāmīni guiquēnē ēñēdāni. Mīnitō adoyōmō pōnēninque Ao ante cædāni. Nē Ca ca wæcā tōnō edæ adoyōmō Ca ca pōnente wæedāni. Mōnō pōnencabo īmōmpa, ante cædinque godongāmæ waadete pōnēdāni. Wacā caate wæcā adinque mīnitō tōmengā tōnō guæa wæte bai pōnēdāni. Nāmā ængō cædāmai īmīni inte mīnitō wæætē edæ, Ōnōmonque bai īnōmō īmōmpa, ante piyænē cæte quēwēedāni. 9 Wēnæ wēnæ cædāni wæmīni incæte, Botō wæætē wēnæ wēnæ cæbo wæcā tocæī, ante cædāmai īedāni. Wiwa ānāni wæmīni inte, Botō wæætē wiwa āmō wæcā tocæī, ante cædāmai īedāni. Wæætē edæ, Tōmēnāni waa quēwencædānīmpa, ante cædinque mīnitō tōmēnāni īnānite waa apænēdinque godō waa cædāni. Mānōmai cæcæmīnīmpa, ante Wængonguī mīnitō īmīnite waa cædinque pōnō aa pegacāīmpa cæmīnīi. 10 Edæ īīmai ante Wængonguī beyæ ante yewæmōngatīmpa, “Wacā tōmengā nānō quēwengūīmāmo ante nanguī æīnente wædinque, Tæōnæ waa quēwente tocæī, ante nē angā īñōmō tōmengā īñōmō wēnæ wēnæ tededāmai inte babæ wapiticæ ānāmai inte tæōnæ quēwente tocæcāīmpa.

11 Tæōnæ quēwencæte ante cædinque tōmengā wēnæ wēnæ nānō cæīnō ante ēmō cædinque dadi ēmæninque waa edæ cæquēngā īngampa.

Ayæ tōmengā piyænē cædinque, Mōnō tōmāmō godongāmæ gānē pōnente quēwengæīmpa, ante nanguī cæquēngā īngampa.

12 Mōnō Awēnē awīnca ēmōngā inte nē nō cædāni gāmæñō adinque tōmēnāni īnānite cōwē aacampa.

Ayæ, Botō īmote æbānō ante apænēdānīi, ante tōmengā ēamonca ongonte cōwē ēñēngampa.

Wēnæ wēnæ cædāni īnānite guiquēnē tōmengā pīīninque awīncaque acampa,” ante yewæmōngatīmpa cæmīnīi.

13 Mīnitō waa cæcæte ante edæ nanguī cæīnēmīni bamīni adinque æcānō wæætē mīnitō īmīnite wēnæ wēnæ cæquīngā. 14 Incæte mīnitō nō pōnī mīni cædō beyænque caate wæmīni īninque edæ mīni waa quēwente toquinque īmāīmpa. īninque īīmai ante nāni yewæmōngāīnō bai cædāni. Tōmēnāni nāni guīñente wæpāmo beyæ ante mīnitō īñōmō edæ guīñente wædāmai īedāni. Edæ guīñēñate wædāmai īedāni.

15 Wæætē, Tæiyæ Waēmō Awēnē īngā īngampa, ante wede pōnēninque edæ Codito īngante mīmōno entawēedāni. Ayæ, Watapæ bacæīmpa, ante mīnitō quīnante pōnēmīnīi, ante ēñencæte ante wadāni āñōnānite mīnitō wæætē ā ongōnāmai inte īīnque ante edæ do apænēmīni incæmīnīmpa. Codito mōnītō Awēnē pōnō cæcā beyænque mōnītō, Watapæ bacæīmpa, ante wede pōnēmōnīpa, ante mānīnonque ante do apænēmīni edæ ēñencædānīmpa.

16 īīnāni īñōmō ēñencæte ante ānānīpa, ante pōnēninque mīnitō, Botō wentamō entawēnāmai incæboīmpa, ante nāmā apænte cædinque guīñente wædinque tōmēnāni īnānite ædæmō apænēmīni ēñencædānīmpa. Mānōmai cæyōmīni wadāni guiquēnē mīnitō Codito nempo quēwēninque mīni waa cædōnō ante pīīninque babæ ante todānitawo. īninque mīnitō wentamō entawēnāmai inte ædæmō apænēmīni adinque tōmēnāni wæætē, Mōnītō babæ ante tede-tamōnīpa, ante ēñēninque guīñēnete wæcædānīmpa.

17 Mīnitō wēnæ wēnæ cæmīni beyæ caate wæmīni īninque ōnonque īmāīmpa. Wæætē, Wængonguī, Caate wæcæmīnīmpa, angā īninque mīnitō waa pōnī mīni cædō beyænque caate wæmīni īninque edæ godōmenque waa īmāīmpa. 18 Mīnitō nō cædāmai īñōmīnite Codito īñōmō mōnō nē nō cædongā inte mīnitō īmīnite Wængonguī weca ænte poncæte ante cædinque wēnæ

wēnæ mīni cædō beyænque adopoque caate wængacäimpa. Tömengä baō ēñayongante tömengä ingante wænönāni wængä ate Wængonguī Ōnōwoca angä ate ñāni ömæmonte edæ mīngä quēwengampa. ¹⁹ Ayæ adobaī Wængonguī Ōnōwoca tömengä ingante ænte mäocä godinque tömengä nē wænte gogaināni ōnōwocacoo tee mönete ongoncoo weca gote apænecä ēñengadānīmpa. ²⁰ Mānināni nē tee mönete ongönāni inānite Nōwee wodi Docä nāni ānongä doyedē ancaa apænecä incæte tömēnāni ēñēnāmaī inte cægadānīmpa. Mānināni nē ēñēnāmaī cægaināni iñönānite Codito ñōwo tömēnāni weca gote apænecäcäimpa. Wængonguī iñōmō, Wipo ñænængade pōni impo incæ oncō bai mænnoncæbiīmpa, ante Nōwee ingante do angaingä inte, Iñque mænnoncæcäimpa, ante ee wānō congacäimpa. Incæte mānināni ēñēnāmaī cæyönāni ocho ganca iñāni mānimpodānique æpæno yædopāa wogaa gote quēwengadānīmpa.

²¹ Mānimæno edæ wogaa godinque tömēnāni nāni quēwengāī bai mīnitō adobaī æpænē guidinque quēwēmīnīpa. Incæte wīī baonque mēnongate beyæ quēwēmīnīpa. Wæætē mīnitō, Wængonguī ayongä botō mīmō ñā mēnongate entawēmo inte quēwēmōpa, ante nāmā apænte pönēninque æpænē guimīnīpa. Edæ guidinque mīni ængæ gantidō bai Itota Codito ñāni ömæmonte quēwengä beyænque mīnitō adobaī ñāni ömæmonte quēwēmīnīpa. ²² Tömengä iñōmō do öönädē æite Awēnē badinque Wængonguī tömēmængä iñō edæ tæ contayongante anquedoidi incæ nē ānāni incæ nē tæī piñænte cædāni incæ tömēnāni tömānāni edæ tömengä nānō ānō ante ēñente cædānīpa cæmīnīi.

4

Wængonguī nānō pönō cæganca mönō cæcæīmpa

¹ Nē caate wædingä iñōmō, Botō idæwaa wēnæ wēnæ cæte awædō, ante tömengä wīwa nānō cædinō ante do wido cæcampa. Iñique mīnitō, Codito incæ baonga quēwēninque caate wægacäimpa, ante pönēninque, Botō baonga caate wædinque ēñente badinque botō wēnæ wēnæ cædinō ante wido cæcæboīmpa, ante piyænē cæte tæī ongödāni. ² Edæ nē caate wædingä iñōmō, Mönō waocabo baonque ante mönō cæinēwēnō ante botō iñōmō cædāmaī incæboīmpa, ante pönēninque edæ ñimpo cædinque inguipoga tömengä nānō quēwenguīnganca Wængonguī nānō ānōnonque ante ēñente quēwengampa. ³ Eñēnāmaī iñāni cæinente wæwente nāni ānōnō ante ēñente mīnitō wēñēñedē adobaī quingāmē bai cæte quēwengamīnīmpa. Edæ baonque ante mīni toīnente wæwēnonque ante do cædinque mīnitō tömēnāni nāni cæī bai cædinque edæ ti nāmæ bete quidi quidi dowæninque beowæo inte cæowæo inte Yæ yæ angamīnīmpa. Ayæ mīnitō tömēmīni badōinca incæ adinque, Mönitō wængonguī ingampa, ante ædæ wænte tedewengamīnīmpa. Nōwo iñōmō mīnitō mānōmaī cæte idæwaa cæmīni awædō.

⁴ Tömēnāni iñōmō baonque ante nāni godō toīnēwēnō ante cæcæte ante pogodo gote bai cædinque mīnitō imīnite, Ponguēnē quēwēnānīi, ante ancaa ānānīpa. Mīnitō gomō adinque tömēnāni tōnō godongāmæ godāmaī imīni adinque tömēnāni wæætē, Quimæ awincaque gomō awēmīnīi, ante edæ plīnte ānewēnānīpa. ⁵ Incæte mönō waocabo mīmō quēwēmō incæ do wænte gogaināni incæ tömāmō imonte nē oo apænte anguingä iñōmō edæ Wængonguī iñongä ingampa. Iñique tömengä, Æbānō cægamīnīi, ante angä ēñente wædinque mānōmaī cægaināni wæætē aamō cædāmaī inte tömēnāni

nāni cægainō ante edæ do apænequināni inānipa. ⁶ Mānōmaī beyæ do wængaināni inānite mōnō Codito ingantedō ante watapæ apænegatimpa. Tōmēnāni baō ēñate quēwēñōnānite waodāni apænte āninqe pānāni incæte Wængonguī wæætē, Tōmēnāni ōnōwoca ēwocadinque quēwencædānimpa, ante tōmēngā waa pōnī nānō cægainō beyænque nāni quēwenguīnō ante godō apæneca ēñengadānimpa.

⁷ Nōwo iñōmō tōmancoo edæ oo iñque baquinō anguēnē. Mānōmaī impa, ante ēñente wæmīni inte mīnitō, Mōnō tōingā pōnente Wængonguī ingante apænecæimpa, ante cædinque nāmā wææ aadinque ocai encate pōnēdāni. ⁸ Wēnæ wēnæ cæmō incæte waadete pōnēmō iñique mōnō waadete cædō beyænque wadāni piyænē cæte piñāmaī inānipa. Mānōmaī impa, ante pōnēninque mīnitō nē wede pōnēmīni inōmīni inte cōwē waadete pōnente cæedāni. ⁹ Edæ wadāni inānite, Pōedāni, āninqe wacā ingā wacā ingā pædæ godōninqe edæ, Tōmēmo quī impa, ante wædāmaī iedāni.

¹⁰ Wængonguī, Botō pōnō waadete cæbo ate mīnitō ado botō waadete cædōnō ante ænte ēwocadinque godō waadete cæedāni, ante adocanque ingante wadō wacā ingante wadō pōnō waadete cæcā ænte ēwocamīnipa. Iñique mīnitō tōmāmīni mīni ænte ēwocaganca cædinque mīni pōnencabo beyæ godongāmæ waa cæquēnēmīni imīnipa. ¹¹ Wængonguī pōnō cæcā æninqe æcānō nānō apænequinganca ēwocacā tōmēngā Wængonguī nānō apænedonque ante apænequēnēngā ingampa. Æcānō wadāni beyæ ante nānō nē cæquinganca ēwocacā tōmēngā Wængonguī nānō tæī piñænonque entawēninque waa cæquēnēngā ingampa. Mānōmaī cædinque mīnitō waa cæmīni adinque mōnō tōmāmō Itota Codito ēmōwo apænedinque Wængonguī ingante, Bitō waēmō pōnī inōmi inte waa cæbipa, ante apænecæimpa. Tōmēngā iñōmō nē tæī ēmōnongā inte nāō ēmōninqe nē nangūī cædongā ingampa, ante mōnō pedænguipoga quēwēmō incæ iñcayæ ponte mīnguipoga quēwēmō incæ cōwē watapæ pōnī apænecæimpa. Mānōmaī baquinō anguēnē, ante botō, Amēē, āmopa.

Codito nempo quēwēninque caate wæcæmīnimpa, ante

¹² Botō nē waademīni ēñēedāni. Mīnitō nōwo incæ gonga gonte caate bai wæmīni incæte, Quiēmē beyæ mānōmaī caate wæboī, ante guñente wædāmaī iedāni. Edæ wīī ōnonque caate wæmīnipa. ¹³ Wæætē, Codito nānō caate wægainonque godongāmæ nōwo caate wæmōnipa, ante pōnēninque watapæ toedāni. Mānōmaī caate wædinque tomīni iñique Codito nāō apāite bai nānō pōñedē godōmenque gomonga watapæ toquīmīni imāmīnipa. ¹⁴ Mīnitō imīnite wadāni piñte āninqe, Codito ēmōwo ōnonquedō waa adinque wæcantedō abi, ante badete todāni iñique Wængonguī wæætē, Watapæ quēwencæmīnimpa, ante pōnongā æninqe mīnitō tōmēngā Ōnōwoca nē nāō ēmōnongā ingante ēwocamīni beyæ toquēnēmīni imīnipa. ¹⁵ Wacā ingante nē godō wænongā ingante do pānāni wæcampa. Wacā quī nē awēmō ængā ingante nē wēnæ wēnæ cæcā ingante adobāi pānāni wæcampa. Adocanque nē cæquēnēngā inte ānāmaī iñongante wacā iñontobæ godō ōnonque cæcā ate nē ōnonque cæcā ingante pānāni wæcampa. Mīnitō wæætē nāmā wææ aadinque tōmēnāni nāni cædō bai cædāmaī imīni iñique caate wæmīni incæte ædō cæte mīni wiwa cædō beyæ pānāni caate wæquēnēmīni. Edæ dæ anguēnē.

¹⁶ Wæætē wadāni mīnitō imīnite, Wææ, Codito ēmīñæmi imipææ, ante piñte cædāni caate wæmīni incæte mīnitō guingo imonte wædāmaī iedāni. Wæætē edæ Wængonguī ingante apænedinque edæ, Bitō nāō ēmōmi inte

pönö pemonte bai cæbi æninque mōnitō Codito emōwo emonte bai adobai emōmōnīpa, ante waa apæneedāni.

17 Edæ iīmaī impa. Wængonguī tōnō mōnō godongāmæ owocabo iīñomonte tōmengā oo apænte ancæcāimpa. Iīnque mōnō imonte tāno apænte angā iīnque tōmengā wadāni inānite guiquēnē æbānō cæqinggāā. Tōmengā ingantedō ante watapæ apænedāni ate nē ēñente cædāmaī ināni inānite apænte æninque Wængonguī quingāmē bai nanguī pangā wæquinānīi. 18 Ayæ Wængonguī beyæ nāni yewæmōngainō bai impa. Nē nō cæcā wodo wænguēngā iīngante Wængonguī tingæ ængā beyænque quēwēñongā Wængonguī ingante ēñēnāmaī ingā guiquēnē tōmengā ædō cæte quēwenguingāā. Nē wēnæ wēnæ cæcā adobai edæ ædō cæte quēwenguingāā. 19 Mīnitō iīñomō Wængonguī nānō āninō beyænque caate wæmīnitawo. Iīnque mænōmaī beyænque mīnitō, Mōnō imonte nē badongaingā cōwē pōnēningæ ædæmō aauqingā ingampa, ante pōnēninge nāmā mīnitō ōnōwoca tōmengā nempo godōninque piyænē cæte godōmenque waa cæquēnēmīni iīmīnīpa.

5

Mīni pōnencabo æbānō cæte quēwengcēimpa, ante

1 Mīni pōnencabo iīñomīnite pancamīniya nē aamīni Picæmīni mōnō āmīni iīmīnīpa. Botō iīñomō adobai nē aabo Picæmo inōmo inte, Mōnō nē Picæncabo, ante mīnitō imīnite ædæmō apænedinque āmopa. Codito caate wæcā nē agaimo inte botō edæ waadete āmopa. Ayæ Codito ñāo bai nānō emōnō edonque pōni nānō odōmonguīnō ante botō tōmengā tōnō ñāo bai entawēmo inōmo inte edæ, Eñencæmīnīmpa, ante nanguī āmopa. 2 Codito ingante nē pōnēnāni iīñomō mīnitō nempo cænināni bai ongōñōnānite mīnitō tōmēnāni inānite nē aamīni iīmīnīpa. Wængonguī, Nē pōnēnāni inānite aacæmīnīmpa, angā ēñēninque mīnitō wæætē Baa āmōni iīnque Wængonguī pangā wæcæ wæ, ante guīñente wæmīnitawo. Iīñampa wīi guīñente beyænque aacæmīnīmpa. Wæætē Wængonguī, Mīnitō do Ao ante aacæmīnīmpa, ante tōmengā nānō ānōnonque ante edæ ēñente cæte edæ tōmēnāni inānite ædæmō aaedāni. Ayæ edæ godonte æinta ante æīnente wæmīnitawo. Iīñampa wīi æncæte ante wædinque mīnitō edæ, Nē pōnēnāni beyænque nanguī cæinente wædinque cæcæboimpa, ante piyænē cæte aaedāni. 3 Waodāni nē cænināni bai mīnitō nempo ongōñōnānite mīnitō wæætē imæca awēñēidi nāni piinte āmaī wīi adobai piinte ædāni. Wæætē edæ, Mōnō waa cæte quēwēmō adinque tōmēnāni mōnō bai adobai waa cæte quēwencædānīmpa, ante cædinque edæ waa cæedāni.

4 Mānōmaī cæmīni iīnque mōnō nē Aadongā Ñænængā pōni inongā iīñomō iīncayæ ponte a ongōninque poganta ñāo emonta cōwē wodāmaī inta pædæ pōnente bai cædinque mīnitō imīnite, Mīnitō nē aamīni inte botō ñāo emonte ongōñōmō ponte quēwencæmīnīmpa, ancæcāimpa.

5 Tæcæ æmæwo pæimīni guiquēnē ēñēedāni. Godōmenque picænāni nāni āninō ēñēninque edæ Ao ante cæedāni. Ayæ gānē entawente pōnēninque, Ōnōmōnique bai mōnitō imōnīpa, ante pōnēninque wacā nānō āninō ante ēñēninque Ao ante cæedāni. Edæ iīmaī ante yewæmōnte ongōmpa.

“Nāmanque ante, Mōnitō gomonga waa cæmōni imōnīpa, ante nē pōnēnāni inānite edæ Wængonguī Baa angampa. Wæætē edæ, Mōnitō ōnōmōnique bai imōnīpa, ante nē ānāni inānite tōmengā pōnō waadete cæcampa.”

6 Ante yewæmongatimpa cæminii. Ìincayæ ate eyepæ pōni bayonte Wængonguī incæ mōnitō ìmōnite ængō cæcā ongoncæmōnimpa, ante cædinque mīnitō ñowo ìñōmō nē tæi piñængā ònōnempo ongōninqe nāmā ængō cædāmai ìedāni. 7 Codito mōnō ìmonte waadete pōnente cæcampa, ante eñente wædinque mīnitō guñente mīni wæðō ante tōmengā wo cæmīni mongængā ate mīnitō guñēnāmai ìninqe wæætē guēmancæmīnimpa.

8 Nāmā incæ edæ wææ aedāni. Wēnæidi awēnē ìñōmō edæ mēñebo nē piinte angā bai ìnongā inte, Æcānō ingante eate cænguimoo, ante nē piinte cædongā inte awēmō diqui diqui mingampa cæminii. Ee aedāni. 9 Mīnitō caate wæmīni incæte, Mōnō tōniñadāni inguipoga tōmāmæ quēwēninqe adobai edæ caate wædānīpa, ante do eñēmīni inte Codito ingante wede pōnēninqe adiyæ næ gongæninqe wēnæ awēnē ingante cōwē Baa ædāni. 10 Mānōmai cædinque wantæ ìñō caate wæmīni ate Wængonguī nē waadete pōnō cædongā inte mīnitō ìmīnite pōnō cæcā ate edæ gancæ bacæmīnimpa. Ayæ godōmenque pōnō cædinque tōmengā mīnitō ìmīnite pōnō tæi gōnongā ate mīnitō tæi piñænte entawēninqe wæntædāmai inte edæ cōwē tæi ongoncæmīnimpa. Tōmengā adocā ìñōmō ñāō bai cōwē ìmōnongā inte mīnitō ìmīnite aa pedinqe, Mīnitō Codito nempo nē quēwēnōmīni inte botō ñāō ìmonte ongōñōmō pō guite quēwēdāni, angacāimpa. 11 Tōmengā ìñōmō cōwē tæi ìmōninqe nē nanguī cædongā ingampa, ante mōnō pedænguipoga quēwēmō incæ ìincayæ ponte mīnguipoga quēwēmō incæ cōwē watapæ pōni apænecæimpa. Mānōmai baquinō angūēnē, ante botō, Amēē, āmopa.

Waa quēwencæmīnimpa, ante

12 Botō tōniñacā bai ìnongā inte Tidibānō ìñōmō cōwē pōnēninqe ædæmō cæcā ingampa, ante adinqe botō tōmengā tōnō godongāmæ cædinque, Mīnitō acæmīnimpa, ante cadota ante ocanta yewæmōmopa. Ìi cadota adinqe mīnitō gancæ pōnēninqe nanguī cæcæmīnimpa, ante cædinque botō Pegodobo ìñōmō, Wængonguī nāwangā mānōmai pōnō waadete cæcampa, ante yewæmōmopa cæminii. Tōmengā nānō waadete cædonque ante entawēninqe edæ mīnitō adiyæ tæi gongænte ongōedāni, āmopa.

13 Mīnitō ìmīnite apænte æninqe Codito ìñōmō Babidōnia ìñōmō tōmengā ingante nāni godongāmæ pōnencabo ìnānite adobai apænte ængacāimpa. Tōmēnāni ìñōmō mīnitō ìmīnite, Waa quēwencæmīnimpa, ante apænedānīpa. Botō wengā bai ìnongā inte Māadoco adobai, Waa quēwencæmīnimpa, angampa. 14 Mīni pōnencabo adobai godongāmæ waadete pōnēninqe, Wængonguī bitō ìmite waa cæcæcāimpa, ante wacā ingā wacā ingā apæneedāni.

Codito nempo quēwēmīni inte tōmāmīni gānē pōnente quēwencæmīnimpa, ante botō Pegodobo ìmo yewæmōmopa.

2 Pegodo

cadota ante nānō ayænta yewæmongainta

Wængongui mīnitō imīnite waa cæcæcāimpa, ante

¹ Botō Timōnō Pegodo inōmo inte Itota Codito ingante nē cædōmō iñōmote tōmengā botō imote da godongā godinque botō tōmengā beyæ nē apænebo bagaboimpa. Mōnō Wængongui inongā inte Itota Codito iñōmō mōnō imonte, Quēwencæmīnimpā, ante nē Ængaingā ingampa. Tōmengā iñōmō mōnitō imōnite pōnō cædinque, Mīni wede pōnēnō ante waa pōni entawencæmīnimpā, ante pōnongā ænimōni inte entawēmōnīpa. Ayæ adobaī tōmengā nē nō pōni cædongā inte mīnitō imīnite pōnongā æninque mīnitō mōnitō entawēnō baī ado mīni wede pōnēnō ante edæ waa pōni entawēmīnīpa. Īninque mīnitō imīnite botō, Acæmīnimpā, ante yewæmōmopa. ² Mīnitō Wængongui ingante pōnēninque Itota Codito mōnō Awēnē ingante adobaī pōnēninque tōmēna inate edæ ate baī pōnencæmīnimpā, āmopa. Ayæ tōmēna godōmenque pōnō cæda ate mīnitō tōmēna nāna gānē pōnēnō ante edæ eyepæ pōni entawencæmīnimpā, ante botō yewæmōmopa.

Codito nānō nē emīñcēmō inte mōnō ūmaī entawēmompa

³ Itota Codito iñōmō, Nē waa cæbo inte botō ñāō emōmo iñōmote pōedāni, ante mōnō imonte do aa pecā pōmopa. Mānōmaī Itota Codito weca pōñōmote tōmengā Wængongui nānō tæī piñæmāmo entawēnongā inte, Quēwēedāni, āninque eyepæ pōnō cæcā ænte quēwēninque mōnō tōmengā awinca ate baī pōnēninque tōmengā nānō waa cædō baī edæ adobaī mōnō waa cæmō bamompa. ⁴ Tōmengā nē waa cædongā inte edæ ñāō baī emōninque, Botō godōmenque nanguī cædinque waa pōni edæ pōnō cæcæboimpa, ante edæ wæætē wæætē angacāimpa. Īninque mīnitō iñōmō tōmengā nānō angāiñō ante wede pōnēñōmīnite Wængongui tōmengā nānō entawēnō pōnongā æninque mīnitō Wængongui nānō entawēnō baī adobaī entawencæmīnimpā. Ayæ mānīne ante wede pōnēninque mīnitō inguipoga quēwēninque wēnæ wēnæ mōnō cæinente wægāiñō ante, Ñōmænte bacæ wæ, ante wædinque Baa ante edæ aamō cæcæmīnimpā.

⁵ Codito mānōmaī pōnō cæcā beyæ mīnitō wede pōnēmīni inte nē waa cæmīni bacæte ante cōwē edæ pæ pagænte cæedāni. Ayæ wææ nē waa cæmīni badinque Æbānō cæte nō cæquī, ante ēñēmīni bacæte ante nanguī cæedāni.

⁶ Ayæ wææ mānōmaīnō ante mīnitō nē ēñēmīni badinque godōmenque nanguī cædinque nāmā wææ aamīni bacæte ante cæedāni. Ayæ wææ nāmā wææ aamīni badinque wæætē nē wæntædāmaī inte ee cæmīni bacæte ante cæedāni. Ayæ wææ nē wæntædāmaī inte ee cæmīni badinque mīnitō wæætē Wængongui nānō ante entawēnō baī entawēninque tōmengā nānō cædō cæte quēwencæte ante cæedāni. ⁷ Ayæ wææ Wængongui nānō cædō baī cæte quēwēmīni badinque mīnitō ayæ, Mōnō caipæ, ante godongāmæ mīni waa cæcabo bacæte ante cæedāni. Ayæ wææ mīni godongāmæ waa cæcabo bamīni inte mīnitō ayæ waodāni tōmānāni inānite waadete pōnēninque godō waa cæmīni bacæte ante cæedāni.

⁸ Mānōmaī wede pōnēninque tæī ongōninque waadete pōnēninque Wængongui nānō cædō ante godōmenque godōmenque entawente cæmīni ĩninque mīnitō mōnō Awēnē Itota Codito ingante ate baī nē pōnēmīni inte edæ tōmengā beyæ mīni cæquēnēnō ante oda cæte wædāmaī ĩmaīmīnīpa.

Wæætē edæ awæ nanguī inca baī mīnitō adobaī mīni cæquēnēnō ante do cæcæmīnīmpa. ⁹ Wæætē mānīnō tōmānō ante entawēnāmaī ingā guīquēnē tōmēngā mōwoyata baī ēmōnongā inte inguīpogaque waa adīnque oōnædē īñōmō gobæ ī ædō cæte aquīngāā. Tōmēngā nānō wēnæ wēnæ cægāinō ñā do mēnongate īmpa, ante pōnēnāmaī inte ōnonque quēwēngāmpa. ¹⁰ Īñānāni ēñēedāni. Wængonguī mīnitō īmīnite do apænte ænīnque aa pegacāīmpa cæmīnī. Mīnitō, Wængonguī nānō ānōnonque ante ēñente entawēnīnque mōnō cōwē tæī gongænte ongongæīmpa, ante nanguī cædāni. Edæ mānōmainonque ante cæmīni inte mīnitō oda cædāmaī inte tæī ongoncæmīnīmpa. ¹¹ Ayæ īncayæ ate nāñe wæmīni ate mōnō Awēnē Odeye Itota Codito īñōmō mīnitō īmīnite ææntodongā goyōmīnite tōmēngā, Pō guīdāni, ante watapæ æmæwo manguīcā guite cōwē quēwēncæmīnīmpa.

¹² Mīnitō mānīnō ante do ēñēnīnque mīni nō pōnī ēñēnō ante ædæmō entawente tæī ongōmīni incæte botō, Godōmenque cōwē pōnencæmīnīmpa, ante cædīnque adodō adodō ante apænebo ēñencæmīnīmpa. ¹³ Edæ botō, Mīnitō oda cædāmaī inte cōwē pōnencæmīnīmpa, ante cædīnque botō baonga botō quēwēnganca wæætē wæætē apænedīnque nō cæte apænebopa, ante pōnēmpa. ¹⁴ Edæ mōnō Awēnē Itota Codito botō īmote edonque apænedīnque, Bitō oo pōnī wænīnque botō weca ææ poncæbiīmpa, angacāīmpa. ¹⁵ Angā ēñēngāīmo inte botō, Nōwo botō yewæmōnīnō ante adīnque entawēmīni inte mīnitō īñōmō botō gobo ate cōwē pōnencæmīnīmpa, ante cædīnque ñōwo incæ tæī piñænīnque nanguī cæcæboīmpa.

Itota Codito Tæiyæ Awēnē nānō ēmōnō atamōnīpa

¹⁶ Mōnō Awēnē Itota Codito īñōmō tæī piñængā ingā inte oo poncæcāīmpa, ante mīnitō īmīnite apænedīnque mōnitō dicæ wadāni nāni mā apænewēnō ante apænetamōnīyaa. Wæætē edæ, Tōmēngā nē Awēnē īnongā inte mōnō Tæiyæ Awēnē nānō ēmōnō incæ ēmongāmpa, ante nē agāīmōni inte mōnitō, Nāwāngā agamōnīmpa, ante apænemōni ēñēmīnitāpa. ¹⁷ Edæ Awēnē nānō ñāo apāite baī ongōñōmō ongonte apænedīnque Mæmpo Wængonguī incæ, “īngā botō Wēngā īnongā inte botō nē waadecā īngāmpa. Tōmēngā īngante adīnque botō waa tobopa,” ante apænegacāīmpa. Ayæ Itota īngante waa adīnque tōmēngā nē ñāo ēmongā īngante odōmongā agamōnīpa. ¹⁸ Ānanquīdī tōmēngā tæiyæ waēmō ēmonte nānō ongōñōmō godongāmæ ongōnīnque mōnitō mānīnō ante Wængonguī oōnædē tedecā ēñentamōnīpa.

¹⁹ Wængonguī beyæ nē apænegāināni nāni yewæmongāinō baī mōnitō adobaī edonque agāīmōni inte, Nāwāngā īñonte yewæmongadānīmpa, ante apænemōni ēñēngūēnēmīni īmīnīpa. Mānīnō nāni angāinō wēmō īñōmō ñāo apāite tīca ēnente baī ī apa quēwēmīnī. Oque pōnente īñonte, Wadaamō æængæīmpa, ante wānō cōnāni baī mīnitō adobaī mīni ñāo entawēngūnīnque ante Itota Codito nānō ponguīōnæ ante edæ wānō cōnīnque wede pōnēmīni īnīnque waa īmaīmpa. ²⁰ Īñānāni ēñēedāni. Dodāni Wængonguī beyæ nē apænegāināni incæ, Wængonguī æbānō ante apænecā ēñente yewæmongūmoo, ante pōnēnīnque dicæ mā pōnēnīnque adodeque incæ yewæmongadānīyaa. ²¹ Wīī nāmanque pōnēnīnque yewæmongadānīmpa. Wæætē Wængonguī Tæiyæ Waēmō Ōnōwoca nempo quēwēñōnānīte tōmēngā pōnō apænecā ēñēnīnque Wængonguī nānō apænedonque ante apænegadānīmpa, ante āmo ēñēmaīmīnīpa.

2

Nē babæ odōmonte apænedāni ūmāi cædānīpa, ante

1 Doyedē pancadāniya, Wængonguī beyæ apænebopa, ānīnque babæ apænegadānīmpa. Nōwo īñōmō wadāni adobai awēmō cædinque, Mīni cābo oda cæte ēwente wæcæmīnīmpa, ante cædinque babæ ante odōmonte apænequīnāni mīnitō weca do ongōnānīpa. Mōnō Tæiyæ Awēnē incæ tōmēnāni īnānīte æncæte ante nāmā wepæ nē godongāingā īñongante tōmēnāni wæætē nāni quīngæ ōmæe ēwengūnque edæ Baa ānānīpa cæmīnīi.

2 Pancamīniya nangūi īmīni incæ mīni guīñente wæquinque tōmēnāni nāni wentamō mongænte goquīnō incæ tee empote goquīmīni īmīnīpa, ante awædō. Mānīnō godīnque mōnō nōingā ēñēnōnō ante piinte cæyōmīni wadāni adobai mānīi taadō nōinō īñonte godō babæ ānīnque wēnæ wēnæ ānāni baquīnānīmpa, ante awædō. 3 Nē babæ odōmonte apænedāni īñōmō mīnitō māincoo ante ō æīnēwente wæwēnāni incæ nāmāneque nāni pōnēwēnō ante tēdēdāni ēñēnīnque mīnitō do oda cæyōmīnīte tōmēnāni wæætē ō æmāīnānīpa, ante awædō. Mōnō nē pangā ōnoncadopo do ongongāīnāni īnānīpa. Mōnō nē pangā īñōmō, Oo nāni ēwengūnque mānōmāi cædānīpa, ante apænte ancæte ante pīnīnque edæ mōwo mōnāmāi mīngā inte a ongongampa.

4 Anquedoidi incæ ēñēnāmāi cædāni ate Wængonguī ata cæpodāmāi īn-gacāīmpa. Wæætē, Tōmēnāni nāni apænte tente wæquīnganca ontatodē wēmō mæ māmonte bai īñōmō guī tee mōnete ongongcædānīmpa, ante cædinque tōmēngā angā ēñente tōmēnāni nāni owogāīñōmō tadōmēngadæ pōnī dobæ go guīgadānīmpa. 5 Ayæ doyedē tōmēngā nānō nē badongāīnāni īngūipoga quēwēñōnānīte Wængonguī tōmēnāni īnānīte ata cæpodāmāi inte angā ate nē ēñēnāmāi īnāni īñōmō edæ æpæmpo bete wængadānīmpa. Wæætē Nōwee wodi Docā nāni ānongā guīquēnē, Mōnō nō cæte quēwēngæīmpa, ante nē apænegāingā īñongante Wængonguī tōmēngā tōnō tiæte ganca īnāni mānīmpodānīque īnānīte wææ aacā quēwēngadānīmpa. 6 Ayæ, Todōmā tōnō Gōmoda īñōmō quēwēnāni īnānīte, Mīni apænte wido cæquīnque, ante tōmēnāni quēwēñōmō iya tānīnque wido cæcā gōnāiboque bate contagatīmpa. Mānōmāi cædinque Wængonguī, Botō īmote ēñēnāmāi īmīni mīni adobai tente wæquinque cæmīnīpa, ante wadāni īnānīte odōmoncæte ante cægacāīmpa. 7 Ayæ ēñēnāmāi inte cædāni baonque towente quēwēnāni adīnque Dooto wodi īñōmō nē nō cægāingā inte, Wentamō pōnī mongænte quēwēnāni awædō, ante wædongā inte adoyōmō quēwēñongante Wængonguī tōmēngā īngante tōō æmænte ō ængā beyænque quēwēngacāīmpa.

8 Tōmēngā waa cæquinque nō entawēnongā inte tōmēnāni weca quēwente ayongā īmō īnō īmō īnō ēñēnāmāi cædāni adīnque tōmēngā, Ancaā ate awædō, Ancaā ēñente awædō, ante wæwēñongante Wængonguī tōmēngā īngante do ō ængā beyænque quēwēngacāīmpa. 9 Mānōmāi cædinque Wængonguī, Botō mīñæ nē pōnāni caate wadāni adīnque botō do ēñente cædinque æmo ate quēwēnānīpa. Wæætē wīwa cædāni īnānīte botō apænte angūiōnæ ganca mō ongante bai mānīnque nōwo incæ wæætē wæætē pāmo wædānīpa, ante Wængonguī cæcampa. Īnīnque, Nō ēñente Wængonguī cæcampa, ante mōnō edonque ēñēngæīmpa. 10 Mānīi babæ ante nē odōmonte apænewēnāni īñōmō tōmēnāni baonque ante towēīnente nāni entawēmāmo ante nē cædāni īnōnāni inte edæ awēnēīdi īnānīte, Wīi ēñēīnē wædō, ante pīnānīpa. Mānōmāīnō ante nē piinte ānāni īnānīte godōmēnque pancæte ante Wængonguī mō ongote bai mangampa. Tōmēnāni īñōmō nāmā ængō cædinque guīñēnedāmāi inte edæ nē nāō entawente tæī ēmōnāni īnānīte godō wēnæ wēnæ apænedīnque

edæ babæ ante tedewēnānīpa. ¹¹ Īñæmpa anquedoidi tæi piñænāni inte godōmenque ñænænāni inōnāni incæ Wængongui ayongante guiñēnete wædinque nē ñāō entawente tæi emōnāni inānite piinte apænte ānāmai ĩnānīpa.

¹² Nē babæ ante odōmōnāni guiquēnē tōmēnāni nāni nē adāmai ĩnō ante mā pōnēninque wēnæ wēnæ apænedinque babæ ante tedewēnānīpa. Babæidi omæwocadāni inte nāni togænte ecate ewenguinque ōnonque pōni cægōnāni bai nē babæ odōmōnāni ĩñōmō edæ adobai ēñēnāmai ĩnāni inte tōmēnāni nāni wænguinque babæ cædinque quingāmē bai quēwēnānīpa. ¹³ Tōmēnāni wadāni inānite godō wiwa cædāni ĩnīnque ĩnāni wæætē nāēmæ godō cædāni wæcædānīpa. Tōmēnāni ĩñōmō, Itædē incæ mōnō baonque pōnente towengæimpa, ante cædānīpa. Mīnitō waadete pōnēninque godongāmæ cæñōmīni tōmēnāni adoyōmō pōninque cæowæō incædō beowæō incædō inte cægōnāni wentamō nāni mongænō beyænque mīni cabo wæætē baate bai ēñāmīni badingque wentamō tæ encaa tæ encaa emonte bamīni awædō.

¹⁴ Wacā onquiyængā awīnca adinque cōwē godō towēinente wædāni inte tōmēnāni ĩñōmō ñimpo cædāmai cōwē wiwa cæinente wædānīpa. Wacā aquīi piñænāmai ingā adinque tōmēnāni, Mōnitō tōnō godongāmæ ponte wēnæ wēnæ cæcæcāimpa, ante cædinque godō waa cæte bai babæ cædānīpa. Botō qui botō qui, ante nē æinente wædāni ĩñōnānite Wængongui ĩñōmō, Tōmēnāni nāni wæwocaincabo ĩnānīpa, ante piinte angampa. ¹⁵ Taadō tōinō oda cædinque edæ docā Beodo wodi wengā Badāō wodi mīñæ tōmēnāni tee empote godānīpa. Tōmengā Badāō ĩñōmō, Nō cædāmai imo incæte botō māincooque ænte tobote, ante bai cægacāimpa. ¹⁶ Tōmengā Wængongui beyæ nē apænecā incæ ocai omæcacā bai inte wapiticæ ēñēnāmai cæyongante babetadecā ĩningā incæ bodo incæ ĩñontobæ wao bai tededinque Badāō ingante wææ angacāimpa.

¹⁷ Māniū ñōwodāni nē babæ odōmōnāni ĩñōmō æpæ taquēñēñōmō æpæ dæ ā bai edæ ōnōnānique inte odōmōnānīpa. Boguimancoo wīni cai mongænte ōnonque ænte poncoo bai tōmēnāni adobai ĩnāni inte ōnonque cædānīpa. Mānōmai cædāni beyæ Wængongui, Tōmēnāni nāni ongonte wæquiñōmō, ante mæ māmonte bai ĩñōmō badongacāimpa.

¹⁸ Edæ tōmēnāni ogæ tededinque, Botō godōmenque waa pōni cæbo aedāni, ante ōnonquedō ante tedewēnānīpa. Wadāni wapiticæ cæte quēwēnāni nempo adocanque wodo aamō cæyongante mānīnāni nē babæ odōmōnāni ĩñōmō, Bitō mōnitō mīñæ wæætē pōninque baonque bitō cæinēwēnō ante guiñēñadāmai inte cæte tocæbiimpa, ante waa cæte bai godō babæ cædānīpa. ¹⁹ Mīni æædemō aamō cæte mōnedāmai quēwenguinque mōnitō mīñæ pōedāni, ante babæ ānewēnānīpa. Incæte nē babæ odōmōnāni incæ tōmēnāni nāni wiwa cædonque beyænque cæte quēwēnāni beyænque nāēmæ ñā cæyænte bai inte wædānīpa. Edæ quiēmenque ante waocā ēñente cæcāā tōmengā mānīnō nānō ēñente cædō beyænque nē cæte quēwēnōngā inte nāēmæ ñāō cæyænte bai inte wæcampā.

²⁰ Inguipoga ñōmænguēñēmāmo beyæ tee mōnete bai quēwēināni inte tōmēnāni mōnō Awēñē Itota Codito mōnō imonte nē Œngaingā ingante do ate bai pōnēninque edæ abæ tawænāni ĩnānitapa. Mānōmai abæ tawænte godīnāni inte tōmēnāni inguipoga ante nāni cæinente wæpāmo beyænque wæætē adodō go goyo cæte ægodawate tæ wææntodonte bai wædāni ĩnīnque tōmēnāni godōmenque nāni wēnæ wēnæ wæwenguinque ĩmāimpa. ²¹ Nōinō taadō do adīnāni inte tōmēnāni nāni godōmenque wæwenguinque emō cæte godānīpa. Wængongui tæiyæ wæemō nānō wææ angainō ante odōmōnāni nāni do ēñēnīnō ante Baa ante wadæ godāni ĩñōmō godōmenque wēnæ wēnæ nāni wæquinque impa. ĩnīnque mānīnō taadō ante tōmēnāni cōwē adāmai ĩnāni

inte bai tōmēnāni beyæ godōmenque waa incædōnimpā. ²² Tōmēnāni nōinō taadō emō cæte godīnāni nāni cædō bai ante īlmainō ante nāwangā ante badete todānīpā. “Guinta awæ wēningā adodō cængampā. Odæ wængānā īñōmō æpæ pantate ate onguipoipæ wēango wēango nangampā.”

3

Mōnō Awēnē wæætē adodō poncæcāimpā, ante

¹ Botō nē waadedōmīni ēñēedāni. Mīnitō mōwo mōnāmaī inte nōingā ante pōnencæmīnimpā, ante botō, Mānōmaī impā, ante mentaa yewæmōnīnque adodō adodō ante yewæmōmo aedāni. ² Tæiyæ waemō entawēnāni Wængonguī beyæ ante apænedīnque nāni yewæmongainō ante nē adīmīni inte mīnitō wæætē pōnencæmīnimpā, ante cæbopa. Mōnō Awēnē mōnō īmonte nē Ængaingā inte adobai ante wææ angacāimpā. Tōmengā nānō da godongaimōni īñōmō tōmengā nānō wææ angainō ante apænemōni ēñēmīni inte mīnitō wæætē adodō ante pōnencæmīnimpā, ante cædīnque yewæmōmopa.

³ Īmaī ante tāno apænebo ēñencæmīnimpā. Mōnō waocabo inguipoga mōnō quēwēmāmo wodo īnque bayonte nē badete todāni cōwē poncædānimpā. Pōnīnque tōmēnāni badete todīnque nāmā nāni wēnæ wēnæ cæinēnō ante edæ do cæquīnāni īnānīpā. ⁴ Tōmēnāni īmaī ante badete tocædānimpā. “Codito nānō ponguīnque impā, ante wædānitedō abi. Īñæmpa Wængonguī nānō badongāñedē inguipo nānō cægāi bai mæmæidi wodi wænte godāni ate nōwo ganca adobai inte cæ apa guīñewēmīni,” ante badete toquīnāni inte poncædānimpā. Apænebo ēñēedāni. ⁵ Wængonguī īñæmpa adodeque angā beyænque oōnædē owocoo edæ do bagatimpā. Adodeque angā beyænque onguipo æpæ tæcæpæno odæ yate ongōñonte tōmengā æpæ tōnō badongā ongompā. Mānōmaī impā, ante edonque ī incæte tōmēnāni, Mōnō Baa angæimpā, ante beyænque adāmaī inte bai pōnēnāmaī īnānīpā. ⁶ Ado æpæ inguipoga mæ ā beyænque Nōwee wodi quēwengāñedē māninguipo nānō ingāi dæ badīnque waguipo bai bagatimpā, ante edæ nōwodāni īñōmō adobai pōnēnāmaī īnānīpā. ⁷ Ayæ adobai Wængonguī adodeque angā beyænque oōnædē owocoo tōnō īnguipo nōwo mīni cægonguipo edæ iya tanguīnque ongompā. Tōmengā, Botō īmote nē Baa ānāni nānīte botō apænte pante wido cæquīonæ ganca mānīi oōnæ tōnō īnguipo ongompā, angampā.

⁸ Botō nē waademīni edæ ēñēedāni. Mōnō Awēnē ayongante adoōnæque incæ edæ, Mīido ganca wadepo bai impā, ante acampā. Mīido ganca wadepo īñonte mōnō Awēnē ayongante, Adoōnæque bai impā, ante acampā. Mānōmainō ante adodeque incæ mīnitō cōwē ēñente pōnēedāni, āmopa. ⁹ Mōnō Awēnē, Cōwē pōnō cæbo æncæmīnimpā, ante nānō angainō ante pancadāniya, Æiquedō mōnō Awēnē cæquīngāā, ante wædānīpā. Mōnō Awēnē īñæmpa wīi wæntæye ingampā. Wæætē, Adocanque wæñāmaī incæcāimpā. Wæætē tōmānāni, Idæwaa wēnæ wēnæ cæte awædō, ante botō gāmæñō poncædānimpā, ante cædīnque tōmengā mānīnō beyænque ee cædāmaī ingampā. Īnīnque tōmengā, Mīnitō wæætē botō gāmæñō æiquedō ponguīmīni, ante wānō cōnīnque edæ ee pōnāmaī ingampā.

¹⁰ Incæte nē awēmō ō ængā īñontobæ nānō pōmaī mōnō Awēnē nānō poncæ cæonæ īñōmō adobai īñontobæ ponguīnō anguēnē. Nanguī tæi tæi tēnīnque oōnædē owocoo incæ īñontobæ dæ goquīnō anguēnē. Gongā nāni angā nanguī pōnī bæco īnīnque edæ Wængonguī nānō badongaincōo tōmancōo edæ aca podīnque edæ ēwente bacæimpā. Inguipoga tōmāo ongoncōo dæ ba īnīnque inguipo ōnōmæca pōnī baquīnō anguēnē. ¹¹ Tōmancōo edæ mānōmaī

ewenguincooque impa, ante adinque edæ mīnitō iñōmō, Æbānō quēwenguī, ante pōnēmīni. Wængonguī nānō cædō bai cōwē cædinque tæiyæ waēmō quēwenguēnēmō imompa. ¹² Wængonguī nānō ponguīōnæ iñōmō edæ æyedēnō ponguī, ante wānō cōninque, Quingæ pōni pongæimpa, ante mōnō nanguī cæcæimpa. Mānīōnæ iñonte edæ oōnæ incæ gonga bæcote ewente bayonte Wængonguī nānō badongaincoo incæ nanguī ocoi āninque tōmancoo aca podinque ewente baquinō anguēnē. ¹³ Picæōnæ tōnō pedænguipo omææ ewēninque Wængonguī wæætē, Botō mīiōnæque tōnō mīnguipoque pōnō badoncæboimpa, ante nānō angainō bai do badoncæcæimpa. Īninque mōnō iñōmō, Mīiōnæ tōnō mīnguipo iñōmō mōnō nō pōni cæte quēwengæimpa, ante nanguī aīnente wæmompā.

¹⁴ Botō nē waadedōmīni ēñēedāni. Mānōmai bacæimpa, ante nē aīnente wæmīni inte mīnitō iñōmō edæ, Mōnō mānīñedē wentamō entawēnāmai ĩmō adinque Wængonguī piīnāmai incæcæimpa, ante nanguī cædinque edæ nāmā wææ aadedāni. Ayæ tōmengā, Botō ayōmo waēmō ewocamīni ĩninque edæ mōnō godongāmæ piyænē cæte quēwengæimpa, ante pōnō cæcæcæimpa, ante edæ nanguī cæedāni. ¹⁵ Mōnō quēwenguinque ante mōnō Awēnē edæ ee ongonte pōnāmai ingampa, ante pōnēedāni. Wængonguī pōnō cæcā ate ocai nē encacā bate pōnēninque mōnō tōnīñacā Pabodo mōnō nē waadecā inte adobainō ante mīnitō ĩmīnite edæ, Acæmīnimpa, ante yewæmongantapa. ¹⁶ Wængonguī mōnō quēwenguinque ante ee pōnāmai ingampa, ante cadota ante yewæmōninque Pabodo adobainō ante edæ cōwē yewæmongampa. Tōmengā nānō yewæmōninta pancataa wīi edonque ĩ adinque nē ēñēnāmai ĩnāni tōnō aquī piñænāmai ĩnāni iñōmō edæ oda cædinque wapiticæ odōmōnānīpa. Tōmēnāni edæ Wængonguī angā ēñente nāni yewæmongainta tōmantaa adobai adinque tōmēnāni nāni æmæwo ewenguinque edæ wapiticæ odōmōnānīpa.

¹⁷ Botō nē waademīni ēñēedāni. Mānōmai impa, ante do ēñēmīni iñōmīnite Wængonguī nānō wææ angainō ante ēñēnāmai cædāni ĩnāni guiquēnē mīnitō ĩmīnite tōō æmæante wapiticæ ænte gocæ cædāni ate wædinque mīnitō wæætē tōmēnāni mīñæ godāmai ĩedāni. Wæætē edæ Tæiyæ Awēnē nempo quēwēmīni inte, Tæi gowæænāmai incæboimpa, ante nāmā wææ aadedāni. ¹⁸ Mōnō Tæiyæ Awēnē Itota Codito ængā beyænque mōnō quēwēmompā. Īninque tōmengā waadete pōnō cæcā ate mīnitō tōmengā ingante ate bai pōnēninque wadāni ĩnānite godōmenque waadete godō cæmīni baedāni. Tōmengā iñōmō edæ ñōwopāmo iñonte wapāmo mūmāmo iñonte edæ cōwē tæi emongā ĩnongā inte ñāō apāite bai emongampa, ante adinque mōnō ñimpo cædāmai inte tōmengā ingante cōwē waa acæimpa. Mānōmai baquinō anguēnē, ante botō, Amēē, āmopa.

1 Wäo

cadota ante nänö tänota yewæmongainta

Mini quëwenguinö ante në pönongä

¹ Æcänö wëëñëdë Wængongui nänö badongaiñedë do ingacäimpa, ante mäninö ante apænemönipa. Wængongui nänö Angainö ante në ëmongaingä iñömö Itota adocä, Mini quëwenguinö ante në pönongä ingacäimpa. Mönitö iñömö mäningä apænecä ëñëninge tömengä ingante awinca inte në adimöni imönipa. Adocä ingante cöwä adinque mönitö tömengä ingante në gam-podimöni imönipa. Æninqe möni në ëñëningä ingante ante, awinca inte möni në adingä ingante ante, möni në cöwä adingä ingante ante, möni në gam-podingä ingantedö ante apænemönipa. ² Edæ Itota në quëwengaingä iñömö edonque pönä a ongongacäimpa. Mönitö tömengä ingante në adimöni imönipa. Mäningä ingante ante, Näwangä quëwengaingä ingampa, ante apænemöni imönipa. Ayæ mönö Mæmpo Wængongui tönö guëa cöwë quëwengaingä iñömö tömengä mönö weca ponte a ongongä atamönipa. Æninqe münitö iminite mäningä ingante ante apænemöni ëñencæminipa. ³ Ayæ mönö Mæmpo Wængongui tönö tömengä Wengä onguinængä Itota Codito tönö mönitö godongämæ cæmönä imönipa. Æninqe, Minitö adobai mönitö tönö godongämæ cæcæminipa, ante cædinque mönitö möni në adingä ingante ante, möni në ëñëningä ingante ante münitö iminite apænemöni ëñencæminipa. ⁴ Mönö eyepæ watapæ toquinque ante mäninö ante münitö iminite yewæmömönipa.

Wængongui ñäo apäite bai inongä ingampa

⁵ Tömengä nänö angainö möni ëñëninö æbänö i, ante mönitö iimäi ante münitö iminite apænemöni ëñencæminipa. Wængongui ñäo apäite bai inongä ingampa. Æninqe tömengä wentamö nänö entawëno edæ dæ ampa. ⁶ Wentamö iñömö në cægömö Æninqe mönö, Tömengä tönö godongämæ cæmönä, ante ämö Æninqe mönö edæ në babæ ämö imaimompa töö. Ayæ mänömai cæmö Æninqe mönö, Quinö nöingä impa, ante cædämai imaimompa. ⁷ Wængongui ñäo apäiyömö mäninömö ongongä bai mönö adobai ñäo iñömö cægömö Æninqe mönö wacä ingä wacä ingä godongämæ cæbaimompa. Ayæ ñäo iñömö cægömö Æninqe mönö wënæ wënæ cægainö tömäa adinque tömengä Wengä Itota nämä wepæ inte mönö imonte mënongacä ate mënongate imaimompa.

⁸ Mönö, Botö wënæ wënæ cæpämö dæ ampa, ante ämö Æninqe mönö nämä incæ oda cæte wapiticæ go bai cæbaimompa. Ayæ mänömai Æninqe mönö, Quinö nöingä i, ante ëwocadämai quëwëmailompa töö. ⁹ Wæætë edæ Wængongui mönö imonte cöwë pönëninge në ædæmö cæcä inongä ingampa. Ayæ në nö cæcä iñongante mönö tömengä ingante, Botö nämä wënæ wënæ cædimö inte awædo, ante ämö ëñëninge tömengä wæætë piinamai inte mönö imonte pönö ñimpo cæcä quëwencæmöimpa. Ayæ wiwa mönö cæte quëwëno tömäa adinque tömengä wæætë mönö imonte mënongacäimpa. ¹⁰ Mönö, Botö cöwë wënæ wënæ cædämai ingaimö imopa, ante ämö Æninqe Wængongui ingantedö ante, Babæ änongå ingänö, ante ämailompa. Ayæ mänömai ämö Æninqe tömengä nänö angainö ëwocadämai quëwëmailompa töö.

2

Mönö Codito wææ angä beyænque mönö quëwenguinque

¹ Botö wëñæmîni bai îmini ëñëedâni. Mînitö wënæ wënæ cædâmai incæmînimpa, ante îimai ante cædinque yewæmômopa. Incæte adocanque wënæ wënæ cæcantawo. Tömengä beyæ wacä, Mæmpo Wængongui pânâmai incæcäimpa, ante mönö nê wææ änogä incæ mæ ongongampa. Mänîngä îñômö nê Nö Cæcä ïnogä inte Itota Codito ïnogä ingampa. ² Ayæ idægoidi, Mönö wënæ wënæ cægainö ante mönö îmö Wængongui pîñâmai incæcäimpa, ante cædinque cæningä wænönâni nânö wængai bai mäninganque adobai mönö wënæ wënæ cægai beyæ wængacäimpa. Ayæ wîi önonque mönö wënæ wënæ cægainonque beyænque wæætê tömämæ quëwënâni nâni wënæ wënæ cægai beyæ adobai wængacäimpa.

³ Mönö Wængongui ingaingä ingante ate bai pönëmöö, ante æbänö cæte ëñenguii. Edæ, Îimai cæedâni, ante Wængongui nânö wææ angainö ante ëñente cæmö ïninque mönö edæ, Wængongui ingante ate bai nê pönëmö ïmopa, ante do ædæmö ëñëmaimopa. ⁴ Waocä îñômö, Wængongui ingaingä ingante ate bai pönëmö ïmopa, ante nê angä incæte tömengä Wængongui nânö, Îimai cæedâni, ante wææ nânö angainö ante ëñënâmai cæcä ïninque mäningä nê babæ änogä ingampa. Ayæ Wængongui nöingä nânö angainö ante ëwocadâmai quëwengampa töö. ⁵ Wæætê, Wængongui nânö angainö ante æcänö ëñente cæda îñômö mäningä ingante Wængongui pönö cæcä beyænque tömengä Wængongui waadete nânö pönënö ante eyepæ entawente quëwengampa. ïninque Wængongui nânö angainö ante ëñente cæmö inte mönö, Tömengä nempo quëwëmö ïmopa, ante ædæmö ëñëmopa. ⁶ ïninque æcämenque, Botö tömengä nempo nê quëwëmö ïmopa, ante nê angä îñômö tömengä Itota nânö quëwente cægöni bai adobai quëwente cægonguenê ingampa.

Itota, Îimai cæedâni, ante ñowo nânö wææ äno

⁷ Botö nê waademîni ëñëedâni. Mînitö îmînite, Îimai cæedâni, ante wîi botö tömëmö wææ äno ante ñowo yewæmômopa. Wæætê Itota do nânö wææ angainö ante wëenëñedê mîni ëñente ængainö ante adodö ante yewæmômö aedâni. Îi tömengä do nânö wææ angainö îñômö mînitö îmînite möni apænedö mîni ëñëñinö impa. ⁸ Incæte mînitö îmînite Itota, Îimai cæedâni, ante ñowo nânö wææ äno yewæmômopa. Tömengä tönö mînitö quëwente cædinö beyænque, Mänînö nö pönî impa, ante edonque pönî acäimpa. Edæ mönö wëmö îñômö wodëmaa tæcæ bacæ cæyö nö ñäö îñômö tatodonte do apäite impa.

⁹ Botö ñäö îñômö quëwëmö ïmopa, ante nê angä incæte tömengä nânö tönîñacä ingante nê pîngä ingä ïninque tömengä wëmö îñômö ayæ quëwengampa. ¹⁰ Æcänö guiquënê nânö tönîñacä ingante nê waadete pönengä tömengä ñäö îñômö nê quëwengä ingampa. Tömengä ñäö îñômö quëwëninque quiëmê beyænque edæ tëwate goquingä. Edæ dæ ampa. ¹¹ Wæætê æcänö nânö tönîñacä ingante nê pîngä wëmö îñômö quëwengampa. Tömengä wëmö îñômö cægongä inte compocæ compocæ gocä ingampa. Wëmö îñômö quëwëninque babetamongä bagaingä inte tömengä ædönö gocä, ante ëñënâmai ingampa.

¹² Wëñæmîni ëñëedâni. Edæ Itota Codito ëmöwo beyænque mîni wënæ wënæ cægainö ante ñimpo cæte quëwëmîni îmînipa, ante adinque botö mînitö îmînite yewæmômopa. ¹³ Mæmpomîni ëñëedâni. Mînitö edæ, Wëenëñedê nê

ingaingä ingante do ate bai pönengaimini imini beyænque botö minitö iminite yewæmömopa. Onguiñæmini tæcæ pæmini eñëedäni. Minitö edæ godömenque tæi emömini imini inte wënæ awenë ingante Baa ante gänä cæmini beyænque botö minitö iminite yewæmömopa. Weñæmini eñëedäni. Minitö edæ mönö Mæmpo Wængongui ingante do ate bai pönengaimini imini beyænque botö minitö iminite yewæmömopa.

14 Mæmpomini eñëedäni. Minitö edæ wëenëñedë nê ingaingä ingante do ate bai pönengaimini imini beyænque botö minitö iminite yewæmömopa. Onguiñæmini tæcæ pæmini eñëedäni. Minitö edæ tæi emömini inte ayæ Wængongui nänö angainö cöwë ewocate quëwëmini iminipa. Adobai minitö edæ wënæ ingante godömenque tæi emömini inte Baa ante gänä cæminipa. Mänömai beyæ botö minitö iminite yewæmömopa.

15 Inguipogaque ante nani quëwëmämo ante waadete pönënamai iedäni. Inguipoga quëwënäni quiemë wënæ nani cæpamo ante tömämämo ante adobai waadete pönënamai iedäni. Ayæ æcänö i inguipogaque ante nani quëwëmämo ante waadete pönente ina mäningä mönö Mæmpo Wængongui nänö waadete pönëno ewocadämai quëwengä ingampa. 16 I inguipoga iñömö æbänö i, ante acæimpa. Edæ wënæ wënæ cädäni quiemë beyæ nani æinente wædö i, awinca inte adinque nani æinente wædö i, ante wii mönö Mæmpo Wængongui pönö cæcä ate æinënäni. Tömënäni, Mäincoo nangui eamöni imöni aedäni, ante cädänipa. Ayæ, Nangui cæmöni aedäni, ante cädänipa. Incæte tömää mänii nani æinënö wii mönö Mæmpo Wængongui pönö cæcä ate æinente badänipa. Wæætë inguipoga iñömö nê mä cädäni inte quiemë wënæ wënæ nani cæpamo ante adinque wadäni dobæ wënæ wënæ cæinënäni badänipa. 17 Inguipoga mönö quëwëñömö incæ mäninguipogaque ante quëwënäni nani cæinënö incæ oo pöni dæ baquino angüenë. Wæætë waocä, Wængongui nänö angainö ante nê eñente cæcä inte wantæpiyæ wænämäi quëwencæcäimpa.

Quinö nöingä ante impa, quinö babæ ante impa

18 Weñæmini eñëedäni. Inque baquionæ mönö äönæ oo batimpa. Mänionæ iñonte Codito ingante wacä nê piinte cæcä iñömö, Botö Codito imopa, ante nê ænewëngä ponguingä, ante eñëmïnitapa. Edæ mäninö mimi eñëinö bai ñöwoönæ incæ nangui inäni Codito ingante nê piinte cädäni iñömö, Botö Codito imopa, ante nê ænewënonäni inte edæ do pönänitapa. Mänömai i inique edæ, Inque baquionæ do bapa, ante mönö eñengæimpa. 19 Mäninäni iñömö mönö imonte emö cæte godänitapa. Incæte tömënäni wii nê mönö pönencabo adocabo inämai inänitapa. Edæ mönö pönencabo adocabodäni inänäni inte bai tömënäni edæ wadæ godämai inte mönö tönö ayæ a ongoncædönänimpa. Wæætë do godäni adinque mönö, Mäninäni tömänäni mönö cabo inämai inänitapa, ante edonque pöni acæimpa.

20 Edæ ogui wapæ gadoncadäni encadäni bai mönö Tæiyæ Waemö inongä iñömö edæ tömengä Önöwoca ingante mïnitonga angä pö guicä ate minitö tömämïni tömengä ingante entawëninque, Quinö nö i, ante eñëmïnipa. 21 Minitö iminite yewæmöninque botö dicæ, Minitö, Quinö nö i, ante eñënamai iminipa, ante yewæmömogaa. Wæætë edæ, Minitö, Quinö nö i, ante eñëmïnipa, ante adinque botö mänömai beyæ ante yewæmömopa. Ayæ babæ nani äninö tönö Wængongui nöingä nänö angainö tönö ædö cæte guëa inguinaa, ante eñëmïni adinque botö mänömai beyæ ante yewæmömopa. 22 Babæ ante nê ænewëngä æcänö ingantawo. Edæ Itota incæ wii mönö Codito ingaingä ingampa, ante nê angä iñömö tömengä nê babæ ænewëngä ingampa. Mäningä wæætë, Botö Codito inömo imopa, ante Codito ingante nê piinte cæcä

ingampa. Tömengä edæ mönō Mæmpo Wængonguī tōnō tömengä Wengä Itota Codito nāna Mæmpocaya Inate Baa angampa. ²³ Ii Wengä onguīñgä ingante Baa äninque, Itota incæ wīi mönō Codito ingaingä ingampa, ante nē äñāni iñōmō ædō cæte Mæmpo Wængonguī nempo quëwëñōnāni inguināni. Wæætē tömengä Wengä ingante æcänō Ao äninque, Itota mönō Codito ingaingä ingampa, ante nē angä guiquënë tömengä Mæmpo Wængonguī nempo nē quëwëñōngä ingampa.

²⁴ Minitō guiquënë, Quinō angainō, ante wëñëñedē mīni ëñgäinō ante ñōwo godōmenque mīnitō mīmōnē entawente quëwëedāni. Mäninō ante godōmenque entawëmīni inte mīnitō Itota Codito tömengä Mæmpo Wængonguī nāna Mæmpocaya tömëna nempo cōwë quëwënguīmīni imīnīpa. ²⁵ Mönō imonte Wængonguī, Cōwë cæcæboimpa, ante cædinque Iīmaī angacäimpa. Mīnitō wantæpiyæ cōwë wænāmaī quëwëncæmīnīpa.

²⁶ Wadāni, Mīnitō incæ oda cæcæmīnīpa, ante nē cædāni iññānīte botō mīnitō imīnite mäninō ante yewæmōmopa. ²⁷ Codito tömengä Önōwoca ingante do pōnongä ewocamīnīpa. Tömengä ingante cōwë ewocamīni iññōmīnite wacä ædō cæte mīnitō imīnite odōmonte apænequingäa. Tömengä Önōwoca incæ tömānō ante odōmonte apænecä ëñencæmīnīpa. Ayæ tömengä nānō odōmonte apænedō iññōmō nō pōnī i inique edæ wīi babæ äñinō impa. Inique mīnitō tömengä mänōmaī nānō odōmonte apænedinō bai cædinque godōmenque mönō Itota Codito nempo quëwëedāni.

²⁸ Mänōmaī beyæ botō wëñæmīni bai imīni ëñëedāni. Tömengä nempo godōmenque quëwëedāni. Edæ, Tömengä pongä mönō aquiñōnæ mönō guīñëñāmaī ingæimpa, ante cædinque ayæ, Tömengä ponguñōnæ mönō tömengä weca ongōnīnque guingo imōñāmaī ingæimpa, ante cædinque godōmenque tömengä nempo quëwëedāni. ²⁹ Edæ mīnitō, Itota Codito nō nānō cæte ingainō ante ëñëmīni inique edæ mīnitō Iīmaī ante adobaī do ëñëmaimīnīpa. Quinō waa impa, ante nē cædōnāni tömānāni mempoga ëñagāināni inte Wængonguī wëñāni Inānīpa.

3

Wængonguī wëñāni

¹ Mönō Mæmpo Wængonguī incæ æbānō mönō imonte nanguī pōnī nē waadete pōñëñōngä inte cægacäimpa, ante apænebo ëñëedāni. Edæ mönō imonte, Botō wëmīni imīni ämopa, ante angacäimpa. Inique nāwangä mänimōnō imopa. Inguipogaque quëwëñāni iññōmō, Mönō Mæmpo Wængonguī ingante wīi ädinque pōñëñāmaī Inānitapa. Mänōmaī beyæ mönō imonte adobaī adāmaī Ināni inte bai pōñëñāmaī Inānīpa. ² Botō nē waademīni ëñëedāni. Ñōwoyedē Wængonguī wëmō inōmō inte mönō ayæ ate æbānō baquīmōō, ante ayæ wīi edonque amompa. Wæætē, tömengä nānō pōñnæ mönō aquiñōnæ tömengä nānō ingai bai mönō adobaī bacæimpa, ante ædæmō ëñëmompa. Edæ tömengä æbānō ingaingä ingäa, ante mönō edonque acæimpa. ³ Edæ, Tömengä beyænque mänōmaī bacæimpa, ante nē pōñente todāni tömānāni, Itota Codito tæiyæ waëmō nānō ingai bai mönō adobaī tæiyæ waëmō bacæimpa, ante nāmā incæ cædānīpa.

⁴ Nē wëñæ wëñæ cædāni tömānāni Wængonguī nānō, Iīmaī cæedāni, ante nāni yewæmongainō ante Baa ante nē ëñëñāmaī cædāni Inānīpa. Edæ wëñæ wëñæ nāni cægāinō incæ Wængonguinque ingante Baa ante nāni angainō

impa. Mānīnō ante nō ante impa. ⁵ Minitō do ēñēmīnīpa. Tōmengā edæ mōnō wēnæ wēnæ cægāinō ante mōnō īmonte, Ñīmpo cæbo quēwenguīmīni, ante cæcæte ante cædinque ēñagacāimpa. Ayæ tōmengā wēnæ wēnæ cædō entawēnāmaingā ingampa. ⁶ Ayæ edæ tōmengā nempo nē quēwēnōnāni tōmānāni wīi godōmenque wēnæ wēnæ cædāni īnānīpa. Godōmenque nē wēnæ wēnæ cædōnāni guīquēnē tōmengā ingante adāmaī īnōnāni inte pōnēnāmaī īnīnāni īnānīpa tōō. ⁷ Wēñæmīni ēñēedāni. Wacā mīnitō īmīnite, Wapiticæ gote oda cæquīmīni, ante nē māocæ cæcā ingante gomō aedāni. Wæætē, Quīnō waa impa, ante nē cæcā guīquēnē tōmengā Itota Codito nō nānō cæte ingāī baī adobaī nō cædongā īnongampa. ⁸ Nē wēnæ wēnæ cæcā guīquēnē wēnæ pæingā baī inte adocā nempo quēwengampa. Edæ wēñēñedē wēnæ awēnē nānō wēnæ wēnæ cægāī baī cōwē wēnæ wēnæ cæcampa. Mānōmaī beyæ Wængonguī Wengā īñōmō wēnæ awēnē nānō wēnæ wēnæ cægāinō ante wo ēwencæte ante inguipoga ponte ēñagacāimpa.

⁹ Wængonguī wēnāni tōmānāni wīi godōmenque wēnæ wēnæ cæquīnāni īnānīpa. Edæ tōmēmō guīdīmō baī mīnte baī cædinque Wængonguī nānō quēwēnō ante da pōnongā ænīnque tōmēnāni cōwē entawente quēwēnānīpa. Tōmēnāni edæ Wængonguī wēnāni inte ædō cæte godōmenque wēwēnæ wēnæ cæquīnānīi. ¹⁰ Æcānō, Quīnō waa impa, ante nō cædāmaī īnaa tōmengā wīi Wængonguī wengā ingampa. Ayæ æcānō tōmengā nānō tōñīñacā ingante nē waadete pōnēnāmaī īnaa tōmengā adobaī wīi Wængonguī wengā ingampa. Wængonguī wēnāni ædānidō īnānīi, ante ayæ, Wēnæ wēnāni ædānidō īnānīi, ante mōnō mānōmaī beyænque edonque pōñī ēñēmōmpa.

Wacā ingā wacā ingā mōnō waadete pōnengæimpa, ante

¹¹ Minitō mā mīni pōnēñedē mīni ēñengāinō īmaī ante impa. Wacā ingā wacā ingā mōnō waadete pōnengæimpa. ¹² Minitō Cāinō wodi baī wīi īedāni. Māningā edæ wēnæ nānō pæingā baī ingaingā inte tōmengā nānō tōñīñacā ingante nāēmæ wæñongā wængacāimpa. Ayæ quīnante tōmengā ingante wæñongacāī. Edæ tōmengā nāmā nānō cæinō wēnæ wēnæ cæīnonque īñonte, Tōmengā tōñīñacā nānō cæinō wæætē nō cæīnonque ī, ante adīnque mānōmaī beyænque Cāinō wodi tōmengā nānō tōñīñacā ingante wæñongacāimpa.

¹³ Botō tōñīñamīni ēñēedāni. Inguipogaque quēwēnāni mīnitō īmīnite ancaā pīnāni adīnque mīnitō wæætē, Quīnante pīnāni, ante wædāmaī īedāni. ¹⁴ Mōnō tōñīñadāni īnānīte nē waadete pōñēmō beyænque, Mōnō nē wænguēñēmō inte mōnō wæætē mīi quēwēmō īmōmpa, ante edonque ēñēmōmpa. Nē waadete pōnēnāmaī ingā guīquēnē tōmengā īñōmō mōnō wænguēñēmāmo cōwē ēmō cædāmaī ingampa tōō. ¹⁵ Æcānō tōmengā tōñīñacā ingante pīina tōmengā īñōmō nē wæñongā baī ingampa tōō. Ayæ, Nē wæñongā īnongā inte tōmengā nānō wantæpiyæ wæñāmaī quēwenguīmāmo ante ædō cæte entawente quēwenguingāā, ante do ēñēmīnīpa. ¹⁶ Nāwangā waadete pōñēnīnque æbānō cæquīi, ante mōnō īmaī ante ēñengæimpa. Edæ, Itota Codito nāmā incæ mōnō beyænque wængacāimpa, ante adīnque mōnō, Mānōmaī waadete pōnente cæquī impa, ante ēñēmōmpa. Īnīnque mōnō adobaī mōnō tōñīñadāni beyænque ante mōnō nāmā incæ Ao ānīnque wænguēñēmō īmōmpa. ¹⁷ Māincoo nē ēacā īñōmō tōmengā tōñīñacā nānō quēwenguīnō ante wīi eyepæ ēacā acā incæte tōmengā ingante waadete cædāmaī ingantawo. Edæ nē ēacā incæ ædō cæte Wængonguī nānō waadete pōñēmō entawengā ingantawogaa. ¹⁸ Wēñæmīni ēñēedāni. Mōnō, Waodāni īnānīte botō waadete pōñēmō īmōpa, ante tedemō incæte wīi mānīnō ōnōne mōnō tededō beyæ

mönö nöingä cæte waadete pönëmö ïmompä. Wæætë edæ waodäni beyæ godö cædinque mönö nöingä waadete pönengæïmpä.

Wængonguï weca ongonte mönö guïñenāmaï ingæïmpä

¹⁹ Mänömaï cæmompä, ante adinque mönö, Wængonguï nöingä nänö angainö bai quëwëmö ïmompä, ante do ëñëmompä. Ayæ adobai, Tömengä weca mönö a ongöñedë nämä guïñenāmaï incæmöïmpä, ante ëñëmompä. ²⁰ Botö pante wæquinque wënæ wënæ cæbopä, ante mïmönë nämä apænte ämö incæte ïmaï ante adobai ëñëmompä. Wængonguï edæ wïi mönö mïmönë ëñënö bai ïngä inte tömengä godömenque në ëñëngä ingampä. Ayæ tömengä tömää ëñengaingä ingampä.

²¹ Botö në waademïni ëñëedäni. Botö pante wæquinque wënæ wënæ cæbopä, ante mïmönë nämä apænte änämaï ïmö ïninque mönö Wængonguï weca ongöñinque guïñenāmaï ïmaïmompä. ²² Ayæ tömengä, ïmaï cæedäni, ante nänö wææ angainö ante ëñente cæmö ïninque ayæ, Cæmö adinque tömengä tocæcäïmpä, ante cæmö ïninque tömengä ingante quïëmë beyæ ante ämö tömengä wæætë pönö cæcä æmaïmompä. ²³ Tömengä nänö wææ angainö ïmaï impä. Botö Wengä Itota Codito ëmöwo ante pönëedäni. Ayæ tömengä mönö ïmonte, Botö wææ angainö bai wacä ingä wacä ingä waadete pönëedäni. ²⁴ Mänömaïnö ante Wængonguï nänö wææ angainö ante në ëñente cædäni ïñömö tömënäni tömengä nempo quëwënönäni ïnäni. Ayæ adobai tömënäni tömengä ingante entawënäni. Wængonguï tömengä Önöwocä ingante pönongä ænimö inte mönö mäningä tömengä nänö pönongaïwocä beyæ, Wængonguï ingante entawëmö ïmompä, ante do ëñëmompä.

4

Æcänö önöwocä ingante ëwocadäni, ante

¹ Botö në waademïni ëñëedäni. Wädäni, Wængonguï Önöwocä incæ mönitonga pö guicä ïninque ëwocamöni ïmönipa, ante në änäni incæte mïnitö wïi tömënäni näni änö pönëedäni. Wæætë, Tömënäni önöwocä Wængonguï weca owodinque pöwocacantawo, ante ëñencæte ante apænte aedäni. Edæ Wængonguï beyænque në apænemönipa, ante në babæ änewënönäni nangui ïnäni ïmæca quëwënäni weca godänipa. ² Mïnitö edæ, Mäniwocä näwangä Wængonguï Önöwocä ingantawoo, ante ëñencæte ante ïmaï ante edonque pönï ëñencæmïnimpä. Edæ, Itota Codito Waocä ëñate pongaingä ingacäïmpä, ante änäni adinque mïnitö, Tömënäni tömänäni Wængonguï weca në pöwocacä ingante në ëwocadäni ïnäni, ante ëñencæmïnimpä. ³ Wæætë Itota ingantedö ante adodö ante në änämaï ïnäni guiquënë tömënäni tömänäni edæ Wængonguï weca pöwocacä ingante ëwocadämaï ïnäni. Tömënäni näni në ëwocadongä ïñömö tömengä, Itota Codito Waocä ëñate pongaingä ingacäïmpä, ante änämaï ingampä. Mäningä ïñömö Codito ingante në piinte cædongä ïñömö tömengä poncæcäïmpä, ante mïni në ëñëningä ingampä. Nöwoönæ incæ tömengä do inguipoga mönö quëwëñömö ïñömö pongä ataquëedäni.

⁴ Wëñæmïni ëñëedäni. Wädäni, Codito ingante në piinte cædönäni ïñönäni mïnitö Wængonguï quïmïni ïmäni inte godömenque tæï ëmömïni ïmïni. Edæ Wængonguï Önöwocä mïni në ëwocadongä ïñömö tömengä godömenque nangui tæï ëmongä ïñongante wënæ inguipogaque quëwënäni näni në ëwocadongä guiquënë wædænque tæï ëmongä ingampä. ïninque mïnitö mäniñäni në babæ änewënönäni ïnäni Baa ante cædinque godömenque tæï ëmömïni inte

gänä cædimīni imīnīpa. ⁵ Mānīnāni ingui-poga beyænque quēwēnāni inte mānōmaī beyæ ingui-poga quēwēnāni nāni pōnente ānō bai tededāni iñōnānīte ingui-pogaque ante quēwēnāni adodāni inte tōmēnāni inānīte ēñēnānīpa tōō. ⁶ Mōnitō Wængongui quimōni imōni iñōmōnīte, Wængongui ingante nē ate pōnengā iñōmō tōmengā mōnitō imōnīte ēñengampa. Wæætē Wængongui wengā ināmaī inongā guiquēnē tōmengā mōnō imonte ēñēnāmaī ingampa. Mānōmaī i inīnque edæ waocā adocanque ōnōwoca nōingā angā ingante ēwocadongā incæ wacā ōnōwoca babæ angā ingante ēwocadongā incæ mōnō mānīnō beyænque, Æwocadō iī, ante edonque pōnī ēñēmōmpa.

Wængongui waadete pōnengaingā inte

⁷ Botō nē waademīni ēñēdāni. Mōnō wacā ingā wacā ingā waadete pōnengæimpa. Edæ mōnō waadete pōnēnō incæ Wængongui nānō da pōnongainō impa. Tōmānāni, Nē waadete pōnēnāni iñōmō Wængongui wēñēnāni nāni mempo ēñagaincabo inōnāni inte Wængongui ingaingā ingante ate bai pōnēnānīpa. ⁸ Wæætē nē waadete pōnēnāmaī ināni guiquēnē tōmēnāni Wængongui ingante wīi ate bai pōnēnāni inānīpa. Edæ Wængongui nē waadete pōnengaingā ingampa. ⁹ Mōnō imonte Wængongui nānō waadete pōnēmāmo iīmaī cæte odōmongacāimpa. Tōmengā edæ, Botō Wengā beyænque quēwēncæmīnīmpa, ante cædinque tōmengā Wengā adocanque ingante ingui-poga mōnō quēwēñōmō da pōnongā pongacāimpa. ¹⁰ Æbānō waadete pōnenguīi, ante iīmaī impa. Mōnō wīi Wængongui ingante waadete pōnēnīmō imōmpa. Wæætē tōmengā mōnō imonte waadete pōnengā ingaingā ingampa. Ayæ, Mōnō wēnæ wēnæ cægāinō ante mōnō imonte Wængongui pīnāmaī incæcāimpa, ante idægoidi cæningā ingante wænōnāni nānō wængāi bai Wængongui adobāi mōnō wēnæ wēnæ cægāinō beyænque tōmengā Wengā ingante da pōnongā pōnīnque mōnō beyæ wæætē wængacāimpa.

¹¹ Botō nē waademīni ēñēdāni. Wængongui edæ mōnō imonte mānōmaī nē waadete pōnengaingā ingampa, ante adīnque mōnō adobāi wacā ingā wacā ingā waadete pōnenguēnēmō imōmpa. ¹² Mōnō waocabo tōmāmō Wængongui ingante cōwē adāmaī imōmpa. Incæte mōnō wacā ingā wacā ingā waadete pōnēmō inīnque Wængongui ingante entawente quēwēmāimōmpa. Ayæ adobāi wacā ingā wacā ingā waadete pōnēmō inīnque tōmengā pōnō cæcā beyænque mōnō tōmengā nānō waadete pōnēnō ante eyepæ entawente quēwēmōmpa. ¹³ Mōnō tōmengā nempo quēwēmō inte tōmengā ingante adobāi mōnō entawente quēwēmōmpa. Wængongui tōmengā Ōnōwoca ingante mōnō imonte pōnongā ængamōimpa. Mānōmaī beyæ mōnō mānīnō ante do ēñēmōmpa. ¹⁴ Mæmpo Wængongui tōmengā Wengā ingante ānīnque, Ingui-poga quēwēnāni tōmānāni inānīte bitō æmi beyænque quēwenguīnāni, ante cæcæbiimpa, ante da pōnongā pongantapa. Pongā adīnque mōnitō nē adīmōni inte wadāni inānīte mānīnō ante apænēmōni ēñencædānīmpa. ¹⁵ Æcānō, Itota Codito Wængongui Wengā ingaingā ingampa, ante āna iñōmō tōmengā Wængongui ingante entawente quēwengampa. Tōmengā adobāi Wængongui nempo quēwengā ingampa.

¹⁶ Ayæ mānīi beyæ Wængongui mōnō imonte waadete pōnengampa, ante mōnō nē ēñēnōmō inte edæ ædæmō pōnēmō imōmpa. Wængongui iñōmō nē waadete pōnengaingā ingampa. Tōmānāni nē waadete pōnente quēwēnāni iñōmō tōmēnāni Wængongui nempo quēwēnānīpa. Wængongui ingante adobāi tōmēnāni entawente quēwēnānīpa. ¹⁷ Wængongui nānō waadete pōnēnō ante ædæmō entawēmō inīnque mōnō godongāmæ waadete pōnēmō beyæ

tömengä apænte anguiönæ iñonte guifñenāmai inguimō imompa. Edæ Mæmpo Wængongui nempo Itota nānō quēwengai bai mōnō imæca quēwēninque adobai quēwēmō inte māniñedē guifñenāmai inguimō imompa. ¹⁸ Nē waadete pōnengā iñomō tömengä guifñenāmai ingampa. Wæætē edæ tömengä nānō waadete pōnēnō æmæwo pæte bai eyepæ ba ïinque tömengä nē waadete pōnengā ïnongä inte ædō cæte guifñengūgā. Nē guifñengä guiquēnē tömengä nānō pante wæwengūnō incæ do pante bai wæwengä ingampa. Tömengä nānō waadete pōnēnō ante wii eyepæ ba ïinque tömengä æmæwo pædāmai bai ingampa.

¹⁹ Wængongui edæ mōnō imonte tāno waadete pōnengacäimpa. Mānōmai beyæ mōnō wæætē waadete pōnēmō imompa. ²⁰ Botō Wængongui ingante nē waadete pōnēmō imopa, ante nē angä iñomō tömengä wæætē tömengä tōniñacä ingante nē piinte ingä ïinque tömengä babæ anewēnongä ingampa. Edæ māningä nānō tōniñacä ingante nē adingä incæ tömengä ingante waadete pōnēnāmai ingä incæte adocä Wængongui ingante nē adāmai ïingä incæ ædō cæte tömengä ingante waadete pōnengūgā. ²¹ Ayæ, ïimai cæedāni, ante Itota Codito mōnō imonte ïimai angacäimpa. Tōmāmini Wængongui ingante nē waadete pōnēmīni inte mīnitō tōniñadāni ïnānite adobai waadete pōnengūēmīni ïmīnīpa.

5

Inguipogaque nāni quēwēnō ante mōnō Baa angcäimpa

¹ Tōmānāni Itota ingantedō ante, Mōnō Codito ingaingä ingampa, ante nē pōnēnāni inte Wængongui wēnāni nāni mempoga eñagaincabo ïnānīpa. Ayæ tōmānāni Mæmpocä ingante nē waadete pōnēnāni iñomō tömēnāni adobai tömengä Wengä ingante waadete pōnēnānīpa. ² Mōnō Wængongui wēnāni ïnānite waadete pōnēmō imōō, ante eñencæte ante ïimai ante do eñēmompa. Wængongui ingante waadete pōnēmō ïinque ayæ tömengä, ïimai cæedāni, ante nānō wææ angainō ante eñente cæmō ïinque mōnō, Nē waadete pōnēmō imompa, ante eñēmāimompa. ³ Wængongui ingante mōnō waadete pōnēnō iñomō ïimai ante impa. Wængongui, ïimai cæedāni, ante nānō wææ angainō ante mōnō eñente cæcäimpa. Edæ māniñō ante, ïimai cæedāni, ante nānō wææ angainō ante eñente cædinque mōnō wii teēmē mongænte bai baquinque cæmompa. ⁴ Edæ Wængongui wēmō mempoga mōnō eñagaincabo iñomō mōnō tōmāmō inguipogaque ante nāni quēwēnō ante Baa ānīnque godōmenque tæi emonte gānā cæmompa. Inguipogaque ante nāni quēwēnō ante mōnō godōmenque tæi emōmāmo iñomō ïimai ante impa. Wængongui ingante mōnō wede pōnēnō beyænque mōnō godōmenque tæi emōmō inte gānā cæmompa. ⁵ Inguipogaque ante nāni quēwēnō ante Baa ancæte ante æcānō godōmenque tæi emongä inte gānā cæcantawoo. Edæ Itota Wængongui Wengä ingaingä ingampa, ante nē pōnenganque tömengä godōmenque tæi emōnongä ingampa.

Wængongui Wengä ingantedō ante nō ante impa

⁶ Nē æpænē guite pongaingä iñomō nāmā wepæ petæ petæ wæænte nē gogaingä iñomō māningä iñomō Itota Codito ïnongä ingacäimpa. Tömengä wii æpænenque inte pongacāi wæætē æpænē inte ayæ nāmā wepæ inte pongacäimpa. Ayæ Wængongui Ōnōwoca incæ tömenganque māniñō ante, Nō ante impa, ante nē æpæncä ingacäimpa. Edæ Wængongui Ōnōwoca nē

nöngä inongä ingampa. ⁷ Edæ mäa go adoque inäni mänimpodäni, Nö impa, ante apænete bai në änäni inänipa. ⁸ Edæ Wængongui Önöwoca incæ æpæ incæ wepæ incæ mäa go adoque mänimpodäni incæ, Nö impa, ante në apænedäni mäe öñompa. Mänimpodäni inömo quiëmë äningue adodö ante në apænedäni inänipa. ⁹ Quiëmë ante waocä incæ, Nö impa, ante nänö apænedinö ante do ëñëmompa. Quiëmë ante, Nö impa, ante Wængongui nänö apænegainö guiquënë godömenque waa pöni impa. Edæ Wængongui tömenganque nänö apænegainö impa. Edæ tömengä Wengä ingantedö ante Wængongui, Nö pöni impa, ante nänö apænegainö impa töö. ¹⁰ Æcänö Wængongui Wengä onguifnängä ingante në wede pönëna inömo tömengä, Nö impa, ante Wængongui nänö apænegainö ante entawente quëwengampa. Wæætë edæ æcänö Wængongui nänö apænegainö ante wii pönëna guiquënë tömengä Wængongui ingantedö ante, Babæ änogä ingänö, ante në angä ingampa. Edæ Wængongui tömengä Wengä ingantedö ante, Nö impa, ante nänö apænegainö ante mäningä inömo pönënamai ingampa töö. ¹¹ Ayæ mäninö ante tömengä, Nö impa, ante nänö apænegainö ante iimaï ante impa. Mönö imonte Wængongui, Mini wantæpiyæ cöwë quëwenguinö, ante pönongä æntamompa. Mäninö mönö quëwenguinö ante tömengä Wengä në quëwëngö inge mönö imonte pönongä ænimö inge entawente quëwëwompa. ¹² Tömengä Wengä nempo në quëwengä inömo tömengä wantæpiyæ nänö quëwenguinö do entawente quëwengampa. Wængongui Wengä nempo në quëwënamai ingä guiquënë tömengä wæætë wantæpiyæ nänö quëwenguinö ænamai ingampa.

Wäo inque nänö angainö

¹³ Minitö Wængongui Wengä ëmöwo ante në pönëmini inöminite botö mäninö ante yewæmömo aedäni. Minitö edæ wantæpiyæ cöwë mini quëwenguinö do entawente quëwëmini inöminite botö, Æñencæminimpa, ante yewæmömomo.

¹⁴ Iimaï beyæne Wængongui weca guifñënamai pömö imompa. Mönö quiëmë æncæte ante tömengä ingante apænedinque tömengä nänö änö bai ante apænemö ininque tömengä mönö imonte ëñëmaingampa. ¹⁵ Ayæ, Mönö imonte në ëñëngö ingampa, ante ëñëmö ininque mönö, Quiëmë ante apænemö ëñëninque tömengä mäninö mönö äninö ante do pönongä æmö imompa, ante ëñëmaimompa.

¹⁶ Minitö mini tonifnacä wënæ wënæ cæcä incæ wii tömengä nänö æmæwo wænguinque wënæ wënæ cæcä aminitawo. Mänömai cæyongante në adingä inömo mäningä beyæ ante Wængongui ingante apænecæcäimpa. Apænecä ëñëninque Wængongui tömengä ingante wantæpiyæ nänö quëwenguinö pönongä æncæcäimpa. Edæ pancadäniya wënæ wënæ nani cædincoo mongænäni incæ wii tömënäni nani æmæwo wænguinque wënæ wënæ cæcädäniya, ante botö mäninänique inänitedö ante apænebopa. Wæætë edæ waocä Wængongui Täiyæ Waëmö Önöwoca ingante ancaa Baa Baa äninque tömengä nänö æmæwo wænguinque në wënæ wënæ cæcä ingampa. Ininque botö, Mänömai Baa äninque në wënæ wënæ cædingä beyæ ante Wængongui ingante apænecæimpa, ante änämai imopa. ¹⁷ Quiëmë wiwa cæmö mäninö tömänö wënæ wënæ mönö cædö impa. Wæætë wënæ wënæ cæmö incæte wii tömänö mönö wënæ wënæ cædö beyæ mönö në wænguënëmö bamompa. Pancaa beyæneque në wænguënëmö bamompa.

¹⁸ Wængongui wënäni nani mempoga ëñagaincabo inömo godömenque wënæ wënæ cædämai inänipa, ante ëñëmompa. Edæ Wængongui Wengä ëñagaingä inge tömënäni inänite wææ cædongä ingampa. Ayæ wënæ incæ tömënäni

inänite gampodämaï inongä ingampa. ¹⁹ Wængonguï wëmö imö imompa, ante eñëmompa. Wæætë wadäni edæ inguipogaque ante nê quëwënäni guiquënë tömënäni tömänäni wënæ awënë nempo quëwënänipa, ante eñëmompa. ²⁰ Wængonguï Wengä do pongä ingacäimpa. Ayæ Wængonguï nê nöingä ingaingä ingante ate bai pönencæminimpa, ante cædinque tömengä mönö imö pönö odömongä ate eñëmompa. Tömengä mänömaï cæcampa, ante adobai eñëmompa. Ayæ tömengä nê nöingä ingaingä iñongante mönö tömengä Wengä Itota Codito nempo quëwëmompa. Itota Codito nö Wængonguï ingaingä ingampa. Ayæ tömengä wantæpiyæ cöwë nê quëwengä ingaingä inte pönö cæcä beyænque mönö adobai wantæpiyæ quëwëmö imompa. ²¹ Botö wëñæmïni bai imïni eñëedäni. Wadäni, Mönitö wængonguïdi impa, ante näni cönönincoo weca godämaï iedäni, ämopa. Mäninque ante yewæmömopa.

2 Wäo

cadota ante nänö ayænta yewæmongainta

Nöinö mönō äno ante ayæ mönō waadete pönēnō ante

¹ Minitō Wængonguī ingante mīni pönencabo iñōmīnite botō nē aabo Picæmo mīni äno mo inte yewæmōmopa. Minitō badā nāni wencabo bai iñōmīnte tōmengā mīnitō iñōmīnte ængacāimpa. Botō mīnitō iñōmīnte nō waadete pönēmopa. Wīi botonque waadete pönēmīni inte wæætē mönō Codito nöingā nänō waa pōni angainō ante nē ēñēnīnāni adobaī tōmēnāni tōmānāni nāni nē waadete pönēmīni iñōmīnte yewæmōmo aedāni. ² Edæ mönō nē Nöingā nänō waa pōni angainō ante entwante quēwēmō inte mönō cōwē ñimpo cædāmaī entwæncæmōimpa. ³ Nē Mæmpocā Wengā Itota Codito tōnō Mæmpo Wængonguī tōmēna godongāmæ waadete pōnō cædinque, Quēwæncæmīnimpā, ante mönō imonte waadete waa cæda beyænque mönō gānē entwæncæmōimpa. Ñinque mönō nē nō pönēmō inte mānīnō ante cōwē entwante quēwēnōmō inte mönō wacā ingā wacā ingā waadete pönēmō incæmōimpa.

⁴ Mæmpo Wængonguī mönō imonte nänō, Ñimāi cædāni, ante nänō wææ angainō bai ēñente cædinque mīni pönencabo iñōmīni botō, Pancadāniya nöinō cægonte bai quēwēnānipa, ante ēñēnīmo inte nanguī tobopa. ⁵ Nōwo iñōmō mīnitō iñōmīnte ämo ēñēdāni. Minitō Wængonguī ingante mīni pönencabo iñōmō wacā ingā wacā ingā waadete pönēdāni ämopa. Botō ñōwo mānōmaī äninque wīi tōmēmo wææ äno ante yewæmōmopa. Wæætē Awēnē do wææ nänō angainō ante wēēñēdē mönō ēñente ængainō ante adodō ante yewæmōmo aedāni. ⁶ Nē pönēnāni inānite mönō waadete pönēnō ñimāi impā. Mönō Codito, Ñimāi cædāni, ante nänō wææ angainō ante ēñente cædinque mönō quēwengæimpā. Minitō wēēñēdē do mīni ēñēnīnō bai wææ äninque tōmengā, Minitō cōwē waadete pönente quēwēdāni, ængacāimpa.

Waadāni oda cæcædānimpā, ante nē cædāni

⁷ Waodāni edæ oda cæcædānimpā, ante nē cædāni nanguī ināni imæca quēwēnāni weca gote mæ ongōnānimpā. Mānīnāni iñōmō Itota Codito Waocā ēñate pongaingā ingampa, ante änämaī nē ināni inānīpa. Æcānō tōmēnāni bai nē ingā, Waodāni edæ nāni oda cæquinque, ante nē cæcā ingampa. Ayæ, Botō Codito imopa, ante Codito ingante piinte cædongā ingampa. ⁸ Minitō iñōmō nāmā wææ aedāni. Quiēmē cæcæte ante mīni cædinō ante mīnitō, Wē womōnāmaī ingæimpā, ante cædinque wææ cædāni. Wæætē mīni cædinō beyæ Wængonguī nänō pōnonguīncoo tōmancoo eyepæ pōnongā æncæte ante cædāni.

⁹ Nē pönengā Itota Codito nänō odōmōnte apænægāinō ante nē ēñēningā incæ wīi godōmenque ēñente cædinque wadō ante wadæ gocā iñōmō tōmengā ædō cæte Wængonguī tōnō godongāmæ quēwengūngāā. Wæætē Itota Codito nänō odōmōnte apænægāinō ante godōmenque nē ēñente cædongā iñōmō tōmengā iñōmō Mæmpocā tōnō ayæ tōmengā Wengā tōnō godongāmæ quēwengampa. ¹⁰ Wacā mīnitō weca pōninque mānīnō Codito odōmōnte apænēdīnō ante odōmōnte apænēdāmaī ingampa, ante ädinque mīnitō tōmengā ingante, Botō oncōnē pō guīie, ante änämaī iedāni. Ayæ, Waa quēwente pōmi, ante änämaī iedāni. ¹¹ Edæ adocā ingante æcānō, Waa

quēwente pōmi, ante äna tōmengä mäningä wēnæ wēnæ cæyongante tōmengä tōnō guēa cæte bai cæcampa.

Wäo ïnque nänō angäinō

¹² Botō mīnitō ïmīnite godōmenque nanguï äñente wæbo incæte mincayonta inte wentamōmæ yewæmōimæ inte wii yewæmōinēmopa. Wæætē mīnitō weca ēñacæ pōinēmo ïmopa. Ayæ mīnitō tōnō awincadō awinca adinque botō apæneinēmo ïmopa. Mänōmaï cædinque botō, Mönō godongämæ eyepæ pōni watapæ tocæmōimpa, ante cæbopa. ¹³ Mōnitō tōniñamīni ēñēedāni. Wængongui ingante mōni pōnencabo tōmengä nänō nē ængaimōni inte mōnitō ïñomō mīni pōnencabo ïñōmīnite, Waa quēwēedāni, ämōnīpa, ante yewæmōmopa.

3 Wäo

cadota ante nänö tömanta yewæmongainta

Gayo ingante Wäo nänö waa apænedö

¹ Gayo botö nê waadebi êñëmi. Bitö botö nê nö waadete pönëmi iñömite botö nê aabo Picæmo mîni ânömo inte, Acæbiimpa, ante yewæmömopa.

² Botö nê waadebi êñëmi. Tömëmi önöwoca incæ waa êwocate quëwëmi bai bitö baonga adobai waa êñabi quëwencæbiimpa, âninqe ayæ, Bitö quëwenguinö ante bitö cöwë waa pönî quëwencæbiimpa, ämopa. ³ Mönö tönîñadâni pancadâniya iñömö pöninqe, Gayo iñömö Itota Codito nö pönî nänö angainö ante cöwë nö pönëninque cæcampa, ante apænedânitapa. Ayæ, Gayo ñowo godömenque nönö cægonte bai quëwengä ingampa, ante apænedâni êñëninque nanguî pönî totabopa. ⁴ Botö wëmîni bai iñîni imînitedö ante, Itota Codito nö pönî nänö angainö bai tömënâni nönö cægonte bai quëwënâni inânipa, ante apænedâni êñëninque botö godömenque watapæ toquinque impa.

⁵ Botö nê waadebi êñëmi. Mönö tönîñadâni incæ bitö nê tæcæ adinâni inâni incæte bitö quînö tömënâni beyæ ante cædinque cöwë pönëninque ædæmö cæbi imipa. ⁶ Codito ingante godongâmæ möni pönencabo iñömönite mäninâni wæætë, Gayo nê waadete pönengä ingampa, ante mönitö imönite apænedâni êñentamönipa. Tömënâni Wængonguî ingante nê cædâni inânipa cæbii. Bitö tömënâni inânite godö cæbi æninque gomonga godâni ininqe waa imaimpa. ⁷ Edæ tömënâni iñömö Itota emöwo beyænque tao godânitapa. Mänömaï goyönânite nê êñënâmaï cædâni dicæ pönönâni æñânitawogaa. ⁸ Mänömaï beyæ mönö Wængonguî nöingä nänö angainö ante tömënâni tönö godongâmæ cæcæimpa, ante cædinque mäninâni bai inâni mönö oncö pönâni adinque mönö, Pö guiite cænte möedâni, anguënëmö imompa.

Diotedepeto tönö Deëmetedio

⁹ Codito ingante mîni pönencabo iñömönite botö mînitö imînite do yewæmontabopa. Incæte Diotedepeto iñömö, Botö nê awënë imopa, ante nê cæinëngä inte mönitö imönite Baa âninqe nänënë cæcä ingampa. ¹⁰ Mînitö weca botö pöninqe tömengä quînö nänö cædö ante edonque pönî apænebo êñencæmînimpa. Edæ tömengä mönitö imönitedö ante önonquedö ante wënæ wënæ apænecampa. Ayæ mäninö ante wîi eyepæ impa, ante pönente ingä ininqe tömengä edæ mönö tönîñadâni pönâni adinque, Pö guiite cænte möedâni, ânâmaï ingampa töö. Wadâni guiquënë, Pö guiite cænte möedâni, ancæte ante nê cæinënâni inânite tömengä adobai, Cædâmaï iedâni, ante wææ angä ingampa. Ayæ mänömaï cædâni adinque tömengä, Mönitö Codito ingante möni godongâmæ pönencabo iñömönite mînitö gobæwedâni, angampa cæbii.

¹¹ Botö nê waadebi êñëmi. Quînö wënæ wënæ i adinque bitö adodö cædâmaï ië. Wæætë quînö waa i adinque adodö cæe. Quînö waa impa, ante nê cædâni iñömö Wængonguî wënâni inânipa. Quînö wënæ wënæ impa, ante nê cædâni guiquënë Wængonguî ingante adâmaï inânipa.

¹² Deëmetedio ingantedö ante tömânâni waa apænedânipa. Wængonguî nöingä nänö quëwënö bai Deëmetedio adobai nönö cæte quëwëngä ingampa, ante acæimpa. Mönitö adobai tömengä ingante ante waa

apænemöni imönipa. Ayæ tömengä ingantedö mönö äninö nö impa, ante do ëñemipa.

Wäo ïinque nänö yewæmongaïnö

¹³ Minitö iminite godömenque nanguï äinente wæbo incæ yewæmöingö inte wentanömæ yewæmöimæ inte wii yewæmöinëmopa. ¹⁴ Wæætë bitö weca wantæ ïnö pöningue botö äinëmo imopa. Pömo ate botö bitö tönö awincadö awinca adinque apænenecæmönaimpa.

¹⁵ Bitö piyænë cæte quëwencæbiimpa, ämopa. Mönö æmigoidi ïñömö quëwënäni bitö imite, Waa quëwencæbiimpa, ante apænedänimpa. Mönö æmigoidi bitö weca quëwënäni tömänäni inänite wæætë bitö adocanque ingante adocanque ingante apænedinque, Waa quëwencæbiimpa, ante botö beyæ apænebi ëñencädänimpa, ämopa. Mäninque ante yewæmömopa.

Codaā cadota ante nānō yewæmongainta

Waa quēwencæminimpa, ante Codaā yewæmongampa

¹ Botō Itota Codito ingante nē cædōmo inte Tantiago tōniñabo Codaabo inōmo imopa. Mæmpo Wængonguī mīnitō imīnite waadete pōnēnique aa pecā pōmīni inique mīnitō Itota Codito nempo nē ongōmīni iñōmīnite botō, Acæminimpa, ante yewæmōmopa. ² Wængonguī waadete pōnō piyænē cæcā inique mīnitō tōmengā nānō gānē entawēnō ædæmō entawēninque nanguī waadete pōnente waa cæte quēwencæminimpa, ante yewæmōmopa.

Babæ ante nē odōmonte apcēnedāni (2 Pegodo 2.1-7)

³ Botō nē waadedōmīni ēñēedāni. Botō, Codito ængā beyænque mōnō quēwēmāmo æbānō ī, ante quingæ yewæmoncæte ante cæyōmote wadāni wēnæ wēnæ cædāni ate wædinque botō, Mīnitō wææ cædāni, ante yewæmonguēnēmo batabopa. Wængonguī quimō iñōmonte tōmengā iñōmō, Wede mīni pōnēnō ante pōnōmo ænīnique mīnitō cōwē wææ aadāni, ante æmæwo pōnī pædæ pōnongā ænte entawēmompa. Inique botō wæætē, Wede mīni pōnēnō ante wææ cæcæminimpa, ante yewæmonguēnēmo intabopa. ⁴ Wængonguī, Botō imote nē Baa ānāni nāni pante wæquinque wentamō mongænānīpa, ante tōmēnāni inānite apænte ānīnique piingampa, ante do yewæmongatimpa. Tōmēnāni iñōmō mīnitō weca do awēmō pōnānīpa cæmīni. Wængonguī pōnō waadete nānō cægaiñō ante tōmēnāni wapiticæ cædinque, Mīnitō baonque townenque mīni cæinēnō ante ōnonque cæcæminimpa, ante cædinque Wængonguī waadete pōnō cæcampa, ante babæ ante odōmonte apcēnedānīpa. Ayæ Itota Codito adocanque mōnō Tæiyæ Awēnē iñongante tōmēnāni iñōmō tōmengā ingante Baa ānānīpa.

⁵ Mīnitō wæætē tōmānō ante ēñēnīmīni iñōmīnite botō, Do mīni ēñēnīnō ante wæætē wæætē adodō ante pōnencæminimpa, ante cædinque adodō ante yewæmoncæ cæbo aedāni. Dodāni Equitobæ quēwēñōnānite mōnō Awēnē ænte māocā godāni ate tōmengā nē wede pōnēnāmaī ināni inānite edæ, Ōmæ, ante capo wænongā wængadānīpa. ⁶ Ayæ anquedoidi nē awēñēdi inōnāni incæ pancadāniya tōmēnāni nāni aagaiñō incæ ñimpo cædinque tōmēnāni nāni quēwengaiñōmō emō cædinque wadæ gogadānīpa. Adinique Wængonguī, Botō apænte anguiōnæ inque bayonte tōmēnāni inānite botō pancæboimpa, ante ñōwo iñōmō gæguincamenca wodāmaī inguimenca tæī goti wīninque tōmēnāni inānite wēmō iñōmō mangui tee mōnete wææ cæcampa. ⁷ Ayæ Todōmā iñōmō quēwengaiñāni tōnō Gōmoda iñōmō quēwengaiñāni eyequeī godongāmæ nāni quēwengaincabo nāni quēwengaincabo tōnō adobaī wēnæ wēnæ cædinque nānōogængā ināmaī iñongante godō mōnīnique ayæ godōmenque quingāmē bai wīwa tote quēwengadānīpa. Mānōmaī cæte quēwēnāni ate Wængonguī angā gonga wææ tī wocæno gonte æmæwo wængadānīpa. Mānōmaī godō pangā nāni wængaī bai ante odōmōninque Wængonguī, Nē wēnæ wēnæ cædāni adobaī gonga cōwē yædæ yædæ bæcōyōmō caate wæquinānidō anguēnē, ante mōnō imonte odōmoncæte ante cægacāimpa.

⁸ Ayæ wīlimate bai mā pōnente nē odōmōnte apænedāni iñōmō ñōwo mīnitō weca pōninque dodāni nāni cægai bai adobaī pōni cædānīpa. Wīwa cædinque tōmēnāni wentamō mongænte bai edæ baō ñōmængui ēñadānīpa. Awēñēidi iñānite edæ Baa ānānīpa. Ayæ anquedoidi oōnæde ñāō iñōmō quēwēnāni iñānite edæ babæ ānīnque wēnæ ante tedewēnānīpa. ⁹ Incæte anquedo awēñē Mīguedo incæ tōmēnāni pīinte nāni tedewēnō bai adobaī tededāmai ingacāimpa. Mōitee wodi baō iñi adīnque anquedo Mīguedo tōnō wēnæ awēñē iñōmō edæ, Æbānō cæquī, ante guēadō guēa angadāimpa. Āñōnate Mīguedo iñōmō, Botō nē apænte anguēnēmo imopa diyæ anguimoo, ante pōñēninque guīñente wædinque wēnæ awēñē ingante, Wēnæ wēnæ cæbīpa tōō, ante pīinte ānāmai ingacāimpa. Wæætē, “Wængongui incæ bitō ĩmite Baa angā ēñncæbīimpa,” angacāimpa. ¹⁰ Ñōwodāni iñōmō tōmēnāni adāmai inte nāni ēñēnāmai iñōnō ante edæ pīīnīnque do wīwa tedewēnānīpa. Wæætē babæidi nāni ēñēnonque ante ēñēninque tōmēnāni māñinonque ante nāni cædō beyæ wænte nāni ñōmænguinque godōmenque quingāmē bai cædānīpa.

¹¹ Tōmēnāni edæ nāni Ca ca wæquinque baquīnō anguēñē. Cāinō wodi nānō gogainō incæ edæ do godānīpa. Ayæ Badāō wodi, Nanguī æncæboimpa, ante cædinque tōmengā nānō oda cægāinō incæ tōmēnāni iñōmō adodō ante pogodo godīnque, Godōmenque nanguī æncæboimpa, ante oda cædānīpa. Ayæ Codee wodi, Awēñēidi iñānite wido cæcæimpa, ante nānō cægāinō bai cædinque ñōwodāni nāni wænguinque adobaī cædānīpa.

¹² Mīnitō waadete pōñēninque godongāmæ ponte cæñōmīni iñāni iñōmō guīñēnāmai inte adoyōmō ponte cænānīpa. Mīnitō tōnō godongāmæ ongōnāni beyænque mīni cabo wentamō baate bai ēmōmīni awædō. Tōmēnāni, Nē aawēmōni ĩmōnīpa, ante babæ apænedīnque nē cænīnāni bai iñāni iñānite pædæ godōnāmai iñāni inte tōmēnānīque ade cænte bai cædinque wīl nōinō ante odōmōnte apænedānīpa tōō. Ayæ waodāni, Cōōnæ cæ tobāimpa, ante wæyōnānite boguīmancoo cōōnæye ēmōñonte woboyæ pō wido cæ bai cædinque tōmēnāni nāni, Pōnōmōni æncæmīnīpa, āñinō ante pōñōnāmai inte edæ babæ cædānīpa. Ayæ awæ incayedē ōmæcawæ i adīnque do bæ wite mempoga wæñiwæ bai iñāni inte tōmēnāni mempoga wænte bai iñāni inte, Pōnōmōni cæncæmīnīpa, ante nē babæ ānewēnāni iñānīpa. ¹³ Ayæ gāwapæno tadōmengadæ ompota ōñōñō mængonta mængonta cædinque ompota yabæ tayōñōi edonque ōñō ai bai tōmēnāni wīwa cæyōnāni wentamō nāni entawēnō adobaī edonque pōni ongō acæimpa. Ayæ nēmō adodonque goquēñē incæ oo tobæ wæænte wēmō ba bai tōmēnāni adobaī oda cæte wapiticæ godāni inte edæ tōmēnāni nāni cōwē tadāmai wæwænguinque mæ māmonte bai iñōmō edæ godāni iñānīpa.

¹⁴ Ayæ Adāō wodi nānō mōmōidi wææ nānō mōmōidi wææ nānō mōmōcā ingaingā inte Ēnoco iñōmō tōmengā Wængongui beyæ apænedīnque dodāni babæ ante nē odōmōnte apænedāni iñānitēdō ante iīmaīnō ante apænegacāimpa. “Mōnō Awēñē pongā apa quēwēnānīi. Ayæ tōmengā quīnāni tæiyæ waēmō iñāni adobaī mūido ganca māñimpodāni pōñōnānite adopo adopo edæ pō pō cædinque ōnōmpo tipæmpoga māñimpoga pōñāni inte baco iñāni mōnō Awēñē tōnō godongāmæ poncædānīpa. ¹⁵ Tōmengā māñōmai pōninque edæ tōmāmō ĩmōnte apænte ancæcāimpa. Wængongui ingante nē Baa āñāni iñānite tōmengā, Mīnitō mīni wæwente baquinque botō ĩmote Baa ānīnque edæ ēñēnāmai cæmīnīpa tōō, ancæcāimpa. Ayæ, Mīni nē Baa ānoncabo iñōmīni inte mīnitō mīni wæwente baquinque edæ botō ĩmote pīinte ānīnque wīwa āmīnīpa. Āmo ēñēmaīmīnīpa, ante edonque apæñecæte ante mōnō Awēñē poncæcāimpa.” Māñōmaīnō ante Ēnoco wodi wēñēñedē pōni angacāimpa.

16 Nōwodāni æbāmē cædāni incæ nē babæ ante odōmonte apænedāni iñōmō, Quimæ quēwēē, ante pīinque piyænē cædāmaī inānīpa. Taadō ante tōmēnāni nāmā nāni cæinēwēnonque ante tee empote godānīpa. Botō godōmenque waa pōni cæbo aedāni, ante nāmā ængō cædinque tedewēnānīpa. Ayæ, Wadāni mōnitō wædō ante pōnō cæcædānīpa, ante babæ cædinque tōmēnāni wadāni inānīte waa ate bai fededinque waa pōni cæte bai godō apænedānīpa cæmīnīi.

Nē pōnēmīni iñōmō iūmaī cæcæmīnīpa, ante

17 Mīnitō guiquēnē botō nē waademīni ēñēedāni. Mōnō Awēnē Itota Codito nānō nē da godongaināni incæ, Æbānō baquūi, ante nāni apænegainō ante iūmaīnō ante pōnēedāni. 18 Tōmēnāni iñōmō mīnitō imīnīte apænedinque, “Wado iūmæca iinque bayonte edæ wadāni nāmā nāni toinēwente godōnō ante goquīnāni incæ Wængonguī ingante Baa ante badete toquīnāni inōnāni inte edæ do poncædānīpa,” ante apænedāni ēñēmīnitapa. 19 Iīnāni nē badete todāni iñōmō Wængonguī Ōnōwoca ingante ēwocadāmaī ināni inte edæ nāmā nāni cæinēnō ante ēñente cædānīpa. Mīnitō adocabomīni iñōmīnīte tōmēnāni, Nānēnōtō nānēnē gocæmīnīpa, ante cædinque pā cæte bai cædāni inānīpa.

20 Botō nē waadedōmīni edæ iūmaī cædāni. Mīnitō mōnō Tæiyæ Waēmō pōni inongā ingante wede pōnēmīni inte mānīnō mīni wede pōnēnō incæ dica tæi gō cæte ongonca bai impa. Ante adinque mīnitō oncō dicaboga mænonte bai edæ tæi piñænīnque godōmenque cædāni. Ayæ Wængonguī Tæiyæ Waēmō Ōnōwoca ingante ēwocadinque mīnitō, Tōmēngā æbānō angāā, ante ēñēnīnque mānīnonque ante Wængonguī ingante apæneedāni. 21 Mīnitō, Mōnō Awēnē Itota Codito pōnō waadete waa cæcā beyænque mōnō wænāmāi inte cōwē wantæpiyæ quēwēngæimpa, ante æncæte ante wānō cōmīnitawo. Iīnque Wængonguī nē waadete pōnēngā nempo cōwē waadete pōnēnīnque ongōedāni.

22 Pancadāniya guiquēnē, Wabānō quēwēnguūmoo, ante guiñente wæyōnānīte mīnitō tōmēnāni inānīte piīnte adāmaī inte godō waadete waa cædāni. 23 Pancadāniya guiquēnē gonga bæcōyōmō oo goquīnāni iūmaī impa, ante adinque mīnitō wæætē, Quēwencædānīpa, ante odōmonte apænedinque tōmēnāni inānīte ō æmīni beyænque quēwencædānīpa. Wadāni guiquēnē wīwa cædāni inte nāmā baō wentamō mongænte bai ēñayōnānīte mīnitō, Nāate wæcæ wæ, ante guiñente wædinque tōmēnāni weocoo nāni nāadīncoo incæ gampodāmaī inte tōmēnāni beyæ wæætē waadete godō waa cædāni.

Wængonguī waēmō pōni ēmōnongā ingampa, ante

24 Mīnitō tæ go wæænte bai oda cædāmaī incæmīnīpa, ante Wængonguinque eyepæ pōni inongā inte tōō æmængā ate mīnitō adiyæ ongonte bai wede pōnencæmīnīpa. Ayæ tōmēngā adocanque eyepæ pōni cædongā inte pōnō badongā ate mīnitō waimīni bamīni iīnque mīnitō nangui pōni mīni watapæ toquinque tōmēngā nānō ñāō ēmōnōmō ænte mæicā æicæmīnīpa. 25 Wængonguī adocanque pōni inongā inte mōnō imonte, Quēwencæmīnīpa, ante nē Ængaingā ingampa. Iīnque Itota Codito mōnō Awēnē nānō cægainō beyænque eyepæ bate quēwēmō iñōmō mōnō iūmaīnō ante apænecæimpa. Wængonguī ēñēmi. Bitō badongaincoo dæ āñonte wēēnē imāmoque iñonte ñōwopāmo iñonte wapāmo mīimāmo iinque bayonte bitō adobique cōwē ñāō entawente tæi ēmōnīnque Awēnē nē tæi piñæmi inōmi inte tōmāo iñōmō quēwēnāni inānīte nē Ānōmi imidō anguēnē, ante mōnō apænecæimpa. Mānōmaī baquīnō anguēnē, ante botō, Amēē, āmopa.

Wäo ingante Itota Codito Nänö Odömongainö

Wäo wüimonte bai nänö adi, ante yewæmongainö

¹ Wëenëñedë quïnö wë wodonte bai ingatimpa, ante Itota Codito nänö odömongainö ante yewæmonte impa. Wængongui iñömö, Wantæ iñonte quïnö bai baquii, ante, Itota tömengä ingante në cædäni inänite odömoncæcäimpa, ante cædinque Itota Codito ingante edonque odömongä agacäimpa. Ayæ Itota Codito wæætë tömengä anquedo ingante, Bitö Wäo botö në cæcä weca godinque odömömi acæcäimpa, ante da pönongä ponte odömongä atabopa.

² Botö Wäomo guiquënë, Quïnö botö adinö tömänö incæ nö impa, ante yewæmömopa. Mäninö Wængongui nänö angainö ante Itota Codito incæ botö imote edonque odömongä adimo inte botö adobai wüimonte bai tömänö botö adinö ante, Nö impa, ante yewæmömopa.

³ Wængongui beyæ botö apænedö ante ii yewæmöintaa yewæmömopa. Mänintaa adinque në apænedäni nani toquinque. Ayæ mäninta botö yewæmöninö ante ëñente cædäni nani toquinque. Edæ iümai baquionæ wæætë iñö oo baquinö angënë.

Godongämæ nani pönencabo tiæte ganca inäni beyæ Wäo yewæmongampa

⁴ Botö Wäomo inömo impa. Atiabæ iñömö wayömö wayömö incæ Codito ingante godongämæ mini pönencabo önompo æmæmpoque go mencabominiya acæminimpa, ante botö yewæmömopa.

Mönö Mæmpo Wængongui wëenëñedë në quëwengainä inte ñöwo quëwengä incæ ayæ wantæpiyæ quëwencæcäimpa. Tömengä Önöwoca incæ önompo æmæmpoque go mëwoga önöwocaidi bai ëwocadongä inte Wængongui nänö aacæ tæ tayömö tæcætawë inö në ongongampa. Ininque Mæmpocä tönö tömengä Önöwoca waadete pönö cæda ate minitö gänë entawencæminimpa.

⁵ Ayæ adobai Itota Codito edæ Wængongui ingantedö ante cöwë ædæmö pöni apænedongä inte wængä ate täno ñäni ömæmongaingä ingampa. Tömengä tömämæ awënë odeyedi nani Tæiyæ Awënë Odeye inongä ingampa. Tömengä adobai mönö imonte në waadete pönönongä inte mönö wënæ wënæ cægainö adinque tömengä wepæ inte mënongacäimpa. Tömengä adobai waadete pönö cæcä ate minitö gänë entawencæminimpa, ämopa. ⁶ Ayæ Itota, Botö Awënë Odeyëbo nempo quëwëninque minitö botö tönö godongämæ aamini bacæminimpa, ante pönö badongacäimpa. Ayæ, Botö Mæmpo Wængongui ingante cæcæminimpa, ante Itota pönö cæcä ate mönö Wængongui qui, ante në godömö bagäimö imopa. Tömengä ñäo bai ëmöñongante mönö waocabo tömenganque ingante waa acæimpa. Tömenganque cöwë në tæi piñænongå inte quingämenque quëwënanä iñönänite tömengä tömänäni Awënë inongä ingampa, ante mönö cöwë angæimpa, ante Amëë, ante ämopa.

⁷ Eñeedäni, tömengä edæ boguimancodë wææñongante,

tömänäni tömengä ingante acædänimpa.

Tömengä ingä në timpogainäni incæ adobai tömengä ingante acædänimpa.

Ayæ tömämæ quëwënanäni tömänäni tömengä ingante adinque Ca ca wæcædänimpa.

Mänömai baquinö angënë, ante botö, Amëë, ämopa.

⁸ Wængongui Awënë adocanque Tōmāā nē Cægaingā inte iīmaī angampa. “Botō Tānobo ingaīmo inte Tōmāmo inguīmo īmopa.” Mānōmaīnō ante nē angā iīnōmō tōmengā wēēnēñedē do quēwengāingā inte nōwo quēwengā incæ ayæ wantæpiyæ quēwencæcāimpa.

Itota Codito nē nāō bai ēmongaingā ingante Wāō nāno adō

⁹ Botō Wāōmo īnōmo īmopa. Minitō tōniñabo inte botō minitō tōnō Awënë Od-eye Itota nempo quēwēniñque mōnō tōmengā tōnō godongāmæ aamō īnōmō īmopa. Botō minitō tōnō godongāmæ wæwēmō īmō incæte mōnō wæntæye īnāmaī inte ee cæmōmpa. Wængongui nāno angainō ante apænedinque ayæ, Itota mōnō Codito īnongā ingampa, ante, Nō impa, ante botō apænedō beyænque botō wāā tēiwænē Patōmoto iīnōmō tee mōnete bai quēwentabopa.

¹⁰ Wængongui Awënë itædē iīnonte Wængongui Tæiyæ Waēmō Ōnōwoca incæ botō īmote bæi ongonte bai cæyongā botō ōnōñabæ īnō adocanque tedepāmo todompeta nāni ancadeca we ōonte bai yedæ tē ēñentabopa. ¹¹ Iīmaī angantapa. “Bitō quīnō wūimonte bai abii, ante yewæmōintaa yewæmōe. Yewæmōinque wayōmō wayōmō incæ Codito ingante godongāmæ nāni pōnencabo ōnōmpo æmæmpoque go mencabodāniya iīnōnānite tōmēnāni īnānite da godōe,” ante angantapa. “Epeto quēwēñōmō quēwēnāni Etāmidōna quēwēñōmō quēwēnāni Pedegāmo quēwēñōmō quēwēnāni Tiatida quēwēñōmō quēwēnāni Tadoditi quēwēñōmō quēwēnāni Pidadedepia quēwēñōmō quēwēnāni ayæ Daoditea quēwēñōmō quēwēnāni Codito ingante godongāmæ nāni pōnencabo nāni cabo nāni cabo iīnōnānite bitō tōmēnāni īnānite īi bitō yewæmōninta da godōmi æncædānimpa.”

¹² Āñongate botō, Ēcānō āna ēñēmoo, ante dadi ēmænte atabopa. Dadi ēmæññōmote yædo concædi tī wodōnoincade oodo inte badōincade ōnōmpo æmæmpoque go mēa ganca ongoncade atabopa. ¹³ Ayæ yædo concædi tī wodōnoincade ongoñōmō adoyōmō tæcæguedē adocanque nē Waocā ēñagaingā bai inte ongongā atabopa. Tōmengā doyæncōo ōnōwa ganca incōo mongæninque ayæ tæcæēnēmæ īnō pacadeyænta oodo inte badōi ēēnēmængā ingantapa. ¹⁴ Tōmengā ocabo tōnō ocagui iīnōmō dayō nāāmænta pōni ēmō bai adobai encadinque yoguimō nāō pōni ēmō bai adobai nāō bai encacā ingantapa. Ayæ tōmengā awinca incæ gonga wo bæcote bai ēmongā ingantapa. ¹⁵ Tōmengā ōnōwa incæ yaēmenta bodonte nāni ānō gongapamō guī ocoi āñonte nāō ēmō bai tōmengā adobai ēwacā ingantapa. Tōmengā tedeyungā æpæ mæ conta goyonte æpæ tē bai adobai tē ēñentabopa. ¹⁶ Tōmengā ōnōnempo tōmempo incæ nēmōidi æmæmpoque go mēa ganca næængantapa. Ayæ tōmengā ōnōne īnō yaēmē tipængaa waingamē engamē ēnedinque yædæ tadete ongongantapa. Ayæ tōmengā awinca incæ nænque nanguī tamonte bai nāō bai ēmongantapa.

¹⁷ Tōmengā ingā adinque botō tōmengā ōnōwa īnō wænte bai tæ gowææntabopa. Tæ gowææñōmō tōmengā ōnōmpo tōmempo inte botō īmote gampodinque “Bitō guīñēnāmaī incæbiimpa,” ante āninque edæ, “Tōmāā badōnāmaī iīnedē botō Do Quēwengāimo īmopa. Ayæ tōmāā iinque bayedē incæ botō Ayæ Pōni nē Quēwēmo incæboimpa,” ante angantapa. ¹⁸ Edæ “Botō nē Quēwengāimo īnōmo inte nē wænīmo incæ nāni ōmæmōnte cōwē wantæpiyæ quēwēmo īnōmo īmopa. Woadāni nē wænte godīnāni nāni wænte ongoñōmō ongoñōnānite botō, Cōwē wænāmaī quēwencæmīnimpa, ante botō tæi piñæmāmo inte nē æmo īmopa.

¹⁹ “Mānōmaī beyæ bitō wūimonte bai bitō adīnō ante quīnō nōwo ī, ante quīnō iīncayæ ate baquīi, ante yewæmōe āmopa. ²⁰ Mānū nēmōidi ōnōmpo

æmæmpoque go mēa ganca botō ōnōnempo tōmempo incæ mæ ōñoncoo bitō adincoo ante, Æbānō i, ante bitō ēñēnāmaī inōnō ante botō edonque pōni apænebo ēñencæbiimpa. Botō imote godongāmæ nāni pōnencabo ōnompo æmæmpoque go mencabodāniya iñōnānite tōmēnāni inānite nē aadāni bai nēmōidi inānīpa. Ayæ yædo concædi tī wodōnincade oodo inte badōincade ōnompo æmæmpoque go mēa ganca ongoncadedcoo bitō adincoo ante, Quīnō bai inānīi, ante botō adobai bitō imite edonque pōni apænebo ate nē ēñēmi bacæbiimpa. Wayōmō wayōmō incæ botō imote godongāmæ nāni pōnencabo ōnompo æmæmpoque go mencabodāniya iñōmō tōmēnāni yædo concædi tī wodōnincade bai adobai inānīpa,” ante Waocā nē ēñagaingā iñōmō botō imote apænegacāimpa.

2

Godongāmæ nāni pōnencabo tiæte ganca ināni inānite Itota nānō ānō

Epeto iñōmō quēwēnāni inānite Itota nānō ānō

¹ Ayæ adocā godōmenque apænecantapa.

“Epeto iñōmō Wængonguī ingante godongāmæ nāni pōnencabo inānite nē aacā acæcāimpa, ante botō ānō ante iūmaī yewæmōe āmopa. ‘Botō edæ nēmōidi ōnompo æmæmpoque go mēa ganca botō ōnōnempo tōmempo nē nææmo imo inte botō adobai yædo concædi tī wodōnincade oodo inte badōincade ōnompo æmæmpoque go mencadea incade ongōñōmō adoyōmō tæcæguedē nē cægōmo imopa.

² “Mīnitō æbānō cæmīnīi, ante do ēñēmopa. Edæ nangui pōni cædinque mīnitō wæntæye ināmaī inte ee cæmīnīpa. Mīnitō wīwa cædāni inānite Baa ante quēwēminīpa, ante do ēñēmopa. Ayæ Wængonguī nānō nē da godongāimōni imōnīpa, ante nē ānāni incæte ināmaī iñōnānite mīnitō, Nāwangā inānīi, ante ēñencæte ante apænte adinque, Tōmēnāni babæ ānānīpa, ante ēñente wæmīnitapa. ³ Mīnitō wæntæye ināmaī inte ee cæmīni imīnīpa. Ayæ botō emōwo apænete beyænque wæwēmīni incæte godōmenque godōmenque cædinque mīnitō mīmōné nangæ badāmaī imīnīpa, ante do ēñēmopa.

⁴ “Incæte adoque pōni mīni cædinō wīi waa abopa. Mīnitō edæ wīi wēēnēñedē bai ædæmō waadete pōnēmīni imīnīpa, ante awædō. ⁵ Edæ mīnitō waa cædimīni imīni incæte nōwo wæætē wēnæ wēnæ cæmīni bamīni awædō. Mānīnō ante pōnēedāni. Mānīi mīni wēnæ wēnæ cædinō ante, Ancaa wæwente awædō, ante pōnente ñimpo cædinque mīnitō wēēnēñedē mīni waa cægāi bai adobai cæte quēwēedāni āmopa. Amo ēñēnīnque mīnitō mīni wēnæ wēnæ cædinō ante wædāmaī imīni adinque botō mīnitō weca pōmaimopa. Pōnīnque mīni yædo concædi tī wodōnincade nānō ongōñōmō ongōñonte botō ō ænguimodō anguēnē. ⁶ Incæte adoque mīni cædinō guiquēnē waa abopa. Mīnitō edæ Nīncodaitaidi nāni ānāni nāni cædō ante adinque piinte imīnīpa. Botō adobai tōmēnāni nāni cædō ante adinque piinte imopa.

⁷ “Wayōmō wayōmō incæ botō imote godongāmæ nāni pōnencabo inānite Wængonguī Ōnōwoca quīnō angāā, ante tōmēngā nānō ānō ante nē ēamonca imīni inte ēñēedāni. Wængonguī waa gōnea iñōmō mānīñōmō adowænque quēwēnguiwæ pædiwæ iwæmpa. Tæī emonte nē gānā cædāni inānite botō iñōmō, Mānīwæ inca cæncæmīnīpa, ante pædæ godoncæboimpa,’ ante mānīnque āmopa,” ante Waocā nē ēñagaingā iñōmō botō imote apænegacāimpa.

Ætāmīdōna iñōmō quēwēnāni inānite Itota nānō ānō

⁸ Ayæ adocä godömenque apænegantapa.

“Ætämidoña iñömö Wængongui ingante godongämæ nani pönencabo inänite në aacä acæcäimpa, ante botö äno ante iimaï yewæmõe ämopa. Tömää badönämaï iñedë botö Do Quëwengäimo imopa. Ayæ tömäa iinque bayedë incæ botö Ayæ Pöni në Quëwëmo incæboimpa. Botö në wænimo incæ ñowo wæætë ñani ömæmongäimo imopa.

⁹ “ Minitö wæwëmini inte adobai ömæpomini iminipa, ante botö do ëñëmopa. Incæte minitö nö ëamini iminipa. Oodeoidi pancadäniya, Mönitö Wængongui ingante möni pönencabo imönipa, ante në änäni incæte wii mänömaï inäniya. Tömënäni minitö iminite ancaa piinte babæ änewënäni inäniya, ante botö do ëñëmopa. Mäninäni iñömö Tatäna ingante nani ëñencabo inte mänömaï cædänipa töö. ¹⁰ Minitö quino beyæ wæwencæ cæmini imini incæte guññënamäï iedäni. Tatäna incæ, Æbänö cæminii, ante acæte ante cæcä beyænque waodäni pancaminiya iminite tee mönecædänimpa. Önompö tipæmpoga eönæ iñonte wæwenguiimini iminipa. Ininque minitö mini wænguinque wæmini incæ cöwë pönëninque ædæmö cædäni. Mänömaï në cæmini ininque botö, Mini cöwë quëwenguinta, ante poganta bai minitö iminite pönömo æmaimäniya.

¹¹ “ ‘Wayömö wayömö incæ botö imote godongämæ nani pönencabo inänite Wængongui Önöwoca quino angää, ante tömengä nänö äno ante në ëamonca imini inte ëñëedäni. Wadäni adopoque wæninqe nani mempoga wænguiimämo bai tæï ëmonte në gänä cædäni iñömö wæætë mempoga wænänmaï incædänimpa,’ ante mäninque ämopa,” ante Waocä në ëñagaingä iñömö botö imote apænegacäimpa.

Pedegämo iñömö quëwënäni inänite Itota nänö äno

¹² Ayæ adocä godömenque apænegantapa.

“Pedegämo iñömö Wængongui ingante godongämæ nani pönencabo inänite në aacä acæcäimpa, ante botö äno ante iimaï yewæmõe ämopa. ‘Botö edæ yaëmë tipængaa waingamë engamë nææmo imopa.

¹³ “ ‘Ædönö quëwëminii, ante botö do ëñëmopa. Tatäna contaimpa ongonte nänö aayömö adoyömö minitö quëwëmini imini incæte botö imo edæ ñimpo cædämaï quëwëmini iminipa. Mini quëwëñömö Tatäna adoyömö quëwengä ininque, Antipato edæ botö äno ante cöwë pönëninque ædæmö apænedongä iñongante mäniñömö quëwënäni tömengä ingante wænönäni wængantapa. Tömengä wæñedë incæ minitö botö imote edæ, Dicæ pönëmogaa, änämaï iminipa.

¹⁴ “ ‘Incæte pancaa mini cædinö wii waa abopa. Edæ pancaminiya docä Badäö nänö odömonte apænegainö ante ëñëwëmini awædö. Tömengä iñömö, Badaco godö cæcä beyænque idægoidi tee tëwate bai oda cæcædänimpa, ante cædinque adocä Badaco ingante odömonte apænegä ëñente cægacäimpa. Wadäni, Mönitö wængongui cængui impa, ante nani cönöni ante, Minitö cæedäni, ante Badaco iñömö idægoidi inänite odömonte apænegacäimpa. Ayæ onquiyænäni tönö godö towente cæedäni, ante odömonte apænegacäimpa. ¹⁵ Ayæ pancaminiya adobai Nincodaitaidi nani odömonte apænedö ante ëñëwëmini awædö. ¹⁶ Mänömaï beyæ mini wænæ wænæ cædinö ante, Ancaa wæwente awædö, ante pönente ñimpo cædäni. Minitö mini wænæ wænæ cædinö ante wædämaï imini adinque botö wantæ iñonte minitö weca pömaïmopa. Pöninque tömënäni nani odömonte apænedö ante në ëñëwënäni iñönänite botö önöne incæ yaëmë ënedinque yædæ tædëdinque guëadö guëa cæcæboimpa.

17 “Wayömo wayömo incæ botö imote godongämæ nani pönencabo inänite Wængongui Önöwoca quinä angää, ante tömengä nänö äno ante nē ēamonca imini inte ēñēedäni. Tæi emonte nē gänä cædäni inänite cængui mänää nani angainö botö wē wodöni cængui iñonte godömo ænte cæncædänimpa. Adodäni inänite adobaï dica näämæntaca godömo æncædänimpa. Wa emöwo ante pemöningue mänincaa yewæmante ingæimpa. Nē ænänique mänüwo ēñēnani inänipa, ante mäninque ämopa,” ante Waocä nē ēñagaingä iñömö botö imote apænegacäimpa.

Tiatida iñömö quëwënnani inänite Itota nänö äno

18 Ayæ adocä godömenque apænecantapa.

“Tiatida iñömö Wængongui ingante godongämæ nani pönencabo inänite nē aacä acæcäimpa, ante botö äno ante iimaï yewæmöe ämopa. ‘Botö edæ Wængongui Wëmo inömo imopa. Botö awinca incæ gonga wo bæcote bai nē emömo imopa. Botö önöwa incæ yaëmenta bodonte nani äno bai nãö bai nē ewabo imopa.

19 “Minitö æbänö cæminii, ante mini waadete pönönö ante mini wede pönönö ante wadäni inänite mini waa cædö ante botö do ēñēmopa. Minitö wæntæye inämaï inte ee cædinque godongämæ cæmini iminipa, ante ayæ, Wëñēñedē do waa cædimini inte nōwo godömenque waa cæmini iminipa, ante adobaï do ēñēmopa. 20 Incæte adoque pöni mini cædinö wii waa abopa. Onquiyängä Etabete nē emongä iñömö edæ, Wængongui beyæ nē apænebo, ante nämä incæ nē angä ingante wadämäl imini inte wæætē tömengä ingante ayæ godömenque Ao äminipa töö. Iñæmpa tömengä iñömö botö imote nē cædäni inänite nänö odömonte apænedö beyænque oda cæte gocædänimpa, ante cæcä beyæ tömënäni onquiyænäni tönö godö towente cædänipa. Wadäni, Mönitö wængongui cængui impa, ante nani cönöni cænänipa töö. Mänömaï cæcædänimpa, ante mäningä onquiyängä odömonte apænegacäimpa.

21 “Tömengä nänö towente cædimämo ante, Botö wënæ wënæ cæbo inte ancaa wæwente awædö, ante pönente wabänö ñimpo cæquingää, ante botö tömengä ingante ee pänämaï intabopa. Incæte tömengä nänö wënæ wënæ cædö ante wädämaï quëwengä ingampa. 22 Iñinque botö, Tömengä ingante cæbo beyænque wënæ wënæ bate wæwencæcäimpa, ante cæcæboimpa. Ayæ tömengä nänö odömonte apænedinö bai nē ēñente cædäni iñömö tömengä tönö nani guëa godö möwëninö ante, Mönitö wënæ wënæ cæmöni inte ancaa wæwente awædö, ante pönente ñimpo cædämaï inäni iñinque tömënäni inänite adobaï botö cæbo beyænque nanguï wënæ wënæ bate wæwëmainänipa.

23 Tömengä wënäni inänite wænömo wæncædänimpa. Iñinque wayömo wayömo incæ botö imote godongämæ nani pönencabo tömancabodäniya iñömö, Botö incæ tömënäni nani mimöno tönö ocaidē, Æbänö pönënnanii, ante nē ēñemo inömo imopa, ante ēñencædänimpa. Ayæ minitö cædi bai ante adinque botö wæætē adobaï minitö tömämini iminite cæcæboimpa.

24 “Wamini pancaminiya guiquënë Tiatida iñömö quëwëmini inte mäningä onquiyängä nänö odömonte apænedö ante minitö nē pönënnämaï iminipa. Ayæ Tatäna wē wodonte nänö angainö ante ēñënnämaï iminipapa. Iñinque botö minitö iminite iimaï ämopa. Minitö teemē mongæncoo mongænte gote bai wädämaï incæminipa, ante wadö ante anämaï incæboimpa. 25 Wæætē botö ocæ emænte wææganca minitö edæ do mini pönönö ante ñimpo cædämaï iedäni. Mäninque ämopa.

26 “Inguipoga iinque baganca ædānidō botō ānō nē cædōnāni inte tæi ēmonte nē gānā cædāni inānite botō pōnō cæbo ate tōmēnāni nāmā tæi piñænāni badingue tōmāmæ quēwēnāni inānite nē ānāni bacædānimpa. 27 Botō Mæmpo botō imote pōnō cæcā beyænque Awēnē badingue nāmā tæi piñænte inte nē āmo bai botō adobaī tōmēnāni inānite pōnō cæbo beyænque awēnēidi badingue aacædānimpa. Tæiyæ awēnē tōmengā nempo quēwēnāni inānite aacā bai tōmengā iñōmō tōmāmæ quēwēnāni inānite, iīmaī cædāni, ante aacæcāimpa. Dai inte bæte cængæmō tæi ænacā nancate bai cædinque tōmengā adobaī wabæca wabæca quēwēnāni inānite nanguī pante cæcæcāimpa. 28 Mānināni inānite botō adobaī wadaamō ñāo bayonte apāimō incæ godōmo æncædānimpa.

29 “Wayōmō wayōmō incæ botō imote godongāmæ nāni pōnencabo inānite Wængonguī Ōnōwoca quīnō angāā, ante tōmengā nāno ānō ante nē ēamonca iīmīni inte ēñēedāni, ante māninque āmopa,” ante Waocā nē ēñagaingā iñōmō botō imote apænegacāimpa.

3

Tadoditiidi inānite Itota nāno ānō

1 Ayæ adocā godōmenque apænecantapa.

“Tadoditi iñōmō Wængonguī ingante godongāmæ nāni pōnencabo inānite nē aacā acæcāimpa, ante botō ānō ante iīmaī yewæmōe āmopa. ‘Wængonguī Ōnōwoca incæ ōnempo æmæmpoque go mēwoga ōnōwocaidi ēwocadongā ingampa. Botō iñōmō tōmengā ingante nē ēwocate quēwēngaimo inte nēmōidi ōnempo æmæmpoque go mēa ganca ināni nē næænte ingaimo imopa.

“Iinque, Minitō æbānō cæmīnii, ante do ēñēmopa. Minitō mīimīni quēwēmīnīpa, ante wadāni apænedāni incæte mīnitō wīi waa cæte quēwēmīni inte do wængānāni bai iīmīnīpa tōō. 2 Edæ, Botō Wængonguī ayongā mīni cædinō wīi eyepæ cæmīnīpa, ante adinque botō, Ñāni ōmæmōedāni, ante āmopa. Ñāni ōmæmōinque mīnitō, Ayæ mīināni quēwēnāni incæ nē wæncæ cædāni bai badāni incæte tōmēnāni wænāmāi inte wæætē tæimō bacædānimpa, ante cædāni. 3 Mānōmaī beyæ, Quiēmē do ænimīni bai iīmīni, quiēmē ante do ēñēmīnī, ante māninō ante wæætē adodō ante pōnēedāni. Pōnēinque mīnitō māninō ante ēñente cædāni. Ayæ mīni wēnæ wēnæ cædinō ante, Ancaa wæwente awædō, ante pōnente ñimpo cædāni. Wæætē mīnitō wīi ñāni ōmæmonte bai iīmīni ate wædinque botō incæ mīnitō weca awēmō nē ængā bai pōmaimopa. Ayæ, Awēmō nē ængā æyedēnō ponguingāā, ante ēñēnāmāi ināni bai botō adobaī mīnitō ēñēnāmāi iñōmīni mīnitō weca awēmō ponguīmo apa quēwēmīnī.

4 “Incæte Tadoditi iñōmō mīni quēwencabo iñōmīnite pancadāniya tōmēnāni weocoo wentamō nāmōnāmāi bai inīnāni inte nē waa cæte quēwēnānīpa. Mānināni waa cæte quēwēnāni beyæ eyepæ inōnāni inte weocoo nāāmæntacoo mongænte botō mīñæ gocædānimpa. 5 Nē tæi ēmonte gānā cædāni iñōmō adobaī weocoo nāāmæntacoo mongæncædānimpa. Ayæ, Quēwēnguinta, ante Wængonguī nāno yewæmongaintaa mānināni ēmōwo do yewæmōi iinque botō cōwē wadæ cædāmāi incæboimpa. Wæætē botō Mæmpo Wængonguī weca ayæ tōmengā anquedoidi weca botō, iīnāni botō mīñæ gogāināni inānīpa, ancæboimpa.

6 “Wayōmō wayōmō incæ botō imote godongāmæ nāni pōnencabo inānite Wængonguī Ōnōwoca quīnō angāā, ante tōmengā nāno ānō ante nē ēamonca

imini inte eñeedäni, ante mäninque ämopa,” ante Waocä nä eñagaingä iñömö botö imote apænegacäimpa.

Pidadedeptaidi inänite Itota nänö änö

⁷ Ayæ adocä godömenque apænecantapa.

“Pidadedeptia iñömö Wængongui ingante godongämæ näni pönencabo inänite nä acä acæcäimpa, ante botö änö ante iima yewæmoe ämopa. ‘Botö edæ nä Tæiyæ Waëmö ingaimo ämopa. Nö ante cægaimo inte botö docä Awënë Dabii nänö wi ænequimö nä næængaïmo ämopa. Iinque quino odemö botö wi ænebo incæ mäninemö wacä ædö cæte tee mönequingää. Ayæ quino odemö botö tee mönebo incæ mäninemö wacä ædö cæte wi ænequingää.

⁸ “ Minitö æbänö cæminii, ante do eñëmopa. Minitö cæcæminimpa, ante botö odemö wi ænete bai cæbo aedäni. Æcänö mäninemö wæætë tee mönequingää. Edæ dæ angampa. Minitö wii tæi piñæmini imini incæte botö angainö ante eñente cæmini inte botö emowo ante, Dicæ eñëmöniiyaa, ante anämaï inimini iminipa. Botö do eñëmopa. ⁹ Möni oodeocabo imöni incæ pancadäniya, Mönitö Wængongui ingante möni eñencabo imönipa, anäni incæte inämaï inänipa. Wæætë tömënanii iñömö babæ änewënanii inänipa. Tatäna ingante näni eñencabo inänipa töö. Botö godö cæbo ate adodäni minitö weca ponte minitö önöwa gäänë ædæ wææncädänimpa. Ayæ, Botö minitö iminite nä waadete pönengaimo ämopa, ante botö godö odömömo eñencädänimpa.

¹⁰ Minitö iminite, Ee cædinque wæntæye inämaï iedäni, ante botö angainö ante eñente nä cædimini imini adinque botö wæætë minitö iminite wææ acæboimpa. Inguipoga quëwënanii tömënanii näni wængeuimämo ancaa baquino anguënë. Edæ Tatäna, Æbänö quëwënanii, ante acæte ante cæcä ate näni wæwënedë botö iñömö, Minitö wæwënamäi incæminimpa, ante minitö iminite wææ acæboimpa.

¹¹ “ Botö oo ocæ emænte ponguïmo ämopa. Wængongui poganta nänö godonguinta, ante minitö iminite godongä æncæminimpa. Mäninta mini ænguinta iñömö wacä ænämaï incæcäimpa, ante minitö mini entawëno ante godömenque godömenque ñimpo cædämaï iedäni. ¹² Botö cæbo ate waodäni tæi emonte nä gänä cædäni iñömö tömëmo Wængongui tæiyæ waëmö oncönë wantæpiyæ quëwëguinänidö anguënë. Tömënanii Wængongui weca cöwë quëwente taodämaï incädänimpa. Tömënaniiya botö Wængongui emowo yewæmoncæboimpa. Mii Eedotadëë näni äñömö iñömö botö Wængongui nänö quëwëñömö iñonte mänii tömengä nänö quëwëñömö incæ öönädë inö da pönongä wæængæimpa. Mänii Wængongui nänö quëwëñömö emowo botö adobai tömënaniiya yewæmoncæboimpa. Ayæ botö wawo botö ñowo pömongaïwo adobai tömënaniiya yewæmoncæboimpa.

¹³ “ Wayömö wayömö incæ botö imote godongämæ näni pönencabo inänite Wængongui Önöwoca quino angää, ante tömengä nänö änö ante nä eamonca imini inte eñeedäni, ante mäninque ämopa,” ante Waocä nä eñagaingä iñömö botö imote apænegacäimpa.

Daoditeaidi inänite Itota nänö änö

¹⁴ Ayæ adocä godömenque apænecantapa.

“Daoditea iñömö Wængongui ingante godongämæ näni pönencabo inänite nä acä acæcäimpa, ante botö änö ante iima yewæmoe ämopa. ‘Botö emowo Amëë, ante pömongaïmo inte botö cöwë, Näwangä impa, ante në cöwë ædæmö apænegaimo ämopa. Wëenëñedë Wængongui nänö badongäñedë mäniñedë botö tömengä tönö godongämæ badongaïmo beyænque tömengä nänö badongaincoo tömancoo Awënë badinque botö në ämo ämopa.

15 “Mīnitō æbānō cæmīnī, ante do eñēmopa. Yoguiþæ bai ināmaī imīni incæte ocoi āmæ bai adobaī ināmaī imīnīpa tōō. Ināmpa yoguiþæ bai imīnīpa diyæ waa aquimoo. Edæ ocoi āmæ bai imīnīpa diyæ waa aquimoo. 16 Mīnitō yoguiþæ bai ināmaī imīni incæte ocoi āmæ bai ināmaī imīni inte wæætē wī eyepæ cæmīni inte gānē āmæ bai imīnīpa tōō. Mānōmaī beyæ botō edæ tōmēmo ōnōnē towæ tānonte bai mīnitō imīnite adobaī wido cæcæ cæbo apa quēwēmīnī. 17 Mīnitō, Mōnitō nanguī ēamōni imōnīpa, ante āmīnīpa. Edæ, Tōmēmōni mānīcoo gæte da wēnīnque eyepæ ēamōnīpa, ante āmīnīpa. Ināmpa mānīnō ante wapitīcæ pōnente āmīnīpa. Mīnitō mīni wæwēnō incæ eñēnāmaī imīnīpa tōō. Mīnitō æbānō bate cæmīnī, ante adīnque wadāni, Mīnitō wodi, ancædānīpa. Ōmæpodāni bai imīni inte mīnitō babetamōnāni bai imīni inte ōmaadāni bai imīni incæte, Mānōmaī imōnīpa, ante eñēmīnyaa.

18 “Mānōmaī beyæ botō, Iīmaī cæedāni, ante waadete āmopa. Botō pōnō cæbo beyænque mīnitō wæætē waa bate bai nanguī cæcæmīnīpa, āmopa. Mānīnō botō pōnō cædō inōmō oodo gongapamō aca podonte ate waēmō oodo bate bai impa. Inīnque mīnitō, Mōnitō nanguī ēamōni bacæmōnīpa, ante cædinque botō weca ponte tōmēmo oodo ante godonte æedāni. Ayæ, Ōmaamōni ināmaī incæmōnīpa, ante guingo imōnāmaī incæmōnīpa, ante mīnitō botō weocoo nāāmæntacoo godonte æente mongæedāni. Ayæ mīnitō, Awīnca waa acæimpā, ante cædinque tōmēmo awīnca cōnōmōimæ godonte ænīnque cōnōmōedāni.

19 “Botō nē waadete pōnēnāni inānite botō piinte āmo inte adobaī pante cæbo imopa cæmīnī. Mīnitō nanguī cædinque mīni wēnæ wēnæ cædīnō ante, Ancaa wæwente awædō, ante pōnente nīmpo cæedāni. 20 Ēamonca eñēedāni. Botō incæ odemō yabæ inō ongonte bai waomīni mīmōno a ongōnīnque, Wī ænequī, ante aa peyōmo waocā æcāmenque incæ eñēnīnque odemō wī ænete botō imo, Pō guīie, angā inīnque botō inōmō edæ tōmēngā mīmōnē pō guīicæboimpā. Tōmēngā mīmō botō oncō bai inōnte botō tōmēngā tōnō cænte bai cōwē quēwencæboimpā. Ayæ tōmēngā wæætē botō tōnō cænte bai cōwē quēwencæcāimpā. 21 Botō tæī ēmonte nē gānā cægāimo inte botō Mæmpo nāno aacæ tæ contaimpaa tōmēngā tōnō guēa tæ contagāimo bai nē tæī ēmonte nē gānā cædāni inōmō adobaī botō tōmēmo aacæ tæ contayōmo botō tōnō godongāmæ tæ contacædānīpa, ante āmo adopaa tæ contaquināni.

22 “Wayōmō wayōmō incæ botō imote godongāmæ nāni pōnencabo inānite Wængonguī Ōnōwoca quīnō angāā, ante tōmēngā nāno ānō ante tōmēnāni nē ēamonca imīni inte eñēedāni, ante mānīnque āmopa,” ante Waocā nē eñgaingā inōmō botō imote apænegacāimpā.

4

Ōōncædē inōmō Wængonguī ingante watapæ apōnedāni

1 Botō Wāōmo inōmo inte ayæ ate æmō ayōmote ōōncædē inō odemō wī ænete atabopa. Todompeta nāni ancadeca we ōonte yedæ tē bai tedepāmo tāno botō eñēnīnō inōmō nōwo wæætē adopāmo botō imote iīmaī ānīnque, “Inōmō pō æe. Æñōmite botō, Ayæ ate quīnō baquēnē inguīī, ante bitō imite odonque odōmōmo acæbiimpā,” angantapa.

2 Mānīnō ante āñongā Wængonguī Ōnōwoca incæ botō imote bæi ongonte bai cæyongā botō wīlmonte bai adīnque iīmaī atabopa. Ōōncædē inō Awēnē tæ contaimpā ayōmo adocanque mānīnōmō tæ contacā atabopa. 3 Māningā adoyōmō nē tæ contadongā inōmō dica nāō bai ēmonca bai adobaī ēmongā ingantapa. Aatape nāni ānīnca bai codōnadīna nāni ānīnca bai mānīnca

mencaa ñäo bai inca bai tömengä adobai emongä ingantapa. Awënë tæ contaimpa iñömö daimë dica bai etemedada nani äninca emonca bai inte æidämæ waimë pöni gongæmënimpa. ⁴ Mänimpa Awënë nänö aacæ tæ contaimpa waimpacoo bæinticoatodo ganca mänimpopacoo mäniñömö godämæ a ongompapa. Adopacoo iñömö në aadäni në Picænäni bæinticoatodo ganca mänimpodäni tæ contadinque näämæntacoo mongæninque poganta oodo inte badöinta da wencate a ongönänitapa. ⁵ Awënë tæ contaimpa inö näinte yædæ yædæ ta gote detæbo tæi tæi tē tēñonte yedæ pöni änimpa. Ayæ Awënë tæ contayömö tæcætawë inö ti wodönoincade önompo æmæmpoque go mencedæa wocædöincadecoo a ongönimpa. Wængonguï Öñowoca incæ önompo æmæmpoque go mēwoga öñowocaidi bai ewocadongä inte mänincadecoo bai ingampa.

⁶ Ayæ Awënë tæ contaimpa tæcætawë inö adobai gäwapæntibæ bai iñonte awocawænta bai inimpa. Ayæ Awënë tæ contaimpa iñömö mülnäni quëwëñäni mënaa go mënaa inäni godämæ a ongönänitapa. Mäninäni iñömö tæcætawë inö öñöñabæ inö tömäo awinca emönäni atabopa. ⁷ Tānocä müngä quëwëngä botö adingä iñömö nëöo bai emongampa. Ayæ wacä müngä quëwëngä botö adingä iñömö wagada mæmpo bai emongampa. Wacä müngä quëwëngä botö adingä iñömö tömengä awinca wacä awinca bai emongampa. Ayæ tömangä müngä quëwëngä botö adingä iñömö guingämöwæ pao pao gocä bai atabopa. ⁸ Mëa go mëa mülnäni quëwëñäni incæ adocanque adocanque önompo æmæmpoque go adoguënepænque emænte quëwëñäni inänipa. Ayæ adodäni inte tömëñäni baonga godämæ tömanga nangui pöni awinca emonte æñömengadænguënepæ incæ awinca adobai emönänipa. Mäninäni edæ itædë woyowotæ ñimpo cædämaï inte iïmaï ante ämotamïni äñänipa.

“Bitö Tæiyæ Waëmö Awënë imidö, bitö Tæiyæ Waëmö Awënë imidö, ante ämönipa.

Wængonguï Awënë bitö adobique Tömää në Cæbi inte

wëñëñedë do në quëwëngäimi iïi ñöwobi adobi inömi inte ayæ wantæpiyæ cöwë quëwëncæbiimpa.”

Ante ämotamïni ante cöwë äñänipa.

⁹ Awënë tæ contaimpa në tæ contadongä inte në wantæpiyæ cöwë quëwëngäingä ingante apænedinque mëa go mëa mülnäni quëwëñäni iñömö iïmaï ante apænedänipa. Bitö ñäo emömi imipa, ante apænedinque tömëñäni, Bitö imite waa amönipa. Mönitö bitö imi waa ate pönente apænemönipa, ante apænedänipa. ¹⁰ Mänömaï ante apæneyönäni në aadäni në Picænäni iñömö bæinticoatodo ganca mänimpodäni Awënë tæ contaimpa në tæ contadongä inte në wantæpiyæ cöwë quëwëngäingä weca ædæ wææninqe tömengä ingante, Bitö Wængonguï Awënë imidö anguëñë, ante watapæ apænedinque tömëñäni poganta gä æncadinque Awënë tæ contaimpa gäänë cö cædinque iïmaï ante ämotamïni ante äñänipa.

¹¹ “Bitö iñömö mönitö Wængonguï Awënë imidö, ämönipa. Bitö badöinënö, ante pönente ingäimi inte öönædë ongönäni tönö inguipoga ongönäni tönö tömänäni inänite badongäimi imipa.

Bitö wii badömi bai tömänäni badongainäni quëwëñämaï dæ ancædönänipa. Mänömaï beyæ bitö eyepæ inömi iñömite, Bitö ñäo emömidö anguëñë, ante mönitö bitö imite waa amönipa.

Bitö nämä tæi piñænte në cæbi imidö, ante bitö imite ämönipa,”
ante ämotamïni ante äñänipa.

5

Wængongui Codotedo yewæmöinta wi æmpocampa

¹ Ayæ Awënë nänö aacæ tæ containpaa nê tæ contacä iñömö tömengä önönempo tömempo incæ yewæmöinta dadi ompointa næængä atabopa. Mäninta tipäataa yewæmöinta impa. Adotaa yæwedeta iñömö guñenca bai inte tee bædinta önompö æmæmpoque go mentaa inimpa. ² Ayæ Wængongui anquedo adocanque nê tæi ëmongaingä inte yedæ aa pecä atabopa. “Mäninta dadi ompointa wi æmpoquii, ante æcänö nō waa pōni Inongä inte eyepæ inte tee bædedinta wā wā ænete wi æmpoqingää,” angantapa. ³ Ayæ öönæde incæ inguipoga incæ tadömengadænga incæ cōwä ayönäni, Æcänö mäninta wi æmpoqingää, cæncadenta inö æcänö aquingää, ante edæ dæ angantapa. ⁴ Æcänö nō waa pōni Inongä inte eyepæ inte dadi ompointaa wi æmpoqingää iñömö edæ dæ angampa. Cæncadenta inö æcänö aquingää ante dæ angampa, ante adinque nangui pōni Ca ca wætabopa. ⁵ Ca ca wæbo adinque nê aadäni nê Picænäni iñönäni adocanque nê Picængä incæ botö imo, “Wædämai ie. Wæætë cōwä ae, angantapa. Adocanque onguiñængä iñömö mäninta wi æmpoqingä a ongongampa. Awënë Dabii Pæingä incæ tömengä iñömö docä Oodaa pæinäni nāni cabo iñonte nê nēöo bai tæi ëmönongä inte nê gänä cæcä ingaingä ingampa. Tömengä iñömö edæ eyepæ inte tee bædedinta önompö æmæmpoque go mentaa wi æmpodisque dadi ompointa wi æmpocæcäimpa,” angantapa.

⁶ Ayæ Wængongui Codotedo nāni wænönāni nê wæningä bai ingä atabopa. Tömengä Awënë Wængongui nänö aacæ tæ contayömö tæcæguedë ongöñongä miināni quëwënāni mēnaa go mēnaa ināni tönö nê aadāni nê Picænāni godämæ a ongönāni atabopa. Tömengä iñömö önömoncawæncöo önompö æmæmpoque go mēwäa ëmoncadinque awinca önompö æmæmpoque go mēmonga ëmongacäimpa. Edæ Wængongui Önöwoca incæ önompö æmæmpoque go mēwoga önöwocaidi bai nänö ewocadö bai mänii awincacoo inänipa. Adodāni önöwocaidi inänite inguipoga da pönongä pöningue tömēnāni inguipoga tömāmæ gote cæwodāni inänipa. ⁷ Ayæ Wængongui Codotedo iñömö Awënë tæ contayömö pöningue nê tæ contadongä önönempo tömempo inö dadi ompointa nänö nææninta ö ængantapa. ⁸ Tömengä mäninta ö ængä ate mēa go mēa miināni quëwënāni tönö nê aadāni nê Picænāni bæinticoatodo ganca mänimpodāni Wængongui Codotedo weca ponte ædæ wæænānitapa. Ināni tömānāni ampoqui adapa nāni änö nææninqwe owæta oodo inte nāni badöinta ogui waaqui eyede enga næænānitapa. Wængongui quinäni tömengä ingante nāni apænedö iñömö mänii ogui waaqui bai impa. ⁹ Tömēnāni mā äninque Imai ante ämotamini ante änānitapa. “Bitö imite wænönāni nê wænimi inte bitö nō waa pōni inömi imipa.

Inique bitö eyepæ inte dadi ompointaa ænte tee bædedinta wā wā ænete wi æmpoquimi imipa.

Waadāni nāni cabo waodāni nāni cabo incæ wadö nāni tedecabo wadö nāni tedecabo incæ

wacä awënë nāni cabo wacä awënë nāni cabo incæ wabæca nāni quëwencabo wabæca nāni quëwencabo incæ waodāni inänite bitö,

Wængongui quimini bacæminimpa, ante cædinque nāmā wepæ godonte ængabiimpa.

¹⁰ Bitö nempo quëwëningue tömēnāni bitö tönö godongāmæ aadāni bacædänimpa, ante badongabiimpa.

Mönö Wængongui ingante cæcædänimpa, ante bitö pönö cæbi ate tömēnāni,

Mönö Awënë Odeye Wængongui quí, ante nē godönäni bagainäni inänipa. Mäninäni edæ awënëidi badinque inguipoga quēwēnāni inänite aacædänimpa.”
ante ämotamini änanitapa.

¹¹ Ayæ ayömo Wængongui anquedoidi iñömö bacoo inäni inte ämotamini änäni eñēninque, Tömēnāni æpodö müdo ganca inäni, ante botö ædö cæte tee mampote eñenguimoo. Edæ müinäni quēwēnāni tönö nē aadāni nē Picænāni tönö Awënë tæ contaimpa gäänē tæcæguedē ongōñōnānite Wængongui anquedoidi iñömö yabæque godāmæ gongænte ongōnānitapa. ¹² Mäniñömö godāmæ ongōninque tömēnāni yedæ äninque iimaí ante ämotamini änanitapa. “Wængongui Codotedo ingante wæñōnāni nē wæningä inte tömengä nö waa pōni inongä inte eyepæ ingampa.

Tömengä edæ tæi piñængä ingänö anguēnē.

Tömengä quincodö incæ tōmancoo nē éacā inte tōmānō ante eñēnongä ingänö anguēnē.

Tömengä tæi piñænte inte tōmää nänö cæinēnō cædongä ingampa.

Tömengä ingante, Bitö imite waa amönipa. Bitö ñäö emömidö anguēnē, ante bitö imite watapæ apænemönipa,” änanitapa.

¹³ Ayæ Wængongui nänö badongainäni oönædē quēwēnāni incæ inguipoga quēwēnāni incæ tadōmengadæ quēwēnāni incæ gāwapæntibædē quēwēnāni incæ tōmānāni adoyedē iimaí ante ämotamini ante änäni eñentabopa. “Awënë tæ contaimpaa nē tæ contadongä ingante ayæ Wængongui Codotedo ingante tömēna inate iimaí ämönipa.

Mīnatö iminate watapæ ämönipa. Mīnatö iminate waa amönipa.

Mīnatö ñäö emöminadö anguēnē. Mīnatö tæi piñæmīna imīnadö anguēnē.

Wantæpiyæ iñonte mäniñö ante cōwē ancæmönimpa,” ante änanitapa.

¹⁴ Ante äñōnāni mēa go mēa müinäni quēwēnāni adobai, “iimaí baquīñö anguēnē” ante, “Amēé,” änanitapa. Ayæ nē aadāni nē Picænāni iñömö ædæ wææninque watapæ änanitapa.

6

Tee bædinta önonpo æmæmpoque go mentaa

¹ Ayæ Wængongui Codotedo iñömö tee bædinta önonpo æmæmpoque go mentaa incæ yewæmōinta dadi ompointa tee bædedinta tãnota wi æmpoyongä atabopa. Ayæ mēa go mēa müinäni quēwēnāni incæ adocanque iñömö tömengä nänö tedepämo detæbo tē bai inte botö imote, “Pöe,” ante yedæ angä eñentabopa. ² Tæcæ ayömo cabayo näämænta eñacä do a ongongä atabopa. Cabayo inte nē tæ contacä iñömö to piyæncaimpa næængantapa. Tömengä iñömö wadāni inänite guëadó guëa cæte tæi emongä inte gänä cædongä iñongante Awënë poganta pönönāni æninque tömengä wæætē guëadó guëa cæcæte ante cabayo mongænte gocantapa.

³ Ayæ Wængongui Codotedo wæætē tee bædedinta wataa wi æmpoyongante mēa go mēa müinäni quēwēnāni incæ wacä iñömö botö imote, “Pöe,” angä eñentabopa. ⁴ Ayæ wacä cabayo opatawæ gonga emö bai eñacä pongantapa. Waodāni incæ wacä ingä wacä ingä wænoncædänimpa, ante cædinque Wængongui godö angä beyænque cabayo inte nē tæ contacä iñömö, Inguipoga quēwēnāni piyænē cædāmāi incædänimpa, ante nē cæcä bacantapa. Ayæ, tömengä ingante ñænæ yæmē bai pönönāni ængantapa.

⁵ Ayæ Wængongui Codotedo wæætē tee bædedinta wataa wi æmpoyongante mēa go mēa müinäni quēwēnāni incæ ayængä iñömö botö imote, “Pöe,” angä

ēñentabopa. Tæcæ ayömo cabayo wentamö ēñacä do a ongongä atabopa. Cabayo inte nē tæ contacä iñömö tee manguï önönempo næængä ingantapa. ⁶ Ayæ mäa go mäa münäni quëwënäni weca tedepämo bai ēñēñömo, “Todigomö tönö tebadamö näni cænguimö, ante nanguï näni godonte æimö impa, ancæte ante iimaï angä ēñentabopa. Tömää itædē cædäni ate näni cæganca beyæ todigomö mäa diboda pönï tee manguï ganca mäninque godonte æncædänimpa. Adobai tömäa itædē cædäni ate näni cæganca beyæ tebadamö önönpo æmæmpoqwe go adoqwe diboda tee manguï ganca mäninque godonte æncædänimpa. Ayæ oquinguipe ante odibomö näni ämö eyepæ pæcæimpa, ante ee aedäni. Biinömæ ante yowe eyepæ pæcæimpa, ante ee aedäni.”

⁷ Ayæ Wængongui Codotedo wæætē tee bædedinta wataa wi æmpoyongante mäa go mäa münäni quëwënäni incæ tömangä iñömö botö imote, “Pöe,” angä ēñentabopa. ⁸ Tæcæ ayömö cabayo nämënäa ēñacä do a ongongä atabopa. Cabayo inte nē tæ contacä iñömö tömangä emöwo, Nē Wænöinengä, ante pemonte emongantapa. Waodäni näni wænte ongönömö awënë tömangä miñæ tee empo pongantapa. Wængongui Codotedo pönö cæcä beyænque tömäna inguipe quëwënäni inänite adinque mänaa go mänaa iñönänite adocanque ingante wænöninque ayæ wadäni mänaa go mänaa iñönänite adocanque ingante wænöninque nanguï inäni inänite nē wænöna badatapa. Tömäna pancadäniya inänite yaemæca nē wænöna badatapa. Ayæ tömäna godö cæda beyænque waodäni pancadäniya gue ænente näni wænguimämo pö wæncædänimpa. Ayæ tömäna godö cæda beyænque pancadäniya quingæ wodonte näni wænguimämo pö wæncædänimpa. Ayæ tömäna godö cæda beyænque pancadäniya babæidi wænönäni beyæ wæncædänimpa.

⁹ Ayæ Wængongui Codotedo wæætē tee bædedinta wataa wi æmpoyongante botö, Wængongui qui, ante näni wëmonca iya täimoga ænömengadæ inö waodäni önöwocaidi owodäni atabopa. Mäninäni Wængongui nänö angainö ante nē ēñente cædäni inte, Itota mönö Codito inongä ingampa, ante, Nö ante impa, ante apænädäni beyæ tömënäni inänite wænönäni wængainäni inänitapa. ¹⁰ Adodäni yedæ äninque iimaï äänitapa, “Awënë Wængongui bitö tömänäni inänite nē Aabi inömi imipa. Edæ tæiyæ waemö inömi inte bitö nē nö ante apænëbi imipa. Ininque inguipe quëwënäni mönitö imönite nē wænöninäni inänite æiqedö apænte anguimii. Ayæ mönitö wepæ möni gowepæ beyæ ante tömënäni inänite æiqedö panguimii ämönipa.” ¹¹ Mäninäni tömänäni inänite tömangä doyæncoo näämæntacoo pönongä ænänitapa. Æñönänite, “Wædænque ayæ ee ongödäni,” äninque tömangä, “Minitö iminöte do wænönäni wæmini bai wadäni mini tönifadäni ayæ miñäni quëwënäni inte minitö tönö Wængongui ingante nē cædönäni inänite wænoncædänimpa. Iinäni inänite wænonguënänäni inänipa, ante Wængongui nänö änö bai tömënäni inänite iinque näni wænonganca ee ongödäni,” ämopa, ante angantapa.

¹² Ayæ Wængongui Codotedo wæætē tee bædedinta wataa wi æmpoyongä atabopa. Mänifedē tæimö goinque ocæ ocæ gotimpa. Waodäni tömënäni guidengä wængä ate wæwente beyænque wentamoncoo mongænäni bai nænque iñontobæ adobai wentamö pönï emö batimpa. Apäicä pæibo iñedē incæ wepæ bai opatawæ emö batimpa. ¹³ Ayæ nëmoncoo öönædē inö owocoo iñömö wææ tæ ayæ waa wææ tæ ayæ waa wææ tæ inguipe iñömö tæ wææninque iigowæmö ayæ icadämaï iñonte nanguï woboyæ pæmæñonte woga woga cædinque tæ wæænte bai adobai tæ wæænänitapa. ¹⁴ Ayæ öönæ

incæ mincayonta dadi ompote bai dæ ä batimpa. Ayæ tömanquidi tömäa wää teiwænë ññontobæ wayömö gote dæ ä bai ñimpa.

¹⁵ Ayæ awënë odeyeyidi incæ ñænænäni inte nê cædönäni incæ tontadoidi awënëidi incæ nê nangui eadäni incæ tæi piñænte cædäni incæ tömëni guñente badänitapa. Ayæ awënë nê godonte æningä beyænque nê cæte quëwëni incæ namanque cæte quëwëni incæ tömëni tömänäni guñente badänitapa. Guñente badinque tömëni änanquidi æite ontatodë ññömö wë womönänitapa. Ayæ onquiyaboga dicabocodë tæcæguedë go guite wë womönänitapa. ¹⁶ Ayæ waodäni ñänite aa pete bai tömëni, “Onquiyaboidi ëñeedäni, dicaboidi ëñeedäni, Awënë tæ containpaa nê tæ contadongä mönitö ñmönite adämaï incæcäimpa, ante cædinque mönitö mönitonga tæ wæænte beocaedäni,” ante aa pedänitapa. Ayæ, “Wængongui Codotedo ængui badinque mönitö ñmönite pänämaï incæcäimpa, ante cædinque tæ wæænte beocaedäni,” ante aa pedänitapa. ¹⁷ “Edæ tömëna nana nangui pönï ængui baquionæ do ba ñinque æcänö ayæ quëwëngüggä. Edæ dæ ä inguinö angüënë,” ante wædänitapa.

7

Wængongui anquedo nänö nê yewæmöinäni

¹ Ayæ ate Wængongui anquedoidi mënaa go mënaa ongönäni atabopa. Adocanque yædæcapæ ñö ongönongante wacä yæwaiñö ongönongante wacä ñmatæ betamonca ñö ongönongante tömängä æmataæ betamonca ñö a on-gongantapa. Ñinque, Woboyæ mëa go mëa ññonte mönö a ongönö ñö ingui-poga go pæmænämaï, ante cædinque cædänitapa. Tömëni ömaa ññömö incæ gäwapæntibæ ññömö incæ adobai tömäo awæncoo pæyömö incæ woboyæ pæmænämaï ingæimpa, ante cædänitapa. ² Wacä anquedo nænque tamönö ñö pongä atabopa. Tömängä Wængongui nê Quëwëngüggä nänö yewæmöingö næænte pongä atabopa. Wængongui anquedoidi mënaa go mënaa ñäni ññömö ingui-poga incæ gäwapæntibæ incæ wo ëwente cæcædänimpa, ante cædinque Wængongui godö cæcä beyænque tæi piñænäni badänitapa. Mäninäni ñänite Wængongui anquedo ññowo pönningä yedæ aa pecantapa. ³ “Ee ongödäni. Edæ mönitö ingui-poga incæ gäwapæntibæ incæ awæncoo incæ ee wo ëwënämaï ññöminite mönitö Wængongui ingante nê cædäni nani önönemö ñö tömängä nänö yewæmöi ante täno yewæmoncæmöinimpa. Yewæmömöni ate mönitö mäninädë ate wo ëwente cædäni.”

⁴ Ayæ yewæmöinäni æpodänidö badänitapa, ante apæncä ëñentabopa. Tömänäni yewæmöinäni inte tiento coadenta i coatodo müido ganca ñänitapa. Idægoidi nani cabo tipæmpoga go mencabodäniya ññönäni ñmaï yewæmöinäni badänitapa.

⁵ Wëenëhedë Oodaa wodi pæinäni nani cabo ññönäni nê yewæmöinäni ññömö tipæmpoga go mëa müido ganca ñänitapa.

Ayæ Odobee wodi pæinäni nani cabo ññönäni nê yewæmöinäni wææ tipæmpoga go mëa müido ganca ñänitapa.

Ayæ Gado wodi pæinäni nani cabo ññönäni nê yewæmöinäni wææ tipæmpoga go mëa müido ganca ñänitapa.

⁶ Ayæ Atedo wodi pæinäni nani cabo ññönäni nê yewæmöinäni wææ tipæmpoga go mëa müido ganca ñänitapa.

Ayæ Nempatadii wodi pæinäni nani cabo ññönäni nê yewæmöinäni wææ tipæmpoga go mëa müido ganca ñänitapa.

Ayæ Mänatee wodi pæinäni nani cabo ññönäni nê yewæmöinäni wææ tipæmpoga go mëa müido ganca ñänitapa.

- 7 Ayæ Timeönö wodi pæināni nāni cabo iñōnānite nē yewæmōināni wææ tipæmpoga go mēa müido ganca inānitapa.
 Ayæ Debii wodi pæināni nāni cabo iñōnānite nē yewæmōināni wææ tipæmpoga go mēa müido ganca inānitapa.
 Ayæ Itacado wodi pæināni nāni cabo iñōnānite nē yewæmōināni wææ tipæmpoga go mēa müido ganca inānitapa.
 8 Ayæ Tabodöo wodi pæināni nāni cabo iñōnānite nē yewæmōināni wææ tipæmpoga go mēa müido ganca inānitapa.
 Ayæ Ootee wodi pæināni nāni cabo iñōnānite nē yewæmōināni wææ tipæmpoga go mēa müido ganca inānitapa.
 Ayæ adobaï Beencaminö wodi pæināni nāni cabo iñōnānite nē yewæmōināni wææ tipæmpoga go mēa müido ganca inānitapa.

Tæiyæñāni nāāmæntacoo mongænte a ongōninqe

9 Ayæ ate wæætē ayömö tæiyæñāni ināni a ongōnāni atabopa. Æpodānidö ināni, ante æcānō tee mampote anguingāā. Mānināni wabæca nāni quëwencabo wabæca nāni quëwencabo inte tæiyæñāni incæ waodāni nāni cabo waodāni nāni cabo inte tæiyæñāni incæ wacā awënë nāni cabo wacā awënë nāni cabo inte tæiyæñāni incæ wadö nāni tedecabo wadö nāni tedecabo inte tæiyæñāni incæ mănōmaï inōnāni inte ongōnānitapa. Ināni iñōmō nāāmænta weocoo doyæncoo mongæñāni inte yædēmæmāa önōnempo nææninque Awënë nānō aacæ tæ containpa gāänē ongōninqe Wængongui Codotedo weca a ongōnānitapa. 10 Ayæ tōmēñāni yedæ äninque iïmaï änānitapa. “Mönö Wængongui iñōmō tōmengä nānō aacæ tæ containpaa nē tæ contacä inongä inte

tōmengä adocä mönō imonte, Quëwencæminimpa, ante nē Ængä inongä ingampa.

Ayæ Wængongui Codotedo adobaï mönō imonte, Quëwencæminimpa, ante nē Ængä inongä ingampa,” änānitapa.

11 Nē aadāni nē Picæñāni tönö mēa go mēa müināni quëwēñāni Awënë tæ containpa gāänē ongōñōnānite Wængongui anquedoidi tōmāñāni iñōmō yabæ inö godāmæ ongōnānitapa. Wængongui nānō aacæ tæ contayömö gāänē guidömēmæ ædæ wææninque tōmēñāni Wængongui ingante, Bitö Wængongui Awënë imidö angüënë, ante watapæ apænedānitapa. 12 Ayæ änānitapa. “Amëë. Mönö Wængongui ingante watapæ apænemönipa.

Ayæ tōmengä ñāö ëmongänö angüënë. Tōmengä tōmāñö ante ëñëongä ingänö angüënë.

Tōmengä ingante waa adinque mönitö tōmengä ingante waa ate pönente apænemönipa.

Ayæ tōmengä tæï piñængä ingänö angüënë.

Tōmengä tæï piñængä inte tōmāā nānō cæinënö cædongä ingampa.

Wantæpiyæ iñonte cöwë mäninö ante ancæmönimpa.

Mănōmaï baquïnö angüënë, ante, Amëë,” änānitapa.

13 Ayæ nē aadāni nē Picæñāni incæ adocanque botö iïmo äninque, “Ināni nāāmæntacoo doyæncoo nē mongæñāni iñōmō æmōñānidö inānitawo. Edæ ædönö quëwēñāni inte pönānitawo,” angantapa. 14 Äñongante botö tōmengä ingante, “Awënë bitö tōmēmi do ëñëmipa,” antabopa. Äñömote tōmengä wæætē, “Mānināni nanguï nāni wæwengaimāmo iinque baganca incæ ayæ müināni quëwēñāni inānipa. Edæ tōmēñāni weocoo doyæncoo, Waëmö pönï bacæimpa, ante Wængongui Codotedo wepæñē yamongaināni inānipa,” ante nē aacä nē Picængä apæñecantapa.

¹⁵ Ayæ adocä godömenque apænecantapa.

“Mänömai beyæ Wængongui nänö aacæ tæ contaimpa gäänë a ongöninque tömënäni itädë incæ woyowotæ incæ Wængongui oncö tæiyæ waëmö oncönë tömengä ingante cöwë cädänipa.

İninqe oncontai bai tömënäni wænömënæca wo cæcä bai cædinque mänimpaa nê tæ contadongä İñömö tömënäni İnänite ante wææ aacæcäimpa.

¹⁶ Tömënäni cöwë gue ænënämai tepæ gæwænämai incädänimpa. Nænque tömënäniya tı nāwānāmai İ İninqe tömënäni gönāmai incädänimpa. Quïémë ocoi ä beyænque tömënäni gonte İnāmai İnguİnānidō angüenë.

¹⁷ Edæ Wængongui Codotedo Wængongui nänö aacæ tæ contayömö gäänë nê a ongongä İñömö tömengä İñömö mänİnāni nāāmæntacoo nê mongænāni İnänite nê acä incæcäimpa.

Tömengä edæ tömënäni İnänite quëwenguımæ tapæñömö İñömö ænte mäocä goquİnāni.

Ayæ Wængongui tömënäni wëñapæ nāni tamonte wædİ tömāmæ wadæ cæmoncæcäimpa,” angantapa.

8

Tee bædedinta tömanta wi æmpocampa

¹ Ayæ Wængongui Codotedo tee bædedinta tömanta wi æmpoyongante öönädë İñömö mëedia ooda ganca nōwæ ongonte batimpa. ² Ayæ anquedoidi öonmpo æmæmpoque go mëa ganca İnāni Wængongui weca nê a ongönāni İnänite atabopa. Mänİnāni İnänite tömengä todompeta nāni ancade öonmpo æmæmpoque go mencedea ganca pædæ godongä ænänitapa. ³ Ayæ wacä anquedo İñömö ogui waaquı İya täincade oodo İnte nāni badöincade nææninque, Wængongui qui, ante nāni İya täimpa gäänë ponte a ongongantapa. Mänİmpa oodo İnte nāni badöİmpa Wængongui nänö aacæ tæ contaimpa gäänë ongönİmpa. Ayæ, Wængongui quİnāni tömengä ingante apæneyönāni bitö ogui waaquı tancæbiİmpa, ante cædinque adocä anquedo ingante wacä pöninque nangui ogui waaquı godongä ængantapa. ⁴ Ænte öonmpo næænte ogui waaquı İya tangä İninqe tēemāmāmo Wængongui weca æİpāmoyedë Wængongui quİnāni tömengä ingante nāni apænepāmo guëa adoyömö æİpāmotİmpa. ⁵ Ayæ adocä anquedo İñömö ogui waaquı İya täincade æninque İya täİmoga gonga ænte eyede wëninque İnguİpoga İñömö wææntodongantapa. Wææntodongä ate detæbo tæi tæi tē goyö yedæ pōni ānİmpa. Yædæ yædæ nānİmpa. Ayæ goİnque gotİmpa.

Todompeta nāni ancade

⁶ Ayæ Wængongui anquedoidi öonmpo æmæmpoque go mëa ganca İnāni todompeta nāni ancade öonmpo æmæmpoque go mencedea ganca nê nææİnāni İnte todompeta öonöne gö cædedİnque we we öoncæ cädänitapa.

⁷ Wængongui anquedo tänocä İñömö tömengä todompeta İnte we we öongä ate yoguİca gonga tönö wepæ adoyömö wempodente bai İnguİpoga İñömö tæ tæ wæænİmpa. Tæ tæ wææ ate İnguİpoga İñömö pancabaa nangui ömæ İñömö gonte batİmpa. Awæncoo İñömö pancacooga incæ adobai nangui İncoo gonte wænİmpa. Gaguımæncoo İñömö tömāncoo gonte batİmpa.

⁸ Wængongui anquedo ayængä İñömö tömengä todompeta İnte we we öongä ate nænæ onquiyabo ëmö bai gonga bæcodote bai İñonte

wææntodōnāni gāwapæntibaa tæi tæi guitimpā. Tæi tæi guii ate gāwapæntibæ iñōmō pancatibaa incæ nanguī pōni æpæ iñōmō wepæ batimpā. ⁹ Ayæ gāwapæntibæ cæncadēmæ inō quēwēnāni iñōmō pancadāniya incæ nanguī ināni wænānitapā. Ayæ ñænæ wipocoo pancacooga incæ nanguī wo cæwodincoo iñōmō wo ewente guitimpā.

¹⁰ Wængonguī anquedo ayængā iñōmō tōmengā todompeta inte we we oōngā ate ñænæ nēmō iñōmō cadentato tica wodōnote bai oōnæde inō owodēmō incæ tæ wææninque ōnoncooga iñōmō pancacooga incæ nanguī æpænē iñōmō tæi tæi guitimpā. Æpæ tayōmō adobai cæncadēmæ inō tæi tæi guitimpā ¹¹ Mānīnēmō emōwo iñōmō, Tī Nānēmō, ante nāni ānēmō impā. Nēmō tæi guiiyonte nanguī æpæ iñōmō moncapæ bai tī nāmæ batimpā. Waodāni tæiyænāni iñōmō imæ tī nāmæ bagaimæ bete wænānitapā.

¹² Wængonguī anquedo ayængā iñōmō tōmengā todompeta inte we we oōngā ate nænque pancayōmonga tente ba ate apāicā adobai pancayōmonga tente ba adinque nāna apāidinō iñōmō pancaa wēmō batimpā. Nēmōncōo iñōmō pancadāniya incæ nanguī ināni wo ewente badāni ate nāni apāidinō iñōmō pancaa wēmō batimpā. Itæde iñonte tipæmpoga go mēa ooda ganca iñō mēa go mēa ooda ganca nænque ñāō apāidāmai inimpā. Ayæ woyowotæ iñonte tipæmpoga go mēa ooda ganca iñō mēa go mēa ooda ganca apāicā tōnō nēmōncōo apāidāmai inānitapā.

¹³ Ayæ ayōmote guingāmōwæ oōnæde gāmænō pao pao godinque iūmai ante aa pecā eñentabopā. “Inguipoga quēwēnāni nāni wæquinque. Nāni wæquinque. Nāni wæquinque impā, angantapā. Edæ Wængonguī anquedoidi mēnaa go adocanque ināni inte tōmēnāni todompeta inte we we ōncæ cædāni beyænque inguipoga quēwēnāni iñōmō nanguī pōni wæwenguīnāni bacædānimpa,” ante guingāmōwæ angantapā.

9

¹ Wængonguī anquedo ayængā iñōmō tōmengā todompeta inte we we oōngā ate wa nēmō oōnæde inō owodinqe inguipoga tæ wæængainēmō ongō atabopā. Mānīi nēmō ingante tadōmengadænguipo ontatodē wi ænequī godonte inimpā. ² Wi ænequī æninque ontatodē wi ænecā ate tēemāncōo ta æitimpā. Mānīi tēemāncōo ñænæ gongapamō tēemāncōo bai inimpā. Ininque iī tēemāncōo tadōmengadænguipo ontatodē ta æiyonte nænque tōnō oōnæ wentamō pōni badaimpā. ³ Tēemāncodē inō ñāwāi ta pōninque inguipoga iñōmō wææñōnānite wacā godō cæcā beyænque tōmēnāni tæimō badinque emēne inguipoga quēwēnāni bai tæ guidāni badānitapā. ⁴ Ayæ tōmēnāni inānite, Inguipoga gaguimæncōo incæ gæpæñabocoo incæ awæncōo incæ pæcōo wo ewēnāmai iedāni. Wæætē waodāniqwe ōnōnemō inō Wængonguī nānō yewæmōi inte nē yewæmōnāmai ingāināni inānite adinque mīnitō tōmēnāni inānite godō cæmīni beyænque nantate wæcædānimpa, ante wacā angantapā. ⁵ Ayæ nāwāiidi inānite edæ, Wænōedāni, ānāmai ingā inte tōmengā, Mīnitō wæætē tōmēnāni inānite ōnompō æmæmpoqwe apāicā ganca cæmīni beyæ nanguī pōni wæwæncædānimpa, angantapā. Ininque emēne tæ guii waocā nantate wæcā bai tōmēnāni nanguī pōni nantate wæwēnāni inānitapā.

⁶ Māniñedē waodāni, Æbānō cæte wænguimoo, ante ancaa cædinque wænāmai incædānimpa. Wæinēmōnīpā, ante ānāni incæte ædō cæte wæmāināni.

⁷ Ayæ nāwāiidi iñōmō tontadoidi cabayoidi guēadō guēa cæte nē godāni bai adobai emōnānitapā. Tōmēnāni ocaboga awēnē poganta oodo inte badōnīnta bai wencadānitapā. Ayæ mānīnāni awīnca iñōmō waodāni awīnca bai

ëmönänitapa. ⁸ Tömënanî ocagui ïñömö onquiyängä ocagui bai encadinque tömënanî bagacoo ïñömö neöo бага bai engadänitapa. ⁹ Tömënanî tæcætawë ïnö tæïnetä inte badöinta bai wææ mongænanitapa. Ayæ tontadoidi guëadö guëa wænoncæte ante cædinque änanî ate cabayoidi pogodo gote awoto bai wëä pönonte nanguï pöni ä bai ñawäiidi ïñömö adobai öngonguëpæ pao pao godinque ämæ godänitapa. ¹⁰ Tömënanî önomiñæ incæ emëñe önomiñæmpa bai ëmiñænänitapa. Tömënanî nani tæï piñæmæmo önomiñæ ïnö ëmiñænänî inte önompo æmæmpoque apäicä ganca godö cädäni beyæ waodäni nanguï pöni wæwënanitapa. ¹¹ Mänii ñawäiidi ïñömö awënë odaye ingante ëñente quëwënanitapa. Mänigä tömënanî awënë ïñömö tadömgengadanguipo ïñömö quëwënanî ïnanite në aacä anquedo ïnogä inte tömengä ëmowo ebedeo tededö, Abadoö, nani äwo i ayæ, Në Wo Èwengä, ante ëmongä ïninqe guidiego tededö, Apodiöo, ante pemönänipa.

¹² Täno nani wæquinque dö ïnque batimpa. Incæte godömenque mempoga ganca nanguï pöni nani wæquinque ayæ baquïnö anguëñe.

¹³ Wængongui anquedo ayängä ïñömö tömengä todompeta inte we we öongä ate tedepämo tëñö ëñentabopa. Ogui waqui iya tämpa oodo inte badöimpa Wængongui weca mäæ ongompa. Mänimago önomcawæ bai mäa go mäa mäæ ongöñömö mäniñömö tedepämo tëñö ëñentabopa. ¹⁴ Wængongui anquedo ayängä todompeta në næængä ingante iimaï angantapa. “Nænæ önonga Eopadatedö nani änonga ïñömö anquedoidi mënaa go mënaa ïnani ïñömö në ñä cæyænänänî ïnanite bitö ñimpo cæe,” angantapa. ¹⁵ Edæ mäninänî anquedoidi mënaa go mënaa ïnani ïñömö tömënanî mäninepo ïnque ba ate mäniï apäicä ïfönte mäniönæ incæ mäniï ooda ïfönte dobæ nani cæuinqe ante a ongöñönänite iimaï angantapa. Waodäni tömänäni ïñömö menca-bodäniya go adocabodänique quëwëñönänî adocabodänique ïnanite munitö wænoncæminimpa, angantapa. Ayæ ñowo tömënanî ïnanite ñimpo cæcä ate tömënanî wænoncæte ante tao godänitapa. ¹⁶ Ayæ tontadoidi ïñömö cabayo mongæinänî inäni æpodänidö inänii, ante tee mampote dootiento miñöo ganca ïnanitapa. Mänimpodäni ïnanipa, ante ëñentabopa.

¹⁷ Botö wüimonte bai ayömo cabayoidi tönö në mongæinänî ïñömö iimaï ëmönäni atabopa. Cabayo në mongæinänî ïñömö tæcætawë ïnö tæïnetä nani wææ mongæntacoo pancataa opatawæ gonga gonte bai ëmontapa. Pancataa wentamö ëmontapa. Pancataa atopode nani ä bai wiñadæ ëmö bai ëmontapa. Cabayoidi ocabo ïñömö neöo ocabo bai encadänitapa. Tömënanî önöne ïnö gonga tönö tëemä tönö atopode nani öo waadö tadedänitapa. ¹⁸ Mänii gonga tönö tëemä tönö atopode ïñömö mëmæmoque go adopæmoque nani wæñömæmocoo në tadedäni inte cabayoidi ïñömö waodäni tömänäni menca-bodäniya go adocabodänique quëwëñönänî adocabodänique ïnanite wæñönänî wænänitapa. ¹⁹ Mäninänî cabayoidi tömënanî önöne inte tæï piñænte wæñöninqe adobai tömënanî önomiñæ inte tæï piñænte wæñönänipa. Edæ tömënanî önomiñæ ïñömö tæntæ ocabo bai ëmiñænänî inte waodäni ïnanite pocænänî wænänitapa.

²⁰ Mänimämo wadonte nani wængälmæmocoo beyæ ayæ wænämäi quëwënanî inte wæwënanî incæte tömënanî nani wënæ wënæ cægäinö ante, Ancaa wæwente awädö, ante pönënamäi ïnani inte ñimpo cädämaï ïnanitapa. Wæætë oodo inte padata inte bodonte inte dica inte awæmpa inte tömënanî nani badonte cönönincoo ïñömö adämaï incoo incæte ëñënamäi incoo incæte dao dao godämaï incoo incæte tömënanî, Mönitö wængongulidi ïnanipa, ante ædæ wæænte apænedinque ñimpo cädämaï ïnanitapa. Ayæ adobai wënæidi ïnanite ædæ wææninqe, Minitö mönitö wængongulidi iminidö anguëñe,

ante ñimpo cædāmaī inte apænedānitapa. ²¹ Ayæ mänināni godōmenque waodāni inānite plinte wænōnāni inte tōmēnāni miī bete yewænāni inānipa. Nānōogængā ināmaī iñongante towente cædōnāni inte tōmēnāni awēmō ō ænāni inānipa. Mānōmaī godōmenque cædinque tōmēnāni nāni wēnæ wēnæ cægainō ante, Ancaa wæwente awædō, ante pōnēnāmaī ināni inte ñimpo cædāmaī inānitapa.

10

Wængonguī anquedo dadi ompointa guiyanta næængā

¹ Ayæ wacā anquedo nē tæī ēmongā inte oōnædē inō wæængā atabopa. Tōmēngā weocoo mongænte baī boguīmancodē pōninque tōmēngā ocaboga tæcædæca inō daimē godāmæ owotapa. Tōmēngā awinca incæ nænque baī apāidinque tōmēngā önōmēnē incæ cobacadewæwæ gonga gonte emō baī emēnēngā ingantapa. ² Tōmēngā önōnempo inō dadi ompointa ininta nāni wi æmpodinta guiyanta næængā ingantapa. Tōmēngā önōwa tōmēwa gāwapæntibaa cō cæwadinque tōmēngā dipæwa guiquēnē ōmaa cō cæwacantapa. ³ Mānōmaī cō cæwadinque tōmēngā nēōō ii pepa baī nanguī pōni yedæ aa pecantapa. Aa peyongā detæbo önompo æmæmpoque go mēa ganca wæætē tæī tēninque tededānitapa. ⁴ Detæbo önompo æmæmpoque go mēa ganca ināni iñōmō tededāni ēñēninque botō yewæmoncæ cætabopa. Tæcæ yewæmoncæ cæyōmo oōnædē inō tedepāmo iīmaī ante tedecā ēñentabopa. “Iñæmpa önompo æmæmpoque go mēa detæbo nāni tededō æbānō ante tededāni, ante wīl ēñēnguī i īninque bitō yewæmōnāmaī iē,” angantapa.

⁵ Wængonguī anquedo botō adingā iñōmō gāwapæntibaa tōnō ōmaa nē a ongongā iñōmō tōmēngā önompo tōmempo oōnædē inō pædæ æmpocantapa. ⁶ Tōmēngā tōmempo pædæ æmpodisque, Wængonguī ēñēngā botō änō ante nōingā baquīnō anguēnē, ante iīmaī angantapa. Edæ nē wantæpiyæ cōwē quēwēngaingā inte oōnædē tōmāā inguipoga tōmāā gāwapæntibæ tōmāā badōninque tōmēngā adobaī oōnædē owodāni tōmānāni inguipoga quēwēnāni tōmānāni gāwapāa quingānō owodāni tōmānāni inānite nē badongaingā inte tōmēngā emōwo apænedinque, Botō apænedō nōingā baquīnō anguēnē, ante nē apænegā iñōmō, “Mōnō ee ongōñedē do iinque batimpa, angantapa. ⁷ Edæ Wængonguī anquedo tōmangā pōni iñōmō tōmēngā todōmpeta we we ōncæ cæyongante Wængonguī nānō cæinēnō ante wē wodonte baī nānō angainō ante ñōwo iinque cæcæcāimpa. Wængonguī ingante nē cægaināni tōmēngā beyæ nē apænegaināni iñōnānite māniñō nānō cæinēnō ante do apænegaingā inte Wængonguī māniñō baī ñōwo iinque cæcæcāimpa,” angantapa.

⁸ Ayæ oōnædē inō tedepāmo adopāmo do botō ēñēnō ñōwo wæætē botō imote iīmaī angā ēñentabopa. “Wængonguī anquedo nē gāwapæntibaa tōnō ōmaa iñōmō a ongongā weca godinque bitō tōmēngā önōnempo dadi ompointa ininta nāni wi æmpodinta nānō nææīninta æe,” angantapa. ⁹ Angā ēñēninque Wængonguī anquedo weca godinque botō tōmēngā ingante, Dadi ompointa guiyanta pōnōmi æmoe, ante añōmo tōmēngā wæætē botō imo, “Æe. Æninque cæe. Bitō önōne da wēneyōmi guīñēmæ baī waēme pōni ingæimpa. Incæte yo mongænte ate cæncadē guidinque ti nā bacæimpa. Iinque cædente wæcæbiimpa,” angā ēñentabopa.

¹⁰ Wængonguī anquedo önōnempo dadi ompointa guiyanta æninque botō ade cæntabopa. Önōne guīñēmæ baī waēme pōni i incæte yo mongænte ate cæncadē guidinque ti nā badinque cædente wætabopa. ¹¹ Ayæ botō

imote angantapa. “Wacä awënë nāni cabo wacä awënë nāni cabo incæ wabæca nāni quëwencabo wabæca nāni quëwencabo incæ wadö nāni tedecabo wadö nāni tedecabo incæ wabæca wabæca nāni awënë odeye cabo iñönānite bitö, Mānināni iñānite æbānö baquüi, ante wæætë Wængongui beyæ apæ necæbiimpa,” ante angantapa.

11

Wængongui æbānö cæcää, ante mënaa apænedapa

¹ Wacä botö imote, Tee manguimpa impa, ante cæwipa bai pædæ pönöningue ayæ botö imote, “Goe, angantapa. Wængongui oncö tæiyæ waëmö oncönë godinque mänincö tönö, Wængongui qui, ante nāni iya taimpa tee mäe. Ayæ waodāni adoyömö ædæ wææningue Wængongui ingante, Bitö Wængongui Awënë imidö angüënë, ante watapæ apænedāni iñömö æpodānidö iñāni, ante tee mampote cæe. ² Wængongui oncö tæiyæ waëmö oncönë tee mäninque yacö boyāa iñömö tee mänāmai ië. Edæ mänincö boyāa wadāni oodeoidi iñāmai iñāni iñānite do godonte intapa. Mānināni edæ coadenti i doo apāicā ganca mānimpoga iñonte Wængongui nānö tæiyæ waëmö quëwëñömö incæ wo ëwente cæcædānimpa. ³ Ayæ botö imotedö ante, Botö æbānö cæboo, ante në, Nö ante impa, ante apænedā iñönate botö godö cæquimo beyænque tømëna tæi piñante badingue miido dootiento tetenta ëönæ mānimpöönæ iñonte botö beyæ apæ necædaimpa. Waodāni wæwente beyænque gômæ ëmoncoo mongæñāni bai tømëna adobai gômæ ëmoncoo mongæñinque apæ necædaimpa,” ante apæ necä ëñentabopa.

⁴ Wængongui æbānö cæcää, ante në, Nö ante impa, ante apænedā iñömö tømëna iñömö Wængongui inguipoga Awënë iñongante tømengä weca odibowæ nāni äwæ mëwāa ongöwæ bai iñapa. Ayæ tømengä weca yædo concædi ti wodönoincade mencadea ongoncade bai māñina iñömö adobai iñöna iñapa. ⁵ Wadāni, Tømëna inate wënæ wënæ cæinëmopa, ante cædāni iñinque tømëna wæætë në piinte cædāni iñānite gonga wo tadete bai cædinque wænöna wæncædānimpa. Edæ, Tømëna inate wënæ wënæ cæinëmönipa, ante në cædāni tømāñāni mänömai wæncædānimpa. ⁶ Wængongui godö cæcä beyænque tømëna tæi piñæna badingue, Wængongui beyæ möna apæneyedë cöönæ cædāmai ingæiimpa, ante cædinque öönædë tee mönete bai cæcædaimpa. Ayæ tæi piñæna iñöna inte tømëna æyedëmë cæinëna incæ wæætë wæætë cæyönate æpæncoo tømāncoo wepænque bacæiimpa. Adobai inguipoga tømāmæ quëwënāni iñānite tømëna cæda ate quiëmë wænömāmocoo incæ pö wënæ wënæ bacædānimpa.

⁷ Ayæ tømëna, Wængongui æbānö cæcää, ante iñinque apænedā ate babæcä bai mönö guiñënongå inte tadömengadænguipo inö tadinque tømëna inate guëadö guëa cædinque tæi ëmongä inte gänä cædinque wænongä wæncædaimpa. ⁸ Wænā ate tømëna baonque ñænængade nāni quëwëñömö taadö iñömö öñoncædaimpa. Edæ Todömä iñömö quëwënāni wiwa cædāni bai ayæ Equitobæ quëwënāni wënæ wënæ cædāni bai māñi ñænængade nāni quëwëñömö në quëwënāni iñömö adobai wënæ wënæ cædānipa. Māñi quëwëñömö adoyömö tømëna Awënë ingante awāa timpote wænönāni wængacäimpa. ⁹ Mëönaa go adoönæque go tæcæ itædë iñonte tømëna baö iñi acæte ante pöninque wacä awënë nāni cabo wacä awënë nāni cabo incæ waodāni nāni cabo waodāni nāni cabo incæ wadö nāni tedecabo wadö nāni tedecabo incæ wabæca wabæca nāni quëwencabo incæ waodāni nangui iñāni ponte tømëna baö acædānimpa. Ayæ, Da wënāmai ingæiimpa, ante wææ cæcædānimpa. ¹⁰ Tømëna iñömö Wængongui beyæ në apænedāna iñöna

inte inguipoga quēwēnāni inānite nanguī āna wædināni inte tōmēnāni nōwo wæætē watapæ tocædanimpa. Inique tōmēna mǎnōmāi wænte oñōna ate tōmēnāni nanguī Yæ yæ todirque wacā ingā wacā ingā, Ōnonque æe, ante pædæ godōnāni æncædanimpa.

¹¹ Mēōnaa go adoōnæge go tæcæ itædē iinque go ate Wængonguī edæ, Quēwencæmīna, ante tōmēngā nānō guēmāmāmo quēwengūimāmo woo ōongacā ate tōmēna iñōmō wæætē mīna badinque ængæ ganticædaimpa. Ængæ gantiyōna nē adāni guiquēnē ancaī guīñente wæcædanimpa. ¹² Ancaī guīñente ayōnāni tōmēna oōnædē inō tedepāmo yedæ ante eñencædaimpa. “Iñōmō pō æeda,” angā eñēninque tōmēna oōnædē inō boguimancodē æiyōna tōmēna inate nē piinte cædināni edonque acædanimpa. ¹³ Tōmēna æiyedē māniñedē goinque nanguī ocæ ocæ goquimpa. Tōmēnāni nāni quēwēñōmō onconcoo bacoo iñonte pancaconga incæ nanguī onconcoo acapowate bogocæ tæ gowæænguimpa. Ado goinque goyedē waodāni tiæte mīdo ganca wæncædanimpa. Ayæ mīlnāni quēwēnāni ancaī guīñēninque, Wængonguī oōnædē nē quēwēmi imi inte bitō nō tæi piñænte imidō anguēnē, ante wæcædanimpa.

¹⁴ Ayæ mēmpoga nāni wæquinque do iinque batimpa. Incæte godōmenque adopoque nanguī pōni nāni wæquinque oo pōni bacæimpa.

Todompeta æmæwoya

¹⁵ Wængonguī anquedo tōmangā iñōmō tōmēngā todompeta we we ōongā ate oōnædē inō wadāni nāni tedepāmo yedæ tededinque iimāi anānitapa.

“Mōnō Awēnē Wængonguī tōmēngā Codito tōnō inguipoga Tæiyæ Awēnē Odeyeda badinque wantæpiyæ cōwē aacædaimpa,” anānitapa.

¹⁶ Nē aadāni nē Picænāni iñōmō bæinticoatodo ganca ināni mānimpodāni iñōmō Wængonguī weca tōmēnāni awēnē tæ contaimpaa nē tæ contadāni inte nōwo guidōmēmæ ædæ wææninque Wængonguī ingante, Bitō Awēnē Wængonguī imidō anguēnē, ante watapæ apænedānitapa. ¹⁷ Ayæ iimāi apænedinque, “Awēnē Wængonguī bitō adobique Tōmāā nē Cædōmi inte wēēñedē do nē quēwēngāimi imi nōwobi inōmi imipa.

Bitō nāmā tæi piñæmi inte nōwo ædæmō nē aabi inōmi imipa, ante adinque bitō imite waa ate pōnente apænemōnipa.

¹⁸ Wabæca wabæca nāni quēwencabo incæ tōmānāni quēwēnāni ænguī badānitapa.

Ayæ bitō ænguī babi iinque

nē wængaināni inānite bitō apænte panguiōnæ do batimpa.

Ayæ bitō beyæ nē apænedōnāni iñōmō bitō imite nē cædōnāni iñōnānite tōmēnāni inānite bitō, Minitō cædi beyæ paga cæbo æncæminimpa, ante bitō godonguiōnæ dobæ batimpa.

Ayæ bitō quīnāni iñōnānite bitō emōwo ante bitō imite nē eñente cædōnāni iñōnānite

awēnē bai ināni incæ ōnōnānique ināni incæ tōmānāni inānite bitō, Minitō cædi beyæ paga cæbo æncæminimpa, ante bitō godonguiōnæ dobæ batimpa.

Ayæ inguipoga quēwēnāni inānite wadāni nē wo ewente cædōnāni iñōnānite bitō wo ewente cæquiōnæ do batimpa.”

¹⁹ Ayæ oōnædē inō Wængonguī tæiyæ wæmō oncō odemō wibænetapa. Wibæneyō Wængonguī, Waodāni æbānō cæte botō tōnō godongāmæ waa cæte quēwencædanimpa, ante odōmoncæte ante nānō yewæmongainca nāni da wencaincade iñōmō mānincōnē mæ ongoncade atabopa. Ayōmote yædæ

yædæ nänimpa. Yedæ pöni änimpa. Detæbo tæi tæi tēñö yedæ pöni änimpa. Goinque gotimpa. Ayæ yoguica cöönæ bai nangui cæte wæænimpa.

12

Onquiyængä tönö dadagöö nani änungä

¹ Wængongui, Mä pöni odömömo adinque eñencädänimpa, ante cædinque öönædë inö waemö pöni badongä a owo atabopa. Edæ onquiyængä iñömö nænque inte weocoo wēñate bai mongæñongä apäicämo incæ tömengä cæncadēwa ænömengadæwa inö impa. Tömengä, Awënë poganta, ante tipæmpoga go mä nēmōidi inte godämæ badöinta wencacantapa. ² Mäningä onquiyængä yædëmadä ënengä iñongante wēñængä eñacæ cæcä wæte wædinque wēñæ nantate Yæ yæ wæcantapa.

³ Iñinque Yæ yæ wæyongante öönædë inö mä pöni Wængongui nänö badöi wadö bai badöi a owo atabopa. Edæ ñænængade obe bai dadagöö nani änungä opatawæ eñacä inte tömengä ocabocoo önompo æmæmpoque go menca encacä inte mänii ocabocoo awënë pogantacoo önompo æmæmpoque go mentaa wencacä ingantapa. Tömengä önoncawæ adobai önompo tipæmpoga ocabocoo encacä ingantapa. ⁴ Tömengä önoncawæ adobai önompo cæmiñæninqe öönædë owodäni nēmōidi incæ pancadäniya incæ nangui iñäni iñanite wææntodongä inguipoga tæ wæænänitapa. Onquiyængä oo pöni iñongante dadagöö, Wēñængä eñacä ate cæncæboimpa, ante tömengä weca a ongongantapa.

⁵ Onquiyængä wēñængä onguñængä ingante mangä iñinque tömengä iñömö nänö Awënë baquinque pæcantapa. Tömengä iñömö tæiyæ awënë tömengä nempo quëwēnani iñanite aacä bai adobai tömämæ quëwēnani iñanite, iñimä cædäni, ante aacæcäimpa. Mäningä onquiyængä wēñængä ingante wacä ö ænte Wængongui weca ayæ tömengä nänö aacæ tæ conyömö mäniñömö ænte mæicä æicantapa. ⁶ Mäniñö bayonte wäänä iñömö önomæca iñömö wodii gocantapa. Tömengä beyæ ante Wængongui nänö eyepæ cæyömö mäniñömö wodii gocantapa. Mäniñömö müido dootiento tetenta ëonæ mänimpoñæ iñonte tömengä quëwente beyæ cængui eyepæ pönönani cæncæcäimpa, ante Wængongui tömengä nänö owoyömö ante do badongantapa.

⁷ Mäniñedë edæ öönædë iñömö guëadö guëa cæte wæñönänitapa. Wængongui anquedo Miiguedo nani angaingä iñömö tömengä wadäni anquedoidi awënë inongä ingampa. Tömengä tömēnani tönö dadagöö ingante wido cæcæte ante cæyönani dadagöö wæætë tömengä anquedoidi tönö wæætëdö wæætë guëa cædäni incæte ⁸ tömēnani ædö cæte gänä cæquñänii. Edæ ædö cæte öönædë iñömö ayæ quëwenguñänii, ante tömēnani iñanite wido cædänitapa. ⁹ Tömēnani iñömö ñænængade dadagöö ingante wido cæte wææntodönänitapa. Mäningä dadagöö iñömö wēenēnedë tæntæ ingaingä inte tömengä ëmowo Wēnæ Tatäna mēwoga ëmongä ingampa. Adocä, Inguipoga quëwēnani tömānani oda cæcædänimpa, ante nē wapiticæ ænte mäocä ingampa. Tömengä ingante ayæ tömengä anquedoidi iñanite inguipoga iñömö wido cæte wææntodönänitapa.

¹⁰ Ayæ ate öönædë inö tedepämo yedæ ante iñimä ä eñentabopa.

“Ñowoönæ mönö Wængongui mönö imonte, Minitö botö æmæwo æmo beyænque quëwenguimäni, ante tömengä nänö cæönæ batimpa. Ayæ tömengä nänö tæi piñænö ñowoönæ ba iñinque

tömengä adobai Tæiyæ Awënë Odeye ñöwoönæ bacäimpa.

Ayæ tömengä nänö apænte ængaingä mönö Codito adobai nämä tæi
piñænongä inte në angä bacäimpa.

Wënæ guiquënë mönö tönifadani inänitedö ante, Wënæ wënæ cädänidö
anguënë, ante wapiticæ apænete änewënonongä ingampa.

Woyowotæ incæ itæde incæ mönö Wængongui weca a ongöningue
tömengä mäninäni inänitedö ante në wapiticæ änewënonongä ifhongante tömengä
ingante inguipoga ifnömö wææntodönäni wæængantapa.

¹¹ Wængongui Codotedo wepæ tömengä nänö wænte godongaimæ beyænque
tæi emönäni badinque

mönö tönifadani ifnömö wënæ ingante gänä cädänitapa.

Ayæ, Wængongui æbänö cæcää, ante tömënäni näni apænedö beyænque
tömënäni tæi emönäni badinque wënæ ingante gänä cädänitapa.

Wadäni tömënäni inänite Wængongui beyæ wænoncæ cæyönäni tömënäni,
Mönitö guifänämaï wæncæmönimpa, ante në änäni inänitapa.

¹² Mänömaï beyæ munitö öönæde ifnömö në quëwëmini inte watapæ
tocæminimpa.

Wamini guiquënë inguipoga ifnömö æpæntibæde ifnömö në quëwëmini inte
mini wæquinque ingæimpa.

Edæ wënæ munitö weca wææ pö quëwengäimpa.

Tömengä nänö wo ewenguinö oo pöni impa, ante ëñente beyænque äingä pöni
bacampa.

Mänömaï beyæ munitö guifenguimämo baquinque impa.”

Mänömaï ante yedæ angä ëñentabopa.

¹³ Ayæ dadagöö, Botö imote inguipoga ifnömö wido cæte wææntodönäni
adi wædö, ante wædinque onquiyængä ingante wëñængæ onguifængä në
mäningä ingante bæi ongoncæte ante togængantapa. ¹⁴ Incæte Wængongui,
Önömæca ifnömö bitö beyæ botö cæyömö pao pao gocæbiimpa, ante cædinque
ñænængæde guingämöwæ önonguënepæ bai tipænguënepæa pönö badongä
enguënepænte bai onquiyængä bacantapa. Ininque onquiyængä, Tæntæ botö
imote bæi ongönämaï incæcäimpa, ante Wængongui önömæca tömengä beyæ
nänö cæyömö pao pao gocantapa. Mëa go adoque tæcæ wadepo ifhonte
tömengä mänifnömö quëwente beyæ nänö cænguï eyepæ ænte cænguifnömö
gocantapa. ¹⁵ Ayæ, Onquiyængä ingante æpæ quingæ mangui bai bæ ta tæi
guicæcäimpa, ante cædinque dadagöö tömengä önöne inö önö bai æpæ towæ
tadonte bai tao godecantapa. ¹⁶ Dadagöö towæ tadonte bai nänö tao godepæ
quiringæ pönö onguipo incæ onquiyængä beyæ ante cædinque wi ænete cæyö
ada guipæntapa. ¹⁷ Ada guipæ adinque dadagöö ifnömö onquiyængä ingante
godömenque ænguï badinque wadæ godinque, Mäningä onquiyængä wënäni
incæ wadäni inänite guëa cæte wænonguimo, ante gocantapa. Tömënäni
Wængongui nänö, Ifmaï cæedäni, ante wææ angainö ante në ëñente quëwënanäni
inte, Itota æbänö cæcää, ante në apænete quëwënanäni inönäni ifnömö mäninäni
mäningä onquiyængä wënäni ifnönänite dadagöö, Wænoncæboimpa, ante go-
cantapa.

13

Mënaa mönö guifänöna

¹ Ayæ dadagöö æpæntibæ yæwedeca emönaiya ifnömö ponte a ongongantapa.

Ayæ babæcä bai në guiñënongå iñömö æpæntibæde quëwente ta pöñongä atabopa. Mönö guiñënongå tömengä ocabocoo önonpo æmæmpoque go mencaacä encacä inte tömengä önonmoncawæ önonpo tipæmpoga ocabocooga inö encacä ingantapa. Awënë pogantacoo tipæmpoga ganca tömengä önonmoncawäa da da wencate encantapa. Ayæ Wængongui ëmowo incæ wiwa babæ wapiticæ ante äniwoi tömengä ocabocooga tömancooga inö yewæmonte encacä ingantapa. ² Mäningä mönö guiñënongå botö në adingä iñömö mëne bai ëmönongä incæte tömengä önöwa oto önöwa bai ëwacä inte tömengä önöne nëöö önöne bai ënecä atabopa. Ayæ dadagöö nämä nänö tæi piñænö ante mönö guiñënongå ingante pædæ godöningue tömengä nänö aacæ tæ contaimpa pædæ godongä ænte tæ contadingue mönö guiñënongå në awënë badingue, Iimaï cæedäni, ante nangui angä bacantapa. ³ Ayæ mönö guiñënongå adoque ocaboga ämocate wæncæ cæcä bai ingaingä incæte gämæ cæcate ingantapa.

Tömämæ quëwënanï mönö guiñënongå ingante adingue ancai guiñëningue tömänäni tömengä miñæ godänitapa. ⁴ Dadagöö godö cæcä beyænque mönö guiñënongå iñömö awënë badingue dadagöö bai në angä do bacä impa, ante adingue tömänäni dadagöö ingante, Bitö Awënë Wængongui bai imidö angüenë, ante apænedänitapa. Adobai mönö guiñënongå ingante, Bitö Awënë Wængongui bai imidö angüenë, ante apænedänitapa töö. Mäninö ante godömenque Iimaï äninque, “Æcänö mönö guiñënongå bai ingä iñömö edæ dæ angampa. Æcänö tömengä ingante guëadö guëa cædinque tæi ëmonte gänä cæqingäa.”

⁵ Dadagöö godö cæcä beyænque mönö guiñënongå iñömö nämanque pönente änewënongå badingue Wængongui ingantedö ante babæ wapiticæ ante änewëningue, Botö Wængongui bai imopa cæminï, änewënongantapa. Ayæ awënë badingue në angä badingä inte mönö guiñënongå iñömö coadenta i doo apäicäa mänpoga iñonte, Iimaï cæedäni, ante aacantapa. ⁶ Ayæ tömengä mäniñedë Wængongui ingantedö ante wënæ wënæ babæ wapiticæ ante änewënongå inte Wængongui ëmowo ante tömengä nänö quëwëñömö ante babæ wapiticæ ante änewënongantapa. Tömënanï öönæde në quëwënanï inänitedö ante adobai babæ wapiticæ ante änewënongantapa. ⁷ Tömengä Wængongui quinäni inänite guëadö guëa cæcæcäimpa, ante cædinque dadagöö godö cæcä beyænque tömengä nämä tæi piñængä badingue tömënanï inänite tæi ëmongä inte gänä cæcantapa. Ayæ dadagöö godö cæcä beyænque mönö guiñënongå iñömö wadäni nänï cabo wadäni nänï cabo incæ wacä awënë nänï cabo wacä awënë nänï cabo incæ wadö nänï tedecabo wadö nänï tedecabo incæ wabæca nänï quëwencabo wabæca nänï quëwencabo iñönänite tömengä tömänäni awënë badingue tömënanï inänite, Iimaï cæedäni, ante në angä bacantapa.

⁸ Mänömaï beyæ tömämæ quëwënanï iñömö tömengä ingante, Bitö Awënë Wængongui bai imidö angüenë, ante apænecædänimpa. Wængongui inguipoga nänö badöñedë, Botö Codotedo ingante do wænönänï wæncæcäimpa, ante do angacäimpa. Iingä Codotedo, Nänï quëwenguinta, ante nänö yewæmongaintaa ædänidö ëmowo yewæmönämaï inäni iñömö tömënanïque mönö guiñënongå ingante, Bitö Awënë Wængongui bai imidö angüenë, ante apænecædänimpa.

⁹ Në ëamonca imïni inte ëñëedäni.

¹⁰ “Æcämenque ingante ante apænedingue Wængongui, Ao bæi ongonte tee mönete bai cæedäni, angä iningue tömengä ingante do bæi ongonte tee mönecædänimpa.

Æcāmenque ingante ante apænedinque Wængonguī, Ao yaēmenca wænōmīni wæncæcāimpa, angā īninque tōmengā ingante do yaēmenca wænōnāni wæncæcāimpa.” Mānōmaī beyæ mūitō Wængonguī quīmīni īñōmō wæntæye īnāmaī inte ee cæcæmīnīmpa. Edæ tōmengā ingante godōmenque wede pōncæcæmīnīmpa.

¹¹ Ayæ ate wacā babæcā bai nē guīñēnongā guiquēnē onguipodē quēwente ta pōñongā atabopa. Codotedoidi onōmoncawæ mēwāa nāni ēmoncadō bai tōmengā adobaī encacā ingantapa. Incæte tōmengā dadagōō bai tedecantapa. ¹² Mōnō guīñēnongā tānocā pōningā nānō ānō beyænque ayængā pōningā īñōmō awēnē badinque tānocā beyænque āninque, Īmaī cæedāni, ante nē aacā ingantapa. Tānocā pōningā mōnō guīñēnongā āmocate beyæ nē wæncæ cæcā incæ wæætē gāmæ cæcadingā īñongante ayængā pōningā īñōmō tōmāmæ quēwēnāni īnānite angā ēñēninque tōmānāni tānocā pōningā ingante, Bitō Awēnē Wængonguī bai īmidō anguēnē, ante apænedānitapa. ¹³ Māningā mōnō guīñēnongā ayængā pōningā, Mā pōnī cæbo adinque ēñencædānīmpa, ante cædinque badongampa. Ayæ godōmenque mā pōnī cæcā beyænque waodāni edonque pōnī ayōnāni oōnædē inō incæ gonga inguipoga wææ adānitapa.

¹⁴ Mōnō guīñēnongā tānocā pōningā nānō ānō beyænque tōmengā weca mā cædinque ayængā pōningā īñōmō tōmāmæ quēwēnāni īnānite oda cæte nāni goquīnō ante māocā godānitapa. Edæ tōmēnāni īnānite āninque, Mōnō guīñēnongā yaēmenca guīyōmō wæætē gāmæ cæcate nē mūingā quēwengā nānō ēmōnō bai adobaī badōedāni, angā ēñente badonte concædānitapa. ¹⁵ Mōnō guīñēnongā ayængā pōningā īñōmō eyepæ cædinque mōnō guīñēnongā tānocā pōningā nānō ēmōnō bai nāni badōninca incæ, Tedecæcāimpa, ante cæcā ate māninca incæ oo guēmangantapa. Tōmēnāni nāni badōninca ante waodāni Baa āninque, Bitō Awēnē Wængonguī bai īmidō anguēnē, ante apænedāmaī īnāni īnānite māninca incæ ā beyænque wænōnāni wænānitapa.

¹⁶ Ayæ awēnēidi bai īnāni incæ onōnānique incæ māincoo ēadāni incæ māincoo omæpodāni incæ wacā godonte æningā beyænque nē cæte quēwēnāni incæ nāmanque cæte quēwēnāni incæ mānīnāni tōmānāni īnānite tōmengā nānō ānō beyænque onompo tōmempo īnō yewæmōināni badānitapa. Wæætē onompo tōmempo īnō yewæmōnāmaī īnāni inte tōmēnāni onōnemō īnō yewæmōināni badānitapa. ¹⁷ Tōmengā nānō yewæmōi yewæmōnāmaī īnāni guiquēnē tōmēnāni māincoo ædō cæte godonte ænguīnānī. Ædō cæte godonte ænāni weca gote tōmēnāni māincoo īnī godonte ænguīnānī. Ayæ mānīnō ante yewæmōi īñōmō mōnō guīñēnongā tānocā pōningā ēmōwo impa. Wīi tōmengā ēmōwo yewæmonte ī bai tōmengā ēmōwo ante beyæ, Æpodō ī, ante yewæmonte impa.

¹⁸ Mānīnō ante ēñencæte ante nāni ēñēnō ante eyepæ encadāni inte ēñencædānīmpa. Ocaī nē encacā īninque, Mōnō guīñēnongā tānocā pōningā nānō, Æpodō ī, ante ēñencæte ante cæcæcāimpa. Edæ tōmengā, Æpodō ī, ante waocā, Æpodō ī, ante adopo impa. Tōmengā nānō, Æpodō ī, ante teitiento teitenta ī tei impa.

14

144.000 ganca īnāni nāni āmotamīni āinō

¹ Ayæ botō ayōmote Wængonguī Codotedo ānanquidi īñōmō Tiōno nāni anquidi mānīñōmō a ongongā atabopa. Tōmengā weca waodāni tiento coadenta ī coatodo mūido ganca īnāni inte Wængonguī Codotedo ēmōwo adobaī

tömengä Mæmpo Wængongui emowo nani önönemö inö në yewæmöinani inte a ongönani atabopa. ² Ayæ botö eññömote öönädë inö tedepämo ante ñænæ tēñabo ante bai detæbo eyequei tē bai eññinque adobaï waodäni nani adapate nani ampoque inte tæiyænani ampoyönani ante bai tedepämo tē eññatabopa. ³ Tiento coadenta i coatodo müdo ganca inäni iñömö mä äninque waa ämotamini ante änanitapa. Wængongui nänö aacæ tæ containpa gäänë ämotamini äñönani münnani quëwënnani mäa go mäa ganca inäni në aadäni në Picænani tönö eññänitapa. Tiento coadenta i coatodo müdo ganca inäni ingui-poga quëwënnani tönö adoyömö quëwëñönani, Godonte æmo beyænque quëwenguimini, ante Wængongui nänö në æninänique i ämotamini äinö ante eññente ancædänimpa. Wadäni guiquënë ædö cæte eññente anguinäni.

⁴ Iinani iñömö Wængongui ingante ante waëmö quëwencæmönimpa, ante cædinque, Onquiyængä, ante në towënamäi ingainäni inänipa. Iinque tömënnani Wængongui Codotedo ædönö gocä tömengä müñæ cöwë godänipa. Tömënnani waodäni tönö adoyömö quëwëñönani Itota, Botö wepæ beyænque quëwenguimini, ante tömënnani inänite ængacäimpa. Täno amiña bayedë tä pedinque minitö, Wængongui qui baquimpa, ante mini cönöni bai mäninani adobaï Wængongui quinnani badinque Wængongui Codotedo quinnani inänipa. ⁵ Adodäni cöwë babæ änamäi inäni iinque wadäni ædö cæte tömënnani inänitedö ante, Babæ änanipa, ante anguinäni. Tömënnani edæ cöwë wënæ wënæ cædämaï inänipa töö.

Wængongui anquedoidi mënaa go adocanque nani änö

⁶ Ayæ Wængongui anquedo wacä iñömö öönädë inö pö pao pao gocä atabopa. Ingui-poga në quëwënnani inänite wabæca nani quëwencabo wabæca nani quëwencabo incæ waodäni nani cabo waodäni nani cabo incæ wadö nani tedecabo wadö nani tedecabo incæ wacä awënë nani cabo wacä awënë nani cabo iñönänite anquedo tömänani inänite Wængongui wantæpiyæ cöwë nänö watapæ apænedö ante eññencædänimpa, ante apænecæte ante pongantapa. ⁷ Mäningä Wængongui anquedo iñömö yedæ iimaï äninque, “Wængongui apænte nänö anguiönæ do iinque bayonte mänionæ tömämini mini cægainö ante tömengä apænte ancæcäimpa. Iinque tömengä ingante guññinque ee aedäni. Adobaï tömengä ingante waa aedäni. Tömengä edæ öönädë incæ ingui-poga incæ æpæntibæ incæ æpæ tayömö incæ tömää në badongaingä ingante minitö, Bitö Awënë Wængongui imidö anguënë, ante ædæ wææninque watapæ apæneedäni. Mäninque ämopa,” angantapa.

⁸ Mäningä Wængongui anquedo gocä ate wacä Wængongui anquedo ayængä pöninque iimaï angantapa. “Babidönia nani äñömö do wo ewente batimpa. Babidönia nani waëmö quëwëñömö i incæte do wo ewente ba aedäni. Mänifñömö në quëwënnani wënæ wënæ cædinäni iñömö onquiyængä në towengä bai cædinque biinömæ bete quidi quidi dowæninque towencædänimpa, ante ti nämæ godonte bai cædänipa. Tömënnani mänömaï godö cædäni beyænque wabæca nani quëwencabo wabæca nani quëwencabo wæætë wënæ wënæ cædänitapa. Mäninque ämopa,” angantapa.

⁹⁻¹⁰ Ayæ mäningä Wængongui anquedo gocä ate wacä Wængongui anquedo tömengä pöninque yedæ iimaï angantapa. “Mönö guññenongä tänocä pöningä ingante æcänö, Bitö Awënë Wængongui bai imidö anguënë, ante apænecäa. Ayæ tömengä nänö emönö bai nani badöninca gäänë ædæ wææninque æcänö apænecäa. Wængongui tömënnani inänite nanguï piincæcäimpa. Tömënnani önompö incæ önönemö incæ mönö guññenongä nänö yewæmöi në yewæmöinani adinque Wængongui adobaï tömënnani inänite nanguï

pīincæcāimpa.” Āninqwe Wængonguī anquedo godōmenque apænecantapa. “Mānināni Wængonguī biinōmæ nānō pīimæ becædānimpa. Mānimænque æninqwe tōmengā nānō piinte owætadē pe fiinængantapa. Mānimænque nē bete bai ināni iñōmō nangui pōni wæwencædānimpa. Wængonguī tæiyæ waēmō anquedoidi weca ayæ Wængonguī Codoteyo weca gonga bæcoyōmō atopode nāni ōō wadō gonga bæcoyōmō ōō wayōmō māniñōmō iināni æmæwo gonte ba bai nangui wæwencædānimpa,” angantapa.

11 “Ayæ tōmēnāni gonga bæcoyōmō māniñōmō wæwēñōnāni nāni wæwēmāmo tēemā bai cōwē æicōompa. Woyowotæ incæ itadē incæ mānināni edæ guēmānāmai incædānimpa. Tōmēnāni iñōmō, Mōnō guifiñēngā tānocā pōningā weca ædæ wææninque, Bitō Awēnē Wængonguī bai imidō anguēnē, ante nē apænedāni inānipa. Ayæ tōmengā nānō ěmōnō nāni badōinca gāānē ædæ wææninque nē apænedāni adobai tōmengā ěmōwo nānō yewæmōi nē yewæmōināni inte mānināni tōmānāni wantæpiyæ mānōmai guēmānāmai inte wæwencædānimpa. Māninqwe āmopa,” angantapa.

12 Mānōmai beyæ mīnitō Wængonguī quimīni iñōmō tōmengā nānō, Iīmai cæedāni, ante nānō wææ angainō ante ěñente cædōmīni inte ayæ Itota ingante godōmenque wede pōnēmīni inte mīnitō wæntæye ināmai inte ee cæcæmīnimpa.

13 Ayæ ate botō ōōnædē inō tedepāmo iīmai ante ěñentabopa. “Bitō iīmai yewæmōe,” angantapa. “Nōwo ganca ayæ ate Awēnē Itota ingante pōnente nē wænāni inte tōmēnāni nāni toquinque.”

Ante āñongā Wængonguī Tæiyæ Waēmō Ōnōwoca, “Ao āmopa, angampa. Nāni toquinque ingæimpa. Tōmēnāni nāni nangui cægāinō űimpo cæte guēmancædānimpa. Edæ tōmēnāni nāni waa cægāinō ōōnædē iñōmō edonque pōni acæimpa,” ante angantapa.

Inguipoga quēwēnāni beyæ amiña bai baccæimpa

14 Ayæ botō ayōmo nāāmænta boguimā mæ owo atabopa. Adocanque Waocā ěñagāingā ingā bai iñōmō māni boguimāa tæ contacā atabopa. Tōmengā ocaboga awēnē poganta oodo inte badōinta encacā inte tōmengā nānō ōnōnempo yaēmē bai waingamē idāmæ engamē næængā atabopa.

15 Ayæ ate wacā anquedo Wængonguī oncō tæiyæ waēmō oncōnē ta pōninque boguimāa nē tæ contacā ingante iīmai yedæ ante aa pecantapa. “Inguipoga quēwēnāni botō imote nē wede pōnente waa cædōnāni iñōmō nē mīnte pæmō bai ināni inte tōmēnāni nāni to amiña bayedē bai impa. Wadæ wadæ pinōninque nāni ō æñedē bai do bayonte bitō yaēmē bai bitō nææi ænte gote mānināni inānite wadæ wadæ pinonte bai cædinque ō æe.” 16 Angā ěñēninque boguimāa nē tæ contacā gote inguipoga iñōmō tōmengā yaēmē bai nānō nææi inte wadæ wadæ pinonte bai cædinque tōmānāni nē mīnte pæmō bai ināni inānite ō ængantapa.

17 Ayæ ōōnædē iñōmō Wængonguī oncō tæiyæ waēmō oncōnē ongonte ta pōninque wacā anquedo adobai yaēmē bai waingamē idāmæ engamē nææente pongantapa. 18 Tōmengā pongā ate Wængonguī anquedo wacā pongantapa. Wængonguī oncō tæiyæ waēmō oncōnē, Wængonguī qui, ante iya tæe, ante nē ānongā inte nāni iya tāimoga gāānē ongōninque ta pōninque yaēmē bai waingamē idāmæ nē engamē næængā ingante iīmai yedæ apænecantapa. “Inguipoga tomāo nē wēnæ wēnæ cædāni iñōmō yowecoo bai inānipa. Mānināni yowe ite bayedē bai ināni adinque bitō yaēmē bai bitō nææi ænte gote yowecoo wangō tadampote gæte bai cædinque tōmēnāni inānite cæe.”

19 Angä eñëninque Wængongui anquedo inguipoga iñömö tömengä yaemë bai nänö nææi inte wangö tadampote cædinque yowecoo gædäni bai tömengä nê wënæ wënæ cædäni inänite adobai cæcantapa. Ayæ yowepæ ante ñænængade nani pinä pinä gäwate cæincadedé yowecoo wææntodonte bai cædinque tömengä wënæ wënæ cædäni inänite Wængongui pïnte nänö päiñömö wido cæcantapa. 20 Mänü tömënäni yowecoo ænte pinä pinä gäwate cæincade iñömö tömënäni nani quëwëñömö yabæca ongompa. Mänüñömö tömënäni inänite pinä pinä gäwate bai cædänitapa. Cæyönäni tömënäni wepæ nangui pöni gotimpa. Cabayo goto winediñömö æi ganca tömënäni wepæ mäninganca æi godinque todee tiento quidömetodo ganca mäninganca nangui pöni wepæ gotimpa.

15

Tiæte ganca nani wæwenguimämo pompa

1 Ayæ botö ayömote Wængongui ñöwo wæætë mä pöni odömömo adinque eñncædänimpa, ante cædinque öönædë inö bamönengæ pöni badongä a owo atabopa. Wængongui anquedoidi önompo æmæmpoque go mënaa inäni iñömö öönædë ongöñönänite tömënäni inänite, Minitö cæmini beyænque waodäni nani wæwenguimämocoo önompo æmæmpoque go mempoga pongæimpa, angä eñente ænte pönänitapa. Mänü wæwëmämocoo æmæwo ba adinque Wængongui nänö ængui panguimämo eyepæ bapa.

2 Ayæ æpæntibæ iñömö awocawænta emö bai adinque botö mänintibæ tönö gonga guëa wempodente bæcco atabopa. Adotibæ yæwedeca waodäni mä ongonänipa. Mäninäni iñömö mönö guiñëngongä ayæ pönängä ingante ante ayæ tömengä nänö emönö bai nani badöinca ante Baa äninque tömënäni tæi emonte gänä cædäni inänitapa. Adodäni tömengä emöwo ante, Æpodö i, ante Baa ante yewæmönämaï inäni atabopa. Wængongui tömënäni inänite adapate nani ampoqui godongä ænte næænte a ongonänipa. 3 Tömënäni a ongöninque Wængongui ingante nê cægaingä Möitee wodi ämotamini nänö againö ante ayæ Wængongui Codotedo ämotamini nänö againö ante iïmaï ämotamini änanipa.

“Awënë Wængongui bitö adobique Tömää Cægaïmi inte

bitö mä cædö iñömö waemö pöni inönö anguënë.

Bitö tömämæ quëwënäni Tæiyæ Awënë Odeyebi imidö anguënë.

Quiëmë cædinque bitö nê nö cæbi imipa.

4 Awënë eñëmi, Æcämë bitö imite guiñënämaï inguingää.

Ayæ bitö emöwo ante pönente æcämë mä wa adämaï inguingää.

Edæ bitö adobique tæiyæ waemö imipa.

Tömää bitö nö cædinö edonque pöni ba adinque

wabæca wabæca nani quëwencabo tömänäni bitö weca ponte ædæ wææninque

bitö imi, Bitö Awënë Wængongui imidö anguënë, ante ancædänimpa.”

5 Ayæ ate botö ayömote öönædë iñömö Wængongui tæiyæ waemö oncö incæ æmontaicö bai inte tömengä nänö nänënë owocö iñömö wi ænete bayö atabopa. 6 Wængongui anquedoidi önompo æmæmpoque go mënaa inäni mänincönë ongonte ta pönänitapa. Tömënäni cædäni ate waodäni nani wæwenguimämo iñömö önompo æmæmpoque go mempoga pongæimpa. Tömënäni weocoo waëmoncö nino nani ancoo ñäö bai emoncoo mongæänäni inänipa. Tömënäni tææctawë inö pacadeyænta oodo inte nani badöinta mongæënëmæinäni inänipa.

⁷ Ayæ mīnāni quēwēnāni mēnaa go mēnaa iñōnāni adocanque Wængongui anquedoidi ōnompō æmæmpoque go mēnaa ināni iñōnānite owætacoo adotaque adotaque pædæ godongā ænānitapa. Mānintacoo ōnompō æmæmpoque go mentacoo iñōmō oodo inte nāni badōintacoo inte Wængongui nē wantæpiyæ cōwē quēwengaingā ingā nānō ængui pāmāmo eyede ēnentapa. ⁸ Wængongui nānō ñāō apāidō beyæ ayæ tōmengā nānō tæi pīñæmāmo beyæ tōmengā tæiyæ waēmō oncōnē iñōmō tēēmāmāmo eyede mæ ongompa. Ayæ Wængongui anquedoidi ōnompō æmæmpoque go mēnaa ināni cædāni ate waodāni nāni wæwenguimāmo ante ōnompō æmæmpoque go mempoga nāni wæwenguinganca iinque baganca æcāmenque incæ Wængongui tæiyæ waēmō oncōnē guidāmaī incædānimpa.

16

Wængongui nānō ængui panguintacoo

¹ Ayæ ate Wængongui tæiyæ waēmō oncōnē inō tedepāmo yedæ tē ēñentabopa. Nē angā iñōmō Wængongui anquedoidi ōnompō æmæmpoque go mēnaa ināni inānite, “Goedāni, āninqe, Wængongui owætacoo nānō ængui panguintacoo ōnompō æmæmpoque go mēna ganca incoo næænte gote inguipoga iñōmō gao cædāni,” angā ēñentabopa.

² Wængongui anquedo tānocā godinque tōmengā owætadē ēnē incæ inguipoga gao cæcantapa. Gao cæcā ate mōnō guññongā ayæ pōningā nānō yewæmōi nē yewæmōināni inte tōmengā nānō ēmōnō bai nāni badōninca gāānē ædæ wææninque apænedāni iñōnānite tōmēnāni ayaa nantai ñōmæi tōmāo baadinque nantate wædānitapa.

³ Wængongui anquedo ayæ nē gocā tōmengā owætadē ēnē incæ æpæntibæ cæncadēmæ gao cæcā ate mānimæ iñōmō do wænīnāni wepæ bai bayonte mānintibædē quēwēnāni tōmānāni wænānitapa tōō.

⁴ Wængongui anquedo ayæ nē gocā tōmengā owætadē ēnē incæ æpæñē tōmānonga gao cædinque æpæ tayōmō tōmāñōmō gao cæcā ate mānimæ tōmāmæ wepæ batimpa. ⁵ Ayæ ate Wængongui anquedo æpæ tōmāmæ beyæ nē angā inte iīmāi apæñecā ēñentabopa.

“Mōnō Tæiyæ Waēmō inōmi ēñēmi, bitō wēēñēñedē do nē quēwengaimi imi ñōwobi adobi inōmi iimipa.

Mānōmaī tōmēnāni inānite apænte ante pāninque bitō nō cædinque apænte pānīmi iimipa.

⁶ Edæ bitō quīnāni tōnō bitō beyæ nē apænegaināni inānite wænōnāni ate tōmēnāni nē wænāni wepæ nāate bagadānimpa. Bitō wæætē nē wænonte nāate badāni nāni cægāi beyæ wepæ godōmi begadānimpa,” angantapa.

⁷ Ayæ Wængongui quī, ante nāni iya tāimoga inō tedepāmo tē ēñentabopa. “Ao āmopa. Awēñē Wængongui bitō adobique Tōmāā Cægāimi inte, iīmāi pancæboimpa, ante bitō apænte angāinō bai cædinque tōmēnāni inānite pāninque bitō cōwē nō cæte waa pāmipa.”

⁸ Wængongui anquedo ayæ nē gocā tōmengā owætadē ēnē incæ nænque mæ owoyōmō māniñōmō gao cæcantapa. Ayæ waodāni æmontaiya montæ gongate wæcædānimpa, ante cædinque nē godō angā beyænque nænque nangui tī nāwā batimpa. ⁹ Māñi nangui tī nāwante beyæ waodāni montæ gongate badāni incæte tōmēnāni nāni wēnæ wēnæ cædinō ante, Ancaa wæwente awædō, ante ayæ pōñēnāmaī ināni inte ñimpo cædāmaī inte Wængongui

ingante waa adāmai inānitapa. Tömēnāni, Wængonguī cæcā beyænque mōnō wæwēmāmocoo pōnimpa, ante wædinque Wængonguī ingante pīiniquē tōmengā ěmōwo ante wēnæ wēnæ babæ ante tedewēnānitapa.

¹⁰ Wængonguī anquedo ayæ nē gocā tōmengā owætadē ěnē incæ mōnō guīñēnongā tānocā pōningā nānō aacæ tæ containpaa gao cæcā ate tōmengā awēnē odeye inongā inte nānō aayōmō mæ māmōnte bai batimpa. Waodāni nantate wædinque ōnonguēñēwa æo pocænguēñēwate wædānitapa. ¹¹ Mānōmai wædāni incæte tōmēnāni nāni wēnæ wēnæ cædinō ante, Ancaa wæwente awædō, ante godōmenque pōnēnāmai ināni inte ñimpo cædāmai inānitapa. Wæætē nantai baate nantate wædinque Wængonguī ōönædē quēwēnongā ingante piinte badinque wēnæ wēnæ babæ ante tedewēnānitapa.

¹² Wængonguī anquedo ayæ nē gocā tōmengā owætadē ěnē incæ ñænæ ōnonga Eopadatedō nāni ānonga māñinonga gao cæcā ate awēnē odeyeidi ñenque tamōnō quēwente nāni pōnguīnō taadō ante ōnō tōmāo amimō batimpa.

¹³ Ayæ wēnæidi wentamō nāni ěwocacabo mēnaa go adocanque ināni iñōmō weque bai ināni ta pōnāni atabopa. Dadagōō ōnōnē inō adocanque wēnæ ta pongantapa. Mōnō guīñēnongā tānocā pōningā ōnōnē inō wacā wēnæ ta pongantapa. Ayæ Wængonguī beyæ nē apænedōmo ñmopa, ante nē babæ apænedongā ōnōnē inō wacā wēnæ pongantapa. ¹⁴ Māñināni wēnæidi ōñowocaidi ināni inte mā cædāni inānipa. Ināni iñōmō tōmāmæ awēnē odeyeidi weca āñecæ godinque tōmēnāni inānite apænedinque, Awēnē Wængonguī adocanque Tōmāā nē Cægaingā inte nānō apænte anguionæ iñonte munitō godongāmæ ponte guēadō guēa cæcæminimpa, ante cædānipa.

¹⁵ “Mōnō Awēnē nāmā incæ iīmai angantapa. Aedāni. Nē awēmō ængā iñontobæ pongā bai botō adobai ānāmai inte poncæboimpa. Æyedēñō pōnguīngā, ante nē mōnāmai ongongā iñōmō tōmengā wānō cōnongā bai inongā inte nānō toquinque. Edæ tōmengā, Ōmaabo ināmai incæboimpa, ante ayæ, Guīñēñate wædāmai incæboimpa, ante tōmengā weocoo tōmē weca ee mangā inongā ingampa,” angantapa.

¹⁶ Māñī wēnæidi ōñowocaidi tōmāmæ awēnē odeyeidi inānite āñecæ gote ānāni ěñēninque awēnē odeyeidi iñōmō tōmēnāni tontadoidi tōnō Adāmaguedōō ebedefō tōnō ãñōmō adoyōmō godongāmæ pōnānitapa.

¹⁷ Ayæ Wængonguī anquedo tōmangā nē gocā tōmengā owætadē ěnē incæ woboyæ owoyōmō māñīñōmō gao cæcā ate ōönædē inō Wængonguī tæiyæ waēmō oncōnē tōmengā nānō aacæ tæ contayōmō māñīñōmō tedepāmo yedæ tededinque, “Ñōwo iinque batimpa,” angantapa.

¹⁸ Ayæ ate yædæ yædæ nāninimpa. Detæbo tæi tæi tē goyō yedæ pōni ānimpā. Ayæ goinque nanguī pōni ocæ ocæ gotimpa. Waodāni inguiipoga nāni quēwenganca tōmanganca māñī goinque bai wa goinque cōwē godāmai inimpa. ¹⁹ Goinque ocæ ocæ goyonte tōmēnāni nāni ñænæ quēwēñōmō incæ tænguimæ tænguimæ godinque mēñōmōnga go adoyōmonque batimpa. Ayæ wabæca nāni quēwencabo wabæca nāni quēwencabo incæ tōmāo nāni quēwēñōmō onconcoo acapowate bogocæ tæ gowæænimpā. Wængonguī adobai, Babidōnia nāni waēmō quēwēñōmō quēwēnāni wēnæ wēnæ cædānipa, ante pōnente wædinque ænguī badinque, Mīni wæwenguinque impa, ante owæta biinōmæ nānō pīimæ eyede ěnē godonte bai cædinque tōmēnāni inānite nanguī pīiniquē pangantapa. ²⁰ Tōmāā wāā tēiwænē iñōmō yogæ guitimpa. Ayæ onquiyabocoo adobai dæ bibitapæ batimpa. ²¹ Ayæ ōönædē inō yoguica

cōōnæ bai waodāniya tæi tæi wæænimpa. Māninca tæi tæi wææninca ado-
caque incæ wodo tiēē diboda tee mā ganca enca impa. Yoguica wēnæ wēnæ
incapa, ante adinque waodāni, Māninca mōnō wēnæ wēnæ wæwēmāmo
impa, āninque Wængongi ingante piinte badinque wēnæ wēnæ babæ ante
tedewēnānitapa.

17

Onquiyængä mäincoo beyæ nē towente quēwēnongä

¹ Wængongi anquedoidi ōnompō æmæmpoque go mēa ganca ināni ōnompō
æmæmpoque go mēa ganca owætacoo nē næænāni iñōnānite adocanque
botō weca ponte, “Pōe, angantapa. Onquiyængä mäincoo beyæ nē towente
quēwēnongä iñōmō æpæncoo yædopāa nē tæ contactā apænte nānō pan-
guinō ante botō odōmōmo acæbiimpa. ² Inguipoga awēnē odeyeidi incæ
tōmængä tōnō towengadānimpā. Waodāni inguipoga quēwēnāni incæ adobai
tōmængä towēinēnō beyæ tōmængä biinōmæ bete bai quidi quidi dowænte bai
pōnēnāmai cægadānimpā,” ante apænecā ēñentabopā.

³ Wængongi Ōnōwoca incæ botonga pō guiyongä botō wiiimonte bai iimāi
atabopā. Wængongi anquedo adocā iñōmō botō imote ō ænte māo ōnōmæca
iñōmō cōnongä ongontabopā. Māniñōmō ongōninque botō onquiyængä
babæcā bai nē guñēnongāa mongænte a ongongä atabopā.

Māningä mōnō guñēnongä opatawæ ēñadongä inte emōwocoo tōmængä
baonga godāmæ tōmængä yewæmōi ēñacā ingantapā. Māniwocoo Wængongi
ingantedō ante wēnæ wēnæ babæ wapiticæ āniwocoo inōnimpā. Māningä
mōnō guñēnongä nānō ocabocoo ōnompō æmæmpoque go mēa encacā
inte tōmængä nānō ōnōmoncawæncoo ōnompō tipæmpoga emoncacā ingan-
tapā. ⁴ Onquiyængä iñōmō tōmængä weocoo awēnēidi waēmoncōo nāni
mongæncōo tōnō opatawæ emoncōo mongængantapā. Tōmængä, Botō waēmō
incæboimpā, ante oodo badōincoo tōnō dicamō nāni nangui godonte ænincoo
tōnō pededamō nāni amō māniñoncoo mongænte ingantapā. Tōmængä
ōnōnompō owætadē oodo inte badōintadē quimæmē baapæ bai i eyede en-
gapæ næængantapā. Māningä onquiyængä quiēmē nānō wēnæ wēnæ cæpāmo
nānō towente quēwēnō bai mānintadē næængantapā. ⁵ Adocā onquiyængä
tōmængä ōnōnemō inō emōwo yewæmōi emongä ingantapā. Māniwo wē
wodonte bai i incæte iimāi ante impā.

“Babidōnia nāni waēmō quēwēñōmō i incæte onquiyængä nē towengä bai
impa.

Waodāni nē godō towēnāni wānā bai māningä onquiyængä ingampā.

Ayæ adobai inguipoga quēwēnāni wiwa nāni cæinēnō ante nē cædāni wānā
bai adocā onquiyængä ingampā.”

Mānōmai tōmængä ōnōnemō inō yewæmōnte emongantapā. ⁶ Wængongi
quñāni ingaināni tōnō Itota ingante ante apænedāni beyæ nē wængaināni
tōmēnāni wepæ bete bai māningä onquiyængä quidi quidi dowænte bai ingä
botō atabopā. Tōmængä ingante adinque botō ancai guñēnte wætabopā.

⁷ Ancai guñēnte wæyōmote Wængongi anquedo botō imote iimāi an-
gantapā. “Quinante ancai guñēnte wæbii. Mōnō guñēñongä iñōmō
tōmængä ocabocoo ōnompō æmæmpoque go mencaa encacā inte tōmængä
ōnōmoncawæncōo ōnompō tipæmpoga emoncacā inongä inte onquiyængä in-
gante nē mongængä ingampā. Onquiyængä ingante nē mongængä mōnō
guñēnongä tōnō onquiyængä tōmēna nāna wē wodonte ini æbānō i, ante
apænebo ēñēe. ⁸ Adocā mōnō guñēnongä bitō adingä iñōmō wēēñēdē

quëwengaingä inte ñowo dæ angä incæte ayæ ate tadömengadænguipodë inö ææ ta poncæcäimpa. Ta pöningue tömengä nänö æmæwo ömæ ëwenguingue ingæimpa. Wængongui, Quëwenguinta, ante inguipoga badönämai iñedë nänö yewæmongaintaa inguipoga quëwënäni tömënäni ëmowo në yewæmönämai inäni inö tömënäni iñömö mönö guïñëongä do quëwengaingä ñowo dæ angä incæte ayæ ate pongä adingue ancai guïñente wæcädänimpa,” ante Wængongui anquedo apæñecantapa.

⁹ Ayæ tömengä wæætë apæñecantapa. “Mäninö ante ëñencæte ante ocai ëñënö në encacä inte ëñencæcäimpa. Mönö guïñëongä tömengä önonpo æmæmpoque go mëa ocabocoo iñömö önonpo æmæmpoque go mëa änanquidi bai inänipa. Mänii änanquidiboga onquiyængä tæ contacä ingampa. Mänii ocabocoo adobai önonpo æmæmpoque go mëa awënë odeyeidi bai inänipa. ¹⁰ Mänimpodäni iñönänite önonpo æmæmpoque awënë odeyeidi inänite wido cædänitapa. Adocanque awënë odeye iñömö ñowo aacä ingampa. Wacä awënë odeye ayæ pönämai ingä incæte tömengä pöningue wantæ iñö ongonte aacæcäimpa. ¹¹ Önonpo æmæmpoque go mëa ganca awënë odeyeidi näni cabo iñönänite mönö guïñëongä adocä inongä incæte tömënäni beyæ ponguingä ingampa. Tömengä iñömö wëñëñedë në quëwengaingä incæ ñowo dæ angä inongä inte tömengä nänö æmæwo ömæ ëwenguingue poncæcäimpa,” ante Wængongui anquedo apæñecantapa.

¹² Ayæ tömengä wæætë apæñecantapa. “Ayæ önonpo tipæmpoga önömoncawæncoo bitö adimoncawæncoo iñömö önonpo tipæmpoga awënë odeyeidi bai inäni incæte ayæ aadämai inänipa. Incæte ayæ ate tömënäni inänite änäni ate awënë odeyeidi badingue tömënäni, iimaï cædäni, ante änäni bacädänimpa. Ayæ mönö guïñëongä tönö tömënäni adoque oda ganca godongämæ aacädänimpa. ¹³ Tömënäni adodö ante pönänäni inte, Mönö tæi piñænö ante guïñëongä ingante godömö æncæcäimpa. Ayæ awënë odeyeidi inömö inte mönö, iimaï cædäni, ante në ämö imö bai mönö tömengä ingante ämö në angä bacæcäimpa.

¹⁴ “Mäninäni Wængongui Codotedo ingante guëadö guëa cæcädänimpa. Incæte tömengä iñömö awënëidi tömänäni Awënë inongä ingampa. Ayæ woadäni awënë odeyeidi iñönänite tömengä Tæiyæ Awënë Odeye inongä ingampa. Inique tömengä tæi ëmönongä inte tömënäni inänite gänä cæcæcäimpa. Tömengä, Botö miñæ tee empo goquimini, ante woadäni inänite aa pedingue apænte nänö në ængainäni inte tömengä miñæ cöwë ædæmö cæte tee empo godäni inänipa. Mäninäni adobai tömengä tönö godongämæ guëadö guëa cæte wænonguinäni inte tæi ëmonte gänä cæcädänimpa,” ante Wængongui anquedo apæñecantapa.

¹⁵ Ayæ tömengä wæætë botö imote iimaï apæñecantapa. “Onquiyængä mäincoo beyæ towente quëwëongä inte æpæncoo yædopäa tæ contacä abitapa. Mänii æpæncoo iñömö tæiyænäni woadäni bai inänipa. Wabæca näni quëwencabo wabæca näni quëwencabo incæ wadö näni tedecabo wadö näni tedecabo incæ woadäni tæiyænäni inänipa. Mäninäni tömänäni mäni æpæncoo bai inänipa. ¹⁶ Ayæ önonpo tipæmpoga önömoncawæncoo bai awënë odeyeidi tönö mönö guïñëongä iñömö tömënäni bitö në adinäni inönäni inte onquiyængä mäincoo beyæ në towente quëwëongä ingante piincædänimpa. Piinique, Tömengä ingante æmæwo ömæ ëwengæimpa, ante cæcädänimpa. Tömengä mäincoo tömancoo ö ænäni ate ömaacä inte wæyongante tömengä baö cæningue tömengä ingante æmæwo iya tancädänimpa. ¹⁷ Wængongui,

Botö angai bai linque baganca tömënäni botö pönëno ante cæcædänimpa, ante godö cæcä beyænque mäninäni awënë odeyeidi nani mimönë adodö ante pönënanipa. Pönëninque tömënäni godongämæ Ao äninque, Mönö guifñenongä aacæcäimpa, ante tömengä ingante, Mönö tæi piñænö ante godömö ænguingä, ante godönäni ængantapa.

¹⁸ “Mäningä onquiyængä bitö adingä bai Babidönia nani waëmö quëwëñömö adobaï impa. Mäninömö awënëidi inömö tömämæ awënë odeyeidi inänite në aadäni inänipa,” ante Wængongui anquedo apænecantapa.

18

Babidönia nani quëwëñömö do wo ëwente batimpa

¹ Ayæ ate Wængongui anquedo wacä inte öönædë inö wææ pongä atabopa. Tömengä tæi piñængä inte nanguï angä ingä inte nämä nänö ñäö apäite ëmönö inte inguipoga inömö ñäö apäicä atabopa. ² Tömengä nänö tedepämo inte iimä yedæ aa pedinque,

“Babidönia nani äñömö do wo ëwente batimpa. Babidönia nani waëmö quëwëñömö i incæte do wo ëwente ba aedäni.

Badinque wënæidi nani owoyömö batimpa.

Wënæidi wentamö ewocadäni tömänäni mäninömö tee mönincönë bai quëwëñänipa.

Ayamöidi baacäidi tömänäni adobaï mäninömö wææ cæte bai owodänipa.

³ Wabæca nani quëwencabo wabæca nani quëwencabo incæ tömänäni

babidöniaidi wiwa nani towëinënö beyæ

tömënäni biinömæ bete quidi quidi dowænte bai wædänipa.

Inguipoga awënë odeyeidi incæ babidöniaidi tönö towëñänipa.

Babidönia inömö quëwëñäni namanque ante pönente tocæte ante mäincoo nanguï pönï ænte ëadäni beyænque

inguipoga në godonte ænäni inömö mäincoo nanguï pönï ëadäni badänipa,”

ante Wængongui anquedo aa pecantapa.

⁴ Ayæ öönædë inö wacä tedepämo tedecä ëñentabopa.

“Botö guidëmïni ëñëedäni. Minitö tömënäni weca quëwëmïni incæte,

Tömënäni tönö godongämæ wënæ wënæ cædämaï incëmönimpa, ante cædinque wadæ tao pödäni.

Ayæ, Wængongui tömënäni inänite päninque mönitö imönite pänämaï incæcäimpa, ante pönente wædinque wodii winonte pödäni.

⁵ Tömënäni wënæ wënæ cædimämo inömö cabo ti gæte cönöninque bacoo pönï ongompä.

Incæte Wængongui mäninäni nani wiwa cædimämo cöwë pönente wæcampa.

⁶ Tömënäni nani pönöni bai minitö tömënäni inänite adobaï godoncæminimpa.

Tömënäni nani pönö cædinö beyæ minitö wæætë adopo godö cædinque mem-poga ganca godömenque godö cæmïni wæcædänimpa.

Ti nämæ godönäni bete bai wædänitawo. Minitö wæætë tömënäni owætadë ti nämæ adopopæ pe ñinænte wempo cædëninque,

mempoga pe ñinænte wempo cædente bai cædinque godömenque ti nämæ godöminï bete wæcædänimpa, angantapa.

⁷ Edæ tömënäni nämä incæ, Mönö ñænæmö imompä, ante pönente nanguï waëmö mäincoo ëate quëwëñäni inönänite

minitö wæætë, Tömënäni ægancadö waëmö quëwëñänï, ante adinque

tömënäni inänite adoganca piinte cæmïni nantate wædinque tömënäni wæwente quëwencædänimpa.

Mäninäni inömö, ‘Awënë odeye nänöogængä bai contate ongömpä. Edæ watapæ quëwëmö imompä.

Wīi owæmpoingā bai inōmō inte wæwēnāmai cōwē incæmōimpa, ante ōnōwēnenque pōnente ānewēnānīpa.

⁸ Mānōmāinō ante nē ānāni inte adoque itadē iñonte tōmēnāni nāni wæwēmāmo iñontobæ pō ate nanguī wæcædānīpa.

Māniōnæ tōmēnāni nāni wænguīmāmo nāni wæwenguīmāmo nāni gue ænenguīmāmo pō wæcædānīpa tōō.

Tōmēnāni onconcoo gonga bæcodocæimpa.

Edæ Wængonguī Awēnē iñōmō Babidōnia iñōmō quēwēnāni inānite nē apænte ante pangā iñōmō edæ tōmengā tōmāā cægāingā ingampa,” ante apæncantapa.

⁹ Inguipoga awēnē odeyeidi incæ Babidōnia quēwēnāni tōnō towēnāni inte tōmēnāni adobaī Babidōnia quēwēnāni tōnō nanguī waēmō māincoo godongāmæ ænte ēate quēwēnānīpa. Inique Babidōnia nāni quēwēñōmō gonga bæcododīnque tēemāncoo baca baca æi adīnque tōmēnāni wæwente Ca ca wæcædānīpa.

¹⁰ Babidōnia iñōmō quēwēnāni nanguī pōnī nāni wæwēnō adīnque awēnē odeyeidi ancaī guīñēnīnque, Mānīnāni tōnō godongāmæ wæwēnāmai incæmōnīpa, ante gomonga a ongōnīnque wæcædānīpa. “Babidōnia mīni waēmō quēwēñōmō nē quēwēmīni mīni wæquinque ingæimpa.

Māniñōmō quēwēmīni māincoo nanguī ēate inīmīni inte mīni wæquinque. Wēnæ wēnæ cæmīni iñōmīnite adoque ooda iñonte Babidōnia mīni quēwēñōmō do apænte pante wo ēwente batīpa.” ante wæcædānīpa.

¹¹ Inguipoga māincoo ænte mante nē godonte ænāni iñōmō, Edæ æcānō mōnō godonguēncoo godonte ænguīnaa. Nōwo dæ ā, ante wæwente Ca ca wæcædānīpa.

¹² Incoo iñōmō nāni godonguēncoo impa. Oodo tōnō padata, dica nāni nanguī godonte ænīncācoo tōnō pededamō nāni āmoncoo mæ ongoncoopa. Adobaī waēmōncoo nīno nāni ancoo tōnō awēnēidi waēmōncoo nāni mongæncōo ayæ teda nāni ancoo tōnō opatawæ incoo mæ ongoncoopa. Quīwæmē oguī wawænque ī mānīwæ mæ ongoncoopa. Edepante бага inte nāni badōnīncoo tōnō awænque nāni nanguī godonte ænīwæ inte nāni badōnīncoo mæ ongoncoopa. Yaēmenta bodonte nāni ānī inte nāni badōnīncoo tōnō iædo nāni ānī inte nāni badōnīncoo tōnō mānōmodo nāni anca inte nāni badōnīncoo iñōmō mānīncoo tōmāncoo mæ ongoncoopa, ante wæcædānīpa.

¹³ Cāneda nāni antapo tōnō oguī waa ōni pæcaquī, oguī waquī nāni iya tāimō tōnō tī nā ōni pæquī ayæ oguī wapæ ōni pæquīmæ, biñōmæ tōnō oguīnquīpæ, waēmō ædīna tōnō todīgōmō mānīncoo mæ ongoncoopa. Cæningāidi tōnō obegaidi cabayoidi tōnō cabayo inte nā cæte nāni wēā godō awotocoo mæ ongoncoopa. Mānīncoo tōmāncoo mæ ongoncoopa, ante wæcædānīpa. Ayæ adobaī, Waodāni incæ nē cæte quēwēncædānīpa, ante cæningāidi bai godonguēnēmō intamōmāpa, ante wæcædānīpa.

¹⁴ Mānīnāni Babidōnia quēwēnāni inānite iīmai ancædānīpa. “Quīncāmē ante beīnente wæmīni incæ mānīnca tōmanca mīnitō weca nōwo dæ ancapa.

Mīni ēadīncoo tōnō quīnō waēmō mīni māincoo iñōmō mānīncoo tōmāncoo nōwo dæ ā inīnque mīnitō

ōmæpomīni inte cōwē wæætē ænāmai incæmīnīpa,” ante ancædānīpa.

¹⁵ Tōmēnāni māniñōmō quēwēnāni inānite mānīncoo nāni godōnīncoo beyæ nē ænīnāni inte nē nanguī ēadīnāni incæ Babidōnia iñōmō quēwēnāni nāni wæwēnō adīnque, Mānīnāni tōnō godongāmæ wæwēnāmai incæmōnīpa, ante gomonga a ongōnīnque ancaī guīñēncædānīpa. Ayæ wæwente Ca ca wæcædānīpa.

¹⁶ Ayæ iīmai yedæ ancædānīpa. “Babidōnia mīni waēmō quēwēñōmō nē quēwēmīni incæ mīni wæquinque ingæimpa.

Edæ māniñōmō quēwēmīni tōmēmīni weocoo waēmoncoo nīno nāni ancoo tōnō

awēñēidi waēmoncoo nāni mongæncoo tōnō opatawæncoo mānincooque mongæmīni imīnitapa.

Mīnitō, Mōnō waēmō incæmōimpa, ante oodo inte badōincoo tōnō dicamō nāni nanguī godonte ænincoo tōnō pededamō nāni āmō māniimoncoo mongæmīni imīnitapa.

¹⁷ Incæte adoque ooda iñonte mānincoo mīni ēadincoo incæ edæ æmæwo ōmæ ēwente batimpa, ante nē ænte godōnāni edæ wæcædānimpa,” ante angantapa.

Æpæntibædo wipocoo nē tōō tōō cædōnāni tōnō, Wipodē nē godāni, wipodē nē cædōnāni tōnō, Wipo inte māincoo godonte ængæimpa, ante nē māō godāni tōmānāni māniñāni gomonga a ongoncædānimpa. ¹⁸ Babidōnia nāni quēwēñōmō gonga bæcododinqe tēemancoo baca baca æi adinqe iīmaī yedæ ancædānimpa, “Iī Babidōnia nāni waēmō quēwēñōmō bai wayōmō nāni waēmō quēwēñōmō edæ dæ ampa, ante wæcædānimpa,” ante angantapa. ¹⁹ Nē wæwēnāni inte nāni cæi bai onguipo guidimō ænte ocaboga wo ææntodonte wææ guicadinque Ca ca wædinque iīmaī yedæ ancædānimpa, “Babidōnia nāni waēmō quēwēñōmō nē quēwēnāni nāni wæquinque ingæimpa.

Māniñōmō æpæntibædo wipocoo nē ēadāni inte tōmēnāni nāni godōnincoo māniñōmō quēwēnāni inānite godonte æninque tōmānāni nanguī ēadāni badānitapa.

Ayæ adoque ooda iñonte Babidōnia nāni quēwēñōmō tōmāō æmæwo ōmæ ēwente batimpa, ante ancædānimpa,” angantapa.

²⁰ Māniñō ante ānāni ate, Tōmāmīni oōnædē iñōmō quēwēmīni māniñōmō wo ēwente i adinqe watapæ tocæmīnimpa.

Wængonguī quimīni adobai

Itota nānō nē da godongaīmīni tōnō

Wængonguī beyæ nē apænemīni tōnō

mīnitō tōmāmīni māniñōmō wo ēwente i adinqe watapæ tocæmīnimpa.

Edæ, Mīnitō imīnite æbānō wēnæ wēnæ cædāni, ante adinqe

Wængonguī tōmēnāni nāni quēwēñōmō quēwēnāni inānite apænte āninque pangā ate tocæmīnimpa, ante angantapa.

²¹ Ayæ Wængonguī anquedo nē tæi ēmōngā iñōmō dicabo nāni mō mō equinca bai ñænængade dicabo æninque æpæntibæ cæncadēmæ wo guītodōninque iīmaī angantapa.

“Māninca æpæntibæ cæncadēmæ tæi wo guītodōmo guī bai

Babidōnia nāni waēmō quēwēñōmō

wo ēwente dæ ba ate cōwē adāmaī incædānimpa.

²² Iīnque, Adapate nāni ampongainō incæ āmotamīni nāni angainō incæ

ōōña bai nāni we we ōngainō incæ todompeta nāni ancadeca nāni we we ōngainō incæ māniñōmō cōwē ēñēnāmaī ingæimpa.

Quiēmē badōnāni incæ nē badōngaināni māniñōmō cōwē dæ ancædānimpa.

Tōmēnāni nāni dicabo mō mō equinca inte cæyōnāni dicabo dadi dadi cæyedē ā bai māniñōmō cōwē wīl ēñēngūnānidō anguēnē.

²³ Do nāni ti wodōnoincade māniñōmō cōwē tica ēñēnāmaī ingæimpa.

Onquiyængā ingante nē mōnguingā māniñōmō cōwē dæ ā mōnāmaī ingūnānidō anguēnē.

Māniñōmō māincoo ænte mante nē godonte ænāni iñōmō inguipoga ñænænāni inte ongongadānimpa.

Ayæ idöidi yewænte bai cædinque mänifñömö quëwënäni, Waëmö maincoo, ante wapiticæ änewënäni beyænque wabæca nänäi quëwencabo wabæca nänäi quëwencabo incæ tömänäni nänäi quëwencabo oda cæte gogadänimpa,” angantapa.

²⁴ Wængongui beyæ nè apænegaïnäni inänite wænöninque mänifñömö quëwënäni incæ Wængongui quinäni inänite godömenque wænönäni wængadänimpa. Edæ inguipoga wænönäni nè wængaïnäni tömänäni mänifñömö wænönäni wænte bai ingadänimpa.

19

¹ Babidönia wo ewente ba ate öönædë ifñömö woadäni tæiyænäni adotedæ ogæ tededäni bai ëñentabopa.

“Mönö Awënë ingante watapæ apænecæimpa, ante, Adedoya, äninque, Mönö Wængongui mönö imonte, Quëwencæminimpa, ante nè Ængä inongä ingampa.

Tömengä ñäö emongä inongä ingampa. Ayæ tömengä tæi piñængä inongä ingampa.

² Edæ, Wængongui, Iimaï pancæboimpa, ante nänö apænte angainö bai cædinque tömengä cöwë nö cæte waa pangampa.

Babidönia ifñömö onquiyængä maincoo beyæ nè towente quëwëngä bai impa. Mänifñömö quëwënäni nè wïwa cædäni beyænque inguipoga quëwënäni wæætë nè wïwa cædäni badäni adinque Wængongui mänifñömö quëwënäni inänite apænte ante pangantapa.

Wængongui ingante nè cædinäni inänite adodäni wænönäni adinque tömengä wæætë tömënäni inänite wænongä wænänitapa,” ante änänitapa.

³ Ayæ wæætë ogæ tedinque,

“Adedoya,” änänipa.

“Mänifñömö tæemancoo cöwë baca baca æicöompa,” ante änänitapa.

⁴ Mänifñedë Wængongui nänö tæ contaimpaa tæ contayongante nè aadäni nè Picænäni bænticoatodo ganca inäni tönö münnäni quëwënäni mënaa go mënaa inäni ifñömö ædæ wææninque, Bitö Wængongui Awënë imidö anguënë, äninque “Amëë, Adedoya,” ante aa pedänitapa. ⁵ Wængongui nänö tæ contaimpa inö tedepämo Iimaï tedinque,

“Wængongui ingante nè cæmïni inte

tömengä ingante nè guiñente ëñente cæmïni ifñömö

nè awënëidi imïni incæ önöminique incæ mïnitö tömämïni,

Mönö Wængongui ingante watapæ apænecæimpa, ante apænëedäni,” angantapa.

Wængongui Codotedo monguingä æcæmæ

⁶ Ayæ adobai woadäni tæiyænäni adotedæ ogæ tededäni bai ëñentabopa.

Ñænæ tēnabä ba detæbo eyequei tē bai ëñentabopa.

“Adedoya,

Mönö Wængongui Awënë Tömää nè Cægäimi inte

bitö nè Awënë badinque aabipa.

⁷ Mönö watapæ pönï entawëninque waa tocæimpa.

Edæ tömengä ingante apænëdinque mönö, Bitö ñäö emömi imipa, ante angæimpa.

Edæ Wængongui Codotedo nänö monguinö oo bacæ cæpa cæmïni.

Onquiyængä tömengä ingante monguingä ifñömö, Botö nänöogængä inguingä oo poncæcäimpa, ante nämä incæ eyepæ cæte a ongongampa.

8 Tōmengā ingante weocoo nīno nāni ancoo waēmō nāāmēntacoo nānō wēñāquincoo, ante pōnōnāni ængā ingampa. Wængonguī quīnāni nāni nō cægaincoo incæ nīno nāni ancoo waēmō nāāmēntacoo bai impa.”

9 Ayæ Wængonguī anquedo botō īmote angantapa. “Īmaī ante yewæmōe. ‘Wængonguī Codotedo monguingā ææmæ pō becædānimpā, ante wente ængā nē ponguīnāni nāni toquinque.’” Tōmengā ayæ godōmenque ānīnque, “Mānīnō Wængonguī nānō nō angainō impa,” ante angantapa.

10 Ante āñongā botō tōmengā ōnōwa inō ædæ wææninque tōmengā ingante watapæ apæneceate ante cæyōmote tōmengā wæætē, “Mānōmaī cædāmaī īmāwe, angantapa. Botō ōnonque bitō bai Wængonguī ingante nē cæbo īmopa. Edæ bitō tōnīñadāni Itota nānō apænegainō nē ēñente cædāni bai botō adobai Wængonguī ingante nē cæbo īmopa cæbii. Edæ Wængonguinque ingante ædæ wææninque, Bitō Wængonguī Awēnē īmidō anguēnē, ante apænee,” ante angantapa.

Itota godō odōmongā beyænque Wængonguī beyæ nē apænedāni īñōmō tōmengā nānō apænegainō ante ēwocadinque apænedānīpa.

Nāāmēnta cabayoga nē tæ contacā mongænte pongampa

11 Botō ayæ ayōmote ōönædē wi ænete bai bayō cabayo nāāmēnta ēñacā a ongongā atabopa. Cabayo nē tæ contacā mongænte pongā īñongante, Tōmengā cōwē pōnēninque nē Ædæmō Cædongā inte, Nāwangā impa, ante nē Apænegaingā ingampa, ante pemonte ingampa. Wēnæ wēnæ cædāni īnānite tōmengā nō apænte ante pānongā ingampa. Ayæ guēadō guēa cædinque tōmengā nē nō cædongā ingampa. 12 Tōmengā awīnca gonga bæcodote bai ēmongā inte tōmengā ocaboga pogantacoo encacā ingampa. Tōmengā ēmōwo yewæmōnte īi incæte māniwo tōmenganque nānō ēñēwo impa. Wadāni ædō cæte ēñēnguīnānīi. 13 Tōmengā weocoo yacoo wepænē guipænente mongængampa. Tōmengā ēmōwo īñōmō, Wængonguī nānō Angainō, ante pemonte ingampa.

14 Ōönædē īñōmō tontadoidi tōmengā miñæ tee empote godānīpa. Tōmēnāni nīno nāni ancoo waēmō nāāmēntacoo mongæninque cabayoidi nāāmēnta ēñadāni yabæ tæ contate mongænte godānīpa. 15 Cabayoga nē tæ contacā īñōmō wabæca nāni quēwencabo wabæca nāni quēwencabo incæ waodāni īnānite yaēmenca pancæte ante ānīnque tōmengā ōnōnē inō yaēmē tipængaa waingamē engamē ēnedinque yaedæ tadete ongongantapa. Tōmengā īñōmō nē tæiyæ awēnē tōmengā nempo quēwēnāni īnānite aacā bai adobai tōmāmæ quēwēnāni īnānite, Īmaī cædāni, ante aacæcāimpā. Yowepæ ante yowecoo nāni pīnā pīnā gāwate cæincadedē pīnā pīnā gāwate bai cædinque cabayoga nē tæ contacā Wængonguī ænguī nānō angainō beyænque īñōmō tōmēnāni īnānite pīinte pancæcāimpā. Wængonguī adocanque Tōmāā nē Cægaingā ingampa. 16 Cabayoga nē tæ contacā īñōmō weocoo yacoo adobai tōmengā ōnontīya īi ēmōwo yewæmōnte ēñacampa. “Ayæ waodāni awēnē odeyeidi īñōnānite tōmengā Tæiyæ Awēnē Odeye inongā ingampa. Tōmengā īñōmō awēnēidi tōmānāni Awēnē inongā ingampa,” ante pemonte ingampa.

17 Ayæ wacā Wængonguī anquedo nænque cæncadēmō inō a ongongā atabopa. Tōmengā ōönædē gāmæñō nē cæwodāni tōmānāni īnānite yedæ ante aa pedinque, “Adoyōmō godongāmæ pōedāni. Edæ Wængonguī tæiyæ ææmæ ante pō cædāni. 18 Awēnē odeyeidi incæ tontado capitāōidi incæ onguīñænāni tæī pīñænāni incæ cabayoidi incæ cabayocooga inte nē tæ

contate godāni incæ iināni tōmānāni wænāni ate tōmēnāni baō cæncaete ante pōedāni. Waodāni awēnē beyænque nē cæte quēwēnāni incæ nē nāmā cæte quēwēnāni incæ awēnēidi incæ ōnōnānique incæ tōmānāni baō pō cæedāni,” ante aa pecantapa.

¹⁹ Ayæ botō ayōmō mōnō guiñēnongā tōnō inguipoga awēnē odeyēidi tōnō tōmēnāni tontadoidi tōnō adoyōmō godongāmæ pōningue, Cabayoga nē tæ contacā ingante ayæ tōmengā tontadoidi inānite mōnō guēadō guēa cæcæimpa, ante cædāni atabopa. ²⁰ Incæte guēadō guēa cæyōnānite tōmēnāni nāēmæ mōnō guiñēnongā ingante bæi ongōningue, Wængongui beyæ nē apænebo, ante nē babæ āningā ingante adobaī bæi ongōnānitapa. Nē babæ ānongā iñōmō mōnō guiñēnongā beyænque mā pōni cæcā inongāimpa. Īnque mōnō guiñēnongā tōmengā nānō yewæmōi nē yewæmōināni iñōmō tōmengā nānō ēmōnō baī nāni badōninca gāānē ædæ wææningue nē apænedāni inte tōmēnāni nē babæ ānongā nānō mā cædō adinque guiñēnte wædinque oda cædōnānīpa. Īnque mōnō guiñēnongā tōnō nē babæ ānongā ayæ mīina quēwēñōnate atopode nāni ānontibæ gonga baī nāni bæcodotibæ cæncadēmæ wido cædānitapa. ²¹ Tōmēna mīñæ pōnāni inānite guiquēnē cabayoga nē tæ contacā tōmengā ōnōnē inō yaēmenca yædæ tadete ongōningue do wænongā wænānitapa. Īnque nē cæwodāni baō ade cænānique tōmānāni nē wænīnāni baō tōmo pōni cæwēnōnāni inānitapa.

20

Mīido wadepo iñōnte æbānō baquī

¹ Wængongui anquedo wacā iñōmō tadōmengadænguipo ontatodemō wi ænequi tōnō ñānōmencaīmē ñæñæmē ōnōnempo næængā inte ōnædē inō ta wæængā atabopa. ² Ta wææningue tōmengā dadagōō ingante bæi ongōningue tōmengā nānō mīido wadepo ganca ñā cæyænte ongonguingue ante ñā cæyængantapa. Māningā dadagōō wēēnēñedē tæntæ nē ingaingā inte wænæ awēnē Tatāna ingacāimpa. ³ Māningā ingante ñā cæyæningue tadōmengadænguipodē wido cædinque ontatodemō wi ænequi inte tee mōnedinque tōmengā dæca ontatodemō ædæmō tee moncāntapa. Waodāni wabæca nāni quēwencabo ayæ wabæca nāni quēwencabo iñōnānite tōmengā, Oda cæte gocædānimpa, ante mīido wadepo ganca cædāmaī incæcāimpa, ante Wængongui anquedo dadagōō ingante wido cæcantapa. Mānimpodepo ĩnque ba ate tōmengā ingante, Wantæ iñō ñimpo cæte goquingā, ante ñimpo cæcā gocæcāimpa.

⁴ Ayæ awēnēidi tæ containpacoo botō atabopa. Wængongui Awēnē godō angā beyænque awēnēidi badinque apænte ante nē ānāni badīnāni inte mānimpaa tæ contadāni inānitapa. Ayæ Itota ingante ante apænedinque Wængongui nānō angaiñō ante apænedāni beyænque tōmēnāni inānite wangō tamencadāni wængadānimpa. Wangō tamencadāni wængaiñāni nāni ōñowocaidi botō ñōwo atabopa. Mānīnāni iñōmō mōnō guiñēnongā ayæ pōningā ingante adinque, Bitō Wængongui Awēnē baī imidō anguēnē, ante apænedāmaī inte ayæ tōmengā nānō ēmōnō baī nāni badōninca gāānē ædæ wæænte apænedāmaī ingadānimpa. Ayæ tōmēnāni nāni ōnōnemō inō nāni ōnopmo inō mōnō guiñēnongā ayæ pōningā nānō yewæmōi yewæmōnāmaī ingadānimpa. Adodāni ñāni ōmæmōningue adoque mīido wadepo ganca Itota Codito tōnō godongāmæ aadānitapa.

⁵ Mānīnāni tāno ñāni ōmæmōnāni incæte wadāni guiquēnē nē wængaiñāni incæ mīido wadepo ĩnque go ate ñāni ōmæmoncædānimpa. ⁶ Tāno ñāni

ōmæmōnāni iñōmō nē tæiyæ waēmō ināni inte nāni toquinque. Edæ wadāni nē wængaināni mempoga ganca nāni wænguimāmo iñonte mānināni iñōmō wænāmai incædānimpa. Wæætē, Wængonguī qui, ante nē godōnāni bai tōmēnāni adobai, Wængonguī beyæ, ante ayæ, Itota Codito beyæ, ante cæcædānimpa. Ayæ mīdo wadepo iñonte Itota Codito tōnō godongāmæ aacædānimpa.

Tatāna nānō cēmæwo ōmæ ēwenguinō ante

7 Tadōmengadænguipodē tōmengā nānō tee mōnecōnē nā cæyænte quēwēnōngā iñongante Tatāna ingante mīdo wadepo iñque go ate nī cæyænāni ta gocæcāimpa. 8 Ta godinque tōmengā inguipoga æmatæ go æmatæ go godinque Gogobæ nāni āmæ ganca go Māogobæ nāni āmæ ganca gocæcāimpa. Inguipoga tōmāo godinque tōmengā, Wabæca nāni quēwencabo ayæ wabæca nāni quēwencabo nāni oda cæte goquimāmo ante cædinque tōmēnāni inānite, Mōnō guēadō guēa cæquinque gocæimpa, ante, Adoyōmō godongāmæ pōedāni, ante ancæcāimpa. Æpodānidō ināni, ante tōmēnāni æpæ wedeca ēmōnai bai tæiyænāni inguīnānidō anguēnē.

9 Mānināni bogænæ tōmāo godāni bai tōmēnāni adobai inguipoga tōmāo gocædānimpa. Wængonguī nānō waadete quēwēñōmō tōmengā quīnāni quēwēñōmō godāmæ gocædānimpa. Goyōnāni ōōnædē inō gonga bæcodote gao wææñōnte gonte wæncædānimpa. 10 Ayæ wēnæ tōmēnāni inānite, Oda cæte gocædānimpa, ante nē cægaingā ingante Wængonguī bæi ongote atopode nāni ānontibæ gonga bai nāni bæcodotibæ cæncadēmæ wido cæcæcāimpa. Edæ mōnō guīñēnōngā tōnō, Wængonguī beyæ nē apænebo, ante nē babæ āningā tōnō tōmēna dobæ māniñōmō wido cæte ingadainpa. Iñique mānināni itædē woyowotæ māniñōmō quēwente cōwē wantæpiyæ nāni wænguimāmo ingæimpa.

Wængonguī Awēnē tæ containpa nāāmæntapa

11 Ayæ awēnē tæ containpa nāænæmpa nāāmæntapa adinque botō mēnimpaa nē tæ contacā ingā adobai atabopa. Inguipoga tōnō ōōnæ iñōmō tōmengā ingante ate bai cædinque wodiū godinque nāna ongōñōmō edæ ædōmē gote dæ ānimpa.

12 Ayæ nē wængaināni tōmānāni awēnēidi incæ ōnōnānique incæ mānimpa gāānē a ongōnāni atabopa. A ongōñōnāni mincayontacoo wataa wataa wi æmpote ongconcoo. Ayæ mincayonta wataa Wængonguī, Quēwenguinta, ante tōmengā yewæmongaintaa wi æmpote acantapa. Māniū mincayontacoo iñōmō, Nē wængaināni tōmānāni æbānō cægaināni ināni, ante Wængonguī mānintacoo nānō yewæmongainō ante wataa wataa tōmanta adinque nē wængaināni nāni cægāi ganca, ante tōmēnāni inānite adoganca apænte ante pangantapa. 13 Ayæ æpæntibæ cæncadēmæ do wængaināni wæætē ta pōnānitapa. Æmæwo wængaināni incæ ta pōnānitapa. Tōmēnāni nāni wænte ongōñōmō nē ongongaināni inte wadæ ta pōnānitapa. Ta pōnāni ate, Æbānō cægaināni ināni, ante adinque Wængonguī adocanque adocanque nānō cægāi ganca, ante tōmengā ingante adoganca apænte ante pangantapa.

14 Māniñedē ganca ayæ baganca wænāmai quēwencædānimpa, ante ayæ, Wængaināni nāni ongōñōmō adobai dæ bacæimpa, ante cædinque mōnō Awēnē wængaināni æmæwo nāni wængaimāmo tōnō nāni wænte ongōñōmō æpæntibæ gonga bai nāni bæcodotibæ cæncadēmæ wido cæcantapa. Mānintibæ mempoga ganca æmæwo nāni wænguimāmo bai impa. 15 Wængonguī, Quēwenguinta, ante nānō yewæmongaintaa adinque, Æcānō ēmōwo mānintaa

yewæmōnāmaī ī, ante adinque nē yewæmōnāmaī ingaināni īnānite mānintibæ cæncadēmæ wido cæcantapa.

21

Inguipoga mīnguipo oōncæ mīōncæ

¹ Ayæ oōncæ mīōncæ inguipoga mīnguipo atabopa. Edæ oōncæ picæōncæ inguipoga picænguipo dæ īnque batimpa. Ayæ æpæntibæ adobaī dæ ānimpā.

² Ayæ godōmenque botō ayōmote Wængonguī nānō tæiyæ waēmō quēwēñōmō mīī Eedotadēē nāni āñōmō oōncadē īnō ta wææ atabopa. Onquiyængā nē moncæ cæcā īñōmō, Botō nānōogængā inguingā waa acæcāimpā, ante waēmō weocoo nē mongængā bai īī quēwēñōmō adobaī waēmō pōni ēmō inte ta wææ atabopa.

³ Ayæ Awēnē tæ contaimpā īnō tedepāmo yedæ ä ēñentabopa. “Nōwo Wængonguī nānō owoquincō waodāni weca ongō īnque tōmengā tōmēnāni tōnō quēwenguingā ingampa. Tōmēnāni tōmengā guidēnāni bacædānimpā. Ayæ Wængonguī incæ, Botō tōmēmo mīnitō Wængonguīmo incæboimpā, ante tōmēnāni weca ongoncæcāimpā. ⁴ Tōmēnāni wēñapæ tamonte wædi tōmāmæ Wængonguī wadæ cæmoncæcāimpā. Māniñedē æmæwo mōnō wænīmāmo incæ mōnō wæwēnimāmo incæ Ca ca mōnō wædimāmo incæ nantate mōnō wædimāmo incæ tōmāā mānimāmo dæ angæimpā. Edæ wēēnēñedē īnimāmo incæ īnque batimpā,” angantapa.

⁵ Ayæ Awēnē tæ contaimpā nē tæ contacā īīmaī angantapa. “Tōmāā īnimāmo botō nōwo mīī cæcæboimpā,” angantapa. Ayæ, “Mānōmaīnō ante botō ānīnō edæ nō pōni īī īnque mānīnō ante wedē pōnengæimpā. Mānōmaī beyæ bitō īīmaī ante yewæmōe,” angantapa.

⁶ Ayæ tōmengā wæætē botō īmote īīmaī ānīnque, “Dobæ īnque batimpā. Botō Tānobo ingaīmo inte Tōmāmo inguīmo īmopa. Wēēnēñedē tōmāā nē Badongāimo inte tōmāā nē īnque Cæbo incæboimpā. Edæ nē gæwæñāni, Æpæ beīnēmōnīpa, ante nē ānāni īnānite botō æpæ tapæ quēwengūimæ ononque godōmo becædānimpā. ⁷ Tæī ēmonte nē gānā cædāni īnānite botō mānīncoo botō nē godonguīncoo godōmo æncædānimpā. Ayæ botō incæ tōmēnāni Wængonguīmo incæboimpā. Tōmēnāni wæætē botō wēñæñāni bacædānimpā. ⁸ Wæætē guīñente awædō, ante nē ānāni tōnō nē pōnēnāmaī īnāni guiquēnē, nē wīwa cædāni tōnō wacā ingante nē wænōnāni guiquēnē, nē towente quēwēnāni tōnō idōidi nē īnāni guiquēnē, Wængonguī impā, ante nāni badōnīnca gāānē ædæ wææñīnque nē apænedāni tōnō nē babæ ānāni tōmānāni guiquēnē, mānīnāni īñōnānite atopode nāni ānontibæ gonga bai nāni bæcodotibæ incæ tōmēnāni nāni wæcōñōmō bacæimpā. Māniī nāni wænguīmāmo īñōmō mempoga ganca nāni æmæwo wænguīmāmo impā,” angantapa.

Mīī Eedotadēē quēwēñōmō

⁹ Wængonguī anquedoidi onompo æmæmpoque go mēa ganca īnāni onompo æmæmpoque go mēa ganca owætacoo waodāni īnque nāni wæwengūimāmocoo eyede engate intacoo nē nææñāni īñōnānite adocangæ botō weca pōnīnque, “Pōe,” angantapa. “Wængonguī Codotedo nānōogængā nē baquingā nē monguingā īñongante botō bitō īmote odōmōmo acæbiimpā,” angantapa. ¹⁰ Ayæ Wængonguī Onōwoca incæ botō īmote bæi ongonte bai cæyongante botō wīimonte bai īīmaī atabopa. Wængonguī anquedo botō īmote ō ænte māo onquiyaboga tæcædæca pōni cōnongā ongonte ayōmo Wængonguī tæiyæ waēmō

nānō quēwēñōmō Eedotadēē nāni āñōmō ōōnādē inō ta wææñonte tōmengā botō īmote odōmongā atabopa.

11 Mānī quēwēñōmō Wængonguī ñāō ēmōngā baī apāitimpā. Ayæ dica aatapeca nāni anca ēmō baī awocawænta baī waēmōnca īnimpā. Waodāni nāni nanguī godonte ænīnca baī ñāō apāite baī Eedotadēē īnimpā. 12 Mānī quēwēñōmō godāmæ tæīmō wææ cædi æñōwæmō ongōnimpā. Ayæ wææ cædi odemoncoo īñōmō ōnōmpo tipæmpoga go mēnemōngā wææ cædinemō īnimpā. Ōnōmpo tipæmpoga go mēa ganca wææ cædinemō incæ wayōmō adodemonque Wængonguī anquedo adocanque a ongōñongā wayōmō adodemonque Wængonguī anquedo a ongōñongante anquedoidi ōnōmpo tipæmpoga go mēa ganca ongōñānitapā. Mānīnemō ōnōmpo tipæmpoga go mēnemōngā odemoncooga idægoidi nāni cabo tipæmpoga go mencabodāniya īñōñānite tōmēnāni ēmōwocoo yewæmōnte īnimpā. Wayōmō odemōngā adocaboque ēmōwo wayōmō odemōngā adocaboque ēmōwo yewæmōnte īnimpā. 13 Nænque tamōnō inō mēa go adoque odemō īnimpā. Nænque wæidō inō mēa go adoque odemō īnimpā. Betamonca inō mēa go adoque odemō īnimpā. Adobaī æmatæ inō mēa go adoque odemō īnimpā. 14 Mānī quēwēñōmō wænōmēnæca mænōnte wææ cæqui, ante nāni ñōñōnīncacoo īñōmō ōnōmpo tipæmpoga go mencaā īnimpā. Mānīncacoo ōnōmpo tipæmpoga go mencaā incæ Wængonguī Codotēdo nānō da godongāināni ōnōmpo tipæmpoga go mēnaā īnāni tōmēnāni ēmōwo incæ adocanque ēmōwo wacā adocanque ēmōwo wacā yewæmōnte ēñacāimpā.

15 Wængonguī anquedo botō īmote nē apæñedingā īñōmō tee manguimpā oodo īnte badōimpā nē næængā atabopa. Mānī quēwēñōmō tee mancæte ante mānī wææ cædinemoncoo adobaī tee mancæte ante mānī wææ cædi adobaī tee mancæte ante tōmengā tee manguimpā næængantapā. 16 Mānī quēwēñōmō æmatæ adoganca æmatæ adoganca mænōnte īnimpā. Doyæ inō betamonca inō adoganca īnimpā. Tōmengā mānī quēwēñōmō tee manguimpā īnte tee mante doyæ inō æñōwæmō inō doo mīdo dootiento quidōmetodo ganca īnimpā. Ayæ betamonca īñōmō adobaī doo mīdo dootiento quidōmetodo ganca ī atabopa. 17 Wængonguī anquedo waodāni nāni tee mānō baī tee mangā ayongā mānī quēwēñōmō wææ cædi tæīnebo inō tetenta ī coatodo mēetodo ganca īnimpā.

18 Mānī wææ cædi aatapeca nāni ānonca īnte mænōni īmpā. Mānī quēwēñōmō guiquēnē oodo īnte awocawænta baī waēmō īnte mænōni īmpā. 19 Mānī quēwēñōmō wænōmēnæca mænōnte wææ cæqui, ante ñōñōnīncacoo īñōmō, Waēmō ēmongæīmpā, ante tōmēnāni quīncacoo nāni nanguī godonte ænīncacoo ænte māmō ñōñōnīncacooga bewodō bewodō cædānitapā. Tānoca ñōñōnīnca aatapeca nāni anca īnimpā.

Wacā ñōñōnīnca guiquēnē tapīdoca nāni anca īnimpā.

Wacā ñōñōnīnca guiquēnē aagataca nāni anca īnimpā.

Wacā ñōñōnīnca guiquēnē etēmēnaotaca nāni anca īnimpā.

20 Wacā ñōñōnīnca guiquēnē oōnīnteca nāni anca īnimpā.

Wacā ñōñōnīnca guiquēnē codōnadīnaca nāni anca īnimpā.

Wacā ñōñōnīnca guiquēnē codītōodītoca nāni anca īnimpā.

Wacā ñōñōnīnca guiquēnē bedīdoca nāni anca īnimpā.

Wacā ñōñōnīnca guiquēnē topatīoca nāni anca īnimpā.

Wacā ñōñōnīnca guiquēnē codītōpatadaca nāni anca īnimpā.

Wacā ñōñōnīnca guiquēnē aatītōca nāni anca īnimpā.

Wacā tōmanca guiquēnē āmatītaca nāni anca īnimpā.

Mānīmpoca īnimpā.

²¹ Mänii wææ cæðinemö iñömö önompo tipæmpoga go mënemonga iñömö pededamö nani ämö önompo tipæmpoga go mëmonga inte mænonte iñimpa. Wææ cæðinemö incæ wææ cæðinemö incæ pededamö adomonque adomonque inte mænöninömö iñimpa. Mänii quëwëñömö taadö ñænænö godö oodo inte mænöwate taadö awocawænta bai waëmö iñimpa.

²² Mönö Wængongui Awënë adocunque Tömää nè Cægaingä tönö Wængongui Codotedo tönö mäniiñömö cöwë ongöna iñinque godongämæ quëwënäni guiquënë, Mönö Wængongui oncönë guicæimpa, ante quinante anguinäni. Edæ Wængongui tæiyæ waëmö oncö mäniiñömö dæ ä atabopa. ²³ Wængongui nè ñäö bai ëmönongä inte ñäö apäiquingä bai iñongäimpa. Ayæ Wængongui Codotedo iñömö nani ti wodönoincade bai i iñinque mänii quëwëñömö iñömö nænque incæ apäicä incæ quinante godömenque ñäö apäiquii. ²⁴ Wabæca nani quëwencabo ayæ wabæca nani quëwencabo inänite Wængongui ængä beyænque nè quëwënäni inte mäninäni que mänii ñäö apäiyömö cægoncæðänimpa. Adobai inguipoga awënë odeyeidi waëmoncoo nani éadincoo mäniiñömö ænte poncæðänimpa.

²⁵ Mänii quëwëñömö woyowotæ inämai ingæimpa. Iñinque mäniiñömö wææ cæðinemoncoo iimö iñö iimö iñö iñonte cöwë tee mönedämai ingæimpa. ²⁶ Wabæca nani quëwencabo ayæ wabæca nani quëwencabo incæ tömënäni waëmoncoo nani éadincoo mäniiñömö ænte poncæðänimpa. Mänii quëwëñömö waa quëwëñömö impa, ante waa ate apænecæðänimpa. ²⁷ Quiëmë wënæ wënæ i mäniiñömö cöwë guidämai ingæimpa. Nè wiwa cæðäni incæ nè babæ änäni incæ mänii quëwëñömö guidämai inguinänidö angüënë. Wæætë Wængongui Codotedo, Quëwenguintaa, ante nänö yewæmointaa nè yewæmönäni guiquënë tömënäni que guicæðänimpa.

22

¹ Ayæ Wængongui anquedo botö imote önö quëwenguiämæ odömongä atabopa. Mänimæ awocawænta bai waëmömæ impa. Wængongui tönö Wængongui Codotedo nana aacæ tæ containpa inö tapæmpa. ² Mäniiñömö tadinque mänii quëwëñömö taadö ñænænö godö tæcæguedë inö ta gopæmpa. Mäninö æmæ wedeca incæ imæ wedeca incæ awæ quëwenguiwæ pæwæ atabopa. Mäniwæ iñömö tömenca wacä apäicä iñonte wacä apäicä iñonte incapa. Iñinque adoque wadepo iñedë önompo tipæmpoga go mäa ganca mänimpoga mäniwæ incayedë impa. Wabæca nani quëwencabo ayæ wabæca nani quëwencabo incæ mänimæca quëwënäni tömänäni mäniwæ öñabocoo beyæ gancæ bacæðänimpa, ante ëñabocoo. ³ Wængongui pante nänö angainö beyænque quincoomë wënæ wënæ bagatüi mäninö mäniñedë dæ angæimpa. Wængongui tönö Wængongui Codotedo nana aacæ tæ containpa mänii quëwëñömö mæ ongoncæpaimpa. Tömengä ingante nè cæðönäni iñömö tömengä ingante watapæ apænedingue tömengä ingante cæcæðänimpa. ⁴ Tömengä awinca acæðänimpa. Ayæ tömengä ëmöwo tömënäni öñönemö inö yewæmonte incæðänimpa. ⁵ Mäniiñömö woyowotæ inämai ingæimpa. Edæ mäniiñömö quëwënäni beyæ Wængongui Awënë nè ñäö ëmönongä inte apäiquingä iñongampa. Iñinque nænque ñäö apäidö incæ ti wodönoincade ënëno incæ quinante ayæ apäiquii. Ayæ mäniiñömö quëwënäni adodäni cöwë wantæpiyæ aacæðänimpa.

Itota Codito oo poncæcäimpa

⁶ Ayæ Wængongui anquedo botö imote apænedingue, “Mäninö bitö ëñëno nö pönii i iñinque mäninö ante wede pönengæimpa. Wængongui beyæ nè

apænedōnāni tōmengā Ōnōwoca ingante ēwocadinque apænedānīpa. Tōmēnāni nāni nē ēwocadongā Wængonguī Awēnē iñōmō tōmengā anquedo ingante apænedinque, Bitō botō īmote nē cædōnāni weca godinque, Æbānō oo pōnī baquīmpa, ante odōmōmi acædānīmpa, ante da pōnongā pongantapa,” ante botō īmote apænecantapa.

7 Itota Codito, “Aedāni. Botō oo ocæ ēmænte ponguīmo īmopa. Ī mincayontaa Wængonguī beyæ apænedinque nāni yewæmōnte angainō ante nē ēñente cædāni iñōmō nāni toquinque,” ante apænecantapa.

8 Botō Wāōmo iñōmo īmopa. Mānīnō Wængonguī anquedo nānō ānīnō ante nē ēñēnīmo inte botō mānīi tōmengā nānō odōmōnīnō ante nē adīmo iñōmo īmopa. Wængonguī anquedo angā ēñēnīnque ayæ odōmongā adinque botō nē odōmōnīgā ōnōwa iñō ædæ wæænte tōmengā ingante watapæ apænecæte ante cætabopa. 9 Cæyōmote tōmengā wæætē, “Mānōmāi cædāmāi īmāwe, angantapa. Botō ōnonque bitō bai Wængonguī ingante nē cæbo īmopa. Ayæ bitō tōnīñadāni Wængonguī beyæ nē apænedōnāni tōnō Ī yewæmōintaa nāni angainō ante nē ēñente cædāni tōnō botō tōmēnāni bai adobai Wængonguī ingante nē cæbo īmopa cæbīi. Edæ Wængonguīnque ingante ædæ wææninque, Bitō Wængonguī Awēnē adobique īmidō anguēnē, ante apænee,” angantapa.

10 Wængonguī anquedo godōmenque botō īmote īmāi angantapa. “Edæ mānōmāi baquīōnæ oo pōnī ingæīmpa cæbīi. Ī yewæmōintaa Wængonguī beyæ apænedinque nāni angainō ante bitō wē wodōnāmāi inte do apænee.

11 Nē wēnæ wēnæ cædōnāni iñānite ee abi godōmenque wēnæ wēnæ cæcædānīmpa. Tōmēnāni nāni pōnēnō wentamō bai nē entawēnāni iñānite ee abi godōmenque nāni pōnēnō wentamō bai entawencædānīmpa. Nē nō cædāni iñānite ee abi godōmenque nō cæte quēwencædānīmpa. Nē tæiyæ wæmō entawēnāni iñānite ee abi godōmenque tæiyæ wæmō entawencædānīmpa.”

12 Itota Codito, “Aedāni. Botō oo ocæ ēmænte ponguīmo īmopa. Ocæ ēmænte pōnīnque botō tōmēmo godōmo nāni ænguīncoo, ante næænte ponguīmo īmopa. Tōmānāni æbānō cædānīi, ante adinque botō tōmēnāni nāni cægai ganca ante adoganca godōmo æncædānīmpa. 13 Botō Tānobo ingāimo inte Tōmāmo ingūimo īmopa. Tōmāā badōnāmāi īñedē botō Do Quēwengāimo īmopa. Ayæ tōmāā īinque bayedē incæ botō Ayæ Pōnī nē Quēwēmo incæboīmpa. Wēēñēdē tōmāā nē Badongāimo inte tōmāā nē Īinque Cæbo incæboīmpa.”

14 Weocoo yamonte bai mīmōnē nē mēnongate iñāni iñōmō tōmēnāni nāni toquinque edæ mānīi quēwēñōmō wææ cædīnemō iñōmō go guīquīnāni iñānīpa. Go guīdinque tōmēnāni quēwengūiwæ quēwengūinca bequīnāni iñānīpa. 15 Wiwa cædāni guīquēnē mānīi quēwēñōmō yabæque iñōmō ongōnte wæquīnāni iñānīpa. Idōidi nē iñāni, nē towente quēwēnāni, wacā ingante nē wæñōnāni yabæque ongōnānīpa. Wængonguī īmpa, ante nāni badōnīnca gāānē ædæ wææninque nē apænedāni, nē babæ ānāni tōnō, Babæ ānēmōnīpa, ante nē ānāni tōnō tōmēnāni tōmānāni mānīi quēwēñōmō yabæque iñōmō quēwengūnāni iñānīpa.

16 “Botō Itotabo ingāimo īmopa. Mānīnō botō angainō ante nō īmpa, ante botō īmote godongāmæ nāni pōnencabodāni tōmānāni iñānite apænecā ēñencædānīmpa, ante cædinque botō do botō anquedo ingante mīnitō weca da pōnōmo pongantapa. Botō docā Awēnē Dabīi nānō Wæmæncōo ingāimo inte adobai nānō Pæīmo iñōmo īmopa. Botō wadaamo bai nāo bayō apāimō bai īmopa.”

17 Wængonguī Tæiyæ Wæmō Ōnōwoca tōnō Wængonguī Codotēdo nānōogængā nāni ānongā, “Pōedāni,” ānapa. Āñōna tōmēnāni tōmēna īnate

nē ēñēnāni inte adobaī, “Pōedāni,” ancædānimpa, āmopa. Nē gæwænte ināni tōmānāni pō becædānimpa, āmopa. Nē beinēnāni iñōnānite, Minitō quēwenguimæ, ante ōnonque pōnonguimæ incæ pō ænte becæminimpa, ante āmopa.

¹⁸ Ìi yewæmōintaa Wængonguī beyæ nē apænedāni nāni angainō ante nē ēñēnāni tōmānāni inānite, Ee aedāni, botō wææ āmopa. Edæ mǎnīnō nāni angainō ante godōmenque wadō ānāni inānite Wængonguī pancæcāimpa. Ìi yewæmōintaa quīēmē nāni pante wæwenguincoo, ante yewæmonte adinque Wængonguī nē wadō ānāni inānite mǎnīncoo baī godōmenque pancæcāimpa. ¹⁹ Ayæ ìi yewæmōintaa Wængonguī beyæ nē apænedāni nāni angainō incæ pancadea æninque nē wēā godonte baī cædāni inānite Wængonguī quēwenguīwæ quēwenguīnca godōnāmaī incæcāimpa. Tōmengā adobaī, Botō tæiyæ waēmō quēwēñōmō mǎnīñōmō guīdāmaī incæminimpa, ante ancæcāimpa. Mǎnīi quēwenguīwæ ante mǎnīi quēwēñōmō ante ìi yewæmōintaa yewæmonte impa.

²⁰ Mǎnīnō ante, Nō impa, ante nē apænecā iñōmō tōmengā iñōmō, “Ao, botō oo ocæ ēmænte ponguīmo ìmopa,” angantapa. Āñongante botō,

Mǎnōmaī baquīnō anguēnē, ante, Amēē, āninque, Awēnē Itota pōe, āmopa.

²¹ Awēnē Itota Wængonguī nānō guīdēnāni inānite waadete godō cæcæcāimpa. Mǎnōmaī baquīnō anguēnē, ante botō, Amēē, ante mǎninque āmopa.